


Didza' cubi rucá'ana  
tsahui



New Testament in Zapotec, Rincón (MX:zar:Zapotec, Rincón)

# Didza' cubi rucá'ana tsahui' New Testament in Zapotec, Rincón (MX:zar:Zapotec, Rincón)

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

## Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files dated 29 Jan 2022  
58bf86df-ae22-508c-81dc-936dbf138c25

## Contents

San Mateo . . . . .	1
San Marcos . . . . .	63
San Lucas . . . . .	101
San Juan . . . . .	164
Hechos . . . . .	210
Romanos . . . . .	268
1 Corintios . . . . .	293
2 Corintios . . . . .	316
Gálatas . . . . .	331
Efesios . . . . .	340
Filipenses . . . . .	348
Colosenses . . . . .	354
1 Tesalonicenses . . . . .	360
2 Tesalonicenses . . . . .	365
1 Timoteo . . . . .	368
2 Timoteo . . . . .	375
Tito . . . . .	380
Filemón . . . . .	383
Hebreos . . . . .	385
Santiago . . . . .	403
1 Pedro . . . . .	409
2 Pedro . . . . .	416
1 Juan . . . . .	420
2 Juan . . . . .	426
3 Juan . . . . .	427
Judas . . . . .	428
Apocalipsis . . . . .	430
Salmos . . . . .	457

## DIDZA' DXI'A BUZÚAJĚ' MATEO

*Yugu' xuz xině'e gudödi queë' Jesús  
(Lc. 3:23-38)*

<sup>1</sup> Ni ruzúaja' lágaquië' xuz xině'e gudödi queë' Jesucristo. Nabábagaquië' David, enca' Abraham xuz gudödi queë'.

<sup>2</sup> Abraham gúquië' xuzë' Isaac.

Isaac gúquië' xuzë' Jacob.

Jacob gúquië' xúzgaquië' Judá, en yugu' bönni' böchě'ë.

<sup>3</sup> Judá gúquië' xúzgaquië' Fares, en Zara, ate' Tamar gúcanu xiná'agaquië'.

Fares gúquië' xuzë' Esrom.

Esrom gúquië' xuzë' Aram.

<sup>4</sup> Aram gúquië' xuzë' Aminadab.

Aminadab gúquië' xuzë' Naasón.

Naasón gúquië' xuzë' Salmón.

<sup>5</sup> Salmón gúquië' xuzë' Booz, ate' Rahab gúcanu xině'ë.

Booz gúquië' xuzë' Obed, ate' Rut gúcanu xině'ë.

Obed gúquië' xuzë' Isaí.

<sup>6</sup> Isaí gúquië' xuzë' David.

David na' gunná bé'eně' bönachi Israel, ate' butsaga ná'aleně'-nu nigula na' gúcanu zí'alö nigula queë' Urías, ate' David, en nigula ni guláquië' xuz xině'ë Salomón.

<sup>7</sup> Salomón gúquië' xuzë' Roboam.

Roboam gúquië' xuzë' Abías.

Abías gúquië' xuzë' Asa.

<sup>8</sup> Asa gúquië' xuzë' Josafat.

Josafat gúquië' xuzë' Joram.

Joram gúquië' xuzë' Uzías.

<sup>9</sup> Uzías gúquië' xuzë' Jotam.

Jotam gúquië' xuzë' Acaz.

Acaz gúquië' xuzë' Ezequías.

<sup>10</sup> Ezequías gúquië' xuzë' Manasés.

Manasés gúquië' xuzë' Amón.

Amón gúquië' xuzë' Josías.

<sup>11</sup> Josías gúquië' xúzgaquië' Jeconías, en yugu' bönni' böchě'ë.

Yugu' bönni' ni gula'cu'ë dza ni' cate' yugu' bönni' Babilonia gula'chě'ë bönachi Israel nadzúngaca lu xiyúgaquië'.

<sup>12</sup> Jeconías gúquië' xuzë' Salatiel.

Salatiel gúquië' xuzë' Zorobabel.

<sup>13</sup> Zorobabel gúquië' xuzë' Abiud.

Abiud gúquië' xuzë' Eliaquim.

Eliaquim gúquië' xuzë' Azor.

<sup>14</sup> Azor gúquië' xuzë' Sadoc.

Sadoc gúquië' xuzë' Aquim.

Aquim gúquië' xuzë' Eliud.

<sup>15</sup> Eliud gúquië' xuzë' Eleazar.

Eleazar gúquië' xuzë' Matán.

Matán gúquië' xuzë' Jacob.

16 Jacob gúquië' xuzë' José.

José ni gúquië' bönni' queënu María, ate' María ni gúcanu xinë'ë Jesús, lë' ca' Cristo, Bönni' na' tun löza bönachi judío guídë idinná bé'enë' légaquië'.

17 Caní naca, gulaca chidá' cö' di'a dza ga gusí lo zoë' Abraham ga bidxintë zoë' David, ate' gulaca ca' ia'chidá' cö' di'a dza ga gusí lo zoë' David ga bidxintë dza yugu' bönni' Babilonia gula'chë'ë bönachi Israel nadzúngaca, ate' gulaca ca' ia'chidá' cö' di'a dza ga gusí lo dza ni' gula'chë'ë léguequi ga bidxintë dza guljë' Cristo.

*Yugu' le guca cate' guljë' Jesucristo  
(Lc. 2:1-7)*

18 Caní guca cate' guljë' Jesucristo. Cate' ni' chinazí' lu ná'abi' María, xinë'ë Jesucristo utsaga ná'alenbi' José, en zí'atëlö cate' si' utsaga ná'alenë'-bi', en cabí ne sóalenë'-bi', guyú'ubi' tubi' bí'ido' lë'ëbi' María na'. Guca caní ni'a que yöl-la' huáca queë' Dios Bó' Lá'ayi. 19 Náquië' José na', bönni' queëbi' María, bönni' tsahui', pero biti' gú'unnë' uzéguië'-bi' didza' lógaca bönachi. Gú'unnë' ulá'alenë'-bi' bagáchi'sö. 20 Tsanni ni' rizá' ládxë'ë José ca na' gunë', buluí'i lahuë' gubáz lá'ayi queë' Xanru' lahuë' José lu yëla bëchigal, en gudxë' lë':

—José, zxi'ini zxi'sóë' David. Biti' gádxinu' si'u-bi' María, para gácabi' nigula quiu', tu' yú'ubi' bi'i bönni'do' lë'ëbi' ni'a que yöl-la' huáca queë' Dios Bó' Lá'ayi. 21 Gáljabi' tubi' bi'i bönni'do' queëbi', ate' gu'u labi' Jesús, tu' usölábi' bönachi queëbi' lu dul-la' nabága'gaca.

22 Caní guca yúgu'të lë' ni para gaca lë' na' gunné' Xanru' lu ru'ë bönni' bë'ë didza' uláz queë' Dios, gunné':

23 Buli'yútsöca', tu nigula ra'bando',  
tsú'ubi' bí'ido' lë'ëbi',  
ate' gáljabi' tubi' bi'i bönni'do',  
ate' ilu'ë labi' Emanuel.

Emanuel naca tu didza' hebreo le rnna: Len rë'u Dios.

24 Cate' bubanë' José lu yëla bëchigal, benë' ca na' gudxë' gubáz lá'ayi queë' Xanru' lë', ate' guzxi'ë-bi' María, ate' gúcabi' nigula queë'. 25 Biti' guzóalenë'-bi' cate' bidxinrö dza chigúlajbi' bi'i bönni'do' queëbi', bi'i zí'alö queëbi', ate' gulu'ë labi' Jesús.

## 2

*Bönni' ta'yéajni'inë' ridiyúgaquië' bí'ido' Jesús*

1 Cate' gúljabi' Jesús lu yödzö Belén, luyú Judea, rinná bë'ë Herodes luyú ni', ate' bila'dxinë' bönni' ta'yéajni'inë' Jerusalén, narúajgaquië' tu yödzö dë' saca' ga rilén gubidza. 2 Gula'nabë' bönni' ni, ta'nnë':

—¿Gazxi zóabi' bí'ido' na' ral-la' inná bé'ebi' bönachi judío, bí'ido' na' si' gúljabi'? Cate' ni' zóatu' ga rilén gubidza bilé'etu'-ba' böljaj beni' naca bë' chigúlajbi', ate' za'tu' ni para tseaj ládxi'tu'-bi'.

3 Cate' gúquibe'enë' Herodes, bönni' rinná bë'ë, lë' ni, gur'ödë' böniga, en lësca' caní gula'bö' böniga yúgu'të bönachi nacua' Jerusalén. 4 Ní'irö Herodes na' bulidzë' yúgu'të bixúz unná bë', len bönni' yudo' tu'sédinë', ate' gunábinë' légaquië' gazxi ral-la' galjë' Cristo, bönni' na' tunë' löza bönni' judío ilá' lahuë' para inná bé'enë' légaquië'. 5 Të' lë':

—Lu yödzö Belén luyú Judea. Caní naca tu' buzúajë' tu bönni' bë'ë didza' uláz queë' Dios le rnna caní:

6 Biti' nácarö cá'asö yödzö Belén luyú Judá lahuë' Dios

ca nácagaca yödzo gapa nacuá' nupa ta'nná bē' luyú ni, tu' irúajē' tu bōnni' yödzo Belén, en gáquiē' lo, bōnni' na' gun chi'ē bōnachi Israel quia'.

<sup>7</sup> Ní'irō Herodes bulidzē' bagáchi'sō bōnni' ta'yéajni'inē' na', en gunábinē' légaquiē' para inōzinē' dxi'a gáca'xte chiguca bulufi lahui bōlaj na' bila'lé'enē'. <sup>8</sup> Ní'irō gusōl-lē'ē légaquiē' tsójáquiē' Belén. Rē' légaquiē':

—Guli'tséaj ni', en guli'tsōjnaba dxi'a nacxi naca queēbi' bí'ido' na'. Cate' chibidzōlilil'-bi', ididí'xjōi'ili' neda', para tseja' ca' neda', tseaj ládxa'a-bi'.

<sup>9</sup> Gudōdi bila'yōnnē' didza' bē'ē Herodes na', sōjáquiē' bōnni' ta'yéajni'inē' na', ate' bōlaj na' bila'lé'enē' cate' ni' nacu'ē ládzagaquiē' sōjnōruba' lógaquiē' ga bidxintē yōjsóa ga na' dēbi' bí'ido' na'. <sup>10</sup> Cate' bila'lé'enē' bōlaj na', bulu'dzédjade'enē'. <sup>11</sup> Cate' gula'yáziē' yu'u, bila'lé'enē'-bi' bi'i bōnni'do' na', zóalenbi'-nu María, xiná'abi'. Bulu'zóa zxi'bígáquiē' lobi', en gula'yéaj ládxi'gáquiē'-bi'. Gudōdi na' gula'saljē' yugu' yōxaj quégaquiē', ate' bulu'nōdzjē' queēbi' oro, en yalaj, en nōrido' rilá' zxi'xi que yaga mirra. <sup>12</sup> Tu' chibuzéajni'inē' Dios légaquiē' lu yēla bēchigal para cabi' tsōjhuōjquiē' ga zoē' Herodes na', que lē ni na' yōjhuōjquiē' ládzagaquiē' nōza yúbōlō.

*José, en María, ta'chē'ē-bi' Jesús luyú Egipto*

<sup>13</sup> Gudōdi bulu'zē'ē yugu' bōnni' ta'yéajni'inē' ni', bulufi lahuē' tuē' gubáz lá'ayi queē' Xanru' lu yēla bēchigal, ga na' dē' José, en rē' lē':

—Guyaschi. Guchē'-bi' bí'ido' ni, enca' xiná'abi', ate' buzxunnaj ni. Guyéaj luyú Egipto, ate' ugá'anu' ni' cate' guiéra' li' ia'tú. Cani' gunu' tu' uguiljē' Herodes bí'ido' ni para gútiē'-bi'.

<sup>14</sup> Ní'irō guyasē' José, en ni' naca chi'i dzō'ōlō, guchē'ē-bi' bí'ido' na', enca' xiná'abi', ate' yōjáquiē' luyú Egipto. <sup>15</sup> Bulu'gá'anē' ni' cate' gútirē' Herodes. Cani' guca para gaca lē na' gunné' Xanru' Dios lu ru'ē tu bōnni' bē'ē didza' uláz queē', gunné': “Ga naca luyú Egipto bulidza' Zxi'ina'.”

*Risōl-lē'ē Herodes bōnni' ilútiē'-bi' bi'i huē'ēnido' nacuá'abi' yödzo Belén*

<sup>16</sup> Cate' gúquibe'enē' Herodes biti' gulunē' bōnni' ta'yéajni'inē' ca rnnē', gulenē', ate' gunná bé'enē' bōnni' tsójáquiē' ni' para ilútiē'-bi' yúgu'tēbi' bi'i bōnni'do' nacuá'abi' yödzo Belén, en idú gásibi'ilō ga dē Belén na', yugu' bí'ido' chiyú'ugacabi' chopa iz, en bí'ido' nahuē'ēngacarōbi'. Cani' benē' ca busáquiē' queē' Herodes na', tsa chiguca dza bulufi lahui bōlaj na', dza na' bulu'zéajni'inē' bōnni' ta'yéajni'inē' na' lē'. <sup>17</sup> Cani' guca, bidxín lē na' gunné' Jeremías, bōnni' bē'ē didza' uláz queē' Dios, gunné':

<sup>18</sup> Lu yödzo Ramá riyōn chí'igaca

nupa ta'bōdxi, en nupa ta'bōdxi yechi'.

Raquel ribōdxi nu ni'a quégacabi' zxi'ininu.

Biti' gaca nu huē' tsahui' lēnu, tu' chinátigacabi'.

<sup>19</sup> Gudōdi gútiē' Herodes na', ní'irō bulufi lahuē' gubáz lá'ayi na' queē' Xanru' lu yēla bēchigal lahuē' José ga ni' zoē' luyú Egipto, ate' rē' lē':

<sup>20</sup> —Guyasa. Guchē'-bi' bi'i bōnni'do' ni, enca' xiná'abi', ate' bōaj luyú Israel, tu' chigulátiē' bōnni' ni' gulē'ēnnē' ilútiē'-bi' bi'i bōnni'do' ni.

<sup>21</sup> Ní'irō guyasē' José, ate' guchē'ē-bi' bi'i bōnni'do' na', enca' xiná'abi', ate' yōhuōjquiē' luyú Israel. <sup>22</sup> Cate' gúquibe'enē' José rinná bē'ē Arquelao luyú Judea tu' chigútiē' Herodes, xuzē' Arquelao na', que lē ni na' gúdxinē'

José huöjé' ni'. Cate' buzéajni'iné' Dios lé' lu yëla bëchigal, guyijé' luyú Galilea. <sup>23</sup>Cate' bidxiné' ni', yöjsóé' lu yödzö Nazaret. Caní guca para gaca lé' na' gula'nné' yugu' bönni' gulu'é didza' uláz queé' Dios ca ral-la' gaca queé' Jesús, si' Lë', Bönni' Nazaret.

### 3

*Juan, bönni' ruquilé' bönachi nisa runé' libán lu lataj cá'asö*

(Mr. 1:1-8; Lc. 3:1-9, 15-17; Jn. 1:19-28)

<sup>1</sup>Yugu' lu dza ni' buluí' lahué' Juan, bönni' na' buquilé' bönachi nisa, en runé' libán lu lataj cá'asö luyú Judea. <sup>2</sup>Juan na' rnné':

—Buli'bí'í ládxi'li', tu' chizóa idxín dza idinná bë' Nu na' zoa yehua' yubá luyú ni.

<sup>3</sup>Ca naca queé' Juan na', buzúajé' Isaías, bönni' bë'é didza' uláz queé' Dios dza ni'té, le rnna cani:

Riyón chi'é bönni' rulidzé' lu lataj cá'asö, rnné':

“Buli'pá'a nöza para idxín Xanru' ga zóali'.

Guli'béaj li yugu' nöza lasi tödé' lu icja ládxi'do'oli'.”

<sup>4</sup>Nácué' zxé' Juan lari' néquini lítsa'ba' böa', ate' núgué'é lé'é le néquini guidi. Rahué'-ba' böchi'zu, en re'jé' bidxindo' que buzdo'. <sup>5</sup>Yugu' bönni' yödz Jerusalén len bönachi narúajgaca idú luyú Judea, en idú gásibi'ilö ga dë yegu Jordán bila'dxiné' ga zoé' Juan na'. <sup>6</sup>Cate' gula'xóalépé' dul-la' nabága'gaquié', Juan na' buquilé' légaquié' nisa lu yegu Jordán na'.

<sup>7</sup>Cate' bilé'ené' Juan ta'dxiné' zían bönni' yudo' fariseo len yugu' bönni' yudo' saduceo ga zoé' para ila'dilé' nisa, gudxé' légaquié':

—Libi'ili', di'a dza quegacaba' bëla sínia'. ¿Zoa nu buzéajni' libí'ili' para izxúnajli' yöl-la' rusiúdxí na' si' gaca quegaca bönachi? <sup>8</sup>Guli'gún le gaca bë' chibubí'í ládxi'li'. <sup>9</sup>Biti' cuéqui ícjalí', bití' innalí' nácalí' tsahui' tu' naca Abraham xuz gudödi queéli'. Rea' libí'ili', huáca guné' Dios ga ulu'huóaca yugu' guíöj naca' ni di'a dza queé' Abraham. <sup>10</sup>Chizóa riböza guíé huága para ichugu yugu' yaga le rulu'í ca gaca queéli'. Yúgu'té yaga bití' ta'bia le naca dxi'a, irúgugaca, ate' ila'gu'é léguequi lu guí'. <sup>11</sup>Le nácaté neda' ruquila' libí'ili' nisa lu nisa, nálöli' chibubí'í ládxi'li', pero Bönni' na' ral-la' guidé' cate' tödi quia' neda', Lë' guné' le rulu'isö yöl-la' ridila nisa ni, uchízié' libí'ili' Dios Bö' Lá'ayi len guí' queé'. Bönni' ni nácatéré' lo ca neda', ate' neda' bití' naca' lesaca' ilecja' xiráchué' nudé'é. <sup>12</sup>Zöné' lu në'é böcö' queé', le ulúbiné' ga ridxi'a zxoá' xtila queé'. Cu'é zxoá' xtila queé' lu yu'u ga ni' gun chi'é le, pero uzégui'é bëbu que lu guí', ate' guí' na' bití' ca' ulu.

*Ridile' nisa Jesús*

(Mr. 1:9-11; Lc. 3:21-22)

<sup>13</sup>Ní'irö buzé'é Jesús luyú Galilea, ate' bidxiné' ra' yegu Jordán ga na' zoé' Juan, para idilé' nisa lu në'é Juan na'. <sup>14</sup>Juan buzágué'é xinözé', en rë' Jesús:

—Neda' ral-la' idila' nisa lu no'o Li'. ¿Za'tso' Li' quia' neda'?

<sup>15</sup>Bubi'é didza' Jesús, rë' lé':

—Benna lataj na'a, tu' caní ral-la' gunru' idüté le naca tsahui'.

Ní'irö Juan bë'é Lë' lataj. <sup>16</sup>Cate' chinadilé' Jesús nisa, la' burúajté' lu nisa. Ní'irö gualaj lúzxiba lahué' Jesús, ate' bilé'ené' ruhuötjé' Dios Bö' Lá'ayi, en bidxiné' ga na' zoé', riné'é ca riná'aba' gu'dödo'. <sup>17</sup>Ní'irö biyón chi'í nu ru'í didza' yehua' yubá, rnna:

—Bönni' ni náquië' Zxí'ina'. Nadxí'ida' Lë', en raza ládxa'a Lë'.

## 4

*Rë'ëni Satanás tu' xihui' ibaga' Jesús dul-la'*

(Mr. 1:12-13; Lc. 4:1-13)

<sup>1</sup> Ní'irö la' guchë'të' Dios Bö' Lá'ayi Jesús lu lataj cá'asö para gata' lataj si' bë' Satanás tu' xihui' Lë'.

<sup>2</sup> Idú choá' dza choá' yëla biti' bi gudahuë' Jesús, ate' gudödi ni' ridunë'.

<sup>3</sup> Ní'irö tu' xihui', nu na' run ga tá'baga' bönachi dul-la', bidxín ga zoë' Jesús, en rë Lë':

—Channö nacu' idú Zxí'inë' Dios, gunná na'a ulu'huóaca guiöj nacua' ni yöta xtila.

<sup>4</sup> Bubi'ë didza' Jesús, rë' le:

—Nazúaj lu guichi lá'ayi le rnna: “Calëgasö yöta xtila nabánigaca bönachi, pero lësca' yúgu'të didza' ru'ë Dios nabánigaca bönachi.”

<sup>5</sup> Ní'irö tu' xihui' guchë' Jesús lu yödzo lá'ayi Jerusalén, ate' budxía Lë' ga naca xitsá' ícjo'olö yudo'. <sup>6</sup> Ní'irö tu' xihui' rë Lë', rnna:

—Channö nacu' Li' idú Zxí'inë' Dios, busuladzu' cuinu' ni, tu' nazúaj lu guichi lá'ayi le rnna:

Dios isöl-lë'ë gubáz lá'ayi queë' para ilún chi'ë Li',

ate' ulu'chisë' Li' lu ná'agaquië',

para cabí tsöjchëgu'u guiöj, en cabí gunu' zi' ni'u.

<sup>7</sup> Bubi'ë didza' Jesús, rë' le:

—Ia'stú nazúaj lu guichi lá'ayi, le rë bönachi, rnna: “Biti' ugunu' dxin Xanu' Dios.”

<sup>8</sup> Ní'irö tu' xihui' guchë' Jesús ga naca tu lu guí'a sibi, ate' ni' buluí' Lë' yúgu'të yödzo nacua' yödzo'lió ni, en yúgu'të yöl-la' tsahui' quëguequi.

<sup>9</sup> Ní'irö rë Lë':

—Yúgu'të lë ni udöda' lu no'o channö uzóa zxibu' lahua', en gunu' neda' zxön.

<sup>10</sup> Jesús rë' le:

—Böaj quiu' li', Satanás tu' xihui', tu' nazúaj lu guichi lá'ayi le rë netu', rnna: “Xanu' Dios tseaj ládxa'u, en udödi cuinu' lu na' tuzë' Lë'.”

<sup>11</sup> Ní'irö buzá' Satanás tu' xihui' ga na' zoë' Jesús, ate' gubáz lá'ayi queë' Dios bila'dxinë' ga zoë', en gulácalenë' Lë', en gula'gu'ë le gudahuë'.

*Risí lahuë' Jesús runë' libán luyú Galilea*

(Mr. 1:14-15; Lc. 4:14-15)

<sup>12</sup> Cate' biyönnë' Jesús nadzunë' Juan lidxi guíë, guyijë' luyú Galilea.

<sup>13</sup> Buzë'ë yödzo Nazaret, ate' yöjsóë' lu yödzo Capernaum ga naca ra' nísado', lu buzá' quëgaca bönachi Zabulón, en bönachi Neftalí. <sup>14</sup> Caní guca, bidxín lë na' gunné' Isaías, bönni' bë'ë didza' uláz queë' Dios, gunné':

<sup>15</sup> Luyú Zabulón, en luyú Neftalí,

la' nöza ra' nísado' ia'tsölá'a yegu Jordán saca' ga rilén gubidza.

Luyú Galilea, ga nacua' bönachi biti' náacagaca judío.

<sup>16</sup> Bönachi chul-la niti ni' bila'lé'e bení,

ate' bönni' ni' náacagagüë' ca nupa chinátigaca, gulén quëgaquië' bení'.

<sup>17</sup> Cate' ní'irö gusí lahuë' Jesús runë' libán, en rë' bönachi ni':

—Buli'bí'i ládxi'li', tu' chizóa idxín dza idinná bë' Nu na' zoa yehua' yubá luyú ni.



*Jesús rulidzë' tapë' bönni' uzxõn böla para tsõjtá'gaquië' Lë'*

*(Mr. 1:16-20; Lc. 5:1-11)*

<sup>18</sup> Cate' gudë' Jesús ra' nísado' que Galilea, bilé'enë' chopë' bönni'. Tuë' lë' Simón, en zoa ia'tú lë' Pedro, ate' dzáguië' Andrés, bönni' böchë'ë, lë'. Chopë' ni ta'chiljë' yõxaj böla quëgaquië' lu nísado' na' tu' nácagaquië' uzxõn böla. <sup>19</sup> Jesús rë' légaquië':

—Guli'dutá' neda', ate' guna' ga ichë'ëli' bõnachi quia', gunli' ca runli' rizõnli'-ba' böla.

<sup>20</sup> Chopë' ni la' bulu'cá' anatë' yugu' yõxaj böla quëgaquië', ate' sõjácalenë' Jesús.

<sup>21</sup> Cate' gudödë' Jesús ia'lati' ní'ilo, bilé'enë' ia' chopë' bönni'. Tuë' lë' Jacobo, ate' dzáguië' Juan, bönni' böchë'ë lë'. Nácagaquië' zxi'inë' Zebedeo. Nacu'ë lë'e bárcodo' dzágagaquië' Zebedeo, xúzgaquië', en tu'únë' yõxaj böla quëgaquië'. Ní'irõ Jesús bulidzë' chopë' ni para tsõjtá'gaquië' Lë'. <sup>22</sup> La' bulu'cá' anatë' bárcodo' na', enca' xúzgaquië', ate' sõjácalenë' Jesús.

*Jesús rusédinë' bõnachi zían*

*(Lc. 6:17-19)*

<sup>23</sup> Gudë' Jesús idú luyú Galilea, rusédinë' bõnachi gapa naca lu yu'u ga tu'dubë' bönni' judío, en tu'sëdë' queë' Dios. Benë' libán ni' que didza' dxi'a ca si' idinná bë'ë Dios luyú ni', en bunë' yúgu'të nupa te'e tsa naca yõdzõhuë' té'eguequi. <sup>24</sup> Guzë didza' que yõl-la' huáca queë' Jesús, ate' bila'yõni bõnachi idú luyú Siria, ate' dujuá'gaquië' yúgu'të bönni' té'enë' zían yõdzõhuë' que quëgaquië', en ta'gu'i ta'zaquië', ga zoë' Jesús. Dujuá'gaquië' ca' yugu' bönni' yú'ugaquië' bö' xihui', en yugu' bönni' té'enë' huë' xjote', en yugu' bönni' nacú'unigaquië' bin ni'a ná'agaquië', ate' Jesús bunë' yúgu'të bönni' na'. <sup>25</sup> Bõnachi zían bila'rúajgaca luyú Galilea, en yugu' yõdzõ Decápolis, en yõdzõ Jerusalén, enca' luyú Judea, en yugu' yõdzõ nacua' ia'tsólá'alõ yegu Jordán saca' ga rilén gubidza, ate' røjácalen Jesús.

## 5

*Libán benë' Jesús ga naca lu guí'ado'*

*(Lc. 6:20-23)*

<sup>1</sup> Cate' bilé'enë' Jesús bõnachi zían sõjácalen Lë', ní'irõ gurenë' tu lu guí'ado' ga naca xitsá'alõ, ate' gurõ'ë lu guí'a ni'. Ní'irõ bulu'dubë' bönni' usëda queë' ga zoë'. <sup>2</sup> Gusí lahuë' rusédinë' légaquië', rnnë':

<sup>3</sup> —Bica' ba yugu' bönni' té'quibe'enë' ta'yádzjanë' le naca queë' Dios, tu' nadéli'gaquië' lataj ga rinná bë'ë Bönni' na' zoë' yehua' yubá.

<sup>4</sup> Bica' ba yugu' bönni' tu'huí'ini ládxi'gaquië' tu' nabága'gaquië' dul-la', tu' huë' tsahuë'ë Dios caz légaquië'.

<sup>5</sup> Bica' ba yugu' bönni' nácagaquië' nõxaj ladxi' lahuë' Dios, tu' gata' quëgaquië' luyú ni.

<sup>6</sup> Bica' ba yugu' bönni' ta'zë ládxi'gaquië' le naca tsahui' lahuë' Dios, ate' raca quëgaquië' ca raca quégaca nupa ta'dún, en ta'bidxi nisa, tu' gunë' Dios ga ulu'zi'ë xibë lë na' ta'zë ládxi'gaquië'.

<sup>7</sup> Bica' ba yugu' bönni' tu'huechi' ládxi'gaquië' luzá'agaquië', tu' huechi' ládxi'ë Dios légaquië'.

<sup>8</sup> Bica' ba yugu' bönni' naca tsahui' icja ládxi'do'gaquië', en biti' bi dul-la' nabága'gaquië', tu' ila'lé'enë' Dios.

<sup>9</sup> 'Bica' ba yugu' bönni' ta'bequi dxíë' didza' bizxaj, tu' ila'zì' lágaquië' xzí'ini cazë' Dios.

<sup>10</sup> 'Bica' ba yugu' bönni' ta'zaca' ta'guië' lu le ta'bía ládxi'gaca bönachi légaquië' cate' tunë' le naca tsahui', tu' dë' lataj quégaquië' ga rinná bë'ë Bönni' na' zoë' yehua' yubá.

<sup>11</sup> 'Bica' ba libí'ili' cate' tu'lidza bönachi libí'ili' zì', en ta'bía ládxi'gaquië' libí'ili', ate' lu yöl-la' rizí' yë' ta'nnë' queëli' le xihui' tu' dá'ali' neda'.

<sup>12</sup> Buli'dzeja, en guli'chaza ládxi'li', tu' uzí'da'ali' xibé yehua' yubá. Ca raca queëli', guca quégaquië' bönni' gulu'ë didza' uláz queë' Dios, en gula'cu'ë zí'atëlö ca libí'ili', tu' gula'bía ládxi'gaca ca' bönachi légaquië'.

*Bönachi dá'gaca Cristo ilaca ca zödi', en ca bení'*

*(Mr. 9:50; Lc. 14:34-35)*

<sup>13</sup> Gunnë' ca' Jesús:

—Libí'ili' nácali' ca zödi' luyú ni, pero channö initi zödi' na' yöl-la' siná'a que, bití' gaca gunru' ga huóáca siná'a. Bití'rö naca lesaca', pero chinaca tu le chú'unaru', ate' ulu'libi bönachi le.

<sup>14</sup> 'Libí'ili' nácali' ca bení' yödzölió ni para ulu'ili' lahui le naca queë' Dios. Ral-la' gácali' ca tu yödzö rö'ö tu lu guí'a, tu' cabí gaca igachi' yödzö na'. <sup>15</sup> Cate' ruquéla'ru' guí', bití' rigú'uru' le tu zxan guí'ina, pero ruzóaru' le ga liná' para uzení' yúgu'të nupa nacua' lu yu'u. <sup>16</sup> Ca na' run bení', ral-la' gunli' ca' libí'ili', güí'ili' lataj gaca bë' le nácali' lógaca yúgu'të bönachi, para cate' ila'lé'e le naca tsahui' runli', ila'gú'u-në' Xúzili' Dios zoë' yehua' yubá yöl-la' ba.

*Rusédinë' Jesús que le gunná bë'ë Dios lu në'ë Moisés*

<sup>17</sup> Gunnë' ca' Jesús:

—Bití' guéquili' bida' para usunítia' yugu' le gunná bë'ë Moisés, o xibá na' bulu'sédinë' bönni' gulu'ë didza' uláz queë' Dios. Bida', caléga para usunítia' yugu' lë na', pero para ulu'a lahui idútë le tu'sedi lë na'. <sup>18</sup> Le nácatë rea' libí'ili'. Tsanni nacua' lúzxiba, en yödzölió ni, bití' tódi cá'asö nitú dídza'do', en nitú le rinná bë' xibá na', cate' gácarö yúgu'të le ral-la' gaca. <sup>19</sup> Que lë ni na', nútí'tës bönni' quítsjë' tu xibá cuídi'do'os le zoa lu xibá na', en usédinë' bönachi para ilún caní, bönni' ni gácatërë' cuídi'do'os ca yúgu'të nupa ila'cuá' ga rinná bë' Bönni' na' zoë' yehua' yubá, pero nútí'tës bönni' gunë' ca rinná bë' xibá na', en usédinë' bönachi para ilún ca' caní, bönni' ni tsépisëtërë' ga rinná bë' Nu na' zoa yehua' yubá. <sup>20</sup> Rea' ca' libí'ili': Channö cabí gunli' le nácatërö tsahui' ca le tunë' bönni' yudo' usedi, enca' ca tunë' bönni' yudo' fariseo, bití' ca' tsú'uli' ga rinná bë'ë Dios yehua' yubá.

*Rusédinë' Jesús ca naca que nu rilé luzë'e*

*(Lc. 12:57-59)*

<sup>21</sup> Gunnë' ca' Jesús:

—Chibiyónili' ca gula'nnë' bönni' guta' lu ná'agaquië' le gulë' xuz xtó'oli': "Bití' gútili' bönachi. Nu bönni' gútië' bönachi, nabáguë'ë xíguia', ate' huadxiné' ga uchi'a usöröë' Dios lë'." <sup>22</sup> Na'a, neda' rea' libí'ili': Nu bönni' rilenë' böchi' luzë'ë, nabáguë'ë xíguia' huadxiné' ga uchi'a usöröë' Dios lë'. Lësca caní, nu bönni' innë' zì'ë queë' böchi' luzë'ë nabáguë'ë xíguia' ulu'chi'a ulu'söröë' bönni' lo tu'chi'a tu'söröë' lë', ate' nu bönni' guié' luzë'ë: "¡Böa' canöz!" nabáguë'ë xíguia' tsöjtsu'ë lu guí' gabila.

<sup>23</sup> 'Caní naca, channö chizóa cu'u tu le unödzu' lu bucugu lá'ayi, ate' tsöjnenü' ni' zoa bizx que rilenë' böchi' luzó'o li', <sup>24</sup> bucá'ana lé na' unödzu' lu bucugu ni', en böaj lidxu'. Zí'alö yöjca'ana tsahui' le benu' queë' böchi' luzó'o, ate' ní'irö gudá unödzu' lé na' nu'u.

<sup>25</sup> 'Channö zoa nu bönni' rinábinë' li' bi ubi'u queë', en ichë'ë li' ga uchi'a usöröë' tu bönni' li', budzágatë tsahui' bönni' na' tsanni ni' yú'ulenu' lé' nöza, para cabí udödë' li' lahuë' bönni' ruchi'a rusöröë', ate' bönni' ni udödë' li' lu në'ë bönni' rusayjë' lidxi guíë, ate' lé' cu'ë li' lidxi guíë na'.

<sup>26</sup> Le nácatë rea' li', bití' ca' uruju' ni' cate' idxinrö dza quizzju' ga buitë le ral-lu'u.

*Rusédinë' Jesús ca naca que nu riguitsaj xibá que yöl-la' nutsaga na'*

<sup>27</sup> Gunnë' ca' Jesús:

—Chibiyónili' ca na' gula'nnë': "Bití' gunu' dul-la' le riguitsaj xibá que yöl-la' nutsaga na'." <sup>28</sup> Na'a, neda' rea' libí'ili': Núti'tës bönni' ruyúë' tu nigula len yöl-la' rizë ladxí' le ruá' dö', chibenë' dul-la' len lënu lu icja ládxi'da'ahuë'.

<sup>29</sup> 'Que lé ni na', channö guiöj lo' ibëla gun ga gunu' dul-la', guléaj le, en gurú'una le. Gácarö dxi'a quiu' unítíu' tu guiöj lo', en calëga idúteo' tsöjtsú'u lu guí' gabila. <sup>30</sup> Channö no'o ibëla gun ga gunu' dul-la', guchugu le, en gurú'una le. Gácarö dxi'a quiu' unítíu' tu no'o, en calëga idúteo' tsöjtsú'u lu guí' gabila.

*Rusédinë' Jesús ca naca que nu bönni' rulá'alenë' nigula queë'*

(Mt. 19:9; Mr. 10:11-12; Lc. 16:18)

<sup>31</sup> Gunnë' ca' Jesús:

—Lësca' gula'nnë': "Núti'tës bönni' rusanë'-nu nigula queë', ral-la' unödzejë' queënu tu guichi le rnna rulá'alenë'-nu." <sup>32</sup> Na'a, neda' rea' libí'ili', channö zoë' nu bönni' rusanë'-nu nigula queë', en bití' zoa le ruá' dö' runnu, gunë' bönni' na' ga gunnu dul-la' le riguitsaj xibá que yöl-la' nutsaga na' channö utsaga ná'lennu bönni' yúbölö, ate' bönni' na' si'ë-nu nigula na', lësca' gunë' dul-la' le riguitsaj xibá que yöl-la' nutsaga na'.

*Rusédinë' Jesús ca naca que nu ruzötaj La la'ayi queë' Dios*

<sup>33</sup> Gunnë' ca' Jesús:

—Lësca' biyónili' ca yugu' bönni' guta' lu ná'agaquië' gulë' xuz xtó'oli', gula'nnë': "Bití' si' yë'u cate' run tsutsu xtídz'u ni'a queë' Dios, en ral-la' gunu' lahuë' Xanru' Dios idütë' lé na' run tsutsu xtídz'u ni'a queë' Lë'."

<sup>34</sup> Na'a, neda' rea' libí'ili', bití' ca' gun tsutsu xtídz'a'li'. Bití' gun tsutsu xtídz'a'li' ni'a que yehua' yubá, tu' naca ga rö'ë rinná bë'ë Dios. <sup>35</sup> Bití' gun tsutsu xtídz'a'li' ni'a que luyú ni, tu' naca luyú ni ca xilibi ni'ë Dios, en calëga ni'a que Jerusalén, tu' naca ladzë' Bönni' nayépisëtërë' rinná bë'ë. <sup>36</sup> Bití' gun tsutsu xtídz'u ni'a que icju', tu' cabí gaca gunu' ga huóaca chiguichi o gasaj nitú guitsa' icju'. <sup>37</sup> Ral-la' innásili': "Ön", o innásili': "Bití'", tu' naca que tu' xihui' le nadödi bë' ca nácacaca didza' ni.

*Rusédinë' Jesús ca naca que nu ruzí' lëbi luzë'e*

(Lc. 6:29-30)

<sup>38</sup> Gunnë' ca' Jesús:

—Chibiyónili' ca naca le gunná bë'ë Moisés, gunné': "Nu bi run que guiöj lahui luzë'e, ubí' ca' que, enca' nu bi run que layí' luzë'e, ubí' ca' que." <sup>39</sup> Na'a, neda' rea' libí'ili': Bití' tá'baga'li' nu guá' dö' queëli', ate' channö nu capa' xagu' ibëla, bë' lataj capa' ca' ia'tú xagu' yögöla.

40 Channö zoa nu gun ga uchi'a usöröë' tu bönni' li', en cuë' zxo', bē' ca' queë' lari' rixóa cúdzu'u. 41 Channö zoa nu gun bayudxi gu'u yua' que tu chi'i, guyéajlen nu na' chopa chi'i. 42 Nu bi rinábini li', bunödzej que, en nu bi guë'ëni gunnu' que tu chi'i, biti' tá'bagu'u lē na' inabi li'.

*Rusédinē' Jesús ca ral-la' idxí'iru' nupa biti' ta'lé'e rē'u dxi'a*  
(Lc. 6:27-28, 32-36)

43 Gunnē' ca' Jesús:

—Lēscā' caní' biyōnili' lē na' gula'nnē': "Ral-la' idxí'inu' nu nadxí'i li', en udí'inu' nu biti' rilé'e li' dxi'a." 44 Na'a, neda' rea' libí'ili', guli'dxí'i nupa biti' ta'lé'e libí'ili' dxi'a. Guli'nábinē' Dios gácalenē' nupa tu'lidza libí'ili' zi'. Guli'gún le naca tsahui' quégaca nupa tu'dí'i libí'ili', en buli'lidzē' Dios inábili'-nē' gunē' ga gaca dxi'a quégaca nupa ta'nnē' queēli', en tuá' dō' queēli'. 45 Channö gunli' caní, gácali' zxi'ini cazē' Xúziru' Dios, zoē' yehua' yubá, tu' runē' Lē' ga ruzení' gubidza queē' ga nacua' bōnachi tuá' dō', enca' ga nacua' bōnachi tsahui'. Risól-lē'ē tu nisa guiōj lu yu quégaca bōnachi tsahui', enca' lu yu quégaca bōnachi biti' nácagaca tsahui'. 46 Channö nadxí'isili' bönni' nadxí'iguequinē' libí'ili', ¿nuzxi caz cu'u libí'ili' yōl-la' ba? Lēscā' caní tunē' bönni' biti' nácagaca tsahui' na', bönni' tu'quixjē' uláz que yōdzō zi'tu', nadxí'iguequinē' luzá'agaquiē'. 47 Channö rugápali' Dios tuzē' böchi' luzá'ali', ¿bizxi caz runli' le nácaterō dxi'a? Lēscā' caní tunē' bönni' biti' núnbē'gaquiē' Dios. 48 Pero libí'ili', guli'gaca idú tsahui', ca na' náquiē' Xúziru' Dios, zoē' yehua' yubá, náquiē' idú tsahui'.

## 6

*Rusédinē' Jesús ca ral-la' gácalenru' bōnachi*

1 Gunnē' ca' Jesús:

—Guli'gūi' ládxi'li' gaca idú ca reaj ládxi'li'-nē' Dios. Biti' gúnsili' lē ni lógaca bōnachi para ila'lé'e ca na' runli'. Channö runli' caní, biti' bi gunnē' Xúziru' Dios zoē' yehua' yubá queēli'. 2 Cate' bi unōdzju' que nu bi riyadzaj, biti' gunu' ga ilá' lahui lē na' runu' ca tunē' bönni' tu'luf'isō tsahui' cuíngaquiē' ga naca lu yu'u ga tu'dubē' bönni' judío, en tu'sedē' queē' Dios, enca' ga naca lu yē'ēyi. Caní tunē' para ila'gú'u bōnachi légaquiē' yōl-la' ba. Le nácate' rea' libí'ili', cá'asō naca yōl-la' ba gata' quégaquiē'. 3 Pero li', cate' bi unōdzju' que nu bi riyadzaj, biti' ca' gu'u lataj nu inōzi. 4 Na'a, lē na' unōdzju', bagáchi'sō ral-la' unōdzju', ate' Xúziru' Dios, Nu rilé'e ca na' runu' bagáchi'sō, Lē' ubi'ē quiu'.

*Rusédinē' Jesús ca ral-la' ulídzaru'-nē' Dios*  
(Lc. 11:2-4)

5 Gunnē' ca' Jesús:

—Cate' ulídzali'-nē' Dios, biti' gunli' ca tunē' bönni' tu'luf'isō tsahui' cuíngaquiē', tu' ta'yaza ládxi'gaquiē' ta'zuínē' tu'lidzē' Dios gapa naca lu yu'u ga tu'dubē' tu'sedē' bönni' judío queē' Dios, en gapa naca lu yē'ēyi para ila'lé'e bōnachi légaquiē'. Le nácate' rea' libí'ili', cá'asō naca yōl-la' ba gata' quégaquiē'. 6 Pero libí'ili', cate' ulídzali'-nē' Dios guli'tsaza lídxili', en buli'sayaj yu'u. Buli'lidzē' Dios inábili'-nē' Xúziru' Dios, zóalenē' libí'ili' ga na' zóali' queézili', ate' Xúziru' Dios, Nu rilé'e ca runli' bagáchi'sō, Lē' ubi'ē queēli'.

<sup>7</sup> Cate ulídzali'-në' Dios biti' gunli' la' yé'eyi la' lez ca na' tunë' bönni' biti' núnbë'gaquië' Dios, tu' téquinë' huayönnë' Dios légaquië' tu' tu'lidzë' la' yé'eyi la' lez. <sup>8</sup> Biti' gunli' ca na' tunë' légaquië'. Xúziru' Dios, zí'atëlö cate' si' inábali'-në', chinöz quezinë' le riyadzaj queéli'. <sup>9</sup> Que lë ni na', ral-la' ulídzali'-në' Dios innali' caní: Xuz netu', zu' yehua' yubá, gaca zxön Lo'.

<sup>10</sup> Gudá inná bë'u luyú ni.

Ben ga gaca luyú ni ca raza ládxi'u Li' ca na' raca yehua' yubá.

<sup>11</sup> Benna le gágutu' na'a dza.

<sup>12</sup> Buniti lo netu' le huiá' dö' bentu' Lo' Li' ca runtu' netu', runiti lotu' nupa bi tun queëtu'.

<sup>13</sup> Biti' gu'u lataj si' bë' tu' xihui' netu', pero busölá netu' lu na' nu ruá' dö'.

Nequi quiu' ga rinná bë'u, en yöl-la' unná bë', en yöl-la' ba.

Caní rë'ënitú' gácatíca'sö. ¡Ca' gaca!

<sup>14</sup> Channö uniti loli' luzá'ali', nupa tuá' dö' queéli', uniti lahuë' Xúziru' Dios, zoë' yehua' yubá, libí'ili'. <sup>15</sup> Channö cabí uniti loli' luzá'ali', biti' uniti lahuë' Xúziru' Dios libí'ili' ca naca dul-la' nabága'li'.

*Rusédinë' Jesús ca ral-la' gunru' gubasa*

<sup>16</sup> Gunnë' ca' Jesús:

—Cate' gunli' gubasa, biti' gunli' bayechi' loli' ca tunë' bönni' tu'luí'isö tsahui' cuíngaquië', tu' tunë' bayechi' lógaquië' para iléquiube'e bönachi tunë' gubasa. Le nácatë rea' libí'ili', cá'asö naca yöl-la' ba gata' quégaquië'. <sup>17</sup> Libí'ili', cate' gunli' gubasa, buli'pá'a ícjali', en guli'quibi loli', <sup>18</sup> para cabí iléquiube'e bönachi runli' gubasa. Bagáchi'sö ral-la' gunli' gubasa, ate' Xúziru' Dios, zóalenë' libí'ili' ga na' zóali' queézili', Lë' ubi'ë queéli'.

*Yehua' yubá ral-la' utúbiru' yöl-la' tsahui' queëru'*

(Lc. 12:33-34)

<sup>19</sup> Gunnë' ca' Jesús:

—Biti' utúbili' yöl-la' tsahui' luyú ni, ga ni bëlado' que tu'töba' le, ate' raca ditaj, en ga ni ta'yaza gubán, ta'banë'. <sup>20</sup> Buli'tubi yöl-la' tsahui' yehua' yubá, ga ni' bëlado' que biti' ulu'töba' le, en biti' gaca ditaj, en ga ni' biti' ila'yázië' bönni' gubán, en biti' ila'banë'. <sup>21</sup> Ga ni' dë yöl-la' tsahui' queéli', ni' güf'i ládxi'li' idxinli'.

*Le rigú'u bení' icja ládxi'do'oru'*

(Lc. 11:34-36)

<sup>22</sup> Gunnë' ca' Jesús:

—Guiöj loru' naca ca tu le rigú'u bení' icja ládxi'do'oru'. Que lë ni na', channö guiöj loli' naca tsahui', idútëli' tsépili' yösa bení'. <sup>23</sup> Channö guiöj loli' biti' naca tsahui', idútëli' nachúl-lali'. Que lë ni na', channö bení' zóalen libí'ili' nuhuöáca le naca chul-la, yënni'tërö nachúl-lali'.

*Dios, en dumí*

(Lc. 16:13)

<sup>24</sup> Gunnë' ca' Jesús:

—Cuntu nu bönni' gaca gunë' xichíngaquië' chopa xanë', tu' uzöë' tuë' tsölá'alö, ate' ia'túë' na' idxí'inë', o ugá'analenë' tuë', ate' ia'túë' na' usán ládxi'ë. Biti' gaca gunli' xichinë' Dios, enca' dumí.

*Dios rapa chi'ë nupa néquiquequi queë'*

*(Lc. 12:22-31)*

<sup>25</sup> Gunnë' ca' Jesús:

—Ia'stú rea' libí'ili': Biti' ubi uguí'ili' ni'a que le gáguli' o ni'a que le guí'jali', yugu' le nabánili', o ni'a que lari' gáculi'. Nazáca'tërö yöl-la' na'bán queéli' ca le gáguli', ate' nácatërö lesaca' le nácali' ca lari' gáculi'. <sup>26</sup> Buli'yú ca raca quégacaba' biguinnido' ta'daba' lúzxiba. Biti' bi taz tu'zóaba', en biti' tu'lápaba', en biti' tu'túbiba' ga bi ila'gú'uba' quégacaba', pero Xúziru' Dios zoë' yehua' yubá, rugagu cazë' légacaba'. Nazáca'tëröli' libí'ili' ca yugu' biguinnido' na'. <sup>27</sup> ¿Nuzxi caz bönni' nútsë'ë ládjali' gaca gunë' ga soë' ibanë' ia'túz dza tu' ruúbi ruguí'inë' para gaca caní queë'?

<sup>28</sup> ¿Bizx que ruúbi ruguí'ili' ni'a que le gáculi'? Buli'yútsöca' ca raca quégaca yöjdo' rő'gaca la' guixi' ca ta'zxon. Biti' tun dxin, en biti' tun du lari'. <sup>29</sup> Neda' rea' libí'ili', Salomón, bönni' ni' gunná bē'ë, sal-la' gúta'da' yöl-la' tsahui' queë', lari' gúcuë' biti' gunná'tërö lachi ca rinná'gaca yöjdo' na'. <sup>30</sup> Dios caz runë' lachi yöj guíxi'do', le rő'gaca la' guixi', le nacua' na'a dza, ate' cuxó huidzaj ila'yegui lu guí'. Channó caní ruí'i ládxi'ë yöj guíxi'do', runë' léguequi lachi, gúnda'arë' ca' queéli', sal-la' biti' réajlë'ëli'-në' idú ládxi'li'. <sup>31</sup> Que lë ni na', biti' ubi uguí'ili', en biti' innali': “¿Bizxi gágutsatu?” o “¿Bizxi guí'jatsatu?” o “¿Bizxi lari' gácutsatu?” <sup>32</sup> Bö'nachi yödzölió ni tu'úbi tu'guí'i ni'a que yúgu'të lë ni, pero zoë' Xúziru' yehua' yubá, ate' Lë' nözinë' naquínili' yúgu'të lë ni. <sup>33</sup> Na'a, guli'gü'irö ládxi'li' inná bé'enë' Dios libí'ili', en gunli' le naca tsahui' lahuë' Lë', ate' Lë' cu'ë xinözali' yúgu'të lë ni. <sup>34</sup> Que lë ni na', biti' ubi uguí'ili' ni'a que le ral-la' gaca cuxó huidzaj, tu' huáca gü'í'i ládxi'li' cuxó huidzaj le gaca queéli' dza na'. Tu tu dza ilaca le ral-la' gü'í'i ládxi'li' dza na'.

## 7

*Biti' ral-la' ichugu bē'ëru' böchi' luzá'aru'*

*(Lc. 6:37-38, 41-42)*

<sup>1</sup> Gunnë' ca' Jesús:

—Biti' ichugu bē'ëli' böchi' luzá'ali', para cabí ichugu bē'ë Dios queéli', <sup>2</sup> tu' ichugu bē'ë Lë' queéli' la' leze ca na' richugu bē'ëli' queë' böchi' luzá'ali', ate' ca na' rurixi rudödili' que luzá'ali', la' cá'asó urixi udödë' Dios queéli'. <sup>3</sup> ¿Bizx que ruyú' bēbudo' yu'u guiöj lahuë' böchi' luzó'o, en biti' réquibe'enu' yu'u le zxöntërö guiöj lo' li'? <sup>4</sup> ¿Gü'ëtso' böchi' luzó'o: “Gulöz, cueja' bēbudo' yu'u guiöj lo'”, ate' li', le zxöntërö ca' yu'u guiöj lo' li'? <sup>5</sup> Li', bönni' rulu'isó tsahui' cuinu'. Guléaj zí'aló le zxön yu'u guiöj lo' li', ate' ní'irö ilé'enu' tsáhu'i'do' para gaca cueju' bēbudo' yu'u guiöj lahuë' böchi' luzó'o.

<sup>6</sup> Biti' gü'í'ili' quégacaba' bö'cu' le naca lá'ayi, para cabí ulu'huécjaba', en iláguya'aba' libí'ili', en biti' chú'unali' le naca lesaca' queéli' láhuigacaba' cuchi, para cabí ulu'zadi' ní'aba' le.

*Guli'naba, guli'guilaj, en buli'lidza ra' yu'u*

*(Lc. 11:9-13; 6:31)*

<sup>7</sup> Gunnë' ca' Jesús:

—Guli'naba, ate' Dios gunnë' queéli'. Guli'guilaj, ate' gunnë' lataj idzöli queéli'. Buli'lidza ra' yu'u, ate' Lë' isaljë' queéli'. <sup>8</sup> Núti'tës bönni' rinabë', ridé'li'në', ate' bönni' riguiljë', ridzöli queë', ate' bönni' rulidzë' ra' yu'u, ralaj queë'.

<sup>9</sup> Channö zoë nu bönni' ladjali' libí'ili', ate' zóabi' bi'i queë', channö inábibi' lë' yöta xtila, ¿naru' unödzejë'-bi' guió? <sup>10</sup> Channö inábibi' lë' tuba' böla, ¿naru' unödzejë'-bi' bëla? <sup>11</sup> Libí'ili' nácali' huiá' dö', pero nözili' unödzejali' xzi'inili' le naca tsahui'. Nácatëro löza, Xúzili' zoë' yehua' yubá unödzejë' nupa ta'nábini Lë' le naca dxi'a.

<sup>12</sup> 'Que lë ni na', ca na' rë'ënili' ilún bönachi queëli', lësca' caní guli'gún quégaquië'. Lë ni naca le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios.

*Tu ga ral-la' tsú'uru' le naca tsúpi'do'*

*(Lc. 13:24)*

<sup>13</sup> Gunnë' ca' Jesús:

—Guli'tsáz ga nu riyaza le naca tsúpi'do'. Blaga' naca ga nu riyaza, en yalaj naca nöza le röjácalenë' bönni' ga ni' ila'nitië', ate' ta'yázië' bönni' zían ni'. <sup>14</sup> Tsúpi'do' naca ga nu riyaza, en lásido'os naca nöza le röjácalen bönachi ga ni' ila'deli' yöl-la' na'bán idú, ate' nabábasö nupa ta'dzöli le.

*Le runru' naca bë' le nácaru'*

*(Lc. 6:43-45)*

<sup>15</sup> Gunnë' ca' Jesús:

—Guli'gún chi'i cuinli' para cabí ila'zì' yé'enë' bönni' ta'zì' yë'ë libí'ili', ta'nnë' tu'ë didza' uláz queë' Dios. Ila'dxinë' bönni' caní ga zóali', en ulu'luí' cuíngaquië' nöxaj ládxi'do' ca nácacacaba' bö'cu' xzila'do', pero lu icja ládxi'do'gaquië' nácaqaquië' ca bö'cu' guí'a sínia'. <sup>16</sup> Yugu' le tunë' ilaca bë' le nácaqaquië'. Biti' ruchíbiru' le ribía lubá uva lu yaga yötsi', en bití' ruchíbiru' le ribía yaga higo lu guixi' legui lásido'. <sup>17</sup> Caní naca, yúgu'të yaga dxi'a ta'bía le naca dxi'a, ate' tu yaga cabí naca dxi'a ribía le cabí naca dxi'a. <sup>18</sup> Yaga dxi'a na' bití' gaca cuía le cabí naca dxi'a, ate' yaga na' bití' naca dxi'a bití' gaca cuía le naca dxi'a. <sup>19</sup> Yúgu'të yaga bití' ta'bía le naca dxi'a ila'rugu, ate' ila'gu'ë léguequi lu guí'. <sup>20</sup> Caní naca, yugu' le tunë' bönni' na' ilaca bë' le nácaqaquië'.

*Nupa bití' ila'yázië' ga rinná bë'ë Dios*

*(Lc. 13:25-27)*

<sup>21</sup> Gunnë' ca' Jesús:

—Zian nupa të neda': "Xan, Xan", pero calëga yúgu'të' ila'yázië' ga rinná bë'ë Dios yehua' yubá. Ila'yázasë' ni' bönni' tunë' ca rë'ënë' Xuza' Dios, zoë' yehua' yubá. <sup>22</sup> Cate' idxín dza údxi que yödzoilió ni, bönni' zían ilë' neda', ila'nnë': "Xan, Xan, bentu' libán que xtídzë'ë Dios, buguntu' dxin Lo', en buguntu' ca' dxin Lo' para bubéajtu' yugu' bö' xihui', en buguntu' ca' dxin Lo' bentu' zían yöl-la' huáca zxön." <sup>23</sup> Ní'irö neda' guía' légaquië': "Bití' ca' núnbë'a libí'ili'. Guli'cuíta ga zoa', libí'ili' ruá'ali' dö'."

*Chopa ca gaca udxíaru' xilibi zö'ö*

*(Lc. 6:47-49; Mr. 1:22)*

<sup>24</sup> Gunnë' ca' Jesús:

—Ia'stú ca', nu bönni' riyönnë' xtídzá'a ni, en gunë' ca rnna, bönni' ni náquië' ca tu bönni' réajni'inë', budxië' lidxë' ga naca lu guió. <sup>25</sup> Cate' gulaj guiójsiu', en guzxón yegu gubó'o, en guyecja bö', gudibi nisa cuíta yu'u na', pero bití' gubixi, tu' dxía xilibi lu guió. <sup>26</sup> Na'a, nu bönni' riyönnë' xtídzá'a ni, en bití' runë' ca rnna, bönni' ni náquië' ca tu bönni' bití' réajni'inë', budxië' lidxë' lu yu dzöbi. <sup>27</sup> Cate' gulaj guiójsiu', en guzxón

yegu gubó'o, en guyecja bö', ní'irö gudá'a nisa cuita yu'u na', ate' gubixitë, en tsaz biguinnaj.

<sup>28</sup> Cate' Jesús budxi bë'lenë' légaquië' didza' ni, bulu'bani bönachi zían nacuá' ni' ca naca le rusédinë', <sup>29</sup> tu' rusédinë' légaquië' ca tu bönni' dë lu në'ë, en calëga ca tunë' bönni' yudo' usedi quégaquië'.

## 8

*Ruhoáquië' tu bönni' ré'enë' huë' nudzu' ruzödi*

*(Mr. 1:40-45; Lc. 5:12-16)*

<sup>1</sup> Cate' bö'tjë' Jesús lu guí'a na', sójácalen bönachi zían Lë'. <sup>2</sup> Bidxinë' tu bönni' ré'enë' huë' nudzu' ruzödi ga zoë' Jesús, ate' buzóa zxibë' lahuë' Jesús, en rë' Lë':

—Xan, channö rë'ënu', huáca unu' neda'.

<sup>3</sup> Ní'irö Jesús la' bulitë në'ë, en gudanë' lë'. Rë' lë':

—Rë'ënda'. Huóácu' dxi'a.

La' bunititë xihuë'ë bönni' huë' na'. <sup>4</sup> Ní'irö Jesús gudxë' lë':

—Buyú, cuntu nu guío' caní, pero guyéaj, yöjlu'í cuinu' lahuë' bixúz, ate' yöjnödzej le gunná bë'ë Moisés le ulu'í bönachi chibóácu'.

*Jesús ruúnë' bi'i huen dxin queë' tu bönni' rinná bë'ë lu gudil-la*

*(Lc. 7:1-10)*

<sup>5</sup> Cate' guyázië' Jesús yödzö Capernaum, bidxinë' tu bönni' ga zoë', bönni' rinná bé'enë' tu gáyu'ë bönni' rójáquië' gudil-la, ate' gúta'yuë' lahuë' Jesús, <sup>6</sup> en rë' Lë':

—Xan, bi'i huen dxin quia' dëbi' yu'u, ré'ebi' huë' nacu'unibi' bin, ate' rigu'í rizáca'da'abi'.

<sup>7</sup> Jesús rë' lë':

—Neda' guída' una'-bi'.

<sup>8</sup> Bubi'ë didza' bönni' na' rinná bé'enë' bönni' rójáquië' gudil-la, en rë' Jesús:

—Xan, biti' naca' zi tsáziu' lidxa', pero tsa innasu' quia', ate' huóacabi' bi'i huen dxin quia'. <sup>9</sup> Lë'sca' neda', zoa nu rinná be'e neda', en nacu'ë ca' bönni' rójáquië' gudil-la rinná bé'egacada'-në'. Cate' rea'-në' tuë': "Guyéaj ni'", rejë'. Cate' rea'-në' ia'tuë': "Gudá ni", ridë'. Cate' rea'-në' bönni' huen dxin quia': "Ben dxin ni", la' runtë' dxin na'.

<sup>10</sup> Cate' biyönnë' Jesús didza' ni, bubáninë', ate' gudxë' bönni' sójácalenë' Lë', rnnë':

—Le nácatë rea' lib'íli', ga nacuá' bönachi Israel, cuntu nu bönni' rójxéqui'da'-në' réajlë'ë neda' ca runë' bönni' ni. <sup>11</sup> Ia'stú rea' lib'íli': Ila'rúaj bönachi zían saca' ga rilén gubidza, en saca' ga ribía gubidza, ate' ila'bö'len tsózxön Abraham, en Isaac, en Jacob, yehua' yubá ni' ga rinná bë'ë Dios, <sup>12</sup> pero yugu' bönni' na' gurö cazë' Dios para ila'yázië' ga na' rinná bë'ë Lë', chú'unë' légaquië' ní'lö ga na' naca chul-la, ate' ni' ila'bödxë', en ulu'til-la láyë'ë lu yöl-la' ruhu'ini quégaquië'.

<sup>13</sup> Ní'irö Jesús gudxë' bönni' na' rinná bé'enë' bönni' rójáquië' gudil-la, rnnë':

—Böaj lidxu'. Ca na' réajlë'u, ca' gaca quiu'.

La' ná'asö böácatëbi' bi'i huen dxin queë' na'.

*Jesús ruúnë' xiná'anu nigula queë' Pedro*

*(Mr. 1:29-31; Lc. 4:38-39)*



<sup>14</sup> Bidxinë' Jesús lidxë' Pedro, ate' ni' bilé'enë'-nu xiná'anu nigula queë', dënu lu da'a, en yú'unu tu xilá. <sup>15</sup> Gudanë' Jesús ná'anu, ate' la' burúajté xilá na' yú'unu. Ní'irö böásanu, en bunödžjanu le guluhuë'.

*Jesús ruúnë' zían nupa te'e*

(Mr. 1:32-34; Lc. 4:40-41)

<sup>16</sup> Cate' chiridzö' dza na', dujuá'agaquië' zían bönni' yú'ugaca bö' xihui' légaquië' ga zoë' Jesús, ate' len yöl-la' rinnësö queë' bubéajë' yugu' bö' xihui' na', en bunë' ca' yúgu'të nupa te'e. <sup>17</sup> Caní guca para gaca ca na' gunné' Isaiás, bönni' bë'ë didza' uláz queë' Dios, gunné': "Lë' bu'ë yugu' le rizáca'ru', en bu'ë ca' yugu' yödzöhuë' queëru'."

*Nupa gulë'ëni tsöjäcalen Jesús*

(Lc. 9:57-62)

<sup>18</sup> Cate' bilé'enë' Jesús nacua' bönnachi zían gásibi'ilë', gunná bé'enë' yugu' bönni' usëda queë' ila'dödë' ia'tsölá'a nísado' ni'. <sup>19</sup> Bidxinë' tu bönni' yudo' usedi ga na' zoë' Jesús, en rë' Lë':

—Bönni' Usedi, sá'lëna' Li' gátitës ga tseju'.

<sup>20</sup> Jesús rë' lë':

—Yugu' böza' nacua' zzan guiöj quégacaba', ate' yugu' biguínido', nudxiágacaba' xicá'agacaba', pero neda', Bönni' Guljë' Bönnachi, biti' dë ga quíxaj icja'.

<sup>21</sup> Ia'tuë' bönni', náquië' bönni' usëda queë' Jesús, gudxë' Lë':

—Xan, benna neda' lataj huöja' ga idxinrö dza chibucácha'a-në' xuza'.

<sup>22</sup> Jesús gudxë' lë':

—Gudá' neda'. Bë' lataj yugu' bönni' tati cazë' ulu'cáché'ë nupa ilátigaca quégaquië'.

*Jesús ribequi dxíë' bö' budunu'*

(Mr. 4:35-41; Lc. 8:22-25)

<sup>23</sup> Gurenë' Jesús lë'e bárcodo', ate' dzágagaquië' Lë' bönni' usëda queë'. <sup>24</sup> Ní'irö guyecja bö' budunu' lu nísado' na', ate' riyasa ridxiáda' nísado' na' ga bidxintë riyaza nisa lë'e bárcodo' na'. Dë' rásië' Jesús lë'e barco na'. <sup>25</sup> Ní'irö bila' dxinë' bönni' usëda queë' Jesús ga na' zoë', ate' bulu'subanë' Lë', en të' Lë':

—Xan, busölá netu'. Chirigáchi'ru' lu nisa.

<sup>26</sup> Bubi'ë didza' Jesús, en rë' légaquië':

—¿Bizx que rádxili'? Láti'do'os réajlë'ëli'-në' Dios.

Ní'irö guyasë' Jesús, en bulidzë' bö' na' recja, en nísado' na', ate' la' gurö'ötë dxi. <sup>27</sup> Bulu'bánninë' bönni' na', ta'nnë':

—¿Nuzxi caz bönni' ni? Ru'ísë' didza', ate' bö' recja, en nísado' tun ca rnnë'.

*Yugu' bönni' Gadara yú'ugaca bö' xihui' légaquië'*

(Mr. 5:1-20; Lc. 8:26-39)

<sup>28</sup> Cate' bidxinë' Jesús ia'tsölá'a nísado' ga na' naca lu xiyú yödzö Gadara, bila'rúajë' chopë' bönni' ga nacua' ba quégaca nupa nátigaca, dutságagaquië' Jesús. Nácaqaquië' sínia', ate' cuntu nu gaca tödi la' nöza ni'. <sup>29</sup> La' guluí'të' zidzaj didza' chopë' ni, ta'nnë':

—¿Bizxi ral-la'tu' quiu', Jesús, Zxí'inë' Dios? ¿Naru' bidxintso' ni dusaca' zi'u netu' zí'alö ca idxin dza queëtu'?

<sup>30</sup> Ga ni' nacua'ë nacua'aba' cuchi zían ta'daba' táguba', nacua'aba' láti'do' ga naca zi'tu'. <sup>31</sup> Gula'naba yechi' bö' xihui' na' Jesús, en të' Lë':

—Channö ubéaju' netu', benna lataj tsöjtsú'ugacatu'-ba' cuchi zián ni'.

<sup>32</sup> Ní'irö Jesús gudxë' léguequi:

—Guli'tséaj.

La' bila'rúajtë bö' xihui', en yöjcházagaca cuchi zián ni'.

Ní'irö yúgu'tëba' cuchi zián na' yöjbíxitëgacaba' ga naca lë'e guiöj, en yöjcházagacaba' lu nísado', ga ni' gula'yëpiba' nisa, en gulátiba'.

<sup>33</sup> Guládxinë' bönni' tu'yüé'-ba' cuchi na', ate' bulu'zxúnnajë'. Cate' bila'dxinë' lu yödzo, gula'guíxjö'ë yúgu'të lë na' guca quëgaquië' bönni' ni' gula'yú'u bö' xihui' légaquië'. <sup>34</sup> Ní'irö bila'rúaj bönachi lu yödzo ni', yöjtságagaquië' Jesús. Cate' bila'lé'enë' Lë', guláta'yüë' lahuë' uzë'ë lu xiyúgaquië' na'.

## 9

*Jesús ruúnë' tu bönni' nacú'unië' bin*

(Mr. 2:1-12; Lc. 5:17-26)

<sup>1</sup> Ní'irö bubenë' Jesús lë'e bárcodo', en gudödë' ia'tsölá'a nísado' ni', ate' budxinë' ga naca ladzë'. <sup>2</sup> Ni' dujuá'gaquië' tu bönni' nacú'unië' bin ga zoë' Jesús, zxoë' lu da'a yaga. Cate' bilé'enë' Jesús ca na' ta'yéajlë'ë bönni' ni Lë', gudxë' bönni' na' nacú'unië' bin, rnnë':

—Butipa ládxu'u, xzí'ina'do'. Chibuníti lahua' dul-la' nabágu'u.

<sup>3</sup> Nacu'ë ca' bönni' yudo' tu'sédinë' ni', ate' ta'nnë' lu icja ládxi'do'gaquië', ta'nnë': “Didza' ru'ë bönni' ni ruzóa Dios tsölá'alö.”

<sup>4</sup> Cate' réquibe'enë' Jesús le ta'zá' ládxi'gaquië', rë' légaquië':

—¿Bizx que rizá' ládxi'li' caní le cabí naca tsahui'? <sup>5</sup> Biti' naca böniga nu guiësö bönni' ni: “Yugu' dul-la' nabágu'u chibuníti lahua'”, pero naca böniga nu gun ga huóásë', en uzé'enë'. <sup>6</sup> Na'a, ulu'ida' libí'ili' neda', Bönni' Guljë' Bönachi, dë lu na'a yöl-la' unná bë' uniti lahua' dul-la' luyú ni.

Ní'irö Jesús gudxë' bönni' na' nacú'unië' bin, rnnë':

—Guyása. Buchisa da'a yaga quiu', en böaj lidxu'.

<sup>7</sup> Ní'irö la' guyásatë' bönni' na' nacú'unië' bin, en böajë' lidxë'. <sup>8</sup> Cate' bila'lé'enë' bönni' nacu'ë ni' lë ni, bulu'bábinë', ate' gula'gu'ë Dios yöl-la' ba tu' bunödziejë' yöl-la' huáca caní quégaca bönachi.

*Jesús rulidzë' Mateo*

(Mr. 2:13-17; Lc. 5:27-32)

<sup>9</sup> Cate' buzë'ë Jesús ni', bilé'enë' bönni' lë' Mateo, rö'ë ga na' ruquíxjë' uláz que yödzo zi'tu', ate' Jesús gudxë' lë':

—Gudá' neda'.

Ní'irö la' guyásatë' Mateo na', ate' sa'yéajlenë' Jesús.

<sup>10</sup> Ia'tú le guca, cate' ni' rö'ë Jesús rahuë' ga naca lidxë' Mateo, zián bönni' tu'quíxjë', en yugu' bönni' cá'asö bila'dxinë' ga zoë', ate' gula'bó'lenë' Jesús tsözxön len yugu' bönni' usëda queë'. <sup>11</sup> Cate' bönni' yudo' fariseo bila'lé'enë' lë ni, gula'nábinë' yugu' bönni' usëda queë' Jesús, ta'nnë':

—¿Naru' bönni' rusédinë' libí'ili' rágulentse' tsözxön bönni' tu'quíxjë', en iá'zica'rë' bönni' dul-la'?

<sup>12</sup> Cate' biyönnë' Jesús lë ni, rë' légaquië':

—Biti' naquíniguequinë' bönni' nácaqaquië' dxi'a nu un bönachi, pero bönni' té'enë' naquíniguequinë' nu un bönachi. <sup>13</sup> Guli'tséaj, en buli'sëda le rnna lë na' nazúaj lu guichi lá'ayi, le rnna caní: “Rë'ënda' ulu'huéchi'

ládxi'gaquië' bönni' luzá'agaquië', en calëga ilútië'-ba' böa' bëdxi lu bu-  
cugu lá'ayi quia'." Bida' ni, calëga para ulídzagaca'-në' bönni' tsahui', pero  
bida' para ulídzagaca'-në' bönni' dul-la' para ulu'bí'i ládxi'gaquië'.

*Rusédinë' Jesús ca ral-la' gunru' gubasa*

(Mr. 2:18-22; Lc. 5:33-39)

<sup>14</sup> Ní'irö bönni' dá'gaquië' Juan, bönni' na' buquilé' bönachi nisa,  
bila'dxinë' ga zoë' Jesús, ate' gula'nábinë' Lë', ta'nnë':

—¿Bizx que na' netu', enca' yugu' bönni' yudo' fariseo, zían luzuí runtu'  
gubasa, pero yugu' bönni' usëda quiu' Li' bití' tunë' gubasa?

<sup>15</sup> Bubi'ë didza' Jesús, en rë' légaquië':

—¿Naru' huácatsö ila'sëbi ládxi'gaca nupa nacuá' laní que yöl-la' rutsaga  
na' tsanni ni' bönni' rutsaga në'ë zóalenë' légaquië'? Za' dza cate' idué'  
bönni' na' rutsaga në'ë ga nacu'ë. Dza ní'irö ilunë' gubasa.

<sup>16</sup> Bucúdzü'ë didza' Jesús, rnnë':

—Cuntu nu un tu lari' tëbi len lari' cubi, tu' uxú'uni lari' cubi na' nugu'ë  
lari' tëbi na', ate' ichöza'rö lari' tëbi na'. <sup>17</sup> Lëasca' caní, cuntu nu bönni'  
riguë'ënë' xisi uva cubi tu lu buzudi guídi gula, tu' galaj ilëbi xisi uva cubi  
na', en uzzuxzaj buzudi guídi gula na', ate' gaca ditaj xisi uva na', ate'  
iníti ca' buzudi guídi na'. Rigá'aru' xisi uva cubi tu lu buzudi guídi cubi,  
ate' irópatë taca chí'i.

*Rubanbi' bi'i nigula queë' Jairo, en ruhuóacanu tu nigula gudannu lari'  
nácuë' Jesús*

(Mr. 5:21-43; Lc. 8:40-56)

<sup>18</sup> Tsanni ni' Jesús ruí'ilenë' légaquië' didza' ni, tu bönni' rinná bé'enë'  
bönachi judío bidxinë' ga zoë', ate' buzóa zxibë' lahuë' Jesús, en rë' Lë':

—Bi'i nigúlado' quia' la' gútitébi'. Gudá ixóa no'o lëbi', ate' ubanbi'.

<sup>19</sup> La' guzuítenë' Jesús, en sa'yéajlenë' lë'. Dzágagaquië' bönni' usëda queë'  
Lë'.

<sup>20</sup> Ní'irö bidxinnu tu nigula zaca' cúdzü'lë' Jesús, chiguca chinnu iz  
ré'enu, bití' ruhu'í rön queënu que huë' quégaca cázanu nigula, ate'  
gudannu lari' nácuë' Jesús. <sup>21</sup> Caní bennu tu' rizá' ládxi'nu, rnnanu:  
Channó cansa' zxë', huóaca'. <sup>22</sup> Ní'irö buécjé' Jesús, en ruyúë' lënu, ate'  
rë'ë-nu:

—Butipa ládxi'u, zxi'ina'do'. Chiböácateu' tu' réajlë'u neda'.

La' ná'asö böácateu'.

<sup>23</sup> Cate' bidxinë' Jesús lidxë' bönni' unná bë' na', bilé'enë' nacu'ë ni'  
bönni' tu'cödxë' gui, en nupa ta'bödxi yechi'. <sup>24</sup> Jesús rë' légaquië':

—Guli'cuita ni, tu' cabí nátibi' bi'i nigúlado' ni. Rásisibi' na'.

Ní'irö nupa nacuá' ni' bulu'titaj Lë'.

<sup>25</sup> Cate' chinubéajé' Jesús bönachi na' ní'ilö, guyázië', en gudélë'ë ná'abi'  
bi'i nigula na', ate' la' guyásatëbi'. <sup>26</sup> Guzë didza' ca guca lë ni, ate' bila'yöni  
bönachi nacuá' idütë luyú na'.

*Jesús ruúnë' bönni' nachul-la guiöj lógaquië'*

<sup>27</sup> Cate' Jesús burúajé' ni', chopë' bönni' nachul-la guiöj lógaquië'  
söjácalenë' Lë'. Tu'ë zidzaj didza', ta'nnë':

—Zxi'ini xi'sóë' David, buéchi' ladxi' netu'.

<sup>28</sup> Cate' bidxinë' Jesús ga naca lu yu'u, bila'dxinë' chopë' bönni' na'  
nachul-la guiöj lógaquië' ga zoë'. Jesús gunábinë' légaquië', rnnë':

—¿Ba réajlë'ëli' neda', huáca una' libí'ili'?

Légaquië' ta'nnë':

—Ön, Xan.

<sup>29</sup> Ní'irö Jesús gudanë' guiöj lógaquië', ate' rnnë':

—Ca réajlë'ëli', ca' gaca queéli'.

<sup>30</sup> La' böálatë guiöj lógaquië'. Ní'irö Jesús buzenë' bach légaquië', rnnë':

—Guli'gü'ítica'só ládxi'li' cuntu nu inözi lë ni.

<sup>31</sup> Cate' bulu'rúajë' ni', la' bulu'zëtë' didza' idütë luyú ni' ca naca lë na' benë' Jesús.

*Jesús ruúnë' tu bönni' biti' ru'ë didza'*

<sup>32</sup> Cate' Jesús, en yugu' bönni' usëda queë' bulu'rúajë' tu lu yu'u, bila'dxinë' bönni' ga zoë' Jesús nachë'gaquië' lahuë' tu bönni' biti' ru'ë didza', tu' yu'u lë' bö' xihui'. <sup>33</sup> Cate' bubéajë' Jesús bö' xihui' na', la' gunnëtë' bönni' na' biti' guca gu'ë didza'. Bulu'báinë' bönni' nacu'ë ni', ta'nnë':

—Catu caz rilé'etu' le caní ladaj bönachi Israel.

<sup>34</sup> Ní'irö bönni' yudo' fariseo gula'nnë' queë' Jesús, ta'nnë':

—Bönni' ni rubéajë' yugu' bö' xihui', rugunë' dxin yöl-la' unná bë' que xángaca bö' xihui' na'.

*Jesús ruhuéchi' ládxë'ë bönachi zían*

<sup>35</sup> Gudë' Jesús idú gásibi'ilö gapa nacua' yödzö zxön, en gapa nacua' yödzodo', ate' gapa naca lu yu'u ga tu'dubë' tu'sëdë' bönni' judío queë' Dios. Rusédinë' Jesús bönachi nacua' ni', en runë' libán que didza' dxi'a ca rinná bë'ë Dios. Bunë' yúgu'të nupa bi ta'guí' ta'zaca' yugu' lu yödzö na'. <sup>36</sup> Cate' Jesús bilé'enë' bönni' zían ni', buéchi' ládxë'ë légaquië', tu' ta'guí' ta'záquië', en nudú ládxi'gaquië' ca raca quegacaba' bö'cu' zxila' biti' zoa nu ruyú légacaba'. <sup>37</sup> Ní'irö Jesús rë' yugu' bönni' usëda queë', rnnë':

—Le nácatë dëda' yöla, pero nabábasö nupa tu'lapa. <sup>38</sup> Que lë ni na', guli'gáta'yu lahuë' Dios, náquië' Xan yöla na', inábili'-në' isöl-lë'ë bönni' huen dxin ulu'lapë' yöla queë'.

## 10

*Jesús riböë' bönni' ilácagaquië' gubáz queë'*

(Mr. 3:13-19; Lc. 6:12-16)

<sup>1</sup> Ní'irö bulidzë' Jesús idxínnutë' bönni' usëda queë', en budödë' lu ná'agaquië' yöl-la' unná bë' para ulu'béajë' bö' xihui' yú'ugaca bönachi, en ulu'ünë' yúgu'të nupa te'e, en yúgu'të nupa bi ta'guí' ta'zaca'.

<sup>2</sup> Caní naca lágaquië' idxínnutë' gubáz na' nasöl-lë'ë Jesús:

Simón, (lë' ca' Pedro),

Andrés, (böchë'ë Simón na'),

Jacobo, (zxí'inë' Zebedeo),

Juan, (böchë'ë Jacobo na'),

<sup>3</sup> Felipe, Bartolomé, Tomás,

Mateo, (bönni' uquízaxaj),

Jacobo, (zxí'inë' Alfeo),

Lebeo, (lë' ca' Tadeo),

<sup>4</sup> Simón, (bönni' ruí'i ládxë'ë yödzö queë'),

Judas Iscariote, (bönni' udödë' Jesús lu ná'agaquië' bönni' ilütië' Lë').

*Jesús risöl-lë'ë gubáz queë' tsöjéngaquië' libán*

(Mr. 6:7-13; Lc. 9:1-6)

<sup>5</sup> Ní'irò Jesús gusól-lè'è idxínnutè' bõnni' ni tsõjéngaquiè' libán, ate' gunná bé'enè' légaquiè', rnnè':

—Biti' tséajli' ga nacuá' bõnachi biti' nácagaca judío, en biti' tsú'uli' ládzagaca bõnachi nacuá' luyú Samaria. <sup>6</sup> Guli'tséaj ga nacuá' bõnachi Israel, nácagaciè' ca bö'cu' zxíla'do' nanítigacaba'. <sup>7</sup> Guli'tsójén libán, innali': "Chibidxín gala' dza Dios, Nu na' zoa yehua' yubá, inná bè'è luyú ni." <sup>8</sup> Buli'ún nupa te'e. Buli'ún dxi'a nupa te'e huè' nudzu' ruzödi. Buli'subán nupa chinátigaca. Buli'béaj bö' xihui' yú'ugaca bõnachi. Bénna'sa' queéli' yöl-la' unná bè' ni. Buli'gún dxin le, en biti' bi uquízxjali'.

<sup>9</sup> 'Biti' bi guá'ali' lu buzudi queéli', calèga dumí oro, en calèga dumí plata, en calèga dumí lásido'. <sup>10</sup> Biti' guá'ali' yõxaj yõta queéli' le gáguli' la' nõza. Tuz lari' ixóa yenli', en biti' guá'ali' xiráchuli' o xiyaga queéli', tu' idzõli quézínè' bõnni' huen dxin le gahuè'.

<sup>11</sup> 'Gáti'tès yõdzõ zxõn o yõdzõdo' ga idxinli', guli'naba nuzxi naca idú ladxí' lu yõdzõ ni', ate' ugá'anali' lidxi nu na' cate' gála'rõ dza urúajli' yõdzõ na'. <sup>12</sup> Cate' tsú'uli' tu lu yu'u, buli'gapa Dios bõnachi nacuá' lu yu'u na', inábili'-nè' Dios unõdzjè' quégaquiè' le cuéqui dxi icja ládxi'do'gaquiè'. <sup>13</sup> Channõ bõnachi nacuá' lu yu'u ni' nácagaca lesaca', ugá'analen le ribequi dxi ladxí' na' léguequi, pero channõ bõnachi na' cabí nácagaca lesaca', inábali' cabí ugá'ana lè na' ribequi dxi ladxí' len léguequi. <sup>14</sup> Gáti'tès ga idxinli' ga bõnachi ni' biti' ilún libí'ili' bal, en biti' ulu'zè nagui xtídz'a'li', buli'rúaj lu yu'u ni' o yõdzõ ni', ate' guli'cuíbi bèchtõ da' lè'e lálali', le ulu'í léguequi nabága'gaca xíguia'. <sup>15</sup> Le nácate' rea' libí'ili', cate' idxín dza ichúguíè' Dios quégaca bõnachi, ila'gu'í ila'záca'rõ bõnachi yõdzõ na' ca ila'gu'í ila'záca' bõnachi gula'cuá' yõdzõ Sodoma, en yõdzõ Gomorra, nupa ni' busunítie' Dios.

*Nupa biti' ta'yéajlè' ulu'saca' zi' nupa dá'gaca Cristo*

<sup>16</sup> Gunnè' ca' Jesús:

—Buli'yútsõca', neda' risól-la'a libí'ili', ate' gácali' ca bö'cu' zxíla'do' ta'daba' ga dzõ'õba' bö'cu' gu'a sínia'. Guli'gaca sina' ca nácagacaba' sina' bèla sínia', pero guli'gaca ca' nõxaj ladxí' ca nácagacaba' gu'dõdo'. <sup>17</sup> Guli'gún chí' cuinli' quégaca bõnachi, tu' ulu'dödè' libí'ili' lu ná'agaquiè' bõnni' yúlahui', en ila'guínè' libí'ili' gapa naca lu yu'u ga tu'dubè' tu'sèdè' bõnni' judío queè' Dios. <sup>18</sup> Lèsca' caní, ila'ch'è' libí'ili' lógaquiè' bõnni' lo, en lógaquiè' bõnni' ta'nná bè'è, tu' dá'ali' neda'. Caní gaca para gaca gunlí' ba nalí quia' lógaquiè' bõnni' ni', en lógaquiè' bõnni' biti' nácagaquiè' judío. <sup>19</sup> Ní'irò cate' ulu'dödè' libí'ili' lu ná'agaquiè' bõnni' unná bè' na', biti' cõ'õli' bõniga nacxi innali', tu' ichizè' Dios icja ládxi'do'oli' didza' gu'í'ili', en ca innali' la' dza ná'asõ. <sup>20</sup> Calèga libí'isili' na' innali', pero Dios Bõ' Lá'ayi, Nu na' risól-lè'è Xúziru' Dios queéli', Lè cazè' sóalenè' libí'ili', en gu'è didza'.

<sup>21</sup> 'Ila'cuá' bõnachi ulu'dõdi bóchi'guequi lu ná'agaquiè' bõnni' ilútiè' légaquiè', en lèsca' caní, bõnni' nácagaquiè' xuz ulu'dödè' zxi'inigaquiè', ate' ila'cuá'abi' bi'í ila'dá'baga'bi' xúzgacabi', en ilunbi' ga ilátiè' xúzgacabi' na'. <sup>22</sup> Yúgu'tè bõnachi ulu'zõa libí'ili' tsólá'alõ tu' dá'ali' neda', pero nu ugá'ana tsutsu ga idxinrõ dza údxi, nu ni ulá. <sup>23</sup> Cate' ulu'saca' zi' bõnachi libí'ili' tu lu yõdzõ, buli'zxunnaj ni', ate' tséajli' ia'tú yõdzõ, tu' rea' libí'ili', huõda' neda', Bõnni' Guljè' Bõnachi, zí'alõ cate' údxi gunlí' libán gapa nacuá' yugu' yõdzõ quégaca bõnachi Israel.

<sup>24</sup> 'Núti'tës bönni' náquië' bönni' usëda bití' nácarë' lo ca nu rusëdi lë', en lësca' caní, nu bönni' náquië' huen dxin bití' nácarë' lo ca xanë'. <sup>25</sup> Nu na' naca bönni' usëda ral-la' udzëjanë' channö huadéli'në' gáquië' ca naca nu rusëdi lë', ate' bönni' huen dxin na' ral-la' udzëjanë' channö gáquië' ca naca xanë'. Channö ta'nnë' quia' neda', bönni' xan yu'u, ta'nnë' naca' Belzebú tu' xihui', ila'nnë' zí'irë' quégaca bönachi tá'gaquië' neda'.

*Nu ral-la' gádxiru'*

*(Lc. 12:2-9)*

<sup>26</sup> Gunnë' ca' Jesús:

—Que lë ni na', bití' gádxili' bönachi. Hualá' lahui yúgu'të le raca bëdxi lándö'os, ate' huáca bë' yúgu'të le nagachi'. <sup>27</sup> Yugu' didza' ru'í'lena' libí'ili' ga naca chul-la, guli'quixjö' ga naca lu bení', ate' le rea' libí'ili' ga nagachi', guli'nnë' zidzaj ga naca lahui' lógaca bönachi. <sup>28</sup> Bití' gádxili' nupa tuti le náca gaca caz bönachi, pero bití' gaca ulu'suniti bö' naca cázaru'. Guli'gadxi Dios, Bönni' na' gaca gútië' idútë le nácali', en chú'unë' bö' naca cázali' lu gu' gabila.

<sup>29</sup> 'Ta'dá'uba' chópaba' biguínido' len tu dumí lásido', pero bití' ibíxiba' tuba' lu yu channö cabí ru'ë Xúziru' Dios lataj gaca caní. <sup>30</sup> Lësca' caní, nabábagaca yúgu'të guitsa' ícjali' lahuë' Dios. <sup>31</sup> Que lë ni na', bití' gádxili'. Ru'itërö ládxë'ë Dios libí'ili' ca ru'í' ládxë'ë-ba' zianba' biguínido'.

*Yugu' bönni' ta'zí' lu ná'agaquië' Cristo lógaca bönachi*

*(Lc. 12:8-9)*

<sup>32</sup> Gunnë' ca' Jesús:

—Nu bönni' si' lu në'ë neda' lógaca bönachi, neda' si' lu na'a bönni' na' lahuë' Xuza' zoë' yehua' yubá. <sup>33</sup> Bönni' ta'dá'baguë'ë lógaca bönachi, ila'nnë' bití' ta'dë'ë neda', lësca' caní neda' tá'baga'a légaquië' lahuë' Xuza' zoë' yehua' yubá.

*Jesús náquië' le run ga ila'ru'aj choplö bönachi*

*(Lc. 12:51-53; 14:26-27)*

<sup>34</sup> Gunnë' ca' Jesús:

—Bití' guéquili' za'a idigu'a le ribequi dxi bönachi yödzöliö ni. Bití' za'a idigu'a le ribequi dxi, pero za'a idigu'a le gun ga ila'ru'aj choplö bönachi. <sup>35</sup> Za'a ni, ate' guna' ga ila'dá'baga' bönachi xúzguequi, ate' yugu' nigula ila'dá'baga'nu ca' xiná'agacanu. Lësca' caní, yugu' nigula zxoá' lídxigacanu ila'dá'baga'nu xto' zxi'ininu. <sup>36</sup> Caní gaca, la' di'a dzasö quégaca bönachi ulu'saca' zi' luzë'eguequi.

<sup>37</sup> 'Nu nadxí'irö xuz xinë'e ca nadxí'i neda', bití' naca bachi nu na' ta' neda', ate' nu nadxí'irö bi'i bönni' que o bi'i nigula que ca nadxí'i neda', bití' naca bachi nu na' ta' neda'. <sup>38</sup> Nu bití' si' lu në'e gaca ca tu bönni' söjtë'ë lë'e yaga cruz, en ta' neda', bití' naca bachi guequi quia' neda'. <sup>39</sup> Nu ru'í' ladxi' gun chí'i yöl-la' na'bán que, uniti le, pero nu uniti yöl-la' na'bán que tu' da' neda', ulá nu na'.

*Yugu' le ubi'ë Dios queëru'*

*(Mr. 9:41)*

<sup>40</sup> Gunnë' ca' Jesús:

—Nu gun libí'ili' bal, neda' ca' gun bal, ate' nu na' gun neda' bal, gun bal ca' Dios Xuz nasöl-lë'ë neda'. <sup>41</sup> Nu gun bal tu bönni' ru'ë didza' uláz queë' Dios tu' ru'ë didza' uláz queë' Dios, huadeli' nu na' lu në'ë Dios la' leze na' idéli'në' bönni' ru'ë didza' uláz queë' Dios. Lësca' caní, nu gun bal

tu bönni' tsahui' tu' náquië' bönni' tsahui', huadeli' nu na' lu në'ë Dios la' leze na' idéli'në' bönni' tsahui'. <sup>42</sup> Núti'tës nu unödzej queë' tu bönni'do' ni tu zxibíndo'os nisa tu' náquië' bönni' usëda quia' neda', le nácatë rea' libí'ili', biti' uniti nu na' le ral-la' si' lu në'ë Dios.

## 11

*Ta'dxinë' bönni' nasöl-lë'ë Juan ga zoë' Jesús  
(Lc. 7:18-35)*

<sup>1</sup> Cate' Jesús budxi buzéajni'inë' yugu' bönni' usëda queë', buzë'ë ni', sa'yéajë' röjsédinë' bönachi, en röjenë' libán yugu' lu ládzagaca bönachi na'.

<sup>2</sup> Juan, bönni' buquilé' bönachi nisa, ni' yu'ë lidxi guië, ate' biyönnë' ca nácagaca le runë' Jesús. Ní'irö Juan na' gusöl-lë'ë chopë' bönni' dá'gaquië' lë', ate' bila'dxinë' ga na' zoë' Jesús. <sup>3</sup> Chopë' ni gula'nábinë' Jesús, të' Lë':

—¿Nacu' Li' Cristo, Bönni' na' ral-la' idxinë' yödzülió ni, o ral-la' cöztu' dza idxinë' ia'túë' bönni'?

<sup>4</sup> Bubi'ë didza' Jesús, rë' légaquië':

—Guli'tséaj tsójtíxjöi'ili'-në' Juan lë ni riyónili', en rilé'eli'.

<sup>5</sup> Guli'tsójödxë' ca raca, tu'lé'enë' bönni' guchul-la guiöj lógaquië', ate' tu'zë'ë bönni' biti' guca ila'dé'. Nuhuóácagaquië' bönni' gui'iguequinë' huë' nudzu' ruzödi, ate' ta'yönnë' bönni' gula'códzuë'. Nnita' nabángaqüië' bönni' gulatië', ate' raca libán que didza' dxi' a lógaca bönachi yechi'. <sup>6</sup> Bica' ba nu bönni' biti' gáquië' chopá ládxe'ë, biti' ubéaj ládxe'ë neda'.

<sup>7</sup> Cate' yugu' bönni' na' dá'gaquië' Juan bulu'zë'ë söjhuöjgaquië', ní'irö gusí lahuë' Jesús ru'ilenë' bönachi nacuá' ni' didza' ca naca queë' Juan na'. Rë' légaquië':

—¿Bizxi gú'unili' ilé'eli' cate' ni' guyéajli' lu lataj cá'asö? ¿Naru' gú'unili' ilé'eli'-në' tu bönni' náquië' ca tu gui ruzecaj bö' recja le? <sup>8</sup> Channö cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' nácüë' lari' dxí'ado'? Nöz quézili' bönni' nácugaquië' lari' dxí'ado' nacu'ë lídxiagaquië' bönni' ta'nná bë'ë. <sup>9</sup> Channö cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' ru'ë didza' uláz queë' Dios? Ca' naca, réquida'. Rea' libí'ili', bilé'eli'-në' tu bönni' nácatërë' lo ca ia'zica'rë' bönni' gulu'ë didza' uláz queë' Dios. <sup>10</sup> Caní naca, tu' náquië' Juan bönni' na' ru'í didza' le nazúaj lu guichi lá'ayi ca naca queë', le rnna:

Buyú, risöl-la'a bönni' gubáz quia', inöruë' ca Li'.

Lë' upë'ë nöza ga tödu'.

<sup>11</sup> Le nácatë rea' libí'ili'. Idútë yödzülió ni, cuntu nu zoa nácarö lo ca Juan, bönni' ni' buquilé' bönachi nisa, pero nu naca cuídi'do'os ga rinná bë' Nu na' zoa yehua' yubá nácatërö lo ca Juan na'.

<sup>12</sup> Cate' ni' gusí lahuë' buquilé' Juan bönachi nisa, ga ridxintë na'a dza, bayudxi túngaca bönachi para ta'yaza ga rinná bë'ë Bönni' na' zoë' yehua' yubá, ate' nupa tunsö bayudxi ta'deli' le. <sup>13</sup> Ga bidxintë dza na' blë'ë Juan, le rinná bë' xibá queë' Moisés, en le bulu'zúajë' lu guichi yúgu'të bönni' gulu'ë didza' uláz queë' Dios gulu'í didza' ca rinná bë'ë Bönni' na' zoë' yehua' yubá. <sup>14</sup> Channö rë'ënili' si' lu ná'ali' lë ni, ral-la' inözili' Juan na' náquië' Elías, bönni' ni' bë'ë didza' uláz queë' Dios, bönni' na' Dios gunnë' ral-la' ilá' lahuë' leyúbölö dza ni zóaru' na'a. <sup>15</sup> Nu zoa nagui, en riyöni ral-la' uzë nagui.

<sup>16</sup> ¿Bizxi ubéqui'tseda' ca nácagaca bönachi nacuá' dza ni zóaru' na'a? Nácagaquië' ca yugu' bí'ido' ta'bö'öbi' lu yë'ëyi. Zidzaj tu'lídzabi'

luzá'agacabi', <sup>17</sup> ta'nnabi': "Rucódxitu' queéli' gui. ¿Bizx que bití' ruyá'ali'? Rul-la yéchi'tu' queéli'. ¿Bizx que bití' ribödxí yéchi'li'?" <sup>18</sup> Caní nácali', tu' bidé' Juan, ate' tu' cabí' gú'í' gudahué' ca ráguli' libí'ili', gunnëli' queé', gunnali': "Tu' xihui' dzágui lë'." <sup>19</sup> Ní'irö bidxina' neda', Bönni' Guljé' Bönachi, ate' re'aj rahua', ate' rnnëli' quia', rnnali': "Náquié' bönni' huágulë'ë, en bönni' re'jé'. Náquié' luzá'agaquié' bönni' uquízxaj, en ia'zica'rö huen dul-la'." Yöl-la' réajni'i queé' Dios naca bé' ní'a que le tun nupa ta'zí' lu né'eguequi le.

*Le gaca que nu bití' run ca rnna xtídzë'ë Dios*  
(Lc. 10:13-15)

<sup>20</sup> Ní'irö gusi lahué' Jesús ruzenë' bach bönachi naca' yugu' yödzö gapa ní' benë' zían yöl-la' huáca, tu' cabí' tu'bf'ini ládxi'guequi. <sup>21</sup> Gudxë' léguequi:

—Bica' bayechi' libí'ili', bönachi Corazín. Bica' bayechi' libí'ili', bönachi Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca bena' ga zóali', dza ní'tëlö ulu'bf'i ládxi'gaca bönachi yödzö Tiro, en yödzö Sidón na', en ilácugaca lari' tēbi, en ulu'dxía dō ícjaguequi, le ulu'luf'i tu'bf'i ládxi'gaca bönachi na'. <sup>22</sup> Na'a, neda' rea' libí'ili', cate' idxín dza ichúguié' Dios quégaca bönachi, quí'í sáca'röli' libí'ili' ca ila'guf'i ila'zaca' bönachi yödzö Tiro, en yödzö Sidón, nupa na' busunítië' Dios. <sup>23</sup> Libí'ili', bönachi Capernaum, guca queéli' ca bidxintëli' ga nu riyaza yehua' yubá. Huótjali' lu guí' gabila. La'tu' gulaca yugu' yöl-la' huáca bena' ga zóali' lu yödzö Sodoma, ulu'gá'ana bönachi yödzö ní' ga ridxintë na'a dza. <sup>24</sup> Na'a, neda' rea' libí'ili', cate' idxín dza ichúguié' Dios quégaca bönachi, quí'í sáca'röli' libí'ili' ca ila'guf'i ila'zaca' bönachi Sodoma na'.

*Rnnë' Jesús: "Guli'dá ga zoa', uzí' ládxi'li'"*  
(Lc. 10:21-22)

<sup>25</sup> Dza na' bé'ë didza' Jesús, rnnë':

—Xuza', nacu' Xani yehua' yubá, en Xani luyú ni. Rigu'a Li' yöl-la' ba, tu' bucáchu'u lë ni, para cabí' ila'lé'enë' bönni' ta'yéajni'ide'enë' le, pero buluf'inu' nupa nácacaca ca yugu' bf'ido' le. <sup>26</sup> Ca' gaca, Xuza', tu' caní guyaza ládxi'u Li'. <sup>27</sup> Yúgu'të nudödë' Xuza' lu na'a. Cuntu nu nunbë' neda', Xzí'inë' Dios, pero tuzë' Dios Xuz, en cuntu nu nunbë' Dios Xuz, pero tuza' neda', Xzí'inë' Dios, enca' nupa na' ré'ënda' uluf'ida' léguequi Dios Xuz. <sup>28</sup> Guli'dá ga zoa' yúgu'tëli' röjxéqui'li' tu' rúntica'sili' dxin que yöl-la' yudo', en nuá'ali' yua' zí'í quégaca xibá que, ate' neda' guna' ga uzí' ládxi'li'. <sup>29</sup> Lu yöl-la' nōxaj lādxi' queéli' guli'gún xichina', gácali' ca bēdxi ta'z'í'iba' yugu' quégacaba'. Guli'sēda lu na'a neda', tu' naca' nōxaj lādxi', en do' lādxi', ate' idzöli yöl-la' ruzí' lādxi' queéli', le cuéqui dxi ládxi'li'. <sup>30</sup> Yugu' na' ugu'a libí'ili', le naca le inná bé'ēda' libí'ili', bití' naca böniga, ate' yua' ugu'a libí'ili' le naca le rusédida', dzá'do'os naca.

## 12

*Ta'lecjé' do bönni' usēda queé' Jesús dza lá'ayi*  
(Mr. 2:23-28; Lc. 6:1-5)

<sup>1</sup> Dza ní', le naca dza lá'ayi quégaquié' bönni' judío, gudödë' Jesús gapa dë yöla xzoa' xtila, ate' ta'dunë' bönni' usēda queé', en gusí lógaquié' ta'lecjé' do ga dxía xzoa' xtila, en tahué' xzoa' xtila na'. <sup>2</sup> Cate' bila'lé'enë' bönni' yudo' fariseo lë ni, tē' Jesús:



—Buyútsöca, tunë bönni usëda quiu' le cabí ral-la' gunru' dza lá'ayi.

<sup>3</sup> Ní'irö Jesús gudxë légaquië':

—¿Naru' cabí nulábanili' lu guichi lá'ayi bi benë David cate' gudunë, ate' gula'dún ca' nupa gula'cuá'len lë'? <sup>4</sup> Guyu'ë lu yu'u queë Dios, en gadahuë' yugu' yôta xtila nagú'ugaquië' lu bucugu lá'ayi, le cabí ral-la' gahuë' lë', en biti' ral-la' ilahuë' bönni' gula'cuá'lenë' lë', pero légacsë bixúz dë lataj ilahuë' le. <sup>5</sup> ¿Naru' cabí nulábanili' le rinná bë' xibá queë' Moisés ca tunë bixúz yugu' dza lá'ayi? Tunë dxin lö'a yudo' yugu' dza lá'ayi, en biti' ta'báguë'ë xíguia'. <sup>6</sup> Na'a, neda' rea' libí'ili', zoa' neda' ni, en naca' bönni' nácarë' lo ca yudo'. <sup>7</sup> Biti' réajni'ili' lë na' nazúaj lu guichi lá'ayi, le rnna: “Ré'ënda' huéchi' láchli' luzá'ali', en calëga gútigacali'-ba' böa' bédxido' ruzëgu'gacali'-ba' lu bucugu lá'ayi quia'.” La'tu' réajni'ili' lë ni, biti' ichúguli' quégaca nupa biti' nabága'gaca xíguia'. <sup>8</sup> Ca' naca, tu naca' neda', Bönni' Guljë' Bönachi, Xani dza lá'ayi.

*Jesús ruúnë' tu bönni' narequi' në'ë*

(Mr. 3:1-6; Lc. 6:6-11)

<sup>9</sup> Ní'irö buzë'ë Jesús ni', ate' guyu'ë lu yu'u ga tu'dubë' bönni' judío, en tu'sedë' queë' Dios. <sup>10</sup> Lu yu'u na' zoë' tu bönni' narequi' në'ë, ate' tu' té'ënnë' bönni' judío unná bë' ila'dzölinë' bi ulu'zëgu'ë Jesús didza', que lë ni na' gula'nábinë' Lë', ta'nnë':

—¿Naru' dë lataj unru' nu re'e cate' naca dza lá'ayi?

<sup>11</sup> Bubi'ë didza' Jesús, rë' légaquië':

—Nu bönni' nútsë'ë ladjali', channö zóaba' tuba' bö'cu' zxila' queë', en channö ibíxiba' lu yeru cate' naca dza lá'ayi, ¿naru' cabí tsöjxönë'-ba', en tsöjléajë'-ba'? <sup>12</sup> Nazáca'tërë' tu bönni' ca tuba' bö'cu' zxila'. Que lë ni na', dë lataj gunru' le naca dxi'a quégaca bönachi cate' naca dza lá'ayi.

<sup>13</sup> Ní'irö Jesús gudxë' bönni' huë' na':

—Bulí no'o.

Cate' bulí në'ë, la' böácatë dxi'a ca naca ia'tsölá'a në'ë.

<sup>14</sup> Ní'irö bulu'rúajë' bönni' yudo' fariseo na', ate' gulún xtídza'gaquië' para gaca ilútië' Jesús.

*Le gunné' tu bönni' bë'ë didza' uláz queë' Dios ca ral-la' gaca queë' Jesús*

<sup>15</sup> Cate' réquibe'enë' Jesús lë ni, buzë'ë ni', ate' sójacalen bönachi zían Lë'. Jesús bunë' yúgu'të nupa te'e ladaj bönachi na', <sup>16</sup> en gunná bé'enë' léguequi biti' usiyönguequi bönachi Nu náquië'. <sup>17</sup> Caní gunné', para gaca lë na' gunné' Isaías, bönni' bë'ë didza' uláz queë' Dios, gunné':

<sup>18</sup> Bulí'yútsöca', Bönni' ni náquië' Huen Dxin quia', na' guró caza' neda' Lë'.

Nadxí'ida' Lë', en raza láchxa'a Lë'.

Ichiza' Lë' Bö' Lá'ayi.

Lë' usiyönnë' yúgu'të bönachi ca guna', uchi'a usöróa' quéguequi.

<sup>19</sup> Cuntu nu tíl-lalenë' didza', en biti' ulidzë' zidzaj.

Cuntu nu yöni chi'ë ga naca zí'tu'.

<sup>20</sup> Tu guído' zoa bö' biti' quítsjë' le, ate' guí' chizóa ulu, biti' usúluë' le, cate' uzóarë' le naca tsahui' queë'.

<sup>21</sup> Yúgu'të bönachi ilún löza Lë'.

*Ta'nnë' bönni' judío unná bë': "Dzaga Jesús tu' xihui'"*

*(Mr. 3:19-30; Lc. 11:14-23; 12:10)*

<sup>22</sup> Ní'irö dujuá'gaquië' tu bönni' ga zoë' Jesús, nachul-la lahuë', en biti' raca gu'ë didza', tu' yu'u bö' xihui' lë', ate' Jesús bunë' bönni' na'. Caní guca, rilé'enë', en ru'ë didza' bönni' na' guchul-la lahuë', en biti' guca gu'ë didza'. <sup>23</sup> Que lë ni na' bulu'bani yúgu'të bönachi nacuá' ni', ta'nná:

—¿Naru' nácatsë' bönni' ni Zxí'ini Xi'sóë' David, Bönni' na' ral-la' guídë'?

<sup>24</sup> Cate' bila'yönnë' bönni' yudo' fariseo lë ni, ta'zá' ládxe'ë, ta'nnë': Bönni' ni rubéajë' yugu' bö' xihui' tu' dzaga Beelzebú tu' xihui', xángaca bö' xihui', Lë'.

<sup>25</sup> Réquibe'enë' Jesús lë na' ta'zá' ládxi'gaquië', ate' rë' légaquië':

—Gáti'tës ga ta'nná bë' bönachi, channö bönachi ni' ila'rúaj choplö, en ila'díl-lalen luzé'eguequi, iníti yöl-la' unná bë' queguequi. Lësca' caní, channö ila'rúaj choplö bönachi nacuá' tu yödzo o tu yu'u, en ila'díl-la, biti' gaca ila'día' bönachi nacuá' yödzo na' o yu'u na'. <sup>26</sup> Lësca' caní, channö ubéaj Satanás tu' xihui' la' luzé'esö, ate' yugu' bö' xihui' na' ila'díl-lalen la' léguequisö, ¿naru' idía' yöl-la' unná bë' que tu' xihui'? <sup>27</sup> Rnnali' quia' rubéaja' yugu' bö' xihui' tu' dzaga Beelzebú tu' xihui' neda'. Channö runa' caní, ¿nuzxi dzaga nupa dá'gaca libí'ili' cate' tu'béaj yugu' bö' xihui'? Que lë ni na' le túngaca caz naca bë' nachíxili'. <sup>28</sup> Na'a, channö neda' rubéaja' yugu' bö' xihui' tu' zóalen yöl-la' huáca queë' Dios Bö' Lá'ayi neda', le nácatë chibidxín le rinná bë'ë Dios ga zóali'.

<sup>29</sup> ¿Naru' huácatsö nu bönni' tsu'ë lidxe' bönni' nal-la, en cuéajë' yöl-la' tsahui' dzö'ö lidxe' channö cabí gúguë'ë bönni' nal-la na' zí'aló? Ní'irö gaca tsu'ë, en ulatjë' lidxe' bönni' nal-la na'.

<sup>30</sup> Nu biti' run neda' tsözxön, ridá'baga' neda', en nu biti' rutubi tsözxön len neda', rusilasi nu na'.

<sup>31</sup> Que lë ni na' rea' libí'ili', ca naca yúgu'të dul-la' tun bönachi, en yugu' didza' xihui' ta'nná, uniti lahuë' Dios léguequi, pero nu bönni' innë' zi'ë queë' Dios Bö' Lá'ayi, biti' ca' uniti lahuë' Dios lë'. <sup>32</sup> Lësca' caní, nu bönni' innë' quia' neda', Bönni' Guljë' Bönachi, Dios uniti lahuë' lë', pero nu bönni' innë' queë' Dios Bö' Lá'ayi, biti' ca' uniti lahuë' Dios lë'. Biti' uniti lahuë' lë' dza ni zóaru' na'a, en biti' uniti lahuë' lë' dza si' za'.

*Le runru' naca bë' le nácaru'*

*(Mt. 7:15-20; Lc. 6:43-45)*

<sup>33</sup> Gunnë' ca' Jesús:

—Channö naca dxi'a tu yaga, cuía le naca dxi'a, pero channö naca cá'asö yaga na', cuía ca' le naca cá'asö. Caní naca, le ribía tu yaga naca bë' yaga na'. <sup>34</sup> Libí'ili' nácali' di'a dza quégacaba' bëla sínia'. ¿Nacxi gaca gü'ili' dxi'a didza', channö cabí nácali' dxi'a? Ca naca le ta'zá' ládxi'gaca bönachi, lësca' caní tu'í didza'. <sup>35</sup> Tu bönni' tsahui' ru'ë didza' tsahui' tu' yu'u le naca tsahui' icja ládxi'da'ahuë', pero tu bönni' huiá' dö' ru'ë didza' biti' naca tsahui' tu' yu'u le cabí naca tsahui' icja ládxi'da'ahuë'. <sup>36</sup> Que lë ni na' rea' libí'ili', cate' idxín dza ichúguië' Dios quégaca bönachi, uchi'a usöröë' tu tu bönni' ca naca yúgu'të didza' gula'nnazë' ca'. <sup>37</sup> Ca naca didza' ru'u, uchi'a usöröë' li', ate' uruju' tsahui' o ibágu'u xíguia' ni'a que didza' na' bë'u.

*Ta'nábinë' Jesús gunë' le gaca bë' nu náquië'*

*(Mr. 8:12; Lc. 11:29-32)*

<sup>38</sup> Ní'irö bulu'bi'ë didza' yugu' bönni' yudo' fariseo, en yugu' bönni' yudo' tu'sédinë', en tē' Jesús:

—Bönni' Usedi, ré'ënitu' ilé'etu' tu le gunu' le gaca bē' dē lu no'o yöl-la' unná bē'.

<sup>39</sup> Bubi'ë didza' Jesús, en rē' légaquië':

—Yugu' bönni' tuá' dö' ni, biti' zoa idú ládxi'do'gaquië', ta'nábinë' neda' guna' tu le gaca bē' nu naca'. Biti' bi le gaca bē' ila'lé'enë', pero le naca bē'sö na' ca guca queë' Jonás, bönni' bē'ë didza' uláz queë' Dios. <sup>40</sup> Ca na' guca queë' Jonás na', bugá'anë' lē'ëba' tu böla zxon idú tsonna dza tsonna yēla, lēasca' caní gaca quia' neda', Bönni' Guljē' Bönachi, tsonna dza tsonna yēla ugá'ana' zzan yu. <sup>41</sup> Ila'yasë' bönni' gula'cu'ë yödzö Nínive dza ichúguië' Dios quégaca bönachi cate' uchi'a usöröë' bönachi nacua' dza ni zóaru' na'a, ate' le gulunë' usubaga' bönachi ni xigua' tu' bulu'bí'i ládxi'gaquië' bönni' Nínive na' cate' ni' busiyönnë' Jonás légaquië' xtídzë'ë Dios, ate' na'a zoa' ni neda', en nácatëra' lo ca Jonás na'. <sup>42</sup> Lēasca' caní, nigula ni' gunná bé'enu yödzö dē saca' ga ridödi gubidza beo' ziaga chásanu dza ichúguië' Dios quégaca bönachi cate' uchi'a usöröë' bönachi nacua' dza ni zóaru' na'a, ate' le bennu usubaga' légaquië' xigua', tu' birúajnu nigula na' ga nácatëro' zi'tu' para yóninu didza' réajni'i bē'ë Salomón, ate' na'a zoa' ni neda', en nácatëra' lo ca Salomón na'.

*Cate' rudxín tu bö' xihui' xilataj*

*(Lc. 11:24-26)*

<sup>43</sup> Gunnë' ca' Jesús:

—Cate' rirúaj tu bö' xihui' yu'u bönni', ridá gapa nabidxi, riguila'j ga uzí' ladxi'. Channö cabí idzöli ga na' uzí' ladxi', <sup>44</sup> ní'irö inná: "Huója' xilatja' ga ni' birúaja'." Cate' udxín ga ni' birúaj, tsöjxaca' bönni' na', náquië' ca tu yu'u nadachi', en nalúaj, en chinabá'a para nu tsöjsóa ni'. <sup>45</sup> Ní'irö tseaj, tsöjzxi' ia'gadxi bö' xihui' nácacatëro' xihui' ca le, ate' ila'yaza yúgu'të, en ila'cuá' icja ládxi'da'ahuë' bönni' na', ate' ga údxi huayáli'tëro' ca gaca queë' bönni' na' ca guca queë' zí'alö. Lēasca' caní gaca quégaca bönachi tuá' dö' ni.

*Xinë'ë Jesús, en yugu' bönni' böchë'ë*

*(Mr. 3:31-35; Lc. 8:19-21)*

<sup>46</sup> Cate' ni' ru'ílenë' Jesús bönachi didza' ni, xinë'ë, en yugu' bönni' böchë'ë bila'dxinë' ni'. Gula'cu'ë lö'alö, en gulë'ëni'queuinë' ilu'ílenë' Jesús didza'. <sup>47</sup> Ní'irö tu bönni' busiyönnë' Jesús, en rē' Lē':

—Buyútsöca', nacu'ë xinó'o, en yugu' bönni' böchu'u lö'alö, en té'ënnë' ilu'ílenë' Li' didza'.

<sup>48</sup> Bubi'ë didza' Jesús, en rē' bönni' na' busiyönnë' Lē' caní, rnnë':

—¿Nözili' nuzxi caz xiná'a, en nupxi caz bönni' böcha'a?

<sup>49</sup> Ní'irö bulí nē'ë, en bulu'e yugu' bönni' uséda queë', en rnnë':

—Bulí'yútsöca', bönni' ni náca'gaquië' ca xiná' caza', en yugu' böchi' caza'.

<sup>50</sup> Núti'tës nu run ca ré'ëni quézinë' Xuza' zoë' yehua' yubá, nu ni naca bi'i böchi' caza', en bi'i zan caza', en xiná' caza'.

## 13

*Rucúdzu'ë didza' Jesús ca naca queë' tu bönni' guz*

*(Mr. 4:1-9; Lc. 8:4-8)*

<sup>1</sup> La' dza ní'sö birúajë' Jesús niu' yu'u, ate' yöjchö'ë ra' nísado'. <sup>2</sup> Tu' bila'dxín bönachi zían ga zoë' Jesús, gurenë' tu lē'e bárcodo', en gurö'ë ni', ate' bönachi zían na' gula'cuá' luyú bidxi ra' nísado' na'. <sup>3</sup> Ní'irö Jesús

bě'leně' légaquiē' didza', zían le busédině' légaquiē'. Bucúdzu'ě didza', rnně':

—Buli'yútsöca', birúajě' tu bönni' guz, sōjěsiē' xisedo'. <sup>4</sup> Tsanni ni sōjěsiē', bal-la xisedo' na' gulasi ra' nōza, ate' bila'dxinba' biguínndo', en gulé'ajba' xisedo' na'. <sup>5</sup> Gulasi ia'zica'rō xisedo' na' luyú ga rō'ō guiōj, ga na' rō'ō láti'sō yu, ate' la' gula'lentě, tu' cabí rō'ōda' yu ni'. <sup>6</sup> Ní'irō cate' budzá'a gubidza, lě na' bēsiē' la' gula'cuáditě, en gula'bidxi, tu' cabí dē ga ilún luí. <sup>7</sup> Gula'lén ia'zica'rō xisedo' na' ga bulu'lén lubá yōtsi', ate' gula'zxón lubá yōtsi' na', en bila'rōli lě na' bēsiē', en gulún ditaj le. <sup>8</sup> Gulasi ia'zica'rō xisedo' na' ga naca luyú bēbu, ate' bulu'nōdzaj. Bal-la lě na' bēsiē' bulu'nōdzaj ia'tú gayuá'tērō ca'. Ia'zica'rō bulu'nōdzaj ia'tsónnalalaj ca', ate' ia'zica'rō bulu'nōdzaj ia'chí uruá' ca'. <sup>9</sup> Nu zoa nagui, en riyōni, ral-la' uzě nagui.

*Le tē'ēni ilún le bucúdzu'ě Jesús didza'*

*(Mr. 4:10-12; Lc. 8:9-10)*

<sup>10</sup> Ní'irō bila'dxině' bönni' usēda queē' Jesús ga zoē', en gula'nábině' Lě, ta'nně':

—¿Bix que ru'ílenu' bōnachi didza' yugu' le rucúdzu'u didza'?

<sup>11</sup> Bubi'ě didza' Jesús, en rē' légaquiē':

—Dios ru'ě libí'ili' lataj tséajni'ili' le nagachi' ca rinná bē'ě Lě' yehua' yubá, pero bōnachi ni biti' tē'ēni ila'yéajni'i. <sup>12</sup> Nu si' xtídzě'ě, Dios unōdzjě' que ia'lati', ate' gáta'da'arō que, pero nu biti' si' le, la's dui le dē que udúa. <sup>13</sup> Que lě ni na' ru'ílena' légaquiē' didza' yugu' le rucúdzu'a didza', tu' tu'yúē' pero biti' ta'lé'eně'. Ta'yōnně' pero biti' tu'zě nágagaquiē', en biti' ta'yéajni'ině'. <sup>14</sup> Caní raca quégaquiē' para gaca ca na' gunné' Isaiás, bönni' bē'ě didza' uláz queē' Dios, gunné':

Le nácatě yōnili' pero biti' tséajni'ili'.

Uyuli' iná'ali' pero biti' ilé'eli'.

<sup>15</sup> Caní raca tu' nazidi ládxi'do'gaca bönni' ni,

en biti' bi riyaza icja nágagaquiē'.

Nadzudi' guiōj lógaquiē',

para cabí ila'lé'eně' len guiōj lógaquiē' na'.

Biti' ulu'zě nágagaquiē',

en biti' ulu'zéajni'i ládxi'gaquiē',

en biti' ulu'huóáquiē' quia' neda'

para gaca una' légaquiē'.

<sup>16</sup> Na'a, bica' ba libí'ili', tu' rilé'e guiōj loli', en riyōni nágali'. <sup>17</sup> Le nácatě rea' libí'ili', zían bönni' gulu'ě didza' uláz queē' Dios en yugu' bönni' tsahui' gulé'ěnně' ila'lé'eně' le rilé'eli' libí'ili' pero biti' bila'lé'eně' le. Gulé'ěnně' ila'yōnně' le riyōnili' libí'ili' pero biti' bila'yōnně' le.

*Riguíxjō'ě Jesús le bucúdzu'ě didza'*

*(Mr. 4:13-20; Lc. 8:11-15)*

<sup>18</sup> Gunně' ca' Jesús:

—Buli'zě nágali' ca naca le bucúdzu'a didza' que bönni' guz. <sup>19</sup> Núti'tēs nu riyōni didza' ca rinná bē'ě Dios yehua' yubá, en biti' réajni'i le, raca que didza' riyōni nu na' ca guca que xisedo' na' gulasi ra' nōza. La' za'tě tu' xihui', en rugúa didza' na' guyú'u icja ládxi'da'ahuē' bönni' na'. <sup>20</sup> Xisedo' na' gulasi luyú ga rō'ō guiōj rulu'f'i ca raca queē' bönni' riyōnně' didza' na', en la' ruzetě náguiē' lu yōl-la' rudzeja queē', <sup>21</sup> pero ca na' biti' ridía' xisedo' na' tu' cabí dē ga gun luí, lēasca' caní raca queē' bönni' ni. Cate'

idxín tu le usaca' zì lè', ate' ila'bía ná'gaca bönachi lè' tu' nazí' lu nè'è didza' na', la' gácatè chopa ládxe'è. <sup>22</sup> Xisedo' na' gulasi ga na' bulu'lén lubá yötsi' rulu'í ca raca queë' bönni' na' riyönnè' didza' na', pero ru'í ládxe'è yugu' le dè yödžölió ni, ate' nazí' yè'è bönni' na', tu' ru'í ládxe'è yugu' yöl-la' tsahui' que. Yugu' lè ni ta'röli didza' na', en tun ga biti' gun dxin lu icja ládxi'da'ahuë'. <sup>23</sup> Xisedo' na' gulasi luyú bëbu rulu'í ca raca queë' bönni' riyönnè' didza' na', en réajni'inè' le, ate' run dxin didza' na' lu icja ládxi'da'ahuë'. Nácagaca bal-la bönachi ca xisedo' na' bulu'nödžaj ia'tú gayuá'tèrö ca'. Nácagaca ia'zica'rö bönachi ca xisedo' na' bulu'nödžaj ia'tsónnalalaj ca', ate' nácagaca ia'zica'rö bönachi ca xisedo' na' bulu'nödžaj ia'chi uruá' ca'.

*Tu guíxi'do' cané le nalá' ca rilá' yöla zxoá' xtila*

<sup>24</sup> Ia'tú le bucúdzu'è didza' Jesús, ate' rë' légaquië':

—Ca gaca cate idxín ni le rinná bë'è Dios yehua' yubá naca ca guca que xisedo' dxi'a le guzè' tu bönni' ga naca lu xiyúé'. <sup>25</sup> Tsanni na' tasië' bönni' nacu'è lidxè', bidxín tu nu biti' rilé'e xan yu'u na' dxi'a, ate' yöjža lu xiyúé' xisedo' guíxi'do' cané le nalá' ca naca yöla zxoá' xtila, ate' böaj xilataj. <sup>26</sup> Cate' gulén zxoá' xtila na', en gurö'ö do que, ga na' dxía xui'í, ní'irö gulaca bë' guíxi'do' cané na'. <sup>27</sup> Ní'irö bila'dxinè' bönni' huen dxin ga zoë' bönni' xan la' yèla na', en tē' lè': "Xan, channö' gazu' xisedo' dxi'a lu yu quíu', žnacxi guca gula'lén guíxi'do' cané na'?" <sup>28</sup> Xan yu na' gudxè' légaquië', rnnè': "Tu bönni' biti' rilé'enè' neda' dxi'a benè' caní." Ní'irö gula'nábinè' huen dxin queë' lè', ta'nnè': "žBa rē'enu' tséajtu' tsöjölajtu' guíxi'do' cané na'?" <sup>29</sup> Xángaquië' rē' légaquië': "jBiti' ca! Nadx ca' cate' iládzu'li' guíxi'do' cané na', iládzu'lenteli' ca' yöla zxoá' xtila. <sup>30</sup> Gácarö dxi'a gü'ili' lataj ila'zxo'ngarö tsöžxön cate' idxinrö dza tsöjtúbiru' le, ate' ní'irö guía' nupa ulu'tubi le: Buli'tubi zí'alö guíxi'do' cané na', en guli'guga' tsöjxili huéaj para uzégui'ru' le, ate' ní'irö utúbili' zxoá' xtila lu yu'u quia'."

*Rucúdzu'è didza' Jesús ca naca que xisé mostaza*

(Mr. 4:30-32; Lc. 13:18-19)

<sup>31</sup> Ia'tú le bucúdzu'è didza' Jesús, ate' rë' légaquië':

—Ca gaca ga idxín le rinná bë'è Dios yehua' yubá, gaca ca raca que tu xisé mostaza, le guzè' tu bönni' ga naca lu xiyúé'. <sup>32</sup> Le nácatè xisé mostaza na' nácatèrö cuidi' ca yúgu'tè xisedo' ia'zica'rö, pero cate' chinadúz, rizxöntèrö ca yúgu'tè guixi' cuan, en rizxön ca naca tu yaga, ate' ta'dxinba' biguínido', en tunba' xicá'agacaba' lu ni'a nè'e.

*Rucúdzu'è didza' Jesús que cúa zi que yöta xtila*

(Lc. 13:20-21)

<sup>33</sup> Ia'tú le bucúdzu'è didza' Jesús, ate' rë' légaquië':

—Ca gaca ga idxín le rinná bë'è Dios yehua' yubá gaca ca le run cúa zi que yöta xtila, le buchíxinu tu nigula len tsonna libixi yöjža zxoá' xtila, ate' guyazxa idütè cúa na'.

*Le rē'eni gun le rucúdzu'è didza' Jesús*

(Mr. 4:33-34)

<sup>34</sup> Yúgu'tè lè ni bucúdzu'è didza' Jesús, le bë'lenè' bönachi nacua' ni' didza', en biti' bi didza' bë'lenè' légaquië' le cabí bucúdzu'è didza'. <sup>35</sup> Caní benè' para gaca lè na' buzúajè' lu guichi tu bönni' bë'è didza' uláz queë' Dios, gunnè': Gu'a didza' yugu' le ucúdzu'a didza'.

Inniá' yugu' le nagachi' cate' ni' gusí lo si' guta' yödzölió.

*Riguíxjö'ë Jesús le bucúdzu'ë didza' que guíxi'do' cané*

<sup>36</sup> Ní'irö buzenë' Jesús bönachi nacuá' ni' didza', en gusöl-lë'ë légaquië', ate' guyu'ë yu'u. Ní'irö bila'dxinë' bönni' usëda queë' ga zoë', en të' Lë':

—Gudíxjö'i netu' le ré'ëni inná lë na' bucúdzu'u didza' que guíxi'do' cané le nalá' ca naca yöla zxoá' xtila.

<sup>37</sup> Bubi'ë didza' Jesús, ate' ré' légaquië':

—Bönni' razë' xisedo' dxi'a naca' neda', Bönni' Guljë' Bönachi. <sup>38</sup> La' yöla na' naca yödzölió ni, ate' xisedo' dxi'a na' tu'luí' ca nácgaca nupa nabábagaca ga rinná bë'ë Dios. Guíxi'do' cané na' le nalá' ca naca yöla zxoá' xtila tu'luí' ca nácgaca nupa néquigequi que tu' xihui'. <sup>39</sup> Nu na' bití' rilé'e dxi'a xan la' yöla na', en yöjöza guíxi'do' cané na', tu' xihui' caz naca. Dza ulu'tubë' na' ruluí' ca gaca dza údxi que yödzölió ni, ate' nupa na' tu'tubi nácgaca gubáz lá'ayi queë' Dios. <sup>40</sup> Ca na' guca, bulu'tubë' guíxi'do' cané na', en bulu'zégui'ë le lu guí', lësca' caní gaca cate' údxi que yödzölió ni. <sup>41</sup> Neda', Bönni' Guljë' Bönachi, isól-la'gaca'-në' gubáz lá'ayi quia', ate' ulu'béajë' ga rinná bë'ë Dios yúgu'të nupa tun ga tun dul-la' luzé'eguequi, enca' nupa tuá' dö'. <sup>42</sup> Yugu' gubáz lá'ayi na' ila'gu'ë bönni' tuá' dö' na' lu guí' gabila. Ni' ila'bödxë', en ulu'tíl-la láyí'gaquië'. <sup>43</sup> Ní'irö ila'yëpi yösa bení' bönachi tsahui', en ilácagaquië' ca gubídza ga ni' rinná bë'ë Dios yehua' yubá. Nu zoa nagui, en riyöni ral-la' uzë nagui.

*Rucúdzu'ë didza' Jesús que tu yöl-la' tsahui' nagachi'*

<sup>44</sup> Lësca' caní bucúdzu'ë didza' Jesús, rnnë':

—Le rinná bë'ë Dios yehua' yubá naca ca tu yöl-la' tsahui' nagachi' tu la' yöla. Cate' bidzölinë' tu bönni' le, bucáchë'ë le leyúbölo ga na' bigachi', ate' lu yöl-la' rudzeja queë' guyijë', yöjëti'ë yúgu'të le de queë' ate' gú'uë' la' yöla na' para gata' yöl-la' tsahui' na' queë'.

*Rucúdzu'ë didza' Jesús que tu bugá le nazáca'da'*

<sup>45</sup> Gunnë' ca' Jesús:

—Ca ral-la' sé ládxi'li' le rinná bë'ë Dios yehua' yubá naca ca benë' tu bönni' rá'uë', en ruúti'ë, en riguiljë' bugá nazáca'gaca. <sup>46</sup> Cate' bidzölinë' tu bugá le nazáca'da', guyijë', yöjëti'ë yúgu'të le de queë', ate' gú'uë' bugá na'.

*Rucúdzu'ë didza' Jesús que tu yöxaj böla*

<sup>47</sup> Lësca' caní gunnë' Jesús:

—Ca gaca ga ridxín le rinná bë'ë Dios yehua' yubá, gaca ca run tu yöxaj böla le ta'chiljë' bönni' lu nísado', le röjxi' zían böla izá'a. <sup>48</sup> Cate' chibidzá' yöxaj na', bulu'béajë' le luyú bidxi ra' nísado' na', ate' gula'bö'ë ni', en gula'gu'ë-ba' yugu' böla dxi'a tu lu ga'böra, pero gula'ru'unë'-ba' yugu' böla cá'asö. <sup>49</sup> Lësca' caní gaca cate' údxi que yödzölió ni. Ila'ruájë' gubáz lá'ayi queë' Dios, ate' ulu'béajë' quez yugu' bönachi tsahui', ate' ulu'cuítie' légaquië' ladaj bönachi tuá' dö'.

<sup>50</sup> Ní'irö ila'gu'ë bönachi tuá' dö' na' lu guí' gabila. Ni' ila'bödxë', en ulu'tíl-la láyë'ë.

*Yöl-la' tsahui' le naca gula, en le naca cubi*

<sup>51</sup> Ní'irö Jesús gunábinë' yugu' bönni' usëda queë', rnnë':

—¿Ba réajni'ili' yúgu'të lë ni?

Bulu'bi'ë didza', të' Lë':

—Ön, Xan.

<sup>52</sup> Jesús gudxë' légaquië':

—Cate' tu bönni' yudo' usedi chinazí' lu në'ë le rinná bē'ë Dios yehua' yubá, náquië' ca tu bönni' xan yu'u, rubéajë' ladaj yöl-la' tsahui' queë' le naca cubi, en le naca gula, le nácacaca tsahui' le ruzi'ë xibé.

*Le benë' Jesús lu yödzö Nazaret*

(Mr. 6:1-6; Lc. 4:16-30)

<sup>53</sup> Cate' budxi bucúdzü'ë Jesús yugu' didza' ni, buzë'ë ni'. <sup>54</sup> Cate' budxinë' ladzë', busédinë' bönachi nacua' lu yu'u ga tu'dubë' bönni' judío, en tu'sedë' queë' Dios, ate' bulu'bánninë, ta'nnë':

—¿Gazxi caz guzëdë' bönni' ni yöl-la' réajni'i ni? ¿Nacxi caz naca, runë' yugu' yöl-la' huáca ni? <sup>55</sup> Náquië' bönni' ni xzí'inë' bönni' gubëdxi yaga, ate' xinë'ë lënu María. Náquië' böchi'gaquië' Jacobo, en José, en Simón, en Judas. <sup>56</sup> Lësca' nigula zanë' nacua'lennu rë'u ni. ¿Gazxi caz guzëdë' yúgu'të lë ni?

<sup>57</sup> Que lë ni na' gulaca chopá ládxi'gaquië', ate' bulu'cá'anë' Lë'. Ní'irö Jesús gudxë' légaquië':

—Yúgu'të bönachi tun bal tu bönni' ru'ë didza' uláz queë' Dios, pero bönachi uládz queë', en bönachi nacua' lidxë' biti' tun lë' bal.

<sup>58</sup> Que lë ni na' biti' benë' Jesús zían yöl-la' huáca ni', tu' cabí ta'yéajlë'ë Lë'.

## 14

*Ca bëtgaquië' Juan, bönni' buquilë' bönachi nisa*

(Mr. 6:14-29; Lc. 9:7-9)

<sup>1</sup> Lu dza ni', biyönnë' Herodes, bönni' rinná bē'ë luyú Galilea, ca nácacaca yugu' yöl-la' huáca runë' Jesús. <sup>2</sup> Herodes na' gudxë' yugu' ni'a në'ë, rnnë':

—Bönni' na' Juan, bönni' buquilë' bönachi nisa. Chibubanë' lu yöl-la' guti. Que lë ni na' dë lu në'ë yöl-la' huáca zxön na'.

<sup>3</sup> Caní gunné' Herodes tu' gusöl-lë'ë lë cazë' bönni' gula'zönë' Juan, en gulúgui'ë lë' du guië, ate' gula'gu'ë lë' lidxi guië tu' gú'uninu Herodías ilunë' caní. Herodías na' gúcanu nigula queë' Felipe, böchë'ë Herodes na'.

<sup>4</sup> Caní benë' Herodes, tu' gudxë' Juan na' lë': "Biti' ral-la' sóalenu'-nu."

<sup>5</sup> Que lë ni na' gú'unnë' Herodes gútië' Juan, pero gúdxinë' ila'dá'baga' bönachi lu yödzö ni' lë', tu' téquiquequi bönachi náquië' Juan na' tu bönni' ru'ë didza' uláz queë' Dios. <sup>6</sup> Ní'irö cate' guca laní que dza guyé'enë' iz Herodes, birúajbi' bi'i nigula queënu Herodías na', en buyá'abi' lógaca nupa nacua' laní na', ate' guyaza ládxi'ë Herodes le benbi'. <sup>7</sup> Guzxí' lu në'ë Herodes, en benë' tsutsu xtídzë'ë unödzjë' queëbi' bití'tës bi inábibi' lë'. <sup>8</sup> Tu' chibusédinu-bi' zí'aló xiná'abi', gúdxibi' lë':

—Benna quia' na'a icjé' Juan, bönni' buquilë' bönachi nisa. Gulú'u le tu lu zxiga' zxön.

<sup>9</sup> Ní'irö buí'innë' Herodes, pero tu' chibenë' tsutsu xtídzë'ë, en tu' bila'yöni nupa te'aj tágulen lë', que lë ni na' gunná bé'enë' nu tsöjñödzaj icjé' Juan na' queëbi'. <sup>10</sup> Caní guca, gusöl-lë'ë nu tsöjrixí yenë' Juan ga ni' yu'ë lidxi guië. <sup>11</sup> Bönni' na' nasöl-lë'ë bu'ë icjé' Juan na', zxoa lu zxiga' zxön, ate' bunödzjë' le queëbi' bi'i nigula na', ate' lëbi' buá'abi' le queënu xiná'abi'.

<sup>12</sup> Ní'irö bila'dxinë' bönni' gula'dé'ë Juan na', ate' bulu'ú'ë lë', en bulu'cáché'ë lë'. Gudödi ni', yöjtíxjöi'iguequinë' Jesús ca gulaca lë ni.

*Jesús rugahuë' zíanrö ca chi-un gayuá' bönachi*

(Mr. 6:30-44; Lc. 9:10-17; Jn. 6:1-14)

<sup>13</sup> Cate' réquibe'enë' Jesús lë ni, buzé'ë ni', ate' gurenë' tu lë'e bárcodo', en sa'yéajë' la' queézë' tu lataj cá'asö. Cate' bila'yöni bönachi zéajë' ni', bila'ruaj yugu' yödzö ni', en yöjaca ga ni' idxinë' Jesús, ta'zë'e ní'aguequi.  
<sup>14</sup> Cate' burúajë' Jesús lë'e barco, bilé'enë' nacuá' bönachi zían ni', ate' buéchi' ládxë'ë léguequi, en bunë' nupa te'e, nútsa'gaca ládjaguequi. <sup>15</sup> Cate' chiridzö' dza na', bila'dxinë' yugu' bönni' usëda queë' Jesús ga zoë', en të' Lë':

—Chiridzö' na'a, ate' cá'asö naca lataj ni. Busöl-la' bönachi ni para tsöjaca gapa dë yödzödo' para gá'ugaca bi ilagu.

<sup>16</sup> Ní'irö Jesús gudxë' légaquië':

—Biti' run bayudxi tsöjácië'. Buli'nödzaj libí'ili' le ilahuë'.

<sup>17</sup> Ní'irö të' Lë':

—Gáyu'sö yöta xtila dë, en chópasöba' böla dëba' queëtu' ni.

<sup>18</sup> Jesús rë' légaquië':

—Buli'dödi le lu na'a.

<sup>19</sup> Ní'irö Jesús gunná be'enë' bönachi na' ila'bö' ga yu'u daca'. Gudödi na' gudélé'ë gayu' yöta xtila na', en chópaba' böla na', ate' guchisa lahuë', ruyüë' zaca' yehua' yubá. Gudxë' Dios: "Xclenu'." Ní'irö buzxuzxjë' yöta xtila na', en budödë' le lu ná'agaquië' bönni' usëda queë', ate' légaquië' gula'guisië' le lógaca bönachi zían na'. <sup>20</sup> Gulahuë' yúgu'tégaquië', en bulu'huöljanë'. Ní'irö bulu'tubë' yugu' bizxaj nagá'anagaca, en bulu'lié' chinnu ga'böra. <sup>21</sup> Bönni' ni' gulahuë' gulácië' idü chi-un gáyu'ë, pero cuntu nu bulaba yugu' nigula, en bí'ido'.

*Jesús rizë'e ni'ë lu nísado'*

(Mr. 6:45-52; Jn. 6:16-21)

<sup>22</sup> Ní'irö la' bentë' Jesús ga gula'benë' bönni' usëda queë' lë'e bárcodo', en tsöjácië', ila'nöruë' lahuë' Lë', para ila'dödë' ia'tsólá'a nísado' ni', tsanni na' uzenë' Lë' bönachi nacuá' ni' didza'. <sup>23</sup> Cate' chibusöl-lë'ë Jesús bönachi na', gurenë' tu lu guí'ado' ga ni' yöjsöë' tuzë'. Ni' bulidzë' Dios. Cate' chigul-la, tuzë' zoë' ni'. <sup>24</sup> Bárcodo' ga na' nacu'ë bönni' usëda queë' ridödi gatsaj láhui'lö nísado' na', ate' riyasa bárcodo' na' tu' riyasa ridxía nísado' na', ate' ruzaga' bö' recja barco na'. <sup>25</sup> Gudödi guluhuëla, gubígui'ë Jesús gala' ga na' nacu'ë, rizë'e ni'ë lu nísado'. <sup>26</sup> Cate' yugu' bönni' usëda queë' bila'lé'enë' Lë', rizë'e ni'ë lu nísado', gula'bö'dë'ë böniga tu' tádxinë'. Gula'bö'dxi'ë, ta'nnë':

—Tu' ridasö na'.

<sup>27</sup> Ní'irö Jesús la' bulidztë' légaquië', rnnë':

—Buli'zxöni ládxi'li'. Neda' ni. Biti' gádxili'.

<sup>28</sup> Ní'irö bubí'ë didza' Pedro, rë' Jesús:

—Xan, channö nacu' Li', gunná be'e neda' guída' ga na' zu' lu nisa.

<sup>29</sup> Jesús gudxë' lë':

—Gudá.

Ní'irö bö'tjë' Pedro lë'e bárcodo' na', en guzë'e ni'ë lu nísado', sa'yéajë' ga na' zoë' Jesús. <sup>30</sup> Ní'irö cate' bilé'enë' Pedro ca bö' na' recja rutá nisa, gúdxinë'. Ní'irö gusi lahuë' rötjë' lu nisa, ate' gurödxi'ë. Bulidzë' Jesús, rnnë':



—Xan, busölá neda’.

<sup>31</sup> Jesús la’ bulitë në’ë. Buguélë’ë lë’, en rë’ lë’:

—Láti’só réajlë’u neda’. ¿Bizx que guca chopa ládxi’u’?

<sup>32</sup> Cate’ bulu’benë’ lë’e bárcodo’ na’, guró’ò dxi bô’ na’ recja. <sup>33</sup> Ní’irö bönni’ nacu’ë lë’e bárcodo’ na’ gula’yéaj ládxi’gaquië’ Jesús, ta’nnë’:

—Le nácatë, Zxí’inë’ Dios nacu’.

*Jesús ruínë’ yugu’ bönni’ huë’ nacu’ë yödzo Genesaret*

(Mr. 6:53-56)

<sup>34</sup> Cate’ chigula’dödë’ ia’tsölá’a nísado’ na’, la’ bila’dxintë’ lu xiyú yödzo Genesaret. <sup>35</sup> Cate’ bulu’únbë’ë bönni’ yödzo ni’ Jesús, gula’söl-lë’ë didza’ idütë luyú ni’, ate’ dujuá’gaquië’ yúgu’të nupa te’e ga na’ zoë’ Jesús. <sup>36</sup> Guláta’yue’ lahuë’ Jesús gu’ë légaquië’ lataj íla’gansë’ ru’i lari’ nácuë’, ate’ la’ bulu’huöacatë yúgu’të nupa na’ bila’gán lari’ na’.

## 15

*Le tun ga bití’ nácaru’ tsahui’ lahuë’ Dios*

(Mr. 7:1-23)

<sup>1</sup> Ní’irö yugu’ bönni’ yudo’ fariseo, en bönni’ yudo’ tu’sédinë’, narúajgaquië’ Jerusalén, bila’dxinë’ ga zoë’ Jesús, ate’ tē’ Lë’:

<sup>2</sup>—¿Bizx que tunë’ bönni’ usëda quiu’ le ridödi bē’ ca naca le nulaga loru’ runru’ ca gulunë’ xuz xtó’oru’? Bití’ ta’guíbi në’ë ca naca que yudo’ cate’ si’ ilahuë’.

<sup>3</sup> Bubi’ë didza’ Jesús, en gunábinë’ légaquië’, rnnë’:

—¿Bizx que libí’ili’ ca’ rucá’anali’ cá’asö xibá queë’ Dios para gunli’ le nulaga loli’ runli’? <sup>4</sup> Caní’ raca, tu’ gunná bé’enë’ Dios libí’ili’, gunné’: “Ben bal xuz xino’o”, en gunné’ ca’: “Nu innë’ zi’ que xuz xinë’e, tsaz gati nu na’.” <sup>5</sup> Pero libí’ili’ rnnali’: “Channö nu guíë xuz xinë’e: Bití’ bi’ gaca gunna’ quiu’ tu’ chiguzxí’ lu na’a gunna’ yúgu’të queë’ Dios, <sup>6</sup> bití’rö bi’ run bayudxi gun nu na’ que xuz xinë’e.” Caní’ runli’, rucá’anali’ cá’asö le gunná bē’ë Dios, para gunli’ le nulaga loli’ runli’. <sup>7</sup> Libí’ili’, bönni’ rulu’isö tsahui’ cuinli’, idú ca nácali’ gudíxjö’ë Isaías, bönni’ bē’ë didza’ uláz queë’ Dios, gunné’:

<sup>8</sup> Bönni’ ni, len rú’agacsë’ tunë’ neda’ bal, en calëga idú ládxi’gaquië’.

<sup>9</sup> Nítisö naca le ta’yéaj ládxi’gaquië’ neda’, tu’ tu’sédinë’ yugu’ le gula’nná bē’ bönachi.

<sup>10</sup> Ní’irö bulidzë’ Jesús bönachi nacua’ ni’, en rë’ léguequi:

—Buli’zë nágali’ le guía’ libí’ili’, en guli’tséajni’i. <sup>11</sup> Calëga le riyaza ru’ë nu bönni’ run ga bití’ náquië’ tsahui’ lahuë’ Dios, pero le rirúaj ru’ë, lë ni run ga bití’ náquië’ tsahui’ lahuë’ Dios.

<sup>12</sup> Ní’irö yugu’ bönni’ usëda queë’ Jesús gula’bígui’ë ga zoë’, en tē’ Lë’:

—¿Naru’ nöztsenu’ gula’lenë’ yugu’ bönni’ yudo’ fariseo cate’ bila’yönnë’ didza’ ni bē’u’?

<sup>13</sup> Ní’irö bubi’ë didza’ Jesús, en rë’ légaquië’:

—Yúgu’të le nadúz, le cabí’ guzë’ Xuza’ zoë’ yehua’ yubá, huadúl’jagaca idú luí. <sup>14</sup> Buli’cá’ana légaquië’. Chinachúl-la lógaquië’, en ta’ché’ë nupa nachul-la lógaca. Channö tu bönni’ lo chul-la ichë’ë ia’túé’ bönni’ lo chul-la, iropë’ íla’bixë’ tu lu yeru.

<sup>15</sup> Ní’irö bubi’ë didza’ Pedro, en rë’ Jesús:

—Buzéajni’i netu’ lë ni rucúdzü’u didza’.

16 Jesús rë' légaquië':

—¿Naru' cabí réajni'itseli' ca' libí'ili'? 17 ¿Naru' cabí réajni'itseli' riyaza lé'ëru' yúgu'të le riyaza ruá'aru', ate' rurúaj lé'ëru'? 18 Na'a, le rirúaj rúa'ali', lu icja ládxi'do'oli' za', ate' lé ni run ga bití' nácali' tsahui' lahuë' Dios. 19 Caní raca, tu' ta'lén lu icja ládxi'do'oli' yugu' le rizá' ládxi'li' le ruá' dö', le ilún ga gútili' bönachi, en le ilún ga quítsjali' xibá que yöl-la' nutsaga na', en le ruá' dö' runli', en yugu' le rizé ládxi'li' cuanli', en yugu' le rinnéli' que luzá'ali' le cabí nácate, en yugu' le rinné xihui'li'. 20 Yugu' le caní tun ga bití' náquië' tu bönni' tsahui' lahuë' Dios, pero channö cabí nayari në'ë ca naca que yudo' cate' bi gahuë', bití' gun ga bití' náquië' tsahui' lahuë' Dios.

*Tu nigula izá'a réajlë'ënu Jesús*

(Mr. 7:24-30)

21 Ní'irö buzë'ë Jesús ni', en guyéajë' lu xiyú yödzo Tiro, en yödzo Sidón. 22 Tu nigula nabábanu luyú Canaán birúajnu yödzo ni', ate' bë'ënu zidzaj didza', rënu Jesús:

—Xan, xzí'ini xi'sóë' David, buéchi' ladxí' neda'. Bi'i nigúlado' quia' riguí' rizáca'da'abi' tu' yu'u bö' xihui' lébi'.

23 Bití' bi didza' bubi'ë Jesús. Ní'irö gula'bígú'ë bönni' usëda queë' ga zoë', ate' gulé' Lë', ta'nnë':

—Busól-la'-nu, tu' zá'anu cúdzu'ru' ribödxi'anu.

24 Ní'irö bubi'ë didza' Jesús, ate' rë'ë-nu:

—Dios nasöl-lë'ë neda' gácalena' bönachi Israel, nupa nácacaca ca bö'cu' xzíla'do' nanítigacaba'.

25 Ní'irö gubíga'nu nigula na' ga zoë' Jesús, en guyéaj ládxi'nu Lë', ate' rënu Lë':

—Xan, gúcalen neda'.

26 Bubi'ë didza' Jesús, rnnë':

—Bití' naca dxi'a ugúaru' yöta quégacabi' bí'ido', en chú'unaru' le lógacaba' bö'cu'do'.

27 Ní'irö nigula na' rënu Jesús, rnnanu:

—Ön, Xan, pero táguba' bö'cu'do' na' le bizxaj tu'huóxaj ga tagu xángacaba'.

28 Ní'irö bubi'ë didza' Jesús, rnnë':

—Nigúlado'. Idú naca ca réajlë'u neda'. Gaca quiu' ca rë'ënnu'.

La' ní'isö böácatëbi' bi'i nigúlado' queënu.

*Jesús ruúnë' zían nupa te'e*

29 Ní'irö buzë'ë Jesús ni', en gudödë' ga naca ra' nísado' que Galilea. Gurenë' tu lu guí'ado', ate' gurö'ë ni'. 30 Bönachi zían dujuá'gaquië' nupa bití' guca ila'zá', en nupa nachul-la guió'j lógaca, en nupa bití' guca ila'nnë', en nupa narugu ni'a në'eguequi, en ia'zíca'rö zían nupa te'e, ate' gula'guíxaj léguequi xini'ë Jesús, ate' Lë' bunë' léguequi. 31 Bulu'bani bönachi ni' ca naca le benë' Jesús, tu' bila'lé'e tu'nnë nupa bití' guca ila'nnë', ate' nuhuóacagaca nupa gurugu ni'a në'eguequi, ate' tu'zá' nupa bití' guca ila'zá', ate' tu'lé'e nupa guchul-la lógaca. Que lé ni na' gula'gu'ë yöl-la' ba Dios quégaca bönachi Israel.

*Jesús rugahuë' zíanrö ca choá' gayuá' bönachi*

(Mr. 8:1-10)

32 Ní'irö Jesús bulidzë' yugu' bönni' usëda queë', en rë' légaquië':

—Ruhuechi' ládxa'a bönachi zían ni, tu' chiguca tsonna dza zá'lenguequi neda', en biti' bi dë le ilagu. Biti' rë'enda' usól-la'gaca'-në' tsòjhuòajgaquië' lédxigaquië' ta'dunsë' ca', nadxi ca' udú ládxi'gaquië' la' nòza.

<sup>33</sup> Ní'irò yugu' bönni' usëda queë' të' Lë', ta'nnë':

—¿Gazxi caz idzòlitu' yòta xtila zían lu lataj cá'asò ni, le ugágotu' bönachi zían ni?

<sup>34</sup> Gunábinë' Jesús légaquië', rnnë':

—¿Bal-laxi yòta xtila dë queëli'?

Bulu'bi'ë didza', ta'nnë':

—Gadxi, ate' nabábasöba' böla cuidi' dëba' queëtu' ni.

<sup>35</sup> Ní'irò Jesús gunná bé'enë' bönachi zían na' ila'bö' lu yu. <sup>36</sup> Gudélë'ë gadxi yòta xtila na', en yugu' böla na', ate' gudxë' Dios: "Xclenu'." Ní'irò buxzuzxjë' iroptë na', en bunödzejë' quégaquië' bönni' usëda queë', ate' légaquië' gula'guisië' le lógaca bönachi zían na'. <sup>37</sup> Gulahuë' yúgu'të', en bulu'huóljanë'. Gudödi ni' bulu'tubë' le bizxaj nagá'anagaca, ate' bulu'lié' gadxi ga'böra. <sup>38</sup> Yugu' bönni' na' gulahuë' nácagaquië' choá' gáyu'ë, pero cuntú nu bulaba yugu' nigula, en bí'ido'. <sup>39</sup> Ní'irò busól-lë'ë Jesús bönachi na' tsòjhuòajgaquië' lédxigaquië', ate' gurenë' lë'e bárcodo' ni', en sa'yéajë' lu xiyú yödzo Magdala.

## 16

*Ta'nábinë' Jesús gunë' tu le gaca bë' nuzxi náquië'*

(Mr. 8:11-13; Lc. 12:54-56)

<sup>1</sup> Ní'irò yugu' bönni' yudo' fariseo len yugu' bönni' yudo' saduceo bila'dxinë' ga zoë' Jesús para ila'zì' bë'ë Lë', ate' gula'nábinë' Lë' gunë' tu le gaca bë' ga za' yöl-la' unná bë' queë'. <sup>2</sup> Bubi'ë didza' Jesús, en rë' légaquië':

—Cate' ridzò, rnnali' caní: "Gun dxi'a cuxò, tu' rò'ò böaj xiná lúzxiba."

<sup>3</sup> Cate' naca zílado', rnnali' caní: "Biti' gun dxi'a na' a dza tu' rò'ò böaj xiná, en ruchul-la lúzxiba." Libí'ili', bönni' ruluí'isò tsahui' cuinli'. Raca innë ya'ali' naca gun lúzxiba, pero biti' gaca tséajni'ili' le tu'sedi le taca dza ni zóaru' na'a. <sup>4</sup> Yugu' bönachi tuá' dö' ni, en biti' zoa idú ládxi'gaca ta'nábini neda' guna' tu le gaca bë' Nu naca', pero biti' bi le gaca bë' ila'lé'enë'. Ila'lé'esinë' lë na' guca bë' ca guca queë' Jonás, bönni' bë'ë didza' uláz queë' Dios.

Ní'irò Jesús bucá'anë' légaquië', söhuòjë'.

*Le tu'sédinë' bönni' yudo' naca ca cúa zi que yòta xtila*

(Mr. 8:14-21)

<sup>5</sup> Cate' bila'dxinë' ia'tsólá'a nísado' ni', guléquibe'enë' bönni' usëda queë' Jesús gulál-la ládxi'gaquië' ilu'ë le ilahuë'. <sup>6</sup> Ní'irò Jesús gudxë' légaquië':

—Buli'yútsöca'. Gulí'gún chi'i cuinli' que le naca ca cúa zi que yòta xtila quégaquië' bönni' yudo' fariseo, en quégaquië' bönni' yudo' saduceo.

<sup>7</sup> Ní'irò la' légcasë' gulún xtídza'gaquië' bönni' usëda queë', ta'nnë':

—Rnnë' caní tu' cabí nuá'aru' yòta xtila.

<sup>8</sup> Réquibe'enë' Jesús lë ni, ate' rë' légaquië':

—¿Bizx que run xtídza'li' la' libí'isili' tu' cabí nuá'ali' yòta xtila? Láti'do'os réajlë'ëli' neda'. <sup>9</sup> ¿Naru' cabí réajni'itseli', en biti' röjnétseli' ca guca quégaca gayu' yòta xtila ni', lë na' gulahuë' chi-un gáyu'ë bönni', ate' tsca xò ga'böra butúbili'? <sup>10</sup> ¿Naru' cabí röjnétseli' ca' ca guca quégaca gadxi yòta xtila ni', lë na' gulahuë' choá' gáyu'ë bönni', ate' tsca xò

ga'bõra butúbili'? <sup>11</sup> ¿Naru' cabí réajni'ili'? Biti' bê'a didza' que yõta xtila cate' gudxa' libí'ili' gun chi'i cuinli' que le naca ca cúa zi que yõta xtila quégaquië' bõnni' yudo' fariseo, en quégaquië' bõnni' yudo' saduceo.

<sup>12</sup> Ní'irõ gula'yéajni'inë' bití' gudxë' Jesús légaquië' ilún chi'i cuíngaquië' que cúa zi que yõta xtila, pero ral-la' ilún chi'i cuíngaquië' que le tu'sédinë' yugu' bõnni' yudo' fariseo, en yugu' bõnni' yudo' saduceo.

*Pedro rnnë' Jesús náquië' Cristo*

(Mr. 8:27-30; Lc. 9:18-21)

<sup>13</sup> Cate' bidxinë' Jesús lu xiyú yõdzõ Cesarea, ga na' rinná bê'ë Filipino, gunábinë' yugu' bõnni' usëda queë', rnnë':

—¿Bizxi ta'nná bõnachi nu naca' neda', Bõnni' Guljë' Bõnachi?

<sup>14</sup> Bulu'bi'ë didza', ta'nnë':

—Bal-lë' ta'nnë': "Juan nacu', bõnni' ni' buquilé' bõnachi nisa." Ia'zica'rë' ta'nnë': "Elías nacu', bõnni' ni' bê'ë didza' uláz queë' Dios dza ni'te." Ia'zica'rë' ta'nnë': "Jeremías nacu', o ia'tué' bõnni' bê'ë didza' uláz queë' Dios."

<sup>15</sup> Ní'irõ Jesús gudxë' légaquië':

—Naru' libí'ili', ¿nuzxi rnnali' naca' neda'?

<sup>16</sup> Bubi'ë didza' Simón Pedro, en rë' Lë':

—Li' nacu' Cristo, Xzí'inë' Dios ban.

<sup>17</sup> Bubi'ë didza' Jesús, rë' lë':

—Bica' xibó' li', Simón, xzí'inë' Jonás, tu' cabí buluí'inë' nu bõnni' li' lë' ni. Xuza' zoë' yehua' yubá buluí'inë' li' lë' ni. <sup>18</sup> Neda' rea' li', li' nacu' Pedro, ate' lu guiõj ni ucuá'a nupa ulu'dubi quia', ate' yõl-la' unná bê' que tu' xihui' bití' sequí' uzaga' xinõzgaquië'. <sup>19</sup> Gunna' quíu' yugu' xzí'ini gufé que lataj ga rinná bê' Nu zoa yehua' yubá. Le inná bê'u luyú ni, chigunná bê' ca' Nu na' zoa yehua' yubá, ate' le gu'u lataj gaca luyú ni, chibë' lataj gaca lë' na' Nu na' zoa yehua' yubá ni'.

<sup>20</sup> Ní'irõ Jesús gunná bé'enë' yugu' bõnni' usëda queë' cuntú nu ilë'ë náquië' Lë' Cristo.

*Jesús riguúxjö'ë ca si' ilútië' Lë'*

(Mr. 8:31-9:1; Lc. 9:22-27)

<sup>21</sup> La' dza ní'isõ gusí lahuë' Jesús riguúxjöi'inë' yugu' bõnni' usëda queë' run bayudxi tsejë' Jerusalén, ga ni' yugu' bixúz unná bê' en bõnni' gula tu'zëajni'inë', en bõnni' yudo' tu'sédinë' ulu'saca' zi'ë Lë', ate' ní'irõ ilútië' Lë', pero cate' gaca tsonna dza ubanë' lu yõl-la' guti. <sup>22</sup> Ní'irõ Pedro guchë'ë Jesús quez, en gusí lahuë' ridil-lë' Lë' didza', rnnë':

—Xan, bití' gu'ë Dios lataj. Bití' ca' gaca quíu' ca rnno'.

<sup>23</sup> Ní'irõ buécjë' Jesús, en rë' Pedro:

—Gucúita ga zoa'. Runu' ca run Satanás, tu' xihui'. Runu' ga gaca chopa ládxa'a tu' cabí naca le rizá' ládxu'u li' ca rizá' ládxë'ë Dios, pero ca ta'za'sõ ládxi'gaca bõnachi.

<sup>24</sup> Ní'irõ Jesús gudxë' yugu' bõnni' usëda queë', rnnë':

—Channõ zoë' tu bõnni' rë'ënë' tē'ë neda', ral-la' uzóë' tsólá'alõ yugu' le rë'ëni quézinë', en gáquië' ca tu bõnni' sa'yéajë' zeajtë'ë lë'e yaga cruz, ate' ní'irõ gaca tē'ë neda'. <sup>25</sup> Nu bõnni' guë'ënnë' gun chi'ë yõl-la' na'bán queë', unítíë' le, pero bõnni' unítíë' yõl-la' na'bán queë' tu' dë'ë neda', gata' yõl-la' na'bán idú queë'. <sup>26</sup> ¿Naru' uzi'tsë' xibé' tu bõnni' channõ utubë' yúgu'të' le dë' yõdzõliõ ni pero unítíë' yõl-la' na'bán idú queë'? Bití' bi gaca unõdzjë' tu

bönni' para gata' yöl-la' na'bán idú queë'. <sup>27</sup> Caní rnníá', tu' huöda' neda', Bönni' Guljé' Bönachi, en idzaga yöl-la' unná bē' queë' Xuza' Dios neda', ate' idzágagaquië' gubáz lá'ayi quia' neda'. Ní'irö ubi'a que queë' bönachi tsa naca le núngaca. <sup>28</sup> Le nácatē rea' libí'ili': "Biti' ca' ilátigaca bal-la nupa nacuá' ni cate' ila'lé'erö idinná bē'a neda', Bönni' Guljé' Bönachi."

## 17

*Ridzá' ca nalá' lahuë' Jesús*

(Mr. 9:2-13; Lc. 9:28-36)

<sup>1</sup> Gudödi xopa dza, Jesús gudél'ë Pedro len Jacobo, en Juan, böch'ë Jacobo na', en guché'ë légaquië', ate' yöjáquië' quez tu lu guí'a sibi. <sup>2</sup> Ní' bidzá' ca nalá' lahuë' Jesús lógaquië'. Guyëpi yösa bení' lahuë' Jesús ca ruzení' gubidza, ate' lari' nácüë' böaca chiguí'chido'os ca bení'. <sup>3</sup> Ní'irö bila'lé'enë' bönni' usëda queë' buluí'i lógaquië' Moisés, en Elías, ate' tuí'ilenë' Jesús didza'. <sup>4</sup> Ní'irö Pedro rë' Jesús:

—Xan, naca dxi'a zóaru' ni. Channö rë'ënu', guna' ni tsonna yu'u lága'do', tu quiu', ia'tú queë' Moisés, en ia'tú queë' Elías.

<sup>5</sup> Tsanni ni' ru'ë Pedro didza' ni, la' guró'ötë tu böaj bení' le guzxoá légaquië', ate' lu böaj na' biyön chí'i nu rnna:

—Bönni' ni Zxí'ini caza'. Nadxí'ida'-në', en raza ládxa'a Lë'. Buli'zé nágali' didza' gu'ë.

<sup>6</sup> Cate' bila'yönnë' bönni' usëda queë' chí'i na', gula'dzö'ë gusurú'alö, en guladxi bila'dzöbinë'. <sup>7</sup> Ní'irö gubígui'ë Jesús ga na' nacu'ë, ate' gudanë' légaquië', rnnë':

—Guli'chasa. Biti' gádxili'.

<sup>8</sup> Cate' gula'chisa lógaquië', en bulu'yúë', cúnturö nu bila'lé'enë', pero tuzë' Jesús.

<sup>9</sup> Cate' ni' tu dínnië' lu guí'a na', Jesús gunná bé'enë' légaquië', rnnë':

—Cuntu nu guiëli' ca guca lë ni bilé'eli' cate' ubanra' lu yöl-la' guti neda', Bönni' Guljé' Bönachi.

<sup>10</sup> Ní'irö yugu' bönni' usëda queë' gula'nábinë' Lë', ta'nnë':

—¿Bizx que ta'nnë' bönni' yudo' usëdi run bayudxi uluí'i lahuë' Elías zí'alö ca uluí'i lahuë' Cristo?

<sup>11</sup> Bubi'ë didza' Jesús, rë' légaquië':

—Le nácatë uluí'i lo cazë' zí'alö Elías, en ucá'anë' tsahui' yúgu'të.

<sup>12</sup> Neda' rea' libí'ili': "Chibulufi' lahuë' Elías na', pero biti' bulu'únbë'ë lë', ate' yúgu'të ca rnnasö quégaquië' gulunë' queë'." Lësca' caní ilunë' quia' neda', Bönni' Guljé' Bönachi, ulu'saca' zi'ë neda'.

<sup>13</sup> Ní'irö gula'yéajni'inë' bönni' usëda queë', bé'lenë' Jesús légaquië' didza' ca guca queë' Juan, bönni' na' buquilë' bönachi nisa.

*Ruúnë'-bi' Jesús tubi' bi'i bönni' ré'ebi' xjote'*

(Mr. 9:14-29; Lc. 9:37-43)

<sup>14</sup> Cate' bila'dxinë' ga na' nacuá' bönachi zián, gubígui'ë tu bönni' ga zoë' Jesús, ate' buzóa zxibë' lahuë' Lë', <sup>15</sup> en rë' Lë':

—Xan, buéchi' ladxi'-bi' bi'i bönni'do' quia', tu' ré'ebi' xjote', en riguí'i rizáca'da'abi', ate' zián luzuí' ridzö'öbi' lu guí' o lu nisa. <sup>16</sup> Chidiguá'a-bi' lógaquië' bönni' usëda quiu' pero biti' guca ulu'únë'-bi'.

<sup>17</sup> Bubi'ë didza' Jesús, rnnë':

—Libí'ili', bönachi cabí réajlë'ëli', en bití' nácali' tsahui'. ¿Gáca'xte caz ral-la' sóalena' libí'ili' para tséajlë'ëli' neda'? ¿Gáca'xte caz ral-la' guá' ilena' queëli'? Guli'diguá'-bi' quia' ni.

<sup>18</sup> Ní'irö Jesús buzenë' le bach bö' xihui' na' yu'u lëbi', ate' la' burúajtë lëbi', ate' la' ná'asö böácatëbi' bi' bönni'do' na'.

<sup>19</sup> Ní'irö, yugu' bönni' usëda queë' Jesús gula'biguë'ë quez ga zoë', ate' gula'nábinë' Lë', ta'nnë':

—¿Bizx que na' bití' guca ubéajtu' netu' bö' xihui' na'?

<sup>20</sup> Jesús rë' légaquië':

—Bití' guzxéqui'li' tu' cabí réajlë'ëli' Dios idú ládxi'li'. Le nácatë rea' libí'ili', sal-la' cuídi'sö naca yöl-la' réajlë' queëli' Dios, nácatë ca tu xisedo' mostaza, huáca guiëli' gu'ado' ni: “Gucuíta ni, en yöjsóa ní'ilö”, ate' la' icuítatë gu'ado' na'. Bití' bi zoa le cabí gaca gunli' channö réajlë'ëli' Dios idú ládxi'li'. <sup>21</sup> Tu bö' xihui' caní gácasö ubéajli' channö ulídzali'-në' Dios, en gunli' gubasa.

*Riguíxjö'ë Jesús leyúbölö ca si' ilútië' Lë'*

(Mr. 9:30-32; Lc. 9:43-45)

<sup>22</sup> Tsanni ni' ta'dë' luyú Galilea, Jesús gudxë' yugu' bönni' usëda queë', rnnë':

—Zoa nu udödi neda', Bönni' Guljë' Bönachi, lu ná'agaca bönachi.

<sup>23</sup> Ilútië' neda', pero cate' gaca tsonna dza Dios usubanë' neda'.

Ní'irö bulu'hui'innë' bönni' usëda queë'.

*Jesús riguíxaj lazë' que yudo'*

<sup>24</sup> Cate' bulu'dxinë' Jesús, en yugu' bönni' usëda queë' lu yödzö Capernaum, bila'dxinë' yugu' bönni' tu'quixxjë' bönachi lázagaca que yudo' ga zoë' Pedro, ate' të' lë':

—¿Naru' cabí quixxaj lazë' que yudo' bönni' rusédinë' libí'ili'?

<sup>25</sup> Bubi'ë didza' Pedro, rnnë':

—Ön, huaguixxjë'.

Cate' buázië' Pedro lu yu'u, Jesús la' bulidztë' lë', en rë' lë':

—¿Nacxi rusaca' quiu', Simón? Bönni' ta'nná bë'ë luyú ni, ¿nupxi tu'quixxjë' le riguíxaj laz, en lazxaj que yu? ¿Naru' tu'quixxjë' bönachi uládz quégaquië' o bönachi izá'a?

<sup>26</sup> Bubi'ë didza' Pedro, rë' Lë':

—Bönachi izá'a tu'quixxjë'.

Ní'irö Jesús rë' lë':

—Que lë ni na', bití' run bayudxi quixxaj laza' que yudo' tu' naca' Zxi'inë' Dios ca na' bití' bi ta'guíxaj nupa nátagaca bönachi uládz queë' bönni' na' ruquixxjë'. <sup>27</sup> Na'a, para cuntú nu gun leru', guyéaj ra' nísado', yözaj lu nisa le rizóninu'-ba' böla, ate' böla cueju'-ba' zí'alö, guzxí'i-ba'. Cate' isalju' ruá'aba', ni' idzölinu' tu dumí lásido'. Guzxí'i le, ate' gudixxaj laza', en lazu'.

## 18

*¿Núzxilö gaca lo?*

(Mr. 9:33-37; Lc. 9:46-48)

<sup>1</sup> La' dza ní'isö bila'dxinë' bönni' usëda queë' Jesús ga zoë', ate' gula'nábinë' Lë', ta'nnë':

—¿Núzxilë' bönni' ni gáquië' lo ga rinná bë'ë Dios yehua' yubá?

<sup>2</sup> Bulidzë'-bi' Jesús tubi' bi'i bönni'do', ate' buzöë'-bi' gatsaj lähui'lö ga na' nacu'ë. <sup>3</sup> Ní'irö rë' légaquië':

—Le nácatë rea' libí'ili', channö cabí huóácali' ca zeaj nácabi' bí'ido', biti' ca' tsú'uli' ga ni' rinná bë'ë Dios yehua' yubá. <sup>4</sup> Que lë ni na', núti'tës nu gaca nöxaj ladxí', en huóáca ca nácabi' bí'ido' ni, nu ni gaca lo ga ni' rinná bë'ë Dios yehua' yubá. <sup>5</sup> Núti'tës nu gun bal tubi' bí'ido' caní tu' néquibi' quia', neda' caz gun bal.

*Le tun ga nu gun dul-la'*

*(Mr. 9:42-48; Lc. 17:1-2)*

<sup>6</sup> Gunnë' ca' Jesús:

—Nu gun ga gunbi' dul-la' tubi' bí'ido' caní réajlë'ëbi' quia', gácarö dxi'a queë' bönni' na' la'tu' ugalë'ë guió'j riyëtuni yaga yenë', ate' tsöjsuladzu' cuinë' lu nísado'. <sup>7</sup> Bica' bayechi' bönachi yödzölió ni tun ga gun dul-la' luzë'eguequi. Nacuá'tica'sö le tun ga nu gun dul-la', pero bica' bayechi' nu run ga nu gun dul-la'.

<sup>8</sup> 'Que lë ni na', channö gun no'o o ni'u ga gunu' dul-la', guchugu le, en gurú'una le. Gácarö dxi'a quiu' tsöjtsáziu' ga su' ibanu' biti' rizó'o o narugu ni'a no'o, en calëga nacua' chopo no'o, en chopo ni'u ate' tsöjtsáziu' lu guí' gabila le catu caz ulu. <sup>9</sup> Channö gun guió'j lo' ga gunu' dul-la', gulëaj le, en gurú'una le. Gácarö dxi'a quiu' tsöjtsáziu' ga su' ibanu', zoa tuz guió'j lo', en calëga nacua' chopo guió'j lo', ate' tsöjtsáziu' lu guí' gabila.

*Jesús rucúdzu'ë didza' que tu bö'cu' zxila' nanítiba'*

*(Lc. 15:3-7)*

<sup>10</sup> Gunnë' ca' Jesús:

—Guli'gún chí'i cuinli' para cabí uzóali'-bi' tsölá'alö tubi' bí'ido' caní. Neda' rea' libí'ili', gubáz lá'ayi tapa chí'ë légacabi' nacua'tica'së' lahuë' Xuza' zoë' yehua' yubá. <sup>11</sup> Bida' ni neda', Bönni' Guljë' Bönachi, para usölá' nu ni naniti.

<sup>12</sup> '¿Nacxi rusáca'li' queé'li'? Tu bönni', nacua'aba' tu gayuá' bö'cu' zxila' queë', channö nítiba' tuba', ¿naru' cabí uca'anë'-ba' tápalalaj yu' chënnaba' na', ate' tsejé' gapa naca lu guí'a, para tsöjtijjé'-ba' bö'cu' zxíla'do' na' nanítiba'? <sup>13</sup> Channö udzölinë'-ba', le nácatë rea' libí'ili', udzëjarönë' ni'a queë'ba' bö'cu' zxíla'do' na' ca gunë' quégacaba' ia'tápalalaj yu' chënnaba' ni' biti' gula'nítiba'. <sup>14</sup> Lëscá' caní, Xúziru' Dios, zoë' yehua' yubá, biti' rë'ënë' nítibi' tubi' bí'ido' caní.

*Ca ral-la' uniti loru' böchi' luzá'aru'*

*(Lc. 17:3)*

<sup>15</sup> Gunnë' ca' Jesús:

—Channö böchi' luzó'o guá' dö' quiu', guyéajtsöca', en yöjca'analenë' tshahi' la' libí'isili'. Channö uzë' náguië' lí', chibuguélu'u böchi' luzó'o. <sup>16</sup> Channö cabí uzë' náguië' xtídz'u, guchë'ë ia'túé' o ia' chopë' bönni' para urúaj li xtídz'u lógaquië' chopo tsonnë' bönni', nupa gaca ilún ba nali que xtídz'a lí'. <sup>17</sup> Channö cabí uzë' náguië' xtídz'a'gaquië', gudxi ca' bönachi tu'dubi tu'sëdi queë' Dios, en channö cabí uzë' náguië' xtídz'a'gaca bönachi na', ní'irö bönni' na' gáquië' quiu' ca tu bönni' biti' réajlë'ë Dios, en ca tu bönni' ruquízxië' uláz que yödzö zítu'.

<sup>18</sup> 'Le nácatë rea' libí'ili', yúgu'të le inná bë'ëli' lu yödzölió ni, naca le chigunná bë'ë Dios yehua' yubá, ate' yúgu'të le gü'íli' lataj lu yödzölió ni, naca le chibë'ë lataj Dios yehua' yubá.

<sup>19</sup> 'Lësca' caní rea' libí'ili', channö chópasili' gun tuz xtídza'li' lu yödzölió ni ca naca tu le inábili'-në' Dios, gunë' Xuz caza' Dios, zoë' yehua' yubá, lë na' rinábili'-në'. <sup>20</sup> Ga nacua' chopá tsonna nupa ni nudúbigaca quia' neda', zoa caza' neda' gatsaj láchui'lö ga na' nacu'ë.

<sup>21</sup> Ní'irö gubígui'ë Pedro ga zoë' Jesús, en gunábinë' Lë', rnnë':

—Xan, ¿bál-laxitë luzuí ral-la' uniti lahua' böchi' luzá'a, nu na' ruá' dö quia'?' ¿Naru' gadxi luzuí?

<sup>22</sup> Jesús rë' lë':

—Neda' rea' li', calëgasö gadxi luzuí, pero idú tsónnalalaj yu' chi cuía le naca gadxi luzuí.

*Jesús rucúdzu'ë didza' que tu bönni' huen dxin biti' buniti lahuë' luzë'ë*

<sup>23</sup> Gunnë' ca' Jesús:

—Ia'stú, ca gun Nu na' rinná bë' yehua' yubá naca ca benë' tu bönni' rinná bë'ë. Gú'unnë' ucá'analenë' tsahui' yugu' bönni' huen dxin queë'.

<sup>24</sup> Cate' gusí lahuë' rucá'analenë' légaquië' tsahui', dujuá'gaquië' ga zoë' tu bönni' ral-lë'ë queë' zían gayuá' dumí. <sup>25</sup> Tu' cabí guca quíxjë', gunná bë'ë xanë' idó'ogaquië' lë', en nigula queë', en yugu' bi'i queë', en yúgu'të le dë queë', ate' ní'irö gazxaj le ral-lë'ë queë' xanë' na'. <sup>26</sup> Ní'irö bönni' huen dxin na' buzóa zxiibë' lahuë' xanë', en gunábinë' lë', rnnë': "Xan, ben zxön láchu'u neda'. Huaguíxaj caza' li' idutë." <sup>27</sup> Ní'irö xanë' na' buéchi' láchxë'ë bönni' huen dxin queë' na', en buniti lahuë' lë' lë na' ral-lë'ë queë', ate' busanë' lë'. <sup>28</sup> Cate' burúajë' bönni' huen dxin na', la' yöjtságatë' tu bönni' rúnlenë' lë' tsözxön dxin, ate' bönni' na' ral-lë'ë queë' láti'do'os dumí. Ní'irö guzxönë' lë', en guzxínnajë' yenë', ate' rë' lë': "Gudíxjatë lë na' ral-lu'u quia'." <sup>29</sup> Ní'irö luzë'ë na' buzóa zxiibë' lahuë', en gunaba yechë'ë lahuë', rnnë': "Ben zxön láchu'u neda'. Huaguíxaj caza' li' idutë." <sup>30</sup> Biti' gú'unnë' bönni' huen dxin na', ate' yöjlu'ë lë' lidxi guíë dza quíxjarë' lë na' ral-lë'ë queë'. <sup>31</sup> Cate' bila'lé'enë' lë ni ia'zica'rë' huen dxin, bulu'huí'inide'enë' ní'a queë', ate' yöjtíxjö'iguequinë' xángaquië' yúgu'të lë na' guca. <sup>32</sup> Ní'irö xángaquië' bulidzë' bönni' huen dxin na', ate' rë' lë': "Li', huen dxin catsahui'. Yúgu'të dumí na' gúl-lu'u quia' buniti lahua' li'. Busúlua' lë na' gúl-lu'u quia' tu' gunaba yechu'u lahua'. <sup>33</sup> ¿Naru' cabí ral-la' huéchi' láchu'u ca' luzó'o ca na' bena' neda', buéchi' láchxá'a li'?" <sup>34</sup> Ní'irö guléde'enë' xanë', en budödë' lë' lu ná'agaca nupa ulu'saca' zi' lë dza quíxjarë' idutë le ral-lë'ë queë'.

<sup>35</sup> Ní'irö rnnë' Jesús:

—Lësca' caní gunë' Xuza' zoë' yehua' yubá queë'li' channö cabí uniti loli' idú láchxi'li' yugu' böchi' luzá'ali'.

## 19

*Nupa tu'lá'a yö'l-la' nutsaga na'*

(Mr. 10:1-12; Lc. 16:18)

<sup>1</sup> Cate' budxi bë'ë Jesús yugu' didza' ni, buzë'ë luyú Galilea, ate' bidxinë' luyú Judea le dë ia'tsölá'a yegu Jordán saca' ga rilén gubidza. <sup>2</sup> Bönachi zían sójácálen Jesús, ate' bunë' léguequi ni'.

<sup>3</sup> Ní'irö bila'dxinë' bal-lë' bönni' yudo' fariseo ga zoë' Jesús para ila'zí' bë'ë Lë', ate' gula'nábinë' Lë', ta'nnë':

—¿Naru' dë lataj bönni' nutsaga në'ë usanë' nigula queë' tu' nözi bíti'tës bi' raca?

<sup>4</sup> Bubi'ë didza' Jesús, rë' légaquië':



—¿Naru' cabí nulábanili' le nazúaj lu guichi lá'ayi ca benë' Dios bönachi cate' si' benë' yödžölió? Bönni', en nigula benë' légaquië'. <sup>5</sup> Caní gunnë' Dios: "Que lë ni na', ral-la' usanë' tu bönni' xuz xinë'ë, ate' tsaz tsöjsóalenë'-nu nigula queë', ate' iropë' na' ulu'huóáquië' tuz bönachi." <sup>6</sup> Caní naca, bití' rō nácagaquië' chopë' pero tuz bönachi chinuhuóáquië'. Que lë ni na', bití' ral-la' ulu'lë'ë bönni' nupa na' benë' Dios tuz.

<sup>7</sup> Ní'irō bönni' yudo' na' gula'nábinë' Jesús, ta'nnë':

—¿Bizx que na' gunná bé'enë' Moisés légaquië' le ru'íi lataj nu bönni' unödžjë' tu guichi queënu nigula queë' le rnna nulá'a yöl-la' nutsaga na', ate' usanë'-nu nigula queë' na'?

<sup>8</sup> Jesús rë' légaquië':

—Caní benë' Moisés tu' nazidi icja láchxi'do'oli'. Bennë' libí'ili' lataj usanli'-nu nigula queéli', pero cate' gusí'lo guta' gurō'ō yödžölió, bití' guca caní. <sup>9</sup> Neda' rea' libí'ili', channō tu bönni' usanë'-nu nigula queë', en bití' gudálennu bönni' yúbölō, ate' utsaga ná'alenë'-nu nigula yúbölō, gunë' dul-la' le riguitsaj xibá que yöl-la' nutsaga na'. Lësca' caní, channō nu bönni' utsaga ná'alenë'-nu nigula na', nusanë'-nu bönni' queënu, gunë' dul-la' le riguitsaj xibá que yöl-la' nutsaga na'.

<sup>10</sup> Ní'irō yugu' bönni' usëda queë' Jesús gulë' Lë', ta'nnë':

—Channō caní naca queë' tu bönni' zóalenë'-nu nigula queë', gácarō dxi'a queë' la'tu' cabí utsaga caz në'ë, ugá'anë' tuzë'.

<sup>11</sup> Bubi'ë didza' Jesús, rë' légaquië':

—Bití' gaca ila'zí' lu ná'agaca yúgu'të bönachi didza' ni, pero núpasō na' Dios ruzéajni'inë' léguequi. <sup>12</sup> Nacu'ë bönni' bití' tu'tsaga ná'alengaquië' nigula tu' cabí nácagaquië' idú bönni' biguiú', tu' gualajë' ca', ate' ia'zica'rë' bönni' bití' tu'tsaga ná'alengaquië' nigula tu' bulu'zaga' bönachi xinözgaquië', ate' ia'zica'rë' bönni' bití' tu'tsaga ná'alengaquië' nigula para gaca ilunë' xichinë' Dios, Nu rinná bë' yehua' yubá. Nu sequi' si' lu në'e didza' ni ral-la' si' lu në'e le.

*Jesús rulidza tsáhuë'ë-bi' yugu' bí'ido'*

*(Mr. 10:13-16; Lc. 18:15-17)*

<sup>13</sup> Ní'irō yugu' xuz xiná'agacabi' bí'ido' dujuá'agaquië'-bi' ga zoë' Jesús para ixóa në'ë légcabi', en ulidžë' Dios ni'a quégacabi', ate' bönni' usëda queë' bulu'zágui'ë xinözgaquië'. <sup>14</sup> Ní'irō Jesús rë' légaquië', rnnë':

—Guli'gü'i-bi' yugu' bí'ido' lataj ila'dxinbi' ga zoa', en bití' uzága'li' xinözgacabi', tu' ila'zí' lataj nupa nácagaca ca yugu' bí'ido' caní ga ní' rinná bë'ë Dios yehua' yubá.

<sup>15</sup> Jesús guxóa në'ë légcabi', ate' ní'irō buzë'ë ní'.

*Tu bönni' unná bë' cuidi' dë yöl-la' tsahui' queë'*

*(Mr. 10:17-31; Lc. 18:18-30)*

<sup>16</sup> Tu bönni' ni zoë' iz cuidi' queë' buduyüë' Jesús, en rë' Lë':

—Bönni' Usedi idú tsahui'. ¿Bizxi le naca tsahui' ral-la' guna' para gata' yöl-la' na'bán idú quia'?

<sup>17</sup> Bubi'ë didza' Jesús, rë' lë':

—¿Naru' nöztsenu' lë na' rnno' quia', rnno' naca' idú tsahui'? Cuntu nu bönni' náquië' idú tsahui'. Tuzë' Dios náquië' idú tsahui'. Channō rë'ënu' gata' yöl-la' na'bán idú quiu', ben ca rinná bë' xibá queë' Dios.

<sup>18</sup> Ní'irō bönni' na' rë' Jesús, rnnë':

—¿Bízxilō xibá na'?

Jesús rē' lē':

—Xibá na' gunná bē'ē Moisés:

Biti' gútiu' bōnachi.

Biti' gunu' dul-la' le riguitsaj xibá que yōl-la' nutsaga na'.

Biti' cuanu'.

Biti' innío' que böchi' luzó'o le cabí nácate.

<sup>19</sup> Ben bal xuz xinó'o.

Bidxí'i böchi' luzó'o ca nadxí'i cuinu'.

<sup>20</sup> Bōnni' na' ni zoē' iz cuidi' queē' gudxē' Jesús, rnnē':

—Yúgu'tē lē ni runa' ga gudela' naca' bí'ido'. ¿Naru' zoa ia'tú le ral-la' guna'?

<sup>21</sup> Jesús rē' lē':

—Channō rē'ēnu' gacu' tsahui', guyéaj, yōjēti' le dē quiu', ate' dumí na' si'u, bunōdzaj quégaca bōnachi yechi'. Caní gata' yōl-la' tsahui' quiu' ni' yehua' yubá. Ní'irō gudá, gudá neda'.

<sup>22</sup> Cate' bōnni' na' ni zoē' iz cuidi' queē' biyōnnē' didza' ni, sōhuōjē' ruhu'i'innē' tu' dēda' yōl-la' tsahui' queē'.

<sup>23</sup> Ní'irō Jesús gudxē' yugu' bōnni' usēda queē', rnnē':

—Le nácate rea' libí'ili', bōniga naca tsáziē' nu bōnni' dē yōl-la' tsahui' queē' ga rinná bē'ē Dios yehua' yubá. <sup>24</sup> Ia'stú rea' libí'ili', nácáro bōniga tsáziē' tu bōnni' dē yōl-la' tsahui' queē' ga ni' rinná bē'ē Dios ca tōdiba' bōa' lu nagui yōtsi'.

<sup>25</sup> Cate' bila'yōnnē' yugu' bōnni' usēda queē' didza' ni, bulu'bánninē, ta'nnē':

—¿Nuzxi caz gaca ulá, channō?

<sup>26</sup> Jesús buyúē' légaquiē', en rē' légaquiē':

—Biti' gaca ilún bōnachi lē ni, pero Dios huáca gunē' yúgu'tē.

<sup>27</sup> Ní'irō bubí'ē didza' Pedro, en rē' Jesús:

—Buyútsōca', netu' chibucá'anatu' yúgu'tē, en zá'entu' Li'. ¿Bíxzirō gata' queētu'?

<sup>28</sup> Jesús rē' légaquiē':

—Le nácate rea' libí'ili', dza ni' cate' ucubi yōdzōlió, ate' cō'a inná bē'a neda', Bōnni' Guljē' Bōnachi, ga ni' gácatēra' lo, lēasca' libí'ili' zá'lenli' neda' na'a, cō'ōli' chinnu lataj ga inná bē'ēli', en uchi'a usōrōli' quégaca idxinnu cō'tē yōdzō quégaca xzí'ini xi'sóē' Israel. <sup>29</sup> Nu bōnni' rucá'anē' lidxē', o yugu' böché'ē, o yugu' zanē', o xuzē', o xinē'ē, o nigula queē', o yugu' xzí'inē', o yugu' xiyúē', para gunē' xichina', bōnni' ni si'ē ia'tú gáyua'tērō ca' queē', en gata' ca' yōl-la' na'bán idú queē'. <sup>30</sup> Zíán nupa nácagaca lo na'a, ulu'gá'ana cá'asō, ate' nupa nagá'anagaca cá'asō na'a, hualácagaca lo.

## 20

*Rucúdzu'ē didza' Jesús ca tunē' bōnni' huen dxin*

<sup>1</sup> Gunnē' ca' Jesús:

—Ca gun Bōnni' na' rinná bē'ē yehua' yubá naca ca benē' tu bōnni' xan yu'u. Birúajē' zílado', yōjdiljē' yugu' bōnni' ilunē' dxin ga naca lu xiyúē' ga na' nadúzgaca lubá uva. <sup>2</sup> Cate' chibugá'analē' tsahui' yugu' bōnni' huen dxin na', quíxjē' légaquiē' tu dumí lazzaj que tu dza, gusól-lē'ē légaquiē' ilunē' dxin ga naca lu xiyúē'. <sup>3</sup> Cate' hurúajē' idú xsila, bilé'enē' ia'zica'rē' bōnni' nacua'asē' ca' ga naca lu yē'ēyi. <sup>4</sup> Rē' légaquiē': “Guli'tséaj ca' libí'ili' ga naca lu xiyúa', ate' quíxjja' libí'ili' le naca tsahui'.”

La' yójacatē' ca' légaquiē'. <sup>5</sup> Burúajē' bōnni' xan yu'u na' leyúbölö idú huagubidza, enca' idú xihuö udzö', en la' tuz ca benē', gusöl-lē' yugu' bōnni' yōjxáquiē' lu xiyúē'. <sup>6</sup> Burúajē' ca' cate' ni' zoa ia'látido'os gubidza, en yōjxáquiē' ia'zica'rē' bōnni' nacuá'asē' ca' ni', ate' rē' légaquiē': "¿Bizx que zoátali ni cá'asö idú dza, biti' bi dxin runli'?" <sup>7</sup> Yugu' bōnni' na' tē' lē', ta'nnē': "Cuntu nu benna xichintu'." Ní'irö rē' légaquiē': "Guli'tséaj ca' libí'ili' ga naca lu xiyúa', ate' quizzxa' libí'ili' le naca tsahui'." <sup>8</sup> Cate' chizóa gal-la, bōnni' xan yu na' rē' bōnni' yu'u lu nē'ē yugu' huen dxin na', rnnē': "Bulidza yugu' bōnni' huen dxin na', ate' gu'u lázxxagaquiē'. Quizzju' zí'alö yugu' bōnni' na' bila'dxinē' yōjsetē. Udxin na' quizzju' yugu' bōnni' na' bila'dxinē' zí'atēlö." <sup>9</sup> Ní'irö bila'dxinē' bōnni' yōjéngaquiē' dxin cate' ni' zoa ia'látido'os gubidza, en gula'zi'ē tu tuhuéajē' dumí lazxxaj que tu dza. <sup>10</sup> Cate' bila'dxinē' bōnni' yōjéngaquiē' dxin zí'atēlö, guléquinē' huazí'agaquiē' ia'lati', pero lē'sca' gula'zi'ē tu tuhuéajē' dumí lazxxaj que tu dza. <sup>11</sup> Cate' gula'zi'ē le, gula'nnē'dē'ē queē' bōnni' xan yu'u na', <sup>12</sup> ta'nnē': "Yugu' bōnni' ni bila'dxinē' ga yōjsetē, tu chí'isö gulunē' dxin, en tuz ca gudíxxjatso' légaquiē' ca netu', ate' netu' ni bentu' dxin idú dza, en gúguida'atu' gubidza." <sup>13</sup> Bubi'ē didza' xan yu na', en rē' tuē': "Böcha'a, biti' bi runa' quiu' le cabí naca tsahui'. ¿Naru' cabí bugá'ana tsáhuiru' si'u tu dumí lazxxaj que tu dza? <sup>14</sup> Guzxí' lazxxju', en böaj lidxu'. Neda' rē'ēnda' quizzxa' bōnni' ni yōjenē' dxin ga yōjsetē la' leze ca na' riguíxxja' li'. <sup>15</sup> ¿Naru' cabí dē lu na'a guna' ca rē'ēnda' len le nequi quia'? ¿Naru' ruzxē'etsenu'-nē' luzó'o tu rúnna'da' queē'?" <sup>16</sup> Caní naca, bal-lē' bōnni', tu'cá'ana bōnachi légaquiē' cá'asö, ilácagaquiē' lo, ate' ia'zica'rē' bōnni', nácagaquiē' lo na'a, ulu'gá'anē' cá'asö. Zián nupa nulidza', pero nabábasö nupa narögaca.

*Rigúxjö'ē Jesús leyúbölö ca si' ilútiē' Lē'*

*(Mr. 10:32-34; Lc. 18:31-34)*

<sup>17</sup> Cate' ni' yu'ē Jesús nōza, sa'yéajē' Jerusalén, guchē'ē quez idxínnutē' bōnni' usēda queē', en rē' légaquiē':

<sup>18</sup>—Buli'yútsöca', ribenru' zéajru' Jerusalén, ate' ni' soa nu udödi neda', Bōnni' Guljē' Bōnachi, lu ná'agaquiē' bixúz unná bē', en lu ná'agaquiē' bōnni' yudo' usēdi, ate' ila'chúguiē' quia' gátia'. <sup>19</sup> Ulu'dödē' neda' lu ná'agaquiē' bōnni' zitu' para ulu'titjē' neda'. Ila'guinē' neda', en ulu'dē'ē neda' lē'e yaga cruz, pero cate' gaca tsonna dza, Dios usubanē' neda' lu yöl-la' guti.

*Le gunábanu xiná'agaquiē' Jacobo, en Juan*

*(Mr. 10:35-45)*

<sup>20</sup> Ní'irö bidxinnu xiná'agaquiē' Jacobo, en Juan, yugu' xzí'inē' Zebedeo, ga zoē' Jesús, dzágagaquiē'-nu chopē' ni, ate' buzóa xzíbinu lahuē' Jesús, en gunábinu Lē' tu le uzá' ládxē'ē queēnu. <sup>21</sup> Jesús gunábinē'-nu, rnnē':

—¿Bizxi rē'ēnu'?

Rēnu Lē':

—Gunná bē' cō'öbi' tubi' xzí'ina' ni cuita lē'u ibēla, en ia'tubi' cō'öbi' cuita lē'u yögöla ga ni' inná bē'u.

<sup>22</sup> Bubi'ē didza' Jesús, rē' légaquiē':

—Biti' nōzili' le rinábali'. ¿Naru' huáca guá' ilenli' le qui'i saca' neda', en idí'ali' nisa ca idila' neda' nisa, gátia'?

Tē' Lē':

—Huácatu’.

<sup>23</sup> Ní’irō Jesús rē’ légaquiē’:

—Le nácatē le ral-la’ qui’i saca’a neda’, gaca ca’ queēli’, en le ral-la’ idila’ neda’ nisa, gátia’, idílali’ ca’ nisa libí’ili’, pero que cō’ōli’ cuita lē’a ibēla o cuita lē’a yōgōla, biti’ dē lu na’a nu gu’a que, pero gata’ quégaca nupa ni’ chinupē’ē Xuza’ quéguequi.

<sup>24</sup> Cate’ ia’chiē’ bōnni’ usēda queē’ Jesús bila’yōnnē’ lē ni, gula’lenē’.

<sup>25</sup> Ní’irō Jesús bulidzē’ légaquiē’, rnnē’:

—Nōzquézili’ ca tunē’ yugu’ bōnni’ ta’nná bé’enē’ bōnachi izá’a, ridōditē bē’ ta’nná bé’enē’ légaquiē’, ate’ nupa ni’ nácacagarō lo ta’nná be’e la’ luzé’eguequisō. <sup>26</sup> Biti’ gaca caní queēli’. Núti’tēsōli’ libí’ili’ nu rē’ēni gaca zxon ga zóali’, nu ni ral-la’ gun dxin que ia’zica’rōli’. <sup>27</sup> Lēscá’ caní, núti’tēsōli’ libí’ili’ nu guē’ēni gaca lo, ral-la’ gaca ca tu bōnni’ nadó’o que ia’zica’rōli’. <sup>28</sup> Lēscá’ neda’, Bōnni’ Guljē’ Bōnachi, bida’ ni, calēga para nu gun xichina’, pero para guna’ xichíngaca bōnachi, en udōda’ yōl-la’ na’bán quia’, le quíxzjada’ ni’a quégaca bōnachi zían para ulu’lágaca.

*Ruínē’ Jesús chopē’ bōnni’ nachul-la lógaquiē’*

(Mr. 10:46-52; Lc. 18:35-43)

<sup>29</sup> Cate’ ni’ tu’rúajē’ yōdzō Jericó, bōnachi zían sōjácalen Jesús. <sup>30</sup> Nacu’ē chopē’ bōnni’ nachul-la lógaquiē’ ni’, rō’gaquiē’ ra’ nōza. Cate’ bila’yōnnē’ ridōdē’ Jesús ni’, gulu’ē zidzaj didza’, ta’nnē’:

—Xan, zxi’ini xi’sōē’ David, buéchi’ ladxi’ netu’.

<sup>31</sup> Bōnachi zían nacua’ ni’ gulē’ légaquiē’ ila’cu’ē dxisō, pero zídzejrō gulu’ē didza’, ta’nnē’:

—Xan, zxi’ini xi’sōē’ David, buéchi’ ladxi’ netu’.

<sup>32</sup> Ní’irō guzē’ ribōzē’ Jesús, en bulidzē’ légaquiē’, ate’ gunábinē’ légaquiē’, rnnē’:

—¿Bizxi rē’ēnili’ guna’ queēli’?

<sup>33</sup> Tē’ Jesús:

—Xan, rē’ēnitu’ gunu’ ga huóalaj guiōj lotu’.

<sup>34</sup> Ní’irō Jesús buéchi’ lādxē’ē légaquiē’, ate’ gudanē’ guiōj lógaquiē’. La’ bōáljatēgaca guiōj lógaquiē’, ate’ yōjácalenē’ Jesús.

## 21

*Ridxinē’ Jesús yōdzō Jerusalén len yōl-la’ ba zxon*

(Mr. 11:1-11; Lc. 19:28-40; Jn. 12:12-19)

<sup>1</sup> Cate’ bila’dxíngalē’ yōdzō Jerusalén, en ni’ nacu’ē ga dē yōdzō Betfagé ga na’ zoa Guí’a Yaga Olivo, ní’irō gusól-lē’ē Jesús chopē’ bōnni’ usēda queē’, <sup>2</sup> ate’ rē’ légaquiē’:

—Guli’tséajtsōca’ yōdzōdo’ ni’ ca dōdilō ga ni zóaru’, ate’ la’ tsōjxáca’tēli’-ba’ tuba’ burro guna’ nága’ba’, ate’ dzaga lēba’ tuba’ burro biguiú’do’. Guli’tsōsedxi’-ba’, en ichē’ēli’-ba’ quia’ ni. <sup>3</sup> Channō nu bi guiē libí’ili’, guli’guié nu na’: “Xanru’ riquinnē’-ba’.” Ní’irō isól-lē’ē légacaba’ quia’.

<sup>4</sup> Caní guca para gaca lē na’ buzúajē’ lu guichi bōnni’ bē’ē didza’ uláz queē’ Dios, gunnē’:

<sup>5</sup> Guli’guié nupa nacua’ yōdzō Sión,

Buli’yútsōca’, zē’ē Bōnni’ inná bé’enē’ libí’ili’.

Lu yōl-la’ nōxaj ladxi’ queē’ dxíē’-ba’ tuba’ burro.

Dxié’ cúdzu’ba’ búrrodo’ nácabá zxi’iniba’ bōa’ ruá’aba’ yua’.

<sup>6</sup> Ní'irö bönni' usëda queë yöjáquië ni', ate' gulunë' ca na' gunná bé'enë' Jesús légaquië'. <sup>7</sup> Gula'chë'ë-ba' burro guná' na', en burro biguiú'do' na', ate' bulu'dxië' cúdzu'gacaba' yugu' lari' guitsa' queégaquië', ate' gudxië' Jesús lahui' lari' na'. <sup>8</sup> Nacua' ca' bönachi zían ni', ate' gula'chilaj yugu' lari' ta'xóa cúdzu'guequi la' nöza. Ia'zica'rë' bulu'chibë' zin le bulu'zxóë' ga naca la' nöza. <sup>9</sup> Gulu'i zidzaj didza' bönachi na' nanörugaca, en nupa na' sójacalen Jesús, ta'nná:

—¡Yöl-la' ba Lë', zxi'ini xi'sóë' David! ¡Bica' ba nu ni za' ni'a que Lë' Xanru'! ¡Yöl-la' ba Dios!

<sup>10</sup> Cate' guyázië' Jesús yödzo Jerusalén, bulu'dzatsa yúgu'të bönachi lu yödzo na', ate' zían nupa gulë luzë'eguequi, ta'nná:

—¿Nuzxi caz bönni' ni'?

<sup>11</sup> Ia'bal-la bönachi ni' ta'nná:

—Nu ni Jesús, bönni' ru'ë didza' uláz queë' Dios, ate' naca ladzë' Nazaret luyú Galilea.

*Jesús rulatjë' lö'a yudo'*

(Mr. 11:15-19; Lc. 19:45-48; Jn. 2:13-22)

<sup>12</sup> Cate' guyázië' Jesús lö'a yudo' queë' Dios, bulágui'ë ní'ilo yúgu'të nupa tuti' to'o ga naca lö'a yudo' na'. Burixë' ca' yugu' blaga queégaquië' bönni' tu'tsë'ë dumí yödzo zi'tu', en yugu' le ta'bö'i nupa tuti' gu'dodo'. <sup>13</sup> Rë' légaquië':

—Nazúaj lu guichi lá'ayi le rnna: “Lidxa' si'i le, yu'u ga nu ulidza Dios”, pero libí'ili' chinunli' lataj ni ca naca yu'u lídxigaca gubán.

<sup>14</sup> Cate' ni' zoë' Jesús chila yudo', bal-lë' bönni' nachul-la lógaquië', en bönni' biti' raca ila'zë'ë bila'dxinë' ga na' zoë', ate' Lë' bunë' légaquië'. <sup>15</sup> Gula'lenë' yugu' bixúz unná bë', en bönni' yudo' tu'sédinë' cate' bila'lé'enë' yugu' yöl-la' huáca ni runë' Jesús, en bila'yönnë' tu'í'ibi' bí'ido' zidzaj didza' ga naca chila yudo', ta'nnabi':

—¡Bica' ba Lë', zxi'ini xi'sóë' David!

<sup>16</sup> Ní'irö të' Jesús:

—¿Naru' cabí riyömmu' ca ta'nnabi' bi'i ni?

Bubi'ë didza' Jesús, rnnë':

—Ön, riyönda'. ¿Naru' catu caz nulábanili' le nazúaj lu guichi lá'ayi caní caz ral-la' gaca? Caní rnna: “Li' benu' ga yugu' bi'i cuidi', en yugu' bí'ido' ni' tádxi'bi' gulúl-labi' yöl-la' ba le naca idú.”

<sup>17</sup> Ní'irö Jesús bucá'anë' légaquië', ate' burúajë' Jerusalén. Guyijë' yödzo Betania ga ni' bugá'anë' idú yëla.

*Jesús rulidza zi'ë yaga higo*

(Mr. 11:12-14, 20-26)

<sup>18</sup> Cate' za' rení', ate' ni' söhuöjë' Jesús Jerusalén, ridunë'. <sup>19</sup> Bilé'enë' tu yaga higo rö' gal-la' cuite nöza, ate' gubígui'ë ga na' rö', pero biti' bi bidzölinë' lu yaga na'. Xilágui'so dxía. Ní'irö Jesús gudxë' le:

—Bíti'rö cuía le ribía quiu'.

La' gubídxitë yaga higo na'. <sup>20</sup> Cate' bila'lé'enë' bönni' usëda queë' lë ni, bulu'bánninë', ate' gula'nánninë' Jesús, ta'nnë':

—¿Nacxi caz guca, gubídxitë yaga ni'?

<sup>21</sup> Bubi'ë didza' Jesús, rë' légaquië':

—Le nácatë rea' libí'ili', channö tséajlë'ëli' Dios, en biti' gaca chopá ládxi'li', calégasö huáca gunli' ca na' bena' que yaga ni, pero channö

guiélli' guí'a ni: Gucuíta, en yöjsóa lu nísado', gaca ca na' innali'. <sup>22</sup> Lësca' caní, yúgu'tè le inábali' cate' ulídzali'-nè' Dios, channö huayéjlè'èli' gunné' Dios queéli', huazí'ili' lè na' inábali'.

*Yöl-la' unná bè' dè lu në'è Jesús*

(Mr. 11:27-33; Lc. 20:1-8)

<sup>23</sup> Ní'irö guyáziè' Jesús chila yudo', ate' tsanni ni' rusédinè' bönachi nacua' ni', bila'dxinè' yugu' bixúz unná bè' len bönni' gula tu'zéajni'inè' ga zoè', ate' gula'nábinè' Jesús, ta'nné':

—¿Bizxi yöl-la' unná bè' dè lu no'o, runtso' yugu' lè ni? ¿Nuzxi budödi lu no'o yöl-la' unná bè' ni?

<sup>24</sup> Bubi'è didza' Jesús, rë' légaquiè':

—Lësca' neda' inábatsöqui'da' libí'ili' tu didza'. Channö quíxjöi'ili' neda' ca naca, neda' ca' guía' libí'ili' bizxi yöl-la' unná bè' dè lu na'a runa' caní.

<sup>25</sup> ¿Nuzxi caz gusöl-la' Juan para buquülè' bönachi nisa? ¿Naru' Dios gusöl-lè'è lè', o gula'sól-lè'è yugu' bönni' lè'?

Ní'irö gula'sí lógaquiè' bönni' yudo' na' ta'nné' la' légacasè':

—Channö innaru': Dios gusöl-lè'è lè', la' guièté' rë'u: “¿Bizx que biti' guyéajlè'èli' lè'?” <sup>26</sup> Na'a, channö innaru': Gula'sól-lè'è yugu' bönni' lè', rádxiru' le ilún bönachi lu yödzö tu' ta'yéajlè'è yúgu'tè' Juan na' bè'è didza' uláz queè' Dios.

<sup>27</sup> Que lè ni na' bulu'bi'è didza', tè' Jesús:

—Biti' nöztu'.

Jesús rë' légaquiè':

—Neda' ca', biti' guía' libí'ili' bizxi yöl-la' unná bè' dè lu na'a runa' lè ni.

*Rucúdu'è didza' Jesús ca gulunbi' chópabi' zxí'inè' tu bönni'*

<sup>28</sup> Ní'irö Jesús gudxè' yugu' bönni' yudo' na':

—¿Nacxi rusáca'li' queéli'? Guzóè' tu bönni' nacua'abi' chópabi' bi'i bönni' queè', ate' yöjödxe'-bi' tubi' bi'i queè' na', gunné': “Zxí'ina', guyéaj na'a tsöjenu' dxin ga naca luyú quia' ga rögaca lubá uva.” <sup>29</sup> Bubi'ibi' didza' bi'i na', gúdxibi'-nè': “Biti' rë'ènda' tseja'.” Gudödi ni' bubí'li' ládxi'bi', ate' yöjenbi' dxin. <sup>30</sup> Ní'irö bönni' na' yöjödxe'-bi' ia'tubi' bi'i queè' na', en la' tuz ca gunné', ate' bubí'ibi' didza' bi'i ni, gúdxibi'-nè': “Huaca, Dad. Uyéaja'.” Biti' guyéajbi' bi'i ni. <sup>31</sup> ¿Núzxilöbi' bi'i chopa ni benbi' le guyaza ládxe'è xúzibi'?

Bulu'bi'è didza', tè' Jesús:

—Bi'i zí'aló na'.

Ní'irö Jesús rë' légaquiè':

—Le nácatè rea' libí'ili', ila'nöruè' bönni' uquíxaj tuá' dö', en yugu' nigula udá dzaga ca libí'ili', ate' ila'yáziè' ga ni' rinná bè'è Dios. <sup>32</sup> Caní gaca, tu' bidè' Juan, bönni' buquülè' bönachi nisa, ga zóali', en busédinè' libí'ili' le naca tsahui' ca ral-la' gunli', ate' libí'ili' biti' guyéajlè'èli' lè', pero yugu' bönni' uquíxaj, en yugu' nigula udá dzaga gula'yéajlè'è lè'. Sal-la' bilé'eli' lè ni, biti' bubí'li' ládxi'li' para tséajlè'èli' lè'.

*Rucúdu'è didza' Jesús ca béngaquiè' bönni' huen dxin biti' nácagaquiè' tsahui'*

(Mr. 12:1-12; Lc. 20:9-19)

<sup>33</sup> Gunné' ca' Jesús:

—Buli'zé nágalí' ia'tú le ucúdu'a didza'. Guzóè' tu bönni' xan yu'u, ate' bönni' ni budè'è yugu' lubá uva luyú queè'. Guléquiè' lè'aj que, en guchö'önè' tu lerui guió'j ga isíè' xisi uva na'. Benè' ca' tu yu'u xitsá' ga

gaca nu uyú idútē luyú queë'. Ní'irō budōdē' luyú na' lu ná'agaquiē' bōnni' huen dxin, para ila'zi'ē quégaquiē' gatsaj huéaj, ate' sa'yéajē' yōdzō zi'tu'.

<sup>34</sup> 'Cate' chibidxín dza ulu'chibē' yugu' lubá uva na', gusól-lē'ē bōnni' xan luyú na' bal-lē' ni'a nē'ē ga na' nacu'ē bōnni' huen dxin ni' para ulu'zi'ē lu ná'agaquiē' uláz queë'. <sup>35</sup> Ní'irō gula'zōnē' bōnni' huen dxin na' yugu' ni'a nē'ē na'. Gulunē' huē' tuē', en ia'túē' bétigaquiē' lē', en ia'túē' bulu'ladxē' lē' guiōj. <sup>36</sup> Leyúbölō bōnni' xan luyú na' gusól-lē'ē ca' ia'zica'rē' ni'a nē'ē, ate' guláquiē' zióntērē' ca nupa na' gusól-lē'ē zí'alō, ate' la' tuz ca gulunē' bōnni' huen dxin ni' quégaquiē'.

<sup>37</sup> 'Ga yōjsete, gusól-lē'ē ca' zxí'inē' ga na' nacu'ē. Guzá' ladxē'ē, rnnē': Hualunē' bal bi'i quia'. <sup>38</sup> Cate' yugu' bōnni' huen dxin na' bila'lē'enē'-bi' zxí'inē', la' gula'nnatē' la' légacasē': "Bi'i ni guequi queēbi' luyú ni. Guli'dá, gútiru'-bi', ate' le ral-la' guequi queēbi' guequi queēru'." <sup>39</sup> Ní'irō gula'zōnē'-bi', ate' bulu'béajē'-bi' ní'ilō luyú ga na' rō'gaca lubá uva, ate' bétigaquiē'-bi' ni'.

<sup>40</sup> Ní'irō Jesús gunábinē' légaquiē', gunnē':

—Cate' udxiné' bōnni' xan luyú na', ¿nacxi gunē' quégaquiē' bōnni' huen dxin ni'?

<sup>41</sup> Bulu'bi'ē didza' bōnni' yudo' na', tē' Jesús:

—Usunítiē' bōnni' tuá' dō' na', ate' luyú queë' na' udōdē' lu ná'agaquiē' ia'zica'rē' bōnni' huen dxin, bōnni' ilu'ē lē' uláz queë' cate' idxín dza ulu'chibē' le.

<sup>42</sup> Ní'irō Jesús gudxē' légaquiē':

—¿Naru' catu caz nulábanili' lē' na' nazúaj lu guichi lá'ayi ca naca lē' ni? Caní rna:  
Guiōj na' gula'rú'unē' bōnni' tu'cu'ē zō'ō,  
la' guiōj ná'asó chinaca guiōj len zō'ō.  
Lē' cazē' Xanru' benē' ga naca caní,  
ate' naca tu le run ga rubániru'.

<sup>43</sup> 'Que lē' ni na' rea' libí'ili', xilátjali' ga na' rinná bē'ē Dios idúa queēli', en gata' quégaca bōnachi ilún ca ral-la' gun nu nadelí' lataj ni'. <sup>44</sup> Nu tsōjchegu' lu guiōj ni, la' cuinsi quítsaj, ate' channō guiōj ni tseajbaga' bōnni' na', uzxuzxaj lē'.

<sup>45</sup> Cate' yugu' bixúz unná bē', en yugu' bōnni' yudo' fariseo bila'yōnnē' lē' na' bucúdzū'ē didza' Jesús, téquibe'enē' bē'ē Jesús didza' ca naca quégaquiē'. <sup>46</sup> Gula'zóa gula'bō'ē ila'zōnē' Jesús, pero guládxiné' bi ilún bōnachi zión nacua' ni' tu' ta'yéajlē' náquiē' Jesús bōnni' ru'ē didza' uláz queë' Dios.

## 22

*Rucúdzū'ē didza' Jesús ca naca que laní que yōl-la' rutsaga na'*

<sup>1</sup> Jesús bē'lenē' légaquiē' didza' leyúbölō, ate' bucúdzū'ē didza', rnnē':

<sup>2</sup> —Ca gaca quégaca nupa ila'yaza ga rinná bē'ē Dios yehua' yubá naca ca guca quégaca nupa bulidzē' tu bōnni' rinná bē'ē cate' benē' laní que dza utsaga ná'abi' bi'i bōnni' queë'. <sup>3</sup> Gusól-lē'ē ni'a nē'ē tsōjxi'gaquiē' yugu' bōnni' chinulidzē' para guídagaquiē' laní queēbi', pero bití' gulē'ēnē' guídagaquiē'. <sup>4</sup> Ní'irō gusól-lē'ē ia'zica'rē' ni'a nē'ē, en gudxē' légaquiē': "Guli'tsōjōdxitsōca' nupa na' chinulidza', na' guiēli' légaquiē': Buli'yútsōca', chinupá'a la' huagu. Chibétia'-ba' yugu' xpédxa', en yugu' bōa' bēdxi renni' quia'. Yúgu'tē chinupá'a. Guli'dá, sóaru' laní queēbi'

bi'i bönni' quia' utsaga ná'abi." <sup>5</sup> Yugu' bönni' na' yöjlídza'gaquië' biti' guluné' légaquië' bal, ate' yöjáquië' que queégaquië'. Tuë' yöjenë' dxin, en ia'túë' guyijë' tsjö'u tsjöjti'ë. <sup>6</sup> Ia'zica'rë' gula'zönë' yugu' ni'a në'ë na', ate' gulu'ë dö' quégaquië', en bëtgaquië' légaquië'. <sup>7</sup> Cate' bönni' na' rinná bë'ë biyönnë' lë ni, gulénë', en gusól-lë'ë yugu' bönni' queë' röjáquië' gudil-la, ate' bëtigaquië' yugu' bönni' hueti bönachi na', en bulu'qué'lë'ë guí ládza'gaquië'. <sup>8</sup> Ní'irö bönni' na' rinná bë'ë gudxë' yugu' ni'a në'ë, gunnë': "Le nácatë chinupá'a que laní na', pero yugu' bönni' bulidza' biti' guláquië' lesaca' guídagaquië' laní quia'. <sup>9</sup> Guli'tséajtsöca' gapa naca la' nöza, en buli'lidza yúgu'të nupa tsöjxáca'li' ni' para guídagaca laní queëbi' bi'i bönni' quia' utsaga ná'abi." <sup>10</sup> Ní'irö bila'rúajë' ni'a në'ë na', sôjáquië' gapa naca la' nöza, ate' bulu'tubë' yúgu'të nupa yöjxáca'gaquië', yugu' bönni' dxi'a, en yugu' bönni' tuá' dö', ate' ga na' raca laní bilíró bönachi.

<sup>11</sup> 'Cate' guyázië' bönni' na' rinná bë'ë para uyúë' nupa ni' nudúbigaca, bilé'enë' tu bönni' biti' nácuë' lari' tsahui' le bunödzejë' quégaquië' bönni' nacu'ë laní na'. <sup>12</sup> Ní'irö gudxë' bönni' na': "Bönni'do', ¿zóatso' ni, en biti' nacu' lari' tsahui' bunödza' quégaca nupa nacuá' laní?" Bönni' na' busayaj ru'ë. <sup>13</sup> Ní'irö bönni' na' rinná bë'ë gudxë' nupa na' tun xichinë', gunnë': "Guli'guga' ni'a në'ë bönni' ni. Guli'tsöjchú'un-në' ní'ilö ga na' rö'ö chul-la. Ní' cödxë', en útil-la láyë'ë, lu yöl-la' ruhu'ini queë'."

<sup>14</sup> Ní'irö Jesús gudxë' légaquië':

—Zian nupa nulidza', pero nabábasö nupa ila'rögaca.

*Jesús ru'ë didza' ca naca le riguíxaj lázaru'*

(Mr. 12:13-17; Lc. 20:20-26)

<sup>15</sup> Ní'irö yugu' bönni' yudo' fariseo na' bulu'zë'ë ni', ate' gulún xtídza'gaquië' ilunë' ga bi innë' Jesús para gaca ulu'zéguië' Lë' didza'. <sup>16</sup> Para ilunë' caní, gula'sól-lë'ë bal-lë' bönni' dá'gaquië' légaquië', len bönni' dá'gaquië' Herodes, ga zoë' Jesús, nupa na' gulé Jesús:

—Bönni' Usedi, nöztu' Li' ru'u didza' cátëze naca, en naca idútë li ca rusédinu' ca naca queë' Dios, en biti' ruí'i ládxi'u le ta'nná quiu' bönachi, tu' cabí ruchi'a rusöröu' bönachi ca naca le ta'nnasö bönachi na'. <sup>17</sup> Gudíxjöi'i netu'. ¿Nacxi runi li'? ¿Naru' run bayudxi, o biti' run bayudxi quixxaj laztu' queë' César, bönni' yödzö zi'tu' na' rinná bé'enë' rë'u?

<sup>18</sup> Réquibe'enë' Jesús té'ënnë' ulu'béajë' Lë' didza', ate' gudxë' légaquië':

—Libi'ili', bönni' rulu'isö tsahui' cuinli', ¿bizx que ruí'ili' didza' le ruzóa neda' ra' guí'a? <sup>19</sup> Buli'luí'i neda' dumí le riguíxaj lázali'.

Ní'irö bulu'luí'inë' Lë' tu dumí que yödzö Roma. <sup>20</sup> Jesús gunábinë' légaquië', rnnë':

—¿Nuzxi lahui da' ni, en nuzxi le nazúaj lë'e dumí ni?

<sup>21</sup> Të' Lë':

—Queë' César na'.

Ní'irö Jesús gudxë' légaquië':

—Guli'guíxjë' César le nequi queë' César, ate' Dios le nequi queë' Dios.

<sup>22</sup> Cate' bila'yönnë' lë ni, bulu'bánninë' ca naca didza' tsahui' bubí'ë Jesús, ate' bulu'cá'anë' Lë', söhuóajtëgaquië'.

*Ta'nabi yúdxinë' Jesús ca ulu'bán nupa chinátigaca*

(Mr. 12:18-27; Lc. 20:27-40)



<sup>23</sup> La' dza ná'asö yugu' bönni' yudo' saduceo, bönni' na' ta'nné' biti' ulu'bán nupa chinátigaca, bila'dxiné' ga zoé' Jesús, ate' gula'nábiné' Lè',  
<sup>24</sup> ta'nné':

—Bönni' Usedi, Moisés gunné': "Channö gátie' tu bönni' zóanu nigula queé', en cuntu nu bi'i zóabi' queé', ní'irö bi'i böché'ë bönni' na' ral-la' utsaga ná'aleni'-nu nigula uzébi' queé', para cabi' initi di'a dza queé' bönni' böchi'bi' na'." <sup>25</sup> Gula'cuá'abi' gadxi bi'i bönni' ga zóatu', naca böchi'gacabi'. Bi'i zí'alö na' butsaga ná'aleni'-nu nigula, ate' gútitebi'. Tu' cuntu nu bi'i queébi' zóabi', bi'i buropi na' butsaga ná'aleni'-nu nigula uzébi' queébi' bi'i böchi'bi' na'. <sup>26</sup> Lësca' caní guca queébi' bi'i buropi na', enca' queébi' bi'i bunní, en la' tuz ca guca quegacabi' igádxitebi', gulátibi' yúgu'tébi'. <sup>27</sup> Ga búdxite gútinu ca' nigula na'. <sup>28</sup> Cate' idxín dza ulu'bán nupa chinátigaca, ¿núzxilögacabi' bi'i gadxi ni' guéquinu nigula na' queébi', tu' bulu'tsaga ná'aleni'-nu yúgu'tébi' nigula na'?

<sup>29</sup> Ní'irö bubí'ë didza' Jesús, ate' rë' légaquié':

—Nachíxili' libí'ili' tu' cabi' réajni'ili' le nazúaj lu guichi lá'ayi, en tu' cabi' núnbé'ëli' yöl-la' huáca queé' Dios. <sup>30</sup> Cate' idxín dza ulu'bán nupa chinátigaca, bití'rö gaca yöl-la' rizóalen nigula, en biti' ulu'tsaga ná'agaquié', pero gácaquié' ca nácaquié' gubáz lá'ayi queé' Dios nacué' yehua' yubá. <sup>31</sup> Ca na' ral-la' ulu'bán nupa chinátigaca, ¿naru' cabi' nulábanili' lë na' gudxi cazë' Dios libí'ili'? <sup>32</sup> Caní gunné': "Neda' naca' Dios queé' Abraham, en Dios queé' Isaac, en Dios queé' Jacob." Dios na' biti' náquié' Dios quegaca nupa nátigaca tsaz, pero náquié' Dios quegaquié' bönni' ni nabángaquié' sal-la' gulátie'.

<sup>33</sup> Cate' bila'yöni bönachi nacué' ni' didza' ni, bulu'bani ca naca lë na' rusédiné' Jesús léguequi.

### *Xibá queé' Dios le naca lo*

(Mr. 12:28-34)

<sup>34</sup> Cate' guléquié' ené' bönni' yudo' fariseo ca bené' Jesús, busayjé' ruá'agaquié' bönni' yudo' saduceo, ní'irö bulu'dubé' yúgu'té'. <sup>35</sup> Tué' bönni' nútsé'ë ladjagaquié', en nazédé' xibá queé' Moisés, gú'unné' si' bē'ë Jesús. <sup>36</sup> Que lë ni na' gunábiné' Jesús, rnné':

—Bönni' Usedi, ¿bízxilö xibá queé' Dios naca lo?

<sup>37</sup> Jesús rë' lë':

—Idxi'inu' Xanu' Dios idú láchxu'u, en idú icja láchxi'do'o, enca' len idú yöl-la' réajni' quiu'. <sup>38</sup> Xibá ni naca lo, en nazáca'tërö. <sup>39</sup> Xibá na' naca buropi, la' ca nácaté, en caní rna: "Idxi'inu' böchi' luzó'o ca nadxí'i cuinu'." <sup>40</sup> Chopa xibá ni náca gaca ga röjlöz yúgu'té le rinná bē' xibá queé' Dios, en yúgu'té le bulu'sédiné' bönni' gulu'ë didza' uláz queé' Dios.

### *¿Nuzxi xí'ini náquié' Cristo?*

(Mr. 12:35-37; Lc. 20:41-44)

<sup>41</sup> Tsanni ni' nacué' tsözxön bönni' yudo' fariseo na', Jesús gunábiné' légaquié', <sup>42</sup> rnné':

—¿Nacxí rusáca'li' queé'li' queé' Bönni' na' lë' Cristo? ¿Nuzxi xí'ini náquié'?

Bulu'bi'ë didza', ta'nné':

—Zxi'ini xi'sóé' David náquié'.

<sup>43</sup> Ní'irö Jesús rë' légaquié':

—¿Bizx que na' lë cazë' David bulidzë' Lë', gunnë': "Xana"? Caní gunnë' cate' ni' bë'ë didza' uláz queë' Dios Bö' Lá'ayi, gunnë':

<sup>44</sup> Xanru' Dios gudxë' Xana':

"Gurö'ö cuita lë'a ibëla,

cate' gunra' ga ulu'zëchu zxíbigaca Lo' nupa tequi Li' zi'."

<sup>45</sup> Channö David na' gunnë' queë' náquië' Xanë', ¿nacxi caz naca, rnnali' náquië' xzí'ini xi'sóë' David na'?

<sup>46</sup> Cuntu nu guca ubí'i didza', ate' ga gusí lo dza na', cúnturö nu burugui bi inábini Lë'.

## 23

*Jesús ruzéqui'ë yugu' bönni' yudo' didza'*

(Mr. 12:38-40; Lc. 11:37-54; 20:45-47)

<sup>1</sup> Ní'irö Jesús bë'lenë' bönachi nacuá' ni' len yugu' bönni' usëdi queë' didza'. <sup>2</sup> Rë' légaquië':

—Yugu' bönni' yudo' fariseo, en yugu' bönni' yudo' usëdi nuhuöázagaquië' xilatjë' Moisés, en tu'sédinë' bönachi. <sup>3</sup> Que lë ni na', guli'gún yúgu'të le ilë' libí'ili', pero bití' gunlí' libí'ili' ca na' tunë' légaquië', tu' tu le ta'nnë', en ia'tú le tunë'. <sup>4</sup> Le ta'nná bé'enë' bönachi naca ca tu yua' zi' le cabí sequí' nu guá', ate' tu'gu'ë le ya'zxícjagaca bönachi, pero légaquië' bití' tē'ënnë' ulu'tenë' le, calëga len tuze xibön ná'agaquië'.

<sup>5</sup> Yúgu'të le tunë', tunë' para ila'lé'e bönachi légaquië', tu' tunë' zxön le túgui'ë yen ná'agaquië', en ra' xigágaquië' ga na' nuzúajgaquië' tu le nazúaj lu guichi lá'ayi, en tu'tunnë' luzxi lari' nácugaquië'. <sup>6</sup> Tē'ënnë' ila'bö'ë ga naca lataj lo ga na' tu'dubë' tahuë', enca' ga na' naca lataj lo lu yu'u ga tu'dubë' tu'sëdë' queë' Dios. <sup>7</sup> Lësca' caní, tē'ënnë' ulu'gapa bönachi légaquië' didza' ba zxön gapa naca lógaca bönachi, en tē'ënnë' ilë' bönachi légaquië': "Padiux, bönni' usëdi."

<sup>8</sup> Pero libí'ili', bití' ral-la' gunlí' ga nu guië' libí'ili': Bönni' Usëdi, tu' zoa tuz Nu naca Bönni' Usëdi queë'li', neda', Cristo, ate' yúgu'tëli' nácali' böchi'li' tuli' ia'tuli'. <sup>9</sup> Cuntu nu guië'li' luyú ni, bití' innali': Xuz, tu' zoa tuz Nu naca Xúzili', zoë' yehua' yubá. <sup>10</sup> Bití' gunlí' ga nu guië' libí'ili': Xan, tu' zoa tuz Nu naca Xanlí', neda', Cristo. <sup>11</sup> Nu nutsa' ládjali' nu run xichinli' ia'zica'röli', nu ni na' gácarö lo ga zóali'. <sup>12</sup> Channö nu uzóa cuini lataj lo, cá'asö ugá'ana nu na', pero nu naca nöxaj ladxi', gaca lo.

<sup>13</sup> Bica' bayechi' libí'ili', bönni' yudo' usëdi, enca' libí'ili', bönni' yudo' fariseo, bönni' rulu'isö tsahui' cuinli'. Ruzága'li' nöza söjácalen bönachi para ila'dxín ga ni' rinná bë'ë Dios yehua' yubá. La' libí'isili' bití' sequí' tsú'uli', en bití' ru'í'ili' lataj ila'yú'u nupa tē'ëni ila'yú'u.

<sup>14</sup> Bica' bayechi' libí'ili', bönni' yudo' usëdi, enca' libí'ili', bönni' yudo' fariseo, bönni' rulu'isö tsahui' cuinli'. Rugúali' yugu' lídxigacanu nigula uzëbido', en para ulu'isö tsahui' cuinli', xidzé rulídzali'-në' Dios. Que lë ni na', zí'tërö írugu queë'li' quí'i sáca'li'.

<sup>15</sup> Bica' bayechi' libí'ili', bönni' yudo' usëdi, enca' libí'ili', bönni' yudo' fariseo, bönni' rulu'isö tsahui' cuinli'. Ridödili' idú lu nísado', en idú yödzóliö ni para gunlí' ga tseaj ládxe'ë tu bönni' Dios tsözxön len libí'ili', en cate' chiguzxëqui'li'-në', runlí' ga nabága'rë' xíguia' ca libí'ili', ate' tsöjtsu'ë lu gu' gabila.

<sup>16</sup> Bica' bayechi' libí'ili'. Nachul-la loli', ate' rē'ënili' ulu'í'ili' nöza bönachi. Caní naca queë'li' tu' rnnali': "Channö bi rizí' lu në'ë tu bönni'

ni'a que yudo', biti' run bayudxi, pero channö runë le ni'a que oro dzö'ö yudo', bayudxi gun." <sup>17</sup> Libí'ili', bönni' lo chul-la, en tu' caréajni'i. ¿Bíxzilö nácarö lo? ¿Naru' oro na', o yudo' le run lá'ayi oro na'? <sup>18</sup> Lësca' caní rnnali': "Channö nu bönni' gunë' le ni'a que bucugu lá'ayi, biti' gun bayudxi, pero channö gunë' le ni'a que gun xzoa lahui, bayudxi gun." <sup>19</sup> Libí'ili', nazídili', en nachul-la loli'. ¿Bíxzilö nácarö lo? ¿Naru' gun xzoa láhuisö, o bucugu lá'ayi na' run lá'ayi gun na'? <sup>20</sup> Que læ ni na', channö nu bönni' runë' le ni'a que bucugu lá'ayi, runë' le ni'a que le, enca' ni'a que yúgu'të le xzóagaca láhuisö. <sup>21</sup> Lësca' caní, channö nu bönni' runë' le ni'a que yudo', runë' le ni'a que le, enca' ni'a queë' Dios, nun cazë' xilatjë' ni'. <sup>22</sup> Lësca' caní, channö nu bönni' runë' le ni'a que yehua' yubá, runë' le ni'a que lataj ga rö'ë rinná bë'ë Dios, enca' ni'a que Lë cazë' Dios rö'ë ni'.

<sup>23</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Caní naca queëli' tu' riguíxjali' que yudo' tu cö' huéaj tu' chi cö' le rizí'ili' que xöhuéaj, en que guixi' anís, en que comino la' huagu, pero rucá'anali' le nácarö lo le rinná bë' xibá queë' Dios, tu' cabí runli' le naca tsahui', en biti' ruhuéchi' ládxi'li' luzá'ali', en biti' réajlë'ëli'-në' Dios. Yugu' læ ni run bayudxi gunli', en læs biti' ucá'anali' ia'zica'rö læ na' runli', le riguíxjali' que yudo'. <sup>24</sup> Libí'ili', nachul-la loli', en rë'ënili' ulu'í'ili' nöza bönachi. Ca na' runli' naca ca rudödili' bödzádzado' le ré'jali', rubéajgacali'-ba' bö'iyudo', pero ré'jali'-ba' böa' ta'bië'-ba' bönni'.

<sup>25</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Nácali' ca xzíga'do' ré'jali', en yö'öna ráhuili'. Riguibili' le nuá' cuita læ'e, pero lu icja ládxi'do'oli' nalí yugu' le ribanli', en yugu' le ruá' dö' runli'. <sup>26</sup> Libí'ili', bönni' yudo' fariseo lo chul-la. Zí'alö guli'quibi le nuá' lu xzíga'do', en lu yö'öna, læ na' sa'yéaj gácali' tsahui' lu icja ládxi'do'oli', para gácali' ca' tsahui' cuita læ'ëli'.

<sup>27</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Caní naca queëli' tu' nácali' ca yugu' yeru ba quégaca nupa chinátigaca, le nácatigaca chiguíchido'os cuita læ'e, en le nácatë lachi nalá'gaca, pero nalígaca dxita quégaca nupa chinátigaca, enca' yúgu'të le siguti. <sup>28</sup> Lësca' caní nácali' libí'ili'. Le nácatë láhuisö rulu'í' cuinli' tsahui' lógaca bönachi, pero lu icja ládxi'do'oli' nalili' yugu' le rulu'isö tsahui' cuini, en le ruá' dö' runli'.

<sup>29</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ruchísali' biquitaj que ba gapa nagáchi'gaquië' bönni' gulu'ë didza' uláz queë' Dios, en ru'í'ili' biquitaj gapa nagáchi'gaca bönachi tsahui'. <sup>30</sup> Lësca' caní rnnali': "La'tu' zóatu' dza ni'te cate' gula'cu'ë xuz xtó'otu', biti' guntu' légaquië' tsözxön cate' gulútië' yugu' bönni' gulu'ë didza' uláz queë' Dios." <sup>31</sup> Tu' rnnali' caní, la' libí'isili' runli' ba nalí nácali' xzí'ini xí'sóagaca nupa ni' bétigaca yugu' bönni' gulu'ë didza' uláz queë' Dios. <sup>32</sup> Caní naca, rusubaga' cuinli' xíguia' na' gula'báguië' xuz xtó'oli'.

<sup>33</sup> 'Libí'ili' na', nácali' ca yugu' bëla sínia', en di'a dza quégacaba' bëla sínia'. ¿Nacxi caz uláli' lu le usaca' zi' libí'ili' lu gu' gabila? <sup>34</sup> Que læ ni na', neda' isól-la'a queëli' yugu' bönni' ilu'ë didza' uláz queë' Dios, enca' yugu' bönni' ta'yéajni'inë', en yugu' bönni' usedi. Yugu' bönni' ni, bal-lë' gútíli'-në', en ia'zica'rë' udá'ali' læ'e yaga cruz, en ia'zica'rë' quinli' gapa naca lu yu'u ga rudúbili' rusédali' queë' Dios, ate' ulágali' légaquië' tu ia'tu' yödzö. <sup>35</sup> Caní gaca, ibága'li' libí'ili' xíguia' que idútë rön quégacaba' bönni' tsahui'

le gulalaj luyú, ga gudela' nu bëti Abel, bönni' tsahui', ga ridxintë nupa bëtigaca Zacarías, zxí'inë' Berequías, bönni' na' bëtili'-në' gatsaj láchui'lö ga dë yudo', en ga dë bucugu lá'ayi ga na' tu'zégui'ë' böa' bëdxido' lahuë' Dios. <sup>36</sup> Le nácatë rea' libí'ili', yúgu'të lë ni ila'baga' bönachi nacua' dza ni zóaru' na'a.

*Jesús ribödxë' ni'a que yödzo Jerusalén*

*(Lc. 13:34-35)*

<sup>37</sup> Lësca' caní gunnë' Jesús:

—Jerusalén, Jerusalén, libí'ili' na' rútigacali'-në' bönni' tu'ë didza' uláz queë' Dios, en ruládxigacali' guiój nupa nasöl-lë'ë Dios. Zían luzuí gú'unida' utuba' libí'ili' quia', ca runba' yöjede, rutúbiba' bórado' queéba' zxañ xíliba', pero biti' gú'unili'. <sup>38</sup> Buli'yútsöca', cá'asö ugá'ana yu'u lídxili'. <sup>39</sup> Caní gaca, tu' rea' libí'ili', na'a isí lo biti' ulé'eli' neda' cate' innáröli': "Lá'ayi náquië' Bönni' na' zë'ë uláz queë' Xanru'."

## 24

*Riguíxjö'ë Jesús ca si' ulu'quínnajë' yudo'*

*(Mr. 13:1-2; Lc. 21:5-6)*

<sup>1</sup> Birúajë' Jesús chila yudo', en tsanni ni' rizë'ë ni', gula'bígui'ë bönni' usëda queë' ga na' zoë', ate' bulu'luí'inë' Lë' ca nácgaca zö'ö nagú'ugaca lë'a yudo'. <sup>2</sup> Bubi'ë didza' Jesús, ate' rë' légaquië':

—¿Rilé'etseli' yúgu'të lë ni? Le nácatë rea' libí'ili', biti' ca' ugá'ana guiój nabaga' luzë'e ni, le cabí iguínnaj.

*Le ilaca bë' chizóa idxín dza údxi que yödzo lío*

*(Mr. 13:3-23; Lc. 21:7-24; 17:22-24)*

<sup>3</sup> Cate' ni' rö'ë Jesús ga naca lu Guí'a Yaga Olivo, bila'dxinë' bönni' usëda queë' ga na' zoë' queéze', en të' Lë':

—Gudíxjö'i' netu', ¿bátaxi ilaca lë ni, en bizxi gaca bë' dza huödu', en dza údxi que yödzo lío ni?

<sup>4</sup> Ní'irö bubi'ë didza' Jesús, ate' rë' légaquië':

—Buli'yú para cabí nu si' ye'e libí'ili', <sup>5</sup> tu' zá'gaquië' zían bönni' légaquië' ca lea' neda'. Ila'nnë' nácgacaquië' Cristo, en ila'zí' yé'enë' bönachi zían. <sup>6</sup> Huayónili' raca gudil-la, en le ruí'í didza' que gudil-la, pero biti' cö'öli' böniga, tu' ral-la' ilaca yúgu'të lë ni, pero cabí ridxini dza údxi cate' ilácarö lë ni. <sup>7</sup> Til-la tu yödzo len ia'tú yödzo, ate' tu ga nu rinná bë' len ia'tú ga nu rinná bë'. Ilatsaj yödzo huë' zxañ, en gaca gubín, ate' zían lataj tödi budó' zxu'. <sup>8</sup> Yúgu'të lë ni nácgaca le isí lógaca yugu' le ila'guí'í ila'zaca' bönachi.

<sup>9</sup> Ní'irö ulu'dödi bönachi libí'ili' lu na' nu usaca' zí' libí'ili'. Yúgu'të bönachi ulu'dí'í libí'ili' tu' dá'ali' neda', en ilútië' bál-lal' libí'ili'. <sup>10</sup> Cate' gaca caní, gaca chopá láchigaca zían bönachi, en ulu'cá'ana neda', ate' udödi tu ia'tú luzë'e, en tu ia'tú udí'í luzë'e. <sup>11</sup> Ní'irö ulu'luí'í lógacaquië' zían bönni' ta'zí' yé'ë. Ulu'luí'í cuíngaquië' ca yugu' bönni' tu'ë didza' uláz queë' Dios, en ila'zí' yé'enë' bönachi zían. <sup>12</sup> Iluá'ada' dö' bönachi, ate' que lë ni na' biti'rö ila'dxí'í böchi' luzë'eguequi. <sup>13</sup> Nu guequi tsaz queë' Dios ga idxintë dza údxi, nu ni ulá. <sup>14</sup> Idú yödzo lío gaca libán que didza' dxi'a ca rinná bë'ë Dios para gaca ba nalí que lógaca yúgu'të bönachi izá'a, ate' ní'irö idxín dza údxi.

<sup>15-16</sup> 'Nu ulaba lë ni ral-la' uzéajni'í ladxi'. Gunnë' Daniel, bönni' bë'ë didza' uláz queë' Dios, gunnë': "Tsaza le rudí'inë' Dios lataj lá'ayi queë'

Dios, lë na' rusuniti." Cate' ilé'eli' gaca caní, ní'irö nuli' zóali' luyú Judea ral-la' tsójzxúnnajli' saca' gu'ado'. <sup>17</sup> Nu dxía ícjo'olö biti' gal-la' huötaj tsójzxi' bi' dë que lu yu'u, pero ral-la' izxúnnajtë. <sup>18</sup> Nu zoa la' guixi', biti' gal-la' huöaj tsójzxi' lari' que. <sup>19</sup> Bica' bayechi' yugu' nigula si' ulu'zóanu bí'ido' quégacanu, enca' nigula ni' tu'gádxinu-bi' bí'ido' quégacanu cate' idxín dza ni'. <sup>20</sup> Buli'lidzë' Dios inábili'-në' cabí idxín dza ni' izxúnnajli' cate' raca beo' ziaga o cate' naca dza lá'ayi, <sup>21</sup> tu' ila'gu'i ila'záca'tërö bönachi dza ni' ca gula'gu'i gula'záca' bönachi dza ni'te cate' si' guta' gurö'ö yödzölió, ga ridxintë na'a dza, en calëga dza zá'gaca biti' ila'gu'i ila'záca' caní. <sup>22</sup> Cate' idxín dza ni', channö Dios biti' cuéqui lahuë' quégaquië', cuntu nu ulá, pero cuéqui lahuë' quégaquië' dza ni', en gácalenë' nupa gurö cazë' Lë'.

<sup>23</sup> 'Ní'irö biti' tséajlë'ëli' channö nu idxín queëli', en guié libí'ili': "Buli'yútsöca', ni zoë' Cristo", o inná: "Ní' zoë'." <sup>24</sup> Ulu'luf'i lógaquië' zían bönni' ta'z'í yë'ë, en ila'nnë' nácagaquië' Cristo, o ila'nnë' tu'ë didza' uláz queë' Dios. Ilunë' le ilaca bë', en le ilún ga ulu'bani bönachi, ate' ila'z'í yé'enë' nupa gurö cazë' Dios channö huala'zéqui'në'. <sup>25</sup> Buli'yútsöca', chigudxi caza' libí'ili' yúgu'të lë ni zí'atëlö ca si' ilaca. <sup>26</sup> Que lë ni na', biti' irúajli' channö ila'dxín queëli' nupa ilë libí'ili': "Buli'yútsöca', ni zoë' Cristo lu lataj cá'asö." Lësca' caní, biti' tséajlë'ëli' channö ila'nná: "Buli'yútsöca', lu yu'u zoë'." <sup>27</sup> Ca na' raca cate' rëpi yösa ga rilén gubidza, en ruzení' ga ribía gubidza, lësca' caní gaca cate' huöda' neda', Bönni' Guljë' Bönachi. <sup>28</sup> Ilácatë caní, ca na' ta'nná bönachi: "Gátitës ga dë tu le nati, ni' ulu'dubi cázaba' bíchulab."

*Ca gaca cate' huödë' Bönni' Guljë' Bönachi*

(Mr. 13:24-37; Lc. 21:25-33; 17:26-30, 34-36)

<sup>29</sup> Gunnë' ca' Jesús:

—Tödi yugu' dza ni' cate' ila'gu'i ila'záca' bönachi caní, ichul-la gubidza, ate' beo' biti' gunna bení' que. Ila'guínnajba' böljaj lúzxiba, ate' ila'z'ixízi le nalá'gaca naca tsutsu lúzxiba. <sup>30</sup> Ní'irö ilá' lahui lúzxiba le gaca bë' huöda' neda', Bönni' Guljë' Bönachi, ate' ila'bödxí yechi' yúgu'të bönachi yödzölió ni, cate' ila'lé'e neda', Bönni' Guljë' Bönachi, suzá'a lu böaj lúzxiba, dë lu na'a yöl-la' unná bë', en yöl-la' huáca zxon. <sup>31</sup> Ní'irö isöl-la'gaca'-në' gubáz lá'ayi quia'. Ulu'cödxë' zidzaj lúzuba' böa' guixi', ate' ulu'tubë' nupa naböa' quia', nacua' idapa la'atë yödzölió, en yúgu'të lataj zxan lúzxiba.

<sup>32</sup> 'Buli'zéajni'i ládxi'li' le rusedi libí'ili' le raca que yaga higo. Cate' ta'lén ni'a në'e yúludo', en chirubía xilagui' yúludo', inözili' chizóa idxín dza csubá. <sup>33</sup> Lësca' caní, cate' ilé'eli' taca yúgu'të lë ni, inözili' chizóa idxín dza údxí na', en chiridzaga lahui. <sup>34</sup> Le nácatë rea' libí'ili', yúgu'të lë ni ilaca zí'atëlö ca ilátigaca bönachi nacua' dza ni'. <sup>35</sup> Huadödi quégaca lúzxiba, en luyú ni, pero yugu' xtídza'a biti' ila'dödi cá'asö.

<sup>36</sup> 'Cate' idxín dza ni' cuntu nu nözi. Biti' nözguequinë' gubáz lá'ayi queë' Dios nacué' yehua' yubá, en biti' nözda' neda', Zxí'inë' Dios, pero tuzë' Dios Xuz nözinë'.

<sup>37</sup> 'Ca na' guca dza cate' ni' zoë' Noé, lësca' caní gaca cate' huöda' neda', Bönni' Guljë' Bönachi. <sup>38</sup> Yugu' dza ni' zí'atëlö ca si' idxín nisa guió'j le busuniti yödzölió, gulë'aj gulahuë', bulu'tsaga ná'agaquië', en bulu'dödë' zxí'inigaquië' lu yöl-la' rutsaga na' ga bidxintë dza guyázië' Noé lé'e barco zxon ni' benë', <sup>39</sup> en biti' guléqui'be'enë' cate' bidxintë nisa guió'j le busuniti yödzölió, ate' gula'nítië' yúgu'të'. Lësca' caní gaca cate' si' huöda'

neda', Bönni' Guljê Bönachi, cuntu nu guéquite'e. <sup>40</sup> Dza huöda' ila'cu'ë chopë bönni' la' guixi'. Tuë uchë'a-në' quia', ate' ia'túë' ucá'ana'-në'. <sup>41</sup> Ila'cuá'anu chópanu nigula nacua'anu huëtu. Tunu uchë'a-nu quia', ate' ia'tunu ucá'ana'-nu.

<sup>42</sup> Buli'subán ládxi'li' tu' cabí nözili' bizxi dza huöda' neda', Xanli'. <sup>43</sup> Na'a, guli'tséajni'i lë ni. La'tu' nözinë' xan yu'u bizxi dza guidë' gubán, huanë'ë yëla, en biti' gu'ë lataj nu quidaj zö'ö para cuan le dzö'ö lidxë'. <sup>44</sup> Que lë ni na', buli'subán ládxi'li' ca' libí'ili', tu' huöda' neda', Bönni' Guljê Bönachi, tu dza biti' nuzóa icjali'.

*Bönni' huen dxin tsahui', en bönni' huen dxin biti' náquië' tsahui'*  
(Lc. 12:41-48)

<sup>45</sup> Gunnë' ca' Jesús:

—¿Nuzxi caz bönni' huen dxin náquië' tsahui', en réajni'inë', bönni' huen dxin na', xanë' cu'ë lu në'ë bönachi nacua' lidxë' para gu'ë le ilágugaca cate' idxín dza? <sup>46</sup> Bica' ba bönni' huen dxin na' náquië' tsahui', bönni' na', cate' udxinë' xanë', uduxáquië' lë' caní runë' le nudödë' xanë' lu në'ë. <sup>47</sup> Le nácatë rea' libí'ili', yúgu'të le dë queë' xanë', udödë' lu në'ë bönni' huen dxin na' runë' caní. <sup>48</sup> Channö huóáquië' bönni' huen dxin queë' huiá' dö', en sa' ládxi'ë, innë': "Huadzenë' xana', en biti' huódatië'", <sup>49</sup> en channö isí lahuë' gundë' zí' bönni' túnlenë' lë' tsözxón dxin, en isí lahuë' ca' gu'aj gágulenë' nupa ta'zudxi, <sup>50</sup> ní'irö huödë' xanë' bönni' huen dxin na' tu dza cate' biti' zoë' ribözë', o tu yëla biti' réquinë'. <sup>51</sup> Ní'irö xanë' na' usaca' zídë'ë bönni' huen dxin na', en gunë' ga gaca queë' ca na' ral-la' gaca quégaca nupa tu'lu'isö tsahui' cuínguequi. Ní'irö cödxí yechë'ë, en gaga zxea láyë'ë.

## 25

*Rucúdzu'ë didza' Jesús ca naca quégacabi' chibi' bi'i nigula ra'bando'*

<sup>1</sup> Gunnë' ca' Jesús:

—Ca gaca quégaca nupa ila'yaza ga rinná bë'ë Dios yehua' yubá naca ca guca quégacabi' chibi' bi'i nigula ra'bando'. Gula'zí'ibi' le nuá'gaca guí' quégacabi', ate' bila'rúajbi' tsöjtságagacabi' bönni' utsaga në'ë. <sup>2</sup> Gáyu'bi' nácacacabi' bi'i biti' ta'yéajni'ibi' ate' ia'gáyu'bi' nasína'gacabi'. <sup>3</sup> Yugu' bi'i nigula biti' ta'yéajni'ibi' na' gula'zí'ibi' le nuá'gaca guí' quégacabi' pero biti' guluá'abi' ia'lati' za régui. <sup>4</sup> Yugu' bi'i sina' na' guluá'abi' za régui lu böga'do' quégacabi' len le nuá'gaca guí' quégacabi'. <sup>5</sup> Tu' gudzenë' bönni' utsaga në'ë, gudödi yëla lógacabi', en gulásitëbi'. <sup>6</sup> Cate' bidxín idú guluhuëla, biyón chi'i nu rinnë zidzaj, rnna: "¡Chizë'ë bönni' utsaga në'ë! ¡Guli'rúaj tsöjtságali'-në'!" <sup>7</sup> Ní'irö gula'yásabi' yúgu'tëbi' bi'i nigula na', ate' bulu'pá'abi' le nuá'gaca guí' quégacabi'. <sup>8</sup> Gulu'ibi' didza' bi'i biti' ta'yéajni'ibi' na', en gulëbi' yugu' bi'i sina' na': "Guli'gunna queëtu' láti'do' za régui queéli' tu' tu'úlu le nuá'gaca guí' queëtu' ni." <sup>9</sup> Bulu'bi'ibi' didza' bi'i sina' na', gula'nnabi': "Biti' gaca, tu' cabí bi ugá'ana queëtu', en queéli'. Guli'tséajtsöca' ga ridó'o za régui, tsöj'ö'uli' queéli'." <sup>10</sup> Tsanni ni' sôjácabi' sôjxí'gacabi' le, bidxinë' bönni' utsaga në'ë. Yugu' bi'i na' nacua'abi' sina', en ta'bözabi' lë' gula'yú'ulentëbi' lë' ga na' raca laní que utsaga na', ate' la' guyáyajtë yu'u. <sup>11</sup> Gudödi ni' ia'zica'röbi' bi'i nigula ra'bando' na' bila'dxinbi' ni', ate' bulu'lídzabi'-në', en gula'nnabi': "Xan, Xan, gusalaj queëtu'." <sup>12</sup> Lë' bubí'ë didza', rnnë': "Le nácatë rea' libí'ili', biti' nözda' gazxi libí'ili'."

<sup>13</sup> Ní'irö Jesús gudxë' légaquië':

—Buli'subán ládxi'li', tu' cabí nözili' bizxi dza o bizxi yëla huöda' neda', Bönni' Guljë' Bönachi.

*Rucúdzu'ë didza' Jesús ca naca que dumí zaca'*

<sup>14</sup> Gunnë' ca' Jesús:

—Ca gun Nu na' rinná bë' yehua' yubá naca ca benë' tu bönni', chizóa tsejë' zi'tu'. Bulidzë' yugu' bönni' huen dxin queë' en gulu'ë yugu' le dë queë' lu ná'agaquië'.

<sup>15</sup> 'Tuë' bönni' huen dxin na', gulu'ë gayu' dumí nazaca' lu në'ë, ate' ia'tué' gulu'ë chopa dumí nazaca' lu në'ë. Ia'tué' gulu'ë tu dumí nazaca' lu në'ë. Tu tuë' gulu'ë lu në'ë tsca huéaj le ila'zéqui'në'. Ní'irö la' guzá'atë' ga naca zi'tu'. <sup>16</sup> Guyijë' bönni' huen dxin na' guzxi'ë gayu' dumí nazaca' na', en yöjtíjalenë' le ia'gayu' dumí nazaca'. <sup>17</sup> Lësca' caní, bönni' na' guzxi'ë chopa dumí na', yöjtíjalenë' le ia'chopa ca'. <sup>18</sup> Bönni' na' guzxi'ë tu dumí gayijë', en yöjchó'önë' lu yu, ate' bucáché'ë dumí queë' xanë' lu yu ni'.

<sup>19</sup> 'Cate' chigudzé, budxinë' xángaquië' bönni' huen dxin na', ate' bucá'analenë' légaquië' tsahui'. <sup>20</sup> Ga gusí lo bidxintë' bönni' na' guzxi'ë gayu' dumí nazaca' na', en sunu'ë ia'gayu' dumí ca', ate' rë' xanë': "Xan, gayu' dumí gulú'u lu na'a. Ni dë ia'gayu' dumí ca' yöjtíjalena' le." <sup>21</sup> Xanë' na' rë' lë': "Naca dxi'a. Nacu' huen dxin tsahui'. Tsáhui'do' benu' cate' ni dë lu no'o láti'do'os. Na'a yénni'tërö cu'a lu no'o. Guyaza ga zoa', udzëjalenu' neda'." <sup>22</sup> Gudödi ni' bidxinë' ca' bönni' huen dxin na' guzxi'ë chopa dumí nazaca', ate' rnnë': "Xan, chopa dumí gulú'u lu na'a. Ni dë ia'chopa dumí ca' yöjtíjalena' le." <sup>23</sup> Ní'irö xanë' na' rë' lë': "Naca dxi'a. Nacu' huen dxin tsahui'. Tsáhui'do' benu' cate' ni dë lu no'o láti'do'os. Na'a, yénni'tërö cu'a lu no'o. Guyaza ga zoa', udzëjalenu' neda'." <sup>24</sup> Ní'irö cate' bidxinë' bönni' huen dxin na' guzxi'ë tu dumí nazaca' na', rnnë': "Xan, nözda' nacu' bönni' bizxaj, tu' rulapu' ga biti' guzu', en rutubu' ga biti' guchilju'. <sup>25</sup> Que lë ni na' gúdxida' li', ate' guyija', yöjchácha'a dumí quiu' lu yu. Ni dë na'a le nequi quiu'." <sup>26</sup> Ní'irö bubí'ë didza' xanë', en rë' lë': "Nacu' huen dxin biti' naca tsahui', en xöhuëdi. Nöz quézinu' rulapa' ga biti' guza', en rutuba' ga biti' guchilja'. <sup>27</sup> Que lë ni na', gácarö dxi'a quiu' la'tu' bunödzu' dumí quia' lu ná'agaquië' bönni' ulu'gunë' le dxin, ila'guíjalenë' le ia'lati', para cate' huöda' neda', uzi'a le nequi quia' len icja ca'." <sup>28</sup> Ní'irö xanë' na' gudxë' nupa nacuá' ni': "Gulí'cúa dumí na' dë lu në'ë bönni' ni, en guli'cú'u le lu në'ë bönni' na' dë queë' chi dumí." <sup>29</sup> Núti'tës nu rugún tsahui' dxin le dë queë', zoa nu unödzej queë' ia'lati', ate' gáta'da' queë', pero nu na' biti' rugún tsahui' dxin le dë lu në'ë, la's dui le dë queë' idúa. <sup>30</sup> Na'a, bönni' huen dxin biti' naca tsahui' ni, guli'tsöjchú'una-në' ní'ilö ga naca chul-la. Ni' cödxí yéché'ë, en gagu zxea láyë'ë.

*Cristo uchi'a usöröë' quégaca bönachi*

<sup>31</sup> Gunnë' ca' Jesús:

—Cate' ni' huöda' neda', Bönni' Guljë' Bönachi, idinná bë'a, ate' dzágagaquië' neda' yúgu'të gubáz lá'ayi quia', ní'irö có'a lataj tsahui' quia', ga na' uchi'a usöröa' quégaca bönachi. <sup>32</sup> Ulu'dubi dërö lahua' neda' bönachi yödzüliö ni, ate' ucu'a léguequi tsölá'a huéaj ca runë' bönni' uyú bö'cu' zxila', rucu'ë-ba' tsölá'a huéajba' yugu' chivo, en yugu' bö'cu' zxila'. <sup>33</sup> Yugu' bö'cu' zxila' na' ucu'ë-ba' cuita lë'ë ibëla, ate' yugu' chivo na'

ucu'ë-ba' cuita lë'ë yögöla. <sup>34</sup> Ní'irö, neda', bönni' unná bë', guía' nupa nacua' cuita lë'a ibëla, innia': "Guli'dá ga zoa', libí'ili' bubéajë Xuza' libí'ili' quez queë'. Nequi queëli' lataj ga na' rinná bë'ë, lë na' bupë'ë queëli' dza ni'te cate' ni' benë' yödzölió. <sup>35</sup> Caní nequi queëli' tu' guduna', ate' bénnali' le gudahua'. Gubidxa' nisa, ate' bénnali' le gu'a. Guca' ca tu bönni' ridá zí'tu', ate' gulú'uli' neda' lídxili'. <sup>36</sup> Biyadzaj le gácua', ate' bugáculi' neda' le ráculi'. Güf'ida', ate' buduyúli' neda'. Guyu'a lidxi guié, ate' buduyúli' neda'." <sup>37</sup> Ní'irö ulu'bi'ë didza' bönni' tsahui' na', ilë' neda': "Xan, ¿bátaxi bilé'etu' Li' gudunu', ate' bugágutu' Li'?' ¿Bátaxi gubidxu', ate' bénnatu' le gu'u?' <sup>38</sup> ¿Bátaxi bilé'etu' Li' gudó' zí'tu', ate' gulú'utu' Li' lídxitu'?' ¿Bátaxi biyadzaj le gacu', ate' bugácutu' Li' le rácutu'?' <sup>39</sup> ¿Bátaxi bilé'etu' Li' güi'inu', o guyú'u lidxi guié, ate' buduyútu' Li'?" <sup>40</sup> Ubi'a didza' neda', bönni' unná bë', ate' guía' légaquië': "Le nácatë rea' libí'ili', tu' benli' caní queë' nu bönni' böcha'ado' ni, sal-la' náquië' bönni' cá'asö, quia' neda' caz benli' ca'."

<sup>41</sup> Ní'irö guía' nupa nacua' cuita lë'a yögöla, innia': "Guli'cuíta ga zoa', libí'ili' na' nabága'li' xíguia', tsöjtsázali' lu guí' na' biti' ulu, lë na' bupë'ë Dios ni'a que tu' xihui', en quéguequi gubáz dá'gaca le. <sup>42</sup> Caní gaca queëli' tu' guduna', ate' biti' bénnali' le gahua'. Gubidxa' nisa, ate' biti' bénnali' le guí'ja'. <sup>43</sup> Guca' ca bönni' ridë' zí'tu', ate' biti' gulú'uli' neda' lídxili'. Biyadzaj le gácua', ate' biti' bugáculi' neda' le ráculi'. Güf'ida', enca' guyu'a lidxi guié, ate' biti' buduyúli' neda'." <sup>44</sup> Ní'irö ila'nná ca' nupa na', ilë' neda': "Xan, ¿bátaxi bilé'etu' Li' gudunu', o gubidxu', o gucu' ca bönni' ridë' zí'tu', o biyadzaj le gacu', o güi'inu', o guyú'u lidxi guié, ate' biti' gúcalentu' Li'?" <sup>45</sup> Ní'irö ubi'a didza' neda', bönni' unná bë', guía' légaquië': "Le nácatë rea' libí'ili', tu' cabí bi benli' que tu nu nutsa' ladaj nupa nacua' ni, sal-la' naca cá'asö nu na', biti' bi benli' quia' neda'." <sup>46</sup> Ní'irö bönachi tuá' dö' na' la' tsöjtsázagacatë ga ni' ila'guí'ila'zaca'tica'sö, pero bönachi tsahui' ni' gata' yöl-la' na'bán idú quéguequi.

## 26

*Tun xtídza'gaquië' bönni' yudo' ila'zönë' Jesús*  
(Mr. 14:1-2; Lc. 22:1-2; Jn. 11:45-53)

<sup>1</sup> Cate' budxi bë'ë Jesús yugu' didza' ni, gudxë' yugu' bönni' usëda queë',  
<sup>2</sup> rnnë':

—Nöz quézili' ia'chopa dza idxín Laní Pascua, ate' dza na' neda', Bönni' Guljë' Bönachi, ulu'dödë' neda' lu ná'agaca nupa ulu'dá' neda' lë'e yaga cruz.

<sup>3</sup> Ní'irö bila'dxinë' yugu' bixúz unná bë' len yugu' bönni' yudo' usedi, en bönni' gula tu'zéajni'inë' bönachi judío, ate' bulu'dubë' ga naca lö'a lidxi bixúz lo, lë' Caifás. <sup>4</sup> Ni' gulún xtídza'gaquië' ila'zönë' Jesús, lu yöl-la' rizi' yë' quégaquië', para ilútië' Lë'. <sup>5</sup> Ta'nnë':

—Biti' gunru' lë ni dza laní, para cabí ila'dzatsa bönachi.

*Tu nigula rigú'unu le rilá' zxixi icjë' Jesús*  
(Mr. 14:3-9; Jn. 12:1-8)

<sup>6</sup> Cate' ni' zoë' Jesús lu yödzö Betania lu yu'u lidxë' Simón, bönni' na' güi'inë' huë' nudzu' ruzödi, <sup>7</sup> bidxinnu cúdzu'lë' Jesús tu nigula, nuá'anu tu böga'do' néquini' guiöj nazaca', en yudzu tu le rilá' zxixi le nazáca'da', ate' gulú'unu le icjë' Jesús cate' ni' rö'ë rahuë'. <sup>8</sup> Cate' bila'lë'enë' bönni' usëda queë' Jesús lë ni, gula'lenë', ta'nnë':



—¿Bizx que réqui ditaj lë ni? <sup>9</sup> Guca nu guti' lë ni, en si' dumí zían para gácalenru' yugu' bönachi yechi'.

<sup>10</sup> Cate' biyönnë' Jesús lë ni, rë' légaquië':

—¿Bizx que rnnëli' queënu nigula ni? Tshahi' naca le bennu quia'. <sup>11</sup> Yugu' bönachi yechi' ila'cuá'lentica'sö libí'ili', pero neda' bití' ugá'analentica'sa' libí'ili'. <sup>12</sup> Le bennu nigula ni, gulú'unu neda' le rilá' zixixi ni, naca le rupá'anu neda' para dza igácha'a yeru ba. <sup>13</sup> Le nácatë rea' libí'ili', gátí'tës luyú yödölió ga gaca libán que didza' dxi'a ni, lësca' ila'guixjö' bönachi le bennu nigula ni quia' para nu tsöjné lënu.

*Rizí' lu në'ë Judas udödë' Jesús lu ná'agaquië' bönni' unná bë'*  
(Mr. 14:10-11; Lc. 22:3-6)

<sup>14</sup> Ní'irö guyijë' Judas Iscariote ga na' nacu'ë bixúz unná bë'. Náquië' bönni' dzáguië' chínnuë' na' dá'gaquië' Jesús, <sup>15</sup> ate' gudxë' légaquië':

—¿Bizxi gúnnali' quia' channö neda' udöda'-në' Jesús lu ná'ali'?

Bulu'gá'analenë' lë' tshahi' ilu'ë lë' chi uruá' dumí plata. <sup>16</sup> Ní'irö gusi' lahuë' Judas na' risí ribö'ë udödë' Jesús lu ná'agaquië'.

*Le ráguru' le rusá' ládxi'ru' ca gútië' Xanru'*  
(Mr. 14:12-25; Lc. 22:7-23; Jn. 13:21-30; 1Co. 11:23-26)

<sup>17</sup> Cate' naca dza risí lo laní' quégaquië' bönni' judío cate' tahuë' yöta xtila le cabí nazí'í' cúa zi que, gula'bígui'ë bönni' usëda queë' Jesús ga zoë', en të' Lë':

—¿Gazxi rë'ënu' tsöjpa'atu' queëru' para gáguru'-ba' bö'cu' zxíla'do' dzö' Laní Pascua?

<sup>18</sup> Jesús rë' légaquië':

—Guli'tséajtsöca' yödö ni' ga na' zoë' tu bönni', en guli'guië': "Bönni' rusédinë' netu' rnnë': Chizá' gala' dza quia'. Lu yu'u lidxu' gágulengaca'-në' bönni' usëda quia' bö'cu' zxíla'do' dzö' Laní Pascua."

<sup>19</sup> Ní'irö gulunë' bönni' usëda queë' ca na' gunná bé'enë' Jesús légaquië', ate' bulu'pë'ë le ilahuë' dzö' Laní Pascua.

<sup>20</sup> Cate' chigudzö' dza na', Jesús guró'lenë' idxínnutë' bönni' usëda queë' tahuë'. <sup>21</sup> Tsanni ni' tahuë', Jesús rë' légaquië':

—Le nácatë rea' libí'ili', tu nu nutsa' ládjali' ni udödi neda'.

<sup>22</sup> Ní'irö bulu'hu'ini ládxi'gaquië', en gula'nábinë' Jesús tu tuë', ta'nnë':

—Xan, ¿naru' neda'?

<sup>23</sup> Bubi'ë didza' Jesús, rnnë':

—Bönni' ni runë' në'ë tsözxön len na'a lu yö'öna, bönni' ni udödë' neda'.

<sup>24</sup> Le nácatë neda', Bönni' Guljë' Bönachi, uyija' ga gátia' ca na' nazúaj lu guichi lá'ayi ca ral-la' gaca quia', pero bica' bayechi' nu na' udödi neda' gátia'. Gácarö dxi'a queë' bönni' na' la' cabí guljë'.

<sup>25</sup> Ní'irö bubi'ë didza' Judas, bönni' na' udödë' Jesús, rnnë':

—Bönni' Usedi, ¿naru' neda'?

Jesús rë' lë':

—Ön, lí' na'.

<sup>26</sup> Tsanni ni' tahuë', gudélë'ë Jesús yöta xtila, en gudxë' Dios: "Xclenu'." Ní'irö buzxuzxjë' le, en bunödzejë' quégaquië' bönni' usëda queë', rnnë':

—Guli'sí', guli'gagu. Lë' ni le naca caza'. Ca bena' que yöta xtila ni rulufi' ca gaca que le naca caza'.

<sup>27</sup> Gudélë'ë ca' tu zxíga'do', en gudxë' Dios: "Xclenu'." Ní'irö bunödzejë' ca' quégaquië', rnnë':

—Guli'gui'aj yúgu'téli'. <sup>28</sup> Lë ni rulu'i ca naca xichöna' le run tsutsu didza' cubi rucá'ana tsahui'. Xichöna' na' ilalaj ni'a quégaca bönachi Zían para gaca uniti lahuë' Dios yugu' dul-la' nabága'gaquië'. <sup>29</sup> Rea' ca' libí'ili', bití'rö guf'ja' xisi le ribía lubá uva ni cate' idxinrö dza ni' guf'jalena' libí'ili' tu le cubi ga ni' rinná bē'ë Xuza'.

*Jesús rnnë' innë' Pedro biti' núnbë'ë Lë'*

(Mr. 14:26-31; Lc. 22:31-34; Jn. 13:36-38)

<sup>30</sup> Cate' budxi gulúl-lë' yöl-la' ba queë' Dios, yöjáquië' lu Guf'a Yaga Olivo.  
<sup>31</sup> Ní'irö Jesús rë' légaquië':

—Yúgu'téli' gaca chopa ládxi'li', en ucá'anali' neda' na'a dzö' ni, tu' nazúaj lu guichi lá'ayi ca gaca quia', le rnna: “Guna' ga gátie' Bönni' Uyú Bö'cu' Zxila', ate' ilásilasiba' bö'cu' zxila' na'.” <sup>32</sup> Cate' ubana' lu yöl-la' guti, ní'irö tséaja' tsöjnörua' loli' saca' luyú Galilea.

<sup>33</sup> Ní'irö bubí'ë didza' Pedro, en rë' Jesús:

—Sala' ilaca chopa ládxi'gaquië', en ulu'cá'anë' yúgu'të' Li', neda' biti' gaca chopa ládxa'a, biti' ucá'ana' Li'.

<sup>34</sup> Jesús gudxë' lë':

—Le nácatë rea' li', na'a dzö' ni, cate' si' cödxilöba' böra, li' innó' tsonna luzuí biti' núnbë'u neda'.

<sup>35</sup> Ní'irö Pedro gudxë' Jesús:

—Sal-la' gátilentea' Li', biti' ca' innía' biti' núnbë'a Li'.

Lësca' caní gula'nnë' yúgu'të bönni' usëda queë'.

*Jesús rulidzë' Dios la' yëla Getsemaní*

(Mr. 14:32-42; Lc. 22:39-46)

<sup>36</sup> Ní'irö Jesús bidxinlenë' légaquië' la' yëla Getsemaní, ate' gudxë' yugu' bönni' usëda queë' na', rnnë':

—Guli'cö'tsóca' ni tsanni tséaja' ia'lati' ní'ilö, tsöjlidza'-në' Dios.

<sup>37</sup> Jesús guchë'ë Pedro len iropë' xzí'inë' Zebedeo, ate' gusi lahuë' ruhu'innë', en risëbi ládxë'ë. <sup>38</sup> Ní'irö Jesús gudxë' légaquië':

—Ruhui'ini ládxa'a, en huáti caza' lu yöl-la' risëbi ladxi'. Guli'gá'ana ni, en guli'ná' yëla tsözxön len neda'.

<sup>39</sup> Gudödë' Jesús ia'láti'do' ní'ilö, ate' ni' biyéchuë'. Busudxín lahuë' lu yu, en bulidzë' Dios, gunnë':

—Xuza', channö huáca, ben ga biti' gun bayudxi qui'i saca'a lë ni, calëga ca rë'ënda' neda', pero ca rë'ënu' Li' gunu'.

<sup>40</sup> Cate' budxinë' Jesús ga na' nacu'ë bönni' usëda queë', yöjxáquië' légaquië' tasië', ate' rë' Pedro:

—¿Naru' cabí gúcatsö iná'alenu' neda' tsözxön yëla tu chí'ido'?

<sup>41</sup> Guli'ná' yëla, en buli'lidzë' Dios inábili'-në' gácalenë' libí'ili', para cabí gü'ili' Satanás tu' xihui' lataj si' bë' libí'ili' le xihui'. Bö' naca cázali' nasína'tica'sö, pero lu yöl-la' bönáchisö queëli' nacuídi'li'.

<sup>42</sup> Ní'irö guyijë' Jesús le buropi luzuí, en bulidzë' Dios, rnnë':

—Xuz, channö cabí gaca gunu' ga biti' qui'i saca'a lë ni, ben ca raza ládxi'u Li'.

<sup>43</sup> Cate' böajë', leyúbölö buduxaquië' légaquië' tasië' tu' nadödirö yëla guiöj lógaquië'. <sup>44</sup> Ní'irö bucá'anë' Jesús légaquië', ate' guyijë' leyúbölö, en bulidzë' Dios le bunny luzuí, ate' tuz ca gunnë' zí'alö rnnë'. <sup>45</sup> Leyúbölö böajë' ga na' nacu'ë bönni' usëda queë', en rë' légaquië':

—¿Rásitsali' na'a, en ruzi'tsó ládxi'li'? Buli'yútsöca', chibudzaga lo. Neda', Bönni' Guljë' Bönachi, chinadöda' lu ná'agaquië' bönni' dul-la'.

46 ¡Guli' chasa, uyéajru! Buli'yútsöca', bönni' na' rudödë' neda' chibidxinë' ni.

*Ta' chë'ë Jesús nadzunë'*

(Mr. 14:43-50; Lc. 22:47-53; Jn. 18:2-11)

47 Tsanni ni' ru'ë Jesús didza' ni, Judas, bönni' nabábalenë' idxínnutë' na', la' bidxintë' ni', ate' dzágagaquië' bönni' zían lë', nuá'agaquië' guié tuchi', en yugu' yágado'. Yugu' bixúz unná bë', en bönni' gula tu' zéajni'inë' bönachi judío nasöl-la' gaquië' légaquië'. 48 Judas, bönni' na' rudödë' Jesús, chibulu'inië' légaquië' tu le gunë' le gaca bë' nu naca Jesús, gunné':

—Bönni' na' utsaga lahua'-në', Lë' na' Jesús. Guli'sönë'.

49 Ní'irö gubígui'ë Judas ga na' zoë' Jesús, rnnë':

—Padiux, Bönni' Usedi.

Ní'irö la' busudxín lotë' Lë'. 50 Jesús rë' lë':

—Böcha'a, ¿bizxi huen zo'o ni?

Ní'irö gula'biguë'ë bönni' na', ate' gula'zönë' Jesús. 51 Tuë' bönni' dzáguie' Jesús gulecjë' guié tuchi' queë', en benë' huë', guchúguie' guídi náguie' bönni' huen dxin queë' bixúz lo. 52 Jesús gudxë' lë':

—Bugú' guié tuchi' quiu' lidxi. Yúgu'të nupa tu'dí'ini guié tuchi', lu guié tuchi' ilátigaca. 53 ¿Naru' cabí nōzinu' huáca ulidza' Xuza', ate' Lë' la' isöl-la'të' zíanterö ca chinnu cö' gubáz lá'ayi le naca zían gáyú'ë tu cö' huéaj? 54 Channö guna' caní, ¿nacxi gaca udxín le nazúaj lu guichi lá'ayi, le rnna caní ral-la' gaca quia'?

55 Ní'irö Jesús gudxë' yugu' bönni' ni':

—¿Birúajtsali' nuá'ali' guié tuchi', en yágado' para sönli' neda' ca runli' rizönli'-në' gubán? Yugu' dza gurö'a loli' ga naca lu chila yudo', en busédigacada' bönachi, pero biti' guzxönli' neda'. 56 Raca caní yúgu'të lë' ni para udxín le nazúaj lu guichi lá'ayi, ca na' gula'nnë' bönni' gulu'ë didza' uláz queë' Dios.

Ní'irö yúgu'të bönni' usëda queë' Jesús bulu'cá'anë' Lë', en bulu'zxúnnajë' ni'.

*Ridxinë' Jesús lógaquië' bönni' yudo'*

(Mr. 14:53-65; Lc. 22:54-55, 63-71; Jn. 18:12-14, 19-24)

57 Ní'irö yugu' bönni' na' zóngaqüie' Jesús gula'chë'ë Lë', ate' bila'dxinë' lahuë' Caifás, bixúz lo, ga ni' nudúbigaquië' ca' yugu' bönni' yudo' usedi len bönni' gula tu' zéajni'inë'. 58 Pedro söjnáhuë' Jesús zí'tu' zí'tu'sö, en bidxinë' ga naca lö'a lidxi bixúz lo na', para ilé'enë' nacxi utságuie' Jesús.

59 Yugu' bixúz unná bë' len bönni' gula tu' zéajni'inë', en bönni' yudo' tu'chi'a tu'söröë', bulu'guiljë' nu uzegui Jesús didza' sal-la' si' yë'ë bönni' na', para gaca ila'chúguie' queë' gátie'. 60 Cuntu nu bila'dzölinë' sal-la' bila'dxinë' bönni' zían, en gula'nnë' queë' le cabí nácatë. Ga búdxitë bila'dxinë' chopë' bönni', ate' lu yöl-la' rizí' yë' quégaquië' gula'nnë' queë', 61 ta'nnë':

—Bönni' ni gunné': "Huaca uquínnaja' yudo' queë' Dios, ate' uchisa' le ia'tsonna dzasö."

62 Ní'irö guzuinë' bixúz lo na', en rë' Jesús:

—¿Naru' cabí rubí'tso' didza'? ¿Bizxi caz lë' ni ta'nnë' bönni' ni quiu'?

63 Jesús biti' bi gunné'. Ní'irö bixúz lo gudxë' Lë':

—Ní'a queë' Xanru' Dios ban rinná bé'eda' Li' quíxjö'u le nácatë. Gudíxjö'i' netu' channö nacu' Li' Cristo, Zxí'inë' Dios.

64 Jesús rë' lë':

—Ca na' ranno' naca'. Le nácatë rea' libí'ili, ilé'eli' neda', Bönni' Guljé' Bönachi, rö'a cuita lë'ë ibëla Dios, ga ni' dë lu na'a yöl-la' unná bë', ate' guída' lu böaj lúxhiba, en idxina' ga zóali'.

<sup>65</sup> Ní'irö lu yöl-la' rilé queë' guchözë' bixúz lo lari' nácuë', rnnë':

—¡Gunnë' zí'ë bönni' ni' queë' Dios! ¿Núzxirö naquíniru' nu innë' queë' bönni' ni? Chibiyón quézili' didza' zì' bë'ë queë' Dios. <sup>66</sup> ¿Nacxi rusáca'li' queëli'?

Bulu'bi'ë didza', gula'nne':

—Nabáguë'ë xíguia' gátie'.

<sup>67</sup> Ní'irö bulu'chejë' zxöna' lahuë' Jesús, en gulu'ë dö' queë'. Gula'gápë'ë ru'ë Jesús ia'zica'rë', <sup>68</sup> en të' Lë':

—¿Nácatso' Li' Cristo? Gunnëya'atsöca' na'a, ¿nuzxi na' gudapa' Li'?

*Pedro rnnë': "Biti' núnbë'a-në' Jesús"*

(Mr. 14:66-72; Lc. 22:56-62; Jn. 18:15-18, 25-27)

<sup>69</sup> Tsanni ni' gulaca lë na', rö'ë Pedro lö'alö, ate' bidxinnu tunu nigula huen dxin ga na' zoë', ate' rnnanu:

—Lësca' li' gudálenü' Jesús, bönni' Galilea na'.

<sup>70</sup> Gudá'baguë'ë Pedro lógaca bönachi nacua' ni', rnnë':

—Biti' nözda' nuzxi que na' ru'u didza'.

<sup>71</sup> Cate' birúajë' Pedro ga nu riyaza lö'a, bilé'enu-në' ia'tunu nigula, ate' gudxinu nupa nacua' ni':

—Bönni' ni gudálenë' ca' Jesús, bönni' Nazaret na'.

<sup>72</sup> Leyúbölö gudá'baguë'ë Pedro, en buzötjé' Dios, rnnë':

—Biti' ca' núnbë'a-në' bönni' ni.

<sup>73</sup> Íá'láti'do'os gudzé, gula'biga' nupa nacua' ni' ga na' zoë' Pedro, en të' lë':

—Le nácatë li' nunu' ca' tsözxön légaquië' tu' naca bë'u yöl-la' ru'isö quiu' didza'.

<sup>74</sup> Ní'irö gusí lahuë' Pedro rudxía dö' cuinë', en ruzötjé' Dios, rnnë':

—Biti' ca' núnbë'a-në' bönni' ni.

La' ná'asö gurödxitëba' böra. <sup>75</sup> Ní'irö yöjnenë' Pedro didza' gudxë' Jesús lë', gunné': Cate' si' cödxilöba' böra, tsonna luzuí chigunnó' bití' núnbë'u neda', ate' burúajë' Pedro ni', en gurödxí yéchi'dë'ë.

## 27

*Tu'dödë' Jesús lu në'ë Pilato*

(Mr. 15:1; Lc. 23:1-2; Jn. 18:28-32)

<sup>1</sup> Cate' za' rení' dza na', gulún xtídza'gaquië' yúgu'të bixúz unná bë' len bönni' gula tu'zéajni'inë' bönni' judío para ilútië' Jesús. <sup>2</sup> Gula'chë'ë Jesús náguë'ë, ate' bulu'dödë' Lë' lu në'ë Poncio Pilato, bönni' rinná bë'ë uláz que yödzö Roma.

*Ratië' Judas*

<sup>3</sup> Cate' chinözinë' Judas, bönni' na' budödë' Jesús lu ná'agaquië' bönni' yudo', narugu queë' Jesús gátie', buí'innë', ate' yöju'ë chi uruá' dumí plata na' lu ná'agaquië' bixúz unná bë', en yugu' bönni' gula na'. <sup>4</sup> Ré' légaquië':

—Bena' dul-la' tu' budöda'-në' bönni' tsahui' gátie'.

Ní'irö të' lë':

—Biti' gun lë ni ga cö'ötu' böniga. Le ben cazu' li' na'.

<sup>5</sup> Ní'irö gurú'unë' Judas yugu' dumí plata na' ga naca chila yudo', ate' buzë'ë ni', en yöjsí yenë'.

<sup>6</sup> Bulu'zi'è bixúz unná bē' yugu' dumí plata na', ta'nné':

—Biti' sa'yéaj cú'uru' dumí ni ga rigú'uru' dumí que yudo', tu' naca lazzjé' tu bönni' ratié' bönachi.

<sup>7</sup> Ní'irö gulún xtídzagaquié', ate' gulá'uiné' dumí na' tu la' yëla queé' tu bönni' huen rö'ö para gaca ga ila'gáché'è bönni' zi'tu'. <sup>8</sup> Que lè ni na', ga ridxintè na'a dza nazí'i le lataj na', La' Yëla Rön. <sup>9</sup> Caní guca ca na' gunné' Jeremías, bönni' bē'è didza' uláz queé' Dios, gunné': "Gula'guélè'è chi uruá' dumí plata na', tsca le gula'zéqui'né' bönni' Israel Lè', <sup>10</sup> ate' dumí na' gulá'uiné' la' yëla queé' tu bönni' huen rö'ö. Lè ni buluí'iné' Xana' neda'."

*Ridxiné' Jesús lahué' Pilato*

(Mr. 15:2-5; Lc. 23:3-5; Jn. 18:33-38)

<sup>11</sup> Cate' bulu'sudxiné' Jesús lahué' Pilato, bönni' na' rinná bē'è uláz que yödz Roma, bönni' ni gunábiné' Jesús, rē' Lè':

—¿Nacu' Li' Bönni' inná bē'ené' bönachi judío?

Jesús rē' lē':

—Ca nácasö rnno'.

<sup>12</sup> Cate' yugu' bixúz unná bē' len bönni' gula tu'zéajni'iné' bulu'zéguié' Jesús didza', biti' bi didza' bubi'è Jesús. <sup>13</sup> Ní'irö Pilato rē' Jesús:

—¿Naru' cabí riyöntsenu' cate' xö le ta'nné' quiu'?

<sup>14</sup> Jesús biti' bi didza' bubi'è. Caní guca, bubániné' bönni' unná bē' na'.

*Rirugu queé' Jesús gatié'*

(Mr. 15:6-20; Lc. 23:13-25; Jn. 18:38–19:16)

<sup>15</sup> Cate' naca dza Laní Pascua na', dē caz tu le runé' Pilato, bönni' unná bē' na', ca ta'naba bönachi rusané' tué' bönni' yu'è lidxi guié, núti'tés nu té'eni usané'. <sup>16</sup> Dza na' tu bönni' nabágué'è xíguia', lē' Barrabás, yu'è lidxi guié ni'. <sup>17</sup> Cate' bulu'dubi bönachi zían ni', Pilato gunábiné' légaquié', rnné': —¿Nuzxi rē'ënili' usana' queéli'? ¿Naru' Barrabás o Jesús, Bönni' na' lē' Cristo?

<sup>18</sup> Caní gunné' Pilato tu' réquibe'ené' bulu'dödè' bönni' yudo' Jesús lu nē'è tu' tu'zxe'ené' Lè'.

<sup>19</sup> Tsanni ni' rö'è Pilato ga na' ruchi'a rusöröè', nigula queé' gusöl-la'nu nu tsöjödxi lē', rnna:

—Biti' bi gunu' queé' bönni' tsahui' ni, tu' gúdxide'eda' guduyëla lu yëla bëchigal tu' nöziné' Lè'.

<sup>20</sup> Yugu' bixúz unná bē' len bönni' gula tu'zéajni'iné' gula'gú'u yöl-lè'è bönachi zían na' para ila'nabi Pilato usané' Barrabás na', ate' gútié' Jesús.

<sup>21</sup> Leyúbölö bē'è didza' bönni' unná bē' na', rē' légaquié':

—¿Núzxilé' chopè' ni rē'ënili' usana'-né' queéli'?

Gula'nné':

—Barrabás.

<sup>22</sup> Ní'irö Pilato gunábiné' légaquié', rnné':

—¿Nacxi guna' queé' Jesús, bönni' na' lē' Cristo?

Yúgu'tè' ta'nné':

—¡Budé'è lē'e yaga cruz!

<sup>23</sup> Ní'irö bönni' unná bē' na' rē' légaquié':

—¿Bizxi dö' bené'?

Zídzajrö gulu'è didza', ta'nné':

—¡Budé'è lē'e yaga cruz!

24 Cate' réquibe'enë Pilato biti' birúaj xtídz'è, pero gula'dzátasarö bönachi, ní'irö gudél'è nisa, en gudibi në'è lógaquië', rnnë':

—Biti' bi xíguia' nabága'a neda' tu' nōzi yōl-la' guti queë' bönni' tsahui' ni. Le gun cázali' libí'ili' lè ni.

25 Bulu'bí'i didza' yúgu'tè bönachi ni', ta'nná:

—¡Yōl-la' guti queë' bönni' ni ibága'tu' netu', en ila'baga' ca' xzí'initu'!

26 Ca' guca, Pilato busanë' Barrabás na' lu ná'agaquië'. Ní'irö gunná bé'enë' bönni' rōjáquië' gudil-la ila'guinë' Jesús, ate' gudödi ni' budödë' Lè' lu ná'agaquië' para ulu'dé'è Lè' lè'e yaga cruz.

27 Yugu' bönni' rōjáquië' gudil-la nacu'è lu në'è bönni' unná bë' na' gula'ché'è Jesús lu yu'u yúlahui' nazí'i le pretorio, ate' ni' bulu'tubë' yúgu'tè bönni' rōjáquië' gudil-la nacu'è ni' ga na' zoë' Jesús. 28 Ní'irö gula'lecjë' lari' nácuë' Jesús, en bulu'gácuë' Lè' tu lari' xiná chul-la, ca rácugaca nupa ta'nná bë'. 29 Bulu'dxië' icjë' tu le néquini ni'a në'e yaga yōtsi' le naca ca le dxia icjë' bönni' rinná bë'è, en bulu'zōë' tu guído' lu në'è ibëla le rulu'í ca tu yaga que bönni' yúlahui'. Ní'irö bulu'zóa zxibë' lahuë', en bulu'titjë' Lè', ta'nnë':

—¡Bica' ba Li', rinná bé'enu' bönachi judío!

30 Ní'irö bulu'chejë' Lè' zxōna', ate' bulu'guélë'è gui na', en gula'guinë' icjë'. 31 Gudödi bulu'titjë' Jesús, gula'lecjë' lari' na' nácuë', ate' bulu'gácuë' Lè' lari' que cazë'. Ní'irö gula'ché'è Lè' para tsōjdá'agaquië' Lè' lè'e yaga cruz.

*Tu'dé'è Jesús lè'e yaga cruz*

*(Mr. 15:21-32; Lc. 23:26-43; Jn. 19:17-27)*

32 Cate' ni' bila'rúajë' bönni' na', yōjxáca'gaquië' Simón, tu bönni' Cirene, ate' gulunë' ga bi'è yaga cruz queë' Jesús.

33 Cate' bila'dxinë' lataj nazí'i le Gólgota, le rnna lu didza' xidza', Lataj Que Böga' Ícjaru', 34 bulu'gui'jë' Jesús nupi zi nutsí'i xzí'gala'aba' böa' guixí'. Cate' buxí'i ru'è Jesús, biti' gú'unnë' guí'jë'.

35 Cate' chinudá'agaquië' Lè' lè'e yaga cruz, gula'guísië' lari' nácuë', en bulu'quitjë' lahui le gaca bë' núzxilë' guequi queë'. Caní guca, budxín lè na' gunné' bönni' bë'è didza' uláz queë' Dios, gunné': "Gula'guísië' lari' nácuë', en bulu'quitjë' lahui le gaca bë'." 36 Ní'irö gula'bō'è ni', tu'yúé' Jesús. 37 Lësca' bulu'zōë' lè'e yaga cruz ícjalë' Jesús tu didza' le riguixjō' le nabáguë'è le rnna caní: "Bönni' ni Jesús, Bönni' rinná bé'enë' bönachi judío."

38 Ga ni' dë'è Jesús, bulu'dé'è ca' lè'egaca yaga cruz chopë' bönni' gubán. Tuë' bulu'dé'è cuita lè'è ibëla, en ia'tué' na' cuita lè'è yōgōla. 39 Gula'dödë' ni' yugu' bönni' bulu'lidza zi'è Jesús, en bulu'tá ícjagaquië', tu'titjë' Lè', 40 ta'nnë':

—¡Ōn, Li' na' uquínaju' yudo', ate' tsonna dzasō ca' uchísatso' le! ¡Busólá cuinu' na'a channō nacu' Li' Xzí'inë' Dios! ¡Bōtjatsōca' lè'e yaga cruz na'!

41 Lësca' caní bulu'titjë' Lè' yugu' bixúz unná bë' len yugu' bönni' yudo' usedi, en yugu' bönni' yudo' fariseo, len bönni' gula' tu'zéajni'inë', ta'nnë':

42 —Yugu' nu yúbölō busölë' bönni' ni, pero biti' gaca usólá cuinë'. Channō náquië' Bönni' inná bé'enë' bönachi Ísrael, huōtjatsōquië' na'a lè'e yaga cruz, ate' tséajlë'ëru' Lè'. 43 Lè' buzzōni ládxë'è Dios. Dios usólá cazë' Lè' na'a channō raza ládxë'è Lè', tu' gunné': "Xzí'inë' Dios naca'."

44 Lësca' caní yugu' bönni' gubán na' dá'gaquië' lè'egaca yaga cruz ga ni' dë'è Jesús bulu'lidza zi'è Lè'.

*Ratië' Jesús**(Mr. 15:33-41; Lc. 23:44-49; Jn. 19:28-30)*

<sup>45</sup> Cate' bidxín huagubidza, guchul-la idütë yödzölió ga bidxintë idú ridödi xihuö. <sup>46</sup> Idú ridödi xihuö na', bë'ë zidzaj didza' Jesús, rnnë':

—Elí, Elí, ¿lama sabactani?

Didza' ni rnna lu didza' xidza': "Dios quia', Dios quia', ¿bixx que nubéaj ládXu'u neda'?"

<sup>47</sup> Cate' nupa nacuá' ni' bila'yöni didza' ni, ta'nná:

—Bönni' ni rulidzë' Elías, bönni' ni' bë'ë didza' uláz queë' Dios.

<sup>48</sup> La' guxítí'të' tuë' bönni' nútsë'ë ládjagaquië', en gudélë'ë tu le bululu rixxupi nisa, ate' buxúpinë' le nupi zi, en buzóë' le tu lu gui, ate' butságuië' le ru'ë Jesús para xupë'. <sup>49</sup> Ní'irö ia'zica'rë' bönni' ni' ta'nnë':

—¡Gulözagarö! ¡Uyútsöca'ru' channö huidë' Elías usölë' Lë'!

<sup>50</sup> Leyúbölö gurödxí'ë zidzaj Jesús, ate' burúajtë bö' naca cazë', gútitë'.

<sup>51</sup> La' ná'asö biröza'të lari' nal-la' lu yudo', birúaj choplö, le gudela' icjlö ga bidxintë xiní'i. Ní'irö gudödi budó' zxu', en gula'lá'a guiöj. <sup>52</sup> Gula'yalaj yeru ba quégaca nupa chinátigaca, nupa ni' gula'yéajlë' Dios, ate' bulu'bán bönachi na'. <sup>53</sup> Gudödi bubanë' Jesús, bulu'rúajë' bönni' na' yeru ba quégaquië', en gula'yázië' yödzö lá'ayi Jerusalén, ga ni' bila'lé'e bönachi zían légaquië'.

<sup>54</sup> Ní'irö gúdxinë' bönni' na' rinná bé'enë' bönni' röjáquië' gudil-la, enca' yugu' bönni' röjáquië' gudil-la nacuá'lenë' lë' tu'yúë' Jesús, ate' gunné':

—Le nácatë bönni' ni gúquië' Xzí'inë' Dios.

<sup>55</sup> Zí'tu'sö gula'cuá'anu nigula zían tu'yunu Jesús, nigula na' gula'dálennu Jesús cate' ni' buzë'ë luyú Galilea, ate' gulunnu xichinë', gula'gú'unu le gulahuë'. <sup>56</sup> Lë'sca' María Magdalena, en María, xiná'agaquië' Jacobo, en José, nútsa'gacanu ládjagacanu, ate' zóanu ca' ni' xiná'agaquië' yugu' xzí'inë' Zebedeo.

*Ta'gu'ë Jesús yeru ba le nadaj lë'e guí'a guiöj**(Mr. 15:42-47; Lc. 23:50-56; Jn. 19:38-42)*

<sup>57</sup> Cate' chiridzö' dza na', bidxinë' José, bönni' Arimatea, tu bönni' rilé'enë' yöl-la' tsahui' queë', en dë'ë ca' Jesús. <sup>58</sup> Bönni' ni yöjyúë' Pilato, en gunabë' lataj u'ë Jesús. Ní'irö Pilato gunná bë'ë ulu'nödzjë' queë' Jesús. <sup>59</sup> Guzxi'ë José Lë', en buchölinë' Lë' tu lari' nazaca'. <sup>60</sup> Ní'irö gulu'ë Lë' lu yeru ba cubi queë' le naguidjë' lë'e guí'a guiöj. Budë'ë tu guiöj blaga zxön ga nu riyaza yeru ba na', ate' söhuöjë'. <sup>61</sup> Gula'cuá'anu María Magdalena, en ia'tunu María ni', rö'gacanu ra' yeru ba na'.

*Yugu' bönni' röjáquië' gudil-la tapa chi'ë ba queë' Jesús*

<sup>62</sup> Cate' za' rení' ia'tú dza, gudödi bulu'pë'ë que dza lá'ayi quégaquië' bönni' judío, bulu'dubë' yugu' bixúz unná bë', en yugu' bönni' yudo' fariseo ga zoë' Pilato. <sup>63</sup> Të' Pilato:

—Bönni', röjnetu' bi gunné' bönni' rizí' yë'ë na', cate' ni' zoë' nabanë', gunné': "Cate' gaca tsonna dza ubana' lu yöl-la' guti." <sup>64</sup> Que lë ni na' gunná be'e nupa ilún chi'i ba ni' ga idxintë dza bunni, para cabí ídigaquië' bönni' usëda queë' chi'i dzö'ölö, en ulu'béajë' Lë'. Ní'irö ilë' bönachi: "Bubanë' Jesús lu yöl-la' guti." Channö caní gaca, didza' cabí nácatë ni ilu'ë gúntë'rö huiá' dö' ca ben didza' cabí nácatë na' gulu'ë zí'alö.

<sup>65</sup> Pilato gudxë' légaquië':

—Ni nacu'ë bönni' rōjáquië' gudil-la. Guli'chë'ë queëli'. Guli'tséaj, guli'gún chi'i yeru ba na' tsca séqui'li' gunli'.

<sup>66</sup> Ní'irō yōjáquië' ni', en bulu'sayjë' dxi'a yeru ba na', en bulu'dé'ë lë'e guiōj na' tu le gaca bë' channō isalaj, ate' bulu'cá'anë' ni' bönni' rōjáquië' gudil-la ilún chi'ë le.

## 28

*Rubanë' Jesús lu yöl-la' guti*

(Mr. 16:1-8; Lc. 24:1-12; Jn. 20:1-10)

<sup>1</sup> Cate' chigudödi dza lá'ayi quégaquië' bönni' judío, en chizá' reni' dza domingo, yōjyúgacanu María Magdalena en ia'tunu María na' yeru ba queë' Jesús. <sup>2</sup> Tsárido'os gudödi budó' zxu'. Cani guca, tu' bōtjë' tuë' gubáz lá'ayi queë' Xanru' narúajë' yehua' yubá. Bidxinë' ra' yeru ba na', ate' gudúë' guiōj blaga zxön na', en gurö'ë lu guiōj na'. <sup>3</sup> Nalá' lahui gubáz lá'ayi na' ca yōsa bení', ate' zxíla'do'os naca lari' nácuë'. <sup>4</sup> Cate' yugu' bönni' na' rōjáquië' gudil-la tapa chi'ë yeru ba na' bila'lé'enë' lë', guládxinë', en gula'zxízië'. Gula'dzö'ë lu yu, en guláquië' ca bönni' nati caz. <sup>5</sup> Ní'irō gubáz lá'ayi na' gudxë' yugu' nigula na', rnnë':

—Biti' gádxili'. Nözda' ruguújali'-në' Jesús, bönni' na' bulu'dé'ë lë'e yaga cruz. <sup>6</sup> Biti' zoë' ni tu' chibubanë' ca na' chigunná cazë' Lë'. Guli'dá, uyuli' ga ni' gutë' Xanru'. <sup>7</sup> Guli'tséaj na'a, guli'tsōjōdxi yugu' bönni' usëda queë' chibubanë' Jesús lu yöl-la' guti, ate' na'a Lë' cazë' inōruë' loli' saca' luyú Galilea. Ni' ulé'eli'-në'. Chigudxa' libí'ili' le gulu'ë Dios lu na'a.

<sup>8</sup> Ní'irō la' bulu'zá'tënu ra' yeru ba na', tádxinu, en tu'dzéjanu, ate' carelō sōjácacu sōjtjxjöi'iguequinu yugu' bönni' usëda queë'. <sup>9</sup> Tsanni ni' sōjácacu, Jesús yōjtsáquië' légacacu, ate' rë' légacacu:

—Padiux.

Ní'irō gula'bíga'nu ga zoë' Jesús, en bulu'nída'nu ni'ë. Gula'yéaj lādxi'gacanu Lë'. <sup>10</sup> Ní'irō Jesús rë' légacacu:

—Biti' gádxili'. Guli'tséaj, guli'tsōjtjxjöi'i yugu' böcha'a tsōjáquië' saca' luyú Galilea, ate' ni' ulu'lé'enë' neda'.

*Le gula'guúxjö'ë yugu' bönni' rōjáquië' gudil-la*

<sup>11</sup> Tsanni ni' sōjácacu nigula na', yugu' bönni' na' rōjáquië' gudil-la gulún chi'ë yeru ba na' bulu'dxinë' lu yōdzö ni', ate' gula'guúxjöi'inë' yugu' bixúz unná bë' yúgu'të lë na' gulaca. <sup>12</sup> Cate' chibulu'tubë' yugu' bönni' gula tu'zëajni'inë', gulún xtídza'gaquië'. Ní'irō bulu'nōdzjë' dumí zían quégaquië' bönni' na' rōjáquië' gudil-la. <sup>13</sup> Të' légaquië':

—Cani innali': "Bila'dxinë' bönni' usëda queë' chi'i dzö'ölö, en bulu'béajë' Lë' tsanni ni' rásitu'." <sup>14</sup> Channō huayōnnë' bönni' rinná bë'ë lë ni, netu' uzëajni'itu' lë', en guntu' ga bití' bi gunë' queëli'.

<sup>15</sup> Ní'irō yugu' bönni' rōjáquië' gudil-la na' gula'zi'ë dumí na' ate' yōjégaquië' ca na' chinazédagaquië'. Cani guca, tu'zë' bönni' judío didza' ni ga ridxintë na'a dza.

*Jesús risöl-lë'ë yugu' bönni' gubáz queë'*

(Mr. 16:14-18; Lc. 24:36-49; Jn. 20:19-23)

<sup>16</sup> Ní'irō idxinë'ajtë' bönni' usëda queë' Jesús yōjáquië' luyú Galilea, ate' bila'dxinë' lu guf'ado' na' chibulu'f'inë' Jesús légaquië'. <sup>17</sup> Cate' bulu'lé'enë' Jesús, gula'yéaj lādxi'gaquië' Lë', pero bal-lë' gulaca chopa lādxi'gaquië'. <sup>18</sup> Ní'irō gubígui'ë Jesús ga na' nacu'ë, en rë' légaquië':



—Dios chinudödë' lu na'a yúgu'të yöl-la' unná bë' yehua' yubá, en luyú ni. <sup>19</sup> Que lë ni na', guli'tséaj, guli'tsöjsëdi yúgu'të bönachi idútë yödzölió. Buli'quíla légaquië' nisa, ugunli' dxin Lë' Dios Xuz, en Lë' Dios Zxí'ini, en Lë' Dios Bó' Lá'ayi. <sup>20</sup> Guli'sëdi légaquië' ilunë' yúgu'të lë na' gunná bé'eda' libí'ili'. Buli'yútsöca', neda' caz zóalena' libí'ili' yúgu'të dza ga idxinrö dza údxi que yödzölió. Ca' gaca.

## DIDZA' DXI'A BUZÚAJĚ' MARCOS

*Libán beně Juan, bönni' buquile' bönachi nisa*

*(Mt. 3:1-12; Lc. 3:1-9, 15-17; Jn. 1:19-28)*

<sup>1</sup> Caní gusí lo didza' dxi'a ca guca quee' Jesucristo, Zxí'ině' Dios.

<sup>2</sup> Budxín lě na' buzúajě' lu guichi Isaías, bönni' bē'ě didza' uláz quee' Dios, le gunně' Dios:

Buyútsōca', risōl-la'a bönni' gubáz quia', inōruē' Lo'.

Lě' upě'ě nōza ga tōdu'.

<sup>3</sup> Yōn chi'ě tu bönni' ulidzē' zidzaj lu lataj cá'asō, inně':

“Buli' pá'a nōza para idxín Xanru' yichaj lǎzxdō'oli'.

Buli'béaj li yugu' nōza lasi ga tōdē'.”

<sup>4</sup> Caní budxín, tu' ruquile' Juan bönachi nisa lu lataj cá'asō, en runě' libán para ila'dila bönachi nisa, bönni' na' bulu'bí'i lǎdxi'gaquie' para uniti lahuē' Dios dul-la' nabága'gaquie'. <sup>5</sup> Bila'rúaj bönachi zían yúgu'tē yōdzō luyú Judea, enca' yōdzō Jerusalén, en yójáquie' ga na' zoē' Juan, ate' Juan na' buquile' légaquie' nisa lu yegu Jordán, bönni' na' gula'xóalépē' dul-la' nabága'gaquie'.

<sup>6</sup> Nácué' Juan lari' néquini lítsa'ba' bōa', en núguē'ě lē'ě tu guídi. Rahuē'-ba' bōchi'zu, en re'jē' le zxixi que buzdo'. <sup>7</sup> Runě' Juan libán, rnně':

—Si' zē'ě bönni' tōdi na'a, náparē' yōl-la' unná bē' ca neda'. Biti' naca' neda' lesaca' yéchua', para ilecja' xiráchuē' nudē'ě. <sup>8</sup> Neda' ruquila' libí'ili' nisa, pero Lě' guně' le ruluí'isō yōl-la' ridila nisa ni, uchíziē' libí'ili' Dios Bō' Lá'ayi.

*Ridilē' Jesús nisa*

*(Mt. 3:13-17; Lc. 3:21-22)*

<sup>9</sup> Tu dza ni' birúajě' Jesús yōdzō Nazaret luyú Galilea, ate' Juan na' buquile' Lě' nisa lu yegu Jordán. <sup>10</sup> Cate' burúajě' Jesús lu nisa, la' ná'asō bilé'eně' guyalaj lǎzxi'ba, en ruhuōtjē' Dios Bō' Lá'ayi, ruluí'i cuinē' ca tuba' gu'dōdo', en bidisóalenē' Lě'. <sup>11</sup> Biyōn chi'i nu ruí'i didza' yehua' yubá, rnna:

—Li' nacu' Zxí'ina'. Nadxí'ida' Li', en raza lǎdxa'a Li'.

*Rě'ěni tu' xihui' gun ga ibáguē'ě Jesús dul-la'*

*(Mt. 4:1-11; Lc. 4:1-13)*

<sup>12</sup> Ní'irō Dios Bō' Lá'ayi guchē'ě Jesús bayudxi lu lataj cá'asō. <sup>13</sup> Guzōē' Jesús lataj cá'asō na' idú choá' dza, ate' gú'uni Satanás tu' xihui' gun ga ibáguē'ě Jesús dul-la'. Guzōē' Jesús ga ni' ta'daba' bōa' guixi' dzō'ōba' gu'ado'. Yugu' gubáz lá'ayi quee' Dios gulácalenē' Jesús, en gula'gu'ě le gudahuē'.

*Rusédinē' Jesús bönachi luyú Galilea*

*(Mt. 4:12-17; Lc. 4:14-15)*

<sup>14</sup> Gudōdi gula'gu'ě Juan na' lidxi guíē, sa'yéajě' Jesús luyú Galilea. Runě' libán ni' que didza' dxi'a ca rinná bē'ě Dios. <sup>15</sup> Caní rnně':

—Chibidxín dza. Chizóa idinná bē'ě Dios. Buli'bí'i lǎdxi'li', en guli'tséajlě' didza' dxi'a ni.

*Rulidzë' Jesús tapë' bönni' uzxön böla**(Mt. 4:18-22; Lc. 5:1-11)*

<sup>16</sup> Tsanni ni' ridë' Jesús ra' nísado' luyú Galilea, bilé'enë' Simón len Andrés, bönni' böché'ë Simón na'. Nácagaquië' uzxön böla, en ta'chiljé' yöxaj böla quégaquië' lu nisa na'. <sup>17</sup> Jesús gudxë' légaquië', rnnë':

—Guli'dutá' neda', ate' guna' ga ichë'ëli' bönachi quia' neda', gunli' ca runli' rizönli'-ba' böla.

<sup>18</sup> La' bulu'cá'anatë' yöxaj quégaquië', en sôjácalenë' Jesús.

<sup>19</sup> Gudödë' Jesús ia'láti'do' ní'ílô, ate' bilé'enë' Jacobo, en Juan, yugu' xzi'inë' Zebedeo, nacu'ë lë'e bárcodo' quégaquië', tu'únë' yöxaj böla quégaquië'. <sup>20</sup> Jesús la' bulidztë' légaquië', ate' bulu'cá'anë' xúzgaquië' Zebedeo, dzáguië' yugu' huen dxin queë' lë'e bárcodo' na', ate' sôjácalenë' Jesús.

*Tu bönni' yu'u lë' bö' xihui'**(Lc. 4:31-37)*

<sup>21</sup> Bila'dxinë' Jesús, en yugu' bönni' dá'gaquië' Lë' lu yödzö Capernaum. Cate' ni' naca dza lá'ayi quégaquië' bönni' judío, guyázië' Jesús yu'u ga tu'dubë' bönni' judío, en tu'sëdë' queë' Dios, ate' gusi'lahuë' rusédinë' nupa nudúbigaca ni'. <sup>22</sup> Bulu'báininë' ca na' rusédinë' Jesús, tu' rusédinë' ca runë' tu bönni' dë lu në'ë, en calëga ca tunë' bönni' yudo' usëdi. <sup>23</sup> Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sëdë' queë' Dios, ate' gurödxí'ë bönni' na', rnnë':

<sup>24</sup> —¿Bizxi rál-la'tu' quiu', Jesús, bönni' Nazaret? ¿Za'tsu' usunítíu' netu'? Núnbë'a Li', nacu' Bönni' Lá'ayi queë' Dios.

<sup>25</sup> Jesús buzenë' le bach, rnnë':

—Busayaj ru'u, en burúaj lu bönni' ni.

<sup>26</sup> Ní'irö bö' xihui' na' buxízida' bönni' na' yu'u lë', ate' gurödxí'a zidzaj, en la' burúajtë. <sup>27</sup> Bulu'báininë' yúgu'të bönni' nacu'ë ni', ate' gula'nabi luzë'egaquië', ta'nnë':

—¿Bizxi caz lë ni? ¿Naru' nácatsö xibá cubi? ¡Len yöl-la' unná bë' rinná bé'enë' yugu' bö' xihui', ate' tun ca rnnë'!

<sup>28</sup> La' guzëtë didza' que yöl-la' huáca queë' Jesús, ate' bila'yöni bönachi idütë luyú Galilea na'.

*Ruúnë' Jesús xiná'anu nigula queë' Pedro**(Mt. 8:14-15; Lc. 4:38-39)*

<sup>29</sup> Ní'irö burúajë' Jesús lu yu'u ga na' tu'dubë' tu'sëdë' queë' Dios, en la' guyéajlentë' Jacobo, en Juan, ate' bila'dxinë' lídxigaquië' Simón, en Andrés. <sup>30</sup> Ni' dënu xiná'anu nigula queë' Pedro, yú'unu tu xilá. La' gula'guíxjói'tenë' Jesús ca raca queënu. <sup>31</sup> Ní'irö gubígui'ë Jesús, ate' gudélé'ë ná'anu, en guchisë'-nu. La' burúajtë tu xilá na' yú'unu, ate' bupá'anu le gulahuë'.

*Ruúnë' Jesús zían nupa te'e**(Mt. 8:16-17; Lc. 4:40-41)*

<sup>32</sup> Cate' chiridzö', ca gudxía gubidza, la' dujuá'gacatë' yúgu'të nupa te'e, en yugu' bönni' yu'u légaquië' bö' xihui' ga zoë' Jesús. <sup>33</sup> Yúgu'të bönachi lu yödzö bila'guirö ga nu riyaza yu'u ga na' zoë' Jesús. <sup>34</sup> Jesús bunë' zían nupa te'e, naca zían yödzöhuë' té'enë'. Bubéajë' ca' zían bö' xihui' yú'ugaca bönachi na'. Biti' bë'ë lataj ila'nnë bö' xihui' na' tu' núnbë'gaca Lë' Nu náquië'.

*Runë libán Jesús luyú Galilea**(Lc. 4:42-44)*

<sup>35</sup> Zí'acado' guyasë' Jesús, ni' naca chul-la. Burúajë' yödzo na', en sa'yéajë' tu lataj cá'asö, ate' ni' bulidzë' Dios. <sup>36</sup> Simón, en nupa nacua' len lë' söjdíljagaquië' Jesús. <sup>37</sup> Cate' yöjxáca'gaquië' Lë', të' Lë':

—Yúgu'të bönachi tu'guílaj Lí'.

<sup>38</sup> Ní'irö Jesús gudxë' légaquië', rnnë':

—Uyéajru' yugu' dzaga yödzö, para guna' ca' libán ni'. Que lë ni na' birúaja'.

<sup>39</sup> Caní guca, gudödë' Jesús idú luyú Galilea, runë' libán lu yu'u gapa tu'dubë' bönni' judío, tu'sëdinë' queë' Dios, ate' rubéajë' bö' xihui' yú'ugaca bönachi.

*Tu bönni' ré'enë' huë' nudzu' ruzödi**(Mt. 8:1-4; Lc. 5:12-16)*

<sup>40</sup> Tu bönni' ré'enë' huë' nudzu' ruzödi bidxinë' ga zoë' Jesús. Buzóa zxi'bë', en gúta'yuë' lahuë', rnnë':

—Channö ré'ënu', huáca unu' neda'.

<sup>41</sup> Jesús buéchi' ládxi'ë' lë'. Bulí në'ë, gudanë' lë', en gudxë' lë':

—Rë'ënda'. Chinuhuöácu'.

<sup>42</sup> Ca gunné' ca', la' bunítitë huë' ré'enë', en böáquië' dxí'ado'. <sup>43</sup> Ní'irö Jesús buzenë' bach bönni' na', en la' busöl-la'të' lë'. <sup>44</sup> Caní gudxë' lë':

—Cuntu nu guó' ca bena' quiu', pero guyéaj, yöjluí'i cuinu' lahuë' bixúz, en yöjnödzej para le böácanu' li' que yudo' ca na' gunná bë'ë Moisés, lë na' uluí'i bönachi chinuhuöácu'.

<sup>45</sup> Burúajë' bönni' ni, en gusi lahuë' riguíxjöi'inë' bönachi zián ca guca queë'. Tu' buzë' didza' ni, bití'rö guca tsázië' Jesús yálajdo' tu lu yödzö, pero gezóasë' ní'lö gapa naca lu lataj cá'asö. Bönachi yúgu'të yödzö bila'dxin ga na' zoë' Jesús.

**2***Bönni' ré'enë' huë' nacú'unië' bin**(Mt. 9:1-8; Lc. 5:17-26)*

<sup>1</sup> Cate' chigudödi chopa tsonna dza, buázië' Jesús yödzö Capernaum, ate' guzë didza' zoë' yu'u. <sup>2</sup> La' bulu'dúbitë bönachi zián ga na' zoë' Jesús, ga bidxintë bití'rö guzxéqui' ila'cuá' ni', ni ra' yu'u, ate' Jesús benë' libán que xtídzë'ë lógaquië'. <sup>3</sup> Ní'irö bila'dxinë' ga na' zoë' Jesús tapë' bönni', nuá'agaquië' tu bönni' huë' nacú'unië' bin. <sup>4</sup> Biti' guca ila'dxinë' lahuë' Jesús tu' nacua' bönachi zián ni'. Que lë ni na' gula'saljë' ícjo'olö ca dödilö ga zoë' Jesús. Cate' budxi bulu'dxië' yeru na', ni' bulu'zötjé' le denë' bönni' huë' na'. <sup>5</sup> Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Zxi'ina', chibunít lahua' li' ca naca dul-la' nabágu'u.

<sup>6</sup> Rö'ögaquië' bal-lë' bönni' yudo' usedi ni'. Ta'zá' ládxi'gaquië', ta'nnë': <sup>7</sup> ¿Bizx que ru'ë caní didza' bönni' ni? Rucá'anë' cá'asö Dios. Cuntu nu bönni' gaca uniti lahuë' dul-la'. Tuzë' Dios gaca gunë' lë ni. <sup>8</sup> La' gúquibe'etenë' Jesús le ta'zá' ládxi'gaquië', ate' gudxë' légaquië':

—¿Bizx que rizá' ládxi'li' caní? <sup>9</sup> Biti' naca böniga nu guiësö bönni' huë' ni chibuníti lo dul-la' nabáguë'ë, pero naca böniga nu gun ga huöásë', en u'ë le denë', en uzë'e ni'ë. <sup>10</sup> Guna' le gaca bë' neda', Bönni' Guljë' Bönachi, dë lu na'a luyú ni uniti lahua' dul-la' nabága'gaca bönachi.

Ní'irö Jesús gudxë' bönni' huë' na':

11 —Li' rea': Guyasa. Buá' le denu', en böaj lidxu'.

12 La' guyásatë' bönni' huë' na', bu'ë le gúti'në', en burúajë' lógaca yúgu'të nupa nacuá' ni'. Bulu'bánninë' yúgu'të', en gula'gu'ë Dios yöl-la' ba, ta'nnë': —Catu caz rilé'etu' le caní.

*Jesús ruidzë' Leví*

*(Mt. 9:9-13; Lc. 5:27-32)*

13 Burúajë' Jesús yödzo Capernaum, na' gudödë' leyúbölö ra' nísado'. Bulu'dubi bönachi zían ga zoë' Jesús, ate' Lë' busédinë' légaquië'. 14 Cate' ridödë' Jesús ni', bilé'enë' Leví, zxi'inë' Alfeo, rö'ë ga ruquíxjé' uláz que yödzo zítu'. Jesús gudxë' lë':

—Gudá' neda'.

La' guyásatë' Leví na', sa'yéajlenë' Jesús.

15 Gudödi guca lë ni, rö'ë Jesús rahuë' lu yu'u lidxë' Leví na', ate' zían bönni' uquíxaj, en ia'bal-lë' bönni' cá'asó rölengaquië' tsözxön Jesús, en yugu' bönni' usëda queë'. Caní guca, tu' rójaca bönachi zían len Jesús. 16 Cate' yugu' bönni' yudo' usedi, en yugu' bönni' yudo' fariseo, bila'lé'enë' Lë' rö'ë rágulënë' tsözxön yugu' bönni' uquíxaj, en ia'bal-lë' bönni' cá'asó, gulé' yugu' bönni' usëda queë' Jesús, ta'nnë':

—¿Bizxi caz runtsë'? ¡Rë'aj rágulentsë' yugu' bönni' uquíxaj, en ia'bal-lë' bönni' dul-la'!

17 Biyönnë' Jesús didza' ni tu'ë, en gudxë' légaquië':

—Nupa nacuá' dxi'a bití' naquínguequi nu un bönachi, pero nupa te'e naquínguequi nu un bönachi. Za'a neda', calëga dulídzagaca' bönachi tshai', pero rulídzagaca' bönachi dul-la' para ulu'bí'i ládxi'gaca.

*Ru'ë Jesús didza' que yöl-la' run gubasa*

*(Mt. 9:14-17; Lc. 5:33-39)*

18 Tu dza ni' tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, ate' bila'dxín nupa gula'nabi Jesús, ta'nná:

—¿Bizx que tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, pero bönni' dá'gaquië' Li' bití' tunë' gubasa?

19 Bubi'ë didza' Jesús, rë' légaquië':

—¿Naru' réquitseli' ilún gubasa nupa nacuá' laní queë' bönni' rutsaga në'ë tsanni ni' bönni' na' rutsaga në'ë zóalenë' légaquië'? Tsanni ni' bönni' na' rutsaga në'ë zóalenë' légaquië', bití' gaca ilunë' gubasa. 20 Idxín dza cate' udúë' bönni' na' rutsaga në'ë, en bíti'rö sóalenë' légaquië', ate' dza ní'irö ilunë' gubasa.

21 'Cuntu nu bönni' udë'ë tu lari' cúbido' lu lari' chinatëbi, tu' utsupi' lari' cubi na', en huachöza' lari' tëbi na', ate' huaróza'rö lari' tëbi na'. 22 Lë'sca' caní cuntu nu bönni' que'ë xisi uva cubi lu buzudi bidxi néquini guídi, tu' gal-la xisi uva cubi na', en ulá'a buzudi bidxi na' néquini guídi, ate' ilalaj xisi uva na', en gaca ditaj buzudi néquini guídi. Xisi uva cubi lu buzudi néquini guídi cubi ral-la' cá'aru'.

*Bönni' dá'gaquië' Jesús ta'lecjë' do dza lá'ayi*

*(Mt. 12:1-8; Lc. 6:1-5)*

23 Tu dza lá'ayi quégaquië' bönni' judío, gudödë' Jesús gapa dë yöla xzoa' xtla, ate' bönni' usëda queë' gula'sí lógachië' ta'lecjë' do ga dxía xzoa' xtla. 24 Ní'irö bönni' yudo' fariseo gulé' Jesús, ta'nnë':

—Buyútsöca'. ¿Bizx que tunë' bönni' dá'gaquië' Li' le cabí ral-la' gunru' dza lá'ayi?

25 Jesús gudxë' légaquië':

—¿Naru' cabí nulábanili' ca benë' David cate' gudunë'? Biyadzaj le ilahuë' lë', en nupa nacua' len lë' <sup>26</sup> ate' guyázië' lu yu'u queë' Dios cate' ni' náquië' bixúz lo Abiatar, en gudahuë' yöta xtila tu'cu'ë lahuë' Dios, lë na' bití' dë lataj nu gagu, pero tuz bixúz dë lataj ilahuë' le. Bë'ë ca' le ilahuë' bönni' nacua' lenë' lë'.

<sup>27</sup> Ní'irö Jesús gudxë' légaquië':

—Dios benë' dza lá'ayi le ulu'z'í' xibé bönnachi, calëga benë' bönnachi para ilún chi'i dza lá'ayi. <sup>28</sup> Que lë ni na', neda', Bönni' Guljë' Bönnachi, naca' Xani dza lá'ayi.

### 3

*Ruínë' Jesús tu bönni' narequi' në'ë*

(Mt. 12:9-14; Lc. 6:6-11)

<sup>1</sup> Leyúbölö guyu'ë Jesús tu lu yu'u ga tu'dubë' tu'sëdë' bönni' judío queë' Dios, ate' zoë' ca' ni' tu bönni' narequi' në'ë. <sup>2</sup> Bönni' yudo' nacu'ë ni' tu'yúë' Jesús channö únë' bönni' na' dza lá'ayi, tu' t'ë'ennë' ulu'zégui'ë Lë' didza'. <sup>3</sup> Ní'irö Jesús gudxë' bönni' na' narequi' në'ë, rnnë':

—Guyasa, en guzuí lógaca bönnachi ni.

<sup>4</sup> Jesús gunábinë' bönnachi ni', rnnë':

—¿Naru' dë lataj gunru' le naca dxi'a cate' naca dza lá'ayi o gunru' le ruá' dö'? ¿Naru' dë lataj gunru' ga ila'deli' bönnachi yöl-la' na'bán o usunítiru' le?

Gula'cuá' dxisö bönnachi ni'. <sup>5</sup> Ní'irö len yöl-la' rilé queë', buyúë' Jesús bönnachi na' nacua' gásibi'ilë'. Ruhuí'innë' tu' nácagaquië' zidi ladxi'. Gudxë' bönni' na' narequi' në'ë, rnnë':

—Bulí no'o.

Ní'irö bulí në'ë bönni' na', ate' böácatë dxí'ado' në'ë. <sup>6</sup> Ní'irö bulu'ruájë' bönni' yudo' fariseo, ate' la' guluntë' tsözxön didza' len bönni' dá'gaquië' Herodes bi ilunë' queë' Jesús, para ilútië' Lë'.

*Tu'dubi bönnachi zían ra' nísado'*

<sup>7</sup> Buzë'ë Jesús ni' tsözxön len bönni' dá'gaquië' Lë', en bidxinë' ra' nísado', ate' sójácálen Lë' bönnachi zían narúajgaca luyú Galilea, en luyú Judea. <sup>8</sup> Bönnachi zían narúajgaca Jerusalén, en luyú Idumea, en ia'tsölá'a yegu Jordán, en yugu' yödzö nacua' idú gásibi'ilö ga nacua' yödzö Tiro, en yödzö Sidón bila'dxín ca' ga zoë' Jesús. Caní gulunë', tu' bila'yönnë' ca nácagaca yugu' le zxön runë' Jesús. <sup>9</sup> Que lë ni na' Jesús gunná bé'enë' bönni' dá'gaquië' Lë' ulu'cöztica'së' tu bárcodo' ga gaca cuenë', para cabí ulu'quí bönnachi zían na' Lë'. <sup>10</sup> Caní guca tu' chibunë' zían nupa te'e, ate' bila'guirö bönnachi zían na' ga zoë' para ila'gán Lë'. <sup>11</sup> Cate' bö' xihui' yú'ugaca bönnachi bila'lë'e Jesús, bulu'dxiga' bönnachi na' yú'ugaca xini'ë Jesús, ate' gula'bödxí'a, ta'nná:

—Nacu' Li' Zxí'inë' Dios.

<sup>12</sup> Jesús buzenë' le bach bö' xihui' na', cabí ila'guixjö' nu náquië' Lë'.

*Riböë' Jesús chinnu bönni' ilácagaquië' gubáz queë'*

(Mt. 10:1-4; Lc. 6:12-16)

<sup>13</sup> Ní'irö gurenë' Jesús tu lu guí'ado', ga ni' bulidzë' nupa rë'ënë'. Gula'biguë'ë bönni' ni gásibi'ilë'. <sup>14</sup> Jesús bucu'ë chinnuë' bönni' ni, para ila'cuá'lenë' Lë', en para isöl-lë'ë légaquië' tsöjéngaqüë' libán. <sup>15</sup> Budödë' lu ná'agaquië' yöl-la' huáca ulu'únë' nupa te'e, en ulu'béajë' bö' xihui' yú'ugaca bönnachi. <sup>16</sup> Caní nácagaca lágaquië':

Simón, (buzóë' Jesús ia'tú lë', Pedro),

<sup>17</sup> Jacobo,

Juan, (bönni' böchë'ë Jacobo, ate' nácagaquië' xzí'inë' Zebedeo. Chopë' ni, Jesús buzóë' ia'tú lágaquië', Boanerges, le rna lu didza' xidza': Bönni' sínia' ca guziú'),

<sup>18</sup> Andrés, Felipe, Bartolomé, Mateo, Tomás,

Jacobo, (xzí'inë' Alfeo),

Tadeo,

Simón, (bönni' ruí'i ladxë'ë yödzo queë'),

<sup>19</sup> Judas Iscariote, (bönni' udödë' Jesús lu ná'agaquië' bönni' ilútië' Lë').

*Yugu' bönni' yudo' ta'nnë': "Tu' xihui' dzaga Jesús"*

*(Mt. 12:22-32; Lc. 11:14-23; 12:10)*

Gudödi ni' Jesús len bönni' dá'gaquië' Lë' bulu'dxinë' tu lu yu'u. <sup>20</sup> Leyúbölö bila'guirö bönachi zían ga zoë' Jesús, ate' bíti'rö guta' lataj bi ilahuë' Jesús, en bönni' ná' dá'gaquië' Lë'. <sup>21</sup> Cate' di'a dza queë' Jesús bila'yönnë' ca raca queë', bila'dxinë' ni' para ulu'ché'ë Lë', ta'nnë': Richixi icjë'.

<sup>22</sup> Lësca' caní bönni' yudo' usedi, narúajgaquië' Jerusalén gula'nnë' queë', ta'nnë':

—Dzaga Belzebú, xángaca bö' xihui' Lë', ate' len yöl-la' unná bë' que rubéajë' yugu' bö' xihui'.

<sup>23</sup> Ní'irö Jesús bulidzë' yugu' bönni' yudo' usedi na', en bucúdzu'ë didza', rnnë':

—¿Naru' ubéaj la' cuinsi Satanás tu' xihui'? <sup>24</sup> Channö ila'rúaj choplö bönachi tu yödzo, en ila'díl-lalen luzé'eguequi, bití' gaca idía' yödzo na'. <sup>25</sup> Lësca' caní channö ila'rúaj choplö bönachi nacuá' tu yu'u, en ila'díl-lalen luzé'eguequi, bití' gaca ila'día' bönachi nacuá' yu'u na'. <sup>26</sup> Que lë ni na', channö Satanás tu' xihui' tá'baga' luzé'e, narúajgaca choplö bö' xihui'. Bití' gaca idía' yöl-la' unná bë' que, pero chizóa údxí que.

<sup>27</sup> 'Cuntu nu gaca tsu'u lidxë' tu bönni' nál-la, en cuéaj yöl-la' tsahui' queë' channö cabí gaga' zí'alö bönni' nál-la na', ate' ní'irö sequí' cuéaj le dzö'ö lidxë'.

<sup>28</sup> 'Le nácate' rea' libí'ili': Dios gaca uniti lahuë' bönachi ca naca yúgu'të dul-la' nabága'gaca, en ca naca yúgu'të didza' schanní' ta'nná, <sup>29</sup> pero núti'tës nu innë' schanní' queë' Dios Bö' Lá'ayi, catu caz uniti lahuë' Dios nu na'. Tsaz nabaga' xíguia' nu na'.

<sup>30</sup> Caní gunné' Jesús tu' ta'nnë' queë' bönni' yudo' usedi na', ta'nnë':

—Tu' xihui' dzaga Lë'.

*Nu naca xinë'ë Jesús, en bönni' böchë'ë*

*(Mt. 12:46-50; Lc. 8:19-21)*

<sup>31</sup> Ní'irö bila'dxinë' yugu' bönni' böchë'ë Jesús, enca' xinë'ë ga zoë'. Gula'cu'ë ló'alö, en gula'sól-lë'ë nu tsöjlidza Jesús. <sup>32</sup> Bönachi zían na' rö'gaca cuitë' Jesús gulë' Lë', ta'nná:

—Yugu' bönni' böchu'u, enca' xinó'o nacu'ë ló'alö, tu'lidzë' Lí'.

<sup>33</sup> Bubi'ë didza' Jesús, gudxë' légaquië':

—¿Nuzxi caz na' xiná'a, en nupxi caz yugu' bönni' böcha'a?

<sup>34</sup> Ní'irö buyúë' nupa na' rö'gaca gásibi'ilë', rnnë':

—Buli'yútsöca'. Nupa ni nácagaca ca xiná'a, en yugu' bönni' böcha'a.

<sup>35</sup> Nu run ca rë'ënë' Dios, nu ni naca ca bi'i böcha'a, en bi'i zana' enca' xiná'a.

## 4

*Rucúdzu'ë didza' Jesús ca naca queë' bönni' guz*  
(Mt. 13:1-9; Lc. 8:4-8)

<sup>1</sup> Leyúbölö gusí lahuë' Jesús rusédinë' bönachi ga naca ra' nísado'. Bulu'dubi bönachi zían ga zoë', ate' gurenë' Jesús tu lë'e bárcodo' zxoá lu nisa na', en gurö'ë ni', ate' yúgu'të bönachi na' gula'cuá' luyú ra' nisa na'.  
<sup>2</sup> Zían le busédinë' Jesús légaquië', bucúdzu'ë didza'. Tsanni ni' rusédinë' légaquië', rnnë':

<sup>3</sup> —Gulí'zë nágali' didza' ni. Birúajë' tu bönni' guz, søjësië' xisedo'.  
<sup>4</sup> Tsanni ni' rúsië', gulasi bal-la xisedo' na' ra' nōza, ate' bila'dxinba' biguinnido', gulé'ajba' le. <sup>5</sup> Gulasi ia'bal-la xisedo' na' ga rō'ö guiōj ga bití' rō'ö yenni' yu. Bayōn gula'lén xisedo' na' tu' cabí rō'ö yenni' yu. <sup>6</sup> Ní'irō cate' gulén gubidza, buquexu' le, ate' gubidxi, tu' cabí nun luí ga rē'. <sup>7</sup> Gulasi ia'bal-la xisedo' na' ga tu'lén lubá yōtsi'. Cate' gula'lén xisedo' na', bulu'lén ca' lubá yōtsi' na', en gula'rōli le, ate' lē na' bēsië' bití' bi bunōdzaj. <sup>8</sup> Gulasi ia'bal-la xisedo' na' ga naca luyú bēbu, ate' gula'zxon, en xitsá' ra' gula'bō'. Bulu'nōdzaj lē na' bēsië'. Tu dxigu' xisedo' na' bēsië' bunōdzaj ia' chí uruá' xisedo' ca'. Ia'tú bunōdzaj ia'tsōnnalaj ca', ate' ia'tú na' bunōdzaj ia'tú gayuá' ca'.

<sup>9</sup> Ní'irō Jesús gudxë' légaquië', rnnë':

—Nu zoa nagui, en riyōni ral-la' uzé nagui.

*Rigu'xjö'ë Jesús bizx que rucúdzu'ë didza'*  
(Mt. 13:10-17; Lc. 8:9-10)

<sup>10</sup> Cate' chibugá'anë' tuzë' Jesús, bila'dxín nupa dá'gaca Lë' ga zoë', nungaca tsōzxōn idxínnutë' bönni' uséda queë', ate' gula'nábinë' Lë' bi sa'yéaj lē na' bucúdzu'ë didza'. <sup>11</sup> Jesús gudxë' légaquië', rnnë':

—Libi'ili' nadéli'li' tséajni'ili' le nagachi' ca rinná bē'ë Dios, pero nupa na' bití' nácagaca tuz len rē'u, ru'ílēna' légaquië' didza' yugu' le rucúdzu'a didza'. <sup>12</sup> Caní runa' para gaca lē na' nazúaj lu guichi lá'ayi, rnna: Ulu'yúë', en bití' ila'lé'enë'.

Ulu'zë nágagaquië', en bití' ila'yéajni'inë'.

Bití' ulu'bí'i ládxi'gaquië' para gaca uniti lahua' légaquië' ca naca dul-la' nabága'gaquië'.

*Rigu'xjö'ë Jesús le bucúdzu'ë didza'*  
(Mt. 13:18-23; Lc. 8:11-15)

<sup>13</sup> Jesús gudxë' ca' yugu' bönni' dá'gaquië' Lë', rnnë':

—¿Naru' cabí réajni'itseli' lē na' bucúdzu'a didza'? ¿Nacxi caz gaca tséajni'ili' ia'zica'rō le ucúdzu'a didza'? <sup>14</sup> Bönni' guz na' náquië' nu ruzé xtídzë'ë Dios.

<sup>15</sup> 'Nácagaca bal-la bönachi ca xisedo' na' gulasi ra' nōza. Ta'yōnnë' xtídzë'ë Dios, en ca ta'yōnisinë' ca', la' za'të Satanás tu' xihui', en rigúa didza' na' bidxín lu icja ládxi'do'gaquië'.

<sup>16</sup> 'Nácagaca ia'bal-la bönachi ca xisedo' na' gulasi ga rō'ö guiōj. Ta'yōnnë' didza' na', ate' len yōl-la' rudzeja quégaquië' ta'zi'ë le. <sup>17</sup> Bití' riyaza icja ládxi'do'gaquië', ate' tu chí'isō ta'dë'ë le. Cate' bi raca quégaquië', o zoa nu ribía ladxí' légaquië' tu' ta'dë'ë didza' na', la' tu'huōatë ládxi'gaquië'.

<sup>18</sup> 'Nácagaca ia'bal-la bönachi ca xisedo' na' gulasi ga na' tu'lén lubá yōtsi'. Ta'yōnnë' didza' na', <sup>19</sup> pero tu'í ládxi'gaquië' le nácagaca que yōdzōlió



ni. Nazí yé'eguequinè tu' nadxí'iguequinè yugu' yöl-la' tsahui', en ta'zè ládxi'gaquiè' yugu' le dè. Ta'yaza icja ládxi'do'gaquiè' yúgu'tè lè ni, en tu'suniti didza' na', para cabí gun dxin lu icja ládxi'do'gaquiè'.

<sup>20</sup> 'Nácagaca ia'bal-la bönachi ca xisedo' na' gulasi ga naca luyú bèbu. Ta'yönnè didza' na', en ta'zí lu ná'agaquiè' le, ate' run dxin lu icja ládxi'do'gaquiè'. Nácagaca bal-la bönachi caní ca xisedo' na' bulu'nödzej ia'chí uruá' huéaj. Nácagaca ia'bal-lè' ca xisedo' na' bulu'nödzej ia'tsónnalaj ca', ate' nácagaca ia'bal-la bönachi ca xisedo' na' bulu'nödzej ia'tú gayuá' ca'.

*Rucúdzu'è didza' Jesús que tu le rigú'u bení*

*(Lc. 8:16-18)*

<sup>21</sup> Jesús gudxè' ca' bönni' dá'gaquiè' Lè', rnnè':

—¿Naru' rigála'ru' guí', ate' rudúsi'ru' le tu guí'ina, o rigú'uru' le zxani le ráti'ru'? Biti' ca' runru' caní. Ruzóaru' guí' ga naca xitsá' ga cu'u bení'.

<sup>22</sup> Yúgu'tè le nagachi' ilá' lahui, ate' yúgu'tè le raca balándo'os ila'rúaj ga liná'. <sup>23</sup> Nu zoa nagui, en riyöni ral-la' uzè nagui.

<sup>24</sup> Gudxè' ca' légaquiè':

—Guli'güí' ládxi'li' le riyönili'. Ca naca le ruríxili', la' leze urixè' Dios queéli', ate' gunnè' queéli' ia'lati'. <sup>25</sup> Nu nazí' le za' que, gu'è que ia'lati', pero nu bití nazí' le, la's dui le dè que, udúa.

*Rucúdzu'è didza' Jesús ca rizxön zxoá' xtila*

<sup>26</sup> Gunnè' ca' Jesús:

—Ca raca ni le rinná bè'è Dios naca ca raca cate' ruchejè' tu bönni' zxoá' xtila lu yu. <sup>27</sup> Chi'i dzö'ölö rásiè', en riyasè' cate' za' rení'. Ta'lén zxoá' xtila na', en ta'zxön, pero bití' nözínè' lè' nacxi raca ta'zxön. <sup>28</sup> La' cuinsi luyú na' ruxön le nadúzgaca luyú na', zí'alö xiyazi, ní'irö za' do que, en tödi na' cuía xui'i nál-la lu do que. <sup>29</sup> Cate' chinal-la xui'i na', la' tséajtè' tsøjchibè' do na' tu' chibidxín dza uzi'è xui'i.

*Rucúdzu'è didza' Jesús ca raca que xisé mostaza*

*(Mt. 13:31-32; Lc. 13:18-19)*

<sup>30</sup> Gunnè' ca' Jesús:

—¿Bizxi caz innaru' ca raca ni le rinná bè'è Dios? ¿Bizxi ucúdzu'ru' didza' ca raca? <sup>31</sup> Raca ca raca que tu xisedo' mostaza. Cate' riyaza luyú naca tu xisedo' nácatèrö cuidí' ca yúgu'tè xisedo' dzö'ö luyú, <sup>32</sup> pero cate' chinadúz, rilén, en rizxöntèrö ca yúgu'tè guixi' cuan rógaca luyú. Tscá run yana' ní'a nè'e, gaca ila'dxinba' biguínido', en ulu'dxiába' xicá'agacaba' lu zxul-la que.

*Ca rugunè' dxin Jesús le rucúdzu'è didza'*

*(Mt. 13:34-35)*

<sup>33</sup> Caní guca, busédinè Jesús légaquiè', en zíanrö ca' le bucúdzu'è didza' tscá guca ila'yéajni'inè'. <sup>34</sup> Yúgu'tè didza' bè'lenè' bönachi bucúdzu'è didza', ate' yúgu'tè didza' ni buchila lá'anè', buzéajni'inè' légacasé' bönni' usèda queè'.

*Jesús ribequi dxíè' bö' budunu'*

*(Mt. 8:23-27; Lc. 8:22-25)*

<sup>35</sup> La' dza ná'asö, cate' ridzö', Jesús gudxè' yugu' bönni' dá'gaquiè' Lè', rnnè':

—Töditsöca'ru' ia'tsölá'a nísado' ni.

<sup>36</sup> Ní'irö bulu'lá'alenë' bönachi zián nacuá' ni', ate' bulu'së'ë bárcodo' ga na' chizóasë' Jesús. Gula'cuá' ca' ni' ia'zica'rö bárcodo' sôjácálen légaquië'.  
<sup>37</sup> Gusí lo recja bö' budunu' lu nisa na', ate' gudá'a nisa lë'e bárcodo' na'. Ca' guca, zeaj ridzá' nisa lë'e bárcodo' na'.<sup>38</sup> Dë' rásië' Jesús lu xicügüë' ga naca xitsá'alö lë'e bárcodo' na', ate' bulu'subanë' Lë'. Të' Lë':

—¡Bönni' Usedi! ¿Naru' cabí ruí'i ládxi'tso' netu'? ¡Huáti caztu' lu nisa ni!

<sup>39</sup> Ní'irö guyasë' Jesús, en gunná bé'enë' bö' na' recja, gunné':

—Gurõ'õ dxi.

Gudxë' ca' nisa na', gunné':

—Dxisö guzóa.

Gurõ'õ dxi bö' na' guyecja, en guzóa dxi lu nísado' na'.<sup>40</sup> Ní'irö Jesús gudxë' yugu' bönni' dá'gaquië' Lë', rnnë':

—¿Bizx que radxi ridzöbili' caní? ¿Naru' cabí réajlë'ëli' Dios?

<sup>41</sup> Ní' tádxinë' gulë' luzë'ë tuë' ia'tué':

—¿Nuzxi caz bönni' ni'? ¡Tun bö' recja, en nísado' ca rna xtídzë'ë!

## 5

*Bönni' Gadara yu'u bö' xihui' lë'*

(Mt. 8:28-34; Lc. 8:26-39)

<sup>1</sup> Ní'irö bila'dxinë' Jesús, en yugu' bönni' dá'gaquië' Lë' ia'tsölá'a nísado' ga naca lu xiyúgaca bönachi Gadara. <sup>2</sup> Cate' burúajë' Jesús lë'e bárcodo' na', tu bönni' rirúajë' zxan bulóaj ga nacuá' yeru ba la' dutságatë' Lë'. Bönni' ni yu'u bö' xihui' lë', <sup>3</sup> ate' nun xilatjë' ga na' nacuá' yeru ba. Cuntu nu guca guga' bönni' na', calëga len du guië'. <sup>4</sup> Zián luzuí bulu'zóë' bregui' guië' yen në'ë, en ni'ë, en gulúgui'ë lë' du guië'. Yugu' du guië' na' bulë'ë, ate' bregui' guië' na' guditsjë'. Biti' rizéqui'në' nu bönni' inná bé'enë' lë'. <sup>5</sup> Ridática'së' ribödxi'ë rëla, en të dza ga na' nacuá' yeru ba, en gapa naca lu guí'ado', run huë' cuinë' yugu' lu guiøj dzõ'õ ní'. <sup>6</sup> Cate' bilë'enë' zë'ë zi'tu' Jesús, guxíti'ë guyijë' ga na' zë'ë, ate' buzóa zxibë' lahuë' Lë'. <sup>7</sup> Bë'ë zidzaj didza', rë' Jesús:

—¿Bizxi ral-la'a quiu' Jesús, Zxí'inë' Dios nayëpisëtë'rë'? Ní'a queë' Xanru' Dios ráta'yua' lo', bití' usaca' zi'u neda'.

<sup>8</sup> Caní gunné' bönni' na' tu' chigudxë' Jesús bö' xihui' na':

—Lí', bö' xihui', burúaj lu bönni' ni.

<sup>9</sup> Jesús gunábinë' le, rnnë':

—¿Bi leu'?

Bubí'i didza' le, gudxi Lë':

—Lea': Le Zián, tu' rõ'õ ziantu'.

<sup>10</sup> Gula'nabi yechi' yugu' bö' xihui' na' Jesús para cabí isöl-lë'ë léguequi zi'tu' luyú ni'. <sup>11</sup> Nacuá'aba' cuchí zián lu guí'ado' ní'sö, ta'daba' táguba' ni'. <sup>12</sup> Gula'nabi yechi' bö' xihui' na' Jesús, ta'nná:

—Gusöl-la' netu' ga ni' dzõ'õba' cuchí zián. Bë' netu' lataj tsöjtsú'ugacatu'-ba'.

<sup>13</sup> La' bë'të' Jesús léguequi lataj, ate' bila'rúaj bö' xihui' na', en yöjtsú'ugaca cuchí zián na', ate' gula'xíti'ba' cuchí zián na', yöjbíxigacaba' ga naca ra' guí'a, yöjcházagacaba' nísado'. Lu nísado' na' gula'yëpiba' nisa, galátiba', en nácacacaba' ca galaj gayuá'aba'.

<sup>14</sup> Ní'irö bulu'zxunnaj nupa ni' gulún chi'i cuchí zián na'. Yöjtíxjöi'iguequinë' bönachi lu yödzo ni', enca' bönachi nacuá' la' guixi' ni'. Bila'rúaj bönachi lu yödzo, söjyúgaquië' bizxi na' guca ni'. <sup>15</sup> Cate'

bila'dxinë' ga ni' zoë' Jesús, bila'lé'enë' bönni' na' zí'alö yú'ugaca bö' xihui' lë'. Bönni' ni rö'ë ni', nácuë' lari', en zoë' dxí'ado', ate' guladxi bönachi na'. <sup>16</sup> Nupa na' bila'lé'e le benë' Jesús gula'guíxjö'i bönachi na' bila'rúaj lu yödzo ca na' guca queë' bönni' na' zí'alö yú'ugaca bö' xihui' lë', enca' ca guca quégacaba' cuchi na'. <sup>17</sup> Ní'irö gula'sí lógaca bönachi zían na' ta'ta'yu lahuë' Jesús urúajë' lu xiyúguequi.

<sup>18</sup> Cate' bubenë' Jesús lë'e bárcodo', bönni' na' zí'alö yú'ugaca bö' xihui' zían lë', gúta'yuë' lahuë' Jesús gu'ë lë' lataj tséajlenë' Lë'. <sup>19</sup> Jesús biti' bë'ë lë' lataj, pero gudxë' lë':

—Böaj lidxu'. Yöjtíxjö'i di'a dza quiu' yugu' le zxön bena' quiu' neda', naca' Xanu', en ca bena' buéchi ládxa'a li'.

<sup>20</sup> Söhuöjé' bönni' na', en ruzé' didza' yugu' yödzo Decápolis ca nácgaca le zxön benë' Jesús queë', ate' bulu'bani yúgu'të bönachi nacua' yugu' yödzo ni'.

*Bi'i nigula queë' Jairo, en nigula na' gudannu lari' nácuë' Jesús  
(Mt. 9:18-26; Lc. 8:40-56)*

<sup>21</sup> Cate' budxinë' Jesús ia'tsólá'a nísado' na', ní'irö bulu'dubi bönachi zían ga na' zoë' ra' nísado'. <sup>22</sup> Bönni' lë' Jairo, bönni' rinná bë'ë lu yu'u ga tu'dubë' bönni' judío, en nazëdë' queë' Dios, bidë' ga zoë' Jesús. Cate' bilé'enë' Jesús, buzóa zxibë' lahuë', <sup>23</sup> en gúta'yuë' lahuë', rnnë':

—Chiraqui gátibi' bi'i nigúlado' quia'. Gudá ixóa no'o lëbi' para huóacabi', en biti' gátibi'.

<sup>24</sup> Sa'yéajlenë' Jesús lë', ate' bönachi zían söjácalen Jesús, tu'quirö Lë'. <sup>25</sup> Tu nigula, chinaca chinnu iz ré'enu, zóanu ca' ni'. Biti' ruhuí'i rön queënu que huë' quégaca cázanu nigula. <sup>26</sup> Yenni' chigudí'i guzxáca'nu lu ná'agaquië' zían bönni' tu'ünë' bönachi. Nítisö chibutönu dëra le dë queënu, tu' cabí bi' gúcalen lënu, pero riyali' queënu. <sup>27</sup> Cate' biyöninu tuí'i didza' bönachi ca naca queë' Jesús, gudödinu ládjalö bönachi zían na', en bidxinnu zaca' cúdzu'lë' Jesús, en gudannu lari' nácuë'. <sup>28</sup> Caní bennu tu' rnnanu: "Channö cansa' le nácuë', huóaca'." <sup>29</sup> La' buí'të rön queënu, ate' réquibe'enu chibóacanu que le guca queënu.

<sup>30</sup> La' gúquibe'etenë' Jesús ben dxin yöl-la' huáca queë', ate' buécjë', ruyüë' bönachi zían na'. Rnnë':

—¿Nuzxi na' gudán neda'?

<sup>31</sup> Ní'irö bönni' dá'gaquië' Lë' të' Lë', ta'nnë':

—Rilé'e quézínu' bönachi zían ni tu'quirö Li', en rnnatso: "¿Nuzxi na' gudán neda'?"

<sup>32</sup> Ruyüë' Jesús gásibi'ilë' para ilé'enë' nuzxi na' gudán Lë'. <sup>33</sup> Ní'irö nigula na' gubíga'nu lahuë'. Rádxinu, en rizxízinu tu' chinözinu bi na' guca queënu, ate' buzóa zxíbinu lahuë' Jesús, en gúdxinu Lë' idütë le nácatë.

<sup>34</sup> Jesús rë'ë-nu:

—Nigúlado'. Chibóácu' tu' réajlë'u neda'. Böaj lidxu' idú ládXu'u. Tsaz nuhuóácu' que le guca quiu'.

<sup>35</sup> Tsanni ni' ru'ë caní didza' Jesús, bönni' narúajgaquië' lidxë' bönni' na' rinná bë'ë lu yu'u ga tu'dubë' tu'sëdë' queë' Dios bila'dxnë' ni', en të' bönni' na':

—Chigútibi' bi'i nigúlado' quiu'. Bítirö upízxjanu' Bönni' Usedi.

<sup>36</sup> Biti' bë' ládXë'ë Jesús lë' na' ta'nnë', ate' gudxë' bönni' unná bë' na', rnnë':

—Biti' gádxinu'. Guyéajlë'ësë' Dios.

<sup>37</sup> Biti' bë'ë lataj Jesús tsöjácalen Lë' ia'zica'rö bönachi, pero léguasë Pedro, en Jacobo, en Juan, böchë'ë Jacobo na'. <sup>38</sup> Cate' bidxinë' lidxë' bönni' na' rinná bë'ë ga tu'dubë' tu'sédë' queë' Dios, bilé'enë' raca dzatsa, enca' nupa ni' ta'bödxi, en nupa ta'bödxi yechi'. <sup>39</sup> Guyázië' Jesús, en gudxë' légaquië':

—¿Bizx que rutsátsali', en ribödxi' caní? Biti' nátibi' bi'i nigúlado' ni. Rásisibi' na'.

<sup>40</sup> Ní'irö bulu'titjë' Jesús, pero Lë' bubéajë' yúgu'të bönachi na' n'ílö, ate' guchë'ë xuz xiná'abi' bi'i nigúlado' na', enca' nupa nacuá'len Lë', ate' guyázië' ga na' dëbi'. <sup>41</sup> Gudélë'ë ná'abi' bi'i nigúlado' na', en gudxë'-bi':

—Talita, cumi.

Didza' hebreo ni rna lu didza' xidza': Bi'i nigúlado', guyasa. <sup>42</sup> La' guyásatëbi' bi'i nigúlado' na', en buzé'ebi'. Chiyú'ubi' chinnu iz. Bulu'bani nupa nacuá' ni'. <sup>43</sup> Ní'irö Jesús gunná bé'enë' légaquië' cuntu nu ulu'siyönnë' lë na' guca. Gudxë' légaquië':

—Guli'gü' le gágubi' bi'i nigúlado' ni.

## 6

*Ridxinë' Jesús Nazaret, le naca ladzë'*

(Mt. 13:53-58; Lc. 4:16-30)

<sup>1</sup> Buzë'ë Jesús ni', budxinë' ladzë', ate' yugu' bönni' dá'gaquië' Lë' söjácalenë' Lë'. <sup>2</sup> Cate' bidxín dza lá'ayi quégaquië' bönni' judío, gusí lahuë' Jesús rusédinë' bönachi ga na' tu'dubë' tu'sédë' queë' Dios. Gula'cuá' bönachi zian' ni' ta'yöni Lë'. Bulu'bani, ta'nná:

—¿Gazxi caz bizédë' bönni' ni yugu' lë ni? ¿Bizxi caz yöl-la' réajni'i ni nadéli'në'? ¿Nacxi caz runë' le nácagaca bë' na' zá'gaca yehua' yubá? <sup>3</sup> Náquië' bönni' ni gubëdxi yaga na', en xzí'ininu María. Náquië' böchi'gaquië' Jacobo, en José, en Judas, en Simón. Nigula zanë' nacuá'lennu ca' rë'u.

Que lë ni na' bulu'cá'anë' Lë' cá'asö. <sup>4</sup> Ní'irö Jesús gudxë' légaquië', rnnë':

—Gáti'tës tunë' bal nu bönni' ru'ë didza' uláz queë' Dios, pero bönachi uláz queë', en bönachi di'a dza queë', en bönachi nacuá' lidxë' biti' tun lë' bal.

<sup>5</sup> Que lë ni na' biti' guca gunë' Jesús nitú yöl-la' huáca zxön ni'. Bunsë' nabábasö bönachi te'e cate' guxóa në'ë léguequi. <sup>6</sup> Bubáninë' Jesús tu' cabí ta'yéajlë' Lë'. Gudödi na' gudödë' yugu' yödzödo' nacuá' gásibi'ílö, rusédinë' bönachi ni'.

*Risöl-lë'ë Jesús bönni' dá'gaquië' Lë' tsöjéngaquië' libán*

(Mt. 10:5-15; Lc. 9:1-6)

<sup>7</sup> Ní'irö bulidzë' Jesús idxínnutë' bönni' dá'gaquië' Lë', en gusí lahuë' risöl-lë'ë légaquië' chopa huéajgaquië'. Budödë' lu ná'agaquië' yöl-la' unná bë' ulu'béajë' yugu' bö' xihui' yú'ugaca bönachi. <sup>8</sup> Gunná bé'enë' légaquië' biti' bi' ilu'ë la' nöza, calëga yöxaj, calëga yöta, en calëga dumí biti' ila'gu'ë lu buzudi quégaquië', pero iluá'asë' xiyágado'. <sup>9</sup> Ral-la' ulu'dë'ë xiráchugaquië', pero calëga chopa lari' ulu'xóa yéngaquië'. <sup>10</sup> Gudxë' ca' légaquië':

—Gáti'tës ga tsú'uli' tu yu'u, guli'sóa yu'u na' cate' uzá'aröli' yödzö na'. <sup>11</sup> Channö tsú'uli' tu yödzö ga biti' ilún bönachi lu yödzö na' libí'ili' bal, en biti' ulu'zë' nágagaquië' xtídza'li', buli'rúaj ni', en buli'quínnaj bëchtö da' lë'e lálali'. Lë ni gaca bë' nabága'gaquië' xíguia'. Le nácatë' rea' libí'ili',

cate' idxín dza ichúguie' Dios quégaca bönachi, ila'gu'i ila'záca'rö bönachi lu yödzö na' ca ila'gu'i ila'záca' bönachi Sodoma, en Gomorra, yugu' yödzö na' busunítié' Dios.

<sup>12</sup> Ní'irö bila'ruájé' bönni' dá'gaquié' Lè', yöjéngaquié' libán ca ral-la' ulu'bí'i ládxi'gaca bönachi. <sup>13</sup> Bulu'béajé' zían bō' xihui' yú'ugaca bönachi. Gula'gu'è le za zían nupa te'e, ate' bulu'huóáquié'.

*Ca bétigaquié' Juan, bönni' buquilé' bönachi nisa*  
(Mt. 14:1-12; Lc. 9:7-9)

<sup>14</sup> Biyönné' Herodes, bönni' unná bē', ca naca le runé' Jesús, tu' rizé didza' gátitēs que yöl-la' huáca queé'. Bal-la bönachi ta'nná:

—Chibubanē' Juan, bönni' ni' buquilé' bönachi nisa, lu yöl-la' guti. Que lè ni na' napé' yöl-la' huáca runé' yugu' lè ni.

<sup>15</sup> Ia'bal-la bönachi ta'nná:

—Naquié' Elías, bönni' bē'è didza' uláz queé' Dios dza ni'te.

Ia'bal-la bönachi ta'nná:

—Naquié' bönni' ru'è didza' uláz queé' Dios ca guláquié' bönni' gulu'è didza' uláz queé' dza ni'te.

<sup>16</sup> Cate' biyönné' Herodes yugu' lè ni, gunné':

—Naquié' Juan, bönni' na' burixa' yené'. Chibubanē' lu yöl-la' guti.

<sup>17</sup> Caní gunné' Herodes tu' gusöl-lé'è lè cazé' bönni' yöjxöngaquié' Juan na', ate' gulúgu'è lè' du guié lu yu'u lidxi guié. Caní bené' Herodes tu' rilenu Herodías Juan na'. Nácanu nigula na' gúcanu nigula queé' Felipe, bōchē'è Herodes na'. Herodes gudúé'-nu Herodías na', en butsga ná'alénē'-nu. <sup>18</sup> Juan na' gudxé' Herodes:

—Biti' ral-la' sóalenu'-nu nigula queé' bōchu'u.

<sup>19</sup> Que lè ni na' gusí gurō'önu Herodías. Gú'uninu bi gunnu queé' Juan, tu' gú'uninu gútinu lè', pero biti' bi guzxéqui'nu <sup>20</sup> tu' rádxiñé' Herodes Juan. Nōziné' náquié' Juan na' tsahui', en lá'ayi. Que lè ni na' gudapa chi'è lè', en buzé náguié' lè' idú ládxi'è sal-la' lè na' rnné' Juan ben ga gurō'è böniga Herodes na'. <sup>21</sup> Ní'irö bidxín tu dza guzxéqui'nu Herodías na', le naca dza runé' Herodes laní que dza guyé'ené' iz. Bupé'è le ilé'aj ilahué' bönni' dè lu ná'agaquié' uláz queé', en bönni' ta'nná bé'ené' bönni' rōjáquié' gudil-la, enca' bönni' nácagaquié' lo luyú Galilea. <sup>22</sup> Guyázabi' bi'i nigula queénu Herodías ga na' tē'aj tahué', en buyá'abi' lógaquié'. Guyaza ládxi'è Herodes ca runbi', en gula'yaza ládxi'gaca ca' nupa tē'aj tágulen lè'. Ní'irö Herodes gudxé'-bi' bi'i nigula na', gunné':

—Gunaba bi ré'ènu' gunna' quiu', ate' guna' ca'.

<sup>23</sup> Bené' tsutsu xtídzé'è, gudxé'-bi':

—Ní'a queé' Xanru' Dios gunna' quiu' bíti'tēs bi inabu' ga idxinté gatsaj ga rinná bē'a.

<sup>24</sup> Burúajbi' lèbi', ate' gunábabi' xiná'abi':

—¿Bizxi inábatsa'?

Lènu gúdxinu-bi':

—Icjé' Juan, bönni' buquilé' bönachi nisa, inabu'.

<sup>25</sup> La' buázatēbi' ga na' zoé' Herodes, en rēbi'-nē':

—Rē'ènda' ixú' quia' na'a lu zxiga' zxön icjé' Juan, bönni' na' buquilé' bönachi nisa.

<sup>26</sup> Ní'irö bu'inné' Herodes, pero tu' buzötjé' Dios, en tu' bila'yöni ca' nupa tágulen lè', bití' gú'unné' iníti xtídzé'è na' guzxi' lu nē'è queébi'.

<sup>27</sup> Herodes la' gusöl-la'tè' tu bönni' rejé' gudil-la zoé' rapa chi'è, ate' gunná

bé'enë' lë' tsöjxi'ë icjé' Juan. <sup>28</sup> Bönni' na' rejé' gudil-la guyijé' lidxi guié, yöjrixé' yen Juan na', ate' bu'ë icjé', nuxóé' le tu lu zxiga' zxon. Budödë' le lu ná'abi' bi'í nigula na', ate' lëbi' bunödzejabi' le queënu xiná'abi'.

<sup>29</sup> Cate' bönni' dá'gaquié' Juan na' bila'yönné' didza' chiguca lë na', bila'dxiné' ni', en bulu'ú'ë lë', ate' yöjčachi'gaquié' lë' yeru ba.

*Rugahuë' Jesús zianró ca chi-un gayuá' bönachi*  
(Mt. 14:13-21; Lc. 9:10-17; Jn. 6:1-14)

<sup>30</sup> Gudödi ni' bulu'dubë' bönni' gubáz queë' Jesús ga zoë', en gula'guixjoi'iné' Lë' yúgu'të le guluné', en yugu' le bulu'sédiné' bönachi. <sup>31</sup> Nacuá' bönachi zian ni', nupa zá'gaca, en nupa sōjaca, ga bidxintë' bítirō dë lataj ilahuë' Jesús, en yugu' bönni' dá'gaquié' Lë'. Que lë ni na' Jesús gudxë' légaquié', rnnë':

—Guli'dá. Uyéaj cázaru' ga naca lataj cá'asö, en uzi' láchxi'ru' tu chí'i.

<sup>32</sup> La' légacasë' yöjáquié' tu lë'e bárcodo', ate' bila'dxiné' tu lataj cá'asö. <sup>33</sup> Bila'lë'e bönachi zian légaquié' sōjáquié' ni', en núnbë'gaca Jesús. Que lë ni na' bönni' yúgu'të yödzö ni' carelō yöjáquié' ni'. Gula'zë'e ní'agaquié', ate' bila'dxiné' ni' zí'atëlō ca Jesús, en yugu' bönni' dá'gaquié' Lë'. <sup>34</sup> Cate' burúajé' Jesús lë'e bárcodo' na', bilé'ené' bönachi zian na', ate' buéchi' láchxë'ë légaquié' tu' nácagaquié' ca bö'cu' zxila'do' bití' zoa nu gapa chí'i légacaba'. Gusí lahuë' rusédiné' légaquié' le zian. <sup>35</sup> Cate' chiridzō' dza na', yugu' bönni' dá'gaquié' Jesús bila'dxiné' ga zoë', en tē' Lë':

—Chiridzō', ate' lataj cá'asö naca ni. <sup>36</sup> Busöl-la' bönachi zian ni para tsōjaca yugu' yú'udo', en yugu' yödzōdo' nacua' gásibi'ilō, tsōjō'ugaca yōta, tu' cabí bi dë ni le ilagu.

<sup>37</sup> Bubi'ë didza' Jesús, gudxë' légaquié':

—Guli'gü' lib'í cázali' le ilahuë'.

Gulé' Lë':

—¿Naru' tsōjō'utsatu' yōta xtila len láchxjatu' que idú xunu' beo', ate' gú'itu' le ilahuë'?

<sup>38</sup> Jesús gudxë' légaquié':

—¿Bal-laxi yōta xtila dë queéli'? Guli'tsōjyútsōca'.

Cate' chinóziguequiné', tē' Lë':

—Gáyu'sō yōta xtila dë, en chópasōba' bōla dēba'.

<sup>39</sup> Ní'irō gunná bē'ë Jesús iluné' ga ila'bō' bönachi zian na', ila'cuá' tu cō' huéajguequi ga naca lachi' lu daca'. <sup>40</sup> Gula'cu'ë tu cō' huéajgaquié', tu gayuá' huéajgaquié', en chi-un huéajgaquié'. <sup>41</sup> Ní'irō gudélë'ë Jesús igáyu'të yōta xtila na', en irópaba' bōla na'. Buyúé' zaca' lúzxiba, en gudxë' Dios: “Xclenu'.” Ní'irō buzzuzxjé' yōta xtila na', en bē'ë quégaquié' bönni' uséda queë' para ila'guisié' quégaca bönachi zian na'. Gudísié' ca' irópatēba' bōla na' quégaca yúgu'të bönachi na'. <sup>42</sup> Gulahuë' yúgu'të', en bulu'huóljané'. <sup>43</sup> Ní'irō bulu'tubé' le bizxaj que yōta xtila na', en quégacaba' bōla, ate' chinnu ga'bōra bulu'lié'. <sup>44</sup> Guláquié' ca chi-un gáyu'ë bönni' na' gulahuë'.

*Rizë'e ni'ë Jesús lu nísado'*  
(Mt. 14:22-27; Jn. 6:16-21)

<sup>45</sup> La' bentë' Jesús ga gula'bené' yugu' bönni' dá'gaquié' Lë' lë'e bárcodo', para ila'nōrué' lahuë', ila'dödë' lu nísado' na', para ila'dxiné' lu yödzö Betsaida, tsanni ni' Lë' rusöl-lë' bönachi zian na' lídxiguequi. <sup>46</sup> Cate' chibudxi busöl-lë' légaquié', guyijé' tu lu gu'ado', ate' ní' ru'ilené' Dios

didza'. <sup>47</sup> Cate' chizá' ral-la, zeaj bárcodo' na' gatsaj láhui'ló nísado', ate' zoë' Jesús tuzë' luyú bidxi na'. <sup>48</sup> Bilé'enë' Jesús légaquië', böniga tu'sé'ë bárcodo' na' tu' recja bö' za' ga na' ta'dödë'. Gudödi guluhuëla bidxinë' Jesús ga na' nacu'ë, rizë'e ni'ë lu nísado' na', ate' gú'unnë' tödisë' ga na' nacu'ë. <sup>49</sup> Cate' bila'lé'enë' Lë' rizë'e ni'ë lu nísado', guléquinë' bixín na', ate' gula'bödxi'ë <sup>50</sup> tu' bila'lé'enë' yúgu'të' Lë', en guladxi gula'dzöbinë'. Ní'iró la' bulidztë' Jesús légaquië', rnnë':

—Buli'tipa ládxi'li'. Neda' caz. Biti' gádxili'.

<sup>51</sup> Gurenë' Jesús lë'e bárcodo' ga na' nacu'ë, ate' gurö'ö dxi bö' na' recja, ate' légaquië' gula'niti gula'tíqui'sinë' bulu'bábinë'. <sup>52</sup> Biti' ta'yéajni'ininë' le rulu'i lë na' benë' Jesús que yöta xtila na'. Ni' naca zidi icja ládxi'do'gaquië'.

*Ruúnë' Jesús nupa te'e lu yödzo Genesaret*  
(Mt. 14:34-36)

<sup>53</sup> Gula'dödë' Jesús, en yugu' bönni' dá'gaquië' Lë' ia'tsólá'a nísado', ate' bila'dxinë' ga naca lu xiyúgaca bönachi Genesaret. Bulu'dxiguë'ë bárcodo' luyú bidxi ni'. <sup>54</sup> Cate' bulu'rúajë' lë'e bárcodo' na', la' bulu'únbë'të bönachi ni' Jesús. <sup>55</sup> Gula'xiti' bönachi na', yójaca yúgu'të yödzo'do' idú gásibi'ilö, en gula'sí lógaquië' dujuá'agaquië' yúgu'të nupa te'e ga zoë' Jesús, zxóagaca yugu' le déguequini, ate' bila'dxinë' gáti'tës ta'yönnë' zoë' Jesús. <sup>56</sup> Gáti'tës ga ridödë' Jesús, yugu' lu yödzo'do', en yugu' yödzo' zxön, en yugu' yú'udo', tu'cu'ë nupa te'e quégaquië' gapa naca la' nöza, en gapa naca lu yé'ëyi, en ta'tá'yue' lahuë' Jesús gu'ë légaquië' lataj ila'gansë' luzxi lari' nácuë'. Yúgu'të nupa na' bila'gán lari' nácuë' bulu'huóacatë dxi'ado'.

## 7

*Le tun ga biti' nácaqaca bönachi tsahui' lahuë' Dios*  
(Mt. 15:1-20)

<sup>1</sup> Ní'iró bal-lë' bönni' yudo' fariseo len bal-lë' bönni' yudo' usedi narúajgaquië' Jerusalén, bulu'dubë' ga zoë' Jesús. <sup>2</sup> Bönni' yudo' ni bila'lé'enë' bönni' usëda queë' Jesús tahuë' yöta, biti' nuchí'agaquië' ná'agaquië', lë na' rna: Biti' nayárigaca ca nalëbiguequinë' tunë' bönni' yudo' na'. Que lë ni na' gula'nnë' quégaquië'. <sup>3</sup> Yugu' bönni' yudo' fariseo na', en ia'zica'rö bönachi judío tunë' ca gulëbiguequinë' gulunë' xuz xtó'ogaquië', ate' channö cabí ta'guíbi ná'agaquië' zían luzuí ca na' nalëbiguequinë' tunë', biti' ca' tahuë'. <sup>4</sup> Cate' tu'dxinë' röjõ'ugaquië' lu yé'ëyi, channö cabí ta'guibë' lë na' ca nalëbiguequinë' tunë', biti' ca' tahuë'. Zíanrö ca' tunë', yugu' le nalëbiguequinë' tunë'. Caní ta'guibë' zxiga' yõ'öna, en yugu' zxiga' guíë, en yugu' le táti'në'. <sup>5</sup> Que lë ni na' yugu' bönni' yudo' fariseo, en yugu' bönni' yudo' usedi gula'nábinë' Jesús, ta'nnë':

—¿Naru' cabí tunë' yugu' bönni' usëda quiu' ca gulëbiguequinë' gulunë' xuz xtó'oru', pero tahuë' yöta biti' nuchí'agaquië' ná'agaquië'?

<sup>6</sup> Bubi'ë didza' Jesús, rë' légaquië':

—Libi'ili', bönni' rulu'isö tsahui' cuinli'. Nácatë le gudíxjö'ë Isaías, bönni' ni' bë'ë didza' uláz queë' Dios, ca naca queëli'. Buzúajë' lu guichi, gunnë':

Yugu' bönni' ni, len rú'agacasë' tunë' neda' bal, calëga idú ládxi'gaquië'.

<sup>7</sup> Níti'sö naca yöl-la' ba ta'gu'ë neda'

tu' tu'sēdinē' le ta'nná bē' bōnachi,  
calēga xibá quia'.

<sup>8</sup> Caní naca, tu' rucá'anali' le gunná bē'ē Dios, ate' runli' yugu' le nazi' lāhuili' lu ná'agaca bōnachi.

<sup>9</sup> Gudxē' ca' légaquiē':

—Idú lādxi'li' rucá'anali' cá'asō le gunná bē'ē Dios para gunli' ca naca le nulaga loli' runli'. <sup>10</sup> Moisés gunnē' caní: “Ben bal xuz xinó'o.” Gunnē' ca': “Nu ulidza zi' xuzi o xinē'e, guli'gútité nu na'.” <sup>11-12</sup> Libí'ili' rnnali' caní: “Channō nu bōnni' guié' xuzē' o xinē'ē: Biti' gaca bi gunna' queēli', tu' naca Corbán.” (Didza' ni rna lu didza' xidza': Tu' nuzōa' quez queē' Dios yúgu'tē.) Ní'irō rnnali': “Biti' run bayudxi bi gunē' bōnni' na' quegaquiē' xuz xinē'ē.” <sup>13</sup> Caní naca, rucá'anali' cá'asō xtídzē'ē Dios para gunli' le nulaga loli' runli', yugu' le rudōdili' lu ná'agaca zxi'ini xi'sóali'. Ziánrō ca' le caní runli'.

<sup>14</sup> Ní'irō Jesús bulidzē' bōnni' zían na' nacu'ē ni', en rē' légaquiē':

—Gulizē' nágali' didza' gu'a, yúgu'tēli', en guli'tséajni'i. <sup>15</sup> Biti' bi dē le riyaza nu bōnni' le gaca gun ga bití' náquiē' tsahui' lahuē' Dios, pero le rirúaj lē', lē ni gaca gun ga bití' náquiē' tsahui' lahuē' Dios. <sup>16</sup> Channō zoa nágali', en riyōnili', bulizē' nágali'.

<sup>17</sup> Cate' Jesús bulá'alenē' bōnachi zían na', guyu'ē tu yu'u, ate' yugu' bōnni' usēda queē' gula'nábinē' Lē' ca naca lē na' bucúdu'ē didza'. <sup>18</sup> Jesús gudxē' légaquiē':

—¿Riyádzjatsō ca' queēli' yōl-la' réajni'i? ¿Naru' cabí réajni'ili', yúgu'tē le riyaza nu bōnni', bití' gaca gun ga bití' náquiē' tsahui' lahuē' Dios? <sup>19</sup> Naca caní tu' cabí riyaza icja lādxi'da'ahuē', pero lē'ēsē' riyaza, ate' rurúaj lē'ē.

Tu' gunnē' caní Jesús, buluí'inē' rē'u naca dxi'a yúgu'tē le rē'aj ráguru'. <sup>20</sup> Gunnē' ca' Jesús:

—Le rirúaj lu bōnni' run ga bití' náquiē' tsahui' lahuē' Dios. <sup>21</sup> Caní naca, tu' ta'rúaj icja lādxi'do'gaquiē' bōnni' yugu' le ta'zá' lādxi'gaquiē' le naca xihui', yugu' le tun ga tunē' dul-la' ta'guitsjē' xibá que yōl-la' nutsaga na', en yugu' le ruá' dō'. Tun ga tútiē' bōnachi, <sup>22</sup> en ta'banē', en ta'zē' lādxi'gaquiē' le dē que luzá'agaquiē', en tu'ē dō', en ta'zí' yē'ē, en tu'zxē'ē, en ta'nná zi'ē que luzá'agaquiē', en tun ba zxōn cúngaquiē', en tunē' le canōz. <sup>23</sup> Yúgu'tē le xihui' caní ta'rúaj icja lādxi'da'ahuē' nu bōnni', en tun ga bití' náquiē' tsahui' lahuē' Dios.

*Tu nigula izá'a réajlē'ēnu Jesús*

*(Mt. 15:21-28)*

<sup>24</sup> Buzē'ē Jesús ni', ate' bidxinē' gala' ga nacuá' yōdzō Tiro, en yōdzō Sidón. Guyáziē' tu yu'u ni', en gú'unnē' cuntu nu inōzi, pero bití' ca' guca ucachi' cuinē'. <sup>25</sup> Tu nigula zóabi' bi'i nigúlado' queēnu, yu'u bō' xihui' lēbi', biyōninu didza' rizē ca naca queē' Jesús, ate' la' bídatēnu ga zoē' Jesús, en buzóa zxfbinu xini'ē. <sup>26</sup> Nigula ni bití' nácanu judío, pero nabábanu bōnachi Sirofenicia. Gúta'yunu lahuē' Jesús ubéajē' bō' xihui' na' yu'u-bi' bi'i nigúlado' queēnu. <sup>27</sup> Ní'irō Jesús gudxē'-nu, rnnē':

—Bē' lataj ulu'huōlaj zí'alō nupa náca'gaca ca zxi'ini xan yu'u, tu' cabí naca dxi'a ugúaru' yōta quegacabi' bi'i na', en chú'unaru' le lógacaba' bō'cu'do'.

<sup>28</sup> Bubi'inu didza' nigula na', gúdxinu Jesús:

—Ōn, Xan, pero yugu' bō'cu'do' nacuá'aba' zxani ga tágubi', táguba' le bizzaj tu'huóxaj ga na' tágubi'.



<sup>29</sup> Ní'irö Jesús gudxë'-nu, rnnë':

—Tu' gunnó' caní, huáca huóaju'. Chiburúaj bö' xihui' na' guyú'u-bi' bi'i nigúlado' quiu'.

<sup>30</sup> Cate' budxinnu lídxinu, bilé'enu-bi' bi'i nigúlado' queénu na', dëbi' lu da'a, en chinurúaj bö' xihui' na' guyú'u lëbi'.

*Jesús ruúnë' tu bönni' nacödzuë', en biti' gaca innë'*

<sup>31</sup> Burúajë' Jesús lataj na' nababa yödzo Tiro, ate' gudödë' gapa dë yödzo Sidón, en yugu' yödzo Decápolis, ate' bidxinë' ra' nísado' lu xiyú Galilea. <sup>32</sup> Bönnachi ni' dujuá'gaca tuë' bönni' nacödzuë', en biti' raca innë' ga zoë' Jesús, ate' ta'ta'yu lahuë' Jesús ixóa në'ë' lë'. <sup>33</sup> Jesús bubéajë' lë' tsólá'aló ladjagaca bönnachi na', ate' bunë'ë' xibón në'ë' yeru náguië' bönni' na'. Gurú'unë' zxóna'do', en gudanë' lúdxë'ë. <sup>34</sup> Ní'irö buyúé' lúzxibálö, en gunné' lúdxë'ë, rnnë':

—Efata.

Didza' hebreo ni rnna lu didza' xidza': Guyalaj.

<sup>35</sup> La' böáljatë' náguië', en la' bugúitjatë' lúdxë'ë, en gunnëtë' dxí'ado'. <sup>36</sup> Jesús gunná bé'enë' légaquië' cuntu nu ilë' ca', pero tsca gunná bé'enë' légaquië', bulu'zëtërë' ca' didza' que lë na' benë'. <sup>37</sup> Bulu'bánnë', ta'nnë':

—Táshui'do' runë' yúgu'të. Runë' ga tu'yöni nupa gulaca cödzu, en ga tuí'i didza' nupa biti' guca ila'nnë.

## 8

*Rugahuë' Jesús zíanró ca choá' gayuá' bönnachi*

(Mt. 15:32-39)

<sup>1</sup> Yugu' dza na' bulu'dubi bönnachi zían ga zoë' Jesús. Tu' cabí dë le ilágugaca, Jesús bulidzë' bönni' usëda queë', ate' bé'lenë' légaquië' didza'.

<sup>2</sup> Gudxë' légaquië':

—Ruhuechí' ládxa'a bönnachi zían ni tu' chinaca tsonna dza nacuá'len neda' ni, en biti' dë le ilágugaca. <sup>3</sup> Channó usól-la'a léguequi lídxigaca ta'dunsó ca', huala'cuídi' la' nóza, tu' zá'gaca zi'tu' bál-lagaca.

<sup>4</sup> Bulu'bi'ë didza' bönni' usëda queë', të' Lë':

—¿Bizxi ugágutsaru' bönnachi guizxi yu ni, ga ni naca lataj cá'asó?

<sup>5</sup> Gunánnë' Jesús légaquië', rnnë':

—¿Bál-laxi yöta xtila dë queéli'?

Të' Lë':

—Gádxisö.

<sup>6</sup> Ní'irö Jesús gunná bé'enë' bönnachi zían na' ila'bó' lu yu. Gudéléë' gadxi yöta xtila na', ate' gudxë' Dios: "Xclenu'." Ní'irö buzxuxjé' léguequi, en bë'ë' quégaquië' bönni' usëda queë' para ila'guísië' lógaca bönnachi zían na'. <sup>7</sup> Guta' ca' quégaquië' tu chópaba' böla cuídi'. Jesús gudxë' Dios: "Xclenu'", ate' gunná bé'enë' légaquië' ila'guísië' ca' légacaba' lógaca bönnachi. <sup>8</sup> Gulagu yúgu'të bönnachi na', en bulu'huólaj. Ní'irö bulu'tubë' le bizxaj nagá'anagaca, ate' gula'lí idú gadxi ga'bóra. <sup>9</sup> Bönnachi na' gulagu gulaca idú ca choá' gayuá'gaca. Jesús busól-lë' léguequi lídxigaca, <sup>10</sup> ate' gurenë' lë'e bárcodo' tsözxón len yugu' bönni' usëda queë', ate' bila'dxinë' lu xiyúgaca bönnachi Dalmanuta.

*Ta'nánnë' Jesús gunë' tu le gaca bë' nuzxi náquië'*

(Mt. 16:1-4; Lc. 12:54-56)

<sup>11</sup> Ní'irö bila'dxinë' bönni' yudo' fariseo ga zoë' Jesús, en gula'sí lógachië' ta'díl-lalenë' Lë' didza'. Gulë'ënnë' ila'zì' bë'ë' Jesús. Que lë ni na'

gula'nábinë' Lë' gunë' tu le naca bë' za' yehua' yubá. <sup>12</sup> Gunnëda' ládxe'ë Jesús, rnnë':

—¿Bizx que ta'nábitsö bönachi ni neda' guna' tu le naca bë' za' yehua' yubá? Le nácatë rea' libí'ili', bití' ca' ilé'eli' tu le naca bë' za' yehua' yubá.

<sup>13</sup> Ní'irö bulá'alenë' légaquië'. Bubenë' lë'e bárcodo', en sa'yéajë' ia'tsölá'a nísado'.

*Le tu'sëdinë' bönni' yudo' naca ca'cúa zi que yöta xtila*

*(Mt. 16:5-12)*

<sup>14</sup> Gulal-la ládxi'gaquië' bönni' usëda queë' Jesús ilu'ë bi ilahuë', ate' tuz yöta xtila dë lë'e bárcodo' na'. <sup>15</sup> Ní'irö Jesús buzéajni'inë' légaquië', rnnë':

—Buli'yútsöca' queéli'. Guli'gún chi'i cuinli' para cabí sí'ili' le naca ca'cúa zi que yöta xtila quégaquië' bönni' yudo' fariseo, en queë' Herodes.

<sup>16</sup> Gula'sí lógaquië' tu'ë didza' bönni' usëda queë' la' légacasë', ta'nnë':

—Gunnë' caní tu' cabí dë yöta xtila gáguru'.

<sup>17</sup> Réquibe'enë' Jesús le ta'nnë', ate' rë' légaquië':

—¿Bizx que ruí'ili' caní didza' tu' cabí dë yöta xtila gáguru'? ¿Naru' cabí réajni'itseli', en bití' réquibe'itseli'? ¿Ni nácatsö zidi icja ládxi'do'oli'?

<sup>18</sup> ¿Zóatsö guiöj loli', en bití' rilé'eli', en zóatsö guídi nágali', en bití' riyónili'? ¿Naru' cabí röjnétseli'? <sup>19</sup> Cate' ni' buzuxzjxa' gayu' yöta xtila, ate' gulahuë' chi-en gáyu'ë bönni', ¿bál-laxi ga'böra bulili' le bizxaj butúbili'?

Gula'nnë':

—Chinnu.

<sup>20</sup> Gunnë' ca' Jesús:

—Cate' ni' buzuxzjxa' gadxi yöta xtila, ate' gulagu choá' gayuá' bönachi, ¿bál-laxi ga'böra bulili' le bizxaj butúbili'?

Gula'nnë':

—Gadxi.

<sup>21</sup> Ní'irö Jesús gudxë' légaquië':

—¿Naru' cabí réajni'itseli' na'a, bë'a didza' que le tu'sëdinë' bönni' na'?

*Jesús ruúnë' bönni' Betsaida nachul-la lahuë'*

<sup>22</sup> Cate' Jesús, en bönni' dá'gaquië' Lë' bila'dxinë' yödzö Betsaida, bila'dxin ga zoë' Jesús nupa dujuá'gaquië' queë' tu bönni' nachul-la lahuë'. Ta'tá'yuë' lahuë' canë' bönni' na'. <sup>23</sup> Jesús gudél'ë në'ë bönni' na' nachul-la lahuë', ate' guchë'ë lë' ní'ilö ra' yödzö. Ní' budxië' zxöna' guiöj lahuë', en guxóa në'ë lë'. Ní'irö gunábinë' lë', rnnë':

—¿Ba rilé'enu' lati'?

<sup>24</sup> Buyúë' bönni' na' nachul-la lahuë', rnnë':

—Rilé'egacada' bönachi, nalá'gaca ca yugu' yaga, pero ta'dá bönachi na'.

<sup>25</sup> Leyúbölö guxóa në'ë Jesús guiöj lahuë', ate' buyúdë'ë bönni' na' nachul-la lahuë', ate' böácatë dxi'ado' guiöj lahuë'. Na'a rilé'enë' dxi'ado' yúgu'të. <sup>26</sup> Ní'irö Jesús gusöl-lë'ë lë' lidxë', rnnë':

—Bití' tsöjdödu' lahui' yödzö, en cuntu nu guío' le bena' nu zoa lu yödzö ni.

*Rnnë' Pedro: "Jesús náquië' Cristo"*

*(Mt. 16:13-20; Lc. 9:18-21)*

<sup>27</sup> Gudödi na', bulu'zë'ë Jesús, en yugu' bönni' usëda queë' ni', ate' gula'dödë' yugu' yödzödo' nabábagaca Cesarea, ga na' rinná bë'ë Filipino. Tsanni ni' yú'ugaquië' nöza, Jesús rinabi yudxë' yugu' bönni' usëda queë', rnnë':

—¿Nuzxi ta'nná bönachi naca'?

28 Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquilé' bönachi nisa. Ta'nná ia'bal-la nacu' Elías, bönni' bë'ë didza' uláz queë' Dios dza ni'te. Ta'nná ia'bal-la nacu' bönni' yúbölö bë'ë didza' uláz queë' Dios dza ni'te.

29 Ní'irö Jesús gunábinë' légaquië', rnnë':

—Nazxi libí'ili', ¿nuzxi rnnali' naca'?

Bubi'ë didza' Pedro, rnnë':

—Li' nacu' Cristo.

30 Ní'irö Jesús gunná bé'enë' légaquië' cuntú nu ulu'siyönnë' Nu náquië'.

*Rigu'xjö'ë Jesús ca si' ilútië' Lë'*

(Mt. 16:21-28; Lc. 9:22-27)

31 Ní'irö gusí lahuë' Jesús rusédinë' bönni' dá'gaquië' Lë', rnnë':

—Run bayudxi qui'i saca'a neda', Bönni' Guljë' Bönachi. Bönni' gula tu'zéajni'inë', en yugu' bixúz unná bë', en bönni' yudo' tu'sédinë' ulu'zöë' neda' tsölá'alö. Ilútië' neda', pero cate' gaca tsonna dza ubana'.

32 Yálajsö bë'lenë' légaquië' didza' ni. Ní'irö Pedro guchë'ë Jesús tsölá'alö, en gusí lahuë' ridil-lë' lë' didza'. 33 Buécjë' Jesús, en buyúë' ia'zica're' bönni' usëda queë', ate' buzenë' bach Pedro, rnnë':

—Gucuita ga zoa'. Nacu' ca Satanás, tu' xihui'. Le rizá' ládxi'u biti' za' lu në'ë Dios, pero ca ta'zá' ládxi'gaca bönachi naca.

34 Ní'irö Jesús bulidzë' yugu' bönni' usëda queë', enca' bönachi nacua' ni', en gudxë' légaquië':

—Channö rë'enë' nu bönni' të'ë neda', ral-la' uzöë' tsölá'alö le rë'ëni quézinë', en gáquië' ca tu bönni' sa'yéajë' söjtë'ë lë'e yaga cruz, ate' ní'irö huáca të'ë neda'. 35 Nu bönni' ruí'ida' ládxi'ë yöl-la' na'bán queë', unítie' le, pero nu bönni' unítie' yöl-la' na'bán queë' tu' dë'ë neda', o tu' dë'ë didza' dxi'a quia', udéli'në' bönni' ni yöl-la' na'bán queë'. 36 ¿Naru' uzi'tsë' xibé tu bönni' channö utubë' yúgu'të le dë yödzülió ni, pero unítie' cuinë'? 37 Biti' bi gaca unödzejë' tu bönni' le huóá'ui cuinë'. 38 Channö zoë' nu bönni' rutuí'inë' quia' neda', en que xtídza'a lógaca bönachi ni nucá'anagaca Dios, en tun dul-la', lë'sca' caní neda', Bönni' Guljë' Bönachi, utuí'ida' queë' bönni' na' cate' guídalena' yöl-la' huáca zxön queë' Xuza', ate' dzágagaquië' gubáz lá'ayi neda'.

## 9

1 Jesús gudxë' ca' légaquië', rnnë':

—Le nácatë rea' libí'ili', nacua' ni nupa biti' ilátigaca cate' ila'lé'erö idinná bë'ë Dios luyú ni, en ilá' lahui yöl-la' huáca zxön queë'.

*Ridzá'a ca riná' lahuë' Jesús*

(Mt. 17:1-13; Lc. 9:28-36)

2 Cate' chigudödi xopa dza, Jesús guchë'ë Pedro, en Jacobo, en Juan, ate' légacasë' yójáquië' tu lu guí'a sibi. Ní' bidzá'a ca riná' lahuë' Jesús lógaquië' yonnë' na'. 3 Guyëpi yösa bení' lari' nácuë' Jesús, ate' guca chiguíchido'os. Zxíla'do'os guca, le cuntú nu ra' lari' yödzülió ni gaca gun chiguíchido'os ca guca lari' na'. 4 Bulu'luf'i lógaquië' Elías, en Moisés, tu'ilenë' Jesús didza'.

5 Ní'irö Pedro gudxë' Jesús:

—Bönni' Usedi, bica' ba rë'u zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

<sup>6</sup> Caní gunné' Pedro tu' cabí nōzinē' bi na' rnnē', tu' tádxinē' bōnni' usēda queē' Jesús na'. <sup>7</sup> Ní'irō guró'ō bōaj le gulú'u zzul-la légaquiē', ate' biyōn chi'i nu ruí didza' lu bōaj na', rna:

—Bōnni' ni Zxf'ina'. Nadxf'ida' Lē'. Buli'zē nágali' Lē'.

<sup>8</sup> La' bulu'yutē' pero cūnturō nu ta'lé'enē'. Tuzē' Jesús zóalenē' légaquiē'.

<sup>9</sup> Tsanni ni' yú'ugaquiē' nōza, tu'dínniē' lu guí'a sibi na', Jesús gunná bé'enē' légaquiē' cuntu nu ulu'siyōnnē' ca', lē na' bila'lé'enē', cate' ubanrē' lu yōl-la' guti Lē', Bōnni' Guljē' Bōnachi. <sup>10</sup> Que lē ni na' gula'gú'usē' ícjagaquiē' didza' ni bē'ē, ate' la' légacasē' ta'nabi yúdxinē' luzá'agaquiē' bizxi sa'yéaj didza' na' bē'ē, gunné' ubanē' lu yōl-la' guti. <sup>11</sup> Gula'nábinē' Jesús, ta'nnē':

—¿Bizx que ta'nnē' bōnni' yudo' usedi run bayudxi guídē' Elías zí'alō ca guídē' Cristo?

<sup>12</sup> Bubi'ē didza' Jesús, rnnē':

—Le nácatē guídē' Elías zí'alō, en ucu'ē yúgu'tē ca ral-la' gaca. Na'a, ¿bizxi sa'yéaj le nazúaj lu guichi rna run bayudxi qui'i sáquē'ē Bōnni' Guljē' Bōnachi, ate' cá'asō ulu'cá'ana bōnachi Lē'? <sup>13</sup> Rea' libí'ili': Chibidē' Elías, ate' gulunē' queē' tsca gulē'ēnnē', tsca nazúaj lu guichi lá'ayi ca ral-la' gaca queē'.

*Jesús ruúnē'-bi' bi'i bōnni' yu'u lēbi' bō' xihui'*

*(Mt. 17:14-21; Lc. 9:37-43)*

<sup>14</sup> Cate' ni' bulu'dxinē' Jesús, en bōnni' dzágagaquiē' Lē' ga na' nacu'ē ia'zica'rē' bōnni' usēda queē' Jesús, bila'lé'enē' nacuá' bōnachi zían ni', ate' bōnni' yudo' tu'sēdinē' ta'díl-lalenē' yugu' bōnni' usēda queē' na' didza'. <sup>15</sup> Cate' bōnachi zían na' bila'lé'e Jesús, bulu'bani, en carelō zá'gaca ga na' zē'ē, dijōdxigaca Lē': "Padiux."

<sup>16</sup> Ní'irō Jesús gunábinē' yugu' bōnni' usēda queē' na', rnnē':

—¿Bizxi didza' na' ridíl-lalenli' légaquiē'?

<sup>17</sup> Bubi'ē didza' tu bōnni' nūtsē'ē ladaj bōnachi zían na', rnnē':

—Bōnni' Usedi, nachē'a-bi' bi'i bōnni'do' quia' ni quiu', yu'u lēbi' bō' xihui' le run ga biti' raca innēbi'. <sup>18</sup> Cate' bō' xihui' na' ru'u lēbi', rurixi rutula lēbi' lu yu, ate' ribía bidxina' zidi' ruá'abi', en rutil-la láya'bi'. Que lē ni na' zeaj ridxítabi'. Gunábigacada'-nē' bōnni' usēda quiu' ulu'béajē' bō' xihui' na', pero biti' gula'zéquí'nē'.

<sup>19</sup> Bubi'ē didza' Jesús, rnnē':

—Libí'ili', bōnni' cabí ta'yéajlē'ē. ¿Gáca'xte caz ral-la' sóalena' libí'ili'? ¿Gáca'xte caz ral-la' guá' ilena' queéli'? Guli'diguá'-bi' quia' ni.

<sup>20</sup> Dujuá'agaquiē'-bi' ga na' zoē' Jesús. Cate' bō' xihui' na' bilé'e Lē', la' buxízitē lēbi'. Gudzō'ōbi' lu yu, ate' burixi butula lēbi', ate' bidxía bidxina' zidi' ruá'abi'. <sup>21</sup> Ní'irō Jesús gunábinē' xúzibi' bi'i na', rnnē':

—¿Gáca'xi chiguca raca caní queēbi'?

Rnnē' xúzibi' na':

—Ní' nácatēbi' bí'ido' ré'ebi' caní. <sup>22</sup> Zían luzuí rirú'una lēbi' lu guí', en lu nisa para guti lēbi'. Que lē ni na', channō racu' lati', buéchi' ladxi' netu', gácalenu' netu'.

<sup>23</sup> Jesús gudxē' lē':

—Channō huáca tséajlē'u, yúgu'tē huáca channō tséajlē'u Dios.

<sup>24</sup> La' bē'tē' zidzaj didza' xúzibi' bi'i na', rnnē':

—¡Réajlē'a! ¡Gúcalen neda' para tséajlē'era' Lē'!

<sup>25</sup> Cate' bilé'ené' Jesús zá'gaca bönachi zián, tu'quí Lë', buzené' bach bö' xihui' na', rë' le:

—Li', bö' xihui' runu' ga biti' raca inná, en biti' raca yöni bönachi, rinná bé'eda' li' uruju' lu bi'i ni, en bíti'rö tsu'u lëbi'.

<sup>26</sup> Gurödxí'a bö' xihui' na', en burixi butúlada' bi'i na'. Ní'irö burúajtë, en bucá'ana bi'i na' ca bi'i nati cázabi'. Ca' naca, gulu'i didza' bönachi zián ni', ta'nná:

—Chínátibi',

<sup>27</sup> Ní'irö Jesús gudélë'ë ná'abi', en buchisë'-bi', ate' guzuíbi' bi'i na'.

<sup>28</sup> Ní'irö guyázië' Jesús tu yu'u, ate' la' légacasë' gula'nábinë' bönni' usëda queë' Lë', ta'nnë':

—¿Bizx que biti' guca ubéajtu' netu' bö' xihui' na'?

<sup>29</sup> Jesús gudxë' légaquië':

—Biti' gaca ubéajli' cá'asö bö' xihui' caní, pero tuz channö ulídzali'-në' Dios, en gunli' gubasa.

*Jesús riguúxjö'ë leyúbölö ca si' ilútië' Lë'*

*(Mt. 17:22-23; Lc. 9:43-45)*

<sup>30</sup> Cate' bulu'zë'ë Jesús, en yugu' bönni' dá'gaquië' Lë' ni', gula'dödë' luyú Galilea. Biti' ré'ënë' Jesús nu inözi ga na' zoë' <sup>31</sup> tu' rusëdinë' yugu' bönni' usëda queë'. Rë' légaquië':

—Ulu'dödë' neda', Bönni' Guljë' Bönachi, lu ná'agaquië' bönni' ilútië' neda', pero tódi gátia', cate' gaca tsonna dza ubana'.

<sup>32</sup> Biti' gula'yéajni'inë' didza' ni rë' légaquië', ate' tu' tádxinë', biti' bi gula'nábinë' Lë'.

*Nu naca lo*

*(Mt. 18:1-5; Lc. 9:46-48)*

<sup>33</sup> Ní'irö Jesús, en bönni' dá'gaquië' Lë' bila'dxinë' yödzö Capernaum, ate' tsanni ni' nacu'ë lu yu'u, Jesús gunábinë' légaquië', rnnë':

—¿Bizxi didza' na' gudíl-lalen luzá'ali' cate' ni' yú'uli' nöza?

<sup>34</sup> Légaquië' bulu'sayaj rú'ugaquië', tu' gula'díl-lalen luzá'agaquië' didza' la' nöza ni' núzxilögaquië' gáquië' bönni' lo. <sup>35</sup> Ní'irö gurö'ë Jesús, en bulídzë' idxínmutë' bönni' usëda queë'. Rë' légaquië':

—Nu ré'ëni gaca lo ral-la' gaca ca tu bönni' cuídi'sö, enca' ca ni'a ná'ali' yúgu'tëli'.

<sup>36</sup> Ní'irö Jesús gudélë'ë-bi' tubi' bí'ido', en buzöë'-bi' gatsaj láchui'lö ga na' nacu'ë. Ni' runidë'-bi', rë' légaquië':

<sup>37</sup> —Nu bönni' si' lu në'ë tu bí'ido' caní tu' néquibi' quia', si' lu në'ë ca' neda', ate' nu bönni' si' lu në'ë neda', calëga néda'sö si' lu në'ë, pero si' lu në'ë ca' Xuza', Bönni' na' nasöl-lë'ë neda'.

*Nu biti' ridá'baga' rë'u, rácalen rë'u*

*(Mt. 10:42; Lc. 9:49-50)*

<sup>38</sup> Ní'irö Juan gudxë' Jesús:

—Bönni' Usedi, bilé'etu'-në' tu bönni' rubéajë' yugu' bö' xihui', rugunë' dxin lo'. Gunná bé'etu' lë' bíti'rö gunë' ca', tu' cabí dë'ë rë'u.

<sup>39</sup> Ní'irö Jesús gudxë' lë':

—Biti' inná bé'eli'-në', tu' channö zoë' nu bönni' runë' tu yöl-la' huáca le za' yehua' yubá, en rugunë' dxin La' neda', biti' ca' gaca bönni' na' innë' zi'ë quia'. <sup>40</sup> Caní naca, nu biti' ridá'baga' rë'u, rácalen nu na' rë'u.

<sup>41</sup> Núti'tës nu gunna queëli' tu' zxíga'do' nisa guf'jali' tu' dá'ali' neda', Cristo, si'í caz nu na' le ral-la' gata' que.

*Zoa bönadxi queëru' gunru' ga nu gun dul-la'*

*(Mt. 18:6-9; Lc. 17:1-2)*

<sup>42</sup> Gunnë' ca' Jesús:

—Núti'tës nu gun ga gunbi' dul-la' tubi' bí'ido' caní réajlë'ëbi' neda', gácarö dxi'a ugal-la' nu na' guichi riyëtu yaga yeni, en tsöjchú'una cuini lu nísado'. <sup>43</sup> Channö tu no'o gun ga gunu' dul-la', guchugu le. Dxi'arö gaca quiu' tsöjtsáziu' ga su' ibanu' zoa tuz no'o, calëga zoa chopa no'o, ate' tsöjtsáziu' lu guí' gabila, ga ni' biti' ulu guí' que. <sup>44</sup> Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu. <sup>45</sup> Lëasca' caní, channö tu ni'u gun ga gunu' dul-la', guchugu le. Gácarö dxi'a quiu', tsöjtsáziu' ga su' ibanu' zoa tuz ni'u, calëga zoa chopa ni'u, ate' tsöjtsáziu' lu guí' gabila, ga ni' biti' ulu guí' que. <sup>46</sup> Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu. <sup>47</sup> Lëasca' caní, channö tu guiöj lo' gun ga gunu' dul-la', guléaj le. Gácarö dxi'a quiu' tsöjtsáziu' ga rinná bë'ë Dios zoa tuz guiöj lo', calëga zoa chopa guiöj lo', ate' tsöjtsáziu' lu guí' gabila. <sup>48</sup> Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu.

<sup>49</sup> 'Ruxi'iru' bëla' zödi', en rugála'ru' le ra' guí', para cabí gaca ditaj. Lë ni rusedi rë'u ca ulu'huóaca dxi'a yúgu'të bönachi. Lëasca' caní, ré'ënë' Dios izxi'i zödi' yúgu'të böa' bédxido' tu zégu'gaquië'-ba' lu bucugu lá'ayi queë'. <sup>50</sup> Dxi'a naca zödi', pero channö initi yöl-la' siná'a que, ¿nacxi úniru' le siná'a? Guli'gaca la' libí'isili' ca zödi' dxi'a, sóali' dxi'ado' tuli' len ia'tuli'.

## 10

*Rusëdinë' Jesús que nu rulá' yöl-la' nutsaga na'*

*(Mt. 19:1-12; Lc. 16:18)*

<sup>1</sup> Buzë'ë Jesús yödzo Capernaum, ate' guyijë' luyú Judea, en gudödë' ia'tsölá'a yegu Jordán saca' ga rilén gubidza. Bulu'dubi leyúbölö bönachi zían ga zoë', ate' leyúbölö busëdinë' légaquië' ca run cazë'. <sup>2</sup> Ní'irö bila'dxinë' bönni' yudo' fariseo ga zoë' Jesús, ate' té'ënnë' ilunë' ga bi innë' Jesús para gaca ulu'zëguie' Lë' didza'. Gula'nábinë' Lë', ta'nnë':

—¿Dë lataj bönni' nutsaga në'ë usanë'-nu nigula queë'?

<sup>3</sup> Bubi'ë didza' Jesús, rnnë':

—¿Bizxi gunná bé'enë' Moisés libí'ili'?

<sup>4</sup> Gula'nnë':

—Moisés bë'ë lataj nu bönni' uzúajë' lu guichi le rnna rulá'alenë'-nu nigula queë' na', ate' ní'irö usanë'-nu.

<sup>5</sup> Bubi'ë didza' Jesús, rnnë':

—Gunná bé'enë' Moisés libí'ili' caní tu' naca zidi icja ládi'do'oli', <sup>6</sup> pero cate' gusí lo rata' yödzülió, Dios benë' légaquië' bönni', en nigula. <sup>7</sup> Gunnë': "Que lë ni na' ucá'anë' bönni' xuz xinë'ë, en tsöjsóalenë'-nu nigula queë', <sup>8</sup> ate' chopë' ni ulu'huóáquië' ca tuz bönachi." Que lë ni na' bítirö nácagaquië' chopë' pero tuz chinácagaquië'. <sup>9</sup> Que lë ni na' ca', nu naca bönachi biti' ral-la' ulá'a nupa na' chinutságuie' Dios.

<sup>10</sup> Cate' gula'yázië' yu'u, gula'nabi yúdxinë' bönni' usëda queë' Jesús ca naca didza' na' bë'ë. <sup>11</sup> Jesús gudxë' légaquië':

—Núti'tës bönni' ulá'alenë'-nu nigula queë', en utsaga ná'alenë'-nu nigula yúbölö, runë' dul-la' le riguitsaj xibá que yöl-la' nutsaga na' tu' rusubáguë'ë-nu dul-la' nigula na' guzóalenë'-nu zí'alö. <sup>12</sup> Lëasca' caní

channö tu nigula nutsaga ná'lennu bönni' usannu-në', en sí'inu-në' bönni' yúbölö, runnu ca' dul-la' le riguitsaj xibá que yöl-la' nutsaga na'.

*Jesús rulidza tsáhuë'ë-bi' yugu' bí'ido'*

*(Mt. 19:13-15; Lc. 18:15-17)*

<sup>13</sup> Ní'irö bila'dxin bönnachi ga zoë' Jesús dujuá'gaquië' bí'ido' queguequi. Të'ëni ixóa në'ë lé'gcabi', ate' gula'sí lógaquië' bönni' usëda queë' Jesús ta'dil-la didza'gaquië' nupa na' dujuá'agaca lé'gcabi'. <sup>14</sup> Cate' bilé'enë' Jesús lë ni, gulënë' légaquië', en gunnë':

—Guli'güi'-gácabi' bí'ido' lataj ila'dxinbi' quia'. Biti' uzá'gacali'-bi', tu' gata' quegaca nupa nácgaca ca bí'ido' ni, lataj ga rinná bë'ë Dios. <sup>15</sup> Le nácatë rea' libí'ili': Nu cabí si' lu në'e le rinná bë'ë Dios ca runbi' tu bí'ido', bití' ca' tsaza ga ní rinná bë'ë.

<sup>16</sup> Ní'irö Jesús bunidë'-bi' yugu' bí'ido' na'. Guxóa në'ë lé'gcabi', en bulidza tsáhuë'ë-bi'.

*Bönni' cuidi' napë' yöl-la' tsahui'*

*(Mt. 19:16-30; Lc. 18:18-30)*

<sup>17</sup> Cate' bu'ë Jesús nöza, carelô bidë' tu bönni', en buzóa zxibë' lahuë' Jesús, en gunábinë' Lë', rnnë':

—Bönni' Usedi idú dxi'a, ¿nacxi guna' para idéli'da' yöl-la' na'bán idú?

<sup>18</sup> Jesús gudxë' lë':

—¿Bizx que ru'u neda' didza', rnno': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a. <sup>19</sup> Chinöz quézinu' yugu' le gunná bë'ë Dios, gunnë':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' bönnachi.

Biti' cuanu'.

Biti' innío' que luzó'o le cabí nácatë.

Biti' ucáchi'lanu'.

Ben bal xuz xinó'o.

<sup>20</sup> Bubi'ë didza' bönni' na', rë' Jesús:

—Bönni' Usedi, yúgu'të lë ni run caza' cate' ni' nácatea' bí'ido'.

<sup>21</sup> Len yöl-la' dxi'i ladxi' queë', Jesús buyúë' lë', rnnë':

—Tu le riyadzaj quiu'. Guyéaj, yöjëti' yúgu'të le dë quiu', en bunödzej quegaca bönnachi yechi' lë na' si'u, ate' gata' quiu' yöl-la' tsahui' yehua' yubá. Ní'irö huödu' quia', gacu' ca tu bönni' sa'yéajë' söjtë'ë lë'e yaga cruz, ate' to'o neda'.

<sup>22</sup> Cate' biyönnë' didza' ni, bu'innë', ate' söhuöjë' risëbi ládxe'ë tu' dëda' yöl-la' tsahui' queë'.

<sup>23</sup> Ní'irö buyúë' Jesús gásibi'ilë', en gudxë' yugu' bönni' usëda queë':

—Böniga naca ila'yaza nupa ta'lé'e yöl-la' tsahui' ga rinná bë'ë Dios.

<sup>24</sup> Bulu'bánninë' bönni' usëda queë' ca naca xtídzë'ë, ate' leyúbölö Jesús gudxë' légaquië':

—Libí'ili', xzí'ina'do', böniga naca ila'yázië' bönni' tu'zxöni ládxi'gaquië' yöl-la' tsahui' quegaquië' ga rinná bë'ë Dios. <sup>25</sup> Nácarö böniga tsázië' nu bönni' rilé'enë' yöl-la' tsahui' ga rinná bë'ë Dios, ca tódiba' bóa' ta'bía-ba' bönnachi lu nagui yötsi'.

<sup>26</sup> Cate' bila'yönnë' didza' ni, bulu'bánnitëronë' ca'. Ta'nnë' la' légcasë':

—¿Nuzxi caz gaca ulá, channö?

<sup>27</sup> Buyúë' Jesús légaquië', rnnë':

—Biti' gaca gun bönachi lë ni, pero huáquië' Dios, tu' rizéqui'në' Dios yúgu'të.

<sup>28</sup> Ní'irö Pedro gudxë' Lë':

—Xan, netu' nucá'anatu' yúgu'të, en dá'atu' Li'.

<sup>29</sup> Bubi'ë didza' Jesús, rnnë':

—Le nácatë rea' libí'ili', nu bönni' ucá'anë' lidxë', o böchë'ë, o zanë', o xuzë', o xinë'ë, o nigula queë', o yugu' xzí'inë', o xiyúë', tu' runë' xichina' o tu' runë' libán que didza' dxi'a quia', <sup>30</sup> bönni' ni huazí' queë' ia'tú gayuá'tërö ca' dza ni zóaru' na'a, yugu' lidxë', en yugu' böchë'ë, en yugu' zanë', en yugu' xinë'ë, en yugu' xzí'inë', en yugu' xiyúë', enca' yugu' le ila'bía ládxi'gaca bönachi lë', ate' lu yödzölió si' za', gata' yöl-la' na'bán idú queë'. <sup>31</sup> Zián nupa nácatë lo na'a, ilaca cuídi'sö ni', ate' nupa nácatë cuídi'sö na'a, ilaca lo ni'.

*Leyúbölö riguúxjö'ë Jesús ca si' ilútië' Lë'*

(Mt. 20:17-19; Lc. 18:31-34)

<sup>32</sup> Cate' ni' yú'ugaquië' nōza, ta'benë' sōjāquië' Jerusalén, nanōruë' Jesús lōgaquië' bönni' usēda queë'. Nanítiguequinë', en lu yöl-la' rádxisō sōjācalenë' Lë'. Leyúbölö Jesús guchë'ë quez idxínnutë' na'. Gusí lahuë' ru'ilenë' légaquië' didza' ca naca le ral-la' gaca queë'. <sup>33</sup> Rnnë':

—Ril'é quézili' ribenru' zéajru' Jerusalén ga ni' zoa nu udōdi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usedi, ate' chúguië' quia' gátia', en ulu'dödë' neda' lu ná'agaquië' bönni' zi'tu'. <sup>34</sup> Bönni' na' ulu'titjë' neda', en ilúndë'ë neda' zi'. Ulu'chejë' neda' zxōna'. Ní'irö ilútië' neda', pero cate' gaca tsonna dza ubana' lu yöl-la' guti.

*Jacobo en Juan ta'nábinë' Jesús bi gunë' quégaquië'*

(Mt. 20:20-28)

<sup>35</sup> Ní'irö gula'biguë'ë Jacobo, en Juan, xzí'inë' Zebedeo, lahuë' Jesús, en tē' Lë':

—Bönni' Usedi, rë'ënitü' gunu' queëtu' le inábatu'.

<sup>36</sup> Jesús gudxë' légaquië':

—¿Bizxi rë'ënili' guna' queéli'?

<sup>37</sup> Gulë' Lë':

—Cate' idxín dza cō'u ga inná bë'u, ben ga cō'ötu' tutu' cuitu' ibëla, en ia'tutu' cuitu' yögōla.

<sup>38</sup> Ní'irö Jesús gudxë' légaquië':

—Biti' nōzili' bi rinábalí'. ¿Naru' huáca sí'ili' le ral-la' si'a neda', le naca le qui'i saca'a? ¿Naru' huáca idílali' nisa ca idila' neda' nisa, gátia'?

<sup>39</sup> Bulu'bi'ë didza', ta'nnë':

—Huácatu'.

Jesús gudxë' légaquië':

—Le nácatë, le qui'i saca'a neda', sí'ili' ca' libí'ili', en ca idila' neda' nisa, idílali' ca' nisa, <sup>40</sup> pero biti' dë lu na'a cō'a nu cuía cuita' ibëla, en nu cuía cuita' yögōla. Dios unödzjë' quégaquië' bönni' chinupë'ë quégaquië' yugu' lataj na'.

<sup>41</sup> Cate' bila'yönnë' ia'chíë' bönni' usēda queë' Jesús didza' ni, gula'lenë' Jacobo, en Juan na'. <sup>42</sup> Ní'irö Jesús bulidzë' légaquië', rnnë':

—Nöz quézili' ca tun nupa ta'nná be'e yugu' yödzö, tu'zenë' bach bönachi, ate' nupa nácatë lo ládjagaquië' ta'nná be'e luzë'eguequi. <sup>43</sup> Biti' gaca caní queéli', pero nu guë'ëni gaca zxön ga zóali', ral-la' gun xichinli'



ia'zica'röli', <sup>44</sup> ate' núti'tèslöli' nu gué'ëni gaca lo ral-la' gaca ca bönni' huen dxin tsaz queëli' yúgu'tèli'. <sup>45</sup> Caní ral-la' gunli' tu' bida' ni neda', Bönni' Guljé' Bönachi, caléga para nu gun xichina', pero para guna' xichíngaca bönachi, en udöda' yöl-la' na'bán quia' le huóá'uida' bönachi zían.

*Jesús ruúnë' Bartimeo, bönni' lo chul-la*

(Mt. 20:29-34; Lc. 18:35-43)

<sup>46</sup> Ní'irö bila'dxinë' Jesús, en yugu' bönni' dá'gaquië' Lë' yödzö Jericó. Cate' ni' rurujé' Jesús yödzö ni, dzágagaquië' Lë' yugu' bönni' usëda queë', enca' bönachi zían. Ra' nöza ni' rö'ë tu bönni' nachul-la lahuë', lë' Bartimeo, zxi'inë' Timeo. Rinabë' nu bi gúnna'sö queë'. <sup>47</sup> Cate' biyömmë' Bartimeo ridödë' Jesús, bönni' Nazaret, ni', gusi lahuë' ru'ë zidzaj didza', rnnë':

—¡Jesús, zxi'ini xi'sóë' David! ¡Buéchi' ladxi' neda'!

<sup>48</sup> Nupa ta'dödi ni' gula'dil-la lë' didza'. Të lë':

—Busayaj ru'u.

Ní'irö zídzejrö bulidzë', rnnë':

—¡Zxi'ini xi'sóë' David! ¡Buéchi' ladxi' neda'!

<sup>49</sup> Ní'irö guzóë' dxisö Jesús, ribözë', ate' rë' légaquië':

—Buli'lidzë'.

Bulu'lidzë' bönni' na' nachul-la lahuë'. Të lë':

—¡Butipa ládxi'u! ¡Guyaschi! ¡Rulidzë' li'!

<sup>50</sup> Ní'irö gurú'unë' tsólá'alö lari' naxóa yenë'. La' guyásatë', en bidë' ga na' zoë' Jesús. <sup>51</sup> Jesús gunábinë' lë', rnnë':

—¿Bizxi ré'ënu' guna' quiu'?

Bubi'ë didza' bönni' na' nachul-la lahuë', rnnë':

—Bönni' Usedi, ré'ënda' gunu' ga huóálaj guiöj lahua'.

<sup>52</sup> Jesús gudxë' lë':

—Böaj lidxi'. Chinuhuóácu' tu' réajlë'u neda'.

La' böáljatë guiöj lahuë', ate' sa'yéajlenë' Jesús.

## 11

*Riyazië' Jesús yödzö Jerusalén*

(Mt. 21:1-11; Lc. 19:28-40; Jn. 12:12-19)

<sup>1</sup> Bila'dxinë' Jesús, en yugu' bönni' dá'gaquië' Lë' gala' ga dë Jerusalén, ga na' nacuá' yödzö Betfagé, en yödzö Betania, en ga na' dë ca' Guí'a Yaga Olivo. Ní'irö Jesús gusöl-lë'ë chopë' bönni' usëda queë', <sup>2</sup> en rë' légaquië':

—Guli'tséaj lu yödzödo' dë loru' ni', en cate' tsú'uli' ni', tsöjxáca'li'-ba' tuba' búrrodo' nága'ba' ni', en cuntu nu ribíani lëba'. Guli'sedxi-ba', en guli'ché'-ba' quia' ni'. <sup>3</sup> Channö nu bi guié libí'ili' tu' runli' lë ni, guli'guié nu na': "Xanru' riquinnë'-ba', ate' la' usól-la'të'-ba' quiu'."

<sup>4</sup> Ní'irö yöjáquië', en yöjxáca'gaquië'-ba' búrrodo' na', nága'ba' ra' nöza ga nu riyaza lö'a, ate' gula'sedxë'-ba'. <sup>5</sup> Nupa nacuá' ni' të légaquië':

—¿Bizxi ni runli'? ¿Bizx que risédxili'-ba' búrrodo' na'?

<sup>6</sup> Bulu'bi'ë didza' bönni' usëda queë' Jesús, gulë' légaquië' ca na' chigudxi cazë' Jesús légaquië', ate' gulu'ë légaquië' lataj. <sup>7</sup> Ní'irö gula'ché'-ba' búrrodo' na' ga na' zoë' Jesús. Gula'xóë' lari' quégaquië' cúdzu'ba', ate' Jesús gudxië'-ba'. <sup>8</sup> Zían bönni' nacu'ë ni' gula'chiljé' lari' quégaquië' gapa naca la' nöza. Ia'bal-la bönachi ni' gula'guítsaj zin le bulu'zxóa la' nöza.

<sup>9</sup> Gula'sí lo nupa nanörugaca lahuë' Jesús, en nupa na' zá'gaca cúdzu'lë' tu'i zidzaj didza', ta'nnë':

—¡Yöl-la' ba! ¡Xanru' Dios gun lá'ayë Bönni' zë'ë ni, nasöl-lë'ë Dios Lë'!  
 10 ¡Dios gun lá'ayë' Bönni' ni si' inná' bë'ë, ca na' gunná' bë'ë xuz xtó'oru'  
 David! ¡Yöl-la' ba Dios!

11 Caní' guca, bidxinë' Jesús Jerusalén, ate' guyázië' lö'a yudo'. Cate' budxi buyüë' yúgu'të le nacua' idú gásibi'iló ni', burúajë' zaca' yödzo Betania tu' chiridzö', ate' dzágagaquië' Lë' yugu' bönni' usëda queë'.

*Jesús rulidza zi'ë tu yaga higo*

(Mt. 21:18-19)

12 Cate' za' rení' ia'tú dza, ate' tu'rúajë' Jesús, en yugu' bönni' dá'gaquië' Lë' yödzo Betania, ridunë' Jesús. 13 Zi'tu' bilé'enë' tu yaga higo dxia xilagui'. Gubígui'ë ga na' zoa yaga na' channö utsöjxaquië' lati' le ribía. Cate' bidxinë' ni' biti' bi yöjxáquië' le ribía. Xilágui'sö dxia tu' cabí ridxini dza cuía. 14 Ní'irö Jesús bulidzë' yaga na', rnnë':

—Biti'rö nu gagu le ribía quiu'.

Yugu' bönni' usëda queë' bila'yönnë' didza' ni.

*Jesús rulatjë' lö'a yudo'*

(Mt. 21:12-17; Lc. 19:45-48; Jn. 2:13-22)

15 Cate' bila'dxinë' Jesús, en yugu' bönni' dá'gaquië' Lë', yödzo Jerusalén, guyázië' Jesús lö'a yudo', en gusí lahuë' rubéajë' ní'iló nupa tuti', en nupa to'o lu lö'a yudo'. Burixë' yugu' blaga quégaca nupa tu'tsá' dumí izá'a, enca' yugu' ga ta'bö' nupa tuti' yugu' gu'dödo'. 16 Biti' ca' bë'ë lataj nu bi guá', uzóa nöza ga naca lö'a yudo'. 17 Busëdinë' nupa nacua' ni', rnnë':

—Nazúaj lu guichi lá'ayi, rna: “Lidxa' si'i le, yu'u ga bönachi idütë yödzölió ulu'lidza Dios.” Libí'ili' chinunli' le ca naca lídxigaca gubán.

18 Cate' yugu' bixúz unná' bë', en yugu' bönni' yudo' usedi bila'yönnë' didza' ni, gula'sí lógaquië' tu'guiljë' nacxi ilütie' Jesús, pero tu' tádxinë' le ilún bönachi, biti' bi gulunë' queë', tu' tu'bani yúgu'të bönachi ca naca le rusëdinë' Jesús. 19 Cate' chiridzö' burúajë' Jesús lu yödzo na'.

*Ribidxi yaga higo bulidza zi'ë Jesús*

(Mt. 21:20-22)

20 Cate' za' rení' ia'tú dza, gula'dödë' Jesús, en yugu' bönni' dá'gaquië' Lë' ga zoa yaga higo na' bulidza zi'ë Jesús, en bila'lé'enë' le, chinabidxi idú luí. 21 Ní'irö yöjnenë' Pedro bi guca, ate' gudxë' Jesús:

—Bönni' Usedi, buyútsöca'. Chinabidxi yaga higo ni bulidza zi'u néaje.

22 Bubi'ë didza' Jesús, rë' légaquië':

—Guli'tseajlë' Dios. 23 Le nácatë rea' libí'ili', channö nu bönni' guië' guí'ado' ni: “Gucuíta ni, yöjsöa lu nísado’”, en biti' gaca chopa ládxë'ë bönni' na', pero idú ládxë'ë tseajlë'ë gunë' Dios ca na' rnnë', ca' gaca. 24 Que lë' ni na' rea' libí'ili': Yúgu'të le inábali' cate' ulídzali'-në' Dios, guli'tséajlë' chibennë' Dios queëli' lë na' rinábali', ate' gunnë' queëli'. 25 Cate' ni' rulídzali'-në' Dios, channö zoa nu rileli' nu bi ben queëli', buli'niti lo nu na', para uniti lahuë' ca' libí'ili' Xúzili' na' zoë' yehua' yubá ca naca dul-la' nabága'li'. 26 Channö cabí uniti loli' bönachi, biti' uniti lahuë' Xúzili' zoë' yehua' yubá libí'ili' dul-la' nabága'li'.

*Yöl-la' unná' bë' dë lu në'ë Jesús*

(Mt. 21:23-27; Lc. 20:1-8)

27 Ní'irö Jesús, en yugu' bönni' dá'gaquië' Lë' yöjhuöjgaquië' Jerusalén. Cate' ni' ridë' Jesús ga naca chila yudo', bila'dxinë' yugu' bixúz unná

bē', en yugu' bönni' yudo' usedi, en bönni' gula tu'zéajni'inē', ga zoē'.  
 28 Gula'nábinē' Jesús, ta'nnē':

—¿Bizxi yöl-la' unná bē' dē lu no'o runu' yugu' lē ni? ¿Nuzxi caz budödi lu no'o yöl-la' unná bē' gunu' caní?

29 Bubi'ē didza' Jesús, rē' légaquiē':

—Neda' ca' inábida' libí'ili' tu didza'. Channö ubí'ili' quia' didza', ní'irö guía' libí'ili' bi yöl-la' unná bē' rúnida' yugu' lē ni. 30 ¿Nuzxi budödi lu në'è Juan uquilē' bönachi nisa? ¿Naru' Dios o bönachi? Guli'nnátsöca'.

31 Gula'sí lógaquiē' tun xtídza'gaquiē' la' légacasē', ta'nnē':

—Channö innaru' Dios gusöl-lē'ē lē', guíē' rē'u: “¿Bizx que biti' guyéajlē'ēli' lē'?” 32 ¿Naru' guíētsaru'-nē': Gula'söl-lē'ē bönni' lē'?

Caní ta'zá' ládxi'gaquiē' tu' tádxinē' le ilún bönachi zían nacuá' ni' tu' téquiquequi yúgu'tē bönachi na' bē'ē didza' Juan na' uláz queē' Dios. 33 Que lē ni na' gulē' Jesús:

—Biti' nöztu'.

Ní'irö Jesús gudxē' légaquiē':

—Neda' ca' biti' quíxjöi'ida' libí'ili' bi yöl-la' unná bē' dē lu na'a rúnida' yugu' lē ni.

## 12

*Rucúdzu'ē didza' Jesús ca gaca quégaca huen dxin biti' nácaqaca tsahui'*  
 (Mt. 21:33-46; Lc. 20:9-19)

1 Ní'irö gusí lahuē' Jesús ru'ilenē' yugu' bönni' dá'gaquiē' Lē' didza' yugu' le rucúdzu'ē didza', rnnē':

—Guzöē' tu bönni', budē'ē lubá uva zían ga naca lu xiyúē'. Guléquiē' lē'a que, en guchö'önē' tu röga' guiöj ga isíē' xisi uva na'. Budxiē' tu yu'u gupa ga naca xitsá' ga nu uyú xiyúē' na'.

'Ní'irö budödē' xiyúē' na' lu ná'agaquiē' huen dxin, ila'zi'ē gatsaj huéaj le unödzej, ate' guyijē' yödžö zi'tu'. 2 Cate' bidxín dza ulu'chibē' le ribía, gusöl-lē'ē-bi' bi'i huen dxin tsöjxi'ibi' lu ná'agaquiē' huen dxin na' le ralla' si'ē xanbi' que le gula'bía lubá uva na'. 3 Ní'irö yugu' huen dxin na' gula'guélé'ē-bi' bi'i na', en gulundē'-bi' zi', ate' bulu'söl-lē'ē-bi' cá'asöbi'. 4 Ní'irö bönni' xan luyú na' gusöl-lē'ē-bi' ia'tubi' bi'i huen dxin queē', ate' bi'i ni bulu'ladxē'-bi' guiöj. Bulu'lē'ē ícjabi'. Gulu'ē dö' queēbi'. 5 Ní'irö bönni' xan luyú na' gusöl-lē'ē-bi' ca' ia'tubi' bi'i huen dxin queē', ate' bi'i ni gulútiē'-bi'. Gusöl-lē'ē-bi' ca' zíanröbi', ate' bál-labi' gulúngacadē'-bi' zi', en ia'bál-labi' gulútigaquiē'-bi'.

6 'Cúnturö nu nagá'ana queē' xan luyú na'. Nagá'anasibi' xzí'inē', ate' nadxfí'ide'enē'-bi'. Ga yöjsetē, gusöl-lē'ē-bi' xzí'inē', rnnē': “Ilunē' bal xzí'ina'.” 7 Ní'irö yugu' bönni' huen dxin na' gula'nnē' la' légacasē', ta'nnē': “Bi'i ni ral-la' guequi queēbi' luyú ni. Guli'dá, gútiru'-bi', ate' guequi queēru' luyú ni.” 8 Que lē ni na' gula'zönē'-bi', en gulútiē'-bi'. Gula'ru'unē'-bi' ní'lö ga dá'gaca lubá uva na'.

9 Ní'irö Jesús gunábinē' bönni' nacu'ē ni', rnnē':

—¿Nacxi gunē' bönni' xan luyú na', channö? Huidē', en gútigaquiē' bönni' huen dxin na', ate' udödē' luyú na' lu ná'agaquiē' bönni' yúbölö.

10 ¿Naru' cabí nulábanili' lē na' nazúaj lu guichi lá'ayi? Caní rnna:

Guiöj na' gula'ru'unē' bönni' tu'cu'ē zö'ö, na'a naca guiöj len, squin zö'ö.

11 Xanru' Dios benē' ga naca caní ate' rubániru' ca naca lē ni rilé'eru'.

12 Ní'irō ta'zóa ta'bō'ē ila'zōnē Jesús tu' téquibe'enē' bucúdzu'ē didza' ca naca quégaquiē', pero tádxinē' le ilún bōnachi zían nacuá' ni', en que lē ni na' bulu'cá'anē' Lē', sōhuōjgaquiē'.

*Ca naca le ta'guíxaj lázagaca bōnachi*

(Mt. 22:15-22; Lc. 20:20-26)

13 Gudōdi lē ni yugu' bōnni' yudo' unná' bē' na' gula'sól-lē'ē bal-lē' bōnni' yudo' fariseo len bōnni' dá'gaquiē' Herodes ga zoē' Jesús para ilunē' ga bi innē' para gaca ulu'zéguiē' Lē' didza'. 14 Bila'dxinē' bōnni' ni ga na' zoē' Jesús, en tē' Lē':

—Bōnni' Usedi, nōzitu' ru'u didza' idútē' li. Biti' ru'í ládXu'u bi ta'nnaš bōnachi, tu' cabí ruyusu' le tu'lu'isō cuínguequi bōnachi, pero rusēdinu' ca nácatē le rē'ēnē' Dios ilún bōnachi. ¿Ru'í netu' lataj xibá queē' Moisés quíxaj laztu' le tu'quixxjē' uláz queē' César? ¿Naru' uguíxajtu' o bití' quíxajtu'?

15 Réquibe'enē' Jesús tu'ē didza' lu yōl-la' riguílaj ladxí' quégaquiē', ate' rē' légaquiē':

—¿Bizx que rubéajli' neda' didza'? Guli'diguá'tsōca' tu dumí ridá para ilé'eda' le.

16 Diguá'agaquiē' le, ate' Jesús gunábinē' légaquiē', rnnē':

—¿Nuzxi lahui da' lē'e ni, en nuzxi lē ni?

Bulu'bi'ē didza', ta'nnē':

—Queē' César na'.

17 Ní'irō Jesús gudxē' légaquiē', rnnē':

—Buli'nōdzaj queē' César le nequi queē' César, ate' queē' Dios le nequi queē' Dios.

Bulu'bánnē' ca naca didza' bubí'ē Jesús.

*Ca naca que yōl-la' rubán lu yōl-la' guti*

(Mt. 22:23-33; Lc. 20:27-40)

18 Ní'irō bila'dxinē' bal-lē' bōnni' yudo' saduceo ga zoē' Jesús. Bōnni' ni ta'nnē' bití' ulu'bán nupa chinátigaca. Que lē ni na' gulē' Jesús, ta'nnē':

19 —Bōnni' Usedi, Moisés nuzúajē' queēru' lu guichi channō gátíē' tu bōnni' bití' zoa bi'i queē', ate' ugá'ananu nigula queē', bi'i bōchē'ē bōnni' na' ral-la' utsaga ná'alēnbi'-nu, en uzóabi' bí'ido' gácabi' bi'i queēbi' bōchi'bi'. 20 Gula'cuá'abi' gádxibi' bi'i nácacagabi' bōchi'gacabi'. Bi'i huáca na' butsaga ná'alēnbi'-nu nigula, ate' gútibi', cuntu nu zoa bí'ido' queēbi'. 21 Bi'i buropi na' butsaga ná'alēnbi'-nu nigula uzēbi na', ate' gútibi' ca, cuntu nu zoa bí'ido' queēbi'. Lēšca' caní guca queēbi' bi'i bunny. 22 Caní guca, bulu'tsaga ná'alēnbi'-nu yúgu'tēbi', cuntu nu zoa bí'ido' quégacabi'. Ga yōjsetē, gútinu ca' nigula na'. 23 Na'a, cate' ulu'bán nupa chinátigaca, ¿núxilōbi' guéquinu nigula na' queēbi', tu' bulu'tsaga ná'alēnbi'-nu igádxitēbi'?

24 Bubi'ē didza' Jesús, rē' légaquiē':

—Richíxili' tu' cabí núnbē'ēli' le nazúaj lu guichi lá'ayi, en bití' nōzili' ca naca yōl-la' huáca queē' Dios. 25 Cate' ulu'bán nupa chinátigaca, bití' ca' ulu'tsaga ná'agaquiē', ate' yugu' bōnni' bití' ila'cuá'lenē' nigula, pero ilácagaquiē' ca nácacagaquiē' gubáz lá'ayi queē' Dios, nacu'ē yehua' yubá. 26 Na'a, ca naca quégaca nupa chinátigaca channō ulu'bán, ¿naru' cabí nulábanili' le buzúajē' lu guichi Moisés? Ru'í didza' ca na' bulidzē' Dios lē' lu yaga yōtsi'do' régui. Gudxē' lē': "Neda' naca' Dios queē' Abraham, en Dios queē' Isaac, en Dios queē' Jacob." Tu' gunné' caní quégaquiē', naca

bë' nabángaquië' sal-la' gulátië' zí'alò. <sup>27</sup> Dios náquië' Dios quégaca nupa nabángaca, calëga quégaca nupa nátigaca tsaz. Richíxiteröli'.

*Le naca lo le gunná bë'ë Dios*

(Mt. 22:34-40)

<sup>28</sup> Bidë' ca' tu bönni' yudo' usedi ga zoë' Jesús. Biyönnë' ca na' gu-luí'ilenë' Jesús didza', en nözinë' dxí'ado' bubí'ë Jesús didza'. Que lë ni na' gunábinë' Jesús, rnnë':

—¿Bízxilö le gunná bë'ë Dios nácatërö lo ca yúgu'të le gunná bë'ë?

<sup>29</sup> Bubi'ë didza' Jesús, rë' lë':

—Le gunná bë'ë le nácatërö lo ca yúgu'të naca lë na' rnna: “Gulí'yöni bönnachi Israel. Xanru' Dios, tuzë' Lë' náquië' Xanru'. <sup>30</sup> Ral-la' idxí'ínu' Xanru' Dios idú ládxi'u, en lu idú icja ládxi'do'o, en lu idú yöl-la' réajni'i quiu', en lu idú yöl-la' huáca quiu'.” Lë ni naca le gunná bë'ë le nácatërö lo. <sup>31</sup> Le gunná bë'ë le naca buropi, lëbisö ca naca. Caní rnna: “Ral-la' idxí'ínu' luzó'o ca nadxí'i cuinu'.” Biti' ca' zoa ia'tú le gunná bë'ë le nácarö lo ca chopá ni gunná bë'ë.

<sup>32</sup> Ní'irö bönni' yudo' usedi na' gudxë' Jesús, rnnë':

—Dxí'ado' gunnó', Bönni' Usedi. Le nácatë rnno'. Tuzë' náquië' Dios, en cúnturö nu zoa naca Dios. <sup>33</sup> Para idxí'iru'-në' Dios idú ládxi'ru', en lu idú yöl-la' réajni'i queëru', en lu idú icja ládxi'do'oru', en lu idú yöl-la' huáca queëru', en para idxí'iru' luzá'aru' ca nadxí'i cuinru', nácarö lesaca' ca yúgu'të böa' bëdxido' rútigacaru'-ba' lu bucugu lá'ayi queë' Dios, enca' ca yúgu'të böa' bëdxido' ruzégui'gacaru'-ba' lu bucugu na'.

<sup>34</sup> Cate' biyönnë' Jesús dxí'ado' rubi'ë didza' bönni' ni, ní'irö gudxë' lë', rnnë':

—Ia'látí'sö riyadzaj quiu' gúnbë'u le rinná bë'ë Dios.

Cúnturö nu burugui bi inábini Jesús.

*¿Nuzxi zxí'ini náquië' Cristo?*

(Mt. 22:41-46; Lc. 20:41-44)

<sup>35</sup> Cate' ni' rusëdinë' Jesús bönnachi ga naca chila yudo', rnnë':

—¿Bizx que ta'nnë' bönni' yudo' usedi náquië' Cristo zxí'ini xi'sóë' David? <sup>36</sup> Lë cazë' David na' bë'ë didza', zóalenë' Dios Bö' Lá'ayi lë', gunné':

Xanru' Dios gudxë' Xana':

“Gurö'ö cuita lë'a ibëla

cate' gunra' ga ulu'zóa zxí'bigaca lo'

nupa bití' ta'lé'e Lí' dxi'a.”

<sup>37</sup> ¿Naru' nácatsë' Cristo zxí'ini xi'sóë' David channö lë cazë' David na' rnnë' queë' náquië' Xanë'?

Bönnachi zían nacua' ni' tu'zë' nágagaca Lë' gula'yaza ládxi'gaca didza' ni.

*Jesús ruzégui'ë didza' bönni' yudo' tu'sëdinë'*

(Mt. 23:1-36; Lc. 11:37-54; 20:45-47)

<sup>38</sup> Ní' rusëdinë' Jesús yugu' bönni' dá'gaquië' Lë', rë' légaquië':

—Gulí'gún chí'i cuinlí' quégaquië' bönni' yudo' tu'sëdinë'. Ta'yaza ládxi'gaquië' ta'dë' nilö na'lö, nácuagaquië' lari' tunna. Ta'yaza ládxi'gaquië' ca' tu'lidza tsahui' bönnachi légaquië' gapa naca lu yë'ëyi. <sup>39</sup> Ta'bö'ë yugu' lataj lo lu ya'u ga tu'dubë' tu'sëdë' queë' Dios, enca' gapa tu'dubë' tē'aj tahuë'. <sup>40</sup> Rugúagaquië' lídxigacanu nigula uzëbi, en para ulu'luí'isö tsahui' cúngaquië', xidzé tu'lidzë' Dios. Bönni' ni, gúnda'rë' Dios légaquië' xíguia'.

*Le bunödžjanu tu nigula uzëbido' queë' Dios*

*(Lc. 21:1-4)*

<sup>41</sup> Tsanni ni' rö'ë Jesús chila yudo' ga zoa guí'ina ga ta'gú'u bönachi dumí que yudó', ruyúë' ca tun bönachi ta'gú'u dumí lu guí'ina. Dumí zían ta'gu'ë bönni' dë yöl-la' tsahui' quégaquië'. <sup>42</sup> Ní'irö bidxinnu tu nigula yechi' uzëbido' ni', ate' gulú'unu chopa dumí lásido', le nazáca'gaca láti'do'os. <sup>43</sup> Ní'irö bulidzë' Jesús yugu' bönni' usëda queë', en rë' légaquië':

—Le nácatë rea' libí'ili', nigula yechi' uzëbido' ni' gulú'urönu ca yúgu'të nupa bi ta'gú'u lu guí'ina que yudo'. <sup>44</sup> Yúgu'të bönni' ni ta'gu'ë que le nagá'anasö quégaquië', pero nigula ni, lu yöl-la' yéchi'do' queënu gulú'unu idütë la's dui tsca le dësö queënu, le ral-la' gáhuinu.

## 13

*Riguíxjö'ë Jesús ca si' ulu'quínnajë' yudo'*

*(Mt. 24:1-2; Lc. 21:5-6)*

<sup>1</sup> Cate' burúajë' Jesús chila yudo', tuë' bönni' usëda queë' gudxë' Lë', rnnë':

—Bönni' Usedi, buyútsöca' náctiga yugu' yu'u zxön ni, en náctiga yugu' guiöj lë'e zö'ö quéguequi.

<sup>2</sup> Bubi'ë didza' Jesús, rë' lë':

—Rilé'enu' yugu' yu'u zxön ni, pero biti' ca' ugá'ana guiöj lahui luzë'e ni, tu' ulu'quínnaj bönachi léguequi.

*Le ilaca bë' cate' si' údxi que yödžölió*

*(Mt. 24:3-28; Lc. 21:7-24; 17:22-24)*

<sup>3</sup> Ní'irö yöjáquië' Jesús, en yugu' bönni' dá'gaquië' Lë' lu Guí'a Yaga Olivo, guí'a na' dë ca dödilö ra' yudo'. Cate' chirö'ë Jesús ni', la' légacasë' Pedro, en Jacobo, en Juan, en Andrés, gulë' Lë', ta'nnë':

<sup>4</sup> —Gudíxjö'i' netu' båtáxi ilaca lë ni. ¿Bizxi gaca bë' chizóa ilaca yúgu'të lë ni?

<sup>5</sup> Bubi'ë didza' Jesús, rusëdinë' légaquië', rnnë':

—Gulí'gún chí'i cuinli' para cabí nu si' ye'e libí'ili'. <sup>6</sup> Ila'lá' lahuë' zían bönni' si' lágaquië' ca lea' neda', ila'nnë' nácagaquië' Cristo. Caní ila'zí' yé'enë' bönachi zían.

<sup>7</sup> Ní'irö cate' yönili' raca gudil-la nilö ná'alö, biti' gádxili'. Yúgu'të lë ni ral-la' ilaca, pero biti' ridxini dza údxi. <sup>8</sup> Tu yödžö tíl-lalen ia'tú yödžö, en tu ga nu rinná bë' tsöjtíl-lalen ia'tú ga nu rinná bë'. Zían lataj tödi budó' zxu', en tsu'u gubín. Ila'tsatsa bönachi. Yugu' lë ni ilaca le isí lo ila'guí'i ila'zaca' bönachi dza ni'.

<sup>9</sup> Ní'irö guli'gún chí'i cuinli', tu' ulu'dödë' libí'ili' lu ná'agaquië' bönni' yúlahui'. Ila'guinë' libí'ili' gapa tu'dubë' tu'sëdë' queë' Dios bönni' judío. Idxinli' lógaquië' bönni' ta'nná bé'enë' libí'ili', en lógaquië' bönni' ta'nná bé'enë' yödžö zítu'. Ilunë' caní queëli' tu' dá'ali' neda', pero gunli' ba nali' quia' neda' ni'. <sup>10</sup> Zí'alö ca idxín dza údxi, run bayudxi gaca libán que didza' dxi'a quia' lógaca bönachi idütë yödžölió. <sup>11</sup> Cate' ni' ila'chë'ë libí'ili', en ulu'dödë' libí'ili' lu ná'agaquië' bönni' yúlahui', biti' gü'i ládxi'li' bizxi innali'. La' dza ní'isö Dios gunnë' queëli' didza' gü'i'ili', ate' lë ni innali'. Cate' ni' gü'i'ili' didza', calëga libí'isili' na' innali', pero Dios Bö' Lá'ayi innë'. <sup>12</sup> Ulu'dödi bönachi la' böchi'gacasö lu ná'agaquië' bönni' ilútië' légaquië'. Yugu' bönni' nacua'abi' bi'i quégaquië' ulu'dödë' la' zxi'inigaca cazë' ca', ate' zxi'inigacuië' na' ulu'dödibi' la' xuz xiná'agaca cázabi'

lu ná'agaquië' bönni' ilútië' légaquië'. <sup>13</sup> Yúgu'të bönachi ulu'zóa libí'ili' tsólá'alo tu' dá'ali' neda', pero nálóli' guá' ilenli' lë na' ga idxinrö dza údxi, uláli'.

<sup>14</sup> 'Nupa tu'laba didza' ni ral-la' ila'yéajni'i. Buzúajë' lu guichi Daniel, bönni' ni' bë'ë didza' uláz queë' Dios, le rnna caní: "Tsaz tu le xihui' le rucá'ana cané ga naca la'ayi." Dza ní'irö ral-la' ila'zxunnaj nupa nacua' luyú Judea, en tsójaca gapa naca lu gu'ado'. <sup>15</sup> Nu zoa ícjo'olö dza ni' ral-la' izxúnnajtë, en biti' huötaj zxan yu'u para tsöjzxi' bi dë que lu yu'u. <sup>16</sup> Nu zoa la' guixi' ral-la' izxúnnajtë, en biti' huöaj tsöjzxi' lari' rixóa yeni. <sup>17</sup> Bica' bayechi' yugu' nigula dza ni' nuá'agacanu-bi' bí'ido', enca' nigula tu'gádxinu-bi' bí'ido'. <sup>18</sup> Buli'lidzë' Dios inábili'-në' cabí gun bayudxi izxúnnajli' cate' raca beo' ziaga ca'. <sup>19</sup> Yugu' dza ni' ila'guí'ila'zaca'rö bönachi ca le guca zí'atëlö cate' si' guta' yödzölió le benë' Dios ga ridxintë na'a dza, ate' dza zá'gaca biti' gaca caní. <sup>20</sup> La'tu' cabí nunë' Dios ga ulu'huóaca nabábasö yugu' dza ni', cuntú nu ulá, pero tu' nadxí'inë' nupa chigurö cazë', chinunë' queë' gunë' ga ulu'huóaca nabábasö yugu' dza ni'.

<sup>21</sup> 'Na'a, channö nu guíë libí'ili': "Buli'yútsöca', ni zoë' Cristo", o inná: "Buli'yútsöca', ni zoë'", biti' ca' tséajlë'ëli' nu na'. <sup>22</sup> Ila'lá' lahuë' zían bönni' ila'zí' yé'enë' bönachi. Ila'nnë' nácagaquië' Cristo, en ila'nnë' nácagaquië' bönni' tu'ë didza' uláz queë' Dios. Ulu'luí'inë' le ilaca bë', en ilunë' yugu' yöl-la' huáca zxon. Huala'zí' yé'enë' ca' nupa gurö cazë' Dios channö ila'zéqui'në'. <sup>23</sup> Ní'irö libí'ili', guli'sóa ban ladxi'. Yúgu'të chigudxa' libí'ili' zí'atëlö ca gaca.

*Ca huödë' Bönni' Guljë' Bönachi*

(Mt. 24:29-35, 42-44; Lc. 21:25-36)

<sup>24</sup> Gunnë' ca' Jesús:

—Yugu' dza ni', tödi gaca dza na' ila'guí'ila'zaca' caní bönachi, ichul-la gubidza, en biti' cu'u bení' beo'. <sup>25</sup> Ila'guínnaj bölaj lúzxiba, en ila'zxizi le nál-lagaca nalá'gaca lúzxiba na'. <sup>26</sup> Ní'irö ila'lé'eni neda', Bönni' Guljë' Bönachi, za'a lu böaj lúzxiba, napa' yöl-la' huáca zxon, en yöl-la' bení' quia'. <sup>27</sup> Isöl-la'gaca'-në' gubáz lá'ayi quia', ate' ulu'tubë' bönachi gurö cazá' quia' nacua' idapa la'a yödzölió, ga naguéla'të luyú bidxi, ga ridxintë ga naguela' lúzxiba.

<sup>28</sup> 'Guli'tséajni'i le rusedi yaga higo ni'. Cate' ta'lén ni'a në'e huë'ënido', en rubía xilagui' yulu, nözili' chizóa idxín beo' cusubá. <sup>29</sup> Lësca' caní, cate' ilé'eli' taca lë ni, inözili' chizóa idxín dza údxi na', en chiridzaga lo. <sup>30</sup> Le nácatë rea' libí'ili', yúgu'të lë ni ilaca zí'atëlö ca ilátigaca nupa nacua' dza na'. <sup>31</sup> Huadödi que lúzxiba, en que luyú ni, pero xtí'dza'a catu caz tödi que.

<sup>32</sup> 'Cate' idxín dza ni' o rëla ni', cuntú nu nözi. Biti' nözguequinë' gubáz lá'ayi nacu'ë yehua' yubá, en biti' nözda' neda', Zxí'inë' Dios. Tuzë' Dios Xuz nözinë'. <sup>33</sup> Que lë ni na', buli'subán ládxi'li'. Guli'sóa sina', en buli'lidzë' Dios tu' cabí nözili' bizxi dza gaca lë ni. <sup>34</sup> Gaca ca raca cate' sa'yéajë' zí'tu' tu bönni'. Cate' chizóa uzë'ë lidxë', udödë' lu ná'agaquië' huen dxin queë' yugu' le dë queë'. Que queëgaquië' gu'ë xichíngaquië', en inná bë'ë soa ban ladxi' nu zoa huen chí'i ga nu riyaza. <sup>35</sup> Guli'sóa libí'ili' ban ladxi' tu' cabí nözili' båtáxi huödë' xan yu'u, cate' chiridzö', o gatsaj lahuí' yëla, o cate' ribödxiba' böra, o zílado'. <sup>36</sup> Guli'gún caní, para cabí idixáquië' libí'ili' rásili' channö huödë' tsárido'os. <sup>37</sup> Lë ni rea' libí'ili', rea' ca' yúgu'të bönachi: Guli'sóa ban ladxi'.

## 14

*Tun xtída'gaquië' bönni' yudo' ila'zönë' Jesús*  
(Mt. 26:1-5; Lc. 22:1-2; Jn. 11:45-53)

<sup>1</sup>Ia'chopa dza ca' gaca Laní Pascua cate' tu'subanë' bönni' judío ca benë' Dios, bubéajë' xuz xtó'ogaquië' luyú Egipto. Naca laní cate' tahuë' yöta xtila bití' nazí' cúa zi que. Ta'zóa ta'bö'ë yugu' bixúz unná bë', en bönni' yudo' tu'sédinë' ila'zönë' Jesús bagáchi'sö para ilútië' Lë'. <sup>2</sup>Ta'nnë':

—Bití' gaca sönru'-në' dza laní tu' ila'tsatsa bönachi.

*Nigula rigú'unu le rilá' zxixi icjë' Jesús*  
(Mt. 26:6-13; Jn. 12:1-8)

<sup>3</sup>Zoë' Jesús yödzo Betania, lu yu'u lidxë' Simón, bönni' gü'inë' huë' nudzu' ruzödi. Tsanni ni' rö'ë rahuë' Jesús, guyázanu tu nigula, nuá'anu tu böga'do' néquini guió'j zaca', yudzu le rilá' zxixi que yöj susén lasi idú, le nazaca' yenni'. Gulá'anu böga'do' na', en gulú'unu le rilá' zxixi na' icjë' Jesús. <sup>4</sup>Gula'lélanë' bal-lë' bönni' nacu'ë ni'. Ta'nnë' la' légacasë':

—¿Bixz que guca ditaj le zxixi na'? <sup>5</sup>La'tu' nu guti' lé na', huazi' que ia'lati' ca lázxjaru' que tu iz para nu quisi le quégaca bönachi yechi'.

Gula'nnëdë'ë queënu.

<sup>6</sup>Ní'irö Jesús bë'ë didza', rnnë':

—Guli'gü'i-nu lataj. ¿Bixz que rinnë' zí'ili' queënu? Naca dxi'a le bennu quia'. <sup>7</sup>Nacuá'lentica'sö bönachi yechi' libí'ili', en bátati'tës guë'ënili', huáca gunlí' dxi'a quégaquië', pero neda' bití' sóatica'sa' ga zóali'. <sup>8</sup>Tsca le guzxéqui'nu bennu nigula ni. Cate' gulú'unu le rilá' zxixi ni neda', bupá'anu neda' zí'atëlö ca igácha'a yeru ba. <sup>9</sup>Le nácatë' rea' libí'ili', gáti'tës ga gaca libán que didza' dxi'a quia' idú yödzülió, soa nu quixjö' ca' lë ni bennu nigula ni quia'. Caní gaca para nu tsójné lënu.

*Rizí' lu në'ë Judas udödë' Jesús*  
(Mt. 26:14-16; Lc. 22:3-6)

<sup>10</sup>Ní'irö birúajë' Judas Iscariote, bönni' nabábalenë' chínnuë' na' dá'gaquië' Jesús. Guyijë' ga nacu'ë bixúz unná bë' para udödë' Jesús lu ná'agaquië'. <sup>11</sup>Cate' bila'yönnë' xtídzë'ë Judas na', bulu'dzéjanë', ate' gula'zí' lu ná'agaquië' ilu'ë lë' dumí. Ní'irö gusí lahuë' Judas rizóa ribö'ë udödë' Jesús lu ná'agaquië'.

*Le rë'aj ráguru' rusubanru' ca gútië' Xanru'*  
(Mt. 26:17-29; Lc. 22:7-23; Jn. 13:21-30; 1Co. 11:23-26)

<sup>12</sup>Naca dza risí lo laní cate' tahuë' yöta xtila bití' nazí'i cúa zi que, dza na' tutië'-ba' bö'cu' xzila'do' tahuë'-ba' dzö' Laní Pascua na', cate' tu'subanë' ca benë' Dios busölë' bönachi judío luyú Egipto. Ní'irö bönni' usëda queë' Jesús gula'nábinë' Lë', ta'nnë':

—¿Gazxi rë'ënu' tséajtu' tsöjpá'atu' le gáguru' xtsö' que Laní Pascua?

<sup>13</sup>Ní'irö Jesús gusöl-lë'ë chopë' bönni' usëda queë', en rë' légaquië':

—Guli'tséaj lu yödzo. Ni' huadzágali' tu bönni' nu'ë tu rö'ö nisa. Guli'tséajlenë'. <sup>14</sup>Ga na' tsázië', guli'guíë' xan yu'u na': “Rnnë' Bönni' Usedi: ¿Gazxi zoa yu'u ga na' gágulengaca'-në' bönni' usëda quia' xtsö' que Laní Pascua?” <sup>15</sup>Ní'irö uluí'inë' libí'ili' tu yu'u xzön ga naca buropi cuía ga chinabá'a. Buli'pá'a le gáguru' ni'.



16 Bila'rúajë' bönni' usëda queë' na', en bila'dxinë' lu yödzo, ate' yöjxáca'gaquië' yúgu'të ca na' chigudxë' légaquië' Jesús. Bulu'pë'ë le ilahuë' ni' que Laní Pascua.

17 Cate' chizá' ral-la, bidxinë' Jesús ni', dzágagaquië' idxinnutë' bönni' usëda queë' Lë'. 18 Tsanni ni' rő'ögaquië' tahuë', bë'ë didza' Jesús, rnnë':

—Le nácatë rea' libí'ili', zoa nu dzaga libí'ili', nu rágulen neda' tsözxön, nu udödi neda' lu ná'agaca bönachi.

19 Ní'irö bulu'hui'innë', en gula'sí lógaquië' tu tuë' të' Lë':

—¿Naru' neda'?

Ia'tué' ca' gunné':

—¿Naru' neda'?

20 Bubi'ë didza' Jesús, rë' légaquië':

—Naca tu nu nutsa' ladaj chínnuli' ni, bönni' na' nunë'ë në'ë tsözxön len na'a lu yö'öna. 21 Tseja' ga gátia' neda', Bönni' Guljë' Bönachi, ca na' nazúaj lu guichi lá'ayi ca gaca quia', pero bica' bayechi' bönni' na' udödë' neda' lu ná'agaquië' bönni' ilútië' neda'. Gácarö dxi'a queë' bönni' na' la'tu' cabí guljë'.

22 Tsanni ni' tahuë', gudélé'ë Jesús yöta xtila. Gudxë' Dios: "Xclenu." Buzxuzxjë' le, en bë'ë quégaquië', rnnë':

—Guli'gagu. Lë ni naca bëla' rön quia'.

23 Gudélé'ë ca' tu zxíga'do', en gudxë' Dios: "Xclenu." Ní'irö bë'ë quégaquië', ate' yúgu'të' gulé'ajë' le. 24 Jesús rë' légaquië':

—Lë ni xichöna' le run tsutsu didza' cubi rucá'ana tsahui', le núnlenë' Dios bönachi. Rön ni ilalaj ni'a quégaca bönachi zían. 25 Le nácatë rea' libí'ili', bíti'rö guí'ja' xisi uva ga idxinrö dza guí'ja' le cubi ga ni' rinná bë'ë Dios.

*Jesús rnnë' innë' Pedro biti' núnbë'ë Lë'*

(Mt. 26:30-35; Lc. 22:31-34; Jn. 13:36-38)

26 Gudödi gulúl-lë' yöl-la' ba, bila'rúajë' sőjáquië' Guí'a Yaga Olivo.

27 Ní'irö Jesús gudxë' légaquië', rnnë':

—Yúgu'tëli' gaca chopa ládxi'li', ucá'anali' neda' na'a dzö, tu' nazúaj lu guichi lá'ayi, rna: "Gutia'-në' uyú bö'cu' zxila', ate' ilásilasiba' bö'cu' zxila' na'." 28 Tödi ubana' lu yöl-la' guti, tseja' luyú Galilea zí'alö ca libí'ili'.

29 Ní'irö Pedro gudxë' Jesús, rnnë':

—Sal-la' yúgu'të' ilaca chopa ládxi'gaquië', en ulu'cá'anë' Li', biti' ca' gaca chopa ládxa'a neda'.

30 Jesús gudxë' lë', rnnë':

—Le nácatë rea' li', la' dzö' nisö, si' cödxilöba' böra le buropi luzuí, tsonna luzuí innó' biti' núnbë'u neda'.

31 Ní'irö Pedro buzötjë' Dios, rnnë':

—Sal-la' gátilentea' Lí' tsözxön, biti' ca' inná' biti' núnbë'a Li'.

Lësca' caní gula'nnë' yúgu'të'.

*Jesús rulidzë' Dios la' yëla Getsemaní*

(Mt. 26:36-46; Lc. 22:39-46)

32 Ní'irö Jesús, en bönni' dá'gaquië' Lë' bila'dxinë' la' yëla Getsemaní, ate' Jesús gudxë' légaquië', rnnë':

—Guli'cö' ni, tsanni tseja' neda', tsöjlidza'-në' Dios.

33 Jesús guché'ë Pedro, en Jacobo, en Juan, ate' gusí lahuë' ridzöbinë', en risëbi ládxe'ë. 34 Gudxë' légaquië', rnnë':

—Huati caza' lu yöl-la' risëbi ládxi'. Guli'cöz ni, en guli'ná' yëla.

<sup>35</sup> Ní'irö guzë'ë Jesús ia'láti'do', en busudxín lahuë' lu yu, bulidzë' Dios. Gunábinë' Lë', channö huáca, ucuítë' queë' le ral-la' qui'i sáquë'ë dza na'.  
<sup>36</sup> Ní' rulidzë' Dios, rnnë':

—Xúza'do', yúgu'të huáca gunu' Li'. Gucuíta lë na' ral-la' qui'i saca'a, pero calëga ca rë'ënda' neda', pero ca rë'ënu' Li', gunu'.

<sup>37</sup> Ní'irö böajë' Jesús ga na' nacu'ë bönni' usëda queë', ate' yöjxáquië' légaquië' tasië'. Gudxë' Pedro:

—Simón, ¿rásitso'? ¿Naru' cabí rubéajtso' yëla lo' tu chí'ido'? <sup>38</sup> Guli'ná' yëla, en buli'lidzë' Dios, inábili'-në' para cabí gata' lataj tu' xihui' idilú'u yöl-la' libí'ili'. Le nácatë bö' naca cázali' zoa caz sina', pero lu yöl-la' bönáchisö queë'li' ricuidí'li'.

<sup>39</sup> Ní'irö sa'yéajë' Jesús leyúbölö, rulidzë' Dios, en la' tuz ca gunnë'.  
<sup>40</sup> Cate' böajë' leyúbölö ga na' nacu'ë, yöjxáquië' légaquië' tasië' tu' nadöditë yëla lógaquië'. Biti' nözguequinë' bizxi didza' ulu'bi'ë, le ilë' Lë'.

<sup>41</sup> Cate' böajë' le bunni luzuí ga na' nacu'ë, rë' légaquië':

—¿Rásitsali'? ¿Ruzi'tsa ládxi'li'? ¿Tsa'ti' gaz! ¿Chibidxín dza! ¿Buli'yútsöca', Neda', Bönni' Guljë' Bönachi, chinadöda' lu ná'agaca bönachi dul-la'!  
<sup>42</sup> ¿Guli'chasa, uyéajru'! ¿Buli'yútsöca', chizë'ë bönni' na' udödë' neda' lu ná'agaca bönachi!

#### *Ta'zönë' Jesús*

(Mt. 26:47-56; Lc. 22:47-53; Jn. 18:2-11)

<sup>43</sup> Ní' ru'ë Jesús didza' ni, bidxinë' Judas, bönni' nabábalenë' chínnuë' na' dá'gaquië' Jesús, ate' zá'lengaquië' bönni' zían lë', nuá'agaquië' guíë tuchi', en yaga. Yugu' bixúz unná bë', en yugu' bönni' yudo' usedi, en bönni' gula tu'zéajni'inë' nasöl-la'gaquië' légaquië'. <sup>44</sup> Judas, bönni' na' rudödë' Jesús lu ná'agaquië' chinulú'inë' légaquië' tu le gunë' le gaca bë' nu naca Jesús, gunnë':

—Bönni' na' utsaga lahua'-në', Lë' na' Jesús. ¿Guli'sönë', en guli'chë'ë! ¿Guli'yútsöquië'!

<sup>45</sup> Cate' bidxinë' Judas ni', la' gubíga'të' ga na' zoë' Jesús, en gudxë' Lë':

—Bönni' Usedi, Bönni' Usedi.

Ní'irö busudxín lahuë' Jesús. <sup>46</sup> Ní'irö gula'zönë' Jesús, en gula'chë'ë Lë' nadzunë'.

<sup>47</sup> Ní'irö tuë' bönni' ni' dë'ë Jesús guléajë' guíë tuchi', en benë'-bi' huë' bi'i huen dxin queë' bixúz lo. Guchúguíë' gufí nágabi'. <sup>48</sup> Jesús gudxë' bönachi na', rnnë':

—¿Narúajtsali' nuá'ali' guíë tuchi', en yaga para sönli' neda', runli' ca runli' cate' rizönli'-në' gubán? <sup>49</sup> Yugu' dza guzóalena' libí'ili' rusédigacada' bönachi ga naca chila yudo', ate' biti' guzxönli' neda', pero raca caní para gaca le nazúaj lu guichi lá'ayi.

<sup>50</sup> Ní'irö yúgu'të bönni' usëda queë' Jesús bulu'cá'anë' Le', ta'zxúnnajë'.

#### *Rizxúnnajbi' tubi' bi'i ra'bán*

<sup>51</sup> Zóabi' ca' ni' tubi' bi'i ra'bán söjnobí' Jesús, nuxóasö cuinbi' tu lari' blaga'. Yugu' bönni' na' nachë'gaquië' Jesús gula'zönë'-bi' <sup>52</sup> pero busanbi' lari' na', en xiguídisöbi' buzxúnnajbi'.

#### *Ridxinë' Jesús lógaquië' bönni' yúlahui' lo*

(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup> Gula'chë'ë Jesús lahuë' bixúz lo, ate' bulu'dübë' ni' yúgu'të bixúz unná bë', en bönni' gula tu'zéajni'inë', en yugu' bönni' yudo' usedi.

54 Pedro yõjnahuë' Jesús zi'tu' zítu'sõ, en guyázië' lõ'a lidxi bixúz lo na', en gurõ'õlenë' tsõzxõn yugu' ni'a në'ë bixúz lo na', rutsë'e cuinë' ra' guí'.

55 Yugu' bixúz unná bë' len yúgu'të bönni' yúlahui' lo bulu'guiljë' tu le ulu'subáguie' Jesús para gaca ila'chúguie' queë' gátië' pero bití' bi bulu'dzõlinë'. 56 Bönni' zían gula'nnë' queë' Jesús le cabí nácatë, pero bití' yõjlõzagaca le gula'nnë' queë'. 57 Ní'irõ gula'zuinë' yugu' bönni' gula'nnë' queë' Jesús le cabí nácatë, ta'nnë':

58 —Netu' biyõnitu' didza' bë'ë bönni' ni, gunnë': "Uquínna' judo' ni, lë ni nequi lu ni'a lu na' bõnachi, ate' tsonna dzasõ uchisa' ia'tú le cabí nequi lu ni'a lu na' bõnachi."

59 Lësca' lë ni, bití' yõjlõzagaca xtídza'gaquië'.

60 Ní'irõ guyasë' bixúz lo na' gatsaj láhui'lõ bõnachi nacua' ni', en gunábinë' Jesús, rnnë':

—¿Naru' cabí rubi'itso' didza'? ¿Bizxi na' ta'nnë' quiu' bönni' ni?

61 Jesús, dxisõ zoë'. Bití' bi didza' rubi'ë. Gunábinë' Lë' leyúbõlõ bixúz lo na', rnnë':

—¿Naru' nacu' Li' Cristo, Zxí'inë' Dios Lá'ayi?

62 Bubi'ë didza' Jesús, rnnë':

—Naca'. Ilé'eli' neda', Bönni' Guljë' Bõnachi, soa' cõ'a cuitë' ibëla Dios napa cazë' yõl-la' huáca cate' ni' huõda' lu böaj lúzxiba.

63 Ní'irõ bixúz lo na', lu yõl-la' rilé queë' guchõzë' lari' nácuë', rnnë':

—¿Núzxirõ naquíniru' nu qui'xjõ'? 64 ¿Riyõn quézili' rucá'anë' Dios cá'asõ len didza' ru'ë! ¿Nacxi rusáca'li' queë'li'?

Yúgu'të' gula'chúguie' queë' gátië'.

65 Ní'irõ gula'sí lógaquië' bal-lë' tu'chejë' Jesús zxõna'. Bulu'sayjë' lahuë', en gulundë' Lë' zì', ta'nnë':

—Gunnë' yá'atsõca' nuzxi na' bë' Li'.

Yugu' bönni' ni'a në'ë bixúz lo gula'gápë'ë ru'ë Jesús.

### *Rnnë' Pedro bití' núnbë'ë Jesús*

(Mt. 26:69-75; Lc. 22:56-62; Jn. 18:15-18, 25-29)

66 Cate' ni' zoë' Pedro lõ'a zxan yu'u, bidxinbi' tubi' bi'i nigula huen dxin queë' bixúz lo na' ga na' zoë'. 67 Cate' bilé'ebi' Pedro, rõ'ë rutsë'e cuinë' ra' guí', buyubi' lë', rnnabi':

—Do'o ca' li' Jesús, bönni' Nazaret na'.

68 Gudá'baguië' Pedro, rnnë':

—Bití' núnbë'a-në', en bití' nõzda' bizxi na' rno'.

Burúajë' Pedro yõjsõé' ga nu riyaza lõ'a. Ní'irõ gurõdxiba' böra. 69 Buyubi' lë' leyúbõlõ bi'i nigula huen dxin na', en gusí lobi' rëbi' nupa nacua' ni':

—Bönni' ni dzáguie' légaquië'.

70 Leyúbõlõ gudá'baguië' Pedro. Ia'lati' gudzé nupa nacua' ni' tã Pedro, ta'nná:

—Le nácatë dzagu' légaquië', tu' nacu' bönni' Galilea. Yõl-la' ru'isõ quiu' didza' naca bë'u, tu' tuz ca ru'ili' didza'.

71 Gusí lahuë' Pedro ruxía dö' cuinë', en ruzõtjë' Dios, rnnë':

—Bití' ca' núnbë'a-në' bönni' na' ru'ili' didza' ca naca queë'.

72 La' gurõdxitëba' böra le buropi luzuí. Ní'irõ yõjnenë' Pedro didza' na' bë'ë Jesús, gudxë' lë': "Zí'alõ cõdxiba' böra le buropi luzuí, tsonna luzuí innó' bití' núnbë'u neda'." Cate' yõjnenë' didza' ni, gusí lahuë' ribõdxidë'ë.

## 15

*Ridxinë Jesús lahuë Pilato, bönni' rinná bē'ē*  
(Mt. 27:1-2, 11-14; Lc. 23:1-5; Jn. 18:28-38)

<sup>1</sup> Ní' naca zílado', yugu' bixúz unná bē' len bönni' gula tu'zéajni'inē', en yugu' bönni' yudo' usedi, en yúgu'tē bönni' yúlahui' lo gulún xtídza'gaquiē'. Ní'irō gula'chē'ē Jesús náguē'ē, en bulu'dödē' Lē' lu nē'ē Pilato, bönni' rinná bē'ē uláz que yōdz Roma. <sup>2</sup> Pilato gunábinē' Jesús, rnnē':

—¿Naru' nacu' Li' Bönni' inná bé'enē' bönachi judío?

Bubi'ē didza' Jesús, rnnē':

—Ca nácatē rno'.

<sup>3</sup> Yugu' bixúz unná bē' bulu'zéguiē' Jesús didza' le zían. <sup>4</sup> Ní'irō Pilato gunábinē' Lē' leyúbölö, rnnē':

—¿Naru' cabí rubi'itso' didza'? Buzětsöca' nagu' cate' xō zían le ta'nnē' quiu'.

<sup>5</sup> Biti' bi didza' bubí'ē Jesús. Ca' guca, bubáninē' Pilato.

*Ta'chúquiē' queē' Jesús gátíē'*  
(Mt. 27:15-31; Lc. 23:13-25; Jn. 18:38-19:16)

<sup>6</sup> Dē tu le runē' Pilato cate' raca laní na', rusanē' lu ná'agaca bönachi tu bönni' nadzunē' lidxi guíē, núti'tēs nu ta'naba. <sup>7</sup> Nadzunē' tu bönni' lē' Barrabás lidxi guíē, ate' dzágagaquiē' lē' ia'bal-lē' luzē'ē, yugu' bönni' gulútiē' bönachi cate' gula'dá'báguíē' yúlahui'. <sup>8</sup> Cate' bila'dxín bönachi zían ní', gula'sí lógaquiē' ta'nabē' lahuē' Pilato gunē' quégaquiē' ca run cazē'. <sup>9</sup> Bubi'ē didza' Pilato, rnnē':

—¿Rē'ēnili' usana'-nē' queēli' Bönni' Inná Bé'enē' Bönachi Judío?

<sup>10</sup> Caní gunné' Pilato tu' réquibe'enē' bulu'dödē' yugu' bixúz unná bē' Jesús lu nē'ē tu' tu'xzé'enē' Lē'. <sup>11</sup> Yugu' bixúz unná bē' na' gula'gu'ē xilá ládxi'gaca bönachi zían na', para ila'nabē' lahuē' Pilato usanē' lu ná'agaquiē' Barrabás. <sup>12</sup> Ní'irō Pilato gunábinē' légaquiē' leyúbölö, rnnē':

—¿Bizxi rē'ēnili' guna' queē' bönni' na' ru'íli' lē', Bönni' Inná Bé'enē' Bönachi Judío?

<sup>13</sup> Gulu'ē zidzaj didza', ta'nnē':

—¡Budē'ē lē'e yaga cruz!

<sup>14</sup> Gunábinē' Pilato légaquiē', rnnē':

—¿Bizxi caz dö' nu'ē?

Leyúbölö tu'ē zidzaj didza', ta'nnē':

—¡Budē'ē lē'e yaga cruz!

<sup>15</sup> Tu' gú'unnē' Pilato gunē' ga ila'yaza ládxi'gaca bönachi zían na', busanē' Barrabás lu ná'agaquiē'. Ní'irō gunná bé'enē' nu quin Jesús, ate' budödē' Lē' lu ná'agaquiē' bönni' ulu'dē'ē Lē' lē'e yaga cruz.

<sup>16</sup> Ní'irō yugu' bönni' rōjáquiē' gudil-la gula'chē'ē Jesús lö'a yúlahui', ate' bulu'tubē' luzá'agaquiē' ní'. <sup>17</sup> Bulu'gácuē' Jesús tu lari' xiná gul-la, en gulunē' tu bregui' ní'a nē'e yōtsi', le bulu'dxíē' icjē'. <sup>18</sup> Ní'irō gula'sí lógaquiē' tu'lidzē' Jesús, ta'nnē':

—¡Yöl-la' ba lí', rinná bé'enu' bönachi judío!

<sup>19</sup> Gula'guiné' gui icjē', en bulu'chejē' Lē' zxöna'. Bulu'zóa zxíbigaquiē' lahuē', en lu yöl-la' rutitaj gulunē' Lē' bal. <sup>20</sup> Cate' budxi bulu'titjē' Lē', bulu'gúē' lari' xiná chul-la na' nácuē' ate' bulu'gácuē' Lē' lari' que cazē'. Ní'irō gula'chē'ē Lē' ní'ilö yúlahui' na' para tsöjda'gaquiē' Lē' lē'e yaga cruz.

*Tu'dë'ë Jesús lë'e yaga cruz*

(Mt. 27:32-44; Lc. 23:26-43; Jn. 19:17-27)

<sup>21</sup> Gulunë' ga bi'ë tu bönni' Cirene yaga cruz queë' Jesús, ridödisë' ni' suzë'ë la' guixi'. Lë' Simón, xúzgacabi' Alejandro, en Rufo.

<sup>22</sup> Gula'chë'ë Jesús lataj na' nazí'i le Gólgota, tu didza' hebreo le rnna lu didza' xidza', Lataj Que Böga' Ícjaru'. <sup>23</sup> Gulu'ë le guí'jë' Jesús xisi uva nutsi' nōri silá' que yaga mirra, pero Lë' biti' gu'ë le. <sup>24</sup> Ní'irō bulu'dë'ë Jesús lë'e yaga cruz, ate' gula'guisië' lari' nácuë', le gula'zí' que queëgaquië' bönni' na' rōjáquië' gudil-la. Bulu'béajë' le gaca bë' para ila'nōzinë' bízxilō idela' que queëgaquië'.

<sup>25</sup> Naca idú xsila cate' bulu'dë'ë Lë' lë'e yaga cruz. <sup>26</sup> Didza' na' bulu'zōë' lë'e yaga cruz ícjalë' Jesús ca naca le tu'quië' Lë' rnna caní: "Bōnni' Rinná Bé'enë' Bōnachi Judío." <sup>27</sup> Bulu'dá'lenë' Jesús tsōzxōn lë'egaca yaga cruz chopë' gubán, tuë' cuita lë'ë ibëla, en ia'túë' cuita lë'ë yōgōla. <sup>28</sup> Caní guca lë' na' nazúaj lu guichi lá'ayi, rnna: Gubábalenë' bönni' tuá' dō'.

<sup>29</sup> Yugu' bönni' ta'dödë' ni' tu'lidza zi'ë Jesús, en tu'tá ícjagaquië', ta'nnë':  
—¡Ōn! ¿Naru' uquínajtso' yudo' queë' Dios, ate' tsonna dzasō uchísatsu' le? <sup>30</sup> ¡Busólá cuinu' na'a, en bōtaj lë'e yaga cruz na'!

<sup>31</sup> Lë'sca' caní yugu' bixúz unná bë', en yugu' bönni' yudo' usedi tu'titjë' Lë'. Të' luzá'agaquië' tuë' ia'túë':

—Bōnachi yúbölō busölë', pero biti' gaca usólá cuinë'.

<sup>32</sup> Ta'nnë' ca':

—¡Ōn! ¿Nácatsu' Cristo, Bōnni' Inná Bé'enë' Bōnachi Israel? ¡Bōtjatsōca' na'a lë'e yaga cruz para ilë'etu', ate' tséajlë'etu' Li'!

Yugu' bönni' na' dá'gaquië' tsōzxōn len Lë' lë'egaca yaga cruz bulu'lidza zi'ë ca' Lë'.

*Le guca cate' gútië' Jesús*

(Mt. 27:45-56; Lc. 23:44-49; Jn. 19:28-30)

<sup>33</sup> Cate' bidxín idú huagubidza, guchul-la idütë yōdzōlió. Guca caní ga bidxintë idú ridōdi xihuō. <sup>34</sup> Idú ridōdi xihuō na' bë'ë Jesús zidzaj didza', rnnë':

—Eloi, Eloi, ¿lama sabactani?

Didza' hebreo ni rnna lu didza' xidza': Dios quia', Dios quia', ¿bizx que nubéaj lādXu'u neda'?

<sup>35</sup> Yugu' bönni' nacu'ë ni' bila'yōnnë' didza' ni, ate' ta'nnë':

—Buli'zëtsōca' nágali'. Elías rulidzë'.

<sup>36</sup> Ní'irō guxítí'ë tu bönni' nútsë'ë lādjagaquië', en buxúpinë' nupi zi tu le bululu rë'aj nisa. Budë'ë le lahui gui, en bë'ë le xupë' Jesús, rnnë':

—Cōztsōca'ru', uyuru' channō huidë' Elías uzōtjë' Lë'.

<sup>37</sup> Gurōdxi'ë zidzaj Jesús, en la' gútitë'. <sup>38</sup> Birōza' lari' yōdx nala' lu yudo'. Birúaj choplō, gudela' icjlō, en birúajtë zxánilō. <sup>39</sup> Bönni' na' rinná bé'enë' bönni' rōjáquië' gudil-la zuínë' lahuë' Jesús, en bilé'enë' ca na' guca gurōdxi'ë Jesús, en la' gútitë', ate' gunnë':

—Le nácatë bönni' ni gúquië' Zxí'inë' Dios.

<sup>40</sup> Nacuá'anu ca' ni' nigula, zí'tu'sō tu'yunu. Nútsa'gacanu lādjacacanu María Magdalena, en Salomé, en María, xiná'agacabi' Jacobo cuidí', en José. <sup>41</sup> Nigula ni yōjácálennu Jesús cate' ni' gudë' luyú Galilea, en gulácálennu Lë', gula'gú'unu le gulahuë'. Nacuá'anu ca' ni' ia'bál-lanu nigula zían gula'zá'lennu Lë' lu yōdzō Jerusalén.

*Ta'gu'ë Jesús yeru ba*

(Mt. 27:57-61; Lc. 23:50-56; Jn. 19:38-42)

<sup>42</sup> Chizá' ral-la, en naca dza tu'pě'ë, dza si' idxín dza lá'ayi quégaquië' bönni' judío. <sup>43</sup> Que lë ni na' bidé' José, bönni' yödzö Arimatea, bönni' lo ladjagaquië' bönni' yúlahui' lo. Ribözé' ca' dza idinná bē'ë Dios. Idú lădxë'ë guyázië' ga na' zoë' Pilato, en gunábinë' lë' gu'ë lë' lataj u'ë Jesús. <sup>44</sup> Bubáninë' Pilato tu' gunné' chigútië' Jesús, ate' bulidzë' bönni' na' rinná bé'enë' bönni' rōjáquië' gudil-la para inábinë' lë' channö chinátië' Jesús. <sup>45</sup> Cate' biyönnë' ca na' gunné' bönni' na' rinná bé'enë' bönni' rōjáquië' gudil-la, bē'ë José lataj u'ë Jesús. <sup>46</sup> Ní'irö José na' gú'uë' tu lari' xtila dxí'ado', ate' buzötjë' Jesús lë'e yaga cruz, en buchölinë' Lë' lari' na'. Ní'irö gulu'ë Lë' yeru ba nadaj lë'e gu'a guiöj. Budë'ë tu guiöj blaga zxôn ga nu riyaza ba na'. <sup>47</sup> María Magdalena, en María, xinë'ë José tu'yunu ga na' ta'gu'ë Jesús.

## 16

*Rubanë' Jesús lu yöl-la' guti*

(Mt. 28:1-10; Lc. 24:1-12; Jn. 20:1-10)

<sup>1</sup> Cate' chinadödi dza lá'ayi quégaca bönachi judío le naca dza gadxi, María Magdalena, en Salomé, en María, xinë'ë Jacobo, ta'zí'inu yugu' le rilá' zxixi para tsöjlú'ugacanu Jesús. <sup>2</sup> Ní' naca zílado' dza risí lo, yöjăcanu ra' yeru ba queë'. Bila'dxinnu ni' cate' si' gulén gubidza. <sup>3</sup> Gula'nábinu luzá'agacanu:

—¿Nuzxi cúatsö queëru' guiöj na' da' ga nu riyaza ba queë'?

<sup>4</sup> Cate' bila'dxinnu ni', bulu'yunu, en bila'lé'enu chinadúa guiöj na', ate' guiöj zxôn naca. <sup>5</sup> Gula'yú'unu yeru ba lë'e gu'a guiöj na', ate' ni' bila'lé'enu-bi' tubi' bi'i bönni' ra'bán, nácabi' gubáz lá'ayi queë' Dios. Rō'öbi' tsölá'a ibëla lu yeru ba na', nácubi' lari' tunna chiguíchido'os. Guládxide'enu. <sup>6</sup> Ní'irö bi'i na' gúdxibi' légacanu, rnnabi':

—Bíti'rö gádxili'. Ruguíajli' Jesús, Bönni' Nazaret, Bönni' na' gudë'ë lë'e yaga cruz. Chibubanë'. Biti' zoë' ni. Buli'yú ga ni gula'gu'ë Lë'. <sup>7</sup> Guli'tséaj na'a, guli'tsöjtíxjoi'i ca' yugu' bönni' usëda queë', enca' Pedro. Guiëli' légaquië': “Tsejë' Jesús luyú Galilea zí'alö ca libí'ili'. Ni' ulé'eli'-në' ca na' chigudxi cazë' libí'ili'.”

<sup>8</sup> Ní'irö bulu'rúajnu ni', bulu'zxúnnajnu ra' yeru ba na' tu' ta'zxízinu lu yöl-la' radxi ridzöbi quégacanu. Cuntu nu gulënu ca' tu' tádxinu.

*Rulu'i lahuë' Jesús lonu María Magdalena*

(Jn. 20:11-18)

<sup>9</sup> Cate' bubanë' Jesús zílado' dza na', bulu'i lahuë' zí'alö lonu María Magdalena, nigula na' bubéajë' gadxi bö' xihui' gula'yú'u lënu. <sup>10</sup> Guyéajnu yöjtíxjoi'inu nupa na' gula'dalen Jesús. Nupa ni ta'sëbi lădxigaca, en ta'bödxí yechi'. <sup>11</sup> Cate' bila'yöni didza' ruí'inu, zoë' nabanë' Jesús, ate' bilé'e quézinu Lë', biti' gula'yéajlë' lënu.

*Chopë' bönni' usëda queë' Jesús tu'lé'enë' Lë'*

(Lc. 24:13-35)

<sup>12</sup> Gudödi na', nadzá'alö buluf'i lahuë' Jesús lógaquië' chopë' bönni' usëda queë' yú'ugaquië' nöza, sōjáquië' ga naca ladaj guixi'. <sup>13</sup> Ní'irö bulu'dxinë', dutíxjoi'iguequinë' ia'zícá'rë', ate' ni xtídza'gaquië' biti' gula'yéajlë'ë.

*Le rigü'ë Jesús lu ná'agaquië' bönni' gubáz queë'**(Mt. 28:16-20; Lc. 24:36-49; Jn. 20:19-23)*

<sup>14</sup> Ga yöjsetë, buluí'i lahuë' Jesús lógaquië' idxinéajtë' tsanni ni' ta'bö'ë tahuë', ate' gudil-lë' légaquië' didza' tu' cabí ta'yéajlë'ë Lë', en tu' naca zidi icja ládxi'do'gaquië', tu' cabí gula'yéajlë'ë xtídza'gaca nupa na' bila'lé'e Lë' nubanë'. <sup>15</sup> Ní'irö gudxë' légaquië', rnnë':

—Guli'tséaj idütë yödzölió tsöjenli' libán que didza' dxi'a lógaca yúgu'të bönachi. <sup>16</sup> Nu tséajlë' neda', en idila nisa, ulá nu na', pero nu biti' tséajlë', irugu que gati nu na'. <sup>17</sup> Le ilaca bë' ni ilunë' bönni' ila'yéajlë'ë neda'. Ulu'gunë' dxin La' neda', en ulu'béajë' yugu' bö' xihui' yú'ugaca bönachi, en ilu'ë didza' izá'a. <sup>18</sup> Channö ila'zönë'-ba' bëla sínia' lu ná'agaquië', o channö ile'jë' le nachë' yöl-la' guti, biti' bi gun quégaquië'. Ila'xóa në'ë nupa te'e, ate' ulu'huóacatë.

*Ruhuëpë' Jesús yehua' yubá**(Lc. 24:50-53; Hc. 1:6-11)*

<sup>19</sup> Cate' Xanru' budxi bé'lenë' légaquië' didza' ni, buchisë' Dios Lë' yehua' yubá ga ni' gurö'ë cuitë' ibëla Lë'. <sup>20</sup> Bila'rúajë' légaquië', yöjéngaquië' libán yúgu'të yödzö. Gúcalenë' Xanru' légaquië', en benë' ga gulunë' le nácgaca bë' naca idütë li didza' tu'ë. Ca' naca.

## DIDZA' DXI'A BUZÚAJĚ' LUCAS

*Didza' rigu'ë Lucas lu në'ë Teófilo*

<sup>1</sup> Zián nupa chigulún bayudxi ulu'zúaj lu guichi idútë le nácatë, le guca ga zóaru', <sup>2</sup> ca na' bila'lé'e nupa ni' dza ni'te, ate' bulu'lu'i rë'u, en bulu'zë didza' que. <sup>3</sup> Teófilo, bönni' tsáhu'i'do', runi neda' naca dxi'a uzúaja' quiu' lu guichi, ga ze lo dzö' yúgu'të lë ni, tu' chibuguílaj bubéquia' ga ze lo dzö' ca naca yúgu'të lë na' guca dza ni'te. <sup>4</sup> Ruzúaja' quiu' lu guichi ni para inözinu' naca idútë li lë na' chinazëdu'.

*Rulu'inë' gubáz lá'ayi queë' Dios ca si' gálajbi' Juan, bönni' uquilë' bönachi nisa*

<sup>5</sup> Dza ni'te cate' gunná bë'ë Herodes luyú Judea, ni' zoë' tu bixúz lë' Zacarías. Nabábalenë' cö' bixúz, nazí'i le Cö' Queë' Abías. Elisabet, nigula queë' Zacarías na' nácanu ca' zxi'ini xi'sóë' Aarón, bönni' gúquië' bixúz lo dza ni'te. <sup>6</sup> Nácagaquië' Zacarías, en Elisabet tsahui' lahuë' Dios, ate' idú ládxi'gaquië' tunë' ca rnna xtidzë'ë Dios, en le rinná bë' xibá queë'. Caní guca, cuntú nu guca bi innë' quégaquië'. <sup>7</sup> Cuntú nu zoa bi'i quégaquië', tu' nácanu Elisabet nigula huödx, ate' chinagúlagachië' irópatë'.

<sup>8</sup> Guca beo' gul-la' uláz que cö' na' nabábalenë' Zacarías ilunë' dxin lahuë' Dios, lu yöl-la' bixúz quégaquië'. <sup>9</sup> Ca naca le nulaga lógaquië' tunë' bixúz, gul-la' uláz queë' Zacarías guyázië' lu lataj lá'ayi que yudo' para uzégui'ë yalaj lahuë' Xanru' Dios. <sup>10</sup> Tsanni ni' ruzégui'ë Zacarías na' yalaj, gula'cuá' yúgu'të bönachi ní'ilö, tu'lidza Dios. <sup>11</sup> La' ná'asö bulu'i lahuë' gubáz lá'ayi queë' Xanru' ga zoë' Zacarías na'. Zuñë' gubáz na' tsólá'a íbëla bucugu lá'ayi ga na' régui yalaj. <sup>12</sup> Cate' bilé'enë' Zacarías gubáz lá'ayi na', gurö'ë böniga, en gudxi bidzöbinë'. <sup>13</sup> Ní'irö gubáz lá'ayi na' gudxë' lë', gunné':

—Zacarías, biti' gádxinu', tu' chibiyönnë' Dios le rinabu' lahuë', ate' Elisabet, nigula quiu', uzóanu-bi' tubi' bi'i bönni'do', ate' gu'u labi' Juan. <sup>14</sup> Gata' quiu' le uzi'u xibé, en udzéjanu', ate' zián nupa ulu'dzeja ládxi'gaca cate' gálajbi' bí'ido' na', <sup>15</sup> tu' gácatëbi' zxön lahuë' Dios. Biti' gu'ajbi' xisi uva, en calëga tu le rusudxi bönachi, ate' sóalenë'-bi' Dios Bó' Lá'ayi cate' isí lo si' gálajbi'. <sup>16</sup> Gunë' Juan ni ga ulu'huóáca zián bönachi Israel queë' Xanru'. <sup>17</sup> Inóruë' lë' ca Xanru', ate' ila'cuá'alén lë' Bó' na', en yöl-la' huáca na' gula'cuá'alén Elías, bönni' bë'ë didza' uláz queë' Dios dza ni'te. Caní gunë' para únë' tuz nupa nácagaca xuz len zxi'inigaquië', en uzéajni'inë' nupa ta'dá'baga' para ilácagaca tsahui', en ucözë' bönachi para ila'z' lu në'eguequi Xanru'.

<sup>18</sup> Zacarías gunábinë' gubáz lá'ayi na', rnnë':

—¿Bizxi gaca bë' para inözda' ilaca lë ni? Chinagúla' neda', en chinagúlanu ca' nigula quia'.

<sup>19</sup> Bubi'ë didza' gubáz lá'ayi na', rnnë':

—Neda' lea' Gabriel. Runa' dxin lahuë' Dios. Lë cazë' gusól-lë'ë neda' para gú'ílëna' li' didza', en usiyónnda' li' didza' dxi'a ni. <sup>20</sup> Na'a, tu' cabí guyéajlë'u xtidza'a, icödzu', en bíti'rö gaca innó' cate' gácarö lë ni. Yúgu'të lë ni udxín cate' idxín dza que.



<sup>21</sup> Tsanni ni' raca lë ni, nacuá' bönachi ní'ilo, ta'böza Zacarías, ate' tu'bani tu' ridzenë' xidzé ga na' zoë' lu lataj lá'ayi. <sup>22</sup> Cate' burúajë' Zacarías, biti' guca gü'ilenë' légaquië' didza', ate' guléquibe'enë' bilé'enë' tu le buluí'inë' Dios lë' lu lataj lá'ayi. Bulá'a buluí'isë' Zacarías, buzéajni'inë' légaquië', tu' cabí raca innë'.

<sup>23</sup> Cate' bizá'a yugu' dza na' ral-la' gunë' dxin Zacarías lahuë' Dios, ní'irö böajë' lidxë'. <sup>24</sup> Gudödi yugu' dza na' Elisabet, nigula queë' Zacarías na', biá'anu-bi' lë'ënu bí'ido', ate' idú gayu' beo' bugá'anasinu ga zoa lídxigaquië'. Guzá' ládxi'nu, rnnanu: <sup>25</sup> "Caní runë' Xanru' quia'. Ruzá' ládxi'ë quia' bí'ido', en runë' ga bití'rö utuí'ida' lógaca bönachi."

### *Rigú'xjö'ë gubáz lá'ayi ca si' gálajbi' Jesús*

<sup>26</sup> Cate' chiguca xopa beo', buluí'i lahuë' gubáz lá'ayi na', tu' gusöl-lë'ë Dios lë' cazë' Gabriel, tsejë' Nazaret, tu yödzö luyú Galilea. <sup>27</sup> Dios gusöl-lë'ë lë' ni' tsöjyüë'-bi' tubi' bi'i nigula ra'bando' lëbi' María. Chinazí' lu ná'abi' María utsaga ná'aleni'-në' bönni' lë' José. Nababë' José di'a dza queë' David, bönni' gunná bé'enë' bönachi Israel dza ni'te. <sup>28</sup> Cate' guyázië' Gabriel na' ga zóabi' María, gudxë'-bi':

—Padiux. Dios ruzá' ládxi'ë quiu'. Xanru' Dios zóalenë' li'. Lë' cazë' benë' ga nácaru' li' bica' ba ca yúgu'të nigula.

<sup>29</sup> Cate' bilé'ebi' María gubáz lá'ayi na', gurö'öbi' böniga tu' nözi didza' na' bë'ë, en rubani ládxi'bi' nacxi sa'yéaj didza' na' bulidzë'-bi' gubáz lá'ayi na'. <sup>30</sup> Ní'irö gubáz lá'ayi na' gudxë'-bi', rnnë':

—María, biti' gádxinu', tu' chibidéli'nu' le ruzá' ládxi'ë Dios quiu'. <sup>31</sup> Na'a, tsú'ubi' tubi' bí'ido' lë'u, ate' uzú'-bi' tubi' bi'i bönni'do', ate' gu'u labi' Jesús. <sup>32</sup> Jesús ni tsépisëtë'rë', en si' Lë' Zxí'inë' Dios, Nu nayépisëtë'rö. Xanru' Dios gunë' ga inná bë'ë ca na' gunná bë'ë David, xuz gula gudödi queë'. <sup>33</sup> Jesús na' inná bé'etica'sinë' bönachi Israel, ate' le inná bë'ë Lë' catu caz tödi que.

<sup>34</sup> Ní'irö María gunábibi' gubáz lá'ayi na', rnnabi':

—¿Nacxi caz gaca lë ni, tu' cabí zóalena' bönni'?

<sup>35</sup> Bubi'ë didza' gubáz lá'ayi na', rë'ë-bi':

—Guidë' Dios Bö' Lá'ayi ga zu', ate' yöl-la' huáca queë' Dios, Nu nayépisëtë'rö, sóalen li', le gaca ca tu zzul-la rigú'u böaj ga zu'. Que lë ni na' bi'i bönni'do' na' ral-la' gálajbi', tsú'ubi' lu në'ë Dios, ate' si' labi' Zxí'inë' Dios. <sup>36</sup> Cá'anqueze Elisabet, nigula di'a dza quiu', chinuá'anu-bi' lë'ënu tubi' bi'i bönni'do' sal-la' chinagúlanu. Gula'nnë' queënu: "Nácanu nigula huödx", pero chizéaj xopa beo' nuá'anu-bi' lë'ënu bí'ido' na'. <sup>37</sup> Biti' bi' zoa le cabí séqui'në' Dios.

<sup>38</sup> Ní'irö María gunabi':

—Ni zoa'. Tsaz naca' huen dxin queë' Xanru'. Gaca quia' ca na' chigunnó'.

Ní'irö la' buza'të' gubáz lá'ayi na' ga zóabi' María.

### *María söjyubi'-nu Elisabet*

<sup>39</sup> La' dza ní'isö guyú'ubi' nöza María, ate' carelö sa'yéajbi' ga naca gu'ado', en bidxinbi' tu yödzö luyú Judea. <sup>40</sup> Ni' guyázabi' lidxë' Zacarías, en gúdxibi'-nu Elisabet:

—Padiux.

41 Cate' biyõninu Elisabet didza' na' bê'ëbi' María, la' butátë cuinbi' bi'i hué'enido' na' yú'ubi' lè'ënu, ate' bidisóalenë'-nu Dios Bõ' Lá'ayi. 42 Ní'irõ bê'ënu Elizabet zidzaj didza', rnnanu:

—¡Chinunë' Dios ga nácaru' lí' bica' ba ca yúgu'të nigula, en chinunë' ca' ga nácabi' bica' ba bí'ido' na' yú'ubi' lè'u! 43 ¿Núzxitë neda', zá'anu xinë'ë Xana' quia'? 44 Cate' biyõnda' didza' bê'u, bulidzu' neda', lu yõl-la' rudzeja queëbi' la' butátë cuinbi' bi'i hué'enido' ni yú'ubi' lè'a. 45 ¡Bica' ba lí' tu' guyéajlè'u xtídzë'ë gubáz lá'ayi, ate' udxín caz lè na' gudxé' lí' uláz queë' Xanru'!

46 Ní'irõ gunabi' María:

¡Dútë le naca' rigú'u Xanru' yõl-la' ba,

47 en rudzeja ládxi'léna'-në' Dios, Nu rusólá neda'!

48 ¡Dios caz buzá' ládxi'ë quia' neda'!

Yu'a lu në'ë, en tsaz naca' huen dxin queë'.

Na'a isí lo, ca naca' quia' ila'nná:

Bica' ba nigula na'.

49 ¡Zxõntërõ naca' le benë' Dios unná bê' quia'!

¡Lá'ayi naca' Lè'!

50 Lè' ruhuéchi' ládxi'tica'së' bõnachi tadxi Lè'

na'a dza, en dza zá'gaca.

51 Yugu' yõl-la' huáca zxõn chibenë' Lè'.

Buzõtjé' nupa gulún zxõn yõl-la' réajni'i quéguequi.

52 Bugúë' yõl-la' unná bê' quégaca nupa gulaca lo, en benë' ga gulaca lo nupa gulaca nõxaj ladxí'.

53 Benë' ga bulu'huõlaj bulu'dzë'e nupa gula'dún, en bucá'anë' cá'asõ nupa bila'lé'e yõl-la' tsahui'.

54 Gúcalenë' bõnachi Israel, nupa na' tun xichinë', tu' yõjnenë' légaquië', en buéchi' ládxi'ë légaquië'.

55 Benë' ca guzxi' lu në'ë gunë' quégaquië' xuz xtó'oru' enca' queë' Abraham, en quégaca di'a dza queë'.

56 María bugá'analenbi'-nu Elisabet idú ca tsonna beo', ate' gudõdi ni' bõajbi' lédxibi'.

*Le guca cate' gúlajbe' Juan, bõnni' uquilë' bõnachi nisa*

57 Cate' bidxín dza ral-la' sóabi' bí'ido' queënu Elisabet, buzóanu-bi' tubi' bi'i bõnni'do'. 58 Bila'yõni dzaga yu'u queënu, en yugu' di'a dza queënu ca na' guca, buéchi' ládxi'ë-nu Dios, ate' bulu'dzëjalén lënu. 59 Cate' chiguca xunu' dza zóabi' bí'ido' na', bila'dxinë' di'a dza queënu para ila'chúguië' lu xipëla'bi' bi'i bõnni'do' na' lè na' gaca bê' néquibi' queë' Dios, ate' té'ennë' ilu'ë labi' Zacarías ca na' lè' xúzibi'. 60 Ní'irõ bubí'ínu didza' Elisabet, xiná'abi', rnnanu:

—Calëga. Juan si' labi'.

61 Gula'nábinë'-nu, ta'nnë':

—¿Bizx que? Cuntu nu di'a dza quiu' lè' Juan.

62 Ní'irõ bulu'lá' bulu'lú'isinë', gula'nábinë' xúzibi' nacxi ré'ënë' gu'ë labi'. 63 Zacarías na' gunabë' tu blágado', ate' buzúajé' lahui caní: Juan lëbi'. Bulu'bánninë' yúgu'të'. 64 La' ní'isõ bõáljatë ru'ë Zacarías na', en buguítjatë lúdxë'ë, ate' bê'ë didza' le gulu'ë Dios yõl-la' ba. 65 Ní'irõ guládxinë', en bulu'bánninë' yúgu'të dzaga yu'u quégaquië', ate' yúgu'të yõdzõdo' nacuá' lu gu'ado' luyú' Judea, guzë didza' ca guca lè ni. 66 Gula'zá' ládxi'gaca yúgu'të

nupa bila'yöni ca na' guca, ta'nná: “¿Nacxi caz gácabi' bi'i bönni'do' ni? Le nácatë Xanru' zóalenë'-bi'.”

*Didza' bëë Zacarías uláz queë' Dios*

<sup>67</sup> Ní'irö Dios Bö' Lá'ayi bidisóalenë' Zacarías, xúzibi' Juan, ate' bëë didza' uláz queë' Dios, rnnë':

<sup>68</sup> ;Yöl-la' ba Dios, Xángaca bönachi Israel tu' buduyüë' rë'u, bönachi queë', en böá'uë' rë'u!

<sup>69</sup> ;Gusöl-lë'ë queëru' Bönni' usölë' rë'u, len yöl-la' huáca zxön queë'!

Bönni' ni guljë' ládajgaca di'a dza queë' David, huen dxin queë' Dios.

<sup>70</sup> ;Dza ni'te guzxi' lu në'ë gunë' ga gaca caní! Raca ca na' gunné' lu ruá'agaquië' bönni' gulu'ë didza' uláz queë'.

<sup>71</sup> Guzxi' lu në'ë usölë' rë'u lu ná'agaca nupa tequi rë'u zi', enca' lu ná'agaca nupa biti' ta'lé'e rë'u dxi'a.

<sup>72</sup> Guzxi' lu në'ë huéchi' ládxë'ë xuz gudödi queëru', en tsöjnenë' le guzxi' lu në'ë le naca lá'ayi.

<sup>73</sup> Lë ni benë' tsutsu xtídzë'ë, en guzxi' lu në'ë, le gunë' queë' Abraham, xuz gudödi queëru', le naca tu le ral-la' gunë' queëru' rë'u.

<sup>74</sup> Guzxi' lu në'ë usölë' rë'u lu ná'agaca nupa biti' ta'lé'e rë'u dxi'a para cabirö gádxiru' gunru' xichinë' Lë',

<sup>75</sup> en para gácaru' ba'a ladxi', en idú dxi'a lahuë' Lë' yúgu'të dza sóaru' ibanru'.

<sup>76</sup> Li', zxi'ina'do', si' lo' bönni' ru'ë didza' uláz queë' Dios unná bë' tu' tsöjnöru' ca Xanru' caz, en upó'o nöza ga tödë'.

<sup>77</sup> Gunu' ga ila'nözi bönachi queë' ca gaca ulu'lágaca, en ca na' uniti lahuë' Dios dul-la' nabága'gaca.

<sup>78</sup> Caní gaca, tu' ruhuéchi'da' ládxë'ë Dios rë'u, en runë' ga tsení' queëru' Bönni' na' náquië' bení idú.

<sup>79</sup> Lë' uzení'ë quégaca nupa nacué' gapa naca chul-la, en gapa nacué' nupa chizóa ilátigaca para ugú'ë rë'u nöza ga cö'ö dxi ládxi'do'oru'.

<sup>80</sup> Guzxönbi' bi'i bönni'do' na', en bidipa ládxi'bi'. Guzóasibi' gapa naca lu lataj cá'asö cate' bidxinrö dza buluí'i lobi' lógaca bönachi Israel.

## 2

*Le guca cate' gúlajbi' Jesús*

(Mt. 1:18-25)

<sup>1</sup> Lu dza na' gunná bëë Augusto César, bönni' Roma, ila'yaza lu guichi yúgu'të bönachi nacué' yödzölió. <sup>2</sup> Cate' gusi' lo ta'yaza lu guichi caní, rinná bëë bönni' lë' Cirenio luyú Siria. <sup>3</sup> Yúgu'të bönachi yójaca yödzö que queéguqui ga na' zeaj nababa para ila'yaza lu guichi. <sup>4</sup> Guzë'ë José yödzö Nazaret luyú Galilea, sa'yéajë' luyú Judea, en bidxinë' yödzö Belén, ga ni' guljë' David, tu' guljë' José ládajgaca di'a dza queë' David na'. <sup>5</sup> Guyijë' José ni' para tsázië' lu guichi, ate' dzágabi'-në' María, bi'i nigula nazi' lu ná'abi' utsaga ná'aleni' lë', en chizóa sóabi' bí'ido' queë'bi'. <sup>6</sup> Cate'

ni' nacu'ë lu yödzö Belén, bidxín dza sóabi' bí'ido' queëbi'. <sup>7</sup> Buzóanu-bi' tubi' bi'i bönni'do', bi'i huáca queënu. Buchólinu-bi' yugu' lári'do', ate' gudíxjanu-bi' tu lu yú'udo' ga tun chi'i le táguba' böa' quégaca bönachi yú'ugaca nöza. Caní guca, tu' cabí bidzöli lataj ila'cu'ë lu yu'u ga ni' ta'dxín bönachi yú'ugaca nöza.

*Tu'lu'i lahuë' gubáz lá'ayi queë' Dios ga nacu'ë bönni' tu'yúë'-ba' bö'cu' zxila'*

<sup>8</sup> Gala' ra' yödzö Belén nacu'ë bönni' tu'yúgaquië'-ba' bö'cu' zxila' la' guixi', tapa chí'igaquië'-ba' chi'i dzö'ölö. <sup>9</sup> La' buluf'itë lahuë' gubáz lá'ayi queë' Xanru' ga na' nacu'ë. Yöl-la' bení' queë' Xanru' buzení' ga na' nacu'ë, ate' guládxinë'. <sup>10</sup> Ní'irö gubáz lá'ayi na' gudxë' légaquië', rnnë':

—Biti' gádxili'. Na'a rusiyönda' libí'ili' didza' le gun ga udzëjade'eli, le ulu'zì' ca' xibé yúgu'të bönachi. <sup>11</sup> Na'a chigúlajbi' lu ladzë' David Nu usölá libí'ili'. Nu ni naca Cristo, Xanru'. <sup>12</sup> Lë ni gaca bë'ëbi'. Udzöllili'-bi' Bí'ido' na', narölibi' yugu' lári'do', en dëbi' tu lu yú'udo' ga tun chi'i le táguba' böa' quégaca bönachi yú'ugaca nöza.

<sup>13</sup> Ga na' zoë' gubáz lá'ayi na', tsárido'os bulu'lu'i lógaquië' zianrö ca' gubáz lá'ayi queë' Dios, narúajgaquië' yehua' yubá, en ta'gu'ë Dios yöl-la' ba, ta'nnë':

<sup>14</sup> ¡Yöl-la' ba Dios zoë' xitsá',  
ate' luyú gaca le cuéqui dxi ládxi'do'gaquië'  
bönni' raza ládxe'ë Dios légaquië'!

<sup>15</sup> Cate' bulu'zë'ë gubáz lá'ayi na' ga ni' nacu'ë, söjhuöjgaquië' yehua' yubá, ní'irö gulé luzë'ë tuë' ia'tué' bönni' uyú bö'cu' zxila' na', ta'nnë':

—Uyéajtsöca'ru' Belén para ilé'eru' lë ni chiguca ca na' chibusiyönnë' Xanru' rë'u.

<sup>16</sup> La' yöjácatië', ate' yöjxáca'gaquië' María len José, enca' bí'ido' na', dëbi' tu lu yú'udo' ga tun chi'i le táguba' böa' quégaca bönachi yú'ugaca nöza. <sup>17</sup> Cate' bila'lé'enë' lëbi', gula'guíxjö'ë lë na' si' busiyönnë' gubáz lá'ayi na' légaquië' ca naca queëbi' bí'ido' na'. <sup>18</sup> Bulu'bani yúgu'të nupa bila'yöni didza' gulu'ë bönni' tu'yúë' bö'cu' zxila' na'. <sup>19</sup> María gulú'usö icja náganu didza' ni, ate' guzá' ládxi'nu ca naca que. <sup>20</sup> Söjhuöjgaquië' bönni' na' tu'yúë'-ba' bö'cu' zxila', tunë' zxön Dios, en ta'gu'ë Lë' yöl-la' ba ni'a que yúgu'të lë na' bila'yönnë', en bila'lé'enë', le guca ca na' busiyönnë' gubáz lá'ayi na' légaquië'.

*Ta'gu'ë-bi' bí'ido' Jesús lu në'ë Dios*

<sup>21</sup> Cate' chiguca xunu' dza zóabi' bí'ido' na', gula'chúguië' lu xipéla'bi' lë na' naca bë' néquibi' queë' Dios, ate' gulu'ë labi' Jesús ca na' chibë' cazë' labi' gubáz lá'ayi na' zí'alö cate' si' tsú'ubi' lë'ënu xiná'abi'.

<sup>22</sup> Cate' chibizá'a dza que le tu'pá'a cuíngacanu nigula ca rinná bë' xibá queë' Moisés, gula'chë'ë-bi' bí'ido' Jesús yödzö Jerusalén para ila'gu'ë-bi' lu në'ë Xanru' Dios. <sup>23</sup> Caní gulunë', tu' nazúaj lu guichi lu xibá queë' Xanru' le rnna: “Yúgu'tëbi' bi'i bönni'do' nácagacabi' bi'i zí'alö queënu xiná'agacabi', ulu'béajë'-bi' quez queë' Xanru' Dios.” <sup>24</sup> Que lë ni na' yöjácië' ni' para ilútië'-ba', en ila'gu'ë-ba' lahuë' Dios chópaba' gúgudo' o chópaba' budödu' ca na' rinná bë' xibá queë' Xanru' Dios.

<sup>25</sup> Dza ní'isö zoë' tu' bönni' lë' Simeón lu yödzö Jerusalén. Bönni' ni náquië' tsahui', en reaj ládxe'ë Dios. Ribözë' Bönni' na' isöl-lë'ë Dios, Bönni' na' gácalenë' bönachi Israel. Dios Bö' Lá'ayi zóalenë' Simeón na', <sup>26</sup> en

chibuluf'inë' lë' bití' gátíë' cate' ilé'erönë' Cristo, Bönni' na' isöl-lë'ë Xanru' Dios. <sup>27</sup> Bidxinë' Simeón na' chila yudo' tu' guchë'ë Dios Bö' Lá'ayi lë' ni'. Cate' xuz xiná'abi' gula'chë'ë-bi' bí'ido' Jesús chila yudo' para ilunë' queëbi' ca rinná' bë' xibá' na', <sup>28</sup> ní'rö bunidë'-bi' Simeón na', en guyéaj ládxe'ë Dios, rnnë':

<sup>29</sup> Xana', na' a huáca gunnu' neda' lataj gátia', soa dxi ládxa'a tu' chiguca le gudxu' neda', huen dxin quiu'.

<sup>30</sup> Chibilé'eda' Nu na' buzóa cazu', Nu usölá bönachi,

<sup>31</sup> Nu na' ulú'u lahui lógaca yúgu'të bönachi.

<sup>32</sup> Lëbi' nácabi' bení' le uzení' bönachi izá'a, en nácabi' ca' bení' quégaca bönachi Israel quiu'.

<sup>33</sup> Bulu'bánninë' José, en María, xiná'abi' bí'ido' Jesús, ca naca lë' na' gunnë' Simeón ca naca queëbi' Jesús. <sup>34</sup> Simeón na' gunábinë' Dios gunë' ga gaca dxi'a quégaquië', ate' gudxe'-nu María, xiná'abi' Jesús, rnnë':

—Buyútsöca'. Bi'i ni nuzöë'-bi' Dios para gunbi' ga ila'chixi bönachi zían, ate' ulu'huóasa bönachi zían ladaj bönachi Israel. Gácabi' tu le naca bë', ate' ila'nnë' bönachi queëbi'. <sup>35</sup> Gaca caní para ila'lá' lahui le ta'zá' ládxi'gaca bönachi zían. Yugu' lë' ni ilaca quiu' ca tu guié' tuchi' le tsaza ládxi'do'o.

<sup>36</sup> Ana, nigula ru'ínu didza' uláz queë' Dios, zóanu ca' ní'. Nācanu xzí'inë' Fanuel, bönni' nababë' di'a dza queë' Aser. Chinagúlada'anu Ana na', tu' guzóalennu bönni' queënu idú gadxi iz gudödi gúcanu ra'bando', <sup>37</sup> ate' bugá'ananu tuzi cate' bidxintë' dza chiyú'unu idú ca tápalalaj yu' tapa iz. Biti' ca' rubí'i ruzá'anu ga naca chila yudo'. Rëla, en te dza reaj ládxi'nu-në' Dios, runnu gubasa, en rulídzanu-në' Dios. <sup>38</sup> La' ná'asö bidxintënu ni', rënu-në' Dios: "Xclenu'." Gudíxjöi'ínu yúgu'të bönachi ca naca queëbi' bí'ido' Jesús, bönachi na' nacua' Jerusalén, nupa ta'böza dza idxín Nu na' isöl-lë'ë Dios para gácalen bönachi.

### *Søjhuöjgaquië' José, en María yödzö Nazaret*

<sup>39</sup> Gudödi gulunë' José, en María yúgu'të le rinná' bë' xibá' queë' Xanru' Dios, yøjhuöjgaquië' ládzaqaquië' Nazaret luyú Galilea. <sup>40</sup> Guzxönbi' bí'ido' Jesús, en bidípa ládxi'bi'. Guta' queëbi' yöl-la' réajni'i, ate' zxön naca le ruzá' ládxe'ë queëbi' Dios.

### *Rudxinbi' bí'ido' Jesús chila yudo'*

<sup>41</sup> Yugu' iz röjáquië' xuz xiná'abi' Jesús Jerusalén cate' raca Laní Pascua, laní tu' subanë' bönni' judío ca benë' Dios, bubéajë' xuz xtó'ogaquië' luyú Egipto. <sup>42</sup> Cate' chiyú'ubi' chinnu iz bi'i Jesús, yöjáquië' Jerusalén ca tun cazë' cate' raca laní na'. <sup>43</sup> Cate' gudödi laní, søjhuöjgaquië', ate' bugá'anabi' bí'ido' Jesús Jerusalén, pero bití' téquibe'enë' José, en María, xiná'abi' Jesús. <sup>44</sup> Tu' téquinë' nútsa'bi' ladaj bönachi zían yú'ulengaca légaquië' nōza, tu dza nayá' gula'zë'ë. Ní'rö cate' bulu'guiljë'-bi' gapa nacua' di'a dza quégaquië', en gapa nacua' nupa núnbë'gaquië' <sup>45</sup> bití' bulu'dzölinë'-bi'. Que lë' ni na' yøjhuöjgaquië' Jerusalén, søjdljagaquië'-bi'.

<sup>46</sup> Cate' chiguca dza bunni, bulu'dzölinë'-bi' ga naca chila yudo', rö'öbi' gatsaj lāhui'lë' bönni' yudo' tu'sédinë'. Ruzë' nágabi' didza' tu'ë, en rinaba yúdxibi' légaquië'. <sup>47</sup> Bulu'bani yúgu'të nupa bila'yöni didza' bë'ëbi' ca naca yöl-la' réajni'i queëbi', en ca nácagaca didza' bubí'ibi'. <sup>48</sup> Cate' bila'lé'enë'-bi' xuz xiná'abi', bulu'bánninë', ate' gúdxinu-bi' xiná'abi', rnnanu:

—Zxi'ina', ¿bizx que benu' caní queëtu'? Buyútsöca', len yöl-la' ruúbi ruguí' neda', en xuzu' buguúljatu' lí'.

49 Ní'irö gúdxibi' Jesús légaquië', rnnabi':  
—¿Bizx que buguñjali' neda'? ¿Naru' cabí nözili' run bayudxi guna' xichinë' Xuza'?

50 Biti' gula'yéajni'inë' xuz xiná'abi' didza' na' gúdxibi' légaquië'.

51 Jesús böajlenbi' légaquië', budxinbi' Nazaret, ate' benbi' ca rnna xtídza'gaquië' xuz xiná'abi'. María, xiná'abi' Jesús, gulú'sönu icja ládxi'do'onu yúgu'të lë ni. 52 Ráta'rö yöl-la' réajni'i queëbi' bi'i Jesús, en rízxönbí'. Burúajbi' dxi'a lahuë' Dios, en lógaca bönachi.

### 3

*Libán runë' Juan, bönni' ruquilë' bönachi nisa*  
(Mt. 3:1-12; Mr. 1:1-8; Jn. 1:19-28)

1 Cate' chiguca chinu iz rinná bé'enë' Tiberio César idütë yödzülió, rinná bë'ë Poncio Pilato luyú Judea, ate' Herodes rinná bë'ë ca' luyú Galilea. Felipe, böchë'ë Herodes na', rinná bë'ë luyú Iturea, en luyú Traconite, ate' Lisantias rinná bë'ë luyú Abilinia. 2 Yugu' dza na' nácagaquië' bixúz lo Anás, en Caifás, ate' la' ná'asö Dios bë'lenë' Juan, xzi'inë' Zacarías, didza' cate' ni' zoë' Juan lu lataj cá'asö. 3 Ridë' Juan ni yúgu'të lataj nacúa' ra' yegu Jordán, runë' libán ca ral-la' ila'dila nisa nupa tu'bí'i ládxi'gaca para uniti lahuë' Dios dul-la' nabága'gaca. 4 Guca caní ca na' nazúaj lu guichi lá'ayi yugu' didza' bë'ë Isaías, bönni' bë'ë didza' uláz queë' Dios, rnna: Riyón chí'ë bönni' rulidzë' lu lataj cá'asö, rnnë':

“Buli'pá'a nöza lu icja ládxi'do'oli' para idxín Xanru' queëli'.

Buli'béaj li yugu' nöza lasi ga tödë'.

5 Ral-la' ulígaca yúgu'të gapa naca röga', en ulu'huóaca lachi' yúgu'të guí'a sibi, en guí'ado'.

Ral-la' ulu'rúaj li nöza nayecja nabí'igaca, ate' ulu'huóaca dxi'a nöza guiój.

6 Ila'lé'eni yúgu'të bönachi Bönni' na' isöl-lë'ë Dios, Nu usölá bönachi.”

7 Cate' bila'rúaj bönachi zían para ila'dila nisa lu në'ë Juan, lë' gudxë' légaquië':

—Libi'ili', di'a dza quégacaba' bëla sínia'. ¿Zoa nu buluf'i libí'ili' ral-la' izxúnajli' yöl-la' rusiúdxí si' gaca quégaca bönachi? 8 Na'a, guli'gún le ilaca bë' chibubí'i ládxi'li', en bití' sa' ládxi'li', bití' innali': “Nácatu' tsahuí' tu' nácatu' di'a dza queë' Abraham”, tu' rea' libí'ili', huáca quelé'ë Dios yugu' guiój ni, en gunë' ga ulu'huóaca di'a dza queë' Abraham. 9 Nácali' ca yugu' yaga. Chizóa riböza guíë huága para ichugu yugu' yaga. Yúgu'të yaga bití' ta'bía le naca dxi'a, ila'chúguië' yaga na', en ila'gu'ë léguequi lu guí'.

10 Ní'irö bönachi nacúa' ni' gula'nabi lë', ta'nná:

—¿Nacxi gúntsatu'?

11 Bubi'ë didza' Juan, rë' légaquië':

—Nu dë chopá cö' zxe ral-la' unödzej que nu bití' dë que, ate' nu dë le gagu, lëscá caní ral-la' quisi quégaca nupa bití' dë le ilágugaca.

12 Bal-lë' bönni' tu'quizxjë' lázagaca bönachi uláz que yödzo zi'tu' bila'dxinë' ca' ni' para ila'dilë' nisa, ate' gula'nábinë' lë', ta'nnë':

—Bönni' usëdi, ¿nacxi gúntsatu' netu'?

13 Juan gudxë' légaquië':

—Bití' uquízjaróli' tsca le chigunnë' bönni' yú'uli' lu në'ë.

14 Bal-lë' bönni' röjáquië' gudil-la gula'nábinë' ca' lë', ta'nnë':

—¿Nazxi netu', nacxi guntu'?

Juan gudxë' légaquië':

—Bíti'rö gun gádxili' bönachi para cúali' le dë quéguequi. Bíti'rö innëli' quégaca bönachi le cabí nácatë para gunli' ga ìla'guizxaj libí'ili', pero guli'tsaza ládxi'li' tsca ráxjali'.

<sup>15</sup> Ta'zá' ládxi'gaca bönachi na' ta'böza Bönni' na' ral-la' isöl-lë'ë Dios, channö náquië' Juan na' Bönni' lë' Cristo. <sup>16</sup> Bubi'ë didza' Juan, gudxë' yúgu'të', rnnë':

—Le nácatë neda' ruquila' libí'ili' nisa, pero zë'ë Bönni' gunë' le ruluí'isö yöl-la' ridila nisa ni, ichízië' libí'ili' Dios Bö' Lá'ayi, en le naca guí' queë'. Bönni' ni náparë' yöl-la' unná bë' ca neda', ate' neda' biti' naca' lesaca' ilecja' le nudë'ë ni'e. <sup>17</sup> Zönë' lu në'ë böcö' queë', ate' ulubë' ga rilubi xzoa' xtila queë', lë ni ruluí'i le gaca quégaca bönachi. Utubë' xzoa' xtila, en cu'ë le xilataj, pero bëbu que uzégui'ë lu guí' le catu caz ulu.

<sup>18</sup> Ca nácgaca didza' ni, en ia'zica'rö zían didza' le guchízië' icja nágagaca bönachi, benë' libán Juan lógaquië' que didza' dxi'a. <sup>19</sup> Juan na' buzégui'ë didza' Herodes, bönni' rinná bë'ë, tu' zóalenë'-nu Herodías, nigula queë' Felipe, bönni' böchë'ë, enca' tu' runë' zían le ruá' dö'. <sup>20</sup> Ní'irö benë' Herodes tu le nácarö huiá' dö', gulu'ë Juan na' lidxi guíë'.

*Ridíle' Jesús nisa*

*(Mt. 3:13-17; Mr. 1:9-11)*

<sup>21</sup> Dza na' cate' cabí nadzunë' Juan lidxi guíë, cate' ni' ruquilë' bönachi nisa, bidilë' ca' Jesús nisa. Cate' ni' rulidzë' Dios, gualaj lúzxiba, <sup>22</sup> ate' bötjë' Dios Bö' Lá'ayi, bidxinë' ga na' zoë' Jesús. Buluí'ihuë', rinë'ë ca riná' tuba' gu'dôdo', ate' biyön chi'i Nu ruí' didza' yehua' yubá, rna:

—Li' nacu' Zxí'ina'. Nadxí'ida' Li', en raza ládxa'a Li'.

*Yugu' xuz xinë'e gudödi queë' Jesús*

*(Mt. 1:1-17)*

<sup>23</sup> Cate' gusí lahuë' runë' xichinë' Jesús, yu'ë ca chi uruá' iz. Téquiguequi bönachi náquië' zxi'inë' José. Jesús náquië' zxi'ini xi'sóë' Elí, nu na' náquië' xúzinu María, nigula queë' José na'.

<sup>24</sup> Elí na' gúquië' zxi'inë' Matat,

nu ni guca zxi'inë' Leví,

nu ni guca zxi'inë' Melqui,

nu ni guca zxi'inë' Jana,

nu ni guca zxi'inë' ia'túë' José.

<sup>25</sup> José ni gúquië' zxi'inë' Matatías,

nu ni guca zxi'inë' Amós,

nu ni guca zxi'inë' Nahum,

nu ni guca zxi'inë' Esli,

nu ni guca zxi'inë' Nagai.

<sup>26</sup> Nagai na' gúquië' zxi'inë' Mat,

nu ni guca zxi'inë' ia'túë' Matatías,

nu ni guca zxi'inë' Semei,

nu ni guca zxi'inë' ia'túë' José,

nu ni guca zxi'inë' Judá.

<sup>27</sup> Judá na' gúquië' zxi'inë' Joana,

nu ni guca zxi'inë' Resa,

nu ni guca zxi'inë' Zorobabel,

nu ni guca zxi'inë' Salatiel,  
nu ni guca zxi'inë' Neri.  
28 Neri na' gúquië' zxi'inë' ia'túë' Melqui,  
nu ni guca zxi'inë' Adi,  
nu ni guca zxi'inë' Cosam,  
nu ni guca zxi'inë' Elmodam,  
nu ni guca zxi'inë' Er.  
29 Er na' gúquië' zxi'inë' Josué,  
nu ni guca zxi'inë' Eliezer,  
nu ni guca zxi'inë' Jorim,  
nu ni guca zxi'inë' ia'túë' Matat.  
30 Matat na' gúquië' zxi'inë' Leví,  
nu ni guca zxi'inë' Simeón,  
nu ni guca zxi'inë' Judá,  
nu ni guca zxi'inë' ia'túë' José,  
nu ni guca zxi'inë' Jonán,  
nu ni guca zxi'inë' Eliaquim.  
31 Eliaquim na' gúquië' zxi'inë' Melea,  
nu ni guca zxi'inë' Mainán,  
nu ni guca zxi'inë' Matata,  
nu ni guca zxi'inë' Natán.  
32 Natán na' gúquië' zxi'inë' David,  
nu ni guca zxi'inë' Isaí,  
nu ni guca zxi'inë' Obed,  
nu ni guca zxi'inë' Booz,  
nu ni guca zxi'inë' Salmón,  
nu ni guca zxi'inë' Naasón.  
33 Naasón na' gúquië' zxi'inë' Aminadab,  
nu ni guca zxi'inë' Aram,  
nu ni guca zxi'inë' Esrom,  
nu ni guca zxi'inë' Fares,  
nu ni guca zxi'inë' ia'túë' Judá.  
34 Judá na' gúquië' zxi'inë' Jacob,  
nu ni guca zxi'inë' Isaac,  
nu ni guca zxi'inë' Abraham,  
nu ni guca zxi'inë' Taré,  
nu ni guca zxi'inë' Nacor.  
35 Nacor na' gúquië' zxi'inë' Serug,  
nu ni guca zxi'inë' Ragau,  
nu ni guca zxi'inë' Peleg,  
nu ni guca zxi'inë' Heber,  
nu ni guca zxi'inë' Sala.  
36 Sala na' gúquië' zxi'inë' Cainán,  
nu ni guca zxi'inë' Arfaxad,  
nu ni guca zxi'inë' Sem,  
nu ni guca zxi'inë' Noé,  
nu ni guca zxi'inë' Lamec.  
37 Lamec na' gúquië' zxi'inë' Matusalén,  
nu ni guca zxi'inë' Enoc,  
nu ni guca zxi'inë' Jared,



nu ni guca zxi'inë Mahalalel,  
 nu ni guca zxi'inë ia'túë Cainán.  
<sup>38</sup> Cainán na' gúquië' zxi'inë' Enós,  
 nu ni guca zxi'inë' Set,  
 nu ni guca zxi'inë' Adán,  
 nu ni guca ca zxi'ini cazë' Dios.

## 4

*Satanás tu' xihui' rë'ëni usubaga' Jesús dul-la'*

(Mt. 4:1-11; Mr. 1:12-13)

<sup>1</sup> Buzë'ë Jesús ra' yegu Jordán, zóalenë' Dios Bõ' Lá'ayi Lë', ate' Dios Bõ' Lá'ayi na' guchë'ë Jesús lu lataj cá'asõ. <sup>2</sup> Guzõë' Jesús ni' idú ca choá' dza, ate' gú'uni tu' xihui' usubaga' Jesús dul-la'. Biti' bi gudahuë' Jesús yugu' dza na', ate' gudõdi ni' ridunë'. <sup>3</sup> Ní'irõ tu' xihui' na' gudxi Jesús, rnna:

—Channõ naca cazu' Li' Zxi'inë' Dios, gunnátsõca' ulu'huõáca guiõj ni yõta xtila.

<sup>4</sup> Bubi'ë didza' Jesús, rë' le:

—Nazúaj lu guichi, rnna: “Calégasõ yõta xtila nabánigaca bõnachi, pero nabánigaca ca' yúgu'të xtídzë'ë Dios.”

<sup>5</sup> Ní'irõ guchë' tu' xihui' na' Jesús ga naca tu lu gu'fa sibi ate' tu chí'ido'osõ buluí' Lë' yúgu'të xilátjagaca nupa ta'nná bë' yõdzõliõ. <sup>6</sup> Tu' xihui' na' rë' Jesús, rnna:

—Gunna' quiu' yúgu'të xilátjagaca nupa ta'nná bë' ni, en yõl-la' tsahui' quéguequi, tu' nadõdi lu na'a yúgu'të lë' ni, ate' nu rë'ënisida' ruá'a que. <sup>7</sup> Channõ Li' uzóa zxibu' lahua', en gunu' neda' zxõn, yúgu'të lë' ni guequi quiu'.

<sup>8</sup> Bubi'ë didza' Jesús, rë' le:

—Gucuita ga zoa', Satanás, tu' nazúaj lu guichi lá'ayi le rë' netu', rnna: “Xanu' Dios tseaj ládxu'u-në', en tuzë' Lë' gunu' xichinë'.”

<sup>9</sup> Ní'irõ tu' xihui' na' guchë' Jesús Jerusalén, ate' budxía Lë' lu zõ'õ ícjo'olõ yudo', en rë' Lë':

—Channõ nacu' Zxi'inë' Dios, busuládzu'tsõca' cuinu' ni <sup>10</sup> tu' nazúaj lu guichi lá'ayi, rnna:

Dios isõl-lë'ë gubáz lá'ayi queë', ilácalenë' Li'.

<sup>11</sup> Lu ná'agaquië' ulu'chisë' Li' para cabí tsõjchëgu'u guiõj, en biti' gunu' zi' ni'u.

<sup>12</sup> Bubi'ë didza' Jesús, rë' le:

—Nazúaj lu guichi lá'ayi le rë' netu': “Biti' si' bë'u Xanu' Dios.”

<sup>13</sup> Cate' biti' budzõli tu' xihui' na' ia'tú le si' bë' Jesús, buzá' ga zoë' tu chí'ido'.

*Risí lahuë' Jesús runë' xichinë' luyú Galilea*

(Mt. 4:12-17; Mr. 1:14-15)

<sup>14</sup> Bõajë' Jesús luyú Galilea, dë lu në'ë yõl-la' huáca queë' Dios Bõ' Lá'ayi. Guzë' didza' ca naca queë', ate' bila'yõni bõnachi nacua' yúgu'të yõdzõ idú gásibi'ilõ. <sup>15</sup> Busëdinë' Jesús bõnachi gapa naca lu yu'u ga tu'dubë' tu'sëdë' bõnni' judío queë' Dios, ate' yúgu'të bõnachi gulún Lë' zxõn.

*Le benë' Jesús yõdzõ Nazaret, ga naca ladzë'*

(Mt. 13:53-58; Mr. 6:1-6)

16 Ní'irō budxinē' Jesús yōdzō Nazaret ga ni' guzxōnē'. Cate' bidxín dza lá'ayi quégaquiē' bōnni' judío, ca run cazē' Jesús, guyáziē' lu yu'u ga tu'dubē' tu'sedē' bōnni' judío queē' Dios, ate' guzuínē' para ulabē' tu le nazúaj lu guichi lá'ayi. 17 Bulu'dödē' lu nē'ē' Jesús guichi ga na' nazúaj didza' bē'ē' Isaías, bōnni' bē'ē' didza' uláz queē' Dios. Cate' gusaljē' guichi na', budzōlinē' ga nazúaj lu guichi le rnna:

18 Zóalenē' Bō' Lá'ayi queē' Xanru' neda' tu' nubéajē' neda' quez queē' para usiyōnda' bōnachi yechi' didza' dxi'a. Gusōl-lē'ē' neda' para una' nupa raca zi' lādxi'do'guequi, en usiyōnda' nupa nadzúngaca, ca gaca ulu'lágaca, en úna' bōnachi nachul-la lóguequi, en usōlá' bōnachi zoa nu run léguequi zi',

19 en guna' libán que dza ruzá' lādxē'ē' Xanru' Dios quégaca bōnachi.

20 Ní'irō butubē' Jesús guichi na', en bugu'ē' le lu nē'ē' bōnni' rapa chi'ē' yugu' guichi lá'ayi, ate' gurō'ē'. Ní'irō yúgu'tē' nupa nudúbigaca lu yu'u na' gula'ná' Jesús. 21 Gusí lahuē' Jesús rē' légaquiē':

—Na'a dza ni zóali' libí'ili', rudxín caz le nazúaj lu guichi ni.

22 Yúgu'tē' gula'nnē' dxi'a queē', en bulu'bánninē' ca naca didza' dxi'a ru'ē', ate' ta'nnē':

—¿Naru' calēga bōnni' ni zxí'inē' José?

23 Jesús rē' légaquiē', rnnē':

—Nadxi huēli' neda' lē' ni ta'nná bōnachi, le rnna: “Li', bōnni' ruún bōnachi, bun cuinu'.” Lē'sca' caní huēli' neda': “Yugu' le biyōnitu' benu' Capernaum, ben ca' ga ni naca ladzu'.”

24 Gunnē' ca' Jesús:

—Le nácatē' rea' libí'ili', channō zoē' nu bōnni' ru'ē' didza' uláz queē' Dios, biti' tun bōnachi uládz queē' lē' bal. 25 Le nácatē' rea' libí'ili', gula'cuá'anu zían nigula uzēbi luyú Israel yugu' dza ni' zoē' Elías, bōnni' bē'ē' didza' uláz queē' Dios, cate' ni' biti' gulaj guiōj idú ca tsonna iz yu' xopa beo', ate' guca gubín luyú na', 26 pero Dios biti' gusōl-lē'ē' Elías na' ga nacuá'anu nigula uzēbi nabábagacanu Israel, pero gusōl-lē'ē' lē' ga na' zóanu tu nigula uzēbi lu yōdzō Sarepta, le nababa yōdzō Sidón.

27 Lē'sca' caní, gula'cuá' zían nupa te'e huē' nudzu' ruzōdi luyú Israel dza ni' zoē' Eliseo, bōnni' bē'ē' didza' uláz queē' Dios, pero biti' bōáquiē' nu bōnni' nútsē'ē' ladaj bōnachi Israel na', pero bōáquiē' tuzē' Naamán, bōnni' nababē' luyú Siria.

28 Cate' bila'yōnnē' didza' ni, gula'lenē' yúgu'tē' bōnni' nacu'ē' lu yu'u ga na' tu'dubē' tu'sedē' queē' Dios. 29 Ní'irō gula'yasē', en bulu'béajē' Jesús ní'ilō ra' yōdzō. Gula'chē'ē' Lē' ga naca lē'e guí'a guiōj ga na' dē'ládzagaquiē' para ulu'suládzue' Lē' ga naca lē'e guí'a guiōj na'. 30 Ní'irō gudödē' Jesús gatsaj láhui'lō ga na' nacu'ē', söhuōajtē'.

*Tu bōnni' yu'u lē' bō' xihui'*

*(Mr. 1:21-28)*

31 Ní'irō guyijē' Jesús yōdzō Capernaum luyú Galilea, ate' busédinē' bōnachi yugu' dza lá'ayi quégaquiē' bōnni' judío. 32 Bulu'bánninē' ca naca le rusédinē' Jesús légaquiē', tu' bē'ē' didza' ca tu bōnni' dē' lu nē'ē' yōl-la' unná bē'.

33 Zóatē' ca' tu bōnni' yu'u lē' bō' xihui' lu yu'u ga na' tu'dubē' tu'sedē' queē' Dios, ate' bē'ē' zidzaj didza', 34 rnnē':

—¡Busán netu'! ¿Bizxi rála'tu' quiu', Jesús, bönni' Nazaret? ¿Naru' zo'o para usunítu' netu'?' Núnb'è'a Li' Nu nacu'. Bönni' Lá'ayi queë' Dios nacu'.

<sup>35</sup> Jesús buzenë' le bach bö' xihui' na', en rë' le:

—Busayaj ru'u, en burúaj lu bönni' ni.

Ní'irö bö' xihui' na' gurú'una bönni' na' lu yu lógaca bönachi nacuá' ni'. Burúajtë lu bönni' na', en bití'rö bi ben queë'. <sup>36</sup> Bulu'bánninë' yúgu'të', en gulu'ë didza' tuë' len ia'tuë', ta'nnë':

—¿Bizxi didza' ni ru'ë? Len yöl-la' unná bë', en yöl-la' huáca zxön rinná bé'enë' yugu' bö' xihui', ate' tu'rúajtë bö' xihui' na'.

<sup>37</sup> Guzë didza' ca naca queë' Jesús, ate' bila'yöni bönachi yúgu'të' yödzö idú gásibi'ilö.

*Ruúnë' Jesús xiná'anú nigula queë' Pedro*

(Mt. 8:14-15; Mr. 1:29-31)

<sup>38</sup> Ní'irö guyasë' Jesús, en burúajë' lu yu'u ga na' tu'dubë' tu'sëdë' queë' Dios, ate' guyázië' lidxë' Simón. Xiná'anú nigula queë' Simón na' zóanu ni', en yú'unu xilá, ate' guláta'yue' lahuë' Jesús únë'-nu. <sup>39</sup> Gubígui'ë Jesús ga na' dënu, ate' bulidzë' huë' xilá na' yú'unu. La' birúajtë xilá na' yú'unu, ate' la' guyástënu, en bë'ënu le gulahuë'.

*Ruúnë' Jesús zían nupa te'e*

(Mt. 8:16-17; Mr. 1:32-34)

<sup>40</sup> Cate' chiribía gubidza, yúgu'të nupa nacuá'len léguequi nupa na' te'e que queëguequi yödzhuë' bila'dxin ni', ate' dujuá'gaca léguequi ga na' zoë' Jesús. Lë' guxóa në'ë nupa na' te'e, en bunë' léguequi. <sup>41</sup> Bulu'rúaj ca' zían bö' xihui' yú'ugaca bönachi te'e na'. Ta'bödxí'a bö' xihui' na', ta'nná:

—Li' nacu' zxi'inë' Dios.

Ní'irö Jesús buzenë' le bach yugu' bö' xihui' na', en bití' bë'ë lataj ila'nná, tu' nöziguequi náquië' Cristo.

*Runë' Jesús libán luyú Galilea*

(Mr. 1:35-39)

<sup>42</sup> Cate' za' rení' ia'tú dza, burúajë' Jesús Capernaum na', ate' guyijë' tu lataj cá'asö. Bila'dxin bönachi zían ni', tu'guilaj Jesús. Cate' bila'dxinë' ga na' zoë', gulë'éniguequinë' ulu'tsenë' Lë', para cabí uzë'ë ga na' nacu'ë. <sup>43</sup> Ní'irö Jesús gudxë' légaquië', rnnë':

—Run bayudxi tseja' gapa nacuá' ia'zica'rö yödzö, tsöjena' ca' libán ni' que didza' dxi'a ca rinná bë'ë Dios. Que lë' ni na' gusöl-lë'ë neda' ni.

<sup>44</sup> Caní guca, benë' libán yugu' yödzö luyú Galilea gapa naca lu yu'u ga tu'dubë' bönni' judío, en tu'sëdë' queë' Dios.

## 5

*Ta'dzunba' böla zían*

(Mt. 4:18-22; Mr. 1:16-20)

<sup>1</sup> Cate' ni' zoë' Jesús ra' nísado' nazí'i le Genesaret, lu xiyú Galilea, bulu'quída' bönachi zían Lë' para ila'yöni xtídzë'ë Dios. <sup>2</sup> Ní'irö bilé'enë' Jesús chopa bárcodo', zxóagaca lu nísado' ga na' naca ra' yu bidxi, ate' narúajgaquië' bönni' uzxón böla lé'egaca bárcodo' na', en ta'guibë' yöxaj böla queégaquië'. <sup>3</sup> Gurenë' Jesús tu lë'e bárcodo' na', le nequi queë' Simón Pedro, ate' gunábinë' lë' udxíguië' le ia'látí'do' zítu' ga naca ra' yu bidxi na'. Ní'irö gurö'ë Jesús lë'e bárcodo' na', en rö'ösë' ca' ni' rusédinë' bönachi

zián nacuá' lu yu bidxi na'. <sup>4</sup> Cate' budxi bë'ë didza' Jesús, ní'irö gudxë' Simón, rnnë':

—Busá' bárcodo' ni lu nísado' ga na' rö'ö zila, ate' ni' guli'zalaj yöxaj böla queëli' para sönlí'-ba' böla.

<sup>5</sup> Bubi'ë didza' Simón, rë' Jesús:

—Bönni' Usëdi, idú yëla chibentu' dxin, en biti' bi böla nazönitú'-ba', pero didza' quiu' izáljagara' yöxaj.

<sup>6</sup> Cate' chigula'zaljë' le, gula'zönë' ziántëröba' böla, ate' réquitiqui' iröza' yöxaj böla na'. <sup>7</sup> Ní'irö bulu'lá'a bulu'lu'ísinë', bulu'lidzë' luzá'agaquië' nacu'ë ia'tú lë'e bárcodo' na' para zá'gaquië' ilácalenë' légaquië'. Cate' bila'dxinë' ni' bulu'dzë'ë-ba' böla irópatë' bárcodo' na', ate' chirequi ulu'huötaj bárcodo' na' lu nisa. <sup>8</sup> Cate' bilé'enë' Simón Pedro lë ni, ní'irö buzóa zxibë' lahuë' Jesús, rnnë':

—Gucuita ga zoa', Xan, tu' naca' bönni' dul-la'.

<sup>9</sup> Caní gunné' tu' radxi ridzöbinë' Pedro ni'a quégacaba' böla zián na' gula'zongaquië'-ba', en lësca' caní guca quégaca nupa nacuá'len lë'.

<sup>10</sup> Guladxi gula'dzöbinë' ca' Jacobo, en Juan, yugu' zxf'inë' Zebedeo, nupa ni nácgaca luzë'ë Simón Pedro na'. Ní'irö Jesús rë' Simón na', rnnë':

—Biti' gádxinu'. Na'a isí lo' ichë'u quia' bönachi ca runu' rizönu'-ba' böla.

<sup>11</sup> Cate' chibulu'sudxinë' yugu' bárcodo' na' ga naca ra' yu bidxi, ní'irö bulu'cá'anë' yúgu'të ni', ate' söjácalenë' Jesús.

*Ruúnë' Jesús tu bönni' ré'enë' huë' nudzu' ruzödi*

*(Mt. 8:1-4; Mr. 1:40-45)*

<sup>12</sup> Cate' zoë' Jesús tu lu yödzö ni', bidxinë' tu bönni' ré'ede'enë' huë' nudzu' ruzödi ga na' zoë'. Cate' bilé'enë' Jesús, busudxín lahuë' lu yu, en gúta'yuë' lahuë', rnnë':

—Xan, channö ré'ënu', huáca unu' neda'.

<sup>13</sup> Ní'irö bulí në'ë Jesús, en gudanë' lë'. Rë' lë':

—Rë'ënda'. Gacu' dxi'a.

La' gubídxité huë' nudzu' queë' bönni' na'. <sup>14</sup> Ní'irö Jesús gunná bé'enë' lë' cuntú nu guíë' ca'. Gudxë' lë':

—Guyéaj, yöjlu'í' cuinu' lahuë' bixúz, ate' yöjnödzej que yudo' le rulu'í' nuhuöácu' dxi'a ca gunná bë'ë Moisés, lë na' ulu'í' légaquië' chiböácu'.

<sup>15</sup> Guzëtëro didza' que yöl-la' huáca queë' Jesús, ate' bulu'dubi bönachi zián ga na' zoë' para ila'yöni xtídzë'ë, en para únë' léguequi, ugüë' yödzöhuë' té'eguequi. <sup>16</sup> Ní'irö buzë'ë Jesús ni', en guyijë' tu lataj cá'asö, ate' ni' bulidzë' Dios.

*Ruúnë' Jesús tu bönni' huë' nacu'unië' bin*

*(Mt. 9:1-8; Mr. 2:1-12)*

<sup>17</sup> Ia'tú dza, cate' ni' rusédinë' Jesús bönachi, rö'ögaquië' yugu' bönni' yudo' fariseo len bönni' yudo' tu'sédinë' xibá queë' Moisés ni', narúajgaquië' yúgu'të yödzö luyú Galilea, en luyú Judea, en lu yödzö Jerusalén. Naca bë' dë lu në'ë Jesús yöl-la' huáca queë' Xanru' Dios tu' ruúnë' bönachi te'e nacuá' ni'. <sup>18</sup> Ní'irö bönni' nuá'agaquië' le denë' tu bönni' huë' nacu'unië' bin bila'dxinë' ga ni', ate' bulu'guiljë' naxi ilunë' para ila'gu'ë lë' lu yu'u para ila'guixjë' lë' lahuë' Jesús. <sup>19</sup> Cate' biti' gula'dzölinë' naxi ilunë', tu' nacuá' bönachi zián ni', gula'benë' ícjo'olö yu'u na', en gula'saljë' ícjo'o na'. Ní'irö bulu'zötjë' le denë' bönni' huë' na', ate' gula'guixjë' lë' gatsaj láhui'lö bönachi ni' lahuë' Jesús. <sup>20</sup> Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Bönni', yugu' dul-la' nabágu'u chibuníti lahua'.

<sup>21</sup> Ní'irö gula' sí lógaquië' ta'zá' ládxi'gaquië' bönni' yudo' tu'sédinë' na', en yugu' bönni' yudo' fariseo, ta'nnë': "¿Nuzxi caz bönni' ni rnnë' le rucá'ana Dios cá'asö? ¿Nuzxi caz gaca uniti lo dul-la'? Tuzë' Dios runiti lahuë' dul-la'."

<sup>22</sup> Réquibe'enë' Jesús le ta'zá' ládxi'gaquië', ate' rë' légaquië':

—¿Bizx que rizá' ládxi'li' caní? <sup>23</sup> Biti' naca böniga nu guiësö bönni' ni: "Yugu' dul-la' nabágu'u chibuníti lahua'", pero naca böniga nu gun ga chasë', en së'e ni'ë. <sup>24</sup> Guna' ga inözili' dë lu na'a neda', Bönni' Guljë' Bönachi, yöl-la' unná bë' uniti lahua' dul-la' luyú ni.

Ní'irö gudxë' bönni' na' nacú'unië' bin, rnnë':

—Li' rea', guyasa. Buá' le denu', en böaj lidxu'.

<sup>25</sup> La' guyásatë' bönni' huë' na' lógaquië', ate' bu'ë lë na' gúti'në', en söhuöjë' lidxë', rigu'ë Dios yöl-la' ba. <sup>26</sup> Gula'nítitiqui'sinë' yúgu'të', ate' gula'gu'ë Dios yöl-la' ba, en tádxisinë' ca', ta'nnë':

—Na'a bilé'eru' le run ga rubániru'.

### *Jesús rulidzë' Leví*

(Mt. 9:9-13; Mr. 2:13-17)

<sup>27</sup> Gudödi gulaca yugu' lë ni burúajë' Jesús ni', ate' bilé'enë' tu bönni' uquízxaj lázagaca bönachi, lë' Leví, rö'ë ga na' ruquízxjë', ate' Jesús rë' lë':

—Gudá' neda'.

<sup>28</sup> La' guyásatë' Leví, ate' bucá'anë' yúgu'të', en sa'yéajlenë' Jesús.

<sup>29</sup> Gudödi ni' benë' Leví na' tu gü'i huagu queë' Jesús ga naca lu yu'u lidxë', ate' gula'cu'ë zían bönni' uquízxaj ni' len ia'bal-lë' bönni' ta'bö'lenë' légaquië' tahuë'. <sup>30</sup> Ní'irö bönni' yudo' tu'sédinë' len yugu' bönni' yudo' fariseo gula'nnë' quégaquië' bönni' usëda queë' Jesús, ta'nnë':

—¿Bizx que rë'aj rágulenli' yugu' bönni' uquízxaj, en ia'zica'rë' bönni' dul-la'?

<sup>31</sup> Bubi'ë didza' Jesús, rë' légaquië':

—Yugu' bönni' nacu'ë dxi'a bití' naquíniguequinë' nu un bönachi, pero bönni' té'enë' naquíniguequinë' nu un bönachi. <sup>32</sup> Za'a, calëga ulídzagaca'në' bönni' tsahuí', pero za'a ulídzagaca'në' bönni' dul-la' para ulu'bí'i ládxi'gaquië'.

### *Ta'nábinë' Jesús ca naca que yöl-la' run gubasa*

(Mt. 9:14-17; Mr. 2:18-22)

<sup>33</sup> Ní'irö bönni' yudo' na' gula'nábinë' Jesús, ta'nnë':

—¿Bizx que tunë' gubasa zían luzuí bönni' dá'gaquië' Juan, en tu'lidzë' Dios, ate' tunë' ca' caní bönni' dá'gaquië' yugu' bönni' yudo' fariseo, pero bönni' dá'gaquië' Li' t'ë'aj tahuë'?

<sup>34</sup> Jesús rë' légaquië':

—¿Naru' huácatsö gunli' ga ilunë' gubasa bönni' nacu'ë laní que yöl-la' rutsaga na' tsanni ni' bönni' rutsaga në'ë zóalenë' légaquië'? <sup>35</sup> Huadxín dza cate' udúë' bönni' rutsaga në'ë ga nacu'ë. Dza ní'irö ilunë' gubasa.

<sup>36</sup> Ní'irö bucúdzu'ë didza' Jesús ca naca lë ni, ate' rë' légaquië':

—Cuntu nu bönni' ichúguië' tu lari' cubi chinadí, en cuejë' tsötaca' le udë'ë lë'e lari' tēbi. Channö gunë' caní, calëgasö gaca ditaj lari' cubi na', pero lári'do' na' birúaj lë'e lari' cubi na' bití' tsöjlóza lari' tēbi na'. <sup>37</sup> Lësca' caní, cuntu nu bönni' rigu'ë xisi uva cubi lu buzudi guídi gula. Channö nu gun caní, xisi uva cubi na' uchöza' buzudi guídi gula, ate' ilalaj xisi uva na', ate' gaca ditaj buzudi guídi gula na'. <sup>38</sup> Que lë ni na' ral-la' cá'aru' xisi

uva cubi lu buzudi guídi cubi, ate' irópatë ilaca chí'i. <sup>39</sup> Channö zoa nu rë'aj xisi uva gula, biti' guë'ënitë guí'aj xisi uva cubi, tu' rna: "Nácarö sizxí' xisi uva gula na'."

## 6

*Bönni' usëda queë' Jesús ta'lecjë' do zxa' xtila dza lá'ayi*

(Mt. 12:1-8; Mr. 2:23-28)

<sup>1</sup> Cate' naca tu dza lá'ayi quégaquië' bönni' judío, ridödë' Jesús gapa dë yöla zxa' xtila, ate' bönni' usëda queë' ta'lecjë' do ga dxía zxa' xtila. Ta'zxabini ná'agaquië' le, en tahuë'. <sup>2</sup> Ní'irö gula'nábinë' bönni' yudo' fariseo légaquië', ta'nnë':

—¿Bizx que runli le cabí ral-la' gunru' dza lá'ayi?

<sup>3</sup> Bubi'ë didza' Jesús, rë' légaquië':

—¿Naru' cabí nulábanili' ca benë' David cate' gudunë', ate' gula'dún ca' nupa nacuá'len lë'? <sup>4</sup> Guyázië' lu yu'u queë' Dios, en guzxi'ë yöta xtila tu'cu'ë lahuë' Dios, lë na' biti' ral-la' gáguru', pero tuz bixúz dë lataj ilahuë', ate' gudahuë' David le, en bë'ë ca' quéguequi nupa nacuá'len lë'.

<sup>5</sup> Ní'irö Jesús gudxë' légaquië', rnnë':

—Neda', Bönni' Guljë' Bönachi, naca' xani dza lá'ayi.

*Tu bönni' narequi' në'ë*

(Mt. 12:9-14; Mr. 3:1-6)

<sup>6</sup> Cate' naca ia'tú dza lá'ayi quégaquië' bönni' judío, guyázië' Jesús lu yu'u ga tu'dubë' tu'sëdë' queë' Dios, en busédinë' nupa nacuá' ni'. Zoë' ca' tu bönni' ni' narequi' në'ë ibëla. <sup>7</sup> Yugu' bönni' yudo' tu'sédinë', en yugu' bönni' yudo' fariseo tu'yúë' Jesús para ila'lé'enë' channö únë' bönni' na' cate' naca dza lá'ayi quégaquië' para ulu'dzölinë' nacxi ulu'zéguië' Lë' didza'. <sup>8</sup> Réquibe'enë' Jesús le ta'zá' ládxi'gaquië', ate' gudxë' bönni' na' narequi' në'ë, rnnë':

—Guyasa. Guzuí gatsaj láchui'lö ni.

La' guyásatë' bönni' na', guzuínë'. <sup>9</sup> Ní'irö Jesús gudxë' yugu' bönni' yudo' na', rnnë':

—Unábitsöqui'da' libí'ili' tu didza'. ¿Naru' dë lataj cate' naca dza lá'ayi gunru' le naca dxi'a o gunru' le ruá' dö'? ¿Naru' dë lataj uguéla'ru' yöl-la' na'bán quégaca bönachi, o ugúaru' le?

<sup>10</sup> Ní'irö buyüë' Jesús yúgu'të bönni' na' nacu'ë gásibi'ilë', ate' gudxë' bönni' huë' na':

—Bulí no'o.

Bulí në'ë bönni' na', ate' la' böácatë në'ë na'. <sup>11</sup> Ní'irö gula'lenë' bönni' yudo' na', ate' gulún xtídza'gaquië' la' légacasë' nacxi bi ilunë' queë' Jesús.

*Riböë' Jesús chínnuë' bönni' ilácagaquië' gubáz queë'*

(Mt. 10:1-4; Mr. 3:13-19)

<sup>12</sup> Dza ni' guyijë' Jesús ga naca tu lu guí'ado'. Bulidzë' Dios ni', ate' idú yöla bé'lenë' Dios didza'. <sup>13</sup> Cate' za' rení', bulidzë' yugu' bönni' dá'gaquië' Lë', ate' guröë' chínnuë' para iláquië' gubáz queë'. <sup>14</sup> Bulidzë':

Simón, (lë' ca' Pedro),

Andrés, (böché'ë Pedro),

Jacobo, en Juan, en Felipe, en Bartolomé,

<sup>15</sup> Mateo, en Tomás,

Jacobo, (zxí'inë' Alfeo),

Simón, (bönni' ruí'i ládxi'ë yödzö queë'),

16 Judas, (böchë'ë Jacobo),  
en Judas Iscariote, (bönni' udödë' Jesús lu ná'agaquië' bönni' ilútië' Lë').

*Ruúnë' Jesús bönachi zían*

*(Mt. 4:23-25)*

17 Jesús bö'tjalënë' yugu' bönni' gubáz queë' na' lu gu'ado' na', ate' bila'dxinë' tu ga naca lachi', ga ni' nacu'ë zíanrö ca' bönni' usëda queë', ate' nacuá'len légaquië' bönachi zían narúajgaca yúgu'të yödzö luyú Judea, en yödzö Jerusalén, en yugu' yödzödo' dëgaca ra' nísado' ga na' nacuá' yödzö Tiro, en yödzö Sidón. Bila'dxín bönachi ni ga ni' para ulu'zë náagagaca xtídzë'ë Jesús, en ulu'huóaca lu yödzöhuë' té'eguequi. 18 Bulu'huóáquië' ca' bönni' ni' ta'guí' ta'záquië' lu ná'agaca bö' xihui'. 19 Yúgu'të bönachi zían na' tuí'í ládxi'gaca ila'gán Jesús tu' ruúnë' léguequi len yöl-la' huáca queë'.

*Nupa náacagaca bica' ba, en nupa náacagaca bica' bayechi'*

*(Mt. 5:1-12)*

20 Ní'irö buyüë' Jesús yugu' bönni' usëda queë' nacu'ë ni', en gudxë' légaquië':

—Bica' ba libí'ili', réquibe'eli' riyadzjali' le naca queë' Dios, tu' gata' queëli' lataj ga rinná bë'ë Dios.

21 'Bica' ba libí'ili' ridunli' le gunnë' Dios queëli', tu' huöljali'.

'Bica' ba libí'ili' ribödxili' tu' bi nadéli'li' le naca tsahui', tu' huadxín dza uzxídxili'.

22 'Bica' ba libí'ili', tu' za' dza cate' biti' ila'lé'e bönachi libí'ili' dxi'a, en ulu'béaj libí'ili' ga nacuá', en ila'nnë' zi' queëli', en ulu'cá'ana cá'asö le nazí'í lali' ca tu le naca xihui' tu' dá'ali' neda', Bönni' Guljë' Bönachi. 23 Buli'sí' xibé dza na', en buli'dzeja, tu' naca zxon le guequi queëli' yehua' yubá. Lësca' caní gulunë' xuz xtó'ogaca bönachi ni' quégaquië' bönni' gulu'ë didza' uláz queë' Dios.

24 'Bica' bayechi' libí'ili', dë yöl-la' tsahui' queëli', tu' chidë le ruzí'ili' xibé.

25 'Bica' bayechi' libí'ili' nuhuölaj nudzé'eli' na'a, tu' huadunli'.

'Bica' bayechi' libí'ili' ruzxídxili' na'a, tu' huí'inili', en cödxí yéchi'li'.

26 'Bica' bayechi' libí'ili' ta'nnë' yúgu'të bönachi dxi'a queëli'. Lësca' caní gulunë' xuz xtó'oli', gula'nnë' dxi'a quégaquië' bönni' gula'zi' yë'ë, gula'nnë' náacagaquië' bönni' tu'ë didza' uláz queë' Dios.

*Ral-la' idxí'iru' nupa biti' ta'lé'e rë'u dxi'a*

*(Mt. 5:38-48; 7:12)*

27 Gunnë' ca' Jesús:

—Libí'ili' zóali' ni, en riyónili' xtídza'a, rea' libí'ili': Guli'dxí'í nupa biti' ta'lé'e libí'ili' dxi'a. Guli'gún le naca dxi'a quégaca nupa tu'dí'í libí'ili'. 28 Guli'nabi Dios gaca dxi'a quégaca nupa tua' dö' queëli', en buli'lidzë' Dios inábili'-në' gácalënë' nupa ta'nnë' zi' queëli'. 29 Channö nu capa' tsölá'a xagu', buzë ia'tsölá'a ca' xagu'. Channö nu cúa lari' naxóa cúdz'u, bë' lataj cúa ca' xzo'. 30 Núti'tës nu bi inaba le dë quiu', bunödzaj que, ate' nu cúa le nequi quiu', biti' unabu' le. 31 Ca rë'ënili' ilún bönachi queëli', lësca' caní guli'gún quéguequi.

32 'Channö nadxí'isili' nupa nadxí'igaca libí'ili', ¿bizxi yöl-la' ba idéli'li'? Lësca' caní tunë' bönni' dul-la', ta'dxí'inë' nupa nadxí'iguequi légaquië'.

33 Channö runli' le naca dxi'a quégacasö nupa tun dxi'a queëli', ¿bizxi yöl-la' ba idéli'li'? Lësca' caní tunë' bönni' dul-la'. 34 Channö runödzjali'

quégaca nupa runli' löza ulu'bí'i queéli', ¿bizxi yöl-la' ba idéli'li'? Lësca' caní tunë' bönni' dul-la', tu'nödzejë' quégaca nupa tun dul-la', tu' tunë' löza ulu'bí'i quégaquië' lë na' bulu'nödzejë'. <sup>35</sup> Neda' rea' libí'ili': Guli'dxi'i nupa biti' ta'lé'e libí'ili' dxi'a, en guli'gún le naca dxi'a. Buli'nödzej quégaca bönachi sal-la' biti' runli' löza nu ubí'i queéli'. Channö caní gunli', zxön naca le gata' queéli', ate' gácali' xzí'ini cazë' Dios, Nu nácatërö lo, tu' runë' Lë' le naca dxi'a quégaca bönachi biti' ta'yaza ládxi'gaca, en quégaca bönachi tuá' dö'. <sup>36</sup> Buli'huéchi' ládxi'li' bönachi ca na' runë' Xúzili' Dios, ruhuéchi' ládxi'ë yúgu'të bönachi.

*Biti' ral-la' ichugu bë'ëru' que luzá'aru'*

(Mt. 7:1-5)

<sup>37</sup> Gunnë' ca' Jesús:

—Biti' ichugu bë'ëli' que luzá'ali', ate' cuntu nu ichugu bë' queéli'. Biti' cuéaj bë'ëli' que luzá'ali', ate' cuntu nu cuéaj bë' queéli'. Buli'niti lo luzá'ali', ate' Dios uniti lahuë' ca' libí'ili'. <sup>38</sup> Buli'nödzej que luzá'ali', ate' Dios gunnë' queéli'. Ulu'nödzejë' queéli' le ulu'rixë' len tu guí'ina ribixi le naca idú, le naguirö, en naguí gate ga rë', en zóatica' gubá. Ca naca le rurixili', la' cá'asö urixë' Dios ca' queéli'.

<sup>39</sup> Bucúdzu'ë didza' Jesús, rë' légaquië':

—¿Naru' huácatsö nu bönni' lo chul-la ichë'ë ia'túë' bönni' lo chul-la? Biti' ca' gaca, tu' ila'bixë' iropë' tu lu yeru. <sup>40</sup> Biti' ca' gácarë' lo tu bönni' usëda ca nu rusëdi lë', pero cate' údxi izëdë' bönni' na', gáquië' ca naca nu na' rusëdi lë'.

<sup>41</sup> ¿Bizx que ruyú' bëbudo' yu'u guiöj lahuë' böchi' luzó'o, en biti' rilé'enu' le zxön yu'u guiöj lo cazu? <sup>42</sup> ¿Naru' huácatsö guío'-në' böchi' luzó'o: “Bócha'a, benna lataj cueja' bëbudo' yu'u guiöj lo”, en biti' rilé'enu' le zxön yu'u guiöj lo cazu? Li', bönni' rulu'isö tsahui' cuinu', guléaj zí'alö le zxön yu'u guiöj lo cazu', ate' ní'irö ilé'enu' dxi'a para cueju' bëbudo' yu'u guiöj lahuë' böchi' luzó'o.

*Le runru' naca bë' le nácaru'*

(Mt. 7:17-20; 12:34-35)

<sup>43</sup> Gunnë' ca' Jesús:

—Tu yaga dxi'a biti' cuía le naca cá'asö. Lësca' caní, tu yaga guí'a biti' gaca cuía le naca dxi'a. <sup>44</sup> Caní naca, le ribía tu yaga naca bë' ca naca yaga na'. Biti' ruchíbiru' le ribía yaga higo lu yaga yötsi', en calëga lu bisequi' yötsi' biti' ruchíbiru' le ribía lubá uva. <sup>45</sup> Tu bönni' dxi'a ru'ë didza' dxi'a tu' yu'u le naca dxi'a icja ládxi'da'ahuë', ate' didza' xihui' ru'ë bönni' xihui' tu' yu'u icja ládxi'da'ahuë' le xihui'. Rinnë ruá'aru' ca naca le yu'u icja ládxi'do'oru'.

*Chopa ca gaca cuéquiru' xilibi yu'u*

(Mt. 7:24-27)

<sup>46</sup> Gunnë' ca' Jesús:

—¿Bizx que rulídzali' neda', rnnali': “Xantu', Xantu'”, pero biti' runli' ca rinná bé'eda' libí'ili'? <sup>47</sup> Ulu'í'ida' libí'ili' ca naca nu na' za' quia', en riyöni xtídza'a, en run ca rnna xtídza'a. <sup>48</sup> Nu ni naca ca tu bönni', cate' benë' lidxë', guchö'önë' ga rë', en guléquië' xilibi yu'u ga naca lu guiöj. Cate' bötaj yegu gubó'o, guchö'óna cuita yu'u na', pero biti' guca uquínaj le, tu' nulibi ga naca lu guiöj. <sup>49</sup> Na'a, nu riyöni xtídza'a, en biti' run ca rnna, nu ni naca ca tu bönni' benë' lidxë' ga naca lu yu cá'asö. Biti' benë' xilibi.



Cate' guchö'öna yegu gubó'o cuita yu'u na', la' biguínajtë, ate' gubixi dërö zö'ö que.

## 7

*Jesús ruínë'-bi' bi'i huen dxin queë' tu bönni' unná bë'*  
(Mt. 8:5-13)

<sup>1</sup> Cate' Jesús budxi bë'lenë' légaquië' didza' ni, guyázië' yödzö Capernaum. <sup>2</sup> Lu yödzö ni' zoë' tu bönni' Roma rinná bé'enë' bönni' rójáquië' gudil-la. Zóabi' bi'i huen dxin queë' nadxí'ide'enë'-bi', ate' bi'i ni ré'ebi', en chirequi gátibi'. <sup>3</sup> Cate' biyönnë' bönni' ni didza' tu'ë bönachi ca naca queë' Jesús, la' gusól-la'të' bal-lë' bönni' gula tu'zéajni'inë' bönni' judío ga na' zoë' Jesús, tsójöta'yugaquië' lahuë' Lë' guidë' uduhuénë'-bi' bi'i huen dxin queë' na' ré'ebi'. <sup>4</sup> Bönni' gula tu'zéajni'inë' na' bila'dxinë' ga zoë' Jesús, ate' guláta'yuë' lahuë' idú ládxi'gaquië', ta'nnë':

—Náquië' lesaca' bönni' na' gunu' queë' lë ni, <sup>5</sup> tu' runë' bal bönachi uládz queëru', en benë' tu yu'u queëru' ga rudúbiru' rusëdaru' queë' Dios.

<sup>6</sup> Ní'irö Jesús guyéajlenë' légaquië'. Cate' chizóa ila'dxinë' lidxë' bönni' na', lë' gusól-lë'ë bal-lë' böchi' luzë'ë ga zë'ë Jesús, ate' të' Lë':

—Xan, rnnë' bönni' na': "Biti' uguí'inu', tu' cabí naca' lesaca' tsáziu' lidxa', <sup>7</sup> en bití' naca' lesaca' guida' ga zu'. Que lë ni na' bití' burúguida' guida' ga zu'. Bë'ësö didza', ate' huóacatébi' bi'i huen dxin quia'. <sup>8</sup> Neda' ca', zoa nu rinná be'e neda', ate' nacu'ë ca' bönni' rójáquië' gudil-la rinná bé'eda' légaquië'. Rea'-në' tuë': Guyéaj ni', ate' rejë'. Rea'-në' ia'túë': Gudá ni, ate' ridë'. Rea'-në' ca' huen dxin quia': Ben dxin ni, ate' runë' dxin na'."

<sup>9</sup> Cate' biyönnë' Jesús didza' ni, bubáninë' queë' bönni' na', ate' buécjë', en gudxë' bönachi na' zá'gaca cúdzu'lë', rnnë':

—Le nácatë rea' libí'ili', cuntu nu bönni' Israel bití' rójáqui'da'-në' réajlë'ë quia' ca réajlë'ë quia' bönni' ni.

<sup>10</sup> Cate' bulu'dxinë' bönni' na' gusól-lë'ë bönni' rinná bé'enë' bönni' rójáquië' gudil-la, gula'yázië' ga naca lu yu'u lidxë', en bila'lë'enë' chibóacabi' bi'i huen dxin na'.

*Jesús rusubanë'-bi' bi'i bönni' queënu tu nigula uzëbi*

<sup>11</sup> Gudödi guca lë ni, sa'yéajë' Jesús yödzö Naín, ate' dzágagaquië' bönni' usëda queë' Lë', len bönachi zían. <sup>12</sup> Cate' bidxinë' gala' ra' yödzö na', bilë'enë' yugu' bönni' nuá'agaquië'-bi' tubí' bi'i bönni' nati. Sójáchí'gaquië'-bi'. Bi'i nati na' nácabi' la's dui bi'i queënu tu nigula uzëbido'. Zían bönachi uladza queënu nigula uzëbi na' sójácalen-nu. <sup>13</sup> Cate' Xanru' bilë'enë'-nu, buéchi' ládxië'-nu, ate' gudxë'-nu:

—Bíti'rö cödxu'.

<sup>14</sup> Ní'irö gubígui'ë Jesús, en gudanë' da'a yaga ga na' dëbi' bi'i nati na'. Gula'bözë' bönni' na' nuá'agaquië'-bi', ate' Jesús gunnë':

—Bi'ido', li' rea', guyasa.

<sup>15</sup> Ní'irö bubanbi'. Gurö'öbi' bi'i na' zí'alö nátibi', ate' gusí lobi' ru'íbi' didza'. Jesús budödë'-bi' lu ná'anu xiná'abi'. <sup>16</sup> Cate' bönni' ni' bila'lë'enë' lë ni, guládxinë' yúgu'të', ate' gula'gu'ë Dios yöl-la' ba, ta'nnë':

—Bidxín queëru' tu bönni' lo, ru'ë didza' uláz queë' Dios. Dios caz rácalenë' bönachi queë'.

<sup>17</sup> Guzë didza' ca naca yöl-la' huáca queë' Jesús, ate' bila'yöni bönachi yúgu'të yödzö luyú Judea, en yúgu'të yödzö idú gásibi'ilö.

*Le rinabë' Juan, bönni' buquilé' bönachi nisa*

(Mt. 11:2-19)

<sup>18</sup> Bönni' dá'gaquië' Juan gula'guíxjoi'në' lë' yúgu'të lë ni runë' Jesús. Ni' yu'ë Juan lidxi guíë, bulidzë' chopë' bönni' na' dá'gaquië' lë, <sup>19</sup> ate' gusöl-lë'ë légaquië' ga na' zoë' Jesús para ila'nábinë' Lë', ila'nnë': "¿Nacu' Li' Cristo, bönni' ral-la' guídë', o naru' ral-la' cöztu'-në' bönni' yúbölö?" <sup>20</sup> Cate' bila'dxinë' bönni' na' nasöl-lë'ë Juan ga na' zoë' Jesús, të' Lë':

—Juan, bönni' buquilé' bönachi nisa, nasöl-lë'ë netu' para inábitu' Li', innatu': "¿Nacu' Li' Cristo, bönni' na' ral-la' guídë', o naru' ral-la' cöztu'-në' bönni' yúbölö?"

<sup>21</sup> La' ná'asö ruúnë' Jesús zían nupa te'e, yugu' bönni' huë', en bönni' yú'ugaca légaquië' bö' xihui', ate' zían bönni' lo chul-la busaljë' guiöj lógaquië'. <sup>22</sup> Bubi'ë didza' Jesús, rë' chopë' bönni' na' nasöl-lë'ë Juan, rnnë':

—Guli'tséaj, guli'tsöjtíxjoi'-në' Juan ca naca le bilé'eli', en le biyönili'. Tu'lé'enë' bönni' guchul-la lógaquië'. Tu'zë'ë bönni' gulatsjë'. Nuhuóacagaquië' bönni' gü'iguequinë' huë' nudzu' ruzödi. Tu'yönnë' bönni' gula'códzuë'. Nubángaquië' bönni' gulátie'. Ta'yönnë' bönni' yechi' didza' dxi'a. <sup>23</sup> Bica' ba nu bití' gaca chopa ladxí', ate' za'len neda' sal-la' bití' runa' ca réqui nu na' ral-la' guna'.

<sup>24</sup> Cate' bönni' na' gusöl-lë'ë Juan bulu'zë'ë ni', gusí lahuë' Jesús rulu'ínë' bönachi ni' ca naca queë' Juan na', rnnë':

—¿Bizxi birúajli' yöjyuli' lu lataj cá'asö? ¿Naru' birúajli' yöjyuli' tu gui rutá bö' recja le? <sup>25</sup> ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' nácuë' lari' nazáca'de'e? Nöz quézili' nupa nácu'gaca lari' nazáca'de'e, en tu'zí' xibé yöl-la' tsahui', nacua' lídxigaquië' bönni' ta'nná bë'ë. <sup>26</sup> ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' ru'ë didza' uláz queë' Dios? Ön, rea' libí'ili', ate' nayëpisëtë'rë' ca nu ruí' i didza' uláz queë' Dios. <sup>27</sup> Náquië' Juan bönni' na' nazúaj lu guichi lá'ayi ca naca queë', rnna:

Buyútsöca', risöl-la'a-në' gubáz quia', inöruë' ca Li'.

Bönni' ni uchi'ë nōza ga tödu'.

<sup>28</sup> 'Neda' rea' libí'ili': Gapa nacua' bönachi, channö zoë' nu bönni' ru'ë didza' uláz queë' Dios, bití' nácarë' lo ca Juan, bönni' na' buquilé' bönachi nisa, pero nu nácatë'rö cuídí'sö ga rinná bë'ë Dios nayëpisëtë'rö ca Juan na'.

<sup>29</sup> Cate' bönachi ni', en bönni' tu'quizxjë' lázagaca bönachi bila'yönnë' didza' ni bë'ë Juan, guléquibe'enë' le naca tsahui' lahuë' Dios, en bila'dilé' nisa lu në'ë Juan, <sup>30</sup> pero yugu' bönni' yudo' fariseo, en bönni' yudo' tu'sédinë' xibá queë' Moisés bití' bila'dilé' nisa lu në'ë Juan, ate' caní guca, bulu'cá'anë' cá'asö le gú'unnë' Dios gunë' quégaquië'.

<sup>31</sup> Gunnë' ca' Xanru':

—¿Nacxi uséqui'tseda' bönachi nacua' dza ni zóaru' na'a? ¿Nacxi caz náca'gaquië'? <sup>32</sup> Náca'gaquië' ca bí'ido' ta'guítjabi'. Ta'bör'öbi' lu yé'ëyi, en ta'bödxi'abi'. Ta'nnabi' tubi' ia'tubi': "Rucódxitu' queéli' gui, pero bití' ruyá'ali'. Rul-la yéchi'tu', pero bití' ribödxi'ili'." <sup>33</sup> Caní nácali' tu' bidë' Juan, bönni' buquilé' bönachi nisa, en bití' gudahuë' yöta xtala, en bití' gu'ë xisi uva, ate' rnnali' queë': "Tu' xihui' dzaga lë'." <sup>34</sup> Cate' bida' neda', Bönni' Guljë' Bönachi, en rë'aj rahua', rnnali' quia': "Bönni' ni náquië' bönni' huágulë'ë, en bönni' re'jë'. Náquië' luzá'agaquië' bönni' tu'quizxjë',

en ia'zica'rë' bönni' dul-la'." <sup>35</sup> Rea' libí'ili': Naca bë' nupa nápagaca yöl-la' réajni'i queë' Dios ni'a que le túngaca.

*Le benë' Jesús lidxë' tu bönni' yudo' fariseo*

<sup>36</sup> Tu bönni' yudo' fariseo bulidzë' Jesús gágulenë' lë' tsözxön, ate' guyázië' Jesús lidxë' bönni' na', en gurö'ë rahuë'. <sup>37</sup> Zóanu lu yödzö na' tu nigula udá dzaga, en cate' nözinu rö'ë rahuë' Jesús lidxë' bönni' yudo' fariseo na', ní'irö bidxinnu ni' nuá'anu tu böga'do' néquini guiöj nazaca' le yudzu tu le rilá' zxixi. <sup>38</sup> Cate' bidxinnu zaca' cúdzu'lë' Jesús, gurö'önu xini'ë ribödxinu. Ní'irö gusí lonu rigú'unu nisa ribödxinu ni'ë Jesús, en ruzxinu ni'ë len guitsa' ícjanu. Butsaga lonu ni'ë, en gulú'unu ni'ë lë na' rilá' zxixi. <sup>39</sup> Cate' bönni' yudo' fariseo na' nulidzë' Jesús bilé'enë' lë ni, guzá' ládxë'ë, rnnë': "La'tu' náquië' bönni' ni bönni' ru'ë didza' uláz queë' Dios, huéquië' enë' nuzxi na', en nacxi nácanu nigula ni rigannu Lë', tu' nácanu nigula udá dzaga." <sup>40</sup> Ní'irö Jesús gudxë' bönni' fariseo na', rnnë':

—Simón, dë tu le ral-la' guía' li'.

Bubi'ë didza' bönni' na', rnnë':

—Gunná, Bönni' Usedi.

<sup>41</sup> Jesús rë' lë':

—Zoë' tu bönni' dë dumí queë', ate' nacu'ë chopë' bönni' tál-lë'ë dumí queë'. Tuë' bönni' na' ral-lë'ë queë' lazxjë' que chopa iz, ate' ia'tué' na' ral-lë'ë queë' lazxjë' que chopa beo'. <sup>42</sup> Tu' cabí dë quégaquië' dumí ulu'guízxjë' lë na' tál-lë'ë queë', que lë ni na' buniti lahuë' iropë' lë na' tál-lë'ë queë'. Gunnátsöca' na'a. ¿Núzxilë' bönni' chopë' ni idxí'irönë' bönni' na' buniti lahuë' légaquië'?

<sup>43</sup> Bubi'ë didza' Simón na', rnnë':

—Réquida' neda', bönni' na' rála'rë' queë' dumí, lë na' buniti lahuë'.

Jesús gudxë' lë':

—Le nácasö rno'.

<sup>44</sup> Ní'irö buécjë' Jesús, ate' ni' ruyúë'-nu nigula na', rë' Simón:

—¿Naru' rilé'enu' nigula ni? Guyázia' lidxu', ate' biti' bennu' quia' nisa quíbidá' ni'a, pero nigula ni gulú'unu ni'a nisa ribödxinu, en buzxinu ni'a len guitsa' ícjanu. <sup>45</sup> Biti' butsaga lo' neda', pero cate' bidxíntea' lidxu', biti' ruzóa dxinu nigula ni, rutsaga lonu ni'a. <sup>46</sup> Biti' gulú'u icja' le za, pero nigula ni gulú'unu ni'a lë na' rilá' zxixi. <sup>47</sup> Que lë ni na' rea' li', dul-la' zían gubága'nu nigula ni, chiguyú'u yöl-la' runiti lo quéguequi, ate' nadxí'ide'enu neda'. Nu na' Dios runiti lahuë' le láti'do'os, láti'do'os nadxí'i Dios nu na'.

<sup>48</sup> Ní'irö Jesús gudxë'-nu nigula na', rnnë':

—Dul-la' gubágu'u chiguyú'u yöl-la' runiti lo que.

<sup>49</sup> Yugu' bönni' na' ta'bö'lenë' Jesús tahuë' gula'sí lógaquië' të' luzá'agaquië', ta'nnë':

—¿Nuzxi caz bönni' ni, runiti lotsë' ca' dul-la'?

<sup>50</sup> Ní'irö Jesús gudxë'-nu nigula na', rnnë':

—Tu' réajlë'u neda', chibuló' li'. Böaj lidxu', zoa dxi ládxu'u.

## 8

*Yugu' nigula tácalennu Jesús, ta'gú'unu le tahuë'*

<sup>1</sup> Gudödi gulaca lë ni, gudë' Jesús gapa nacua' zían yödzö zxön, en yugu' yödzödo', ate' benë' libán ni', en bë'ë didza' que didza' dxi'a ca rinná bë'ë Dios, ate' idxínnutë' bönni' usëda queë' dzágagaquië' Lë'. <sup>2</sup> Bál-lanu nigula

bunë' Jesús légacanu dzágagacanu ca' Lë'. Bubéajë' bö' xihui' yú'ugaca légacanu, en bugüë' yugu' yödzöhuë' gü'iguequinu. Nútsa'nu ladjagacanu María, lënu ca' Magdalena, nigula na' bubéajë' gadxi bö' xihui' yú'ugaca lënu. <sup>3</sup> Juana, nigula queë' Chuza, bönni' yu'u lu në'ë le dë lidxë' Herodes, nútsa'nu ca' ladjagacanu, ate' cá'anqueze Susana nútsa'nu ca' légacanu. Ta'gú'unu nigula ni, en zianrónu ca', le tahuë' Jesús, en yugu' bönni' usëda queë'. Tu'nödzejanu le dë quégacanu.

*Rucúdzu'ë didza' Jesús ca naca queë' bönni' guz*  
(Mt. 13:1-9; Mr. 4:1-9)

<sup>4</sup> Bila'rúaj bönnachi zian yugu' yödzö ni', en bilá'gaca ga na' zoë' Jesús. Cate' bulu'dubë' ga na' zoë', Lë' bucúdzu'ë didza', rë' légaquië':

<sup>5</sup>—Birúajë' bönni' guz, søjësië' xisedo'. Cate' ni' søjësië', bulu'huöxaj bal-la xisedo' na' ga naca la' nõza, ate' bulu'libi bönnachi léguequi. Bila'dxinba' ca' biguinnido', en gulë'ajba' xisedo' na' dzö'ö la' nõza. <sup>6</sup> Bulu'huöxaj ia'bal-la xisedo' na' lu yu ga rö'ö guiöj. Cate' gula'lén xisedo' na', la' gula'bídxitë tu' cabí nalupa' yu na'. <sup>7</sup> Bulu'huöxaj ia'bal-la xisedo' na' ga bulu'lén lubá yötsi'. Tsözxön gula'zxön lubá yötsi' na', en xisedo' na', ate' lubá yötsi' na' bila'röli xisedo' na' gula'lén, en gulún ditaj léguequi. <sup>8</sup> Bulu'huöxaj ia'bal-la xisedo' na' ga naca luyú bëbu. Cate' chigula'zxön, bulu'nödzej. Tu dxigu' na' bunödzej ia'tú gayuá'tërö xisedo' ca'.

Cate' budxi gunné' caní Jesús, bë'ë zidzaj didza', rnnë':

—¡Nu zoa nagui, en riyöni ral-la' uzë nagui!

*Bizx que rucúdzu'ë Jesús didza'*  
(Mt. 13:10-17; Mr. 4:10-12)

<sup>9</sup> Ní'rö yugu' bönni' usëda queë' Jesús gula'nábinë' Lë', ta'nnë':

—¿Bizxi sa'yéaj lë na' bucúdzu'u didza'?

<sup>10</sup> Jesús gudxë' légaquië':

—Dios ruzéajni'inë' libí'ili' le nagachi' ca rinná bë'ë Lë', pero ia'zica'rö bönnachi ni, ru'ílëna' léguequi didza' le rucúdzu'a didza' para cate' ulu'yúë', bití' ila'lé'enë', en cate' ila'yönnë', bití' ila'yéajni'inë'.

*Riguíxjö'ë Jesús le rulu'i le bucúdzu'ë didza'*  
(Mt. 13:18-23; Mr. 4:13-20)

<sup>11</sup> Gunnë' ca' Jesús:

—Caní naca le rulu'i lë na' bucúdzu'a didza'. Xisedo' na' naca xtídzë'ë Dios. <sup>12</sup> Xisedo' na' bulu'huöxaj la' nõza tu'luí' ca raca quégaca bönni' ta'yönnë' didza' na', pero la' za'të tu' xihui', en rigúa didza' na' bidxín lu icja ládxi'do'gaquië', para cabí ila'yéajlë'ë, en cabí ulu'lë'. <sup>13</sup> Xisedo' na' bulu'huöxaj lu yu ga rö'ö guiöj tu'luí' ca raca quégaquië' bönni' ta'yönnë' didza' na', en tu'dzéjanë' ta'zi'ë le, pero nácagaquië' ca xisedo' na' bití' ben lui. Tu chí'isö ta'yéajlë'ë, tu' ridxín le rizí' bë' légaquië', ate' la' tu'huöatë ládxi'gaquië'. <sup>14</sup> Xisedo' na' bulu'huöxaj ga bulu'lén lubá yötsi' tu'luí' ca raca quégaquië' bönni' ta'yönnë' didza' na', en cate' chibila'yönnë', yugu' le tuí' ládxi'gaquië' yödzölió ni, en yugu' yöl-la' tsahui' que, en yugu' le ta'yaza ládxi'gaquië' le taca ni, tun nigui légaquië', ate' bití' run dxin didza' na' lu icja ládxi'do'gaquië'. <sup>15</sup> Xisedo' na' bulu'huöxaj ga naca luyú bëbu tu'luí' ca raca quégaquië' bönni', idú ládxi'gaquië' ta'yönnë' didza' na', en ta'gu'ë tsutsu le lu icja ládxi'do'gaquië', ate' lu yöl-la' riböza zxön ladxí tunë' ca rna didza' na'.

*Rucúdzu'ë didza' Jesús que le rigú'u bení' lídxiru'*

(Mt. 4:21-25)

<sup>16</sup> Gunné' ca' Jesús:

—Cuntu nu bönni' ruquélé'ë guí', ate' la' rudúsi'tè' le guf'ina, en bití' rigú'ë le zxani le ráti'nè', pero ruzóé' le xilataj ga naca liná' lu yu'u, ate' nupa ila'yaza ni' ulu'zí' xibé guí' na'. <sup>17</sup> Ilá' lahui yúgu'tè le nagachi', ate' gaca bē', ate' irúaj ga liná' yúgu'tè le raca balándo'os.

<sup>18</sup> 'Que lè ni na', buli'zè nágali', tu' huadéli'nè' ia'lati' bönni' ruzóé' tsutsu icja ládxi'da'ahué' didza' riyönnè', en huazi'rè' xtídzè'ë Dios, pero bönni' bití' ruzóé' tsutsu icja ládxi'da'ahué' didza' riyönnè', huadúa didza' na' biyönnè'.

*Xinë'ë Jesús, en yugu' bönni' böchë'ë*

(Mt. 12:46-50; Mr. 3:31-35)

<sup>19</sup> Ní'irö bila'dxinè' xinë'ë Jesús, en yugu' bönni' böchë'ë ga na' zoè', pero bití' guca ila'bígué'ë gala' ga zoè' tu' nacuá' bönachi zían ni'. <sup>20</sup> Zoa ni' nu bulidza Jesús, rnna:

—Nacu'ë xinó'o, en yugu' bönni' böchu'u lö'a. Tè'ënnè' ilu'ilenè' Li' didza'.

<sup>21</sup> Bubi'ë didza' Jesús, rē' légaquiē':

—Nupa ni ta'yöni xtídzè'ë Dios, en tun ca rnna, bönni' ni nácagaquiē' ca xiná' caza', en yugu' bönni' böchi' caza'.

*Jesús ribequi dxié' bö' budunu'*

(Mt. 8:23-27; Mr. 4:35-41)

<sup>22</sup> Tu dza gurenè' Jesús tu lē'e bárcodo', dzágagaquiē' bönni' usēda queē' Lē', ate' Jesús rē' légaquiē':

—Udódotsöca'ru' ia'tsölá'a nísado' ni.

Ní'irö söjácatē'. <sup>23</sup> Tsanni ni' ta'dödē' lu nísado' na', rásiē' Jesús. Ní'irö gusi' lo recja bö' budunu' lu nísado' na', ate' chirequi huötaj bárcodo' na' zxan nisa, en zoa bönadxi quégaquiē'. <sup>24</sup> Ní'irö gula'bigué'ë ga dē' Jesús, en bulu'subanē' Lē', ta'nnē':

—¡Bönni' Usedi! ¡Bönni' Usedi! ¡Chirequi huötjaru' lu nisa!

Cate' bubanē' Jesús, bulidzē' bö' na' recja, en nisa na' riyasa ridxiáda', ate' guzóa dxi bö' na' recja, en guró'o dxi lu nísado' na'. <sup>25</sup> Ní'irö Jesús gudxē' yugu' bönni' usēda queē', rnnē':

—¿Naru' cabí réajl'ëli' Dios?

Guládxinë' légaquiē', en tu'bánninē'. Gulé luzá'agaquiē' tuē' ia'túē':

—¿Nuzxi caz bönni' ni? Rinná bé'enē' bö' recja, en nísado', ate' tun ca rnna xtídzè'ë.

*Tu bönni' yödzö Gadara yu'u lē' bö' xihui'*

(Mt. 8:28-34; Mr. 5:1-20)

<sup>26</sup> Ní'irö bila'dxinè' lu xiyúgaquiē' bönni' Gadara, le dē ia'tsölá'a nísado' ca dödilö ga dē luyú Galilea. <sup>27</sup> Cate' birúajē' Jesús lē'e bárcodo' na' ga naca lu yu na', dutságuiē' tu bönni' yödzö na' Lē'. Chigudzé yu'u bö' xihui' lē', ate' bíti'rö rácuē' lari', en bíti'rö rizóé' lu yu'u, pero nun xilatjē' lu zxan bulóaj ga nádjagaca yeru ba. <sup>28</sup> Cate' bönni' na' yu'u bö' xihui' lē' bilé'enē' Jesús, guródxí'ë zidzaj, ate' buzóa zxibē' lahué' Jesús, en bē'ë zidzaj didza', rnnē':

—¿Bizxi ral-la'a quiu', Jesús, Zxí'inē' Dios nayēpisētērē'? Ráta'yua' lo cabí usaca' zí'u neda'.

29 Caní gunné' tu' chigunná bé'ené' Jesús bö' xihui' na' urúaj lu bönni' na'. Zían luzuí zí'atëlö burixi butúluda' bö' xihui' na' bönni' na', ate' yugu' bönni' yödzö ni' gulúgui'è lè' du guié, en bulu'xéjané' bregui' guié ni'a nē'è, pero blē'è yugu' du guié na', ate' bö' xihui' na' yu'u lè' guché' lè' lu lataj cá'asö. 30 Ní'irö Jesús gunábiné' bö' xihui' na', rnnē':

—¿Bi leu'?

Bö' xihui' na' gudxi Lē':

—Le Zían lea'.

Caní gunná tu' yú'ugaca bö' xihui' zían bönni' na'. 31 Ní'irö yugu' bö' xihui' na' guláta'yugaca lahué' Jesús cabí isöl-lē'è léguequi lataj chul-la quégaca nupa nátigaca. 32 Nacuá'aba' ca' tu cō'ōba' cuchi zían ta'daba' táguba' lu guí'ado' ni', ate' bö' xihui' na' gula'naba yechi' Jesús gu'è léguequi lataj tsöjtsú'ugaca cuchi zían na'. Jesús bē'è léguequi lataj. 33 Bulu'rúaj yugu' bö' xihui' lu bönni' na', en yöjtsú'ugaca cuchi zían na', ate' yöjácaba' cuchi zían na' ga naca tu lē'e guiój. Yöjbíxigacaba' lu nísado', ate' ni' gula'yépiba' nisa, gulátiba'.

34 Cate' bila'lé'ené' bönni' tu'yúgaquié'-ba' cuchi zían na' ca na' guca quégacaba', guladxi gula'dzöbiné'. Bulu'zxúnnajé' ni', ate' yöjhuójgaquié' yöjtíxjöi'iguequiné' nupa nacua' yödzö na', en nupa nacua' la' guixi' ni'. 35 Ní'irö bila'ruajé' bönni' yödzö na', yöjyúgaquié' lè na' guca. Cate' bila'dxiné' ga na' zoé' Jesús, bila'lé'ené' bönni' na' gula'yú'u bö' xihui' lè', rö'è xini'è Jesús. Nacué' lari', en dxí'ado' chizóé', ate' guládxiné'. 36 Nupa na' bila'lé'e lè na' guca gula'guíxjöi'i légaquié' ca guca, böáquié' bönni' na' gula'yú'u bö' xihui' lè'. 37 Ní'irö yúgu'té bönachi zían na' quégaca yödzö nabábagaca Gadara na' guláta'yu lahué' Jesús urúajé' lu xiyúguequi, tu' tádxiné'. Bubené' Jesús lē'e bárcodo' na', en söhuójé'. 38 Bönni' na' bulu'rúaj bö' xihui' na' lè' gúta'yué' lahué' Jesús gu'è lè' lataj tséajlené' Lē' tsözöxn. Gunná bé'ené' Jesús lē' ugá'ané' ni', rnnē':

39 —Böaj lidxu'. Yöjtíxjöi'i bönachi uládz quiu' yugu' le zxön bené' Dios quiu'.

Böajé' bönni' na' lidxé', ate' buzé' didza' idú lu yödzö ni' ca naca le zxön bené' Jesús queé'.

*Jesús ruúnē-bi' bi'i nigula queé' Jairo enca' nigula na' gudannu lari' nácué'*

(Mt. 9:18-26; Mr. 5:21-43)

40 Cate' budxiné' Jesús ia'tsölá'a nísado' na', bulu'dzeja bönachi zían nacua' ni' ni'a queé' Lē', tu' ta'böza Lē'. 41 Ní'irö bidxiné' Jairo ga zoé' Jesús. Náquié' bönni' lo que yu'u ga tu'dubé' bönni' judío, en tu'sedé' queé' Dios. Biyéchué' xini'è Jesús, en gúta'yué' lahué' tsejé' lidxé'. 42 Caní bené' tu' zóabi' tubi' bi'i nigula queé', chirequi gátibi'. Nácabi' bi'i la's dui queé', en yú'ubi' ca chinnu iz. Tsanni ni' sa'yéajé' Jesús, sönógaca tu'quirö bönachi zían Lē'.

43 Nútsa'nu tu nigula ladaj bönachi zían na', chiguca chinnu iz riguí'i rizáca'nu. Biti' ruhuí'i rön queénu que hué' quégaca cázanu nigula, ate' chibutönu dēra le dē queénu, riguíz'xjanu nupa tu'ún bönachi, pero biti' guca nu bönni' únē'-nu. 44 Gubíga'nu zaca' cúdzu'lé' Jesús, en gudannu ruí'i lari' nácué', ate' la' bu'itē hué' rön queénu.

45 Ní'irö Jesús gunábiné' nupa nacua' ni', rnnē':

—¿Nuzxi na' gudán neda'?

Gula'dá'bagui'ë yúgu'të'. Ní'irö Pedro, en nupa nacua'len lë' gulë' Lë', ta'nnë':

—Bönni' Usedi, nacua' bönnachi zían ni, tu'quirö Li', en tu'dxiga' Li', ate' ħrnatso': “¿Nuzxi na' gudán neda'?”

<sup>46</sup> Ní'irö Jesús gunnë':

—Zoa nu gudán neda', tu' gúquibe'eda' birúaj yöl-la' huáca neda' le ruún bönnachi.

<sup>47</sup> Cate' réquibe'enu nigula na' nözinë' Jesús le bennu, ní'irö guxzízinu. Biyéchunu xini'ë Jesús, en gudíxjöi'ínu Lë' lógaca bönnachi zían na' bizx que na' gudannu lari' nácuë', en ca na' guca, la' böácátënu. <sup>48</sup> Ní'irö Jesús gudxë'-nu:

—Nigúlado', tu' réajlë'u neda' chiböácu'. Böaj lidxu', zoa dxi ládxu'u.

<sup>49</sup> Cate' ni' ru'ë Jesús didza' ni, bidxinë' tu bönni' ni', zë'ë lidxë' bönni' lo na' que yu'u ga tu'dubë' tu'sedë' queë' Dios, ate' gudxë' bönni' lo na':

—Chigútibi' bi'i nigúlado' quiu'. Bítirö upíxjanu'-në' Bönni' Usedi.

<sup>50</sup> Cate' biyönnë' Jesús lë ni, bubí'ë didza', rë' bönni' lo na':

—Biti' gádxinu'. Guyéajlë'ësö Dios. Huóácabi' bi'i nigúlado' quiu'.

<sup>51</sup> Cate' guyázië' Jesús yu'u na', bití' bë'ë lataj nu tsázalen Lë', pero légcasë' Pedro, en Jacobo, en Juan, enca' xuz xiná'abi' nigúlado' na'.

<sup>52</sup> Ta'bödxi nupa nacua' ni'. Ta'bödxi yechë'ë ni'a queëbi' bi'i nigúlado' na', ate' Jesús rë' légaquië', rnnë':

—Bítirö cödxili'. Biti' nátibi' nigúlado' ni. Rásisibi'.

<sup>53</sup> Bulu'titjë' Lë' tu' nözguequinë' chinátibi'. <sup>54</sup> Ní'irö gudélé'ë Jesús ná'abi', en bë'ë zidzaj didza', rnnë':

—Bi'i nigúlado', guyaschi.

<sup>55</sup> Ní'irö bu'u bö' naca cázabi', bubanbí', ate' la' guyásatëbi'. Jesús gunná bé'enë' légaquië' ilu'ë le gágubi'. <sup>56</sup> Bulu'báninë' xuz xiná'abi', pero Jesús gunná bé'enë' légaquië' cuntu nu ilë' ca na' guca.

## 9

*Risöl-lë'ë Jesús bönni' usëda queë' tsöjéngaquië' libán*

*(Mt. 10:5-15; Mr. 6:7-13)*

<sup>1</sup> Ní'irö butubë' Jesús idxínnutë' bönni' usëda queë', ate' budödë' lu ná'agaquië' yöl-la' huáca, en yöl-la' unná bë' para ulu'béajë' bö' xihui' yú'ugaca bönnachi, en ulu'ünë' nupa te'e. <sup>2</sup> Gusól-lë'ë légaquië' tsöjéngaquië' libán ca rinná bë'ë Dios, en tsöjhuéngaquië' nupa te'e. <sup>3</sup> Jesús gudxë' légaquië':

—Biti' bi guá'ali' para la' nöza, calëga xiyágado', en calëga yöxaj, en calëga yöta, en calëga dumí, en bití' ixóa yenlí' chopa lari'. <sup>4</sup> Bítitës yu'u ga tsú'uli', guli'sóa ni' cate' uzá'aróli' yödzö na'. <sup>5</sup> Gátitës ga bití' ilún bönnachi libí'ili' bal, buli'rúaj yödzö na', en guli'cuíbi bëchtö da' lë'e lábali', le ulu'í légaquië' nagá'ana xíguia' nabága'gaquië'.

<sup>6</sup> Ní'irö bila'rúajë' bönni' usëda queë' na'. Gula'dödë' yúgu'të yödzödo', tunë' libán que didza' dxi'a, en tu'ünë' nupa te'e yúgu'të lu yödzö na'.

*Ca gútië' Juan, bönni' buquilë' bönnachi nisa*

*(Mt. 14:1-12; Mr. 6:14-29)*

<sup>7</sup> Biyönnë' Herodes, bönni' rinná bë'ë, ca naca yúgu'të le runë' Jesús, ate' gurö'ë böniga, tu' ta'nná bönnachi:

—Juan na' chibubanë' lu yöl-la' guti.

<sup>8</sup> Ia'bal-lë' ta'nnë':

—Chibulë'ë Elías, bönni' na' bë'ë didza' uláz queë' Dios.

Ia'bal-lë' ta'nnë':

—Chibubanë' tu bönni' bítsë'ë yugu' bönni' gulu'ë didza' uláz queë' Dios dza ni'te.

<sup>9</sup> Herodes na' gunnë':

—Juan na' burixa' yenë'. ¿Nuzxi caz bönni' ni, riyönda' queë' runë' yugu' lë ni?

Rizóa ribö'ë Herodes ilé'enë' Jesús.

*Rugahuë' Jesús chi-un gayuá' bönachi*  
(Mt. 14:13-21; Mr. 6:30-44; Jn. 6:1-14)

<sup>10</sup> Cate' bulu'dxinë' bönni' gubáz nasöl-lë'ë Jesús ga zoë' Lë', bulu'siyönnë' Lë' yúgu'të le gulunë'. Ní'irö guchë'ë Jesús légaquië' quez. Yöjáquië' tu lataj cá'asö lu xiyú yödzö Betsaida. <sup>11</sup> Cate' chinöziguequi bönachi lë ni, yöjnóguequi Lë', ate' Jesús benë' léguequi bal, en bé'lenë' léguequi didza' ca rinná bë'ë Dios, ate' bunë' nupa te'e.

<sup>12</sup> Cate' chizá' ral-la dza na', idxínnutë' bönni' gubáz queë' Jesús gula'bíguë'ë ga zoë', en të' Lë':

—Busöl-la' bönachi ni tsöjaca gapa dë yödzödo', en gapa dë yú'udo' idú gásibi'ilö para tsöjtíljagaquië' gapa ulu'gá'anë', en bi ilahuë', tu' naca lataj cá'asö ga ni zóaru'.

<sup>13</sup> Ní'irö Jesús rë' légaquië':

—Guli'gu'ë libí'ili' le ilahuë'.

Të' Lë':

—Gáyu'sö yöta xtílado' dë, en chópasöba' böla dëba' queëtu', o ¿naru' huayéajtsatu' tsöj'öutu' le ilágugaca bönachi zían ni?

<sup>14</sup> Nacu'ë ca chi-un gáyu'ë bönni' ga na'. Ní'irö Jesús gudxë' yugu' bönni' usëda queë', rnnë':

—Guli'gún ga ila'bö'ë tu cö' huéajgaquië', ilaca ca chi-un huéajgaquië'.

<sup>15</sup> Caní gulunë', ate' gula'bö'ë yúgu'të'. <sup>16</sup> Ní'irö gudélë'ë Jesús gayu' yöta xtila na', en chópaba' böla na', ate' guchisa lahuë' ruyúë' lúzxiba, en rë' Dios: “Xclenu'.” Ní'irö buzzuxjë' léguequi, en bë'ë quégaquië' bönni' usëda queë' para ulu'cu'ë lógaca bönachi na'. <sup>17</sup> Gulahuë' yúgu'të', en bulu'huöljanë'. Gudödi na' bulu'tubë' yugu' bizxaj bugá'ana, ate' bulu'líë' idú chinnu ga'böra.

*Rnnë' Pedro Jesús náquië' Cristo*  
(Mt. 16:13-19; Mr. 8:27-29)

<sup>18</sup> Tu dza tsanni ni' zoë' quez Jesús, rulidzë' Dios, bila'dxinë' bönni' usëda queë' ga zoë', ate' gunábinë' légaquië', rnnë':

—¿Nuzxi ta'nná bönachi naca' neda'?

<sup>19</sup> Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquilë' bönachi nisa. Ta'nná ia'bal-lë' nacu' Elías, ate' ta'nná ia'bal-lë' nacu' tu bönni' bítsë'ë yugu' bönni' gulu'ë didza' uláz queë' Dios dza ni'te, en nubanë' lu yöl-la' guti.

<sup>20</sup> Ní'irö Jesús gunábinë' légaquië', rnnë':

—Názxi libí'ili', ¿nuzxi rnnali' naca'?

Bubi'ë didza' Pedro, rnnë':

—Nacu' Cristo nasöl-lë'ë Dios.

*Rigúxjö'ë Jesús ca si' ilútië' Lë'*  
(Mt. 16:20-28; Mr. 8:30-9:1)



<sup>21</sup> Ní'irö Jesús gúdxidë'é légaquië', en gunná bé'enë' légaquië' cuntu nu ilë' Nu náquië' Lë'. <sup>22</sup> Ní'irö rë' légaquië':

—Run bayudxi qui'i saca'a neda', Bönni' Guljë' Bönachi, zián le gaca quia'. Ulu'cá'anë' neda' cá'asö yugu' bönni' gula tu'zëajni'inë', en yugu' bixúz unná bë', en yugu' bönni' yudo' usedi. Ilútië' neda', pero dza tsonna dza Dios usubanë' neda' lu yöl-la' guti.

<sup>23</sup> Gudxë' ca' yúgu'të':

—Channö rë'enë' nu bönni' të'e neda', ral-la' uzóë' tsölá'aló le dë queë', en gáquië' ca tu bönni' sa'yéajë' söjtë'e lë'e yaga cruz, ate' ní'irö gaca të'e neda'. <sup>24</sup> Núti'tës bönni' ruí'í lãdxë'e gun chi'e yöl-la' na'bán queë', unítie' le, pero channö unítie' yöl-la' na'bán queë' tu' dë'e neda', bönni' ni gata' yöl-la' na'bán idú queë'. <sup>25</sup> Biti' bi uzi'e xibé tu bönni' channö utubë' queë' yúgu'të le dë yödzülió ni, pero unítie' tsaz yöl-la' na'bán queë'. <sup>26</sup> Nu bönni' rutuí'inë' neda', en rutuí'inë' ca' xtídza'a, lë'sca' neda', Bönni' Guljë' Bönachi, utuí'ida' bönni' na' cate' huöda' idinná bë'a, dzágagaca neda' yöl-la' zxon queë' Xuza', en yöl-la' zxon quégaquië' gubáz lá'ayi queë' Dios. <sup>27</sup> Le nácatë rea' libí'ili', nacuá' bal-lë' bönni' ni bití' ilátie' cate' ila'lé'erönë' dza idinná bë'e Dios.

*Ridzá' ca riná' lahuë' Jesús*

(Mt. 17:1-8; Mr. 9:2-8)

<sup>28</sup> Cate' bizá'a xunu' gubidza gudödi bë'e Jesús yugu' didza' ni, ní'irö guchë'e Pedro, en Juan, en Jacobo, ate' gurenë' tu lu guí'ado', ga na' bulidzë' Dios. <sup>29</sup> Tsanni ni' ruí'ilenë' Dios didza', bidzá' ca riná' lahuë', ate' böáca chiguí'chido'os lari' nácuë', en guyëpi yösa bení'. <sup>30</sup> Ní'irö bulu'luí'í lógaquië' chopë' bönni' ga zoë' Lë' tuí'ilenë' Lë' didza'. Nácagaquië' Moisés, en Elías. <sup>31</sup> Chopë' ni gula'yëpë' yösa bení', ate' tuí'ilenë' Jesús didza' ca si' uzë'e yödzülió ni, gátie' lu yödzü Jerusalén. <sup>32</sup> Sal-la' chirácada' ilásië' Pedro, en nupa nacuá'len lë', bayudxi gula'ná'asë', ate' bila'lé'enë' yöl-la' bení' queë' Jesús, en chopë' na' nacuá'lenë' Lë'. <sup>33</sup> Cate' bulu'zë'e chopë' na' ga na' zoë' Jesús, ní'irö Pedro gudxë' Lë':

—Bönni' Usedi, dxi'a naca zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

Biti' réquibe'enë' Pedro bi na' rnnë'. <sup>34</sup> Tsanni ni' ru'e didza' ni, la' gurö'ötë böaj le bugacu légaquië', ate' guládxinë' tu' nacu'e lu böaj na'. <sup>35</sup> Ní'irö biyön chi'i Nu ruí'í didza' lu böaj na', rnna:

—Bönni' ni náquië' Zxí'ina'. Nadxí'ida' Lë'. Buli'zë nágali' didza' gu'ë.

<sup>36</sup> Cate' budxi bë' didza' chi'i na', tuzë' Jesús nagá'analenë' légaquië'. Ta'cuá' dxíë' bönni' usëda queë', ate' dza na' cuntu nu gulë' ca naca le bila'lé'enë'.

*Ruúnë' Jesús bi'i bönni' yu'u bö' xihui' lëbi'*

(Mt. 17:14-21; Mr. 9:14-29)

<sup>37</sup> Cate' za' rení' ia'tú dza bulu'huötjë' Jesús, en bönni' na' dzágagaquië' Lë' lu guí'ado' na', ate' bila'rúaj bönachi zián dutságagaca Jesús. <sup>38</sup> Ní'irö bë'e zidzaj didza' tu bönni' nútsë'e ladaj bönachi zián na'. Bulidzë' Jesús, rnnë':

—Bönni' Usedi, ráta'yua' lo' duyú'-bi' bi'i bönni' quia' tu' nácabi' bi'i la's dui quia'. <sup>39</sup> Yu'u bö' xihui' lëbi' le run ga ribödxí'abi', en ruxízida' lëbi'. Run ga ribía bidxina' zxöna' ruá'abi', en rurixi rutúluda' lëbi', ate' catu caz rasán lëbi'. <sup>40</sup> Gúta'yua' lógaquië' bönni' usëda quiu' ulu'bëajë' le, pero bití' gula'zëqui'në'.

41 Bubi'ë didza' Jesús, rnnë':

—Libi'ili', bití' réajlë'ëli', en nachixi ícjali'. ¿Gáca'xte ral-la' sóalena' libí'ili', en guá' ilena' queé'li'? Dijuá'a-bi' bi'i bönni' quiu' ni.

42 Cate' ni' zá'abi' ribíga'bi' ga na' zoë' Jesús, burixi butúluda' bö' xihui' na' lëbi'. Jesús gudil-lë' bö' xihui' na', en bunë'-bi' bi'i bönni' na'. Ní'irö bugu'ë-bi' lu në'ë xúzibi'. 43 Bulu'bani yúgu'të bönachi ni' ca naca yöl-la' huáca zxon queë' Dios.

*Jesús ru'ë didza' leyúbölö ca si' ila'zönë' Lë'*

*(Mt. 17:22-23; Mr. 9:30-32)*

Tsanni ni' tu'bani yúgu'të bönachi ca naca le zxon runë' Jesús, Lë' gudxë' yugu' bönni' usëda queë', 44 rnnë':

—Gulí'cú'u icja nágali' didza' ni, tu' si' ulu'dödë' neda', Bönni' Guljë' Bönachi, lu ná'agaca bönachi.

45 Biti' gula'yéajni'inë' bönni' usëda queë' didza' ni, tu' cabí ru'ínë' Dios légaquië' lataj ila'yéajni'inë', pero bití' bulu'rúguinë' ila'nábinë' Jesús ca naca didza' ni.

*Nu naca lo*

*(Mt. 18:1-5; Mr. 9:33-37)*

46 Ní'irö gula'sí lógaquië' bönni' usëda queë' Jesús tu'ë didza'. Ta'nábini lúz'agaquië' tuë' ia'túë' núzxilë' gáquië' lo. 47 Réquibe'enë' Jesús le ta'zá' ládxi'gaquië', ate' gudélë'ë-bi' tubi' bí'ido', en buzóë'-bi' cuitë'. 48 Ní'irö rë' légaquië':

—Núti'tës bönni' gunë' bal tu bí'ido' caní tu' néquibi' quia' neda', neda' caz gunë' bal, ate' nu bönni' gunë' neda' bal, gunë' ca' bal Xuza' nasöl-lë'ë neda'. Que lë ni na' bönni' nútsë'ë ládjali' nácarë' nöxaj ladxi', bönni' ni náquië' lo.

*Nu bití' ridá'baga' rë'u, rácalen rë'u*

*(Mr. 9:38-40)*

49 Ní'irö Juan bulidzë' Jesús, rnnë':

—Bönni' Usedi, bilé'etu'-në' tu bönni' rugunë' dxin Lo' rubéajë' bö' xihui', ate' gunná bé'etu'-në' tu' cabí dë'ë rë'u.

50 Jesús rë' lë':

—Biti' inná bé'eli'-në', tu' rácalen rë'u nu bití' ridá'baga' rë'u.

*Jesús ridil-lë' Jacobo, en Juan*

51 Cate' chizá' gal-la' dza ral-la' gátie' Jesús, en huëpë' yehua' yubá, benë' bayudxi tsejë' Jerusalén. 52 Gusöl-lë'ë yugu' bönni' gubáz queë' ila'nöruë' ca Lë', ate' yójáquië' tu yödzödo' quegaca bönachi Samaria para tsöjpa'agaquië' ga ugá'anë' Jesús tu yëla. 53 Yugu' bönni' yödzö na' bití' gulunë' Jesús bal tu' chinaca queë' sa'yéajë' Jerusalén. 54 Cate' Jacobo, en Juan, bönni' usëda queë' Jesús, bila'lë'enë' lë ni, të' Lë':

—Xan, ¿naru' inábatsöca'tu' huötaj gu' le za' yehua' yubá, en usuniti légaquië', guntu' ca na' benë' Elías?

55 Buécjë' Jesús, en gudil-lë' légaquië', rnnë':

—Biti' nözili' bizxi bö' dzágui libí'ili'. 56 Bida' ni neda', Bönni' Guljë' Bönachi, calëga para usunítia' yöl-la' na'bán quegaca bönachi, pero bida' dusölá' bönachi.

Ní'irö yójáquië' yödzö yúbölö.

*Nupa të'ëni tsöjácálen Jesús*

*(Mt. 8:19-22)*

<sup>57</sup> Tsanni ni' yú'ugaquië' nõza Jesús, en yugu' bönni' dá'gaquië' Lë', bidxinë' tu bönni' yödzo Jerusalén, en rë' Jesús:

—Xan, rë'ënda' sá'lëna' Li' gáti'tës ga tseju'.

<sup>58</sup> Jesús rë' lë':

—Yúgu' böza', nacua' zxan bulóaj quégacaba', ate' biguñnido', dxíagaca xcá'agacaba', pero neda', Bönni' Guljë' Bönachi, biti' dë' quia' ga gáta'a uzí ládxa'a.

<sup>59</sup> Ní'irö Jesús gudxë' tu bönni' yúbölö, rnnë':

—Gudá' neda'.

Bönni' ni' gudxë' Lë':

—Xan, benna neda' lataj huója' lidxa' ga idxinrö dza chibucácha'a-në' xuzá'.

<sup>60</sup> Jesús gudxë' lë':

—Bë' lataj bönni' chizóa ilátië' ulu'cáché'ë nupa chinati quégaquië', pero li', guyéaj, yójén libán ca inná bë'ë Dios.

<sup>61</sup> Ní'irö bidxinë' ia'túë' ca', en rë' Jesús:

—Xan, rë'ënda' sá'lëna' Li', pero benna neda' lataj tseja' tsöjzégacada'-në' didza' dí'a dza quia'.

<sup>62</sup> Jesús gudxë' lë':

—Núti'tës bönni' ruí'i ládxe'ë le raca yödzölió náquië' ca tu bönni' rugá'anë'-ba' bëdxi, en ruyúë' zaca' cúdzulë'. Nu run caní biti' naca lesaca' tsaza ga rinná bë'ë Dios.

## 10

*Risöl-lë'ë Jesús tsónnalalaj yu' chië' bönni' tsöjéngaquië' libán*

<sup>1</sup> Gudödi gulaca yugu' lë' ni, guröë' Xanru' ia'tsónnalalaj yu' chië' bönni' usëda queë', ate' gusól-lë'ë légaquië' chopa huéajgaquië' para ila'nöruë' ca Lë', en tsójáquië' yúgu'të yödzo, en yödzödo' gapa chizóa tödë' Lë'. <sup>2</sup> Gudxë' légaquië':

—Le nácatë, dëda' dxin quia', le naca ca tu la' yëla zxon ga nu tsöjlapa', pero nabábasö huen dxin quia' nacua'. Que lë' ni na', guli'gáta'yu lahuë' Dios, náquië' Xan la' yëla na', isöl-lë'ë yugu' huen dxin ga naca la' yëla queë'. <sup>3</sup> Guli'tséaj na'a. Buli'yútsóca', neda' risöl-la'a libí'ili', nácali' ca yugu' bö'cu' zxila' sójácaba' ládjacacaba' bö'cu' guí'a sínia'. <sup>4</sup> Biti' guá'ali' yöxaj dumí, en calëga buzudi yöta, en biti' guá'ali' ia'tú cö' xiráchuli', en biti' tseli' para güí'ilenli' bönachi didza' gapa naca la' nõza. <sup>5</sup> Gáti'tës yu'u ga tsú'uli', innali': "Le ribequi dxi ladxi' gaca quégaca bönachi nacua' yu'u ni." <sup>6</sup> Channö zoa ni' nu bönni' si'ë yöl-la' ribequi dxi ladxi', ugá'analen lë' le ribequi dxi ladxi' na' inábali', pero channö cabí zoa ni' nu bönni' caní, ugá'analen libí'ili' le ribequi dxi ladxi' na' inábali'. <sup>7</sup> Guli'gá'ana yu'u ga na' tsú'uli', en guli'guí'aj guli'gagu bi ilunnë' queëli', tu' udzöli quézinë' bönni' huen dxin le gahuë'. Biti' tódili' yu'u yu'u. <sup>8</sup> Gáti'tës yödzo ga tsú'uli', ate' ilún libí'ili' bal, guli'gagu le ulu'cu'ë loli'. <sup>9</sup> Buli'un nupa te'e nacua' yödzo na', en guli'guíë' léguequi: "Chibidxín le rinná bë'ë Dios ga zóali'." <sup>10</sup> Gáti'tës yödzo ga tsú'uli', channö cabí ilún libí'ili' bal, guli'rúaj, tsöjsóali' la' nõza que yödzo na', en innali': <sup>11</sup> "Bëchtö que ládzali' le da' lë'e lábatu' ruquínajtu', le rulu'i nabága'li' xigua', pero ral-la' inözili' lë' ni, chibidxín le rinná bë'ë Dios ga zóali'." <sup>12</sup> Neda' rea' libí'ili', cate' idxín dza ichúguíë' Dios quégaca bönachi, ila'guí'i ila'zaca'rö bönachi yödzo ni' ca ila'guí'i ila'zaca' bönachi yödzo Sodoma, nupa ni' busunítië' Dios.

*Le gaca quégaca nupa biti' ulu'bí'i ládxi'gaca*

(Mt. 11:20-24)

<sup>13</sup> Gunné' ca' Jesús:

—Bica' bayechi' libí'ili', bönachi yödzo Corazín. Bica' bayechi' libí'ili', bönachi yödzo Betsaida. La'tu' gulaca lu yödzo Tiro, en lu yödzo Sidón yugu' yöl-la' huáca rubani ca yugu' le bena' ga zóali', dza ni'te ulu'bí'i ládxi'gaquié' bönni' ni', ate' ilácué' lari' cá'asö, en ila'gu'ë dö ícjagaquié', le ulu'ígaca chibulu'bí'i ládxi'gaquié'. <sup>14</sup> Que lë ni na', cate' idxín dza ichúguié' Dios quégaca bönachi, qu'íi sáca'röli' ca ila'gu'íi ila'záquié' bönni' yödzo Tiro, en yödzo Sidón. <sup>15</sup> Libí'ili', bönachi Capernaum. Réquili' tsázali' yehua' yubá. Huötjali' tsöjtsázali' lataj chul-la quégaca nupa nátigaca.

<sup>16</sup> Ní'irö Jesús gudxé' yugu' bönni' uséda queé', rnné':

—Nu ruzé nagui libí'ili', ruzé nagui ca' neda', ate' nu rucá'ana libí'ili' cá'asö, rucá'ana ca' neda' cá'asö, en nu rucá'ana neda' cá'asö, rucá'ana ca' cá'asö Xuza', nasöl-lë'ë neda'.

*Bönni' yöjéngaquié' libán tu'dxiné' ga zoé' Jesús*

<sup>17</sup> Cate' tsónnalalaj yu' chié' bönni' na' gusöl-lë'ë Jesús bulu'dxiné' ga zoé' Lë', bönni' na' yöjéngaquié' libán, ta'nné':

—Xan, tun bö' xihui' ca rnnatu' cate' ruguntu' dxin Lo'.

<sup>18</sup> Jesús gudxé' légaquié':

—Neda' bilé'eda' Satanás tu' xihui', gubixi zxan lúzxiba ca run yösa, le riyaza luyú. <sup>19</sup> Buli'yútsöca', neda' nudöda' lu ná'ali' yöl-la' unná bë' para gaca söngacali'-ba' bëla sínia', en xöjnö', en biti' bí' gaca queéli', ate' ucúl-lali' yöl-la' unná bë' que tu' xihui', nu biti' rilé'e rë'u dxí'a. <sup>20</sup> Na'a, buli'dzeja, calégasö tu' tun bö' xihui' ca rnnali', pero tu' nuzúajgaca lali' lu guichi ni' yehua' yubá.

*Rudzéjané' Jesús*

(Mt. 11:25-27; 13:16-17)

<sup>21</sup> La' ní'isö rudzéjané' Jesús, dzáguié' Dios Bö' Lá'ayi Lë', rnné':

—Rigu'a Li' yöl-la' ba, Xuza', nacu' Xani yehua' yubá, en Xani luyú ni, tu' bucáchu'u yugu' lë ni lógaquié' bönni' táquié' yenni', en bönni' ta'yéajni'iné', pero bulu'íguequinu'-bí' bí'ido' ca naca. ¡Ca' gaca, Xuza', tu' caní guyaza ládxi'u!

<sup>22</sup> Ní'irö gunné':

—Yúgu'të budödë' Xuza' lu na'a. Cuntu nu bönni' nöziné' Nu náquié' Zxí'iné' Dios, pero tuzé' Dios Xuz nöziné', ate' cuntu nu nözi Nu náquié' Dios Xuz, pero tuzé' Zxí'iné' nöziné', ate' inözigaca ca' nupa na' Zxí'iné' rë'ëné' ulu'íné' léguequi Xuzé'.

<sup>23</sup> Ní'irö Jesús buyúé' yugu' bönni' uséda queé', en rë' légaquié':

—Bica' bágaca nupa ta'lé'e le rilé'eli' libí'ili', <sup>24</sup> tu' rea' libí'ili': Zían bönni' gulu'ë didza' uláz queé' Dios, enca' bönni' gula'nná bë'ë, gulé'ënné' ila'lé'ené' le rilé'eli', pero biti' bila'lé'ené' le. Gulé'ënné' ila'yönné' le riyönili', pero biti' bila'yönné' le.

*Tu bönni' Samaria, bönni' tsahui'*

<sup>25</sup> Ní'irö guyasé' tu bönni' yudo' usedi, en para si' bë'ë Jesús, gunábiné' Lë', rnné':

—Bönni' Usedi, ¿bizxi ral-la' guna' para idéli'da' yöl-la' na'bán idú?

<sup>26</sup> Jesús rë' lë':

—¿Bizxi caz nazúaj lu guichi lu xibá queë' Moisés? ¿Nacxi rusaca' quiu' lè na' rulabu'?

<sup>27</sup> Bubi'ë didza' bönni' na', rnnë':

—Caní rna: “Idxi'inu' Xanu' Dios idú ládxi'u, en len idú icja ládxi'do'o, en len idú yöl-la' run quiu', en len idú yöl-la' réajni'i quiu', ate' idxi'inu' bönni' luzó'o ca nadxi'i cuinu'.”

<sup>28</sup> Jesús rë' lë':

—Dxi'ado' bubi'u didza'. Ben caní, ate' gata' quiu' yöl-la' na'bán na'.

<sup>29</sup> Tu' gú'unnë' bönni' na' ubéaj dxi'a cuinë', rë' Jesús:

—¿Nuzxi na' bönni' luzá'a?

<sup>30</sup> Bubi'ë didza' Jesús, rë' lë':

—Buzë'ë tu bönni' Jerusalén, rudínnië', sa'yéajë' yödzo Jericó. La' nöza ni' gula'zönë' gubán lë'. Gula'güë' lari' nácuë', en gulunë' lë' huë'. Ní'irö bulu'zë'ë ni', en nucá'anagaquië' lë', chirati cazë'. <sup>31</sup> Ní'irö gudödë' tu bixúz la' nöza ni'. Cate' bilé'enë' bönni' huë' na', tsölá'aló gudödë'. <sup>32</sup> Gudödë' ca' ni' tu bönni' nababë' xzi'ini xi'sóë' Leví, yugu' bönni' na' tunë' dxin que yudo'. Cate' bilé'enë' lë', tsölá'aló ca' gudödë'. <sup>33</sup> Lësca' yu'ë tu bönni' Samaria nöza na', ate' bidxinë' gala' ga dë' bönni' huë' na'. Cate' bilé'enë' lë', buéchi' ládxi'ë' lë'. <sup>34</sup> Gubígui'ë ga na' dë', ate' gulu'ë le za, en xisi uva nál-la lu huë' queë', ate' buchölinë' le lari'. Ní'irö budxië' lë' cúdzu'ba' böa' queë', en bu'ë lë' yu'u ga ta'dxinë' bönni' yú'ugaquië' nöza, ate' ni' gudapa chi'ë lë'. <sup>35</sup> Cate' za' rení' ia'tú dza, en chizóa uzë'ë bönni' Samaria na', guléajë' lászjaru' que chopa dza, le bucá'anë' lu në'ë bönni' xan yu'u na', en rë' lë': “Gudapa chi'ë bönni' ni, en channö utöu' ia'lati' dumí, ubi'a neda' quiu' cate' huöda'.” <sup>36</sup> Na'a, ¿nacxi runi li'? ¿Núzxilë' bönni' yonna ni gúquië' bönni' luzë'ë bönni' na' gulu'ë dö' bönni' gubán queë'?

<sup>37</sup> Bubi'ë didza' bönni' yudo' usedi na', rë' Jesús:

—Bönni' na' buéchi' ládxi'ë' lë'.

Ní'irö Jesús gudxë' lë':

—Guyéaj na'a, yöjén ca' li'.

*Le benë' Jesús lídxigacanu Marta, en María*

<sup>38</sup> Ní'irö bu'ë nöza Jesús, ate' bidxinë' tu yödzo'do' ga ni' tu nigula lënu Marta guchë'ënu Lë' lídxinu. <sup>39</sup> Marta ni zóanu nigula xzílanu lënu María, ate' María na' gurö'ötënu ga naca xini'ë Jesús, en ruzë' naganu xtídzë'ë. <sup>40</sup> Marta na' bubi bugu'ínu, zían dxin runnu, ate' gubíga'nu ga na' zoë' Jesús, en rënu Lë':

—Xan, ¿naru' cabí ruí'í ládxi'tso' neda' tu' nucá'anabi' bi'í xzila' ni neda', ate' tuza' runa' dxin? Gudxi-bi' gácalenbi' neda'.

<sup>41</sup> Bubi'ë didza' Jesús, rë'ë-nu:

—Marta, Marta, ruúbi rugu'ide'enu', en zían le ruí'í ládxi'u runu'.

<sup>42</sup> Tuz le run bayudxi nu gun, ate' María ni guröbi' lë na' nácatëro dxi'a, ate' lë na' guröbi' bití' udúa queëbi'.

## 11

*Ca ral-la' ulídzaru'-në' Dios  
(Mt. 6:9-15; 7:7-11)*

<sup>1</sup> Tu dza ni' Jesús rulidzë' Dios. Cate' budxi bé'lenë' Dios didza', tuë' bönni' usëda queë' rë' Lë', rnnë':

—Xan, busedi netu' ulídzatu'-nē' Dios gü'ilentu'-nē' didza', ca benē' Juan, busedinē' bönni' dá'gaquiē' lē'.

<sup>2</sup> Ní'irō Jesús rē' légaquiē':

—Cate' ulídzali'-nē' Dios gü'ilenli'-nē' didza', guli'ná: Xuztu', zu' yehua' yubá, gá'ana zxön Lo'.

Gudá inná bē'u.

Gaca ca raza ládzu'u Li' luyú ni, ca na' raza yehua' yubá.

<sup>3</sup> Benna le gágutu' na'a dza.

<sup>4</sup> Buniti lo netu' dul-la' nabága'tu'

ca netu' ca' runiti lotu' nupa tua' dö' queētu'.

Biti' gu'u lataj si' bē' tu' xihui' netu',

pero busölá netu' lu na' nu ruá' dö'.

<sup>5</sup> Jesús rē' ca' légaquiē':

—Channö zoē' nu bönni' ládjali', en zoē' böchi' luzē'ë, en channö huidē' ga na' zoē' guluhuēla, ate' ulidzē' lē', innē': “Böcha'a, benna quia' tsonna yöta xtila <sup>6</sup> tu' si' bidxinē' quia' böchi' luzá'a, zē'ë zi'tu', pero biti' bi dē le gu'a-nē' gahuē.” <sup>7</sup> ¿Naru' ubi'ë didza' caní bönni' na' zoē' yu'u, guíē' lē': “Biti' utsó'o neda' tu' chinayayaj yu'u, en chidēlengacabi' bi'i quia' neda', ate' biti' gaca chasa' bi gunna' quiu'”? <sup>8</sup> Neda' rea' libí'ili': Sal-la' biti' chasē' bi unödzejē' queē' tu' náquiē' böchi' luzē'ë, pero chasē', en unödzejē' queē' idutē le riquinnē' para cabirö upízxjanē' lē'. <sup>9</sup> Que lē ni na' rea' libí'ili': Guli'naba, ate' Dios gunnē' queēli'. Guli'quilaj, ate' idzöli queēli'. Buli'lidza ra' yu'u, ate' tsalaj queēli'. <sup>10</sup> Nu rinaba, rizi' que, ate' nu riguilaj, ridzöli que, ate' nu rulidza ra' yu'u, ralaj que.

<sup>11</sup> 'Channö zoē' nu bönni' ládjali', en náquiē' xuz, ate' channö zxí'inē' inábibi' lē' yöta xtila, ¿naru' unödzejatsē' queēbi' guiöj? Channö inábibi' lē' tuba' böla, ¿naru' unödzejatsē' queēbi' bēla? <sup>12</sup> Channö inábibi' lē' dxita que böra, ¿naru' unödzejatsē' queēbi' xöjnö? <sup>13</sup> Caní naca, nácali' libí'ili' huiá' dö', pero nözili' unödzejali' quégacabi' zxí'inili' le naca dxi'a. Nácatērö löza Xúzili' zoē' yehua' yubá gunnē' queēli' Dios Bö' Lá'ayi, núlöli' inábili' Lē'.

*Ta'nnē' runē' dxin Jesús len yöl-la' huáca que tu' xihui'*

*(Mt. 12:22-30; Mr. 3:19-27)*

<sup>14</sup> Tu dza bubéajē' Jesús bö' xihui' yu'u tu bönni', le run ga biti' raza innē'. Cate' burúaj bö' xihui' na', bē'ë didza' bönni' na' biti' guca innē', ate' bulu'bani bö'nachi nacua' ni'. <sup>15</sup> Bal-la bö'nachi nacua' ni' ta'nná:

—Len yöl-la' huáca que tu' xihui' Beelzebú, xángaca bö' xihui', rubéajē' yugu' bö' xihui' na'.

<sup>16</sup> Ia'bal-la bö'nachi na' gulē'ëni ila'zì' bē' Jesús, ate' gula'nabi Lē' gunē' tu le gaca bē' le za' yehua' yubá. <sup>17</sup> Réquibe'enē' Jesús le ta'zá' ládxi'gaquiē', ate' rē' légaquiē':

—Gáti'tēs ga ta'nná be'e bö'nachi luzē'eguequi, channö ila'rúaj choplö la' léguequisö bö'nachi na', ila'niti. Channö ila'rúaj choplö bö'nachi nacua' tu yu'u, údxi quéguequi. <sup>18</sup> Lēsca' caní raza que Satanás, tu' xihui', nazí'i le ca' Beelzebú. Channö ila'rúaj choplö nupa dá'gaca le, ¿nacxi gaca idía' yöl-la' unná bē' que? ¿Rnnátsali' na'a: Len yöl-la' huáca que Beelzebú rubéaja' yugu' bö' xihui'? <sup>19</sup> Channö neda', len yöl-la' huáca que Beelzebú rubéaja' yugu' bö' xihui', ¿nuzxi runna quégaca nupa dá'gaca libí'ili' yöl-la' huáca tu'béaj yugu' bö' xihui'? Que lē ni na', le tun nupa ni naca bē' nachixili'. <sup>20</sup> Channö neda', len yöl-la' huáca queē' Dios rubéajgaca' bö' xihui', le nácatē chibidxín le rinná bē'ë Dios ga zóali'.

<sup>21</sup> 'Cate' tu bönni' nál-la dè lu nē'è le rudí'inē', en rapa chi'è lidxē', naca chi'i dērō le dē queē'. <sup>22</sup> Na'a, channō zē'è ia'tué' bönni' nál-latērē' ca lē', en ucul-lē' lē', ní'irō cuē' yúgu'tē le rudí'inē', lē na' ruzxōni lādxe'è, ate' quísiē' le dē queē' bönni' na'.

<sup>23</sup> 'Nu biti' rácalen neda', ridá'bagá' neda'. Nu biti' rutúbilen neda', rusilasi nu na'.

*Ca naca que bö' xihui' rudxín xilataj*

(Mt. 12:43-45)

<sup>24</sup> Gunnē' ca' Jesús:

—Cate' rirúaj bö' xihui' lu bönni', ridá gapa nabídx, riguilaj ga uzí' ladxí'. Channō cabí idzōli que, inná: "Huōja' xilatja' ga ni' birúaja'." <sup>25</sup> Cate' rudxín ni', rōjxaca' bönni' na', náquiē' ca tu yu'u chinulúa, en chinabá'a para nu tsōjsóa ni'. <sup>26</sup> Ní'irō reaj, en rōjxí' ia'gadxi bö' xihui', nácagacatērō xihui' ca le, ate' ta'yú'u bönni' na'. Na'a, le raca queē' bönni' na' nayáli'tērō ca le guca queē' zí'alō.

*Le naca bica' ba le naca idú*

<sup>27</sup> Tsanni ni' ru'è Jesús didza' ni, tu nigula nútsa'nu ladaj bōnachi zían na' bē'ēnu zidzaj didza', rnnanu:

—Bica' ba nigula na' biá'anu Li' lē'ēnu, en bica' ba ca' luchú'unu ga na' gúdxu'u.

<sup>28</sup> Bubi'è didza' Jesús, gunnē':

—Nácagacatērō bica' ba nupa ta'yōni xtídzē'è Dios, en tun ca rnna.

*Ta'nábinē' Jesús gunē' le gaca bē' nuzxi náquiē'*

(Mt. 12:38-42; Mr. 8:12)

<sup>29</sup> Tsanni ni' ta'biga' bōnachi zían ga zoē' Jesús, gusí lahuē' ru'è didza', rnnē':

—Ta'nába bōnachi tuá' dō' ni guna' le gaca bē' ga za' yōl-la' huáca quia', pero biti' bi le gaca bē' ila'lé'enē'. Tuz le gaca bē' ca na' guca queē' Jonás ila'lé'enē'. <sup>30</sup> Ca na' guca queē' Jonás, gúquiē' tu le naca bē' lógaca bōnachi yōdzō Nínive, lēscá' caní gaca quia' neda', Bönni' Guljē' Bōnachi, gaca' tu le gaca bē' lógaca bōnachi dza ni zóaru' na'a. <sup>31</sup> Cate' idxín dza ichúguiē' Dios quégaca bōnachi ila'guí' ila'zaca', en uchi'a usōrōē' bōnachi dza ni zóaru' na'a, Dios uchisē'-nu nigula gunná bé'enu bōnachi dza ni'te luyú ni' dē tsólá'a ga ridōdi gubidza beo' ziaga, ate' le bennu ulu'í nabága'gaca bōnachi ni xíguia', tu' bídanu lēnu, birúajnu ga naca zí'tu' para uduzē náganu didza' réajni'í bē'è Salomón, bönni' gunná bé'enē' bōnachi Israel, pero na'a, zoa' neda' ni, en nayépisētēra' ca Salomón na'. <sup>32</sup> Lēscá' caní, Dios uchisē' bönni' gula'cu'è yōdzō Nínive cate' idxín dza ichugu bē'è quégaca bōnachi, en uchi'a usōrōē' bōnachi dza ni zóaru' na'a, ate' le gulunē' ulu'í nabága'gaca bōnachi ni xíguia', tu' bulu'bí'í lādxi'gaquiē' bönni' Nínive cate' bila'yōnnē' libán benē' Jonás, ate' na'a zoa' neda' ni, en nayépisētēra' ca Jonás na'.

*Le rigú'u bení' lu icja lādxi'do'oru'*

(Mt. 5:15; 6:22-23)

<sup>33</sup> Gunnē' ca' Jesús:

—Cate' nu ruquela' guí', biti' rigú'u le ga nagachi', en biti' rudusi' le gu'ína, pero ruzóa le xitsá' ga liná', para uzeni' quégaca nupa ta'yú'u yu'u na'. <sup>34</sup> Guiōj lorú' naca ca tu le rigú'u bení' lu icja lādxi'do'oru'. Channō guiōj lo' naca dxi'a, idúteo' yudzu le naca bení', pero channō naca xihui'

guiöj lo', idúteo' yudzu le naca chul-la. <sup>35</sup> Ben chí'i cuinu' na'a, para cabí huóaca chul-la lê na' rigú'u beni' lu icja ládxi'do'o. <sup>36</sup> Caní naca, channó idúteo' nalísinu' le naca beni', en biti' bí zóalen lí' le chul-la, yúgu'tè ilé'enu' dxi'a ca raca cate' ruzen' quiu' guí'.

*Jesús ruzégui'ë yugu' bönni' yudo' didza'*  
(Mt. 23:1-36; Mr. 12:38-40; Lc. 20:45-47)

<sup>37</sup> Cate' budxi bë'ë didza' ni Jesús, tu bönni' yudo' fariseo bulidzë' Lë para tsöjtágulenë' lë'. Cate' guyázië' Jesús lidxë' bönni' yudo' na', gurö'ë rahuë'. <sup>38</sup> Cate' bönni' yudo' fariseo na' bilé'enë' Lë', bubáninë' tu' cabí gudibi në'ë Jesús cate' si' gahuë'. <sup>39</sup> Xanru' rë' lë':

—Libí'ili', bönni' yudo' fariseo, riguibi cuinli' ca riguibili' láhuilögaca le rë'aji ráhuili', pero lu icja ládxi'do'oli' ruhuídí'li', en rizá' ládxi'li' le ruá' dö'. <sup>40</sup> Libí'ili', bönni' biti' réajni'li'. ¿Naru' cabí nózili', Nu ben le zoa láhuisö ben ca' le yu'u lë'elö? <sup>41</sup> Na'a, guli'gún gun le dë queëli', ate' ní'irö huóaca dxi'a yúgu'tè le dë queëli'.

<sup>42</sup> 'Bica' bayechi' libí'ili', bönni' yudo' fariseo. Riguíxjali' que yudo' tu cö' huéaj tu' chí cö' le rizí'ili' que xöhuéaj, en que guixi' ruda, en quégaca guixi' cuando', pero rudódisili' le naca tsahui', en yöl-la' nadxí'i queëli' Dios. Yugu' lë' ni run bayudxi gunli', en biti' ucá'anali' ia'zica' lë' na' runli'.

<sup>43</sup> 'Bica' bayechi' libí'ili', bönni' yudo' fariseo. Rë'ëni' cö'öli' gapa naca lo lu yu'u ga rudúbili' rusédali' queë' Dios, en rë'ëni' ulu'lidza bönachi libí'ili' ba zxon gapa naca láhuilöguequi bönachi.

<sup>44</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' ruluí'sö tsahui' cuinli', tu' nácali' ca nácagaca yeru ba quégaca nupa nátigaca le cabí nalá'gaca, ate' ta'dá bönachi láhuigaca yeru ba na', en biti' téquibe'e.

<sup>45</sup> Ní'irö hubi'ë didza' tu bönni' yudo' usedi raquië' xibá queë' Moisés. Rë' Jesús:

—Bönni' Usedi, cate' rno' caní, netu' ca' runu' zi'.

<sup>46</sup> Jesús rë' lë':

—Bica' bayechi' ca' libí'ili', bönni' yudo' usedi rácali' xibá queë' Moisés, tu' rusubága'gacali' bönachi tu yua' zi'i le cabí gaca nu guá', pero libí'ili' calëga láti'do'os biti' ruláhuili' le len ná'ali'.

<sup>47</sup> 'Bica' bayechi' libí'ili', tu' richísali' biquitaj quégaca ba ga nagáchi'gaquië' bönni' gulu'ë didza' uláz queë' Dios, ate' gulútië' xuz xtó'oli' légaquië'. <sup>48</sup> Caní naca, runli' ba nalí runli' tuz le gulunë' xuz xtó'oli' tu' gulútië' xuz xtó'oli' na' légaquië', ate' libí'ili' richísali' biquitaj quégaca ba ga nagáchi'gaquië'.

<sup>49</sup> 'Que lë' ni na', lu yöl-la' réajni'i queë', Dios gunné' caní: "Isöl-la'a queëli' bönni' ilu'ë didza' uláz quia', en yugu' bönni' gubáz quia', ate' yugu' bönni' ni, bal-lë' gútili', en ia'bal-lë' cuia na'li' légaquië'." <sup>50</sup> Caní gunë' Dios tu' uchi'a usöröë' quégaca bönachi dza ni zóaru' na'a, ni'a que rön quégaca yúgu'të bönni' gulu'ë didza' uláz queë', bönni' ni' bëtigaca bönachi légaquië' cate' gusí lo rata' yödzölió, <sup>51</sup> ga gusí lo nu bëti Abel, ga bidxintë gulútië' Zacarías, bönni' na' gulútië' gatsaj láhuilö ga dë bucugu lá'ayi ga na' tu' zégui'gaquië'-ba' böa' bëdxido' lahuë' Dios, en ga dë lataj lá'ayi. Que lë' ni na', rea' libí'ili', Dios uchúguë' quégaca bönachi dza ni zóaru' na'a, ni'a que rön quégaca yúgu'të bönni' na' gulútië' xuz xtó'oli' légaquië'.



<sup>52</sup> 'Bica' bayechi' libí'ili', bönni' yudo' usedi, rácali' xibá queë Moisés. La' libí'isili' dë lu ná'ali' zxi'ini guié que lataj ga ta'dzöli bönachi yöl-la' réajni'i. Libí'ili' biti' riyázali', ate' ruzága'li' xinözigaca nupa tē'eni ila'yaza.

<sup>53</sup> Cate' Jesús budxi bē'lenē' légaquiē' didza' ni, bönni' yudo' tu'sédinē', en yugu' bönni' yudo' fariseo gula'léde'enē' Lē', ate' gula'sí lógaquiē' ta'naba yúdxide'enē' Lē' ca naca zían le taca, <sup>54</sup> en tu'béajē' Lē' didza' para gaca ulu'zéguiē' Lē' didza' ni'a que didza' ubi'ë.

## 12

*Rusédinē' Jesús ca naca yöl-la' rulu'isö tsahui' cuini*

<sup>1</sup> La' dza na' bulu'dubi zían gayuá' bönachi ga zoë' Jesús ga bidxintē ta'rölisö luzé'eguequi bönachi na'. Ní'irö gusi lahuē' Jesús rē' yugu' bönni' usēda queë cazē', rnnē':

—Guli'gún chí'i cuinli' que le naca ca cúa zi que yōta xtila quégaquiē' bönni' yudo' fariseo, le naca yöl-la' rulu'isö tsahui' cuini quégaquiē'. <sup>2</sup> Biti' bi dë le naca balándo'os le cabí ilá' lahui, en biti' bi dë le nagachi' le cabí gaca bē'. <sup>3</sup> Que lē ni na', yúgu'tē le chigunnáli' ga naca chul-la, ila'yōni bönachi ga naca lu bení', ate' didza' bē'ēli' bagáchi'sö ga guzóa lu yu'u nayayaj, gaca libán que ga naca lógaca bönachi.

*Nu ral-la' gádxiru'*

*(Mt. 10:28-31)*

<sup>4</sup> Gunnē' ca' Jesús:

—Böcha'ado', rea' libí'ili': Biti' gádxili' bönni' tütigaquiē' bönachi, ate' tōdi na' bítirö bi gaca ilunē' quéguequi. <sup>5</sup> Ulu'ida' libí'ili' nu ral-la' gádxili'. Guli'gadxi Nu na' gaca ugúa yöl-la' na'bán queēli', en tōdi na' dë lu nē'ë yöl-la' unná bē' chū'unē' libí'ili' lu gu' gabila. Ön, rea' libí'ili', guli'gadxi Nu na'.

<sup>6</sup> 'Túti'gaquiē'-ba' gáyu'ba' biguinnido' len chopa dumí lásido'. Biti' ral-la ládxē'ë-ba' Dios tu biguinnido' na'. <sup>7</sup> Lësca' caní, yúgu'tē guitsa' ícjali' nabábagaca lahuē' Dios. Que lē ni na', biti' gádxili'. Nazáca'tëröli' libí'ili' ca zianba' biguinnido'.

*Nupa ta'nmasö néquiquequi queë' Jesús*

*(Mt. 10:32-33; 12:32; 10:19-20)*

<sup>8</sup> Gunnē' ca' Jesús:

—Rea' libí'ili': Yúgu'tē bönni' ta'nnē' néquiquequinē' quia' neda' lógaca bönachi, lësca' neda', Bönni' Guljē' Bönachi, innía' néquiquequinē' quia' lógaquiē' gubáz lá'ayi queë' Dios, <sup>9</sup> ate' bönni' ta'dá'baguē'ë néquiquequinē' quia' lógaca bönachi, lësca' neda' tá'baga'a néquiquequinē' quia' lógaquiē' gubáz lá'ayi queë' Dios.

<sup>10</sup> 'Yúgu'tē nupa bi ila'nnē' quia' neda', Bönni' Guljē' Bönachi, gaca uniti lahuē' Dios léguequi, pero nu innē' zi' queë' Dios Bö' Lá'ayi, biti' uniti lahuē' Dios nu na'.

<sup>11</sup> 'Cate' ila'chē'ë libí'ili' gapa naca lu yu'u ga tu'dubē' bönni' judío, en tu'sedē' queë' Dios, en lógaquiē' bönni' ulu'chi'a ulu'söröë libí'ili', en lógaquiē' bönni' dë lu ná'agaquiē', biti' ubi ugu'ili' nacxi gunli' o bizxi didza' ubí'ili', o bizxi innali'. <sup>12</sup> La' dza ná'asö usédinē' Dios Bö' Lá'ayi libí'ili' le ral-la' innali'.

*Huáca gun yöl-la' tsahui' queëru' ga gal-la ládxiru'-nē' Dios*

<sup>13</sup> Tu bönni' nútsē'ë ladaj bönachi zían na' rē' Jesús, rnnē':

—Bönni' Usedi, gudxë' böcha'a gunnë' uláz quia' le guta' queë' xuztu'.

<sup>14</sup> Jesús rë' lë':

—Bönni'. ¿Naru' zoa nu buzóa neda' ca nu uchi'a usörö libí'ili', o nu gun gatsaj le dë queëli'?

<sup>15</sup> Ní'irö Jesús gudxë' bönachi nacua' ni', rnnë':

—Buli'yútsöca'. Guli'gún chí'i cuinli' para cabí uhuí'di'li'. Le uzi'ë xibé nu bönni' bití' nácasö le zían le dë queë'.

<sup>16</sup> Ní'irö Jesús bé'lenë' légaquië' didza', bucúdzu'ë didza', rnnë':

—Zoë' tu bönni' rilé'enë' yöl-la' tsahui' queë', ate' runödizada' gulapa lu xiyúë'. <sup>17</sup> Ní'irö guzá ládxe'ë bönni' na', rnnë': "¿Nacxi guntsa'? Bití' dë ga gapa chí'a le rulá' quia'." <sup>18</sup> Ní'irö rnnë': "Caní guna'. Uquínnajgaca' yu'u ga rapa chí'a le rulá' quia', ate' guna' yugu' yu'u zxöntëro' ca', ate' gapa chí'a le rulá' quia' ni', len yugu' le dë quia'. <sup>19</sup> Ní'irö gaca guíë' cuina': Chidëda' quia' zían le chinutuba', le gáhuida' zían iz. Uzí ládxa'a. Gu'aj gahua', en udzëjada'." <sup>20</sup> Ní'irö Dios rë' lë': "Li', bönni' bití' bi nõzinë'. Na'a dzö' gätíu'. Na'a, ¿nuzxi caz guequi que, lë na' chinutubu'?" <sup>21</sup> Caní raca queë' bönni' rutubë' la' queëzë' yöl-la' tsahui', en bití' runë' le naca ca yöl-la' tsahui' lahuë' Dios.

*Dios run chí'ë yugu' bönachi queë'*

*(Mt. 6:25-34)*

<sup>22</sup> Gudödi ni' Jesús gudxë' yugu' bönni' usëda queë', rnnë':

—Que lë ni na' rea' libí'ili': Bití' ubi uguí'ili' ni'a que le gu'aj gáguli', lë na' nabánili', o ni'a que lari' gáculi'. <sup>23</sup> Nácáro lesaca' yöl-la' na'bán queëli' ca le ráguli', ate' nácáro lesaca' idú le nácali' ca lari' ráculi'. <sup>24</sup> Buli'yutëz ca raca quegacaba' boíquiaj. Bití' tázaba', en bití' ta'lápaba', en bití' nacua' quegacaba' ga ilún chí'iba' le rulá' quegacaba', pero Dios rugahuë' légacaba'. ¿Naru' cabí nazáca'tëroli' libí'ili' ca yugu' biguínndo'? <sup>25</sup> ¿Nuzxi caz bönni' ladjali' gaca gunë' ga soë' ibanë' ia'tú chí'ido'os tu ruúbi ruguí' ládxi'da'ahuë'? <sup>26</sup> Que lë ni na', channö cabí gaca gunli' lë ni naca cuídi'sö, ¿bizx que ruúbi ruguí'ili' ni'a que le naca zxöntëro'?

<sup>27</sup> Buli'yutëz ca ta'zxön yöjdo'. Bití' tun du lari', en bití' taba lari', pero rea' libí'ili', bití' gúcarö lachi le gúcuë' Salomón ca nácagaca yöjdo' ni, sal-la' gúta'da' yöl-la' tsahui' queë'. <sup>28</sup> Channö Dios runë' lachi yöj guíxi'do' rö'gaca na'a la' guíxi', ate' cuxó huidzaj ila'gu'ë léguequi lu guí', ¿naru' cabí gunë' le nácáro dxi'a queëli', libí'ili' na' bití' réajlë'ëli' Dios idú ládxi'li'? <sup>29</sup> Que lë ni na', bití' güi' ládxi'li' le ral-la' gáguli', en le ral-la' guí'jali', en bití' ubi uguí' ládxi'do'oli'. <sup>30</sup> Yúgu'të lë ni ta'guilaj bönachi yödzölió ni, pero chinöz quezínë' Xúzili' Dios le riquínili'. <sup>31</sup> Guli'gü' ládxi'li' tsú'uli' ga rinná bë'ë Dios, ate' yúgu'të lë ni cu'ë xinöza queëli'.

*Yöl-la' tsahui' rigú'uru' yehua' yubá*

*(Mt. 6:19-21)*

<sup>32</sup> Gunnë' ca' Jesús:

—Bití' gádxili', libí'ili' na' nácali' bö'cu' xzíla'do' quia'. Nabábasili' zóali', pero raza ládxe'ë Xúzili' Dios gunnë' queëli' lataj tsú'uli' ga ni' rinná bë'ë Lë'. <sup>33</sup> Guli'guti' le dë queëli', en buli'nödzej quegaca bönachi yechi'. Caní gaca, gunli' queëli' yöxaj dumí le cabí gaca ditaj, en cú'uli' yöl-la' tsahui' na' yehua' yubá le bití' ubidxi udú, ga ni' bití' idxinë' bönni' gubán, en bití' usunítiba' böa'do' le. <sup>34</sup> Ga ni' dë yöl-la' tsahui' queëli', ni' güi' ládxi'li' idxinli'.

*Ral-la' sóaru' ban ladxi'*

<sup>35</sup> Gunné' ca' Jesús:

—Guli'sóa sina', en guli'quela' guí' le uzení' queéli'. <sup>36</sup> Guli'gaca ca bönni' huen dxin ta'bözé' dza huödé' xángaquié', bönni' sa'yéajé' laní que yöl-la' rutsaga na', para cate' udxiné', en ulidzé', la' ila'sáljaté' queé' tsu'è. <sup>37</sup> Bica' bágaca huen dxin na' ila'cu'è ban ladxi' cate' huödé' xángaquié'. Le nácaté rea' libí'ili, upá'a cuiné' xángaquié' na', ate' guné' ga ila'bö'è ga ilahué', ate' cu'è le ilahué'. <sup>38</sup> Sal-la' huödé' cate' chiral-la o idú guluhuéla, channö idixáquié' légaquié' nacu'è ban ladxi', bica' bágaca huen dxin na'. <sup>39</sup> Lê ni ral-la' inözili'. La'tu' nöziné' xan yu'u bizxi dza huadxiné' bönni' gubán, usubán ládxé'è, en biti' gu'è lataj bönni' na' udxíé' yeru lidxé', para cabí cuané' le dzö'ö lidxé'. <sup>40</sup> Que lê ni na', guli'sóa ban ladxi' ca' libí'ili', tu' huöda' neda', Bönni' Guljé' Bönachi, tu dza biti' ribözali' neda'.

*Bönni' huen dxin tsahui', en bönni' huen dxin biti' náquié' tsahui'*

*(Mt. 24:45-51)*

<sup>41</sup> Ní'irö Pedro gunábiné' Jesús, rnné':

—Xan, ¿naru' reo' nétu'sö lê ni rucúdz'u didza', o reo' ca' caní yúgu'té bönachi?

<sup>42</sup> Ré' Xanru' lé':

—¿Nuzxi na' bönni' huen dxin tsahui', en réajni'iné', dè lu në'è uláz queé' xané'? Bönni' ni, xané' udödé' lu në'è lidxé' para cate' gála'rö ilahué' bönni' nacu'è lidxé', gu'è que queégaquié' le ilahué'. <sup>43</sup> Bica' ba bönni' huen dxin na' cate' huödé' xané', idixáquié' lé' runé' caní dxin na' nudödé' lu në'è. <sup>44</sup> Le nácaté rea' libí'ili, udödé' xané' lu në'è bönni' huen dxin tsahui' na' iduté le dè queé'. <sup>45</sup> Channö guéquiné' bönni' huen dxin na' huadzené' huödé' xané', ate' isí lahué' gu'è dö' quégaquié' ia'zica'rè' huen dxin, bönni' en nigula, en isí lahué' guí'aj gahué', en súdxiné', <sup>46</sup> ní'irö huödé' xané' bönni' huen dxin na' cate' biti' ribözé' lé', en cate' biti' réquibe'ené', ate' usaca' zi'é bönni' huen dxin biti' náquié' tsahui' na', en ichúguié' queé' qui'í sáquié' ca narugu quégaquié' bönni' biti' ta'yéajlé'è.

<sup>47</sup> Bönni' huen dxin na' nöziné' le ré'éné' xané', en biti' zoé' sina', en biti' runé' ca rnné' xané', bönni' ni, quínité'rè' xané' lé'. <sup>48</sup> Channö cabí nöziné' tu bönni' huen dxin le ré'éné' xané', en guné' le gun ga íbágué'è le quiné' xané' lé', bönni' ni quiné' lé' láti'do'os. Tu bönni' yu'u lu në'è yenni', yenni' unabé' xané' lu në'è, ate' bönni' na' xané' nuzxöni ládxé'è lé' le zxön, le zxöntèrö ca' unabé' xané' lu në'è bönni' huen dxin na'.

*Le náquié' Jesús gun ga ila'rúaj choplö bönachi*

*(Mt. 10:34-36)*

<sup>49</sup> Gunné' ca' Jesús:

—Bida' neda' dujéna' ga tsegui guí' yödzölió ni, en caba ládxa'a ch-naguéla' guí' na'. <sup>50</sup> Na'a, dè tu le ral-la' qui'í saca'a le naca ca tu le idí'ida' nisa, ate' rö'a böniga ga idxinté gaca caní quia'. <sup>51</sup> ¿Naru' réquili' bida' dulequi dxía' le raca yödzölió ni? Rea' libí'ili': ¡Caléga! Bida' duléquia' le gun ga ila'rúaj choplö bönachi. <sup>52</sup> Na'a isí lo lu'lá'alén luzé'eguequi gayu' bönachi nacua' tu yu'u. Tsonné' ila'dá'bagué'è chopé' nazí'igaquié' xtídza'a, ate' chopé' na' ila'dá'bagué'è tsonné' na'. <sup>53</sup> Nu bönni' zóabi' bi'í bönni' queé' tá'bagué'è xzí'iné' na', ate' bi'í bönni' na' tá'baga'bi' xúzibi'. Nigula zóabi' bi'í nigula queénu tá'baga'nu xzí'ininu na', ate' bi'í nigula na' tá'baga'bi' xiná'abi'. Nigula zóanu nigula xzoa' lídxinu tá'baga'nu xzoa' lídxinu na', ate' nigula xzoa' lídxinu na' tá'baga'nu xto' xzí'ininu.

*Le náçagaca bè' le taca na'a dza*

*(Mt. 16:1-4; Mr. 8:11-13)*

<sup>54</sup>Jesús gudxë' ca' bönachi zían nacua' ni', rnnë':

—Cate' rilé'eli' za' bōaj saca' ga ribía gubidza, la' rnnátëli': “Hualaj guiój”, ate' caní raca. <sup>55</sup>Cate' recja bō' za' saca' ga ridōdi gubidza beo' ziaga, rnnali': “Udzá' a na'a”, ate' caní raca. <sup>56</sup>Libí'ili', bōnni' rulu'isō tsahui' cuinli'. Nōzili' le rulu'i le raca lúxiba, en le raca luyú ni, pero bití' réquibe'eli' le rulu'i le náçagaca bè' taca dza ni zóaru' na'a.

*Ral-la' ugá'analenru' tsahui' nu rilé' r'eu*

*(Mt. 5:25-26)*

<sup>57</sup>Gunnë' ca' Jesús:

—¿Bizx que bití' ruchi'a rusöröli' la' libí'sili' ca naca le naca tsahui'? <sup>58</sup>Channō zoa nu bi unabi yudxi li', ate' zéajli' idxinli' yúlahui', bè' ladxi' ugá'analenu' tsahui' nu na' tsanni ni' yú'uli' nōza, para cabí uzegui li' lahuë' bōnni' uchi'a usöröë' libí'ili', ate' bōnni' uchi'a usöröë' na' udödë' li' lu në'ë bōnni' rusayjë' lidxi guié, ate' bōnni' na' rusayjë' lidxi guié cu'ë li' lidxi guié na'. <sup>59</sup>Rea' li', bití' uruju' ni' cate' údxirō quixxju' yúgu'të dumí lásido' ral-lu'u que nu na'.

## 13

*Run bayudxi ubí'i ládxi'ru'*

<sup>1</sup>La' dza ní'sō bila'dxinë' bōnni' ta'guixjöi'inë' Jesús ca benë' Pilato, bëtië' bal-lë' bōnni' Galilea, en guzxi'ë rōn quégaquië', le bugútsi'në' xichōngacaba' bōa' bēdxi chigulútië' légaçaba' para ila'gu'ë xichōngacaba' na' lahuë' Dios. <sup>2</sup>Bubi'ë didza' Jesús, rë' légaquië':

—¿Naru' réquili' guláçarë' bōnni' dul-la' bōnni' Galilea na' ca ia'zica'rë' bōnni' Galilea, tu' gula'gu'i' gula'zaquië' caní? <sup>3</sup>Rea' libí'ili': ¡Calëga! Channō cabí ubí'i ládxi'li', nítili' ca' yúgu'tëli'. <sup>4</sup>Lësca' caní guca quégaquië' chizxunë' bōnni' ni', yöjbaga' yu'u sibi na' nazí' le Siloé légaquië', ate' gulátie'. ¿Naru' réquili' gula'bága'tërë' légaquië' xigua' ca ia'zica'rō bōnachi nacua' Jerusalén? <sup>5</sup>Rea' libí'ili': ¡Calëga! Channō cabí ubí'i ládxi'li', nítili' ca' yúgu'tëli'.

*Rucúdzu'ë didza' Jesús que yaga higo bití' bi ribía*

<sup>6</sup>Ní'irō bucúdzu'ë didza' Jesús, rë' légaquië':

—Zoë' tu bōnni', zoa tu yaga higo nazë' ga naca lu xiyué'. Rōjtiljë' le ribía yaga na', pero bití' bi ridzōlinë'. <sup>7</sup>Ní'irō gudxë' bōnni' runë' dxin lu xiyué' na', rnnë': “Chiguca tsonna iz rida' rududilja' le cuía yaga higo ni, en bití' bi ridzōlida'. Guchugu le. ¿Bizx que run nigui luyú ni?” <sup>8</sup>Ní'irō bubi'ë didza' bōnni' huen dxin na', rë' lë': “Xan, bücá'anagarō le ia'tú ízatëz, ate' uzatsa' yu zxani, en cu'a bëbu zxani. <sup>9</sup>Channō cuía yaga ni, gaca dxi'a, pero channō cabí bi cuía, ní'irō ichugu' le.”

*Ruínë' Jesús tu nigula ré'enu cate' naca dza lá'ayi*

<sup>10</sup>Tu dza rusédinë' Jesús bōnachi nacua' lu yu'u ga tu'dubë' bōnni' judío, en tu'sëdë' queë' Dios cate' naca dza lá'ayi quégaquië'. <sup>11</sup>Zóanu tu nigula ni' chiguca chizxunu' iz ré'enu, tu' yu'u lënu bō' xihui' run ga te'e bōnachi, ate' nayéçutica'sinu ridanu, en bití' ca' raca ulí cuinnu. <sup>12</sup>Cate' bilé'enë'-nu Jesús, bulidzë'-nu, rnnë':

—Nigúlado', chiböácu' que yödzöhuë' quiu'.

<sup>13</sup> Ní'irö Jesús guxóa në'ë lënu, ate' la' bulitë cuinnu, en gulú'unu-në' Dios yöl-la' ba. <sup>14</sup> Ní'irö gulénë' bönni' lo que yu'u ga na' tu'dubë' tu'sedë' queë' Dios. Rilenë' tu' bunë' Jesús nigula na' cate' naca dza lá'ayi. Bönni' lo na' gudxë' nupa nacuá' ni', rnnë':

—Xopa dza nacuá' cate' runru' dxin. Dë lataj yugu' dza ni guídali' para nu un libí'ili', en calëga dza lá'ayi.

<sup>15</sup> Ní'irö bubi'ë didza' Xanru', rnnë':

—Libí'ili', bönni' rulu'isö tsahui' cuinli', ¿naru' cabí rusédxigacali'-ba' böa' bëdxi que queëli' ga na' dá'gacaba' cate' naca dza lá'ayi, ate' tsöjuá'agacali'-ba' para ilë'ajba' nisa? <sup>16</sup> Nácanu nigula ni xzí'ini xi'sóë' Abraham, ate' idú chixxunu' iz chiyú'unu lu yalaj que Satanás tu' xihui'. ¿Naru' cabí ral-la' nu usedxi lënu sal-la' naca dza lá'ayi?

<sup>17</sup> Cate' bë'ë didza' ni Jesús, bulu'tuí'inë' yúgu'të bönni' nacu'ë ni ta'lenë' Lë', pero bulu'dzeja ia'zica'rö bönachi, yúgu'të nupa nacuá' ni', tu' ta'lé'enë' yugu' le zxön runë' Jesús.

*Rucúdzu'ë didza' Jesús que xisedo' mostaza*

*(Mt. 13:31-32; Mr. 4:30-32)*

<sup>18</sup> Ní'irö rnnë' Jesús:

—¿Nacxi caz raca rizxön le rinná bë'ë Dios, o bizxi uséqui'tseru' le? <sup>19</sup> Raca ca raca que xisedo' mostaza, le guzxi'ë tu bönni', ate' guzë' le ga naca lu xiyúë'. Guzxön yaga mostaza na', en guca ca tu yaga zxön, ate' bila'dxinba' biguínmido', gulunba' xcá'agacaba' lu ni'a në'e yaga mostaza na'.

*Rucúdzu'ë didza' Jesús que cúa zi que yöta xtila*

*(Mt. 13:33)*

<sup>20</sup> Lësca' caní rnnë' Jesús:

—¿Bizxi caz uséqui'tseda' le rinná bë'ë Dios? <sup>21</sup> Naca ca cúa zi que yöta xtila, le guzxi'ínu tu nigula, en bugútsi'nu tsonna cö' cúa yöta xtila, ate' guyaxzaj idütë cúa na'.

*Tu ga tödiru' le naca guído'*

*(Mt. 7:13-14, 21-23)*

<sup>22</sup> Tsanni ni' yu'ë nöza Jesús, sa'yéajë' Jerusalén, ridödë' yugu' yödzö zxön, en yugu' yödzödo', ate' rusédinë' bönachi nacuá' gapa na'. <sup>23</sup> Tu bönni' zoë' ni' gunábinë' Jesús, rnnë':

—Xan, ¿naru' nabábasö nupa ulu'lágaca?

Jesús rë' nupa nacuá' ni', rnnë':

<sup>24</sup> —Guli'gü'i ládxi'li' tsú'uli' saca' ga nu ridödi le naca guído', tu' rea' libí'ili': Zián nupa ilë'ëni ila'yaza ni', pero bití' ila'zéqui'në'. <sup>25</sup> Tödi chasë' Xan yu'u, en usayjë' yu'u, isí lolí' libí'ili' na' zóali' ní'ilö ulídzali'-në' ra' yu'u na', ate' guié'li'-në': “Xan, Xan, gusalaj queëtu'.” Ní'irö ubi'ë didza' Lë', en guië' libí'ili': “Bití' nözda' nuzxi libí'ili'.” <sup>26</sup> Ní'irö isí lolí' innali': “Gü'i gudágulentu' Li', ate' busédinu' gapa naca lu yë'ëyi queëtu'.” <sup>27</sup> Ní'irö guië' libí'ili': “Rea' libí'ili', bití' nözda' gazxi bönachi libí'ili'. Guli'cuíta ga zoa', yúgu'tëli' ruá'ali' dö'.” <sup>28</sup> Ní'irö cödxí yéchi'li', en gagu zxea láya'li' cate' ilé'egacali'-në' Abraham, en Isaac, en Jacob, en yúgu'të bönni' gulu'ë didza' uláz queë' Dios, nacu'ë ga ni' rinná bë'ë Dios, pero libí'ili' sóali' ní'ilö. <sup>29</sup> Ila'dxín bönachi ila'ruáj saca' ga rilén gubidza, en saca' ga ribía gubidza, en saca' ga za' bö' ziaga, en saca' ga ridödi gubidza beo' ziaga,

ate' ila'bö'ë ilahuë' ga ni' rinná bē'ë Dios. <sup>30</sup> Ní'irö ilaca lo bal-la bönachi náca gaca cá'asö na'a, ate' ulu'gá'ana cá'asö bal-la nupa náca gaca lo na'a.

*Ribödxi yechë'ë Jesús ni'a quégaca bönachi Jerusalén*

*(Mt. 23:37-39)*

<sup>31</sup> La' dza ní'isö bila'dxinë' bal-la bönni' yudo' fariseo ga zoë' Jesús en tē' Lē':

—jBurúaj! jBuzxunnaj ni! jRē'ënē' Herodes gútiē' Li'!

<sup>32</sup> Jesús rē' légaquiē':

—Guli'tséaj, guli'tsöjödxe' bönni' na' náquiē' ca tuba' böza', innali': "Buyútsöca', rubéajgaca' bö' xihui', en ruúna' bönachi na'a, en cuxö, en cate' gaca lidzaj, údxi guna' dxin quia'." <sup>33</sup> Run bayudxi tséajlensa' ca' nöza na'a, en cuxö, en huidzaj, ate' idxina' Jerusalén, tu' tütigaquiē' bönni' tu'ë didza' uláz queë' Dios ni'.

<sup>34</sup> 'Libí'ili', zóali' Jerusalén. Rütigacali'-nē' bönni' tu'ë didza' uláz queë' Dios, en ruládxigacali'-nē' guiöj bönni' gubáz risöl-lē'ë Dios ga zóali'. Cate' xö zían luzuí gú'unida' utuba' libí'ili' quia' ca runba' yöjede, rutúbiba' börado' queëba' zxan xíliba', pero biti' gú'unili'. <sup>35</sup> Buli'yútsöca', cá'asö ugá'ana lídxili', ate' rea' libí'ili', bíti'rö ilé'eli' neda' cate' idxinrö dza innali': "Bica' ba Nu na' za' uláz queë' Xanru'."

## 14

*Ruúnē' Jesús tu bönni' ré'enē' huē' gui*

<sup>1</sup> Cate' naca dza lá'ayi quégaquiē' bönni' judío, guyu'ë Jesús lidxë' tu bönni' unná bē', bönni' yudo' fariseo. Rö'ë Jesús rahuë', ate' nacu'ë bönni' yudo' fariseo ni' ta'nē'ë Lē'. <sup>2</sup> Zoë' ca' tu bönni' ré'enē' huē' gui ga na' zoë' Jesús. <sup>3</sup> Ní'irö Jesús gunábinē' bönni' yudo' usedi táquiē' xibá queë' Moisés, en yugu' bönni' yudo' fariseo, rnnē':

—¿Naru' dē' lataj unru' nu re'e cate' naca dza lá'ayi?

<sup>4</sup> Légaquiē' bulu'sayaj ruá'agaquiē'. Ní'irö Jesús gudélē'ë bönni' huē' na', en bunē' lē', ate' la' busöl-la'tē' lē'. <sup>5</sup> Ní'irö Jesús rē' yugu' bönni' yudo' na', rnnē':

—Channö nu bönni' ladjali' nacuá'aba' queë' böa' bēdxi, ate' ibíxiba' tuba' lu yeru, ¿naru' cabí tsöjléajtē'-ba', sal-la' naca dza lá'ayi?

<sup>6</sup> Biti' bi didza' guca ulu'bi'ë ca naca lē ni.

*Nu cö' lataj lo*

<sup>7</sup> Cate' bilé'enē' Jesús ca tunē' bönni' yudo' fariseo na', ta'bö'ë lataj lo ga na' ta'bö'ë tahuë', ní'irö bucúdzu'ë didza', ate' rē' légaquiē':

<sup>8</sup> —Cate' nu bönni' ulidzē' li' guídu' ga raca laní que yöl-la' rutsaga na', biti' cö'u lataj lo. Nadxi ca' nulidzē' ca' tu bönni' nácatērē' lo ca li'. <sup>9</sup> Ní'irö bönni' na' bulidzē' li' huidē' ga zu', en guíē' li': "Bē' lataj bönni' ni cö'ë ga zu'", ate' ní'irö lu yöl-la' rutuí' quiu' tsöjchö'u zxánitëlö. <sup>10</sup> Que lē ni na', cate' nu bönni' ulidzē' li', guyéaj yöjchö' zxánitëlö, para cate' idxinē' bönni' na' bulidzē' li', huē' li': "Böcha'a, gudödi ia'lati' nilö." Ní'irö gácaru' li' lo lógaca nupa ta'bö'len li' tsözxön. <sup>11</sup> Nu run ba zxön cuini, ilunē' ga huöta' huöxaj, pero nu zoa nöxaj ladxi', ilunē' ga gácarö lo nu na'.

<sup>12</sup> Jesús rē' ca' bönni' na' bulidzē' Lē', rnnē':

—Cati' gunu' tu gü'i huagu o tu lanído', biti' ulidzagacu'-nē' yugu' böchi' luzó'o, en yugu' bönni' böchu'u, en yugu' di'a dza quiu', en dzaga yu'u quiu' ta'lé'enē' yöl-la' tsahui' quégaquiē', tu' ulu'lidzē' ca' li', ate' caní gaca,

ubí'i quiu'. <sup>13</sup> Cate' gunu' tu güi'i huagu, bulidza yugu' bönachi yechi', en nupa nabixi ni'a ná'agaca, en nupa biti' raca sá'gaca, en yugu' bönni' lo chul-la. <sup>14</sup> Ní'irö gacu' bica' ba, tu' cabí gaca bi ulu'bi'ë bönni' caní quiu', pero ubí'i quiu' cate' idxín dza ulu'bán nupa gulún le naca tsahui', en gulátigaca.

*Rucúdzu'ë didza' Jesús que tu laní zxön*

<sup>15</sup> Cate' tu bönni' rö'ë rágulenë' Jesús biyönnë' didza' ni, rë' Lë':

—Bica' ba nu gagu ga ni' rinná bë'ë Dios.

<sup>16</sup> Jesús rë' lë':

—Zoë' tu bönni' benë' laní zxön, ate' zián nupa bulidzë'. <sup>17</sup> Cate' chinabá'a la' huagu, gusöl-lë'ë bönni' huen dxin queë' tsöjödxe' nupa na' chinulidzë', gunné': "¡Guli'dá! ¡Yúgu'të chinabá'a!" <sup>18</sup> Gula'sí lógaquië' yúgu'të' ta'nabë' lataj cabí tsöjáquië'. Bönni' zí'alö na' rnnë': "Si' guzxi'a tu luyú, en runda' bayudxi tsöjyúa' le. Ráta'yua' lo' gunnu' neda' lataj." <sup>19</sup> Ia'túë' rnnë': "Si' guzxi'a gayu' nözaba' bëdxi, ate' tsöjzxi' bë'a légacaba' ugúngaca'-ba' dxin. Ráta'yua' lo' gunnu' neda' lataj." <sup>20</sup> Ia'túë' rnnë': "Si' butsaga na'a, en que lë ni na' biti' gaca guída'." <sup>21</sup> Cate' böajë' bönni' huen dxin na', yöjtíxjöi'inë' xanë' yúgu'të lë ni. Ní'irö gulénë' bönni' xan yu'u na', ate' gudxë' bönni' huen dxin na', rnnë': "Guyéajtë na'a gapa naca lu yë'ëyi, en gapa naca la' nöza que yödzö ni, ate' ichë'u yugu' bönachi yechi' ni, en nupa nabixi ni'a ná'agaca, en nupa biti' raca sá'gaca, en yugu' bönni' lo chul-la." <sup>22</sup> Cate' chinunë' bönni' huen dxin na' caní, rnnë': "Xan, chibena' ca na' gunná bé'enu' neda', ate' ni dë' lataj." <sup>23</sup> Ní'irö xanë' gudxë' bönni' huen dxin na', rnnë': "Guyéaj gapa naca la' nöza, en gapa naca nöza lasi, ate' ben bayudxi guídígaca nupa nacuá' ni' para ilí lidxa', <sup>24</sup> tu' rea' libí'ili: Biti' gahuë' que laní quia' nitúë' bönni' ni' bulidza' zí'alö."

*Le sáca'ru' cate' zéajlenru'-në' Cristo*

<sup>25</sup> Yugu' dza ni' röjácalen Jesús bönachi zián, ate' buécjë' Jesús, en rë' légaquië':

<sup>26</sup> —Channö guídalenë' neda' tu bönni', en biti' idxí'irönë' neda' ca nadxí'inë' xuz xinë'ë, en nigula queë', en yugu' zxi'inë', en yugu' bi'i böchë'ë, en yugu' bi'i zanë', en yöl-la' na'bán queë', biti' gaca gáquië' bönni' usëda quia'. <sup>27</sup> Nu bönni' biti' gáquië' ca tu bönni' sa'yéajë' söjtë'ë lë'e yaga cruz, ate' tē'ë neda', biti' gaca gáquië' bönni' usëda quia'. <sup>28</sup> Channö zoë' nu bönni' ladaj libí'ili' guë'ënnë' gunë' tu yu'u zián cuía, çnaru' cabí cö'ë zí'alö ulabë' gáca'xi dumí ral-la' utöë' para inözinë' channö dë' queë' tsca le riquinnë' para údxi gunë' yu'u na'? <sup>29</sup> Channö cabí gunë' caní, en isí lahuë' cuéquië' xilibi yu'u na', ate' biti' gaca údxi gunë' yu'u na', ní'irö ila'sí lógaca yúgu'të nupa ila'lé'e le ulu'titaj lë', <sup>30</sup> ila'nná: "Bönni' ni' gusi lahuë' runë' yu'u, pero biti' guca údxi gunë' le." <sup>31</sup> Lë'sca' caní, channö zoë' nu bönni' rinná bë'ë, en ral-la' tsejë' gudil-la tsöjtíl-lalenë' ia'túë' bönni' rinná bë'ë, çnaru' cabí cö'ë zí'alö, en cuéqui icjë' channö séqui'në' tsöjtíl-lalenë' bönni' ni' nachë'ë galaj milë' bönni', ate' lë' chi milsë' bönni' nachë'ë? <sup>32</sup> Channö cabí séqui'në', cate' ni' zoë' zi'tu' ia'túë' bönni' na' rinná bë'ë, isöl-lë'ë bönni' gubáz queë', ate' inábinë' lë' nacxi ral-la' gunë' para ulu'dzáquië' dxí'a. <sup>33</sup> Caní naca, channö zoë' nu bönni' ladaj libí'ili' biti' ucá'anë' yúgu'të le dë' queë', biti' gaca gáquië' bönni' usëda quia'.

*Zödi' le naniti yöl-la' siná'a que*

(Mt. 5:13; Mr. 9:50)

<sup>34</sup> Gunné' ca' Jesús:

—Dxi'a naca zödi', pero channö initi yöl-la' siná'a que, ¿naxi gaca úniru' le siná'a? <sup>35</sup> Bítirö nazaca' zödi' na', caléga para luyú, en caléga para ga rirú'uniru' bëbu, pero chú'unaru' le ní'ilö. Nu zoa nagui, en riyöni, ral-la' uzé nagui nu na'.

## 15

*Rucúdzu'ë didza' Jesús ca naca queëba' bö'cu' zxila' gunítiba'*

(Mt. 18:10-14)

<sup>1</sup> Bulu'dubë' yúgu'të bönni' tu'quíxjé' lázagaca bönachi, en yugu' bönni' cá'asö ga zoë' Jesús para ulu'zé náguié' Lë'. <sup>2</sup> Que lë ni na' yugu' bönni' yudo' fariseo, en yugu' bönni' yudo' usedi gula'nné' queë' Jesús, ta'nné':

—Bönni' ni runé' bal yugu' bönni' dul-la', en rágulené' légaquié'.

<sup>3</sup> Ní'rö bucúdzu'ë didza' Jesús, rë' légaquié':

<sup>4</sup> —Channö zoë' tu bönni' ladaj libí'ili', nacuá'aba' queë' tu gayuá'aba' bö'cu' zxila', en channö nítiba' tuba', ¿naru' cabí ucá'ané' ia'zica'röba' tápalalay yu' chënnaba' na' ga naca lu lataj cá'asö, ate' tsejë' tsöjdiljé'-ba' bö'cu' zxila' na' nanítiba', cate' udzölröné'-ba'? <sup>5</sup> Cate' udzöliné'-ba', lu yöl-la' rudzeja queë' ixóë'-ba' ya' zxicjé', <sup>6</sup> en cate' udxiné' lidxé' utubë' yugu' böchi' luzé'ë, en yugu' dzaga yu'u queë', ate' guié' légaquié': "Buli'dzéjalen neda', tu' chibudzö'lida'-ba' bö'cu' zxila' quia' gunítiba'."  
<sup>7</sup> Rea' libí'ili': Lësca' caní gácatërö yöl-la' rudzeja yehua' yubá ni'a queë' tuë' bönni' dul-la' ubí'i ládxé'ë ca gaca queégaquié' tápalalay yu' chënné' bönni' tsahui', bönni' téquiné' bití' naquíniguequiné' ulu'bí'i ládxí'gaquié'.

*Rucúdzu'ë didza' Jesús que tu dumí guniti*

<sup>8</sup> Rnné' ca' Jesús:

—Channö zóanu tu nigula, dë queënu chi dumí plata, en channö initi tu dumí plata na', ¿naru' cabí uquéla'nu guí, ate' ulúanu yu'u, uguilaj yúdxinu le cate' udzölrönu le? <sup>9</sup> Cate' udzölinu le, utúbinu yugu' nigula luzá'anu, en yugu' nigula dzaga yu'u queënu, ate' guiënu légacanu: "Buli'dzéjalen neda', tu' chibudzö'lida' dumí plata na' guniti."  
<sup>10</sup> Rea' libí'ili': Lësca' caní, ulu'dzéjade'eröné' gubáz lá'ayí queë' Dios ni'a queë' tuë' bönni' dul-la' ubí'i ládxé'ë.

*Rucúdzu'ë didza' Jesús queëbi' tu bi'i gunítibi'*

<sup>11</sup> Rnné' ca' Jesús:

—Zoë' tu bönni' nacuá'abi' chópabi' bi'i bönni' queë'. <sup>12</sup> Bi'i cuidi' na' rëbi'-né' xúzibi': "Dad, benna quia' le dë quiu' le ral-la' guequi quia'." Ní'rö xúzibi' na' gudísië' quegacabi' le dë queë'. <sup>13</sup> Nabábasö dza gudzé, bi'i cuidi' na' butúbibi' yúgu'të, ate' guyéajbi' tu yödzo zí'tu', ate' ni' butöbi' dërö le dë queëbi'. Le ruá' dö' benbi'. <sup>14</sup> Cate' chibutöbi' dërö le dë queëbi', guca gubín lu yödzo ga na' zóabi', ate' biyadzaj queëbi'. <sup>15</sup> Ní'rö guyéajbi' yösóabi' huen dxin queë' tu bönni' lu yödzo ni', ate' bönni' na' gusól-lë'-bi' ga dë xiyúé' tsöjgágubi'-ba' yugu' cuchi queë'. <sup>16</sup> Guca ládxí'bi' gágubi' guixi' cá'asö na' táguba' cuchi, pero cuntú nu bi' bë' le gágubi'. <sup>17</sup> Ní'rö bubí'i ládxí'bi', rnnabi': "Cate' xö bönni' huen dxin nacu'ë lidxé' zuza', en dëda' le tahuë', pero neda' ni huáti caza' yöl-la' ridún. <sup>18</sup> Uzá'a ni, huója' ga zoë' zuza', en tsjödxá'-né': Dad, bena' dul-la' lahuë' Dios, zoë' yehua'



yubá, en lo' li'. <sup>19</sup> Bítirö naca' neda' lesaca' gaca' zxi'inu'. Ben neda' ca bönni' huen dxin quiu'. <sup>20</sup> Ní'irö guyú'ubi' nöza, söhuöajbi' ga zoë' xúzibi'.

'Cate' ni' zóabi' zí'tu' suzá'abi', bilé'ené'-bi' xúzibi', en buéchi' ládxë'é-bi'. Carelö yöjzxi'galé'-bi' xúzibi', en yöjnidé' yenbi', gudahué'-bi' zxixi. <sup>21</sup> Ní'irö zxi'iné' na' rëbi'-në': "Dad, bena' dul-la' lahué' Dios, zoë' yehua' yubá, en lo' li'. Bítirö naca' neda' lesaca' gaca' zxi'inu'." <sup>22</sup> Ní'irö xúzibi' rë' yugu' bönni' huen dxin queë', rnnë': "Guli'tsöjléajtë lari' nazáca'tërö, en guli'gacu-bi'. Guli'cü'u le nazaca' xibön ná'abi', en buli'dá' huarache ní'abi'. <sup>23</sup> Guli'tsöjzxi'i-ba' bëdxi renni', ate' guli'guti-ba'. Gáguru'-ba', en gunru' laní, <sup>24</sup> tu' guca bi'i bönni' quia' ni ca tu bi'i chinátibi', ate' bubanbi'. Gunítibi', ate' chibulá'abi' na'a." Ní'irö gula'sí lógaquië' tu'dzéjanë'.

<sup>25</sup> Tsanni ni' raca lë ni, zóabi' bi'i bönni' zí'alö queë' bönni' na' la' guixi'. Cate' suzá'abi' rudxinbi' gala' ra' yu'u, riyónibi' raca huila, en raca huó'a lu yu'u na'. <sup>26</sup> Ní'irö bulídzabi'-në' tuë' bönni' huen dxin zoë' ni', en gunábibi' lë' bizxi na' raca. <sup>27</sup> Bönni' huen dxin na' rë'é-bi': "Bi'i bóchu'u na' budxinbi', ate' gunná bë'é xuzu' gulútië'-ba' bëdxi renni', tu' budxinbi' lu në'é dxi'a tsáhuí'do'." <sup>28</sup> Ní'irö gulébi' bi'i zí'alö na', en biti' gú'unibi' tsú'ubi' yu'u. Ní'irö birúajë' xúzibi', en gúta'yué' lobi' tsú'ubi'. <sup>29</sup> Bubí'ibi' didza' bi'i zí'alö na', rëbi'-në' xúzibi': "Nöz quézinu' cate' xö iz bena' dxin lo', en catu caz gudá'baga'a li', pero catu caz bennu' quia' tuba' bö'cu' zxíla'do' para gü'ílëna' xibé yugu' luzá'a. <sup>30</sup> Na'a, cate' budxinbi' bi'i quiu' ni busunítibi' yugu' le guta' quiu', gudálenbi'-nu yugu' nigula udá dzaga, benu' ga gulútië'-ba' bëdxi renni' ni'a queëbi'." <sup>31</sup> Ní'irö xúzibi' rë'é-bi', rnnë': "Zxi'ina', li' zóalen cazu' neda' ate' yúgu'të le dë quia', quiu' nequi. <sup>32</sup> Ben bayudxi gunru' laní, en udzéjaru', tu' gúcabi' bi'i bóchu'u ni ca tu bi'i chinati cázabi', ate' nubanbi'. Gunítibi' ate' chibulá'abi'."

## 16

*Rucúdzu'ë didza' Jesús queë' bönni' huen dxin biti' náquië' tsahui'*

<sup>1</sup> Jesús rë' ca' yugu' bönni' dá'gaquië' Lë', rnnë':

—Zoë' tu bönni' dë yöl-la' tsahui' queë', en zoë' ca' queë' tuë' bönni' huen dxin dë lu në'é uláz queë'. Bila'dxiné' yugu' bönni' tu'zéguië' bönni' huen dxin na' lahué' xanë', ta'nnë' queë' rutösë' le dë queë' xanë' na'. <sup>2</sup> Ní'irö xan yu'u na' bulídzë' bönni' huen dxin na', en rë' lë': "¿Bizxi didza' ni riyönda' quiu'? Buluí'i neda' le naca bë' dxin nunu', tu' cabirö gata' lu no'o uláz quia'." <sup>3</sup> Ní'irö guzá' ládxë'é bönni' huen dxin na', rnnë': ¿Nacxi guntsa'? Rubéajë' xana' neda' lataj lo ga runa' dxin. Biti' séqui'da' guna' dxin gú'una, en utuí'ida' inaba' nu bi gúnnasö quia'. <sup>4</sup> Na'a nözda' naca guna' para cate' ubéajë' neda' lataj lo ni, ila'cuá' nupa ulu'zí' neda' lídxiguequi. <sup>5</sup> Ní'irö bönni' huen dxin na' bulídzë' yugu' bönni' bi tál-lë'é queë' xanë', ate' rë' bönni' zí'alö: "¿Gáca'xi ral-lu'u queë' xana'?" <sup>6</sup> Lë' rnnë': "Tu gayuá' rö'ö chugu le za ral-la'a." Bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Gurö'ötë ni, en buzúaj ia'tú lu guichi le inná chi-un rö'ö chugu ral-lu'u." <sup>7</sup> Gudödi ni' gunábinë' ia'túé', rnnë': "Nazxi li', ¿gáca'xi ral-lu'u?" Lë' rnnë': "Tu gayuá' da'a zxoaxtila." Ní'irö bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Buzúaj ia'tú lu guichi le inná tápalalaj da'a ral-lu'u." <sup>8</sup> Réquibe'ené' xanë' na' sínatë bené' bönni' huen dxin biti' náquië' tsahui' na'. Caní naca, nácacarë' sina' bönni' yödzólió ni lu le tuné' la' légacasë', ca nácacaga bönachi ta'dalen Dios lu bení' queë'.

<sup>9</sup> 'Neda' rea' libí'ili': Guli'cózalen bönachi dxi'a, ugunli' dxin yöl-la' tsahui' dë queëli' yödzölió ni, para cate' idxín dza ucá'anali' yugu' lë ni, ilunë' libí'ili' bal lataj ni' zóatica'só.

<sup>10</sup> 'Nu rugún dxi'a dxin tu le cuídí'só dë lu në'e, lësca' ugún dxi'a dxin tu le zxön gata' lu në'e. Nu bití' rugún dxi'a dxin tu le cuídí'só dë lu në'e, bití' ugún dxi'a dxin tu le zxön gata' lu në'e. <sup>11</sup> Que lë ni na', channö cabí rugunli' dxi'a dxin yöl-la' tsahui' dë queëli' yödzölió ni, ¿nuzxi caz udödi lu ná'ali' yöl-la' tsahui' le naca idú? <sup>12</sup> Channö cabí rugunli' dxi'a dxin le dë lu ná'ali' le nequi que nu yúbölö, ¿nuzxi caz udödi lu ná'ali' le ral-la' guequi que quezili'?

<sup>13</sup> 'Bití' gaca nitüë' bönni' huen dxin gunë' xichíngaca chopa xanë', tu' udí'ne' tuë', en idxí'ine' ia'tué', o gunë' bal tuë', en uzóë' tsóla'aló ia'tué' na'. Bití' gaca gunli' xichinë' Dios, en gunli' ca' dxin para uzí'ili' xibé yöl-la' tsahui' que yödzölió.

<sup>14</sup> Bila'yönnë' bönni' yudo' fariseo didza' ni, ate' tu' nadxí'iguequinë' yöl-la' tsahui' quegaquië', que lë ni na' bulu'titjé' Jesús. <sup>15</sup> Ní'irö Jesús rë légaquië':

—Libí'ili' rubéaj dxi'a cuinli' lógaca bönachi, pero nözinë' Dios le yu'u icja ladxí'do'oli', tu' naca lë na' tun zxön bönachi tu le ruzóë' Dios tsóla'aló.

*Xibá queë' Moisés, en le rinná bë'ë Dios*

<sup>16</sup> Gunnë' ca' Jesús:

—Ga bidxintë dza zoë' Juan, ben dxin le rinná bë' xibá queë' Moisés, en le bulu'zúajë' lu guichi yugu' bönni' gulu'ë didza' uláz queë' Dios. Ní'irö cate' bidxinë' Juan na', gusí lo raca libán ca gaca nu tsaza ga rinná bë'ë Dios, ate' tun bayudxi yúgu'të bönachi ila'yaza ni'.

<sup>17</sup> 'Sal-la' raca caní, gácarö ila'dödi que lúzxiba, en que luyú ni ca initi tu dídza'só nazúaj lu guichi lu xibá queë' Dios.

*Le rulá'a yöl-la' nutsaga na'*

*(Mt. 19:1-12; Mr. 10:1-12)*

<sup>18</sup> Gunnë' ca' Jesús:

—Channö tu bönni' ulá'alënë' nigula queë', ate' utsaga ná'alënë'-nu nigula yúbölö, gunë' dul-la' le riguitsaj xibá que yöl-la' nutsaga na', ate' nu utsaga ná'alënë' nigula na' nusanë'-nu bönni' queënu, gun ca' dul-la' le riguitsaj xibá que yöl-la' nutsaga na'.

*Bönni' dë yöl-la' tsahui' queë', en Lázaro*

<sup>19</sup> Ní'irö bucúdzü'ë didza' Jesús, rnnë':

—Zoë' tu bönni' rilé'enë' yöl-la' tsahui' queë'. Rácuë' lari' xiná, en lari' nazáca'da', ate' yugu' dza rúntica'së' laní, ate' té'aj tahuë' le banéquini.

<sup>20</sup> Zoë' ca' ni' tu bönni' yéchi'do' lë' Lázaro, bönni' rinabë' nu bi unödzej queë', ate' huë'tëzë' rö'ë ra' yu'u queë' bönni' na' rilé'enë' yöl-la' tsahui'.

<sup>21</sup> Raca ladxë'ë bönni' yéchi'do' na' gahuë' le bizxaj tu'huóxaj zxani ga rahuë' bönni' na' rilé'enë' yöl-la' tsahui'. Ta'dxinba' ca' bö'cu', en ta'lë'ëba' lu huë' queë' bönni' yéchi'do' na'.

<sup>22</sup> Bidxín dza gútië' bönni' yéchi'do' na', ate' gubáz lá'ayi queë' Dios gula'ché'ë lë' tsöjsóalenë' Abraham ga naca lataj lachi queë' Dios. Gútië' ca' bönni' na' bilé'enë' yöl-la' tsahui', ate' bulu'cáché'ë lë' yeru ba.

<sup>23</sup> Cate' ni' riguí' rizáquë'ë bönni' na' bilé'enë' yöl-la' tsahui', zoë' lataj quegaca nupa nátigaca, guchisa lahuë', en bilé'enë' Abraham zoë' zi'tu', en dzáguie' Lázaro na' lë'.

<sup>24</sup> Ní'irö bë'ë zidzaj didza', rnnë': "Xuza', Abraham, buéchi' ladxí' neda'. Gusól-la' Lázaro quia' para

usubisë' xibõn në'ë, en udusuhuõälë' lúdxa'a, tu' rigu'í rizáca'a lu gu'í ni." <sup>25</sup> Abraham rë' lë', rnnë': "Zxí'ina', busá' ládxi'u ca guca quiu', buzi'u xibé yöl-la' tsahui' tsanni ni' zu' nabanu', pero Lázaro ni, guca queë' yöl-la' yechi', ate' na'a, ruzí' zxõnë' Lázaro ni, pero lí' rigu'í rizácu'u. <sup>26</sup> Ia'stú, tu ra' gu'í sibi rë', en le zoa gatsaj láchui'lö ga ni' zóali' libí'ili', en ga ni zóatu' netu'. Que lë ni na' nupa nacua' ni, en ilë'ëni ila'dödi ga zóali' libí'ili', biti' ca' gaca ilunë' ca', en biti' gaca ilida ni nupa nacua' ni.'" <sup>27</sup> Ní'irö bönni' na' bilé'enë' yöl-la' tsahui' rë' lë', rnnë': "Xuza' Abraham, ráta'yua' lo' isól-lu'u-në' Lázaro tsejé' lidxë' xuza', <sup>28</sup> tu' nacu'ë gáyu'ë bönni' böcha'a ni'. Gusól-lë'ë tsójenë' liná' lo que le raca ni, para cabí guídigaquië' ca' lataj ga ni rigu'í rizáca'a." <sup>29</sup> Ní'irö Abraham rë' lë', rnnë': "Dë queégaquië' le buzúajë' lu guichi Moisés, en le bulu'zúajë' lu guichi bönni' gulu'ë didza' uláz queë' Dios. Yugu' didza' queégaquië' na' ral-la' ulu'zë náguië'." <sup>30</sup> Bubi'ë didza' bönni' na' bilé'enë' yöl-la' tsahui', rnnë': "Xuza' Abraham, biti' gaca caní, pero channö ubanë' tu bönni' lu yöl-la' guti, en tsejé' ga na' nacu'ë, ulu'bí'i ládxi'gaquië'." <sup>31</sup> Abraham rë' lë', rnnë': "Channö cabí tu'zë náguië' didza' bë'ë Moisés, en le gula'nnë' bönni' gulu'ë didza' uláz queë' Dios, biti' ila'yéajlë'ë sal-la' nu ubán lu yöl-la' guti."

## 17

*Run bõnadxi queëru' gunru' ga nu gun dul-la'*

(Mt. 18:6-7, 21-22; Mr. 9:42)

<sup>1</sup> Jesús rë' yugu' bönni' dá'gaquië' Lë', rnnë':

—Nacua'tica'sö le tun ga ilún bõnachi dul-la', pero bica' bayechi' bönni' na' runë' ga nu gun dul-la'. <sup>2</sup> Dxí'arö gaca queë' bönni' na' runë' caní, nu ugal-la' tu guiõj riyëtu yaga yenë', en tsójchú'una lë' lu nísado', cate'lö gunë' ga gun dul-la' nu bi'i néquibi' quia'. <sup>3</sup> Guli'gún chi'i cuinli'. Channö böchi' luzó'o gu'ë dö' quiu', buzéajni'i-në', en channö ubí'i ládxi'ë, buniti lo lë'. <sup>4</sup> Sal-la' gadxi luzuí tu dza gu'ë dö' quiu', en gadxi luzuí ca' guídë' ga zu', en guié' lí': "Rubí'i ládxa'a", ral-la' uniti lo' lë'.

*Yöl-la' huáca que le réajlë'ëru' Cristo*

<sup>5</sup> Ní'irö yugu' bönni' gubáz queë' Xanru' të' Lë', ta'nnë':

—Ben ga tséajlë'ërötu'-në' Dios.

<sup>6</sup> Xanru' rë' légaquië', rnnë':

—La'tu' naca cuidí'sö yöl-la' réajlë' queëli' Dios, nácasö ca tu xisedo' mostaza, huáca guiéli' yaga zxõn ni: "Gucuíta ni, en yöjsóa lu nísado'", ate' gun yaga na' ca rnnali'.

*Le ral-la' gun nu naca huen dxin*

<sup>7</sup> Gunnë' ca' Jesús:

—Channö zoë' tuë' bönni' ladaj libí'ili', en zoë' queë' tuë' bönni' nadó'o rugá'anë'-ba' bëdxi o rulapë', cate' údxi gunë' xichinë' xanë', ¿naru' huëtsë' xanë' lë', innë': "Gudá, guró'ö gagu'?" <sup>8</sup> ¡Calëga! Caní guié' lë': "Bupá'a le gahua'. Guzóa sina' cu'u le guí'aj gahua', ate' tódirö na' huáca guí'aj gagu' lí'." <sup>9</sup> ¿Naru' huëtsë' bönni' nadó'o queë' na': "Xclenu'", tu' benë' ca gunná bé'enë' lë'? Runi neda', biti' gunë' caní. <sup>10</sup> Lësca' caní gaca queëli'. Cate' chinunli' yúgu'të le gunná bé'enë' Dios libí'ili', ral-la' innali': "Nácatu' huen dxin cabí nácatu' lesaca', tu' bénsótu' le run bayudxi guntu'."

*Chië' bönni' té'enë' huë' nudzu' ruzödi*

11 Tsanni ni' yu'ë Jesús nöza, sa'yéajë' Jerusalén, ridödë' gapa dë yödzo'do' nabábagaca luyú Samaria, en luyú Galilea. 12 Cate' guyázië' tu yödzo'do', bila'ruájë' dutságagaquië' Lë' chië' bönni' té'enë' huë' nudzu' ruzödi, ate' gula'cu'ë zí'tu'sö, 13 en tu'ë zidzaj didza', ta'nnë':

—¡Jesús, Bönni' Usedi! ¡Buéchi' ladxi' netu'!

14 Cate' bilé'enë' Jesús légaquië', rë' légaquië':

—Guli'tséaj, guli'tsöjluf'i cuinli' lógaca bixúz.

Tsanni ni' söjáquië', bulu'huöáquië' dxi'a. 15 Ní'irö tuë' bönni' nútsë'ë ládjagaquië', cate' réquibe'enë' chinuhuöáquië' dxi'a, böajë' ga na' zoë' Jesús, ru'ítica'së' zidzaj didza', rigü'ë Dios yöl-la' ba. 16 Biyéchuë', en busudxín lahuë' lu yu lahuë' Jesús, en rë' Lë': "¡Xclenu'!"

Bönni' ni nababë' Samaria. 17 Ní'irö Jesús rë' lë':

—¿Naru' cabí bulu'huöáquië' dxi'a chië' bönni'? ¿Gazxi nacuá'tsë' ia'zica'rë' bönni' na'? 18 ¿Naru' cabí zoa nu huöda cu'u Dios yöl-la' ba, pero tuzë' bönni' zí'tu' ni?

19 Ní'irö Jesús gudxë' bönni' na', rnnë':

—¡Guyasa, en böaj lidxu'! ¡Chiböácu' dxi'a tu' réajlë'u neda'!

### *Ca idxín le rinná bë'ë Dios*

(Mt. 24:23-28, 36-41)

20 Cate' yugu' bönni' yudo' fariseo ta'nábinë' Jesús bátaxi ral-la' idxín le rinná bë'ë Dios, Lë' bubí'ë didza', rë' légaquië':

—Ca idxín le rinná bë'ë Dios, biti' naca le ilé'eli'. 21 Cuntu nu gaca inná: "¡Ni bidxín!", o inná: "¡Ni' bidxín!" ¡Buli'yútsöca'! ¡Rinná bë'ë Dios lu icja ládxi'do'gaca bönachi!

22 Ní'irö Jesús gudxë' yugu' bönni' usëda queë', rnnë':

—Huadxín dza cate' guë'ënili' ilé'eli' dza huöda neda', Bönni' Guljë' Bönachi, pero biti' ilé'eli' le. 23 Ila'cuá' nupa ilë libí'ili': "¡Ni zoë'!" o ila'nná: "¡Ni' zoë'!" Biti' tséajli' ni', en biti' tséajlenli' légaquië'. 24 Ca raca cate' rëpi yösa, ruzení' idá'alö lúzhiba, lësca' caní gaca cate' idxín dza huöda' neda', Bönni' Guljë' Bönachi. 25 Zí'alö ca gaca lë ni, run bayudxi quí'í sáca'da', ate' bönachi dza ni zóaru' na'a ulu'cá'ana neda' cá'asö. 26 Ca na' guca dza ni' zoë' Noé, lësca' caní gaca cate' idxín dza huöda' neda', Bönni' Guljë' Bönachi. 27 Dza ni'te na' gulë'aj gulahuë'. Bulu'tsaga ná'agaquië', en bulu'dödë' zxfí'ingaquië' lu yöl-la' rutsaga na' ga bidxintë dza guyázië' Noé lë'e barco zxon na' nazí'í le arca, ate' bidxintë nisa guiöj usuniti yödzölió le busuniti yúgu'të'. 28 Lësca' caní guca dza ni' zoë' Lot. Gulë'aj gulahuë'. Gulá'uë', en gulúti'ë. Gulazë' xiyúgaquië', en gulunë' yugu' yu'u quégaquië'. 29 Cate' bidxín dza na' burúajë' Lot lu yödzö Sodoma, böxaj guí' ca tu nisa guiöj, enca' le ruzéguida' nazí'í le azufre, ate' bulu'suniti yúgu'të'. 30 Lësca' caní gaca cate' idxín dza ulu'í'í lahua' neda', Bönni' Guljë' Bönachi.

31 'Cate' idxín dza na', channö zoë' tu bönni' ícjo'olö, en dzö'ö le dë queë' lu yu'u na', biti' ral-la' huötjë' tsöjzxi'ë le dë queë', ate' nu zoa la' guixi', lësca' caní, biti' ral-la' huöjë' lidxë'. 32 Guli'sá' ládxi'li' ca guca queënu nigula queë' Lot. 33 Nu bönni' rë'ënë' gun chi'ë yöl-la' na'bán queë', unítie' le, pero bönni' udödë' yöl-la' na'bán queë' ni'a quia', udélé'ë le.

34 'Rea' libí'ili': Cate' idxín rëla na', ila'cu'ë chopë' bönni' tsözxón ga tasië', ate' tuë' uduzxi'a-në', en ia'tué' ucá'ana' lë'. 35 Ila'cuá'anu huëtu tsözxón chópanu nigula, ate' tunu uduzxi'a-nu, en ia'tunu ucá'ana'-nu.

<sup>36</sup> Ila'cu'ë chopë' bönni' la' guixi', ate' tuë' uduzxi'a-në', en ia'tué' ucá'ana' lë'.

<sup>37</sup> Cate' bila'yönnë' lë ni bönni' usëda queë' Jesús, gula'nábinë' Lë', ta'nnë':

—Xan, ¿gazxi gaca lë ni?

Jesús rë' légaquië':

—Ga dë tu le nati, ni' ulu'dubi quéziba' bíchulab.

## 18

*Tu nigula uzëbi, en bönni' ruchi'a rusöröë'*

<sup>1</sup> Ní'irö bucu'dzu'ë didza' Jesús, rë' légaquië' ca run bayudxi ulídzatica'siru'-në' Dios, en biti' gaca chopa ládxi'ru'. <sup>2</sup> Rnnë':

—Zoë' tu bönni' ruchi'a rusöröë' tu yödzö, bönni' biti' rádxinë' Dios, en biti' runë' nu bönni' bal. <sup>3</sup> La' yödzö ná'asö zóanu tu nigula uzëbi, ate' bidxinnu nigula ni ga zoë' bönni' ruchi'a rusöröë' na', rnnanu: “Buchí'a busörö le run quia' nu ruá' dö' quia'.” <sup>4</sup> Xidzé biti' gú'unnë' bi gunë' queënu, pero gudödi ni' guzá' ládxë'ë, rnnë': “Biti' rádxida'-në' Dios, en biti' runa' nu bönni' bal, <sup>5</sup> pero tu' rupízxjanu nigula uzëbi ni neda', que lë ni na' uchi'a usöröa'-nu, para cabí guidatica'sinu ni, en para cabí tödi bë' upízxjanu neda'.”

<sup>6</sup> Ní'irö Xanru' rë' légaquië', rnnë':

—Gulizë' nágalí' ca na' gunné' bönni' ruchi'a rusöröë' na', bönni' biti' náquië' tsahui'. <sup>7</sup> ¿Naru' cabí uchi'a usöröë' Dios bönachi gurö czë' queë', nupa na' tu'lidza Lë' rëla te dza? ¿Naru' huadzétsenë' gácalenë' légaquië'? <sup>8</sup> Rea' libí'ili': La' uchi'a usörötenë' légaquië'. Cate' huöda' neda', Bönni' Guljë' Bönachi, ¿naru' idzö'lida' nupa ta'yéajlë' neda' luyú ni?

*Tu bönni' yudo' fariseo, en tu bönni' uquízxaj*

<sup>9</sup> Bucú'dzu'ë didza' Jesús ca naca quégaquië' bönni' tu'béaj tsahui' cuíngaquië', en tu'cá'anë' cá'asö ia'zica'rö bönachi. <sup>10</sup> Gunnë':

—Bila'dxinë' chopë' bönni' ga naca chila yudo' para ulu'lidzë' Dios. Tuë' bönni' na' náquië' bönni' yudo' fariseo, ate' ia'tué' na' náquië' bönni' ruquízxjë' lázagaca bönachi. <sup>11</sup> Guzuínë' bönni' yudo' fariseo na', en caní bulidzë' Dios, rnnë': “Dios, rea' Lí': Xclenu', tu' cabí naca' ca nácagaquië' ia'zica'rë' bönni', nácagaquië' gubán, en biti' nácagaquië' tsahui'. Ta' guitsjë' xibá que yöl-la' nutsaga na'. Lë'sca' biti' naca' ca bönni' uquízxaj ni. <sup>12</sup> Neda' runa' gubasa chopa luzuí tu' xunu' dza huéaj, en runödzja' que yudo' tu cö' huéaj tu' chi cö' que yúgu'të le rata' quia'.” <sup>13</sup> Guzóazë' zítu' bönni' uquízxaj na', en biti' böázxjanë' ichisa lahuë' uyúë' lúzxiba, pero gudapë' luchu'ë, rnnë': “Dios, buéchi' ladxi' neda', bönni' dul-la'.” <sup>14</sup> Neda' rea' libí'ili': Böajë' lidxë' bönni' uquízxaj na', nuhuöáquië' tsahui' lahuë' Dios, calëga ia'tué' bönni' ni'. Núti'tës bönni' run ba zxön cuinë', gunë' Dios ga huöta' igulë', pero nu bönni' rizöë' nöxaj ladxi', gunë' Dios ga gácarë' lo.

*Jesús rulidza tsáhuë'ë-bi' yugu' bí'ido'*

(Mt. 19:13-15; Mr. 10:13-16)

<sup>15</sup> Ní'irö bila'dxinë' yugu' bönni', en nigula ga zoë' Jesús, nachë'gaquië'-bi' yugu' bí'ido' quégaquië' para ixóa në'ë Jesús léga'cabi'. Cate' bila'lë'enë' yugu' bönni' usëda queë' Jesús lë ni, gula'dil-lë' légaquië'. <sup>16</sup> Ní'irö Jesús bulidzë' yugu' bönni' dá'gaquië' Lë', rnnë':

—Guli'güi'bi' lataj ila'dxinbi' bí'ido' ni ga zoa'. Biti' uzága'li' xinózagacabi', tu' gata' quégaca nupa nácaté ca bí'i caní lataj ga rinná bē'ē Dios. <sup>17</sup> Le nácatē rea' libí'ili': Nu cabí si' lu nē'e le rinná bē'ē Dios, ca runbí' tubi' bí'ido', bití' ca' tsaza ga ni' rinná bē'ē Lē'.

*Tu bönni' rilé'enē' yöl-la' tsahui'*

*(Mt. 19:16-30; Mr. 10:17-31)*

<sup>18</sup> Tu bönni' unná bē' gunábinē' Jesús, rnnē':

—Bönni' Usedi idú dxi'a. ¿Bizxi ral-la' guna' para idéli'da' yöl-la' na'bán idú?

<sup>19</sup> Jesús rē' lē':

—¿Bizx que rē'u neda': "Idú dxi'a"? Cuntu nu bönni' náquiē' idú dxi'a. Tuzē' Dios náquiē' idú dxi'a. <sup>20</sup> Nöz quézinu' yugu' le gunná bē'ē Dios: Biti' gunu' dul-la' le riguitsaj xibá que yöl-la' nutsaga na'.

Biti' gútigacu' bönachi.

Biti' cuanu'.

Biti' innío' que luzó'o le cabí nácatē.

Ben bal xuz xinó'o.

<sup>21</sup> Bönni' na' rē' Jesús, rnnē':

—Yúgu'tē lē ni runa' ga gudela' naca' bí'ido'.

<sup>22</sup> Cate' biyönnē' Jesús didza' ni, rē' lē':

—Ia'tú le riyadzaj quiu' gunu'. Bēti' yúgu'tē le dē quiu', ate' lē na' si'u bunódzaj quégaca bönachi yechi', ate' gata' quiu' yöl-la' tsahui' yehua' yubá. Ní'irö gudá, gudá' neda'.

<sup>23</sup> Cate' bönni' na' biyönnē' didza' ni, ruhuí'innē', tu' dēda' yöl-la' tsahui' queē'. <sup>24</sup> Cate' bilé'enē' Jesús ca na' ruhuí'innē' bönni' na', rnnē':

—¡Bica' böniga gaca, ila'yaza nupa ta'lé'e yöl-la' tsahui' ga rinná bē'ē Dios! <sup>25</sup> Gácarö tódiba' böa' nagui yötsi', ca tsáziē' tu bönni' rilé'enē' yöl-la' tsahui' ga rinná bē'ē Dios.

<sup>26</sup> Ní'irö nupa bila'yöni didza' ni gula'nná:

—¿Nuzxi caz gaca ulá, channö?

<sup>27</sup> Jesús gudxē' légaquiē':

—Le bití' gaca ilunē' bönni', huáca gunē' Dios.

<sup>28</sup> Ní'irö Pedro rē' Jesús:

—Buyútsöca', netu' nucá'anatu' yúgu'tē le dē queētu', en dá'atu' Li'.

<sup>29</sup> Ní'irö Jesús rē' légaquiē':

—Le nácatē rea' libí'ili', nu bönni' ucá'anē' lidxē', o xuz xinē'ē, o yugu' böchi' zanē', o nigula queē', o yugu' zxi'inē', tu' ruí'í ládxe'ē inná bē'ē Dios, <sup>30</sup> bönni' ni huazí'irē' dza ni zóaru' na'a, ate' dza si' za' idéli'nē' yöl-la' na'bán idú.

*Jesús rigúxjö'ē leyúbölö ca si' ilútiē' Lē'*

*(Mt. 20:17-19; Mr. 10:32-34)*

<sup>31</sup> Jesús guchē'ē quez queē' idxínnutē' bönni' usēda queē', en rē' légaquiē':

—Buli'yútsöca', ribenru' zéajru' Jerusalén, ga ni' ilaca yúgu'tē le nazúajgaca lu guichi ca gula'nnē' bönni' gulu'ē didza' uláz queē' Dios ca ral-la' gaca quia' neda', Bönni' Guljē' Bönachi. <sup>32</sup> Yugu' bönni' Jerusalén ulu'dödē' neda' lu ná'agaquiē' bönni' zi'tu', ate' ulu'titjē' neda', en ulu'lidza zi'ē neda', en ulu'chejē' neda' zxóna'. <sup>33</sup> Ila'guinē' neda', ate' tódirö ni' ilútiē' neda', pero cate' gaca tsonna dza ubana'.

<sup>34</sup> Biti' gula'yéajni'iné' bönni' uséda queë' didza' ni, en biti' guléquibe'ené' ca sa'yéaj le ru'ilené' légaquié' didza' que, tu' naca le cabí sequi' ila'yéajni'iné'.

*Jesús ruúné' tu bönni' yödzö Jericó nachul-la lahué'*

(Mt. 20:29-34; Mr. 10:46-52)

<sup>35</sup> Cate' chizóa idxiné' Jesús yödzö Jericó, zoë' tu bönni' ni' nachul-la lahué'. Rö'è ra' nöza rinabé' nu bi gúnnasö queë'. <sup>36</sup> Bönni' ni' biyönné' ta'dódi bönachi zían ni', ate' gunabé' bizxi na' raca. <sup>37</sup> Bönachi ni' té' lé':

—Jesús, bönni' Nazaret, ridödé' ni.

<sup>38</sup> Ní'irö bönni' na' nachul-la lahué' bé'è zidzaj didza', rnné':

—Jesús, xzí'ini xi'sóé' David, buéchi' ladxi' neda'!

<sup>39</sup> Yugu' bönni' nanörugaquié' lahué' Jesús gula'dil-lé' bönni' na' nachul-la lahué' para usayaj ru'è, pero lé' zídzejrö bé'è didza', rnné':

—¡Xzí'ini xi'sóé' David, buéchi' ladxi' neda'!

<sup>40</sup> Ní'irö guzé' dxiz Jesús ribözé', ate' gunná bé'ené' nu tsöjlidza lé' para idxiné' lahué'. Cate' bönni' na' nachul-la lahué' bidxiné' lahué' Jesús, gunábiné' Jesús lé', rnné':

<sup>41</sup> —¿Bizxi ré'ènu' guna' quiu'?

Bönni' na' nachul-la lahué' rnné':

—Ré'ènída' huóalaj guió'j lahua'.

<sup>42</sup> Jesús ré' lé':

—Chibóalaj guió'j lo'. Chibóácu' tu' réajlé'u neda'.

<sup>43</sup> La' ní'isö bulé'etené', ate' sa'yéajlené' Jesús, rigu'è Dios yöl-la' ba. Lésca' yúgu'té' bönachi nacua' ni', en bila'lé'e lé' na' guca gula'gú'u Dios yöl-la' ba.

## 19

*Jesús, en Zaqueo*

<sup>1</sup> Ní'irö guyázié' Jesús yödzö Jericó, en ridödé' lu yödzö na'. <sup>2</sup> Zoë' tu bönni' lé' Zaqueo ni', bönni' lo ladjagaquié' bönni' uquízxaj, ate' dè yöl-la' tsahui' queë'. <sup>3</sup> Ru'i ladxé'è bönni' ni ilé'ené' Jesús, pero biti' guca queë' tu' nacua' bönachi zían ni', en náquié' bönni' ga ré'èdo'. <sup>4</sup> Ní'irö carelö yöjnörué' lógaca bönachi zían na', ate' yöjchené' tu lu yaga para gaca ilé'ené' Jesús, tu' ral-la' tödé' ni'. <sup>5</sup> Cate' bidxiné' Jesús ni', guchisa lahué' ruyúé' ga na' dxíé' Zaqueo na', en ré' lé':

—Zaqueo, bötjaté' lu yaga na', tu' run bayudxi tsöjgá'ana' lidxu' na'a.

<sup>6</sup> Ní'irö la' bötjaté' Zaqueo lu yaga, ate' lu yöl-la' rudzeja queë' guché'è Jesús lidxé'. <sup>7</sup> Cate' bila'lé'e bönachi nacua' ni' lé' ni, gula'sí lógaquié' yúgu'té' ta'nné' queë', ta'nné':

—Guyázié' Jesús ugá'analené' bönni' dul-la'.

<sup>8</sup> Ní'irö guzuíné' Zaqueo, en ré' Xanru':

—Xan, buyútsöca'. Gatsaj le dè quia' gu'a quégaca bönachi yechi', en channö bi gudódi bé' buquízxja' bönachi, ubi'a quégaca bönachi na' tapa cö'tèlò ca'.

<sup>9</sup> Jesús ré' lé':

—Na'a dza ni bidxín yöl-la' rusólá quégaca nupa nacua' yu'u ni, tu' nababé' bönni' ni di'a dza queë' Abraham. <sup>10</sup> Bida' neda', Bönni' Guljé' Bönachi, ududilja', en udusólá' nupa nanítigaca.

*Rucúdzu'è didza' Jesús que chi cö' dumí*

11 Tsanni ni' ta'yönnë' didza' ni ru'ë Jesús, rë' légaquië' le rucúdzu'ë didza', tu' chizóa ila'dxinë' yödzö Jerusalén, ate' téquinë' chizóatë ilá' lahui le rinná bé'ë Dios. 12 Caní rnnë' Jesús:

—Zoë' tu bönni' lo, sa'yéajë' tu yödzö zì'tu' para si' lu në'ë yöl-la' unná bé', ate' ní'rö huödë'. 13 Cate' chizóa tsejë' ni' bulidzë' chië' bönni' huen dxin queë', en bé'ë que queégaquië' tu cö' huéaj dumí, ate' rë' légaquië': "Guli'guílajlen dumí ni tsanni huöda'." 14 Yugu' bönni' uládz queë' biti' ta'lé'enë' lë' dxi'a, ate' gula'söl-lë'ë yugu' gubáz quegaquië' ga ni' tsejë', ila'nnë': "Biti' ré'ënitü' inná bé'enë' bönni' ni netu'." 15 Ní'rö guzxi' lu në'ë yöl-la' unná bé', ate' budxinë' ladzë'. Cate' bidxinë' ni' gunná bé'enë' nu tsöjlidza yugu' bönni' huen dxin na' budödë' lu ná'agaquië' dumí na', para inözínë' gáca'xi bulu'guílajlenë' le tu tuë'. 16 Cate' bönni' zí'alö na' bidxinë' lahuë', rnnë': "Xan, tu cö' dumí quiu' na' chibén icja ia'chí cö' ca'." 17 Xanë' na' rë' lë': "Tshui' benu'. Nacu' huen dxin tshui'. Tu' dxi'ado' bugunu' dxin láti'do'os na' guta' lu no'o, na'a, guna' ga inná bé'enu' chi yödzö." 18 Ní'rö bidxinë' ia'túë' bönni' huen dxin na' lahuë' lë', rnnë': "Xan, tu cö' dumí quiu' na' chibén icja ia'gayu' cö' ca'." 19 Xanë' na' rë' ca' lë': "Inná bé'enu' gayu' yödzö." 20 Ní'rö bidxinë' ia'túë' lahuë' lë', rnnë': "Xan, ni dë' tu cö' dumí quiu' na'. Ben chi'a le, butúlida' le lari'. 21 Caní bena' tu' rádxida' li', tu' nacu' bönni' bizxaj. Runu' ca na' ta'nná bönachi: Ruzi'u le cabí buzú', en rulapu' ga biti' guzu'." 22 Ní'rö xanë' na' rë' lë': "Nacu' huen dxin biti' naca tshui'. Ní'a que didza' bé'u uchi'a usöróa' li'. ¿Réquibe'enu' naca' bönni' bizxaj: Ruzi'a le cabí buzóa', en rulapa' ga biti' guza'?" 23 Na'a, ¿bizx que biti' yöjlu' dumí quia' na' ga gun icja, para cate' huöda', uzí'a le idú len icja na'?" 24 Ní'rö rë' nupa nacua' ni': "Guli'cúa lu në'ë dumí na', ate' guli'gü'i queë' bönni' na' dë' queë' chi cö' dumí." 25 Légaquië' të' lë': "Xan, chidé queë' chi cö' dumí." 26 Ní'rö bubí'ë didza' xángaquië', rnnë': "Rea' libí'ili': Nu rugún dxi'a dxin le do' dë' lu në'e, ulu'zxöni láchixi'gaca lë' ia'late', pero nu biti' rugún dxi'a dxin le do' dë' lu në'e, ulu'béaj lu në'e lë' na' guta' lu në'e." 27 Ca naca quegaquië' bönni' ni' biti' ta'lé'enë' neda' dxi'a, en biti' gulë'ënnë' inná bé'eda' légaquië', guli'tsöjxi' légaquië' para idigaquië' ni, ate' guli'guti légaquië'."

*Len yöl-la' ba zxön razië' Jesús yödzö Jerusalén*

*(Mt. 21:1-11; Mr. 11:1-11; Jn. 12:12-19)*

28 Cate' budxi gunné' caní Jesús, buguelë'ë xinözë', sa'yéajë' zaca' yödzö Jerusalén. 29 Cate' bila'dxinë' gala' ga nacua' yödzö Betfagé, en yödzö Betania, ga naca ra' guí'ado' nazí'i le Gu'ía Yaga Olivo, gusöl-lë'ë Jesús chopë' bönni' usëda queë', 30 ate' rë' légaquië':

—Guli'tséaj yödzödo' ni' ca dödilö ga zóaru', en cate' idxinli' ni', tsöjxáca'li'-ba' tuba' búrrodo' nága'ba' ni', búrrodo' na' cuntü nu ribíani lëba'. Guli'sedxi-ba', en guli'duchë'-ba' quia' ni. 31 Channö zoa nu rinábini libí'ili', inná: "¿Bizx que risédxili'-ba'?", ubí'ili' didza' caní innali': "Xanru' riquinnë'-ba'."

32 Sójáquië' bönni' usëda queë' na' nasöl-lë'ë, ate' yöjxáca'gaquië'-ba' ca na' chigudxë' Jesús légaquië'. 33 Cate' gula'sedxë'-ba' búrrodo' na', yugu' bönni' xanba' të' légaquië':

—¿Bizx que risédxili'-ba' búrrodo' na'?

34 Bulu'bi'ë didza', ta'nnë':

—Xanru' riquinnë'-ba'.



<sup>35</sup> Gula'chë'ë-ba' ga na' zoë' Jesús. Cate' chigula'xóë' yugu' lari' tsölá'a quégaquië' cúdzu'ba' búrrodo' na', bulu'dxié' Jesús cúdzu'ba' lahui lari' na'. <sup>36</sup> Gapa ral-la' tódë' Jesús, gula'chiljé' lari' quégaquië' la' nōza. <sup>37</sup> Cate' chibila'dxiné' gala' ga zoa lidinni que Guí'a Yaga Olivo, lu yöl-la' rudzeja quégaquië' gula'sí lógaquië' yúgu'të bönni' dá'gaquië' Jesús, tu'ë zidzaj didza', ta'gu'ë Dios yöl-la' ba, ni'a quégaca yugu' yöl-la' huáca zxon bila'lé'enë' benë' Jesús. <sup>38</sup> Ta'nnë':

—¡Yöl-la' ba bönni' unná bë' ni zë'ë uláz queë' Xanru' Dios! ¡Yehua' yubá za' le ribequi dxi ládxi'ru'! ¡Yöl-la' ba Dios!

<sup>39</sup> Ní'irö yugu' bönni' yudo' fariseo nútsa'gaquië' ladaj bönachi zían ni' tē' Jesús, ta'nnë':

—¡Bönni' Usedi, gudil-la yugu' bönni' usëda quiu'!

<sup>40</sup> Bubi'ë didza' Jesús, rë' légaquië':

—Rea' libí'ili': Channö ila'cuá' dxie' bönni' ni, yugu' guiój hualuí'i caz zidzaj didza'.

<sup>41</sup> Cate' bidxiné' Jesús gala' ra' yödzo na', en rilé'enë' le, ní'irö ribödxë' que, <sup>42</sup> rnnë':

—Raca ládxa'a huanözili' na'a dza le gaca gun ga cuéqui dxi ládxi'li' lahuë' Dios, pero na'a chinagachi' queëli', para cabí ilé'eli' le. <sup>43</sup> Huala'dxín queëli' dza cate' nupa biti' ta'lé'e libí'ili' dxi'a ila'bequi zö'ö idú gásibi'ilö ga zóali', en ila'gú'u libí'ili' lé'alö, ate' yúgu'të lataj idú gásibi'ilö ilúnlenë' libí'ili' gudil-la. <sup>44</sup> Ulu'quínajé' zö'ö run chí'i yödzo queëli', en ilútië' nupa nacué' lu yödzo ni. Biti' ugá'ana guiój lahui luzé'e. Yúgu'të lé ni gaca queëli' tu' cabí gúquibe'eli' dza bidë' Dios buduyúë' libí'ili'.

*Rulatjé' Jesús lö'a yudo'*

(Mt. 21:12-17; Mr. 11:15-19; Jn. 2:13-22)

<sup>45</sup> Ní'irö guyázië' Jesús lö'a yudo', en gusí lahuë' rubéajé' ní'ilö yúgu'të nupa tuti', en nupa to'o ga naca lö'a yudo'. <sup>46</sup> Rë' légaquië':

—Nazúaj lu guichi lá'ayi, rnna: “Lídxa' naca yu'u ga ulu'lidza bönachi Dios”, pero libí'ili' chinunli' le ca tu lídxi'gaca bönni' gubán.

<sup>47</sup> Yugu' dza rusédinë' Jesús bönachi ga naca chila yudo', ate' gula'zóa gula'bö'ë bixúz unná bë', len bönni' yudo' tu'sédinë', en yugu' bönni' lo que lu yödzo ilútië' Lë'. <sup>48</sup> Biti' bulu'dzölinë' nacxi ilútië' Lë', tu' idú ládxi'gaca tu'zë náagaca yúgu'të bönachi xtídzë'ë.

## 20

*Yöl-la' unná bë' dë lu në'ë Jesús*

(Mt. 21:23-27; Mr. 11:27-33)

<sup>1</sup> Tu dza, cate' ni' rusédinë' Jesús bönachi ga naca chila yudo', en riguixjö'ë didza' dxi'a, bila'dxiné' yugu' bixúz unná bë', en bönni' yudo' tu'sédinë', len bönni' gula tu'zéajni'iné', ga na' zoë', <sup>2</sup> ate' tē' Jesús:

—Gudixjö'i netu'. ¿Bizxi yöl-la' unná bë' dë lu no'o runu' caní? ¿Nuzxi caz budödi lu no'o yöl-la' unná bë' ni?

<sup>3</sup> Bubi'ë didza' Jesús, rë' légaquië':

—Inábida' ca' libí'ili' tu didza', ate' ubí'ili' innali'. <sup>4</sup> ¿Nuzxi gusöl-la' Juan ruquilë' bönachi nisa? ¿Naru' Dios, o bönachi?

<sup>5</sup> Gulún xtídzá'gaquië' la' légacasë' bönni' yudo' na', ta'nnë':

—Channö innaru': Gusöl-lë'ë Dios lë', guié' rë'u: “¿Bizx que biti' guyéajlë'ëli'-në'?” <sup>6</sup> Channö guiëru'-në': Gula'söl-lë'ë yugu' bönni' lë',

bönachi lu yödzo ni ulu'ladxi' rë'u guiöj, tu' nöziguequi bë'ë didza' Juan na' uláz queë' Dios.

<sup>7</sup> Ní'irö bulu'bi'ë didza', ta'nnë':

—Biti' nöztu' nuzxi na' gusöl-la' Juan.

<sup>8</sup> Ní'irö Jesús rë' légaquië':

—Neda' ca' biti' guía' libí'ili' bi yöl-la' unná bë' rúnida' caní.

*Yugu' bönni' huen dxin biti' nácaquië' tsahui'*

(Mt. 21:33-44; Mr. 12:1-11)

<sup>9</sup> Ní'irö la' gusi lotë' Jesús ru'ilenë' bönachi nacua' ni' didza'. Rucúdzu'ë didza', rnnë':

—Zoë' tu bönni' budë'ë yugu' lubá uva lu xiyúë', ate' budödë' luyú na' lu ná'agaquië' bönni' huen dxin para ilún gatsjé' len lë' le ulu'zi'ë, ate' guyijé' zi'tu' ga ni' bugá'anë' xidzé. <sup>10</sup> Cate' bidxín dza ulu'chibë' uva luyú na', gusöl-lë'ë tuë' bönni' gubáz queë' ga na' nacu'ë huen dxin na' para si'ë uláz queë' que le ulu'zi'ë, pero huen dxin na' gulúndë'ë lë' zi', en bulu'söl-lë'ë lë' cá'asö. <sup>11</sup> Leyúbölö gusöl-lë'ë ia'tué' gubáz queë', ate' légaquië' gulúndë'ë lë' ca'zi', en gulu'ë dö' queë', ate' bulu'söl-lë'ë lë' cá'asö. <sup>12</sup> Leyúbölö gusöl-lë'ë quegaquië' bönni' bunni gubáz queë', ate' bulu'dxié' ca' lë' huë', en bulu'béajé' lë' ní'ilö luyú na'.

<sup>13</sup> Ní'irö guzá láchë'ë xani luyú na', gunné': “¿Nacxi guntsa'? Isöl-la'a xzí'ini caza' nadxí'ida'-bi' quegaquië'. Cate' ila'lé'enë'-bi', nadxi ca' ilunë'-bi' bal.” <sup>14</sup> Ní'irö, cate' yugu' bönni' huen dxin na' bila'lé'enë'-bi', gulún xtídza'gaquië' la' légacasë', ta'nnë': “Bi'i ni guequi queë'bi' luyú ni. Guli'dá, gútiru'-bi', para guequi queë'ru' le ral-la' guequi queë'bi'.” <sup>15</sup> Bulu'béajé'-bi' ní'ilö luyú na', en gulútië'-bi'.

'Na'a, ¿nacxi caz gunë' xani luyú na' quegaquië'? <sup>16</sup> Guidé', en gútië' yugu' huen dxin na', ate' udödë' luyú queë' lu ná'agaca bönachi yúbölö.

Cate' bönachi nacua' ni' bila'yöni lë' ni, gula'nnë':

—¡Inná Dios biti' gaca caní!

<sup>17</sup> Ní'irö buyúë' Jesús légaquië', rnnë':

—¿Bizxi sa'yéaj lë' na' nazúaj lu guichi lá'ayi, rnna:

Guiöj na' gula'rú'unë' bönni' huen zö'ö,

guiöj ni chinaca guiöjlen squin zö'ö?

<sup>18</sup> Núti'tës nu ibixi lahui guiöj ni, quitsaj nu na', ate' nu bönni' tsöjbága' guiöj ni lë', uzxuzxaj lë'.

*Ca naca dumí ta' guizxaj lázagaca bönachi*

(Mt. 21:45-46; 22:15-22; Mr. 12:12-17)

<sup>19</sup> La' dza ní'isö, yugu' bixúz unná bë' len bönni' yudo' tu'sédinë' gula'zóa gula'bö'ë ila'zönë' Jesús, tu' téquibe'enë' gunné' quegaquië' lë' na' bucúdzu'ë didza', pero guládxinë' bi ilún bönachi zían nacua' ni'. <sup>20</sup> Ní'irö bulu'yúyenë' Jesús, en gula'söl-lë'ë yugu' bönni' para ulu'béajé' Lë' didza', bönni' ulu'lui'i cúngaquië' ca bönni' tsahui', para ilunë' ga bi innë' Jesús, para gaca ulu'dödë' Lë' lu në'ë bönni' rinná bé'enë' uláz queë' César.

<sup>21</sup> Para ilunë' caní, gula'nábinë' Jesús, ta'nnë':

—Bönni' Usedi, nöztu' rnno' le nácatë, en rusédinu' le nácatë, en biti' ruchi'a rusörou' ca naca le tu'lui'isö lahui bönachi, pero idütë li naca ca rusédinu' xibá queë' Dios. <sup>22</sup> Gudíxjö'i netu'. ¿Naru' run bayudxi quizxaj laztu' queë' César, bönni' Roma rinná bë'ë, o cabí?

<sup>23</sup> Réquibe'enë' Jesús le té'ënnë' ilunë' queë', ate' rë' légaquië':

—¿Bizx que rizí' bë'ëli' neda'? <sup>24</sup> Buli'lu'itsöqui' neda' tu dumí ridá. ¿Nuzxi lahui da' lë'e ni, en nuzxi le nazúaj ni?

Bulu'bi'ë didza', ta'nnë':

—Queë' César na'.

<sup>25</sup> Ní'irö Jesús rë' légaquië':

—Buli'nödzej queë' César le nequi queë' César, ate' queë' Dios le nequi queë' Dios.

<sup>26</sup> Biti' guca ilunë' ga bi innë' Jesús para gaca ulu'zéguië' Lë' didza' lógaca bönachi zían na', pero bulu'báinë' ca naca didza' bubí'ë, ate' bulu'sayaj ruá'agaquië'.

*Ca gaca quégaca nupa ulu'bán lu yöl-la' guti*

(Mt. 22:23-33; Mr. 12:18-27)

<sup>27</sup> Ní'irö yugu' bönni' yudo' saduceo, nupa na' ta'nná bití' ulu'bán nupa chinátigaca, bila'dxinë' ni', ate' gula'nábinë' Jesús, ta'nnë':

<sup>28</sup> —Bönni' Usedi, Moisés buzúajë' queëru' lu guichi, le rnna: “Channö gátie' nu bönni', ate' ugá'anau nigula queë', en channö cuntu nu zoa bi'i queë', ní'irö bi'i böchi'bi' ral-la' sí'ibi'-nu nigula queë' na', para uzóabi' bi'i queëbi' böchi'bi' na' gútibi'.” <sup>29</sup> Gula'cuá'abi' gadxi bi'i bönni' nácacabi' böchi'bi', ate' bi'i zí'aló na' butsaga ná'aleni' bi'i nigula, en gútibi', bití' zóabi' bi'i queëbi'. <sup>30</sup> Ní'irö bi'i buropi na' butsaga ná'aleni'-nu nigula na', ate' gútibi' ca' bi'i ni, bití' zóabi' bi'i queëbi'. <sup>31</sup> Butsaga ná'aleni'-nu bi'i bunní na', ate' la' tuz ca gulunbi' igádxitëbi', ate' gulátibi', bití' zóabi' bi'i quégacabi'. <sup>32</sup> Ga búdxitë, gútinu ca' nigula na'. <sup>33</sup> Na'a, cate' ulu'bán nupa chinátigaca, ¿núzxilöbi' guéquinu nigula na' queëbi', tu' bulu'tsaga ná'aleni'-nu igádxitëbi'?

<sup>34</sup> Ní'irö bubí'ë didza' Jesús, rë' légaquië':

—Tu'tsága ná'agaca bönachi dza ni zóaru' na'a, en tu'nödzjë'-bi' xzí'inigaquië' para ulu'tsaga ná'agacabi'. <sup>35</sup> Na'a, nupa nácacaca lesaca' ulu'bán lu yöl-la' guti, en tsöjcuá' yödzölió si' gata', bití' ilún yöl-la' rizóalen nigula, en bití' ulu'tsaga ná'agaca. <sup>36</sup> Caní gaca, tu' cabirö ilati nupa na' ulu'bán lu yöl-la' guti, pero ilácagaca ca nácaquië' gubáz lá'ayi queë' Dios, en ilácagaca xzí'ini cazë' Dios. <sup>37</sup> Ca na' ral-la' ulu'bán nupa chinátigaca, rulu'inë' rë'u Moisés caz ga na' nazúaj lu guichi ca naca que yaga yötsi' régui, ga ni' ru'ë didza' Xanru', rnnë' náquië' Dios queë' Abraham, en Dios queë' Isaac, en Dios queë' Jacob. <sup>38</sup> Dios náquië' Dios, calëga quégaca nupa nátigaca tsaz, pero quégaca nupa nabángaca, tu' nabángaca lahuë' Lë' yúgu'të bönachi, sal-la' gulati luyú ni.

<sup>39</sup> Ní'irö bulu'bi'ë didza' bal-lë' bönni' yudo' usedi, ta'nnë':

—Bönni' Usedi, dxí'ado' gunnó'.

<sup>40</sup> Bítí'rö bulu'rúguinë' ila'nábinë' Lë' didza'.

*¿Nuzxi xzí'ini náquië' Cristo?*

(Mt. 22:41-46; Mr. 12:35-37)

<sup>41</sup> Ní'irö Jesús rë' légaquië':

—¿Nacxi caz na' ta'nnë': “Cristo náquië' xzí'inë' David”? <sup>42</sup> David caz bë'ë didza' le nazúaj lu guichi lá'ayi ga nazúajgaca salmo, le rnna: Xanru' Dios gudxë' Xana':

“Gurö'i cuita lë'a ibëla

<sup>43</sup> cate' gunra' ga ulu'zechu zxíbigaca lo' nupa ta'dá'baga' Li'.”

44 David caz na' gunnë' queë' náquië' Xanë'. ¿Nacxi caz naca, rnnali' libí'ili' náquië' zxi'inë'?

*Jesús ruzégui'ë diza' bönni' yudo' tu'sédinë'*

(Mt. 23:1-36; Mr. 12:38-40; Lc. 11:37-54)

45 Tsanni ni' yúgu'të bönachi nacua' ni' tu'zë nágagaca Jesús, rë' yugu' bönni' usëda queë':

46 —Guli'gún chi'i cuinli' quégaquië' bönni' yudo' tu'sédinë', tu' ta'yaza ládi'gaquië' ta'dë' nácugaquië' lari' tunna, en té'ënnë' ulu'lidza bönachi légaquië' zxön gapa naca lu yë'ëyi, en ta'yaza ládi'gaquië' ca' ta'bö'ë lataj lo gapa tu'dubë' tu'sédë' queë' Dios, en gapa ta'bö'ë tahuë'. 47 Ta'gúë' lídxigacanu nigula uzëbido', ate' para ulu'luí' tshui' cuíngaquië', xidzé tu'lidzé' Dios. Yugu' bönni' ni, yénni'tërö gunë' Dios ga ila'gu'í ila'záquië'.

## 21

*Gun le gulú'unu tu nigula yechi' lahuë' Dios*

(Mr. 12:41-44)

1 Ga na' zoë' Jesús chila yudo', guchisa lahuë', en rilé'enë' yugu' bönni' dë yöl-la' tshui' quégaquië', ta'gu'ë dumí lu gu'ina que dumí gun que yudo'. 2 Bilé'enë' ca' tu nigula yechi' uzëbido', rigú'unu chopá dumí lásido', le nazáca'gaca láti'do'os. 3 Rnnë' Jesús:

—Le nácatë rea' libí'ili', tu le zxöntërö gulú'unu nigula yechi' uzëbido' ni ca ia'zica'rö bönachi na' ta'gu'ë dumí. 4 Yúgu'të', tsca le nadödi bë' dë quégaquië', gula'gu'ë dumí que yudo', pero nigula ni, lu yöl-la' yechi' queënu gulú'unu idütë le dë queënu, le ral-la' gáhuinu.

*Rigúxjö'ë Jesús ca ulu'sunítië' yudo'*

(Mt. 24:1-2; Mr. 13:1-2)

5 Nacua' ni' nupa tu'í didza' ca naca que yudo' na', ca na' nazí'i biquitaj que, yugu' guiöj nazácalé'egaca, en yugu' gundo' nácagaca lachi, ate' Jesús rë' légaquië', rnnë':

6 —Yúgu'të lë ni rilé'eli', huadxín dza cate' bíti'rö ugá'ana guiöj lahui luzë'e ni, tu' ulu'suníti bönachi yudo' ni.

*Le ilaca bë' cate' si' idxín dza údxi*

(Mt. 24:3-28; Mr. 13:2-23)

7 Ní'irö gula'nábinë' Jesús, ta'nnë':

—Bönni' Usedi, ¿bátaxi gaca lë ni? ¿Bizxi gaca bë' chizóa gaca caní?

8 Bubi'ë didza' Jesús, rnnë':

—Guli'gún chi'i cuinli', para cabí nu si' ye'e libí'ili', tu' ila'lá'gaquië' bönni' zían, en ila'z'i' lágáquië' ca lea' neda', ila'nnë' nácagaquië' Cristo, en ila'nnë': “Chizá' gala' dza údxi.” Neda' rea' libí'ili': Biti' tséajlenli' légaquië'. 9 Cate' yönili' raca gudil-la, en ta'dá'baga' bönachi yúlahui', biti' gadxi idzöbili', tu' run bayudxi ilaca le caní, pero biti' zuitëni dza údxi.

10 Ní'irö rë' ca' légaquië':

—Til-la tu yödzö len ia'tú yödzö, ate' bönachi tu ga nu rinná bë' ila'díl-lalen bönachi ia'tú ga nu rinná bë'. 11 Tödigaca budó' zxu', ate' zían lataj gaca gubín, en ilatsaj yödzöhuë' zxön. Ila'lá' lahui lúzxiba le ilún gadxi bönachi, en le ilaca bë'.

12 'Zi'atëlö cate' si' ilaca lë ni, ila'zön bönachi libí'ili', en ila'bía ládi'gaca libí'ili'. Ila'ché'ë libí'ili' gapa tu'dubë' tu'sédë' queë' Dios para ilútië' libí'ili', en ila'gu'ë libí'ili' lidxi guíë. Ila'ché'ë libí'ili' lógaquië' bönni' ta'nná

bë'ë, en lógaquië' bönni' lo, tu' dá'ali' neda'. <sup>13</sup> Gaca caní queëli' para séqui'li' gunli' ba nalí quia' neda'. <sup>14</sup> Tsutsu guli'gún ládxi'li', para cabí cuéqui ícjali' zí'aló naxci innali' uláz queëli', <sup>15</sup> tu' gunna' queëli' didza' ubí'ili', en yöl-la' réajni'í, para cabí gaca ulu'cul-lë' libí'ili', en para cabí gaca bi ila'nnë' que xtídza'li' bönni' ní' biti' ila'lé'enë' libí'ili' dxi'a. <sup>16</sup> Ní'irö xuz quézili' ulu'dödë' libí'ili', en cá'anqueze yugu' bönni' böchi' quézili', en yugu' di'a dza que quézili', en yugu' böchi' luzé'e quézili', ate' ilútië' bál-lali'. <sup>17</sup> Yúgu'të bönachi ulu'zóa libí'ili' tsölá'aló tu' dá'ali' neda', <sup>18</sup> pero biti' initi nitú guitsa' ícjali'. <sup>19</sup> Channö ugá'anali' tsutsu, idéli'li' yöl-la' na'bán idú.

<sup>20</sup> 'Cate' ilé'eli' bönni' röjáquië' gudil-la nagú'ugaquië' lë'a Jerusalén, inözili' chibidxín dza initi yödzö ni. <sup>21</sup> Ní'irö nupa nacuá' luyú Judea ralla' ila'zxunnaj ni, en tsöjaca gapa naca guí'ado', ate' nupa nacuá' lu yödzö ni ral-la' ila'rúaj ni, ate' nupa nacuá' la' guixi', biti' ral-la' ulu'dxín lu yödzö ni. <sup>22</sup> Yugu' dza ni' Dios gunë' xíguia' nupa nacuá' yödzö ni para gaca yúgu'të le nazúaj lu guichi lá'ayi ca ral-la' gaca quégaquië'. <sup>23</sup> Cate' idxín dza ni', bica' bayechi' yugu' nigula nuá'gacanu-bi' bí'ido' sí' ilaljbi', en nigula tu'gádxí-nu-bi' bí'ido', tu' ila'guí'í ila'záca'da' bönachi nacuá' ni', ate' Dios gúndë'ë bönachi ni' xíguia'. <sup>24</sup> Ilátië' zíanë' lu gudil-la na', ate' ila'chë'ë ia'bal-lë' nadzúngaquië' ga ila'dxinë' idútë yödzölió, ate' yödzö Jerusalén ni, ulu'léaj ulu'libë' le bönni' zitu', cate' izá'arö dza quégaquië'.

*Le ilaca bë' si' huödë' Bönni' Guljë' Bönachi*

(Mt. 24:29-35, 42-44; Mr. 13:24-37)

<sup>25</sup> Gunnë' ca' Jesús:

—Ní'irö ila'cuá' le ilaca bë' lu gubidza, en lu beo', en yugu' lu böljaj lúzxiba, ate' luyú ni ulu'chixi bönachi, en iládxiguequi, tu' yön chí'í guziú' yu que nísado', en que le riyasa ridxía nisa na'. <sup>26</sup> Ulu'dú ládxi'gaca lu yöl-la' radxi quéguequi tu' ila'zá' ládxi'gaca quégaca le ral-la' ilaca lu yödzölió, en ila'zxizi le nalá'gaca lúzxiba. <sup>27</sup> Ní'irö ila'lé'enë' neda', Bönni' Guljë' Bönachi, guída' lu böaj lúzxiba, dë lu na'a yöl-la' unná bë', ate' ilá' lahui yöl-la' zxön quia'. <sup>28</sup> Cate' isí lo ilaca lë ni, buli'tipa ládxi'li', en guli'chisa loli', tu' chizóa udxina' neda', para huó'ua' libí'ili'.

<sup>29</sup> Jesús gudxë' ca' légaquië' tu le bucúdzü'ë didza', rnnë':

—Buli'yútsöca' ca raca que yaga higo, en que bítitës yaga yúbölö. <sup>30</sup> Cate' rilé'eli' ta'lén ni'a në'e hué'enido', nöz quézili' chizá' gala' cusu ba. <sup>31</sup> Lësca' caní, cate' ilé'eli' chitaca yugu' lë ni, inözili' chizá' gala' dza idinná bë'ë Dios luyú ni.

<sup>32</sup> 'Le nácatë rea' libí'ili', biti' ilátigaca bönachi ila'cuá' dza ni' cate' ilaca yúgu'të lë ni. <sup>33</sup> Ila'dödi que lúzxiba, en que luyú ni, pero xtídza'a, biti' tódi cá'asö, tu' idxín caz ca rnna.

<sup>34</sup> 'Guli'gún chí'í cuinli' para cabí gü'ili' lataj tsaza icja ládxi'do'oli' le gun ditaj libí'ili', lë na' naca yöl-la' rágulë'e, en yöl-la' rizudxi, en yöl-la' ruúbi ruguí', para cate' idxín dza ni', cabí sóali' niti ladxi', <sup>35</sup> en para cabí gaca queëli' ca tu le rizön bönachi, ca naca le gaca quégaca yúgu'të bönachi nacuá' idútë yödzölió. <sup>36</sup> Que lë ni na', guli'sóa ban ladxi', en buli'lídzatica'së' Dios, para gaca uláli' lu lë na' ral-la' ilaca, en para cabí utuf'ili' cate' idxinli' lahua' neda', Bönni' Guljë' Bönachi.

<sup>37</sup> Lahui' dza rizöë' Jesús chila yudo', rusédinë' bönachi, ate' chí'í dzö'ölö rirúajë' ni', en rejë' lu guí'ado' nazí'í le Guí'a Yaga Olivo. <sup>38</sup> Yugu' zila

bila'dxín yúgu'të bönachi ga zoë' Jesús chila yudo' para ulu'zë nágagaca xtídzë'ë.

## 22

*Tun xtídzá'gaquië' ilútië' Jesús*

(Mt. 26:1-5, 14-16; Mr. 14:1-2, 10-11; Jn. 11:45-53)

<sup>1</sup> Cate' chizóa idxín laní cate' tahuë' yöta xtila cabí nazí'i cúa zi que, nazí'i le Pascua laní na', <sup>2</sup>bulu'dubë' yugu' bixúz unná bë' len bönni' yudo' tu'sédinë'. Ta'zóa ta'bö'ë ilútië' Jesús, pero bití' gula'zéqui'në' tu' tádxinë' bi ilún bönachi.

<sup>3</sup> Ní'irö Satanás tu' xihui' yöjtsaga Judas. Judas lë' ca' Iscariote, en nababë' idxínnutë' gubáz nasól-lë'ë Cristo. <sup>4</sup> Guyijë' Judas na', yöjë'lenë' didza' yugu' bixúz unná bë', en bönni' dë lu ná'agaquië' que yudo', nacxi gunë' para udödë' Jesús lu ná'agaquië'. <sup>5</sup> Bulu'dzéjanë' bönni' yudo' na', en gula'zí' lu ná'agaquië' ulu'nödziejë' queë' dumí. <sup>6</sup> Raza ládxë'ë Judas lë ni, ate' rizóa ribö'ë udödë' Jesús lu ná'agaquië' bagáchi'sö.

*Le ráguru' le rusá' ládxí'ru' ca gútië' Xanru'*

(Mt. 26:17-29; Mr. 14:12-25; Jn. 13:21-30; 1Co. 11:23-26)

<sup>7</sup> Bidxín dza na' tahuë' yöta xtila cabí nazí'i cúa zi que, cate' ral-la' ilútië'-ba' bö'cu' zxila' le tahuë' dzö' Laní Pascua. <sup>8</sup> Jesús gusöl-lë'ë Pedro, en Juan, rnnë':

—Gulí'tséaj, guli'tsöjpa'a queëru' le gáguru' dzö' Laní Pascua.

<sup>9</sup> Të' Lë':

—¿Gazxi rë'ënu' tsöjpa'atu' queëru'?

<sup>10</sup> Jesús rë' légaquië', rnnë':

—Bulí'yútsöca', cate' tsú'uli' lu yödzö ni, irúajë' tu bönni' dutságuie' libí'ili', söjnu'ë tu rö'ö nisa. Guli'tséajlenë' ga idxíntëli' yu'u ga tsázië'. <sup>11</sup> Guli'guie' xan yu'u na': "Bönni' Usedi rë' li': ¿Gazxi zoa yu'u laní ga gágulena' yugu' bönni' uséda quia' dzö' Laní Pascua?" <sup>12</sup> Ní'irö ulu'finë' libí'ili' tu yu'u zxon xitsá' ga ni' chinabá'a. Bulí'pa'a ni' le gáguru'.

<sup>13</sup> Ní'irö yöjáquië', en yöjxáca'gaquië' ca na' chigudxë' Jesús légaquië', ate' bulu'pë'ë ni' le ilahuë' dzö' Laní Pascua.

<sup>14</sup> Cate' bidxín dzö' na', gurö'ë Jesús ga ilahuë', ate' bönni' gubáz queë' na' gula'bö'lenë' Lë' tsözxön. <sup>15</sup> Ní'irö Jesús rë' légaquië':

—Gúcada' ládxa'a gágulena' libí'ili' tsözxön xtsö' ni zí'atëlö cate' si' qui'i saca'a, en gátia'. <sup>16</sup> Rea' libí'ili': Bítirö gahua' lë ni cate' idxinrö dza gaca le rulu'isö xtsö' ni ga ni' rinná bë'ë Dios.

<sup>17</sup> Gudélë'ë Jesús tu xzíga'do', en gudxë' Dios: "Xclenu'." Ní'irö rë' légaquië':

—Gulí'sí' lë ni, en guli'gu'aj lati' huéaj, <sup>18</sup> tu' rea' libí'ili': Bítirö gu'ja' xisi uva cate' idxinrö le rinná bë'ë Dios.

<sup>19</sup> Ní'irö gudélë'ë yöta xtila, en gudxë' Dios: "Xclenu'." Gudödi ni' buzxuzxjë' le, en bë'ë que queégaquië', rnnë':

—Lë ni naca idütë le naca' le rudöda' uláz queëli'. Guli'gún caní para usá' ládxí'li' neda'.

<sup>20</sup> Cate' budxi gulahuë', lësca' caní bë'ë didza' que xzíga'do' na', rnnë':

—Xzíga'do' ni rulu'i ca naca didza' cubi rucá'ana tsahui', ate' rön quia' run tsutsu le, rön na' ilalaj ni'a queëli'.

<sup>21</sup> Na'a, bönni' na' udödë' neda' lu ná'agaca bönachi rö'ë rágulene' neda' tsözxön. <sup>22</sup> Le nácatë huayija' ga ilútië' neda', Bönni' Guljë' Bönachi, en gaca

quia' ca na' nazúaj lu guichi lá'ayi ca ral-la' gaca quia', pero bica' bayechi' bönni' na' udödë' neda'.

<sup>23</sup> Ní'irö gula'si lögaquië' ta'nábinë' Lë' tu tuë', ta'nnë':

—¿Núzxilötu' nu gun caní?

*Tu'i xtídzagaquië' núzxilögaquië' gáquië' lo*

<sup>24</sup> Ní'irö gulu'ë didza' la' légacasë' núzxilögaquië' idéli'në' lataj lo. <sup>25</sup> Jesús gudxë' légaquië':

—Yugu' bönni' unná bë' tu'gunë' dxin yöl-la' unná bë' quégaquië', ta'nná bé'enë' bönachí, ate' nupa ni dë lu ná'agaca yöl-la' unná bë', légaquië' bönni' tácalen. <sup>26</sup> Libí'ili' bití' ral-la' gunli' caní, pero nu naca lo ládjali' ral-la' gaca ca nu naca cuídítërö, ate' nu rinná bë' ral-la' gaca ca nu run dxin quéguequi luzë'e. <sup>27</sup> ¿Núzxilö na' nácarö lo, nu na' rö'ö ragu, o nu rupá' la' huagu? ¿Naru' calëga nu na' rö'ö ragu nácarö lo? Neda' zóalena' libí'ili' ca nu rupá' la' huagu.

<sup>28</sup> 'Libí'ili' ni guzóaleni' neda' cate' ni' bi guca quia', yugu' le gula'zí' bë' neda'. <sup>29</sup> Que lë ni na' udöda' lu ná'ali' tu ga inná bë'ëli', ca na' benë' Xuza', budödë' lu na' a ga inná bë'a neda'. <sup>30</sup> Caní guna' para gaca cö'öli', en gu'aj gáguleni' neda' ga ni' inná bë'a, ate' cö'öli' xilataj cázali' ga uchi'a usöröli' idxinnu cö' zxi'ini xi'sóë' Israel.

*Rnnë' Jesús innë' Pedro bití' núnbë'ë Lë'*

(Mt. 26:31-35; Mr. 14:27-31; Jn. 13:36-38)

<sup>31</sup> Gunnë' ca' caní Xanru':

—Simón, Simón. Buyútsöca'. Chigunaba Satanás tu' xihui' libí'ili', para urixi udödi libí'ili' ca nu rurixi rudödi xzoa' xtila, <sup>32</sup> pero chibulidza'-në' Dios, en gunábida' Lë' gácalenë' li', para cabí údxi udú yöl-la' réajlë' quiu' neda'. Na'a, cate' huóácu' quia', butipa ládxi'gaquië' böchi' luzó'o.

<sup>33</sup> Pedro rë' Lë':

—Xan, chizóa' sá'lëna' Li', calëgasö tseja' lidxi guié', pero lësca' gátilëna' Li'.

<sup>34</sup> Jesús rë' lë':

—Pedro, rea' li': Zí'alö cödxiba' böra na'a, chigudá'bagu'u tsonna luzuí, innó' cabí núnbë'u neda'.

*Le benë' Jesús cate' chizóa ilútië' Lë'*

<sup>35</sup> Jesús gunábinë' légaquië', rnnë':

—Cati' gusöl-la'a libí'ili' cabí nuá'ali' yöxaj yöta, en calëga buzudi dumí, en calëga chopa cö' xiráchuli', ¿naru' bi biyadzaj queëli'?

Légaquië' ta'nnë':

—Bití' bi.

<sup>36</sup> Ní'irö rë' légaquië':

—Na'a, nu dë yöxaj yöta que ral-la' guá' le, ate' lësca' caní ral-la' gun nu dë que buzudi dumí, ate' nu bití' dë que guié' tuchi' ral-la' guti' lari' rixóa yeni, en si' tu guié' tuchi'. <sup>37</sup> Rea' libí'ili': Run bayudxi gaca quia' lë na' nazúaj lu guichi lá'ayi, rnná: “Gulunë' queë' ca tunë' quégaca nupa tua' dö”, ate' ilaca yúgu'të le nazúajgaca lu guichi ca ral-la' gaca quia'.

<sup>38</sup> Ní'irö légaquië' ta'nnë':

—Xan, ni dë chopa guié' tuchi'.

Lë' rë' légaquië':

—Chinaca.

*Jesús rulidzë' Dios la' yëla Getsemaní*

(Mt. 26:36-46; Mr. 14:32-42)

39 Ní'irö birúajë' Jesús, en ca run cazë' sa'yéajë' lu Guí'a Yaga Olivo, ate' yugu' bönni' usëda queë' sôjácalenë' Lë'. 40 Cate' bila'dxinë' ni', Jesús rë' légaquië', rnnë':

—Buli'lídzë' Dios, inábili'-në' cabí gata' lataj si' bë' tu' xihui' libí'ili'.

41 Ní'irö Jesús guzë'ë ga na' nacu'ë, en gudödë' ia'lati' tsca ga ridxín tu guioj rirú'uniru', ate' ni' buzóa zxibë', en rulidzë' Dios. 42 Rnnë':

—Xúz, channö ré'ënu', bucuása ga zoa' lë na' ral-la' quí'i saca'a, pero calëga ca ré'ënda' neda', pero ca ré'ënu' Li' gunu'.

43 Ní'irö buluí'i lahuë' gubáz lá'ayi queë' Dios, zë'ë yehua' yubá, ate' butipë' ládxë'ë Jesús. 44 Lu yöl-la' risëbi ladxi' queë', idú ládxë'ë Jesús bulidzë' Dios, ate' nisa yösa queë' guca ca rön raba' luyú.

45 Cate' budxi bulidzë' Dios, guyasë', en böajë' ga na' nacu'ë bönni' usëda queë', ate' duxáquië' légaquië' tásië' tu' tu'huí'inigaquië'. 46 Ní'irö Jesús rë' légaquië':

—¿Rásitsali'? ¡Guli'chasa, en buli'lidzë' Dios! Inábili'-në' cabí gata' lataj si' bë' tu' xihui' libí'ili'.

*Ta'zönë' Jesús*

*(Mt. 26:47-56; Mr. 14:43-50; Jn. 18:2-11)*

47 Tsanni ni' ru'ë didza' Jesús, la' bila'dxintë' bönni' zían ni', ate' Judas, bönni' na' nababë' idxínnuë' bönni' usëda queë' Jesús dzáguië' légaquië', ate' nanöruë' lógaquië' bönni' zían na'. Gubígui'ë ga zoë' Jesús para utsaga lahuë' Lë'. 48 Ní'irö Jesús rë' lë':

—Judas, ¿naru' rudóditso' caní neda', Bönni' Guljë' Bönachi, rutsaga lo' neda'?

49 Cate' yugu' bönni' na' nacuá'lenë' Jesús bila'lé'enë' ca na' raca queë' Lë', të' Lë':

—Xan, ¿naru' güi'itu' légaquië' guíë tuchi'?

50 Tuë' bönni' usëda queë' Jesús benë' huë' guídi náguië' bönni' huen dxin queë' bixúz lo. Burixë' guídi náguië' ibëla. 51 Jesús rnnë':

—Chinaca na'a. Tsca' gaz.

Gudanë' Jesús guídi náguië' bönni' huen dxin na', en bunë' le. 52 Ní'irö rë' yugu' bixúz unná bë', en bönni' dë lu ná'agaquië' que yudo', en bönni' gula tu'zéajni'inë', bönni' na' biti' ta'lé'enë' Lë' dxi'a, rnnë':

—¿Narúajtsali' nuá'ali' guíë tuchi', en yaga para sönlí' neda' ca runlí' rizönlí'-në' gubán? 53 Yugu' dza guzóalen caza' libí'ili' chila yudo', ate' biti' bi benlí' quía', pero na'a chibidxín dza queëli', le naca dza dë lu në'e nu na' zoa lataj chul-la.

*Rnnë' Pedro: "Biti' núnbë'a-në' Jesús"*

*(Mt. 26:37-58, 69-75; Mr. 14:53-54, 66-72; Jn. 18:12-18, 25-37)*

54 Ní'irö gula'zönë' Jesús, en gula'chë'ë Lë' ga na' bulu'sudxinë' Lë' lidxë' bixúz lo. Pedro yöjnahuë' Jesús zi'tu' zí'tu'sö. 55 Cate' ni'a në'ë bixúz lo chigula'béquië' guí' lö'a lidxë' bixúz lo na', gula'bö'ë idú gásibi'ilö ra' guí' na', ate' Pedro guró'lenë' légaquië' tsözxön. 56 Cate' tubi' bi'i nigula huen dxin bilé'ebi'-në' Pedro, ni' rő'ösë' ra' guí', buyubi' lë', en rnnabi':

—Bönni' ni dë'ë ca' Jesús.

57 Gudá'baguië' Pedro, rnnë':

—Nígula, biti' ca' núnbë'a-në' bönni' na'.

58 Ia'lati' gudzé ia'tué' bönni' bilé'enë' Pedro, ate' rnnë':

—Li' do'o ca' légaquië'.



Pedro gunnë':

—Bönni', calëga neda'.

<sup>59</sup> Ia'láti'sö gudzé, gunnë' ia'túë' bönni':

—Le nácatë bönni' ni dë'ë Jesús, tu' náquië' bönni' Galilea.

<sup>60</sup> Ní'irö Pedro gunnë':

—Bönni', biti' nözda' bixxi na' ru'u didza' que.

Tsanni ni' ru'ë didza' ni, la' gurödxitëba' böra. <sup>61</sup> Ní'irö buécjë' Xanru', en ruyúë' Pedro, ate' yöjnenë' Pedro xtídzë'ë Xanru', ca na' gudxë' lë': "Zí'aló códxiba' böra na'a, li' chigudá'bagu'u tsonna luzuí, innó' biti' núnbë'u neda'." <sup>62</sup> Burúajë' Pedro ní'iló, ate' rön caz gurödxë'.

*Tu'titjë' Jesús*

(Mt. 26:67-68; Mr. 14:65)

<sup>63</sup> Yugu' bönni' na' nazöngaquië' Jesús bulu'titjë' Lë', ate' gula'guínë' Lë'.

<sup>64</sup> Ní'irö bulu'sajjë' lahuë' Jesús, ate' gula'gápë'ë lahuë', en gula'nábinë' Lë', ta'nnë':

—¿Gunnëya'atsöca! ¿Nuzxi na' gudapa' Li'?

<sup>65</sup> Ziánrö ca' gula'nnë' queë' le gulu'ë dö' queë'.

*Ridxinë' Jesús lógaquië' bönni' yudo' tu'chi'a tu'söröë'*

(Mt. 26:59-66; Mr. 14:55-64; Jn. 18:19-24)

<sup>66</sup> Cate' chizá' rení' dza na', bulu'dubë' bönni' gula tu'zéajni'inë' bönachi judío len yugu' bixúz unná bë', en bönni' yudo' tu'sédinë', ate' gula'chë'ë Jesús lógaquië' bönni' yudo' tu'chi'a tu'söröë', ate' gula'nábinë' Lë', <sup>67</sup> ta'nnë':

—Gudíxjöi' netu'. ¿Naru' nactso' Li' Cristo?

Jesús rë' légaquië':

—Channö guía' libí'ili' naca' Cristo, biti' tséajlë'ëli' neda', <sup>68</sup> en channö inábida' libí'ili' tu didza', biti' ubí'ili' didza', en biti' usanli' neda'. <sup>69</sup> Na'a isílo, neda', Bönni' Guljë' Bönachi, cö'a cuita lë'ë ibëla Dios, nápatërë' yöl-la' unná bë'.

<sup>70</sup> Gula'nábinë' Lë' yúgu'të', ta'nnë':

—¿Naru' nactso' Li' Zxi'inë' Dios?

Lë' gudxë' légaquië':

—Le nácasö rnnali'.

<sup>71</sup> Ní'irö ta'nnë':

—¿Núzxirö naquíniru' nu gun ba nalí queë'? La' ré'usö chibiyöniru' didza' ru'ë.

## 23

*Ridxinë' Jesús lahuë' Pilato, bönni' rinná bë'ë uláz queë' César*

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Ní'irö gulazuínë' yúgu'të bönni' zián ni', ate' gula'chë'ë Jesús lahuë' Pilato, <sup>2</sup> ga ni' gula'sí lógaquië' tu'zéguië' Lë' didza', ta'nnë':

—Bönni' ni, budzölitu' ca runë'. Runë' ga ta'dá'bagá' bönachi uládz queëtu' yúlahui', en ruzáguë'ë xinózigaca nupa ta'guízxaj laz ruquízxjë' César, en rnnë' lë' cazë' náquië' Cristo, bönni' ral-la' inná bë'ë.

<sup>3</sup> Ní'irö Pilato gunábinë' Jesús, rnnë':

—¿Naru' nacu' Li' nu inná be'ë bönachi judío?

Bubi'ë didza' Jesús, rnnë':

—Le nácasö rnno'.

<sup>4</sup> Ní'irö Pilato gudxë' yugu' bixúz unná bë', en bönachi nacuá' ni', rnnë':

—Biti' bi rudzólida' le naca xíguia' nunë' bönni' ni.

<sup>5</sup> Ní'irö gulunrë' tsutsu xtídza'gaquië', ta'nnë':

—Runë' ga tu'tsatsa bönachi, en rusédinë' caní bönachi idú luyú Judea. Gúsí lahuë' benë' caní luyú Galilea ga ridxintë runë' ca' ni.

*Ridxinë' Jesús lahuë' Herodes, bönni' rinná bë'ë luyú Galilea*

<sup>6</sup> Cate' biyönnë' Pilato didza' ni, tu'ë didza' que luyú Galilea, ní'irö gunábinë' légaquië' channö náquië' Jesús bönni' Galilea. <sup>7</sup> Cate' gunözinë' nababë' Jesús ga ni' rinná bë'ë Herodes, gusól-lë'ë Lë' lahuë' Herodes na', tu' zoë' ca' Herodes Jerusalén yugu' dza na'. <sup>8</sup> Cate' Herodes na' bilé'enë' Jesús, budzéjanë', tu' chiguca xidzé rë'ënë' ilé'enë' Lë' tu' chibiyönnë' le zían ca naca queë' Jesús, en runë' löza ilé'enë' tu yöl-la' huáca gunë'. <sup>9</sup> Ní'irö Herodes gunábinë' Jesús le zían, pero Jesús biti' bi didza' bubi'ë. <sup>10</sup> Nacu'ë ca' ni' yugu' bixúz unná bë', len bönni' yudo' tu'sédinë', ate' bulu'zéguidë'ë Jesús didza'. <sup>11</sup> Ní'irö Herodes, en bönni' queë' rójáquië' gudil-la bulu'cá'anë' Jesús cá'asó, en para ulu'titjë' Lë', bulu'gácuë' Lë' tu lari' nazaca' ca rácuë' tu bönni' unná bë', ate' leyúbölö bulu'sudxinë' Lë' lahuë' Pilato. <sup>12</sup> Dza na' bulu'dzáquië' dxi'a Pilato, en Herodes, tu' zí'aló gula'lé luzë'ë tuë' ia'tuë'.

*Ta'chúquië' queë' Jesús gátie'*

(Mt. 27:15-26; Mr. 15:6-15; Jn. 18:39–19:16)

<sup>13</sup> Ní'irö butubë' Pilato yugu' bixúz unná bë', en bönni' dë lu ná'agaquië', en bönachi lu yödzö, <sup>14</sup> ate' rë' légaquië':

—Dujuá'ali'-në' bönni' ni lahua' neda', rnnali' queë' runë' ga tu'tsatsa bönachi, pero cate' gunabi yúdxida'-në', ate' zóatëli' ca' ni, biti' bi budzólida' le naca xíguia' nabáguë'ë, yugu' lë na' ruzéguieli'-në' didza'. <sup>15</sup> Cate' gusól-la'a libí'ili' lahuë' Herodes, biti' bi budzölinë' le benë' bönni' ni le naca xíguia' nabáguë'ë para nu ichugu queë' gátie'. <sup>16</sup> Na' usaca' zi'a-në', ate' tódi na' usana'-në'.

<sup>17</sup> Run bayudxi tu le gunë' Pilato, usané' lu ná'agaca bönachi tuë' bönni' nadzunë' cate' raca laní na', ca na' run cazë'. <sup>18</sup> Ní'irö gulu'ë zidzaj didza' yúgu'të bönni' nacu'ë ni', ta'nnë':

—Bëtië' bönni' ni, en busané' queëtu' Barrabás.

<sup>19</sup> Nadzunë' Barrabás na' lidxi guíë tu' gudíl-lalenë' yúlahui' lu yödzö na', en tu' bëtië' bönachi. <sup>20</sup> Bulidzë' Pilato légaquië' leyúbölö, tu' rë'ënë' usané' Jesús. <sup>21</sup> Leyúbölö gulu'ë zidzaj didza', ta'nnë':

—¡Budë'ë lë'e yaga cruz! ¡Budë'ë lë'e yaga cruz!

<sup>22</sup> Ní'irö Pilato gudxë' légaquië' le bunni luzuí, rnnë':

—¿Bizxi caz le ruá' dó' benë' bönni' ni? Biti' bi budzólida' nunë' le run ga nabáguë'ë xíguia' gátie'. Usaca' zi'a-në', ate' ní'irö usana'-në'.

<sup>23</sup> Zídzajrö gulu'ë didza', ta'nabë' të'ë Jesús lë'e yaga cruz. Tu' gula'bödxí'ë yenni' yugu' bönni' na', en yugu' bixúz unná bë', gula'déli'në' gaca ca na' të'ënnë'. <sup>24</sup> Ní'irö Pilato guchúguië' queë' Jesús, para gaca queë' ca na' ta'nabë'. <sup>25</sup> Busané' quégaquië' bönni' na' nadzunë' lidxi guíë tu' gudíl-lalenë' yúlahui', en bëtië' bönachi, bönni' na' chigula'nabë', ate' budödë' Jesús para gaca queë' ca na' të'ënnë'.

*Dë'ë Jesús lë'e yaga cruz*

(Mt. 27:32-44; Mr. 15:21-32; Jn. 19:17-27)

<sup>26</sup> Cate' ni' ta'ch'ë Jesús tsöjdá'gaquië' Lë' lë'e yaga cruz, gula'zönë' Simón, bönni' yödzö Cirene, suzë'ë la' guixi', ate' gula'xöë' yen zxicjë' yaga cruz na' para gu'ë le, en tsejë' cüdzulë' Jesús.

<sup>27</sup> Bönachi zían, enca' yugu' nigula söjnógaca Jesús, ta'bödxinu nigula na', en ta'bödxu yéchi'nu queë' Lë'. <sup>28</sup> Ní'irö buécjë' Jesús, en ruyüë' légacanu, ate' rë' légacanu:

—Libí'ili' nigula Jerusalén. Biti' cödxili' quia' neda', pero guli'cödxu que quézili', en quégacabi' xzí'inili' <sup>29</sup> tu' huadxín dza ila'nná: “Bica' bágaca yugu' nigula huödx, en nigula biti' guluá'anu-bi' bí'ido', en biti' bulu'gádxinu-bi' bí'ido'.” <sup>30</sup> Ní'irö ila'sí lógaca ila'nná bönachi, ilé' yugu' gu'a sibi: “Guli'dubága' netu’”, en ilé' ca' yugu' gu'ado': “Guli'cachi' netu'.” <sup>31</sup> Channö caní tunë' quia' neda', naca' ca tu yaga ya'a, ¿naru' cabí ilüntërë' ca' queéli', nácali' ca yaga bidxi?

<sup>32</sup> Gula'ch'ë ca' chopë' bönni' tuá' dö', para ilútië' légaquië' tsözxön len Jesús. <sup>33</sup> Cate' bila'dxinë' lataj nazí'i le Calavera, le rnna len didza' xidza' Lataj Que Böga' Ícjaru', bulu'dé'ë Jesús lë'e yaga cruz. Bulu'dé'ë ca' lë'egaca yaga cruz chopë' bönni' tuá' dö'. Tuë' bulu'dé'ë cuita lë'ë ibëla Jesús, en ia'tué' bulu'dé'ë cuita lë'ë yögöla. <sup>34</sup> Ní'irö Jesús rnnë':

—Xuz, buniti lo légaquië', tu' cabí nözguequinë' bi tunë'.

Bönni' röjáquië' gudil-la nacu'ë ni' bulu'lë'ë que queëgaquië' le nácuë' Jesús, en bulu'quitjë' le gaca bë' lahui. <sup>35</sup> Bönachi nacua' ni' tu'yú, en yugu' bönni' dë lu ná'agaquië' bulu'titjë' Jesús, ta'nnë':

—Yugu' nu yúbölö busölë' bönni' ni. Na'a ral-la' usölá cuinë' channö náquië' Cristo, bönni' gurö cazë' Dios.

<sup>36</sup> Yugu' bönni' na' röjáquië' gudil-la bulu'titjë' ca' Jesús. Gula'biguë'ë ga na' zoë', en bulu'gui'jë' Lë' nupi zi, <sup>37</sup> ta'nnë':

—Channö nacu' Li' bönni' inná bé'enë' bönachi judío, busölá cuinu'.

<sup>38</sup> Da' ca' lë'e yaga cruz icjlë' Jesús tu le nazúaj lu guichi lu didza' griego, en lu didza' latín, en lu didza' hebreo, le rnna caní: “Bönni' Rinná Bé'enë' Bönachi Judío.” <sup>39</sup> Tuë' bönni' huiá' dö' na' dë'ë lë'e yaga cruz bulidza zi'ë Jesús, rnnë':

—Channö nacu' Li' Cristo, busölá cuinu', enca' netu'.

<sup>40</sup> Bubi'ë didza' ia'tué' bönni' huiá' dö' na', en gudil-lë' luzë'ë na', rnnë':

—¿Naru' cabí rádxinu'-në' Dios? Lësca' li' narugu quiu' gátu'. <sup>41</sup> Le nácatë rë'u, le rál-la'sö gaca queëru' riguí' rizáca'ru', ca na' sa'yéaj dö' biá'aru', pero Bönni' ni, biti' bi dö' nu'ë.

<sup>42</sup> Ní'irö bönni' ni rë' Jesús:

—Yöjné neda' cate' idxinu' ga ni' inná bë'u.

<sup>43</sup> Jesús rë' lë':

—Le nácatë rea' li', na'a dza ni sóalenu' neda' lataj lachi quia'.

### *Ratië' Jesús*

(Mt. 27:45-56; Mr. 15:33-41; Jn. 19:28-30)

<sup>44</sup> Cate' bidxín idú huagubidza, guchul-la idútë yödzölió ga bidxinrö idú ridödi xihuö. <sup>45</sup> Guchul-la gubidza, ate' lari' nal-la' lu yudo' biröza' chopa dí'ilo. <sup>46</sup> Ní'irö bë'ë zidzaj didza' Jesús, rnnë':

—Xuz, rigú'a lu no'o bö' naca caza'.

Cate' budxi gunné' caní, birúajtë bö' naca cazë', gútië'.

<sup>47</sup> Cate' bönni' rinná bé'enë' bönni' röjáquië' gudil-la bilé'enë' ca na' guca, gulu'ë Dios yöl-la' ba, rnnë':

—Le nácaté bönni' ni gúquië' bönni' tsahui'.

<sup>48</sup> Cate' yúgu'të bönni' nacu'ë ni' tu'yúë' bila'lé'enë' lë na' guca, yöjhuöjgaquië' yödzo, ta'gapa' luchú'ugaquië' tu' tu'bánninë'. <sup>49</sup> Zí'tu'sö bulu'gá'ana yúgu'të nupa ni' núnbë'gaca Jesús, en yugu' nigula na' yöjácalennu Lë' cate' ni' gudë' luyú Galilea, ate' tu'yúë' lë ni raca.

*Rigáchë'ë Jesús yeru ba*

(Mt. 27:57-61; Mr. 15:42-47; Jn. 19:38-42)

<sup>50</sup> Zoë' ca' ni' tu bönni' yödzo Arimatea que luyú Judea, lë' José. Bönni' ni náquië' dxi'a, en tsahui', en nabábalenë' yugu' bönni' yudo' tu'chi'a tu'söröë'. <sup>51</sup> Biti' benë' tuz nupa na' gula'chugu queë' Jesús gátie', tu' ribözë' ca' José ni le rinná bë'ë Dios. <sup>52</sup> Ní'irö guyijë' José na' lahuë' Pilato, en gunabë' lataj u'ë Jesús. <sup>53</sup> Cate' chinuzötjë' Lë', buchölinë' Lë' lari', ate' gulu'ë Jesús yeru ba, le nadaj lë'e gu'a guiöj, ate' lu ba na', cuntu nu nagü'iguequinë'. <sup>54</sup> Dza na' naca dza tu'pë'ë que dza lá'ayi quégaquië' bönni' judío, tu' si' idxín dza na'.

<sup>55</sup> Yöjácanu ca' ni' nigula na' gula'zá'lennu Jesús, cate' ni' gudë' luyú Galilea, ate' bila'lé'enu yeru ba na', en ca na guca, gula'gu'ë Lë' ni'. <sup>56</sup> Cate' yöjhuöjgacanu yu'u, bulu'pá'anu nöri rilá' zxixi, en yugu' le za rilá' zxixi. Ní'irö bulu'zí' ládxi'gacanu dza lá'ayi na' quégaquië' bönni' judío ca na' rinná bë' xibá queë' Dios.

## 24

*Rubanë' Jesús lu yöl-la' guti*

(Mt. 28:1-10; Mr. 16:1-8; Jn. 20:1-10)

<sup>1</sup> Cate' bidxín dza risí lo ia'gadxi dza na', cate' ni' naca zílado', bila'dxinnu nigula na' ra' yeru ba queë' Jesús. Nuá'gacanu yugu' le rilá' zxixi, lë na' chinupá'agacanu, ate' dzágagacanu légacanu ia'bál-lanu nigula. <sup>2</sup> Cate' bila'dxinnu ni', bila'lé'enu chinadúa guiöj na' gudá' ga nu riyaza yeru ba queë'. <sup>3</sup> Cate' gula'yázanu yeru ba na', bití' bulu'dzölinu zoa Xanru' Jesús ni'. <sup>4</sup> Cate' ni' ta'bö'önu böniga ni'a que lë ni, chopë' bönni' nácuagaquië' lari' rëpi yösa bení' la' bila'dxintë' ni', en gula'zuiné' ga na' nacua'anu. <sup>5</sup> Ní'irö guládxinu, en bulu'zötaj ícjagacanu, tu'yunu lu yu, ate' chopë' gubáz lá'ayi na' të' légacanu, ta'nnë':

—¿Bizx que ruguúlajli' nu zoa nabán xilataj nu nati? <sup>6</sup> Biti' zoë' ni, tu' chibubanë'. Gulí'tsojné lë na' chigudxi cazë' libí'ili' cate' ni' zoë' luyú Galilea. <sup>7</sup> Gunnë': "Run bayudxi nu udödi neda', Bönni' Guljë' Bönachi, lu ná'agaquië' bönni' dul-la', ate' ulu'dë'ë neda' lë'e yaga cruz, ate' ubana' cate' gaca tsonna dza."

<sup>8</sup> Ní'irö yöjnégacanu didza na' bë'ë Jesús, <sup>9</sup> ate' bulu'zá'anu ra' yeru ba na', yöjtíxjöi'iguequinu idxinéajtë' bönni' gubáz queë' Cristo, en ia'zica'rë' ca', ca naca lë na' guca. <sup>10</sup> Nigula na' yöjtíxjöi'iguequinu bönni' gubáz na' yugu' lë ni, nácuaganu María Magdalena, en Juana, en María, xinë'ë Jacobo, en ia'bál-lanu nigula na' dzágagacanu légacanu. <sup>11</sup> Guléquinë' bönni' gubáz na' tu'ínu didza' chixi, en bití' gula'yéajlë'ë légacanu.

<sup>12</sup> Ní'irö guyasë' Pedro, en carelô sa'yéajë' ra' yeru ba na'. Cate' buyúë' lu ba na', bilé'enë' yugu' lári'sö nacua' ni', ate' ní'irö böajë' lidxë', rubánninë' ca naca lë na' guca.

*Le guca la' nöza ridxintë Emaús*

(Mr. 16:12-13)

<sup>13</sup> La' dza ná'asö sōjáquiē' chopē', yú'ugaquiē' nōza le ridxintē Emaús, le rō'ō ca chopa hora rizá'aru' Jerusalén. <sup>14</sup> Yú'ugacasē' ca' nōza, tu'ē didza' ca naca yúgu'tē lē na' guca. <sup>15</sup> Tsanni ni' yú'ugaquiē' nōza, tu'ē didza' la' légacasē', gubígui'ē gala' Lē cazē' Jesús, ate' gudálenē' légaquiē' tsōzxōn. <sup>16</sup> Biti' bulu'únbē'ē Lē' tu' naca ca tu le nabaga' guiōj lógaquiē'. <sup>17</sup> Ní'irō Jesús gunábinē' légaquiē', rnnē':

—¿Bizxi didza' na' ruí'ili' la' libí'sili' yú'uli' nōza? ¿Bizx que na' ruhu'ínili'?

<sup>18</sup> Bubi'ē didza' bōnni' na' lē' Cleofas, rē' Lē':

—¿Nácatso' bōnni' zi'tu' lu yōdzō Jerusalén, en tuzu' li' bití' nōzinu' lē na' guca néaje nasi ni'?

<sup>19</sup> Ní'irō Jesús rē' légaquiē':

—¿Bizxi na' guca?

Tē' Lē':

—Lē na' guca queē' Jesús, bōnni' Nazaret. Gúquiē' bōnni' bē'ē didza' uláz queē' Dios, ate' len yōl-la' huáca zxōn benē' dxin, en bē'ē didza' lahuē' Dios, en lógaca yúgu'tē bōnachi. <sup>20</sup> Yugu' bixúz unná bē', len bōnni' ta'nná bé'enē' netu' bulu'dōdē' Lē', en gulunē' ga nu guchugu queē' gátie', ate' bulu'dē'ē Lē' lē'e yaga cruz. <sup>21</sup> Netu' bentu' lōza gúquiē' Lē' bōnni' na' ralla' huóá'uē' bōnachi Israel, pero na'a chiguca tsonna dza cate' gulaca lē ni. <sup>22</sup> Ia'stú, bál-lanu nigula nútsa'gacanu netu' gulunnu ga gurō'ōtu' bōniga. Yōjācanu ra' yeru ba queē' cate' si' gulén gubidza na'a dza, <sup>23</sup> en cate' bití' bulu'dzōlinu Lē', buduhuōjgacanu, en gulēnu netu' bila'lé'enu yugu' gubáz lá'ayi queē' Dios, nupa ni' gulē légacanu zoē' nabanē' Jesús. <sup>24</sup> Ní'irō bal-lē' bōnni' luzá'atu' yōjāquiē' ra' yeru ba na', en bila'lé'enē' naca ca na' gula'nnanu nigula na', pero bití' bila'lé'enē' Jesús.

<sup>25</sup> Ní'irō Jesús gudxē' légaquiē':

—Libí'ili', bōnni' bití' réajni'ininē'. Nazidi icja lādxi'do'oli' para cabí tséajlē'ēli' yúgu'tē le gula'nnē' bōnni' gulu'ē didza' uláz queē' Dios. <sup>26</sup> ¿Naru' cabí ben bayudxi qui'i sáquē'ē Cristo yugu' lē ni, en tsáziē' ga ni' tsépisētērē'?

<sup>27</sup> Ní'irō gusí lahuē' Jesús rigúxjōi'inē' légaquiē' yúgu'tē le ruí'i didza' ca naca queē' le nazúajgaca lu guichi lá'ayi, ca na' gusí lo bē'ē didza' Moisés ga bidxintē yugu' le gula'nnē' yúgu'tē bōnni' gulu'ē didza' uláz queē' Dios.

<sup>28</sup> Cate' bila'dxinē' yōdzōdo' ga na' sōjáquiē', benē' Jesús ca tu bōnni' zéajtērē' zi'tu'. <sup>29</sup> Gulunē' bayudxi ugá'analē' légaquiē', ta'nnē':

—Bugá'analē' netu', tu' chiridzō' na'a, en chizóa gal-la.

Ní'irō guyáziē' Jesús yu'u, en bugá'analē' légaquiē'. <sup>30</sup> Cate' ni' Jesús rō'ē rágulenē' légaquiē', gudélē'ē yōta xtila, en gudxē' Dios: "Xclenu'." Ní'irō buzzuxjē' le, en bē'ē quégaquiē'. <sup>31</sup> La' ní'isō bidúa lē na' gubaga' guiōj lógaquiē', ate' bulu'únbē'ē Jesús, ate' Lē' buniti cuinē' lógaquiē'. <sup>32</sup> Ní'irō gulē luzé'ē tuē' ia'túé':

—¿Naru' cabí bōála'tica' lādxi'do'oru' tsanni ni' ruí'ilenē' rē'u didza' la' nōza, en cate' ni' ruchila lá'aniē' le nazúaj lu guichi lá'ayi?

<sup>33</sup> La' ní'isō gula'zuínē' yōjhuōjgaquiē' Jerusalén, ate' yōjxáca'gaquiē' nudúbigaquiē' idxinéajtē' bōnni' gubáz queē' Jesús, en nupa nacuá'len légaquiē'. <sup>34</sup> Ní'irō yugu' bōnni' na' nacu'ē ni' gulē' chopē' na':

—Chibubán cazē' Xanru', en buluf'i lahuē', ate' bilé'enē' Simón Lē'.

<sup>35</sup> Ní'irō chopē' na' gula'guíxjō'ē ca na' guca quégaquiē' la' nōza, en ca na' bulu'únbē'ē Jesús cate' ni' buzzuxjē' yōta xtila na'.

*Bönni' usëda queë' Jesús tu' lé'enë' Lë'*

*(Mt. 28:16-20; Mr. 16:14-18; Jn. 20:19-23)*

<sup>36</sup> Tsanni ni' tu' ë didza' ca nácagaca lë ni, la' yöjsóatë' Jesús gatsaj láchui'lö ga na' nacu'ë, ate' rë' légaquië':

—Guli'sóa dxi ládxi'li'.

<sup>37</sup> Ní'irö guladxi gula'dzöbinë' tu' téquinë' bixín ta'lé'enë'. <sup>38</sup> Jesús rë' légaquië':

—¿Bizx que rö'öli' böniga? ¿Bizx que rizá' ládxi'li' yugu' lë ni?

<sup>39</sup> Buli'yútsóca' na'a, en ni'a. Neda' caz ni. Guli'cán neda', en buli'yú neda', tu' cabí da' bixín bëla', en biti' yu'u dxita ca ni rilé'eli' naca quia' neda'.

<sup>40</sup> Ni' ru'isë' ca' didza' ni, bulu'inë' légaquië' në'ë, en ni'ë. <sup>41</sup> Tu' tu'dzéaguequinë' biti' gula'yéajlë'ë, en gula'bó'ë baniga. Que lë ni na' Jesús gudxë' légaquië':

—¿Dë queëli' ni le gahua'?

<sup>42</sup> Ní'irö bulu'nödzjë' queë' láti'do'oba' böla chinéguiba', en tu quízxi'ba' buz. <sup>43</sup> Guzxi'ë Jesús le, en gudahuë' lógaquië'. <sup>44</sup> Ní'irö rë' légaquië':

—Yúgu' lë na' gulaca quia' gulaca ca na' gudxi caza' libí'ili' cate' ni' zóalena' libí'ili', gunniá': Run bayudxi gaca yúgu'të le nazúaj lu guichi lu xibá queë' Moisés, en le gula'nnë' bönni' gulu'ë didza' uláz queë' Dios, en le nazúaj lu guichi nazí'i le Yugu' Salmo, ca ral-la' gaca quia' neda'.

<sup>45</sup> Ní'irö buzéajni'inë' légaquië' lë na' nazúajgaca lu guichi lá'ayi. <sup>46</sup> Rë' légaquië':

—Caní nazúaj lu guichi ca run bayudxi gaca queë' Cristo, qui'i sáquë'ë, en ubanë' lu yöl-la' guti cate' gaca tsonna dza, <sup>47</sup> ate' idütë yödzölió ral-la' gaca libán ca naca quia' neda' para ulu'bí'i ládxi'gaca bönachi para uniti lahuë' Dios dul-la' nabága'gaquië'. Lu yödzö Jerusalén isí lo gaca libán na' <sup>48</sup> ate' libí'i cázali' na' bilé'eli' yugu' lë ni ral-la' gunli' ba nalí que. <sup>49</sup> Buli'yútsóca', isöl-la'a queëli' le guzxi' lu në'ë Xuza' gunnë' queëli', pero buli'gá'anasó Jerusalén cate' idxinrö queëli' yöl-la' huáca na' za' yehua' yubá.

*Ruhuëpë' Jesús yehua' yubá*

*(Mr. 16:19-20)*

<sup>50</sup> Ní'irö Jesús guchë'ë yugu' bönni' dá'gaquië' Lë', söjáquië' yödzö Betania, ate' ni' guchisa në'ë, en bulidza tsáhuë'ë légaquië'. <sup>51</sup> Tsanni ni' rulidza tsáhui'së' ca' légaquië', buzá'atë' ga na' nacu'ë, buëpë' yehua' yubá. <sup>52</sup> Gudödi gula'yéaj ládxi'gaquië' Lë', lu yöl-la' rudzeja quégaquië' yöjhuöjgaquië' Jerusalén. <sup>53</sup> Gula'cuá'tica'së' chila yudo', ta'gu'ë Dios yöl-la' ba, en tun zxönë' Lë'. ¡Ca' naca!

## DIDZA' DXI'A BUZÚAJË' JUAN

*Bönni' na' nazí' i lë' Didza' gúlajë' bönachi*

<sup>1</sup> Cate' gusí lo, zí'atëlö cate' si' gata' yödžölió, ni' zoa cazë Bönni' lë' Didza', ate' Bönni' na' náquië' Didza' zóalenë' Dios, ate' Didza' na' naca caz Dios. <sup>2</sup> Bönni' na' náquië' Didza' zóalenë' Dios cate' ni' gusí lo si' rata' yödžölió. <sup>3</sup> Lu në'ë Bönni' ni, Dios benë' yúgu'të le dë, en biti' bi dë le nunë' Dios le cabí benë' lu në'ë Bönni' na'. <sup>4</sup> Dë caz queë' yöl-la' na'bán, ate' yöl-la' na'bán na' naca ca tu bení' le ruzení' lu icja ládxi'do'gaca bönachi. <sup>5</sup> Ruzení' bení' na' ga naca chul-la que dul-la', pero biti' ca' sequi' le chul-la na' usulu bení' na'.

<sup>6</sup> Dios gusöl-lë'ë ni tu bönni' lë' Juan. <sup>7</sup> Bidë' bönni' ni para gáquië' nu gun ba nalí. Bidë' para gunë' ba nalí queë' Bönni' na' náquië' bení', para tséjlë'gaca yúgu'të bönachi Dios ni'a que lë na' runë' ba nalí. <sup>8</sup> Biti' náquië' Juan bení' na', pero bidë' para gunë' ba nalí queë' Bönni' na' náquië' bení'. <sup>9</sup> Bönni' na' náquië' bení' le naca idú ni' razie' yödžölió ni, ate' ruzení'ë lu icja ládxi'do'gaca yúgu'të bönachi.

<sup>10</sup> Bönni' na' náquië' bení' bidxinë' yödžölió ni, ate' lu në'ë Lë' Dios benë' yödžölió ni, pero bönachi yödžölió biti' bulu'únbë'ë Lë'. <sup>11</sup> Bidxinë' ga nequi queë', pero biti' ca' gula'zí' lu ná'agaquië' Lë' bönni' nabábalenë'. <sup>12</sup> Yúgu'të bönni' gula'zí' lu ná'agaquië' Lë', bönni' ni' gula'yéajlë'ë Jesús, Lë' benë' ga dë lu ná'agaquië' ilácagaquië' zxi'inë' Dios. <sup>13</sup> Bönni' ni ná'agaquië' zxi'inë' Dios, calëga tu' ná'agaquië' zxi'inë' nu bönni', en calëga tu' nálajgaquië' ni'a que le rizé ládxi'ë nu bönni', o ni'a que tu le rë'ënë' nu bönni', pero ná'agaquië' caní tu' naca le rë'ëni quezinë' Dios.

<sup>14</sup> Bönni' na' náquië' Didza' guljë' bönachi, en tu chí'só guzóalenë' rë'u, idú dzágagaca Lë' le ruzá' ládxi'ë Dios queëru', en le naca idútë li. Bilé'etu' yöl-la' zxon queë', ate' yöl-la' zxon queë' na' naca le ru'í queë'bi' bi'ila's dui que, Nu na' naca Xúzibi'. <sup>15</sup> Juan na' benë' ba nalí queë' Bönni' na', en bë'ë zidzaj didza', rnnë':

—Bönni' ni náquië' Nu na' gudíxjõ'a que, gunniá': Bönni' si' zá'tëlë' ca neda' nayépisëtërë' ca neda', tu' zoa cazë' Lë' zí'alö ca neda'.

<sup>16</sup> Le naca idú queë' buzí'iru' xibé yúgu'tëru', lë na' buzá' ládxi'ë queëru' Dios, en zíanrö ca' le ruzá' ládxi'ë queëru'. <sup>17</sup> Bidxín queëru' xibá queë' Dios lu në'ë Moisés, pero le ruzá' ládxi'ë queëru' Dios, en le naca idútë li bila'dxín queëru' lu në'ë Jesucristo. <sup>18</sup> Catu caz nu bilé'e Dios, pero Lë', la's dui Zxi'inë' Dios, Bönni' na' nadxí'ide'enë' Dios Xuz, Bönni' ni na' benë' ga núnbë'ëru'-në' Dios.

*Le benë' ba nalí Juan, bönni' buquilë' bönachi nisa, ca náquië' Jesús*

*(Mt. 3:1-12; Mr. 1:7-8; Lc. 3:1-17)*

<sup>19</sup> Lë ni naca le benë' ba nalí Juan, cate' ni' bönni' judío unná bë' nacu'ë Jerusalén gula'söl-lë'ë yugu' bixúz, en bönni' nabábagaquië' Leví, nupa ni ná'agaca ni'a ná'agaquië' bixúz, para ila'nábinë' Juan na', ila'nnë':

—¿Nuzxi bönni' lí'?

<sup>20</sup> Yálajdo' bë'ë didza' Juan, en biti' gudá'baguië', pero gudíxjõ'ë catëz naca, rnnë':

—Biti' naca' Cristo, Bönni' na' guzxi' lu në'ë Dios isöl-lë'ë queëru'.

21 Ní'irö gula'nábinë' lë' leyúbölö, tē' lë':

—¿Nuzxi caz li'? ¿Naru' nacu' li' Elías, bönni' bē'ë didza' uláz queë' Dios dza ni'tē'?

Gunnë' Juan:

—Biti' naca'.

Ní'irö tē' lë':

—¿Naru' nacu' li' bönni' na' ral-la' guídë' gu'ë didza' uláz queë' Dios?

Bubi'ë didza' Juan, rnnë':

—Calëga neda'.

22 Ní'irö tē' lë':

—¿Nuzxi caz nacu'? Gudíxjöi'i netu' para gaca usiyöntu' nupa gula'sól-la' netu'. ¿Bizxi rnnö' li' nuzxi nacu'?

23 Bubi'ë didza' Juan, rē' légaquië':

—Neda' naca' bönni' na', nazúaj lu guichi lá'ayi ca naca queë', rnnä: Riyón chí'i nu rulidza lu lataj cá'asö, rnnä: Buli'béaj li nöza para idxín Xanru' queéli'. Caní gunnë' Isaías, bönni' na' bē'ë didza' uláz queë' Dios.

24 Yugu' bönni' ni nácaqaquië' bönni' yudo' fariseo nasól-la'gaquië' bönni' judío unná bē'. 25 Gula'nábinë' Juan, tē' lë':

—¿Bizx que ruquilu' bönachi nisa channö cabí nacu' li' Cristo, en biti' nacu' Elías, en calëga bönni' na' ral-la' guídë' gu'ë didza' uláz queë' Dios?

26 Bubi'ë didza' Juan na', rē' légaquië':

—Neda' ruquila' bönachi nisa lu nisa, pero gatsaj láhuilö' ga zóali' zoë' tu bönni' biti' núnbë'ëli'-në'. 27 Bönni' ni náquië' Bönni' na' si' zá'tëlë' ca neda', en nayëpisëtërë' ca neda', ate' biti' naca' neda' lesaca' ulecja' xiráchuë' nudë'ë.

28 Yúgu'të lë ni guca lu xiyú yödzö Betábara, ga naca ia'tsólá'a yegu Jordán, zaca' ga rilén gubidza, ga ni' buquilë' Juan bönachi nisa.

*Jesús náquië' ca bö'cu' zxíla'do' tutië'-ba' lahuë' Dios tu' nözi dul-la'*

29 Dza buropi ni' Juan bilé'enë' Jesús, zē'ë ga zoë', ate' rnnë':

—Buli'yútsöca'. Bönni' ni náquië' bö'cu' zxíla'do' queë' Dios, gátië' para ugüë' dul-la' nabága'gaca bönachi yödzölió. 30 Lë' náquië' bönni' na' gunniá' queë': "Si' zá'tëlë' ca neda' tu bönni', nayëpisëtërë' ca neda', tu' zoa cazë' zí'alö ca neda'." 31 Neda' biti' bénbë'a-në' zí'alö, pero bida', ruquila' bönachi nisa para ilúnbë'e bönachi Israel Lë'.

32 Benë' ba nalí Juan ca naca queë' Jesús, rnnë':

—Bilé'eda'-në' Dios Bö' Lá'ayi, bötjë' birúajë' yehua' yubá, gunë'ë ca riná'aba' gu'dödo', ate' bidxinë' ga zoë' Jesús, en bugá'analënë' Lë'. 33 Biti' bénbë'eda' Lë' zí'alö. Gudxi neda' Nu na' gusól-la' neda' para uquila' bönachi nisa, gunnë': "Cate' ilé'enu'-në' huötjë' Dios Bö' Lá'ayi, tsöjsóalënë' Bönni' na', en ugá'analënë' Lë', Bönni' ni gunë' le rulu'isö yöl-la' ridila nisa ni, uchízië' bönachi Dios Bö' Lá'ayi." 34 Na'a, chibilé'eda' lë na', en runa' ba nalí queë' Bönni' ni, náquië' Zxí'inë' Dios.

*Yugu' bönni' usëda zí'alö queë' Jesús*

35 Ia'tú dza ca', leyúbölö zoë' Juan ni', ate' nacuá'lenë' lë' chopë' bönni' dá'gaquië' lë'. 36 Cate' Juan na' bilé'enë' Jesús, ridödë' ni', ní'irö gudxë' bönni' na' dá'gaquië' lë', rnnë':

—Buli'yútsöca'. Ni' zoë' bönni' na' náquië' bö'cu' zxíla'do' queë' Dios, gátië' uláz quegaca bönachi dul-la'.



<sup>37</sup> Chopë' bönni' na' dá'gaquië' Juan bila'yönnë' didza' ni bë'ë lë', ate' yöjnógaquië' Jesús. <sup>38</sup> Ní'irö buécjë' Jesús, en buyúë' chopë' ni söjnógaquië' Lë', ate' rë' légaquië':

—¿Bizxi riguíjali'?

Të' Lë':

—Bönni' Usedi, ¿gazxi zu'?

<sup>39</sup> Bubi'ë didza' Jesús, rë' légaquië':

—Guli'dá, uyuli'.

Ní'irö yójacalenë' Lë', en bila'lé'enë' ga na' zoë', ate' bulu'gá'analënë' Lë' dza na', tu' chizá' ral-la.

<sup>40</sup> Andrés, böchë'ë Simón Pedro, náquië' tuë' bönni' chopë' ni' bila'yönnë' didza' bë'ë Juan, en yöjnógaquië' Jesús. <sup>41</sup> Andrés na', zí'aló yöjdiljë' bönni' böchë'ë, lë' Simón, ate' rë' lë':

—Chibidzölitu'-në' Mesías.

Mesías naca tu didza' hebreo le rnna lu didza' griego: Cristo, ate' lu didza' xidza': Bönni' nasól-lë'ë Dios.

<sup>42</sup> Ní'irö Andrés na' la' guchë'të' Simón ga na' zoë' Jesús. Cate' Jesús bilé'enë' lë', rë' lë':

—Li' nacu' Simón, xzí'inë' Jonás. Na'a, si' lo' Cefas.

Cefas naca ca' tu didza' hebreo le rnna: Pedro, lu didza' xtila, ate' lu didza' xidza': Guiöj.

*Jesús rulidzë' Felipe, en Natanael*

<sup>43</sup> Cate' za' rení' ia'tú dza, gú'unnë' Jesús tsejë' luyú Galilea, ate' yöjxáquië' Felipe, en rë' lë':

—Gudá' neda'.

<sup>44</sup> Náquië' Felipe bönni' yödzö Betsaida, le naca ládzagaquië' Andrés, en Pedro. <sup>45</sup> Felipe budzölinë' Natanael, en rë' lë':

—Chibidzölitu'-në' bönni' na' buzúajë' Moisés ca naca queë' lu guichi lu xibá queë' Dios, ate' bulu'zúajë' ca' ca naca queë' bönni' gulu'ë didza' uláz queë' Dios. Bönni' ni Jesús, xzí'inë' José, bönni' yödzö Nazaret.

<sup>46</sup> Natanael rë' lë':

—¿Naru' huala'tsó Nazaret tu le naca dxi'a?

Felipe rë' lë':

—Gudá uyú'.

<sup>47</sup> Cate' bilé'enë' Jesús zë'ë Natanael na' ga zoë', rnnë':

—Buli'yú ni tu bönni' náquië' idú bönni' Israel, en bití' rnnasë' ca' bönni' ni.

<sup>48</sup> Ní'irö Natanael gunábinë' Jesús, rë' Lë':

—¿Naru' núnbë'tso' neda'?

Bubi'ë didza' Jesús, rë' lë':

—Cate' si' ulídzatërë' Felipe li', cate' ni' zu' zxan yaga higo, bilé'eda' li'.

<sup>49</sup> Ní'irö bubi'ë didza' Natanael, rë' Lë':

—Bönni' Usedi, Li' nacu' Xzí'inë' Dios. Li' nacu' Nu inná be'e bönachi Israel.

<sup>50</sup> Bubi'ë didza' Jesús, rë' lë':

—¿Réajlë'tso' tu' gudxa' li': Bilé'eda' li' zxan yaga higo? Yugu' le zxöntë'ro ca lë ni hualé'enu'.

<sup>51</sup> Lësca' caní rë' Jesús légaquië', rnnë':

—Le nácatë' rea' libí'ili', ilé'eli' naya'aj lúz'xiba, en ta'benë', en tu'huötjë' gubáz lá'ayi queë' Dios ga zoa' neda', Bönni' Guljë' Bönachi.

## 2

*Laní que yöl-la' rutsaga na' le guca lu yödzo Caná*

<sup>1</sup> Cate' chiguca tsonna dza, guca laní que yöl-la' rutsaga na' lu yödzo Caná luyú Galilea, ate' zóanu xiné'ë Jesús ni'. <sup>2</sup> Lësca' zoa nu bulidza Jesús, en yugu' bönni' usëda queë' dijáquië' laní na'. <sup>3</sup> Cate' biyadzaj xisi uva ilé'ajë', ní'irö xiné'ë Jesús gúdxinu Lë', rnnanu:

—Biti'rö dë xisi uva ilé'ajë'.

<sup>4</sup> Bubi'ë didza' Jesús, rë'ë-nu:

—Nígúlado'. ¿Bizx que rulidzu' neda'? Biti' ca' ridxini dza ulu'a lahui yöl-la' huáca quia'.

<sup>5</sup> Ní'irö xiné'ë Jesús gúdxinu bönni' huen dxin ta'gu'ë le tahuë', rnnanu:

—Guli'gún yúgu'të le guié' libí'ili'.

<sup>6</sup> Nacuá' ní' xopa yusu' guiöj tu'gunë' dxin bönni' judío cate' tu'pá'a cuíngaquië' ca nalébiguequinë' tunë', en rúdzugaca chopa tsonna rö'ö nisa tu tu yusu' na'. <sup>7</sup> Jesús gudxë' yugu' bönni' huen dxin na', rnnë':

—Buli'lí yugu' yusu' ni nisa.

Bulu'lié' yugu' yusu' na' nisa. <sup>8</sup> Ní'irö Jesús rë' légaquië':

—Guli'gachi' na'a, en guli'tsöjuá' lahuë' bönni' zoë' ra' yusu'.

Yöjuá'gaquië' na'. <sup>9</sup> Buyüë' bönni' na' zoë' ra' yusu' channö nazxí'i nisa na' nuhuóaca xisi uva, pero bití' réquibe'enë' gazxi za'. Nöziguequinë' bönni' huen dxin na' gulächë'ë nisa na'. Ní'irö bönni' na' zoë' ra' yusu' bulidzë' bönni' rutsaga nelé'ë, <sup>10</sup> en rë' lë':

—Zí'alö tu'nödzjë' yúgu'të bönni' xisi uva nácarö sizxí'i, en cate' chigulë'ajë' yenni', ní'irö tu'nödzjë' le cabí nazxí'i. Li', ga bidxintë na'a ben chi'u xisi uva nácarö sizxí'i.

<sup>11</sup> Yöl-la' huáca naca bë' ni benë' Jesús lu yödzo Caná luyú Galilea naca le risí lo yugu' yöl-la' huáca gunë'. Caní guca, bulu'e lahui yöl-la' zxon queë', ate' gula'yéajlé'ë Lë' bönni' usëda queë'.

<sup>12</sup> Gudödi na' guyijë' Jesús yödzo Capernaum, ate' dzágagaquië' xiné'ë, en yugu' bönni' böché'ë, en yugu' bönni' usëda queë' Lë', ate' zían dza gula'cu'ë Capernaum na'.

*Rulatjë' Jesús lö'a yudo', rubéajë' nupa tun le cabí ral-la' ilún ni'*

(Mt. 21:12-13; Mr. 11:15-18; Lc. 19:45-46)

<sup>13</sup> Cate' chizóa idxín Laní Pascua cate' tu'subanë' bönni' judío ca benë' Dios, ca na' bubéajë' xuz xtó'ogaquië' luyú Egipto, guyijë' Jesús yödzo Jerusalén. <sup>14</sup> Lu yödzo na' yöjxáquië' Jesús nacu'ë bönni' lö'a yudo' ga na' túti'ë-ba' yugu' bëdxi, en yugu' bö'cu' zxila', en yugu' gu'dödo', böa' bëdxi na' tútigaquië'-ba' lahuë' Dios. Rö'ögaquië' ca' ni' bönni' tu'tsë'ë dumí za' idútë yödzülió. <sup>15</sup> Cate' bilé'enë' Jesús lë ni, buzalë' yugu' du lasi le quindë' bönachi na', ate' bulágui'ë yúgu'të' ní'ilö lö'a yudo', en bulágui'ë-ba' ca' ní'ilö yugu' bö'cu' zxila', en yugu' bëdxi. Bësië' dumí quégaquië' bönni' na' tu'tsë'ë dumí lu yu, en burixë' yugu' blaga quégaquië'. <sup>16</sup> Ní'irö Jesús gudxë' bönni' na' túti'ë-ba' yugu' gu'dödo', rnnë':

—Guli'cúa yugu' lë ni. Biti' únili' lidxë' Xuza' tu yë'ëyi.

<sup>17</sup> Ní'irö yöjnéguëquinë' bönni' usëda queë' Jesús le nazúaj lu guichi lá'ayi, rnna: Tu' ruí'ida' ládxa'a lidxu', régui rilá ládxi'da'ahua'.

<sup>18</sup> Ní'irö bulu'bi'ë didza' bönni' judío unná bë' nacu'ë ni', të' Jesús:

—¿Bizxi yöl-la' huáca uluí'inu' netu' le gaca bë' dë lu no'o runu' yugu' lë ni?

<sup>19</sup> Bubi'ë didza' Jesús, rë' légaquië':

—Guli'quinnaj yudo' ni, ate' tsonna dzasö uchisa' le.

<sup>20</sup> Ní'irö të' Lë' bönni' judío, ta'nnë':

—Idú xopa-un iz guyá' yudo' ni, ate' Li', ¿tsonna dzasö uchísatso' le?

<sup>21</sup> Yudo' na' bë'ë didza' que Jesús naca la' cuin cazë'. <sup>22</sup> Que lë ni na', cate' bubanë' Jesús lu yöl-la' guti, yöjnéguequinë' bönni' usëda queë' Jesús ca na' gunnë', ate' gula'yéajlë'ë le nazúaj lu guichi lá'ayi, enca' yugu' didza' bë'ë Jesús.

*Jesús núnbë'ë yúgu'të bönachi*

<sup>23</sup> Cate' ni' zoë' Jesús Jerusalén, cate' raca Laní Pascua na', gula'yéajlë' bönachi zían Lë', tu' bila'lé'enë' yugu' yöl-la' huáca runë'. <sup>24</sup> Biti' buzxöni ládxë'ë Jesús légaquië', tu' nunbë' cazë' yúgu'të bönachi. <sup>25</sup> Biti' naquinnë' Jesús nu quíxjöi'i Lë' ca nácgaca bönachi, tu' nöz quézínë' Lë' le yu'u icja ládxí'do'gaca bönachi.

### 3

*Jesús, en Nicodemo*

<sup>1</sup> Nicodemo, tu bönni' yudo' fariseo, nabábalenë' yugu' bönni' judío unná bë'. <sup>2</sup> Bidë' bönni' ni ga zoë' Jesús chí'i dzö'ölö, en rë' Lë':

—Bönni' Usedi. Réquibe'etu' nasöl-lë'ë Dios Li' para usédinu' netu'. Biti' séqui'në' tu bönni' gunë' yugu' yöl-la' huáca nácgaca bë' ca nácgaca le caní runu' Li' channö cabí zóalenë' Dios lë'.

<sup>3</sup> Bubi'ë didza' Jesús, rë' lë':

—Le nácatë rea' li', nu cabí galaj leyúbölö, bití' ca' ilé'e lataj ga ni' rinná bë'ë Dios.

<sup>4</sup> Nicodemo gunábinë' Lë', rnnë':

—¿Nacxi caz séqui'në' tu bönni' galjë' leyúbölö cate' chináquië' bönni' gula? ¿Naru' huácatsö tsu'ë leyúbölö lé'ënu xinë'ë, ate' galjë' ia'tú?

<sup>5</sup> Bubi'ë didza' Jesús, rë' lë':

—Le nácatë rea' li'. Nu bönni' cabí galjë' ni'a que nisa, en ni'a queë' Dios Bö' Lá'ayi, bití' gaca tsázië' ga rinná bë'ë Dios. <sup>6</sup> Nu na' nalaj lu ni'a lu na' bönachi, bönáchisö naca, pero nu nalaj ni'a queë' Dios Bö' Lá'ayi, Bö' Lá'ayi nabani nu na'. <sup>7</sup> Bití' ubáninu' tu' rea' li', run bayudxi galju' leyúbölö. <sup>8</sup> Gátí'tës recja bö', ate' riyönnu' rnnë' bö' na', pero bití' nözínu' gazxi za', o gazxi zeaj. Lësca' caní raca quégaca nupa náljagaca ni'a queë' Dios Bö' Lá'ayi.

<sup>9</sup> Ní'irö Nicodemo gunábinë' Jesús, rnnë':

—¿Nacxi caz gaca lë ni'?

<sup>10</sup> Bubi'ë didza' Jesús, rë' lë':

—¿Ruséditsenu' li' bönachi Israel, en bití' nözínu' yugu' lë ni'? <sup>11</sup> Le nácatë rea' li', le nöztu' ru'ítu' didza' que, en le bilé'etu' runtu' ba nalí que, pero bití' rizi' lu ná'ali' lë na' runtu' ba nalí. <sup>12</sup> Channö cabí réajlë'ëli' neda' cate' ru'ílëna' libí'ili' didza' ca naca le raca yödzölió ni, ¿nacxi caz gaca tséajlë'ëli' channö guía' libí'ili' le raca yehua' yubá?

<sup>13</sup> 'Catu caz gurenë' nu bönni' yehua' yubá, pero tuza' neda', Bönni' Guljë' Bönachi, bötja' birúaja' yehua' yubá, ate' zoa caza' ni' yehua' yubá. <sup>14</sup> Ca na' benë' Moisés lu lataj cá'asö, buchisé'-ba' bëla néquiniba' guié, budë'ë-ba' lë'e yaga, lësca' caní run bayudxi gaca quia' neda', Bönni' Guljë' Bönachi, ulu'chisé' neda' xitsá'. <sup>15</sup> Caní gaca quia', para cabí ila'niti yúgu'të nupa ila'yéajlë' neda', pero gata' quéguequi yöl-la' na'bán idú.

*Dios nadxí'ide'ené' bönachi yödzülió*

<sup>16</sup> Tu' bidxí'ide'ené' Dios bönachi yödzülió, buzá' ladxé'ë quéguequi Zxí'iné' la' buduíné', para cabí ila'niti yúgu'té nupa ila'yéajlé' Lè', pero gata' yöl-la' na'bán idú quéguequi. <sup>17</sup> Dios gusól-lé'ë Zxí'iné' yödzülió ni, caléga para ichúguié' quégaca bönachi yödzülió ni gátigaca, pero para ulu'lágaca bönachi yödzülió ni ní'a queé' Lè'.

<sup>18</sup> Nu bönni' réajlé'ë Zxí'iné' Dios, biti' ca' narugu queé' inítié', pero bönni' na' biti' réajlé'ë Lè', chinarugu queé' gátié', tu' cabí réajlé'ë Zxí'iné' Dios la' buduíné'. <sup>19</sup> Que lé ni na' chinarugu quégaca bönachi gátigaca, tu' bidxiné' Bönni' na' náquié' bení' yödzülió ni, pero gulunrö zxön bönachi ni le naca chul-la que dul-la' ca guluné' zxön Bönni' na' náquié' bení', tu' nácagaca xihui' le tuné'. <sup>20</sup> Yúgu'té bönni' tu'ë dö' biti' raza ladxí'gaquié' bení', en biti' rídigaquié' lu bení', para cabí ilá' lahui le tuné'. <sup>21</sup> Nu run le naca idúté li ridxín lu bení' para gaca bē' núngaca ní'a queé' Dios le run nu na'.

*Juan, bönni' ruquilé' bönachi nisa, ru'ë didza' ca naca queé' Jesús*

<sup>22</sup> Gudödi na', Jesús guyéajlené' bönni' dá'gaquié' Lè', ate' bila'dxiné' luyú Judea, en guzóalené' légaquié' ni', ga na' tu'quilé' bönachi nisa. <sup>23</sup> Lésca' ruquilé' Juan bönachi nisa ga nazí'i le Enón, gala' ga dē yödzo Salim, tu' dē nisa zila lataj na', ate' ta'dxín bönachi ni', en ta'dila nisa. <sup>24</sup> Raca caní zí'atélö cate' biti' idzuné' Juan na' lidxi guíé'.

<sup>25</sup> Ní'irö gula'sí lógaquié' bal-lé' bönni' dá'gaquié' Juan ta'díl-lalené' yugu' bönni' judío didza' ca naca que yöl-la' ruchi'a cuini que yudo'. <sup>26</sup> Bila'dxiné' ga zoé' Juan, en té' lé':

—Bönni' usedi. Buyútsöca'. Bönni' na' guzóalené' li' ia'tsölá'a yegu Jordán, bönni' na' benu' ba nalí queé', ruquilé' bönachi nisa, ate' ta'dxín yúgu'té bönachi ga zoé'.

<sup>27</sup> Ní'irö bubi'ë didza' Juan, rē' légaquié':

—Biti' bi dē lu nē'ë nu bönni', channö cabí nudödē' Dios le lu nē'ë. <sup>28</sup> Biyön quézili' lē na' bena' ba nalí, gunnía': "Biti' naca' neda' Cristo", pero Dios nasól-lé'ë neda' para guía' bönachi si' zē'ë Lè'. <sup>29</sup> Bönni' na' rizi'ë-bi' bi'i nigula rutsaga ná'abi' náquié' bönni' rutsaga nē'ë, pero böchi' luzé'ë bönni' rutsaga nē'ë, en dzáguié' lé', ruzé náguié' didza' ru'ë, en rudzéjané' tu' riyönné' didza' ru'ë bönni' rutsaga nē'ë. Lésca' caní, rudzéjade'eda' neda' tu' raca lé ni caní. <sup>30</sup> Run bayudxi gácaré' zxön Cristo, pero neda', run bayudxi gácara' cuídí'sö.

*Nu za' zaca' yehua' yubálö*

<sup>31</sup> Gunné' ca' Juan:

—Bönni' na' zē'ë zaca' xitsá'alö nayépisetère' ca yúgu'té bönachi. Nu bönni' náquié' bönachi yödzülió ni, que yödzülió ni náquié', en ru'ë didza' que le raca yödzülió ni, pero Bönni' na' zē'ë zaca' yehua' yubálö nácatère' lo ca yúgu'té bönachi. <sup>32</sup> Bönni' na' runé' ba nalí que le bilé'ené', en le biyönné', pero cuntú nu rizi' lu nē'ë le runé' ba nalí. <sup>33</sup> Núti'tés bönni' rizi' lu nē'ë lē na' runé' ba nalí, bönni' ni rulu'ë lahui réajlé'ë naca idúté li didza' ru'ë Dios. <sup>34</sup> Bönni' na' nasól-lé'ë Dios, didza' queé' Dios ru'ë, tu' nuzödärē' Dios Bó' Lá'ayi queé' lu Bönni' na'. <sup>35</sup> Dios Xuz nadxí'iné' Zxí'iné', ate' yúgu'té le dē chinödödē' lu nē'ë Zxí'iné' na'. <sup>36</sup> Nu bönni' réajlé'ë Dios Zxí'ini, dē yöl-la' na'bán idú queé', pero bönni' na' biti' réajlé'ë

Dios Zxí'ini, biti' idéli'né' yöl-la' na'bán na', pero nabáguë'è xíguia' lahuë' Dios.

## 4

*Jesús ruí'ilené'-nu didza' tu nigula Samaria*

<sup>1</sup> Bila'yönné' bönni' yudo' fariseo ca na' dá'gaca Jesús zíanrö bönachi ca dá'gaca Juan, ate' ruquilé' ca' nisa zíanrö bönachi ca ruquilé' nisa Juan. <sup>2</sup> Calëga Jesús caz ruquilé' bönachi nisa, pero bönni' usëda queë' tu'quilé' bönachi nisa. <sup>3</sup> Cate' gúquibe'ené' Jesús lë ni, buzë'è luyú Judea, ate' sa'yéajé' leyúbölö luyú Galilea.

<sup>4</sup> Ga ni' sa'yéajé', run bayudxi tödë' luyú Samaria. <sup>5</sup> Caní guca, bidxinë' Jesús tu yödzödo' luyú Samaria, nazí'i le Sicar, gala' ga dë yu na' bunödzejë' Jacob queë'bi' José, zxí'inë' Jacob na', dza ni'te. <sup>6</sup> Lataj na' zoa tu yeru nisa nachö'önë' Jacobo na' ga rë'. Cate' bidxinë' Jesús ni', gurö'è ra' yeru nisa na' tu' yöjxéqui'në' yu'è nöza. Guca idú huagubidza. <sup>7</sup> Ní'irö bidxinnu tu nigula Samaria ni' para sí'inu nisa. Jesús rë'ë-nu:

—Benna le guí'ja'.

<sup>8</sup> Tuzë' zoë' Jesús tu' chisöjajúie' bönni' usëda queë' lu yödzö söjxi'gaquie' le ilahuë'. <sup>9</sup> Ní'irö nigula Samaria na' rënu Jesús, rnnanu:

—¿Rinábítsenu' neda' le guí'ju', en nacu' bönni' judío? Neda' ni naca' nigula Samaria.

Caní gunnánu tu' cabí ta'dzaga dxi'a bönachi Samaria len bönachi judío.

<sup>10</sup> Bubi'ë didza' Jesús, rë'ë-nu:

—La'tu' núnbë'u le runödzejë' Dios, en Nuzxi na' rë li': “Benna le guí'ja'”, li' inabu', ate' Lë' gunné' quiu' nisa runna yöl-la' na'bán.

<sup>11</sup> Ní'irö nigula na' rënu Lë', rnnanu:

—Bönni', biti' nu'u le cuéaju' nisa, ate' yeru nisa ni, dxí'tërö rö'. ¿Gazxi dë nisa na' runna yöl-la' na'bán? <sup>12</sup> ¿Naru' nácatërötso' Li' zxon ca xúziru' gudödi Jacob, bönni' ni' bennë' queëtu' yeru nisa ni, ga ni guzxi'ë nisa gu'ë, en gulé'ajbi' ca' zxi'inë', en gulé'ajba' ca' böa' bëdxi queë'?

<sup>13</sup> Bubi'ë didza' Jesús, rë'ë-nu:

—Núti'tës nu guí'aj nisa ni, leyúbölö ubidxi nisa, <sup>14</sup> pero nu guí'aj nisa na' unödza' neda', bítirö ubidxi icja lãdxi'da'ahuë', tu' unödza' queë' nisa na' gaca lu icja lãdxi'da'ahuë' ca tu ga ralaj nisa, le guí'i yöl-la' na'bán idú queë'.

<sup>15</sup> Ní'irö nigula na' rënu Lë', rnnanu:

—Bönni', benna quia' nisa na', para cabirö ubidxa', en cabirö uduzxi'a nisa ni.

<sup>16</sup> Jesús rë'ë-nu:

—Guyéaj, yöjlidzë' bönni' quiu', ate' huödu' ni.

<sup>17</sup> Bubí'inu didza' nigula na', rënu Lë':

—Cuntu nu zoa bönni' quia'.

Ní'irö Jesús rë'ë-nu:

—Ca nácatë rño': “Cuntu nu zoa bönni' quia'”, <sup>18</sup> tu' chiguzóalenu' gayu' bönni', ate' bönni' na' zóalenu'-në' na'a, biti' náquie' bönni' quiu'. Didza' ni ru'u, ca nácatë rño'.

<sup>19</sup> Ní'irö nigula na' rënu Lë', rnnanu:

—Bönni', runi neda' nacu' bönni' ru'ë didza' uláz queë' Dios. <sup>20</sup> Xuz xtó'oru' guléquinë' Dios le bach lu guí'a ni, pero rnnali' libí'ili' Jerusalén naca ga ral-la' ilequi bönachi Dios le bach.

21 Jesús rē'ē-nu:

—Nigula, guyéajlë' neda'. Za' dza cate' tseaj ládxi'li'-në' Dios Xuz sal-la' biti' idisóali' guí'ado' ni, en biti' tsöjsóali' Jerusalén. 22 Libí'ili' reaj ládxi'li' Nu biti' núnbë'ëli', pero netu' núnbë'ëtu' Nu na' reaj ládxi'tu', tu' benë' queë' Dios ilá' lahui yöl-la' rusölá ni'a quégaquië' bönni' judío. 23 Na'a, za' dza, en chiridxín dza na', cate' nupa le nácatë ta'yéaj ládxi'gaca Dios, ila'yéaj ládxi'gaca Lë', zóalenë' Dios Bö' Lá'ayi léguequi, en le naca iduté li, tu' ré'ënë' Dios Xuz ilácagaquië' queë' bönni' ila'yéaj ládxi'gaquië' Lë' caní. 24 Dios náquië' Bö', ate' nupa ta'yéaj ládxi'gaca Lë', run bayudxi ila'yéaj ládxi'gaca Lë', zóalenë' Dios Bö' Lá'ayi léguequi, en le naca iduté li.

25 Ní'irö nigula na' rënu Lë', rnnanu:

—Nözda' ral-la' guídë' Mesías, Bönni' na' lë' Cristo. Cate' guídirë' Lë' quíxjöi'inë' rë'u yúgu'të.

26 Jesús rē'ē-nu:

—Lë' cazë' ruí'ilenë' li' didza'.

27 La' ná'asö bulu'dxinë' bönni' usëda queë' Jesús, ate' bulu'bánninë' tu' ruí'ilenë'-nu nigula didza', pero biti' burúguinë' nitúë' inábinë' Lë', cabí innë': "¿Bizxi rinábinu' lënu?" o: "¿Bizxi didza' ruí'ilenü'-nu?" 28 Ní'irö nigula na' bucá'ananu xichö'önu ni', ate' böajnu la'yödzö, söjödxi nu nupa nacua' ni', rnnanu:

29 —¿Guli'dá, ilé'eli'-në' tu bönni' gudxë' neda' yúgu'të le chinuna'! ¿Naru' cabí nácatsë' Lë' Cristo?

30 Ní'irö bila'rúaj bönachi yödzö na', en bila'dxín ga zoë' Jesús.

31 Tsanni ni' söhuöajnu nigula na', bönni' usëda queë' Jesús gulunë' bayudxi, të' Lë':

—Bönni' Usedi, gudagu.

32 Jesús rē' légaquië':

—Dë tu le rahua', le cabí réquibe'eli'.

33 Ní'irö gula'nabi luzá'agaquië' bönni' usëda queë' tuë' ia'túë', ta'nnë':

—¿Zoa nu chidiguá'tsö le gudahuë'?

34 Ní'irö Jesús rē' légaquië':

—Le nabánida' naca guna' ca ré'ënë' Xuza' nasöl-lë'ë neda', en údxi guna' xichinë'. 35 Caní rnnali' libí'ili': "Ia'tapa beo' huadxín dza uláparu'." Neda' rea' libí'ili': Guli'chisa loli' uyuli' bönachi nácgaca ca gapa nadúzgaca, le chinabídxigaca para tsöjlaparu'. 36 Bönni' na' rulapë' rizi'ë lazxjé', ate' lë na' rulapë' bönni' na', naca para gata' yöl-la' na'bán idú quégaca bönachi, para gaca ulu'dzeja tsözxön nu raza, en nu rulapa. 37 Naca iduté li lë na' rñna caní: Tu nu raza, ate' ia'tú nu rulapa. 38 Neda' gusöl-la'a libí'ili' tsöjlapali' ga biti' gúzali'. Gulún bönachi yúböló dxin guláz, ate' libí'ili' ruzí'ili' xibé dxin na' núngaquië'.

39 Zían bönachi Samaria nacua' yödzö Sicar na' gula'yéajlë'ë Jesús ni'a que xtídza'nu nigula na' bennu ba nalí queë', gunnánu: "Gudxë' neda' yúgu'të le chinuna'." 40 Cate' bila'dxinë' bönni' Samaria ga ni' zoë' Jesús, gulá'tayüë' lahuë' ugá'analenë' légaquië'. Jesús bugá'anë' ni' ia'chopa dza.

41 Caní guca, zióntërë' ca' bönni' ni' gula'yéajlë'ë Jesús ni'a que didza' bë'ë.

42 Ní'irö bönni' ni' gulé'-nu nigula na', ta'nnë':

—Na'a réajlë'ëtu' Lë', calégasö ni'a que didza' bë'u li', pero lësca' tu' biyönitu' netu' Lë', en nöztu' le nácatë bönni' ni náquië' Cristo, Nu rusölá bönachi yödzölió.

*Ruünë' Jesús zxi'inë' tuë' bönni' dë lu në'ë*

<sup>43</sup> Ia' chopa dza ca', buzë'ë Jesús luyú Samaria, en sa'yéajë' luyú Galilea. <sup>44</sup> Caní benë', tu' gudíxjö'ë Lë cazë' Jesús, gunnë': "Bönachi uládz queë' nu bönni' ru'ë didza' uláz queë' Dios biti' tun lë' bal." <sup>45</sup> Cate' bidxinë' Jesús luyú Galilea, gulunë' bönni' Galilea na' Lë' bal tu' yöjáquië' ca' Jerusalén cate' guca Laní Pascua, en bila'lé'enë' le benë' Jesús ni'.

<sup>46</sup> Ní'irö böajë' Jesús yödzö Caná luyú Galilea, ga ni' benë' ga böáca nisa xisi uva. Lu yödzö Capernaum na' zoë' tu bönni' dë lu në'ë uláz queë' bönni' rinná bë'ë, ate' ré'ebi' bi'i bönni' queë' bönni' na' dë lu në'ë. <sup>47</sup> Cate' biyönnë' bönni' ni chibuzë'ë Jesús luyú Judea, en budxinë' luyú Galilea na', ní'irö guyijë' ga na' zoë' Jesús, en gúta'yuë' lahuë' guidé' lidxë', para uduhuënë'-bi' bi'i bönni' queë' na', tu' chirequi gátibi'. <sup>48</sup> Ní'irö Jesús rë' lë':

—Biti' ca' tséajlë'ëli' channö cabí ilé'eli' le nácagaca bë', en yugu' yöl-la' huáca guna'.

<sup>49</sup> Ní'irö bönni' na' dë lu në'ë uláz queë' bönni' rinná bë'ë gudxë' Jesús, rnnë':

—Bönni', gudía'të para cabí gátibi' bi'i quia'.

<sup>50</sup> Ní'irö Jesús rë' lë':

—Böaj lidxu'. Nabanbi' bi'i quiu'.

Bönni' ni guyéajlë'ë didza' bë'ë Jesús, ate' söhuöjë'. <sup>51</sup> Tsanni ni' yu'ë nöza söhuöjë', duzxi'gala'gaquië' lë' bönni' huen dxin queë' ate' gula'guíxjöi'inë' lë', ta'nnë':

—Nabanbi' bi'i quiu'.

<sup>52</sup> Gunábinë' légaquië' bátaxi gusí lo ruhuóáca ládxi'bi'. Të' lë':

—Ba'ayi, idú huagubidza, burúaj xilá yú'ubi'.

<sup>53</sup> Ní'irö gúquibe'enë' xúzibi' bi'i na', böácabi' cate' ni' bë'lenë' Jesús lë' didza', en gudxë' lë': "Nabanbi' bi'i quiu'." Que lë' ni na' guyéajlë'ë Jesús, ate' gula'yéajlë' ca' Lë' bönachi nacuá' lidxë'.

<sup>54</sup> Yöl-la' huáca ni naca le buropi benë' Jesús cate' ni' zoë' luyú Galilea, gudödi buzë'ë luyú Judea.

## 5

### *Ruúnë' Jesús tu bönni' nacú'unië' bin ga nazí' i le Betesda*

<sup>1</sup> Gudödi guca lë' ni, guca laní quegaquië' bönni' judío, ate' guyijë' Jesús Jerusalén. <sup>2</sup> Lu yödzö na', gala' ga tu'ú'uba' bö'cu' zxila', dë tu le zxön yudzu nisa, nazí' i le Betesda lu didza' hebreo, en nacuá' gayu' chila don que. <sup>3</sup> Yugu' lu chila na' dëgaquië' zían bönni' té'enë', bönni' nachul-la lógaquië', en bönni' biti' gaca sá'gaquië', en bönni' nacú'unigaquië' bin. Ta'bözë' bata utá cuini nisa na'. <sup>4</sup> Caní raca, tu' ruhuötjë' tu gubáz lá'ayi queë' Dios tu chí'i huéaj, en röjtsu'ë lu nisa na', en rutë' nisa na'. Huóacaté' nu bönni' tsöjtsú'utië' lu nisa na' cate' rutá cuini ca naca bítitës yödzöhuë' raca queë'. <sup>5</sup> Zoë' tu bönni' ni', chiguca chizxunu' uruá' iz ré'enë'. <sup>6</sup> Cate' bilé'enë' Jesús dë' bönni' huë' na' ni', réquibe'enë' chiguca zían iz ré'enë', ate' gunábinë' lë', rnnë':

—¿Ba rë'ënu' huóácu'?

<sup>7</sup> Bubi'ë didza' bönni' huë' na', rë' Jesús:

—Bönni', cuntú nu zoa cu'u neda' lu nisa na' cate' rutá cuini. Tsanni sa'yéaja' neda', röjtsu'ë bönni' yúbölö zí'aló ca neda'.

<sup>8</sup> Jesús rë' lë':

—Guyaschi. Buá' le denu', en guzë'e.

<sup>9</sup> La' böácátë' bönni' na', ate' bu'ë le gúti'në', en guzë'ë. Dza na' raca caní naca dza lá'ayi quégaquië' bönni' judío. <sup>10</sup> Ní'irö bönni' judío unná bë' gulë' bönni' na' nuhuöáquië', ta'nnë':

—Dza lá'ayi naca na'a. Biti' ral-la' u'u le ráti'nu'.

<sup>11</sup> Bubi'ë didza' bönni' na', rë' légaquië':

—Bönni' na' bunë' neda' gudxi cazë' neda', gunné': “Buá' le denu', en guzë'e.” Bönni' na' bunë' neda'.

<sup>12</sup> Ní'irö gula'nábinë' lë', ta'nnë':

—¿Nuzxi na' gudxi caní li': “Buá' le denu', en guzë'e”?

<sup>13</sup> Biti' nözinë' bönni' na' nuhuöáquië' nuzxi na', tu' chibuzë'ë Jesús lataj ni' tu' nacuá' bönachi zían ni'. <sup>14</sup> Gudödi guca lë' ni, Jesús yöjxáquië' bönni' na' ga naca chila yudo', ate' rë' lë':

—Buyútsöca'. Chiböácu'. Bítirö gunu' dul-la', para cabí gaca quiu' tu le nácarö zí' ca lë' na' guca quiu'.

<sup>15</sup> Guyijë' bönni' na', yöjtíxjöi'inë' yugu' bönni' judío unná bë' Jesús na' bunë' lë'. <sup>16</sup> Que lë' ni na' bönni' judío unná bë' gula'bía ládxi'gaquië' Jesús, en gulë'ënnë' ilútië' Lë', tu' runë' yugu' lë' ni cate' naca dza lá'ayi quégaquië'. <sup>17</sup> Bubi'ë didza' Jesús, rë' légaquië':

—Xuza' ná'atë runë' dxin, ate' neda' ca' runa' dxin.

<sup>18</sup> Que lë' ni na' gulë'ënrönë' bönni' judío unná bë' ilútië' Jesús, calégasö tu' guditsjë' xibá que dza lá'ayi quégaquië', pero lësca' tu' gunné' Dios caz náquië' Xuzë', ate' caní naca nun cuinë' ca náquië' Dios.

*Yöl-la' unná bë' dë lu në'ë Zxí'inë' Dios*

<sup>19</sup> Ní'irö bubí'ë didza' Jesús, rë' légaquië':

—Le nácatë rea' libí'ili'. Biti' bi gaca guna' neda', Zxí'inë' Dios, rácasö quia', pero tuz lë' na' rilé'eda' runë' Dios Xuz. Yúgu'të le runë' Dios Xuz, lësca' caní runa' neda', Zxí'inë'. <sup>20</sup> Dios Xuz nadxí'inë' neda', Zxí'inë', en ruluí'inë' neda' yúgu'të le runë', ate' yugu' le zxöntëro ca lë' ni uluí'inë' neda', le ilún ga ubánili' libí'ili'. <sup>21</sup> Ca na' runë' Dios Xuz, rusubanë' nupa nátigaca, en rugú'ë légaquië' yöl-la' na'bán, lësca' caní runa' neda', Zxí'inë', runödza' quégaca bönachi yöl-la' na'bán ca rë'ëni quézida'. <sup>22</sup> Cuntu nu ruchi'a rusöröë' Dios Xuz, pero chinudödë' lu na'a neda', Zxí'inë', yúgu'të yöl-la' unná bë' para uchi'a usöröa' bönachi. <sup>23</sup> Caní naca para ilún bal yúgu'të bönachi neda', Zxí'inë', ca na' tun bal Dios Xuz. Nu bití' run bal neda', Zxí'inë', bití' run bal Dios Xuz, nasöl-lë'ë neda', Zxí'inë' na'.

<sup>24</sup> 'Le nácatë rea' libí'ili'. Bönni' na' riyönnë' didza' ruá'a, en réajlë'ë Dios Xuz na' nasöl-lë'ë neda' dë yöl-la' na'bán idú queë', ate' bití' irugu queë'. Náquië' ca nu chinubán lu yöl-la' guti tu' chidë yöl-la' na'bán idú queë'. <sup>25</sup> Le nácatë rea' libí'ili', za' dza, en chiridxín dza na', cate' ila'yöni nupa chinátigaca chí'a neda', Zxí'inë' Dios, ate' nupa ila'yöni xtídza'a, en ilún ca rnna, huóata' yöl-la' na'bán quéguequi. <sup>26</sup> Ca na' dë lu në'ë Dios Xuz unödziejë' yöl-la' na'bán quégaca bönachi, lësca' caní benë' ga dë lu na'a neda', Zxí'inë', unödza' yöl-la' na'bán quégaca bönachi. <sup>27</sup> Lësca' caní budödë' lu na'a yöl-la' unná bë' uchi'a usöröa' bönachi, tu' naca' Bönni' Guljë' Bönachi. <sup>28</sup> Bití' ubánili' ca naca lë' ni, tu' huadxín dza cate' yúgu'të nupa chinátigaca ila'yöni chí'a, <sup>29</sup> en ulu'rúaj yeru ba. Ulu'bán nupa na' gulún le naca tsahui', en huóata' yöl-la' na'bán quéguequi, pero nupa na' gulún le bití' naca tsahui', ulu'bán, ate' irugu quéguequi ilátigaca tsaz.

*Le naca bë' le náquië' Jesús*



<sup>30</sup> Gunnë' ca' Jesús:

—Biti' bi gaca guna' la' néda'sö. Ca naca le riyönda' rë' Xuza' neda', caní ruchi'a rusöröa', ate' ca na' ruchi'a rusöröa' naca tsahui', tu' cabí runa' ca rë'énisida' neda', pero ca rë'ëni quéziné' Xuza' nasöl-lë'ë neda', runa'. <sup>31</sup> Channö neda' runa' ba nalí que la' cuin caza', bití' naca lesaca' lë na' runa' ba nalí. <sup>32</sup> Zoa Nu yúbölö Nu run ba nalí quia' neda', Lë' Xuza', ate' nözda' naca lesaca' le runë' ba nalí quia'. <sup>33</sup> Libí'ili' gusöl-la'li' bönni' yöjnábiguequinë' Juan, ate' lë na' benë' ba nalí quia' naca idútë li. <sup>34</sup> Neda' bití' naquinda' nu bönni' gunë' ba nalí quia', pero ruá'a didza' caní para uláli'. <sup>35</sup> Didza' bë'ë Juan na' gulaca ca tu guí' yöri, le guyegui, en buzení', ate' libí'ili', tu chf'isö guyaza ládxi'li' uzí'ili' xibé bení' queë'. <sup>36</sup> Na'a, zoa le run ba nalí quia' neda' le nácarö idú li ladxe' ca lë na' benë' ba nalí quia' Juan. Yugu' le budödë' Dios Xuz lu na'a guna', la' leze na' runa', ate' yugu' lë na' runa', tun ba nalí quia', en náca gaca bë' gusöl-lë'ë Dios Xuz neda'. <sup>37</sup> Lësca' Dios Xuz nasöl-lë'ë neda' runë' ba nalí quia'. Catu caz biyönili' chi'ë, en catu caz bilé'eli' lahuë', <sup>38</sup> en cabí nazí' lu ná'ali' xtídzë'ë, tu' cabí réajlë'ëli' neda', Nu na' gusöl-lë'ë. <sup>39</sup> Rusédali' le nazúaj lu guichi lá'ayi, tu' réquili' huáta' yöl-la' na'bán idú queéli' ní'a que lë na' nazúaj lu guichi lá'ayi, ate' lë na' nazúaj lu guichi run ba nalí quia' neda'. <sup>40</sup> Bití' rë'ënili' guídali' quia' neda' para gata' yöl-la' na'bán queéli'.

<sup>41</sup> 'Bití' riguilja' yöl-la' ba le ila'gú'u bönachi neda'. <sup>42</sup> Neda' núnbë'a libí'ili', en nözda' bití' nadxf'ili'-në' Dios. <sup>43</sup> Bidxina' ni uláz queë' Dios Xuz, ate' libí'ili' bití' rizí' lu ná'ali' neda', pero channö huadxín nu yúbölö nu guídi rácasö que, si' lu ná'ali' nu na'. <sup>44</sup> ¿Nacxi caz gaca tséajlë'ëli' Dios channö rizí'ili' yöl-la' run zxön que luzá'ali' tuli' ia'tuli', en bití' riguíjali' yöl-la' run zxön na' za' lu në'ë la's dui Dios? <sup>45</sup> Bití' uzóa ícjali' uzégua' libí'ili' didza' lahuë' Xuza'. Nu na' uzegui libí'ili' didza' naca lë cazë' Moisés, bönni' na' ruzxöni ládxi'li'-në', sal-la' gútië' dza ni'te. <sup>46</sup> La'tu' réajlë'ëli'-në' Moisés, tséajlë'ëli' ca' neda', tu' buzúajë' Moisés lu guichi ca naca quia' neda'. <sup>47</sup> Na'a, ¿nacxi caz gaca tséajlë'ëli' didza' ruá'a neda' channö cabí réajlë'ëli' yugu' le buzúajë' Moisés lu guichi?

## 6

*Rugahuë' Jesús zíanrö ca chi-un gayuá' bönachi*

(Mt. 14:13-21; Mr. 6:30-44; Lc. 9:10-17)

<sup>1</sup> Gudödi guca lë ni, guyijë' Jesús ia'tsölá'a Nísado' Que Galilea, nazí'i le ca' Nísado' Queë' Tiberias. <sup>2</sup> Bönachi zían yöjnógaca Jesús tu' bila'lé'e yugu' yöl-la' huáca benë', cate' bunë' bönni' té'enë'. <sup>3</sup> Ní'irö gurenë' Jesús, guyijë' ga naca tu lu guí'ado', ga ni' gurö'ölenë' yugu' bönni' usëda queë'. <sup>4</sup> Chizóa idxín Laní Pascua cate' tu'subanë' bönni' judío ca benë' Dios, bubéajë' xuz xtó'ogaquië' luyú Egipto. <sup>5</sup> Cate' guchisa lahuë' Jesús, en bilé'enë' bönachi zían zá'gaca ga zoë', ní'irö rë' Felipe:

—¿Gazxi tsójö'uru' yöta xtila le ilágugaca bönachi zían ni?

<sup>6</sup> Caní gunnë' Jesús para si' bë'ë Felipe na', tu' chinözinë' Lë' naca gunë'. <sup>7</sup> Bubi'ë didza' Felipe, rnnë':

—La'tu' sí'iru' yöta xtila len lázxjaru' que idú xunu' beo', bití' guequi láti'do' huéaj le ilágugaca bönachi zían ni.

<sup>8</sup> Ní'irö tu bönni' usëda queë' Jesús, lë' Andrés, böchë'ë Simón Pedro, rë' Lë', rnnë':

<sup>9</sup>—Ni zóabi' tubi' bi'i bönni', nuá'abi' gayu' yöta xtila néquiguequini zxoá' cebada, en chópaba' böla cuídi'do'. ¿Naru' huéqui'tse ugagu le do' ni cate' xö bönachi?

<sup>10</sup>Ní'irö Jesús rë' légaquié':

—Guli'gún ga ila'bö' bönachi zían ni lu yu.

Lataj na', rő'öda' daca', ate' gula'bö'ë idú ca chi-un gáyu'ë bönni' ni'. <sup>11</sup>Ní'irö gudélë'ë Jesús yugu' yöta xtila na'. Cate' chigudxë' Dios: "Xclenu'", gudísië' le quégaquië' bönni' usëda queë', ate' légaquië' gula'guísië' le quégaca yúgu'të nupa na' rő'gaca lu daca' ni'. Lësca' caní gulunë' quégacaba' böla cuídi'do' na', ate' gulahuë' tsca gulé'ënnë' ilahuë'.

<sup>12</sup>Cate' chibulu'huóljanë', Jesús gudxë' yugu' bönni' usëda queë', gunnë':

—Buli'túbi le bizxaj nagá'anagaca, para cabí ilaca ditaj.

<sup>13</sup>Bulu'tubë' ca', ate' bulu'lié' chinnu ga'börado' yugu' le bizxaj quégaca gayu' yöta xtila néquiguequini zxoá' cebada na', le bulu'gá'ana quégaquië' bönni' na' gulahuë'. <sup>14</sup>Cate' bila'lé'enë' bönni' ni' yöl-la' huáca na' benë' Jesús, ta'nnë':

—Le nácatë bönni' ni náquië' bönni' na' ru'ë didza' uláz queë' Dios, bönni' na' ral-la' guídë' yödžölió ni.

<sup>15</sup>Tu' réquibe'enë' Jesús të'ënnë' ila'chë'ë Lë' bayudxi para ilunë' ga inná bé'enë' légaquië', que lë ni na' buzë'ë ni', sa'yéajë' tuzë' tu lu guí'a.

*Rizë'e ni'ë Jesús lu nísado'*

*(Mt. 14:22-27; Mr. 6:45-52)*

<sup>16</sup>Cate' chizá' ral-la, yőjáquië' bönni' usëda queë' Jesús, ate' bila'dxinë' ra' nísado'. <sup>17</sup>Gula'benë' tu lë'e bárcodo' ni', en sőjáquië' ta'dödë' lu nísado' na', para ulu'dxinë' Capernaum. Chinaca chul-la ate' Jesús biti' ridxíninë' ga na' nacu'ë. <sup>18</sup>Gusí lo recja bö' budunu' lu nísado' na', ate' riyasa ridxía nisa na'. <sup>19</sup>Cate' chibulu'së'ë bárcodo' na', le guzá' le naca tsca rizá'aru' tu hórasö, ní'irö bila'lé'enë' Jesús rizë'e ni'ë lu nísado' na', en zë'ë ribíguë'ë ga na' zeaj barco na', ate' guladxi gula'džöbinë'. <sup>20</sup>Ní'irö Jesús rë' légaquië':

—Neda' caz ni. Biti' gádxili'.

<sup>21</sup>Ní'irö len yöl-la' rudzeja quégaquië' bulu'guélë'ë Lë' lë'e bárcodo' na', ate' la' bidxintë bárcodo' na' lu yu bidxi ga ni' sőjáquië'.

*Bönachi zían tu'guilaj Jesús*

<sup>22</sup>Dza buropi ni', guléquibe'e bönachi zían na' nagá'anagaca ia'tsölá'a nísado' bidxín tuz bárcodo' ni', ate' Jesús biti' gurénlenë' yugu' bönni' usëda queë' lë'e bárcodo' na', pero légacasë' na' yőjáquië'. <sup>23</sup>Ní'irö bila'rúaj ia'bal-la bárcodo' lu yödžö Tiberias, ate' bila'dxín tu lataj le dë gála'sö ga ni' gulahuë' yöta xtila cate' ni' Xanru' Jesús gudxë' Dios: "Xclenu'" que. <sup>24</sup>Tu' bila'lé'enë' bítirö zoë' Jesús ni', en biti' nacu'ë bönni' usëda queë' ni', que lë ni na' gula'benë' lë'egaca bárcodo' na', ate' yőjáquië' Capernaum, tu'guiljë' Jesús.

*Náquië' Jesús yöta xtila nabánigaca tsaz bönachi*

<sup>25</sup>Cate' bila'dxín bönachi zían na' ia'tsölá'a nísado' na', yőjxáca'gaquië' Jesús, en të' Lë':

—Bönni' Usedi, ¿bátaxi bidxinu' ni?

<sup>26</sup>Bubi'ë didza' Jesús, rë' légaquië':

—Le nácatë rea' libí'ili': Ruguílajli' neda', calëga tu' bilé'eli' yugu' yöl-la' huáca bena', pero tu' gudáguli' yöta xtila ni', en böljali'. <sup>27</sup>Guli'gún dxin, calëga para sí'ili' la' huagu ridödi que, pero para sí'ili' la' huagu na'

ugá'anatica'sö, en runna yöl-la' na'bán idú. Lë ni naca la' huagu neda', Bönni' Guljé' Bönachi, gunna' queéli', tu' bulu'ë lahui Xuza' Dios naca' Zxi'iné'.

<sup>28</sup> Ní'irö gula'nábiné' Lë', ta'nné':

—¿Bizxi run bayudxi guntu' para guntu' le raza ládxë'ë Dios?

<sup>29</sup> Bubi'ë didza' Jesús, rë' légaquié':

—Lë ni le raza ládxë'ë Dios, tséajlë'ëli' neda', naca' nu gusöl-lë'ë Lë'.

<sup>30</sup> Ní'irö gula'nábiné' Lë', ta'nné':

—¿Bizxi le naca bë' runu', le ilé'etu' para tséajlë'ëtu' Li'? ¿Bizxi yöl-la' huáca runu'? <sup>31</sup> Gulahuë' xuz gudödi queëru' yöta xtila nazí'i le maná lu lataj cá'asö, ca nazúaj lu guichi lá'ayi, rnna: “Yöta xtila que yehua' yubá Moisés bë'ë quégaquié', gulahuë'.”

<sup>32</sup> Bubi'ë didza' Jesús, rë' légaquié':

—Le nácatë rea' libí'ili': Calëga Moisés na' bennë' queéli' yöta xtila que yehua' yubá, pero Xuza' Dios runnë' queéli' yöta xtila le naca idú que yehua' yubá. <sup>33</sup> Yöta xtila na' runnë' Dios quégaca bönachi naca' neda', lë na' birúaj yehua' yubá, en runödzej yöl-la' na'bán quégaca bönachi yödzölió ni.

<sup>34</sup> Ní'irö të' Lë':

—Xan, bénnatica'sö queëtu' yöta xtila na'.

<sup>35</sup> Jesús rë' légaquié':

—Neda' caz naca' yöta xtila nabánigaca tsaz bönachi. Nu za'len neda', huölaj udzë'e tsaz nu na' le naca queë' Dios, ate' nu tséajlë' neda', chinë'aj tsaz le naca queë' Dios. <sup>36</sup> Naca ca na' chigudxi caza' libí'ili': “Sal-la' rilé'eli' neda', bití' ca' réajlë'ëli' neda'.” <sup>37</sup> Yúgu'të nupa na' runnë' Xuza' quia', ídigaca quia', ate' nupa na' zaca quia', bití' usá'gaca-në'. <sup>38</sup> Caní naca, tu' bötja' birúaja' yehua' yubá, calëga para guna' ca rë'ënda' neda' caz, pero para guna' ca rë'ënë' Dios Xuz, nasöl-lë'ë neda'. <sup>39</sup> Lë ni le rë'ënë' Xuza' nasöl-lë'ë neda', rë'ënë' cabí unítia' nitú nupa na' bennë' quia', pero usubana' léguequi dza údxi. <sup>40</sup> Lë ni le rë'ënë' Dios Xuz nasöl-lë'ë neda', rë'ënë' gata' yöl-la' na'bán quéguequi, yúgu'të nupa na' ila'lé'e neda', Zxi'iné', en ila'yéajlë' neda', ate' neda' usubana' léguequi dza údxi na'.

<sup>41</sup> Ní'irö gula'nnë' queë' Jesús bönni' judío unná bë' tu' gunné': “Neda' caz naca' yöta xtila na' bötaj, birúaj yehua' yubá.” <sup>42</sup> Que lë ni na' ta'nné':

—¿Naru' cabí bönni' ni Jesús, zxi'iné' José? Nunbë' cázaru' xuz xinë'ë. ¿Nacxi caz naca na', rnnë' bönni' ni: “Bötja' birúaja' yehua' yubá”?

<sup>43</sup> Ní'irö bubi'ë didza' Jesús, rë' légaquié':

—Bití' innëli' quia' la' libí'sili'. <sup>44</sup> Bití' séqui'në' nitüë' bönni' guidë' quia' channö cabí idigu'ë quia' Xuza' nasöl-lë'ë neda' nu na', ate' neda' usubana' nu na' dza údxi. <sup>45</sup> Nazúaj lu guichi lá'ayi ca gula'nnë' bönni' gulu'ë didza' uláz queë' Dios, le rnna caní: Dios usédinë' yúgu'të bönachi. Que lë ni na', yúgu'të bönni' ta'yönnë' chi'ë Xuza', en nazédagaquié' lu në'ë Lë' zá'gaquié' quia'.

<sup>46</sup> Cuntu nu bönni' bilé'enë' Dios Xuz, pero tuzë' Bönni' na' birúajë' ga zoë' Dios. Bönni' ni rilé'e quézinë' Dios Xuz. <sup>47</sup> Le nácatë rea' libí'ili': Núti'tës bönni' réajlë'ë neda' töz yöl-la' na'bán idú queë'. <sup>48</sup> Neda' caz naca' yöta xtila nabánigaca tsaz bönachi. <sup>49</sup> Gulahuë' xuz xtó'oli' yöta xtila na' nazí'i le maná lu lataj cá'asö, en cate' bizá'a dza quégaquié' gulátie'. <sup>50</sup> Neda' naca' yöta xtila ruhuötaj rirúaj yehua' yubá, ate' núti'tës bönni'

gahuë' le, biti' ca' gátië' bönni' na'. <sup>51</sup> Neda' caz naca' yöta xtila na' nabánigaca bönachi, le bötaj birúaj yehua' yubá, ate' channö nútí'tës bönni' gahuë' yöta xtila na', gaca bántica'së' bönni' na'. Yöta xtila na' runödza' neda' naca xipéla'a, le runödza' para gata' yöl-la' na'bán quegaca bönachi yödzölió.

<sup>52</sup> Ní'irö bönni' judío unná bë' gula'chixi luzá'agaquië', ta'nnë':

—¿Naru' huácatsö bönni' ni gunnë' queëru' xipélë'ë le gáguru'?

<sup>53</sup> Que lë ni na' Jesús rë' légaquië':

—Le nácatë rea' libí'ili': Channö cabí gáguli' xipéla'a neda', Bönni' Guljë' Bönachi, en channö cabí gu'jali' xichöna', biti' ca' zóalen libí'ili' yöl-la' na'bán na'. <sup>54</sup> Núti'tës nu gagu xipéla'a, en gu'aj xichöna', dë que yöl-la' na'bán idú, ate' neda' usubana' nu na' dza údxi. <sup>55</sup> Caní gaca, tu' naca xipéla'a la' huagu idú, ate' xichöna' naca tu le naca idú para nu gu'aj le. <sup>56</sup> Núti'tës bönni' gahuë' xipéla'a, en gu'jë' xichöna', sóalenticasë' bönni' na' neda', ate' neda' sóalenticas'a' lë'. <sup>57</sup> Ca na' zoë' nabanë' Dios Xuz nasöl-lë'ë neda', ate' neda' nabánida' Lë', lësca' caní ibáninë' neda' nútí'tës bönni' gahuë' neda'. <sup>58</sup> Lë ni yöta xtila bötaj birúaj yehua' yubá, en biti' naca ca yöta xtila na' nazí'i le maná, lë na' gulahuë' xuz xtó'oli', en cate' bizá'a dza quegaquië', gulátië'. Núti'tës bönni' gahuë' yöta xtila ni sóatica'së' ibanë'.

<sup>59</sup> Yugu' didza' ni bë'ë Jesús ga naca tu lu yu'u ga tu'dubë' bönni' judío, en tu'sëdë' queë' Dios, ate' guca lë ni tsanni ní' rusédinë' bönachi Capernaum.

*Didza' rúnnagaca queëru' yöl-la' na'bán idú*

<sup>60</sup> Cate' bila'yönnë' didza' ni, zían bönni' usëda queë' Jesús gula'nnë' que, ta'nnë':

—Banígatë didza' ni. ¿Nuzxi caz gaca si' lu në'e le?

<sup>61</sup> Réquibe'enë' Jesús ta'nnë' bönni' usëda queë' que xtídzë'ë, ate' gunábinë' légaquië', rnnë':

—¿Naru' run didza' ni libí'ili' zí'? <sup>62</sup> ¿Nacxi caz gaca channö hualé'eli' neda', Bönni' Guljë' Bönachi, huëpa' huöja' ga ni' zoa' zí'alö? <sup>63</sup> Le naca queë' Dios Bö' Lá'ayi naca le runna yöl-la' na'bán queëli'. Le naca béla'sö cuntú nu uzí' xibé. Didza' na' bë'lëna' libí'ili' náacagaca queë' Dios Bö' Lá'ayi, en rúnnagaca yöl-la' na'bán quegaca bönachi. <sup>64</sup> Na'a, bál-lali' biti' réajlë'ëli'.

Gunnë' caní Jesús tu' nözinë' dza ni'te nupa na' biti' ta'yéajlë', enca' nu na' udödi Lë' lu ná'agaquië' bönni' ilútië' Lë'. <sup>65</sup> Que lë ni na' gunnë':

—Que lë ni na' chígudxi caza' libí'ili': Biti' séqui'në' nitúë' bönni' të'ë neda' channö Dios Xuz cabí gu'ë lë' lataj.

<sup>66</sup> Dza na' gulaca chopa ládxi'gaquië' zían bönni' usëda queë', en bítí'rö gula'dálenë' Lë'. <sup>67</sup> Ní'irö Jesús gunábinë' idxínnutë' bönni' usëda queë' na', rë' légaquië':

—¿Naru' ubíga'tsali' ca' libí'ili'?

<sup>68</sup> Bubi'ë didza' Pedro, rë' Lë':

—Xan, ¿nuzxi que tséajtu'? Li' napu' didza' rúnnagaca queëtu' yöl-la' na'bán idú. <sup>69</sup> Netu' réajlë'ëtu' Li', en núnbë'ëtu' Li', nacu' Cristo na' nasöl-lë'ë Dios, en nacu' ca' Zxí'inë' Dios ban.

<sup>70</sup> Bubi'ë didza' Jesús, rë' légaquië':

—Guró caza' libí'ili' chínnulli' ni, pero tuë' bönni' ládajli' libí'ili' dzaga tu' xihui' lë'.

<sup>71</sup> Didza' ni bē'ē Jesús ca naca queē' Judas Iscariote, xzí'inē' tu bōnni' lē' Simón, tu' náquiē' Judas bōnni' na' udōdē' Jesús lu ná'agaquiē' bōnni' ilútiē' Lē', en nabábalenē' ia'chinéajē' bōnni' usēda queē' Jesús.

## 7

*Bōnni' bōchi' cazē' Jesús biti' ta'yéajlē'ē Lē'*

<sup>1</sup> Gudōdi guca lē ni ridē' Jesús luyú Galilea. Biti' gú'unne' tsejē' luyú Judea tu' té'ennē' bōnni' judío unná bē' nacu'ē ni' ilútiē' Lē'. <sup>2</sup> Dza ni' chizóa idxín laní quégaquiē' bōnni' judío cate' tu'subanē' ca gula'cu'ē xuz xtó'ogaquiē' xzan libín lága'do'. <sup>3</sup> Que lē ni na' yugu' bōnni' bōchē'ē Jesús gulē' Lē', ta'nnē':

—Birúaj ni, en guyéaj luyú Judea para ila'lé'enē' ca' bōnni' usēda quiu' nacu'ē ni' yugu' yöl-la' huáca runu'. <sup>4</sup> Channō rē'ēnē' nu bōnni' ilúnbē'e bōnachi lē', biti' runē' bagáchi'sō le runē'. Tu' runu' yugu' yöl-la' huáca caní, buluf'i cuinu' lógaca yúgu'tē bōnachi.

<sup>5</sup> Caní gula'nnē', tu' cabí ta'yéajlē'ē bōnni' bōchē'ē Jesús Lē'. <sup>6</sup> Ní'irō Jesús rē' légaquiē':

—Biti' ridxini dza quia' para ulu'í lahua' lógaca bōnachi, pero dza queēli' tséajli' ni' chizóa caz. <sup>7</sup> Bōnachi yōdzölió ni biti' tu'zóa lib'íli' tsölá'aló, pero tu'zóa neda' tsölá'aló tu' runa' ba nalí quégaquiē', rnníá' naca xihui' le tunē'. <sup>8</sup> Gulí'tséaj lib'íli' laní na'. Biti' tseja' laní na' na'a tu' biti' ridxini dza quia'.

<sup>9</sup> Cate' chigudxē' légaquiē' lē ni, bugá'anē' luyú Galilea.

*Sa'yéajē' Jesús laní quégaca bōnachi judío*

<sup>10</sup> Gudōdi sōjáquiē' bōnni' bōchē'ē Jesús laní na', ní'irō sa'yéajē' ca' Lē', calēga yálajdo', pero bagáchi'sō sa'yéajē'. <sup>11</sup> Ga na' raca laní na', bulu'guiljē' bōnni' judío unná bē' Jesús, ta'nnē':

—¿Gazxi zoē' bōnni' na'?

<sup>12</sup> Bōnachi zían ni' gulu'ida' didza' ca naca queē' Jesús. Bal-lē' ta'nnē':

—Náquiē' dxi'a.

Ia'bal-lē' ta'nnē':

—Biti' náquiē' dxi'a tu' rizi' yé'enē' bōnachi.

<sup>13</sup> Biti' bē'ē nitúē' bōnni' didza' yálajdo' ca naca queē' Jesús, tu' tadxi bōnachi zían na' le ilunē' yugu' bōnni' judío unná bē'.

<sup>14</sup> Cate' chibidxín gatsaj laní na', blē'ē Jesús ra' yudo', en busédinē' bōnachi nacuá' ni'. <sup>15</sup> Bulu'bánninē' bōnni' judío, ta'nnē':

—¿Nacxi caz naca, rácadē'ē bōnni' ni, en biti' ca' nazēdē' que yudo'?

<sup>16</sup> Bubi'ē didza' Jesús, rē' légaquiē':

—Le rusédida' neda', calēga quia' naca, pero queē' Dios Xuz na' nasöl-lē'ē neda'. <sup>17</sup> Channō rē'ēnē' nu bōnni' gunē' ca rē'ēnē' Dios, huéquibe'enē' bōnni' na' channō nequi queē' Dios le rusédida' bōnachi o channō rásasō quia' ruá'a didza'. <sup>18</sup> Nu bōnni' ru'ē didza' rásasō queē', runē' caní para ilún bal bōnachi lē', pero Bōnni' na' rē'ēnē' ilún bōnachi bal Nu nasöl-la' lē', Bōnni' ni ru'ē didza' idútē li, en biti' ca' rizi' yē'ē.

<sup>19</sup> 'Moisés bennē' queēli' xibá queē' Dios, pero biti' runli' ca rinná bē' xibá na'. ¿Bizx que rizóa ribō'ōli' gútili' neda'?

<sup>20</sup> Bulu'bí'i didza' bōnachi zían na', tē Lē':

—Tu' xihui' dzaga lí'. ¿Nuzxi caz rizóa ribō'ō guti lí'?

<sup>21</sup> Bubi'ē didza' Jesús, rē' légaquiē':

—Tu yöl-la' huáca bena', ate' rubánili' yúgu'téli'. <sup>22</sup> Le nácaté Moisés benné' queéli' lè na' narugu lu xipéla'li' le naca bé', pero caléga Moisés caz benné' queéli' lè na', pero guzxi'è le lu ná'agaquié' xuz xtá'ahué'. Na'a, sal-la' naca dza lá'ayi, richúguli' lu xipéla'gacabi' bi'i bönni'do' lè na' naca bé' néquiguequibi' queé' Dios. <sup>23</sup> Channó ta'z'í'ibi' lu xipéla'gacabi' lè na' naca bé' cate' naca dza lá'ayi, para cabí quítsjali' xibá queé' Moisés, ¿naru' rilétseli' neda' tu' buna'-né' tu bönni', ate' böáquié' dxí'ado' cate' naca dza lá'ayi? <sup>24</sup> Biti' ral-la' uchi'a usörö lízili' ca', pero buli'chi'a buli'sörö ca naca le naca iduté li.

*Riguíxjö'è Jesús ga narúajë'*

<sup>25</sup> Ní'irö gulu'è didza' bal-lè' bönni' nacu'è Jerusalén, ta'nné':

—¿Naru' caléga bönni' ni Nu na' tu'guiljé' bönni' judío unná bé' para ilútié' Lè'? <sup>26</sup> Buli'yútsöca', yálajdo' ru'è didza', en biti' bi té' Lè'. ¿Naru' téquibe'ené' bönni' ta'nná bé'ené' rë'u, le nácaté bönni' ni náquié' Cristo, Nu na' ral-la' inná be'e rë'u? <sup>27</sup> Bönni' ni, nöz quéziru' gazxi bönni' Lè'. Cate' guidé' Cristo, cuntu nu inözi gazxi bönni' Lè'.

<sup>28</sup> Ní' zoé' Jesús rusédinè' bönachi chila yudo', en cate' biyönné' didza' ni, ní'irö bé'è zidzaj didza', rnné':

—¿Naru' núnbe'etseli' neda', en nözitseli' gazxi bönni' neda'? Bida' ni, caléga rácasö quia', pero Dios caz nasöl-lè'è neda', ate' Lè', biti' núnbè'ëli'-né' libí'ili'. <sup>29</sup> Neda' núnbe'eda'-né', tu' za'a queé' Lè', ate' Lè' cazé' nasöl-lè'è neda'.

<sup>30</sup> Ní'irö guluné' bayudxi ila'zöné' Lè', pero cuntu nu guzxón Lè', tu' cabí ridxini dza queé' tsu'è lu ná'agaquié'. <sup>31</sup> Gula'yéajlé' zían bönachi ni' Lè', ta'nná:

—Cate' guidé' Cristo, ¿naru' guné' zíanrö yöl-la' huáca ca le runé' bönni' ni?

*Bönni' yudo' ta'söl-lè'è nupa ila'zön Jesús*

<sup>32</sup> Bila'yönné' bönni' yudo' fariseo yugu' didza' ni tu'i bönachi ca naca queé' Jesús, ate' yugu' bixúz unná bé', en yugu' bönni' yudo' fariseo na' gula'söl-lè'è ni'a ná'agaquié' para tsöjxongaquié' Lè'. <sup>33</sup> Ní'irö Jesús gunné':

—Ia'tú chí'isó sóalena' libí'ili', ate' ní'irö huöja' ga zoé' Xuza' nasöl-lè'è neda'. <sup>34</sup> Uguíljali' neda', pero biti' udzölili' neda'. Ga ni' tsöjsóa' neda' biti' gaca guídali' libí'ili'.

<sup>35</sup> Ní'irö té' luzá'agaquié' bönni' judío, ta'nné':

—¿Gazxi tséajtsé' bönni' ni, ga ni' biti' udzöliru'-né'? ¿Naru' huayéajtsé' ga nacu'è bönni' judío násilasigaquié' iduté yödzölió, en usédinè' yugu' bönni' zi'tu' ni'? <sup>36</sup> ¿Bizxi rë'ëni inná didza' na' bé'è: “Uguíljali' neda', pero biti' udzölili' neda'”, enca': “Ga ni' tsöjsóa' neda' biti' gaca guídali' libí'ili'”?

*Nisa yegu le runna yöl-la' na'bán queëru'*

<sup>37</sup> Cate' ni' naca dza údxi que laní na', dza na' naca lo, guzuíné' Jesús, en bé'è zidzaj didza', rnné':

—Channó zoé' nu bönni' ribidxi icja ládxi'da'ahué', ral-la' guidé' bönni' na' ga zoa', en guíjé'. <sup>38</sup> Nu bönni' réajlé'è neda', gaca queé' ca na' nazúaj lu guichi lá'ayi, rna: Lu icja ládxi'da'ahué' bönni' na' ilén le naca ca nisa yegu, lè na' ulu'z'í' xibé bönachi, gata' yöl-la' na'bán quéguequi.

<sup>39</sup> Didza' ni bē'ē Jesús ca naca queē' Dios Bō' Lá'ayi, Nu ral-la' idisóalen bōnni' na' ila'yéajlě'ē Jesús. Caní gunnē' Jesús tu' cabí ridxíninē' Dios Bō' Lá'ayi, tu' cabí ruhuépinē' Jesús ga tsépisētērē'.

*Ta'ruáj choplō bōnachi*

<sup>40</sup> Cate' bila'yōni didza' ni, gula'nná bal-la bōnachi zían na', ta'nná:

—Le nácatē Bōnni' ni náquiē' Bōnni' na' ru'ē didza' uláz queē' Dios, Bōnni' na' guzxí' lu nē'ē Dios isól-lē'ē queēru'.

<sup>41</sup> Ta'nnē' ia'bal-lē':

—Bōnni' ni náquiē' Cristo.

Ta'nná bal-la bōnachi:

—¿Naru' irúajtsē' Cristo luyú Galilea? <sup>42</sup> Nazúaj lu guichi lá'ayi le rnna: “Cristo galjē' ladaj di'a dza queē' David, en gáquiē' ca' bōnni' Belén le guca ladzē' David na'.”

<sup>43</sup> Caní guca, bila'ruáj bōnachi na' choplō tu' nōzinē' Jesús. <sup>44</sup> Tě'ennē' bal-lē' ila'zōnē' Jesús, pero cuntu nu bi ben queē'.

*Biti' ta'yéajlě'ē Jesús bōnni' unná bē'*

<sup>45</sup> Ní'irō bulu'dxinē' ni'a ná'agaquiē' yugu' bixúz unná bē', en yugu' bōnni' yudo' fariseo ga na' nacu'ē bōnni' yudo' na', ate' légaquiē' gulé' ni'a ná'agaquiē' na', ta'nnē':

—¿Bizx que bití' diché'ēli'-nē'?

<sup>46</sup> Bulu'bi'ē didza' ni'a ná'agaquiē', ta'nnē':

—Cuntu nu bōnni' ru'ē didza' ca ru'ē didza' Bōnni' ni.

<sup>47</sup> Ní'irō bulu'bi'ē didza' bōnni' yudo' fariseo na', ta'nnē':

—¿Naru' bē'tsali' lataj guzxí' yé'enē' ca' libí'ili'? <sup>48</sup> ¿Naru' guyéajlě'tsē' Lē' nu bōnni' unná bē' o nu bōnni' yudo' fariseo? <sup>49</sup> Libí'ili' dxíali' dō' tu' cabí rácali' xibá queē' Dios.

<sup>50</sup> Zoē' ca' Nicodemo ni', bōnni' na' bidxinē' ga zoē' Jesús chi'i dzō'ölō, tu' náquiē' ca' bōnni' yudo' fariseo, ate' rē' légaquiē':

<sup>51</sup> —¿Naru' richúguru' queē' tu bōnni' gátie' lu xibá queēru' channō cabí yōniru' lē' zí'alō para inōziru' bi benē'?

<sup>52</sup> Ní'irō bulu'bi'ē didza' ia'zíca'rē' na', tē' lē':

—¿Nácatso' ca' li' bōnni' Galilea? Bulaba le nazúaj lu guichi lá'ayi, ate' uyú' catu caz birúaj nitúē' bōnni' ru'ē didza' uláz queē' Dios luyú Galilea.

<sup>53</sup> Ní'irō yōjhuōjgaquiē' lidxi que queēgaquiē'.

## 8

<sup>1</sup> Guyijē' Jesús ga naca lu Gu'á Yaga Olivo.

*Nigula nagútsjanu xibá que yōl-la' nutsaga na'*

<sup>2</sup> Cate' za' rení' budxinē' Jesús ra' yudo', ate' bila'dxín yúgu'tē bōnachi ga zoē'. Gurō'ē Jesús, rusédinē' légaquiē'. <sup>3</sup> Ní'irō yugu' bōnni' yudo' usedi, en yugu' bōnni' yudo' fariseo duché'ēgaquiē'-nu tu nigula ga zoē' Jesús, tu' gula'dzōlinē'-nu ni' rigútsjanu xibá que yōl-la' nutsaga na'. Bulu'sudxinē'-nu lógaca bōnachi na' tu'zē nágagaca Jesús, <sup>4</sup> ate' tē' Lē':

—Bōnni' Usedi, nigula ni guzxōntu'-nu ni' runnu dul-la' rigútsjanu xibá que yōl-la' nutsaga na'. <sup>5</sup> Lu xibá queē' Moisés, gunná bē'enē' netu' uládxí'tu'-nu guiój nu nigula runnu caní, para gátinu. ¿Náxziga Li', naxxi rnno'?

<sup>6</sup> Caní gula'nnē' para ila'zí' bē'ē Jesús para ila'zéquí'nē' ulu'zéguiē' Lē' didza'. Ní'irō biyéchuē' Jesús, ruyúé' lu yu, en ruzúajē' lu yu na' len xibón nē'ē. <sup>7</sup> Cate' gula'nábide'enē' Lē', ní'irō buzuínē' Jesús, en rē' légaquiē':

—Núli' cabí nunli' dul-la' isí loli' uládxí'li'-nu guiöj.

<sup>8</sup> Leyúbölö biyéchuë' Jesús, ruyúë' lu yu, en buguélé'ë ruzúajë' leyúbölö lu yu na'. <sup>9</sup> Cate' bila'yönnë' didza' ni, bulu'xösa ládxi'do'gaquië' légaquië', ate' bila'rúajë' tu tuë'. Gula'sí lógaquië' bönni' gúlarö ga bídxintë bönni' cuidí'. Nagá'anë' Jesús ni', dzáganu nigula na' Lë' gatsaj láhui'lö nupa na' tu'zé nágagaca Lë'. <sup>10</sup> Ní'irö buzuínë' Jesús leyúbölö, en cuntú nu bilé'enë' nu ruzegui lënu didza', pero túzinu nigula na', ate' rë'ë-nu:

—Nígúla, ¿gazxi nacua' nupa na' bulu'zegui li' didza'? ¿Naru' cabí zoa nu bönni' richúguië' quiu'?

<sup>11</sup> Lënu rnnanu:

—Cuntu nu caz, Xan.

Ní'irö Jesús rë'ë-nu:

—Lëzca' neda', biti' richuga' quiu'. Böaj lidxu', en bíti'rö gunu' dul-la'.

*Náquië' Jesús bení' quégaca bönachi yödzölió*

<sup>12</sup> Leyúbölö Jesús bë'lenë' bönachi didza', rnnë':

—Neda' naca' bení' quégaca bönachi yödzölió. Nu bönni' zá'lenë' neda', biti' të' ga naca chul-la que dul-la', pero tu bení' sóalen bönni' na' le ulufí lë' naca gata' yól-la' na'bán idú queë'.

<sup>13</sup> Ní'irö të' Lë' bönni' yudo' fariseo, ta'nnë':

—Li' runu' ba nalí que la' cuinsu'. Biti' naca lesaca' le runu' ba nalí. Nítisö naca.

<sup>14</sup> Bubi'ë didza' Jesús, rë' légaquië':

—Sal-la' runa' ba nalí que la' cuinsa', idútë li naca le runa' ba nalí, tu' nözda' ga birúaja', en ga tseja', pero libí'ili' biti' nözili' gazxi za'a, en caléga gazxi tseja'. <sup>15</sup> Libí'ili' ruchi'a rusöröli' ca nácagaca le taca yödzölió ni, pero neda', rácasö quia' cuntú nu bönni' ruchi'a rusöröa' queë'. <sup>16</sup> La'tu' uchi'a usöröa', ca nácatë uchi'a usöröa', tu' caléga néda'sö uchi'a usöröa', pero Xuza' nasöl-lë'ë neda' gunë' neda' tsözxön. <sup>17</sup> Lësca' caní lu xibá queë' Moisés nazúaj lu guichi le rnna: Le tunë' ba nalí chopë' bönni', idútë li naca. <sup>18</sup> Neda' runa' ba nalí que la' cuinsa', ate' Xuza' nasöl-lë'ë neda', runë' ca' ba nalí quia'.

<sup>19</sup> Ní'irö bönni' yudo' fariseo na' gula'nábinë' Lë', ta'nnë':

—¿Gazxi zóatsë' Xuzu'?

Bubi'ë didza' Jesús, rë' légaquië':

—Biti' núnbë'ëli' neda', en biti' núnbë'ëli'-në' Xuza'. La'tu' núnbë'ëli' neda', lësca' Xuza' gúnbë'ëli'-në'.

<sup>20</sup> Yugu' didza' ni bë'ë Jesús cate' ni' zoë' rusédinë' bönachi lu chila yudo', ga na' nacua' gu'ina gapa ta'gu'ë gun que yudo', pero cuntú nu guzxon Lë', tu' cabí ridxini dza queë' tsu'ë lu ná'agaquië'.

*Rnnë' Jesús: "Ga tseja' neda', biti' gaca guídali'"*

<sup>21</sup> Leyúbölö Jesús rë' légaquië', rnnë':

—Uzá'a yödzölió ni, ate' uguíjali' nu usólá libí'ili', pero ugá'ana dul-la' nabága'li', en gátili'. Ga tseja' neda', biti' gaca guídali'.

<sup>22</sup> Ní'irö gulu'ë didza' bönni' judío unná bë', ta'nnë':

—¿Naru' guti cuinë'? Rnnë': "Ga tseja' neda', libí'ili' biti' gaca guídali'."

<sup>23</sup> Jesús rë' légaquië':

—Libí'ili' nácali' que luyú dë cadxí'ilö ni, pero neda' za'a yehua' yubá xitsá'. Libí'ili' nácali' bönachi yödzölió ni, pero neda' biti' naca' bönni' yödzölió ni. <sup>24</sup> Que lë ni na' gudxa' libí'ili': Ugá'ana dul-la' nabága'li',



en gátili'. Channö cabí tséajlë'ëli' naca caza' Nu usölä, ugá'ana dul-la' nabága'li', en gátili'.

<sup>25</sup> Ní'irö gula'nábinë' Lë', ta'nnë':

—¿Nuzxi caz nacu'?

Jesús rë' légaquië':

—Naca' la' leze ca na' chigudxa' libí'ili' dza ni'te. <sup>26</sup> Zíán le ral-la' guía' libí'ili', en uchi'a usöröa' le naca queëli'. Didza' idútë li ru'ë Xuza' nasöl-lë'ë neda', ate' didza' riyönda' ru'ë Lë', ru'ilena' bönachi yödzülió ni.

<sup>27</sup> Biti' gula'yéajni'inë' ru'ilenë' légaquië' didza' ca naca queë' Dios Xuz.

<sup>28</sup> Que lë ni na' Jesús rë' légaquië':

—Cate' idxín dza uchísali' neda', Bönni' Guljë' Bönachi, gútili' neda', ní'irö guéquië'eli' naca caza' Nu rusölä, en bití' bi runa' rácasö quia', pero ca na' ruluí'inë' Xuza' neda', ca' ruá'a didza'. <sup>29</sup> Xuza' nasöl-lë'ë neda' zóalenë' neda'. Biti' nucá'anë' Xuza' neda' tuza', tu' rúntica'sa' le raza ládxë'ë Lë'.

<sup>30</sup> Cate' bë'ë Jesús didza' ni, bönni' zíán gula'yéajlë'ë Lë'.

*Nupa nácatë reá' libí'ili' Dios, en nupa nadzúngaca lu na' dul-la'*

<sup>31</sup> Ní'irö Jesús gudxë' yugu' bönni' judío na' ta'yéajlë'ë Lë', rnnë':

—Channö gúntica'sili' ca rnna xtídza'a, gácali' idú bönni' usëda quia'.

<sup>32</sup> Gúnbë'ëli' le naca idútë li, ate' le naca idútë li na' usölä libí'ili'.

<sup>33</sup> Bulu'bi'ë didza', të' Lë':

—Abraham naquië' xuz gudödi queëtu', en cuntú nu ben netu' bönni' nadó'ogaca. ¿Rnnatso': "Usölä libí'ili'?"

<sup>34</sup> Jesús rë' légaquië':

—Le nácatë reá' libí'ili': Yúgu'të nupa tun dul-la', nadzúngaca lu na' dul-la'. <sup>35</sup> Nu naca bönni' nadó'o bití' ugá'anatica'sö lidxë' xan yu'u, pero nu naca zxi'inë' xan yu'u na' rugá'anatica'sö lidxi nu na' naca xan yu'u.

<sup>36</sup> Caní naca, channö Nu na' naca Zxi'inë' Dios usölä libí'ili', le nácatë uláli'. <sup>37</sup> Nözda' naquië' Abraham xuz gudödi queëli', pero rizóa ribö'öli' gútili' neda', tu' cabí nazí' lu ná'ali' xtídza'a. <sup>38</sup> Neda' ruá'a didza' ca naca le bilé'eda' ga na' zoë' Xuza', pero libí'ili' runli' le biyönilí' ga zoa xuz quézili'.

<sup>39</sup> Bulu'bi'ë didza', të' Lë':

—Abraham náquië' xuztu'.

Ní'irö Jesús rë' légaquië':

—La'tu' nácali' idú zxi'ini xi'sóë' Abraham, gunli' ca na' benë' Abraham.

<sup>40</sup> Na'a, rizóa ribö'öli' gútili' neda', sal-la' ru'ilena' libí'ili' didza' idútë li, didza' na' biyönda' bë'ë Dios. Biti' benë' Abraham caní. <sup>41</sup> Libí'ili' runli' ca run xuz quézili'.

Ní'irö të' Lë':

—Netu' bití' ca' nácatu' bi'i lando'. Tuzë' Dios náquië' Xuztu'.

<sup>42</sup> Ní'irö Jesús rë' légaquië':

—La'tu' náquië' Dios idú Xúzili', huadxí'ili' neda', tu' birúaja' neda' ga zoë' Dios, en bida' luyú ni, ate' calëga rácasö quia' bida', pero Dios caz gusöl-lë'ë neda'. <sup>43</sup> ¿Bizx que bití' gaca tséajni'ili' didza' ruá'a? Naca tu' cabí rë'ënilí' uzë' nágali' xtídza'a. <sup>44</sup> Xuz quézili' naca tu' xihui'. Néquili' que tu' xihui', en rë'ënilí' gunli' le rizë'ladxi' xúzili' na'. Dza ni'te naca tu' xihui' nu guti bönachi, en cabí nazí' lu në'e le naca idútë li, tu' cabí ruí'i didza' idútë li. Cate' rizí' yë' tu' xihui', ca naca caz ruí'i didza', tu' naca nu rizí' yë', en naca ca xúzgaca caz nupa ta'zí' yë'. <sup>45</sup> Tu' ruá'a neda' didza' idútë li bití' réajlë'ëli' neda'. <sup>46</sup> ¿Núzxilöli' gaca usubága'li' neda' dul-la'? Channö ruá'a didza' idútë li, ¿bizx que bití' réajlë'ëli' neda'? <sup>47</sup> Nu naca queë' Dios,

ruzé nagui xtídzé'ë Dios, pero libí'ili', tu' cabí nácali' queë' Dios, bití' ruzé nágali' xtídzé'ë.

*Cristo zoa cazé' zí'atëlö ca Abraham*

<sup>48</sup> Ní'irö bulu'bi'ë didza' yugu' bönni' judío, të' Jesús:

—Catëz gunnatu' cate' gunnatu' nacu' bönni' Samaria, ate' dzaga tu' xihui' Li'.

<sup>49</sup> Bubi'ë didza' Jesús, rë' légaquië':

—Biti' dzaga tu' xihui' neda'. Neda' runa' Xuza' bal, ate' libí'ili' ruzóali' neda' tsölá'alö. <sup>50</sup> Biti' runa' zxön cuina'. Zoa Nu run zxön neda', ate' Lë' ruchi'a rusöröë' rë'u. <sup>51</sup> Le nácatë rea' libí'ili': Nu bönni' si' lu në'ë xtídzá'a, bití' ca' gátië' bönni' na'.

<sup>52</sup> Ní'irö yugu' bönni' judío na' të' Lë', ta'nnë':

—Na'a réquibe'etu' dzaga tu' xihui' Li'. Abraham gútië', ate' gulátië' ca' bönni' gulu'ë didza' uláz queë' Dios, pero Li' rnno': “Nu bönni' si' lu në'ë xtídzá'a, bití' ca' gátië' bönni' na'.” <sup>53</sup> ¿Naru' nácatërötso' Li' zxön ca xúziru' Abraham? Gútië' lë', ate' gulátië' ca' bönni' gulu'ë didza' uláz queë' Dios. ¿Nuzxi caz run cuinu'?

<sup>54</sup> Bubi'ë didza' Jesús, rë' légaquië':

—Channö neda' guna' zxön cuina', yöl-la' zxön na' bití' bi gaca. Xuza' runë' neda' zxön, ate' libí'ili' rnnali' náquië' Dios queë'li'. <sup>55</sup> Libí'ili' bití' núnbë'ëli'-në' Dios Xuz, pero neda' núnbë'a-në'. La'tu' innía': Bití' núnbë'a-në', gaca' nu rizi' yë' ca na' nácali' libí'ili', rizi' yë'ëli'. Na'a, le nácatë núnbë'a-në', en nazí' lu na'a xtídzé'ë. <sup>56</sup> Xúzili' Abraham budzéjanë' tu' ral-la' ilé'enë' dza soa' yödzölió ni, en sal-la' gútië' dza ni'te, bilé'enë' le, en budzéjade'enë'.

<sup>57</sup> Ní'irö yugu' bönni' judío na' të' Jesús, ta'nnë':

—Bití' yuí'inu' chi-un iz. ¿Naru' bilé'etsenu' Abraham?

<sup>58</sup> Jesús rë' légaquië':

—Le nácatë rea' libí'ili': Zí'atëlö ca soë' Abraham, neda' zoa caza'.

<sup>59</sup> Ní'irö gula'gué'ë guiój para ulu'ladxë' Jesús, pero Lë' bunítitë cuinë', en burúajë' lö'a yudo' na'. Gudödë' gatsaj láhúi'lö ga na' nacu'ë, ate' söhuójë'.

## 9

*Ruünë' Jesús tu bönni' guljë' nachúl-latë lahuë'*

<sup>1</sup> Cate' gudödë' Jesús tu lataj, bilé'enë' tu bönni' ni' guljë' nachúl-latë lahuë'. <sup>2</sup> Gula'nábinë' Jesús bönni' usëda queë', ta'nnë':

—Bönni' Usedi, ¿nuzxi ben dul-la'? ¿Naru' bönni' ni o xuz xinë'ë tu' guljë' nachúl-latë lahuë'?

<sup>3</sup> Bubi'ë didza' Jesús, rë' légaquië':

—Biti' naca tu' benë' dul-la' bönni' ni, en calëga tu' gulunë' dul-la' xuz xinë'ë, pero naca para ilá' lahui yöl-la' huáca queë' Dios ni'a queë' bönni' ni. <sup>4</sup> Run bayudxi gunru' xichinë' Xuza' nasól-lë'ë neda', tsanni ni naca ca lahui' dza. Huadxín dza gaca chul-la que yöl-la' guti, cate' cuntu nu gaca gun dxin. <sup>5</sup> Tsanni ni zoa' yödzölió ni, naca' bení' quégaca bönachi yödzölió.

<sup>6</sup> Cate' Jesús budxi bë'ë didza' ni, gurú'unë' zxöna' lu yu, en benë' gúna'do' len zxöna' na', ate' bugu'ë guna' na' guiój lahuë' bönni' na' nachul-la lahuë'. <sup>7</sup> Ní'irö rë' lë':

—Guyéaj yöjtibi lo' lu beaj nisa nazí'i le Siloé.

Siloé naca tu didza' hebreo le rnna: Nasöl-la'.

Ní'irö bönni' na' nachul-la lahuë' guyijë' ni', yöjtibi lahuë'. Cate' buzë'ë ni' chirilé'enë'. <sup>8</sup> Ní'irö bulu'bani bönachi dzaga yu'u queë', en nupa ni' bila'l'é le' zí'atëlö cate' ni' nachul-la lahuë', ta'nná:

—¿Naru' caléga bönni' ni bönni' na' ribö'ë rinabë' nu bi unödzej queë'?

<sup>9</sup> Bal-lë' ta'nnë':

—Lë' na'.

Ja'bal-lë' ta'nnë':

—Caléga lë', pero ca rna' lahuë' bönni' na', rna' lahuë' ca' bönni' ni.

Lë' rnnë':

—Neda' na'.

<sup>10</sup> Ní'irö gula'nábinë' lë', ta'nnë':

—¿Nacxi caz guca, gualaj guiöj lo'?

<sup>11</sup> Bubi'ë didza', rë' légaquië':

—Bönni' na' lë' Jesús benë' gúna'do', ate' gudëbë' gúna'do' na' guiöj lahua', en gudxë' neda': “Guyéaj ra' beaj nisa nazí'i le Siloé, yöjtibi lo'.” Guyija' ni', yöjtibi lahua', ate' gualajjtë' guiöj lahua'.

<sup>12</sup> Ní'irö gula'nábinë' lë', ta'nnë':

—¿Gazxi zoë' bönni' na'?

Lë' rë' légaquië':

—Biti' nözda'.

*Yugu' bönni' yudo' ta'náb yúdxinë' bönni' na' gualaj guiöj lahuë'*

<sup>13</sup> Ní'irö gula'chë'ë bönni' na' zí'alö nachul-la lahuë', en bulu'sudxinë' lë' lógaquië' bönni' yudo' fariseo. <sup>14</sup> Tu' naca dza lá'ayi quégaquië' cate' benë' Jesús gúna'do' na', en gusaljë' guiöj lahuë' bönni' na' zí'alö nachul-la lahuë', <sup>15</sup> que lë' ni na' yugu' bönni' yudo' fariseo na' gula'nábinë' lë' leyúbölö nacxi guca gualaj guiöj lahuë'. Lë' gudxë' légaquië':

—Budxíë' gúna'do' guiöj lahua', ate' yöjtiba' le, en rilé'eda'.

<sup>16</sup> Ní'irö gulu'ë didza' bal-lë' bönni' yudo' fariseo na', ta'nnë':

—Biti' nasöl-lë' Dios bönni' na', tu' cabí rapa chi'ë dza lá'ayi.

Ja'bal-lë' ta'nnë':

—¿Naru' huácatsö tu bönni' dul-la' gunë' yugu' yöl-la' huáca runë' bönni' na'?

Caní guca, bila'rúajë' choplö. <sup>17</sup> Leyúbölö gula'nábinë' bönni' na' zí'alö nachul-la lahuë', ta'nnë':

—¿Bizxi ranno' lí' queë' bönni' na', gusaljë' guiöj lo'?

Lë' rnnë':

—Náquië' bönni' ru'ë didza' uláz queë' Dios.

<sup>18</sup> Biti' gula'yéajlë'ë bönni' judío unná bë' na' guljë' nachúl-latë lahuë' bönni' na', en gualaj guiöj lahuë', cate' bulu'lídzarë' xuz xinë'ë bönni' na' gualaj guiöj lahuë', <sup>19</sup> ate' gula'nábinë' légaquië', ta'nnë':

—¿Naru' náquië' bönni' ni zxf'inili', rnnali' guljë' nachúl-latë lahuë'? ¿Nacxi caz naca rilé'enë' na'a?

<sup>20</sup> Bulu'bi'ë didza' xuz xinë'ë na', të' légaquië':

—Nözitu' bönni' ni náquië' zxf'initu', en guljë' nachúl-latë lahuë', <sup>21</sup> pero nacxi guca, rilé'enë' na'a, bití' nöztu', en nuzxi na' gusalaj guiöj lahuë', bití' nöztu'. Gul'nabi-në' lë', tu' chináquië' bönni' chinaca. Lë' cazë' quíxjö'ë.

<sup>22</sup> Caní gula'nnë' xuz xinë'ë bönni' na' zí'alö nachul-la lahuë', tu' tádxinë' yugu' bönni' judío unná bë', tu' chigulún xtídza'gaquië' bönni' judío na' channö nu bönni' si' lu në'ë Jesús náquië' Cristo, tsaz ulu'béajë' bönni' na'

lu yu'u ga tu'dubë bönni' judío, en tu'sedë' queë' Dios. <sup>23</sup> Que lë ni na' gula'nnë' xuz xinë'ë: "Guli'nabi-në' lë', tu' chináquië' bönni' china." "

<sup>24</sup> Ní'irö yugu' bönni' judío unná bë' bulu'lidzë' leyúbölö bönni' na' zí'alö nachul-la lahuë', ate' të' lë':

—Ní'a queë' Xanru' Dios gudixjö' le nácatë. Netu' réquibe'etu' bönni' na' náquië' bönni' dul-la'.

<sup>25</sup> Ní'irö bubi'ë didza', rnnë':

—Channö náquië' bönni' dul-la' biti' nözda'. Tu le nözda'. Zí'alö nachul-la lahua', ate' na' a rilé'eda'.

<sup>26</sup> Gula'nábinë' lë' leyúbölö, ta'nnë':

—¿Bizxi benë' quiu'? ¿Nacxi benë' gusaljë' guiöj lo'?

<sup>27</sup> Bubi'ë didza', rë' légaquië':

—Chigúdxí caza' libí'ili', pero biti' gú'unili' si' lu ná'ali' xtídza'a. ¿Bizx que na' rë'ënili' yónili' leyúbölö? ¿Naru' rë'ënili' tá'ali' ca' Lë'?

<sup>28</sup> Ní'irö bulu'lidza zi'ë lë', ta'nnë':

—Li' do'o Lë', pero netu' dá'atu' Moisés. <sup>29</sup> Netu' nöztu' Dios bë'lenë' Moisés didza', pero ca naca queë' bönni' ni, biti' nöztu' nuzxi caz gusöl-la' Lë'.

<sup>30</sup> Ní'irö bubi'ë didza' bönni' na', rë' légaquië':

—Lë' ni run ga rubánida'. Libí'ili' biti' nözili' nuzxi gusöl-la' bönni' ni, ate' Lë' gusaljë' guiöj lahua'. <sup>31</sup> Nöziru' biti' riyönnë' Dios yugu' bönni' dul-la', pero channö reaj ládxë'ë tu bönni' Dios, en runë' ca rë'ënë' Lë', Dios riyönnë' bönni' ni. <sup>32</sup> Dza ni'te biti' riyön nu gunná channö nu bönni' gusaljë' guiöj lahuë' tu bönni' guljë' nachúl-latë lahuë'. <sup>33</sup> La'tu' cabí náquië' bönni' ni queë' Dios, biti' bi gaca gunë'.

<sup>34</sup> Ní'irö bulu'bi'ë didza', të' lë':

—Ca gulju' naca bë' nabágu'u dul-la'. ¿Naru' li' ruséditsenu' netu'? Ní'irö bulu'béajë' lë' ní'ilö.

#### *Nupa náca gaca chul-la niti*

<sup>35</sup> Biyönnë' Jesús ca gulunë' bönni' judío unná bë', bulu'béajë' bönni' na' zí'alö nachul-la lahuë'. Cate' budzáguë' lë', gudxë' lë':

—¿Ba réajlë'u Zxí'inë' Dios?

<sup>36</sup> Bubi'ë didza' lë', rë' Jesús:

—¿Nuzxi na', Xan, para tséajlë'a Lë'?

<sup>37</sup> Jesús rë' lë':

—Chibilé'enu' Lë', ate' neda' ni ru'ílena' li' didza', naca' Zxí'inë' Dios.

<sup>38</sup> Ní'irö bönni' na', gualaj guiöj lahuë', guyéaj ládxë'ë Jesús, en rë' Lë':

—Xan, réajlë'a Li'.

<sup>39</sup> Jesús rnnë':

—Para uchi'a usöröa' bönachi bida' yödzülió ni, para ulu'lé'e nupa nachul-la nanítigaca, en ilaca ca nu nachul-la lahuí nupa téquiguequi ta'lé'e.

<sup>40</sup> Cate' yugu' bönni' yudo' fariseo na' nacua'lenë' Jesús bila'yönnë' didza' ni, ní'irö të' Lë':

—¿Naru' nachul-la nanítitsatu'?

<sup>41</sup> Bubi'ë didza' Jesús, rë' légaquië':

—La'náru' nachúl-lasö guiöj lolí', biti' ibága'li' dul-la'. Na'a rnnali': "Rilé'etu'." Que lë' ni na' nabága'li' dul-la'.

## 10

*Rucudzu'ë didza' Jesús que lë'a quégacaba' bö'cu' zxila'*

<sup>1</sup> Gunnë' ca' Jesús:

—Le nácatë rea' libí'ili': Nu bönni' biti' razië' saca' ga nu riyaza lë'a quégacaba' bö'cu' zxila', pero tsázië' saca' ga yúbölö, bönni' ni náquië' gubán, en ribán cazë'. <sup>2</sup> Nu bönni' razië' saca' ga nu riyaza náquië' bönni' run chi'i cazë' bö'cu' zxila' na'. <sup>3</sup> Para tsázië' bönni' ni, risalaj nu zoa run chi'i ga nu riyaza, ate' ta'yóniba' bö'cu' zxila' na' chi'ë, en tu'únbë'ëba'në'. Lë' rulidzë'-ba' que queëba' ca légacaba', en rubéajë' yugu' bö'cu' zxila' na'. <sup>4</sup> Cate' chinubéajë'-ba' yúgu'tëba' bö'cu' zxila' néquigacaba' queë', röjnöruë' lógacaba', ate' bö'cu' zxila' na' röjnógacaba' lë', tu' tu'únbë'ëba' chi'ë. <sup>5</sup> Bönni' yúbölö biti' tsöjnógacaba' lë', pero ulu'zxúnnajba' queë', tu' cabí núbë'gacaba' chí'igaquië' bönni' yúbölö.

<sup>6</sup> Le rucudzu' didza' ni gudxë' Jesús légaquië', pero biti' gula'yéajni'inë' lë na' rë' légaquië'.

*Náquië' Jesús ca bönni' rapa chi'ë-ba' bö'cu' zxila'*

<sup>7</sup> Ní'irö Jesús rë' légaquië' leyúbölö, rnnë':

—Le nácatë rea' libí'ili': Neda' naca' ca tu ga ta'yázaba' bö'cu' zxila'. <sup>8</sup> Chigula'lë'ë zían bönni' gula'nnë' nácaquië' Cristo, pero yúgu'të bönni' na' bila'dxinë' zí'aló ca neda', nácaquië' gubán, en ta'bán cazë', ate' biti' bulu'zë' nágaba' bö'cu' zxila' na' légaquië'. <sup>9</sup> Neda' naca' ca tu ga nu riyaza. Núti'tës bönni' tsázalenë' neda', ulë' bönni' na', en gáquië' ca tuba' bö'cu' zxila' rázaba', en rurúajba', en ridzöliba' le ráguba'.

<sup>10</sup> 'Za'zë' bönni' gubán para cuanë'-ba', en gútië'-ba', en usunitië'-ba'. Neda' bida' para gata' yöl-la' na' bán idú quégaca bönachi náca'gaca ca bö'cu' zxila' quia'. Le nácatë gata' quégaquië' yöl-la' na' bán idú na'. <sup>11</sup> Neda' run chí'igaca' bönachi quia' ca runë' bönni' na', lu yöl-la' dxi'i ladxi' queë' rapa chi'ë yugu' bö'cu' zxila'. Bönni' na' rapa chi'ë-ba' bö'cu' zxila' caní zoa cazë' udödë' yöl-la' na' bán queë' ni'a quégacaba' bö'cu' zxila' queë'. <sup>12</sup> Tu bönni' nazxjë' rapa chi'ë-ba' bö'cu' zxila', cate' rilé'enë' zá'aba' bö'cu' gu'á sínia', rucá'anë'-ba' bö'cu' zxila' na', en ruzxúnnajë', ate' bö'cu' gu'á sínia' na' ráguya'aba' yugu' bö'cu' zxila' na', en rusilásiba' légacaba'. Caní runë' bönni' na' rapa chi'ë-ba' bö'cu' zxila' tu' cabí náquië' idú nu run chi'i-ba' bö'cu' zxila', ate' biti' néquigacaba' que cazë' bö'cu' zxila' na'. <sup>13</sup> Ruzxúnnajë' bönni' nazxjë' na' tu' rapa chi'ë-ba' bö'cu' zxila' na' para sí'së' dumí, en biti' ruí'i ládxe'ë-ba' bö'cu' zxila' na'.

<sup>14-15</sup> 'Neda' naca' bönni', lu yöl-la' dxi'i ladxi' quia' run chí'igaca'-ba' bö'cu' zxila'. Ca na' núbë'ë Xuza' neda', ate' neda' núbë'a-në' Xuza', lësca' caní núbë'egacada' bönachi quia' náca'gaca ca bö'cu' zxila' quia', en rudöda' yöl-la' na' bán quia' ni'a quégacaba' bö'cu' zxila' na', ate' bö'cu' zxila' na' néquiguequiba' quia' núbë'gacaba' neda'. <sup>16</sup> Lësca' nacuá'aba' ia'zica'röba' bö'cu' zxila' quia' biti' nabábagacaba' ni. Lësca' légacaba' ralla' tsöjxígaca'-ba'. Léga'gaca' ulu'zë' nágaba' chi'a, en ilácaba' tuz len ia'zica'röba' bö'cu' zxila' quia', ate' neda' caz gun chí'igaca'-ba'.

<sup>17</sup> 'Que lë ni na' nadxi'inë' Xuza' neda', tu' rudöda' yöl-la' na' bán quia', gu'a lataj nu guti neda', ate' uzi'a le leyúbölö, ubana' lu yöl-la' guti. <sup>18</sup> Cuntu nu bönni' séqui'në' gútië' neda', pero neda' rudödi caza' yöl-la' na' bán quia', gátia'. Dë lu na'a udöda' le, en dë lu na'a uzi'a le leyúbölö. Caní naca le gunná bé'enë' Xuza' neda'.

19 Cate' yugu' bönni' judío bila'yönnë' didza' ni, leyúbölö bila'ruájë' choplö ca téquinë' queë'. 20 Ziánë' ta'nnë':

—Yu'u bö' xihui' Lë', en nachixi icjë'. ¿Bizx que ruzë nágali' Lë'?

21 Ia'bal-lë' ta'nnë':

—Biti' ca' ru'ë caní didza' bönni' yu'u bö' xihui' lë'. ¿Naru' huácatsö bö' xihui' usalaj guió'j lógaquië' bönni' nachul-la lógaquië'?

*Yugu' bönni' judío unná bë' tu'zöë' Jesús tsólá'alö*

22 Raca beo' ziaga, en naca dza na' tunë' laní yödzö Jerusalén, tu'subanë' ca gula'gu'ë yudo' quégaquië' lu në'ë Dios. 23 Ridë' Jesús ra' yudo' ga naca chila que, nazí'i le Chila Queë' Salomón. 24 Yugu' bönni' judío unná bë' gula'gu'ë Jesús lë'alö, en të' Lë':

—¿Bátaxi caz usanu' runu' ga rö'ötu' böniga? Channö nacu' li' Cristo, ca nácatë gudíxjö'i' netu'.

25 Jesús rë' légaquië':

—Chigudxi caza' libí'ili', pero bití' réajlë'ëli' neda'. Yugu' dxin runa' tu' dë lu na'a uláz queë' Xuza' nácacaga bë' Nu naca'. 26 Libí'ili' bití' réajlë'ëli' neda', tu' cabí nabábalenli' nupa nácacaga bö'cu' zxila' quia', ca na' chigudxi caza' libí'ili'. 27 Ta'yöniba' bö'cu' zxila' quia' chí'a, en tu'únbe'eba' neda', ate' neda' núnbe'egacada'-ba', ate' ridijácalenba' neda'. 28 Neda' runöd'zja' yöl-la' na'bán idú quégacaba', ate' bití' ca' ila'nítiba', ate' cuntú nu sequí' ubéaj léga'caba' lu na'a neda'. 29 Xuza' Dios bennë' quia' léga'caba', ate' Lë' nápatërë' yöl-la' huáca ca yúgu'të bönachi, ate' cuntú nu sequí' ubéaj léga'caba' lu në'ë Xuza'. 30 Neda', en Dios Xuz, tuz nácatu'.

31 Leyúbölö yugu' bönni' judío unná bë' na' bulu'guélë'ë guió'j ulu'ladxë' Jesús. 32 Jesús rë' légaquië':

—Zian le naca dxi'a bena' loli' tu' dë lu na'a uláz queë' Xuza'. ¿Ni'a que bízxilö dxin dxi'a ni uládxí'li' neda' guió'j?

33 Bulu'bi'ë didza' bönni' judío unná bë' na', të' Lë':

—Ni'a que dxin dxi'a bití' uládxí'tu' li' guió'j, pero tu' cabí rnnío' dxi'a queë' Dios, tu' nacu' li' bönáchisö, en run cuinu' Dios.

34 Bubi'ë didza' Jesús, rë' légaquië':

—¿Naru' cabí nazúaj lu guichi lu xibá queëli' ca gunné' Dios, rna: “Neda' rnnía': Nácali' yugu' dios”? 35 Nöz quéziru' le nazúaj lu guichi lá'ayi nazúaj tsaz. Lu guichi lá'ayi na' ruí'i lágauquië' dios, bönni' ni' Dios bé'lenë' légaquië' didza'. 36 Dios bubéajë' neda' quez queë', en gusöl-lë'ë neda' yödzölió ni. ¿Naru' rnnátsali' quia': “Li' bití' rnnío' dxi'a queë' Dios”, tu' gunnía': Zxí'inë' Dios naca”? 37 Channö cabí runa' dxin budödë' Xuza' Dios lu na'a, bití' ral-la' tséajlë'ëli' neda'. 38 Channö runa' dxin budödë' Dios lu na'a, sal-la' bití' réajlë'ëli' neda' caz, guli'tséajlë' le nácacaga bë' dxin na' runa', para guéquibe'eli' náquië' Dios Xuz tuz len neda', ate' neda' ca' naca' tuz len Xuza'.

39 Leyúbölö gula'zóa gula'bö'ë ila'zönë' Jesús, pero Lë' bulë' lu ná'agaquië'.

40 Ní'irö guyijë' Jesús leyúbölö ia'tsólá'a yegu Jordán, ga ni' buquilé' Juan bönachi nisa zí'atëlö, ate' bugá'anë' Jesús ni'. 41 Bila'dxín bönachi zían ga zoë' Jesús, ta'nná:

—Le nácatë bití' benë' Juan nitú yöl-la' huáca zxon, pero yúgu'të le gunné' Juan na' ca ral-la' gaca queë' bönni' ni, idútë li zeaj naca.

42 Que lë ni na' gula'yéajlë'ë bönni' zían Jesús ga na' zoë'.

## 11

*Le guca cate' gútië' Lázaro*

<sup>1</sup> Dza ni' ré'enë' Lázaro, bönni' Betania, le naca ládzagacanu María, en Marta. Nácanu Marta na' zxílanu María na'. <sup>2</sup> Nácanu María na' nigula zanë' Lázaro, bönni' na' ré'enë', en nácanu ca' nigula na' gulú'unu le rilá' zxixi ni'ë Xanru', en buzxinu ni'ë len guitsa' ícjanu. <sup>3</sup> Gula'sól-la'nu nigula zanë' Lázaro na' nu yójödx Jesús, gunná:

—Xan, buyútsöca', ré'enë' Lázaro, bönni' na' nadxí'inu'-në'.

<sup>4</sup> Cate' biyönnë' Jesús didza' ni, gudxë' nupa nacua' ni', rnnë':

—Yödzhüë' ni biti' naca le guti lë' tsaz, pero naca para ilá' lahui yöl-la' zxön queë' Dios, ate' ni'a que yödzhüë' ni ilá' lahui ca' yöl-la' zxön quia' neda', Zxí'inë' Dios.

<sup>5</sup> Jesús nadxí'inë' Marta, en nigula zxílanu Marta na', en Lázaro na'. <sup>6</sup> Sal-la' nadxí'inë' Jesús légaquië', cate' biyönnë' ré'enë' Lázaro, bugá'anë' ga na' zoë' ia'chopa dza ca'. <sup>7</sup> Cate' bizá'a chopa dza na', Jesús gudxë' yugu' bönni' usëda queë', rnnë':

—Uyéajru' leyúbölö luyú Judea.

<sup>8</sup> Ní'irö yugu' bönni' usëda queë' të' Lë', ta'nnë':

—Bönni' Usedi, si' gula'zóa gula'bö'ë bönni' judío unná bë' ni' ulu'ladxë' Li' guiöj. ¿Naru' uyéajtso' leyúbölö ni'?

<sup>9</sup> Bubi'ë didza' Jesús, rë' légaquië':

—Nacua' caz chinnu hora lahui' dza. Nu bönni' ridë' lahui' dza, biti' tsöjchégu'ë, tu' rilé'enë', tu' zóalen lë' bení' zoa yödzhüé ni. <sup>10</sup> Channö ridë' bönni' na' chí'i dzö'ölö, røjchégu'ë, tu' cabí zóalen bení' lë'.

<sup>11</sup> Cate' budxi bë'ë Jesús didza' ni, ní'irö gudxë' légaquië':

—Rásië' Lázaro, böchi' luzá'aru', ate' tseja' neda', en usubana'-në'.

<sup>12</sup> Ní'irö yugu' bönni' usëda queë' të' Lë', ta'nnë':

—Xan, channö rásië', huóáquië'.

<sup>13</sup> Gunnë' caní Jesús tu' chigútië' Lázaro, pero légaquië' téquinë' gunnë': Rásisë' Lázaro. <sup>14</sup> Ní'irö Jesús gudxë' légaquië' yálajdo', gunnë':

—Chigútië' Lázaro. <sup>15</sup> Rudzëjada' tu' cabí zoa' ni', tu' gaca na'a tu le uzí'ili' xibé, le gun ga tséajlë'ëli' neda'. Uyéajru' na'a ga na' dé' Lázaro.

<sup>16</sup> Ní'irö Tomás, bönni' na' tu'ë lë', Bönni' Bilidi' gudxë' ia'zíca'rë' bönni' usëda queë' Jesús, rnnë':

—Uyéajru' ca' rë'u, en gátilenru'-në'.

*Náquië' Jesús Nu rusbán nupa chinátigaca, enca' Nu nabániru'*

<sup>17-19</sup> Dë yödzhü Betania gála'sö ga dë Jerusalén na', le naca ca rizá'aru' tu hórátëz. Que lë ni na' chibila'dxinë' zían bönni' judío ga na' nacua'anu Marta, en María, en tu'huë tsáhuë'ë légaicanu tu' gútië' bönni' zángacanu. Cate' Jesús bidxinë' ni', biyönnë' chiguca tapa dza yu'ë Lázaro na' yeru ba. <sup>20</sup> Cate' biyönninu Marta didza' zë'ë Jesús, ní'irö birúajnu yu'u, yöjtságanu Lë', pero María bugá'ananu yu'u na'. <sup>21</sup> Marta na' rënu Jesús:

—Xan, la'tu' zu' ni, biti' gátie' bönni' zana'. <sup>22</sup> Lë'sca' na'a, nözda' yúgu'të le inábinu' Dios, Lë' gunnë' quiu'.

<sup>23</sup> Jesús rë'ë-nu:

—Ubanë' bönni' zanu'.

<sup>24</sup> Marta rënu Lë':

—Nözda' ubanë' cate' idxín dza údxi cate' ulu'bán nupa chinátigaca.

<sup>25</sup> Ní'irö Jesús rë'ë-nu:

—Naca caza' neda' Nu rusubán nupa chinátigaca, enca' Nu nabánigaca bönachi. Nu tséajlë' neda', sal-la' gati nu na', ubán caz, <sup>26</sup> ate' yúgu'të bönni' nabánagaquië', en ta'yéajlë'ë neda', biti' ca' ilátië' tsaz. ¿Réajlë'u lë ni?

<sup>27</sup> Marta rënu Lë':

—Ön, Xan. Réajlë'a nacu' Li' Cristo, Zxí'inë' Dios, Bönni' na' guzxi' lu në'ë Dios isöl-lë'ë yödzölió ni.

*Ribödxë' Jesús tu' ruí'i ládxë'ë nigula zanë' Lázaro*

<sup>28</sup> Cate' budxi bé'ënu Marta na' didza' ni, böajnu yu'u, yöjlídzanu María, zxílanu, ate' bagáchi'sö rënu lënu:

—Bönni' Usedi zoë' ni, rulidzë' li'.

<sup>29</sup> Cate' biyönninu María didza' ni, la' guyástënu, zéajnu ga na' zoë' Jesús.

<sup>30</sup> Biti' rázinë' Jesús la' yödzödo' na', pero zóasë' ga na' yöjtságanu Marta Lë'.

<sup>31</sup> Cate' yugu' bönni' judío na' nacuá'lenë' María na', en tu'huë tsáhuë'ë-nu bila'lé'enë'-nu guyásanu, en birúajnu carelö ga naca lu yu'u, ní'irö yöjnéhoaquië'-nu, ta'nnë':

—Uyéajnu ra' yeru ba tsöjchödxinu ni'.

<sup>32</sup> Ní'irö bidxinnu María ga na' zoë' Jesús. Cate' bilé'enu Lë', biyéchunu xini'ë, en rënu Lë':

—Xan, la'tu' zu' ni, biti' gátië' bönni' zana'.

<sup>33</sup> Cate' bilé'enë' Jesús ribödxinu, en ta'bödxë' ca' bönni' judío na' dzágagaquië'-nu, ní'irö buf'innë', en gunnëda' ládxë'ë. <sup>34</sup> Rnnë':

—¿Gazxi bucáchi'li'-në'?

Të' Lë':

—Gudá uyú'.

<sup>35</sup> Gurödxë' Jesús. <sup>36</sup> Ní'irö gula'nnë' bönni' judío na', ta'nnë':

—Buli'yútsöca' ca nadxí'ide'enë' lë'.

<sup>37</sup> Bal-lë' ta'nnë':

—Bönni' ni benë' ga rilé'enë' bönni' na' zí'alö nachul-la lahuë'. ¿Naru' cabí gúcatsö gunë' ga biti' gátië' Lázaro?

*Rubanë' Lázaro lu yöl-la' guti*

<sup>38</sup> Leyúbölö gunnëda' ládxë'ë Jesús, ate' bidxinë' ra' yeru ba na'. Ba na' naca tu yeru nadaj lë'e guí'a guiöj, ate' da' tu guiöjta'a le nusayaj ga nu riyaza le. <sup>39</sup> Jesús gudxë' nupa nacuá' ni', rnnë':

—Gulí'cúa guiöj ni.

Ní'irö Marta, nigula zanë' bönni' nati na', rënu Lë':

—Xan, chirilë'ë siguti tu' chiguca tapa dza nátië'.

<sup>40</sup> Jesús rë'ë-nu:

—¿Naru' cabí chigudxi caza' li' channö réajlë'u, hualé'enu' yöl-la' zxön queë' Dios?

<sup>41</sup> Ní'irö gula'gúë' guiöjta'a na' nusayaj ga nu riyaza yeru ba ga na' yu'ë bönni' nati na'. Buyúë' Jesús zaca' lúzxibalö, rnnë':

—Xuza', rea' Li', xclenu' tu' riyönnu' neda'. <sup>42</sup> Neda' nözda' riyöntiqui'sinu' neda', pero ruá'a didza' ni para ulu'zí' xibé bönachi zían ni, en ila'yéajlë' Li' na' nasöl-lu'u neda'.

<sup>43</sup> Cate' budxi bé'ë Jesús didza' ni, zidzaj bulidzë', rnnë':

—Lázaro, burúaj nilö.

<sup>44</sup> Burúajë' bönni' na' gúquië' bönni' nati lu yeru ba, naröligacarö ni'a në'ë yugu' lári'do', en nagachi' ca' lahuë' ia'tú lári'do'. Ní'irö Jesús rë' légaquië':

—Buli'lí lari' na' naröli ni'a në'ë, en guli'gu'ë lataj së'ë.



*Tun xtídžë'ë yugu' bönni' judío unná bë' ilútië' Jesús*

*(Mt. 26:1-5; Mr. 14:1-2; Lc. 22:1-2)*

<sup>45</sup> Ní'irö zían bönni' judío na' gula'yéajlë'ë Jesús, bönni' na' yójácalenë' tsözxön María, en bila'lé'enë' lë na' benë' Lë'. <sup>46</sup> Bal-lë' yójáquië' ga nacu'ë bönni' yudo' fariseo, en bulu'siyönnë' légaquië' ca na' benë' Jesús. <sup>47</sup> Ní'irö bönni' yudo' fariseo na' bulu'dúbilenë' tsözxön bönni' yudo' tu'chi'a tu'söröë', en yugu' bixúz unná bë', ta'nnë':

—¿Nacxi caz gunru'? Runë' bönni' ni zían yöl-la' huáca zxön. <sup>48</sup> Channö gü'isiru'-në' lataj gunë' ca ni run cazë', ila'yéajlë' yúgu'të bönachi Lë', ate' idijáquië' bönni' Roma ni, duquínnaajgaquië' yudo' lá'ayi queëru', en yödžö queëru'.

<sup>49</sup> Ní'irö bë'ë didza' Caifás, bixúz lo iz na', en dzáguië' légaquië', rë' légaquië':

—Libí'ili' biti' bi nözili', <sup>50</sup> en biti' réquibe'eli' run bayudxi gátië' tuë' bönni' ni'a quégaca bönachi, para cabí initi idú yödžö.

<sup>51</sup> Calëga rácasö queë' bë'ë didza' ni, pero tu' náquië' bixúz lo iz na', que lë ni na' bë'ë didza' uláz queë' Dios ca ral-la' gátië' Jesús ni'a quégaca bönachi yödžö na'. <sup>52</sup> Gátië' Jesús, calëgasö ni'a que yödžö na', pero gátië' ca' para utubë' yugu' xzí'inë' Dios násilasigaquië', para ilácagaquië' tuz. <sup>53</sup> Caní guca, la' dza ná'asö gulún xtídza'gaquië' ilútië' Jesús. <sup>54</sup> Que lë ni na' bíti'rö gudë' Jesús yálajdo' gapa nacuá' bönachi judío, pero buzë'ë ni', sa'yéajë' tu lataj gala' ga naca lataj cá'asö, ate' bidxinë' yödžö Efraín, ga ni' bugá'anë', ate' dzágaquië' bönni' usëda queë' Lë'.

<sup>55</sup> Dza na' chizá' gala' Laní Pascua quegaquië' bönni' judío cate' tu'subanë' ca benë' Dios, bubéajë' bönachi queë' luyú Egipto. Bila'rúaj bönachi zían yugu' yödžö ni', ate' gula'benë', sójáquië' Jerusalén cate' si' idxín laní na' para tsöjpá'a cuíngaquië' ca naca que yudo'. <sup>56</sup> Yugu' bönni' na' nacu'ë Jerusalén tu'guiljë' Jesús, en cate' ni' nacu'ë chila yudo', gula'nabi luzá'agaquië' tuë' ia'túë', ta'nnë':

—¿Bizxi rusáca'li'? ¿Huífatsë' laní, o biti' guídë'?

<sup>57</sup> Chigula'nná bë'ë yugu' bixúz unná bë', en yugu' bönni' yudo' fariseo channö nu nözi ga zoë' Jesús, ral-la' ududíxjö'i'i légaquië' para gaca tsöjxónggaquië' Lë'.

## 12

*María rigú'unu le rilá' zxixi ni'ë Jesús*

*(Mt. 26:6-13; Mr. 14:3-9)*

<sup>1</sup> Cate' ni' nagá'anagaca ia'xopa dza cate' idxín Laní Pascua cate' tu'subanë' bönni' judío ca benë' Dios, bubéajë' bönachi queë' luyú Egipto, ní'irö bidxinë' Jesús lu yödžö Betania, ga na' zoë' Lázaro, bönni' na' gútië', en hubanë' lu yöl-la' guti. <sup>2</sup> Gula'gu'ë tu güf'i huagu ni' le gahuë' Jesús. Gulú'unu María le ilahuë', ate' nütse'ë Lázaro ladaj bönni' rő'ölenagaquië' Jesús ga na' tahuë'. <sup>3</sup> Ní'irö gudéla'nu María ca tu guíë le rilá' zxixi que yøj susén lasi idú, le nazáca'da', en gulú'unu le ni'ë Jesús. Buzxinu ni'ë len guitsa' ícjanu. Idütë lu yu'u na' guzé bö' zxixi. <sup>4</sup> Ní'irö bë'ë didza' tu bönni' usëda queë' Jesús, lë' Judas Iscariote, xzí'inë' tu bönni' lë' Simón, en náquië' bönni' na' udöë' Jesús lu ná'agaquië' yugu' bönni' yudo', rnnë':

<sup>5</sup> —¿Bizx que biti' gudó'o le rilá' zxixi na', le nazaca' lászjaru' que tu iz, ate' huáca nu quisi dumí na' quégaca bönachi yechi'?

<sup>6</sup> Gunnë' caní, calëga tu' ruí'i ládxë'ë bönachi yechi', pero tu' náquië' gubán, en lë cazë' nu'ë buzudi dumí queégaquië', en rubéajlanë' dumí na' tu'chejë' lu buzudi na'. <sup>7</sup> Ní'irö Jesús rë' lë':

—Bë'ë-nu lataj, tu' naca lë ni bennu tu le nabá'a para dza igácha'a. <sup>8</sup> Yugu' bönachi yechi' ila'cuá'lentica'sö libí'ili', pero neda' biti' ugá'anatica'sa' ga zóali'.

*Tun xtídza'gaquië' bönni' judío unná bë' ilútië' Lázaro*

<sup>9</sup> Cate' bila'yönnë' bönni' judío zoë' Jesús yödz Betania, bila'dxinë' zíanë' ni', calégasö tu' zoë' Jesús ni', pero lësca' tu' té'ënnë' ila'lé'enë' Lázaro, bönni' na' busubanë' Jesús lu yöl-la' guti. <sup>10</sup> Ní'irö gulún xtídza'gaquië' yugu' bixúz unná bë', ilútië' ca' Lázaro, <sup>11</sup> tu' ta'yéajlë'ë zían bönni' judío Jesús ni'a queë' Lázaro na', en chinulá'alengaquië' yugu' bixúz unná bë' na'.

*Len yöl-la' ba zxön razië' Jesús Jerusalén*

*(Mt. 21:1-11; Mr. 11:1-11; Lc. 19:28-40)*

<sup>12</sup> Bönachi zían bila'dxín Jerusalén dza Laní Pascua, ate' dza buropi na' ta'yöni zë'ë Jesús ni'. <sup>13</sup> Ní'irö gula'guítsjë' zin, en bila'rúajë' söjxí'gala'gaquië' Jesús, ate' gulu'ë zidzaj didza', ta'nnë':

—¡Yöl-la' ba Dios! ¡Yöl-la' ba Bönni' ni zë'ë uláz queë' Xanru', para inná bé'enë' bönachi Israel!

<sup>14</sup> Budzölinë' Jesús tuba' búrrodo', ate' gudxië'-ba' ca na' nazúaj lu guichi lá'ayi, rnna:

<sup>15</sup> ¡Biti' gádxili', libí'ili', zóali' yödzö Sión!

¡Buli'yútsöca', zë'ë Bönni' inná bé'enë' libí'ili'!

¡Dxië'-ba' tuba' búrrodo'!

<sup>16</sup> Cate' ni' si' guca lë ni, biti' gula'yéajni'inë' bönni' usëda queë' Jesús, pero gudödi ni', cate' busanë' Jesús lu yöl-la' guti, en buëpë' yehua' yubá queë', ní'irö yöjnéguequinë' lë ni nazúaj lu guichi lá'ayi ca ral-la' gaca queë', ate' guca queë' caní.

<sup>17</sup> Lësca' yugu' bönni' na' gula'cuá'lenë' Jesús cate' ni' bulidzë' Lázaro, bönni' na' yu'ë yeru ba, en busubanë' lë' lu yöl-la' guti, gulunë' ba nalí queë'. <sup>18</sup> Que lë ni na' ca' bila'rúajë' bönni' yöjxí'gala'gaquië' Jesús, tu' bila'yönnë' ca naca yöl-la' huáca ni benë' Lë'. <sup>19</sup> Ní'irö gula'nnë' la' légacasë' bönni' yudo' fariseo, ta'nnë':

—Chinaca bë' biti' bi séqui'ru' gunru'. Buli'yú ca dá'gaca yúgu'të bönachi Lë'.

*Yugu' bönni' zi'tu' tu'guiljë' Jesús*

<sup>20</sup> Bal-lë' bönni' zi'tu' dzágagaquië' nupa na' bila'dxín Jerusalén dza Laní Pascua na' para ila'yéaj ládxi'gaquië' Dios. <sup>21</sup> Yugu' bönni' zi'tu' na' bila'dxinë' ga zoë' Felipe, bönni' Betsaida que luyú Galilea, ate' guláta'yue' lahuë', ta'nnë':

—Bönni', rë'ënitú' ilé'etu'-në' Jesús.

<sup>22</sup> Guyijë' Felipe na', en yöjödxe' ca' Andrés. Ní'irö Andrés, en Felipe na' gulë' ca' Jesús. <sup>23</sup> Bubi'ë didza' Jesús, rë' légaquië':

—Chizóa idxín dza gátia' neda', Bönni' Guljë' Bönachi, huöja' xilatja' yehua' yubá. <sup>24</sup> Le nácátë' rea' libí'ili': Ugá'ana cá'asö tu xisedo' channö cabí igachi' luyú, en údxi que. Channö údxi que xisedo' na', ate' ilén, yénni'tërö unödzej. <sup>25</sup> Nu bönni' ruí'i ládxi'dë'ë yöl-la' na'bán queë', unítie' le, tu' gátie' tsaz bönni' na'. Nu bönni' biti' ruí'i ládxë'ë yöl-la' na'bán dë

quee' yödzülió ni gun chí'è le ga idxinrö dza gata' yöl-la' na'bán idü quee'.  
 26 Channö ré'ënè nu bönni' gunè xichina', ral-la' të'è neda' bönni' na', ate'  
 ga ni' tsöjsóa' neda', ni' tsöjsóè' ca' bönni' na' runè' xichina'. Channö runè'  
 xichina' nu bönni', Xuza' Dios gunè' bal bönni' na'.

*Rigúxjö'è Jesús ca si' ilútiè' Lè'*

27 Gunnè' ca' Jesús:

—Na'a rö'a böniga neda'. ¿Nacxi innatsa'? ¿Naru' innía': Xuza', busölá  
 neda' lu le gaca quia' na'a? Que lè ni na' bida', para guá' ilena' le ral-la'  
 gaca quia' na'a. 28 Xuza', ben ga ilá' lahui yöl-la' zxön quiu'.

Ní'irö biyön chí'i Nu ruí'i didza' yehua' yubá, rnna:

—Chibéna' ga nalá' lahui yöl-la' zxön quia', ate' leyúbölö guna' ga ilá'  
 lahui yöl-la' zxön quia' na'.

29 Bila'yöni bönachi zían nacua' ni' chí'i ni, ate' ta'nná:

—Guziú' na' gunné.

Ia'bal-la bönachi na' ta'nná:

—Tu gubáz lá'ayi quee' Dios bé'lenè' Lè' didza'.

30 Ní'irö bubí'è didza' Jesús, ré' légaquiè':

—Biyön chí'i ni, caléga para uzí'a xibé neda', pero para uzí'ili' xibé  
 libí'ili'. 31 Chibidxín dza uchi'a usöröè' Dios bönachi yödzülió ni. Na'a  
 chú'unè' Dios tu' xihui' ní'ilö, nu na' rinná be'e bönachi yödzülió ni. 32 Na'a,  
 channö ilútiè' bönni' neda', en ulu'chisè' neda' xitsá', guna' ga ulu'dubi  
 yúgu'tè bönachi ga zoa'.

33 Didza' ni bé'è Jesús naca bé' ca gátiè'. 34 Bönachi zían na' të Jesús,  
 ta'nná:

—Netu' biyönitu' nupa bulu'laba le rnna xibá quee' Dios, lè na' rnna:  
 Sóatica'sè' Cristo. ¿Nacxi caz naca, rnno' Li': "Run bayudxi Bönni' Guljè'  
 Bönachi, ulu'chisè' Lè' xitsá'?" ¿Nuzxi na' Bönni' Guljè' Bönachi?

35 Ní'irö Jesús ré' légaquiè':

—Ia'tú chí'ido'osó sóalena' neda' libí'ili', en naca' bení' queéli'. Guli'tá  
 tsanni ni zóalena' libí'ili', en zóalen bení' libí'ili', para cabí'ichul-la inítili'.  
 Nu bönni' ridé' ga chul-la niti bití' nõzinè' gazxi sa'yéajè'. 36 Tsanni ni  
 zóalena' libí'ili', naca' bení' queéli'. Guli'tséajlè' neda' naca' bení' queéli'  
 para ilé'eli' bení' na' naca idü.

Cate' Jesús budxi bé'è didza' ni, yøjhuøjè' yøjcachi' lahuè' lógaquiè'.

*Le run nigui bönachi judío, para cabí'ila'yéajlè' Jesús*

37 Sal-la' benè' Jesús zían yöl-la' huáca lógaquiè', bití' gula'yéajlè'è Lè'.  
 38 Caní guca lè na' buzúajè' Isaías lu guichi, bönni' na' bé'è didza' uláz quee'  
 Dios, gunné':

Xan, ¿nuzxi caz guyéajlè' didza' bé'ètu'?

¿Nuzxi caz buluf'inè' Xanru' yöl-la' huáca quee'?

39 Caní guca, bití' guca ila'yéajlè'è Jesús. Guca ca na' gunné' ca' Isaías:

40 Dios benè' ga gula'chul-la gula'nítie',

ate' guca zidi ládxi'do'gaquiè'

para cabí'ila'lé'enè' len guiøj lógaquiè',

en cabí'ila'yéajni'inè' lu icja ládxi'do'gaquiè'.

Bití' ulu'huóáquiè' quia' para úngaca-nè'.

41 Bé'è Isaías didza' ni tu' bilé'enè' yöl-la' zxön quee' Cristo, en bé'è  
 didza' ca naca quee' Lè'. 42 Sal-la' raca caní, gula'yéajlè' bönachi zían  
 Jesús, ga bidxintè gula'yéajlè'è bal-lè' bönni' unna bé' Lè', pero tu' tádxinè'

yugu' bönni' yudo' fariseo, biti' gulunë' ba nali' queë' yálajdo', para cabí ulu'béajë' légaquië' tsaz ga na' tu'dubë' tu'sëdë' queë' Dios. <sup>43</sup> Caní gulunë' tu' tunrë' zxon le tun bönachi légaquië' bal ca le runë' Dios légaquië' bal.

*Ilún didza' b'ë Jesús ga irugu quégaca bönachi ilátigaca*

<sup>44</sup> Bë'ë zidzaj didza' Jesús, rnnë':

—Nu bönni' réajlë'ë neda', calëga neda'sö réajlë'ë, pero réajlë'ë ca' Xuza' nasöl-lë'ë neda'. <sup>45</sup> Lëscá caní, nu bönni' rilé'enë' neda', rilé'enë' ca' Xuza' nasöl-lë'ë neda'. <sup>46</sup> Neda' naca' bení', en bida' yödzülió ni, para cabí ulu'gá'anë' ga chul-la yúgu'të bönni' ila'yéajlë'ë neda'. <sup>47</sup> Channö riyönnë' nu bönni' xtídza'a, en biti' runë' le bal, calëga neda' ichuga' queë' bönni' na' gatië', tu' bida' ni, calëga para ichuga' quégaca bönachi yödzülió ni, pero para usölá' bönachi yödzülió ni. <sup>48</sup> Nu bönni' ruzóë' neda' tsólá'aló, en biti' rizí' lu në'ë xtídza'a, chizóa le ichugu queë' bönni' na'. Didza' na' chibë'lena' libí'ili' naca tu le ichugu queë' bönni' na' dza údxi. <sup>49</sup> Caní naca, ruá'a didza', calëga rácasö quia', pero Xuza' nasöl-lë'ë neda' gudxë' neda' le ral-la' inní'a, enca' ca ral-la' gu'a didza'. <sup>50</sup> Nözda' gunná b'ë Dios caní para gata' yöl-la' na'bán idú quégaca bönachi. Caní naca, didza' na' ruá'a, ruá'a didza' ca na' Xuza' chigudxi cazë' neda'.

## 13

*Jesús riguibë' ní'agaquië' bönni' usëda queë'*

<sup>1</sup> Ní' naca dza si' idxín Laní Pascua cate' tu'subanë' bönni' judío ca benë' Dios, bubéajë' bönachi queë' luyú Egipto. Nözinë' Jesús chibidxín dza queë' gatië', cate' ral-la' uzë'ë yödzülió ni, en huöjë' ga zoë' Xuzë'. Ca na' nadxí'inë' bönachi queë' nacuá' yödzülió ni, na'a nadxí'inë' légaquië' ga idxintë gatië' uláz quégaquië'.

<sup>2</sup> Satanás tu' xihui' chinagú'u yöl-la' Judas Iscariote, zxi'inë' tu bönni' lë' Simón, para udödë' Jesús lu ná'agaca nupa iluti Lë'. <sup>3</sup> Nözinë' Jesús ca naca, birúajë' ga zoë' Dios, en huöjë' ca' ga na' zoë' Dios, ate' Dios Xuzë' chinudödë' lu në'ë Lë' iduté yöl-la' unná bë' queë'. <sup>4</sup> Que lë' ni na', cate' ní' tahuë', guzuinë' Jesús, en gudúë' lari' rixóa yenë'. Gudélë'ë tu lari' ruzxini ná'aru' le budë'ë lë'ë. <sup>5</sup> Ní'irö gudë'ë nisa tu lu zxiga' guié', ate' gusí lahuë' riguibë' ní'agaquië' bönni' usëda queë', en ruzxinë' ní'agaquië' len lari' na' da' lë'ë.

<sup>6</sup> Cate' bidxinë' ga rö'ë Simón Pedro, Pedro na' rë' Lë':

—Xan, ¿naru' Li' quíbitso' ní'a?

<sup>7</sup> Bubi'ë didza' Jesús, rë' lë':

—Lë' ni runa', biti' réajni'ininu' na'a, pero huadzé tséajni'inu'.

<sup>8</sup> Ní'irö Pedro rë' Lë':

—Bití' ca' quíbi cazu' Li' ní'a.

Jesús rë' lë':

—Channö neda' biti' quiba' li', biti' ca' séqui'nu' gunu' neda' tsözxön.

<sup>9</sup> Ní'irö Simón Pedro rë' Lë':

—Xan, calëgasö ní'a quibu', pero quibu' ca' na'a, en icja'.

<sup>10</sup> Jesús rë' lë':

—Nu nayari, ní'asö run bayudxi tsari, tu' naca cazë' dxi'a iduté', ate' libí'ili' nácali' dxi'a, pero calëga yúgu'tëli'.

<sup>11</sup> Gunnë' caní Jesús: “Calëga yúgu'tëli' nácali' dxi'a”, tu' nözinë' nülögaquië' na' udödi Lë'.

<sup>12</sup> Gudödi gudibë' Jesús ní'agaquië', buguelë'ë lari' na' buxóa yenë'. Bubö'ë ga tahuë', ate' rë' légaquië':

—¿Réajni'ili' lë na' si' bena' queëli'? <sup>13</sup> Libí'ili' ruí'ili' La': Bönni' Usedi enca': Xan. Dxi'a naca ca rnnali', tu' caní naca'. <sup>14</sup> Na'a, channö neda' naca' Xanli', en Bönni' Usedi queëli', ate' gudiba' ní'ali', lëasca' caní ralla' gunli' libí'ili', quíbili' ni'a luzá'ali' tuli' ia'tuli'. <sup>15</sup> Tu le buluí'ida' libí'ili' para gunli' libí'ili' ca na' bena' neda'. <sup>16</sup> Le nácatë rea' libí'ili': Biti' nayëpisëtëre' tu bönni' huen dxin ca xanë', ate' bönni' gubáz bití' nayëpisëtëre' ca nu nasöl-la' lë'. <sup>17</sup> Channö réajni'ili' yúgu'të lë ni, bica' ba libí'ili' channö gunli' caní. <sup>18</sup> Didza' ni ruá'a bití' rea' yúgu'tëli'. Nöz quézida' nupa gurö caza' neda', pero run bayudxi gaca lë na' nazúaj lu guichi lá'ayi, le rnna: "Nu rágulen neda' tsözxön, nu ni tá'baga' neda'." <sup>19</sup> Na'a riguíxjöi'ida' libí'ili' zí'alö ca gaca, para cate' gaca caní, tséajlë'ëli' zoa caza' neda'. <sup>20</sup> Le nácatë rea' libí'ili': Nu bönni' gunë' bal gubáz isöl-la'a neda', neda' ca' gunë' bal, ate' nu bönni' gunë' neda' bal, gunë' ca' bal Xuza', nasöl-lë'ë neda'.

*Riguíxjö'ë Jesús ca gunë' Judas, udödë' Lë'*

(Mt. 26:20-25; Mr. 14:17-21; Lc. 22:21-23)

<sup>21</sup> Cate' Jesús budxi bë'ë didza' ni, buí'innë', ate' yálajdo' gunnë':

—Le nácatë rea' libí'ili': Tu bönni' nütse'ë ladjali' udödë' neda'.

<sup>22</sup> Ní'irö bulu'yú lo luzá'agaquië' tuë' ia'túë' bönni' usëda queë', en gula'cu'ë böniga, ate' ta'naba ladxí'gaquië' nuzxi que na' gunnë' Jesús caní. <sup>23</sup> Tuë' bönni' usëda queë' Jesús, bönni' na' Jesús nadxí'inë' lë', zoë' cuita lë'ë. <sup>24</sup> Simón Pedro bulá'a buluí'isë' bönni' ni para inábinë' Jesús nuzxi que na' gunnë' caní. <sup>25</sup> Ní'irö bönni' na' zoë' cuita lë'ë Jesús rë' Lë':

—Xan, ¿nuzxi na' ru'u didza' que?

<sup>26</sup> Bubi'ë didza' Jesús, rë' lë':

—Náquië' bönni' na' gu'a-në' yöta xtila nabisa.

Ní'irö busubísië' yöta xtila na', en bë'ë queë' Judas Iscariote, zxí'inë' tu bönni' lë' Simón. <sup>27</sup> Gudödi gudahuë' Judas yöta xtila na', guyaza Satanás tu' xihui' icja ladxí'da'ahuë'. Ní'irö Jesús rë' lë':

—Lë na' gunu', yöjentë na'a.

<sup>28</sup> Biti' ta'yéajni'inë' ia'zica'rë' bönni' usëda queë' röö'ogaquië' tahuë' bizx que na' Jesús gudxë' lë' caní. <sup>29</sup> Tu' nu'ë Judas buzudi dumí que'gaquië', téquinë' bal-lë' Jesús gudxë' lë': Yöxí' le gáguru' laní, o gunnë': Bë' lati' que'gaca bönachi yechi'. <sup>30</sup> Cate' budxi gudahuë' Judas yöta xtila na', en ni' naca chi'i dzö'ölö, la' birúajtë'.

*Tu xibá cubi*

<sup>31</sup> Cate' chibirúajë' Judas na', ní'irö gunnë' Jesús:

—Na'a chizóa ilá' lahui yöl-la' zxön quia' neda', Bönni' Guljë' Bönachi, en ilá' lahui ca' yöl-la' zxön queë' Dios. <sup>32</sup> Channö ilá' lahui yöl-la' zxön queë' Dios ni'a quia' neda', Zxí'inë', lëasca' Lë cazë' Dios gunë' ga ilá' lahui yöl-la' zxön quia' neda', Zxí'inë', en la' guntë' caní. <sup>33</sup> Libí'ili', zxí'ina'do', ia'tú chí'isö zóalena' libí'ili'. Uguíljali' neda', ate' ca na' chigúdxigaca'-në' bönni' judío, lëasca' rea' libí'ili' na'a: Ga na' tseja' neda', bití' gaca guídali' rásasö queëli'. <sup>34</sup> Rea' libí'ili' tu xibá cubi le rnna caní: Gulí'dxí'i luzá'ali' tuli' ia'tuli'. Ca na' neda' nadxí'ida' libí'ili', lëasca' caní ral-la' idxí'ili' luzá'ali' tuli' ia'tuli'. <sup>35</sup> Channö huadxí'i luzá'ali' tuli' ia'tuli', iléquibe'e yúgu'të bönachi dá'ali' neda'.

*Rnnë Jesús innë Pedro bití núnbë'ë Lë'*

(Mt. 26:31-35; Mr. 14:27-31; Lc. 22:31-34)

<sup>36</sup> Ní'irö Simón Pedro gunábinë Jesús, rnnë':

—Xan, ¿gazxi caz tseju'?

Bubi'ë didza' Jesús, rnnë':

—Ga na' tseja' neda', bití gaca sá'lenú' neda' na'a, pero huadzé guídu' ga tseja' neda'.

<sup>37</sup> Pedro rë' Lë':

—Xan, ¿bizx que bití gaca sá'lena' Li' na'a? Chizóa' udöda' yöl-la' na'bán quia', gátia' tu' nadxí'ida' Li'.

<sup>38</sup> Bubi'ë didza' Jesús, rë' lë':

—¿Naru' udödu' yöl-la' na'bán quiu' tu' nadxí'ínu' neda'? Le nácatë rea' lí, zí'alö ca cödxiba' böra, lí tá'bágu'u tsonna luzuí, innó' bití núnbë'u neda'.

## 14

*Náquië Jesús nöza tséajlenru' para idxinru' ga zoë Dios Xuz*

<sup>1</sup> Rnnë' Jesús:

—Bití' cö'li' baniga lu icja ládxi'do'oli'. Guli'tséajlë' Dios, en guli'tséajlë' ca' neda'. <sup>2</sup> Lu yu'u lidxë' Xuza' lataj zían nacua'. La'tu' cabí naca caní, neda' chigudxi caza' libí'ili'. Tseja' na'a, tsöjpá'a lataj queëli' ga tsöjsóali'.

<sup>3</sup> Channö huayéaja', en tsöjpá'a lataj queëli' ga tsöjsóali', huöda' leyúbölö, ate' uchë'a libí'ili' lataj quia', para ga na' tsöjsó'a' neda', tsöjsóali' ca' libí'ili'.

<sup>4</sup> Nöz quézili' ga ni' tseja', en núnbë'ëli' ca' nöza.

<sup>5</sup> Tomás rë' Lë':

—Xan, bití' nöztu' gazxi na' tseju'. ¿Nacxi caz gaca gúnbë'ëtu' nöza?

<sup>6</sup> Bubi'ë didza' Jesús, rë' lë':

—Neda' naca caza' nöza, en naca' ca' le naca idütë li, en naca' ca' Nu nabánigaca bönachi. Ni'a quia' néda'sö gaca nu idxín ga zoë Dios Xuz.

<sup>7</sup> La'tu' núnbë'ëli' neda', Xuza' ca' núnbë'ëli'-në'. Na'a, núnbë'ëli'-në', en chibilé'eli'-në'.

<sup>8</sup> Ní'irö Felipe rë' Lë':

—Xan, buluí'i netu' Xuzu', ate' nácatë queëtu'.

<sup>9</sup> Bubi'ë didza' Jesús, rë' lë':

—Felipe, xidzé chiguca zóalena' libí'ili'. ¿Naru' cabí núnbë'ëtso' neda'? Nu bönni' rilé'enë' neda', rilé'enë' ca' Xuza'. ¿Rnnatso': "Buluí'i netu' Xuzu'?" <sup>10</sup> ¿Naru' cabí réajlë'u zóalen caza'-në' Xuza', ate' Xuza' zóalen cazë' neda'? Yugu' didza' ni ruí'ilena' libí'ili', calëga rácasö quia' ruá'a didza' ni, pero Xuza' zóalen cazë' neda', Lë cazë' runë' dxin ni. <sup>11</sup> Guli'tséajlë' neda', zóalen caza'-në' Xuza', ate' Xuza' zóalen cazë' neda'. Channö cabí gaca gunlí' caní, guli'tséajlë' neda' ni'a quégaca dxin ni runa'. <sup>12</sup> Le nácatë rea' libí'ili': Yugu' dxin ni runa' neda', lësca' gunë' bönni' na' réajlë'ë neda', ate' le zxöntërö ca' gunë' bönni' na' tu' huöja' ga zoë Dios Xuz. <sup>13</sup> Yúgu'të le inábili' Dios Xuz, en ugunlí' dxin La' neda', neda' guna' lë na' inábali', para ulu'a lahui neda', Zxí'inë', yöl-la' zxön queë' Dios Xuz. <sup>14</sup> Bítitës bi inábali', en ugunlí' dxin La' neda', neda' guna' le.

*Jesús isöl-lë'ë Dios Bö' Lá'ayi, para idisóalenë' bönachi queë'*

<sup>15</sup> Rnnë' ca' Jesús:

—Channö nadxí'ili' neda', guli'gún le rea' libí'ili', <sup>16</sup> ate' neda' gáta'yua' lahuë' Dios Xuz, ate' Lë' isöl-lë'ë queëli' Nu yúbölö Nu gácalen libí'ili', Nu

utipa ládxi'li', en sóalenticas'õ libí'ili'. Nu ni naca Dios Bö' Lá'ayi, Nu ruí'i didza' idútê li. <sup>17</sup> Biti' gaca ulu'zí' bönachi yödzülió ni xibê' Lè', tu' cabí gaca ila'lé'e Lè', en bití' gaca ilúnbe'e Lè'. Zóalen cazê' libí'ili', ate' soê' lu icja ládxi'do'oli'. <sup>18</sup> Biti' ucá'ana' libí'ili' ca yugu' bi'i uzé'bido'. Huöda' udusóalena' libí'ili'. <sup>19</sup> Ia'tú chí'ido'osõ bítirõ ila'lé'e bönachi yödzülió ni neda', pero libí'ili' ulé'eli' neda'. Tu' zoa caza' nabana' neda', libí'ili' ca', tsaz sóali' ibanli'. <sup>20</sup> Dza ní'rõ cate' Dios Bö' Lá'ayi na' idisóalenê' libí'ili', inöz quézili' zóalen caza'-nê' Xuza' Dios, ate' libí'ili' zóalenli' neda', ate' neda' ca' zóalen caza' libí'ili'. <sup>21</sup> Nu bönni' rizi' lu nê'ê' xtídza'a, en runê' ca rnna, naca bê' nadxí'inê' neda'. Xuza' Dios idxí'inê' bönni' na' nadxí'inê' neda', ate' neda' idxí'ida'-nê' bönni' na', en uluí' lahua' lahuê'.

<sup>22</sup> Judas rê' lè', pero calêga Judas Iscariote, rnnê':

—Xan, çnacxi caz gaca uluí' lo' lotu' netu', en bití' uluí' lo' lógaca bönachi yödzülió?

<sup>23</sup> Bubi'ê' didza' Jesús, rê' lè':

—Nu bönni' nadxí'inê' neda' gunê' ca rnna xtídza'a, ate' Xuza' Dios idxí'inê' bönni' na', ate' guídatu' idisóalentu'-nê' bönni' na' lu icja ládxi'da'ahuê'. <sup>24</sup> Bönni' na' bití' nadxí'inê' neda' bití' runê' ca rnna xtídza'a. Didza' na' biyõnili' bê'a neda', calêgasõ quia' na', pero naca queê' Dios Xuz nasõl-lê'ê' neda'.

<sup>25</sup> Rê' caza' libí'ili' yugu' lè' ni tsanni ni zóalena' libí'ili', <sup>26</sup> pero Dios Bö' Lá'ayi gácalenê' libí'ili', en utipê' ládxi'li'. Xuza' Dios isõl-lê'ê' Lè' queéli' tu' ugunli' dxin La' neda'. Usédinê' libí'ili' yúgu'tê, en usê'ê' ládxi'li' ca naca yúgu'tê didza' na' chigudxa' libí'ili'.

<sup>27</sup> Rucá'ana' queéli' le cuéqui dxi ládxi'li'. Runna' queéli' yõl-la' rø'õ dxi ladxi' quia'. Yõl-la' rø'õ dxi ladxi' na' runna' queéli' bití' naca ca le tunna queéli' bönachi yödzülió ni. Biti' ichixi icja ládxi'do'oli', en bití' gadxi idzõbili'. <sup>28</sup> Chibiyõnili' ca na' chigudxa' libí'ili': Huõja', ate' huöda' udusóalena' libí'ili'. La'tu' nadxí'ili' neda', udzêjali' cate' ni' gudxa' libí'ili' huõja' ga zoê' Dios Xuz, tu' nayêpisêtêrê' Dios Xuz ca neda'. <sup>29</sup> Na'a, chigudxa' libí'ili' zí'aló ca si' gaca, para cate' gaca caní, tsêajlê'eli' neda'.

<sup>30-31</sup> Bítirõ güf'ilena' libí'ili' didza' zían, tu' za' tu' xihui', nu rinná be'e bönachi yödzülió ni. Sal-la' bití' bi dè lu nê'e bi gun quia' neda', ral-la' gaca caní para ilêquibe'e bönachi yödzülió ni nadxí'ida'-nê' Dios Xuz, en runa' ca na' chigudxê' neda' guna'. Gulí'chasa, uzá'aru' ni.

## 15

*Ca naca que lubá uva, en ni'a nê'e lubá na'*

<sup>1</sup> Lêsca' caní Jesús gudxê' légaquiê':

—Naca' neda' ca tu lubá uva le naca idú dxi'a, ate' Xuza' náquiê' ca bönni' guz gú'una rapa chí'ê' lubá na'. <sup>2</sup> Ugúê' yúgu'tê ni'a nê'e lubá na' naca' neda', le cabí bi ta'bía, ate' uchi'ê' yúgu'tê ni'a nê'e na' ta'bía, para ila'bía ia'lati'. <sup>3</sup> Libí'ili' chinácali' dxi'a ni'a que didza' na' chibê'léna' libí'ili'. <sup>4</sup> Gulí'dá'tica'sõ neda', ca na' neda' dá'tica'sa' ca' libí'ili'. Ca naca que ni'a nê'e lubá na', bití' gaca bi cuía rácasõ que, channõ cabí dá'tica'sõ lubá na', lêsca' caní naca queéli', bití' bi gaca gunli' channõ cabí tá'tica'sili' neda'.

<sup>5</sup> Naca' neda' ca lubá na', ate' libí'ili' nácali' ca ni'a nê'e. Nu bönni' dá'tica'sê' neda', ca na' neda' dá'tica'sa' lè', bönni' ni náquiê' ca ni'a nê'e lubá na' ribía yenni', tu' channõ nulá'alenli' neda', bití' bi gaca gunli'.

<sup>6</sup> Nu bönni' bití' dá'tica'sê' neda', gaca queê' ca raca quégaca ni'a nê'e

lubá na' biti' náca gaca dxi'a, ta' rú'uné' ni'a nē'e na', ate' ila'bidxi. Cate' chinabídxigaca ni'a nē'e na', ulu'tubé' léguequi, en ila'gu'ë léguequi lu guí', ate' tséguigaca.

<sup>7</sup> Channö tá'tica'sili' neda', en gunli' ca rna xtídza'a, huáca inábali' bi guě'ënilí', ate' neda' guna' lē na' inábali'. <sup>8</sup> Gunli' bal Xuza' Dios cate' gunli' xichiné', ate' gácali' ca ni'a nē'e lubá na' ta'bía, en caní gaca bē' nácali' idú bönni' ta'dé'ë neda'. <sup>9</sup> Ca na' nadxí'iné' Dios Xuz neda', lē'sca' caní nadxí'ida' libí'ili'. Guli'gúntica'sö ca ral-la' guné' bönni' nadxí'ida'-nē'. <sup>10</sup> Channö gunli' ca rea' libí'ili', gunli' ca ral-la' guné' bönni' nadxí'ida'-nē', ca na' neda' ca' runa' ca chigudxé' Xuza' Dios neda' guna', en rúntica'sa' le raza ládxé'ë Lē', Bönni' na' nadxí'iné' neda'.

<sup>11</sup> 'Yugu' didza' ni rea' libí'ili' para udzėjalenli' tsözxön neda', en gaca idú ca na' udzėjali'. <sup>12</sup> Lē ni naca le rea' libí'ili' gunli': Guli'dxí'i luzá'ali' tuli' ia'tuli', ca na' neda' ca' nadxí'ida' libí'ili'. <sup>13</sup> Biti' gaca idxí'iröné' nu bönni' luzé'ë ca nu bönni' udödē' yöl-la' na'bán queë', gátie' para gácalenē' yugu' böchi' luzé'ë tu' nadxí'iné' légaquiē'. <sup>14</sup> Libí'ili' nácali' böchi' luzá'a channö gunli' ca na' chigudxa' libí'ili' gunli'. <sup>15</sup> Bítirö innía' queëli' nácali' huen dxin quia', tu' cabí nözínē' bönni' huen dxin naca guné' xanē'. Neda' chigunnía' queëli' nácali' böchi' luzá'a, tu' chibena' ga nözili' yúgu'tē le chigudxé' Xuza' neda' guna'. <sup>16</sup> Calēga libí'ili' guröli' neda', pero neda' gurö caza' libí'ili', en buzóa' libí'ili' para tsėjali' bi tsöjenli', ca na' tun ni'a nē'e lubá na' ta'bía yenni', ate' ugá'anatica'sö lē na' gunli'. Caní gaca, Xuza' Dios gunné' queëli' yúgu'tē le inábali' Lē', en ugunli' dxin La' neda'. <sup>17</sup> Lē ni naca le rea' libí'ili' gunli': Guli'dxí'i luzá'ali' tuli' ia'tuli'.

*Bönachi yödžölió tu'zóa tsölá'alö Jesús, en nupa dá'gaca Lē'*

<sup>18</sup> Gunné' ca' Jesús:

—Channö bönachi yödžölió ni tu'zóa libí'ili' tsölá'alö, nözili' chibulu'zöé' neda' tsölá'alö zí'alö ca tu'zöé' libí'ili' tsölá'alö na'a. <sup>19</sup> La'tu' nácali' tuz len bönachi yödžölió ni, huala'dxí'i bönachi yödžölió ni libí'ili' ca na' ta'dxí'i luzé'eguequi, pero tu'zóa bönachi yödžölió ni libí'ili' tsölá'alö tu' cabí nácali' tuz len léguequi, tu' gurö caza' neda' libí'ili', en guléaja' libí'ili' ladaj bönachi yödžölió ni. <sup>20</sup> Guli'tsöjné didza' na' chigudxa' libí'ili', gunnía': Biti' nayépisétérē' nu bönni' huen dxin ca xanē'. Channö gula'bia ládxigaca bönachi neda', ila'bía ládxigaca ca' libí'ili'. Channö nacuá' nupa tun ca rna xtídza'a, ilún ca' ca rna xtídza'li' libí'ili'. <sup>21</sup> Yúgu'tē lē ni ilún bönachi queëli' tu' dá'ali' neda', tu' cabí núbē'gaca Dios Xuz nasöl-lē'ë neda'.

<sup>22</sup> 'La'tu' cabí bida', en la'tu' cabí bē'lena' légaquiē' didza', biti' ila'báguē'ë dul-la', pero na'a tu' bida' ni, biti' bi gaca ila'nné' que dul-la' nabága'gaquiē' le ubéaj légaquiē' dxi'a. <sup>23</sup> Nu bönni' ruzöé' neda' tsölá'alö, ruzöé' ca' Xuza' Dios tsölá'alö. <sup>24</sup> La'tu' cabí bena' yugu' yöl-la' huáca ga nacu'ë, yugu' le cuntu nu ben ca gulaca, biti' ila'báguē'ë dul-la'. Na'a, bila'lē'enē' yugu' lē na' bena', ate' tu'zöé' neda' tsölá'alö, en tu'zöé' ca' Xuza' tsölá'alö. <sup>25</sup> Caní raza, para gaca ca rna xtídžé'ë Dios, le nazí' lu ná'agaquiē', le rna: Tu'zöé' neda' tsölá'alö, en biti' zoa bizx que.

<sup>26</sup> 'Cate' idxiné' Dios Bö' Lá'ayi, Bönni' ru'ë didza' idútē li, en gácalenē' libí'ili', utipē' ládxí'li'. Isól-la'a Bönni' na' queëli' uláz queë' Dios Xuz, ate' guné' ba nalí quia' neda'. <sup>27</sup> Libí'ili' ca' gunli' ba nalí quia', tu' zóalen cázali' neda' tsözxön dza ni'te.



## 16

<sup>1</sup> Gunnë' ca' Jesús:

—Yugu' didza' ni chigudxa' libí'ili', para cabí gaca chopa ládxi'li'.  
<sup>2</sup> Yugu' bönni' judío ulu'béajë' libí'ili' tsaz ga tu'dubë' tu'sëdë' queë' Dios, ate' idxín dza cate' nu bönni' gútië' libí'ili' guéquinë' dxin queë' Dios runë'.  
<sup>3</sup> Caní ilunë', tu' cabí núnbë'gaquië' Dios Xuz, en cabí núnbë'gaquië' neda'.  
<sup>4</sup> Rea' libí'ili' yugu' didza' ni, para cate' idxín dza na', tsöjnéli' didza' ni chigudxi caza' libí'ili'.

*Le gunë' Dios Bö' Lá'ayi*

Gunnë' ca' Jesús:

—Yugu' didza' ni bití' gudxa' libí'ili' dza ni'te, tu' ni' zóalen caza' libí'ili'.  
<sup>5</sup> Na'a huöja', tsöjsóalena'-në' Dios Xuz, nasól-lë'ë neda'. Bití' inábili' neda' nitulí' libí'ili', bití' innali': ¿Gazxi tseju'? <sup>6</sup> Na'a, tu' rea' libí'ili' yugu' didza' ni, risëbi ládxi'li'. <sup>7</sup> Neda' rea' libí'ili' le naca idútë li. Gácarö dxi'a queëli' huöja', tu' channö cabí huöja', bití' idisóalenë' Dios Bö' Lá'ayi libí'ili', Bönni' na' gácalenë' libí'ili', en utipë' ládxi'li', pero channö huöja', isól-la'a-në', na' idisóalenë' libí'ili'. <sup>8</sup> Cate' guidë' Lë', gunë' ga iléquibe'e bönachi yödzülió ni nabága'gaca dul-la', en bití' núnbë'gaca le naca tsahui', ate' ichúguië' Dios queéquequi ilátigaca. <sup>9</sup> Nabága'gaquië' dul-la' tu' cabí ta'yéajlë'ë neda'.  
<sup>10</sup> Bití' núnbë'gaquië' le naca tsahui' tu' ilútië' neda', ate' huöja' ga zoë' Dios Xuz, Bönni' na' náquië' tsahui', ate' bíti'rö ila'lé'enë' neda'. <sup>11</sup> Ichúguië' Dios queégaquië' ilátië' tu' chiguchúguië' que tu' xihui' nu rinná be'e bönachi yödzülió ni.

<sup>12</sup> Ia'zica' zían didza' rë'ënda' gü'ílana' libí'ili', pero bití' gaca tséajni'ili' na'a. <sup>13</sup> Cate' guidë' Dios Bö' Lá'ayi, Bönni' na' ru'ë didza' idútë li, Lë' usedinë' libí'ili' yúgu'të le naca idútë li na', tu' cabí gu'ë didza' ríacasö queë', pero gu'ë yúgu'të didza' na' yönnë' ru'ë Xuza', en gunë' ga inözili' yúgu'të le ral-la' gaca. <sup>14</sup> Lë' gunë' neda' bal, tu' si'ë le nequi quia', en gunë' ga inözili' le. <sup>15</sup> Yúgu'të le nequi queë' Dios Xuz nequi quia'. Que lë ni na' gunnía' si'ë le nequi quia', en gunë' ga inözili' le.

*Yöl-la' risëbi ladxí' queëli' huóaca yöl-la' rudzeja*

<sup>16</sup> Gunnë' ca' Jesús:

—Yetú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda', tu' huöja' ga zoë' Dios Xuz.

<sup>17</sup> Ní'irö bönni' usëda queë' gulë' luzá'agaquië' tuë' ia'tuë', ta'nnë':

—¿Bizxi rna didza' ni rë' rë'u? Rnnë': “Ia'tú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda', en naca tu' huöja' ga zoë' Dios Xuz.”

<sup>18</sup> Ní'irö gula'nnë':

—¿Bizxi caz rë'ëni inná didza' ni, gunnë': “Ia'tú chí'ido'osö”? Bití' réajni'itu' didza' ni ru'ë.

<sup>19</sup> Réquibe'enë' Jesús të'ënnë' ila'nábinë' Lë', ate' rë' légaquië':

—¿Naru' rinábítsö luzá'ali' ca naca que didza' na' bë'a, gunnía': Ia'tú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda'?  
<sup>20</sup> Le nácatë rea' libí'ili': Cödxili', en isëbi ládxi'li', pero bönachi yödzülió ni ulu'dzeja cate' iluti neda'. Ní'irö sal-la' isëbi ládxi'li', yöl-la' risëbi ladxí' queëli' huóaca yöl-la' rudzeja cate' ulé'eli' neda'. <sup>21</sup> Tu nigula cate' chizóa gáljabí' bí'ido' queënu, riguí' rizáca'nu, tu' chibidxín dza queënu, pero cate' chizóabi' tubí' bí'i bönni'do' queënu, bíti'rö röjnenu lë na' butsåganu,

tu' rudzéjanu tu' chigúlajbi' tubi' bi'i bönni'do' yödzölió ni. <sup>22</sup> Lësca' caní raca queéli', risébi ládxi'li' na'a, pero huöda' uduyúa' libí'ili', ate' ní'irö udzeja ládxi'li', ate' biti' séqui'në' nu bönni' ugüé' yöl-la' rudzeja queéli' na'.

<sup>23</sup> 'Dza ní'irö biti' bi inábili' neda'. Le nácatë rea' libí'ili': Yúgu'të le inábili' Dios Xuz, en ugunli' dxin La' neda', Lë' gunné' queéli'. <sup>24</sup> Ga ridxintë na'a dza biti' rugunli' dxin La' neda' cate' bi rinábili'-në' Dios Xuz. Guli'naba caní, ate' idéli'li' lë na' inábali', para gaca idú yöl-la' rudzeja queéli'.

*Ridéli'në' Jesucristo lu le raca yödzölió ni*

<sup>25</sup> Gunné' ca' Jesús:

—Yugu' lë na' chibé'lëna' libí'ili' didza' bucúdz'u' didza'. Huadxín dza cate' bití'rö gü'ílena' libí'ili' didza' le rucúdz'u' didza', pero yálajdo' gü'ílena' libí'ili' didza' ca naca queë' Dios Xuz. <sup>26-27</sup> Dza na' inábili'-në' Dios, en ugunli' dxin La' neda', ate' rea' libí'ili', biti' gun bayudxi gáta'yua' lahué' Dios Xuz uláz queéli', tu' nadxí'inë' Lë cazë' Dios Xuz libí'ili'. Nadxí'inë' libí'ili' tu' nadxí'ili' neda', en réajlë'ëli' birúaja' ga zoë' Dios. <sup>28</sup> Birúaja' ga zoë' Dios Xuz, en bidxina' yödzölió ni. Ia'tú ca', ucá'ana' yödzölió ni, ate' huöja' ga zoë' Dios Xuz.

<sup>29</sup> Ní'irö yugu' bönni' usëda queë' gulé' Lë', ta'nnë':

—Na'a ru'u didza' yálajdo', en bití'rö rucúdz'u' didza'. <sup>30</sup> Na'a réquibe'ëtu' nöz quézinu' Li' yúgu'të, en biti' run bayudxi nu bi inabi yudxi Li', tu' riguixjõ'ínu' netu' le si' inábatu'. Que lë ni na' réajlë'ëtu' birúaja' ga zoë' Dios.

<sup>31</sup> Bubi'é didza' Jesús, rë' légaquië':

—¿Naru' réajlë'tsali' neda' na'a? <sup>32</sup> Buli'yú, huadxín dza, en chiridxín dza na', cate' gásilasili' que queéli', en ucá'anali' neda' tuza', pero biti' soa' tuza', tu' zóalen cazë' Dios Xuz neda'. <sup>33</sup> Yugu' didza' ni chigudxa' libí'ili' para cuéqui dxi ládxi'li', tu' nácali' quia' neda'. Lu yödzölió ni gaca queéli' le usaca' zi' libí'ili', pero buli'tipa ládxi'li'. Neda' chibidéli'da' lu le raca yödzölió ni.

## 17

*Jesús rinábinë' Dios gácalenë' nupa dá'gaca Lë'*

<sup>1</sup> Cate' budxi bë'é Jesús yugu' didza' ni, guchisa lahuë', ruyúé' yehua' yubálö, ate' rnnë':

—Dios Xuz, chibidxín dza. Ben ga ilá' lahui yöl-la' zxön quia' neda', Zxí'ínu', para gaca guna' ga ilá' lahui yöl-la' zxön quiu' Li'. <sup>2</sup> Ben caní tu' chinudödu' lu na'a yöl-la' unná bë' para inná bé'eda' yúgu'të bönachi, en gu'a yöl-la' na'bán idú quégaca yúgu'të nupa na' chibennu' quia'. <sup>3</sup> Lë ni naca yöl-la' na'bán idú na', tu' núnbë'gaquië' Li', nacu' la's dui Dios idú, en tu' núnbë'gaquië' ca' neda', Jesucristo, ate' Li' nasöl-lu'u neda'.

<sup>4</sup> 'Neda' chibëna' ga nalá' lahui yöl-la' zxön quiu' yödzölió ni, en chibudxi bena' dxin na' budödu' lu na'a. <sup>5</sup> Na'a, Xuz, ben ga ilá' lahui yöl-la' zxön napa' tsözxön len Li', para gaca quia' yöl-la' zxön guta' quia' tsözxön len Li' dza ni'te quez cate' si' gata' yödzölió.

<sup>6</sup> 'Chibulu'a lahui le nacu' Li' lógaquië' bönni' ni bennu' quia', nupa na' gurö cazu' Li' ladaj bönachi yödzölió. Gulëquinë' bönni' ni quiu', ate' bénnagacu'-në' quia', ate' tunë' ca rna xtídz'u'. <sup>7</sup> Na'a nözguequinë' yúgu'të lë na' bennu' quia' zá'gaca lu no'o Li', <sup>8</sup> tu' chibudöda' lu

ná'agaquië' didza' na' budödu' Li' lu na'a neda', ate' légaquië' nazi' lu ná'agaquië' le, en téquibe'enë' birúaja' ga zu' Li', ate' ta'yéajlë'ë Li' nasöl-lu'u neda'.

<sup>9</sup>'Neda' ráta'yua' Lo' gácalenu' légaquië'. Ráta'yua' Lo', calëga gácalenu' yúgu'të bönachi yödzölió, pero gácalengacu'-në' bönni' ni chibénnagacu'-në' quia', tu' néquiguequinë' quiu'. <sup>10</sup> Yúgu'të nupa néquiguequi quia' néquiguequi ca' quiu', ate' nupa na' néquiguequi quiu' néquiguequi ca' quia', ate' ca nácgaca nupa na' rulu'i lahui yöl-la' zxön quia'.

<sup>11</sup>'Na'a, bíti'rö ugá'ana' yödzölió ni, pero yugu' bönni' ni ulu'gá'anë' yödzölió, ate' neda' udusóalena' Li'. Xuz Lá'ayi, len yöl-la' huáca quiu' ben chi'i nupa ni chibennu' quia', para ilácgaca tuz, ca na' nácaru' rë'u tuz. <sup>12</sup>Cate' ni' guzóalena' légaquië' yödzölió ni, ben chí'igaca'-në', buguna' dxin yöl-la' huáca na' bennu' quia'. Nupa na' bennu' quia', ben chí'igaca'-në', ate' nitüë' biti' bunítia'-në', pero tuzë' bönni' na' náquië' ca xzí'ini tu' xihui', en narugu queë' gátie' tsaz. Caní raca ca nazúaj lu guichi lá'ayi.

<sup>13</sup>'Na'a udusóalena' Li', ate' tsanni ni zoa' yödzölió ni, ruá'a yugu' didza' ni para gaca idú yöl-la' rudzeja quégaquië' ca na' raca quia' neda' yöl-la' rudzeja. <sup>14</sup>Neda' chibudöda' lu ná'agaquië' xtídzu'u, ate' bönachi yödzölió ni tu' zóa légaquië' tsölá'aló tu' cabí nácgacaquië' tuz len léguequi, ca na' naca quia' neda', biti' naca' tuz len bönachi yödzölió ni. <sup>15</sup>Ráta'yua' Lo', calëga cúagacu'-në' yödzölió ni, pero gun chí'igacu'-në', para cabí ila'dzunë' lu na' tu' xihui'. <sup>16</sup>Biti' nácgacaquië' tuz len bönachi yödzölió ni ca na' naca quia' neda', biti' naca' tuz len bönachi yödzölió. <sup>17</sup>Gulëaj quez quiu' légaquië', ugunu' dxin le naca idütë li. Le naca idütë li na' naca xtídzu'u. <sup>18</sup>Ca na' benu' Li', gusöl-lu'u neda' ladaj bönachi yödzölió ni, lëasca' caní runa' neda', risöl-la'gaca'-në' ladaj bönachi yödzölió. <sup>19</sup>Tu' nadxí'igacada'-në' rudödi cuina' quiu', para ulu'rúajë' ca' légaquië' quez quiu' tu' nazi' lu ná'agaquië' le naca idütë li.

<sup>20</sup>Ráta'yua' Lo', calëga quégacasë' bönni' ni, pero lëasca' quégaquië' bönni' ni' ila'yéajlë'ë neda' ni'a que didza' ilu'ë bönni' ni. <sup>21</sup>Ráta'yua' Lo' gunu' ga ilácgacaquië' tuz yúgu'të', en ilácgacaquië' ca' tuz len rë'u, ca na' nacu' Li', Xuza', nacu' tuz len neda', ate' neda' ca', naca' tuz len Li'. Caní ralla' ilácgacaquië' para ila'yéajlë' ia'zica'rö bönachi yödzölió ni, Li' caz gusöl-lu'u neda'. <sup>22</sup>Yöl-la' zxön na' bennu' quia', neda' bë'a ca' quégaquië', para ilácgacaquië' tuz, ca na' nácaru' tuz rë'u. <sup>23</sup>Li' nacu' tuz len neda', ate' neda' naca' tuz len légaquië', para gaca idú ca nácgacaquië' tuz, en caní iléquibe'e ia'zica'rö bönachi yödzölió ni, Li' caz gusöl-lu'u neda', ate' nadxí'igacanu'-në' ca na' nadxí'inu' neda'.

<sup>24</sup>Xúza'do', ré'ënda' ila'cuá'lenë' neda' bönni' ni bénnagacu'-në' quia' ga na' tsöjsóa', para ila'lé'enë' yöl-la' zxön na' bennu' quia' dza ni'te cate' si' gunu' yödzölió tu' nadxí'inu' neda'. <sup>25</sup>Xuza' tsahui', bönachi yödzölió ni biti' núnbë'gaca Li', pero neda' nunbë' caza' Li', ate' yugu' bönni' ni chinöziguequinë' Li' caz gusöl-lu'u neda'. <sup>26</sup>Bena' ga nöziguequinë' le nacu' Li', en gunra' ca' ga ila'nözinë' lë ni para ca na' nadxí'inu' Li' neda', lëasca' caní ila'dxí'i luzá'agaquië', ate' gaca caza' tuz len légaquië'.

## 18

*Ta'zönë' Jesús*

*(Mt. 26:47-56; Mr. 14:43-50; Lc. 22:47-53)*

<sup>1</sup> Cate' budxi bē'ē Jesús yugu' didza' ni, birúajē' ni', ate' sa'yéajlenē' yugu' bönni' usēda queē'. Gudödē' ia'tsólá'a yegu Cedrón, en bidxinē' ga ni' nacua' yaga olivo ca', ate' lataj ni guyázalenē' yugu' bönni' usēda queē'. <sup>2</sup> Lēscá' Judas, bönni' na' udödē' Jesús, núnbē'ē la'yēla na', tu' butubē' Jesús yugu' bönni' usēda queē' ni' zían luzuí. <sup>3</sup> Ní'irō guchē'ē Judas tu cō' bönni' rōjáquiē' gudil-la, en yugu' bönni' ni'a ná'agaquiē' bixúz unná bē', en ni'a ná'agaquiē' yugu' bönni' yudo' fariseo, ate' yōjáquiē' ga ni' zoē' Jesús, nuá'agaquiē' yugu' guí'yōri, en yugu' le tu'dí'inē'. <sup>4</sup> Ní'irō, tu' nōzinē' Jesús yúgu'tē le ral-la' gaca queē', birúajē' ga ni' zoē', en rē' légaquiē':

—¿Nuzxi riguíljali'?

<sup>5</sup> Bulu'bi'ē didza', tē' Lē':

—Jesús, bönni' Nazaret, riguíljatu'-nē'.

Jesús rē' légaquiē':

—Neda' caz.

Judas, bönni' na' rudödē' Jesús lu ná'agaquiē', zóalenē' légaquiē'. <sup>6</sup> Cate' Jesús gudxē' légaquiē': “Neda' caz”, ní'irō bulu'bíguē'ē cusi zxanlō, en gula'dzō'ē lu yu. <sup>7</sup> Jesús gunábinē' légaquiē' leyúbölō, rnnē':

—¿Nuzxi riguíljali'?

Tē' Lē':

—Jesús, bönni' Nazaret, riguíljatu'-nē'.

<sup>8</sup> Ní'irō bubi'ē didza' Jesús, rnnē':

—Chigúdxá' libí'ili': Neda' caz. Channō riguíljali' neda', guli'güf'-gáquiē' lataj tsōjhuójgaquiē' bönni' ni.

<sup>9</sup> Caní gunnē' Jesús para idxín didza' na' bē'ē, gunnē': “Nupa ni bennu' quia', nitúé' bití' bunítia'-nē'.” <sup>10</sup> Ní'irō, tu' nu'ē Simón Pedro tu guíē' tuchi', gulecjē' le, en bentē' huē' Malco, tu bönni' huen dxin queē' bixúz lo, guchúguiē' guídí náguiē' ibēla bönni' na'. <sup>11</sup> Ní'irō Jesús rē' Pedro na':

—Bugú'u guíē' tuchi' quiu' lidxi. ¿Naru' cabí ral-la' quí'i saca'a lē na' chinunē' Xuza' ca gaca quia'?

*Ridxinē' Jesús lahuē' bixúz lo*

(Mt. 26:57-58; Mr. 14:53-54; Lc. 22:54)

<sup>12</sup> Yugu' bönni' na' rōjáquiē' gudil-la, en bönni' na' nacu'ē lu nē'ē, enca' yugu' bönni' ni'a ná'agaquiē' bönni' judío unná bē' gula'zōnē' Jesús, en gulúgui'ē Lē'. <sup>13</sup> Ní'irō gula'chē'ē Lē' zí'alō lahuē' Anás, tu' náquiē' xto' zxi'inē' Caifás, bönni' náquiē' bixúz lo iz na'. <sup>14</sup> Náquiē' Caifás bönni' na' buzéajni'inē' yugu' bönni' judío unná bē', buluf'inē' légaquiē' dxí'arō gaca gatiē' tuzē' bönni', en calēga initi idútē yōdzō quégaquiē'.

*Rnnē' Pedro: “Bití' núnbē'a-nē' Jesús”*

(Mt. 26:69-70; Mr. 14:66-68; Lc. 22:55-57)

<sup>15</sup> Simón Pedro, en ia'túē' bönni' usēda queē' Jesús yōjáquiē' cúdzu'lē' Lē', sōjnéhoquiē' Lē'. Bönni' usēda ni guyázalenē' Jesús lō'a que lidxi bixúz lo, tu' núnbē'ē bixúz lo na' lē'. <sup>16</sup> Bugá'anē' Pedro ní'ilō ga nu riyaza lō'a na'. Que lē ni na' burúajē' bönni' usēda na' núnbē'ē bixúz lo lē', ate' bē'lenē'-nu didza' nigula na' run chí'ínu ga nu riyaza lō'a na', ate' benē' ga guyáziē' Pedro lō'a. <sup>17</sup> Ní'irō nigula na' run chí'ínu ga nu riyaza lō'a rēnu Pedro, rnnanu:

—¿Naru' cabí do'o ca' li' bönni' ni'?

Bubi'ē didza' Pedro, rnnē':

—Calēga neda'.

<sup>18</sup> Tu' run ziaga, yugu' bönni' huen dxin, en yugu' bönni' ni'a ná'agaca bönnachi yudo' nabéquiaguaië' guí', ate' zuíguequinë' ra' guí' na', en tu'tsë'e cuíngauaië'. Lëscá' Pedro zuílenë' légaquië', rutsë'e cuinë'.

*Bixúz lo rinabi yúdxinë' Jesús*

(Mt. 26:59-66; Mr. 14:55-64; Lc. 22:66-71)

<sup>19</sup> Ní'irö gunabi yúdxinë' bixúz lo Jesús para inözinë' nupxi dá'gaca Lë', en nacxi naca le rusedinë' Jesús bönnachi. <sup>20</sup> Bubi'ë didza' Jesús, rë' lë':

—Lahui' lo bé'lëna' yúgu'të bönnachi didza'. Buseditiqui'sida' légaquië' gapa naca lu yu'u ga tu'dubë' tu'sëdë' queë' Dios, enca' chila yudo', ga ni' tu'dubë' yúgu'të bönni' judío, en biti' bi didza' bë'a bagáchi'só. <sup>21</sup> ¿Bizx que rinabi yúdxinu' neda'? Gunabi yudxi nupa ni' bila'yöni didza' bë'lëna' léguequi. Nözguequi quëzinë' bönni' na' didza' na' bë'lëna' légaquië'.

<sup>22</sup> Cate' budxi bë'ë Jesús didza' ni, tu bönni' ni'a ná'agaca bönnachi yudo' gudápë'ë ru'ë Jesús, rnnë':

—¿Naru' caní rubí'tso' didza' lahuë' bixúz lo?

<sup>23</sup> Bubi'ë didza' Jesús, rë' lë':

—Channö biti' gunní'a dxi'a, gudixjö' bízxilö didza' bë'a biti' naca dxi'a, en channö guca dxi'a didza' bë'a, ¿bizx que na' gudápu'u neda'?

<sup>24</sup> Ní'irö Anás na' gusöl-lë'ë Jesús náguë'ë, ate' bulu'sudxinë' Lë' lahuë' Caifás, bönni' náquië' idú bixúz lo.

*Leyúbölö rnnë' Pedro: "Biti' núnbë'a-në' Jesús"*

(Mt. 26:71-75; Mr. 14:69-72; Lc. 22:58-62)

<sup>25</sup> Cate' ni' zuíne' Pedro ra' guí' rutsë'e cuinë', yugu' bönni' nacu'ë ni' gulë' lë', ta'nnë':

—¿Naru' cabí do' o ca' li' Jesús na'?

Gudá'baguië' Pedro, rnnë':

—Calëga neda'.

<sup>26</sup> Zoë' ni' tu bönni' huen dxin queë' bixúz lo, náquië' di'a dza queë' bönni' na' Pedro guchúguië' guídi náguië', ate' bönni' huen dxin na' rë' Pedro:

—¿Naru' cabí bil'é e quëzida' li' la' yëla ni', dzagu'-në' Jesús?

<sup>27</sup> Leyúbölö gudá'baguië' Pedro, ate' la' gurödixitëba' böra.

*Ridxinë' Jesús lahuë' Pilato*

(Mt. 27:1-2, 11-14; Mr. 15:1-5; Lc. 23:1-5)

<sup>28</sup> Ní'irö gula'ché'ë Jesús, en bulu'zë'ë lidxë' Caifás na', ate' bila'dxinë' yúlahui' queë' bönni' yu'u lu në'ë uláz que yödz Roma, le nazí'i le Pretorio. Chizá' rení' dza na', ate' biti' gula'yázië' yugu' bönni' judío yúlahui' na', tu' téquinë' ila'báguë'ë xíguia' channö ila'yázië' ni', le gun ga biti' gaca ilahuë' xtsö' Laní Pascua, laní na' tu'subanë' ca benë' Dios, bubéajë' bönnachi Israel luyú Egipto. <sup>29</sup> Ní'irö birúajë' Pilato, bönni' na' yu'u lu në'ë, en bidxinë' ga na' nacu'ë, ate' rë' légaquië':

—¿Bizxi ruzégui'li'-në' bönni' ni didza'?

<sup>30</sup> Bulu'bi'ë didza', të' lë':

—La'tu' cabí nu'ë bönni' ni dö', biti' udöditu'-në' lo'.

<sup>31</sup> Ní'irö Pilato rë' légaquië', rnnë':

—Libí'i cázali' guli'ché'ë, en buli'chí'a buli'sörö Lë' ca rinná bë' xibá queë'li'.

Yugu' bönni' judío të' lë', ta'nnë':

—Biti' dë lu na'tu' nu gútitu'.

<sup>32</sup> Caní guca para idxín xtídzë'ë Jesús, le bë'ë naca ral-la' gátie'. <sup>33</sup> Ní'irö buázië' Pilato yúlahui' na', ate' bulidzë' Jesús, en rë' Lë':

—¿Nacu' Li' Bönni' Rinná Bé'enë' Bönachi Judío?

<sup>34</sup> Bubi'ë didza' Jesús, rë' lë':

—¿Naru' rácasö quiu' rño' caní, o gulë bönachi li' caní ca naca quia'?

<sup>35</sup> Pilato rë' Lë':

—¿Naru' réquitsenu' naca' judío? Yugu' bönni' uládz quiu', en yugu' bixúz unná bë' bulu'dödë' Li' lu na'a. ¿Bizxi caz benu'?

<sup>36</sup> Ní'irö bubi'ë didza' Jesús, rë' lë':

—Rinná bë'a neda', pero calëga ca ta'nná bë' bönachi yödzölió ni. La'tu rinná bë'a ca ta'nná bë' bönachi yödzölió, ila'dil-lë' bönni' dá'gaquië' neda', para cabí ilu'ë lataj nu udödi neda' lu ná'agaquië' bönni' judío. Ca rinná bë'a neda' bití' naca ca ta'nná bë' bönachi yödzölió ni.

<sup>37</sup> Ní'irö Pilato rë' Lë':

—¿Nácatso' bönni' rinná bë'ë?

Bubi'ë didza' Jesús, rë' lë':

—Naca' ca na' rño'. Que lë ni na' bida' ga gulja' yödzölió ni, para guna' ba nalí que le naca idütë li. Yúgu'të nupa ni tun le naca idütë li tu'zë náagaca didza' ruá'a.

<sup>38</sup> Pilato rë' Lë':

—¿Bizxi na' le naca idütë li?

*Ta'chúquië' queë' Jesús gátie'*

*(Mt. 27:15-31; Mr. 15:6-20; Lc. 23:13-25)*

Cate' budxi gunnë' Pilato caní, burúajë' leyúbölö ga na' nacu'ë bönni' judío unná bë' na', en rë' légaquië':

—Bití' bi dö' ridzöliða' nu'ë bönni' ni. <sup>39</sup> Libí'ili' dë tu le nulaga loli' runlí' cate' raca Laní Pascua ni, rinábili' neda' usana'-në' queéli' tuë' bönni' nadzunë'. ¿Rë'ënili' usana'-në' queéli' Bönni' Rinná Bé'enë' Bönachi Judío?

<sup>40</sup> Ní'irö yúgu'të' gulu'ë zidzaj didza' leyúbölö, ta'nnë':

—¡Calëga bönni' ni, pero Barrabás usanu'-në' queëtu'!

Barrabás na' náquië' gubán.

## 19

<sup>1</sup> Ní'irö Pilato guchë'ë Jesús, en benë' ga gula'guinë' yugu' bönni' röjáquië' gudil-la Lë'. <sup>2</sup> Bönni' röjáquië' gudil-la na' gulunë' tu bregui' ni'a në'e yötsí', ate' bulu'dxië' le icjë' Jesús, en bulu'gacüë' Lë' tu lari' tunna xiná chul-la ca naca le tácuë' bönni' ta'nná bë'ë. <sup>3</sup> Ní'irö gula'bigüë'ë lahuë' Jesús, en të' Lë':

—¡Bica' bo' Li', Bönni' Rinná Bé'enë' Bönachi Judío!

Ní'irö gula'gápë'ë lahuë'.

<sup>4</sup> Ní'irö burúajë' Pilato, en rë' yugu' bönni' judío unná bë', rnnë':

—Buli'yú, rubéaja'-në' loli' ni para inözili' bití' bi rudzöliða' le naca dö' nu'ë bönni' ni.

<sup>5</sup> Ní'irö birúajë' Jesús, dxía icjë' bregui' ni'a në'e yötsí' na', en nácuë' lari' tunna xiná chul-la na'. Pilato rë' légaquië':

—Ni zoë' bönni' ni.

<sup>6</sup> Cate' yugu' bixúz unná bë', en yugu' bönni' ni'a ná'agaquië' bila'lé'enë' Jesús, zidzaj gulu'ë didza', ta'nnë':

—¡Budë'ë lë'e yaga cruz! ¡Budë'ë lë'e yaga cruz!

Pilato rë' légaquië':

—Libí'i cázali' guli'chě'ë, en guli'tsöjdě'ë lě'e yaga cruz. Neda' biti' bi dō' budzōlida' nu'ë bönni' ni.

<sup>7</sup> Ní'irō bönni' judío na' tē' lē':

—Dē queētu' tu xibá, ate' rinná bē' xibá queētu' na' ral-la' gátie' bönni' ni tu' gunnē' náquiē' Zxí'inē' Dios.

<sup>8</sup> Cate' biyōnnē' Pilato didza' ni, gúdxirōnē'. <sup>9</sup> Leyúbölō buáziē' yúlahui' na', en rē' Jesús:

—¿Gázxité bönni' Li'?

Biti' bi didza' bubí'ë Jesús.

<sup>10</sup> Ní'irō Pilato rē' Lē':

—¿Naru' cabí ubí'tso' didza', quíxjöi'inu' neda'? ¿Naru' cabí nōzinu' dē lu na'a udá'a Li' lē'e yaga cruz, en dē lu na'a usana' Li'?

<sup>11</sup> Bubi'ë didza' Jesús, rē' lē':

—Biti' bi dē lu no'o gunu' quia' la'tu' cabí nudödē' Dios yöl-la' unná bē' na' lu no'o. Que lē ni na', bönni' na' budödē' neda' lu no'o nabága'rē' xíguia' ca li'.

<sup>12</sup> La' ní'sō rizóa ribō'ë Pilato usanē' Jesús, pero gulu'ë zidzaj didza' bönni' judío unná bē', ta'nnē':

—Channō usanu'-nē' bönni' ni, biti' ridzagu'-nē' dxi'a César, bönni' rinná bé'enē' iduté yōdzōlió. Nu bönni' run cuiné' bönni' rinná bē'ë, ridá báguē'ë César na'.

<sup>13</sup> Cate' biyōnnē' Pilato didza' ni, gunná bé'enē' nupa diguá'gaca Jesús, ate' gurō'ë xilatjē' ga ruchi'a rusörō'ë, lataj na' nazí'le Lō'a Ga Zxóagaca Guiójta'a, en ca naca didza' hebreo nazí'le Gabata. <sup>14</sup> La' dza ná'asō naca dza si' idxín Laní Pascua, en naca idú hua gubidza. Ní'irō Pilato gudxē' yugu' bönni' judío unná bē' na', rnnē':

—Ni zoē' bönni' rinná bé'enē' libí'ili'.

<sup>15</sup> Gulu'ë zidzaj didza', ta'nnē':

—¡Bétiē'! ¡Bétiē'! ¡Budē'ë lē'e yaga cruz!

Pilato rē' légaquiē':

—¿Rinábitseli' neda' udá'a-nē' lē'e yaga cruz bönni' rinná bé'enē' libí'ili'?

Bulu'bi'ë didza' bixúz unná bē', ta'nnē':

—Cúnturō nu zoa rinná be'e netu'. Tuzē' César rinná bé'enē' netu'.

<sup>16</sup> Que lē ni na' Pilato budödē' Jesús lu ná'agaquiē', para tsöjdá'agaquiē' Lē' lē'e yaga cruz. Ní'irō gula'guélé'ë Jesús, en gula'chě'ë Lē' ní'ilō.

*Tu'dě'ë Jesús lē'e yaga cruz*

(Mt. 27:32-44; Mr. 15:21-32; Lc. 23:26-43)

<sup>17</sup> Birúajē' Jesús ni', nu'ë yaga cruz queē', sa'yéajē' lataj na' nazí'le Lataj Que Böga' Íjaru', en ca naca didza' hebreo nazí'le Gólgota. <sup>18</sup> Bulu'dě'ë Jesús lē'e yaga cruz ni', ate' bulu'dá'lenē' Lē' tsözxōn lē'egaca yaga cruz ia' chopē' bönni'. Tsólá'a huéaj ta'dě'ë, ate' Jesús dē'ë gatsaj láhui'lō chopē' bönni' na'. <sup>19</sup> Gusól-lē'ë Pilato tu bönni' nu'ë le buzúajē' lu guichi le buzōē' lē'e yaga cruz icjlē' Jesús, le rna caní: "Jesús, Bönni' Nazaret, Bönni' Rinná Bé'enē' Bönni' Judío." <sup>20</sup> Bulu'labē' zían bönni' judío didza' ni, tu' zoa ga na' bulu'dě'ë Jesús lē'e yaga cruz gála'sō ra' yōdzō, ate' didza' na' nuzúajē' len didza' hebreo, en len didza' griego, en len didza' latín. <sup>21</sup> Yugu' bixúz unná bē' quégaquiē' bönni' judío tē' Pilato, ta'nnē':

—Biti' uzúaju', "Bönni' Rinná Bé'enē' Bönni' Judío." Buzúaj caní: "Bönni' ni gunnē': Inná bé'eda' bönni' judío."

<sup>22</sup> Bubi'ë didza' Pilato, rē' légaquiē':

—Le chinuzúaja', tsaz chinuzúaja'.

<sup>23</sup> Cate' yugu' bönni' na' rōjáquiē' gudil-la budxi bulu'dé'ē Jesús lē'e yaga cruz, gula'guélē'ē lari' gúcuē'. Gula'béajē' tápalō, tu cō' huéaj guta' que queégaquiē'. Gula'guélē'ē ca' lari' guxóa yenē' Jesús, ate' lari' na' biti' nadía, pero naduba tuz ca naduba. <sup>24</sup> Ní'irō yugu' bönni' na' rōjáquiē' gudil-la gulē luzá'agaquiē' tuē' ia'túē', ta'nnē':

—Biti' ichúguru' le, pero dxí'arō gaca uyuru' le gaca bē' para inōziru' nuzzi guequi que.

Caní guca, budxín ca nazúaj lu guichi lá'ayi, le rnna:

Gula'guísiē' que queégaquiē' lari' nacuá', en que lari' quia' bulu'yúē' le naca bē'.

Caní gulunē' bönni' na' rōjáquiē' gudil-la.

<sup>25</sup> Xinē'ē Jesús, en nigula zxílanu xinē'ē, en María, nigula queē' Cleofas, en María Magdalena gula'cuá'anu gala' ga na' dé'ē Jesús lē'e yaga cruz. <sup>26</sup> Cate' Jesús bilé'enē'-nu xinē'ē, en bilé'enē' ca' zoē' ni' bönni' usēda queē' na' nadxí'inē', gudxē'-nu xinē'ē:

—Na'a, na' zoē' zxi'inu'.

<sup>27</sup> Ní'irō gudxē' bönni' usēda queē' na':

—Na' zóanu xinó'o.

Bönni' usēda na' benē' ga yöjsóanu lidxē' la' dza ní'sō.

*Le guca cate' gutiē' Jesús*

(Mt. 27:45-56; Mr. 15:33-41; Lc. 23:44-49)

<sup>28</sup> Gudōdi ni, tu' nōzinē' Jesús yúgu'tē chibōa budzaga lahui, en para udxín le nazúaj lu guichi lá'ayi, gunné':

—Ribidxa' nisa.

<sup>29</sup> Dē ni' tu zxiga' yudzu nupi zi. Ní'irō yugu' bönni' na' rōjáquiē' gudil-la bulu'gui'jē' nupi zi na' tu le bululu rizxupi nisa, ate' bulu'zōē' le tu lahui gui, en bulu'dé'ē le ru'ē Jesús para xupē'. <sup>30</sup> Budxi gu'ē Jesús nupi zi na', gunné':

—Chinácatē.

Ní'irō buzōtaj icjē'. Burúajtē bö' naca cazē', gútiē'.

*Tu bönni' reajē' gudil-la runē'ē yaga tuchi' cuita lē'ē Jesús*

<sup>31</sup> Ní'irō, tu' naca dza si' idxín Laní Pascua na', en tu' cabí ralla' ulu'gá'ana nupa nātigaca lē'egaca yaga cruz cate' naca dza lá'ayi quégaquiē', le naca tu dza lá'ayi zxōntē, que lē ni na' yugu' bönni' judío gulá'tayuē' lahuē' Pilato guíē' bönni' rōjáquiē' gudil-la tsōjtítsjagaquiē' xiguíchjagaquiē' bönni' dá'gaquiē' lē'egaca yaga cruz, en ulu'zōtjē' légaquiē' lē'egaca yaga cruz na'. <sup>32</sup> Que lē ni na' gula'biguē'ē bönni' rōjáquiē' gudil-la, ate' gula'guítsjē' xiguíchjē' bönni' zí'alō, en lē'sca' caní gulunē' queē' ia'túē' bönni' na' dá'lenē' Jesús lē'e yaga cruz. <sup>33</sup> Cate' bila'dxinē' ga na' dé'ē Jesús, en bila'lé'enē' chinátiē', biti' gula'guítsjē' xiguíchjē'.

<sup>34</sup> Ní'irō tuē' bönni' na' reajē' gudil-la bunē'ē yaga tuchi' cuita lē'ē Jesús, ate' la' birúajtē rōn, en nisa. <sup>35</sup> Neda', Juan, bilé'eda' lē ni, en runa' ba nali que, ate' le runa' ba nali naca idútē li. Nōz quézida' ruá'a didza' idútē li, para tséajlē'ēli' ca' libí'ili' ca naca queē' Jesús. <sup>36</sup> Gulaca yugu' lē ni para budxín le nazúaj lu guichi lá'ayi, le rnna: “Biti' gatsaj nitú dxita yu'ē.”

<sup>37</sup> Ia'tú le nazúaj ca' lu guichi rnna caní: “Ulu'yúē' bönni' na' bulu'nē'ē lē'ē yaga tuchi'.”

*Tu'cáché'ē Jesús*

(Mt. 27:57-61; Mr. 15:42-47; Lc. 23:50-56)



<sup>38</sup> Gudödi guca yúgu'të lë ni, guyijë' José, bönni' yödzö Arimatea, bönni' dë'ë Jesús, pero bagáchi'sö tu' rádxinë' yugu' bönni' judío unná bë', atë' gunábinë' Pilato gu'ë lë' lataj u'ë Jesús. Pilato bë'ë lë' lataj. Ní'irö bidxinë' José ga na' dë'ë Jesús lë'e yaga cruz, atë' bu'ë Lë'. <sup>39</sup> Lë'sca' bidxinë' Nicodemo ni', bönni' na' guyijë' zí'alö yöjyúë' Jesús chi'i dzö'ölö, nu'ë tu le nutsí'i nöri silá' que mirra, en tu le rilá' zxixi, le naca ca tu gayuá' guíë. <sup>40</sup> Ní'irö José, en Nicodemo na' gula'guélé'ë Jesús, en bulu'chölinë' Lë' yugu' lári'do', atë' gula'gu'ë láhuilö lë na' nutsí'i nöri silá' que mirra, en le rilá' zxixi. Gulunë' ca nalébiguequinë' tunë' bönni' judío cate' tu'cáché'ë tu bönni' nati. <sup>41</sup> Gala' ga na' bulu'dé'ë Jesús lë'e yaga cruz dë tu luyú ga zeaj da' yaga olivo, atë' gatsaj láhuilö lataj na' zoa tu yeru ba cubi le nadaj lë'e gu'a guiöj, yeru ba na' cuntunu ta'gü'inë'. <sup>42</sup> Lu yeru ba na' gula'gu'ë Jesús tu' dë gála'sö yeru ba na', en tu' naca dza tu'pë'ë bönni' judío que Laní Pascua.

## 20

*Rubanë' Jesús lu yöl-la' guti*

(Mt. 28:1-10; Mr. 16:1-8; Lc. 24:1-12)

<sup>1</sup> Cate' chinaca zílado' dza domingo, en ni' naca chul-la, guyéajnu María Magdalena ra' yeru ba na', atë' bilé'enu chinadúa guiöjta'a na' busayaj ga nu riyaza yeru ba na'. <sup>2</sup> Ní'irö böajnu carelö ga zoë' Simón Pedro, dzáguië' lë' ia'tué' bönni' usëda, bönni' na' Jesús nadxí'inë' lë', atë' rënu légaquië':

—Bulu'béajë' Xanru' yeru ba ni', en biti' nöztu' gazxi gula'gu'ë Lë'.

<sup>3</sup> Ní'irö bila'rúajë' Pedro, en ia'tué' bönni' usëda na', söjáquië' ra' yeru ba na'. <sup>4</sup> Tsözxön ta'xíti'ë iropë', pero ia'tué' bönni' usëda na' guxíti'rë' carelö ca Pedro, atë' zí'alö lë' bidxinë' ra' yeru ba na'. <sup>5</sup> Biyéchuë', en buyúë' lu yeru ba na', atë' bilé'enë' yugu' lári'do' na' bila'röli-në' Jesús, nacuá' ni', pero biti' guyázië' yeru ba na'. <sup>6</sup> Ní'irö bidxinë' Simón Pedro cúdzu'lë' ia'tué' bönni' usëda na', atë' guyázië' lë' yeru ba na', en bilé'enë' lári'do' na' nacuá' ni'. <sup>7</sup> Lë'sca' bilé'enë' lári'do' na' gula'xóë' icjë' Jesús, biti' dëlen ia'zica'rö lári'do' na', pero tsölá'alö nudubi quez. <sup>8</sup> Ní'irö guyázië' ca' ia'tué' bönni' usëda na' bidxinë' zí'alö ra' yeru ba na', en bilé'enë' ca na' naca, atë' guyéajlë'ë didza' bë'ë Jesús. <sup>9</sup> Caní guca, tu' cabí ta'yéajni'ininë' le nazúaj lu guichi lá'ayi ca run bayudxi gaca queë' Jesús, atë' ubanë' lu yöl-la' guti. <sup>10</sup> Ní'irö iropë' bönni' usëda na' yöjhuöjgaquië' lídxigaquië'.

*Rulu'i lahuë' Jesús lonu María Magdalena*

(Mr. 16:9-11)

<sup>11</sup> Bugá'ananu María ní'ilö ra' yeru ba na', ribödxinu. Tsanni ni' ribödxinu, biyéchunu, buyunu lu yeru ba na'. <sup>12</sup> Bilé'enu chopë' gubáz lá'ayi queë' Díos ni', nácugaquië' lari' chiguichi. Rö'ögaquië' ni', tuë' ícjalö ba na', en ia'tué' xini'alö ba na' ga ni' gula'gu'ë Jesús. <sup>13</sup> Yugu' gubáz lá'ayi na' të' lënu, ta'nnë':

—Nigúlado', ¿bizx que ribödxu'?

Rënu légaquië':

—Tu' bulu'ú'ë Xana', en biti' nözda' gazxi gula'gu'ë Lë'.

<sup>14</sup> Cate' budxi gunnánu caní, buécjanu, en bilé'enu-në' Jesús, zoë' ni', pero biti' réquibe'enu Jesús na'. <sup>15</sup> Ní'irö Jesús gudxë'-nu:

—Nigúlado', ¿bizx que ribödxu'? ¿Nuzxi ruguilju'?

Tu' réquinu náquië' Lë' bönni' rapa chi'ë latja na', rënu Lë':

—Bönni', channö li' bu'u-në', gudíxjöi'i neda' gazxi gulú'u-në', ate' neda' u'a-në'.

<sup>16</sup> Ní'irö Jesús gudxë'-nu:

—María.

Ní'irö buécjanu, en lu didza' hebreo rënu Lë':

—Raboni.

Didza' ni rnna: Bönni' Usedi quia'.

<sup>17</sup> Jesús rë'ë-nu:

—Biti' canu' neda', tu' cabí ruhuépinida' ga zoë' Xuza'. Na'a, guyéaj ga nacu'ë böchi' luzá'a, ate' yöjödxi-gáquië': "Caní rnnë' Jesús: Huëpa' ga zoë' Xuza', náquië' ca' Xúzili'. Náquië' Dios quia', en Dios queéli'."

<sup>18</sup> Ní'irö guyéajnu María Magdalena na', yöjtíxjöi'ínu yugu' bönni' usëda queë' Jesús chibilé'enu-në' Xanru', en ca naca didza' na' gudxë'-nu.

*Rulu'i lahuë' Jesús lógaquië' bönni' usëda queë'*

(Mt. 28:16-20; Mr. 16:14-18; Lc. 24:36-49)

<sup>19</sup> Cate' chigul-la la' dza ná'asö, le naca dza risí lo gadxi dza, nudúbigaquië' bönni' usëda queë' Jesús, ate' nayayaj yu'u ga na' nacu'ë tu' tádxinë' bönni' judío unná bë'. Ní'irö bulu'i lahuë' Jesús gatsaj láhui'lö ga na' nacu'ë, en rë' légaquië':

—Guli'zóa dxi ládxi'li'.

<sup>20</sup> Cate' budxi gudxë' légaquië' didza' ni, bulu'inë' légaquië' në'ë, en cuita lë'ë. Ní'irö tu'dzéjanë' yugu' bönni' usëda na' tu' tu'lé'enë' Xanru'. <sup>21</sup> Ní'irö Jesús rë' légaquië' leyúbölö, rnnë':

—Guli'zóa dxi ládxi'li'. Ca benë' Xuza', gusöl-lë'ë neda', lësca' caní risöl-la'a libí'ili' tsöjenli' xichina'.

<sup>22</sup> Cate' budxi gunnë' caní, bulubë' lógaquië', en rë' légaquië':

—Guli'sí' Dios Bö' Lá'ayi. <sup>23</sup> Núti'tës nu uniti loli', nu na' ben dul-la', chiyú'u yöl-la' runiti lo que, ate' núti'tës nu bití' uniti loli' le, ugá'ana dul-la' que nu na' nun dul-la'.

*Biti' réajlë'ë Tomás*

<sup>24</sup> Tomás bití' zóalenë' légaquië' cate' Jesús buduyüë' légaquië'. Náquië' Tomás tuë' bönni' chínnuë' ní', en tu'ë ca' lë' Bönni' Bilidi'. <sup>25</sup> Gudödi ní' ia'zica'rë' bönni' usëda na' gulé' Tomás, ta'nnë':

—Chibilé'etu'-në' Xanru'.

Tomás rë' légaquië':

—Channö cabí ilé'eda' në'ë ga gunnë' bididaj, en unë'a xibön na'a ga na' gunë'gaca bididaj na', en unë'a na'a cuita lë'ë ga na' gunnë' yaga tuchi', bití' ca' tséajlë'a.

<sup>26</sup> Cate' chigudödi ia'xunu' dza, nudúbigaquië' bönni' usëda na' leyúbölö lu yu'u, ate' Tomás na' zóalenë' légaquië'. Sal-la' nayayaj yu'u ga na' nacu'ë, bulu'i lahuë' Jesús gatsaj láhui'lö ga na' nacu'ë, en rë' légaquië':

—Guli'zóa dxi ládxi'li'.

<sup>27</sup> Ní'irö Jesús rë' Tomás na':

—Bunë' xibön no'o ni, en buyú na'a ni. Bunë' no'o cuita lë'a ni, en bítirö gaca chopa ládxi'u, pero guyéajlë' neda'.

<sup>28</sup> Ní'irö bubí'ë didza' Tomás, rë' Lë':

—Xána'do', en Dios quia'.

<sup>29</sup> Jesús rë' lë':

—Tomás, tu' bulé'enu' neda', réajlë'u. Bica' ba nupa ni' ila'yéajlë' neda' sal-la' bití' ila'lé'eni neda'.

*Le ré'eni gun didza' nazúaj lu guichi ni*

<sup>30</sup> Bené' Jesús zíanró ca' yöl-la' huáca lógaquié' bönni' uséda queé', le cabí nazúajgaca lu guichi ni. <sup>31</sup> Yugu' lè ni nuzúaja' lu guichi para tséajlè'èli' náquié' Jesús Bönni' na' ru'è Dios lè' Cristo, Zxí'iné' Dios, en cate' tséajlè'èli', gata' queéli' yöl-la' na'bán idú tu' réajlè'èli'-nè'.

## 21

*Rulu'i lahué' Jesús lógaquié' gadxé' bönni' uséda queé'*

<sup>1</sup> Gudödi guca lè ni, leyúbölö buluí'i lahué' Jesús lógaquié' bönni' uséda queé' ga naca ra' nísado' que Tiberias, ate' caní guca ca na' buluí'i lahué' lógaquié'. <sup>2</sup> Nudúbigaquié' Simón Pedro, en Tomás, bönni' na' tu'è ca' lè' Bönni' Bilidi', en Natanael, bönni' yödzö Caná que luyú Galilea, en chopé' bönni' zxí'iné' Zebedeo, en ia' chopé' ca' bönni' uséda queé' Jesús. <sup>3</sup> Simón Pedro ré' légaquié':

—Tseaja' tsójxóna'-ba' böla.

Tè' lè' ia' zíca' ré', ta' nné':

—Guntu' li' tsözxón.

Ní'irö yójáquié', en gula'bené' tu' lè'e bárcodo', ate' réla ni' nituba' böla bití' gula'zöné'-ba'. <sup>4</sup> Cate' chizá' rení', yöjsóé' Jesús luyú ra' nisa na', pero bití' téquibe'ené' bönni' uséda queé' Jesús Lè' na'.

<sup>5</sup> Ní'irö Jesús ré' légaquié':

—Zxí'ina' do', ¿naru' cabí deba' lati' böla queéli'?

Bulu'bi'è didza', tè' Lè':

—Nituba'.

<sup>6</sup> Ní'irö Jesús ré' légaquié':

—Guli'chílaj yöxaj böla queéli' tsölá'a ibèla barco, ate' söngacali'-ba'.

Ní'irö gula'chiljé' le, ate' bítí'rö guca ulu'béajé' le, tu' naguíraba' böla lè'e yöxaj böla na'. <sup>7</sup> Ní'irö bönni' uséda na' nadxí'iné' Jesús lè' ré' Pedro, rnné':

—¡Xanru' na'!

Cate' biyönné' Simón Pedro, “Xanru' na'”, böácué' lari' gúcué', tu' nagúé' le zí'alò, ate' guyázié' lu nisa. <sup>8</sup> Bila'dxiné' ia' zíca' ré' bönni' uséda na', tu' s'é'è barco na', suná'yöjgaquié' yöxaj ga na' dzó'öba' böla, tu' cabí naca zí'tu' ga dè luyú bidxi. Nácaté' ca tu' gayuá' löga' ní'aru'. <sup>9</sup> Cate' bila'dxiné' luyú bidxi na', bila'lé'ené' ró'ö tu' guí' bo' yalaj ni', en zxóaba' tuba' böla láhuilö, en dè ca' yöta ni'. <sup>10</sup> Jesús ré' légaquié':

—Guli'diguá'a-ba' ni böla na' si' guzxöngacali'-ba'.

<sup>11</sup> Gurené' Pedro lè'e barco na', ate' gú'uyöjé' yöxaj na' zaca' luyú bidxi, nalíró-ba' böla zxön, idú tu' gayuá' yu' chí'inu-unba'. Sal-la' nácagacaba' böla zían, bití' biröza' yöxaj na'. <sup>12</sup> Ní'irö Jesús ré' légaquié':

—Guli'dá gáguli'.

Bití' burúguiné' nitué' bönni' uséda queé' na' inábiné' Lè', inné': “¿Nuzxi Li'?” Nözguequi quéziné' náquié' Xanru'. <sup>13</sup> Ní'irö gubíguié' Jesús, en gudélé'è yöta na', enca' böla na', ate' b'é'è quégaquié'.

<sup>14</sup> Lè ni naca le bunny luzuí buluí'i lahué' Jesús lógaquié' bönni' uséda queé' gudödi bubané' lu yöl-la' guti.

*Jesús ru'ilené' Simón Pedro didza'*

<sup>15</sup> Cate' budxi gulahué', Jesús ré' Simón Pedro:

—Simón, zxí'iné' Jonás, ¿naru' nadxí'irönu' neda' ca nadxí'iguequiné' bönni' ni neda'?

Bubi'è didza' Pedro, ré' Lè':

—Ön, Xan. Li' nöz quézinu' raza ládxa'a Li'.

Jesús rë' lë':

—Bugagu yugu' bö'cu' zxí'la'do' quia'.

16 Jesús rë' lë' le buropi luzuí, rnnë':

—Simón, zxí'inë' Jonás, ¿naru' nadxí'inu' neda'?

Bubi'ë didza' Pedro, rë' Lë':

—Ön, Xan. Li' nöz quézinu' raza ládxa'a Li'.

Jesús rë' lë':

—Bugagu yugu' bö'cu' zxila' quia'.

17 Jesús rë' lë' le bunni luzuí:

—Simón, zxí'inë' Jonás, ¿raza ládxa'u' neda'?

Buí'innë' Pedro tu' le chibunni luzuí rinabi yúdxinë' lë', gunné': “¿Raza ládxa'u' neda'?” Bubi'ë didza' Pedro, rë' Lë':

—Xan, yúgu'të nöz quézinu' Li'. Nőzinu' raza ládxa'a Li'.

Jesús rë' lë':

—Bugagu yugu' bö'cu' zxila' quia'. 18 Le nácatë rea' li', cate' ni' nacu' ra'bando', rácasö quiu' bugacu cuinu', en ca gunnásö quiu' gudó'. Cate' igulu', ulí no'o, ate' nu yúbólö ugacu lí' lari', en ichë' li' ga ni' bití' gué'ennu' tseaju'.

19 Yugu' didza' ni bë'ë Jesús naca bë' naca gátíë' Pedro, tsöjtë'ë lë'e yaga cruz, para gaca yöl-la' ba queë' Dios. Cate' budxi gunné' caní Jesús, gunné' ca' ia'tú:

—Gudá' neda'.

*Ru'ë didza' Jesús ca gaca queë' bönni' usëda na' nadxí'inë'*

20 Buécjë' Pedro, en bilé'enë' sőjnáhuë' légaquië' bönni' usëda na' Jesús nadxí'inë' lë'. Náquië' bönni' usëda na' gurö'ë cuita lë'ë Jesús cate' ni' gulahuë', en gudxë' Jesús: “Xan, ¿nuzxi na' udödi Li'?” 21 Cate' Pedro bilé'enë' lë', rë' Jesús:

—Xan, ¿bizxi gunë' bönni' ni?

22 Jesús rë' lë':

—Channö rë'ënda' ugá'anë' bönni' ni ga idxinrö dza huöda', bití' ral-la' cö'u böniga. Gudá'a neda' lí'.

23 Guzé didza' ni ga nacu'ë böchi'ru' ta'yéajlë'ë Cristo. Téquinë' bití' gátíë' bönni' usëda na'. Jesús bití' gudxë' lë' bití' gátíë', pero caní gunné': “Channö rë'ënda' ugá'anë' bönni' ni ga idxinrö dza huöda', bití' ral-la' cö'u böniga.”

24 Bönni' usëda ni naca' neda', Juan. Runa' ba nalí quéquequi lë ni, en nuzúaja' yugu' lë ni lu guichi, ate' nözili' naca idútë li le runa' ba nalí.

25 Zíanrö ca' le benë' Jesús. Channö nu uzúaj léquequi lu guichi tu tu, rusaca' quia' bití' guequi yödzöliö ni ila'cuá' guichi na' ral-la' nu uzúaj. Ca' caz.

## LE GULUNĒ' BÖNNI' GUBÁZ NASÖL-LĒ'Ē CRISTO Los Hechos

*Le guzxi' lu nĕ'ĕ Dios, isöl-lĕ'ĕ Dios Bö' Lá'ayi*

<sup>1</sup> Cate' buzúaja' lu guichi zí'alö, quiu' li', Teófilo, neda', Lucas, buzúaja' yúgu'tĕ le gusí lahuĕ' runĕ' Jesús, en rusédinĕ' <sup>2</sup> ga bidxintĕ dza buĕpĕ' yehua' yubá. Cate' si' huĕpĕ' Jesús yehua' yubá, dzáguiĕ' Dios Bö' Lá'ayi Lĕ', gunná bĕ'ĕ ca ral-la' ilunĕ' gubáz queĕ', yugu' bönni' na' gurö cazĕ'. <sup>3</sup> Gudödi gudí'i guz xáquĕ'ĕ Jesús, gútiĕ'. Ní'irö bubanĕ', en bulu'í lahuĕ' lógaquiĕ' gubáz queĕ' na'. Buluí'inĕ' légaquiĕ' zían le gulaca bĕ' zoĕ' nabanĕ', le cabí gaca nu tá'baga'. Zían luzuí bulu'í lahuĕ' lógaquiĕ' idú ca choá' dza, en bĕ'lenĕ' légaquiĕ' didza' ca rinná bĕ'ĕ Dios.

<sup>4</sup> Cate' ni' nacu'ĕ tsözxön, gunná bĕ'enĕ' légaquiĕ' cabí ulu'zĕ'ĕ Jerusalén. Jesús gudxĕ' légaquiĕ', rnnĕ':

—Guli'cöz ni' le guzxi' lu nĕ'ĕ Xuza' isöl-lĕ'ĕ queĕli' ca na' chibusiyön quezida' libí'ili'.

<sup>5</sup> Gunnĕ' ca':

—Le nácatĕ Juan buquilĕ' bönachi nisa lu nisa. Na'a biti' tse xidzé gaca queĕli' le rulu'í yöl-la' ridila nisa ni, idisóalenĕ' Dios Bö' Lá'ayi libí'ili'.

*Ruhuĕpĕ' Jesús yehua' yubá*

<sup>6</sup> Ní'irö yugu' bönni' ta'yéajlĕ'ĕ Jesús, nudúbigaquiĕ' ni', gula'nábinĕ' Lĕ', ta'nnĕ':

—Xan, ¿naru' gunu' ga ila'nná bĕ' bönachi Israel leyúbölö dza ni zóaru' na'a?

<sup>7</sup> Jesús gudxĕ' légaquiĕ':

—Biti' nequi queĕli' inözili' bizxi dza o bizxi dzö' gunĕ' Dios Xuz le nuzóĕ' lu na' cazĕ'. <sup>8</sup> Sí'ili' yöl-la' huáca cate' guídĕ' Dios Bö' Lá'ayi idisóalenĕ' libí'ili'. Ní'irö gunlí' ba nalí quia' neda' lu yödö Jerusalén, en idú luyú Judea, en luyú Samaria, en ga idxíntĕli' iduté yödölió.

<sup>9</sup> Cate' budxi bĕ'lenĕ' légaquiĕ' didza' ni, tsanni ni' tu'yusĕ' ca' Lĕ', la' buĕpitĕ' xitsá' ga rö'ö tu böaj le bucache' Lĕ', ate' bíti'rö bila'lĕ'enĕ' Lĕ'. <sup>10</sup> Tsanni ni' tu'yúĕ' lúxibalö cate' ni' buĕpĕ' Jesús, bulu'lu'í lógaquiĕ' chopĕ' gubáz lá'ayi ga na' nacu'ĕ, nácuagaquiĕ' lari' chiguíchido'os. <sup>11</sup> Chopĕ' ni gulĕ' légaquiĕ', ta'nnĕ':

—Bönni' Galilea, ¿bizx que ruyuli' lúxibalö? Lĕ' cazĕ' Jesús ni si' guzĕ'ĕ ga zóali', buĕpĕ' yehua' yubá, lĕsca' caní huödĕ' leyúbölö ca na' chibilĕ'eli'-nĕ' söhuöjĕ' yehua' yubá.

*Ta'böĕ' Matías para tsáziĕ' xilatjĕ' Judas*

<sup>12</sup> Ní'irö gula'zĕ'ĕ ga na' rö'ö guí'ado' na' nazí'i le Gu'ía Yaga Olivo, ate' yöjhuöjgaquiĕ' Jerusalén. Guí'ado' ni dĕ' gála'sö ga dĕ' Jerusalén, tsca nazí'gaquiĕ' lataj ta'zĕ'ĕ dza lá'ayi quegaquiĕ'. <sup>13</sup> Cate' bulu'dxinĕ' yödzö ni', gula'benĕ' ga naca buropi cuía lu yu'u, ga ni' ta'cu'ĕ Pedro, en Jacobo, en Juan, en Andrés, en Felipe en Tomás, en Bartolomé, en Mateo, en Jacobo, en zxi'inĕ' Alfeo, en Simón, bönni' na' ruí'i ládxĕ'ĕ ladzĕ', en Judas, böchĕ'ĕ Jacobo. <sup>14</sup> Yúgu'tĕ bönni' ni tu'lidzĕ' Dios tsözxön, ate' yugu'

böchë'ë Jesús, en María, xinë'ë Jesús, en ia'zica'rönu nigula ca' nungaquië' légaquië' tsözxön.

<sup>15</sup> La' dza ná'asö guzuinë' Pedro gatsaj láhui'lö ga nacu'ë böchi' luzá'aru' na' ta'yéajlë'ë Cristo. Gulaca idú ca xópalalaj bönachi nupa nudúbigaca ni'.

<sup>16</sup> Pedro gudxë' légaquië', rnnë':

—Böchi' luzá'ado'. Ben bayudxi guca le nazúaj lu guichi lá'ayi, ca na' gunné' Dios Bö' Lá'ayi dza ni'të, le buzúajë' David lu guichi, ca guca queë' Judas, bönni' na' guchë'ë nupa ni' gula'zön Jesús. <sup>17</sup> Judas na' gubábalenë' rë'u, en bënlenë' rë'u tsözxön dxin ni. <sup>18</sup> Gula'zínë' tu la' yëla lazxaj que dö' na' bi'ë bönni' ni. Judas ni gubixë', en biröza' lë'ë, ate' bila'rúaj yúgu'të le dzö'ö lë'ë. <sup>19</sup> Cate' bila'yöni bönachi nacuá' Jerusalén lë ni, gulu'ë le la' yëla na' Acéldama, tu didza' hebreo le rnna lu didza' xidza': La' Yëla Rön. <sup>20</sup> Caní guca queë' Judas, ca na' nazúaj lu guichi lá'ayi nazí'i le Salmos, le rnna:

Ugá'ana cá'asö lidxë',

en bití' idzöli nu soa yu'u na'.

Rnna ca':

Nu yúbölö tsaza xilatjë'.

<sup>21-22</sup> Run bayudxi na'a cöru'-në' tu bönni' gunë' rë'u tsözxön para gunë' ba nalí queë' Jesús, ca guca, bubanë' lu yöl-la' guti. Ral-la' gáquië' bönni' nabábalenë' bönni' ni' gula'cuá'lenë' rë'u dza ni'te cate' ni' Xanru' Jesús gudálenë' rë'u. Gula'sí lógaquië' nacuá'lenë' rë'u cate' ni' buquilë' Juan bönachi nisa, ga bidxintë dza buëpë' Jesús yehua' yubá, cate' buzë'ë ga zóaru'.

<sup>23</sup> Ní'irö bulu'lu'ë chopë', José, en Matías. José na' lë' ca' Barsabás, en zoa ia'tú lë' Justo. <sup>24</sup> Ní'irö bulu'lidzë' Dios, ta'nnë':

—Xantu' Dios, nunbë' casu' icja ládxi'do'gaca yúgu'të bönachi. Bulufi netu' nulë' chopë' ni chiguró casu' Li' <sup>25</sup> para tsázië' lu dxin ni para gáquië' gubáz quiu'. Tsázië' xilatjë' Judas, bönni' ni' bunítië' xilatjë' tu' benë' dul-la', ate' guyijë' xilataj cazë' lataj chul-la.

<sup>26</sup> Ní'irö bulu'zúajë' yugu' lu guichi lágaquië', tu queë' José, en ia'tú queë' Matías. Bulu'gútsi'në' luzé'eguequi, en bulu'béajë' tu, ate' birúaj le nazúaj lë' Matías. Caní guca, Matías na' gubábalenë' ia'chinéajë' gubáz queë' Cristo.

## 2

### *Dios Bö' Lá'ayi ridisóalenë' légaquië'*

<sup>1</sup> Cate' chibidxín dza Pentecostés, nudúbigaquië' tsözxön yúgu'të bönni' ta'yéajlë'ë Cristo. <sup>2</sup> Tsálido'os biyön bö le birúaj lúzxiba, le biyön ca riyön cate' recja bö' budunu', ate' biyön idütë lu yu'u ga na' rő'ogaquië'.

<sup>3</sup> Bulu'lu'fi lahui yugu' bululu gu'do' lu bö'ös lógaquië', ate' gula'guísi que queégaquië'. Bidisóalengaca tu tuë'. <sup>4</sup> Caní guca, Dios Bö' Lá'ayi bidisóalenë' yúgu'të', ate' gula'sí lógaquië' tu'ë didza' yúbölö, tsca naca le bë'ë Dios Bö' Lá'ayi que queë' gu'ë didza' yúbölö na'.

<sup>5</sup> Nacu'ë zían bönni' judío yödzö Jerusalén dza na', nácagaquië' bönni' ta'yéaj ládxi'gaquië' Dios, en zá'gaquië' narúajgaquië' yúgu'të yödzö idütë yödzöliö ni. <sup>6</sup> Cate' bila'yönnë' bö na', bulu'dubë' bönni' zían, ate' gula'bö'ë böniga, tu' bila'yönnë', ca naca xtídza'gaquië' que queégaquië', tu'ë didza' bönni' na' ta'yéajlë'ë Cristo. <sup>7</sup> Gula'ná' badxë' yúgu'të', en bulu'báninë, ta'nnë':

—Buli'yútsöca'. ¿Naru' calëga bönni' Galilea yúgu'të bönni' ni tu'ë didza'?  
 8 ¿Nacxi caz naca riyöniru' tu'ë xtídza'ru' ca naca didza' ru'íru' tu turu'?  
 9 Rë'u ni nácaru' bönni' zían yödzö, bönni' narúajgaquië'

luyú Partia, en luyú Media, en luyú Elam,  
 en luyú Mesopotamia, en luyú Judea, en luyú Capadocia,  
 en luyú Ponto, en luyú Asia,

10 en luyú Frigia, en luyú Panfilia, en luyú Egipto,  
 en luyú Africa, ga nácarö zi'tu' ga dë luyú Cirene.

'Lësca' nacu'ë bönni' yödzö Roma ni. Bal-lë' nácajgaquië' bönni' judío,  
 en ia'bal-lë' nazí' lu ná'agaquië' le ta'yéajlë'ë bönni' judío Dios. 11 Lësca'  
 nacu'ë ni yugu' bönni' narúajgaquië' Creta, en luyú Arabia. Riyöniru' tu'ë  
 didza' ru'íru' que queëru', ate' ta'guíxjö'ë yugu' le zxön benë' Dios, le tun  
 ga rubániru'.

12 Caní guca, bulu'báninë yúgu'të', en gula'bö'ë böniga. Gulë  
 luzá'agaquië' tuë' ia'tué', ta'nnë':

—¿Bizxi caz lë ni?

13 Bulu'titjë' bal-lë', ta'nnë':

—¡Ta'zúdxinë'!

*Libán benë' Pedro lógaca bönachi zían*

14 Ní'irö Pedro guzuilenë' ia'chinéajë' gubáz na' nasöl-lë'ë Cristo, ate'  
 gusí lahuë' ru'ë zidzaj didza', rë' légaquië':

—¡Libí'ili', bönni' Judea, en yúgu'tëli' nacu'á'ali' yödzö Jerusalén! ¡Lë ni  
 ral-la' inözili'! ¡Buli'zë' nágali' le guía' libí'ili'! 15 Netu' ni biti' rizúdxitu' ca  
 na' réquili' libí'ili', tu' ni zóaru' sí' gala' xsila, ate' cuntu nu rizudxi hora  
 caní. 16 Lë ni naca le gunnë' Joel, bönni' bë'ë didza' uláz queë' Dios, gunnë':  
 17 Caní rnnë' Dios: Lë ni le gaca dza tsöjsétëgaca.

Isöl-la'a Bö' Lá'ayi quia', tsöjsóalenë' yúgu'të bönachi.

Zxí'inili', bönni', en nigula, ilu'í'ibi' didza' uláz quia' neda'.

Yugu' bi'i ra'bán ila'lé'ebi' le ulu'a lahui,  
 ate' yugu' bönni' gula ila'nenë' yëla.

18 Cate' idxín dza ni' quisia' Bö' Lá'ayi quia',  
 tsöjsóalenë' huen dxin quia', bönni', en nigula,  
 ate' ilu'ë didza' uláz quia' neda'.

19 Ulu'a lahui lúzxiba xitsá' le ilún ga ulu'bani bönachi,  
 ate' yödzölió ulu'a lahui le ilaca bë',  
 rön, en guí', en dzön ca böaj.

20 Ichul-la gubidza, ate' gaca beo' xiná ca naca rön.

Caní gaca cate' idxín dza ni' chibulu'ë Dios.

Gaca dza ni' le catu caz rilé'eru'.

21 Ulu'lágaca yúgu'të nupa ni' ulu'lidza Lë' Xanru',  
 lu yöl-la' réajlë' quéguequi Lë'.

22 'Buli'zë' nágali' lë ni guía' libí'ili', bönachi Israel. Dios caz benë' bal  
 Jesús, bönni' Nazaret ga zóali'. Dios bë'ë Lë' lataj benë' le tun ga rubániru',  
 yugu' yöl-la' huáca, en le taca bë'. Yúgu'të lë na' benë' Dios lu në'ë Jesús, ca  
 na' chinöz quézili'. 23 Lësca' caní, Dios bë'ë lataj nu budödi Jesús lu ná'ali'.  
 Caní guca, ca na' chigunná ládxë'ë Dios gunë', en ca naca le chibucözë' dza  
 ni'te. Libí'i cázali' guzxönlí'-në' Jesús, en bëtilí'-në' lu ná'agaquië' yugu'  
 bönni' tuá' dö', bönni' gulutië' Lë' cate' ni' bulu'dá'gaquië' Lë' lë'e yaga  
 cruz. 24 Ní'irö Dios caz busubanë' Jesús na'. Bubéajë' Lë' lu yöl-la' guti,

tu' cabí guca ugá'anë tsaz lu yöl-la' guti na'. <sup>25</sup> Ca naca lë ni, bë'ë didza' David uláz queë' Dios ca naca queë' Jesús, gunné':

Bilé'etiqui'sida'-në' Xanru', zoë' lahua'.

Lë' zoë' cuita lë'a ibëla, rizönë' neda', para cabí gaca nu bi gun quia'.

<sup>26</sup> Que lë ni na' budzeja ládxa'a, ate' lu yöl-la' rudzeja quia' bil-la'.

Que lë ni na' guna' löza Lë' cate' idxín dza gátia'.

<sup>27</sup> Xantu' Dios, nõzda' biti' ucá'anú' neda' lataj chul-la ga nacuá' nupa nátigaca.

Biti' gu'u lataj initi idútë le naca'.

Naca' bönni' nadxí'i quézinu' Li'.

<sup>28</sup> Buzéajni'inu' neda' ca ral-la' guna' para idéli'da' yöl-la' na'bán idú.

Gunu' ga udzëjada' tu' zóalen cazu' neda'.

<sup>29</sup> Na'a, libí'ili', böcha'a. Naca bë' gútië' xuz xtó'oru' David, en bigáchë'ë yeru ba, ate' ba queë' na' dë ga zóaru' ga ridxintë na'a dza. <sup>30</sup> David na' bë'ë didza' uláz queë' Dios, en gunözinë' benë' tsutsu Dios didza' le guzxí' lu në'ë queë', gunë' ga galjë' Cristo ladaj di'a dza queë' si' zá'gaca, ate' Cristo na' inná bë'ë xilatjë' David na'. <sup>31</sup> Tu' bilé'enë' David lë ni zí'alö, bë'ë didza' ca guca, bubanë' Cristo, en ca guca, biti' bugá'anë' lataj chul-la ga nacuá' nupa nátigaca, en biti' guniti le naca cazë'. <sup>32</sup> Dios busubanë' Jesús lu yöl-la' guti, ate' ca guca lë ni yúgu'tëtu' runtu' ba nalí que. <sup>33</sup> Caní guca, len yöl-la' huáca queë', Dios buchisë' Lë' xitsá' ga ni' nácatë'rë' zxon. Na'a, Cristo chigusöl-lë'ë Dios Bö' Lá'ayi ni, ate' raca ca na' guzxí' lu në'ë Dios gunë' lu në'ë Cristo, ate' Dios Bö' Lá'ayi na' runë' yugu' lë ni rilé'eli', en riyónili'. <sup>34</sup> Biti' buëpë' David na' yehua' yubá, pero lë cazë' David na' gunné':

Xanru' Dios gudxë' Xana':

Gurö'i cuita lë'a ibëla ga naca lo

<sup>35</sup> cate' gunra' ga ulu' zechu zxíbigaca nupa ta'dá'baga' Li' lo' Li'.

<sup>36</sup> Na'a, bönnachi Israel, ral-la' inözili' le nácatë. Dios benë' ga náquië' Lë cazë' Jesús ni Xanru', en Bönni' Rusölá, bönni' na' budá'ali'-në' lë'e yaga cruz.

<sup>37</sup> Cate' yugu' bönni' ni' bila'yönnë' lë ni, gula'bö'ë bönniga, ate' gulë' Pedro, en ia'zica'rë' bönni' gubáz queë' Cristo, ta'nnë':

—Böchi'ru', ¿nacxi gúntsatu'?

<sup>38</sup> Ní'irö Pedro gudxë' légaquië':

—Buli'bí'i ládxi'li', en guli'dila nisa tu tuli' lu Lë' Jesucristo para uniti lahuë' Dios dul-la' nabága'li', ate' Dios Bö' Lá'ayi idisóalenë' libí'ili', Nu na' isöl-lë'ë Dios. <sup>39</sup> Queëli' nequi le guzxí' lu në'ë Dios, en quégaca zxí'inili', enca' quégaca yúgu'të bönnachi izá'a, yúgu'të bönni' ni' ulidzë' Xanru' Dios légaquië'.

<sup>40</sup> Yugu' didza' ni, en ia'bal-la' zían didza' benë' ba nalí Pedro, le guchizië' icja nágagaquië', gunné':

—Guli'gún ga uláli', irúajli' lád'jagaca bönnachi tuá' dö' nacuá' dza ni zóaru' na'a.

<sup>41</sup> Caní guca, gula'dila nisa nupa ni' gula'zí' lu në'ë guequi didza' na' bë'ë Pedro. Dza na' ca chi uruá' gayuá' bönnachi gulún légaquië' tuz. <sup>42</sup> Gulunë' yúgu'të' idútë le bulu'sédinë' gubáz nasöl-lë'ë Cristo légaquië'. Guláquië'



tuz tuë' len ia'tué', en gulahuë' tsözxön le rusá' ládxi'ru' ca gútië' Jesús, ate' gulunë' tsözxön, bulu'lidzë' Dios.

*Ca tun bönachi queë' Cristo*

<sup>43</sup> Gulunë' gubáz queë' Cristo zían le run ga rubániru', en zían le taca bë', pero guladxi gula'dzöbi ia'zica'rö bönachi. <sup>44</sup> Yúgu'të nupa na' ta'yéajlë' Cristo gulaca tuz, ate' bulu'ún tuz yúgu'të le dë queéqueui. <sup>45</sup> Cate' bila'lé'enë' ta'yadzaj nupa nútsa'gaca ládjagaquië', ní'irö yugu' bönni' bi dë queégaquië' gulúti'ë le, ate' gula'guísië' dumí na' que queégaca nupa ni' bi ta'yadzaj. <sup>46</sup> Bulu'dubë' tsözxön chila yudo' yugu' dza, ate' gulahuë' le rusá' ládxi'ru' ca gútië' Xanru'. Caní gulunë' gapa naca lu yu'u lídxigaquië'. Gulahuë' tsözxön, ate' bulu'dzéjanë', en gulaca idú ládxi'gaquië'. <sup>47</sup> Gula'gu'ë Dios yöl-la' ba, ate' yúgu'të bönachi gulún légaquië' bal. Buzané' Xanru' nupa tu'dubi queë', nupa na' tu'lá tu tu dza.

### 3

*Ruhuóáquië' tu bönni' biti' raca së'ë*

<sup>1</sup> Tu dza ni' gula'benë' Pedro, en Juan, söjáquië' tsözxön lu chila yudo', cate' tu'dubi bönachi tu'lidza Dios ni', le naca idú ridödi xihuó. <sup>2</sup> Ga ni' ta'dödë' zoë' tu bönni' biti' raca së'ë dza ni'te ni' náquië' bí'ido'. Yugu' dza röjuá'gaquië' lë' ni', en ta'béquië' lë' ra' yudo' ga nazí'i le Ra' Yu'u Lachi, para inábinë' nu bi unödztasö queë' ladaj nupa ni' ta'yaza lö'a yudo'. <sup>3</sup> Bönni' ni, cate' bilé'enë' Pedro, en Juan, söjáquië' ta'yázië' lö'a yudo', gúta'yuë' lógaquië' bi ulu'nödztasë' queë'. <sup>4</sup> Ní'irö bulu'yúë' Pedro, en Juan lë', ate' Pedro gudxë' lë':

—Buyú netu'.

<sup>5</sup> Ní'irö bönni' na' buzëda' náquië' légaquië' tu' runë' löza bi ulu'nödztasë' queë'. <sup>6</sup> Pedro gudxë' lë':

—Biti' dë dumí plata, dumí oro quia', pero le dësö quia' gunna' quiu'. Ni'a que yöl-la' huáca que Lë' Jesucristo, bönni' Nazaret, guyasa, en guzë'e.

<sup>7</sup> Ní'irö gudélë'ë Pedro në'ë ibëla bönni' huë' na', en buchisë' lë', ate' la' böácate ni'ë, en buguitaj bëchaj ni'ë bönni' na'. <sup>8</sup> Ní'irö guzuínë' bönni' na', ate' guxíti'ë, en guzë'ë. Guyázalenë' tsözxön Pedro, en Juan, lö'a yudo', rizë'e ni'ë, en rixíti'ë, en rigu'ë Dios yöl-la' ba. <sup>9</sup> Yúgu'të bönachi nacua' ni' ta'lé'e lë' rizë'e ni'ë, en rigu'ë Dios yöl-la' ba. <sup>10</sup> Caní guca, guládxinë', en bulu'bábinë' ca naca lë' na' guca, tu' bulu'únbë'ë lë', náquië' bönni' na' ribö'ë ra' yudo' ga nazí'i le Ra' Yu'u Lachi, rinabë' nu bi unödztasö queë'.

*Didza' bë'ë Pedro chila yudo'*

<sup>11</sup> Tsanni ni' bönni' na' biti' guca së'ë, ate' böáquië', zönë' ná'agaquië' Pedro, en Juan, bulu'dubi yúgu'të bönachi ga na' nacu'ë chila yudo' nazí'i le: Chila Queë' Salomón, ate' gula'ná' badxë'. <sup>12</sup> Cate' bilé'enë' Pedro lë' ni, gudxë' bönachi na':

—Libi'ili', bönni' Israel, ¿bizx que rubánili' ca naca lë' ni? ¿Bizx que ruyuli' netu', en réquitseli' nétu'sö buntu'-në' bönni' ni, en bentu' ga rizë'e ni'ë len yöl-la' huáca queëztu', o ni'a que le reaj ládxi'tu'-në' Dios? <sup>13</sup> Naca lë' ni le benë' Dios. Náquië' Dios queégaquië' xuz gudödi queëru' Abraham, en Isaac, en Jacob. Lë' cazë' béntërë' bal Jesús, Xzí'inë'. Jesús ni, libí'i cázali' bëtili'-në' lu ná'agaquië' bönni' ta'nná bé'enë' libí'ili'. Cate' gú'unnë' Pilato usanë' Jesús, gudá'baga'li'-në'. <sup>14</sup> Buzóali' tsölá'alö Bönni' Tsahui', en Lá'ayi, ate' gunábili'-në' Pilato usanë' queë'li' tu bönni' rútië' bönachi.

15 Caní guca, bëtili'-në' Bönni' runna cazë' yöl-la' na'bán idú queëru'. Ní'irö Dios busubanë' Lë' lu yöl-la' guti, ate' ca naca lë ni runtu' ba nalí que. 16 Tu' guyéajlë'ë bönni' ni Jesús, böáca ni'ë. Rilé'eli'-në', en núnbë'ëli'-në'. Tu' réajlë'ë Jesús, Lë' bunë' dxi'ado' bönni' ni, ate' rilé'eli' yúgu'tëli' le nácatë na'.

17 Na'a, böcha'a, nözda' benli' caní, bëtili'-në' Jesús tu' cabí guyéajni'ili', en biti' gula'yéajni'inë' bönni' ta'nná bé'enë' libí'ili'. 18 Caní busudxinë' Dios didza' na' bë'ë zí'aló, le gula'nnë' bönni' gulu'ë didza' uláz queë' ca ral-la' qui'i sáquë'ë Cristo. 19 Que lë ni na', buli'bí'i ládxi'li', en buli'huóáca queë' Dios, para ugüë' dul-la' nabága'li', en gunë' ga huóáca ládxi'li'. 20 Ní'irö isól-lë'ë leyúbölö Jesús, Bönni' na' buzóë' dza ni'te para gáquië' Cristo, Bönni' Rö queë', Bönni' na' inná bé'enë' libí'ili'. 21 Na'a, run bayudxi ugá'anë' yehua' yubá ni' cate' idxinrö dza uduhuënë' tsahui' yúgu'të le raca, en gaca ca na' chigunná cazë' Dios, lë na' gula'nnë' bönni' gulu'ë didza' uláz queë', bönni' ni' gula'cu'ë dza ni'te. 22 Lësca' caní Moisés gudxë' xuz xtó'oru', gunné': "Xanru' Dios isól-lë'ë queëli' tu bönni' galjë' ládjagaca di'a dza queëli'. Gáquië' bönni' gu'ë didza' uláz queë' Dios. Isól-lë'ë Lë' queëli' ca na' gusól-lë'ë neda'. Run bayudxi uze nágali'-në' ca naca yúgu'të le guíë' libí'ili'. 23 Yúgu'të nupa biti' ulu'zë nágagaca bönni' ni' gu'ë didza' uláz queë' Dios ila'niti, en ulu'lá'alén bönachi queë' Dios."

24 Ca naca dza ni zóaru' na'a, gula'guíxjö'ë yúgu'të bönni' gulu'ë didza' uláz queë' Dios ga gudéla'të zoë' Samuel, en gudödi ni'. 25 Libí'ili' nácali' xzí'ini xísóagaquië' bönni' gulu'ë didza' uláz queë' Dios, ate' nequi queëli' didza' rucá'ana tsahui', le bënlenë' Dios xuz xtó'oru', cate' ni' gudxë' Abraham: "Ni'a que le gunë' xzí'ini xísú' ilaca bica' ba yúgu'të bönachi yödzölió." 26 Cate' Dios busubanë' Xzí'inë' lu yöl-la' guti, gusól-lë'ë Lë' zí'aló queëli' para gunë' ga gácali' bica' ba, en ucá'anali' le cabí naca dxi'a runli'.

## 4

### *Ta'dxinë' Pedro, en Juan lógaquië' bönni' yudo' tu'chi'a tu'söröë'*

1 Tsanni ni' bönachi na' tu'ilenë' Pedro, en Juan, didza', yugu' bixúz judío, en yugu' bönni' yudo' saduceo, en bönni' ta'nná bé'enë' ni'a ná'agaquië' bönni' yudo', bila'dxinë' tsáldo'os ga na' nacu'ë. 2 Gula'lenë' bönni' ni tu' tu'sédinë' Pedro, en Juan, bönachi, en të' léguequi ulu'bán nupa chinátigaca tu' bubanë' Jesús. 3 Ní'irö gula'zönë' Pedro, en Juan, ate' gula'gu'ë légaquië' lidxi guíë ga idxinrö dza yúbölö tu' chiridzö' dza na'. 4 Zían nupa ni' bila'yöni didza' gulu'ë Pedro, en Juan, gula'yéajlë' Cristo. Na'a, yugu' bönni' biguiú'sö ta'yéajlë'ë Cristo nácagaquië' idú chi-un gáyu'ë.

5 Dza buropi ni', yugu' bönni' unná bë', en bönni' gula tu'z'éajni'inë' bönachi judío, en yugu' bönni' yudo' usëdi, bulu'dubë' lu yödzö Jerusalén. 6 Lësca' Anás, bixúz lo, en Caifás, en Juan, en Alejandro, enca' yúgu'të bönni' di'a dza quégaquië' bixúz lo bulu'dubë' ni'. 7 Ní'irö duchë'gaquië' Pedro, en Juan, ate' bulu'sudxinë' légaquië' gatsaj láchui'lö ga na' nacu'ë, en gula'nábinë' légaquië', ta'nnë':

—¿Bizxi yöl-la' unná bë' dë lu ná'ali' runli' lë ni? ¿Nuzxi budödi lu ná'ali' yöl-la' unná bë' ni?

8 Ní'irö Pedro gudxë' légaquië', zóalenë' Dios Bö' Lá'ayi lë', rnnë':

—Libí'ili', núloli' rinná bé'eli' netu', bönachi Israel, en libí'ili', bönni' gula. 9 Na'a, çrinábitseli' netu' ca naca dxin dxi'a bentu' queë' bönni'

huë' ni, en nacxi guca, böáquië' bönni' ni? <sup>10</sup> Riguíxjöi'itu' libí'ili' para ila'nözi yúgu'të bönachi Israel. Zoë' bönni' ni loli', nuhuóáquië' tu' ben dxin yöl-la' huáca queë' Jesucristo, bönni' Nazaret, Bönni' ni' budá'ali-në' lë'e yaga cruz, pero Dios busubanë' Lë' lu yöl-la' guti. <sup>11</sup> Dios bë'ë didza' ca naca queë' Jesús ni, cate' ni' gunné': "Libí'ili', bönni' rucuá'ali' zö'ö, gurú'unali' guiój na', pero guró caza' neda' guiój na' para gaca guiójlen zö'ö." <sup>12</sup> Cúnturö nu zoa nu gaca usölä bönachi, tu' cabí zoa yödzölió ni ia'túë' bönni' nuzóë' Dios, nu gaca usölä rë'u.

<sup>13</sup> Cate' bila'lé'enë' nácagaquië' rugu ladxi' Pedro, en Juan, en guléquibe'enë' bití' nazëdagaquië' que yudo', en nácagaquië' bönni' cá'asö, bulu'bánninë', ate' yójnéqueuinë' Pedro, en Juan na', gula'cuá'lenë' Jesús. <sup>14</sup> Lësca' bila'lé'enë' bönni' na' böáquië', zuínë' lógaquië', ate' bití' guca bi ila'nnë' quégaquië'. <sup>15</sup> Ní'irö gula'nná bé'enë' nupa ulu'béaj légaquië' lö'aló yu'u ga na' nudúbigaquië', ate' gulún xtídzë'ë la' légacasë'. <sup>16</sup> Gula'nnë':

—¿Nacxi güntsaru' quégaquië' bönni' ni? Le nácatë gulunë' tu le run ga tu'bani bönachi, ate' nözigaca yúgu'të bönachi nacua' Jerusalén lë ni. Bití' gaca tá'baga'ru' le. <sup>17</sup> Na'a, para cabí sërö didza', en ila'yöni zíanrö ca' bönachi, uzeru' bach légaquië' para cabí iluf'ilenrë' bönachi didza' ca naca queë' Jesús na'.

<sup>18</sup> Ní'irö bulu'lidzë' Pedro, en Juan, ate' bulu'zenë' bach légaquië' para cabí iluf'ilenrë' bönachi didza', en para cabí ulu'sédinë' légaquië' ca naca queë' Jesús. <sup>19</sup> Ní'irö bulu'bi'ë didza' Pedro, en Juan. Gulë' légaquië':

—Buli'chi'a buli'sörö libí'ili' channö naca tsahui' lahuë' Dios uzërö nágatu' xtídzá'li' libí'ili' ca xtídzë'ë Dios. <sup>20</sup> ¡Bití' gaca soa dxitu'! ¡Run bayudxi güf'itu' didza' que le bilé'etu', en le biyönitu'!

<sup>21</sup> Ní'irö yugu' bönni' yudo' tu'chi'a tu'söröë' bulu'zenë' bach légaquië', pero bulu'sané' légaquië' tu' cabí gula'dzölinë' nacxi ilunë' légaquië' xíguia'. Caní gulunë' tu' guládxinë' le ilún bönachi lu yödzö ni', tu' ta'gú'u Dios yöl-la' ba ni'a que lë na' guca. <sup>22</sup> Bönni' na' böáquië', en guca queë' lë na' run ga rubániru', chiyú'urë' ca choá' iz.

*Ta'nábinë' Dios gunë' ga ilácagaquië' rugu ladxi'*

<sup>23</sup> Cate' bönni' yudo' bulu'sané' Pedro, en Juan, böajgaquië' ga na' nacua'ë luzá'agaquië', ate' bulu'siyönnë' légaquië' yúgu'të lë na' gula'nnë' yugu' bixúz unná bë', en bönni' gula tu'zéajni'inë' bönachi judío. <sup>24</sup> Cate' bila'yönnë' lë ni, bulu'lidzë' Dios tsözxön, gula'nnë':

—Xantu' Dios, ¡zxöntërö nacua' Li'! ¡Li' nacua' Dios! ¡Benu' lúzxiba! ¡Benu' luyú! ¡Benu' nísado'! ¡Benu' yúgu'të le nacua' tu tu lataj na'! <sup>25</sup> Uláz quiu' Li' bë'ë didza' David, bönni' huen dxin quiu', ni' zóalenë' Dios Bö' Lá'ayi lë', gunné':

¿Bizx que tun dzatsa bönachi,  
en ta'zá' ládxi'gaca le ruá' dö'?

<sup>26</sup> Yugu' bönni' ta'nná bë'ë yödzölió ni gulún dzatsë',  
ate' guláquië' tuz bönni' unná bë'.

Gula'dá'báguë'ë Xanru' Dios,  
enca' Cristo, bönni' guró cazë' Lë'.

<sup>27</sup> Le nácatë guláquië' tuz Herodes, en Poncio Pilato, en yugu' bönni' izá'a, en yugu' bönni' Israel lu yödzö ni. Gula'dá'báguë'ë Jesús, Zxi'inu' lá'ayi, Bönni' na' buzú' queëtu'. <sup>28</sup> Gulunë' yúgu'të le bucözu' zí'atëlö, en guzxi' lu no'o, ate' guca ca na' benu' tsutsu xtídzu'u ca ral-la' gaca. <sup>29</sup> Na'a, Xantu', buyú le tu'zenë' bach netu', en ben ga gácatu' rugu ladxi', para

gü'itu' xtídzu'u, netu' bönni' huen dxin quiu'. <sup>30</sup> Ben ga gaca úngacatu' nupa te'e, tu' sóalen yöl-la' huáca quiu' netu', en ben ga gaca gúngacatu' le ilún ga ubánitu', en le ilaca bē'. Gaca caní tu' zóalenē' Jesús, Zxí'ínu' lá'ayi, netu'. ¡Ca' gaca!

<sup>31</sup> Cate' budxi bulu'lidzē' Dios, guzxizi lataj ga na' nacu'ē, ate' Dios Bö' Lá'ayi guzóalenē' yúgu'tē', ate' len yöl-la' rugu ladxi' quégaquiē' gulu'ē xtídzē'ē Dios.

*Tu'únē' tuz le dē quégaquiē'*

<sup>32</sup> Bönachi zían na' ta'yéajlē' Cristo, tuz ca ta'zá' ládxi'guequi, en tuz ca gulúngaca. Biti' gunné' nu bönni' nútsē'ē ládjagaquiē' nequi queēzē' le dē queē', pero bulu'únē' tuz le dē quégaquiē'. <sup>33</sup> Len yöl-la' huáca zxon gula'guíxjō'ē gubáz na' nasól-lē'ē Xanru' Jesús ca bubané' Lē', ate' le buzá' ládxe'ē Dios quégaquiē' gúcalen yúgu'tē'. <sup>34</sup> Cuntu nu bi biyadzaj nu nutsa' ládjagaquiē'. Caní guca tu' yúgu'tē bönni' zoa bi dē quégaquiē', xiyúgaquiē', o lídxiagaquiē', gulúti'ē le, ate' dumí que na' yójuá'gaquiē', <sup>35</sup> en bulu'dödē' le lu ná'agaquiē' gubáz na' nasól-lē'ē Cristo, ate' légaquiē' gula'guísiē' le que queēgaca nupa bi biyadzaj quéguequi. <sup>36</sup> Zoē' José ni', bönni' bulu'zōē' gubáz na' nasól-lē'ē Cristo ia'tú lé' Bernabé, le rnna lu didza' xidza', Bönni' Ruhué Tsáhuē'ē. Nabábalenē' zxi'ini xi'sóé' Leví, en guljē' luyú Chipre. <sup>37</sup> Bēti'ē bönni' ni tu cō' xiyúē', ate' yóju'ē dumí que na', en budödē' le lu ná'agaquiē' gubáz na' nasól-lē'ē Cristo.

## 5

*Dul-la' gulunē' Ananías, en Safira*

<sup>1</sup> Tu bönni' yúbölō lē' Ananías, bēti'ē tu cō' xiyúē'. Safira, nigula queē', bennu tsözxón lē'. <sup>2</sup> Ananías na' bucachi' lanē' late' dumí que yu na', ate' nōzinu ca' nigula queē'. Le bugá'anasō yóju'ē, en gulu'ē le lu ná'agaquiē' gubáz nasól-lē'ē Cristo. Rnnē':

—Tsca nisō guzxi'a.

<sup>3</sup> Pedro gudxē' lē':

—Ananías, ¿naru' guyázatsō Satanás tu' xihui' lu icja ládxi'do'o, en ben ga rizí' yé'enu' Dios Bö' Lá'ayi, ate' bucachi' lanu' late' dumí que xiyú' na'?

<sup>4</sup> Tsanni ni' nagá'ana yu na' lu no'o, ¿naru' cabí nequi quez quiu'? Gudödi bēti'u le, ¿naru' cabí dē caz lu no'o dumí que na'? ¿Bizx que gurō'ō icju' gunu' caní? Dios caz guzxi' yé'enu', calēgasō bönachi.

<sup>5-6</sup> Cate' biyönnē' Ananías didza' ni, gudzō'ē, en gútité'. Ní'irō gula'bíga'tēbi' bi'i ra'bán, ate' bulu'chólibi' lē' lari', en guluá'abi' lē', en yójcáchi'gacabi' lē'. Guladxi gula'dzōbi yúgu'tē nupa ni' bila'yōni ca guca lē ni.

<sup>7</sup> Ca tsonna hora gudödi ni', bidxinnu nigula queē' Ananías na' ni', en biti' nōzinu lē na' guca queē' bönni' queēnu. <sup>8</sup> Ní'irō Pedro gudxē'-nu:

—Gudíxjō'i neda'. ¿Naru' guzxi'ili' tsca nisō xiyuli' na'?

Gunnánu:

—Ōn, tsca nisō guzxi'itu'.

<sup>9</sup> Ní'irō Pedro gudxē'-nu:

—¿Bizx que ben tuz xtídzali' guzxi' bē' xihui'li' Dios Bö' Lá'ayi? Buyútsōca'. Chizóa ulu'dxinbi' yugu' bi'i bulu'cáchi'bi'-nē' bönni' quiu', ate' ulu'béajbi' ca' li'.

<sup>10</sup> Ní'irō la' gudzō'tēnu xini'ē Pedro, en gútiténu. Cate' gula'yázabi' bi'i ra'bán na', gula'lé'ebi'-nu chinátinu. Ní'irō bulu'béajbi'-nu, en

yöjčáchi'gacabi'-nu cuita lë'ë bönni' queénu. <sup>11</sup> Que lë ni na' guladxi gula'dzöbi yúgu'të bönachi queë' Dios, ate' guladxi ca' yúgu'të nupa bila'yöni ca guca lë ni.

*Tunë' bönni' gubáz nasöl-lë'ë Cristo le taca bë'*

<sup>12</sup> Gulunë' bönni' gubáz na' nasöl-lë'ë Cristo zían le taca bë', en zían yöl-la' huáca zxon lógaca bönachi lu yödzo. Yúgu'të' bulu'dubë' tsözxön ga naca chila yudo' nazí'i le Chila Queë' Salomón. <sup>13</sup> Ladaj nupa ni' biti' ta'yéajlë' Cristo, cuntu nu burugui tsöjtá' légaquië', ate' bönachi lu yödzo ni' gulún légaquië' bal. <sup>14</sup> Ní'irö ia'bal-la bönachi zían ca' gula'yéajlë' Cristo, bönni', en nigula. <sup>15</sup> Cate' bila'lë'e bönachi yugu' le tunë' bönni' ni' ta'yéajlë'ë Cristo, yöjuá'agaca nupa te'e gapa naca la' nöza, ate' gula'xöë' léguequi lu da'a yaga, en ia'bal-la lu dá'asö, para cate' tödë' ni' Pedro, tsa zxúl-lasö queë' cu'u zzul-la bal-la bönachi huë' na', para ulu'huóaca. <sup>16</sup> Lësca' bila'rúaj bönachi yugu' dzaga yödzo, en bila'dxin Jerusalén, nuá'agaca nupa te'e, en nupa ta'gu'i ta'zaca' tu' yú'ugaca bö' xihui' léguequi, ate' bulu'huóaca yúgu'téguequi.

*Bönni' yudo' ta'bia ladxigaquië' bönni' gubáz nasöl-lë'ë Cristo*

<sup>17</sup> Que lë ni na' bixúz lo, en bönni' yudo' saduceo na' dá'gaquië' bixúz lo, bulu'zxé'enë' Pedro. <sup>18</sup> Ní'irö bixúz lo na', en bönni' na' dá'gaquië' lë' gula'zönë' gubáz na' nasöl-lë'ë Cristo, ate' gula'gu'ë légaquië' lidxi guié. <sup>19</sup> Ní'irö bidxinë' gubáz lá'ayi queë' Xanru' chi'i dzö'ölö, ate' gusaljë' lidxi guié na', en bubéajë' légaquië'. <sup>20</sup> Gubáz lá'ayi na' gudxë' légaquië', rnnë':

—Guli'tséaj, guli'tsöjsóa chila yudo', en guli'tsöj'len bönachi ni' didza', quíxjöi'ili' légaquië' ca naca yöl-la' na'bán idú ni, en ca gaca ila'déli'në' le.

<sup>21</sup> Cate' bila'yönnë' didza' ni ru'ë gubáz lá'ayi na', gula'yázië' chila yudo' cate' za' rení' zílado', en bulu'sédinë' bönachi.

La' ní'sö bulu'dubë' bixúz lo, en nupa nacua'len lë' tsözxön, len bönni' yudo' tu'chi'a tu'söröë', en bönni' gula tu'zéajni'inë' bönachi Israel, ate' gula'söl-lë'ë nupa tsöjaca lidxi guié para tsöjxi'gaquië' yugu' gubáz na' nasöl-lë'ë Cristo, tu' téquinë' ni' nacu'ë lidxi guié na'. <sup>22</sup> Cate' ni'a ná'agaquië' bönni' yudo' na' bila'dxinë' ni', biti' yöjxáca'gaquië' légaquië' lu yu'u lidxi guié na', ate' ní'irö bulu'huóajë' tsöjtíxjö'gaquië' ca'. <sup>23</sup> Gulë' bönni' yudo' tu'chi'a tu'söröë' na', ta'nnë':

—Le nácatë yöjxáca'tu' nayáyajtë lidxi guié, ate' nacua' nupa tun chi'i ra' lidxi guié na', pero cate' gusalajtu', cuntu nu yöjxáca'tu' lu yu'u na'.

<sup>24</sup> Cate' bixúz lo, en yugu' bixúz unná bë', en bönni' nacua' lu në'ë ni'a ná'agaca bönachi yudo', bila'yönnë' didza' ni, gula'bö'dë'ë böniga tu' cabí nöziguequinë' bizxi guntë lë na' raca. <sup>25</sup> Ní'irö bidxinë' tu bönni' ni', en gudíxjöi'inë' légaquië', rnnë':

—Buli'yútsöca'. Yugu' bönni' na' gulú'ugacali'-në' lidxi guié nacu'ë chila yudo' tu'sédinë' bönachi.

<sup>26</sup> Ní'irö guyijë' bönni' na' rinná bé'enë' ni'a ná'agaca bönachi yudo', dzágagaquië' lë' ni'a ná'agaquië' na', ate' gula'ché'ë yugu' gubáz na' nasöl-lë'ë Cristo, pero biti' bi gulunë' quégaquië', tu' guládxinë' ulu'ladxí' bönachi nacua' ni' légaquië' guió. <sup>27</sup> Cate' chinaché'gaquië' yugu' gubáz na', bulu'sudxinë' légaquië' lógaquië' bönni' yudo' tu'chi'a tu'söröë' na', ate' bixúz lo gunábinë' légaquië', rnnë':

28 —¿Naru' cabí gúdxida'atu' libí'ili' bití' usédili' bönachi ca naca queë' bönni' na'? Na'a, chigudísili' xibá ni idútë yödzo Jerusalén, en ré'ënili' usubága'li' netu' xíguia' tu' nōzi yöl-la' guti queë' bönni' na'.

29 Ní'irō bulu'bi'ë didza' Pedro, en ia'zica'rë' gubáz na' nasöl-lë'ë Cristo, ta'nnë':

—Run bayudxi uzërō nágatu' xtídzë'ë Dios ca xtídz'a'gaca bönachi. <sup>30</sup> Libí'ili' bëtili'-në' Jesús cate' ni' budá'ali'-në' lë'e yaga cruz, pero Dios quégaquië' xuz xtó'oru' busubanë' Lë'. <sup>31</sup> Jesús ni, Dios buzóa cazë' Lë' ga nayëpisëtërë' cuita lë'ë ibëla, para gáquië' Bönni' Lo, en Bönni' Rusölá, en gunë' ga ulu'bí'i ládxi'gaca bönachi Israel, para gaca uniti lahuë' dul-la' nabága'gaquië'. <sup>32</sup> Ca naca lë ni, runtu' netu' ba nalí que, ate' lësca' runë' Dios Bō' Lá' ayi ba nalí que, Bō' na' risöl-lë'ë Dios quégaca nupa tun ca rnna xtídzë'ë.

<sup>33</sup> Cate' bila'yönnë' bönni' yudo' tu'chi'a tu'söröë' na' lë ni, gula'lenë', en gulë'ënnë' ilútië' légaquië'. <sup>34</sup> Ní'irō guzuínë' tu bönni' yudo' ruchi'a rusöröë' lógaquië', lë' Gamaliel, tu bönni' yudo' fariseo. Rácadë'ë bönni' ni xibá queë' Moisés, ate' yúgu'të bönachi tun lë' bal. Gudxë' nupa na' ulu'béaj yugu' gubáz na' nasöl-lë'ë Cristo lö'alō tu chí'ido'. <sup>35</sup> Ní'irō gudxë' bönni' yudo' tu'chi'a tu'söröë' na', gunnë':

—Libí'ili', bönni' Israel, buli'yutëz queëli' ca naca le ré'ënili' gunli' quégaquië' bönni' ni. <sup>36</sup> Ral-la' tsöjnéli' ca guca zí'atëlō cate' si' idxín dza ni zōaru' na'a. Birúajë' Teudas, ate' ben cuinë' ca tu bönni' nayëpisëtërë'. Guláquië' bönni' yöjtá'gaquië' lë' idú tapa gáyu'ë bönni'. Yugu' bönni' röjáquië' gudil-la gulútië' lë', ate' gulásilasi yúgu'të nupa ni yöjtá'gaca lë', ate' gunítisō ca' yúgu'të le benë' bönni' na'. <sup>37</sup> Gudödi guca lë ni, birúajë' ca' Judas, tu bönni' Galilea. Benë' caní cate' ni' gula'yú'u lu guichi bönachi ta'guízzaj lázagaquië', ate' yöjtá'gaca bönachi zían lë'. Lësca' gulútië' bönni' ni, ate' gulásilasi yúgu'të nupa ni yöjtá'gaca lë'. <sup>38</sup> Que lë ni na' rea' libí'ili': Guli'sán-gaquië' bönni' ni, en bití' bi' gunli' quégaquië'. Channō naca quégacasō bönachi lë ni ta'nnë' o lë ni tunë', initi caz, <sup>39</sup> pero channō naca queë' Dios, bití' gaca usunítili' le. ¡Buli'yú cuinli' cabí tíl-lalenli'-në' Dios!

<sup>40</sup> Ní'irō gulunë' tuz didza' len lë'. Bulu'lidzë' yugu' gubáz na' nasöl-lë'ë Cristo, ate' gula'guinë' légaquië', en bulu'zenë' légaquië' bach para cabirō ilu'ilenë' bönachi didza' ca naca queë' Jesús. Ní'irō bulu'sanë' légaquië'. <sup>41</sup> Bila'rúajë' gubáz na' nasöl-lë'ë Cristo lógaquië' bönni' yudo' tu'chi'a tu'söröë' na'. Tu'dzéjanë' tu' bë'ë Dios légaquië' lataj gula'guí'i gula'záquë'ë tu' dá'gaquië' Jesús. <sup>42</sup> Yugu' dza bulu'séditiqui'sinë' bönachi, en gulunë' libán queë' Jesucristo lu chila yudo', en gapa naca lu yu'u lídxigaca bönachi.

## 6

### *Ta'böë' gadxi bönni' para ilácalenë' bönachi queë' Cristo*

<sup>1</sup> Dza ni', tu' gula'yán bönachi ta'yéajlë' Cristo, yugu' bönni' judío tu'ë didza' griego gula'nnë' quégaquië' bönni' judío tu'ë didza' hebreo tu' nōzi le raca cate' ta'guísië' le ilágunu nigula uzëbi, tu' cuntu nu ruí'i le ilágunu nigula uzëbi quégaquië' bönni' ni' tu'ë didza' griego. <sup>2</sup> Ní'irō idxínnutë' bönni' gubáz na' nasöl-lë'ë Cristo bulu'tubë' yúgu'të bönachi ni' ta'yéajlë' Cristo, ate' tē' légaquië':

—Biti' naca dxi'a soa dxitu', en cabí guntu' libán que xtídzë'ë Dios, para guntu' dxin cú'utu' le ilágugaca bönachi. <sup>3</sup> Que lë ni na', böchi' luzá'atu', guli'cö gadxë' bönni' ladjali', para ugú'uru' lu ná'agaquië' dxin ni. Yugu' bönni' na' run bayudxi ilácagaquië' bönni' tun yúgu'të bönachi légaquië' bal, en nácagaquië' bönni' ta'yéajni'i, en naca bë' Dios Bö' Lá'ayi zóalenë' légaquië'. <sup>4</sup> Netu' ni ulídzatica'stu'-në' Dios, en uséditu' bönachi xtídzë'ë Dios.

<sup>5</sup> Yúgu'të' gula'yaza láchxi'gaquië' didza' ni, ate' gula'böë' Esteban, tu bönni' réajlë'ë Cristo idú láchxë'ë, en zóalenë' Dios Bö' Lá'ayi lë'. Lësca' gula'böë' Felipe, en Prócoro, en Nicanor, en Timón, en Parmenas, en Nicolás, bönni' yödzö Antioquía, bönni' zí'alö butsé'ë ca runë' para tseaj láchxë'ë Dios ca tunë' yugu' bönni' judío. <sup>6</sup> Ní'irö bulu'sudxinë' bönni' na' gula'böë' lógaquië' gubáz na' nasól-lë'ë Cristo. Yugu' bönni' gubáz na' gula'xóa ná'agaquië' légaquië', ni' tu'lidzë' Dios.

<sup>7</sup> Guzërö xtídzë'ë Xanru', ate' gula'yanda' bönachi ta'yéajlë' Cristo nacua' Jerusalén. Lësca' zían bixúz judío gula'zí' lu ná'agaquië' le réajlë'ëru' Cristo.

### *Ta'zönë' Esteban*

<sup>8</sup> Esteban na' benë' le tun ga rubániru', en yugu' le taca bë' lógaca bönachi lu yödzö, zóalen yöl-la' huáca queë' Dios lë' le buzá' láchxë'ë queë'. <sup>9</sup> Ní'irö gula'yasë' bal-lë' bönni' nabábagaquië' yu'u ga tu'dubë' bönni' judío, en tu'sedë' queë' Dios, nazí'i le Yu'u Quégaquië' Bönni' Nadzángaquië'. Bönni' narúajgaquië' yödzö Cirene, en yödzö Alejandria, en luyú Cilicia, en luyú Asia, gulunë' légaquië' tsözxön. Bönni' ni gula'díl-lalenë' Esteban didza'. <sup>10</sup> Biti' guca tá'bagá'gaquië' didza' ru'ë Esteban na', tu' bë'ë didza' len yöl-la' réajni'i, tu' zóalenë' Dios Bö' Lá'ayi lë'. <sup>11</sup> Ní'irö gula'guíxjë' bönni' ila'zí' yë'ë, ila'nnë': "Netu' biyönitu' didza' ru'ë Esteban ni, rnnë' zì'ë queë' Moisés, en queë' Dios." <sup>12</sup> Caní guca, bönni' ni gula'gu'ë xilá láchxi'gaca bönachi, tsözxön len bönni' gula'tu'zéajni'inë', en yugu' bönni' yudo' usëdi. Yúgu'të bönni' ni gula'bía di'ë Esteban na'. Gula'zönë' lë', en gula'chë'ë lë' lógaquië' bönni' yudo' tu'chi'a tu'söröë'. <sup>13</sup> Lësca' bulu'cu'ë lógaquië' nupa gula'guíxjö' le cabí nácatë, bönni' na' gula'nnë':

—Biti' zoë' dxisö bönni' ni rnnë' zì'ë que yudo' lá'ayi ni, en que xibá queë' Dios. <sup>14</sup> Biyönitu' didza' bë'ë bönni' ni ca gunë' Jesús, bönni' Nazaret, rnnë' usunítie' yudo' ni, en utsë'ë yugu' le nalëbiru' runru', yugu' lë na' gunná bé'enë' Moisés rë'u.

<sup>15</sup> Ní'irö bönni' yudo' tu'chi'a tu'söröë', en yúgu'të nupa rö'gaca ni' bulu'yúë' Esteban, ate' bila'lë'enë' lahuë', rna' ca rna' lahuë' tu gubáz lá'ayi queë' Dios.

## 7

### *Didza' bë'ë Esteban, le gunné' uláz queë'*

<sup>1</sup> Ní'irö bixúz lo gunábinë' Esteban na', rnnë':

—¿Naru' nácatë caní?

<sup>2</sup> Bubi'ë didza' Esteban, rnnë':

—Libi'ili', bönni' gula, en libi'ili', böcha'a. Buli'zë nágali' le guía' libi'ili'. Dios, Bönni' nayëpisëtë'rë', bulu'i lahuë' ga zoë' Abraham, xúziru' gudödi, cate' ni' zoë' luyú Mesopotamia, cate' si' tsöjsöë' yödzö Harán. <sup>3</sup> Dios gudxë' lë': "Birúaj ladzu', en bulá'alén di'a dza quiu', ate' guyéaj luyú ni' uluí'da' li'." <sup>4</sup> Ní'irö birúajë' Abraham luyú Mesopotamia le naca

xiyúgaca bönachi Caldea, ate' yöjsóé' yödzö Harán. Lu yödzö ni' gútié' xuzé' Abraham na', ate' lé' buzé'è ni', ate' Dios guché'è lé' luyú ga ni zóaru' na'a. <sup>5</sup> Dios biti' bē'è lé' lataj guequi queé' luyú ni. Caléga láti'sö bunödzjē' queé' ga soē' luyú ni, pero guzxi' lu në'è Dios unödzjē' queé' luyú ni, ate' tödi gátiē' Abraham guequi luyú ni quegaca xzi'ini xi'sóé', sal-la' biti' nacu'ínibi' bi'i queé'. <sup>6</sup> Lësca' caní Dios gudxē' Abraham: "Tsöjáquiē' xzi'ini xi'sú' lu xiyúgaca bönachi izá'a, ate' ni' ilácagaquiē' ca bönachi zi'tu'. Ilunē' bönni' luyú ni' ga ilácagaquiē' xzi'ini xi'sú' bönni' nadó'ogaquiē'. Ulu'saca' zi'è légaquiē' idú ca tapa gayuá' iz." <sup>7</sup> Lësca' Dios gudxē' lé': "Neda' uzötja' bönachi luyú ni', ga ni' ilácagaquiē' xzi'ini xi'sú' bönni' nadó'ogaquiē', ate' tödi ni' ulu'rúajē' ni', ate' ilunē' xichina' luyú ni." <sup>8</sup> Dios bénlenē' Abraham tu didza' rucá'ana tsahui', en gunná bé'enē' lé' ichúguiē' lu xipéla'gaquiē' bönni' biguíu' nacu'è lidxē' tu le gaca bē' nazi' lu ná'agaquiē' didza' na' rucá'ana tsahui'. Gudödi ni' gúquiē' Abraham xúzibi' bi'i Isaac, en cate' chigúquibi' xunu' gubidza, guchúguiē' lu xipéla'bi' lé na' naca bē'. Isaac na', lësca' caní benē' queēbi' bi'i Jacob, xzi'inē', en caní benē' ca' Jacob quegaca idxínntēbi' bi'i bönni' queé', nupa ni' gulaca xuz xtó'ogaca idxinnu có' bönachi Israel.

<sup>9</sup> 'Yugu' xuz xtó'oru' na', lu yöl-la' ruzxē'e quegaquiē', gulúti'ē-bi' bi'i José, böchi'gaquiē', lu ná'agaquiē' bönni' ni' gulúti'gaquiē'-bi' luyú Egipto. Dios guzóalenē'-bi' bi'i José na' <sup>10</sup> en busölē'-bi' lu le gulaca queēbi'. Dios bē'è-bi' yöl-la' réajni'i, le ben ga guyaza ládxē'è-bi' Faraón, bönni' rinná bé'enē' bönachi Egipto, ate' Faraón na' budödē' lu ná'abi' bi'i José yöl-la' unná bē' para gunná bé'ebi' bönachi luyú Egipto, en yúgu'tē bönachi nacuá' lidxē' Faraón na'.

<sup>11</sup> Ní'irö gúcada' gubín idú luyú Egipto, en luyú Canaán ni, ate' gula'gu'i gula'zaca' yúgu'tē bönachi dza ni'. Biti' bidzöli le ilahuē' xuz xtó'oru'. <sup>12</sup> Cate' biyönnē' Jacob dē zxoá' xtila luyú Egipto, gusöl-lē'è yugu' xzi'inē', bönni' ni' nácagaquiē' xuz xtó'oru', luyú ni'. Caní guca le zí'alö luzuí yöjáquiē' ni'. <sup>13</sup> Cate' le buropi luzuí yöjáquiē' luyú Egipto, benē' José ga bulu'únbē'è böchē'è lé'. Caní guca, gunözinē' Faraón nupa nácagaca di'a dza queé' José. <sup>14</sup> Ní'irö gusöl-lē'è José didza', en benē' ga bidxinē' Jacob, xuzé', luyú Egipto, ate' dzágagaca di'a dza queé' lé'. Gulaca idú tsónnalalaj yu' chinu bönachi. <sup>15</sup> Caní guca, bidxinē' Jacob luyú Egipto, ga ni' gútiē' lé', ate' gulátiē' ca' xuz xtó'oru' luyú ni' cate' bizá'a dza que queégaquiē'. <sup>16</sup> Cate' gulátiē' tu tu xuz xtó'oru', xzi'ini xi'sóagaquiē' yöjuá'agaquiē' légaquiē' luyú Siquem, ate' ni' bulu'cáché'è légaquiē' yeru ba lu zxan bulóaj na' gú'uē' Abraham lu ná'agaca xzi'inē' Hemor, bönni' Siquem na'.

<sup>17</sup> Gudödi zían iz, cate' bidxín dza ral-la' gaca le guzxi' lu në'è Dios, lé na' benē' tsutsu xtídzē'è gunē' queé' Abraham, gula'yán bönachi yugu' có' Israel, ate' gulaca bönachi zían cate' ni' gula'cuá' luyú Egipto. <sup>18</sup> Ní'irö guyáziē' bönni' yúbölö gunná bē'è luyú Egipto na', en catu caz biyönnē' ca naca le benē' José, gúcalenē' bönachi Egipto. <sup>19</sup> Bönni' unná bē' na' bi'è dö' quegaca bönachi uládz queēru'. Busaca' zi'è yugu' xuz xtó'oru' na', en benē' ga bulu'sanē'-bi' bi'i bönni' huē'enido' que queégaquiē', para ilátibi'. <sup>20</sup> La' dza ní'isö gúljabí' ca' bí'ido' Moisés, ate' Dios guyaza ládxē'è-bi'. Xuz xiná'abi' bulu'sculē'-bi' lídxigaquiē' idú ca tsonna beo'. <sup>21</sup> Cate' bidxín dza ulu'sanē'-bi' xuz xiná'abi' para gátibi' bí'ido' Moisés na', bidxinnu nigula xzi'inē' Faraón ga ni' bulu'cá'anē'-bi', ate' yöjzxi'ínu-bi', en busculunu-bi'



ca bi'i que cázanu. <sup>22</sup> Caní guca, bizédabi' bi'i Moisés yúgu'tè le táquiè' bönni' Egipto, en gúcatèröbi' zxön ca naca didza' bë'ëbi', en ca nácagaca le benbi'.

<sup>23</sup> 'Cate' Moisés na' chiyú'ubi' choá' iz, gunná ládxi'bi' tsöjyubi' bönachi uládz queëbi', bönachi Israel. <sup>24</sup> Cate' bidxinbi' ga na' nacu'ë, bilé'ebi'-nè' tu bönni' Egipto, rusaca' zi'è tu bönni' uládz queëbi'. Ní'irö gúcalenbi'-nè' bönni' uládz queëbi' na', en bétibi'-nè' bönni' Egipto na'. Caní guca, buzí' labi' bi'i Moisés bönni' na' uláz queë' bönni' uládz queëbi'. <sup>25</sup> Gúquibi' Moisés huala'yéajni'inè' bönni' böchi'bi' gunè' Dios ga usölábi' lè cázabi' légaquiè', pero légaquiè' biti' gula'yéajni'inè'. <sup>26</sup> Ia'tú dza ca' yöjxáca'bi' ia' chopè' bönni' Israel, ta'dil-lè', ate' gú'unibi' cuéqui dxibi' légaquiè', en gúdxibi' légaquiè': "Libí'ili', böchi'li' naca. ¿Bizx que ruá'ali' luzá'ali' dö'?" <sup>27</sup> Ní'irö bönni' na' ru'è dö' que luzè'ë budxíguè'ë-bi' bi'i Moisés, gunnè': "¿Núzxité buzóa li' para inná bé'enu' netu', en uchi'a usöröu' le runtu?" <sup>28</sup> ¿Naru' ré'ënitsenu' gútiu' ca' neda' ca benu' néaje, bëtiu'-nè' bönni' Egipto na'?" <sup>29</sup> Cate' Moisés biyönibi' didza' ni, buzxunnajbi' ni, en yöjsóabi' luyú Madián ga ni' guzóabi' ca tu bönni' zi'tu'. Luyú Madián na' butsaga ná'alenbi'-nu nigula lu yödzö ni', ate' gúl jagacabi' chópabi' bi'i bönni' queë'.

<sup>30</sup> 'Cate' chigudödi choá' iz zoè' ni', buluí'ihu' tu gubáz lá'ayi queë' Dios ga zoè' lu guí' que yaga yötsi'do' régui, ga ni' naca lu lataj cá'asö, le rö'ö ra' guí'a nazí'le Sinai. <sup>31</sup> Cate' Moisés bilé'enè' guí' na', bubáninè', ate' gubígui'ë gala' para ilé'enè' dxi'a, ate' biyönnè' chi'è Xanru'. <sup>32</sup> Caní gudxè' Xanru' lè': "Neda' naca' Dios quégaquiè' xuz xto'o. Naca' Dios queë' Abraham, en Dios queë' Isaac, en Dios queë' Jacob." Ní'irö lu yöl-la' radxi queë', guxzizidè'è Moisés, en bíti'rö burúguinè' uyüè'. <sup>33</sup> Xanru' gudxè' lè': "Guléaj xirachu' nudó'o, tu' naca lá'ayi ga ni zu' tu' zoa caza' neda', Dios, ni. <sup>34</sup> Le nácate' chibilé'eda' le ta'guí'i ta'zaca' bönachi quia' nacua' luyú Egipto, en chibiyönda' ta'bödxi yeche'. Bötja', zoa' ni para usölá' légaquiè'. Gudá na'a, isöl-la'a li' luyú Egipto."

<sup>35</sup> 'Sal-la' bönni' uládz queë' Moisés, bulu'cá'anè' lè' cá'asö, gula'nnè': "¿Núzxité buzóa li' para inná bé'enu' netu', en uchi'a usöröu' le runtu?" Dios gusöl-lè'è lè' para gáquiè' bönni' unná bë', en bönni' rusólá, ca na' gubáz lá'ayi na' queë' Dios gudxè' Moisés, cate' buluí'ihu' tu yaga yötsi'do' régui ga na' zoè'. <sup>36</sup> Moisés ni bubéajè' bönni' uládz queëru' luyú Egipto. Guca caní gudödi benè' le gulún ga bulu'bani bönachi ni', en le taca bë' benè' luyú ni'. Lësca' caní benè' lu nísado' nazí'le Nísado' Xiná. Caní benè' lógaquiè' idú ca choá' iz lu lataj cá'asö. <sup>37</sup> Lè cazè' Moisés na' gudxè' bönachi Israel ni', gunnè': "Xanru' Dios isöl-lè'è queëli' tu bönni' galjè' ladaj di'a dza queëli', ate' gáquiè' bönni' gu'è didza' uláz queë' Dios. Isöl-lè'è lè' queëli' ca na' gusöl-lè'è neda'. Lè cazè' run bayudxi uzè nágali'-nè'." <sup>38</sup> Lësca' lè cazè' Moisés na' guzóalenè' bönachi nudúbigaca queë' Dios lu lataj cá'asö, ate' gudzáguiè' gubáz lá'ayi queë' Dios lè', Nu na' bë'len lè' didza' lu guí'a Sinai na'. Moisés na' guzóalenè' xuz xtó'oru', ate' Dios budödè' lu në'è xibá lá'ayi queë', le rui'i didza' ca gaca ila'deli' bönachi yöl-la' na'bán, ate' budödè' Moisés xibá ni lu ná'agaca zxi'ini xi'sóagaquiè' ga ridxintè queëru' rë'u.

<sup>39</sup> 'Biti' gulè'ënnè' xuz xtó'oru' ilunè' ca rna xtídzè'è Moisés, pero bulu'zóè' lè' tsólá'alö, en gulè'ënnè' tsöjhuójgaquiè' luyú Egipto. <sup>40</sup> Cate' ni' zoè' Moisés na' lu guí'a Sinai na', légaquiè' gulè' Aarón, böchè'è Moisés na', gula'nnè': "Rè'ënitü' gunu' yugu' dios queëtu', tu budó' guiè, para

tsöjnörugaca lotu'. Biti' nöztu' bi guca queë' Moisés, bönni' na' nubéajë netu' luyú Egipto." <sup>41</sup> Ní'irö gulunë' tu budó' oro le naca ca tu bédxido', ate' gulútië'-ba' bö'cu' zxíla'do', en gulú'ugaquië'-ba' lo budó' oro na', ate' gulunë' laní lo budó' na' núngaquië'. <sup>42</sup> Que lë ni na' Dios bucá'anë' légaquië', en léalaj ládxe'ë légaquië'. Ní'irö gula'yéaj ládxi'gaquië' yugu' le ta'yëpi lúzxiba. Ca naca lë ni nazúaj lu guichi le gula'nnë' bönni' gulu'ë didza' uláz queë' Dios, le rnna:

Libí'ili', bönnachi Israel,

¿naru' gulú'ugacatsali'-ba' quia' neda' böa' bédxi ni'

bétigacali'-ba', en buzégui'gacali'-ba',

lë na' benli' lu lataj cá'asö idú ca choá' iz?

<sup>43</sup> Biti' gulú'ugacali'-ba' quia' neda',

pero biá'ali' le nequi que Moloc, budó' guiöj queëli'.

Biá'ali' ca' tu le naca ca bölaj lúzxiba nazí'i le Refán,

lë na' buzóali' ca dios queëli'.

Yugu' budó' guiöj budó' yaga ni,

la' libí'isili' benli' para guyéaj ládxi'li' léguequi.

Que lë ni na', ubéaja' libí'ili' lu xiyuli',

en ichë'a libí'ili' zí'tu'rö ga dë luyú Babilonia.

<sup>44</sup> 'Cate' ni' gula'cu'ë xuz xtó'oru' lu lataj cá'asö, guta' quégaquië' yu'u lari' na' ga gulún chi'ë xibá queë' Dios, lë na' naca bë' Dios caz zóalenë' légaquië'. Gulunë' tu yu'u lari' na' ca na' Dios gunná' bë'enë' Moisés, cate' ni' gudxë' lë' gunë' le ca naca lë na' bilé'enë', le buluí'inë' Dios lë' lu gu'á ni'. <sup>45</sup> Lësca' bulu'dödë' yu'u lari' na' lu ná'agaquië' zxí'inigaquië' ga bidxintë dza ni' gulu'ë xuz xtó'oru' le luyú ni, cate' ni' dzáguië' Josué légaquië', ate' gula'güë' xiyúgaca bönnachi izá'a, nupa ni' bulágui'ë Dios lógaquië' xuz xtó'oru'. Caní gulunë' zían iz ga bidxintë dza zoë' David.

<sup>46</sup> Dios guyaza ládxe'ë David na', ate' lë' gunábinë' Dios gu'ë lë' lataj gunë' tu yu'u ga soë' Dios queë' Jacob. <sup>47</sup> Biti' bë'ë Dios lë' lataj, ate' Salomón, zxí'inë' David na' benë' yu'u queë' Dios. <sup>48</sup> Caní benë' sal-la' biti' zoë' Dios, Nu nácatërö lo, tu lu yudo' núngaca bönnachi. Ca naca lë ni gunné' tu bönni' bë'ë didza' uláz queë' Dios, gunné':

<sup>49</sup> Yehua' yubá naca ga rö'a rinná bë'a,

ate' yödzölió naca xilibi ni'a.

Rnnë' Xanru': "¿Naru' gúntsali' tu yu'u ga soa'?

¿Naru' zóatsö tu lataj ga ral-la' uzí' ládxa'a?

<sup>50</sup> ¿Naru' cabí len na'a caza' bena' yúgu'të lë ni'?"

<sup>51</sup> Ní'irö Esteban na' gudxë' yugu' bönni' yudo' tu'chi'a tu'söröë' na', gunné':

—Libí'ili', bönni' zidi, biti' bi raza icja nágali'. Nazidi icja ládxi'do'oli' ca raca quégaca bönnachi biti' núnbë'gaquië' Dios. Ridá'baga'tica'sili'-në' Dios Bö' Lá'ayi. Ca na' gulunë' xuz xtó'oli', runli' ca' libí'ili'. <sup>52</sup> Gula'bia ládxi'gaquië' xuz xtó'oli' na' yúgu'të bönni' ni' gulu'ë didza' uláz queë' Dios. Lësca' gulútië' bönni' ni' gula'guíxjö'ë zí'alö ca ral-la' guídë' Cristo, Bönni' Tsahui', ate' na'a, cate' ni' bidxinë' Bönni' Tsahui' na', libí'i cázali' bëtili'-në' lu ná'agaquië' bönni' gulútië' Lë'. <sup>53</sup> Libí'i cázali' dë lu ná'ali' xibá queë' Dios, lë na' gubáz lá'ayi queë' Dios bulu'dödë' lu ná'agaquië' xuz xtó'oli', pero biti' runli' ca rnna.

*Tútië' Esteban*

<sup>54</sup> Cate' bönni' yudo' tu'chi'a tu'söröë' na' bila'yönnë' didza' ni, gula'léde'enë' Esteban, ate' lu yöl-la' rilé quégaquië' lë' gulagu zxéatica' láyë'ë. <sup>55</sup> Ní'irö buyüë' Esteban na' lúzxibalö, ate' zóalenë' Dios Bö' Lá'ayi lë', bilé'enë' lataj bení' ga zoë' Dios, enca' Jesús, zuínë' cuita lë'ë ibëla Dios ga nayëpisëtërë'. <sup>56</sup> Ní'irö gunné':

—Bulí'yútsöca'. Rilé'eda' nayalaj lúzxiba, ate' zuínë' Bönni' Guljë' Bönachi cuita lë'ë ibëla Dios.

<sup>57</sup> Ní'irö bönni' yudo' tu'chi'a tu'söröë' na' bulu'sayaj nágagaquië'. Gula'bödxí'ë zidzaj, en tsözxön gula'bía di'ë Esteban na'. <sup>58</sup> Bulu'béajë' lë' ní'ilö ra' yödzö na', ga ni' bulu'ladxë' lë' guiöj. Yugu' bönni' ni' tunë' ba nalí le tu'zéguië' Esteban didza' bulu'cu'ë lari' ta'xóa yéngaquië' xini'ë tu bönni' lë' Saulo cate' ni' bulu'ladxë' Esteban guiöj. <sup>59</sup> Cate' ni' tu'ladxë' Esteban guiöj, lë' bulidzë' Dios, gunné':

—Xána' Jesús. Buzí' bö' naca caza'.

<sup>60</sup> Ní'irö biyéchuë', buzóa zxibë', en bë'ë zidzaj didza', gunné':

—¡Xan! ¡Biti' usubágu'u légaquië' dul-la' ni!

Cate' budxi bë'ë didza' ni, gútitë'.

## 8

### *Saulo ribía ládxë'ë bönachi queë' Cristo*

<sup>1-3</sup> Saulo benë' tsözxön yugu' bönni' ni' gulútië' Esteban.

La' ní'isö yugu' bönni' ta'yéaj ládxi'gaquië' Dios guluá'agaquië' Esteban, ate' yöjçáchi'gaquië' lë'. Gula'bödxidë'ë ni'a queë'.

Dza na' yugu' bönni' judío cabí ta'yéajlë'ë Cristo gula'bía ládxi'da'gaquië' bönachi queë' Cristo nacué' Jerusalén. Lësca' Saulo gudxia ládxi'ë bönachi queë' Cristo. Guyázië' gapa naca lu yu'u quégaquië', ate' guzxönë' yugu' bönni', en nigula, ate' gulu'ë légaquië' lidxi guié.

Ní'irö gulásilasi ia'látí'sö cabí bidáchigaca yúgu'të bönachi queë' Cristo idú luyú Judea, en luyú Samaria, ate' légacasë' gubáz na' nasöl-lë'ë Cristo bulu'gá'anë' Jerusalén.

### *Raca libán que didza' dxi'a luyú Samaria*

<sup>4</sup> Yugu' bönni' na' gulásilasië' yöjáquië' yúgu'të lataj, ate' gulunë' libán que didza' dxi'a. <sup>5</sup> Ní'irö Felipe, tu bönni' dzáguië' nupa na' gulásilasi, guyijë' luyú Samaria, ate' benë' libán ni' ca naca queë' Cristo. <sup>6</sup> Bulu'dubë' yugu' bönni' ni', ate' idú ládxi'gaquië' bulu'zé nágagaquië' didza' ru'ë Felipe na', tu' bila'yönnë' xtídzë'ë, en bila'lé'enë' yugu' le taca bë' runë'. <sup>7</sup> Caní guca, tu' benë' ga bulu'rúaj zían bö' xihuí' yú'ugaca bönachi, ta'bödxí'a zidzaj, ate' bulu'huóaca zían nupa te'e huë' nacú'uni bin, en nupa bití' guca sá'gaca. <sup>8</sup> Caní guca, bulu'dzeja bönachi yödzö ní'.

<sup>9</sup> Zoë' Simón, tu bönni' zí'alö gúquië' bönni' udzá' unë ya'a lu yödzö na', bönni' guzxí' yé'enë' bönachi Samaria na', gunné' lë' cazë' náquië' bönni' nayëpisëtërë'. <sup>10</sup> Yúgu'të bönachi bulu'zëda' nágagaca bönni' ni, ga riguela' yugu' bönni' cá'asö ga ridxintë yugu' bönni' lo, gula'nnë': "Bönni' ni dë lu në'ë yöl-la' huáca zxon queë' Dios." <sup>11</sup> Caní guca, gulunë' lë' bal, tu' xidzë nazi' yé'enë' légaquië' len yöl-la' gudzá' unë ya'a queë'.

<sup>12</sup> Cate' gula'yéajlë'ë libán runë' Felipe que didza' dxi'a ca rinná bë'ë Dios, en ca naca queë' Jesucristo, ní'irö gula'dilë' nisa, bönni', en nigula. <sup>13</sup> Ní'irö guyéajlë'ë ca' Simón na', en bidilë' nisa, ate' gudálicantá'së'

tsözxön Felipe na'. Cate' bilé'enë' yugu' yöl-la' huáca zxön, en yugu' le taca bē' runē' Felipe, bubáninē' Simón na'.

<sup>14</sup> Cate' yugu' gubáz na' nasöl-lē'ë Cristo nacu'ë Jerusalén bila'yönnē' ca guca lē ni, chinazí' lu ná'agaca bönachi luyú Samaria xtídzē'ë Dios, ní'irö gula'söl-lē'ë Pedro, en Juan ni'. <sup>15</sup> Cate' Pedro, en Juan na' bila'dxinē' ni', bulu'lidzē' Dios uláz quégaca bönachi ni' ta'yéajlē' Cristo para idisóalenē' Dios Bö' Lá'ayi léguequi. <sup>16</sup> Ga bidxintē dza na', biti' ridxíninē' Dios Bö' Lá'ayi quégaquiē'. Nadílagacasē' nisa para ilácagaquiē' tuz len Xanru' Jesús. <sup>17</sup> Ní'irö Pedro, en Juan na', gula'xóa ná'agaquiē' bönachi Samaria na'. Bulu'lidzē' Dios, ate' bidisóalenē' Dios Bö' Lá'ayi légaquiē'.

<sup>18</sup> Cate' bilé'enē' Simón, bönni' udzá' na', le guca cate' gubáz na' nasöl-lē'ë Cristo gula'xóa ná'agaquiē' bönachi ni', bidisóalenē' Dios Bö' Lá'ayi légaquiē', gú'unnē' quizzjē' légaquiē' dumí, <sup>19</sup> ate' rē' légaquiē':

—Benna ca' yöl-la' huáca ni quia', para cate' ixóa na'a nút'tēs bönachi, idisóalenē' Dios Bö' Lá'ayi nu na'.

<sup>20</sup> Ní'irö Pedro gudxē' lē', rnnē':

—Initi dumí quiu' tsözxön len li', tu' réquinu' len dumí idéli'nu' yöl-la' huáca queē' Dios. <sup>21</sup> Biti' nacu' bachi gútsu'u lē ni, tu' dxía le naca ruá' dö' icja ládxi'do' lahuē' Dios. <sup>22</sup> Bubí'i ládxi' ca naca huiá' dö' ni runu', en gúta'yu lahuē' Dios, nadxi ca' uniti lahuē' li' ca naca lē ni rizá' ládxi'u. <sup>23</sup> Réquibe'eda' nabágu'u xíguia', en nadzunu' lu yalaj que tu' xihui'.

<sup>24</sup> Ní'irö bubí'ë didza' Simón na', rē' légaquiē':

—Buli'lidzē' Dios, gáta'yuli' lahuē' Xanru' ni'a quia' neda' para cabí gaca quia' nitú lē na' chigunnáli'.

<sup>25</sup> Cate' Pedro, en Juan na' budxi gulunē' ba nalí queē' Cristo lu yödzo ni', en bulu'siyönnē' légaquiē' xtídzē'ë Dios, gulunē' ca' libán que didza' dxi'a yugu' lu ládzaquiē' bönni' Samaria, ate' gudödi ni' yöjhuöjgaquiē' Jerusalén.

### *Felipe, en tu bönni' Etiopía*

<sup>26</sup> Ní'irö tu gubáz lá'ayi queē' Xanru' bē'lenē' Felipe didza', en gudxē' lē':

—Guyasa, en guyéaj saca' ga ridödi gubidza beo' ziaga. Idxinu' ga ni' nalá' nöza zeaj Jerusalén zéajtē yödzo Gaza, nöza na' ridödi lu lataj cá'asö.

<sup>27</sup> Ní'irö guyu'ë nöza Felipe na', sa'yéajē'. La' nöza ni' yöjtságuiē' tu bönni' Etiopía, náquiē' bönni' huödx. Luyú Etiopía náquiē' bönni' huen dxin lo queēnu Candace, nigula na' rinná bé'enu bönachi Etiopía na', en yu'u lu nē'ë yúgu'tē yöl-la' tsahui' queēnu dzö'ö lídxinu. Guyijē' Jerusalén bönni' ni para guyéaj ládxi'ë Dios. <sup>28</sup> Na'a, söhuöjē' ladzē', rö'ë lu carreta queē', en rulabē' le nazúaj lu guichi ca gunnē' Isaías, bönni' bē'ë didza' uláz queē' Dios. <sup>29</sup> Ní'irö Dios Bö' Lá'ayi gudxē' Felipe na':

—Gubíga' ga zeaj carreta na', en guyéajlen le.

<sup>30</sup> Cate' chigubígu'ë Felipe ni', biyönnē' ru'ë didza' bönni' huödx na', rulabē' le nazúaj lu guichi ca gunnē' Isaías, ate' gudxē' lē':

—¿Naru' réajni'inu' lē na' rulabu'?

<sup>31</sup> Bubi'ë didza' bönni' Etiopía na', gunnē':

—¿Nacxi gaca tséajni'ida' channö cuntu nu zoa uzéajni'i neda'?

Ní'irö gúta'yue' lahuē' Felipe cuenē', en c'lenē' lē' tsözxön lu carreta na'.

<sup>32</sup> Lē na' nazúaj lu guichi rulabē', rna caní:  
Ca bö'cu' zxlá'do',

gula'chë'ë Lë' para ilútië' Lë',  
 en ca bö'cu' zxlá'do',  
 bití' rnnëba' cate' nu richugu lítsa'ba',  
 ca' benë' Lë', bití' gusalaj ru'ë bi innë'.

<sup>33</sup> Bulu'cá'anë' Lë' cá'asö,  
 en bití' gulu'ë lataj nu uchi'a usörö Lë'.

¿Nuzxi caz gaca inözi xíguia' nabága'gaca bönachi uládz queë'?  
 La' légcasë' gulútië' Lë'.

<sup>34</sup> Bönni' huödx na' gunábinë' Felipe, rë' lë':

—Ráta'yua' lo' quíxjöi'ínu' neda'. ¿Nuzxi que gunné' caní bönni' na' bë'ë didza' uládz queë' Dios? ¿Naru' queë' cazë', o que nu yúbölö?

<sup>35</sup> Ní'irö la' didza' nisö buguelë'ë Felipe, en busiyönnë' lë' didza' dxi'a ca naca queë' Jesús. <sup>36</sup> Cate' ni' yú'ugaquië' nöza sójáquië', bila'dxinë' ga dë nisa, ate' bönni' huödx na' rë' Felipe, rnnë':

—Buyútsöca'. Ni dë nisa. ¿Naru' huácatsö idila' nisa?

<sup>37</sup> Felipe gudxë' lë':

—Channö réajlë'u idú ládXu'u, huáca idilu' nisa.

Lë' bubí'ë didza', rnnë':

—Réajlë'a Jesucristo, náquië' Zxí'inë' Dios.

<sup>38</sup> Ní'irö benë' ga guzóa dxisö carreta queë' na', ate' bulu'huötjë' irópatë', yöjtsázagaquië' lu nisa. Ní'irö Felipe buquilé' bönni' huödx na' nisa. <sup>39</sup> Cate' bulu'rúajë' lu nisa, Dios Bö' Lá'ayi buchë'ë Felipe, ate' bönni' huödx na' bití'rö bilé'enë' lë'. Ní'irö buguelë'ë xinözë', söhuöjë' rudzéjanë'. <sup>40</sup> Cate' chiréquibe'enë' Felipe, zoë' lu yödzö Azoto. Gudödë' yúgu'të yödzö ni', ate' benë' libán que didza' dxi'a, ga bidxintë' yödzö Cesarea.

## 9

### *Saulo ruhuöáquië' queë' Cristo*

<sup>1</sup> Ní' ruzenë' bach Saulo nupa ta'yéajlë' Xanru', gú'unnë' gútië' légaquië'. Para gunë' caní bidxinë' lahuë' bixúz lo, <sup>2</sup> en gunábinë' lë' tu guichi unná bë', le tsöju'ë lógaquië' bönni' unná bë' quegaca yu'u gapa tu'dubë' bönni' judío, en tu'sédë' queë' Dios lu yödzö Damasco, ate' channö utsöjxáquië' yugu' bönni', en nigula ta'yéajlë'ë Jesús ni', gaca ichë'ë légaquië' nadzúngaquië' lu yödzö Jerusalén. <sup>3</sup> Tsanni ni' yú'ugaquië' nöza Saulo, en nupa nacua'len lë', sójáquië', en cate' chizóa ila'dxinë' Damasco, tsárido'os buzeni'da' tu bení' za' lúxriba, le buzení' ga ni' sójáquië'. <sup>4</sup> Ní'irö gudzö'ë Saulo lu yu, en biyönnë' chi'i Nu rë lë':

—Saulo, Saulo, ¿bizx que ribía ládXu'u neda'?

<sup>5</sup> Saulo gunábinë' Lë', gunné':

—¿Nuzxi lí', Xan?

Lë' gunné':

—Neda' Jesús, Nu ribía ládXu'u. Run zi' cuinu', ridá'bagu'u neda'. Raca quiu' ca na' raca queë'ba' bëdxi, run zi' cuinba' richégu'ba' yaga tuchi' túndë'ë-ba' zi'.

<sup>6</sup> Ní'irö Saulo guzxízidë'ë, gúdxinë', en gunné':

—Xan, ¿bizxi ré'ënu' guna'?

Xanru' gudxë' lë':

—Guyasa, en guyáz lu yödzö, ate' ni' isól-la'a quiu' nu guíë' lí' le ral-la' gunu'.

<sup>7</sup> Guládxinè' yugu' bönni' na' sòjácalenè' Saulo, tu' bila'yönnè' chí'i na', sal-la' cuntu nu bila'lé'enè'. <sup>8</sup> Ní'irö böasè' Saulo luyú, en cate' guxá' guiöj lahuè', bití' ca' rilé'enè'. Que læ ni na' gula'guélè'è nè'è, en gula'ché'è læ' Damasco. <sup>9</sup> Guzöé' ni' tsonna dza nachul-la lahuè', en bití' bi güí'i gudahuè'.

<sup>10</sup> Zoè' ca' Ananías, bönni' réajlè'è Cristo, yödzö Damasco, ate' Xanru' buluf'i lahuè' ga zoè' ca tu lu yëla bëchigal, en gudxè' læ':

—Ananías.

Lè' bubí'è didza', gunnè':

—Ni zoa', Xan.

<sup>11</sup> Xanru' gudxè' læ':

—Guyasa, en guyéaj ga naca la' nöza na' nazí'i le Nöza Li, ate' lu yu'u lidxè' Judas gunaba didza' queè' Saulo, bönni' Tarso. Lu yu'u na' rulidzè' Dios. <sup>12</sup> Chibilé'enè' tu bönni' ca tu lu yëla bëchigal zè'è tsáziè' ga zoè', læ' Ananías, en ixóa nè'è læ' para huóalaj guiöj lahuè'.

<sup>13</sup> Ní'irö bubí'è didza' Ananías, rë' Lè':

—Xan, zían nupa chibulu'siyönnè' neda' ca runè' bönni' ni, zían le naca dö' nu'è le benè' quégaca bönachi ta'yéajlè' Li', nacua' Jerusalén. <sup>14</sup> Zè'è ca' ni, dè lu nè'è uláz quégaquiè' bixúz unná bë' sönè' yúgu'tè nupa tu'lidza Dios len Lo' Li'.

<sup>15</sup> Ní'irö Xanru' rë' Ananías na', rnnè':

—Guyéaj, tu' gurö caza' neda' bönni' ni para gunè' libán ca naca quia' lógaca bönachi izá'a, en lógaquiè' bönni' ta'nná bë'enè' légaquiè', enca' lógaca bönachi Israel. <sup>16</sup> Uluf'ida' læ' le zían le qui'i sáquè'è uláz quia' neda', gunè' xichina'.

<sup>17</sup> Ní'irö guyijè' Ananías ni', ate' guyáziè' yu'u, en guxóa nè'è Saulo, ate' rë' læ':

—Böcha'a Saulo, Xanru' Jesús, Nu na' buluf'i lahui la' nöza ga ni' zo'o, gusöl-lè'è neda' para huóalaj guiöj lo', en idisóalenè' Dios Bö' Lá'ayi li'.

<sup>18</sup> La' ní'isö gula'guínnaj le naca ca xilácuba' böla lu guiöj lahuè', ate' la' böáljatè' guiöj lahuè'. Ní'irö guyasè' Saulo, en bidilè' nisa. <sup>19</sup> Gudödi ni' gudahuè', en böaca ládxè'è. Ca chopa tsonna dza guzóalenè' yugu' bönni' ta'yéajlè'è Cristo nacu'è Damasco.

### *Runè' libán Saulo lu yödzö Damasco*

<sup>20</sup> La' gusí lotè' Saulo runè' libán queè' Cristo gapa naca lu yu'u ga tu'dubè' bönni' judío, en tu'sédè' queè' Dios, rnnè':

—Jesús náquiè' Zxi'ini cazè' Dios.

<sup>21</sup> Bulu'bánnè' yúgu'tè bönni' ni' ta'yönnè' læ', ta'nnè':

—¿Naru' calëga bönni' ni bönni' na' busunítiè' nupa nacua' Jerusalén, en tu'lidza Dios lu Lè' Jesús? Para gunè' caní bidè' ca' ni para ichè'è légaquiè' nadzúngaquiè' lógaquiè' bixúz unná bë'.

<sup>22</sup> Bidíparö ládxè'è Saulo, en benè' ga gula'bö'è böniga bönni' judío nacu'è Damasco, tu' buluf'inè' légaquiè' Jesús naca cazè' Cristo, bönni' na' tunè' löza idinná bë'enè' légaquiè'.

### *Rulè' Saulo lu ná'agaquiè' bönni' judío*

<sup>23</sup> Cate' chigudödi zían dza, gulún xtídza'gaquiè' bönni' judío nacu'è ni' ilútiè' Saulo. <sup>24</sup> Rëla, en tè dza gula'bö' nísíè' yugu' bönni' judío ga nu ridödi lu zö'ö run chí'i yödzö na' para ilútiè' læ', pero gúquibe'enè' Saulo le té'ennè' ilunè' queè'. <sup>25</sup> Ní'irö yugu' bönni' ta'yéajlè'è Cristo gula'guélè'è Saulo chí'i

dzö'ölö, ate' gula'gu'ë lë' tu lu ga'böra zxon naga' du, en bulu'zötjé' lë' ní'ilo lu zö'ö run chi'i yödzö na'.

*Rudxinë' Saulo Jerusalén*

<sup>26</sup> Cate' budxinë' Saulo Jerusalén, gú'unnë' tsöjenë' tsözxön bönni' ni' ta'yéajlë'ë Cristo, pero yúgu'të' guládxinë' lë', tu' cabí téquinë' réajlë'ë Saulo na' Cristo. <sup>27</sup> Ní'irö bönni' na' lë' Bernabé gudélë'ë Saulo, en guchë'ë lë' ga na' nacu'ë bönni' gubáz nasöl-lë'ë Cristo. Busiyönnë' légaquië' ca na' guca queë' Saulo, bilé'enë' Xanru' la' nöza, ate' Xanru' caz bé'lenë' lë' didza', en ca na' benë' Saulo lu yödzö Damasco, len yöl-la' rugu ladxi' benë' libán ca naca queë' Jesús. <sup>28</sup> Ní'irö Saulo guzóalenë' légaquië' lu yödzö Jerusalén, ate' gudálenë' légaquië' tsözxön. <sup>29</sup> Lu yöl-la' rugu ladxi' benë' libán Saulo ca naca queë' Xanru', en gudíl-lalenë' didza' bönni' judío tu'ë didza' griego, ate' légaquië' gula'zóa gula'bö'ë ilútië' lë'. <sup>30</sup> Cate' guléquië' enë' bóchi'ru' ta'yéajlë'ë Cristo lë' ni, gula'chë'ë Saulo lu yödzö Cesarea, ate' gula'söl-lë'ë lë' yödzö Tarso, le naca ladzë' Saulo.

<sup>31</sup> Ní'irö guca tsahui' quégaca yúgu'të' cö' bönachi queë' Cristo, nacuá' idú luyú Judea, en luyú Galilea, en luyú Samaria, ate' bila'dipa ládxi'gaquië'. Gula'cu'ë lu yöl-la' radxi quégaquië' Xanru', ate' gula'yanë' tu' gúcalenë' Dios Bö' Lá'ayi légaquië'.

*Pedro ruínë' tu bönni' lë' Eneas*

<sup>32</sup> Ia'tú le guca, cate' Pedro yöjyüë' yugu' bóchi'ru', bidxinë' ga nacu'ë bönni' ta'yéajlë'ë Jesús lu yödzö Lida. <sup>33</sup> Yöjxáquië' tu bönni' ni' lë' Eneas, chiguca xunu' iz dë' ré'enë', nacu'unië' bin. <sup>34</sup> Pedro gudxë' lë':

—Eneas, Jesucristo ruínë' li'. Guyasa, en butubi xto'ö.

La' guyásatë' Eneas na'. <sup>35</sup> Yúgu'të' nupa nacuá' yödzö Lida, en yödzö Sarón bila'lé'e lë', ate' bulu'huóaca queë' Xanru', tu' chita'yéajlë' Lë'.

*Rátinu Dorcas, en rubannu*

<sup>36</sup> Ia'stú le guca, lu yödzö Jope zóanu tu nigula réajlë'ënu Cristo, lënu Tabita, en ca naca didza' griego lënu Dorcas. Bennu nigula ni zían le nácagaca dxi'a le tácalen bönachi yechi'. <sup>37</sup> Le guca dza ni', gü'ínu Dorcas na', en gútinu. Gudödi gula'guíbinu lënu, gula'guíxjë'-nu tu lu yu'u ga naca buropi cuía. <sup>38</sup> Tu' dë yödzö Lida gála'sö ga na' dë yödzö Jope, ga na' zoë' Pedro, bila'yönnë' bönni' Jope na' ta'yéajlë'ë Cristo zoë' Pedro ni', ate' que lë' ni na' gula'söl-lë'ë chopë' bönni' ga na' zoë', ate' guláta'yuë' lahuë', té' lë':

—Biti' tsenu' guídu' queëtu'.

<sup>39</sup> Ní'irö la' guyásatë' Pedro, sa'yéajlenë' légaquië'. Cate' bidxinë' ni', la' gula'chë'të' lë' ga naca lu yu'u ga dënu nigula nati na'. Ní'irö yugu' nigula uzëbi bulu'dúbinu gásibi'ilë', ta'bödxinu, en tu'lu'ínu lë' lari' quégaquië' bönni', en nigula, yugu' le bennu Dorcas cate' ni' zóalennu légacanu. <sup>40</sup> Ní'irö Pedro bubéajë' ní'ilo yúgu'të' nupa nacuá' ni', ate' buzóa zxië', rulidzë' Dios. Ní'irö buécjë' ga dënu Dorcas na', gunné':

—Tabita, guyasa.

La' buxa'të guíöj lonu Dorcas. Cate' bilé'enu-në' Pedro, la' guyástënu, gurö'önu. <sup>41</sup> Gudélë'ë Pedro ná'anu, en buchisë'-nu. Ní'irö bulidzë' bönni' na' ta'yéajlë'ë Jesús, len yugu' nigula uzëbi na', ate' busudxinë' Dorcas na' lógaquië', nabannu. <sup>42</sup> Ca guca lë' ni guzë didza' idú lu yödzö Jope, ate' gula'yéajlë' bönachi zían Xanru' Jesús. <sup>43</sup> Bugá'anë' Pedro yödzö Jope na' zían dza lu yu'u lidxë' Simón, bönni' runë' tsahui' guídi zxa bëdxi.

## 10

*Le benë' Pedro lidxë' Cornelio*

<sup>1</sup> Zoë' yödzo Cesarea tu bönni' lë' Cornelio, bönni' rinná bé'enë' tu gáyu'ë bönni' rōjáquië' gudil-la, nazí'i lágaquië' Bönni' Italia Rōjáquië' Gudil-la. <sup>2</sup> Cornelio na' reaj ládxë'ë Dios, en rádxinë' Lë', ate' yúgu'të bōnachi nacua' lidxë' nungaca lë' tsōzxōn. Runōdzjë' Cornelio dumí zían le rácalen bōnachi yechi', en rulídzatica'së' Dios. <sup>3</sup> Tu dza idú ridōdi xihuō bilé'enë' Cornelio ca tu lu yëla béchigal, razië' tu gubáz lá'ayi queë' Dios ga na' zoë', en rë' lë':

—Cornelio.

<sup>4</sup> Gúdxinë' Cornelio. Buyúë' gubáz lá'ayi na', en gudxë' lë':

—¿Bizxi ranno', Xan?

Gubáz lá'ayi na' gudxë' lë', rnnë':

—Dios riyōnnë' le rulidzu'-në', en nōzinë' ca runu', rácalenu' bōnachi yechi'. <sup>5</sup> Na'a, gusōl-la' yugu' bönni' tsōjáquië' yödzo Jope tsōjlídzagaquië' bönni' na' lë' Simón, zoa ia'tú lë' Pedro. <sup>6</sup> Bönni' ni zoë' lidxë' tu bönni' runë' tsahui' guidi zxa bēdxi. Bönni' ni, lēscá' lë' Simón, ate' zoa lidxë' ra' nísado'. Pedro na' guië' li' le ral-la' gunu'.

<sup>7</sup> Cate' chibuzé'ë gubáz lá'ayi na' bé'lenë' lë' didza', bulidzë' Cornelio chópabi' bi'i huen dxin queë', en tuë' bönni' rejë' gudil-la reaj ládxë'ë Dios, en dzáguie' bōnachi nacua' lidxë' Cornelio. <sup>8</sup> Cate' budxi busiyōnnë' légaquië' yúgu'të le guca, gusōl-lë'ë légaquië' yödzo Jope.

<sup>9</sup> Dza buropi, tsanni ni' yú'ugaquië' nōza, en ta'dxinë' gala' ga dë Jope na', la' ní'sō gurenë' Pedro ícjo'olō yu'u para ulidzë' Dios, ni' naca idú huagubidza. <sup>10</sup> La' ná'asō ridunë' Pedro, en gú'unnë' gahuë', ate' tsanni ni' tu'pë'ë queë', bilé'enë' le naca ca tu lu yëla béchigal. <sup>11</sup> Bilé'enë' nayalaj lúzxiba, en ruhuōtaj tu le naca ca tu lari' guitsa' zxōn ga zoë', le naga' idapa la'a. <sup>12</sup> Lahui lari' na' dxíagacaba' yugu' bōa' guixi' izá'a nacua' tapa ni'a ná'agacaba', en yugu' bōa' tá'ayōj lë' egacaba' lu yu, en yugu' bōa' zoa xíligacaba'. <sup>13</sup> Ní'irō biyōnnë' chí'i nu rë' lë':

—Pedro, guyasa. Béti-gacaba', en gudagu.

<sup>14</sup> Bubi'ë didza' Pedro, rnnë':

—¡Calëga, Xan! Catu caz gudahua' le cabí ral-la' gágutu', o le cabí naca dxi'a.

<sup>15</sup> Le buropi luzuí biyōnnë' chí'i nu na' gudxi lë':

—Le nunë' Dios dxi'a, bití' innó' que: "Bití' naca dxi'a."

<sup>16</sup> Tsonna luzuí guca caní, ate' ní'irō la' buëpitë' lari' zxōn na' lúzxiba. <sup>17</sup> Tsanni ni' rō'ë bōniga Pedro, rizá' ládxë'ë bizxi sa'yéaj lë' na' bilé'enë' ca tu lu yëla béchigal, bila'dxinë' bönni' na' nasōl-lë'ë Cornelio légaquië' ra' yu'u, ta'nabë' gazxi zoa lidxë' Simón na'. <sup>18</sup> Cate' bila'dxinë' ni', bulu'lidzë' nupa nacua' yu'u na', en gula'nábinë' légaquië' channō zoë' tu bönni' lë' Simón ni', zoa ia'tú lë' Pedro. <sup>19</sup> Tsanni ni' rizá' ládxë'ë Pedro ca naca lë' na' bilé'enë', Dios Bō' Lá'ayi gudxë' lë', rnnë':

—Buyútsōca'. Chibila'dxinë' tsonné' bönni' ni, tu'guiljë' li'. <sup>20</sup> Guyaschi na'a, en bōtaj zcan yu'u. Bití' gaca chopá lādXu'u tséajlenu' légaquië', tu' nasōl-la'a neda' yugu' bönni' ni.

<sup>21</sup> Ní'irō bōtjë' Pedro zcan yu'u ga na' nacu'ë bönni' na' nasōl-lë'ë Cornelio, en gudxë' légaquië':

—Neda' bönni' ruguúljajli'. ¿Bizxi huen zá'ali' ni?

<sup>22</sup> Bulu'bi'ë didza', tē' lë':



—Cornelio, tu bönni' rinná bé'enë' bönni' röjáquië' gudil-la, nasöl-lë'ë netu'. Náquië' bönni' tsahui', en rádxinë' Dios. Yúgu'të bönni' judío tunë' bal bönni' ni, en nadxí'iguequinë' lë'. Ia'tú le guca, tu gubáz lá'ayi queë' Dios bë'lenë' lë' didza', en gudxë' lë' isöl-lë'ë nu udulídza li' guídu' lidxë' para yönnë' didza' gu'u.

<sup>23</sup> Ní'irö Pedro gulu'ë légaquië' lu yu'u, en bë'ë ga ila'cu'ë. Cate' za' rení' ia'tú dza, guyasë' Pedro, en guyéajlenë' légaquië'. Bal-lë' böchi'ru' nacu'ë Jope na' gulunë' lë' tsözxön.

<sup>24</sup> Dza bunni ni', bila'dxinë' Cesarea. Chizóë' Cornelio ribözë' légaquië', ate' chinutubë' yugu' di'a dza queë', en yugu' böchi' luzë'ë nadxí'irönë' lidxë'. <sup>25</sup> Cate' guyázië' Pedro lö'a, birúajë' Cornelio yu'u, yöjtságuie' lë'. Biyéchuë' xini'ë Pedro, en guyéaj láchxë'ë lë' ca runru' queë' Dios caz. <sup>26</sup> Pedro buchisë' lë', en gudxë' lë':

—Guyasa. Lësca' bönachi yödzölió naca' ca nacu' li'.

<sup>27</sup> Ni' tuí'isë' ca' didza', guyázatë' Pedro yu'u, en yöjxáquië' nudúbigaca bönachi zían ni'. <sup>28</sup> Ní'irö Pedro gudxë' légaquië', rnnë':

—Libí'ili' nöz quézili' ca rinná bë' xibá queë' Moisés, rnna biti' ral-la' gunë' tu bönni' judío tsözxön o tsázalenë' nu bönni' izá'a. Na'a, Dios buluf'inë' neda' biti' ral-la' inní'a queë' nitúë' bönni' náquië' cá'asö o biti' náquië' dxi'a. <sup>29</sup> Que lë' ni na' cate' bulídzali' neda', la' bídatea', en biti' guca chopa láchxa'a. Rinaba' na'a, ¿bizx que na' bulídzali' neda'?

<sup>30</sup> Ní'irö bubi'ë didza' Cornelio, gunnë':

—Chiguca tapa dza ca zóaru' na'a, idú ridödi xihuó, cate' ni' runa' gubasa, en rulidza'-në' Dios lu yu'u lidxa' ni, bilé'eda'-bi' tubi' bönni' ra'bán nácubi' lari' rëpi yösa bení', duluf'i lobí' neda'. <sup>31</sup> Caní gúdxibi' neda': "Cornelio. Dios riyönnë' le rulidzu'-në', en nözinë' ca runu', rácalenu' yugu' bönachi yechi'. <sup>32</sup> Na'a, isöl-lu'u nu bönni' lu yödzö Jope para tsöjlídzë' tu bönni' lë' Simón, zoa ia'tú lë' Pedro. Bönni' ni zoë' lidxë' tu bönni' runë' tsahui' guídi zxa bëdxi, en lë' ca' Simón. Zoa lidxë' bönni' ni ra' nísado'. Cate' idxinë' Pedro na' ga zu', usiyönnë' li' didza' dxi'a." <sup>33</sup> Caní guca, la' gusöl-la'tea' nu tsöjlidza' li', ate' tsáhui'do' benu' bidu' ga zóatu' ni. Que lë' ni na' zóatu' ni yúgu'tëtu', nudúbitu' lahuë' Dios para uzë' nágatu' le inná bë'enë' Dios li' innó'.

*Didza' bë'ë Pedro lidxë' Cornelio*

<sup>34</sup> Ní'irö gusí lahuë' Pedro ru'ë didza', rnnë':

—Le nácatë réajni'ida' na'a, biti' ruyusë' Dios yöl-la' rinnësö quégaca bönachi, pero tuz ca rilé'enë' rë'u. <sup>35</sup> Dios raza láchxë'ë bönachi idütë yödzölió, nupa na' tadxi Lë', en tun le naca dxi'a. <sup>36</sup> Gusöl-lë'ë Dios xtídzë'ë ga nacuá' bönachi Israel, en gusöl-lë'ë nu ben libán que didza' dxi'a, le run ga raza dxi'a quégaca bönachi, lë' na' bidxín queëru' lu në'ë Jesucristo. Lë' cazë' náquië' Xanru' yúgu'tëru'. <sup>37</sup> Libí'ili' nöz quézili' lë' na' guca luyú Judea, le gusí lo guca luyú Galilea gudödi benë' libán Juan para ila'dila bönachi nisa. <sup>38</sup> Nözili' ca benë' Dios le guca queë' Jesús, bönni' Nazaret. Gusöl-lë'ë Dios Bö' Lá'ayi, en yöl-la' huáca queë' para sóalengaca Lë'. Nözili' ca na' gudë' Jesús, runë' le naca tsahui', en ruúnë' yúgu'të nupa gula'guí' gula'zaca' lu na' tu' xihui'. Caní benë', tu' guzóalenë' Dios Lë'. <sup>39</sup> Na'a, netu' runtu' ba nalí que yúgu'të lë' na' benë' Jesús luyú Judea, en lu yödzö Jerusalén, en ca na' guca, gulútië' Jesús, cate' bulu'dë'ë Lë' lë'e yaga cruz. <sup>40</sup> Ní'irö Dios busubanë' Lë' cate' guca tsonna dza nátië', en benë' ga buluf'i lahuë' ga zóatu' netu'. <sup>41</sup> Biti' buluf'i lahuë' lógaca yúgu'të bönachi,

pero lotu' netu' bulu'í lahuë'. Dios guröë' netu' dza ni'te para guntu' ba nali queë' Jesús, ate' gü'í gudágulentu' Lë' tsözxön gudödi bubanë' lu yö-la' guti. <sup>42</sup> Gunná bé'enë' Dios netu' guntu' libán lógaca bönachi, ate' runtu' ba nali queë' Cristo, náquië' Nu buzóa cazë' Dios para uchi'a usöröë' nupa nabángaca, en nupa chinátigaca. <sup>43</sup> Lësca' yúgu'të bönni' gulu'ë didza' uláz queë' Dios gulunë' ba nali queë' Jesús, gula'nne': "Yúgu'të nupa ila'yéajlë' Lë', Dios uniti lahuë' dul-la' nabága'gaquië' ni'a que le benë' Lë'."

*Dios Bö' Lá'ayi ridisóalenë' bönachi izá'a*

<sup>44</sup> Ni' ru'isë' caní didza' Pedro, la' bidxintë' Dios Bö' Lá'ayi, bidisóalenë' légaquië', yúgu'të nupa ni' ta'yöni libán runë' lë'. <sup>45</sup> Gula'ná' badxë' bönni' judío ta'yéajlë'ë Cristo, nupa na' bila'dxin ni' tsözxön len Pedro, tu' bidë' Dios Bö' Lá'ayi, Nu na' nasöl-lë'ë Dios Xuz. Bidisóalenë' bönachi ni' biti' nácagaca judío. <sup>46</sup> Caní gulunë' tu' bila'yönnë' tu'ë bönni' zi'tu' na' didza' yúbölö, en tunë' Dios zxön. <sup>47</sup> Ní'irö bë'ë didza' Pedro, gunnë':

—¿Naru' huácatsö nu inná be'e bönachi ni para cabí ila'dila nisa? Naca bë' Dios Bö' Lá'ayi bidisóalenë' légaquië', ca na' bidisóalenë' netu'.

<sup>48</sup> Gunná bë'ë Pedro ila'dilë' nisa tu' nazí' lu ná'agaquië' Lë' Xanru' Jesús. Ní'irö yugu' bönni' ni' gulá'ta'yuë' lahuë' Pedro ugá'analenë' légaquië' ca chopá tsonna dza.

## 11

*Didza' bë'ë Pedro lógaca bönachi queë' Cristo nacua' Jerusalén*

<sup>1</sup> Bila'yönnë' gubáz nasöl-lë'ë Cristo, en böchi'ru' nacu'ë luyú Judea ca na' bönni' biti' náca'gaquië' judío gula'zí' lu ná'agaquië' xtídzë'ë Dios. <sup>2</sup> Cate' budxinë' Pedro Jerusalén, böchi'ru' judío gula'díl-lalenë' lë' didza'. <sup>3</sup> Gulé' Pedro:

—¿Bíx que yöjtsú'ulenu' bönni' biti' náca'gaquië' judío, en gudágulenu' légaquië' tsözxön?

<sup>4</sup> Ní'irö gusí lahuë' Pedro rusiyönnë' légaquië' idütë lë na' guca, rnnë':

<sup>5</sup> —Guzóa' lu yödzö Jope, en cate' ni' rulidza'-në' Dios, bilé'eda' ca tu lu yëla béchigal tu le bulu'ínë' Dios neda'. Bilé'eda' bötaj birúaj lúzxiba tu le naca ca tu lari' guitsa' zxön, naga' idapa la'a, ate' bidxin ga na' zoa'. <sup>6</sup> Cate' ni' ruyúa' le para ilé'eda' le dxía láhuilö, bilé'egacada'-ba' böa' guixi' nacua' tapa ní'agacaba', yugu' böa' guixi' sínia', en böa' tá'ayöj lë'egacaba' lu yu, en böa' zoa xíligacaba'.

<sup>7</sup> Biyönda' chi'i nu gudxi neda': "Pedro, guyasa. Bëti-ba', en gudagu." <sup>8</sup> Ní'irö gudxa'-në': "Biti' ca', Xan. Catu caz gudahua' tu le cabí ral-la' gágutu', o tu le cabí naca dxi'a." <sup>9</sup> Ní'irö le buropi luzuí bulidza chi'i lúzxiba na' neda', en gudxi neda': "Le nunë' Dios dxi'a, biti' innó' biti' naca dxi'a."

<sup>10</sup> Tsonna luzuí guca caní, ate' ní'irö idütë lë na' bilé'eda' la' buëpitë lúzxiba. <sup>11</sup> La' ní'isö bila'dxintë' tsonnë' bönni' ra' yu'u ga na' zoa', narúajagaquië' yödzö Cesarea, nasöl-lë'ë légaquië' tu bönni' lë' Cornelio. Sududíljagaquië' neda'.

<sup>12</sup> Dios Bö' Lá'ayi gudxë' neda': "Guyéajlen légaquië', en cabí gaca chopá ládxi'u." Lësca' izxópatë böchi'ru' ni gula'zá'lenë' neda' tsözxön. Guyéajtu' Cesarea, ate' guyaztu' lidxë' tu bönni' zoë' ni'. <sup>13</sup> Bönni' ni' gudíxjö'inë' netu' ca na' bilé'enë', bidxinë' tu gubáz lá'ayi queë' Dios lu yu'u lidxë'. Guzuínë' lahuë', en gudxë' lë': "Na'a isöl-la'gacu'-në' bönni' tsöjajaquië' yödzö Jope, tsöjlídzagaquië' Simón, zoa ia'tú lë' Pedro. <sup>14</sup> Bönni' na' usiyönnë' li' naca gaca uló' li', en ulu'lágaca ca' yúgu'të bönachi nacua' lidxu'."

<sup>15</sup> Cate' ni'

gusí lahua' ruí'ílēna' légaquiē' didza', bidisóalenē' Dios Bō' Lá'ayi légaquiē' ca na' bidisóalenē' rē'u zí'atēlō. <sup>16</sup> Ní'irō yōjneda' didza' na' bē'ē Xanru', gunnē': "Le nácátē Juan buquílē' bōnachi nisa lu nisa, pero libí'ili', gaca queē'li' le rulu'isō yōl-la' ridila nisa na', idisóalenē' Dios Bō' Lá'ayi libí'ili'." <sup>17</sup> Que lē ni na', channō Dios gusōl-lē'ē Dios Bō' Lá'ayi quegaquiē', la' tuz ca benē' queēru' rē'u réajlē'ēru' Xanru' Jesucristo, ¿núzxitē neda' inná bé'eda'-nē' Dios?

<sup>18</sup> Ní'irō, cate' bila'yōnnē' lē ni, gula'cuá' dxíē', en gula'gu'ē Dios yōl-la' ba, ta'nnē':

—Caní naca, Dios ru'ē lataj bōnni' biti' nácagaquiē' judío, tu'bí'i lādxi'gaquiē' para ila'déli'nē' yōl-la' na'bán idú.

### *Yugu' bōnni' nacu'ē Antioquía ta'yéajlē'ē Cristo*

<sup>19</sup> Cate' ni' yugu' bōnni' judío biti' ta'yéajlē'ē gulútiē' Esteban, en gula'bía lādxi'gaquiē' ia'zica'rō bōnachi ta'yéajlē' Cristo, bulu'zxnunaj bōnachi ni, en gulásilasi zían yōdzō luyú Fenicia, en luyú Chipre, en lu yōdzō Antioquía. Gulunē' libán ni' que xtídzē'ē Dios, pero lógacasō bōnachi judío.

<sup>20</sup> Yugu' bōnni' Chipre, en yugu' bōnni' Cirene, gula'cuá'lenē' légaquiē', ate' yugu' bōnni' ni, cate' bila'dxinē' lu yōdzō Antioquía, gulu'ílenē' ca' didza' yugu' bōnni' izá'a. Gulunē' libán lógaquiē' que didza' dxí'a ca naca queē' Xanru' Jesús. <sup>21</sup> Yōl-la' huáca queē' Xanru' guzóalen légaquiē', ate' bōnachi zían gula'yéajlē' Xanru', en bulu'huóaca queē'.

<sup>22</sup> Cate' bidxín didza' ca guca lē ni, ate' bila'yōnnē' bōnni' queē' Cristo nacu'ē Jerusalén, gula'sól-lē'ē Bernabé tséajē' Antioquía na'. <sup>23</sup> Cate' Bernabé na' bidxinē' Antioquía, bilé'enē' le ruzá' lādxe'ē Dios quegaquiē', en budzējanē'. Guchíziē' icja nágagaquiē' para ila'día'tica'sē' queē' Xanru' idú lādxi'gaquiē'. <sup>24</sup> Náquiē' Bernabé na' tsahui', en idú zóalenē' Dios Bō' Lá'ayi lē', en idú lādxe'ē réajlē'ē Cristo. Ní'a que libán benē' Bernabé na', bōnachi zían lu yōdzō na' gula'yéajlē' Xanru'.

<sup>25</sup> Gudōdi ni', guyijē' Bernabé na' yōdzō Tarso, yōjdiljē' Saulo. Cate' budzōlinē' lē', buchē'ē lē' Antioquía. <sup>26</sup> Idú ca tu iz gula'cu'ē ni', tunē' tsōzxōn bōnachi queē' Cristo, en tu'sédinē' bōnachi zían. Lu yōdzō Antioquía na', gusí lo gula'zí' lágagaquiē' cristiano le rnna len didza' xidza': Bōnachi Queē' Cristo, nupa ni' ta'yéajlē' Lē'.

<sup>27</sup> Dza ni' bila'rúajē' Jerusalén, en yōjáquiē' Antioquía bal-lē' bōnni' tu'ē didza' uláz queē' Dios. <sup>28</sup> Guzuínē' Agabo, bōnni' dzáguiē' yugu' bōnni' na', en uláz queē' Dios Bō' Lá'ayi buzéajni'inē' légaquiē', gunnē':

—Si' gaca gubín idútē yōdzōlió.

Guca gubín na' cate' ni' rinná bē'ē Claudio, lu yōdzō Roma. <sup>29</sup> Ní'irō gula'zí' lu ná'agaquiē' bōnni' ta'yéajlē'ē Cristo nacu'ē Antioquía, ila'sól-lē'ē tscá le dēsō que queégaquiē', le gácalen bōchi'ru' nacu'ē luyú Judea. <sup>30</sup> Caní gulunē', ate' lē na' bulu'nōdzjē', gula'gu'ē lu ná'agaquiē' Bernabé, en Saulo para ilu'ē le lógaquiē' bōnni' gula'tapa chi'ē bōnachi queē' Cristo nacu'ē Judea.

## 12

### *Tútiē' Jacobo, en ta'gu'ē Pedro lidxi' guíē*

<sup>1</sup> Dza na' Herodes, bōnni' unná bē', benē' ga gula'zōnē' bal-lē' bōnni' queē' Cristo para ulu'saca' zí'ē légaquiē'. <sup>2</sup> Gunná bé'enē' bōnni' gulútiē' Jacobo, bōchē'ē Juan. Gulu'ē lē' guíē tuchi'. <sup>3</sup> Cate' gúquibe'enē' Herodes

gula'yaza láchxi'gaquié' bönni' judío lè ni, benë' ga gula'zönë' ca' Pedro. Gulaca lè ni dza ni' raca laní cate' tahuë' yöta xtila bití' nazí'í cúa zi que. <sup>4</sup> Gudödi gula'zönë' Pedro, gula'gu'ë lè' lidxi guié, en bulu'dödë' lè' lu ná'agaquié' tapa cö' bönni' röjáquié' gudil-la, nacu'ë tapë' tu huéaj cö' na', para uyúgaquié' lè'. Yu'u láchxë'ë Herodes ubéajë' Pedro lógaca bönachi tödi Laní Pascua, laní na' tu'subanë' ca benë' Dios, bubéajë' bönachi judío luyú Egipto. <sup>5</sup> Caní guca, nun chí'igacrë' Pedro lu yu'u lidxi guié na', pero bönachi queë' Cristo bulu'lídzatica'sö Dios, ta'nábini Dios gácalenë' Pedro.

*Dios rubéajë' Pedro lidxi guié*

<sup>6</sup> Cate' si' idxín dza yu'u láchxë'ë Herodes ubéajë' Pedro lidxi guié na', la' dzö' ní'sö dë' rásië' Pedro, ate' nacu'ë chopë' bönni' röjáquié' gudil-la cuita lè'ë Pedro na', en núa'gaquié' lè' chopa du guié. Gula'cu'ë ia'bal-lë' bönni' röjáquié' gudil-la tapa chí'ë ga nu riyaza lidxi guié na'. <sup>7</sup> Tsálido'os bulu'í lahuë' tu gubáz lá'ayi queë' Xanru' ni', ate' buzení'da' bení' lidxi guié. Gudanë' gubáz lá'ayi na' cuita lè'ë Pedro, ate' busubanë' lè', en gudxë' lè':

—Guyaschi.

Ní'irö bulu'huédxi du guié na' naga' ni'a në'ë Pedro. <sup>8</sup> Gubáz lá'ayi na' gudxë' lè', gunné':

—Béga' lè'u, en gudá' xirachu'.

La' bentë' Pedro caní. Ní'irö gubáz lá'ayi na' gudxë' lè', rnnë':

—Guxóa lari' cúdzu'u, en gudá len neda'.

<sup>9</sup> Burúajë' Pedro, sa'yéajlenë' gubáz lá'ayi na', pero bití' réquibe'enë' nácatë le runë' gubáz lá'ayi na'. Gúquinë' yélasö rinenë'. <sup>10</sup> Cate' chigula'dödë' ga nacu'ë bönni' zí'alö, en bönni' buröpi cö', bönni' na' röjáquié' gudil-la tapa chí'ë, bila'dxinë' ga zoa le néquini guié le nusayaj ga nu riyaza lidxi guié na', ga nu rurúaj la' nöza que yödzö. Ga nu riyaza na', rácasö que guyalaj. Cate' bila'rúajë' ni', gula'zë'ë ga ridzaga ia'turö nöza, ate' ni' gubáz lá'ayi na' la' bulá'alentë' Pedro. <sup>11</sup> Ní'irö réquibe'enë' Pedro, ate' lu icja láchxi'da'azë' gunné':

—Na'a chinözda' le nácatë gusól-lë'ë Xanru' gubáz lá'ayi queë', en busölë' neda' lu në'ë Herodes, en lu yúgu'të le gulë'ënnë' bönni' judío ilunë' quia'.

<sup>12</sup> Tsanni ni' yu'ë nöza Pedro, rizá' láchxë'ë ca naca lè na' guca, ate' bidxinë' lídxinu María, xiná'abi' Juan, bi'í na' zoa ia'tú labí' Marcos. Lu yu'u na' nudúbigaca bönachi zían ta'yéajlë' Cristo, en tu'lidza Dios. <sup>13</sup> Cate' bulidzë' Pedro ra' yu'u lö'a, birúajbi' bi'í nigula lëbi' Rode para inözibi' nuzxi na'. <sup>14</sup> Cate' bünbë'ëbi' bi'í nigula ni chí'ë Pedro, lu yöl-la' rudzeja queëbi' bití' gusaljbi' yu'u, pero carelö böajbi' lu yu'u, yöjtíxjöi'ibi' nupa nacuá' ni', rnnabi':

—Zoë' Pedro ra' yu'u.

<sup>15</sup> Ní'irö gulë' lëbi':

—Nachixi icju'.

Lëbi' tsútsurö ben xtídza'bi' naca caní. Ní'irö gula'nnë':

—Calëga lë'. Bixín queë' na'.

<sup>16</sup> Tsanni na' bití' zoa dxíë' Pedro rulidzë' nupa nacuá' lu yu'u. Cate' gula'saljë' yu'u, gula'nítisinë' cate' bila'lé'enë' lè'. <sup>17</sup> Ní'irö guchisa në'ë Pedro para ila'cu'ë dxisö, ate' busiyönnë' légaquié' ca benë' Xanru', bubéajë' lè' lidxi guié. Ní'irö gudxë' légaquié':

—Gulí'siyönnë' ca' Jacobo, en yugu' böchi'ru' ca na' guca.

Ní'irö burúajë' Pedro, sa'yéajë' ga yúbölö.

18 Cate' za' reni' dza na', bönni' röjáquië' gudil-la gula'bö'ë böniga nacxi guca, bitirö yu'ë Pedro lidxi guié. 19 Ní'irö gusöl-lë'ë Herodes nupa tsöjxí'gaca Pedro. Cate' biti' bulu'dzölinë' lë', Herodes gunabi yúdxinë' yugu' bönni' na' röjáquië' gudil-la, bönni' gulún chi'ë Pedro. Gudödi ni' gunná bé'enë' nupa bëtigaca yugu' bönni' na' röjáquië' gudil-la. Ní'irö buzë'ë Herodes luyú Judea, sa'yéajë' Cesarea, ate' bugá'anë' ni'.

### *Ca gútië' Herodes*

20 Dza ní'isö rilenë' Herodes bönachi yödzo Tiro, en yödzo Sidón. Zí'alö bönachi lu xiyúë' Herodes na' gula'söl-la' le biyadzaj quégaca bönachi lu xiyúgaca yödzo Tiro, en Sidón na', pero tu' rilenë' Herodes légaquië', bitirö bi ta'söl-lë'ë quégaquië'. Ní'irö gulunë' tuz bönni' Tiro, en Sidón na', ate' gulunë' ga soë' Blasto unë quégaquië' lahuë' Herodes na'. Náquië' Blasto na' huen dxin nadéli'në' lataj lo lahuë' Herodes. Gulë'ënnë' bönni' Tiro, en Sidón na' ila'dxinë' lahuë' Herodes, para ila'nábinë' lë' ugá'ana tsahui' didza' bizxaj quégaquië'. 21 Ní'irö budxíë' bë' Herodes dza yönnë' légaquië', ate' dza na' gurö'ë xilatjë' ga ruchí'a rusörö'ë bi raca, nácuë' lari' nazaca', en benë' libán lógaquië'. 22 Ní'irö bulu'lidzë' zidzaj bönni' na', ta'nnë':

—¡Calëga bönni'sö ni! ¡Dios caz ni ru'ë didza'!

23 La' ná'asö la' bë'të' gubáz lá'ayi queë' Xanru' lë' tu' buzi'ë lë' cazë' yöla' ba ral-la' gaca queë' Dios. Ní'irö gurö'ë Herodes na' buzuga', ate' gútië' tu' táguba' lë'.

24 Ní'irö guca libán que xtídzë'ë Xanru', ate' gula'yán nupa nazí' lu ná'agaca le.

### *Le zí'alö luzuí röjéngaquië' Bernabé, en Saulo libán*

25 Cate' Bernabé, en Saulo chibulu'dödë' dumí na' lu ná'agaquië' bönni' gula tapa chi'ë bönachi queë' Cristo nacu'ë Jerusalén, bulu'zë'ë ni', yöjhuöjgaquië' yödzo Antioquía. Gula'ché'ë-bi' ca' bí'i Juan, zoa ia'tú labi' Marcos.

## 13

1 Dza ná'asö gula'cu'ë bönni' tu'ë didza' uláz queë' Dios, en bönni' tu'sedinë' bönachi lu yödzo Antioquía, tunë' tu zxön bönachi queë' Cristo lu yödzo na'. Caní légaquië':

Bernabé,

Simón, (lë' ca' Bönni' Gasja),

Lucio, (bönni' Cirene),

Saulo,

Manaén, (bönni' na' guzxönlenë' tsözxön Herodes, bönni' rinná bë'ë luyú Galílea).

2 Tsanni ni' nudúbigaquië' bönni' ni queë' Xanru', en tunë' gubasa, Dios Bö' Lá'ayi gudxë' légaquië', rnnë':

—Guli'bëaj-gáquië' quez quia' Bernabé, en Saulo para tsöjéngaquië' dxin na' bulidza' légaquië' ilunë'.

3 Budxi gulunë' gubasa, en gulu'ílenë' Dios didza', ní'irö gula'xóa ná'agaquië' chopë' ni, en gula'söl-lë'ë légaquië'.

### *Yugu' gubáz nasöl-lë'ë Cristo tunë' libán luyú Chipre*

4 Ní'irö yöjáquië' Bernabé, en Saulo yödzo Seleucia, tu' gusöl-lë'ë Dios Bö' Lá'ayi légaquië' ni', ate' ni' gula'benë' tu lë'ë barco le guchë' légaquië' ga naca tu luyú bidxi lu nísado', nazí'le Chipre. 5 Cate' bila'dxinë' lu yödzo Salamina luyú na', gulu'ë xtídzë'ë Dios gapa naca lu yu'u ga tu'dubë'

bönni' judío luyú na', en tu'sedë' queë' Dios. Nachë'gaquië'-bi' bi'i Juan para gunbi' légaquië' tu zxön. <sup>6</sup> Budxi gula'dödë' idú gapa dë yödzo' luyú bidxi na' lu nisa zxön, ní'irö bila'dxinë' yödzo' Pafos. Yöjxáca'gaquië' Barjesús, tu bönni' judío ni'. Náquië' bönni' udzá' rinnë yë'ë, en rnnë' ru'ë didza' uláz queë' Dios. <sup>7</sup> Bönni' ni dzáguie' Sergio Paulo, bönni' réajni'i rinná bë'ë. Bönni' unná bë' na' bulidzë' Bernabé, en Saulo, tu' ré'ënë' yönnë' xtídzë'ë Dios. <sup>8</sup> Ní'irö bönni' udzá' na' gudá'baguië' Bernabé, en Saulo, tu' gú'unnë' gunë' ga bití' tséajlë'ë Dios bönni' rinná bë'ë. Bönni' udzá' na' lë' ca' Elimas tsca naca xtídza'gaca bönachi izá'a ga na'. <sup>9</sup> Ní'irö Saulo, lë' ca' Pablo, buzóa tsutsu lahuë', zóalenë' Dios Bö' Lá'ayi lë'. Ruyúë' Elimas na' <sup>10</sup> en rë' lë':

—Li', bönni' rizí' yë', en bönni' huiá' dö', nacu' ca xzí'ini caz tu' xihui', en bönni' bití' rilë'enë' dxí'a yúgu'të le naca tsahui'. ¿Naru' cabí soa dxitso' ca runu', ridá'bagu'u didza' tsahui' queë' Xanru', en ruzágu'u xinöza nu rë'ëni tséajlë' Lë'? <sup>11</sup> Na'a, Xanru' usaca' zi'ë li', ate' ichul-la lo', en bití' ilë'enu' gubidza nababa dza.

La' guchúl-latë lahuë' Elimas na', ate' gudë' nilö ná'alö, riguiljë' nuzxi sön në'ë para ichë' lë'. <sup>12</sup> Cate' bilé'enë' bönni' unná bë' na' lë' na' guca, bubáninë' ca naca xtídzë'ë Xanru', ate' guyéajlë'ë Cristo.

*Le gulunë' Pablo, en Bernabé lu yödzo Antioquía luyú Pisidia*

<sup>13</sup> Ní'irö buzë'ë Pablo lu yödzo Pafos na' len yugu' bönni' dzágagaquië' lë', nacu'ë tu lë'e barco, ate' bila'dxinë' yödzo Perge luyú Panfilia. Lu yödzo na' bi'i Juan bulá'alenbi' légaquië', en böajbi' Jerusalén. <sup>14</sup> Gudödi ni' bulu'zë'ë Perge na', en yöjáquië' yödzo Antioquía luyú Pisidia. Lu yödzo na', cate' ni' naca dza lá'ayi quégaquië' bönni' judío, gula'yázië' lu yu'u ga tu'dubë' tu'sedë' queë' Dios, ate' lu yu'u na' gula'bö'ë. <sup>15</sup> Ní'irö tu bönni' zoë' ni' bulabë' guichi ga nazúaj xibá queë' Dios, enca' le nazúaj lu guichi ca gula'nnë' bönni' gulu'ë didza' uláz queë' Dios. Gudödi ni' yugu' bönni' unná bë' que yu'u na' gula'söl-lë'ë nu yöjódx Saulo, en Bernabé, gunné':

—Libi'ili', böchi'tu'. Channö nuá'ali' bi innali' le uzéajni'i netu', guli'nnë.

<sup>16</sup> Ní'irö guzuínë' Pablo, en guchisa në'ë para ila'cu'ë dxisö, gunné':

—Bulí'zë' nágali' le guía' libí'ili', bönni' Israel, en libí'ili', núlöli' rádxiili-në' Dios. <sup>17</sup> Xanru' Dios, Nu ta'yéaj ládxi'gaca bönachi Israel, gurö cazë' xuz xtó'oru', en benë' ga gula'yándë'ë cate' ni' nácagaquië' bönni' zi'tu' luyú Egipto. Len yöl-la' huáca zxön queë' bubéajë' légaquië' luyú ni'. <sup>18</sup> Idú choá' iz Dios biá' gulënë' quégaquië' cate' ni' gula'dë' idú luyú bidxi lu lataj cá'asö. <sup>19</sup> Cate' budxi busunítie' gadxi cö' yödzo gula'cuá' luyú Canaán, bunödzejë' xiyúgaca bönachi ni' quégaquië' xuz xtó'oru'. <sup>20</sup> Gudödi ni', le guca idú ca tapa gayuá' yu' chi-un iz, Dios bucu'ë yugu' bönni' bulu'chi'a bulu'söröë' légaquië' ga bidxintë zoë' Samuel, bönni' bë'ë didza' uláz queë' Dios. <sup>21</sup> Ní'irö gula'nábinë' Dios uzóë' tu bönni' unná bë' quégaquië'. Dios guröë' Saúl, xzí'inë' Cis, bönni' nababë' di'a dza queë' Benjamín. Idú ca choá' iz gunná bé'enë' Saúl na' légaquië'. <sup>22</sup> Gudödi ni' Dios gudüë' Saúl na', ate' buzöë' David quégaquië' para inná bë'ë. Dios benë' ba nalí queë' David ni, gunné': “Nözda' runë' David, xzí'inë' Isaí, le raza ládxa'a, en gunë' yúgu'të le rë'ënda' neda'.” <sup>23</sup> Ladaj xzí'ini xi'sóë' David na' benë' Dios ga guljë' Jesús para gáquië' bönni' usölë' bönachi Israel, ca na' guzxí' lu në'ë Dios zí'atëlö gunë'. <sup>24</sup> Zí'alö cate' si' ilá' lahuë' Jesús, benë' Juan libán lógaca yúgu'të bönachi Israel para ulu'bí'i ládxi'gaca, en ila'dila nisa.

25 Cate' ni' chizóa údxi gunë' libán Juan na', gunné': "¿Nuzxi réquili' naca' neda'? Biti' naca' Cristo, bönni' na' ral-la' guidé'. ¡Na'a, buli'yútsöca'! Chizöé' idxinë' bönni' na' ga zoa' ni, ate' neda' bití' naca' lesaca' ilecja' xiráchuë' nudë'ë."

26 'Libí'ili', böcha'a, yugu' xzí'ini xi'söë' Abraham, en núlöli' zóali' ni, en rádxili-në' Dios. Dios caz gusöl-lë'ë queëli' didza' ni para uláli'. 27 Nupa naca' Jerusalén, en bönni' ta'nná bé'enë' légaquië' bití' bulu'únbë'ë Jesús, en bití' gula'yéajni'inë' le nazúaj lu guichi le gula'nnë' yugu' bönni' gulu'ë didza' uláz queë' Dios, sal-la' tu'laba cazë' yugu' didza' ni yugu' dza lá'ayi. Lu yöl-la' cabí réajni' queégaquië' gulunë' ga budxín ca rnna didza' ni cate' ni' gula'chúguië' queë' Jesús gátie'. 28 Sal-la' bití' budzöli le nabáguë'ë Jesús gátie', gula'nábinë' Pilato inná bé'enë' bönni' ilútië' Lë'. 29 Cate' budxi gulunë' queë' yúgu'të le nazúaj lu guichi ca ral-la' gaca queë', bulu'zötjé' Lë' lë'e yaga cruz, en bulu'cáché'ë Lë' yeru ba. 30 ¡Ní'irö Dios busubanë' Lë' lu yöl-la' guti! 31 Zián dza buluí'i lahuë' Jesús lógaca nupa yójacalen Lë' tsözxön cate' ni' buzë'ë luyé' Galilea, en bidxinë' Jerusalén. Na'a, yugu' bönni' na' tunë' ba nalí queë' lógaca bönachi.

32 'Caní naca, lë'sca' netu' ni rusiyöntu' libí'ili' didza' dxi'a ca naca lë na' guzxí' lu në'ë Dios gunë' queégaquië' xuz xtó'oru'. 33 Lë na' guzxí' lu në'ë Dios queégaquië', Lë cazë' benë' ga budxín queëru', nácaru' xzí'ini xi'sóagaquië'. Caní benë' cate' busubanë' Jesús. Guca ca na' nazúaj lu guichi ga zoa salmo buropi, le rnna caní: "Li' nacu' Xzí'ina'. Neda' buzóa caza' Li'." 34 Ca naca na', Dios busubanë' Lë' lu yöl-la' guti para cabí initi le naca cazë', Lë cazë' Dios gunné' caní: "Gunna' quiu' le nácagaca bica' ba guzxí' lu na'a lahuë' David." 35 Que lë ni na' nazúaj ca' lu guichi, ga zoa ia'tú salmo, le rnna caní: "Bití' gu'u lataj ugá'anë' bönni' lá'ayi quiu' ga initi le naca cazë'." 36 Le guca queë' David naca bë'. Gudödi benë' dxin lógaca bönachi uláz queë', ca na' gunná bé'enë' Dios lë', ní'irö gútië', ate' gula'gu'ë lë' yeru ba ga nacu'ë xuz xtá'ahuë', ate' guniti le naca cazë'. 37 Na'a, ca naca queë' Jesús na', Dios busubanë' Lë', ate' bití' guniti le naca cazë' lu yeru ba. 38 Libí'ili', böcha'a, ral-la' inözili' lë ni rusiyöntu' libí'ili'. Dios runiti lahuë' libí'ili' ca naca dul-la' nabága'li' ni'a que le benë' Jesús ni. 39 Na'a, Dios ruúnë' tsahui' yúgu'të nupa ta'yéajlë' Jesús, rugúë' yugu' dul-la' na' le cabí guca ugúa xibá queë' Dios, le bë'ë Moisés. 40 Guli'gún chi'i cuinli' na'a para cabí gaca queëli' le nazúaj lu guichi le gula'nnë' bönni' gulu'ë didza' uláz queë' Dios, le rnna caní:

41 Buli'yútsöca', libí'ili', bönni' cabí tunë' neda' bal.

Ubánili', pero lu yöl-la' cabí réajlë' queëli' gátili'.

Neda' guna' tu dxin dza ni zóali',

en sal-la' nu uluí'i libí'ili' le rulu'fí dxin na', bití' ca' tséajlë'ëli'.

42 Cate' bulu'rúajë' Pablo, en yugu' bönni' na' dzágagaquië' lë' lu yu'u ga na' tu'dubë' bönni' judío, en tu'sëdë' queë' Dios, ní'irö bönachi ni' guláta'yu lógaquië' ulu'sëdinë' légaquië' ca naca lë ni cate' idxín ia'tú dza lá'ayi queégaquië'. 43 Cate' ni' bulu'rúajë' lu yu'u na' bönni' nudúbigaquië' ni', zián bönni' judío, en bönni' nuhuóácagaquië' judío, yugu' bönni' ta'yéaj ládxi'gaquië' Dios, gulunë' tsözxön Pablo, en Bernabé. Chopë' ni gulu'ílenë' légaquië' didza', en bulu'së'ë ládxi'gaquië' para ilácatica'sé' tsutsu, ilunë' löza le ruzá' ládxe'ë Dios queégaquië'.

44 Ia'xunu' gubidza' ca' cate' bidxín ia'tú dza lá'ayi queégaquië', bulu'dubë' látu'biqiu' yúgu'të bönachi lu yödzo na' para ila'yönnë' xtídzë'ë

Dios. <sup>45</sup> Ní'irö bulu'zxé'enë' bönni' judío biti' ta'yéajlë'ë, cate' bila'lé'enë' bönachi zían na', ate' gula'nnë' que didza' ru'ë Pablo, en gula'dá'báguë'ë le. <sup>46</sup> Ní'irö lu yöl-la' rugu ladxí' quégaquië' Pablo, en Bernabé, gulë' yugu' bönni' judío na', ta'nnë':

—Ben bayudxi usiyöntu' libí'ili' zí'aló xtídzë'ë Dios, pero tu' rucá'anali' cá'asö didza' ni, en rusáca'li' queëli' biti' nácali' lesaca' sí'ili' yöl-la' na'bán idú ni, que lë ni na', na'a uyéajtu' ga nacua' bönachi izá'a. <sup>47</sup> Lëasca' caní gunná bé'enë' Xanru' Dios netu' guntu' libán queë' Cristo lógaca bönachi izá'a, en naca ca rnna didza' na' bë'ë Dios ca naca queë' Cristo, gunné': Nuzóa' Li' para gacu' bení' quégaca bönachi izá'a, en gacu' Nu usólá bönachi idútë yödzölió.

<sup>48</sup> Cate' bila'yöni bönachi izá'a nacua' ni' didza' ni, bulu'dzéjanë', en gula'gu'ë Xanru' yöl-la' ba ni'a que xtídzë'ë, yúgu'të nupa ni' chinunë' Dios quéguequi gata' quéguequi yöl-la' na'bán idú. <sup>49</sup> Caní guca, guzë' xtídzë'ë Xanru', ate' bila'yöni bönachi yúgu'të yödzö nacua' luyú ni'. <sup>50</sup> Ní'irö bönni' judío biti' ta'yéajlë'ë na' gula'gú'u yöl-lë'ë yugu' bönni' lo que yödzö ni' para cabí ila'lé'enë' dxi'a Pablo, en Bernabé. Lëasca' caní gula'gú'u yöl-lë'ë nigula lo ta'yéaj ladxí'nu Dios. Caní guca, gulunë' ga gula'bía ladxí'gaquië' Pablo, en Bernabé, ate' bulu'láguë' chopë' ni ní'ilö lu xiyúgaquië'. <sup>51</sup> Ní'irö Pablo, en Bernabé bulu'quinnajë' yu bëchtö da' la' lábagaquië' le rulu'í nagá'ana xiguia' nabága'gaca bönachi lu yödzö na', ate' yójáquië' lu yödzö Iconio. <sup>52</sup> Bulu'dzéjanë' bönni' yödzö Antioquia na', bönni' ta'yéajlë'ë Xanru', ate' guzóalenë' Dios Bö' Lá'ayi légaquië'.

## 14

### *Le gulunë' Pablo, en Bernabé lu yödzö Iconio*

<sup>1</sup> Cate' bila'dxinë' Pablo, en Bernabé yödzö Iconio, gula'yú'ë tsözxön lu yu'u ga tu'dübë' bönni' judío, en tu'sëdë' queë' Dios, ate' gulu'ë didza' ni'. Caní guca, zían bönachi judío, enca' zían bönachi izá'a gula'yéajlë' Cristo. <sup>2</sup> Ní'irö bönni' judío biti' ta'yéajlë'ë gula'gú'u yöl-lë'ë bal-lë' bönni' izá'a, para cabí ila'lé'enë' dxi'a böchi'ru' ta'yéajlë'ë Cristo. <sup>3</sup> Tu' gula'yéajlë' bönachi zían na' Cristo, gula'cu'ë Pablo, en Bernabé ni' zían dza, ate' lu yöl-la' rugu ladxí' gulu'ë xtídzë'ë Dios, tu' tu'zxöni ladxí'gaquië' Xanru'. Lë cazë' Xanru' bulu'e naca idútë li didza' tu'ë ca naca le ruzá' ladxë'ë Dios quégaca bönachi, tu' bë'ë légaquië' lataj gulunë' yugu' le taca bë', en le tun ga tu'bani bönachi. <sup>4</sup> Ní'irö bönachi lu yödzö na' bila'rúaj choplö. Bal-lë' gula'dë'ë bönni' judío biti' ta'yéajlë'ë, ate' ia'bal-lë' gula'dë'ë Bernabé, en Pablo, gubáz na' nasöl-lë'ë Cristo. <sup>5</sup> Ní'irö bönni' judío biti' ta'yéajlë'ë na', en yugu' bönni' izá'a ni' gulunë' tuz bönni' ta'nná bé'enë' légaquië', ate' bulu'dübë' para ilu'ë dö' quégaquië' gubáz na' nasöl-lë'ë Cristo, en ulu'ladxë' légaquië' guiöj. <sup>6</sup> Cate' téquibe'enë' Pablo, en Bernabé lë ni, bulu'zxúnnajë' ni', yójáquië' yödzö Listra, en Derbe luyú Licaonia, ate' gula'dödë' yúgu'të yödzödo' idú gásibi'ilö ni', <sup>7</sup> gapa ni' gulunë' libán que didza' dxi'a ca naca queë' Cristo.

### *Tu'ladxë' Pablo guiöj lu yödzö Listra*

<sup>8</sup> Zoë' tu bönni' lu yödzö Listra biti' raca së'ë. Ró'ösë' ni' tu' cabí rizë'ë cate' ni' guljë', en catu caz guzë'e ni'ë. <sup>9</sup> Bönni' ni ruzë' náguië' didza' ru'ë Pablo. Pablo buyúë' lë', en gúquibe'enë' réajlë'ë Cristo para huóáquië'. <sup>10</sup> Ní'irö Pablo bë'ë zidzaj didza', en rë' lë':



—Guzuí.

La' guxítí'tè' bõnni' na', en guzè'e ni'è. <sup>11</sup> Cate' yugu' bõnni' Listra bila'lé'enè' lè na' benè' Pablo, gula'sí lógaquiè' tu'è zidzaj didza' lu didza' tu'è bõnni' Licaonia na', ta'nnè':

—¡Yugu' dios bõnni' ni! ¡Nuhuõtjagaquiè' ga zóaru', en tu'luf'i cuíngaquiè' ca nácaagaquiè' bõnni'!

<sup>12</sup> Gula'nnè' Bernabé na' náquiè' Júpiter, ca lè' dios lo quégaquiè', ate' gula'nnè' náquiè' Pablo Mercurio, ia'tú dios quégaquiè'. Caní gula'nnè' tu' ru'è didza' Pablo ca na' ta'nnè' runè' Mercurio na'. <sup>13</sup> Zoa yudo' que Júpiter ga ni' nacu'è, cuita nõza ga ni' ta'yaza bõnachi lu yõdzõ na'. La' bidxintè' bixúz que Júpiter na', nachè'è-ba' yugu' bèdxí, en nu'è ca' yugu' breguí' yõj, ate' dzágagaca bõnachi zían lè'. Gulé'ennè' ilútiè'-ba' bèdxí na' lógaquiè' Pablo, en Bernabé para ila'yéaj ládxi'gaquiè' légaquiè' ca tunè' quégaca dios quégaquiè'. <sup>14</sup> Cate' Bernabé, en Pablo, gubáz na' nasõl-lè'è Cristo, guléquiibe'enè' lè ni, gula'chözè' lari' nácuagaquiè'. Tu'huf'ininé' tu' tunè' bõnni' ni le cabí ral-la' ilunè', ate' gula'xítí'è, en yõjcu'è gatsaj láchui'lõ bõnachi zían na', en gulu'è zidzaj didza', tè' légaquiè':

<sup>15</sup> —¡Libí'ili' bõnachi! ¿Bizx que runlí' caní? Lësca' bõnni' ca libí'ili' nácatu', en riguíxjoi'itu' libí'ili' lè ni caz ral-la' ucá'anali', le cabí nácatè, para guéquil' queè' Dios ban. Dios ni benè' lúzxiba, en yõdzõlió, en nísado', en yúgu'tè le nacuá' tu tu lataj na'. <sup>16</sup> Yugu' iz chigula'dõdi, gulún yúgu'tè bõnachi ca rnnasõ que queèguequi, ate' Dios biti' buzáguè'è xinõzguequi, <sup>17</sup> pero benè' ga gulaca le tun ba nalí queè', yugu' le náca gaca dxi'a benè' quégaquiè'. Risõl-lè'è queèru' nisa guiõj, en runè' ga ta'yán le rázaru'. Ruzõlaj rudzé'enè' rë'u, en runè' ga rudzeja ládxi'ru'.

<sup>18</sup> Sal-la' Bernabé, en Pablo gulé' légaquiè' caní, cánnisõ bila'déli'nè' bulu'záguè'è xinõzguequi bõnachi zían na', para cabí ilútiè'-ba' bèdxí na' lógaquiè'.

<sup>19</sup> Ní'irõ bal-lè' bõnni' judío biti' ta'yéajlè'è, narúajgaquiè' Antioquía, en Iconio, bila'dxinè' ni', ate' gula'gú'u yõl-lè'è bõnachi zían na'. Ní'irõ yúgu'tè bulu'ladxè' Pablo guiõj, en gulá'ayõjè' lè' ní'ilõ ra' yõdzõ na', tu' téquinè' chinátíè'. <sup>20</sup> Ní'irõ bulu'dubè' yugu' bõnni' ta'yéajlè'è Cristo idú gásibi'ilõ ga dè' Pablo. Guyasè' lè', en buáziè' lu yõdzõ na'. Cate' za' rení' ia'tú dza, burúajlenè' Bernabé, yõjáquiè' yõdzõ Derbe.

<sup>21</sup> Lu yõdzõ ni' gulunè' libán que didza' dxi'a ca naca queè' Jesucristo, ate' bõnachi zían ní' gula'yéajlè' Cristo. Gudõdi ní' yõjhuõjgaquiè' Listra, en Iconio, en Antioquía. <sup>22</sup> Cate' gula'dõdè' Bernabé, en Pablo yugu' yõdzõ na', bulu'tipè' ládxi'gaquiè' bõnni' ni' ta'yéajlè'è Cristo, en bulu'sé'è ládxi'gaquiè' ulu'gá'anè' tsutsu ca na' ta'yéajlè'è Lè'. Gulé' légaquiè':

—Rè'u tsaza cázaru' ga rinná bè'è Dios, run bayudxi quí'i sáca'ru' zían le gaca queèru'.

<sup>23</sup> Bulu'cu'è yugu' bõnni' gula ilún chi'è bõnachi queè' Cristo tu cõ' huéaj bõnachi ní' queè' Cristo. Cate' chiguluf'ilenè' Dios didza', en gulunè' gubasa, ní'irõ gula'gu'è légaquiè' lu nè'è Xanru', Nu na' ta'yéajlè'è.

*Pablo, en Bernabé tu'dxinè' Antioquía luyú Siria*

<sup>24</sup> Ní'irõ Pablo, en Bernabé gula'dõdè' luyú Pisidia, ate' bila'dxinè' luyú Panfilia. <sup>25</sup> Budxi gulunè' libán que xtídzè'è Cristo lu yõdzõ Perge, yõjáquiè' yõdzõ Atalia. <sup>26</sup> Bulu'zè'è ni', ate' gula'benè' tu lè'e barco, en bulu'dxinè' yõdzõ Antioquía, ga na' nacu'è bõnni' queè' Cristo, bõnni' na' gula'sõl-lè'è légaquiè' tsõjéngaquiè' libán, cate' ní' gula'gu'è légaquiè' lu nè'è

Dios, Nu na' ruzá' ladxi' quégaquië' ilunë' xichinë', dxin na' chibudxi gulunë'. <sup>27</sup> Cate' ni' bulu'dxinë' Antioquía, bulu'dubi bönachi queë' Cristo nacua' ni'. Ní'irö Pablo, en Bernabé bulu'siyönnë' légaquië' ca nácagaca le zxön benë' Dios lu ná'agaquië', enca' ca benë' Dios, bë'e yugu' bönachi izá'a lataj ta'yéajlë' ca' Lë'. <sup>28</sup> Pablo, en Bernabé bulu'gá'analenë' bönachi ni' ta'yéajlë' Cristo zían dza.

## 15

*Tu'dubë' huen dxin queë' Cristo lu yödzö Jerusalén*

<sup>1</sup> Ní'irö bal-lë' bönni' narúajgaquië' luyú Judea bila'dxinë' yödzö Antioquía, ate' bulu'sédinë' böchi'ru', bönni' izá'a ni', ta'nnë':

—Channö cabí irugu lu xipéla'li' ca nalëbitu' runtu' ca na' gunná bë'e Moisés, biti' gaca uláli'.

<sup>2</sup> Ní'irö Pablo, en Bernabé gula'díl-lalenë' légaquië' didza', ate' gúcada' dzatsa. Gudödi ni', gula'böë' Pablo, en Bernabé len ia'bal-lë' bönni' böchi'ru' ni', para tsójáquië' Jerusalén, en ila'dxinë' lógaquië' gubáz ni' queë' Cristo, enca' lógaquië' bönni' gula tapa chi'ë bönachi queë' Cristo ni', para ilu'ilenë' légaquië' didza' ca naca lë ni raca, tu'sédinë' bönni' na' bönachi le nachixi.

<sup>3</sup> Ní'irö yugu' bönni' queë' Cristo nacu'ë Antioquía bulu'gu'ë légaquië' nöza, ate' gula'dödë' lu xiyú yödzö Fenicia, en luyú Samaria, ate' bulu'siyönnë' böchi' luzá'aru' yugu' lataj ni' ca guca, bulu'huóáquië' bönni' izá'a queë' Cristo. Lë ni ben ga bulu'dzéjanë' yúgu'të böchi' luzá'aru' ni'.

<sup>4</sup> Cate' bila'dxinë' Pablo, en Bernabé lu yödzö Jerusalén, yugu' bönni' queë' Cristo nacu'ë ni', enca' yugu' gubáz nasöl-lë'ë Lë', en yugu' bönni' gula tapa chi'ë gulunë' légaquië' bal. Pablo, en Bernabé bulu'siyönnë' légaquië' yúgu'të le benë' Dios lu ná'agaquië'. <sup>5</sup> Ní'irö gula'zuiné' bal-lë' bönni' yudo' fariseo, bönni' ta'yéajlë'ë Cristo, en ta'nnë':

—Run bayudxi irugu lu xipéla'gaquië' bönni' izá'a na' ta'yéajlë'ë Cristo, en inná bé'eru' légaquië' ilunë' ca rnna bë' xibá queë' Moisés.

<sup>6</sup> Ní'irö bulu'dubë' gubáz nasöl-lë'ë Cristo len bönni' gula tapa chi'ë bönachi queë', para ulu'chi'a ulu'söröë' lë ni raca. <sup>7</sup> Gudödi gulu'ë zían didza', guzuiné' Pedro, en gudxë' légaquië':

—Libi'ili', böcha'a. Nöz quézili' ca guca dza ni'te, Dios gurö cazë' neda' para guna' libán lógaca bönachi izá'a para ila'yöni didza' dxi'a, en ila'yéajlë' Cristo. <sup>8</sup> Dios, Nu nunbë' caz le yu'u icja ládxi'do'gaca bönachi, buzóë' le naca bë' runë' légaquië' bal, gusöl-lë'ë Dios Bö' Lá'ayi quégaquië', ca na' gusöl-lë'ë Lë' queëru'. <sup>9</sup> Biti' butsé'ë ca benë' quégaquië', en queëru', en lësca' bunë' dxi'a icja ládxi'do'gaquië' tu' ta'yéajlë'ë Cristo. <sup>10</sup> Na'a, ¿bizx que run leli'-në' Dios, rusubága'li' yua' xiyéngaca böchi' luzá'aru'? Yua' ni, le naca le ta'nná bë' xibá queë' Moisés, biti' guca guá'aru' rë'u, en biti' guca ilu'ë xuz xtó'oru' le. <sup>11</sup> Rë'u ni, réajlë'ëru' nuláru' ni'a que le buzá' ládxe'ë Xanru' Jesús queëru', en ca na' nuláru' rë'u, ulu'lë' ca' légaquië'.

<sup>12</sup> Cate' budxi bë'ë Pedro didza' ni, yúgu'të' gula'cu'ë dxisö, ate' bulu'zë nágagaquië' didza' gulu'ë Bernabé, en Pablo. Bulu'siyönnë' légaquië' yugu' le taca bë', en le tun ga tu'bani bönachi, yugu' le benë' Dios lu ná'agaquië' ga nacua' bönachi izá'a. <sup>13</sup> Cate' Bernabé, en Pablo budxi gulu'ë didza' ni, bubí'ë didza' Jacobo, gunné':

—Libi'ili', böcha'a. Buli'zë nágali' le guía' lib'ili'. <sup>14</sup> Simón Pedro chigudíxjö'i' quézinë' rë'u ca benë' Dios, bulu'e lahui yöl-la' huáca queë'

le zí'alò luzuí lógaca yugu' bönachi izá'a para bubéajë' quez queë' bönachi nútsa'gaca ládjagaquië'. <sup>15</sup> Ca naca lë ni röj'lözgaca xtídza'gaquië' bönni' gulu'ë didza' uláz queë' Dios, ca na' nazúaj lu guichi lá'ayi, rnna:

<sup>16</sup> Dza tódi lë ni huóda', en uchisa' Nu inná bë', bönni' na' tsázië' xilatjë' David.

Guna' ca run nu ruchisa tu yu'u naguinnaj.

Uchisa' ca' bönachi ila'cuá' lidxë', nupa nagá'anagaca.

Guna' ca run nu ruchisa tu zö'ö yexu'.

Caní uchisa' le gunná bë'ë David

<sup>17</sup> para ulu'guilaj ia'zíca'rö bönachi Xanru'.

Ulu'guilaj bönachi izá'a Lë',

ate' si' láguequi: Bönachi Queë' Dios.

<sup>18</sup> Caní rnnë' Xanru',

Nu na' dza ni'te ben ga naca bë' yúgu'të lë ni.

<sup>19</sup> 'Que lë ni na' runi neda' biti' ral-la' gun níguiru' bönachi izá'a, nupa tu'huóaca queë' Dios. <sup>20</sup> Ral-la' uzúajru' lu guichi quégaquië' ulu'cá'anë' yugu' le biti' ral-la' ilahuë', le nadödi lógaca budó' guiöj budó' yaga, en cabí ilunë' le ruá' dö', en cabí ilahuë' xipéla'gacaba' böa' guixi' biti' narúaj-gácaba' rön, en cabí ilahuë' xichónba' bítí'tës böa' guixi'. <sup>21</sup> Dza ni'te nacua' yúgu'të yödzö nupa tun libán lu yu'u gapa tu'dubë' bönni' judío, en tu'sëdë' queë' Dios. Tunë' libán ni' que le buzúajë' lu guichi Moisés. Tu'laba cazë' le yugu' dza lá'ayi.

<sup>22</sup> Ní'irö gula'yaza ládxi'gaquië' gubáz nasöl-lë'ë Cristo, en bönni' gula tapa chi'ë, en yúgu'të bönachi queë' Cristo, ila'böë' bal-lë' bönni' ládjagaquië', en ila'söl-lë'ë légaquië' Antioquia. Tsöj'acalenë' Pablo, en Bernabé. Chopë' na' gula'böë', légaquië' Judas, zoa ia'tú lë' Barsabás, enca' Silas. Nácagaquië' bönni' lo ládjagaquië' böchi'ru' ni'. <sup>23</sup> Bulu'zúajë' lu guichi le bulu'dödë' lu ná'agaquië' ilu'ë, le rnna caní:

"Netu', gubáz nasöl-lë'ë Cristo, en bönni' gula tun chi'ë, en yugu' böchi'ru', rugápatu' libí'ili' Dios, böchi'tu', nácali' bönachi izá'a zóali' Antioquia, en yugu' yödzö luyú Siria, en Cilicia. <sup>24</sup> Biyönitu' ca tun bal-la bönachi bila'rúaj ga zóatu', nupa na' biti' nasöl-la'tu'. Dutsá'agaquië' libí'ili' len le ta'nnë', en tu'bequi böniga icja ládxi'do'oli', tu' ta'nná bë'ë irugu lu xipéla'li', en gunli' ca rinná bë' xibá queë' Moisés. <sup>25</sup> Que lë ni na' guyaza ládxi'tu' cate' chibén tuz xtídza'tu', gurötu' chopë' bönni', nupa isöl-la'tu' para uduyúgaquië' libí'ili'. Guídlengaquië' Bernabé, en Pablo, nupa na' nadxí'iru'. <sup>26</sup> Chiyöjáquië' Bernabé, en Pablo gapa guzóa bönadxi ilátië' tu' nadxí'iguequinë' Xanru' Jesucristo. <sup>27</sup> Caní naca, risöl-la'tu' Judas, en Silas ga zóali'. Chopë' ni ulu'siyönnë' libí'ili' lë ni ruzúajtu' lu guichi ni. <sup>28</sup> Dios Bö' Lá'ayi buluf'inë' netu' le raza ládxi'ë, en lësca' caní raza ládxi'tu' netu', biti' usubága'rötu' libí'ili' yua', le naca le rinná bë' xibá queë' Moisés, pero yugu' lë nisö run bayudxi gunli':

<sup>29</sup> Biti' gáguli' le nadödi lógaca budó' guiöj budó' yaga.

Biti' gáguli' rön.

Biti' gáguli' xipéla'gacaba' böa' guixi' biti' narúaj-gácaba' rön.

Biti' gunli' le ruá' dö'.

Chanö' gun chi'i cuinli' para gunli' ca rnna yugu' lë ni, gunli' dxi'a."

<sup>30</sup> Caní guca, yugu' bönni' na' nasöl-la'gaquië' bila'dxinë' Antioquia. Bulu'tubë' bönachi queë' Cristo nacua' ni', ate' gula'gu'ë guichi na' lu ná'agaquië'. <sup>31</sup> Cate' chibudxi bulu'labë' le, bulu'dzéjanë' ca naca le

nazúaj lu guichi na', le ruhué tsahui' légaquié'. <sup>32</sup> Tu' nácagaquié' Judas, en Silas bönni' tu'è didza' uláz queé' Dios bulu'hué tsáhué'è légaquié', en bulu'tipè' ládxi'gaquié' böchi'ru' ni', bulu'guné' dxin didza' zían le guluf'ilené' légaquié'. <sup>33</sup> Gudödi bulu'dzéné' Judas, en Silas ni' nababa dza, ní'ró böchi'ru' ni' bulu'zené' légaquié' dxi'a didza' para tsöjhuöajgaquié' Jerusalén ga nacu'è bönni' gula'sól-lé'è légaquié'. <sup>34</sup> Guyaza ládxe'è Silas bugá'ané' Antioquia. <sup>35</sup> Bulu'gá'ané' ca' Pablo, en Bernabé Antioquia na', ate' bulu'sédiné' bönachi, en guluné' libán que xtídzé'è Xanru'. Lésca' caní gulún zíanró ca' bönachi.

*Risí lahué' Pablo röjené' libán le buropi luzuí*

<sup>36</sup> Gudödi nababa dza Pablo gudxé' Bernabé:

—Uyējaju' leyúbölö tsöjyúgacaru'-né' böchi'ru' nacu'è yúgu'té yödzö gapa chiyöjenru' libán que xtídzé'è Xanru', para ilé'eru' nacxi raca quégaquié'.

<sup>37</sup> Gú'unné' Bernabé ila'ché'è-bi' bi'i Juan Marcos, tséajlenbi' légaquié', <sup>38</sup> pero biti' guyaza ládxe'è Pablo ila'ché'è-bi' tséajlenbi' légaquié' tu' bulá'alenbi' légaquié' luyú Panfilia, en bití'ró yöjénlenbi' légaquié' dxin queé' Xanru'. <sup>39</sup> Biti' guca tuz xtídzá'gaquié' Bernabé, en Pablo ga bidxinté bulu'lá'alené' tué' ia'túé'. Bernabé guché'è-bi' bi'i Marcos, ate' gula'bené' tu lé'e barco, yójáquié' luyú Chipre. <sup>40</sup> Pablo guröé' Silas para tséajlené' lé'. Ní'ró yugu' böchi'ru' gula'gu'è légaquié' lu në'è Xanru', en gula'nábiné' Lé' uzá' ládxe'è quégaquié', ate' bulu'zé'è Pablo, en Silas ni'. <sup>41</sup> Gula'dödé' yugu' yödzö luyú Siria, en Cilicia, ate' bulu'tipè' ládxi'gaca bönachi queé' Cristo nacuá' ni'.

## 16

*Bi'i Timoteo runbi' tsözxön Pablo, en Silas*

<sup>1</sup> Gudödi ni' bila'dxiné' Pablo, en Silas yödzö Derbe, en yödzö Listra. Zóabi' tu bi'i bönni' ni', réajlé'ëbi' Cristo, lébi' Timoteo. Nácabi' zxi'ininu tu nigula judío réajlé'ënu Cristo, pero xúzibi' biti' náquié' judío. <sup>2</sup> Yugu' böchi'ru' nacu'è Listra, en Iconio tuné' ba nalí queé'bi', ta'nné' runbi' le naca dxi'a. <sup>3</sup> Gú'unné' Pablo tséajlenbi' bi'i ni lé', ate' gudélé'è-bi', en guchúguié' lu xipéla'bi' ca tun bönachi judío. Caní bené' para cabí ila'nné' queé'bi' bönni' judío nacu'è yugu' yödzö ni', tu' nöziguequiné' yúgu'té' xúzibi' biti' náquié' judío. <sup>4</sup> Cate' Pablo, en nupa dzágagaca lé' gula'dödé' gapa nacuá' yödzö ni', tu tu yödzö na' bulu'dödé' lu ná'agaquié' yugu' böchi'ru' nacu'è gapa ni' yugu' xibá na' guluné' gubáz nasól-lé'è Cristo, en bönni' gula tapa chi'è bönachi queé', nacu'è Jerusalén. Bulu'dödé' yugu' xibá ni lu ná'agaquié' para iluné' ca rinná bē' xibá na'. <sup>5</sup> Caní guca, bönachi yúgu'té có' bönachi queé' Cristo bila'dipa ládxi'gaca ca naca le réajlé'ëru' Cristo, ate' gula'yán tu tu dza.

*Tu bönni' Macedonia rulidzé' Pablo lu yēla bëchigal*

<sup>6</sup> Pablo, en bönni' dzágagaquié' lé' gula'dödé' luyú Frigia, en luyú Galacia, tu' buzágué'è Dios Bō' Lá'ayi xinözgaquié', para cabí iluné' libán que xtídzé'è Xanru' luyú Asia. <sup>7</sup> Cate' bila'dxiné' luyú Misia, gulé'ënné' tsójáquié' luyú Bitinia, pero Dios Bō' Lá'ayi, Nu risól-lé'è Jesús queéru', biti' bé'è légaquié' lataj. <sup>8</sup> Ní'ró gula'dödé' gala' ga dē Misia, ate' yójáquié' lu yödzö Troas. Neda' Lucas, ruzúaja' lu guichi lé ni, guzóa' Troas na', ate' yöjsóalena'-né' Pablo. <sup>9</sup> Lu yödzö ni' Dios buluf'iné' Pablo tu le bilé'ené' lu

yëla bëchigal. Tu bënni' Macedonia bulu'i lahuë' lë', zuinë', en ráta'yué' lahuë' Pablo, rnnë': "Gudödi ladztu', lu xiyú Macedonia, en gúcalen netu'." <sup>10</sup> Cate' bilé'enë' Pablo lë ni, lë na' bulu'i lahui lë', la' bë ládxi'tëtu' tséajtu' luyú Macedonia, tu' gúquibe'etu' Dios chibulidzë' netu' tsöjentu' libán que didza' dxi'a lógaca bönachi luyú ni'.

*Le gulunë' Pablo, en Silas lu yödzo Filipos*

<sup>11</sup> Ní'irö gurentu' lë'e barco, en buzá'atu' Troas. Gudöditu' lirá ga bidxintu' yödzo Samotracia, ate' gudödi ia'tú dza bidxintu' yödzo Neápolis. <sup>12</sup> Buzá'atu' ni', ate' bidxintu' Filipos, yödzo na' nácarö lo ca yúgu'të yödzo nabábagaca tsölá'a ni' luyú Macedonia. Lu yödzo ni' yugu' bënni' Roma nucuá'agaquië' bönachi uládz quégaquië'. Lu yödzo nisö guzóatu' nababa dza. <sup>13</sup> Cate' bidxín tu dza lá'ayi, birúajtu' lu yödzo, en guyéajtu' ra' yegu ga na' tu'dubi caz bönachi yödzo na', en tu'lidza Dios. Gurö'ötu' ni', en busiyöntu' yugu' nigula nudúbigacanu ni' ca naca xtídzë'ë Xanru'. <sup>14</sup> Nútsa'nu ládjacacanu Lidia, tu nigula Tiatira. Nácanu nigula rúti'nu lari' xiná chul-la le nazáca'da'. Reaj ládxi'nu Dios, ate' buzé náganu didza' ru'ë Pablo, ate' Xanru' gúcalenë'-nu para guzxí' lu ná'anu didza' na' bë'ë. <sup>15</sup> Ní'irö bidílanu lënu nisa, ate' gula'dila ca' nisa bönachi nacuá' lídxinu. Gudödi ni' gúta'yunu lotu', gunnānu:

—Channö réquibe'eli' réajlë'a Xanru', guli'tsaza lidxa', en guli'sóa ni'.  
Bennu bayudxi ugá'anatu' ni'.

<sup>16</sup> Ia'tú le guca tu dza tsanni ni' zéajtu' ga na' rulidztu'-në' Dios, birúajbi' dutságabi' tu bi'i nigula netu' yu'u lëbi' bö' le run ga rinnë yá'abi'. Len yöl-la' rinnë ya'a queëbi' runbi' ga ta'zídë'ë dumí yugu' bënni' xanbi'. <sup>17</sup> Bi'i nigula ni' sudunóbi'-në' Pablo, en netu', ru'í'ibi' zidzaj didza', rnnabi':

—¡Yugu' bënni' ni tunë' xichinë' Dios nayëpisëtërë'! ¡Tu'siyönnë' libí'ili' naca gaca uláli'!

<sup>18</sup> Caní benbi' zían dza. Cate' bíti'rö guyaza ládxe'ë Pablo, buécjë', en bulidzë' bö' na' yu'u lëbi', rnnë':

—Lu Lë' Xanru' Jesucristo, rinná bé'eda' li'. ¡Burúaj icja ládxi'do'obi' bi'i nigula ni'!

La' ní'isö burúajtë bö' na'.

<sup>19</sup> Cate' bila'lé'enë' xanbi' chiburúaj bö' na' run ga rinnë yá'abi', en bíti'rö naca löza ila'zi'ë dumí ni'a queëbi', que lë ni na' gula'zönë' Pablo, en Silas, ate' gula'chë'ë légaquië' lógaquië' bënni' yúlahui', nudúbigaquië' ga naca lu yë'ëyi. <sup>20</sup> Bulu'cu'ë légaquië' lógaquië' bënni' yúlahui' na', ta'nnë':

—Yugu' bënni' ni nácaçaquië' judío, en tunë' ga tu'tsatsa bönachi yödzo ni. <sup>21</sup> Tu'sëdinë' le cabí ral-la' si' lu ná'aru', en bití' ral-la' gunru', tu' nabábaru' Roma.

<sup>22</sup> Ní'irö bönachi zían ni' gula'dá'baga' Pablo, en Silas, ate' yugu' bënni' yúlahui' gula'nná bé'enë' nupa gula'lecja lari' nácaçaquië' Pablo, en Silas, ate' gula'guinë' légaquië' gubá'ayi. <sup>23</sup> Gudödi gula'guindë'ë légaquië', gula'gu'ë légaquië' lidxi guié. Gula'nná bé'enë' bënni' rusayjë' lidxi guié na' gun chí'idë'ë légaquië'. <sup>24</sup> Bënni' ni, cate' chigula'nná bé'enë' lë' caní, gulu'ë légaquië' lu yu'u lë'e dxi' lidxi guié na', en gulu'ë ní'agaquië' yeru yaga ta'zón ní'agaquië'.

<sup>25</sup> Idú guluhuëla Pablo, en Silas tu'lidzë' Dios, en tul-lë' yöl-la' ba queë' Dios, ate' ta'yönnë' yugu' bënni' nadzúngaquië' lidxi guié na'.

<sup>26</sup> Ní'irö tsárido'os gudödi budó' zxu' bach. Caní guca ga bidxintë guzxizi xilibi zö'ö lidxi guié na', ate' la' gula'yáljatë yúgu'të gapa nu riyaza,

ate' bulu'huédxi ca' yugu' du guié nága'gaca bönni' nadzúngaquié' ni'.  
<sup>27</sup> Bubané' bönni' na' rusayjé' lidxi guié. Cate' bilé'ené' nayáljagaca gapa nu riyaza lidxi guié na', gulecjé' guié tuchi' queé' para guti cuiné', tu' réquiné' chibulu'zxúnnajé' bönni' nadzúngaquié' lidxi guié na'. <sup>28</sup> Ní'irö Pablo zidzaj bulidzé' lè', gunné':

—¡Biti' bi gúni cuinu', tu' zóatu' ni yúgu'tétu'!

<sup>29</sup> Ní'irö bönni' na' gunabé' guí, ate' gudá'atè' lu yu'u lidxi guié na'. Guzxízidè'è lu yöl-la' radxi, ate' biyéchué' xiní'agaquié' Pablo, en Silas.  
<sup>30</sup> Cate' chinubéajé' légaquié' lidxi guié na', gudxé' légaquié':

—Libi'ili', bönni', ¿bizxi ral-la' guna' para ulá'?

<sup>31</sup> Légaquié' tè' lè':

—Guyéajlè'è Xanru' Jesucristo, ate' uló' li', en lësca' caní ulu'lágaca bönachi nacua' lidxu'.

<sup>32</sup> Gulufílené' lè' didza' ca naca xtídzè'è Xanru', dzágagaca lè' yúgu'tè bönachi nacua' lidxé'. <sup>33</sup> La' ná'asö, ni' naca chi'i dzö'ölö la' guchè'tè légaquié', ate' yójtibé' légaquié' ga dxíagaquié' hué'. Gudödi ni', la' bidílatè' nisa, ate' gula'dila ca' nisa yúgu'tè bönachi nacua' lidxé'. <sup>34</sup> Ní'irö guché'è légaquié' lidxé', en bè'è le gulahué'. Rudzéjané' lè', en tu'dzeja ca' yúgu'tè bönachi nacua' lidxé' tu' ta'yéajlè'è Dios.

<sup>35</sup> Cate' za' rení' dza na', yugu' bönni' yúlahui' gula'söl-lè'è ni'a ná'agaquié', ate' gulé' bönni' na' rusayjé' lidxi guié:

—Busán-gáquié' bönni' na'.

<sup>36</sup> Ní'irö bönni' na' rusayjé' lidxi guié gudíxjöi'iné' Pablo didza' ni, gunné':

—Gula'söl-lè'è bönni' yúlahui' didza' usana' libí'ili'. Na'a, guli'ruaj, en buli'huöaj dxí'ado' ga rizóali'.

<sup>37</sup> Ní'irö birúajé' Pablo, en gudxé' yugu' ni'a ná'agaquié' bönni' yúlahui' na', gunné':

—Chigula'guiné' netu' lógaca bönachi sal-la' biti' narúguini queétu' ca rinná bè' xibá, en gula'gu'è netu' lidxi guié, ate' netu' ni nabábatu' Roma. ¿Naru' tu'santsé' netu' bagáchi'sö? ¡Biti' ca' gaca! ¡Ilídigaré' légaquié' udusángaqüé' netu'!

<sup>38</sup> Yöjhuöjgaquié' ni'a ná'agaquié' bönni' yúlahui' na', en bulu'siyönné' yugu' bönni' yúlahui' didza' ni, ate' légaquié' guládxiné' cate' bila'yönné' nabábagaquié' Pablo, en Silas Roma. <sup>39</sup> Cate' bila'dxiné' lidxi guié ni', guláta'yué' lógaquié' Pablo, en Silas cabí ulu'subágué'è légaquié' xíguia'. Ní'irö gula'béajé' légaquié' lidxi guié na', en guláta'yué' lógaquié' ulu'ruajé' yödzö na'. <sup>40</sup> Ní'irö bila'ruajé' Pablo, en Silas lidxi guié na', ate' gula'yázié' lídxinu Lidia. Cate' chibila'lé'ené' böchi'ru' nacu'è ni', bulu'chízié' didza' icja nágaquié', en la' bulu'zá'atè' ni'.

## 17

### *Yugu' bönachi Tesalónica tuné' dzatsa*

<sup>1</sup> Gula'dödè' Pablo, en Silas lu yödzö Anfípolis, en lu yödzö Apolonia, ate' bila'dxiné' lu yödzö Tesalónica, ga ni' zoa tu yu'u ga tu'dubé' bönni' judío, en tu'sédè' queé' Dios. <sup>2</sup> Bugá'ané' Pablo ni' idú galaj dza, ate' ca run cazé', guyijé' ga zoa yu'u na' cate' naca dza lá'ayi quégaquié' bönni' judío, ate' bè'lené' légaquié' didza'. <sup>3</sup> Buchila lá'ané', en buluí'iné' légaquié' rusédi le nazúaj lu guichi lá'ayi run bayudxi qui'i sáqué'è Cristo, Bönni' na' tuné'

lõza bõnni' judío udusõlë' légaquië', ate' tõdi gátië' ubanë' lu yõl-la' guti. Ní'irõ Pablo gudxë' légaquië':

—¿Caní guca queë' bõnni' na' lë' Jesús, runa' libán queë' ga ni zóali' ¡Bõnni' ni náquië' Cristo!

<sup>4</sup> Ní'irõ bal-lë' gula'yéajlë'ë Cristo, ate' gulunë' tsõzxõn Pablo, en Silas. Lësca' caní zían bõnni' izá'a, bõnni' ta'yéaj ládxi'gaquië' Dios, gula'yéajlë'ë Cristo. Lësca' zían nigula lo gula'yéajlë'ënu Cristo. <sup>5</sup> Ní'irõ yugu' bõnni' judío biti' ta'yéajlë'ë, lu yõl-la' ruzxë'e quégaquië' Pablo, bulu'tubë' yugu' bõnni' biti' nácaquië' tsahui', bõnni' ta'dasë' ca'. Cate' chibulu'tubë' bõnachi zían, gulunë' ga gulún dzatsa idú lu yõdzõ na', ate' bayudxi gula'yázië' lidxë' Jasón para ulu'béajë' Pablo, en Silas lógaca bõnachi na' tun dzatsa. <sup>6</sup> Cate' biti' bulu'dzõlinë' Pablo, en Silas, gula'béajë' Jasón, en ia'zíca'rë' bõchi'ru' nacu'ë ni', ate' gula'chë'ë légaquië' lógachië' bõnni' yúlahui'. Gulu'ë zidzaj didza', ta'nnë':

—Yugu' bõnni' na' nutsá'gaquië' bõnachi idütë yõdzõlió chibila'dxinë' ca' ni. <sup>7</sup> Jasón ni gulu'ë légaquië' lidxë'. Yúgu'të bõnni' ni ta'dá'baguë'ë xibá queë' César, bõnni' rinná bé'enë' rë'u, ta'nnë': “Zoë' ia'túë' bõnni' rinná bë'ë, lë' Jesús.”

<sup>8</sup> Cate' bila'yõnnë' yugu' bõnni' lu yõdzõ, en yugu' bõnni' yúlahui' na' lë ni, gula'bõ'ë bõniga. <sup>9</sup> Ní'irõ, gudõdi gula'zi'ë bõnni' yúlahui' dumí le bulu'cá'anagarë' Jasón, en ia'zíca'rë' bõnni' na', bulu'sanë' légaquië'.

#### *Le gulunë' Pablo, en Silas lu yõdzõ Berea*

<sup>10</sup> Ní'irõ yugu' bõchi'ru' ni' la' gula'sõl-la'të' Pablo, en Silas, ni' naca chi'i dzõ'oló, ate' sõjáquië' yõdzõ Berea. Cate' bila'dxinë' ni', gula'yázië' lu yu'u ga tu'dubë' bõnni' judío nacu'ë ni', en tu'sëdë' queë' Dios. <sup>11</sup> Gulácarë' tsahui' bõnni' ni ca bõnni' nacu'ë Tesalónica, tu' gula'zí' lu ná'agaquië' xtídzë'ë Xanru' idú ládxi'gaquië'. Yugu' dza bulu'labë' dxi'a le nazúaj lu guichi lá'ayi, para iléquibe'enë' channõ nácatë lë na' rnnë' Pablo. <sup>12</sup> Caní guca, zían bõnni' judío gula'yéajlë'ë Cristo. Lësca' caní, zían bõnni' izá'a, yugu' nigula lo, en yugu' bõnni' gula'yéajlë'ë Cristo. <sup>13</sup> Ní'irõ cate' guléquibe'enë' bõnni' judío nacu'ë Tesalónica, lësca' riguíxjõ'ë Pablo xtídzë'ë Dios lu yõdzõ Berea, yõjáquië' ni', en gulunë' ca' ni' ga gulún dzatsa bõnachi zían. <sup>14</sup> Ní'irõ yugu' bõchi'ru' ni' la' gula'sõl-la'të' Pablo, para tsejë' ga naca ra' nísado', pero bulu'gá'anasë' Silas, en bi'i Timoteo lu yõdzõ Berea. <sup>15</sup> Yugu' bõnni' Berea na' gula'chë'ë Pablo lu yõdzõ Atenas. Ní'irõ la' yõjhu'õjgacatë' lu yõdzõ Berea, tu'ú'ë xtídzë'ë Pablo, para ilë' Silas, en bi'i Timoteo, tsõjácátë' ga ni' zoë' Pablo.

#### *Le benë' Pablo lu yõdzõ Atenas*

<sup>16</sup> Tsanni ni' zoë' Pablo ribözë' Silas, en bi'i Timoteo, lu yõdzõ Atenas, ruhu'ini ládxië' tu' rilé'enë' ta'yéaj ládxi'gaca yúgu'të bõnachi yõdzõ na' yugu' budó' guiõj budó' yaga. <sup>17</sup> Que lë ni na' bé'lenë' bõnni' judío, en bõnni' ta'yéaj ládxi'gaquië' Dios didza' ga naca lu yu'u ga tu'dubë' tu'sëdë' queë' Dios. Yugu' dza bé'lenë' nupa ta'dá lu yë'ëyi didza' ca naca xtídzë'ë Cristo. <sup>18</sup> Bal-lë' bõnni' dá'gaquië' le tu'sëdinë' bõnni' epicúreo, en le tu'sëdinë' bõnni' estoico gulu'ílenë' Pablo didza'. Bal-lë' gula'nnë':

—¿Bizxi rë'ënitsenë' innë' bõnni' huë' didza' ni?

Ia'bal-lë' gula'nnë':

—Réquitu' náquië' nu run libán quégaca dios zi'tu'.

Caní gula'nné' tu' runé' libán Pablo lógaquié' que didza' dxi'a queé' Jesús, en que yöl-la' rubán. <sup>19</sup> Ní'irö gula'guélé'ë në'ë Pablo, en gula'ché'ë lè' lu gu'a ga tu'dubé' tu'ë didza', nazi'i le Areópago, ta'nné':

—¿Naru' huácatsö yónitu' didza' cubi ni rusiyönnu' netu'?' <sup>20</sup> Rusiyönnu' netu' le tun ga rubánitu'. Ré'ënitü' inözitu' bizxi rna didza' ni ru'u.

<sup>21</sup> Bítirö ta'yaza ládxi'gaquié' iluné' bönni' Atenas na', en bönni' izá'a nacu'ë ni', pero ila'yónisiné', en ilu'isé' didza' tu le cubi.

<sup>22</sup> Ní'irö guzuíné' Pablo gatsaj láchui'lö lö'a Areópago na', gunné':

—Bönni' Atenas, yúgu'té le rilé'eda' naca bé' reaj ládxi'da'ali' yugu' dios queéli'. <sup>23</sup> Cate' gudöda' lu yödzo, en buyúgaca' yugu' le reaj ládxi'li', yöjxáca'a ca' tu nichu ga ni' nazúaj le rna caní: “Tu Dios, Cuntu Nu Numbé' Lè'.” Dios na' reaj ládxi'li'-né' sal-la' biti' núnbé'ëli'-né', Dios ni rna' libán queé' lolí'.

<sup>24</sup> ¡Dios ni bené' yödzölió, en yúgu'té le nacua' yödzölió ni! ¡Náquié' Xani yehua' yubá, en Xani luyú ni, en biti' ca' zoé' tu yudo' núngaca bönachi! <sup>25</sup> Biti' bi riyadzaj queé' le gaca ulu'nödzaj bönachi, tu' runödzjé' Lè cazé' quégaca yúgu'té bönachi yöl-la' na'bán, en yúgu'té le riquíniru'.

<sup>26</sup> 'Lè' bené' tuzé' bönni' ga zá'gaca yúgu'té bönachi izá'a para ila'cuá' idú yödzölió, en bulu'e dza ila'cuá', en gapa ral-la' ila'cuá'. <sup>27</sup> Dios bucu'ë légaquié' para ulu'guiljé' Lè', channö nácati'tés ila'dzöliné' Lè' sal-la' ila'gán ila'zönsé'. Caní raca sal-la' biti' zoé' zi'tu' ga zóaru' tu turu'. <sup>28</sup> Lè cazé' runé' ga zóaru' nabanru', en bi gaca gunru', en le nácaru'. Naca ca na' gula'nné' bal-lé' bönni' nútsa'gaquié' libí'ili', nupa bulu'zúaj le do' rú-lali', le ta'nná: “Dí'a dza queé' Dios nácaru'.” <sup>29</sup> Na'a, channö nácaru' dí'a dza queé' Dios, biti' ral-la' innaru' náquié' Dios ca tu budó' guiój budó' yaga, o tu le néquini oro, o plata, o guiój, le núngaca bönachi ca naca tu le ta'guinnajsö ícaguequi. <sup>30</sup> Dios budödé' cá'asö yugu' le guluné' lu yöl-la' biti' réajni'i quégaquié' yugu' iz chigula'dödi, pero na'a rinná bé'ené' yúgu'té bönachi iduté yödzölió ulu'bí'i ládxi'gaca. <sup>31</sup> Dios chinulu'ë tu dza cate' uchi'a usöröé' yúgu'té bönachi. Idú tsahui' naca ca uchi'a usöröé' légaquié' lu në'ë Jesús, bönni' na' buzóa cazé' Lè', ate' lógaca yúgu'té bönachi bené' tsutsu gaca caní tu' busubané' Lè' lu yöl-la' guti.

<sup>32</sup> Cate' bila'yönné' didza' bë'ë Pablo ca guca, zoa nu bubán lu yöl-la' guti, bulu'titjé' bal-lé', ate' ia'bal-lé' gula'nné':

—Yöniguetu' ia'tú lè ni ru'u didza' que.

<sup>33</sup> Ní'irö burúajé' Pablo gatsaj láchui'lö ga na' nacu'ë, söhuójé'. <sup>34</sup> Bal-lé' gula'yéajlé'ë Cristo, en guluné' tsözxön Pablo. Nútsé'ë Dionisio, bönni' areópago, ládjagaquié', ate' nútsa'nu ca' ládjagaquié' nigula na' lènu Dámaris. Ia'bal-lé' na' gula'yéajlé'ë ca' Cristo.

## 18

### *Le bené' Pablo lu yödzo Corinto*

<sup>1</sup> Gudödi guca lè ni, buzé'ë Pablo yödzo Atenas na', ate' guyijé' yödzo Corinto. <sup>2</sup> Yöjxáquié' Aquilo, tu bönni' judío ni'. Guljé' bönni' ni luyú Ponto, en si' bidxíngazé' yödzo Corinto na'. Buzé'ë luyú Italia len nigula queé', lènu Priscila, tu' gunná bë'ë Claudio, bönni' unná bë', ulu'rúajé' yúgu'té bönni' judío yödzo Roma. Guyijé' Pablo ga nacu'ë Aquilo, en Priscila na' <sup>3</sup> tu' naca tuz dxin tuné' Aquilo, en Pablo. Bugá'analené' légaquié', ate' tsözxön guluné' dxin, tuné' yugu' yu'u guídido'. <sup>4</sup> Cate' nácagaca dza lá'ayi quégaquié' bönni' judío, razié' Pablo lu yu'u ga tu'dubé' tu'sedé' queé'



Dios, ga ni' bē'lenē' légaquiē' didza'. Gú'unnē' uluí'inē' yugu' bōnni' judío, en yugu' bōnni' izá'a nacu'ē ni', naca idútē li le riguixjō'ē ca naca queē' Jesucristo.

<sup>5</sup> Cate' bila'dxinē' Silas, en bi'i Timoteo ni', nuzá'agaquiē' luyú Macedonia, nuguí'ide'enē' Pablo, runē' libán que xtídzē'ē Dios, en runē' ba nalí lógaquiē' bōnni' judío, rnnē':

—Jesús náquiē' Cristo, Nu na' tunē' löza yugu' bōnni' judío udusölē' légaquiē'.

<sup>6</sup> Cate' bōnni' judío nacu'ē ni' gula'dá'báguē'ē xtídzē'ē, en gula'nnē zi'ē que, ní'irō Pablo gudxibē' lari' nácuē' para uluí'inē' légaquiē' bítirō nabáguē'ē lē' ni'a quegaquiē', ate' gudxē' légaquiē':

—La' cuínsili' nabága'li' xíguia' que yöl-la' guti queēli', calēga neda' nabága'a le. Na'a, uyija' ga nacua' bōnachi izá'a.

<sup>7</sup> Ní'irō burúajē' Pablo ni', en guyijē' lidxē' Justo, bōnni' reaj ládxē'ē Dios, ate' zoa lidxē' gal-la' ra' yu'u ga tu'dubē' bōnni' judío, en tu'sedē' queē' Dios. <sup>8</sup> Crispo, bōnni' lo que yu'u ga na' tu'dubē' tu'sedē' queē' Dios gúyējilē'ē Xanru' Jesús, ate' dzágagaca lē' yúgu'tē bōnachi nacua' lidxē'. Cate' bila'yōnnē' xtídzē'ē Dios, zían bōnni' Corinto gula'yéajlē'ē Cristo, ate' gula'dilē' nisa. <sup>9</sup> Ní'irō Lē cazē' Xanru' gudxē' Pablo lu yēla bēchigal, gunnē':

—Biti' gádxinu', en biti' su' dxisō, quíxjō'u xtídza'a, <sup>10</sup> tu' zóalen caza' neda' li', ate' cuntu nu uzapa' nē'e li' para guá' dō' quiu', tu' néquiquequi quia' bōnachi zían lu yōdzō ni.

<sup>11</sup> Bugá'anē' Pablo ni' idú ca tu iz yu' gatsaj, ate' busédinē' légaquiē' xtídzē'ē Dios.

<sup>12</sup> Cate' bidxín dza rinná bē'ē Galión luyú Acaya, guláquiē' tuz bōnni' judío biti' ta'yéajlē', ate' gula'dá'báguē'ē Pablo, en gula'chē'ē lē' ga rō'ē ruchi'a rusórōē' Galión na'. <sup>13</sup> Gulē' Galión na':

—Bōnni' ni rigú'u yöl-lē'ē bōnachi para ilunē' bal Dios, ca ridá'baga' xibá queētu'.

<sup>14</sup> Cate' chizóa gu'ē didza' Pablo, Galión na' gudxē' yugu' bōnni' judío, rnnē':

—Libí'ili', bōnni' judío, la'tu' guca tu le riguitsaj xibá queē' César, o tu le ruá' dō', guá' ilena' uzē naga' xtídza'li' ca ral-la' guna', <sup>15</sup> pero channō naca didza' bizxaj que dídza'sō, o que lágaca bōnachi, en ca naca xibá queēzili', guli'cá'ana tsahui' libí'isili', tu' cabí rē'ēnda' neda' gaca' nu uchi'a usōrō yugu' le caní.

<sup>16</sup> Ní'irō Galión bulágui'ē légaquiē' lu yu'u yúlahui'. <sup>17</sup> Ní'irō yúgu'tē bōnni' uládz na' gula'guélé'ē Sóstenes, bōnni' lo que yu'u ga tu'dubē' bōnni' judío, en tu'sedē' queē' Dios, ate' gula'guiné' lē' lö'a yúlahui', pero biti' bē' ládxē'ē Galión lē' na' rāca.

<sup>18</sup> Pablo bugá'anē' lu yōdzō na' zían dza, ate' gudōdi busiyōnnē' bōchi'ru' nacu'ē ni' didza', guyijē' yōdzō Cencrea, ga ni' benē' yútusō icjē', tu' dē tu le nazí' lu nē'ē lahuē' Dios gunē'. Ní'irō gurenē' tu lē'e barco, para tsejē' luyú Siria, dzágagaquiē' lē' Priscila, en Aquilo. <sup>19</sup> Cate' bila'dxinē' yōdzō Éfeso, Pablo bulá'alenē' légaquiē' ni'. Guyáziē' lu yu'u ga tu'dubē' bōnni' judío, en tu'sedē' queē' Dios, ate' bē'lenē' nupa nacua' ni' didza'. <sup>20</sup> Yugu' bōnni' ni' gulá'tayuē' lahuē' Pablo ugá'analē' légaquiē' ia'lati' xidzē', pero lē' biti' gú'unnē'. <sup>21</sup> Bē'lenē' légaquiē' didza', gunnē':

—Run bayudxi soa' gapa' laní si' gaca Jerusalén, ate' leyúbölō huōda' ga ni zóali', channō guē'ennē' Dios.

Ní'irö gurenë' Pablo tu lë'e barco, en buzë'ë Éfeso na'.

*Ridxinë' Pablo Antioquia, ate' risí lahuë' röjenë' libán le bunni luzuí*

<sup>22</sup> Gudödi bidxinë' Pablo yödzo Cesarea, gurenë' guyijë' Jerusalén, ga ni' yöjyüë' bönachi queë' Cristo, ate' ní'irö buzë'ë ni', en guyijë' Antioquia. <sup>23</sup> Gudödi zoë' ni' nababa dza, buzë'ë ni', sa'yéajë' tu tu yödzo luyú Galacia, en Frigia. Benë' tsutsu böchi'ru' nacu'ë ni' ca naca le ta'yéajlë'ë Cristo.

*Runë' libán Apolos lu yödzo Éfeso*

<sup>24</sup> Tu dza ni' bidxinë' Apolos, tu bönni' judío lu yödzo Éfeso. Guljë' bönni' ni lu yödzo Alejandría, en nabé'ede'enë' ru'ë didza', en nazédadë'ë le nazúaj lu guichi lá'ayi. <sup>25</sup> Chinazédë' bönni' ni ca naca le réajlë'ëru' Xanru'. Idú ládxë'ë bë'ë didza', en ca nácatë busédinë' bönachi ca naca queë' Jesús, sal-la' núnbë'ë tuz le ruquíla bönachi nisa ca benë' Juan. <sup>26</sup> Gusí lahuë' Apolos ru'ë didza' idú ládxë'ë ga naca lu yu'u ga tu'dubë' bönni' judío, en tu'sedë' queë' Dios. Cate' Priscila, en Aquilo bila'yönnë' didza' ru'ë Apolos na', gula'chë'ë lë' quez, en bulu'z'éajni'irönë' lë' xibá queë' Dios. <sup>27</sup> Cate' gú'unnë' Apolos tödë' luyú Acaya, bulu'tipë' ládxë'ë, ate' bulu'zúajë' tu lu guichi le tsójuá'gaquië' quégaquië' bönni' teaj ládxë'ë Cristo luyú Acaya na', para ilunë' Apolos na' bal. Cate' bidxinë' Apolos luyú na', yugu' bönni' ni' teaj ládxë'ë Cristo bulu'zídë'ë xibé didza' ru'ë Apolos na', tu' ruzá' ládxë'ë Dios quégaquië'. <sup>28</sup> Caní guca, tu' bucul-lë' Apolos na' yugu' bönni' judío ni' lógaca yúgu'të bönachi, tu' bugunë' dxin le nazúaj lu guichi lá'ayi, en bulu'e bönni' na' Jesús naca cazë' Cristo.

## 19

*Le benë' Pablo lu yödzo Éfeso*

<sup>1</sup> Tsanni ni' zoë' Apolos lu yödzo Corinto, gudödë' Pablo gapa nacuá' yödzo ia'lati' ra'lö, ate' bidxinë' Éfeso. Yöjxáquië' bal-lë' bönni' ta'yéajlë'ë Cristo ni'. <sup>2</sup> Pablo gunábinë' légaquië', rnnë':

—¿Naru' bidisóalenë' Dios Bö' Lá'ayi libí'ili' cate' ni' guyéajlë'ëli' Cristo? Gulë' lë':

—Biti' nayönitü' channö zoë' Dios Bö' Lá'ayi.

<sup>3</sup> Ní'irö Pablo gunábinë' légaquië', rnnë':

—¿Nacxi guca le bidí'ali' nisa?

Ta'nnë':

—Ca buquílë' Juan bönachi nisa.

<sup>4</sup> Pablo gunné':

—Buquílë' Juan bönachi nisa, nupa ni' bulu'bí'i ládx'i'guequi, ate' Juan caz gudxë' léguequi ral-la' ila'yéajlë' Bönni' na' si' zá'telë' ca lë', ate' Bönni' ni naquië' Jesús, Lë' Cristo.

<sup>5</sup> Cate' yugu' bönni' na' bila'yönnë' didza' ni ru'ë Pablo, bila'dilë' nisa tu' chita'yéajlë'ë Xanru' Jesús. <sup>6</sup> Cate' guxóa në'ë Pablo légaquië', en ni' rulidzë' Dios, bidisóalenë' Dios Bö' Lá'ayi légaquië', ate' gulu'ë didza' yúbölö, en gulu'ë didza' uláz queë' Dios. <sup>7</sup> Guláquië' bönni' ni idú chínnuë'.

<sup>8</sup> Guzóë' Pablo idú ca tsonna beo' ni', ate' guyázië' lu yu'u ga tu'dubë' bönni' judío, en tu'sedë' queë' Dios, ate' lu yöl-la' rugu ladxi' benë' libán légaquië'. Bë'lenë' légaquië' didza', en gú'unnë' uluí'në' légaquië' nácatë le riguixjö'ë ca rinná bë'ë Dios. <sup>9</sup> Ní'irö bizídi icja ládx'i'do'gaquië' bal-lë', en bití' gula'yéajlë'ë Cristo, ate' gula'nnë' zí'ë que xtidzë'ë Xanru' ga nacuá' bönachi zían na'. Ní'irö Pablo bulá'alënë' légaquië', ate' bubéajë' quez nupa

ta'yéajlë' Cristo. Bë'lenë' bönachi ni ta'yéajlë' Cristo didza' yugu' dza ga na' tu'dubë' lu yu'u ga rusédinë' Tiranno bönachi. <sup>10</sup> Caní béntica'së' Pablo idú ca chopa iz, ate' caní guca, bila'yöni yúgu'të bönachi didza' ca naca queë' Xanru' Jesús, bönachi nacu'ë yugu' yödzo luyú Asia, bönachi judío, en bönachi izá'a. <sup>11</sup> Dios benë' yugu' yöl-la' huáca zxön lu në'ë Pablo. <sup>12</sup> Caní guca, bal-lë' bönni' gula'zi'ë yugu' lári'do' béguë'ë icjë' Pablo, en yugu' lari' tsölá'a bugalë' lë'ë, ate' yöjuá'gaquië' léguequi gapa nacuá' nupa te'e, ate' bulu'huóáquië' ca naca yödzo hué' que queégaquië', en bulu'rúaj bö' xihui' yú'ugaca bönachi na'.

<sup>13</sup> Ní'irö bal-lë' bönni' judío udá dzaga tu'béajë' bö' xihui' gulë'ënnë' ulu'gunë' dxin Lë' Xanru' Jesús para ulu'béajë' yugu' bö' xihui' yú'ugaca bönachi, ta'nnë':

—Ní'a que Lë' Jesús, Nu na' runë' libán que Pablo, rinná bé'etu' libí'ili' urúajli'.

<sup>14</sup> Caní gulunë' gadxi bönni' xzí'inë' Esceva, tu bönni' judío náquië' bönni' lo ládjagaquië' bixúz unná bë'. <sup>15</sup> Bubí'i didza' bö' xihui' na', gunná:

—Núnbë'a-në' Jesús, en núnbe'eda' bönni' lë' Pablo, pero libí'ili', ¿núzxité libí'ili'?

<sup>16</sup> Ní'irö guxiti'ë bönni' na' yu'u lë' bö' xihui', yöjenë' légaquië' zi, en bucul-lë' yúgu'të, tu' guzxéqui'rönë' ca légaquië'. Caní guca, xiguídigacasë', en hué'gacatzë' bulu'zxúnnajë' gadxë' bönni' na' lu yu'u ni'. <sup>17</sup> Guzé didza' ca guca lë ni, ate' bila'yöni yúgu'të nupa nacuá' lu yödzo Éfeso, bönachi judío, en bönachi izá'a, ate' yúgu'të' guládxinë' Dios. Que lë ni na' gulunë' zxön Lë' Xanru' Jesús.

<sup>18</sup> Lësca' bila'dxinë' zían bönni' ta'yéajlë'ë Cristo, en gula'xóalëpë' dul-la' nabága'gaquië', en gula'guíxjö'ë le chigulunë'. <sup>19</sup> Lësca' caní gulunë' zían bönni', zí'alö gulunë' yöl-la' udzá'. Dujuá'agaquië' yugu' guichi udzá' quégaquië', ate' bulu'zégui'ë léguequi lógaca yúgu'të bönachi. Bulu'labë' tsca nazáca'gaca guichi na', le guca idú chi un mil dumí plata. <sup>20</sup> Caní guca, guzëda' xtídzë'ë Xanru', en bidéli'da' bönachi zían. Idú ládxi'gaquië' gula'yéajlë'ë Cristo.

<sup>21</sup> Gudödi gulaca lë ni, benë' queë' Pablo tsejë' Jerusalén, pero zí'alö ralla' tödë' yugu' yödzo luyú Macedonia, en luyú Acaya, ate' gunné':

—Tödi tseja' Jerusalén, run bayudxi tseja' ca' Roma.

<sup>22</sup> Ní'irö gusöl-lë'ë-bi' chópabi' bi'i bönni' tácalenbi' lë', légcabi' Timoteo, en Erasto, luyú Macedonia, pero bugá'anë' lë' nababa dza luyú Asia na'.

### *Tu'tsatsa bönachi lu yödzo Éfeso*

<sup>23</sup> Bulu'tsatsa bönachi Éfeso dza ni', ate' gula'dá'baguë'ë xtídzë'ë Xanru'.

<sup>24</sup> Benë' Demetrio, bönni' gubëdxi guíë plata ga bulu'tsatsë'. Run cazë' yugu' lidxi budó' guió'budó' yaga néquiguequini plata que dios quégaquië', lënu Diana. Gula'zi'ë bönni' tunë' dxin ni dumí bach. <sup>25</sup> Butubë' Demetrio na' ia'zíca'rë' bönni' tunë' la' dxin nisö, ate' gudxë' légaquië':

—Böcha'a, nöz quézili' ca naca dxin runru', runna dumí queëru'.

<sup>26</sup> Rilë'eli', en riyónili' ca runë' Pablo na'. Calégasö Éfeso ni, pero idú luyú Asia chibidéli'në' bönachi zían, ate' chibutsë'ë ca tunë', tu' rë' légaquië': "Yúgu le núngaca bönachi bití' náca'gaca dios." <sup>27</sup> Calégasö zoa bönadxi ugá'ana cá'asö dxin ni runru', pero lësca' zoa bönadxi ugá'ana cá'asö yudo' que dios zxön lënu Diana. Caní gaca, ugá'ana cá'asö yöl-la' zxön queënu, dios ni ta'yéaj ládxi'gaca-nu bönachi iduté luyú Asia, enca' iduté yödzo'liö.

28 Cate' yugu' bönni' na' bila'yönné' didza' ni, gula'léde'ené', ate' gulu'ë zidzaj didza', ta'nné':

—Nácatëronu zxon Diana, dios queëru' rë'u, bönachi Éfeso.

29 Caní guca, bulu'tsatsa bönachi idütë lu yödzö na', ate' guláquië' tuz, en carelö yöjáquië' lö'a yúlahui'. Gulá'ayöjë' Gayo, en Aristarco, bönni' Macedonia túngaquië' Pablo tsözxön, ga ni'. 30 Cate' gú'unnë' Pablo tsázië' ga nacua' bönachi zían na', bití' ca' gulu'ë lé' lataj bönni' ta'yéajlé'ë Cristo. 31 Lësca' caní gulunë' bal-lë' bönni' yúlahui' que luyú Asia, bönni' ta'lé'enë' Pablo dxi'a. Gula'sól-lë'ë queë' nupa guláta'yu lahuë' bití' tsazië' lö'a yúlahui' na'. 32 Ga ni' tu'tsatsë', en ta'bödxí'ë, tu le ta'nné' bal-lë', en ia'tú le ta'nné' ia'zica'rë', tu' röö'gacasë' baröli bönni' zían na' tu'tsatsë', en lá'tu'biqúi' yúgu'tégaquië' bití' nözguequinë' bizx que na' nudúbigaquië' ni'. 33 Ní'irö yugu' bönni' judío gula'béajë' Alejandro ladaj bönachi zían na', ate' bulu'dxíguë'ë lé' lógaca bönachi zían na'. Bulu'e Alejandro na' len në'ë para ila'bö' dxisö, tu' gú'unnë' gu'ë didza' le gácalen yugu' bönni' judío na' lógaca yúgu'tëguequi. 34 Cate' guléquibe'enë' náquië' judío, yúgu'të' gulu'ë tsözxön zidzaj didza' idú ca chopa hora, ta'nné':

—¡Nácatëronu zxon Diana, dios queëru' rë'u bönachi Éfeso!

35 Ní'irö bönni' uzúaj que yúlahui' benë' ga gula'bö' dxisö bönachi zían na', gunné':

—Bönni' Éfeso, nözigaca yúgu'të bönachi zoa yudo' queënu Diana, dios zxon, ni. Rë'u ni, bönachi Éfeso, run chí'iru' yudo' na', enca' budó' na' böxaj ga zóaru', le birúaj lúxriba. 36 Cuntu nu gaca tá'baga' lé ni. Que lé ni na' run bayudxi sóali' dxisö, en bití' bi gúntëzili'. 37 Nachë'gacali'-në' bönni' ni, en bití' ta'banë' le dzö'ö yudo', en bití' ta'nné' xihuë'ë queënu dios queëli'. 38 Que lé ni na', channö zoa didza' bizxaj quégaquië' Demetrio, en yugu' bönni' gubëdxi gué' plata nacua'lenë' lé', len nútí'tës bönni', dé lataj ga nu uzé nagui légaquië', en zoa nu uchi'a usö'ö légaquië'. Ni' huáca ulu'zegui luzá'agaquië' didza' tuë' ia'tué'. 39 Na'a, channö dé ia'tú le inábali', huáca ucá'anaru' tsahui' le cate' ulu'dubi bönni' yúlahui' ca na' rinná'bë' yúlahui'. 40 Zoa bönadxi nu uzegui rë'u didza' ni'a que dzatsa ni guca na'a, inná ridá'baga'ru' yúlahui'. Bití' bi gaca innaru' bizx que guca dzatsa ni.

41 Cate' budxi bë'ë didza' ni, busól-lë'ë bönachi zían na' nudúbigaca ni' tsöhuöjgaca lídxiguequi.

## 20

### *Sa'yéajë' Pablo luyú Macedonia, en luyú Grecia*

1 Cate' gurö'ö dxi dzatsa na' guca lu yödzö Éfeso, bulidzë' Pablo yugu' bönni' ta'yéajlé'ë Cristo, ate' guchízië' icja nágagaquië' didza'. Gudödi ni' bunidë' légaquië', en la' bulá'alentë' légaquië'. Birúajë' ni', ate' sa'yéajë' luyú Macedonia. 2 Gudödë' yugu' yödzö luyú ni', ruzéajni'ide'enë' böchi'ru' nacu'ë ni', ate' gudödi ni' bidxinë' luyú Acaya. 3 Guzöë' Pablo ni' idú ca tsonna beo'. Cate' chizóa cuenë' tu lé'e barco para tsejë' luyú Siria, gúquibe'enë' ta'bö' nísíë' bönni' judío lé' para ila'zönë' lé'. Que lé ni na' buguelë'ë nöza söhuöjë' luyú Macedonia, ate' bidxinë' yödzö Filipos. 4 Sópater, zxí'inë' Pirro, bönni' Berea, en Aristarco, en Segundo, yugu' bönni' Tesalónica, en Gayo, bönni' Derbe, enca' bi'i Timoteo, en Tíquico, en Trófimo, yugu' bönni' Asia, sójácalenë' tsözxön lé'. 5 Ní'irö yugu' bönni' ni yöjnörugaquië' lahuë' Pablo, yöjáquië' yödzö Troas, ga ni' gula'bözë' lé'.

<sup>6</sup> Lu yödzo Filipos na', neda', Lucas, yöjtsaga'-në' Pablo. Cate' chigudödi laní cate' tahuë' bönni' judío yöta xtila biti' nazí'i cúa zi que, gurentu' tu lë'e barco, en buzá'atu' Filipos na'. Gudödi gayu' dza budzá'gatu' bönni' ni' yöjnörugaquië' lahuë' Pablo, yöjáquië' Troas, ate' ni' bugá'anatu' gadxi dza.

*Le benë' Pablo lu yödzo Troas*

<sup>7</sup> Dza risí lo le gadxi dza bulu'dubë' bönni' ta'yéajlë' Cristo para ilahuë' yöta xtila le rusá' ládxi'ru' ca gútië' Jesucristo. Ni' rusëdinë' Pablo légaquië', en tu' ral-la' uzë'ë ni' cate' za' rení' dza na', xidzé bë'ë didza', ga bidxintë gudödi guluhuëla. <sup>8</sup> Ga ni' nudúbigaquië' naca lu yu'u xitsá', ate' nacua' zían le ta'gú'u bení' ga na'. <sup>9</sup> Zóabi' bi'i Eutico ni', rő'öbi' ga ra'a lení' que yu'u na', ate' nadödirö yëla lobi' tu' ritunna libán runë' Pablo. Ga ni' rő'öbi' rásibi' bi'i na' naca ga bunni cuía lu yu'u, ate' rásisibi' ca' gubíxitébi', böxjabi' ga bidxintëbi' zxan yu'u. Nátitëbi' bulu'lisë'-bi'. <sup>10</sup> Bötjé' Pablo zxan yu'u na', ate' yöjxóë' lëbi', en bunidë'-bi'. Ní'irö gudxë' nupa nacua' ni':

—Biti' gadxi idzöbili'. Nabanbi'.

<sup>11</sup> Cate' chibubenë' Pablo xitsá', gudélé'ë yöta xtila, gudahuë'. Ní'irö Pablo bë'lenë' légaquië' didza' ga bidxintë zila balö. Gudödi ni' burúajë' ni'. <sup>12</sup> Bi'i bönni' ra'bán na' gubíxibi', bulu'ché'ë-bi' nabanbi', en bulu'zí' zxöndë'ë.

*Ca guca bidxintu' Mileto*

<sup>13</sup> Nunörutu' lahuë' Pablo, en yöjchentu' tu lë'e barco, ate' gudöditu' ga bidxintu' yödzo Asón para tsöjtságatu'-në' Pablo ni', para gaca ca na' chibén xtídzatu', tu' gú'unnë' Pablo tsejé' ni' së'esi ni'ë. <sup>14</sup> Cate' chibudzá'gatu'-në' lu yödzo Asón na', gurénlenë' netu' lë'e barco, ate' guyéajtu' yödzo Mitilene. <sup>15</sup> Buzá' barco ni', ate' dza buropi bidxintu' tödi lí ga zoa luyú bidxi nazí'i le Quío, ate' ia'tú dza ca' gudöditu' tödi lí ga dë yödzo Samos, en bidxintu' yödzo Trogilio ga ni' guzóatu' tu chí'i. Ia'tú dza ca' bidxintu' yödzo Mileto. <sup>16</sup> Caní bentu' tu' chibenë' queë' Pablo tödisë' yödzo Éfeso, para cabí tsenë' luyú Asia, tu' run bayudxi soë' Jerusalén cate' naca dza Pentecostés channö séqui'në'.

*Didza' bë'ë Pablo lu yödzo Mileto*

<sup>17</sup> Cate' ni' zoë' Pablo lu yödzo Mileto, gusöl-lë'ë nu yöjlidza bönni' gula tapa chí'ë bönachi queë' Cristo nacu'ë Éfeso. <sup>18</sup> Cate' bila'dxinë' ga zoë' Pablo, lë' gudxë' légaquië':

—Libí'ili' chinöz quézili' ca béntica'sa' ga zóali' ga gudela' bidxina' luyú Asia. <sup>19</sup> Yugu' dza bena' xichinë' Xanru' lu yöl-la' nöxaj ladxi', ga bidxintë gurödxá' ni'a queë'li', ate' zían le guca quia' le guzxi' bë' neda' ni'a que le ruá' dö' gulunë' quia' bönachi judío biti' ta'yéajlë' Cristo. <sup>20</sup> Béntica'sa' libán ga zóali' que yúgu'të le ruzí'ili' xibé, en busévida' libí'ili' yálajdo' ga nudúbili', en gapa naca lu yu'u lédxili'. <sup>21</sup> Bena' ba nalí lógaca bönachi judío, en lógaca bönachi izá'a para ulu'bí'i ládxi'gaca, en ulu'huóaca queë' Dios, en ila'yéajlë' Xanru' Jesucristo. <sup>22</sup> Na'a, Dios Bö' Lá'ayi chinunë' quia' tseja' Jerusalén, en biti' nözda' bizxi gaca quia' ni'. <sup>23</sup> Yúgu'të yödzo ga ridá', riguixjö'inë' Dios Bö' Lá'ayi neda', rë' neda' ila'gu'ë neda' lidxi guié bönni' judío biti' ta'yéajlë', en ulu'saca' zí'ë neda'. <sup>24</sup> Biti' bi runi neda' que lë na' gaca, sal-la' gátia' o cabí gátia', pero ruí'i ládxi'sida' údxi guna' le chigudéla'a runa', para guna' dxin na' budödë' Xanru' Jesús lu na'a, le

naca guna' libán que didza' dxi'a ca naca le ruzá' ládxë'ë Dios queëru'. Caní guna' len yöl-la' rudzeja.

<sup>25</sup> 'Na'a, yúgu'tëli' na' chibena' libán loli' ca rinná bë'ë Dios, nözda' bíti'rö ulé'eli' neda'. <sup>26</sup> Que lë ni na', le nácatë rea' libí'ili' na'a dza. Biti' nabága'a neda' queëli' nituli' libí'ili'. <sup>27</sup> Biti' bi bucáchi'da' libí'ili', pero gudíxjöi'ida' libí'ili' yúgu'të le rnnë' Dios. <sup>28</sup> Que lë ni na', guli'gún chí'i cuinli', en guli'gún chí'i yúgu'të bönachi queë' Cristo, tu' nuzóë' Dios Bö' Lá'ayi libí'ili' para gácalenli' légaquië', en gun chí'ili' bönachi queë' Xanru', Bönni' na' gútië' uláz quégaquië', bulaljë' xichönë' le böá'uinë' légaquië'. <sup>29</sup> Chinözda', tödi uzá'a ga zóali', ila'yaza nupa ilé'ëni ulu'suniti bönachi queë' Cristo ga zóali', ilunë' ca tunba' bö'cu' gu'a sínia', tu'sunítiba' yugu' bö'cu' zxila'. <sup>30</sup> Ila'rúajë' bönni' nútsa'gaquië' ládjali', ate' ilu'ë didza' biti' nácatë para ulu'béajë' quégacasë' nupa ta'yéajlë' Cristo nútsa'gaca ládjali'. <sup>31</sup> Que lë ni na', guli'sóa ban ladxi', en guli'tsöjné' ca bena' neda' idú ca tsonna iz, rëla, en të dza buchízia' icja nágali' tu tuli' ga bidxintë gurödxá' queëli'.

<sup>32</sup> 'Na'a, böchi' luzá'ado', rigu'a libí'ili' lu në'ë Dios. Rinábida' Lë' uzá' ládxë'ë queëli', en gunë' ca rnna xtídzë'ë. Dios gunë' libí'ili' tsutsu, en gunë' ga idéli'li' gunli' tsözxön yugu' bönni' rö queë'. <sup>33</sup> Catu caz guzë ládxá'a le nequi quégaquië' böchi' luzá'a. Biti' guzë ládxá'a dumí, o lari' quégaquië'. <sup>34</sup> Nöz quézili' dxi'a, len na'a caza' bena' dxin para gaca gá'ua' le biyadzaj quia', en quégaca nupa gula'cuá'len neda'. <sup>35</sup> Ca naca yúgu'të le bena', buluf'ida' libí'ili' caní ral-la' gunru' dxin para gaca gácalenru' nupa bi ta'yadzaj. Ral-la' tsöjneru' didza' bë'ë Xanru' Jesús, gunné': "Uzírö xibé nu bí runödzej ca nu bí rizí'."

<sup>36</sup> Cate' budxi bë'ë Pablo didza' ni, buzóa zxibë', ate' benë' tsözxön yúgu'të, bulu'lidzë' Dios. <sup>37</sup> Ní'irö gula'bödxë' yúgu'të. Bulu'nidë' yenë' Pablo, en bulu'tsaga lahuë' lë'. <sup>38</sup> Caní gulunë' tu' bulu'huí'innë' ni'a que didza' na' bë'ë Pablo, gunné': "Bíti'rö ulé'eli' neda'." Yöjácalenë' tsözxön lë' ga na' gurenë' lu barco.

## 21

### *Sa'yéajë' Pablo Jerusalén*

<sup>1</sup> Gudödi bulá'alentu' légaquië', guyú'utë nöza barco na', ate' lirá guyéajtu' ga zoa luyú bidxi nazí'i le Cos. Dza buropi na', gudöditu' ia'tú lataj nazí'i le Rodas, ate' buzá'atu' ni', en bidxintu' yödzö Pátara. <sup>2</sup> Yöjxáca'tu' tu barco yúbölö ni' le zeaj luyú Fenicia. Gurentu' lë'e barco na', ate' guyú'utë nöza. <sup>3</sup> Gudöditu' ga nalá' Chipre, le guta' tsölä'a yögöla, ate' guyéajtu' luyú Siria, ga ni' guyaza barco na' lu yödzö Tiro, tu' ral-la' tsöjca'ana yua' ni' le dzö'ö lë'e barco na'. <sup>4</sup> Lu yödzö Tiro na' yöjxáca'tu' tu bönni' réajlë'ë Cristo, ate' bugá'analentu' lë', en yugu' böchi'ru' ni' idú gadxi dza. Tu' chibulu'ínë' Dios Bö' Lá'ayi légaquië' le ral-la' gaca queë' Pablo, gulë' lë' biti' tsejë' Jerusalén. <sup>5</sup> Cate' chibizá'a dza na', burúajtu' ni', ate' gula'zá'lenë' netu' tsözxön yúgu'të' len nigula que quéégaquië', en yugu' bi'i quégaquië', ga bidxíntëtu' ní'lö ra' yödzö na'. Ra' nísado' ni' buzóa zxíbitu', en bulidztu'-në' Dios. <sup>6</sup> Budxi bunida' luzá'atu' tutu' ia'tutu', bubentu' lë'e barco, ate' légaquië' yöjhuöjgaquië' lídxigaquië'.

<sup>7</sup> Buzá'atë barco na' lu yödzö Tiro, ate' ga yöjsé bidxín lu yödzö Tolemada. Burúajtu' lë'e barco na' ni'. Bugápatu' Dios böchi'ru' nacu'ë ni', ate' bugá'analentu' légaquië' tu dza. <sup>8</sup> Cate' za reni' ia'tú dza, burúajë' Pablo ni', ate' dzá'gatu'-në' netu' guyéajtu' yödzö Cesarea. Ni' guyú'utu' lu yu'u

lidxë' Felipe, ate' bugá'analentu' lë'. Runë' Felipe na' libán que didza' dxi'a. Bítsë'ë gadxë' bönni' ni' bulu'cu'ë dza ni'te para ilácalenë' bönachi queë' Cristo. <sup>9</sup> Nacuá'abi' tapa bi'i nigula ra'bán queë' Felipe na', tuí'ibi' didza' uláz queë' Dios. <sup>10</sup> Gudödi gudzetu' chopa tsonna dza ni', ní'irö bidxinë' Agabo ni', bönni' ru'ë didza' uláz queë' Dios, narúajë' luyú Judea. <sup>11</sup> Bönni' ni buduyúë' netu', ate' gudélë'ë pan le néquini guídi queë' Pablo. Béguë'ë ni'a na' cuinë', en gunné':

—Caní rnnë' Dios Bö' Lá'ayi: “Caní ilunë' bönni' judío nacu'ë Jerusalén. Ilúguië' bönni' ni nequi queë' pan guídi ni, ate' ulu'dödë' lë' lu ná'agaca bönachi izá'a.”

<sup>12</sup> Cate' biyönitú' didza' ni, gúta'yutu' lahuë' Pablo, netu', en nupa nacuá' ni', para cabí tsejë' Jerusalén. <sup>13</sup> Bubi'ë didza' Pablo, gunné':

—¿Bizxi ni runli', ribödxili', en rusuhu'ínili' neda'? Neda' chizóa caza' sina', calégasö ilúguië' neda', pero gátia' ca' lu yödzo Jerusalén ni'a queë' Xanru' Jesús.

<sup>14</sup> Tu' cabí guzquéu'tu'-në' didza', bíti'rö bi gúdxitu'-në', ate' gunnatu':

—Gaca ca raza ládxë'ë Xanru'.

<sup>15</sup> Cate' chigula'dödi dza na', bupa'atu' queëtu', ate' guyéajtu' Jerusalén. <sup>16</sup> Gula'zá'lenë' netu' bal-lë' bönni' ta'yéajlë'ë Cristo, nacu'ë Cesarea, ate' dzáguie' Mnasón, tu bönni' Chipre, légaquie'. Réajlë'ë Cristo dza ni'te, ate' ral-la' tsöjgá'anatu' lidxë' bönni' ni.

### *Pablo röjyúë' Jacobo*

<sup>17</sup> Cate' bidxintu' Jerusalén, len yöl-la' rudzeja quégaquie' böchi'ru' ni' ta'yéajlë'ë Cristo gulunë' netu' bal. <sup>18</sup> Dza buropi na' Pablo guyázalenë' netu' lu yu'u, yöjyutu'-në' Jacobo, ate' nudúbigaquie' ni' yúgu'të bönni' gula tapa chi'ë bönachi queë' Cristo nacu'ë Jerusalén. <sup>19</sup> Cate' Pablo chibugapë' légaquie' Dios, busiyönnë' légaquie' yúgu'të le benë' Dios lu në'ë lë' ga nacuá' bönachi izá'a. <sup>20</sup> Cate' bila'yönnë' lë ni, gula'gu'ë Dios yöl-la' ba. Ní'irö gulë' Pablo:

—Nöz quézinu', böchi'tu', cate' xö zían gáyu'ë bönni' judío ta'yéajlë'ë Cristo, ate' yúgu'të túndë'ë bal xibá queë' Moisés. <sup>21</sup> Chibila'yönnë' yugu' le tuí' didza' bönachi le ta'nnë' quiu', ta'nná rigú'u yöl-lu'u yúgu'të bönni' judío nútsa'gaquie' ladaj bönachi izá'a, para ulu'cá'anë' le gunná bë'ë Moisés, en rinná bé'enu' légaquie' bití' ila'chúguië' lu xpéla'gacabi' bi'i bönni'do' quégaquie', en bití' ilunë' bal yugu' le nalëbiru' runru' rë'u, bönachi judío. <sup>22</sup> ¿Nacxi caz gunru' na'a? Ulu'rúaj bönachi zían cate' ila'yöni chibidxínu' ni. <sup>23</sup> Na'a, ben lë ni rëtu' li'. Nacuá'lenë' netu' ni tapë' bönni', chinazí' lu ná'agaquie' lahuë' Dios tu le ilunë'. <sup>24</sup> Guchë'ë yugu' bönni' ni, en ben légaquie' tsözxön gun dxi'a cuinli' ca naca que yudo', en gudizxaj li' le ral-la' ila'guizxjë' para ilún yútusö ícjagaquie'. Ní'irö ila'nözinë' yúgu'të bönni' judío bití' nácatë lë na' ta'nnë' quiu', pero lësca' li' runu' le naca dxi'a, en runu' ca rinná bë' xibá queë' Moisés. <sup>25</sup> Ca naca quégaca bönachi izá'a, nupa ni' chita'yéajlë' Cristo, chibén xtí'dza'tu', en buzúajtu' lu guichi ca ral-la' ilunë'. Bití' run bayudxi ilún chi'ë yugu' lë ni tunë' bönni' judío, pero tuz:

Bití' ilahuë' le ta'gú'u bönachi lógaca budó' guiöj budó' yaga.

Bití' ilahuë' rön.

Bití' ilahuë' xipéla'gacaba' böa' guixi' bití' narúaj-gácaba' rön.

Bití' ilunë' le ruá' dö'.

*Ta'zönë' Pablo lö'a yudo'*

26 Ní'irö Pablo guchë'ë queë' tapë' bönni' na', ate' dza buropi ni' ben dxi'a cuinë' tsözxön len légaquië' ca naca que yudo'. Ní'irö guyázië' lö'a yudo', para gaca bë' bizxi dza údxi ilunë' le tu'ún dxi'a cuíngaquië', dza ni' ral-la' tsöjuá'agaquië' le ila'gu'ë lahuë' Dios que queëgaquië'. 27 Cate' chizóa izá'a gadxi dza na', bal-lë' judío narúajgaquië' luyú Asia bila'lé'enë' Pablo, zoë' lö'a yudo'. Gulunë' ga gulún dzatsa bönnachi zían, ate' gula'zönë' Pablo. 28 Gulu'ë zidzaj didza', ta'nnë':

—¡Guli'gácalen netu', bönni' Israel! Bönni' ni rusédinë' yúgu'të bönnachi yúgu'të lataj ulu'cá'ana cá'asö yödzö queëru', en xibá queë' Moisés, en yudo' queëru' ni. Na'a, chigulu'ë yugu' bönni' izá'a lu yudo' ni. Caní runë', run díťjanë' lataj lá'ayi ni.

29 Caní gula'nnë' tu' bila'lé'enë' Pablo zí'alö lu yödzö dzáguie' Trófimo, bönni' Éfeso, en téquinë' gulu'ë bönni' ni lu yudo'.

30 Caní guca, bulu'dubi yúgu'të bönnachi yödzö, ate' bila'guirë' ni'. Ní'irö gula'zönë' Pablo, en gulá'ayöjë' lë', bulu'béajë' lë' lö'a yudo', ate' la' bulu'sáyjatë' ga nu riyaza lö'a yudo' na'. 31 Cate' chitequi quézinë' ilútië' Pablo, bídxín didza' lahuë' bönni' lo rinná bé'enë' bönni' rójáquië' gudil-la. Biyönnë' tun dzatsa yúgu'të bönnachi Jerusalén. 32 Bönni' lo ni la' butúbitë' bönni' rójáquië' gudil-la, len bönni' ta'nná bé'enë' légaquië', ate' carelö guyéajlenë' légaquië' ga na' tun dzatsa bönnachi na'. Cate' bila'lé'e bönnachi ni' bönni' lo na' rinná bé'enë' bönni' rójáquië' gudil-la, en bönni' na' rójáquië' gudil-la, bulu'sané' ta'guinë' Pablo. 33 Ní'irö gubígui'ë bönni' lo na', en guxzönë' Pablo, ate' gunná bé'enë' bönni' rójáquië' gudil-la ilúguië' lë' len chopa du guië. Gudödi ni' gunábinë' bönnachi zían ni', rnnë':

—¿Nuzxi caz bönni' ni, en bizxi benë'?

34 Ta'bödxí'a bönnachi zían na', que queëgaca ca ta'nná. Caní guca, biti' bi guca tséajni'inë' bönni' lo na', tu' tu'tsatsa bönnachi na', ate' gunná bé'enë' bönni' rójáquië' gudil-la ila'chë'ë Pablo lu yu'u zxön ga nagá'anagaquië' bönni' na' rójáquië' gudil-la. 35 Cate' bila'dxinë' ga naca ni'yëpi' que yu'u zxön na', bönni' na' rójáquië' gudil-la guluf'inë' Pablo, tu' dxíadi'igaca bönnachi zían légaquië', 36 en zá'gaca cúdzu'lögaquië', ta'bödxí'a, ta'nná:

—Guli'gútië'.

*Didza' bë'ë Pablo uláz queë' lógaca bönnachi*

37 Cate' ni' gula'sí lógachië' ila'gu'ë Pablo lu yu'u zxön ni', lë' gudxë' bönni' lo na' rinná bé'enë' bönni' rójáquië' gudil-la, gunnë':

—¿Naru' gunnu' neda' lataj guía' lí' tu didza'?

Bönni' lo na' gudxë' Pablo:

—¿Rácatso' didza' griego? 38 ¿Naru' calëga lí' bönni' Egipto na' dza lahui nisö butubë' yugu' bönni' gula'dá'baguë'ë yúlahui', ate' guchë'ë idú choá' gáyu'ë bönni' huëti bönnachi lu lataj cá'asö?

39 Ní'irö Pablo gudxë' lë', gunnë':

—Le nácatë naca' neda' bönni' judío. Gulja' Tarso, tu yödzö lo luyú Cilicia. Ráta'yua' lo' gunnu' neda' lataj gu'a didza' lógaca bönnachi ni.

40 Bönni' lo na' bë'ë lë' lataj, ate' guzuínë' Pablo ga naca ni'yëpi', en guchisa në'ë para ila'cuá' dxisö bönnachi zían ni'. Cate' chigula'cu'ë dxisö, Pablo bë'lenë' légaquië' didza' lu didza' hebreo.



—Libí'ili, bönni' gula, en libí'ili' böcha'a. Buli'zë nágali' le guía' libí'ili' ca naca le runa'.

<sup>2</sup> Cate' bila'yönnë' ru'ë didza' hebreo, gula'cuá'arë' dxisö. Pablo gudxë' légaquië', rnnë':

<sup>3</sup> —Naca caza' neda' bönni' judío. Gulja' lu yödzö Tarso luyú Cilia, pero guzxöna' lu yödzö ni, ate' busédinë' Gamaliel neda' idú ca naca xibá quégaquië' xuz xtó'oru'. Bë'tica'sö ládxa'a guyéaj ládxa'a Dios ca runli' libí'ili' na'a. <sup>4</sup> Zí'alö gudxía ládxi'gaca'-në' bönni' nazí' lu ná'agaquië' xtídzë'ë Cristo, en guchë'gaca'-në' ga ilátië'. Guzxöngaca'-në', en gulú'ugaca'-në' lidxi guié', yugu' bönni', en nigula. <sup>5</sup> Lësca' huáca ilunë' ba nalí yugu' bixúz unná bë', en yugu' bönni' gula tu'zëajni'inë' que le gulunë'. Gulunë' guichi unná bë' le yöju'a ga nacu'ë böchi'ru' judío lu yödzö Damasco. Guyija' ni' para tsöjxöngaca' nupa ni' ta'yéajlë' Cristo, para idichë'gaca'-në' nága'gaquië' Jerusalén ni, para ilácagaquië' xíguia'.

*Ríguíxjö'ë Pablo ca böáquië' queë' Cristo*

<sup>6</sup> Ní'irö gunnë' Pablo:

—Cate' ni' sa'yéaja' la' nöza, en si' idxina' Damasco, cate' guca idú huagubidza, tsáldo'os guyëpi yösa bení' le za' lúxhiba, le buzeni' ga na' sa'yéaja'. <sup>7</sup> La' yöjötá'tea' lu yu, en biyönda' chi'i Nu gudxi neda': "Saulo, Saulo, ¿bizx que ribía ládxi'u neda'?" <sup>8</sup> Ní'irö gunábida' lë', gunniá: "¿Nuzxi li', Xan?" Lë' gudxë' neda': "Neda' ni Jesús, bönni' Nazaret. Neda' caz ribía ládxi'u." <sup>9</sup> Nupa ni' gula'cuá'len neda' bila'lé'ë caz bení' na', en guladxi, pero biti' bila'yöni chi'i Nu na' bulidza neda'. <sup>10</sup> Ní'irö gudxa'-në': "¿Nacxi guna, Xan?" Xanru' gudxë' neda': "Guyasa, en guyéaj Damasco. Zoë' ni' tu bönni' guié' li' ca naca yúgu'të le ral-la' gunu'." <sup>11</sup> Tu' cabirö rilé'eda' tu' budí'i yösa bení' na' guyépida' lahua', que lë ni na' yugu' bönni' dzágagaquië' neda' gula'guélë'ë na'a, ate' gula'ché'ë neda' ga bidxíntea' Damasco.

<sup>12</sup> Zoë' Ananías ni', tu bönni' runë' idútë ca rinná bë' xibá queë' Dios, ate' yugu' bönni' judío nacu'ë Damasco tunë' lë' bal. <sup>13</sup> Bidxinë' Ananías na' ga zoa', en gudxë' neda': "Saulo, böcha'a, huóalaj guió'j lo'." La' ní'isö böalaj guió'j lahua', ate' bilé'eda' lë'. <sup>14</sup> Lë' gudxë' neda': "Dios quégaquië' xuz xtó'oru', dza ni'te guró cazë' li' para inözinu' le rë'ni quézinë' Lë', en ilé'enu'-në' Bönni' Tsahui', Lë' cazë' Zxf'inë', en yönnu' le guié' Lë' cazë' li'. <sup>15</sup> Caní gaca, tu' ral-la' gunu' ba nalí queë' Lë' lógaca yúgu'të bönachi, usiyönnu' légaquië' ca naca le chibilé'enu', en le chibiyóninu'. <sup>16</sup> Na'a, ¿bizx que ridzenu'? ¡Guyasa, en bidila nisa! Bulidzë' Xanru' para únë' li' dxi'a, en ugüë' dul-la' nabágu'u."

*Cristo gusöl-lë'ë Pablo para gunë' libán lógaca bönachi izá'a*

<sup>17</sup> Gunnë' ca' Pablo:

—Gudödi ni', cate' budxina' Jerusalén, en tsanni ni' rulidza'-në' Dios lu chila yudo', bilé'eda' tu le naca ca tu lu yëla bëchigal. <sup>18</sup> Bilé'eda'-në' Xanru', ate' gudxë' neda': "¡Guyéaj carelö! ¡Burúajtë Jerusalén ni, tu' cabí ilunë' bal bönni' ni le gunu' ba nalí quia'!" <sup>19</sup> Neda' gudxa'-në': "Xan, nözgaca quézinë' ca bena' neda'. Guyázia' gapa naca lu yu'u ga tu'dubë' tu'sédë' bönni' judío queë' Dios. Gudina' nupa ni' ta'yéajlë' Li', en gulú'ugaca'-në' lidxi guié'. <sup>20</sup> Cate' ni' gulútië' Esteban, bönni' ni' benë' ba nalí quiu', lësca' zoa' neda' ni', en bena' tuz yugu' bönni' gulútië' lë' tu'

ben chi'a lari' nácugaquië' bönni' na' bulu'ladxë' lë' guiöj." 21 Ní'irö Xanru' gudxë' neda': "Guyéaj, tu' risöl-la'a li' lógaca bönachi izá'a."

*Pablo ru'ilenë' bönni' lo didza', bönni' rinná bé'enë' bönni' röjáquië' gudil-la*

22 Nisö ze lo yugu' bönni' judío bulu'zé nágagaquië' didza' bë'ë Pablo, ate' ní'irö gula'bödxi'ë. Gulu'ë zidzaj didza', ta'nnë':

—¡Guli'gútië' bönni' ni! ¡Bíti'rö ral-la' soë' ibanë'!

23 Ní'irö tu' ta'bödxi'ë, en ta'chözë' le nácugaquië' lu yöl-la' rilé quégaquië', en tu'chejë' bëchtö yu lu bö'ös, 24 bönni' lo na' rinná bé'enë' bönni' röjáquië' gudil-la gunná bë'ë ulu'gu'ë Pablo lu yu'u zxön na'. Lësca' gunná bé'enë' légaquië' ila'guinë' Pablo para quíxjö'ë le nácatë, para ila'nözinë' bixx que na' ta'bödxi'ë bönni' judío caní queë' Pablo. 25 Cate' gulúgui'ë lë' du guídi para ila'guinë' lë', Pablo gudxë' tu bönni' nacu'ë lu në'ë bönni' röjáquië' gudil-la zoë' ni', rnnë':

—¿Naru' dë lataj quínili' neda'? Nababa' Roma, ate' cuntú nu buchi'a busörö neda' channö nabága'a xíguia'.

26 Cate' bönni' na' biyönnë' lë ni, guyijë' yöjtíxjö'inë' bönni' lo na' rinná bé'enë' bönni' röjáquië' gudil-la. Rë' lë':

—¿Bizxi caz ni runru'? ¡Bönni' ni nababë' Roma!

27 Ní'irö bidë' bönni' lo na' ga zoë' Pablo, en gudxë' lë':

—¡Gudíxjö'! ¿Naru' nababu' li' Roma?

Pablo gudxë' lë':

—Ön, nababa'.

28 Bubi'ë didza' bönni' lo na', gunné':

—Neda' ni, dumí zían gudíxja' para ibaba' Roma.

Ní'irö Pablo gudxë' lë':

—Neda' gubaba' Roma cate' ni' gulja' tu' nabábagaquië' xuz xiná'a Roma.

29 Cate' bönni' na' chizóa ila'guinë' lë' bila'yönnë' lë ni, la' bulu'bíga'të' ga zoë' Pablo. Lësca' gúdxinë' bönni' lo na' cate' gunözinë' nababë' Pablo Roma, tu' chigunná bë'ë ilúguië' lë'.

*Ridxinë' Pablo lógaquië' bönni' yudo' tu'chi'a tu'söröë'*

30 Dza buropi ni, gú'unnë' bönni' lo na' inözinë' gazxi ga rë' bizxi na' yugu' bönni' judío tu'zéguië' Pablo didza'. Gunná bë'ë bulu'sedxë' du guië' na' náguë'ë Pablo, ate' gunná bë'ë ulu'dubë' bixúz unná bë' judío, en yúgu'të bönni' yudo' tu'chi'a tu'söröë'. Ní'irö bubéajë' Pablo ga na' nagú'ugaquië' lë', ate' buzöë' lë' lógaquië'.

## 23

1 Ní'irö buyúdë'ë Pablo lógaquië' bönni' yudo' tu'chi'a tu'söröë' na', en gunné':

—Libí'ili', böcha'a. Ga ridxintë na'a riböza' dxí'ado'. Caní naca, bití' zoa le ruxösa ládxi'da'ahua' neda' lahuë' Dios.

2 Ní'irö Ananías, bixúz lo, gunná bé'enë' nupa nacuá' cuita lë'ë Pablo ila'gápë'ë ru'ë. 3 Pablo gudxë' lë':

—Lézca' caní Dios ubi'ë quiu', li', rulu'ísö tsahui' cuinu'. ¿Naru' rö'ö cazu' ruchi'a rusöröu' neda' ca rinná bë' xibá, pero ridödi bë'tso' ca rinná bë' xibá na', na' rinná bé'enu' ila'gápë'ë neda'?

4 Nupa nacuá' ni' të Pablo:

—¿Naru' rulidza zi'tso'-në' bixúz lo queë' Dios?

<sup>5</sup> Pablo gudxë' légaquië':

—Libí'ili', böcha'a. Nazúaj lu guichi, rnna: “Biti' ulidza zi'u nu rinná be'e bönachi uládz quiu'”, pero neda' biti' gúquibe'eda' náquië' bixúz lo.

<sup>6</sup> Ní'irö gúquibe'enë' Pablo bal-lë' nácagaquië' bönni' yudo' saduceo, ate' ia'bal-lë' bönni' yudo' fariseo. Ní'irö bé'ë zidzaj didza' lógaquië' bönni' yudo' tu'chi'a tu'söröë' na', gunné':

—¡Libí'ili', böcha'a! ¡Naca' bönni' fariseo, en naca' zxi'inë' tu bönni' fariseo! ¡Na'a ruchi'a rusöröli' neda' tu' runa' löza ulu'bán nupa chinátigaca!

<sup>7</sup> Cate' bé'ë Pablo didza' ni, bila'ruájë' choplö yugu' bönni' yudo' fariseo, en yugu' bönni' yudo' saduceo, ate' gula'dil-la dídžë'ë la' légacasë'. <sup>8</sup> Caní gulunë' tu' ta'nnë' bönni' saduceo na' biti' ulu'bán nupa chinátigaca, en biti' nacu'ë gubáz lá'ayi, en biti' nacuá' bö' nácagaca caz bönachi, pero ta'yéajlë'ë bönni' yudo' fariseo nácagaca yúgu'të lë ni. <sup>9</sup> Que lë ni na' gula'bódxi'ë. Ní'irö gula'yasë' bönni' nazédagaquië' xibá queë' Dios, yugu' bönni' yudo' fariseo, en gula'dil-la dídžë'ë, ta'nnë':

—Rusáca'tu' queëtu' biti' bi dō' nu'ë bönni' ni. Channō tu bö' naca caz bönachi bé'len lë' didza', o channō tu gubáz lá'ayi queë' Dios bé'lenë' lë' didza', biti' ral-la' tá'baga'ru'-në' Dios.

<sup>10</sup> Cate' chita'díl-lada' dídžë'ë bönni' judío na', gúdxinë' bönni' lo na' rinná bé'enë' bönni' röjáquië' gudil-la, tu' réquinë' ulu'zuxzaj ulu'quínajë' Pablo. Ní'irö gunná bé'enë' bönni' röjáquië' gudil-la tsöjléajgaquië' Pablo ladaj bönni' judío na', en ulu'ché'ë lë' lu yu'u zxon ga na' nagá'anagaquië' bönni' na' röjáquië' gudil-la.

<sup>11</sup> Cate' chinaca chi'i dzō'ölö la' dza ná'asö, bulu'í lahuë' Xanru' ga zoë' Pablo, en gudxë' lë':

—Butipa ládxi'u, Pablo. Ca na' chibenu' ba nalí quia' Jerusalén ni, lësca' run bayudxi gunu' ba nalí quia' lu yödzö Roma.

### *Tun xtídza'gaquië' ilütië' Pablo*

<sup>12</sup> Cate' za' rení' ia'tú dza, gulún xtídza'gaquië' bal-lë' bönni' judío, en gulún tsutsu xtídza'gaquië', ta'nnë' gunë' Dios légaquië' xíguia' channō cabí ilunë' lë na' gulún xtídza'gaquië', gula'nnë' biti' ca' ilë'aj ilahuë' ga idxinrö chigulútië' Pablo. <sup>13</sup> Nayanrö ca choá'gaquië' bönni' na' gulún tsutsu xtídza'gaquië' caní. <sup>14</sup> Yöjáquië' bönni' ni ga nacu'ë yugu' bixúz unná bé', en bönni' gula tu'zéajni'inë' bönachi judío, ate' gula'nnë':

—Chiben tsutsu xtídza'tu', gunnatu' gunë' Dios netu' xíguia' channō cabí guntu' caní. Biti' gu'aj gágutu' ga gütirötu'-në' Pablo. <sup>15</sup> Na'a, libí'ili', en bönni' yudo' tu'chi'a tu'söröë', guli'guié' bönni' lo rinná bé'enë' bönni' röjáquië' gudil-la idichë'ë Pablo cuxó para idxinë' ga nudúbili', innalí ré'ënili' inábili'-në' Pablo tu didza' gate ga ré'. Netu' cō'ō nistu'-në' la' nöza, ate' gütitu'-në' zí'alö ca idxinë' ni.

<sup>16</sup> Biyönibi' bi'i bönni' queënu nigula zanë' Pablo ca na' ila'bö' nísie' Pablo, ate' guyéajbi', en guyú'ubi' yu'u zxon na', ate' yöjtíxjö'i'ibi'-në' Pablo. <sup>17</sup> Pablo bulidžë' tuë' bönni' nacu'ë lu në'ë bönni' röjáquië' gudil-la en gudxë' lë':

—Guchë'ë-bi' bi'i ni lahuë' bönni' lo, tu' nuá'abi' didza' guiëbi'-në'.

<sup>18</sup> Ní'irö bönni' na' gudélë'ë-bi', en guchë'ë-bi' ga na' zoë' bönni' lo na', ate' gudxë' lë':

—Bulidžë' Pablo, bönni' na' yu'ë lidxi guíë, neda', en gúta'yuë' lahua' idigu'a-bi' bi'i ni lo, tu' ré'ënibi' gü'ilenbi' li' didza'.

19 Bönni' lo na' gudélë'ë ná'abi', en guchë'ë-bi' quez, ate' gunábinë'-bi', rnnë':

—¿Bizxi na' ral-la' guío' neda'?

20 Lëbi' gúdxibi'-në':

—Chinúngaquië' didza' bönni' judío iláta'yue' lo' ichë'u-në' Pablo cuxó, para idxinë' lógaquië' bönni' yudo' tu'chi'a tu'söröë'. Ilë' li' té'ënnë' ila'nábinë' lë' tu didza' gate ga rë',<sup>21</sup> pero biti' tséajlë'u le ila'nnë' tu' nadödi choá'gaquië' ila'bó' nísie' Pablo. Chigulún tsutsu xtídzë'ë gula'nnë' gunë' Dios légaquië' xíguia' channö cabí ilútië' lë'. Biti' bi ilë'aj ilahuë' ga idxinrö ilútië' lë'. Chizóagaquië' ta'bözë' si' lu no'o gunu' le ila'nábinë' li'.

22 Ní'irö bönni' lo na' rinná bé'enë' bönni' rójáquië' gudil-la gunná bé'enë'-bi' cuntu nu guiëbi' lë na' chigúdxibi' lë', ate' ní'irö busól-lë'ë-bi' bi'i ni.

*Ridxinë' Pablo lahuë' Félix, bönni' rinná bë'ë luyú na'*

23 Ní'irö bönni' lo na' bulidzë' chopë' bönni' nacu'ë tu gáyu'ë bönni' rójáquië' gudil-la lu ná'agaquië' tu tuë', ate' gunná bé'enë' légaquië' ulu'cözë' chopa gáyu'ë bönni' rójáquië' gudil-la ta'zë'e ní'agaquië', en tsónnalalaj yu' chië' bönni' rójáquië' gudil-la dxíagaquië' böa', en chopa gáyu'ë bönni' rójáquië' gudil-la ilu'ë yaga tuchi' para tsójáquië' yödzo Cesarea idú ridödi xtsó'.<sup>24</sup> Lësca' gunná bé'enë' légaquië' ulu'cözë'-ba' tu böa' cuíë'-ba' Pablo, ate' ila'ché'ë lë' dxí'ado', cabí bi gaca queë', para idxinë' lahuë' Félix, bönni' lo rinná bë'ë uláz que Roma.

25 Gusól-lë'ë ca' tu guichi le rna caní:

26 "Neda', Claudio Lisias, ruzúaja' quiu' lu guichi, bönni' lo unná bë', Félix. Rugapa' Dios li'.

27 'Bönni' ni risól-la'a-në' quiu', gula'zönë' bönni' judío lë', en gulë'ënnë' ilútië' lë'. Cate' gúquibe'eda' nababë' Roma, guchë'gaca'-në' bönni' rójáquië' gudil-la, en busólá'-në' lu ná'agaquië' judío na'.<sup>28</sup> Gú'unida' inözda' bizxi benë', lë na' tu'zéguië' lë' didza' bönni' judío, ate' guchë'a-në' lógaquië' bönni' yudo' tu'chi'a tu'söröë' légaquië'.<sup>29</sup> Cate' buédxi didza', gunözda' tu'zéguië' lë' didza' ca naca le rinná bë' xibá quégaquië', en biti' bi nabáguë'ë bönni' ni para nu guti lë', o nu cu'u lë' lidxi guíë'.<sup>30</sup> Ní'irö cate' bidxín nu gudíxjöi' i neda' ta'bó' nísie' yugu' bönni' judío lë', la' gusól-la'tea' lë' ga zu', ate' gunná bé'egacada'-në' bönni' ni tu'zéguië' lë' didza' ila'dxinë' lo' li', para ila'guíxjöi'inë' li' bi didza' nápaqaquië' lë'. ¡Dios gun tsáhuë'ë li'!"

31 Ní'irö bönni' na' rójáquië' gudil-la gula'guélé'ë Pablo, en gulunë' ca na' chigunná bé'enë' légaquië', ate' gula'ché'ë lë' yödzo Antipatris, ni' naca chi'i dzó'ölö.<sup>32</sup> Cate' za' rení' ia'tú dza bönni' rójáquië' gudil-la ta'zë'e ní'agaquië' yójhüjgaquië' Jerusalén, ate' bönni' rójáquië' gudil-la dxíagaquië' böa' bulu'ú'ë nöza, dzágagaquië' Pablo.<sup>33</sup> Cate' bönni' na' rójáquië' gudil-la naché'gaquië' Pablo bila'dxinë' Cesarea, bulu'nödzej' guichi na' lu në'ë bönni' rinná bë'ë uláz que Roma, en bulu'sudxinë' Pablo lahuë'.<sup>34</sup> Gudödi bulabë' bönni' unná bë' guichi na', gunábinë' Pablo pazxi bönni' lë'. Cate' gúquibe'enë' nababë' luyú Cilicia,<sup>35</sup> gudxë' lë':

—Yönida' le innó' cate' ila'dxín ni nupa tu'zegui li' didza'.

Ní'irö gunná bé'enë' ilún chi'ë lë' lu yu'u yúlahui' ga ribö'ë Herodes, bönni' rinná bë'ë, para uchi'a usöröë' bönachi.

## 24

*Pablo ru'ë didza' uláz queë' lahuë' Félix*

<sup>1</sup> Cate' chibizá'a gayu' dza, bidxinë' Ananías, bixúz lo, ni', ate' dzágagaquië' lë' bal-lë' bönni' gula tu'zéajni'inë', en Tértulo, tu bönni' nazë'ede'enë' didza'. Bila'dxinë' lahuë' bönni' unná bë', ate' gula'nnë' queë' Pablo. <sup>2</sup> Cate' chibulu'lidzë' Pablo, ate' bidxinë' ni', gusi lahuë' Tértulo ruzégui'ë lë' didza', rnnë':

—Bönni' lo unná bë', Félix. Ni'a quiu' li' ruzi'tu' xibé le run tsahui' netu', ate' lu yöl-la' réajni'i quiu' rinná bé'enu' dxi'a bönachi uládz queëtu'. <sup>3</sup> Yúgu'të lë ni ruzi'tica'stu' xibé gáti'tës, ate' idú ládxi'tu' rëtu' li': "Xclenu'." <sup>4</sup> Na'a, para cabí upízjarötu' li', ráta'yua' lo' gun zxön ládxi'u, yönnu' tu le do' guíëtu' li'. <sup>5</sup> Gúquibe'etu' bönni' ni rigú'u yöl-lë'ë bönachi, en runë' ga ta'dá'baguë'ë yúlahui' yugu' bönni' judío nacu'ë idútë yödzülió, en náquië' bönni' lo quegaquië' bönni' dá'gaquië' bönni' Nazaret na'. <sup>6</sup> Lësca' gú'unnë' gun dítjanë' yudo' queëtu'. Que lë ni na' guzxöntu'-në', en gú'unitu' uchi'a usörötu' lë' ca naca xibá queëtu'. <sup>7</sup> Ní'irö Lisias, bönni' lo rinná bé'enë' bönni' rójáquië' gudil-la bidxinë' ga zóatu', en lu yöl-la' sínia' zxön bugúë' bönni' ni lu na'tu'. <sup>8</sup> Ní'irö gunná bé'enë' Lisias na' ídigaca nupa tu'zegui lë' didza' lo' li'. Na'a, li' caz, cate' rinabi yúdxinu'-në' Pablo ni, huáca inózinu' gate ga rë' yúgu'të lë ni ruzéguitu' lë' didza'.

<sup>9</sup> Lësca' caní gula'nnë' yugu' bönni' judío ni', gula'nnë' naca caz caní. <sup>10</sup> Ní'irö butásö në'ë bönni' rinná bë'ë uláz que Roma na' para gu'ë didza' Pablo, ate' lë' bubí'ë didza', gunnë':

—Idú ládxa'a quíxjö'a ca naca le runa', tu' chinaca zían iz ruchi'a rusöröu' le raca quégaca bönachi ladztu'. <sup>11</sup> Le bena' huáca inabu'. Biti' réquini chinnu dza bidxina' Jerusalén para tseaj ládxa'a-në' Dios. <sup>12</sup> Biti' yójxáca'gaquië' neda' nu ridíl-lalena' didza', en bití' bena' ga ulu'tsatsa bönachi ga naca chila yudo', en cabí lu yu'u ga tu'dubë' tu'sëdë' queë' Dios, en cabí lu yödzü. <sup>13</sup> Biti' ca' gaca ulu'béaj lië' yugu' lë ni tu'zéguië' neda' didza'. <sup>14</sup> Lë ni rixóalëpa' lo'. Ca runa' xichinë' Dios quégagaquië' xuz xtó'otu' nalëbi ca le tu'sëdinë' légaquië', pero bönni' judío ni tu'ë le: Le ridá'baga' Dios, tu' réajlë'a yúgu'të le rinná bë' xibá queë' Dios, enca' yúgu'të le bulu'zúajë' bönni' gulu'ë didza' uláz queë' Dios. <sup>15</sup> Ca na' légaquië' tunë' löza Dios, lësca' neda' runa' löza Dios, usubanë' nupa chinátigaca, bönachi tsahui', en bönachi bití' nácagaca tsahui'. <sup>16</sup> Que lë ni na' ru'í ládxi'tica'sa' cabí ibága'a le gun ga uxös ládxi'da'ahua' neda' lahuë' Dios o lógaca bönachi.

<sup>17</sup> 'Gudödi zoa' ga yúbölö idú chopá tsonna iz, budxina' ga nacuá' bönachi uládz quia' para unödza' dumí le gácalen bönachi yechi', en unödza' le rigú'a lahuë' Dios. <sup>18</sup> Tsanni ni' runa' caní, bal-lë' bönni' judío narúajgaquië' luyú Asia bidixáca'gaquië' neda'. Ni' zoa' lö'a yudo', nubéaj dxi'a cuina' ca naca que yudo', en cabí nutuba' bönachi zían, en cabí nuna' ga ulu'tsatsa bönachi. <sup>19</sup> Yugu' bönni' judío ni' ral-la' ila'dxinë' lo' li', en ulu'zéguië' neda' didza' channö nápagaquië' neda' didza'. <sup>20</sup> Ila'nnátsöquië' bönni' judío ni channö bulu'dzölinë' bi le cabí naca dxi'a bena' cate' ni' bidxina' lógaquië' bönni' yudo' tu'chi'a tu'söröë' légaquië'. <sup>21</sup> Tuz cate' ni' zoa' lógaquië', bë'a zidzaj didza', gunniá': "Ruchi'a rusöröli' neda' na'a tu' runa' löza ulu'bán nupa chinátigaca."

22 Cate' biyönnë' Félix didza' ni, en dxí'ado' chinözinë' ca naca que lë na' rusëdinë' Pablo, buzë lähui'së' ca' didza' bizxaj ni, gunnë':

—Cati' idxinë' Lisias, bönni' lo rinná bé'enë' bönni' rōjáquië' gudil-la, údxi yōnida' ca naca didza' bizxaj queéli'.

23 Ní'irō Félix gunná bé'enë' tu bönni' nacu'ë lu nē'ë bönni' rōjáquië' gudil-la zoë' ni', gun chi'ë Pablo, pero gu'ë lë' lataj tē' lō'a, en biti' uzáguë'ë xinözgaquië' böchi' luzë'ë duyúgaquië' lë' bi dxin ilunë' queë'.

24 Chopa tsonna dza gudzé, bidë' leyúbölō Félix na'. Drusila, nigula queë' dzáganu lë'. Nácanu nigula judío. Félix bulidzë' Pablo, ate' buzë náguië' xtídzë'ë ca naca le réajlë'ëru' Jesucristo. 25 Cate' bē'ë didza' Pablo ca ral-la' gácaru' tsahui', en inná be'e cuinru', ate' idxinru' ga uchi'a usörōë' Dios rē'u dza si' za', ní'irō gudxi bidzōbinë' Félix, en gudxë' Pablo:

—Guyéaj na'a. Cate' gapa' lataj ulidza' li'.

26 Lē'sca' gú'unnë' Félix si'ë dumí le unödzejë' Pablo lë' para usanë' lë', ate' que lë ni na', zían luzuí bulidzë' Pablo, en bē'lenë' lë' didza'. 27 Cate' bizá'a chopa iz guyazië' Porcio Festo xilatjë' Félix, ate' tu' gú'unnë' Félix gunë' le tsaza ládxi'gaquië' bönni' judío, bucá'anë' Pablo nadzunë' lidxi guië'.

## 25

*Ridxinë' Pablo lahuë' Festo, bönni' unná bē'*

1 Bidxinë' Festo yōdzō Cesarea para tsázië' xilatjë', gáquië' bönni' unná bē' ulaz que Roma. Cate' bizá'a tsonna dza buzë'ë yōdzō na', sa'yéajë' Jerusalén. 2 Cate' bidxinë' Festo ni' yugu' bixúz unná bē', en yugu' bönni' lo quégaca bōnachi judío bila' dxinë' lahuë' para ila'nnë' queë' Pablo, ate' gulá'ta'yuë' lahuë' Festo 3 bi uzá' ládxe'ë quégaquië', isól-lë'ë nupa tsōjxí'gaca Pablo, para udxinë' Jerusalén. Gulé'ënnë' ila'bō' nísie' lë' la' nōza para ilútië' lë'. 4 Bubi'ë didza' Festo, gudxë' légaquië':

—Lu yōdzō Cesarea nadzunë' Pablo, ate' ral-la' tseja' ni' cuxō huidzaj nisō. 5 Que lë ni na', nútí'tëslōli' dë lu ná'ali', ral-la' sá'lenli' neda', en channō nabáguë'ë bönni' ni' xíguia', huáca uzéguili'-në' didza' ni'.

6 Gudzenë' Festo Jerusalén idú ca xunu' gubidza, ate' ní'irō böajë' Cesarea. Cate' guzá' rení' ia'tú dza gurō'ë ga ruchi'a rusörōë', en gunná bé'enë' nupa tsōjxí'gaca Pablo. 7 Cate' chibidxinë' Pablo ni', yugu' bönni' judío narúajgaquië' Jerusalén gula'gu'ë lë' lë'alō, en zían le gula'nnë' queë'. Bulu'zéguië' lë' le tu'subáguë'ë lë' xíguia', pero biti' guca ulu'béaj lië' yugu' lë na' gula'nnë' queë'. 8 Ní'irō bē'ë didza' Pablo uláz queë', gunnë':

—Biti' bi le ruá' dō' bena' que xibá quégaquië' bönni' judío, en cabí que yudo' quégaquië', en cabí queë' César, bönni' Roma, rinná bé'enë' rē'u.

9 Gú'unnë' Festo gunë' le ila'yaza ládxi'gaquië' bönni' judío, ate' bubi'ë didza', gudxë' Pablo:

—¿Rē'ënu' so'o Jerusalén, ga na' soa nu uchi'a usörō li' ca nácagaca lë ni ta'nnë' quiu'?

10 Bubi'ë didza' Pablo, gudxë' lë':

—Zoa caza' ga rō'ō nu ruchi'a rusörō uláz queë' César, ga na' ral-la' uchi'a usörōu' neda'. Biti' bi huiá' dō' nuna' quégaquië' bönni' judío, ate' chinöz quézinu' lë ni. 11 La'tu' nuna' tu le ruá' dō', o bítí'tës le run ga ibága'a xíguia' gátia', biti' tá'baga'a gátia'. Na'a, channō cabí nuna' ca ta'nnë' quia' bönni' ni, cuntu caz nu dë lu nē'ë udōdi neda' lu ná'agaquië'. Rinaba' tseja' lahuë' César ga udxí'a urō quia'.

<sup>12</sup> Cate' Festo chibé'lené' yugu' bönni' yúlahui' didza', bubí'ë didza', gudxé' Pablo:

—Chigunábu' tseju' lahuë' César. Lahuë' César uyiju'.

*Ru'ë didza' Pablo lahuë' Agripa, bönni' unná bē'*

<sup>13</sup> Gudödi chopá tsonna dza, bidxinë' Agripa, bönni' rinná bē'ë lu yödzö Cesarea, dzáganu Berenice lē', duyúgaquië' Festo. <sup>14</sup> Cate' chigula'cu'ë ní' zían dza, Festo buluí'inë' Agripa, bönni' rinná bē'ë, ca naca queë' Pablo. Gudxé' lē':

—Zoë' tu bönni' ni bucá'anë' Félix lē' lidxi guié'. <sup>15</sup> Cate' guzóa' Jerusalén, yugu' bixúz unná bē', en bönni' gula tu'zéajni'inë', bila'dxinë' lahua', ate' gula'nnë' queë' bönni' ni. Gula'nábinë' neda' ichuga' queë' gátie'. <sup>16</sup> Neda' bubí'a didza', gudxa' légaquië' bití' nalébiguequinë' bönni' Roma ila'chúguië' queë' tu bönni' gátie' channö cabí ila'dxini lahuë' nupa tu'zegui lē' didza', para gaca ubí'ë didza' ca naca lē' na' ta'nnë' queë'. <sup>17</sup> Que lē' ni na', cate' bila'dxinë' légaquië' ni, bití' ca' gudzedá', pero cate' guzá' gueyaní' ia'tú dza gurö'a ga ruchi'a rusöröa', ate' gunná bé'eda' nupa yöjxí'gaca bönni' ni. <sup>18</sup> Cate' gula'cu'ë ní' bönni' na' tu'zéguië' lē' didza', bití' bi gula'nnë' queë' ca busaca' quia' ila'nnë'. <sup>19</sup> Gula'nnë' queë' bal-la didza' bizxaj ca naca le ta'yéajlë'ë Dios, en ca naca queë' tu bönni' lē' Jesús, nu na' guti, pero Pablo runë' tsutsu xtídzë'ë rnnë' ni zoë' nabanë' leyúbölö. <sup>20</sup> Tu' buchíxida' ca náca gaca lē' ni, gunábida'-në' Pablo channö ré'ënë' tsejé' Jerusalén, ga ní' soa nu uchi'a usörö lē' ca náca gaca lē' ni. <sup>21</sup> Ní'irö cate' gunabë' Pablo tsejé' lahuë' Augusto César para uchi'a usörö'ë lē' ní', gunná bé'eda' bönni' röjáquië' gudil-la ilún chí'igarë' lē' cate' gála'rö dza isöl-la'a-në' lahuë' César.

<sup>22</sup> Ní'irö Agripa gudxé' Festo na':

—Lézca' neda' ré'ënda' yönida' le innë' bönni' na'.

Festo gudxé' lē':

—Cuxó yönnu' le innë'.

<sup>23</sup> Cate' za' rení' ia'tú dza, len ba zxon bila'dxinë' Agripa, en Berenice ní'. Gula'yázië' ga ral-la' ilu'ë didza', dzágagaquië' légaquië' bönni' unná bē', ate' gula'söl-lë'ë nupa tsöjxí'gaca Pablo. <sup>24</sup> Ní'irö Festo gudxé' Agripa, bönni' unná bē':

—Bönni' unná bē', Agripa, en yúgu'téli' zóali' ni tsözxön len netu'. Ni zoë' rilé'eli'-në' bönni' na', ta'nnë' queë' yúgu'të bönni' judío nacu'ë Jerusalén, enca' nupa nacua' ni, té' neda' ral-la' gátie'. <sup>25</sup> Runi neda' bití' bi benë' le nabáguë'ë xíguia' gátie', pero tu' gunabë' lē' cazë' tsejé' ga uchi'a usöröë' Augusto César lē', que lē' ni na' chinuna' quia' isöl-la'a-në' lahuë' Augusto. <sup>26</sup> Tu' cabí nözda' bí ral-la' uzúaja' lu guichi le uzegui bönni' ni didza' para isöl-la'a lu në'ë César, xana', que lē' ni na' nachë'a-në' loli', en le nácarö lo, nachë'a-në' lo' lí', Agripa, bönni' unná bē', para cate' údxi rinábini yudxu'-në', ní'irö inözda' bí ral-la' uzúaja' lu guichi ca naca queë' bönni' ni. <sup>27</sup> Réquida' bití' naca dxi'a isöl-la'a-në' nu bönni' náguë'ë ní' channö cabí gaca ulu'a le nabáguë'ë.

## 26

*Didza' bē'ë Pablo uláz queë' lahuë' Agripa, bönni' unná bē'*

<sup>1</sup> Ní'irö Agripa gudxé' Pablo:

—Dé lataj gu'u didza' uláz quiu'.

Buchila në'ë Pablo lahuë' Agripa, ate' gusí lahuë' ru'ë didza', rnnë':

2—Bönni' unná bē', Agripa. Raza lādxa'a tu' dē lataj na'a gu'a didza' uláz quia' lo' li' ca naca yúgu'tē le tu'zéguiē' bönni' judío neda' didza'. 3 Raza lādxi'ra' tu' núnbē'u yúgu'tē le nalébiguequinē' tunē' bönni' judío, enca' yugu' lē ni ridíl-latu' didza'.

*Yugu' le benē Pablo zí'atēlō*

4 Gunnē' ca' Pablo:

—Nözguequi quézinē' yúgu'tē bönni' judío ca na' bena' ga gudéla'tē cuídia' ga nacuá' bönachi uládz quia', enca' lu yödzo Jerusalén. 5 Nözguequi quézinē' ca', en huáca ila'guíxjö'ē ca na' bena' dza ni'te. Guca' bönni' fariseo. Yugu' bönni' fariseo tu'i lādxi'gacaré' ila'yéaj lādxi'gaquiē' Dios ca tunē' ia'zica'rē' bönni' judío. 6 Na'a, zoa' ni loli' para nu uchi'a usörö neda' tu' runa' löza Dios, usubanē' bönni' nati, en gunē' ca na' guzxi' lu nē'ē lógaquiē' xuz xtó'otu'. 7 Tunē' löza yugu' bönni' idxinnu cō' di'a dza queētu' ila'déli'nē' lē na' guzxi' lu nē'ē Dios. Que lē ni na' ta'yéaj lādxi'gaquiē' Dios, en tunē' xichinē' rēla, en tē dza. Tu' runa' löza lē ni, nuzéguigaquiē' bönni' judío neda'. Caní naca, bönni' unná bē', Agripa. 8 Na'a, ¿naru' réquitseli' libí'ili' bití' naca le tséajlē'ēru', usubanē' Dios bönni' nati?

*Pablo gudxía lādxe'ē bönachi queē' Cristo*

9 Gunnē' ca' Pablo:

—Lēzca' neda', zí'atēlō gúquida' le zían ral-la' guna', tá'baga'a-nē' Jesús, bönni' Nazaret. 10 Caní bena' lu yödzo Jerusalén. Gulu'a zían bönachi ta'yéajlē' Jesús lidxi guíē, tu' bulu'dödē' yugu' bixúz unná bē' lu na'a yöl-la' unná bē'. Cate' gulútiē' bönachi ni', bénlena' légaquiē' tuz didza'. 11 Zían luzuí busaca' zí'a yugu' bönni' ni' para ulu'sán lādxi'gaquiē' ca ta'yéajlē'ē Cristo. Caní bena' gapa naca lu yu'u ga tu'dubē' bönni' judío, en tu'sédē' queē' Dios. Guléde'eda' légaquiē', ate' gudxía lādxa'a légaquiē' ga bidxintē' guyija' gapa nacuá' yödzo zí'tu' para tsöjxöngaca'-nē'.

*Riguíxjö'ē Pablo ca böáquiē' queē' Cristo*

12 Gunnē' ca' Pablo:

—Para guna' caní guyija' yödzo Damasco, ate' bixúz unná bē' nasöl-la'gaquiē' neda' nudödigaquiē' lu na'a yöl-la' unná bē'. 13 Caní guca, bönni' unná bē', Agripa. Cate' ni' sa'yija' la' nöza, ni' naca idú huagubidza, bilé'eda' tu' bení' lúxiba le buzení'rō ca gubidza. Buzení' ga na' zoa', en ga nacuá' nupa sōjácalen neda'. 14 Ní'irō yúgu'tētu' gudzō'ōtu' lu yu, ate' biyönda' chi'i nu bulidza neda'. Bē'ē didza' hebreo, gunnē': "Saulo, Saulo, ¿bixz que ribía lādxi'u neda'? Run zí' cuinu', ridá'bagu'u neda'. Raca quiu' ca raca queēba' bēdxi, run zí' cuinba', richégu'ba' yaga tuchi' le túndē'ē-ba' zí'." 15 Ní'irō gudxa'-nē': "¿Nuzxi li', Xan?" Xanru' gudxē' neda': "Neda' ni Jesús, Nu na' ribía lādxi'u." 16 Na'a, guyasa, en guzuí, tu' bulu'í' lahua' li' na'a, para uzóa' li' gunu' xichina', en gunu' ba nali' que lē ni chibilé'enu', enca' quégaca le uluí'da' li', uluí' lahua' ga zu'. 17 Usólá' li' lu ná'agaquiē' bönni' uládz quiu', en lu ná'agaquiē' bönni' izá'a, lógaca nupa ni' risöl-la'a li' na'a. 18 Risöl-la'a li' ga na' nacu'ē para gunu' ga ulu'huóalaj guiōj lógaquiē', en ulu'huóáquiē' queē' Dios, en ulu'cá'anē' le naca chul-la' que dul-la', en ila'dxinē' lu bení'. Ulu'rúajē' lu na' Satanés' tu' xihuí', en ila'yáziē' lu nē'ē Dios. Channō ila'yéajlē'ē neda', Dios uniti lahuē' légaquiē', en ugúē' dul-la' nabága'gaquiē', ate' ila'déli'nē' ila'bábalenē' bönachi chinubéajē' Dios quez queē'."



*Benë' Pablo ca naca le bulu'inë' Xanru' lë'*

<sup>19</sup> Gunnë' ca' Pablo:

—Qui lë ni na', bönni' unná bë', Agripa, biti' gudá'baga'a guna' le bulu'inë' Dios, zoë' yehua' yubá, neda'. <sup>20</sup> Buzéajni'ida' nupa nacua' yödzö Damasco, en gudödi ni' nupa nacua' Jerusalén, en nupa nacua' luyú Judea, en bönachi yugu' yödzö zi'tu' para ulu'bí'i ládxi'gaca, en ulu'huóaca queë' Dios, en ilún le ilaca bë' chibulu'bí'i ládxi'gaca. <sup>21</sup> Tu' bena' caní, yugu' bönni' judío gula'zönë' neda' cate' ni' zoa' lö'a yudo', en gulë'ënnë' ilútië' neda'. <sup>22</sup> Ní'irö gúcalenë' Dios neda', ate' ga ridxintë na'a dza zoa' idú ládxa'a, runa' ba nalí lógaquië' bönni' cá'asö, en lógaquië' bönni' lo. Biti' ruá'a didza' yúbölö, pero ca gula'nnasë' zí'alö bönni' gulu'ë didza' uláz queë' Dios, enca' ca gunnë' Moisés ca ral-la' gaca. <sup>23</sup> Gula'nnë': "Qui'í sáquë'ë Cristo, en tódi gátië', gáquië' nu isí lo ubán tsaz lu yöl-la' guti, para ulu'ë lahui naca löza ila'dxin bönachi lataj bení, en gaca libán que lë ni lógaca bönachi uládz queëtu', enca' lógaca bönachi izá'a."

*Pablo ruzéajni'inë' Agripa para tséajlë'ë Cristo*

<sup>24</sup> Cate' chibë'ë Pablo yugu' didza' ni, le bë'ë uláz queë', ní'irö bë'ë zidzaj didza' Festo, gunnë':

—¡Nachixi icju', Pablo! ¡Tu' nazédado'o, chiguchixi icju'!

<sup>25</sup> Ní'irö Pablo gudxë' lë':

—Biti' nachixi icja', rea' li', Festo, ate' didza' ni ruá'a naca idútë li, en naca lesaca'. <sup>26</sup> Lë cazë' Agripa, bönni' ni rinná bë'ë, nözinë' yugu' lë ni, en que lë ni na', idú ládxa'a ruá'a didza' lahuë' lë'. Nözinë' yugu' lë ni, tu' cabí guca bagáchi'sö lë na' guca. <sup>27</sup> Bönni' unná bë', Agripa. ¿Naru' réajlë'u le gula'nnë' bönni' gulu'ë didza' uláz queë' Dios? Nözda' réajlë'u lë ni.

<sup>28</sup> Ní'irö Agripa gudxë' Pablo:

—Ia'láti'sö la' réquinu' idéli'nu' neda' para gaca' queë' Cristo.

<sup>29</sup> Pablo gudxë' lë':

—Ní'a queë' Xanru' Dios rë'ënda', sal-la' ia'láti'sö o yenni', calégasö li', pero lëasca' yúgu'të nupa ni ta'yöni neda', gácali' idú ca naca' neda', néquida' queë' Cristo, pero calëga gága'li' du guié' ca ni nága'a neda'.

<sup>30</sup> Cate' budxi bë'ë Pablo didza' ni, guzuinë' bönni' lo unná bë' na', ate' gulazuinë' ca' bönni' rinná bë'ë, en Berenice, en nupa ró'lengaca légaquië'.

<sup>31</sup> Cate' bila'rúajë' quez, gulu'í xtídzagaquië', ta'nnë':

—Biti' bi nunë' bönni' ni le nabáguë'ë xíguia' gátië', en calëga tsázië' lidxi guié.

<sup>32</sup> Agripa gudxë' Festo:

—Huáca usanu'-në' bönni' ni la'tu' cabí gunabë' tsejë' lahuë' César ga uchi'a usöröë' lë'.

## 27

*Ta'söl-lë'ë Pablo yödzö Roma*

<sup>1</sup> Cate' chigulunë' quégaquië' ila'söl-lë'ë netu' lë'e barco para tséajtu' yödzö Roma, luyú Italia, gula'guélë'ë Pablo, en ia'bal-lë' nupa nadzúngaca, ate' bulu'dödë' légaquië' lu në'ë Julio, tu bönni' rinná bé'enë' tu cö' bönni' rójáquië' gudil-la nazí'i le: Bönni' Queë' Augusto Rójáquië' Gudil-la. <sup>2</sup> Gurentu' tu lë'e barco que luyú Adramitio, le ral-la' tódi yugu' yödzö gapa ta'dxin barco ga naca luyú Asia, ate' yú'usótu' ca' lë'e barco na', buzá'atu' yödzö Cesarea. Aristarco, tu bönni' yödz Tesalónica, le nababa luyú Macedonia dzáguie' netu'. <sup>3</sup> Cate' za' rení' ia'tú dza, bidxintu' yödzö

Sidón, ate' ni' Julio, bönni' na' rinná bé'enë' bönni' röjáquië' gudil-la, lu yöl-la' dxi'i ladxi' queë', bë'ë Pablo lataj tsejë' ga nacu'ë böchi' luzë'ë para ilácalenë' lë' bi riyadzaj queë'. <sup>4</sup> Gudödi ni', bubentu' lë'e barco, ate' buzá'atu' ni'. Gudöditu' tsölá'a ga dë luyú bidxi Chipre ga rö'ö dxi bö' na' recja, tu' za' saca' lotu' bö' recja lu nísado' na'. <sup>5</sup> Ní'irö gudöditu' lu nísado' ga nalá' luyú Cilicia, en luyú Panfilia, ate' bidxintu' Mira, tu yödzö nababa luyú Licia.

<sup>6</sup> Bönni' na' rinná bé'enë' bönni' röjáquië' gudil-la, en nachë'ë netu', yöjxáquië' tu barco ni' narúaj yödzö Alejandría que luyú Egipto, barco na' zeaj luyú Italia ga rö' yödzö Roma. Gulu'ë netu' lë'e barco na'. <sup>7</sup> Guzá' barco na' tsahui' ládxi'do' zían dza, ate' len yöl-la' rizáca'sö bidxintu' ga nalá' tu luyú bidxi lu nísado' na' nazí'i le Gnido, ate' tu' ruzaga' netu' bö' na' recja, gudöditu' tsölá'a luyú bidxi nazí'i le Creta ga rö'ö dxi bö' na' recja, en bidxintu' ga nalá' yödzö Salmón luyú Creta na'. <sup>8</sup> Lu yöl-la' rizáca'sö gudöditu' tsölá'a ga dë luyú bidxi Creta na', en bidxintu' tu lataj ga ta'dxín barco, nazí'i le Buenos Puertos, le dë gala' ga na' dë yödzö Lasea.

<sup>9</sup> Tu' chigudzéda'atu', chigula' zoa bönadxi gaca ditaj bíti'tës barco rizá' lu nísado' na', tu' chigudödi yugu' dza tunë' gubasa cate' si' idxín beo' ziaga cate' récjada' bö'. Que lë ni na' Pablo buzéajni'inë' légaquië', <sup>10</sup> rnnë':

—Libi'ili', bönni', réquibe'eda' ga tseaj barco ni, huazóa bönadxi gaca ditaj barco ni, en yua' dzö'ö lë'e, en lësca' soa bönadxi queëru' gátiru'.

<sup>11</sup> Bönni' na', rinná bé'enë' bönni' röjáquië' gudil-la, guyéajlë'ërë' le gula'nnë' bönni' na' dë lu në'ë barco, en bönni' xan caz, ca le gunnë' Pablo. <sup>12</sup> Tu' cabí naca dxi'a lataj ni' ga ta'dxín barco, nazí'i le Buenos Puertos, para ulu'gá'anë' ni' yugu' beo' ziaga, que lë ni na' la'tu'biqui' yúgu'të bönni' nacu'ë lë'e barco na' gulún tuz xtídzagaquië' ulu'zë'ë ni', channö huáca ila'dxinë' ga ta'dxín barco lu yödzö Fenice, lësca' dë luyú bidxi na' nazí'i le Creta, le dë tsölá'a ga ribía gubidza, ate' gulë'ënnë' ulu'gá'anë' ni' yugu' beo' ziaga.

### *Recja bö' budunu' lu nísado'*

<sup>13</sup> Tu' recja tu bö'do' le za' saca' tsölá'a ga ridödi gubidza beo' ziaga, téquinë' chiraca ilunë' ca të'ënnë', ate' bulu'lisë' guíë zi'i naga' du guíë le ruzóa dxisö barco, ate' gudödi barco na' gala' ra' luyú bidxi na' nazí'i le Creta. <sup>14</sup> Ia'tú chí'isö ca', guyecja tu bö' budunu' za' lotu', nazí'i le Euroclidón. <sup>15</sup> Tu' ruzéaj bö' na' recja barco na' tsölá'alö, ate' tu' cabí guca tseaj barco ga za' bö', ní'irö bë'ëtu' lataj bö' na' buzéaj barco na' ga ré'ëni. <sup>16</sup> Cate' gudödi barco na' ga bidxintu' tsölá'a tu luyú bídxido' nazí'i le Cauda, tsölá'a ni' ga bití' récjada' bö', lu yöl-la' rizáca'sö buchísatu' bárcodo' ná'ayöj barco zxon na' yú'utu'. <sup>17</sup> Gudödi burentu' le lahui barco zxon na', ní'irö bëga'ratu' barco zxon na'. Zxante barco na' buchölitu' du, para cabí ilá'a lu le ridxía nisa na'. Tu' gúdxitu' tödi barco na', en inídxí' lu yuzxi lu nísado' na', buzötjatu' lari' que, le rutubi bö' rusá' barco na'. Canísö bë'ëtu' lataj bö' na' recja buzéaj barco. <sup>18</sup> Cate' za' rení' ia'tú dza, en ni' ruzéajda' bö' budunu' recja barco na', ní'irö gurú'unatu' lu nísado' lati' yua' dzö'ö lë'e barco na'. <sup>19</sup> Dza bunny, len na' cuintu' gurú'unatu' le tun dxin que barco na' lu nísado'. <sup>20</sup> Cate' chiguca zían dza bití' rilë'etu' gubidza, en nitú böljaj, en tu' récjada' bö' na' ruzéaj barco na' yú'utu', bíti'rö runtu' löza ulatu'.

<sup>21</sup> Tu' chiguca zían dza bití' nágutu', guzuíné' Pablo gatsaj láhui'lö légaquié', en gudxé' légaquié':

—Libí'ili', bönni', dxí'arö guca la'tu' uzé nágali' neda', en cabí uzá'aru' luyú Creta, en cabí udutságaru' lè ni riguí' rizáca'ru', en yugu' lè ni raca ditaj que barco ni. <sup>22</sup> Na'a, rea' libí'ili': Tsutsu guli'gún ládxi'li', tu' cabí gátili' nituli' libí'ili' tscali' zóali' ni, sal-la' gaca ditaj barco ni. <sup>23</sup> Caní gaca tu' budulu'i' lahué' neda' gudiyéla tu gubáz lá'ayi queé' Dios. Dios ni néquida' queé', en runa' xichiné'. <sup>24</sup> Gubáz lá'ayi na' gudxé' neda', gunné': "Pablo, bití' gádxinu'. Run bayudxi idxinu' lahué' César. Tu' nadxí'iné' Dios lí', usöl'é' yúgu'té bönachí nacua'len lí' lè'e barco ni." <sup>25</sup> Que lè ni na', tsutsu guli'gún ládxi'li', tu' ruzxöni ládxa'a-né' Dios, gaca ca na' chigudxé' gubáz lá'ayi queé' neda'. <sup>26</sup> Caní gaca sal-la' run bayudxi gaca ditaj barco ni tu luyú bídxido', ga ni' tsöjca'ana rë'u.

<sup>27</sup> Cate' ni' chigudödi chidá' dza, ate' bö' na' recja ruzéaj barco na' lu nísado' nazí'i le Adriático, idú ladxi' yéla guléquiné' bönni' tuné' dxin lu barco na' chizóa idxín barco gala' tu luyú bidxi. <sup>28</sup> Gula'ru'uné' du lu nísado' na', ate' gula'nöziné' galaj ösa naca ga bidxinté' ga rë' lu nisa. Cate' gudödi barco na' ia'lati'do', gula'ru'uné' du na' leyúbölö, en gula'nöziné' chinaca chinu ösa. <sup>29</sup> Tu' guládxiné' tsöjdín barco na' lu guiöj, que lè ni na', tsölá'a láhuilö que barco gula'ru'uné' lu nísado' tapa guié' zi'i nága'gaca du guié' le tu'zóa dxisö barco lu nisa. Lu yöl-la' ruubi ruguí'isö ládxi'do'gaquié' gula'bözé' tsení'. <sup>30</sup> Ní'irö gulé'ënné' bönni' tuné' dxin lu barco ulu'zxúnnajé' lè'e barco na'. Bulu'zötjé' bárcodo' na' dë lahui barco zxön na' lu nísado'. Guluné' ca té'ënné' ilu'ë ia'lati' zi'tu' guié' zi'i na' naga' du guié' le ruzóa dxisö barco na', le zoa saca' tsölá'a láhuilö. <sup>31</sup> Ní'irö Pablo gudxé' bönni' na' rinná bé'ené' bönni' röjáquié' gudil-la, tsözxön len bönni' na' röjáquié' gudil-la, gunné':

—Channö cabí ulu'gá'ané' bönni' ni lè'e barco ni, bití' gaca uláli'.

<sup>32</sup> Ní'irö bönni' na' röjáquié' gudil-la gula'chúguié' du naga' bárcodo' na', ate' gulu'ë lataj gubixi lu nísado'.

<sup>33</sup> Cate' chizá' rení', Pablo gúta'yué' lógaquié' bi ilahué' yúgu'té'. Gudxé' légaquié':

—Na'a chiguca chidá' dza rubéaj yéla loli', en runli' gubasa, bití' bi náguli'. <sup>34</sup> Que lè ni na', ráta'yua' loli' gáguli' para huóaca ládxi'li', tu' cabí gátili' nituli' libí'ili'.

<sup>35</sup> Cate' Pablo budxi bé'ë didza' ni, gudélé'ë yöta xtila, en gudxé' Dios: "Xclenu'." Caní bené' lógaquié' yúgu'té'. Ní'irö buzxuzxjé' yöta xtila na', en gusí lahué' rahué'. <sup>36</sup> Ní'irö bila'dipa ládxi'gaquié' yúgu'té', en gulahué'. <sup>37</sup> Tscatu' zóatu' lè'e barco na', gúcatu' idú chopá gayuá' yu' tsónnalalaj yu' chizxópatu'. <sup>38</sup> Gudödi gulahué', en bulu'huólané', ní'irö gula'ru'uné' zxoá' xtila dë lè'e barco na' lu nisa, para ulu'lahué' yua' dzö'ö lè'e barco na'.

*Raca ditaj barco lu nísado'*

<sup>39</sup> Cate' chiguca lahui' dza, yugu' bönni' tuné' dxin lu barco na' bití' bulu'únbé'ë luyú na'. Bila'le'ené' ga röjrö' nisa zxön na' gatsaj láhui'lö luyú bidxi na', en dë lataj ni' ga naca lachi' ra' nísado'. Gulé'ënné' iluné' ga tsaza barco na' ga ni'. <sup>40</sup> Ní'irö bulu'sedxé' yugu' du guié' nága'gaca yugu' guié' zi'i tu'zóa dxisö barco na', en bulu'sané' légequi, ate' gula'bixi lu nísado'. Bulu'sedxé' ca' du naga' né'e yaga le ruzecaj ruxí'i barco. Ní'irö bulu'chisé' lari' que le rutubi bö', le zoa tsölá'a láhuilö barco na',

ate' ní'irō gusí lo ridōdi barco saca' ga rōjrō' nísado' gatsaj láchui'lō luyú bidxi na'. <sup>41</sup> Cate' bidxín barco na' tu lataj ga ridzaga chopá nisa, ní binidxi' tsólá'a láchuilō barco na' lu yuzxi lu nísado' na', ate' bugá'anasō barco na' ga ní'. Bítirō guca bi utá le, ate' tsólá'a cúdzi'lō barco na', gusí lo riguitsaj nísado' na' le, len yōl-la' rizá' que. <sup>42</sup> Ní'irō bōnni' rōjáquiē' gudil-la gulē'ēnnē' ilútiē' bōnni' nadzúngaquiē', para cabí ila'zxúnnajē', ila'zxóē' lu nisa na'. <sup>43</sup> Bōnni' na' rinná bé'enē' bōnni' na' rōjáquiē' gudil-la gú'unnē' usólē' Pablo, ate' gunná bé'enē' bōnni' na' rōjáquiē' gudil-la cabí ilunē' ca na' té'ēnnē'. Ní'irō gunná bé'enē' bōnni' taca ila'zxóē' lu nisa, zí'alō légaquiē' ila'yáziē' lu nisa para ila'dxinē' luyú bidxi. <sup>44</sup> Gunná bé'enē' ca' yugu' bōnni' nagá'anagaquiē' ila'zxóē' lu yaga dzō'ō láchuilō barco, en ia'bal-lē' láchuigaca yágado' que barco na'. Caní guca, bulu'lē' yúgu'tē'. Canísō bila'dxinē' luyú bidxi na'.

## 28

### *Le benē' Pablo luyú bidxi nazí'i le Malta*

<sup>1</sup> Cate' chibulatu' yúgu'tētu', gunōztu' luyú bidxi ga na' zóatu' nazí'i le Malta. <sup>2</sup> Bōnni' xidza' nacu'ē luyú bidxi na' lu yōl-la' dxi'i ladxi' quégaquiē' gulunē' netu' bal. Gula'béquiē' guí', ate' bulu'lidzē' netu' yúgu'tētu' iditsē'e cuintu', tu' ralaj guiōj, en runda' ziaga. <sup>3</sup> Ní'irō Pablo gúchē'ē tu tsólén huága zxisi bídxido', en cate' gulu'ē le lu guí', birúajba' tuba' bēla sínia' lē'e huágado', rizxúnnajba' bōchila que guí' na', ate' yōjtí'iniba' yen nē'ē Pablo. <sup>4</sup> Cate' bōnni' xidza' na' bila'lé'enē' bēla na', nála'ba' yen nē'ē Pablo, gulē' tuē' ia'túē':

—Le nácatē bōnni' ni náquiē' nu ruti bōnachi. Sal-la' bulē' lu nísado', dios queēru' lē' Tsahui' bití' ru'ē lē' lataj soē' ibanē'.

<sup>5</sup> Gudxibi nē'ē Pablo, en busládzu'ē-ba' bēla sínia' na'. Yōjxóatēba' lu guí', ate' lē' bití' bi guca queē'. <sup>6</sup> Bōnni' xidza' nacu'ē ní' tu'yúē' Pablo, bátacalō cō'ē gui, o tsó'otē' gátie'. Ní'irō cate' chigudzé' ta'bōzē', en bila'lé'enē' bití' bi raca queē', ia'tú le guléquinē', ate' gula'nnē' naca cazē' tu dios.

<sup>7</sup> Lataj ní'isō dē xiyúē' Publio, bōnni' lo que luyú bidxi na', ate' bōnni' ni benē' netu' bal. Lu yōl-la' dxi'i ladxi' queē' gulu'ē netu' lidxē' idú tsonna dza. <sup>8</sup> Dza na' dē' ré'enē' xuzē' Publio na', yu'ē xilá, en ré'enē' huē' rōn. Guyáziē' Pablo sōjyúē' lē', en gudōdi bulidzē' Dios, ní'irō guxóa nē'ē bōnni' huē' na', en bunē' lē'. <sup>9</sup> Tu' benē' Pablo lē' ni, lē'sca' bila'dxín nupa te'e ga zoē', nacuá' luyú bidxi ní', en bulu'huóáquiē'. <sup>10</sup> Yugu' bōnni' ni gulunē' netu' bal, en zían le gulunē' queētu'. Cate' chizóa uzá'atu' luyú ní', bulu'nōdzjē' yugu' le naquínitu' queētu'.

### *Ridxinē' Pablo luyōdzō Roma*

<sup>11</sup> Cate' chiguca tsonna beo' zóatu' ní', ní'irō gurentu' tu lē'e barco que yōdzō Alejandría, le bugá'ana luyú bidxi na' yugu' beo' ziaga. Barco ní dá'gaca tsólá'a láchuilō budó' yaga léguequi Cástor, en Pólux, dios bilidí' quégaca bōnachi Alejandría na'. <sup>12</sup> Buzá'a barco na' ga ní', ate' bidxín yōdzō Siracusa, ga ní' bugá'anatu' tsonna dza. <sup>13</sup> Buzá'atu' ní', ate' gudōditu' tsólá'alō luyú ní', en bidxintu' yōdzō Regio. Cate' za' rení' ia'tú dza, tu' recja bō' za' saca' ga ridōdi gubidza beo' ziaga, buzá'atu' ní', ate' dza buropi na' bidxintētu' yōdzō Puteoli luyú Italia. <sup>14</sup> Lu yōdzō na' yōjxáca'tu' yugu' bōchí'ru' ta'yéajlē'ē Cristo, ate' guláta'yue' lotu' ugá'analentu' légaquiē' idú xunu' dza. Cate' bizá'a dza na' buzá'atu'

ni' para tséajtu' yödzo Roma, rizé'e ní'atu'. <sup>15</sup> Chibila'yönné' böchi'ru' nacu'ë Roma chizó'a idxintu' ni', ate' bila'rúajé' idixí'gala'gaquié' netu'. Bila'dxiné' tu yödzo' nazi'i le Yé'ëyi Que Apio. Ia'bal-lé' bila'dxiné' tu lataj nazi'i le Tsonna Yu'u Quégaquié' Bönni' Yú'ugaquié' Nöza. Cate' Pablo bilé'ené' légaquié', bidipa ládxe'ë, en gudxe' Dios: "Xclenu'."

<sup>16</sup> Cate' bidxintu' Roma, bönni' na' rinná bé'ené' bönni' röjáquié' gudil-la, guché'ë bönni' na' nadzúngaquié', ate' budödé' légaquié' lu në'ë tu bönni' lo rinná bé'ené' bönni' röjáquié' gudil-la, ate' bë'ë Pablo lataj soé' queézé', zóalené' lé' tu bönni' rejé' gudil-la ruyúé' lé'.

*Runé' Pablo libán lu yödzo Roma*

<sup>17</sup> Cate' chigudödi tsonna dza, bulidzé' Pablo yugu' bönni' lo quégaquié' bönni' judío nacu'ë Roma. Cate' chibulu'dubé' ga na' zoé' Pablo, lé' gudxe' légaquié':

—Libí'ili', böcha'a, sal-la' biti' bi bena' quégaca bönachi ládzaru', en caléga que le nalébiru' runru' ca na' guluné' xuz xtó'oru', yugu' bönni' judío nacu'ë Jerusalén bulu'dödé' neda' lu ná'agaquié' bönni' Roma nacu'ë Jerusalén, ate' bulu'sayjé' neda' lidxi guié'. <sup>18</sup> Ní'irö cate' chigula'nabi yúdxiné' neda' bönni' Roma, gulé'ënné' ulu'sané' neda', tu' gulé'quibe'ené' biti' nabá'ga'a xíguia' gátia'. <sup>19</sup> Yugu' bönni' judío ni' gula'dá'bágué'ë nupa na' gulé'ëni ulu'sán neda', ate' ben bayudxi gunaba' tseja' lahué' César ga uchi'a usöröé' neda', en caléga para uzéguia' bönachi uládz queéru' didza'. <sup>20</sup> Que lé' ni na' bulidza' libí'ili' para ilé'eda' libí'ili', en gü'ílana' libí'ili' didza', tu' ná'ga'a du guié' ni tu' runa' löza le runru' löza rë'u, bönachi Israel, gátaté' lé' na' guzxi' lu në'ë Dios gata' queéru'.

<sup>21</sup> Ní'irö légaquié' gulé' Pablo:

—Biti' ridxini queétu' guichi le za' luyú Judea ca naca lé' na' raca quiu', en cuntu nu ridxini nu naca böchi'ru' judío, nu usiyöni netu' channö nu bi rnné' quiu' le ruá' dö'. <sup>22</sup> Na'a, ré'ënitú' yönitu' xtídz'u, lé' na' riguinnaj icju', tu' chinözitu' ta'nné' bönachi yúgu'té' lataj quégaca nupa nazi' lu në'eguequi xibá cubi ni.

<sup>23</sup> Caní guca, bulu'dxié' bë' tu dza, ate' dza na' bila'dxiné' ziané' ga na' zoé' Pablo. Gusí lahué' Pablo zílado', ate' ni' gúl-li'ni buzéajni'iné' légaquié', en buchila lá'ané' le rinná bë'ë Dios. Gú'unné' uluí'iné' légaquié' naca idüté' li libán runé' queé' Jesús. Para guné' caní buguné' dxin le rinná bë' xibá queé' Moisés, enca' le gula'nné' bönni' gulu'ë didza' uláz queé' Dios. <sup>24</sup> Bal-lé' gula'zí' lu ná'agaquié' didza' bë'ë Pablo, pero ia'bal-lé' biti' ca' gula'yéajlé'ë. <sup>25</sup> Tu' bila'rúajé' choplö, gula'sí lógaquié' tu'zé'ë ni', ate' Pablo gudxe' légaquié', rnné':

—Didza' nácaté' bë'ë Dios Bö' Lá'ayi, lé' na' gunné' Isaías, bönni' bë'ë didza' uláz queé' Dios, ca na' buzéajni'iné' xuz xtó'oru', gunné':

<sup>26</sup> Guyéaj lógaca bönachi ni', yöjödxi légaquié':

Yöni nágali', pero biti' tséajni'ili'.

Uyuli' iná'ali', pero biti' ilé'eli'.

<sup>27</sup> Yugu' bönni' ni chinazidi icja ládxi'do'gaquié',

en biti' bi riyaza icja nágagaquié'.

Guluné' ca tun nupa nachul-la guiój lóguequi

para cabí ila'lé'e len guiój lóguequi,

en cabí ila'yöni nágaguequi

para cabí ulu'zéajni'í ládxi'guequi,

en cabí ilě'eni ulu'huóáca queë' Dios  
para gaca una' léguequi.

<sup>28</sup> Na'a, ral-la' inözili' lě ni. Dios risöl-lě'ë netu' lógaca bönachi izá'a para  
ulu'lágaca, ate' légaquië' ila'yönně'.

<sup>29</sup> Cate' Pablo budxi bě'ë didza' ni, bila'rúajě' bönni' judío, ta'díl-lada'  
dídžě'ë la' légacasě'.

<sup>30</sup> Idú chopá iz bugá'aně' Pablo ni', zoë' tu lu yu'u ga na' riguizxjě', ate'  
beně' bal yúgu'tě nupa buduyúgaca Lě'. <sup>31</sup> Lu yöl-la' rugu ladxi' beně' libán  
ca rinná bě'ë Dios. Busédině' bönachi ca naca queë' Xanru' Jesucristo, ate'  
cuntu nu buzaga' xinözě'. ¡Ca' naca!

## DIDZA' GUSÖL-LË'Ë PABLO YÖDZÖ ROMA

*Pablo rugapë' Dios bönachi queë' Cristo nacu'ë Roma*

<sup>1</sup> Neda', Pablo, naca' bönni' nadó'o queë' Jesucristo, en gubáz queë', tu' bulidzë' Dios neda', en guró cazë' neda' para guna' libán que didza' dxi'a queë'.

<sup>2</sup> Dza ni'te guzxf' lu në'ë Dios isöl-lë'ë didza' dxi'a na' queëru'. Gunnë' caní lu ruá'agaquië' bönni' gulu'ë didza' uláz queë', ate' légaquië' bulu'zúajë' le lu guichi lá'ayi queë' Dios. <sup>3</sup> Bulu'zúajë' lu guichi yúgu'të le ral-la' gunë' Zxi'inë' Dios, Nu na' naca Xanru' Jesucristo. Lu yöl-la' bönachi queë' náquië' zxi'ini xi'sóë' David, <sup>4</sup> pero ca naca bö' naca cazë', le naca lá'ayi, naca bë' náquië' Zxi'inë' Dios, en nápadë'ë yöl-la' huáca. Naca bë' náquië' caní tu' bubanë' lu yöl-la' guti. <sup>5</sup> Ni'a que le benë' Jesucristo ruzí'iru' xibé le ruzá' lãdxë'ë queëru' Dios, ate' benë' ga naca' gubáz queë' para uláz queë' Lë' guna' ga ìla'yéajlë' bönachi idütë yödzölió Lë', en ilún ca rnna xtídzë'ë. <sup>6</sup> Bítali' libí'ili' lãdjugaca bönachi yödzölió na', pero na'a nulidzë' Dios libí'ili' para guéquili' queë' Jesucristo.

<sup>7</sup> Rugapa' Dios libí'ili', yúgu'tëli' zóali' Roma. Dios nadxí'inë' libí'ili', en bulidzë' libí'ili' para gácali' quez queë'. Rinábida'-në' Xúziru' Dios, enca' Xanru' Jesucristo, gunnë' queëli' le ruzá' lãdxë'ë queëru', en le ribequi dxi lãdxi'ru'.

*Rë'ënë' Pablo tsöjyüë' bönachi queë' Cristo nacu'ë Roma*

<sup>8</sup> Lë ni risí lahua' ruzúaja' lu guichi: Tu' néquiru' queë' Jesucristo rea'në' Dios: "Xclenu'" ca naca queëli' yúgu'tëli', ate' ta'guixjö' bönachi idütë yödzölió ca réajlë'ëli' Jesucristo. <sup>9</sup> Idú lãdxa'a runa' xichinë' Dios, runa' libán que didza' dxi'a ca naca queë' Zxi'inë'. Nözinë' Dios rulídzatica'sa'në', en rinábida'-në' gaca tsahui' queëli'. <sup>10</sup> Rinábitica'sida' Dios, channö naca le rë'ënë' Lë', gunnë' neda' lataj uduyúa' libí'ili'. <sup>11</sup> Caní rinábida'-në' tu' raca lãdxa'a ilé'eda' libí'ili' para gaca guna' ga gata' queëli' tu le unödzejë' Dios Bö' Lá'ayi queëli', le gun ga gácali' tsutsu. <sup>12</sup> Lë na' rë'ënda' naca utipa lãdxi'ru' turu' ia'turu', tu' réajlë'ëru' Jesucristo yúgu'tëru'.

<sup>13</sup> Böchi' luzá'ado', rë'ënda' inözili' lë ni. Zían luzuí bë' lãdxa'a guída' ga zóali', pero ga ridxintë na'a biti' runni quia'. Rë'ënda' guída' ga zóali' para guna' ga uzí'ili' xibé libán na' runa', ca na' tu'zì' xibé ia'bal-la bönachi yödzölió ni. <sup>14</sup> Dë le ral-la' guna' quégaca yúgu'të bönachi, quégaca bönachi nazëdagaca, en quégaca bönachi cabí nazëdagaca, quégaca bönachi ta'yéajni'i, en quégaca bönachi cabí ta'yéajni'i. <sup>15</sup> Que lë ni na', tsca gaca guna', zoa' riböza' guna' ca' libán que didza' dxi'a ga ni' zóali' libí'ili', zóali' Roma.

*Yöl-la' huáca zxon que didza' dxi'a*

<sup>16</sup> Biti' ca' rutuí'ida' runa' libán que didza' dxi'a, tu' napa yöl-la' huáca queë' Dios para gun ga ulu'lágaca yúgu'të nupa ta'yéajlë' le. Ga risí lo, rë'ënë' Dios ìla'yönnë' bönni' judío le, ate' tödi na' ìla'yöni ca' bönachi izá'a. <sup>17</sup> Didza' dxi'a ni rulu'i rë'u gunë' Dios ga huóácaru' tsahui', channö uyéajlë'ëru' Lë', en biti' gaca chopa lãdxi'ru'. Ca naca lë ni nazúaj ca' lu guichi lá'ayi, rnna: "Nu naca tsahui' tu' réajlë' Dios, gata' yöl-la' na'bán que nu na'."

*Xíguia' nabága'gaca bönachi*

<sup>18</sup> Dios, Nu zoa yehua' yubá, bulu'e lahui biti' rilé'ené' dxi'a yúgu'tè le ruá' dö', en le cabí naca tsahui' tun bönachi. Guné' xíguia' yugu' bönni' na', lu yöl-la' biti' naca tsahui' quégaquié' ta'dá'baguë'è le naca iduté li. <sup>19</sup> Caní gaca quégaquié' tu' nalá' lahui lógaca yúgu'tè bönachi le naca bé' zoa cazé' Dios, tu' bulufi' quéziné' Dios lè ni ga na' nacu'è. <sup>20</sup> Dza ni'te cate' si' guta' yödzölió, ga ridxintè na'a dza, yugu' le nuné' Dios nácagaca bé' le cabí gaca ilé'eru' queé' Dios, ca naca yöl-la' huáca idú queé', en le naca cazé' Dios. Que lè ni na', biti' gaca ila'nné' biti' nabága'gaquié' xíguia'. <sup>21</sup> Cate' ni' gulúnbé'è Dios, biti' gula'yéaj ládxi'gaquié' Lè' ca ral-la' tseaj ládxi'ru'-né' Dios, en biti' gulé' Lè': "Xclenu'." Que lè ni na', cá'asö böáca le gula'zá' ládxi'gaquié', ate' gula'chul-la gula'nitié' tu' nazidi icja ládxi'do'gaquié'. <sup>22</sup> Sal-la' guléquiné' ta'yéajni'iné' yenni', bulu'huóáquié' bönni' biti' bi nözguequiné' <sup>23</sup> tu' bulu'cá'ané' yöl-la' bení' queé' Dios Nu zóatica'sö, ate' gula'yéaj ládxi'gaquié' budó' guiöj budó' yaga, budó' na' nácagaca ca yugu' bönni' tati cazé', en ca yugu' böa'do' zoa xiligacaba', en ca yugu' böa' guixi' ta'daba' lu yu, en ca yugu' böa' bëla tá'ayöj lè'ëba' lu yu ni.

<sup>24</sup> Que lè ni na' Dios guléaj ládxi'gaquié' légaquié' para iluné' yugu' le ta'zè ládxi'gaquié' le ruá' dö', ate' caní guca, bulu'cá'ana cuíngaquié' lu yöl-la' stu' tué' len ia'tué'. <sup>25</sup> Guca caní tu' bulu'cá'ané' xtídzé'è Dios, le naca iduté li, ate' gula'zí' lu ná'agaquié' tu le cabí nácate. Guluné' bal, en gula'yéaj ládxi'gaquié' yugu' le bené' Dios, en caléga Lè' cazé' Dios, Nu na' ral-la' gácatca'sö queé' yöl-la' ba. ¡Ca' gaca!

<sup>26</sup> Que lè ni na' Dios guléaj ládxi'gaquié' légaquié' para iluné' yugu' le ta'zè ládxi'gaquié' le ruá' dö'. Yugu' nigula bulu'cá'anenu yöl-la' rizóalen bönni', para ilunnu le ruá' dö'. <sup>27</sup> Lésca' caní guluné' yugu' bönni' biguiú', bulu'cá'ané' yöl-la' rizóalen nigula, ate' gula'zè ládxi'gaquié' le ruá' dö' túnlené' tué' ia'tué', en guluné' le tun ga nu rutuí', tu' gula'cuá'lené' la' luzá'a bönni'gacasé'. Que lè ni na' gula'gui'i gula'zá'quié' lu xipéla'gaquié' yugu' bönni' guluné' caní tu' bubí'è Dios quégaquié' ca sa'yéaj dul-la' na' guluné' tu' nucá'anagaquié' Dios.

<sup>28</sup> Tu' cabí gulé'enné' iluné' Dios bal, que lè ni na' guléaj ládxi'gaquié' légaquié' para ila'zá' ládxi'gaquié' le biti' naca dxi'a, en iluné' le cabí nazaca'.

<sup>29</sup> Túntica'sé' yúgu'tè le cabí naca tsahui', en yugu' le naca stu'.

Tuné' le ruá' dö', en tu'huídi'né'.

Biti' ta'lé'ené' dxi'a luzá'agaquié', en tu'zxé'ené' luzá'agaquié'.

Tutié' luzá'agaquié', en ta'díl-lalené' luzá'agaquié'.

Ta'zí' yé'ené' bönachi, en zi'tè nácagaquié' xihui'.

Ta'nné' que luzá'agaquié'.

<sup>30</sup> Ta'nné' le cabí nácate que luzá'agaquié'.

Biti' ta'lé'ené' Dios dxi'a, en nácagaquié' bönni' bizxaj.

Tun cuíngaquié' lo, en tun ba zxön cuíngaquié'.

Ta'guiljé' le ruá' dö' iluné', en ta'dá'baguë'è xuz xiná'agaquié'.

<sup>31</sup> Nácagaquié' bönni' biti' ta'yéajni'iné', en tun díjtjagaquié' xtídzagaquié'.

Biti' nácagaquié' dxi'i ládxi' ca ral-la' ilácagaquié'.

Biti' tu'niti lahué' luzá'agaquié'.

Biti' tu'huechi' ládxi'gaquié' luzá'agaquié'.



<sup>32</sup> Nözguequi quéziné' le nuzöë tsaz Dios ca ral-la' gaca quégaca nupa tun yugu' le caní, ilátigaca tsaz. Sal-la' nöziguequiné' lè ni, calégasö caní tuné', pero ta'yaza ládxi'gaquié' nupa tun ca' caní.

## 2

### *Naca tsahui' ichúguié' Dios quégaca bönachi gátigaca*

<sup>1</sup> Que lè ni na', bití' gaca ubéaj tsahui' cuinu', núti'tès nu nacu', richugu bē'u luzó'o. Cate' richugu bē'u luzó'o, rusubaga' cuinu' xíguia', tu' richugu bē'u luzó'o, en lësca' runu' li'. <sup>2</sup> Nöz quéziru' ca ruchi'a rusöröë' Dios. Naca idütè li ca ruchi'a rusöröë' nupa tun le ruá' dö'. <sup>3</sup> Li' richugu bē'u nupa tun le ruá' dö', en tuz ca runu' li'. ¿Naru' réquitsenu' uló' li' cate' uchi'a usöröë' Dios? <sup>4</sup> ¿Naru' rucá'angatso' cá'asö yöl-la' dxi'i ladxí' idú queë' Dios, en yöl-la' riböza zxön ladxí' queë', en ca runé', ridzené' para lené' li'? ¿Naru' cabí nöz quézinu' ruzá' ládxe'ë Dios quiu' yöl-la' dxi'i ladxí' queë' para guné' ga ubí'i ládxi'u'u? <sup>5</sup> Lu yöl-la' ládxi'do' zidi quiu' bití' rubí'i ládxi'u'u. Que lè ni na' rusubaga' cuinu' xíguia' guné' Dios li' cate' uchi'a usöröë' bönachi, ate' gaca bē' naca ca ral-la' guné' Dios cate' ichúguié' quégaca bönachi ilátigaca. <sup>6</sup> La' dza ní'isö ubí'i cazé' Dios que queë' bönni' tscá naca le guluné' tu tué'. <sup>7</sup> Unödzejé' yöl-la' na'bán idú quégaca nupa túntica'sö le naca dxi'a, tu' tuí'i ládxi'gaquié' ulu'zi'ë xibé' Dios, en ulu'rúajé' dxi'a lahué' Lè, en ila'cuá'tica'sè'. <sup>8</sup> Lu yöl-la' rilé queë', Dios guné' xíguia' nupa ta'dá'baga', en bití' té'ëni ilún ca rna le naca idütè li, pero tun ca rna le cabí naca tsahui'. <sup>9</sup> Ila'guí'i ila'záquié', en huí'nida' ládxe'ë yúgu'tè bönni' tuné' le ruá' dö'. Ga risí lo gaca caní quégaca bönachi judío, en gaca ca' caní quégaca bönachi izá'a. <sup>10</sup> Dios guné' ga ilácagaquié' bica' ba, en guné' légaquié' bal, en gu'é le cuéqui dxi ládxi'gaquié' yúgu'tè bönni' tuné' le naca tsahui'. Ga risí lo guné' caní quégaca bönachi judío, en guné' ca' caní quégaca bönachi izá'a.

<sup>11</sup> Caní uchi'a usöröë' Dios bönachi, ate' Lè' bití' runé' bal le ta'nnasö bönachi. <sup>12</sup> Yúgu'tè bönni' na' bití' bila'yönné' le rinná bē' xibá queë' Dios, en guluné' dul-la', lësca' ilátié', sal-la' bití' téquibe'ené' gula'dá'baguë'ë le rinná bē' xibá na', ate' yúgu'tè bönni' bila'yönné' le rinná bē' xibá queë' Dios, en guluné' dul-la', Lè' uchi'a usöröë' légaquié' ca naca le rinná bē' xibá na'. <sup>13</sup> Caní gaca, tu' cabí nácagaquié' tsahui' lahué' Dios yugu' bönni' ta'yónisè' xibá queë', pero ulu'huóaca tsahui' lahué' Lè' yugu' bönni' tuné' ca rna xibá queë'. <sup>14</sup> Bönni' na' bití' nácagaquié' judío, en bití' bila'yönné' le rinná bē' xibá queë' Dios, pero tun cazé' ca rinná bē' xibá queë' na', bönni' ni, sal-la' bití' bila'yönné' le rinná bē' xibá queë' Dios, zóalen légaquié' tu xibá le nuzóë' Dios icja ládxi'do'gaquié'. <sup>15</sup> Nupa ni tu'luf'i lahué' le run xibá na' nazúaj lu icja ládxi'do'gaquié'. Le yu'u icja ládxi'do'gaquié' naca bē' naca caní. Ca ta'zá' ládxi'gaquié', tu'zéguié' luzá'agaquié' didza', o tu'béaj tsahui' luzá'agaquié' tué' ia'tué'. <sup>16</sup> Caní ubi'ë Dios quégacaquié' dza ní' uchi'a usöröë' lu na' Jesucristo yugu' le núnagaquié', en le gula'zá' ládxi'gaquié' yúgu'té'. Caní rusèdi didza' dxi'a runa' libán que.

### *Yugu' bönni' judío, en xibá queë' Dios*

<sup>17</sup> Núlöli' rnnali' nácali' judío, en ruzxöni ládxi'li' xibá queë' Dios, en run ba zxön cuinli' tu' núnbè'ëli'-né' Dios, <sup>18</sup> nöz quézili' le ré'ëné' Dios gunli', en le rusèdi libí'ili' xibá queë', en réquibe'eli' le nácaterö dxi'a. <sup>19</sup> Réquili'

gaca ulu'ili' nöza dxi'a nupa ta'dá ga yúbölö ca nu nachul-la lahui, en gaca uzéajni'ili' nupa nachul-la nanítigaca. <sup>20</sup> Réquili' gaca usédili' nupa biti' ta'yéajni'i, en nupa ta'yéajni'i láti'do'os, tu' dë lu ná'ali' xibá queë' Dios le rusédi bönachi ca naca yöl-la' réajni'i idú, en le naca idútë li. <sup>21</sup> Na'a, libí'ili' rusédili' ia'zica'rö bönachi. ¿Naru' cabí ral-la' usédi cuinli'? Libí'ili' rnnali': "Biti' cuanu'." ¿Naru' ribántsali' libí'ili'? <sup>22</sup> Rnnali' ca': "Biti' gunu' dul-la' le riguitsaj xibá que yöl-la' nutsaga na'." ¿Naru' rúntsali' libí'ili' dul-la' le riguitsaj xibá que yöl-la' nutsaga na'? Libí'ili' biti' rilé'eli' dxi'a yugu' budó' guiöj budó' yaga. ¿Naru' ribántsali' le dzö'ö lu yudo' queguequi? <sup>23</sup> Run ba zxön cuinli' tu' dë lu ná'ali' xibá queë' Dios. ¿Naru' rucá'anatsali' Dios cá'asö, en riguitsjali' xibá le gunná bë'ë Lë'? <sup>24</sup> Nazúaj lu guichi lá'ayi ca runli', rna: Ni'a que le runli' libí'ili' nupa biti' nácgaca judío ta'nnë zi' queë' Dios.

<sup>25</sup> Le nácatë ruzi'u xibé lë na' narugu lu xipëlu'u le naca bë' nazi' lu ná'ali' xibá queë' Dios channö runu' ca rinná bë' xibá na' queë' Dios, pero channö riguitsju' xibá le gunná bë'ë Lë', nuhuóacu' ca tu bönni' biti' néquinë' queë' Dios. <sup>26</sup> Que lë ni na', channö zoë' tu bönni' biti' narugu lu xipëlé'ë lë na' naca bë' nu nazi'i xibá queë' Dios, pero runë' idútë ca rinná bë' xibá queë' Lë', bönni' ni náquië' lahuë' Dios ca tu bönni' narugu caz lu xipëlé'ë lë na' naca bë' sal-la' biti' narugu lu xipëla' cazë'. <sup>27</sup> Bönni' na' biti' narugu lu xipëlé'ë lë na' naca bë' nu nazi'i xibá queë' Dios, pero runë' idú ca rinná bë' xibá na' queë' Dios, ca runë' bönni' ni rulu'i nabága'li' libí'ili' xíguia', sal-la' dë lu ná'ali' xibá na' queë' Dios, en narugu lu xipëla'li' lë na' naca bë' nazi' lu ná'ali' xibá na' queë' Dios, pero biti' runli' ca rinná bë' xibá queë' na'. <sup>28</sup> Biti' náquië' idú bönni' judío tu bönni' nácasë' caní lu yöl-la' bönáchisö queë', ate' biti' naca idú lë na' naca bë' le narúgusö lu xipëlé'ë nu bönni'. <sup>29</sup> Náquië' idú bönni' judío bönni' na' náquië' caní lu icja ládxi'da'ahuë', en le naca idú le narugu lu xipëlé'ë nu bönni' le naca bë' nu nazi'i xibá queë' Dios, naca tu le yu'u icja ládxi'do'gaca bönachi. Naca que bö' naca cázaru', en calëga que yöl-la' bönáchisö queëru'. Nu bönni' náquië' caní, biti' tun bönachi lë' bal, pero Dios caz gunë' lë' bal.

### 3

<sup>1</sup> Channö caní naca, ¿bizxi ruzi'tsë' xibé tu bönni' tu' náquië' judío? ¿Bizxi ruzi'ë xibé tu bönni' judío tu' narugu lu xipëlé'ë? <sup>2</sup> Yenni' ruzi'ë xibé, en zían ca ruzi'ë xibé. Le nácatë'rö lo, Dios gulu'ë lu ná'agaquië' yugu' bönni' judío didza' lá'ayi queë'. <sup>3</sup> Bal-lë' biti' ta'yéajlë'ë Dios. ¿Naru' réquitsenu' biti' gunë' Dios ca rna xtídzë'ë tu' cabí ta'yéajlë'ë Lë'? <sup>4</sup> ¡Biti' ca' gaca! Ral-la' guéquibe'eru' rúntica'së' Dios ca rna didza' bë'ë, sal-la' ta'zi' yë' yúgu'të bönachi. Ca naca queë' nazúaj lu guichi lá'ayi le rna:

Gaca bë' nacu' tsahui' ni'a que didza' ru'u,  
en uruju' tsahui' channö nu uchi'a usörö Li'.

<sup>5</sup> Cate' runru' le ruá' dö', Dios rnnë' biti' naca tsahui' le runru'. Lë ni naca bë' tsahui' náquië' Dios. Nacuá' nupa ta'nná: "Le cabí naca tsahui' le runru' naca bë' náquië' Dios tsahui', ate' que lë ni na' biti' ral-la' gunë' rë'u xíguia'." <sup>6</sup> ¡Biti' ca' naca caní! La'tu' ruzi'ë xibé Dios le ruá' dö' runru', ¿naxi caz gaca uchi'a usörë' bönachi yödzölió ni'?

<sup>7</sup> Cate' nu rizi' yë', Dios rnnë' biti' ruí' didza' nu na' ca runë' Lë'. Lë ni naca bë' naca idútë li didza' ru'ë Dios. Ta'nnë' bönni' le ta'zi' yë'ë légaquië' run ga gaca queë' Dios yöl-la' ba, ate' biti' ral-la' ichúguië' quégaquië', cabí

inně' nácagaquiě' bönni' dul-la'. <sup>8</sup> ¿Naru' huannátsaru': "Guá'aru' dö' para gaca le naca dxi'a"? Nupa na' ta'nně zi' queěru' ta'nná rusédiru' caní, ate' tsahui' naca ichúguiě' Dios queéqueui.

*Yúgu'těru' nabága'ru' dul-la'*

<sup>9</sup> ¿Bizxi caz innaru' na'a? Ca naca queětu' netu', bönni' judío, ¿nácárotu' tsahui' ca ia'zica'rö bönachi? ¡Biti' ca' nácatu'! Chibulu'a ni, nabága'gaca dul-la' bönachi judío, ate' nabága'gaca ca' dul-la' bönachi izá'a. ¡Yúgu'tě' nabága'gaquiě' dul-la'! <sup>10</sup> Nazúaj lu guichi lá'ayi le rnna:

Cuntu nu zoa naca tsahui', cuntu nu caz.

<sup>11</sup> Cuntu nu réajni'.

Cuntu nu riguilaj Dios.

<sup>12</sup> Yúgu'tě' ta'dě' ga yúbölö.

Yúgu'tě' nanítigaquiě'.

Cuntu nu run le naca dxi'a, cuntu nu caz.

<sup>13</sup> Lubá'agaquiě' nácagaca ca yeru ba nayáljagaca.

Len yöl-la' rinněsö queégaquiě' ta'zi' yé'eně' luzá'agaquiě'.

Didza' rirúaj ruá'agaquiě' naca ca le yudzu láya'ba' bēla sínia'.

<sup>14</sup> Len yugu' didza' tu'ě, tu'didza' yúdxiné' bönachi,

en ta'nně zi'ě queéga bönachi na'.

<sup>15</sup> Nacu'ě sina' tútigaquiě' bönachi.

<sup>16</sup> Gátitěs ga ta'dödě' tu'sunítie', en tu'saca' zi'ě luzá'agaquiě'.

<sup>17</sup> Biti' ta'zéqui'ně' ila'bözě' dxí'ado'.

<sup>18</sup> Biti' ca' tádxiné' Dios.

<sup>19</sup> Nöziru' yúgu'tě didza' ni bē'ě Dios, rě' yugu' bönni' na' dē lu ná'agaquiě' xibá queě'. Que lě ni na' cuntu nu gaca inná bití' nabaga' dul-la', ate' yúgu'tě bönachi idútě yödžolió, uchi'a usöröě' Dios queéqueui.

<sup>20</sup> Tu'í ládxi'gaquiě' yugu' bönni' judío iluně' yugu' le rinná bē' xibá queě' Dios para ulu'huóáquiě' tsahui', pero cuntu nu huóáca tsahui' caní, tu' nuzóě' Dios xibá queě' para queéqueibe'ru' nabága'ru' dul-la'.

*Uláru' tu' réajlě'ěru' Jesucristo*

<sup>21</sup> Na'a, chibulu'í lahui ca gaca huóácaru' tsahui' lahuě' Dios. Biti' gaca huóácaru' tsahui' tu' runru' ca rinná bē' xibá queě' Dios, sal-la' lu xibá queě' na', en lu guichi lá'ayi ga nazúajgaca le gula'nně' bönni' gulu'ě didza' uláz queě' Dios, ru'í didza' ca gaca huóácaru' tsahui'. <sup>22</sup> Dios caz runě' ga huóácaru' tsahui' tu' réajlě'ěru' Jesucristo, ate' guně' ga ulu'huóáca tsahui' yúgu'tě nupa ila'yéajlě' Lě'. Tuz ca nácagaca yúgu'tě bönachi <sup>23</sup> tu' núnagaquiě' yúgu'tě' dul-la', en bití' ca' nácagaquiě' tsahui' ca na' náquiě' Dios idú tsahui'. <sup>24</sup> Dios ruzá' ládxi'ě queěru', en nunsě' rě'u tsahui' tu' böá'uě' Jesucristo rě'u. <sup>25</sup> Dios budödě' Jesucristo uláz queěru'. Lě' bulaljě' xichöně', le rigúa dul-la', lě na' uzí'iru' xibé channö uyéajlě'ěru' Lě'. Caní beně' Dios para gaca bē' náquiě' tsahui' Lě' sal-la' lu yöl-la' riböza zxön ladxi' queě' budódisě' cá'asö yugu' dul-la' benru' dza ni'te. <sup>26</sup> Caní beně' Dios, bulu'í cuině' tsahui' dza ni zóaru' na'a, ate' rugá'aně' tsahui' sal-la' rugúě' dul-la' nabága'gaca bönachi, runě' ga tu'huóáca tsahui' nupa ta'yéajlě' Cristo.

<sup>27</sup> ¿Naru' huáčatsö gun ba zxön cuinru' ca naca queěru'? ¡Biti' ca' gácaru'! ¿Bizx que na'? Naca tu' nuláru', calěga tu' runru' ca rinná bē' xibá queě' Dios, pero tu' réajlě'ěsiru' Jesucristo. <sup>28</sup> Na'a, rusáca'ru' queěru'

nuhuóáquië' tsahui' tu bönni' tu' réajlë'ë Jesucristo, en calëga tu' runë' ca rinná bë' xibá queë' Dios.

<sup>29</sup> Ca naca Dios, ¿náquië' Dios quégacasö bönnachi judío? ¿Naru' cabí náquië' ca' Dios quégaca bönnachi izá'a? Õn, náquië' ca' Dios quégaca bönnachi izá'a na' <sup>30</sup> tu' zoa Tuz Nu naca Dios. Dios ni gunë' ga ulu'huóáquië' tsahui' yugu' bönni' judío tu' ta'yéajlë'ë Jesucristo, yugu' bönni' na' narugu lu xipëla'gaquië' lë na' naca bë' nu nequi queë' Dios, en lësca' caní gunë' ga ulu'huóáquië' tsahui' yugu' bönni' zi'tu' tu' ta'yéajlë'ë Jesucristo, en biti' narugu lu xipëla'gaquië' lë na' naca bë'. <sup>31</sup> Na'a, channö nuláru' tu' réajlë'ësiru' Jesucristo, ¿ba nagá'ana cá'asö xibá queë' Dios? ¡Biti' ca' naca ca', pero nagá'anarö tsutsu xibá queë' na'!

## 4

### *Le benë' Abraham rusedi rë'u*

<sup>1</sup> ¿Bizxi caz innaru' na'a? ¿Bizxi bidéli'në' Abraham, xuz xtó'otu' netu', nácatu' judío? <sup>2</sup> La'tu' böáquië' tsahui' Abraham tu' zoa le ben cazë' lë', gunna gun ba zxon cuinë', pero calëga lahuë' Dios. <sup>3</sup> Ca naca lë ni nazúaj lu guichi lá'ayi, le rnna: "Abraham guyéajlë'ë Dios, ate' que lë ni na' Dios benë' ga böáquië' tsahui' lahuë' Lë'." <sup>4</sup> Channö zoa nu bönni' runë' xichinru', le riguíxjaru'-në' biti' naca tu le ruzá ládxi'ru' queë', pero naca tu le ral-la'ru' queë' bönni' na'. <sup>5</sup> Lësca' caní channö tu bönni' réajlë'ë Dios, sal-la' biti' bi dxin benë' bönni' na', Dios, Nu run ga ulu'huóáca tsahui' bönnachi biti' nácagaca tsahui', rnnë' náquië' tsahui' lahuë' Lë' bönni' na', tu' réajlë'ë Lë'. <sup>6</sup> Lësca' caní bë'ë didza' David ca náquië' bica' ba bönni', Dios rnnë' náquië' tsahui' sal-la' biti' bi dxin nunë' bönni' na'. <sup>7</sup> Caní gunné' David:

¡Bica' ba bönni' na' Dios runiti lahuë' le biti' naca tsahui' nunë', en rugüë' yugu' dul-la' nabáguë'ë!

<sup>8</sup> ¡Bica' ba bönni' na', Dios biti' rusbáguë'ë lë' xíguia' tu' nözi dul-la' benë' bönni' na'!

<sup>9</sup> ¿Naru' nácagacsë' bica' ba bönni' narugu lu xipëla'gaquië' lë na' naca bë', o nácagaca ca' caní nupa na' cabí narugu lë na' lu xipëla'gaquië' Chigunná cázaru' böáquië' Abraham tsahui' lahuë' Dios tu' guyéajlë'ë Lë'.

<sup>10</sup> ¿Bátaxi böáquië' tsahui' caní Abraham? ¿Naru' guca cate' ni' chinarugu lu xipëlé'ë lë na' naca bë', o guca zí'alö? Biti' guca cate' chinarugu lu xipëlé'ë, pero zí'alö guca. <sup>11</sup> Abraham guyéajlë'ë Dios cate' ni' biti' narúguni lu xipëlé'ë lë na' naca bë'. Gudödi na' gurugu lu xipëlé'ë lë na' naca bë', le rulu'isö chinuhuóáquië' tsahui' lahuë' Dios. Guca caní para gáquië' Abraham ca xúzgaquië' yugu' bönni' ila'yéajlë'ë Dios sal-la' biti' narugu lu xipëla'gaquië' lë na' naca bë'. Tu' ta'yéajlë'ë Dios, huáca innë' Dios nácagaquië' tsahui' lahuë' Lë'. <sup>12</sup> Náquië' Abraham xuz xtó'ogaquië' yugu' bönni' judío ta'yéajlë'ë Dios. Calégasö náquië' xúzgaquië' bönni' na' narugu lu xipëla'gaquië' lë na' naca bë', pero lësca' náquië' xúzgaquië' bönni' na' tunë' ca benë' Abraham, ta'yéajlë'ë Dios ca na' benë' Abraham cate' ni' biti' narúguni lu xipëlé'ë lë na'.

### *Le guzxi' lu në'ë Dios gata' queëru' tu' réajlë'ëru' Lë'*

<sup>13</sup> Guzxi' lu në'ë Dios bi unödzejë' queë' Abraham, en quégaca zxi'ini xi'sóë', gata' quégaquië' la' yödzölió nisö. Gaca caní, calëga tu' tunë' ca rinná bë' xibá queë' Dios, pero tu' nuhuóácagaquië' tsahui' lahuë' Lë' tu' ta'yéajlë'ë Lë'. <sup>14</sup> La'tu' gata' yödzölió ni quégacasö nupa tun ca rinná bë'

xibá queë' Dios, biti' gun bayudxi nu tséajlë' Lë', ate' nítisö gaca le guzxí' lu në'ë Dios. <sup>15</sup> Rulu'í xibá queë' Dios ré'u nabága'ru' xíguia', le run ga ichúguië' Dios queëru' gátiru'. Ga ni' biti' ridxini xibá queë' na', biti' gaca ila'dá'baga' bönachi le rinná bë' xibá na'.

<sup>16</sup> Que lë ni na' uzí'iru' xibé le guzxí' lu në'ë Dios tu' réajlë'ëru' Lë', para gaca bë' naca tu le ruzá' ládxe'ë queëru'. Caní naca, para gaca bë'da' gata' quéguequi yúgu'të zxi'ini xi'sóë' Abraham lë na' guzxí' lu në'ë Dios, calégasö quégaquië' bönni' na' dë lu ná'agaquië' xibá queë' Dios, pero lësca' quégaca nupa ta'yéajlë' Dios ca na' guyéajlë'ë Abraham Dios. Abraham na' náquië' ca xuz xtó'oru' yúgu'tëru' ré'u, réajlë'ëru'-në' Dios. <sup>17</sup> Caní náquië' ca na' nazúaj lu guichi lá'ayi, le rnna: "Nuzóa' li' ca xúzgaca bönachi idütë yödzülió."

Caní naca, lahuë' Dios, Nu na' guyéajlë'ë Abraham, náquië' xuz gudödi queëru' yúgu'tëru'. Dios ni rusubanë' nupa chinátigaca, en ru'ë didza' que nu biti' zuíni tsa chizóca caz nu na' biti' zuíni.

<sup>18</sup> Caní naca tu' gudxe' Dios Abraham na': "Ziántërö ila'cuá' zxi'ini xi'sú'." Abraham guyéajlë'ë Dios, en benë' löza lë na' guzxí' lu në'ë Dios, sal-la' biti' guca ilë'enë' lë na' runë' löza, ate' caní guca, bidéli'në' náquië' xúzgaca bönachi idütë yödzülió. <sup>19</sup> Biti' guca Abraham chopa ládxe'ë ca na' réajlë'ë Dios, sal-la' chiyu'ë ca tu gayuá' iz, en yöjnenë' ca naca que le naca cazë', chinati caz tu' chinagúlädë'ë, enca' ca naca queënu Sara queë', nácanu nigula huödx. <sup>20</sup> Biti' guca chopa ládxe'ë, en biti' gúquië' tu' caréajlë' ca naca le guzxí' lu në'ë Dios gunë' queë', pero bidipa ládxe'ë tu' guyéajlë'ë Dios, ate' gulu'ë Dios yöl-la' ba. <sup>21</sup> Idú ládxe'ë benë' löza Dios, napë' yöl-la' huáca gunë' idütë lë na' guzxí' lu në'ë. <sup>22</sup> Que lë ni na', tu' guyéajlë'ë Abraham Dios, Dios buzóë' queë' náquië' tsahui'.

<sup>23</sup> Nazúaj lu guichi lá'ayi le rnna: "Dios buzóë' queë' náquië' tsahui'." Nazúaj lu guichi caní, calégasö para uzi'ë xibé Abraham, <sup>24</sup> pero para uzí'iru' xibé ca' ré'u. Ré'u ni, Dios gunë' ga huóácaru' tsahui' lahuë' Lë' channö uyéajlë'ëru' Lë', busubanë' Xanru' Jesús lu yöl-la' guti. <sup>25</sup> Jesús na', Dios budödë' Lë' para gútië' tu' nözi dul-la' nabága'ru', ate' busubanë' Lë' lu yöl-la' guti, para gaca gunë' ga huóácaru' tsahui' lahuë' Lë'.

## 5

### *Le rata' queëru' tu' rnnë' Dios nuhuóácaru' tsahui'*

<sup>1</sup> Na'a, rnnë' Dios nuhuóácaru' tsahui' lahuë' Lë' ni'a que le benë' Xanru' Jesucristo, channö réajlë'ëru' Lë', ate' que lë ni na' nuhuóácaru' tuz len Lë'. <sup>2</sup> Tu' réajlë'ëru' Jesucristo, ruzí'iru' xibé le ruzá' ládxe'ë Dios queëru', le rutipa ládxi'ru'. Rudzéjaru' tu' runru' löza uzí'iru' ca' xibé yöl-la' zxön queë' Dios. <sup>3</sup> Calégasö caní rudzéjaru', pero rudzéjaru' ca' cate' riguí' rizáca'ru', tu' chinöziru' le riguí' rizáca'ru' rusedi ré'u cözaru' zxön ladxi'. <sup>4</sup> Cate' ribözaru' zxön ladxi' rurúajru' tsahui' lahuë' Dios, en cate' chinurúajru' tsahui' runru' löza Lë' gácalen cazë' ré'u. <sup>5</sup> Cate' runru' löza Lë', biti' ca' raca chopa ládxi'ru'. Caní naca, tu' nuhuólaj nudzë' icja ládxi'do'oru' yöl-la' nadxi' queë' Dios ré'u. Runë' Dios Bö' Lá'ayi, Bönni' gusól-lë'ë Dios queëru' ga raca caní.

<sup>6</sup> Cate' ni' biti' ca' guca uláru' rácasö queëru', cate' gúla'rö dza queë', Cristo gútië' uláz queëru', ni' nácaru' bönachi dul-la'. <sup>7</sup> Cuntu nu guë'ëni gati uláz queë' tu' bönni' tsahui'. Nadxi ca' nu urugui gati uláz queë' tu' bönni' náquië' idú dxi'a. <sup>8</sup> Dios rulu'inë' ré'u ca nadxi'ide'enë' ré'u, tu'

gútië' Cristo uláz queëru' cate' ni' nácaru' bönni' dul-la'. <sup>9</sup> Chinuhuóácaru' tsahui' lahuë' Dios tu' bulaljë' Cristo xichönë', gútië' uláz queëru'. Que lê ni na' chinácada' löza usólë' Lë' rë'u lu dza ichúguië' Dios quégaca bönachi dul-la' gátigaca. <sup>10</sup> Cate' ni' biti' rilé'ru'-në' Dios dxi'a, gútië' Zxí'inë' Dios uláz queëru' para huóácaru' tuz len Lë'. Na'a, tu' zoë' nabanë', en chinuhuóácaru' tuz len Lë', chinácada' löza uláru'. <sup>11</sup> Rudzéjaru' lahuë' Dios ni'a que le benë' Xanru' Jesucristo, tu' nuhuóácaru' tuz len Dios ni'a que lê na' benë' Lë'.

*Le benë' Adán, en le benë' Cristo*

<sup>12</sup> Guyú'u dul-la' yödzülió ni tu' nözi le benë' tuzë' bönni', ate' tu' benë' dul-la', guyú'u ca' yöl-la' guti. Que lê ni na' ilátigaca yúgu'të bönachi tu' nabága'gaca yúgu'të bönachi dul-la'. <sup>13</sup> Zí'atëlö ga bidxintë xibá queë' Dios, gulún bönachi yödzülió ni dul-la', pero biti' busubáguë'ë Dios bönachi na' xíguia' ca nupa ta'dá'baga' xibá queë' tu' nözi dul-la' na', tu' biti' ridxini xibá queë' quégaquië'. <sup>14</sup> Ga gudela' zoë' Adán ga bidxintë zoë' Moisés gulati yúgu'të bönachi tu' gula'baga' dul-la', sal-la' biti' gula'dá'baga' tu le gunná bë'ë Dios ca benë' Adán. Náca'gaca yúgu'të bönachi tuz len Adán tu' náca'gaca zxi'ini xi'sóë'. Lë ni rulu'i rë'u ca ilaca tuz len Cristo yúgu'të nupa ila'yéajlë' Lë'.

<sup>15</sup> Le rúnнасë' queëru' Dios biti' naca ca le guca queëru' tu' nözi dul-la' benë' Adán. Tu' nözi dul-la' benë' tuzë' bönni', ilátigaca yúgu'të bönachi. Dxi'atë'rö naca le ruzá' ládxë'ë queëru' Dios, en le rúnнасë' queëru'. Ruzá' ládxë'ë queëru' lê ni ni'a que le benë' yetuzë' Bönni', Jesucristo. <sup>16</sup> Le rúnнасë' Dios queëru' biti' naca ca le guca queëru' tu' nözi dul-la' na' benë' tuzë' bönni' na'. Le guchúguië' Dios queë' Adán gátie' tu' nözi dul-la' na' benë', guchúguië' ca' Dios quégaca yúgu'të bönachi gátigaca. Le rúnнасë' Dios queëru' naca para huóácaru' tsahui' lahuë' Lë' sal-la' nabága'ru' dul-la' zían. <sup>17</sup> Guyú'u yöl-la' guti tu' nözi dul-la' benë' tuzë' bönni'. Nácatë'rö löza ila'deli' yöl-la' na'bán nupa ulu'huóáca tsahui' lahuë' Dios tu' zoa le ruzá' ládxë'ë queëru' Dios ni'a que le benë' yetuzë' Bönni', Jesucristo.

<sup>18</sup> Dios guchúguië' quégaca yúgu'të bönachi ilátigaca tu' nözi dul-la' benë' tuzë' bönni' na'. Lë'sca' caní gaca ulu'huóáca tsahui' yúgu'të bönachi ni'a que le naca tsahui' benë' yetuzë' Bönni' na', gata' yöl-la' na'bán idú quégaquië'. <sup>19</sup> Bulu'huóáca huen dul-la' bönachi zían tu' cabí benë' tuzë' bönni' ca rnna xtídzë'ë Dios. Lë'sca' caní ulu'huóáca tsahui' bönachi tu' benë' yetuzë' Bönni' na' ca rnna xtídzë'ë Dios.

<sup>20</sup> Guyú'u xibá queë' Dios yödzülió ni para gaca bë'da' nabága'gaca bönachi dul-la'. Tu' guca bë'rö nabága'gaca dul-la', guca bë'rö ca' zxöntë'rö naca le buzá' ládxë'ë Dios quégaca bönachi. <sup>21</sup> Guta' yöl-la' huáca unná bë' que dul-la' guti rë'u. Lë'sca' caní le ruzá' ládxë'ë Dios queëru' napa yöl-la' huáca gun ga huóácaru' tsahui' lahuë' Lë', ate' gata' yöl-la' na'bán idú queëru' ni'a que le benë' Xanru' Jesucristo.

## 6

*Naca tsca chinátiru' para cabirö gunru' dul-la' tu' nabániru'-në' Jesucristo*

<sup>1</sup> ¿Bizxi caz innaru' na'a? ¿Naru' gúntsaru' dul-la' para gátarö queëru' le ruzá' ládxë'ë Dios queëru'? <sup>2</sup> ¿Biti' gun cázaru' ca! Naca queëru' ca tsaz chinati cázaru' para cabirö gunru' dul-la'. ¿Naru' gúntica'siru' dul-la'? <sup>3</sup> ¿Naru' cabí nözili' ca na' naca queëru'? Channö bidílaru' nisa para

huoácaru' tuz len Cristo, lë na' bidílaru' nisa rulu'i rë'u chigudódiru' lu yöl-la' guti tsözxön len Lë'. <sup>4</sup> Ca na' guca, gútilenru'-në' Cristo tsözxön, lësca' caní bigáchi'lenru'-në' tsözxön niu' yeru ba cate' ni' bidílaru' nisa. Ca na' busubanë' Dios Cristo lu yöl-la' guti len yöl-la' huáca zxon queë', lës caní ca' rë'u nubánlenru'-në' Jesús tsözxön para gácaru' bönachi idütë cubi queë'.

<sup>5</sup> Channö nunru' Cristo tsözxön, gútiru' ca na' gútië' Lë', lësca' caní gunru'-në' tsözxön, ubanru' lu yöl-la' guti ca na' bubanë' Lë'. <sup>6</sup> Chinöz quéziru' lë ni, yöl-la' bönachi queëru' le guzóa zí'alö gudá'len Lë' tsözxön lë'e yaga cruz, para initi yöl-la' bönachi queëru' na' bënlenru' le dul-la', para cabirö inná be'e le naca dul-la' rë'u. <sup>7</sup> Channö nácaru' tuz len Nu na' guti tu' nözi dul-la', nuhuoácaru' tsahui' lahuë' Dios tu' cabirö nabága'ru' dul-la' na', ate' bití'rö yú'uru' lu na' dul-la'. <sup>8</sup> Na'a, channö nátilenru'-në' Cristo tsözxön, réajlë'ëru' ubánlenru'-në' ca' tsözxön, <sup>9</sup> tu' chinöziru' bubanë' Cristo lu yöl-la' guti, en bití'rö gátië'. Que lë ni na' bití'rö bi gaca gun yöl-la' guti na' queë' Lë'. <sup>10</sup> Ca na' guca, gútië' Lë', tu luzuísö gútië' tu' nözi dul-la' quégaca yúgu'të bönachi, pero ca na' naca, zoë' nabanë', nabánlenë' Dios. <sup>11</sup> Lësca' caní ral-la' usáca'li' queéli' naca queéli' ca chinati cázali' para cabirö gunli' dul-la', pero zóali' nabanli' para gunli' ca rnna xtídzë'ë Dios tu' nácali' tuz len Xanru' Jesucristo.

<sup>12</sup> Que lë ni na', biti' gü'ili' lataj le naca dul-la', para cabí gun ga gunli' dul-la' lu le naca cázali' le gati caz. Biti' gunli' ca naca le rizé ládxi'li' le ruá' dö', lu le naca cázali'. <sup>13</sup> Biti' udödi cuinli' lu dul-la', biti' gunli' le ruá' dö', pero guli'dödi cuinli' lu në'ë Dios tu' nubanli' lu yöl-la' guti, en guli'dödi lu në'ë idütë le naca cázali' para ugúnlenë' le le naca dxi'a. <sup>14</sup> Biti' gü'ili' lataj le naca dul-la', para cabí gun ga gunli' dul-la', tu' nuzóë' Dios libí'ili', calëga para inná be'e libí'ili' xibá queë', pero para inná be'e libí'ili' le ruzá' ládxi'ë queëru'.

*Le rucudzu' didza' ca naca que nu bönni' nadó'o*

<sup>15</sup> ¿Bizxi caz innaru' na'a? ¿Naru' gúntsaru' dul-la' tu' cabirö rinná be'e xibá queë' Dios rë'u, pero rinná be'e le ruzá' ládxi'ë Dios rë'u? ¡Biti' ca' gunru' caní! <sup>16</sup> Chinöz quézili' dxi'a channö udödi cuinli' lu në'ë nu bönni' para gácali' bönni' nadó'ogaca queë', en gunli' ca rnna xtídzë'ë, tsaz nácali' bönni' nadó'ogaca queë' bönni' na' runli' ca rnna xtídzë'ë. Lësca' caní gaca channö udödi cuinli' para gunli' dul-la' le gun ga gátili', o channö udödi cuinli' para gunli' ca rnna xtídzë'ë Dios, Nu gun ga huóacali' tsahui'. <sup>17</sup> Na'a, ¡Xclenë' Dios! Sal-la' zí'alö gúcali' bönni' nadó'ogaca lu na' dul-la', na'a idú ládxi'li' runli' ca rinná bë' xibá na' budödi cuinli' lu në'e. <sup>18</sup> Tu' chinulali' lu na' dul-la', nuhuoácali' ca yugu' bönni' nadó'ogaca lu na' le naca dxi'a. <sup>19</sup> (Ruí'ílena' libí'ili' didza' ca tuí' didza' bönachi, tu' cabí réajni'ili' idütë lu yöl-la' bönachi queéli'.) Zí'alö budödi cuinli' len idütë le naca cázali' lu na' le ruá' dö', en lu na' le cabí naca tsahui', ate' gúcali' ca yugu' bönni' nadó'ogaca lu në'eguequi, en benli' xichini le ruá' dö' na'. Na'a, guli'dödi idütë le naca cázali' lu na' le naca tsahui', para gácali' ca yugu' bönni' nadó'ogaca lu në'e, en gunli' xichini lë na' naca tsahui' para gácali' bönachi narúajgaca quez queë' Dios.

<sup>20</sup> Cate' ni' nácali' ca yugu' bönni' nadó'ogaca lu na' dul-la', biti' benli' xichini le naca tsahui'. <sup>21</sup> Na'a, ¿naru' buzí'itsali' xibé lë na' benli' zí'alö? Na'a lë na' benli' run ga rutuí'ili', en run ga nu gati tsaz. <sup>22</sup> Na'a chinulali' lu na' dul-la', en nácali' ca yugu' bönni' nadó'ogaca queë' Dios, en ruzí'ili'

xibé le run ga nácali' bönachi narúajgaca quez queë' Dios, en le run ga dë queëli' yöl-la' na'bán idú. <sup>23</sup> Lazxaj nu run dul-la' naca yöl-la' guti, pero le rúnnašë' Dios queëru' naca yöl-la' na'bán idú, le rata' queëru' tu' nácaru' tuz len Xanru' Jesucristo.

## 7

### *Le rucudzu' didza' yöl-la' nutsaga na'*

<sup>1</sup> Böcha'ado', núlöli' núnbë'ëli' xibá queë' Dios. Nöz quezili' rinná be'e xibá na' nu bönni' tsanni ni zoë' nabanë'. <sup>2</sup> Naca queëli' ca naca que tu nigula nutsaga ná'lennu-në' bönni', yú'unu lu në'ë bönni' queënu tsanni ni zoë' nabanë' ca rinná bë' xibá que yöl-la' nutsaga na', pero channö chinátië', nurúajnu lu na' xibá na'. <sup>3</sup> Caní naca, tsanni ni zoë' nabanë' bönni' queënu, channö utsaga ná'lennu-në' ia'tué' bönni', gunnu dul-la' le riguitsaj xibá que yöl-la' nutsaga na', pero channö chinátië' bönni' queënu na', nurúajnu lu na' xibá na', ate' na'a, channö utsaga ná'lennu-në' nu bönni' yúbölö, biti' gunnu dul-la' le riguitsaj xibá que yöl-la' nutsaga na'.

<sup>4</sup> Lësca' caní raca queëli', böcha'a. Tu' dzágali'-në' Cristo chinati cázali' libí'ili' para cabirö inná be'e libí'ili' le rinná bë' xibá na', para guéquili' que Nu yúbölö. Na'a chinéquili' queë' Cristo, Nu na' bubán lu yöl-la' guti. Caní naca, para gaca gunru' le raza ládxë'ë Dios. <sup>5</sup> Tsanni ni' guyó'uru' lu na' yöl-la' bönáchisö queëru', le rinná bë' xibá na' ben ga gulaca bë' le guzë ládxi'ru' le ruá' dö', le gulún dxin lu idútë le naca cázaru' para ilún ga gátiru'. <sup>6</sup> Na'a nuláru' lu na' xibá na' tu' nati cázaru' tsca naca le rinná bë' xibá na' gunná be'e rë'u zí'alö. Caní naca para gaca gunru' xichinë' Dios lu yöl-la' na'bán cubi le runnë' queëru' Dios Bö' Lá'ayi, en calëga gunru' xichinë' lu lë na' chinaca gula, le naca xibá na'.

### *Le dzaga neda' le naca dul-la'*

<sup>7</sup> ¿Bizxi caz innaru' na'a? ¿Naru' runtsö xibá queë' Dios ga runa' dul-la'? ¡Biti' ca' run caní! La'tu' cabí buzéajni'i le rinná bë' xibá na' neda', biti' gunözda' naca dul-la' le runa'. La'tu' cabí zoa lu xibá na' le rnna: "Biti' së ládxu'u le dë que luzó'o", biti' gunözda' naca dul-la' yöl-la' rizë ladxi' le dë que luzá'a. <sup>8</sup> Cate' bidxín quia' xibá na', guca bë' le naca dul-la' na' run dxin lu idútë le naca', ate' ben ga gúquibe'eda' rizë ládxa'a yúgu'të le ruá' dö'. Ga biti' ridxini xibá na', biti' naca bë' le naca dul-la'. <sup>9</sup> Dza ni'te, zí'atëlö ga bidxín quia' xibá queë' Dios, ni' gúquida' zoa' nabana', pero cate' bidxín quia' xibá na', gúquibe'eda' nabága'a dul-la', en chinati caza'. <sup>10</sup> Dios gunná bë'ë xibá na' para gun ga gata' queëru' yöl-la' na'bán, pero ben ga gúquibe'eda' chinati caza'. <sup>11</sup> Guca bë' nazí' yé'eda' ca naca dul-la', tu' ben xibá na' ga gúquibe'eda' nabága'a dul-la', en ral-la' gátia'.

<sup>12</sup> Que lë ni na', lá'ayi naca xibá queë' Dios, ate' lá'ayi, en tsahui', en dxi'a naca le gunná bë'ë. <sup>13</sup> ¿Naru' bentsö lë na' naca dxi'a ga bidxín quia' yöl-la' guti? ¡Biti' ca' naca ca'! Le naca dul-la' bugún dxin lë na' naca dxi'a, en ben ga gúquibe'eda' chinati caza' para gaca bë' naca dul-la' le runa'. Caní guca, para gaca bë' ni'a que xibá na' nácatëro xihui' yúgu'të le naca dul-la'.

<sup>14</sup> Nöziru' Dios Bö' Lá'ayi bennë' queëru' xibá na', pero neda' naca' bönáchisö, en yu'a lu na' dul-la' ca tu bönni' nadó'o que. <sup>15</sup> Na'a, biti' réajni'ida' le runa'. Ré'ënda' guna' ca rinná bë' xibá na', pero biti' runa' lë na' ré'ënda' guna'. Le naca dul-la' le cabí rilé'eda' dxi'a, lë na' runa'. <sup>16</sup> Runa' dul-la' sal-la' biti' ré'ënda' guna' dul-la' na'. Xibá na' rusëdi neda'



naca dul-la' le cabí naca dxi'a. Que læ ni na' naca bē'da' naca dxi'a le rinná bē' xibá na'. <sup>17</sup> Caní naca, calēga nēda'sō runa' dul-la' na', pero dul-la' na' dzaga neda' run ga runa' dul-la' na'. <sup>18</sup> Nōzda' bití' zóalen neda' le naca dxi'a, o huáca innía', læ na' naca dxi'a bití' zóalen le naca yöl-la' bōnáchisō quia'. Rē'ēnda' guna' le naca dxi'a, pero la' nēda'sō bití' gaca guna' læ na' naca dxi'a. <sup>19</sup> Bití' runa' le naca dxi'a le rē'ēnda' guna', pero rúntica'sa' le bití' naca dxi'a le cabí rē'ēnda' guna'. <sup>20</sup> Que læ ni na', channō runa' dul-la' na' bití' rē'ēnda' guna', calēga neda' caz runa' le, pero dul-la' na' dzaga neda' run ga runa' dul-la' na'.

<sup>21</sup> Caní naca le raca queēru' yúgu'tēru'. Cate' rē'ēniru' gunru' le naca dxi'a, dzaga rē'u le run ga runru' le ruá' dō'. <sup>22</sup> Lu icja lādxi'da'ahua' raza lādxa'a xibá queē' Dios <sup>23</sup> pero réquibe'eda' dzaga idútē le naca' le rinná be'e neda', ate' læ ni ridá'baga' xibá queē' Dios yu'u icja lādxi'da'ahua'. Læ na' dzaga idútē le naca' run ga runa' dul-la'.

<sup>24</sup> ¡Bica' bayechi' neda'! ¿Nuzxi caz gaca usólá neda' lu yöl-la' bōnáchisō quia' le run ga runa' dul-la'? <sup>25</sup> ¡Xclenē' Dios, chinularu' na'a ni'a que le benē' Xanru' Jesucristo! Que læ ni na', tsca naca le yu'u icja lādxi'da'ahua' runa' ca rinná bē' xibá queē' Dios, sal-la' yöl-la' bōnáchisō quia' run ga rē'ēnda' guna' dul-la'.

## 8

### *Le runru' tu' zóalenē' Dios Bō' Lá'ayi rē'u*

<sup>1</sup> Que læ ni na', bítirō bi xíguia' nabága'gaquiē' yugu' bōnni' néquiquequinē' queē' Jesucristo, bōnni' na' bítirō tunē' ca rē'ēni yöl-la' bōnáchisō quégaquiē', pero ca rē'ēnē' Dios Bō' Lá'ayi tunē'. <sup>2</sup> Tu' naca' tuz len Jesucristo, Dios Bō' Lá'ayi, Nu na' nabániru', rácalenē' neda'. Que læ ni na', nulá' lu læ na' ben ga bena' dul-la', enca' lu yöl-la' guti. <sup>3</sup> Chinunē' Dios le cabí guca gun xibá na', tu' cabí bi guzxéqui' gun tu' nácaru' bōnáchisō. Dios gusól-lē'ē Zxí'ini cazē', ate' gulgjē' bōnachi ca nácaru' rē'u, nácaru' bōnachi dul-la', pero bití' bi dul-la' benē' Lē'. Busubaga' cuinē' dul-la' nabága'ru' rē'u, ate' caní guca, guchúguiē' que dul-la' runru' lu yöl-la' bōnáchisō queēru'. <sup>4</sup> Caní benē' para gaca gunru' idútē le naca tsahui' le rinná bē' xibá queē', núlōru' na' bítirō runru' ca rē'ēni yöl-la' bōnáchisō queēru', pero ca rē'ēnē' Dios Bō' Lá'ayi runru'.

<sup>5</sup> Bōnni' tunē' ca rē'ēni yöl-la' bōnáchisō quégaquiē', tu'í lādxi'gaquiē' le naca que yöl-la' bōnáchisō quégaquiē', pero bōnni' tunē' ca rē'ēnē' Dios Bō' Lá'ayi, tu'í lādxi'gaquiē' le naca queē' Dios Bō' Lá'ayi. <sup>6</sup> Channō ru'í lādxi'siru' le naca que yöl-la' bōnáchisō queēru', tsaz gátiru', pero channō ru'í lādxi'ru' le naca queē' Dios Bō' Lá'ayi, chidē yöl-la' na'bán idú queēru', en ribōzaru' dxi lādxi'. <sup>7</sup> Núti'tēs nu ru'í lādxi'sō le naca que yöl-la' bōnáchisō que, bití' rilē' e Dios dxi'a, tu' cabí run nu na' ca rinná bē' xibá queē' Dios, en bití' ca' gaca gun caní. <sup>8</sup> Que læ ni na', bōnni' na' tunē' ca rē'ēni yöl-la' bōnáchisō quégaquiē' bití' gaca ilunē' le raza lādxe'ē Dios.

<sup>9</sup> Na'a, bítirō runli' ca rē'ēni yöl-la' bōnáchisō queēli', pero runli' ca rē'ēnē' Dios Bō' Lá'ayi tu' zóalen cazē' Lē' libí'ili'. Tu bōnni' bití' zóalenē' Dios Bō' Lá'ayi læ', Nu na' risól-lē'ē Cristo queēru', bití' néquinē' queē' Cristo. <sup>10</sup> Tu' zóalenē' Cristo libí'ili', chinati caz idútē le guca cázali' tu' nōzi dul-la', ate' na'a nabánili'-nē' Dios Bō' Lá'ayi tu' nunē' Dios libí'ili' tsahui'. <sup>11</sup> Bō' Lá'ayi queē' Dios, Nu na' busubán Jesús lu yöl-la' guti, zóalenē' libí'ili'. Læ cazē' Dios, Nu busubán Jesucristo lu yöl-la' guti, runē'

ga nubanli' lu idútë le gúcali' le rati caz. Caní nunë' tu' zóalenë' Dios Bö' Lá'ayi libí'ili'.

<sup>12</sup> Que lë ni na', libí'ili' böcha'a, dë tu le ral-la'ru', pero calëga que yöl-la' bönáchisö queëru', para cabirö gunru' ca rë'ëni yöl-la' bönáchisö queëru' na'. <sup>13</sup> Channö runli' ca rë'ëni yöl-la' bönáchisö queëli', gátili' tsaz, pero channö len yöl-la' huáca queë' Dios Bö' Lá'ayi runli' ga ila'niti le runli' lu yöl-la' bönáchisö queëli', gata' yöl-la' na'bán idú queëli'.

<sup>14</sup> Yúgu'të nupa tun ca rë'ënë' Dios Bö' Lá'ayi náca gaca xzí'inë' Dios. <sup>15</sup> Dios Bö' Lá'ayi na' zóalenë' libí'ili' biti' nuzóë' libí'ili' leyúbölö ca bönni' nadó'ogaca para gadxi idzöbili', pero chinunë' ga nácali' xzí'inë' Dios caz, en runë' ca' ga rulídzaru'-në' Dios, rnnaru': "Abba", le rnna: Dad. <sup>16</sup> Lë cazë' Dios Bö' Lá'ayi ruzéajni'inë' bö' naca cázaru', en runë' ga nöziru' nácaru' xzí'inë' Dios. <sup>17</sup> Channö chinácaru' xzí'inë' Dios, gata' ca' queëru' tsözxön len Cristo le nequi queë' Xúziru' Dios. Caní gaca queëru' channö riguí' rizáca'lenru'-në' tsözxön Cristo para uzí'iru' xibé tsözxön len Cristo yöl-la' xzön queë' Dios.

<sup>18</sup> Runi neda', yugu' lë ni riguí' rizáca'ru' na'a naca tu le cuídido'os tsa naca yöl-la' xzön na' gata' queëru' dza si' za'. <sup>19</sup> Ta'böza yúgu'të le nunë' Dios, en ta'zë ládxi' gaca idxintë dza na' ulu'ë lahui Dios yugu' bönni' náca gacüë' xzí'ini cazë'. <sup>20</sup> Yúgu'të lë na' nunë' Dios gula'dödi lu na' le run ga ila'niti, calëga tu' gulë'ëni caz gaca caní, pero tu' benë' Dios ga naca caní. Benë' ca' ga naca löza que idútë lë na' nunë', <sup>21</sup> ate' ulu'lágaca yúgu'të le nunë' Dios lu lë na' run ga ila'niti. Caní gaca, yúgu'të lë na' ulu'zí' ca' xibé yöl-la' rusólá le nazáca'da' na' ulu'zi'ë xibé yugu' xzí'inë' Dios. <sup>22</sup> Nöziru' ta'guí' ta'zaca' yúgu'të le nunë' Dios ga ridxintë na'a dza, ca na' riguí' rizáca'nu tu nigula chizóa sóabi' bí'ido' queënu. <sup>23</sup> Riguí' rizáca'a, calëgasö yödzölió ni, pero riguí' rizáca'ru' ca' rë'u, sal-la' zóalenë' Dios Bö' Lá'ayi rë'u, Nu na' naca queëru' le rulu'fi rë'u ca ral-la' gaca cázaru'. Riguí' rizáca'ru' tsanni ni ribözaru' dza ni' ulu'ë lahui Dios nácaru' idú xzí'inë', dza ni' únë' ca' idútë le naca cázaru'. <sup>24</sup> Tu' runru' löza lë ni, nuláru' rë'u, pero channö gaca ilë'ëru' lë na' runru' löza, biti' naca tu le ribözaru'. Biti' ribözaru' le chirilë'ëru'. <sup>25</sup> Na'a, channö runru' löza tu le cabí gaca ilë'ëru', lu yöl-la' riböza xzön ladxi' ribözaru' le.

<sup>26</sup> Lëscá caní rácalenë' Dios Bö' Lá'ayi rë'u cate' rudú ládxi'ru', tu' cabí nöziru' bi ral-la' inábiru'-në' Dios, pero Lë cazë' Dios Bö' Lá'ayi rudödë' xtídzaru' lahuë' Dios, ate' lu yöl-la' rinaba yudxi queë' rinnëda' ládxi'ë, tsa cabí gaca nu inná. <sup>27</sup> Dios ruyúë' le yu'u icja ládxi'do' gaca bönachi, en nözinë' le rë'ënë' innë' Dios Bö' Lá'ayi na', ate' Lë', ca rë'ëni quëzënë' Dios, rudödë' xtídzaru' gaca nupa néquiquequi quez queë' Cristo lahuë' Dios.

*Nadéli'tëröru' tu' zóalenë' Cristo rë'u*

<sup>28</sup> Nöziru' tu'zi'ë xibé bönni' yúgu'të le raca quëgaquië', bönni' na' nadxi'iguequinë' Dios, ate' bulidzë' Dios légaquië' ca nuzóa cazë' gunë'. <sup>29</sup> Yugu' bönni' na' gurö cazë' queë' Dios zí'atëlö, buzóë' ca' quëgaquië' zí'atëlö ilácagaquië' ca naca cazë' Xzí'inë', para gáquië' Xzí'inë' lo ladaj zían böchë'ë. <sup>30</sup> Nupa na' buzóë' Dios quëgaquië' zí'atëlö ca ral-la' ilácagaquië', bulidzë' ca' légaquië', ate' yugu' bönni' na' bulidzë', benë' légaquië' tsahui', ate' yugu' bönni' na' benë' légaquië' tsahui', benë' ga tu'zi'ë ca' xibé yöl-la' xzön queë'.

<sup>31</sup> ¿Bizxi caz innaru' na'a ca náca gaca lë ni? Channö rácalenë' Dios rë'u, biti' ral-la' gádxiru' sal-la' bi ilún bönachi queëru'. <sup>32</sup> Dios, idú ládxi'ë

bennë' queëru' Zxí'ini cazë'. Budödë' lë' para gútië' uláz queëru'. Channö caní benë' Dios, ¿naru' cabí gúnnadë'ë queëru' tsözxön len Zxí'inë' yúgu'të le dë? <sup>33</sup> ¿Nuzxi caz gaca bi usubaga' nupa na' gurö cazë' queë' Dios? ¿Cuntu nu gaca, tu' run cazë' Dios ga nuhuóácaru' tsahui'! <sup>34</sup> ¿Nuzxi caz gaca ichugu queëru' gátiru'? ¿Cuntu nu gaca, tu' guti cazë' Cristo uláz queëru', en le nácáro lo, bubanë' lu yöl-la' guti, ate' na' a zoë' cuita lë'ë ibëla Dios ga nácaterë' zxön, ate' rnnë' dxi'a uláz queëru' lahuë' Dios! <sup>35</sup> Sal-la' bi raca queëru', nöz quéziru' nadxí'inë' Cristo rë'u. Nöziru' nadxí'inë' rë'u:

sal-la' riguí'i rizáca'ru', o sal-la' risëbi ládxi'ru',  
o sal-la' ta' bía ládxi'gaca bönachi rë'u,  
o sal-la' ridunru', o sal-la' riyadzaj le gácuru',  
o sal-la' zoa bönadxi queëru', o sal-la' ilútië' bönni' rë'u.

<sup>36</sup> Ca nácagaca lë ni nazúaj lu guichi lá'ayi, rnna:  
Tu' néquitu' quiu' Li', túntica'sö bönachi ga gátitu'.  
Nácatu' ca yugu' bö'cu' zxila',  
nadödígacaba' lu na' nu guti légacaba'.

<sup>37</sup> Na'a, tu' zóalen rë'u Nu na' nadxí'i rë'u, nácaterö löza idéli'ru' lu le raca queëru'. <sup>38-39</sup> Que lë ni na' runi neda':  
Biti' bi sequi' gun ga bítirö idxí'inë' Dios rë'u.  
Nadxí'inë' rë'u tu' néquiru' queë' Xanru' Jesucristo.  
Biti' sequi' gun caní yöl-la' guti o yöl-la' na'bán,  
o yugu' gubáz lá'ayi o nupa ta'nná bë',  
o yugu' yöl-la' huáca que tu' xihui',  
o bítitës bi zoa o bítitës bi si' za',  
o tu le dë xitsá'alö o tu le dë cadxí'ilö,  
o bítitës bi nunë' Dios.

## 9

### *Dios gurö cazë' queë' bönachi Israel*

<sup>1</sup> Ruá'a didza' idütë li tu' néquida' queë' Cristo, ate' röjlöz didza' ni le naca queë' Dios Bö' Lá'ayi le yu'u icja ládxi'da'ahua'. ¿Biti' rizi' yë'a!  
<sup>2</sup> Ruhuí'inide'eda', en risëbitica'sö ládxa'a <sup>3</sup> tu' raca ládxa'a guna' ga ulu'lë' böchi' luzá'a, bönni' uládz quia'. La'tu' huácalen légaquie', guë'eni quézida' ubéaj ládxe'ë Dios neda', en ulá'alena' Cristo. <sup>4</sup> Yugu' bönni' uládz quia' na' nácagaquie' zxí'ini xi'sóë' Israel, ate' Dios bë'ë légaquie' lataj ilácagaquie' zxí'ini cazë'. Yöl-la' zxön queë' Dios guzóalen légaquie', ate' Dios budödë' lu ná'agaquie' didza' rucá'ana tsahui', enca' xibá queë'. Bulidzë' légaquie' para tseaj ládxi'gaquie' Lë', ate' budödë' lu ná'agaquie' yugu' le guzxi' lu në'ë gunë' le ilún tsahui' bönachi. <sup>5</sup> Nácagaquie' zxí'ini xi'sóagaquie' xuz xtó'otu' Abraham, en Isaac, en Jacob, ate' ladaj di'a dza quégaquie', ca naca yöl-la' bönachi queë', guljë' Cristo, Nu naca caz Dios, en rinná bé'enë' yúgu'të. ¡Rácatica'sö queë' yöl-la' ba! ¡Ca' gaca!

<sup>6</sup> Sal-la' yúgu'të bönni' uládz quia' bití' nazí' lu ná'agaquie' Cristo, bití' ral-la' innaru': Nítisö böáca xtídzë'ë Dios. Calëga yúgu'të zxí'ini xi'sóë' Israel nácagaquie' idú bönachi Israel, nupa néquiquequi queë' Dios. <sup>7</sup> Sal-la' gúljagaquie' zían zxí'ini xi'sóë' Abraham, bití' guláquie' yúgu'të' idú zxí'ini xi'sóë' Abraham, pero guca ca na' nazúaj lu guichi lá'ayi, le rnna: "Yugu' zxí'ini xi'sóë' Isaac ilaca idú zxí'ini xi'sú'." <sup>8</sup> Caní naca, nupa nácagaca zxí'inë' tu bönni' néquinen' queë' Dios, calëga yúgu'të' nácagaquie' zxí'inë'

Dios. Lësca' caní, náccagaca idú xzí'ini xí'sóè Abraham núpasö na' náljagaca ni'a que lë na' guzxí' lu në'è Dios. <sup>9</sup>Lë na' guzxí' lu në'è Dios unödzejë' queë' Abraham rnna caní: "Ia'tú iz na'a dza huöda', ate' Sara quiu' uzóanu-bi' tubi' bi'i bönni'do'."

<sup>10</sup> Calëgasö lë ni guca caní, pero lësca' cate' Rebeca ni' nuá'anu-bi' yugu' bi'i bönni'do' queë' Isaac, xuz xtó'otu', <sup>11-13</sup> cate' ni' si' iláljabi', en biti' bi núnigacabi' le naca dxi'a o le ruá' dö', Dios gudxë'-nu Rebeca na', gunné': "Bi'i bönni' zí'alö quiu' gunbi' xichinbi' bi'i buropi." Didza' ni röjlöz lë na' nazúaj lu guichi ca gunné' Dios, le rnna: "Bidxí'ida'-në' Jacob, en calëga Esaú." Caní guca, bugá'ana tsutsu le buzóè' tsaz Dios ca naca lë na' chigurö' cazë'. Que lë ni na' biti' raca caní ni'a que tu le gaca ilún bönachi, pero naca caní tu' ribö' cazë' Dios nu rulidzë'.

<sup>14</sup> ¿Bizxi caz innaru' na'a? ¿Naru' runtsë' Dios le cabí naca tsahui'? ¿Biti' ca' runë' caní! <sup>15</sup> Dios gudxë' Moisés, gunné': "Huéchi' ládxa'a nu rë'ènda' huéchi' ládxa'a, en güf'i ládxa'a nu rë'ènda' güf'i ládxa'a." <sup>16</sup> Que lë ni na', biti' raca caní ni'a que le tē'èni caz bönachi, o tu' runë' bayudxi nu bönni', pero naca tu' rë'èni quézinë' Dios, ruhuéchi' ládxe'è bönachi. <sup>17</sup> Ca naca lë ni nazúaj lu guichi lá'ayi ca na' Dios gudxë' Faraón, gunné': "Que lë ni na' buzóa' li' ga rinná' bē'u para ulu'a lahui yöl-la' huáca quia' ga zu', en guna' ga ilunbë' bönachi idútë yödzo'lió le naca' neda'." <sup>18</sup> Caní naca, Dios ruhuéchi' ládxe'è nu rë'èni quézinë', en lësca' caní runë' zidzaj icja ládxi'da'ahuë' nu bönni' rë'èné' gunë' zidzaj icja ládxi'da'ahuë' bönni' na', ca na' benë' queë' Faraón na'.

<sup>19</sup> Na'a guiéli' neda': "Channö caní naca, ¿bizx que rusubáguë'è Dios bönachi xíguia'?" ¿Nuzxi caz gaca tá'baga' le rë'èni quézinë' Dios gunë'?"

<sup>20</sup> ¿Biti' ca' naca caní! ¿Nuzxi caz li' rnnió' que Dios? ¿Naru' huácatsö tu yusu' néquini yu guië' bönni' huen rö'ö, inná: "¿Bizx que benu' neda' caní?"

<sup>21</sup> ¿Naru' cabí dë lu në'è bönni' huen rö'ö gunë' que guna' na' tu yusu' nu ugún le dxin ga liná', en que la' guna' ná'asö gunë' ia'tú yusu' nu ugún le dxin ga biti' naca liná'?"

<sup>22</sup> Ré'èni quézinë' Dios ulu'è lahui ca gunë' xíguia' nu ruá' dö' en gunë' ga gaca bē' yöl-la' huáca queë', pero lu yöl-la' riböza zxön ladxi' queë' biá' gulënë' yugu' bönni' ni' ral-la' ichúguië' quégaquië', yugu' bönni' na' nabága'gaquië' xíguia', en run bayudxi usunítie' légaquië'. <sup>23</sup> Caní runë' Dios para gaca bē' nácatërö lesaca' yöl-la' ruzá' ladxi' queë', lë na' rulu'è lahui lógaca nupa na' ruhuéchi' ládxe'è, bönni' na' buzóè' quégaquië' zí'atëlö ulu'zi'è xibé yöl-la' zxön queë'. <sup>24</sup> Yugu' bönni' caní bulidzë' Dios. Calëgasö bulidzë' netu', bönachi judío, pero lësca' bulidzë' bönachi izá'a. <sup>25</sup> Ca naca lë ni nazúaj lu guichi lá'ayi ca na' bē'è didza' Oseas uláz queë' Dios, gunné':

Nupa biti' náccagaca bönachi quia',  
gu'a láguequi: Bönachi quia',  
ate' nupa na' biti' bidxí'ida',  
gu'a láguequi: Nupa nadxí'ida'.

<sup>26</sup> La' ná'asö ga gunnía' quéguequi:  
"Biti' nácali' bönachi quia'",

si' láguequi: "Yugu' zxf'inë' Dios ban."

<sup>27</sup> Na'a, ca naca quégaca xzí'ini xí'sóè' Israel, Isaías gunné':  
Sal-la' ila'yanë' xzí'ini xí'sóè' Israel,  
en iláquië' tsa naca yuzxi tu ra' yegu zxön,

ulu'lé' nabábasé'.

<sup>28</sup> Xanru' Dios la' guntë' ga gaca idútë  
lë na' ichúguië' quégaca bônachi yödzölió ni.

<sup>29</sup> Lëscá' caní Isaías bē'ë didza' zí'atëlö, gunnë':  
Dios, Xanru' unná bē' idú,  
la'tu' cabí bucá'anë' queëru' yugu' zxi'ini xi'sóaru',  
ugá'anaru' ca yödzö Sodoma, en yödzö Gomorra,  
yugu' yödzö na' busunítië' Dios.

*Bônachi Israel, en didza' dxi'a*

<sup>30</sup> ¿Bixi caz innaru' na'a? Yugu' bönni' biti' nabábagaquië' Israel  
chibila'déli'në' nuhuóacagaquië' tsahui' lahuë' Dios, en biti' gulunë'  
bayudxi ulu'huóacagaquië' tsahui' lahuë' Dios, pero nuhuóacagaquië' tsahui'  
tu' ta'yéajlë'ë Dios. <sup>31</sup> Na'a, sal-la' gulunë' bayudxi yugu' bönni' Israel  
ilunë' ca rinná bē' xibá queë' Dios, le ral-la' gun ga ilácagaquië' tsahui',  
biti' bila'déli'në' le ral-la' gata' quégagaquië' tu' tunë' ca rinná bē' xibá na'.

<sup>32</sup> ¿Bix que na' guca caní? Caní guca, tu' cabí gulunë' caní lu yöl-la' réajlë'  
quégagaquië' Dios, pero rácasö quégagaquië' gulé'ënnë' ilunë' ca rinná bē' xibá  
na', ate' que lë ni na' gula'chixinë', o huáca innaru': Yöjchégu'gaquië' lu lë  
na' nazí'ile: Guiöj Ga Nu Röjchegu'. <sup>33</sup> Ca naca lë ni nazúaj lu guichi lá'ayi,  
rnna:

¡Buli'yú! Uzó'a-në' yödzö Sión bönni' na'  
gáquië' ca tu guiöj ga nu tsöjchegu',  
guiöj na' gun ga nu ichixi inigui.  
Nu tséajlë' Lë', biti' ca' utuí' nu na'.

## 10

<sup>1</sup> Libí'ili', böcha'ado', le rizé ládxa'a, en le rinábida'-në' Dios gunë'  
quégaca bônachi Israel naca gunë' ga ulu'lé'. <sup>2</sup> Runa' ba nalí quégagaquië',  
idú ládxi'gaquië' tuí' ládxi'gaquië' Dios, pero calëga len yöl-la' réajni'i  
idú. <sup>3</sup> Biti' nözguequinë' ca runë' Dios, runsë' ga nácaru' tsahui', pero  
té'ënnë' ilún cuíngaquië' tsahui' rácasö quégagaquië', en biti' ta'cu'ë nöxaj  
ladxi' lahuë' Dios para gaca gunë' légaquië' tsahui'. <sup>4</sup> Budxi benë' Cristo  
le ré'ëni gun xibá queë' Moisés, benë' ga gaca ulu'huóaca tsahui' yúgu'të  
nupa ila'yéajlë' Lë'.

<sup>5</sup> Ca naca que nu huóaca tsahui' tu' run ca rinná bē' xibá queë' Dios,  
buzúajë' Moisés lu guichi le rnna caní: "Bönni' na' gunë' idútë ca rinná bē'  
xibá na', soë' ibanë' tu' gunë' caní." <sup>6</sup> Na'a, ca naca que nu huóaca tsahui'  
tu' réajlë' Dios, rnna caní: "Biti' innó' lu icja ládxi'do'o, biti' innó': ¿Nuzxi  
caz cuen ni' yehua' yubá?" Lë ni naca, para gun nu na' ga huötjë' Cristo,  
<sup>7</sup> en biti' innó': "¿Nuzxi caz huötaj ga dë lataj que nupa chinátigaca?" Lë ni  
naca, para gun nu na' ga cuenë' Cristo, urúajë' lu yöl-la' guti. <sup>8</sup> Na'a, ¿bizxi  
caz rnna? Caní rnna: "Gala' ga zu' zoa caz xtídzë'ë Dios. Lu ru'u, en lu icja  
ládxi'do'o zoa xtídzë'ë na'." Lë ni naca didza' que le réajlë'ëru' Dios runtú'  
libán que, rnnatu': <sup>9</sup> "Channö didza' gu'u gaca bē' Jesús náquië' Xanu', en  
uyéaj lë'u idú ládxi'u Dios busubanë' Lë' lu yöl-la' guti, uló' li'." <sup>10</sup> Lu icja  
ládxi'do'oru' réajlë'ëru' Jesús para gácaru' tsahui', ate' len didza' ruí'iru',  
rulu'iru' lahui le náquië' Jesucristo para uláru'.

<sup>11</sup> Nazúaj lu guichi lá'ayi le rnna: "Biti' ca' ulu'tuí' yúgu'të nupa  
ta'yéajlë' Lë'." <sup>12</sup> Dios, la' tuz ca ruí' ládxi'ë yugu' bönni' judío, enca'  
yugu' bönni' idútë yödzölió, tu' Lë cazë' Xanru' náquië' Xángaqië' yúgu'të',

en nápadë'ë bi unödzejë' quégaca yúgu'të nupa tu'lidza Lë'. <sup>13</sup> Ca naca lë ni nazúaj lu guichi lá'ayi, rnna: "Ulu'lá yúgu'të nupa ulu'lidza Lë' Xanru'." <sup>14</sup> ¿Nacxi gaca ulu'lidzë' Lë' channö cabí ta'yéajlë'ë Lë'? ¿Nacxi gaca ila'yéajlë'ë Lë' channö catu caz bila'yönnë' ca naca queë'? ¿Nacxi gaca ila'yönnë' channö cuntu nu zoa na gun libán lógaquië'? <sup>15</sup> ¿Nacxi caz gaca ilunë' libán channö cuntu nu isöl-la' légaquië'? Ca naca lë ni nazúaj lu guichi, rnna: "Bica' bágaca nupa na' ila'dxinë' ga nacuá' bönni' rójéngaquië' libán que le ribequi dxi ládxi'ru', en tunë' libán que didza' dxi'a."

<sup>16</sup> Na'a, calëga yúgu'të' gula'zí' lu ná'agaquië' didza' dxi'a. Ca naca lë ni, Isaías gunné': "Xan, ¿nuzxi caz guyéajlë' le bentu' libán que?" <sup>17</sup> Caní naca, ila'yéajlë' Lë' nupa ila'yöni, ate' lë na' ral-la' ila'yöni naca didza' ru'ë Cristo.

<sup>18</sup> Na'a rnní'a: ¿Naru' cabí bila'yönnë'? Le nácatë bila'yönnë', ca na' nazúaj lu guichi lá'ayi, le rnna:

Idútë yödzülió bila'yöni chí'iguequi.

Yúgu'të lataj bila'dxin xtídza'guequi.

<sup>19</sup> Lësca' rnní'a: ¿Naru' cabí guléquibe'enë' bönni' Israel lë ni? Le nácatë guléquibe'enë' le. Ga risí lo, bë'ë didza' Moisés uláz queë' Dios, gunné':

Gun caza' ga uzxé'eli',

tu' idxí'ida' bönachi bití' nabábagaca libí'ili'.

Ní'a quégaca bönachi cabí ta'yéajni'í guna' ga leli'.

<sup>20</sup> Gudödi ni' gúcadë'ë rugu ladxí' Isaías na', en bë'ë didza' uláz queë' Dios, gunné':

Bila'dzüli neda' nupa bití' gula'guílaj neda'.

Bulu'í lahua' lógaquië' bönni' bití' bí gula'nábinë' neda'.

<sup>21</sup> Na'a, ca naca quégaquië' bönni' Israel, Isaías na' bë'ë didza' uláz queë' Dios, gunné': "Idú dza bulí na'a, bulidza' bönachi bití' túngaca ca rnna xtídza'a, en ta'dá'bagá' neda'."

## 11

### *Nupa nulágaca ladaj bönachi Israel*

<sup>1</sup> Na'a rnní'a: ¿Naru' nusán në'ë Dios bönachi Israel? ¿Bití' ca' naca caní! Neda' caz naca' bönni' Israel. Naca' xzí'ini xí'sóë' Abraham, en nababa' dí'a dza queë' Benjamín, xzí'ini cazë' Israel na'. <sup>2</sup> Dios bití' nusán në'ë bönachi queë', nupa na' gurö cazë' queë' dza ni'te. ¿Naru' cabí núnbë'eli' lë na' nazúaj lu guichi lá'ayi ca na' benë' Elías? Bulidzë' Dios, en buzéguie' bönachi Israel didza', gunné': <sup>3</sup> "Xan, chigulútië' bönni' gulu'ë didza' uláz quiu', en bulu'quinnajë' yugu' bucugu lá'ayi quiu' ga buzéguigacatu'-ba' böa' bédxido' lo' Li'. Tuza' neda' nagá'ana' quiu', ate' tē'ënnë' ilútië' ca' neda'." <sup>4</sup> Na'a, ¿bizxi didza' bubi'ë Dios? Caní gunné': "Nun chí'ígaca caza'-në' quia' tsónnalalaj yu' chí gáyu'ë bönni' bití' tu' zechu xzí'bigaquië' lo budó' guiöj na' nazí'i le Baal." <sup>5</sup> Lësca' caní naca dza ni zóaru' na'a, nagá'anagaca bal-la bönachi Israel, nupa na' gurö cazë' queë' Dios tu' ruzá' ládxe'ë caní quégaquië'. <sup>6</sup> Channö naca le ruzá' ládxe'ë caní quégaquië', bití' naca ni'a que tu le gaca ilunë'. La'tu' guca ni'a que tu le gaca gunru', lë na' ruzá' ládxe'ë queëru' Dios bíti'rö gaca tu le ruzá' ládxe'ë queëru'.

<sup>7</sup> ¿Bizxi caz innaru' na'a? Lë na' gula'guílajë' bönni' Israel, bití' bila'déli'në', pero chibila'déli' le nupa ni' gurö cazë' queë' Dios, ate'

ia'zica'rë' na', Dios benë' zidi icja lãdxi'do'gaquië'. <sup>8</sup> Ca naca lë ni nazúaj lu guichi lá'ayi, rnna: "Dios benë' ga náca'gaquië' chul-la niti." Caní benë', en sal-la' gaca ila'lé'enë' le runë', en ila'yönnë' xtídzë'ë, bití' ca' ta'yéajni'inë'. Caní naca quégaquië' ga ridxintë dza ni zóaru' na'a. <sup>9</sup> Ca naca lë ni bë'ë ca' David didza', gunné':

Yugu' laní quégaquië' ulu'huóaca le ila'zön légaquië',  
en ca tu yalaj ga ila'rölinë'.

Ilaca ca' le ilún ga ila'chíxinë',  
en ca tu le uzí' lëbi légaquië'.

<sup>10</sup> Ila'chul-la guiöj lógaquië', para cabí ila'lé'enë'.  
Ila'yechu tsaz cúdzu'gaquië' tu' ilu'ë yua'.

*Ca gaca ulu'lágaca bönachi bití' náca'gaca judío*

<sup>11</sup> Na'a rnnía': ¿Naru' gula'chíxinë' yugu' bönni' judío ga bidxintë gula'nítië' tsaz? ¡Bití' ca' guca ca'! Gula'dá'baguë'ë xtídzë'ë Dios, ate' na'a Dios ru'ë lataj ulu'lágaca nupa bití' náca'gaca judío para gunë' ga ulu'zxé'enë' yugu' bönni' judío léguequi. <sup>12</sup> Le gulunë' bönni' judío, gula'chíxinë', ben ga bidxín quégaca bönachi yödžölió ni le naca ca tu yöl-la' tsahui'. Channö caní guca, guta' yöl-la' tsahui' quégaca nupa bití' náca'gaca judío tu' gula'nítië' yugu' bönni' judío, zxöntë'rö gaca le gata' quéguequi cate' yugu' bönni' judío na' ulu'huóáquië' queë' Dios.

<sup>13</sup> Na'a rea' libí'ili' bití' nácali' judío, rnnía': Tu' naca' gubáz nasöl-lë'ë Dios lógaca nupa bití' náca'gaca judío, runa' zxön lë na' dë lu na'a <sup>14</sup> para nadxi ca' huáca guna' ga ulu'zxé'enë' bönni' uládz quia' libí'ili', en caní guna' ga ulu'lë' bal-lë'. <sup>15</sup> Channö bulu'huóaca bönachi nacua' idú yödžölió queë' Dios tu' bulu'nítië' yugu' bönni' judío xilátjagaquië', zxöntë'rö gaca le gata' quéguequi cate' ulu'huóazië' xilátjagaca cazë' na'. Gaca ca raca cate' tu' bångaca nupa chinátigaca. <sup>16</sup> Channö rigú'uru' quez queë' Dios cúa nílado' rubéajru' zí'alö, lësca' cúa na' nagá'ana naca quez queë', en channö uzóaru' quez queë' Dios luí yaga, lësca' ilaca quez queë' ni'a në'e yaga na'.

<sup>17</sup> Náca'gaquië' bal-lë' bönni' judío ca ni'a në'e tu yaga olivo narúgugaca, ate' libí'ili', ca ni'a në'e tu yaga olivo guí'a, yöjtá'ali' yaga olivo dxi'a na', en buázili' xilátjagaca nupa na' gurúgugaca, en ruzí'ili' xibë luí, en xichöni yaga olivo dxi'a na'. <sup>18</sup> Que lë ni na', bití' gun ba zxön cuinli', bití' uzóali' tsölá'alö nupa náca'gaca ca ni'a në'e na' narúgugaca. Channö run ba zxön cuinli', ral-la' inözili' calëga libí'ili' rugáguli' luí yaga na', pero luí yaga na' rugagu libí'ili'.

<sup>19</sup> Nadxi ca' innó': "Gula'rugú ni'a në'e yaga na' para gaca tsázia' neda' xilátjagaca." <sup>20</sup> Nácatë didza' ru'u, pero gula'rúguië' tu' cabí gula'yéajlë'ë, ate' yöjtó'o li' yaga na' tu' réajlë'u Dios. Que lë ni na', bití' ral-la' gun ba zxön cuinu', pero ral-la' gádxinu' Dios. <sup>21</sup> Channö benë' Dios léguequi xíguia', nupa na' náca'gaca caz ni'a në'e yaga dxi'a na', ¿naru' cabí gunë' xíguia' ca' li'? <sup>22</sup> Buyútsöca' na'a ca náquië' dxi'i ladxi' Dios, en ca rúndë'ë ca' xíguia'. Le nácatë rúndë'ë xíguia' nupa na' gula'chixi, pero náquië' dxi'i ladxi' len li'. Que lë ni na', ral-la' gúntica'su' ca sa'yéaj yöl-la' dxi'i ladxi' queë' na', para cabí ichúguië' ca' li' lu yaga queë' na'. <sup>23</sup> Lësca' caní gaca quégaquië' channö cabí ulu'gá'anë' lu yöl-la' cabí réajlë' quégaquië', tsöjtá'gaquië' leyúbölö lu yaga na', tu' napë' Dios yöl-la' huáca gunë' ga tsöjtá'gaquië' le leyúbölö. <sup>24</sup> Nacu' li' ca tu ni'a në'e gurugu lu yaga olivo guí'a, en yöjtó'o yaga olivo dxi'a ga cuntú nu udá' tu ni'a në'e yaga guí'a.

Yénni'tërö huáca quégaquië', nácagaca cazë' ni'a në'e yaga dxi'a na', huáca tsójtá'gaquië' leyúbölö lu yaga quéguequi cazë' na'.

*Ca gaca ulu'lágaca bönachi Israel*

<sup>25</sup> Böcha'ado', rë'enda' inözili' lë ni bigachi', para cabí gun ba zxön cuinli' ca naca yöl-la' réajni'i queéli'. Bulu'huóaca bal-la bönachi Israel zidi ladxi', ate' caní iláquië' ga idxinrö dza chinayázgaca yúgu'të bönachi biti' nácagaca judío ga rinná bë'ë Dios, nupa na' ral-la' ulu'lágaca. <sup>26</sup> Tödi na' gata' lataj ulu'lë' ca' yúgu'të bönni' Israel, ca na' nazúaj lu guichi lá'ayi, rna:

Irúaj yödzö Sión Nu rusölá,  
en ugúa le ruá' dö' nabága'gaca zxf'ini xi'sóë' Jacob.

<sup>27</sup> Lë ni naca didza' dzaga gúnlena' légaquië'  
cate' ugúa' dul-la' nabága'gaquië'.

<sup>28</sup> Caní naca, gula'dá'baguë'ë didza' dxi'a, ate' Dios guléaj ládxë'ë légaquië' para gaca uláli' libí'ili', pero nadxf'inë' ca' légaquië', tu' gurö cazë' queë' xuz xtó'ogaquië'. <sup>29</sup> Tsaz runödzjë' Dios le runödzjë', en tsaz rulidzë' bönachi. <sup>30</sup> Ca na' naca queéli', zí'atëlö biti' benli' ca rna xtídzë'ë Dios, ate' na'a ruhuéchi' ládxë'ë Dios libí'ili' tu' cabí gulunë' yugu' bönni' judío ca rnnë'. <sup>31</sup> Lësca' caní naca quégaquië' na'a, biti' tuné' ca rnnë' Dios, pero caní gácasö ga idxinrö dza huéchi' ládxë'ë Dios légaquië', ca ruhuéchi' ládxë'ë libí'ili' na'a. <sup>32</sup> Dios guléaj ládxë'ë yúgu'të bönachi para ila'dá'baguë'ë xtídzë'ë, para gaca huéchi' ládxë'ë yúgu'të'.

<sup>33</sup> Zxöntërö naca yöl-la' tsahui' queë' Dios, lë na' naca yöl-la' huáca zxön, en yöl-la' réajni'i queë'. Cuntu nu gaca tséajni'i le nuzöë' Dios gunë', en biti' gaca nu inözi yugu' le runë' Dios. <sup>34</sup> ¿Nuzxi caz guyéajni'i le guzá' ládxë'ë Xanru'? ¿Nuzxi caz buzéajni'i Lë'? <sup>35</sup> ¿Nuzxi caz bi bunödzaj queë' Dios para gun bayudxi bi ubi'ë Dios que? <sup>36</sup> Yúgu'të le dë narúajgaca lu në'ë Dios, en taca lu në'ë, en nácagaca para uzi'ë xibéguequi. ¡Gácatica'só queë' Dios yöl-la' ba! ¡Ca' gaca!

## 12

*Ral-la' udödi cuinru' quez queë' Dios*

<sup>1</sup> ¡Böchi' luzá'ado'! ¡Ruhuéchi' ládxë'ë Dios rë'u! Que lë ni na' ráta'yua' loli' udödi cuinli' lu në'ë Dios, gácali' ca tu le naca ban rigú'uru' lahuë' Dios, para gácali' quez queë', le gaca tu le tsaza ládxë'ë Dios. Lë ni ral-la' gunli', ca sa'yéaj le reaj ládxi'ru'-në' Dios. <sup>2</sup> Biti'rö gunli' la' lébisö ca tun bönachi dza ni zóaru' na'a, pero guli'gaca bönachi cubi tu' nucubë' Dios icja ládxi'do'oli'. Guli'gún caní para gaca inözili' le naca dxi'a rë'në' Dios gunli', lë na' raza ládxë'ë, en le naca idú.

<sup>3</sup> Na'a, tu' zoa le buzá' ládxë'ë quia' Dios, rea' yúgu'tëli': Biti' gun ba zxön cuinli', le cabí ral-la' gunli', pero ral-la' gácali' nöxaj ladxi' ca ribequi íjali', tsa naca yöl-la' réajlë' queéli' Dios le bennë' que queéli'. <sup>4</sup> Ca na' naca tuz idütë le naca cázaru', sal-la' zían le nagudi' dzágalenru', en calëga tuz dxin tun yúgu'të le zían na' nagudi' dzágalenru', <sup>5</sup> lësca' caní naca queëru'. Sal-la' zianru' zóaru', nácaru' ca tuz le naca cázaru' tu' nácaru' tuz len Cristo, ate' que lë ni na' yúgu'tëru' nácaru' tuz turu' len ia'turu'.

<sup>6</sup> Tu turu' dë lu ná'aru' tu le bennë' queëru' Dios, ate' nadzá'gaca tu tu tsa naca le buzá' ládxë'ë que queëru'. Bönni' na' Dios bunödzjë' queë' gu'ë didza' uláz queë', tsa réajlë'ë Lë', ral-la' gu'ë didza' bönni' na'.



7 Bönni' na' Dios bunödzejë' queë' gunë' xichinë',  
 dxí'ado' ral-la' gunë' dxin na'.  
 Bönni' na' Dios bunödzejë' queë' usédinë' bönachi,  
 dxí'ado' ral-la' usédinë' bönachi.  
 8 Bönni' na' Dios bunödzejë' queë' uzéajni'inë' bönachi,  
 dxí'ado' ral-la' uzéajni'inë' légaquië'.  
 Bönni' bi unödzejë' que nu yúbölö,  
 idú ládxë'ë ral-la' unödzejë'.  
 Bönni' rinná bé'enë' bönachi,  
 idú ládxë'ë ral-la' gunë' caní.  
 Bönni' rácalenë' luzë'ë,  
 len yöl-la' rudzeja ral-la' gunë' caní.

*Yugu' le ral-la' gun nu nequi queë' Cristo*

9 Ral-la' idxí'ili' luzá'ali' idú ládxí'li'.  
 Buli'cá'ana le ruá' dö'.  
 Guli'gú' ládxí'li' gunli' le naca dxí'a.  
 10 Guli'dxí'i-guéquinë' luzá'ali'  
 ca nadxí'igueli'-në' böchi' cázali'.  
 Ca runli'-në' bal luzá'ali'  
 ral-la' gunli' ga gácarë' lo ca nácali' la' cuínsili'.  
 11 Buli'típatica'só ládxí'li', en biti' gácali' xöhuëdi.  
 Guli'gún xichinë' Xanru' idú ládxí'li'.  
 12 Buli'dzeja tu' zoa le runli' löza.  
 Guli'cóz zxön ladxi' cate' bi riguí'i rizáca'li'.  
 Buli'lídzatica'sé' Dios.  
 13 Buli'nödzej quegaca bönachi queë' Cristo  
 tsca nayádzjaguequinë'.  
 Guli'gú' lataj ga íla'cuá' nupa ta'dxín queéli'.  
 14 Guli'nábinë' Dios gunë' dxí'a  
 quegaca nupa ta'bia ládxí'gaca libí'ili'.  
 Guli'naba gaca dxí'a quegaquië',  
 en biti' udxíali' légaquië' dö'.  
 15 Buli'dzéalén nupa tu' dzeja.  
 Guli'códxilen nupa ta'bödxí.  
 16 Guli'gaca tuz len luzá'ali'.  
 Biti' gun ba zxön cuinli',  
 pero guli'gún tsözxön yugu' bönni' nöxaj ladxi'.  
 Biti' guéquili' chinadéli'li' iduté yöl-la' réajni'i.  
 17 Cuntu nu ubí'ili' que,  
 biti' guá'ali' dö' que nu ruá' dö' queéli'.  
 Guli'gún dxí'a quegaca yúgu'të bönachi.  
 18 Channö huáca, tsca séqui'li', guli'cóz dxí'a  
 len yúgu'të bönachi.  
 19 Böchi' luzá'ado', biti' uzí' lébili' bönachi la' libí'isili', pero guli'gú' lataj  
 ubi'ë Dios quegaca bönachi na', tu' nazúaj lu guichi lá'ayi le rnna:  
 Neda' caza' uzí' lëba'.  
 Neda' ubi'a quegaca bönachi.  
 Caní gunné' Xanru' Dios. 20 Lësca' caní rnna:  
 Channö zoë' nu bönni' biti' ridzáguië' li' dxí'a,  
 en ridunë', bë'ë le gahuë'.  
 Channö ribidxë' nisa, bë'ë le guí'jë'.

Cate' gunu' caní, gunu' ga utuí'iné' bönni' na'.

<sup>21</sup> Biti' gu'u lataj inná be'e le ruá' dö' li',  
pero gunná be'e le ruá' dö' na',  
ugunu' dxin le naca dxi'a.

## 13

<sup>1</sup> Yúgu'téli' ral-la' gunli' ca ta'nné' bönni' yúlahui'. Dios caz budödé' lu ná'agaquié' yöl-la' unná bē' nápaqaquié', en nucu'ē xilátjagaquié' bönni' ni dē lu ná'agaquié' yöl-la' unná bē'. <sup>2</sup> Que lē ni na', nu ridá'baga' yúlahui' ridá'baga' le nuzóa cazé' Dios, ate' nupa ta'dá'baga' caní, nabága'gaca xiguaia'. <sup>3</sup> Nacu'ē bönni' yúlahui', calēga para ulu'zené' bach nu run le naca dxi'a, pero para ulu'zené' bach nu ruá' dö'. Channö ré'ēnu' gunu' ga bití' ulu'zené' li' bach, ben le naca dxi'a, ate' uruju' dxi'a lógaquié'. <sup>4</sup> Náquié' bönni' yúlahui' ni'a nē'ē Dios para gácalenē' li', pero channö runu' le ruá' dö', ral-la' gádxinu', tu' cabí nu'ē nítisö xiyaga yúlahui'. Náquié' ni'a nē'ē Dios para uzí' lēbē', gunē' xiguaia' nu ruá' dö'. <sup>5</sup> Que lē ni na' run bayudxi gunli' ca rnné' bönni' na' dē lu nē'ē, calēgasö tu' budödé' Dios lu nē'ē gunē' libí'ili' xiguaia', pero lēsca' para soa dxi lādxi'do'oli' lahuē' Dios. <sup>6</sup> Que lē ni na' ca' riguizxaj lázali' que yúlahui', tu' nácaqaquié' bönni' yúlahui' ni'a nē'ē Dios, en tunē' le nudödi cazé' lu ná'agaquié'.

<sup>7</sup> Guli'guíxaj yúgu'tē bönachí le rál-la'li' quégaquié'. Guli'guíxaj lázali' lu na' nu ral-la' quíxaj lázali'. Guli'guíxaj dumí nu ral-la' quíxajali'. Guli'gadxi nu ral-la' gádxili', en guli'gún bal nu ral-la' gunli' bal. <sup>8</sup> Cuntu nu bi ral-la' gál-la'li' que, pero tuz ral-la' idxi'ili' luzá'ali', tu' chibén idú ca rinná bē' xibá queé' Dios nu nadxi'i luzé'e. <sup>9</sup> Caní ta'nná bē' xibá na':

Biti' gunu' dul-la' le riguítsaj xibá que yöl-la' nutsaga na'.

Biti' gútiu' bönachí.

Biti' cuanu'.

Biti' innío' que luzó'o le cabí nácatē.

Biti' sē lādxi'u le dē que luzó'o.

Yugu' xibá ni, en yúgu'tē xibá ia'zica'rö, údxi gun nu run ca rnna didza' rnna caní:

Bidxi'i luzó'o ca nadxi'i cuinu'.

<sup>10</sup> Nu na' nadxi'i luzé'e bití' bi run que luzé'e le ruá' dö'. Caní naca, nu na' nadxi'i luzé'e run idú ca rinná bē' xibá queé' Dios.

<sup>11</sup> Guli'gún caní tu' nözili' ca raca dza ni zóaru' na'a, en nözili' ca' chibidxi'n dza usubán lādxi'li' ca rubán nu chiguxi, tu' chizóarö gal-la' dza uláru' lu le ruá' dö' ca guca cate' ni' gusi'loru' réajl'é'ēru' Cristo. <sup>12</sup> Ga zóaru' na'a naca ca chi'i dzö'ölö, ate' chizóa tödi rēla na', pero ga na' zoé' Cristo naca ca lahui' dza, ate' chizóa tsöjsóaru' ni'. Que lē ni na' ral-la' ucá'anaru' le tun bönachí ga naca chul-la que dul-la'. Ca na' rugacu cuiné' tu bönni' rejé' gudil-la le run chi'i lē' lu gudil-la, ral-la' taru' lu bení' queé' Dios, le gun chi'i rē'u lu na' tu' xihui'. <sup>13</sup> Para gunru' caní ral-la' gunru' dxi'a ca ral-la' gun nu ridá lahui' dza.

Biti' ral-la' súdxiru', en cabí gágulē'ēru'.

Biti' ral-la' gunru' le ruá' dö', en calēga le gun ditaj rē'u.

Biti' ral-la' tíl-lalenru' luzá'aru', en cabí uzxé'ēru' luzá'aru'.

<sup>14</sup> Na'a, ral-la' un cuinli' lu icja lādxi'do'oli' ca náquié' Xanru' Jesucristo, en bití' güf'i lādxi'li' gunli' le rizé lādxi'li' lu yöl-la' bönáchisö queéli'.

## 14

*Biti' ral-la' si' quída'ru' böchi' luzá'aru'*

<sup>1</sup> Guli'güf' lataj nu réajlë' Cristo gun libí'ili' tsözxön sal-la' biti' naca idú ca réajlë' nu na' Lë'. Biti' tül-lalenli' nu na' ca náca gaca le runi nu na' huáca nu gun. <sup>2</sup> Ca naca lë ni, nacu'ë bönni' runi légaquië' huáca ilahuë' yúgu'të le tagu bönachi, pero ia'bal-lë' bönni', tu' cabí naca idú ca ta'yéajlë'ë Cristo, tágusë' le raza ruzóaru'. <sup>3</sup> Na'a, bönni' na' rahuë' yúgu'të biti' ral-la' uzóë' tsölá'aló nu bönni' biti' rahuë' yúgu'të, en lësca' caní, bönni' na' biti' rahuë' yúgu'të biti' ral-la' si' quídzë'ë bönni' na' rahuë' yúgu'të, tu' nazí lu në'ë Dios iropë' bönni' na' ta'yéajlë'ë Cristo. <sup>4</sup> ¿Nuzxi caz lí, rizi' quídz'u bönni' huen dxin que nu yúbölö? Bönni' na' náquië' huen dxin queë' Dios, lahuë' Xan cazë' urúajë' tsahui' o biti' urúajë' tsahui'. Channö urúajë' tsahui' lahuë' Dios, naca tu' gun cazë' Xanru' Dios ga urúajë' tsahui'.

<sup>5</sup> Nadxi ca' zoë' nu bönni' runrë' bal tu dza ca runë' bal ia'zíca'rö dza, ate' bönni' yúbölö, tuz ca runë' bal yúgu'të dza. Tu turu' ral-la' usédada'aru' channö naca dxi'a le runru'. <sup>6</sup> Bönni' na' runë' bal tu dza, runë' le bal para tseaj ládxe'ë Xanru', ate' bönni' na' biti' runë' bal dza na', para tseaj ládxe'ë Xanru' biti' runë' bal dza na'. Lësca' caní, bönni' na' rahuë' yúgu'të, rahuë' caní para tseaj ládxe'ë Xanru', en rë'ë Dios: "Xclenu", ate' bönni' na' biti' rahuë' yúgu'të, biti' rahuë' le para tseaj ládxe'ë Xanru', en rë'ë ca' Dios: "Xclenu".

<sup>7</sup> Biti' zoë' nabanë' queëzë' nitüë' bönni' nabábalenë' rë'u, en biti' ratië' queëzë' nitüë' bönni'. <sup>8</sup> Channö zóaru' nabanru', para tseaj ládxi'ru'-në' Xanru' zóaru' nabanru', en channö gátiru', para gaca yöl-la' ba queë' Xanru' gátiru'. Caní naca, channö zóaru' nabanru' o channö gátiru', nequi quéziru' queë' Xanru'. <sup>9</sup> Que lë ni na' ca' gútië' Cristo, en bubanë', para gáquië' Xángaca nupa chinátigaca, en nupa nabángaca.

<sup>10</sup> Na'a lí, ¿bizx que richugu bë'u böchi' luzó'o? ¿Bizx que ruzú' tsölá'aló böchi' luzó'o? Yúgu'tëru' idxinru' lahuë' Cristo ga uchi'a usöröë' rë'u. <sup>11</sup> Ca naca lë ni nazúaj lu guichi lá'ayi, rnna:

Rnnë' Xanru': "Ni'a quia' neda' caz,  
ulu'zechu zxíbigaca yúgu'të bönachi lahua' neda'.  
Ila'guixjö' yálajdo' naca' Dios."

<sup>12</sup> Caní naca, uchi'a usöröë' Dios yúgu'tëru'.

*Biti' ral-la' gunru' ga ichixi iníguinë' böchi' luzá'aru'*

<sup>13</sup> Que lë ni na', bítirö ral-la' ichugu bé'eru' luzá'aru', pero ral-la' gun yúdxiru' cabí gunru' ga ichixi iníguinë' böchi' luzá'aru', en para cabí gunru' ga gunë' dul-la'. <sup>14</sup> Nöz quézida' biti' bi dë le ráguru' le gaca gun ga bítirö nácaru' tsahui' lahuë' Dios, ate' röjlöz lë ni didza' bë'ë Xanru' Jesús. Channö réquinë' tu bönni' zoa bi gaca gun ga bítirö náquië' tsahui' lahuë' Dios, queë' bönni' ni, caní naca. <sup>15</sup> Channö rusuhu'innu' böchi' luzó'o, tu' ragu' le runi lë' biti' ral-la' gáguru', biti' runu' ca ral-la' gun nu nadxí'i böchi' luzé'e. Biti' bi ral-la' gagu' le gun ga gaca chopá ládxe'ë bönni' na', gútië' Cristo uláz queë'. <sup>16</sup> Que lë ni na', biti' bi gunli' le gun ga ila'nnë' xihui' bönachi que le rusáca'li' queëli' naca tsahui'. <sup>17</sup> Cate' rinná bé'enë' Dios rë'u, biti' ru'í ládxi'ru' le gu'aj gáguru', pero ru'í ládxi'ru' gácaru' tsahui', en sóaru' dxi ládxi', en udzéjaru', yugu' le gaca gunru' tu' zóalenë' Dios Bô' Lá'ayi rë'u. <sup>18</sup> Núti'tës nu run xichiné' Cristo ca náca gaca lë ni, run le raza ládxe'ë Dios, ate' urúaj dxi'a lógaca bönachi.

19 Que lè ni na' ral-la' gunru' le ilún ga gata' le ribequi dxi ládxi'ru' len yúgu'tè bönachi, en le ilún tsutsu turu' ia'turu' ca réajlè'èru' Cristo. 20 Biti' bi ral-la' gagu' le gun ga gaca chopaladxi' nu na' nuzóè' Dios. Nácatè lè na' ta'nná bönachi: "Yúgu'tè dè lataj gáguru'", pero gunru' le ruá' dō' channō gunru' ga ichixi iníguinè' luzá'aru' tu' nōzi lè na' ráguru'. 21 Gácarō dxi'a cabí gagu' bēla', en cabí guí'ju' xisi uva nal-la, en biti' bi gunu' le gun ga ichixi iníguinè' böchi' luzó'o, o le gun ga gaca chopaladxi'è, o le gun ga huóaj ládxi'è ca réajlè'è Cristo. 22 Channō réajlè'u dè lataj bi gunu', ral-la' gunu' le lahuè' Dios ga zu' tuzu'. Bica' ba bönni' na' bití' ruxōsa ládxi'da'ahuè' lè' tu' nōzi lè na' runi lè' dè lataj gunè', 23 pero bönni' na' raca chopaladxi'è tu' nōzi le rahuè', nabáguè'è xíguia', tu' runè' le cabí runi lè' dè lataj gunè'. Naca dul-la' yúgu'tè le runru', le cabí runi rē'u dè lataj gunru'.

## 15

### *Ral-la' gunru' le raza ládxi'è böchi' luzá'aru'*

1 Que lè ni na', channō nácaru' tsutsu ca réajlè'èru' Cristo, ral-la' guá' ilenru' nupa na' nagul-la ládxi'gaca ca ta'yéajlè' Cristo. Biti' ral-la' gunru' le raza ládxi'ru' la' cuínsiru'. 2 Yúgu'tèru' ral-la' gunru' le raza ládxi'è böchi' luzá'aru' para gaca dxi'a queè', en idipa ládxi'è ca réajlè'è Cristo. 3 Caní ral-la' gunru', tu' cabí benè' Cristo le guyaza ládxi'è la' cuínsè', pero guca queè' ca na' nazúaj lu guichi lá'ayi, le rnna: "Budubága'gaca neda' yugu' didza' xihui' gulu'i nupa gula'nné xihui' quiu' Li', Dios." 4 Yúgu'tè le bulu'zúajè' lu guichi lá'ayi dza ni'te, bulu'zúajè' lu guichi para usèdi rē'u. Lè na' nazúaj lu guichi lá'ayi run ga ribózaru' zxönladxi', en ruhuè' tsahui' rē'u. Que lè ni na' zoa le runru' löza. 5 Rinábida'-né' Dios, Nu run ga ribózaru' zxönladxi', en Nu ruhuè' tsahui' rē'u, gunè' ga gunli' tuz ca rusáca'li' queéli', para gácali' ca na' rē'èné' Jesucristo. 6 Caní ral-la' gunli' para gácali' tuz, cú'uli'-né' tsózxön yöl-la' ba Dios, Xuzè' Xanru' Jesucristo. 7 Que lè ni na', para gaca yöl-la' ba queè' Dios, guli'sí' lu ná'ali' tuli' ia'tuli' ca na' Cristo guzxi' lu nē'è ca' rē'u. 8 Caní ral-la' gunli', tu' rea' libí'ili': Bidè' Jesucristo, en gúcalenè' bönachi judío, ate' caní bulu'e lahui naca iduté li didza' ru'è Dios, ate' benè' ga bulu'dxín le guzxi' lu nē'è Dios unódzjè' quégaquiè' xuz xtó'otu'.

### *Yugu' bönachi izá'a ila'yöni didza' dxi'a*

9 Bidè' ca' Cristo para benè' ga ila'gú'u Dios yöl-la' ba nupa bití' nácgaca judío tu' ruhuéchi' ládxi'è Dios légaquiè'. Ca naca lè ni nazúaj lu guichi lá'ayi le rnna:

Que lè ni na', ulu'a lahui le nacu' Li' lógaca bönachi iduté yödzölió, en gul-la' quiu' yöl-la' ba.

10 Ga yúbölö nazúaj lu guichi lá'ayi le rnna: Libí'ili', bönachi iduté yödzölió, buli'dzéjalen bönachi queè' Dios.

11 Ga yúbölö nazúaj ca' lu guichi lá'ayi le rnna: Guli'cu'è Xanru' yöl-la' ba, yúgu'téli' bití' nácali' judío. Guli'tséaj ladxi' Lè', yúgu'téli' zóali' iduté yödzölió.

<sup>12</sup> Lësca' caní buzúajë' Isaías lu guichi le rnna: Ilá' lahui Nu nababa dí'a dza queë' Isaí. Gaca lo Nu na' para inná be'e nupa bití' nácgaca judío. Nupa ni ilún löza Lë'.

<sup>13</sup> Rinábida'-në' Dios, Nu run ga runru' löza, gunë' ga udzëjade'eli', en ga soa dxi ládxi'li' tu réajlë'ëli' Lë', en gunë' ga gaca idú ca runlí' löza, tu zóalen yöl-la' huáca queë' Dios Bö' Lá'ayi libí'ili'.

<sup>14</sup> Böchi' luzá'ado'. Chinóz quézida' rúntica'sili' le naca dxi'a, en dëda' yöl-la' réajni'i queëli' para gaca uzëajni'ili' luzá'ali'. <sup>15</sup> Na'a naca' rugu ladxí', ruzúaja' queëli' lu guichi ni, böcha'a, en rusá'a ládxi'li' tu' zoa le buzá' ládxi'ë Dios quia' neda'. <sup>16</sup> Que lë ni na' runa' xichinë' Jesucristo lógaca bönachi bití' nácgaca judío, en runa' libán que didza' dxi'a queë' Dios, para gaca ugu'a bönachi bití' nácgaca judío lu në'ë Dios, nupa na' guró cazë' Dios Bö' Lá'ayi queë' Lë'. Ilácgacquië' ca tu le rigú'uru' lu në'ë Dios, le raza ládxi'ë Lë'.

<sup>17</sup> Na'a, tu' rúnlena' tsözxön Jesucristo dxin, dë lu na'a tsaza ládxa'a ca naca le nuna' lu xichinë' Dios. <sup>18</sup> Lësca' rurúguida' innía' ca naca lë na' benë' Cristo lu na'a neda', benë' ga tun bönachi bití' nácgaca judío ca rnna xtídzë'ë Dios. Lë ni benë' Lë', bugunë' dxin didza' bë'a neda', en yugu' dxin bena' neda'. <sup>19</sup> Lu na'a neda' bugunë' dxin ca' le nácgaca bë' bulu'e lahui Lë', en yugu' yöl-la' huáca zxön benë', en yöl-la' huáca na' queë' Dios Bö' Lá'ayi le guzóalen neda'. Caní guca, gusí lahua' runa' libán lu yödzo Jerusalén, ate' idú gásibi'ilö ga ridxintë luyú Ilírico, chinuna' libán que didza' dxi'a ca naca queë' Cristo. <sup>20</sup> Bë' ládxa'a bena' libán que didza' dxi'a ga bití' bila'yöni bönachi ca naca queë' Cristo. La'tu' guna' libán ga chibila'yöni bönachi, guna' neda' ca runë' tu bönni' ruguelë'ë lahui dxin zxön chinunë' bönni' yúbölö. <sup>21</sup> Ca bena' neda' naca ca na' nazúaj lu guichi lá'ayi le rnna:

Ila'lë'e nupa nacué' ga cuntu nu ben libán queë' Lë', en ila'yëajni'i nupa catu caz bila'yöni ca naca queë'.

*Rë'ënë' Pablo tsejë' yödzö Roma*

<sup>22</sup> Que lë ni na', sal-la' zían luzuí gú'unida' guída' ga zóali', bití' guca guída'. <sup>23</sup> Na'a, chibudxi bena' dxin quia' yugu' lataj ni, en chirë'ënda' zían iz guída' ga zóali'. <sup>24</sup> Que lë ni na', cate' tseja' luyú España, töda' ga zóali' libí'ili', tu' runa' löza uduyúa' libí'ili', en udzëjalenda' libí'ili'. Tödi ni' huáca ugú'uli' neda' nöza. <sup>25</sup> Na'a ral-la' tseja' Jerusalén, tsöju'a tu le gácalen nupa ni' néquiquequi queë' Cristo. <sup>26</sup> Caní guna', le gula'yaza ládxi'gaquië' bönni' nacué' luyú Macedonia, en luyú Acaya, bulu'tubë' bi tu'nödzejë' quéguequi bönachi yechi' dzágagaca bönachi queë' Cristo, nacué' Jerusalén. <sup>27</sup> Gula'yaza ládxi'gaquië' bönni' bití' nácgacquië' judío gulunë' lë ni. Le nácatë naca tu le rál-la'gaquië' quégaca bönachi judío ni'. Channö bönni' bití' nácgacquië' judío tu'zi'ë xibé le nácgaca queë' Dios ni'a que le núngaca bönachi judío, lësca' ral-la' ilácalenë' bönachi judío na', ulu'gunë' dxin le dë quégaquië'. <sup>28</sup> Que lë ni na', cate' údxi udöda' lu ná'agaca bönachi judío lë na' bulu'nödzejë' bönni' ni, ní'irö töda' ga zóali' libí'ili' cate' tseja' luyú España. <sup>29</sup> Cate' guída' ga zóali', runa' löza idxínlëna' yúgu'të le ruzí'iru' xibé ni'a que didza' dxi'a queë' Cristo.

<sup>30</sup> Ni'a queë' Xanru' Jesucristo, en ni'a que yöl-la' nadxí'i ruchízië' Dios Bö' Lá'ayi icja ládxi'do'oru', ráta'yua' lolí, böcha'ado', ulídzali'-në' Dios

tsözxön len neda', inábili'-në' gácalenë' neda'. <sup>31</sup> Guli'nabi-në' Dios gunë' ga ulá' neda' lu ná'agaquië' bönni' biti' ta'yéajlë'ë nacu'ë luyú Judea, en gunë' ga ila'yaza ládxi'gaquië' ila'zi'ë lë na' tsöju'a lu ná'agaquië' bönni' nácaagaquië' queë' Cristo, nacu'ë Jerusalén. <sup>32</sup> Guli'nabi-në' ca', channö naca ca ré'ënë' Dios, gunnë' neda' lataj idxina' queëli' len yöl-la' rudzeja quia', para uzí ládxi'lëna' libí'ili'. <sup>33</sup> Na'a rinábida'-në' Dios, Nu run ga zoa dxi ládxi'ru', sóalenë' yúgu'tëli'. ¡Ca' gaca!

## 16

### *Tu'gapa Dios luzë'eguequi bönachi queë' Cristo*

<sup>1</sup> Rigu'a-nu lu ná'ali' Febe, nigula zanru' dá'anu Xanru'. Nácanu nigula huen dxin queë' Dios dzáganu bönachi queë' Cristo nacua' yödzö Cencrea. <sup>2</sup> Uláz queë' Xanru' guli'sí' lu ná'ali'-nu nigula na', ca ral-la' ilún bönachi queë' Cristo. Guli'gácalen lënu, unödzejali' queënu bití'tës bi riquínnu. Lë cázanu gúcalennu bönachi zián, en gúcalennu ca' neda'.

<sup>3</sup> Guli'gapa Dios Priscila, en Aquilo, nupa na' gulunlen neda' tsözxön dxin queë' Jesucristo. <sup>4</sup> Chopë' ni gula'dödë' ga guzóa bönadxi ilátië' para gulunë' ga cabí gátia' neda', ate' rea' légaquië': "Xclenli'", en calégasö neda', pero lësca' yúgu'të böchi' luzá'aru' nabábagaquië' gapa nacua' bönachi queë' Cristo biti' náca gaca judío, tē'ë légaquië': "Xclenli'." <sup>5</sup> Guli'gapa Dios bönachi queë' Cristo tu'dubë' lu yu'u lidxigaquië' Priscila, en Aquilo na'. Guli'gapa Dios Epeneto, bönni' na' nadxí'ida'. Bönni' ni guyéajlë'ë Cristo zí'atélö ca yúgu'të bönachi luyú Acaya. <sup>6</sup> Guli'gapa Dios María, nigula na' bennu dxin zxön queë' Cristo ga ni' rudúbili' libí'ili'. <sup>7</sup> Guli'gapa Dios Andrónico, en Junias, yugu' bönni' uládz quia'. Yugu' bönni' ni gula'dzúnlenë' neda' tsözxön lidxi guié, en nadéli'gaquië' lataj lo ladaj bönni' gubáz nasöl-lë'ë Cristo. Lësca' gula'yéajlë'ë Cristo zí'alö ca neda'.

<sup>8</sup> Guli'gapa Dios Amplias, bönni' na' nadxí'ida', en néquinë' queë' Xanru'. <sup>9</sup> Guli'gapa Dios Urbano, bönni' na' bénlenë' netu' tsözxön dxin queë' Jesucristo. Guli'gapa Dios Estaquis, bönni' na' nadxí'ida'. <sup>10</sup> Guli'gapa Dios Apeles, bönni' na' naca bë' réajlë'ë Cristo. Guli'gapa Dios nupa nacua' lidxë' Aristóbulo. <sup>11</sup> Guli'gapa Dios Herodiön, bönni' uládz quia'. Guli'gapa Dios nupa nacua' lidxë' Narciso, en ta'yéajlë'ë Xanru'. <sup>12</sup> Guli'gapa Dios Trifena, en Trifosa, nigula na' tunnu dxin queë' Xanru'. Guli'gapa Dios Pérsida, nigula na' bennu dxin zxön queë' Xanru', ate' nadxí'iru'-nu. <sup>13</sup> Guli'gapa Dios Rufo, bönni' rö queë' Xanru'. Guli'gapa Dios xinë'ë Rufo na', nácanu ca' ca xiná' caza'. <sup>14</sup> Guli'gapa Dios Asíncrito, en Flegonte, en Hermas, en Patrobas, en Hermes, enca' yugu' böchi' luzá'aru' dá'gaquië' Xanru', nacua'lenë' légaquië'. <sup>15</sup> Guli'gapa Dios Filólogo, en Julia, en Nereo, en nigula zanë' Nereo na', enca' Olimpas, en yúgu'të böchi' luzá'aru' ta'yéajlë'ë Cristo, nacua'lenë' légaquië'.

<sup>16</sup> Guli'gapa Dios luzá'ali', unída'li' luzá'ali' lu yöl-la' nadxí'i queëli'. Tu'gapë' Dios libí'ili' yúgu'të böchi' luzá'aru' nabábagaquië' gapa nacua' bönachi queë' Cristo luyú ni.

<sup>17</sup> Na'a, ráta'yua' loli', böcha'ado', guli'gún ga ilaca bë' nupa tun ga irúajli' choplö, en tun ga ichixi iníguili', tu' tu'sédinë' le cabí röjlöz le nazédali'. Guli'cuíta ga nacua' bönachi caní <sup>18</sup> tu' cabí tun xichinë' Jesucristo. Tunë' dxin para bi gata' quégacasë, en ta'zí' yé'enë' yugu' bönni' nōxaj ladxi', tu'gunë' dxin didza' nōxaj ladxi', en didza' tséajlë'ëru'

le cabí nácatë. <sup>19</sup> Rizé didza' ca na' runli' ca rnna xtídzë'ë Xanru', ate' ta'yöni yúgu'të bönachi. Que lë ni na' rudzëjada' ni'a que le runli' libí'ili'. Na'a, rë'ënda' gácali' sina' gunli' le naca dxi'a, en calëga gunli' le ruá' dö'. <sup>20</sup> Dios, Nu run ga zóaru' dxi ladxi', si' gunë' ga ucúl-lali' Satanás, tu' xihui'. Rinábida'-në' Xanru' Jesucristo uzá' lãdxë'ë queëli' le gácalen libí'ili'.

<sup>21</sup> Bi'i Timoteo, bi'i na' rúnlenbi' neda' tsözxön dxin, rugápabi' Dios libí'ili'. Lucio, en Jasón, en Sosípater, yugu' bönni' uládz quia', tu'gapë' Dios libí'ili'.

<sup>22</sup> Neda', Tercio, ruzúaja' lu guichi didza' ni ru'ë Pablo, rugapa' Dios libí'ili', dzáguië' Xanru' neda'.

<sup>23</sup> Gayo, bönni' ni ru'ë neda' lataj zoa' lidxë', en ru'ë ca' lataj tu'dubi yúgu'të bönachi queë' Cristo ni, rugapë' Dios libí'ili'. Erasto, bönni' yu'u lu në'ë dumí que yödö ni, rugapë' Dios libí'ili'. Böchi'ru'do' Cuarto rugapë' Dios libí'ili'.

<sup>24</sup> Rinábida'-në' Xanru' Jesucristo uzá' lãdxë'ë queëli' yúgu'tëli' le gácalen libí'ili'. ¡Ca' gaca!

### *Yöl-la' ba Dios*

<sup>25</sup> Na'a, rigú'utu'-në' yöl-la' ba Dios, Nu gaca gun tsutsu libí'ili' ca naca didza' dxi'a runa' libán que, en ca naca libán runa' ca naca queë' Jesucristo, en ca naca le chibulu'ë lahui Dios que le bigachi' queë', lë na' bucáchë'ë Lë' dza ni'te ga bidxintë na'a dza. <sup>26</sup> Na'a chibulu'ë lahui lë ni yugu' lu guichi bulu'zúajë' bönni' gulu'ë didza' uláz queë' Dios ca na' gunná cazë' Dios, Nu zóatica'sö. Na'a raca libán que lógaca yúgu'të bönachi para gaca ila'yéajlë' Cristo, en ilún ca rnna xtídzë'ë.

<sup>27</sup> ¡Ni'a que le benë' Jesucristo, gácatica'sö yöl-la' ba queë' la's dui Dios, Nu rácatëro caz! ¡Ca' gaca!

## DIDZA' ZÍ'ALÖ GUSÖL-LË'Ë PABLO YÖDZÖ CORINTO

*Pablo rugapë' Dios bönachi queë' Cristo nacu'ë Corinto*

<sup>1</sup> Ca rë'ëni quézinë' Dios bulidzë' neda', Pablo, para gaca' gubáz queë' Jesucristo. Böchi'ru' Sóstenes runë' neda' tsözxön. <sup>2</sup> Rugapa' Dios libí'ili', böchi' luzá'ado', rudúbili' queë' Dios lu yödzo Corinto, en nácali' quez queë' Dios tu' nácali' tuz len Jesucristo. Dios caz bulidzë' libí'ili' para guéquili' quez queë' tsözxön len yúgu'të nupa nacuá' yúgu'të lataj, en tu'lidzë' Dios, tu'gunë' dxin La la'ayi queë' Xanru' Jesucristo, Xángaquië', enca' Xanru'. <sup>3</sup> Ráta'yua' lahuë' Xúziru' Dios, en lahuë' Xanru' Jesucristo uzá' ládxë'ë queëli', en gunë' ga soa dxi icja ládxí'do'oli'.

*Yugu' le ruzí'iru' xibë tu' néquiru' queë' Cristo*

<sup>4</sup> Rética'sa'-në' Dios: "Xclenu'" ca naca queëli', tu' zoa le buzá' ládxë'ë Dios queëli' tu' nácali' tuz len Jesucristo. <sup>5</sup> Tu' nácali' tuz len Cristo, Dios chinagú'udë'ë xinözili' yúgu'të le nequi queë'. Rácalenë' libí'ili' ca naca yúgu'të didza' ru'í'ili', en runë' ga réajni'ili' yúgu'të. <sup>6</sup> Caní naca, tu' guzxf' lu ná'ali' idú ládxí'li' le runtu' liná' lo ca naca queë' Cristo. <sup>7</sup> Que lë ni na', biti' bi riyadzaj queëli' que le runnë' Dios Bö' Lá'ayi queëru', tsanni ni ribözali' dza na' ilá' lahuë' Xanru' Jesucristo. <sup>8</sup> Lë cazë' utipë' ládxí'li' para gaca guá' ilenli' yúgu'të ga idxintë dza údxi, para cabí gaca nu bi innë queëli' dza ni' huödë' Xanru' Jesucristo. <sup>9</sup> Dios runë' ca rnnë', en Lë cazë' bulidzë' libí'ili' para gácali' tuz len Zxí'inë', Xanru' Jesucristo.

*Narúajgaca choplö bönachi queë' Cristo nacu'ë Corinto*

<sup>10</sup> Ni'a queë' Xanru' Jesucristo ráta'yua' loli', böchi' luzá'ado', guli'gún tuz xtídza'li' yúgu'tëli'. Biti' irúajli' choplö, pero guli'gaca tuz ca rizá' ládxí'li', en ca runi libí'ili'. <sup>11</sup> Caní rea' libí'ili', böchi' luzá'ado', tu' gula'guíxjöi'inë' neda' bönni' nacu'ë lídxinu Cloé ca runli', ta'nnë' ridil-la dídza'li'. <sup>12</sup> Lë ni rnní'a': Nadzá'lö didza' ru'í'ili' tu tuli'. Bál-lali' rnnali' dá'ali' Pablo. Ia'bál-lali' rnnali' dá'ali' Apolos. Ia'bál-lali' rnnali' dá'ali' Cefas, ate' ia'bál-lali' rnnali' dá'ali' Cristo. <sup>13</sup> ¿Naru' birúajtsë' choplö Cristo? ¿Naru' gudá'atsa' neda', Pablo, lë'e yaga cruz uláz queëli'? ¿Naru' bidí'atsali' nisa para gácali' tuz len neda'? <sup>14</sup> Rea'-në' Dios: "Xclenu'", tu' cabí buquila' nisa niturö libí'ili', pero chópasë' Crispo, en Gayo. <sup>15</sup> Que lë ni na' biti' gaca innali' bidí'ali' nisa para gácali' tuz len neda'. <sup>16</sup> Lë'sca' buquila' nisa Estéfanos, en nupa nacuá' lídxë'. Biti' røjneda' channö buquila' nisa nu yúbölö. <sup>17</sup> Gusöl-lë'ë Cristo neda', calëga para uquila' bönachi nisa, pero para guna' libán que didza' dxi'a. Ru'a didza', calëga lu yöl-la' rácada' que caza', para cabí ucácha'a yöl-la' huáca que le benë' Cristo lë'e yaga cruz.

*Cristo napa cazë' yöl-la' huáca, en yöl-la' réajni'i queë' Dios*

<sup>18</sup> Nupa nácgaca chul-la niti téquiguequi cá'asö naca libán runru' ca naca queë' Jesús, ca na' gútië' lë'e yaga cruz, pero rë'u na' nuláru', réquibe'eru' dzaga le yöl-la' huáca queë' Dios le rusólá rë'u. <sup>19</sup> Caní naca, tu' nazúaj lu guichi lá'ayi le rnna: Guna' ga huóaca nítisó yöl-la' rácada' quégaca nupa taca yenni'.



Tsölá'alö uca'ana' yöl-la' réajni'i  
 quégaca nupa ta'yéajni'i yenni'.

<sup>20</sup> ¿Bizxi caz uzi'tsë' xibé bönni' réajni'inë' yenni'? ¿Bizxi caz uzi'tsë' xibé bönni' nabé'ede'enë' ru'ë didza'? Dios chibenë' ga böaca cá'asö yöl-la' réajni'i quégaca bönachi yödzölió ni. <sup>21</sup> Dios, lu yöl-la' réajni'i queë', biti' bë'ë lataj ilünbe'e bönachi yödzölió ni Lë' ni'a que yöl-la' rácada' quégaquië'. Dios guyaza ládxë'ë busölë' nupa ta'yéajlë' Lë' ni'a que libán na' runru', sal-la' téquiguequi bönachi cá'asö naca.

<sup>22</sup> Të'ënnë' yugu' bönni' judío ila'lé'enë' yöl-la' huáca náacagaca bë', ate' bönni' zi'tu' ta'guilljë' yöl-la' réajni'i. <sup>23</sup> Rë'u ni runru' libán queë' Cristo, ca na' gútië' lë'e yaga cruz. Le nácatë, libán runru' ca gútië' Cristo, run ga ta'chixi ta'nigui bönachi judío, ate' ia'zica'rö bönachi téquiguequi cá'asö naca. <sup>24</sup> Bönni' na' bulidzë' Dios légaquië', sal-la' nácaquië' bönni' judío o bönni' zi'tu', téquibe'enë' napa cazë' Cristo yöl-la' huáca queë' Dios, en yöl-la' réajni'i queë' Dios. <sup>25</sup> Téquiguequi bönachi yödzölió ni le benë' Dios naca bë' biti' bi nözinë', pero lë na' benë' náparö yöl-la' réajni'i ca yöl-la' réajni'i quégaca bönachi. Téquiguequi le benë' Dios naca bë' nacuídi'në', pero lë na' benë' náparö yöl-la' huáca ca yöl-la' huáca quégaca bönachi. <sup>26</sup> Na'a, böchi' luzá'ado', guli'tsöjné ca gúcali' cate' bulidzë' Dios libí'ili'. Biti' gula'cu'ë ladjali' zían bönni' ta'yéajni'inë' lu yöl-la' bönáchisö quégaquië', en biti' gula'cu'ë ladjali' zían bönni' unná bë', en calëga zían bönni' nácaquië' lo. <sup>27</sup> Téquiguequi bönachi yödzölió ni yugu' bönni' na' guröë' Dios biti' bi nözguequinë'. Caní benë' Dios para gunë' ga ulu'tuí'i nupa ta'yéajni'i. Lë'sca' caní guröë' Dios nupa nacuídi'gaca yödzölió ni para gunë' ga ulu'tuí'i nupa nál-lagaca. <sup>28</sup> Lë'sca' caní, téquiguequi bönachi yödzölió ni nupa na' guröë' Dios náacagaca cá'asö, en biti' bi náacagaca, en nacuídi'gaca. Caní benë' Dios para gunë' ga ulu'gá'ana cá'asö lë na' tun zxön bönachi yödzölió ni. <sup>29</sup> Que lë ni na', cuntu nu gaca gun ba zxön cuini lahuë' Dios. <sup>30</sup> Dios caz benë' ga nácaru' tuz len Jesucristo, en benë' ga náparu' yöl-la' réajni'i queë' Cristo. Tu' náquië' Cristo tuz len rë'u, nuhuóácaru' tsahui', en néquiru' quez queë' Dios, en nuláru'. <sup>31</sup> Naca ca na' nazúaj lu guichi lá'ayi, le rnna: "Channö zoa nu bi ré'ëni gun zxön, ral-la' gun zxön Xanru'."

## 2

*Libán runru' queë' Cristo, ca gudë'ë lë'e yaga cruz*

<sup>1</sup> Caní guca, böchi' luzá'ado', cate' bidxina' queë'li'. Bena' libán loli' que xtídzë'ë Dios, calëga len yöl-la' réajni'i quia', en biti' bë'a didza' lu yöl-la' rácada' quia'. <sup>2</sup> Cate' ni' guzóalena' libí'ili', bë' ládxa'a cabí gu'a didza' que le yúbölö, pero ca nácatë queë' Jesucristo bë'a didza', ca na' gudë'ë lë'e yaga cruz. <sup>3</sup> Guzóalena' libí'ili' lu yöl-la' ricuidi' quia', ate' lu yöl-la' radxi quia' guzxízida'a. <sup>4</sup> Bë'léna' libí'ili' didza', en bena' libán que xtídzë'ë Dios, calëga ca tuí' didza' bönachi lu yöl-la' rácada' quéguequisö, pero guzóalënë' Dios Bö' Lá'ayi neda', ate' guzóalen yöl-la' huáca queë' Dios neda', le guca bë' naca idútë'li didza' bë'a. <sup>5</sup> Caní bena' para gaca tséajlë'ëli' Dios, calëga tu' biyónili' yöl-la' rácada' quégaca bönachi, pero tu' bilé'eli' yöl-la' huáca queë' cazë' Dios.

*Dios Bö' Lá'ayi runë' ga núnbë'ëru'-në' Dios*

<sup>6</sup> Ruí'itu' didza' lu yöl-la' rácada' lógaca nupa chinácarö idú ca ta'yéajlë' Dios. Yöl-la' rácada' ni biti' naca ca le nápagaca bönachi yödzülió ni, en biti' naca ca le nápagaquie' bönni' ta'nná bë'ë dza ni zóaru' na'a, nupa na' ta'niti caz. <sup>7</sup> Ruí'itu' didza' que yöl-la' rácada' nagachi', lë na' runödzejë' Dios, tu' bigachi' yöl-la' rácada' na' buzóë' Dios dza ni'te para uzí'iru' xibé. <sup>8</sup> Yugu' bönni' ta'nná bë'ë dza ni zóaru' na'a biti' gulúnbë'ë yöl-la' rácada' na'. La'tu' gulúnbë'ë le, biti' ulu'dé'ë Xanru' nayëpisëtë'rë' lë'e yaga cruz. <sup>9</sup> Naca ca na' nazúaj lu guichi lá'ayi le rnna:

Chinupë'ë Dios le ulu'zì' xibé nupa nadxí'iguequi Lë',  
yugu' le cuntú nu ble'e, en biti' biyöni,

en biti' gula'zá' ládxi'gaca bönachi ca naca que.

<sup>10</sup> Na'a, Dios nuzéajni'inë' rë'u yugu' lë ni lu në'ë Dios Bö' Lá'ayi, tu' ruyú cazë' Dios Bö' Lá'ayi yúgu'të, enca' le yu'u icja ládxi'da'ahuë' Dios caz.

<sup>11</sup> ¿Naru' gaca inözínë' nu bönni' le yu'u icja ládxi'da'ahuë' ia'túé' bönni'? Tuz bö' naca cazë' bönni' na' nözi lë na'. Lësca' caní, cuntú nu nözi le yu'u icja ládxi'da'ahuë' Dios. Tuzë' Dios Bö' Lá'ayi nözinë' lë ni. <sup>12</sup> Rë'u ni, biti' nazí' lu ná'aru' tu bö' ridasö yödzülió ni, pero nazí' lu ná'aru' Dios Bö' Lá'ayi, Nu na' ruchízië' Dios rë'u para gaca gúnbë'ëru' yugu' le buzá' ládxi'ë' Dios queëru'. <sup>13</sup> Yugu' lë na' buzá' ládxi'ë' Dios queëru' ruí'iru' didza' que, calëga len didza' tu'sédinë' bönachi rë'u len yöl-la' rácada' quëguequi, pero len yugu' didza' rusédinë' Dios Bö' Lá'ayi rë'u. Caní naca, ruzéajni'iru' bönachi zóalenë' Dios Bö' Lá'ayi légaquie' ca naca le rusédinë' Dios Bö' Lá'ayi rë'u.

<sup>14</sup> Tu bönni' biti' zóalenë' Dios Bö' Lá'ayi lë' biti' rizí' lu në'ë le rusédinë' Dios Bö' Lá'ayi rë'u, tu' réquinë' cá'asö naca. Biti' gaca tséajni'inë' bönni' na' lë ni, tu' gaca guéquibe'enë' tuzë' bönni' zóalenë' Dios Bö' Lá'ayi lë' le nazaca' lë ni. <sup>15</sup> Tu bönni' zóalenë' Dios Bö' Lá'ayi lë' gaca guéquibe'enë' le nazaca' yúgu'të, pero cuntú nu gaca guéquibe'e le nazaca' cazë' bönni' na'. <sup>16</sup> Nazúaj lu guichi lá'ayi le rnna:

¿Nuzxi caz nözi le rizá' ládxi'ë' Xanru'?

¿Nuzxi caz gaca uzéajni'i Lë'?

Le rizá' ládxi'ë' Cristo yu'u icja ládxi'do'oru' rë'u.

### 3

#### *Nácaru' huen dxin tsözxön len Dios*

<sup>1</sup> Que lë ni na', böchi' luzá'ado', biti' guca güf'ilena' libí'ili' didza' ca ruí'ilena'-në' didza' tu bönni' nudödi cuinë' lu në'ë Dios Bö' Lá'ayi, pero bë'lëna' libí'ili' didza' ca ruí'ilena' nu naca bönáchisö didza', biti' zóalenë' Dios Bö' Lá'ayi nu na'. Nácali' ca yugu' bi'i huë'ëni. Biti' nácali' tsutsu ca réajlë'ëli'-në' Cristo. <sup>2</sup> Busédidá' libí'ili' le cabí naca böniga, lë na' guca ca nidxi' güf'ili'. Biti' busédidá' libí'ili' le naca böniga ca bëla' gáguli'. Biti' guca tséajni'ili' le naca ca bëla' gáguli', en biti' rácali' na'a. <sup>3</sup> Caní naca, tu' nácali' ca nu naca bönáchisö ga ridxintë' na'a dza. Tsanni ni ruzxé'eli' luzá'ali', en ridil-la dídza'li', en rirúajli' choplö, nácali' ca nu naca bönáchisö, en runli' tuz ca tun bönachi yödzülió ni. <sup>4</sup> Cate' zóalen libí'ili' nu rnna da' Pablo nu na', en ia'tú nu rnna da' Apolos, nácali' ca nu naca bönáchisö.

<sup>5</sup> ¿Nuzxi caz naca' neda', Pablo? ¿Nuzxi caz na' Apolos? Nácatu' huen dxin queë' Dios, ate' ni'a que le bentu' guyéajlë'ëli' Cristo. Tu tutu' runtu' dxin na' bennë' Xanru' que queëtu'. <sup>6</sup> Dxin bentu' lu icja ládxi'do'oli' naca ca dxin run nu raza ruzóa. Neda' guza' xisedo', ate' Apolos gulu'ë nisa,

pero Dios benë' ga gulén, en guzxón xisedo' na' nadúz icja ládxi'do'oli'.  
 7 Caní naca, láti'do'os nazáquië' bönni' guz, en láti'do'os ca' bönni' rigu'ë  
 nisa, pero nazáca'dë'ë Dios Nu run ga rilén, en rixzón xisedo' na'. 8 Tuz ca  
 nácaagaquië' bönni' razë', en bönni' rigu'ë nisa. Dios ubi'ë que queëgaquië'  
 tsca naca dxin runë' tu tuë'. 9 Nácatu' huen dxin tsözxón len Dios, ate'  
 libí'ili' nácali' ca la' yëla queë' Dios ga runtu' dxin.

Lësca' caní nácali' ca tu yu'u runë' Dios. 10 Ca naca le buzá' ládxe'ë  
 Dios quia', naca' ca tu bönni' huen zö'ö lo. Neda' gulu'a xilibi zö'ö, ate'  
 nu yúbölö richisa zö'ö na'. Tu turu' ral-la' uyuru' ca richísaru' zö'ö lahui  
 xilibi zö'ö na'. 11 Dios chigulu'ë tu xilibi zö'ö le naca Lë cazë' Jesucristo,  
 ate' cuntu nu gaca cu'u ia'tú xilibi zö'ö caní. 12 Dxin runru' queë' Cristo  
 naca ca richísaru' zö'ö lahui xilibi zö'ö na'. Lahui xilibi zö'ö na' gaca  
 nu gun dxin le naca ca richisa zö'ö le naca ca le néquini oro, o plata, o  
 guiój nazáca'da'gaca, o gaca nu gun dxin le naca ca richisa zö'ö le néquini  
 yaga, o guizxi, o guixi' cá'asö. 13 Gaca bë' ca naca dxin núngaca tu tu  
 bönachi. Cate' idxín dza ichúguië' Dios quégaca bönachi, ilá' lahui dxin  
 nunru', tu' tódi dxin na' lu guí', ate' guí' na' si' bë' dxin núngaca tu tu  
 bönachi. 14 Channö dxin nunë' tu bönni' urúaj dxi'a lu guí' na', le naca ca  
 tu zö'ö guchisë', Dios ubi'ë queë' ca sa'yéaj dxin nunë'. 15 Channö tsegui  
 dxin nunë' tu bönni' le naca ca tu zö'ö guchisë', unítië' le ré'ënë' ubi'ë Dios  
 queë', pero ulá cazë' lë', ate' gaca queë' ca raca que nu rulá tu lu guí'.

16 ¿Naru' cabí nözili' naca cázali' yudo' queë' Dios, ate' zoë' Dios Bö'  
 Lá'ayi icja ládxi'do'oli'? 17 Channö nu usuniti yudo' queë' Dios, Dios  
 usunitié' nu na', tu' naca lá'ayi yudo' queë' Dios, ate' libí'ili' naca cázali'  
 yudo' na'.

18 Biti' si' ye'e cuinli'. Channö réqui nu nutsa' ládjali' rácada' ca tácada'  
 bönachi yödzölió ni, ral-la' huóaca nu na' ca tu bönni' biti' bi nözinë', para  
 gata' que yöl-la' rácada' le naca idú. 19 Nu bönni' napzë' yöl-la' rácada' que  
 yödzölió ni náquië' tu bönni' biti' bi nözinë' lahuë' Dios. Nazúaj lu guichi  
 lá'ayi le rnna: "Dios runë' ga ila'chixi ila'nigui nupa tácada', rugunë' dxin  
 yöl-la' rácada' queéqueui." 20 Lësca' caní rnna: "Xanru' nözinë' nítisö naca  
 le ta'bequi íc jagaca bönachi tácada'." 21 Que lë ni na', biti' ral-la' gunlí' zxón  
 le gaca gunë' tu bönni'. Nequi queëli' yúgu'të. 22 Néquiquequi queëli':

Pablo, en Apolos, en Cefas,  
 en yödzölió ni,  
 en yöl-la' na'bán, en yöl-la' guti,  
 en dza ni zóaru' na'a, en dza si' za'.  
 Yúgu'të nequi queëli',  
 23 ate' libí'ili' néquili' queë' Cristo,  
 ate' Cristo néquinë' queë' Dios.

## 4

### *Dxin tunë' bönni' gubáz nasöl-lë'ë Cristo*

1 Que lë ni na', ral-la' guéquili' nácatu' netu' huen dxin queë' Cristo,  
 en nazí' lu na'tu' le nagachi' queë' Dios. 2 Yugu' bönni', Dios nudödë' lu  
 ná'agaquië' ulu'gunë' dxin le nequi queë', run bayudxi ilunë' idú dxi'a  
 le tunë'. 3 Biti' bi ruí'i ládxa'a channö uchi'a usöröli' neda', o channö  
 ulu'chi'a ulu'sörö bönachi yödzölió ni neda'. Biti' ca' ruchi'a rusörö cuina'.  
 4 Biti' ruxös ládxi'da'ahua' neda'. Lë ni biti' naca bë' biti' nabága'a xíguia'.  
 Xanru' náquië' Nu ruchi'a rusöröë' neda'. 5 Que lë ni na', biti' ral-la' uchi'a

usöröli' nu bönni' zí'alö ca idxín dza que. Guli'cöz dza ni' huödë' Xanru', ate' Lë' ubéajë' ga liná' le nagachi' ga chul-la, en ulu'ë lahui le yu'u icja ládxi'do'gaca yúgu'të bönachi. Ní'rö Dios ubi'ë que queëgaca bönachi le gun bal léguequi ca ral-la' gaca queguequi.

<sup>6</sup> Na'a, böchi' luzá'ado', ca naca lë ni, bë'a didza' que le runtu' netu', Apolos, en neda'. Huáca usédali' ca runtu' netu' para gunli' le nazúajsö lu guichi lá'ayi, en biti' gunli' zxön tuë' bönni', en biti' uzóali' tsölá'alö ia'tué'.

<sup>7</sup> ¿Nuzxi bentsö ga nacu' li' lo? ¿Bizxi caz bidéli'nu' li' le cabí bennë' Dios quiu'? Channö Lë' bénnasë' quiu' lë na' dë lu no'o, ¿bizx que run ba zxön cuinu', réquinu' rácasö quiu' bidéli'nu' lë na'?

<sup>8</sup> ¿Naru' réquitseli' nadéli'tëröli'? ¿Naru' réquitseli' rilé'eli' yöl-la' tsahui' queéli'? ¿Naru' réquitseli' rinná bë'ëli', sal-la' biti' rinná bë'ëtu' netu'? Ní'a queë' Xanru' Dios rë'ënda' inná bë'ëli' para gaca inná bë'lentu' libí'ili' tsözxön. <sup>9</sup> Runi neda' naca queëtu', bönni' gubáz queë' Dios, ca nuzóë' netu' zéajtu' xibánitë ca na' raca quegaquië' bönni' chinarugu quegaquië' ilátië' lahui' lógaca bönachi. Nácatu' ca tu le tu'yuda' bönachi yödzülió ni, enca' ca tu le tu'yúdë'ë gubáz lá'ayi queë' Dios. <sup>10</sup> Tu' rë'ënitü' guntu' xichinë' Cristo, ru'itu' bönachi lataj téquiguequi nácatu' bönni' biti' bi nõzquequinë', pero libí'ili' réquili' rácada'ali' tu' nácali' queë' Cristo.

Libí'ili' réquili' chinál-lali',  
pero téquiguequi bönachi nacuídu' tu' netu'.  
Tu'zóa bönachi netu' tsölá'alö,  
pero tun libí'ili' bal.

<sup>11</sup> Ga ridxintë na'a dza, riduntu', en ribídxitu' nisa.  
Biti' dë lari' gácutu'.

Tun bönachi netu' zí', en biti' zoa lídxitu'.

<sup>12</sup> Rusaca' zí' cuintu', la' nétu'sö runtu' dxin.

Tu'lidza bönachi netu' zí',  
pero netu' rinábatu' le gácalen léguequi.

Ta'bía ládxi'gaca bönachi netu',  
pero ruá' rilentu' le.

<sup>13</sup> Ta'nnë' queëtu',  
pero lu yöl-la' nõxaj ladxi' ru'ilentu' légaquië' didza'.  
Ga ridxintë na'a dza nácatu' ca bëbu que yödzülió ni,  
en ca tu le ta'ru'una yúgu'të bönachi.

<sup>14</sup> Ruzúaja' queéli' caní lu guichi, calëga tu' rë'ënda' guna' ga utuí'ili', pero rë'ënda' uzéajni'ida' libí'ili', runa' ca runë' tu bönni' ruzéajni'inë' yugu' xí'ini cazë' tu' nadxí'inë' légacabi'. <sup>15</sup> Sal-la' gaca zían gáyu'ë bönni' ila'cuá'alen libí'ili', en ulu'sédinë' libí'ili' ca naca queë' Cristo, tuz nu zoa naca ca xúzili', nu na' ben ga néquili' queë' Cristo. Lu yöl-la' na'bán cubi le nápalí' tu' dzágali' Cristo, neda' caz naca' ca xúzili' tu' busiyönda' libí'ili' didza' dxi'a. <sup>16</sup> Que lë ni na', ráta'yua' loli' gü'i ládxi'li' gunli' ca runa' neda'.

<sup>17</sup> Que lë ni na' ca' risöl-la'a-bi' bi'i Timoteo ga zóali'. Tu' rúnlenbí' neda' dxin queë' Xanru' nácabí' ca xí'ini caza', en nácabí' idú ladxi', ate' nadxí'ida'-bi'. Gunbí' Timoteo ga tsöjnéli' yugu' xibá rusédida' tu' néquida' queë' Cristo, yugu' le rusédida' yúgu'të lataj lógaca yúgu'të cö' bönachi queë' Cristo. <sup>18</sup> Bál-lali' run ba zxön cuinli' tu' réquili' bití'rö udxina' ga zóali'. <sup>19</sup> Na'a, la' udxíntea' ga zóali' channö Xanru' gunnë' neda' lataj. Ní'rö guéquibe'eda', calëgasö didza' tu'ë bönni' tun ba zxön cúngaquië', pero

guéquire'eda' channö zóalen yöl-la' huáca queë' Dios légaquië'. <sup>20</sup> Channö nazi' lu ná'ali' rinná bé'enë' Dios libí'ili', biti' naca bé' naca caní tu' rnnásili' ca'. Naca bé' naca caní channö zóalen libí'ili' yöl-la' huáca queë' Dios. <sup>21</sup> ¿Bíxilo ré'ënili'? ¿Naru' ré'ënili' udxina' ga zóali' len gubá'ayi, para guna' libí'ili' zi', o len yöl-la' nadxf'i, en lu yöl-la' nöxaj ladxi'?

## 5

*Pablo ruchi'a rusöröë' tuë' bönni' runë' le ruá' dö'*

<sup>1</sup> Rizë didza' zóalenë' libí'ili' tuë' bönni' runë' le ruá' dö', tu' zóalenë' nigula queë' xuzë'. Le ruá' dö' caní biti' ca' tun bönachi biti' núnbë'gaca Dios. <sup>2</sup> Libí'ili' run ba zxön cuinli', pero ral-la' huf'inili', en ubéajli' nu na' run dul-la' na' ga zóali'. <sup>3</sup> Sal-la' biti' zóalena' libí'ili' lu idútë le naca', le nácatë zóalena' libí'ili' lu bö' naca caza'. Ca chizóalen caza' libí'ili' chibuchi'a busöröa' nu na' run dul-la' na'. <sup>4</sup> Cate' udúbili' queë' Xanru' Jesucristo guna' libí'ili' tsözxön lu bö' naca caza'. Ní'irö, len yöl-la' huáca queë' Xanru' Jesús <sup>5</sup>buli'dödë' bönni' na' lu na' Satanás tu' xihui' para initi idútë le naca cazë', pero ulá bö' naca cazë' dza ni' huödë' Xanru'.

<sup>6</sup> Biti' naca dxi'a gun ba zxön cuinli' ca naca le runli'. ¿Naru' cabí nözili' didza' na' rRNA: "Cua zído'os que yöta xtila gun ga chazxaj idútë cúa nazi'i le"? <sup>7</sup> Na'a, guli'cúa ga zóali' dul-la' na' le naca ca tu cúa zi gulás, para gácali' dxi'a. Ní'irö gácali' ca tu cúa cubi le cabí nazi'i cúa zi que, ca na' le nácatë chinácali'. Naca queëru' ca chizóaru' Laní Pascua cate' tahuë' yöta xtila biti' nazi' cúa zi que, en chigulútië'-ba' uláz queëru' bö'cu' zxila' que Laní Pascua na', bö'cu' zxila' na' náquië' Lë cazë' Cristo. <sup>8</sup> Que lë ni na' ral-la' gunru' laní na', calëga zóalen rë'u cúa zi gulás na' le rulu'i le ruá' dö', en le cabí nazaca', pero ral-la' ugunru' dxin yöta xtila na' biti' nazi'i cúa zi que, yöta xtila na' rulu'i le naca idú dxi'a, en le naca idútë li.

<sup>9</sup> Cate' buzúaja' queëli' lu guichi zí'alö, gudxi caza' libí'ili' biti' gunli' tsözxön bönni' tunë' le ruá' dö'. <sup>10</sup> Gudxa' libí'ili' caní, calëga para ucuítali' tsaz ga nacua' bönachi yödzülió ni, nupa tun le ruá' dö', en ga nacua' bönachi ta'zë ládxi'gaca le dë que luzë'eguequi, en ga nacua'ë yugu' bönni' gubán, en bönachi ta'yéaj ládxi'gaca budó' guiöj budó' yaga. Para gunli' caní gun bayudxi irúajli' yödzülió ni. <sup>11</sup> Le ré'ëni inná didza' na' buzúaja' queëli' zí'alö naca para cabí gunli' tu zxön tuë' bönni' rnnë' néquinë' queë' Cristo, pero runë' dul-la' le lë'e, o rizë ládxi'ë le dë que luzë'ë, o reaj ládxi'ë tu budó' néquini, o rinnë xihuë'ë, o rizúdxinë', o ribanë'. Biti' ca' gágulenli' tsözxön tuë' bönni' caní. <sup>12-13</sup> Biti' nequi quia' neda' uchi'a usöröa' nupa biti' nabábagaca rë'u. Dios uchi'a usöröë' léguequi. Libí'i cázali' ral-la' uchi'a usöröli' nupa nabábagaca libí'ili'. Que lë ni na', guli'cüë' ga zóali' bönni' xihui' na'.

## 6

*Biti' ral-la' ichë'ëru' böchi' luzá'aru' lógaca bönachi yúlahui'*

<sup>1</sup> Cate' ridil-la dídza'li' tuli' len ia'tuli', ¿nacxi caz rurúguili' tséajli' yúlahui' ga ulu'chi'a ulu'sörö nupa biti' ta'yéajlé' Cristo libí'ili'? Dxí'arö tséajli' lógaca bönachi queë' Cristo para ulu'chi'a ulu'sörö libí'ili'. <sup>2</sup> ¿Naru' cabí nözili' nupa néquiguequi queë' Cristo ral-la' ulu'chi'a ulu'sörö yúgu'të bönachi yödzülió? Channö libí'i cázali' uchi'a usöröli' bönachi yödzülió, ¿naru' cabí nápali' yöl-la' réajni'i uchi'a usöröli' didza' bizxaj caní? <sup>3</sup> ¿Naru' cabí nözili' ral-la' uchi'a usöröru' yugu' gubáz lá'ayi? Rüntërö bayudxi

uchi'a usöröru' le taca yödzölió ga ni zóaru' na'a. <sup>4</sup> Na'a, channö raca tu le run bayudxi nu uchi'a usörö, lë na' raca yödzölió ni, ¿bizx que rucua'ali' nupa ulu'chi'a ulu'sörö le, nupa na' biti' bi dë lu në'eguequi ladjagaca bönachi queë' Cristo? <sup>5</sup> Rnnia' caní para guna' ga utuí'ili'. ¿Naru' cabí zóalen libí'ili' nu raca lati' nu gaca uchi'a usörö le raca quégaquië' böchi' luzá'ali'? <sup>6</sup> ¿Nacxi caz gaca tu bönni' réajlë'ë Cristo ichë'ë böchi' luzë'ë yúlahui' ga ulu'chi'a ulu'sörö bönachi biti' ta'yéajlë' Cristo légaquië'?

<sup>7</sup> Le nácatë richixi riníguili' tu' ridil-la dídza'li'. ¿Bizx que biti' guá' ilenli' nu ruá' dö' queéli'? ¿Bizx que biti' guá' ilenli' nu rucáchi'lan le dë queéli'? <sup>8</sup> Libí'ili' ruá'ali' dö', en rucachi' lanli', ate' runli' caní quégaquië' böchi' luzá'ali' ta'yéajlë'ë Cristo.

<sup>9-10</sup> ¿Naru' cabí nözili' biti' ila'yaza bönachi biti' nácagaca tsahui' ga rinná bë'ë Dios? ¿Biti' si' ye'e cuinli'!

Biti' ca' tsaz ga rinná bë'ë Dios nu run le ruá' dö':  
 Cuntu nu reaj ladxi' budó' guiöj budó' yaga,  
 en cuntu nu riguitsaj xibá que yöl-la' nutsaga na',  
 en cuntu nu bönni' run cuinë' ca nigula,  
 en cuntu nu bönni' zóalenë' la' luzë'e bönni'së',  
 en cuntu nu bönni' gubán, en cuntu nu ruhuidi',  
 en cuntu nu rizudxi, en cuntu nu rinnë xihui',  
 en cuntu nu rucáchi'lan.

Biti' ca' tsaz nu run caní ga rinná bë'ë Dios.

<sup>11</sup> Caní gúcali' bál-lali' libí'ili', pero na'a chinuhuóacali' dxi'a que dul-la' gubága'li', en chinéquili' quez queë' Dios, en chinuhuóacali' tsahui' ni'a que le benë' Xanru' Jesús. Bö' Lá'ayi queë' Dios runë' ga raca caní.

### *Idütë le naca cázaru' nequi queë' Dios*

<sup>12</sup> Ta'nná bönachi: "Yúgu'të dë lataj gunru'." Sal-la' nácatë didza' ni, biti' ral-la' gunru' yúgu'të. Sal-la' dë lataj guna' yúgu'të, biti' gu'a lataj bi inná be'e neda'. <sup>13</sup> Ta'nná ca' bönachi: "La' huagu naca le tsaz lë'ëru', ate' lë'ëru' naca ga tsudzu la' huagu." Nácatë didza' ni, pero idxín dza usunítië' Dios la' huagu, enca' lë'ëru'. Dios benë' idütë le naca cázaru', calëga para ugunru' le dxin gunru' le ruá' dö'. Naca para uzi'ë xibë Xanru', ate' Xanru' náquië' para uzi' xibë' idütë le naca cázaru'. <sup>14</sup> Dios busubanë' Xanru' Cristo lu yöl-la' guti. Lëscá' caní, len yöl-la' huáca queë' usubanë' rë'u.

<sup>15</sup> ¿Naru' cabí nözili', idütë le nácali' naca tuz len le naca cazë' Cristo? ¿Nacxi caz gaca cúali' tu le da' Cristo, en gunli' ga ta' tu nigula udá dzaga? ¿Biti' ca' ral-la' gunli' caní! <sup>16</sup> ¿Naru' cabí nözili' channö tu bönni' zóalenë'-nu nigula udá dzaga, náquië' tuz len lënu? Ca naca lë ni nazúaj lu guichi lá'ayi le rnna: "Ilácagaquië' ca tuz bönachi iropë' na'." <sup>17</sup> Na'a, nu bönni' náquië' tuz len Xanru', náquië' tuz len Lë' lu bö' naca cazë'.

<sup>18</sup> Que lë ni na', biti' ca' gunli' le ruá' dö'. Bítitës dul-la' yúbölö runë' tu bönni', ní'ilö lu le naca cazë' runë' dul-la' na'. Nu bönni' runë' dul-la' le lë'ë, runë' dul-la' le dzaga lë cazë'. <sup>19</sup> ¿Naru' cabí nözili' idütë le naca cázali' naca yudo' queë' Dios Bö' Lá'ayi? Dios caz nuchizë' Dios Bö' Lá'ayi na' libí'ili', ate' Lë' zoë' icja ládxi'do'oli'. Que lë ni na' biti' nequi queëzili' idütë le naca cázali'. Na'a, nequi queë' Dios. <sup>20</sup> Dios gú'uë' libí'ili' len tu le zxön le gudizxjë'. Guli'gún dxin idütë le nácali', enca' bö' naca cázali' para gaca queë' Dios yöl-la' ba, tu' néquiguequi queë' Dios idütë le naca cázali', enca' bö' naca cázali'.

## 7

*Rusédinē' Pablo ca naca que yöl-la' nutsaga na'*

<sup>1</sup> Na'a, ubi'a didza' yugu' le rinábili' neda', le buzúajli' quia' lu guichi. Gácarö dxi'a queë' nu bönni' channö cabí sóalenē'-nu nigula. <sup>2</sup> Tu' tunda' bönachi le ruá' dö' ga ni' zóali', yúgu'tē bönni' nabábagaquiē' libí'ili' ral-la' ila'cuá'lenē'-nu nigula que queégaquiē', ate' yúgu'tē nigula ral-la' ila'cuá'lennu-nē' bönni' que queégacanu. <sup>3</sup> Bönni' na' zóanu nigula queë' ral-la' gunē' queënu nigula queë' ca naca yöl-la' run que yöl-la' nutsaga na', en la' lébisö ral-la' gunnu nigula len bönni' queënu. <sup>4</sup> Biti' dē lu ná'asönu nigula le naca cázanu, pero bönni' queënu dē lu nē'ē ca' le. Lēscá' caní, bití' dē lu ná'asē' bönni' le naca cazē', pero nigula queë' dē lu ná'anu ca' le. <sup>5</sup> Biti' ral-la' ila'dá'baguē'ē luzá'agaquiē' bönni', en nigula na', nutsaga ná'agaquiē'. Huácasö ca' channö ilunē' tuz didza' bití' ila'dzáguiē' tu chí'isö para gaca ulu'lidzē' Dios idú ládxi'gaquiē'. Tödi na', bönni' na' ral-la' sóalenē'-nu nigula queë' leyúbölö, para cabí sequi' Satanás tu' xihui' gun ga tsázagaquiē' nöza dul-la' tu' cabí gaca ila'nná be'e cuíngaquiē'.

<sup>6</sup> Lē ni rea' libí'ili' naca tu le runnē' Xanru' libí'ili' lataj. Biti' naca le gunná bē'ē. <sup>7</sup> Runi neda' gácarö dxi'a ulu'gá'anē' tuz yúgu'tē bönni', ca na' zoa' tuza' neda'. Tu tuē' bönni' rizi'ē tsca le runödzejē' Dios queë' gunē'. Tuē' rizi'ē tu le runödzejē', ate' ia'túē' rizi'ē ia'tú le runödzejē'.

<sup>8</sup> Na'a, rea' nupa zóagaca tuz, enca' yugu' nigula uzēbi, gácarö dxi'a quéguequi ulu'gá'ana tuz ca na' zoa' tuz neda'. <sup>9</sup> Channö cabí gaca ila'nná be'e cuíngaquiē', huáca ulu'tsaga ná'agaquiē', tu' gácarö dxi'a ulu'tsaga ná'agaquiē', en cabí ila'zē ládxi'gaquiē' le ruá' dö'.

<sup>10</sup> Rinná bé'eda' nupa chinutsaga nē'eguequi, en calēga néda'sö runa' xibá ni, pero Lē cazē' Xanru' runē' le, rnnē': "Biti' ulá'alennu tu nigula bönni' queënu." <sup>11</sup> Channö nu nigula ulá'alennu-nē' bönni' queënu, ral-la' ugá'ananu túzinu, o huóacanu tuz len bönni' queënu na'. Lēscá' caní tu bönni' bití' ral-la' ucá'anē'-nu nigula queë'.

<sup>12</sup> Na'a, néda'sö rea' ia'zica'rö bönachi, en calēga rnnē' Xanru' caní, rnniá': Channö zoē' nu böchi' luzá'aru' réajlē'ē Cristo, ate' nigula queë' bití' réajlē'ēnu Xanru', en channö ré'ēninu ugá'analennu lē', bití' ral-la' ulá'alēnē'-nu. <sup>13</sup> Lēscá' caní rnniá': Channö zóanu nu nigula zanru' réajlē'ēnu Cristo, ate' bönni' queënu bití' réajlē'ē Xanru', en channö ré'ēnnē' ugá'analenē'-nu, bití' ral-la' ulá'alennu lē'. <sup>14</sup> ¡Caní ral-la' ilunē'! Bönni' cabí réajlē'ē na', Dios rilé'enē' lē' ca tu bönni' néquinē' quez queë' tu' náquiē' tuz len nigula queë' réajlē'ēnu Cristo, ate' nigula caní, bití' réajlē'ēnu, Dios rilé'enē'-nu ca tu nigula néquinu quez queë' tu' nácanu tuz len bönni' queënu náquiē' böchi' luzá'aru' réajlē'ē Cristo. La' tu' cabí naca caní, ilácabi' zxi'inigaquiē' ca yugu' bi'i lan lahuē' Dios. Na'a, nácacacabi' quez queë' Dios. <sup>15</sup> Nu bönni' o nigula nu cabí réajlē' Cristo, channö ré'ēni ulá'alēn nu na' nutsaga ná'alēn, huáca ca'. Biti' run bayudxi ugá'analen nu na' böchi' luzá'aru' o zanru' nu réajlē' Cristo, tu' bulidzē' Dios rē'u para cōzaru' tsáhu'ido'. <sup>16</sup> ¡Caní ral-la' gaca! Nadxi ca' li', nigula, huáca gunu' ga ulē' bönni' quiu', ate' nadxi ca' li', bönni', huáca gunu' ga ulanu nigula quiu'.

<sup>17</sup> Ral-la' gunru' tu turu' tsca le bennē' queëru' Xanru', enca' tsca guca queëru' cate' bulidzē' Dios rē'u para guéquiru' queë'. Rusédida' yúgu'tē cō' bönachi queë' Cristo xibá ni. <sup>18</sup> Channö Dios bulidzē' nu bönni' narugu

lu xipélë'è le naca bë' néquinë' queë' Dios, ral-la' ugá'anë' caní, zoa lu xipélë'è lë na' naca bë'. Lësca' caní, channö bulidzë' nu bönni' biti' narugu lu xipélë'è lë na' naca bë', biti' ral-la' ichúguië' lë na' lu xipélë'è. <sup>19</sup> Biti' bi nazaca' lë na' narugu lu xipélë'è tu bönni', en channö biti' narugu lu xipélë'è bönni' lë na' naca bë', biti' bi nazaca'. Le nácada' lesaca' naca gunru' ca rinná bë' xibá queë' Dios. <sup>20</sup> Ral-la' ugá'anë' tu tuë' bönni' ca na' gúquië' cate' ni' bulidzë' Dios lë'. <sup>21</sup> Channö bulidzë' li' cate' ni' nacu' bönni' nadó'o, biti' cö'u böniga tu' nacu' caní, pero channö gata' quiu' lataj iruju' lu na' xanu', buzí' xibé lataj na' gata' quiu' iruju'. <sup>22</sup> Channö bulidzë' Xanru' nu bönni' cate' ni' nado'ë, lahuë' Xanru' náquië' ca nu bönni' narúajë' lu në'ë xanë' na', para gunë' xichinë' Xanru'. Lësca' caní, channö bulidzë' Xanru' nu bönni' cate' ni' narúajë' lu në'ë xanë' na', bönni' ni náquië' ca tu bönni' nadó'o queë' Cristo. <sup>23</sup> Zxöntë'rö le gudizxjë' Dios, gú'uë' libí'ili'. Que lë ni na' biti' ral-la' guti' cuinli' lu ná'agaca bönachi. <sup>24</sup> Que lë ni na' ca', böchi' luzá'ado', ral-la' sóali' lahuë' Dios tsca guca queë'li' tu tuli' cate' ni' bulidzë' Dios libí'ili'.

<sup>25</sup> Ca naca quégaca nupa biti' nutsaga ná'agaca, biti' bi gunná bé'enë' Xanru' neda'. Caní runi neda', ate' huáca uzxöni ládxi'li' neda' tu' ruhuéchi' ládxië' Xanru' neda'. <sup>26</sup> Tu' taca zían le raca queë'ru' dza ni zóaru' na'a, runi neda' gácarö dxi'a channö ulu'gá'anë' yúgu'të bönni' ca nácagaquië' na'a. <sup>27</sup> Channö nutsaga ná'lenu'-nu nigula, biti' ulá'alenu'-nu. Lësca' caní, channö zu' tuzu', biti' quilju' tu nigula para utsaga ná'lenu'-nu. <sup>28</sup> Na'a, channö utsaga ná'lenu'-nu nigula, biti' gunu' dul-la', en channö tu bi'i nigula utsaga ná'aleni'-në' bönni', biti' gunbi' dul-la', pero ila'gu'i ila'zaca' nupa nutsaga ná'agaca yödzólió ni, ate' rë'ënda' guna' ga uláli' lu yöl-la' riguí' rizaca' na'.

<sup>29</sup> Na'a, rea' libí'ili' lë ni, böchi' luzá'ado'. ¡Chizóa idxin dza údxi! Que lë ni na', yugu' bönni' nutsaga ná'lengaquië'-nu nigula ral-la' ilu' ládxi'gaquië' Dios, ca runë' nu bönni' biti' nutsaga ná'aleni' nigula. <sup>30</sup> Lësca' caní, nupa ta'bödxi yechi' ral-la' ulu'dzeja lahuë' Dios ca run nu biti' ribödxi, ate' nupa tu'dzeja ral-la' ila'cuá' nöxaj lahuë' Dios ca run nu biti' rudzeja, ate' nupa to'o ral-la' ilaca ca nu biti' bi dë que. <sup>31</sup> Nupa tu'gún dxin le dë yödzólió ni ral-la' ilaca ca nu biti' ru'í ladxí' le dë yödzólió ni, tu' udódi quégaca le rilé'eru' yödzólió ni.

<sup>32</sup> Rë'ënda' biti' ubi ugu'í'ili'. Tu bönni' biti' zóanu nigula queë' ru'í ládxië' le nequi queë' Xanru', naca gunë' le raza ládxië' Xanru'. <sup>33</sup> Tu bönni' nutsaga ná'lenë'-nu tu nigula ru'í ládxië' le raza yödzólió, naca gunë' le raza ládxi'nu nigula queë'. <sup>34</sup> Lësca' caní raca queë'nu tu nigula nutsaga ná'lennu'-në' bönni', en queë'nu nigula na' zóanu túzinu. Nigula na' zóanu túzinu ru'í ládxi'nu le nequi queë' Xanru', naca sóanu quez queë' Dios lu le naca cázanu, en lu bö' naca cázanu. Nigula na' nutsaga ná'lennu'-në' tu bönni' ru'í ládxi'nu le raza yödzólió ni, naca gunnu le raza ládxië' bönni' queë'nu.

<sup>35</sup> Yugu' lë ni rea' libí'ili' para uzí'ili' xibé lë ni, en calëga para uzá'ga'a xinözili'. Rë'ënda' gunli' le ral-la' gunli', para gunli' xichinë' Xanru' idú ládxi'li'.

<sup>36</sup> Channö zoë' tu bönni' réquinë' biti' naca dxi'a ugá'anabi' túzibi' bi'i nigula ra'bando' queë', en chizóa iz queë'bi', en rë'ënde'ebi' utsaga ná'aleni'-në' bönni', huáca utsaga ná'aleni'-në'. ¡Biti' gunbi' dul-la'!  
<sup>37</sup> Channö chinún tsutsu xtídzë'ë bönni' na', en biti' run bayudxi gunë'



caní, en dē lu nē'ē naca gunē', en chinún tsutsu xtídzē'ē ugá'anabi' túzibi', gunē' le naca dxi'a bōnni' na'. <sup>38</sup> Caní naca, nu ruí'i lataj bi'i que utsaga ná'alenbi'-nē' bōnni', run le naca dxi'a, pero nu run ga ugá'anabi' túzibi' run le nácarō dxi'a.

<sup>39</sup> Nígula na' nutsaga ná'lennu-nē' bōnni', rinná be'e xibá que yōl-la' nutsaga na' lēnu tsanni ni zoē' nabanē' bōnni' queēnu. Channō gátie' bōnni' queēnu, gata' lu ná'anu utsaga ná'lennu-nē' nu bōnni' rē'ēninu, channō réajlē'ē Xanru' bōnni' na'. <sup>40</sup> Runi neda' gácarōnu bica' ba channō ugá'ananu túzinu, en réquida' Bō' Lá'ayi queē' Dios runē' neda' tzaxxōn.

## 8

### *Le ta'gú'u bōnachi lógaca budó' guiōj budó' yaga*

<sup>1</sup> Na'a, gu'a didza' ca naca que le rē'aj ráguru', lē na' gula'gú'u bōnachi lógaca budó' guiōj budó' yaga. Ta'nná bōnachi: "Yúgu'tēru' náparu' yōl-la' réajni'i." ¿Nácatē didza' ni! Yōl-la' réajni'i caní run ga run ba zxōn cuinru', pero yōl-la' nadxí'i queēru' luzá'aru' run ga rácalenru' luzá'aru'. <sup>2</sup> Channō zoē' nu bōnni' réquinē' chiréajni'inē', biti' bi réajni'ininē' ca ral-la' tséajni'inē', <sup>3</sup> pero nu bōnni' nadxí'inē' Dios, Dios caz zóalenē' bōnni' na'.

<sup>4</sup> Na'a, ca naca que le rē'aj ráguru', lē na' gula'gú'u bōnachi lógaca budó' guiōj budó' yaga, nōziru' biti' bi nazáca'gaca budó' guiōj budó' yaga na' yōdzōlió ni, en cúnturō nu zoa naca Dios. <sup>5</sup> Sal-la' nacua' le téquiguequi bōnachi nácgaca díos, le nacua' lúzxiba, en le nacua' luyú, ate' zían le tu'lidza bōnachi, en tuí'i lágaca: díos, enca': xan, <sup>6</sup> pero queēru' rē'u:

Tuzē' náquiē' Dios, Lē' Xuz.

Lē' benē' yúgu'tē le rilé'eru',

ate' zóaru' nabanru' para tseaj ládxi'ru' Lē'.

Tuzē' náquiē' Xanru', Lē' Jesucristo.

Lu nē'ē Lē', Dios benē' yúgu'tē le dē,

ate' nabániru' Lē'.

<sup>7</sup> Calēga yúgu'tē bōchi' luzá'aru' ta'yéajni'inē' lē ni. Bal-lē', nupa ni' zí'alō gula'yéaj ládxi'gaca budó' guiōj budó' yaga, ga ridxintē na'a dza tē'aj tahuē' le gula'gú'u bōnachi lógaca budó' guiōj budó' yaga, ate' téquinē' napa yōl-la' huáca que budó' na'. Tu' cabí naca idú ládxi'gaquiē', que lē ni na' téquinē' nabága'gaquiē' xíguia' channō tahuē' lē na'. <sup>8</sup> Biti' gun le guí'aj gáguru' ga gunē' Dios rē'u bal. Channō gáguru' le, biti' gácarōru' dxi'a, en channō cabí gáguru' le, biti' gácarōru' cá asō. <sup>9</sup> Dē lu ná'ali' guí'aj gáguli' bítitēs. Guli'gún chí'i cuinli' para cabí gunli' ga ila'chixi ila'nigui nupa bití' naca idú ca ta'yéajlē' Cristo. <sup>10</sup> Nadxi ca' lí' réquinu' napu' yōl-la' réajni'i ca naca lē ni, en huáca gagu' bítitēs. Channō cō'u xilataj budó' guiōj budó' yaga, en guí'aj gagu' le gula'gú'u bōnachi lo budó' guiōj budó' yaga na', ate' channō nu bōchi' luzó'o bití' naca idú ládxe'ē ilé'enē' lí', rō'u ragu' ni', nadxi ca' gunu' ga gahuē' lē na' gula'gú'u bōnachi lo budó' guiōj budó' yaga na'. <sup>11</sup> Caní gaca, tu' réquinu' napu' yōl-la' réajni'i, gunu' ga ichixi iníguinē' bōchi' luzó'o bití' naca idú ládxe'ē. ¿Naru' guntso' caní queē' bōchi' luzó'o, ni'a que nu na' gútiē' Cristo? <sup>12</sup> Channō caní gunu', gunu' dul-la' tu' usubágu'u bōchi' luzó'o xíguia', en gunu' ga ichixi iníguinē' tu' cabí naca idú ládxe'ē, en gunu' ca' dul-la' le ruzóa Cristo tsólá'alō. <sup>13</sup> Que lē ni na', channō le guí'aj gahua' gun ga ichixi iníguinē' bōchi' luzá'a, bítirō gahua' bēla' na', para cabí guna' ga gunē' bōchi' luzá'a dul-la'.

## 9

*Le dē lu nē'ē nu bōnni' gubáz nasōl-lē'ē Cristo*

<sup>1</sup> ¿Naru' cabí naca' gubáz nasōl-lē'ē Cristo? ¿Naru' cabí nadéli'da' yōl-la' rusōlá? ¿Naru' cabí bilé'eda'-nē' Xanru' Jesús? ¿Naru' cabí nácali' queē' Cristo ni'a que dxin bena' neda' uláz queē' Xanru'? <sup>2</sup> Nadxi ca' téquiguequi ia'zica'rō bōnachi bití' naca' gubáz nasōl-lē'ē Cristo. Libí'ili' run bayudxi guéquili' naca' gubáz queē' Cristo. Tu' nácali' queē' Xanru', le naca cázali' naca bē' naca' gubáz nasōl-lē'ē Xanru'.

<sup>3-4</sup> Nacuá' nupa ta'zí' quidza' neda'. Caní rubi'a didza', rea' légaquiē': Dē lu na'a inaba' le guí'aj gahua' tu' runa' dxin ni. <sup>5</sup> Lē'sca' caní dē lu na'a utsaga ná'alena'-bi' tubi' bi'i nigula zanru' réajlē'ēbi' Cristo para gunbí' neda' tsōzxōn ga ridá', ca na' tunē' ia'zica'rē' gubáz nasōl-lē'ē Cristo, en yugu' bōnni' bōchē'ē Xanru', enca' Pedro. <sup>6</sup> ¿Naru' réquili' tuza' neda', en Bernabé ral-la' guntu' dxin lahui' dza, para idzōlitu' le gágutu'? <sup>7</sup> ¿Nuzxi caz bōnni' rejē' gudil-la, ate' riguizxjē' la' cuinsé'? ¿Nuzxi caz bōnni' rudē'ē tu la' yēla que lubá uva, en bití' rahuē' le ribía lubá na'? ¿Nuzxi caz bōnni' rapa chi'ē-ba' bō'cu' zxila', en bití' re'jē' nidxi' quégacaba'? <sup>8</sup> Bití' guéquili' la' néda'sō ruá'a caní didza'. Lē'sca' caní rnna le nazúaj lu guichi lu xibá queē' Moisés. <sup>9</sup> Lu xibá queē' Moisés nazúaj lu guichi le rnna: Bití' cu'u du rúa'aba' bēdxi cate' rulíbiba' zxoá' xtila. Bē'ē Dios didza' ni, calégasō tu' ruí'í lādxi'ē-ba' bēdxi, <sup>10</sup> pero para uzí'iru' ca' xibé rē'u. Que lē ni na' nazúaj lu guichi didza' na', ate' bōnni' na' rugá'anē'-ba' bēdxi, enca' bōnni' na' runē' ga tu'libiba' bēdxi zxoá' xtila, iropē' na' ral-la' ilunē' lōza ila'zi'ē que le rulá' luyú na'. <sup>11</sup> Na'a, channō bentu' dxin ga zóali', le naca ca dxin guz gú'una, lē na' naca queē' Dios Bō' Lá'ayi, ¿naru' réquitseli' bití' ral-la' uzí'itu' xibé tu le do' dē queéli' ca na' ruzi'ē xibé bōnni' guz gú'una le rulapē'? <sup>12</sup> Ia'zica'rō bōnachi tu' zéajni'inē' libí'ili' tu'zi'ē xibé le dē queéli'. ¿Naru' cabí rála'tērō uzí'itu' xibé netu' le dē queéli'?

Catu caz buzi'tu' xibé lē ni dē lu na'tu', pero biá' gulentu' yúgu'tē para gaca guntu' libán que didza' dxi'a ca naca queē' Cristo. <sup>13</sup> Nōz quézili' ca raca quégaca nupa tun dxin que yudo', tu'zí' xibé gun que yudo'. Lē'sca' caní nupa ta'gú'u rōn quégacaba' bōa' bēdxi lu bucugu lá'ayí queē' Dios, tahuē' bēla' quégacaba' bōa' bēdxi na'. <sup>14</sup> Lē'sca' caní nuzóē' Xanru' ca ral-la' gaca quégaquiē' bōnni' tunē' libán que didza' dxi'a. Nupa tu'zí' xibé libán na' tunē' ral-la' ulu'gagu légaquiē'. <sup>15</sup> Neda' catu caz buzi'a xibé lē ni dē lu na'a, ate' lē ni ruzúaja' lu guichi ni bití' naca le rinábini nu bi gunna quia'. Run ba zxōn cuína' tu' cabí nazxja' cate' runa' libán que didza' dxi'a. Guē'ēnitēra' gátia' ca gu'a lataj nu innē runa' libán na' tu' nazxja'.

<sup>16</sup> Bití' dē lu na'a gun ba zxōn cuína' tu' runa' libán que didza' dxi'a, tu' run bayudxi guna' libán que. Bica' bayechi' neda' channō cabí guna' libán que didza' dxi'a. <sup>17</sup> La'tu' runa' libán tu' ré'ēni quézida', huáca inaba' lazxja', pero run bayudxi guna' libán, tu' naca tu le busubáguē'ē Dios neda' guna'. <sup>18</sup> ¿Bizxi lazxja' uzí'tsa' xibé channō? Ruzi'a xibé le raza lādxa'a tu' cabí nazxja' cate' runa' libán que didza' dxi'a. Bití' ca' ruzi'a xibé lē na' dē lu na'a tu' runa' libán que didza' dxi'a.

<sup>19</sup> Na'a, sal-la' cuntu nu yu'a lu nē'e, chibén cuína' ca tu bōnni' nadó'o quégaca yúgu'tē bōnachi para gaca guna' ga ulu'lágaca zíanrō ca' bōnachi. <sup>20</sup> Cate' runa' libán lógaca bōnachi judío, run cuína' ca tu bōnni' judío para gaca guna' ga ulu'lágaca bōnachi judío na'. Bōnachi judío na' tun ca rinná

bë' xibá queë' Moisés. Que lë ni na' run cuina' ca tu bönni' runë' ca rinná bë' xibá na' sal-la' biti' yu'a lu na' xibá na'. Caní runa' para gaca guna' ga ulu'lágaca nupa tun ca rinná bë' xibá na'. <sup>21</sup> Cate' runa' libán lógaca bönachi izá'a, nupa biti' rinná be'e xibá queë' Moisés léguequi, run cuina' ca tu bönni' zí'tu' na', para gaca guna' ga ulu'lë'. Biti' rucá'ana' cá'asö xibá queë' Dios. Neda' runa' ca rinná bë' xibá queë' Cristo. <sup>22</sup> Run cuina' ca tu bönni' biti' naca idú ca réajlë'ë Cristo para gaca guna' ga ulu'lágaca nupa na' biti' naca idú ca ta'yéajlë' Lë'. Run cuina' ca nácagaca yúgu'të bönachi para gaca guna' ga ulu'lágaca bal-la bönachi na'. <sup>23</sup> Lu yúgu'të lë ni runa', runa' ga ta'yöni bönachi didza' dxi'a, para gaca uzi'a xibé tsözxön len libí'ili' didza' dxi'a na'.

<sup>24</sup> Chinöz quézili' ca tunë' bönni' nútsa'gaquië' lu huitaj. Ta'xíti'ë yúgu'të, pero tuzë' bönni' idéli'në' uzi'ë xibé lataj lo. Lësca' caní ral-la' gunli' xichinë' Dios, gácali' ca bönni' nútsa'gaquië' lu huitaj, para idéli'li' uzi'ili' xibé le ubi'ë Dios queéli'. <sup>25</sup> Yúgu'të bönni', cate' tu'pá'a cuíngaquië' para gaca ila'yázië' lu huitaj, ta'nná be'e cuíngaquië' lu yúgu'të le tunë'. Tunë' caní para ila'déli'në' tu bregui' zin le inítitë, pero idéli'ru' rë'u tu le uzi'tica'siru' xibé. <sup>26</sup> Que lë ni na', naca' neda' ca tu bönni' idú ládxë'ë rixíti'ë. Naca' ca' ca tu bönni', idú ládxë'ë ridil-lë'. Biti' rucudxa' lu bö'ös. <sup>27</sup> Ca runë' bönni' na' rulidzë' bönachi para tsöjtsázagaca lu huitaj, runa' ca' neda', runa' libán para ulu'lágaca bönachi. Bönni' na' nútsë'ë lu huitaj runë' ga gaca tsutsu idütë le naca cazë', en rinná bé'enë' le. Lësca' caní runa' neda', para cabí unítia' xilatja' lu dxin queë' Dios.

## 10

### *Biti' ral-la' tseaj ládxi'ru' budó' guiøj budó' yaga*

<sup>1</sup> Rë'ënda' uzéajni'ida' libí'ili', böchi' luzá'ado', ca guca quégaquië' xuz xtó'otu'. Dios benë' ga gulú'u zzul-la tu böaj yúgu'të'. Lësca' caní, gula'dödë' yúgu'të' gatsaj láhui'lö nísado'. <sup>2</sup> Lu böaj ni', en lu nísado' ni', guca quégaquië' ca raca que nu ridila nisa. Lë na' guca quégaquië' guca bë' guláquië' tuz len Moisés. <sup>3</sup> Lësca' caní, gulahuë' yúgu'të' yöta xtildo' na' bunödziej' Dios Bö' Lá'ayi quégaquië', tu' gulé'ajë' yúgu'të' nisa na' bunödziej' Dios Bö' Lá'ayi quégaquië', tu' gulé'ajë' nisa birúaj lë'e guiøj na' bulu'e lahui Dios Bö' Lá'ayi, guiøj na' gula'báninë' légaquië'. Ca guca guiøj na' naca cazë' Cristo, nabániru' Lë'. <sup>5</sup> Sal-la' guca caní, biti' guyaza ládxi'ë Dios yúgu'të'. Que lë ni na' gulátië' lu lataj cá'asö.

<sup>6</sup> Yúgu'të lë ni naca tu le ruzéajni'i rë'u, para cabí së ládxi'ru' le ruá' dö', ca na' gula'zë ládxi'gaquië' légaquië'. <sup>7</sup> Biti' ral-la' tseaj ládxi'ru' budó' guiøj budó' yaga, ca na' gulunë' bal-lë' légaquië'. Nazúaj lu guichi lá'ayi le rnna: "Gula'bö'ë bönni' ni', en gulé'aj gulahuë', ate' gula'yasë', en gulunë' laní que budó' na'." <sup>8</sup> Biti' ral-la' gunru' le ruá' dö', ca na' gulunë' bal-lë' légaquië' le ruá' dö', ate' tu dzasö gulátië' idú ca tsonna-uruá' milë'. <sup>9</sup> Biti' ral-la' si' bë'ëru' Xanru', ca na' gula'zí' bë'ë Lë' bal-lë' légaquië', ate' gulátië' tu' guláguya'aba' bëla sínia' légaquië'. <sup>10</sup> Lësca' caní, biti' ral-la' innëru' queë' Dios ca na' gula'nnë' queë' bal-lë' légaquië', ate' tuë' gubáz lá'ayi queë' Dios busunítie' légaquië'.

<sup>11</sup> Yúgu'të lë ni le gulaca quégaquië' xuz xtó'otu', tu'zéajni'i rë'u, en nazúaj lu guichi lá'ayi para gun gadxi rë'u, tu' chizóaru' dza chizóa údxi que yödzólió ni. <sup>12</sup> Que lë ni na', na réqui chinal-la, ral-la' gun chí'i cuini, para cabí ichixi inigui. <sup>13</sup> Ca naca le ta'zí' bë' libí'ili' raca ca' quéguequi

yúgu'tè bönachi. Dios runë' ca rnnë', en biti' gu'ë lataj bi si' bë' libí'ili' le cabí gaca guá' ilenli', pero cate' bi si' bë' libí'ili', ulu'ínë' libí'ili' naca gaca irúajli' lu na' tu' xihui', para gaca guá' ilenli'.

<sup>14</sup> Que læ ni na', böchi' luzá'ado', biti' tseaj ládxi'li' budó' guiöj budó' yaga. <sup>15</sup> Ru'ílena' libí'ili' didza' ca ru'ílena' didza' nupa ta'yéajni'i. Buli'chi'a buli'sörö didza' ni gu'a. <sup>16</sup> Cate' inábiru'-në' Dios gun lá'ayë' le ré'ajru' cate' rusubanru' ca gútië' Cristo, læ na' ré'ajru' rulu'i nácaru' tuz len Cristo, en ruzí'iru' xibé le benë' Cristo cate' bulaljë' xichönë' cate' gútië' læ'e yaga cruz. Lësca' caní, yöta xtila na' ruzxúzjaru', en ráguru', rulu'i dzágaru'-në' Cristo, en ruzí'iru' xibé le benë' Cristo cate' budödë' idútë le naca cazë' uláz queëru'. <sup>17</sup> Sal-la' zianru' nácaru', yúgu'tëru' ráguru' tuz yöta xtila na', en que læ ni na' nácaru' ca tuz bönachi.

<sup>18</sup> Buli'yútsöca' ca tunë' bönni' Israel. Bönni' ni' tahuë' lahuë' Dios le ta'gu'ë lu bucugu lá'ayi queë', læ na' tahuë' rulu'i dzágagaquië' Dios. <sup>19</sup> ¿Bizxi rnna didza' ni ruá'a? Biti' rnnía' napa budó' guiöj budó' yaga yöl-la' huáca, en le ta'gú'u bönachi lógaca budó' guiöj budó' yaga na' biti' napa yöl-la' huáca. <sup>20</sup> Caní rnnía': Læ na' ta'gú'u bönachi biti' núnbë'gaquië' Dios lógaca budó' guiöj budó' yaga, ta'gú'u lógaca bö' xihui', en calëga lahuë' Dios. Ré'ënda' biti' idzágali' yugu' bö' xihui'. <sup>21</sup> Biti' gaca guí'jali' le rulu'i nácaru' tuz len Xanru', enca' læ na' ulu'i nácali' tuz len yugu' bö' xihui'. Biti' gaca gáguli' le rulu'i dzágaru'-në' Xanru', enca' le ulu'i dzágali' yugu' bö' xihui'. <sup>22</sup> ¿Naru' gúntsaru' ga uzxé'enë' Xanru'? ¿Naru' réquitseli' nápatërolí' yöl-la' huáca ca napë' Lë'?

*Le dë lu ná'aru' gunru', en ca ral-la' idxí'igacru'-në' böchi' luzá'aru'*

<sup>23</sup> Naca idútë li didza' na' rnna: "Yúgu'të dë lu ná'aru' gunru'." Na'a, neda' rnnía': Calëga yúgu'të ral-la' gunru'. Yúgu'të dë lu ná'aru' gunru', pero calëga yúgu'të gun ga gácarö idú ca réajlë'ëru' Cristo. <sup>24</sup> Ral-la' gü'i ládxi'ru' gunru' le gun ga gaca dxi'a queégaquië' böchi' luzá'aru', en calëgasö le gun ga gaca dxi'a que la' cuínsiru'.

<sup>25</sup> Biti'tës bi tuti' bönachi lu yë'ëyi, huáca gáguli', en biti' bi ral-la' inábali' que, para cabí cuéqui böniga ládxi'do'oli'. <sup>26</sup> Nazúaj lu guichi le rnna: "Queë' Xanru' nequi yödzölió ni, enca' yúgu'të le dë yödzölió ni."

<sup>27</sup> Channö ulidzë' tu bönni' biti' réajlë'ë Dios libí'ili' para guídali' lidxë', ate' guë'ënili' tséajli', guli'gagu yúgu'të le cu'ë loli', en biti' bi inábali' que, para cabí cuéqui böniga ládxi'do'oli'. <sup>28</sup> Channö núti'tës nu guié libí'ili': "Læ ni gula'gu'ë lo budó' guiöj budó' yaga", biti' gáguli' læ na' para gaca dxi'a que nu na' gudíxjöi' caní libí'ili', en para cabí cuéqui böniga ládxi'da'ahuë'. <sup>29</sup> Rnnía': Para cabí cuéqui böniga ládxi'da'ahuë' bönni' na' gudíxjöi'inë' caní libí'ili', en calëga para cabí cuéqui böniga ládxi'do'oli' libí'i cázali'.

Nadxi ca' nu inábini neda', inná: "¿Bizx que ral-la' uzó'a tsölá'alö le dë lu na'a guna' tu' ribequi böniga ládxi'da'ahuë' bönni' yúbölö?" <sup>30</sup> Huáca inná ca' nu na': "Channö guía'-në' Dios: Xclenu', ni'a que læ na' rahua', ¿bizx que nu uzegui neda' didza' ni'a que læ na' rahua'?" <sup>31</sup> Channö bi gáguli' o bi guí'jali', o bití'tës bi gunli', guli'gún yúgu'të para gaca queë' Dios yöl-la' ba. <sup>32</sup> Biti' bi gunli' le gun ga ila'chixi ila'nigui bönachi judío, en biti' gunli' le gun ga ila'chixi ila'nigui bönachi biti' nácagaca judío, en biti' gunli' le gun ga ila'chixi ila'nigui bönachi queë' Dios. <sup>33</sup> Guli'gún ca runa' neda'. Ru'í'ládx'a' guna' le ila'yaza ládxi'gaca yúgu'të bönachi, en biti' ru'i

ládxa'a guna' le uzi'a xibé la' néda'sö, pero le ulu'zi' xibé ia'zica'rö bönachi para ulu'lágaca.

## 11

<sup>1</sup> Guli'gún ca runa' neda', ca na' neda' ca' runa' ca benë' Cristo.

*Le tunnu nigula lógaca bönachi queë' Cristo*

<sup>2</sup> Runa' libí'ili' zxön, böchi' luzá'ado', tu' röjnética'sili' neda', en nazí' lu ná'ali' xibá budöda' lu ná'ali'. <sup>3</sup> Na'a, rë'ënda' tséajni'ili' rinná bé'enë' Cristo yúgu'të bönni', ate' bönni' rinná bé'enë'-nu nigula, ate' Dios rinná bé'enë' Zxí'inë', Bönni' na' náquië' Cristo. <sup>4</sup> Channö tu bönni' rulidzë' Dios, o ru'ë didza' uláz queë' Dios, en dxía icjë' xilu'ë, rucá'anë' Cristo cá'asö. <sup>5</sup> Na'a, channö tu nigula rulídzanu Dios, o ruí'inu didza' uláz queë' Dios, en biti' bi zxoá ícjanu, rucá'ananu bönni' queënu cá'asö, en naca queënu ca naca queënu tu nigula narugu guitsa' ícjanu. <sup>6</sup> Channö tu nigula cabí bi zxoá ícjanu, ral-la' irugu ca' guitsa' ícjanu. Channö gun ga utuí'inu nigula na' channö nu chugu guitsa' ícjanu, ral-la' bi ixóa ícjanu. <sup>7</sup> Tu bönni' biti' bi ral-la' udxía icjë' cate' ridxinë' lahuë' Dios, tu' náquië' ca naca cazë' Dios, ate' lë na' náquië' bönni' ruluí'i lahui yöl-la' zxön queë' Dios, pero le nácanu nigula na' ruluí'i lahui yöl-la' zxön queë' bönni' queënu. <sup>8</sup> Cate' benë' Dios bönachi, biti' bubéajë' bönni' na' lu nigula. Nigula na', lu bönni' na' bubéajë'-nu. <sup>9</sup> Lësca' caní, biti' benë' Dios bönni' para uzi'inu xibé' nigula, pero benë' nigula para uzi'ë xibánu bönni'. <sup>10</sup> Que lë ni na', nigula na' ral-la' ixóa ícjanu le ruluí'i zoa nu rinná be'e lënu tu' tu'yúë' gubáz lá'ayi queë' Dios rë'u. <sup>11</sup> Na'a, lahuë' Xanru', tu bönni' riquinnë'-nu nigula queë', ate' nigula na' riquíninu-në' bönni' queënu. <sup>12</sup> Ca na' benë' Dios, bubéajë'-nu nigula lu bönni', lësca' caní na'a, yúgu'të bönni' náljlengaquië'-nu nigula, ate' yúgu'të rirúaj lu në'ë Dios.

<sup>13</sup> Buli'chi'a buli'sörö la' libí'isili'. ¿Naru' ral-la' ulídzanu-në' Dios tu nigula biti' bi zxoá ícjanu? <sup>14</sup> ¿Naru' cabí rusëdi libí'ili' yöl-la' nácate' quégaca bönachi, ral-la' utuí'inë' bönni' na' ru'ë lataj itunna guitsa' icjë'? <sup>15</sup> Na'a, channö natúnna guitsa' ícjanu tu nigula, naca yöl-la' lachi queënu, tu' bë'ë Dios queënu guitsa' ícjanu para usubín ícjanu. <sup>16</sup> Channö zoa nu guë'ëni tá'baga' didza' ni, canisö nazí' lu na'tu' runtu', en lëbisö tun yugu' cö' bönachi queë' Dios.

*Bönachi Corinto tu' cá'ana cá'asö le rë'aj ráguru' para usubanru' ca gútië' Xanru'*

<sup>17</sup> Biti' runa' libí'ili' bal ca naca le uzéajni'ida' libí'ili' na'a. Le runlí' biti' run ga raca dxi'a queëli' cate' rudúbili' queë' Cristo, pero run ga raca queëli' le cabí naca dxi'a. <sup>18</sup> Risí' lahua' ruzéajni'ida' libí'ili' lë ni ta'guíxjô'i bönachi neda', ta'nná: "Cate' rudúbili' queë' Cristo, narúajli' choplö", ate' réajlë'a nadxi ca' naca caní. <sup>19</sup> Run bayudxi ila'cuá'alén libí'ili' nupa tu'sedi le cabí nácate' para ilaca bë' nupa nácagaca idú bönachi queë' Cristo. <sup>20</sup> Que lë ni na', cate' rudúbili', lë na' ráguli' tsözxön biti' naca le rë'aj ráguru' para usubanru' ca gútië' Xanru'. <sup>21</sup> Caní naca, tu' runlí' bayudxi tu tuli' ráguli' le nuá'ali' que queëli' cate' ráguli' tsözxön, ate' que lë ni na' ridunlí' bál-lali', ate' ia'bál-lali' rë'aj ráguli' ga ridxintë rizúdxili'. <sup>22</sup> ¿Naru' cabí zoa lídxili' ga huáca guí'aj gáguli'? Ca na' runlí', rucá'anali' bönachi queë' Dios cá'asö, en runlí' ga tu'tuí'i nupa biti' bi dë' quéguequi. ¿Bizxi caz

guía' libí'ili'? ¿Naru' guntsa' libí'ili' bal? Biti' ca' runa' libí'ili' bal ca naca lè ni runli'.

*Le rë'aj ráguru' para usubanru' ca gútië' Xanru'*

<sup>23</sup> Xanru' caz budödë' lu na'a lè na' busédida' libí'ili', ca na' benë' Xanru' Jesús yëla ni' cate' nu budödi Lë' lu ná'agaquië' bönni' gulútië' Lë'. Gudélë'ë yöta xtila, <sup>24</sup> en cate' budxi gudxë' Dios: "Xclenu'", buzxuzxjë' le, en gunnë': "Guli'gagu. Lè ni naca xipéla'a le nayuzxaj uláz queëli'. Guli'gún caní, para usubanli' ca gaca quia' neda'." <sup>25</sup> Lësca' caní, gudödi gulahuë', gudélë'ë tu zxíga'do', en gunnë': "Le yudzu zxíga'do' ni naca xichöna', le run tsutsu didza' cubi rucá'ana tsahui'. Guli'gún caní yúgu'të luzuí guí'jali' le, para usubanli' ca gaca quia' neda'." <sup>26</sup> Caní gaca ga idxintë dza huödë' Xanru'. Yúgu'të luzuí gáguli' yöta xtila caní, en guí'jali' que le yudzu zxíga'do' caní, ulu'ili' lahui ca gútië' Xanru'.

*Ca ral-la' gunru' cate' guí'aj gáguru' para usubanru' ca gútië' Xanru'*

<sup>27</sup> Que lè ni na', núti'tës nu gagu yöta xtila ni o guí'aj que le yudzu zxíga'do' ni queë' Xanru', en biti' run le bal, nabaga' xíguia' nu na', en run dul-la', tu' rucá'ana xipélë'ë Xanru', enca' xichönë' cá'asö. <sup>28</sup> Que lè ni na', ral-la' uchi'a usöröru' la' cuínsiru' tu turu', ate' ní'irö huáca gáguru' yöta xtila ni, en guí'ajru' que le yudzu zxíga'do' ni. <sup>29</sup> Núti'tës nu rë'aj ragu lè ni, en biti' run le bal tu' cabí réquibe'e rulu'í le guca queë' Xanru', rusubaga' cuini dul-la' ni'a que lè na' rë'aj ragu. <sup>30</sup> Que lè ni na' te'e zían nupa dzágagaca libí'ili', en ta'cuídi', ate' zianguequi chinátigaca. <sup>31</sup> La'tu' uchi'a usöröru' la' cuínsiru', biti' uchi'a usöröë' Xanru' rë'u. <sup>32</sup> Channö gun bayudxi uchi'a usöröë' Xanru' rë'u, usaca' zí'ë rë'u, para cabí irugu queëru' cate' ichúguië' queguequi bönachi yödzölió ilátigaca.

<sup>33</sup> Que lè ni na', böchi' luzá'ado', cate' udúbili' para guí'aj gáguli' para usubanli' ca gútië' Xanru', guli'cöza luzá'ali'. <sup>34</sup> Channö zoa nu ridún, ral-la' gagu nu na' ga naca lu yu'u lidxi, para cabí gun bayudxi uchi'a usöröë' Dios libí'ili' cate' udúbili'. Nacuá' ia'bal-la le runli', pero ucá'ana' tsahui' yugu' lè na' cate' uduyúa' libí'ili'.

## 12

*Yugu' yöl-la' huáca runnë' queëru' Dios Bö' Lá'ayi*

<sup>1</sup> Na'a, böchi' luzá'ado', rë'ënda' tséajni'ili' ca zeaj naca yöl-la' huáca runnë' queëru' Dios Bö' Lá'ayi.

<sup>2</sup> Nöz quézili' ca guca cate' ni' biti' réajlë'ënili' Cristo, bë'ëli' lataj gula'ché' bönachi libí'ili' ga yúbölö. Guyéaj ladxí'li' budó' guiöj budó' yaga, le cabí ta'nnë. <sup>3</sup> Que lè ni na', ruzéajni'ida' libí'ili' caní, rnnía': Ladaj yúgu'të nupa tu'í didza' uláz queë' Bö' Lá'ayi queë' Dios, cuntú nu gaca innë xihui' queë' Jesús, en nitúë' gaca innë': "Jesús náquië' Xanru'", channö cabí zóalenë' Dios Bö' Lá'ayi nu na'.

<sup>4</sup> Na'a, nadzá'gaca tu tu le runnë' Dios Bö' Lá'ayi queëru', pero tuzë' náquië' Bö' Lá'ayi na'. <sup>5</sup> Lësca' caní, nadzá'gaca tu tu dxin rigü'ë Xanru' lu ná'aru', pero tuzë' náquië' Xanru' na'. <sup>6</sup> Nadzá'gaca ca' tu tu yöl-la' huáca náparu' le rúniru' xichinë' Dios, pero tuzë' náquië' Dios, Nu na' runna yöl-la' huáca na' queëru' para gunru' xichinë'. <sup>7</sup> Dios runnë' que queëru' tu le naca bë' náparu' yöl-la' huáca queë' Dios Bö' Lá'ayi, lè na' ruzí'iru' xibé yúgu'tëru'. <sup>8</sup> Dios Bö' Lá'ayi runödzejë' queë' tu bönni' yöl-la' huáca ru'ë didza' len yöl-la' rácada', ate' ia'túë' bönni', Lë cazë' Bö' Lá'ayi

runödzejë' queë' yöl-la' huáca ru'ë didza' lu yöl-la' réajni'i. <sup>9</sup> Lësca' caní, Lë cazë' Dios Bõ' Lá'ayi na' runödzejë' queë' ia'tué' bönni' yöl-la' réajlë' Cristo bi gunë', ate' ia'tué' bönni' runödzejë' queë' yöl-la' huáca ruúnë' nupa te'e. <sup>10</sup> Ia'tué' bönni' runödzejë' queë' yöl-la' huáca runë' yugu' yöl-la' huáca que yehua' yubá, ate' ia'tué' bönni' ru'ë lë' lataj ru'ë didza' uláz queë' Dios, ate' ia'tué' bönni' runödzejë' queë' yöl-la' huáca réquibe'enë' channö bö' dzaga nu bönni' nequi queë' Dios, o nequi que tu' xihui'. Runödzejë' queë' ia'tué' bönni' yöl-la' huáca ru'ë didza' yúbölö le cabí nazëdë', ate' queë' ia'tué' bönni' yöl-la' huáca rudödë' didza' yúbölö na' biti' nazëdë'. <sup>11</sup> Yúgu'të lë ni runë' Lë cazë' Dios Bõ' Lá'ayi, tu' runödzejë' que tu tu bönachi tsa rë'ëni quézinë'.

*Yúgu'tëru' nácaru' ca tuz bönachi*

<sup>12</sup> Ca na' naca tuz idütë le naca cázaru', sal-la' zían le nagudi' dzágalenru', ate' le zían na' nagudi' dzágalenru' nácacaca tuz idütë le naca cázaru', lësca' caní naca queë' Cristo. <sup>13</sup> Tu' zóalenë' Lë cazë' Dios Bõ' Lá'ayi rë'u, lë ni naca queëru' ca tu le nadílaru' nisa, le naca bë' nácaru' ca tuz bönachi, sal-la' nácaru' yugu' bönni' judío, en yugu' bönni' zi'tu', enca' yugu' bönni' nadó'ogaquië', en yugu' bönni' biti' nadó'ogaquië'. Yúgu'tëru', Dios bë'ë rë'u lataj sí'iru' le runödza cazë' Bõ' Lá'ayi.

<sup>14</sup> Na'a, lu idütë le naca cázaru', zían le nagudi' dzágalenru', en calëga tuz. <sup>15</sup> La'tu' huáca gü'i didza' ní'aru', huanná: "Tu' cabí naca' në'ë bönni', biti' néquida' queë'", didza' ni biti' gun ga biti' nequi queë' bönni' na'. <sup>16</sup> La'tu' huáca gü'i didza' nágaru', huanná: "Tu' cabí naca' guió'j lahuë', biti' néquida' queë' bönni' ni", didza' ni biti' gun ga biti' nequi queë' bönni' na'. <sup>17</sup> La'tu' naca guió'j loru' idütë le naca cázaru', ¿nacxi gaca yöniru'? La'tu' naca nágaru' idütë, ¿nacxi gaca ilé'e zxína'ru'? <sup>18</sup> Na'a, Dios nucu'ë yúgu'të le nagudi' dzágalenru' ca gú'uni quézinë' Lë'. <sup>19</sup> La'tu' naca tuz le nagudi' dzágalenru', bití'ro soa idú ca naca cázaru'. <sup>20</sup> Na'a, ca nácaru', zían le nagudi' dzágalenru', pero tuz le nácaru'.

<sup>21</sup> Que lë ni na', guió'j loru' biti' gaca gué' ná'aru', inná: "Biti' riquinda' li'." Lësca' caní, ícjaru' biti' gaca gué' ní'aru', inná: "Biti' riquinda' libí'ili'." <sup>22</sup> Na'a, yugu' le nagudi' dzágalenru', lë na' réquiru' nácacagarö cuídi'sö, lë ni naquíniröru'. <sup>23</sup> Lësca' caní, yugu' le nagudi' dzágalenru', le réquiru' nácacagarö cá'asö, lë ni rugácuröru' dxi'a, en yugu' le réquiru' biti' ral-la' ilá' lahui, rugácuröru' ca' dxi'a. <sup>24</sup> Biti' run bayudxi gunru' caní que le nácarö lachi que le néquiniru'. Dios benë' idütë le naca cázaru', en benë' ga nácarö lesaca' lë na' réquiru' rë'u nácarö cá'asö. <sup>25</sup> Caní benë', ate' biti' narúajgaca choplö le nagudi' dzágalenru', tu' tun chi'i luzë' eguequi tu ia'tú. <sup>26</sup> Channö gaca zi' tu le néquiniru', ilaca zi' tsözxön len le yúgu'të le néquiniru' na', en channö tu le néquiniru' zoa bi ruzí' xibé, yúgu'të le nagudi' dzágalenru' tu' zí xibé tsözxön le.

<sup>27</sup> Na'a, libí'i cázali' dzágali' idütë le naca cazë' Cristo, ate' tu tuli' nácali' ca yugu' le nagudi' dzágalenë'. <sup>28</sup> Lësca' caní, ladaj bönachi queë' Cristo, Dios nucu'ë nupa tun xichinë'.

Ga naca lo nucu'ë yugu' bönni' gubáz queë' Cristo.

Ga naca buropi nucu'ë yugu' bönni' tu'ë didza' uláz queë'.

Ga bunni nucu'ë yugu' bönni' tu'sédinë' luzá'aru'.

Ní'irö nucu'ë nupa tun yugu' yöl-la' huáca que yehua' yubá.

Ní'irö nucu'ë nupa tu'ún nupa te'e.

Ní'irö nucu'ë nupa tácalen böchi' luzá'aru'.  
 Ní'irö nucu'ë yugu' bönni' tu'luí'inë' rë'u dxin gunru'.  
 Ní'irö nucu'ë yugu' bönni' tu'ë didza' yúbölö biti' nazédagaquië'.

<sup>29</sup> Calëga yúgu'të' nácagaquië' gubáz queë' Cristo.

Calëga yúgu'të' tu'ë didza' uláz queë' Dios.

Calëga yúgu'të' tu'sédinë' luzá'aru'.

Calëga yúgu'të' tunë' yugu' yöl-la' huáca que yehua' yubá.

<sup>30</sup> Calëga yúgu'të' dë lu ná'agaquië' ulu'únë' nupa te'e.

Calëga yúgu'të' tu'ë didza' yúbölö biti' nazédagaquië'.

Calëga yúgu'të' tu'dödë' didza' yúbölö biti' nazédagaquië'.

<sup>31</sup> Guli'gúí' ládxi'li' cu'ë Dios lu ná'ali' yugu' yöl-la' huáca na' nácagacarö lesaca'. Na'a, uluí'ida' libí'ili' tu le nácarö lesaca' ca yúgu'të' lë ni.

## 13

### *Yöl-la' nadxí'i*

<sup>1</sup> Sal-la' gaca gu'a xtídza'gaca bönachi le cabí nazëda', enca' xtídza'gaquië' gubáz lá'ayi queë' Dios, pero channö cabí nadxí'ida' luzá'a, didza' gu'a biti' gácarö lesaca' ca bö le run gui rucödxiru' o guíë rutíl-laru' luzë'e. <sup>2</sup> Sal-la' nazi' lu na'a gu'a didza' uláz queë' Dios en tséajni'ida' yúgu'të le nagachi', en yúgu'të didza' réajni'i, en sal-la' naca idú ca réajlë'a Dios ga ridxintë huáca cúa' yugu' guí'a, pero channö cabí nadxí'ida' luzá'a, biti' bi nazáca'a. <sup>3</sup> Sal-la' quisía' idütë le dë quia' para ugahua' yugu' bönachi yechi', en sal-la' udöda' idütë le naca' ga ulu'zegui bönachi le tu' réajlë'a Cristo, pero channö cabí nadxí'ida' luzá'a, biti' ca' uzi'a xibé lë na' runa'.

<sup>4</sup> Nu bönni' nadxí'inë' luzë'ë, ribözë' zxön ladxí'.

Náquië' dxi'i ladxí', en biti' ruzxé'enë' luzë'ë.

Nadxí'inë' luzë'ë idú ladxë'ë.

Biti' run ba zxön cuinë', en biti' run cuinë' lo.

<sup>5</sup> Biti' runë' le ruá' dö'.

Biti' rudúli'në' le dë queë'.

Biti' rilëtenë', en biti' røjnenë' dö' guluí'i bönachi queë'.

<sup>6</sup> Biti' ca' rudzëjanë' cate' nu run le ruá' dö'.

Rudzëjanë' cate' nu run le naca idütë li.

<sup>7</sup> Ruá' rilenë' bíti'tës bi gun luzë'ë queë'.

Réajlë'tica'së' luzë'ë.

Rúntica'së' löza gun luzë'ë le naca dxi'a.

Ribözatica'së' zxön ladxí'.

<sup>8</sup> Bíti'rö tödi que yöl-la' nadxí'i. Huadödi que le dë lu ná'agaca bönachi iluí'i didza' uláz queë' Dios. Huadxín dza cate' bíti'rö gata' lu ná'agaca bönachi iluí'i didza' yúbölö le cabí nazédagaca, ate' huadödi que yöl-la' réajni'i quéguequi bönachi. <sup>9</sup> Láti'do'os réajni'iru' na'a, en láti'do'os ca' ruí'iru' didza' uláz queë' Dios. <sup>10</sup> Cate' idxín le naca idú, ní'irö údxi que lë na' naca láti'do'os.

<sup>11</sup> Cate' ni' naca' bí'ido', bë'a didza' ca bí'ido', en gulequi icja' ca bí'ido', en guzá' ládxa' ca bí'ido'. Cate' bigula' bucá'ana' le nequi que bí'ida'ahua'. <sup>12</sup> Na'a le rilé'eru' naca ca le rilé'eru' cate' ruyú cuinru' tu lu guíë dxíildo'. Biti' rilé'eru' idú ca naca. Dza ní'irö ilé'eru' idú ca naca yúgu'të. Na'a núnbë'a láti'do'os. Dza ní'irö gúnbë'a yúgu'të ca na' Dios caz núnbë'ë neda'. <sup>13</sup> Na'a, nacuá'tica'sö yöl-la' réajlë' queëru' Dios, en yöl-la'



run löza queëru' Dios, en yöl-la' nadxí'i queëru' luzá'aru'. Nacuá' yonna ni, pero le naca lo naca yöl-la' nadxí'i.

## 14

### *Yugu' yöl-la' huáca runnë' queëru' Dios Bö' Lá'ayi*

<sup>1</sup> Guli'gún bayudxi idxí'ili' luzá'ali', en guli'güí' ladxí'li' sí'ili' ca' yugu' yöl-la' huáca runnë' queëru' Dios Bö' Lá'ayi, en le naca lo, yöl-la' huáca güí'ili' didza' uláz queë' Dios. <sup>2</sup> Nu ruí'i didza' yúbölö le cabí nazëda, calëga bönachi ruí'ilen didza' nu na'. Dios caz ruí'ilen didza' nu na', tu' cuntú nu zoa réajni'i didza' ruí'i nu na'. Dios Bö' Lá'ayi ru'ë nu na' lataj ruí'i didza' ca náca gaca le nagachi' queë' Dios. <sup>3</sup> Nu na' ruí'i didza' uláz queë' Dios, ruí'ilen bönachi didza' para gácarö idú ca ta'yéajlë' Cristo. Rutipa ladxí'guequi, en ruhuë tsahuí' léguequi. <sup>4</sup> Nu na' ruí'i didza' yúbölö le cabí nazëda run tsutsu la' cuinsi, pero nu ruí'i didza' uláz queë' Dios run tsutsu yúgu'të bönachi queë' Cristo.

<sup>5</sup> Raca ladxá'a güí'ili' didza' yúbölö le cabí nazëdali' yúgu'tëli', pero le naca lo, ré'ënda' güí'ili' didza' uláz queë' Dios. Ruzí'iröru' xibé nu ruí'i didza' uláz queë' Dios ca ruzí'iru' xibé nu ruí'i didza' yúbölö le cabí nazëda, channö cabí zoa nu udödi didza' yúbölö na' le cabí nazëda, para ilaca tsutsu bönachi queë' Cristo. <sup>6</sup> Que lë ni na', böchi' luzá'ado', cate' guída' ga zóali', channö güí'ilena' libí'ili' didza' yúbölö le cabí nazëda', bití' bi uzí'ili' xibé. Uzí'isili' xibé didza' na' güí'ilena' libí'ili' le nulul'inë' Dios neda', o didza' uzéajni'i rë'u, o didza' gu'a uláz queë' Dios, o le naca xibá queë'.

<sup>7</sup> Lësca' caní raca que le ta'gú'u bö, yugu' le cabí nabángaca, ca naca gui rucódxiru', o ca naca guitarra. Channö cabí tul-la ca ral-la' ilún, ¿nacxi caz gúnbë'ëru' bízxilö le tul-la na', lë na' rul-la gui na', o guitarra na'? <sup>8</sup> Channö cabí cödxí ca ral-la' gun lúzuba' böa' na' ulidza rë'u lu gudil-la, ¿nuzxi caz upá' cuini para tseaj lu gudil-la na'? <sup>9</sup> Lësca' caní raca queëli'. Channö len lúdxí'li' güí'ili' didza' le cabí taca bönachi, bití' ca' ila'yéajni'i didza' güí'ili'. Caní gaca, nítisö güí'ili' didza'. <sup>10</sup> Le nácatë nacué' zían didza' yúbölö tuí'i zían cö' bönachi izá'a lu yödzölió ni, ate' nacué' bönachi ta'yéajni'i tu tu didza' na'. <sup>11</sup> Na'a, channö cabí réajni'ida' didza' ru'ë tu bönni', gaca' ca tu bönni' zítu' lahuë bönni' na' ru'ë didza', ate' bönni' na' ru'ë didza' gáquië' ca' lahua' neda' ca tu bönni' zítu'. <sup>12</sup> Lësca' caní naca queëli'. Ruí'ida' ladxí'li' sí'ili' yugu' le runnë' queëru' Dios Bö' Lá'ayi. Que lë ni na', guli'güí' ladxí'li' sí'ili' le ilún ga ilácarö tsutsu bönachi queë' Cristo.

<sup>13</sup> Que lë ni na' ca', nu ruí'i didza' yúbölö le cabí nazëda ral-la' ulidza Dios, en inabi Lë' gunnë' que yöl-la' huáca quixjö' le ré'ëni inná didza' na' ruí'i nu na'. <sup>14</sup> Cate' rulidza'-në' Dios, channö ruá'a didza' yúbölö le cabí nazëda', lu bö' naca caza' rulidza'-në' Dios, pero tu' cabí réajni'ida' didza' ruá'a, lu yöl-la' réajni'i quia' bití' ruzi'a xibé didza' na' ruá'a. <sup>15</sup> ¿Nacxi caz ral-la' guna' channö? Ulidza'-në' Dios lu bö' naca caza', enca' lu yöl-la' réajni'i quia' ulidza'-në' Dios. Gul-la' yöl-la' ba lu bö' naca caza', enca' lu yöl-la' réajni'i quia' gul-la' yöl-la' ba. <sup>16</sup> Channö lu bö' naca cazu' rulidza lá'ayu'-në' Dios, ate' zoa ni' nu riyönisö, channö cabí réajni'i didza' ru'u, ¿nacxi caz gaca inná: "Ca' gaca", ni'a que didza' ru'u, rë'u-në' Dios: "Xclenu"?" <sup>17</sup> Nadxi ca' dxí'ado' ru'u didza', rë'u-në' Dios: "Xclenu'." Channö cabí réajni'i didza' ru'u, bití' bi uzí' xibé nu na' riyöni. <sup>18</sup> Rea'-në' Dios: "Xclenu'", tu' ruí'ira' didza' yúbölö le cabí nazëda' ca yúgu'tëli'.

19 Lógaca bönachi queë' Dios guë'ënitë'röda' gu'a gáyu'sö didza' le gaca ila'yéajni'i bönachi ca zían gayuá' didza' yúbölö le cabí nazëda', ate' cuntu nu gaca tséajni'í. Gaca usédida' ia'zica'rö bönachi tuzi channö ila'yéajni'í didza' gu'a.

20 Böchi' luzá'ado', biti' gácali' ca bí'ido' ca naca le rizá' ládxi'li'. Guli'gaca ca bí'ido' para cabí gunli' le ruá' dö', pero guli'gaca bönni' chinácagaca ca naca le rizá' ládxi'li'. 21 Nazúaj lu guichi lá'ayi le rnna: "Len didza' yúbölö, en lu ruá'agaca bönachi izá'a gü'ílena' bönachi ni didza'. Sal-la' guna' caní, biti' ulu'zë nágagaca xtídza'a." ¿Caní rnnë' Xanru'! 22 Caní naca, Dios ru'ë rë'u lataj ru'íru' didza' yúbölö le cabí nazëdaru' para gaca tu le naca bë' lógaca bönachi biti' ta'yéajlë', en calëga lógaca nupa ta'yéajlë' Cristo. Ru'ë rë'u lataj ru'íru' didza' uláz queë' Lë' le ulu'z'í xibë nupa ta'yéajlë' Cristo, en calëga bönachi na' biti' ta'yéajlë'. 23 Que lë ni na', cate' udúbili' tsözxön, yúgu'tëli' na' néquili' queë' Cristo, channö gü'íli' didza' yúbölö le cabí nazëdali' yúgu'tëli', ate' tsázagaca nupa nazëdagaca láti'do'os, o nupa biti' ta'yéajlë' Cristo, ¿naru' cabí ila'nná: "Nachixi ícjali'?" 24 Na'a, channö yúgu'tëli' gü'íli' didza' uláz queë' Dios, ate' tsaz nu cabí réajlë' Cristo o nu nazëda láti'do'os, guéquibe'e nu na' nabaga' xíguia', ate' Dios uchi'a usöröë' lë'. Caní guéquibe'e nu na', tu' tseajni'í didza' gü'íli' yúgu'tëli'. 25 Guéquibe'e ca naca le rizá' ládxi' nu na', lë na' bigachi', ate' uzóa zxibi nu na', en tseaj ládxi' Dios, ate' inná: "Le nácatë Dios zóalenë' libí'ili'."

#### *Ca ral-la' gunru' ga rudúbiru' queë' Cristo*

26 Que lë ni na', böchi' luzá'ado', cate' rudúbili' queë' Cristo, rul-lë' tuë' bönni' dzáguie' libí'ili' tu salmo, ate' rusédinë' ia'túë' tu xibá, ate' ia'túë' riguíxjöi'inë' libí'ili' tu le buluí'inë' Dios lë', ate' ia'túë' ru'ë didza' yúbölö le cabí nazëdë', ate' ia'túë' rudödë' didza' yúbölö na' le cabí nazëdë'. Yúgu'të le gunli' ral-la' gaca le ulu'z'í xibë nupa tu'dubi queë' Cristo. 27 Cate' nacua' ni' nupa tu'í didza' yúbölö le cabí nazëdagaca, biti' ral-la' gü'íli' didza' caní zíanrö ca chopa tsónnasili'. Huáca gu'ë didza' tuzë' bönni' na', ate' tödi na' huáca gu'ë didza' ia'túë', pero run bayudxi soa nu udödi didza' yúbölö na' le biti' nazëdali'. 28 Channö cuntu nu zoa nu gaca udödi didza' yúbölö na' le cabí nazëdali', nu na' ru'í didza' yúbölö le cabí nazëda ral-la' soa dxisö ga na' nudúbili', ate' huáca gü'ílen Dios didza' na' lu icja ládxi'da'ahui. 29 Lësca' caní, yugu' bönni' tu'ë didza' uláz queë' Dios ral-la' ilu'ë didza' chopa tsónnasë', ate' ia'zica'rë' bönni' na' tu'ë didza' uláz queë' Dios ral-la' ulu'chi'a ulu'söröë' didza' ru'ë bönni' na'. 30 Channö Dios uluí'inë' tu bönni' rö'ë ni' le rë'ëni inná xtídzë'ë, ral-la' soa dxisö nu na' ru'í didza'. 31 Yúgu'tëli' huáca gü'íli' didza' uláz queë' Dios tu tulí' para izëdali' yúgu'tëli', en idipa ládxi'li' ca' yúgu'tëli'. 32 Yugu' bönni' tu'ë didza' uláz queë' Dios huáca ila'nná be'e cuíngaquië', en ila'cu'ë dxisö. 33 Calëga Dios nu run ga rutsátsaru', tu' rë'ëné' Lë' gácaru' ba'a ládxi', ca na' runë' ga nacua' yúgu'të cö' bönachi queë' Cristo.

34 Ral-la' ila'cuá'anu dxisö nigula queëli' ga na' rudúbili'. Biti' dë lu ná'agacanu ilu'ínu didza' ni'. Ral-la' ila'cuá'anu nöxaj ca na' rinná bë' xibá queë' Dios. 35 Channö të'ëninu ila'yéajni'ínu ia'lati', ral-la' ila'nábinu bönni' que queëgacanu cate' ni' nacu'ë lídxigaquië'. Biti' ral-la' ilu'ínu didza' yugu' nigula ga na' rudúbiru' queë' Dios.

36 ¿Naru' réquitseli' bunödzejë' Dios xtídzë'ë lu ruá'ali' libí'isili'? ¿Naru' réquitseli' bidxín xtídzë'ë Dios queëzili' libí'ili'? 37 Channö nu bönni'

nútsë'è ládjali' réquinë' ru'è didza' uláz queë' Dios, o réquinë' zóalenë' Dios Bö' Lá'ayi lë', bönni' ni ral-la' si' lu në'è naca xibá queë' Xanru' le ruzúaja' queëli' lu guichi ni. <sup>38</sup> Na'a, channö cabí ru'i ládxe'è didza' ni, biti' güf'i ládxi'li-në' bönni' na'.

<sup>39</sup> Que lë ni na', böchi' luzá'ado', guli'güi' ládxi'li' güf'ili' didza' uláz queë' Dios, en biti' inná bé'eli' nu ru'i didza' yúbölö le cabí nazëda. <sup>40</sup> Ral-la' gunru' yúgu'të ca sa'yéaj, en lu yöl-la' ba'a ladxi'.

## 15

### *Bubanë' Cristo lu yöl-la' guti*

<sup>1</sup> Na'a, böchi' luzá'ado', rigu'xjöi'ida' libí'ili' ca naca didza' dxi'a na' bena' libán que ga zóali', lë na' guzxi' lu ná'ali', ate' run ga nácarö idú ca réajlë'ëli' Cristo. <sup>2</sup> Ni'a que didza' ni uláli', channö gunli' ca rnna didza' dxi'a na' bena' libán que ga zóali', channö le nácatë guyéajlë'ëli'-në' Cristo.

<sup>3</sup> Ga gusí lo budöda' lu ná'ali' le budödë' Dios lu na'a neda'. Caní rnna: "Gútië' Cristo uláz queëru' tu' nabágaru' dul-la'." Ca naca lë ni nazúaj lu guichi lá'ayi le rnna ben bayudxi benë'. <sup>4</sup> Rnna ca': "Bigachë'è yeru ba, en cate' bizá'a tsonna dza, bubanë' lu yöl-la' guti", ca na' nazúaj ca' lu guichi lá'ayi le rnna ben bayudxi guca queë'. <sup>5</sup> Gudödi ni' buluf'i lahuë' Cristo, ate' bilé'enë' Pedro Lë', en gudödi ni' idxínnutë' gubáz queë' bila'lé'enë' Lë'. <sup>6</sup> Ní'irö buluf'i lahuë' lógaquië' zíanrö ca gayu' gáyu'ë böchi' luzá'aru' ta'yéajlë'è Cristo, cate' ni' nudúbigaquië' tsözxön. La'tu'biqiu' yúgu'të böchi'ru' ni nacu'ë nabánagaquië' na'a, sal-la' bal-lë' chinátigaquië'. <sup>7</sup> Ní'irö Jacobo bilé'enë' Lë', en gudödi ni' buluf'i lahuë' lógaquië' yúgu'të bönni' gubáz queë'.

<sup>8</sup> Ga yöjsetë buluf'i lahuë' ca' lahu'a' neda'. Ca guca lë ni, naca' ca tu bí'ido' gúljabí' cate' chigudödi dza ral-la' gáljabí'. <sup>9</sup> Caní naca, tu' nácara' neda' cá'asö ca yúgu'të bönni' gubáz queë', en biti' naca' neda' lesaca' si' la' gubáz queë', tu' gudxía ládxa'a bönachi queë' Dios. <sup>10</sup> Na'a, tu' buzá' ládxe'è quia' Dios naca' le naca' na'a, en calëga nítisö buzá' ládxe'è quia'. Béntëra' neda' xichinë' ca ia'zica'rë' gubáz queë', sal-la' calëga rácasö quia' bena' dxin na'. Dios caz, lu yöl-la' ruzá' ladxi' queë', bugunë' neda' dxin. <sup>11</sup> Na'a, channö bena' libán neda' o channö gulunë' libán ia'zica'rë' bönni', lë ni le runtu' libán que, en le guyéajlë'ëli' libí'ili'.

### *Ubanru' lu yöl-la' guti*

<sup>12</sup> Runtu' libán queë' Cristo ca na' bubanë' lu yöl-la' guti. Channö caní naca, çnacxi caz naca, rnnali' bál-lali': "Biti' ulu'bán nupa chinátigaca"? <sup>13</sup> La'tu' cabí ulu'bán nupa chinátigaca, biti' bubanë' Cristo, <sup>14</sup> en la'tu' cabí bubanë' Cristo, nítisö naca le bentu' libán que, en nítisö naca yöl-la' réajlë' queëli' Lë'. <sup>15</sup> Ia'stú, la'tu' cabí bubanë' Cristo, rizí' yë'ëtu' cate' runtu' ba nali' queë' Dios, rnnatu' busubanë' Cristo, ate' la'tu' cabí usubanë' nupa chinátigaca, Dios biti' busubanë' Cristo. <sup>16</sup> La'tu' cabí ulu'bán nupa chinátigaca, biti' bubanë' Cristo, <sup>17</sup> en la'tu' cabí bubanë' Cristo, nítisö naca yöl-la' réajlë' queëli' Lë', ate' nagá'anagaca dul-la' nabága'li'. <sup>18</sup> Lësca' caní, nupa na' chinátigaca, en gula'yéajlë' Cristo, tsaz gulati channö cabí bubanë' Lë'. <sup>19</sup> Channö tsánnisö ni zóaru' nabanru' huáca uzí'iru' xibë' Cristo, nácaröru' bayechí' ca yúgu'të bönachi.

<sup>20</sup> Na'a, le nácatë bubanë' Cristo lu yöl-la' guti, en náquië' nu gusí lo bubán tsaz ladaj yúgu'të nupa ulu'bán tsaz lu yöl-la' guti. <sup>21</sup> Ca na' guyú'u

yöl-la' guti ni'a que le benë' tuë' bönni', lësca' caní, ni'a que le benë' ia'túë' bönni' guyú'u yöl-la' rubán quégaca nupa chinátigaca. <sup>22</sup> Ca na' tati yúgu'të bönachi tu' náljengaca Adán, lësca' caní ulu'bán yúgu'të nupa na' náljengaca Cristo. <sup>23</sup> Tu tuë' ubanë' ca ral-la' gaca. Zí'alö bubanë' Cristo, ate' tódi ni ulu'bán nupa néquiquequi queë' Cristo cate' huödë'. <sup>24</sup> Ní'irö idxín dza údxi cate' ugüë' Cristo idútë le dë lu në'e, en idútë yöl-la' unná bë', en idútë yöl-la' huáca que tu' xihui', ate' udödë' yöl-la' unná bë' queë' lu në'ë Dios Xuz. <sup>25</sup> Run bayudxi inná bë'ë Cristo ga idxinrö dza chibenë' Dios ga ulu'zechu zxíbigaca lahuë' Lë' yúgu'të nupa ta'dá'baga' Lë'. <sup>26</sup> Le ridá'baga' Lë' le usunítie' ga údxi naca yöl-la' guti. <sup>27</sup> Dios chinudödë' yúgu'të lu në'ë Zxí'inë' para inná bé'enë' le. Nazúaj lu guichi lá'ayi, rna: "Budödë' yúgu'të lu në'ë para inná bé'enë' le." Na'a, naca bé' biti' budödi cuinë' lu në'ë Zxí'inë', tu' naca cazë' Lë' Nu rudödi yúgu'të lu në'ë Zxí'inë'. <sup>28</sup> Cate' idxín dza ni' chinudödë' Dios lu në'ë Cristo yúgu'të para inná bé'enë' le, ní'irö Lë' cazë' Zxí'inë' udödi cuinë' lu në'ë Dios, Nu na' budödi lu në'ë Zxí'inë' yúgu'të, ate' ga údxi, Dios inná bé'enë' tsaz yúgu'të.

<sup>29</sup> Bál-lali' ridílali' nisa uláz quégaca nupa chinátigaca. Channö réquili' biti' ulu'bán nupa na' chinátigaca, ¿bizx que ridílali' nisa uláz quégaca nupa chinátigaca?

<sup>30</sup> Zoa bönadxi queëtu' gátitu' yúgu'të dza. ¿Bizx que ru'ítu' lataj gaca caní channö cabí ubanru' lu yöl-la' guti? <sup>31</sup> Yúgu'të dza zoa bönadxi gátia'. Rigúxjö'ida' libí'ili' lë ni, böchi' luzá'ado', tu' raza ládxa'a le bena'. Caní naca tu' bena' ga réajlë'ëli' Xanru' Jesucristo. <sup>32</sup> Channö tu' gú'unisida' gudíl-lalena' böa' guixi' sínia' lu yödzö Éfeso, ¿bizxi caz uzi'a xibë? Channö cabí ulu'bán nupa chinátigaca, ral-la' gunru' ca ta'nná bönachi: "Guí'aj gáguru' tu' huátiru' cuxö huidzaj."

<sup>33</sup> Biti' gü'ili' lataj nu si' ye'e libí'ili'. Channö si' lu ná'ali' láti'do'os le cabí nácatë, idútëli' huóacali' chul-la niti. <sup>34</sup> Buli'bi'i ládxi'li', en biti' gunli' dul-la' tu' cabí núnbë'ëli'-në' Dios bál-lali' libí'ili'. Rnnía' caní para guna' ga utu'ili'.

### *Ca ilaca nupa ulu'bán lu yöl-la' guti*

<sup>35</sup> Nadxi ca' zoa nu inná: "¿Nacxi ulu'bán nupa chinátigaca? ¿Nacxi gaca idú ca nácatë cazë' cate' ulu'dxinë'?" <sup>36</sup> Li', bönni' biti' bi nözinë'. Lë na' rázu' luyú biti' ilén channö cabí initi. <sup>37</sup> Lë na' rázu' luyú naca tu xisédo'os, nadxi ca' que zxoá' xtila o que ia'tú guixi' cuando'. Lë na' rázu' biti' naca guixi' cuando' na' ral-la' ilén. <sup>38</sup> Dios runë' ga gaca guixi' cuando' ca nun cazë' que. Ca naca tu tu xisédo' na' runë' ga gaca guixi' cuando' que. <sup>39</sup> Lësca' caní, biti' naca lëbisö bëla' que queëgacaba' yúgu'tëba' böa' guixi'. Zoa tu bëla' quégaca bönachi, en ia'tú ca naca bëla' quégacaba' böa' guixi'. Ia'tú ca naca bëla' quégacaba' biguínni, en ia'tú ca naca bëla' quégacaba' böla. <sup>40</sup> Lësca' caní nadzá' idú ca nácatë caz nupa nacué' yehua' yubá ca naca idú ca nácatë caz nupa nacué' luyú ni. Zoa tu yöl-la' lachi quégaca nupa nacué' yehua' yubá, en ia'tú ca naca yöl-la' lachi quégaca nupa nacué' luyú ni. <sup>41</sup> Zoa tu yöl-la' lachi que gubidza, en ia'tú que beo', en ia'tú queëqui bölj lúzxiba. Yöl-la' lachi que tu bölj lúzxiba nadzá' ca naca yöl-la' lachi que ia'tú bölj lúzxiba. <sup>42</sup> Lësca' caní gaca cate' ulu'bán nupa chinátigaca. Cate' rigachi' lu yeru ba naca tu bëla' initi. Cate' ubán, ní'irö gaca tu le soa tsaz. <sup>43</sup> Cate' rigachi' lu yeru ba naca tu bëla' cá'asö, en le nacuidi'. Cate' ubán, ní'irö gaca tu le lachi, en le nál-la. <sup>44</sup> Cate' rigachi'

lu yeru ba naca tu bëla' que yödzülió ni. Cate' ubán, ní'irö gaca tu le soa tsaz yehua' yubá. Zoa tu bëla' que yödzülió ni, en ia'tú ca gaca le idzaga bö' naca cázaru'.

<sup>45</sup> Nazúaj lu guichi lá'ayi le rnna: "Bönni' na' gusi lahuë' zoë' luyú ni, lé' Adán, Dios benë' lé' bönni' ban", pero Bönni' na' guyázië' xilatjë' Adán, Lé' Cristo, Dios benë' ga náquië' Bö' nabániru'. <sup>46</sup> Biti' blë'ë zí'alö Bönni' na' náquië' Bö'. Bla' zí'alö nu na' naca bönáchisö, ate' ní'irö blë'ë Bönni' na' náquië' Bö'. <sup>47</sup> Bönni' ni' blë'ë zí'alö, gúquinë' yu. Bönni' na' blë'ë burópilö, Nu na' naca Xanru', birúajë' yehua' yubá. <sup>48</sup> Nupa nacuá' luyú ni nácagaca ca gúquië' bönni' na' gúquinë' yu, ate' nupa ral-la' tsöjcuá' yehua' yubá ilaca ca naca Nu na' birúaj yehua' yubá. <sup>49</sup> Ca na' na'a dë queëru' tu bëla' le naca ca guca bëla' queë' bönni' na' gúquinë' yu, lësca' ral-la' huóëquiru' ca néquinë' Nu na' birúaj yehua' yubá.

<sup>50</sup> Caní rë'ëni inná lé ni rea' libí'ili', böchi' luzá'ado', rnní'a': Le néquini bëla', en rön bití' gaca tsaz ga ni' rinná bë'ë Dios, en lësca' caní, lé na' initi bití' gaca ideli' lé na' soa tsaz. <sup>51</sup> Buli'yútsöca', rea' libí'ili' tu le bigachi': Biti' gátiru' yúgu'tëru', pero Dios utsë'ë ca nácaru' yúgu'tëru'. <sup>52</sup> Tsálido'os gaca, tsca naca tu le rutásö guiöj loru', cate' cödxí lúzuba' böa' le röjsetë. Cödxí lúzuba' na', ate' ulu'bán nupa chinátigaca, en iléquini tu le soa tsaz, ate' Dios utsë'ë le néquiniru' yúgu'tëru'. <sup>53</sup> Lé na' nácaru' le riniti ral-la' huóáca le soa tsaz, ate' le néquiniru', lé na' ral-la' gati, huóáca tu le catu caz gati. <sup>54</sup> Cate' lé na' riniti chinuhuóáca le soa tsaz, enca' lé na' ral-la' gati chinuhuóáca le catu caz gati, ní'irö idxín lé na' nazúaj lu guichi lá'ayi, le rnna:

Nadúa tsaz yöl-la' guti.

Chibidéli'në' Cristo.

<sup>55</sup> Bítirö inná be'e yöl-la' guti rë'u.

Bítirö gaca yöl-la' guti bi gun queëru'.

<sup>56</sup> Huáca bi gun yöl-la' guti queëru' tu' nabága'ru' dul-la', ate' nabága'ru' dul-la' tu' ridá'baga'ru' xibá queë' Dios. <sup>57</sup> ¡Xclenë' Dios! ¡Lë cazë' runë' ga nuláru' lu yöl-la' guti ni'a que le benë' Xanru' Jesucristo!

<sup>58</sup> Que lé ni na', böchi' luzá'ado', guli'sóa tsutsu. Guli'gaca idú ládxi'li', gúntica'sili' xichinë' Xanru' tu' nöz quézili' bití' runlí' nítisö xichinë' Xanru'.

## 16

*Yugu' bönachi Corinto tu'nödzej quégaquië' böchi'gaca ta'yádzjanë'*

<sup>1</sup> Na'a, ca naca que dumí na' unödzejali', le gácalen böchi'ru' ta'yéajlë'ë Cristo nacu'ë Jerusalén, guli'gún na'a ca na' gunná bé'eda' yugu' cö' bönachi queë' Cristo, nacuá' luyú Galacia. <sup>2</sup> Yugu' dza domingo, tu tulí' ral-la' cú'uli' quez lati' dumí, tsca na' Dios runnë' queë'li'. Guli'gún chí'i le, para cabí gun bayudxi bi utúbili' cate' idxina' ga zóali'. <sup>3</sup> Cate' ni' idxina' ga zóali', isöl-la'a Jerusalén bönni' na' cöli' libí'ili'. Uzúaja' tu lu guichi le gun ga ilaca bë'gaquië', ate' ilu'ë dumí na' unödzejali'. <sup>4</sup> Channö ral-la' tseja' ca' neda', tsöjácalenë' neda'.

*Le rë'ënë' gunë' Pablo*

<sup>5</sup> Guída' ga zóali' cate' údxi töda' yugu' yödzü luyú Macedonia, tu' run bayudxi töda' yugu' yödzü na'. <sup>6</sup> Réquida' ugá'analena' libí'ili' tu chí'i, o nadxi ca' ugá'ana' ni' yugu' beo' ziaga. Ní'irö huáca gácalenlí' neda', ugú'uli' neda' nöza gátitës ga ral-la' tseja'. <sup>7</sup> Cate' guída' uduyúa'

libí'ili' bití' rě'enda' tődisa' ni'. Runa' löza sóalena' libí'ili' xidzé, channö gunnë' Xanru' neda' lataj. <sup>8</sup> Ugá'ana' ni lu yödzo Éfeso ga idxinrö dza Pentecotés <sup>9</sup> tu' dë lataj ni guna' tu dxin zxön queë' Xanru', sal-la' zían nupa ta'dá'baga' neda'.

<sup>10</sup> Channö idxinbi' bi'i Timoteo ga na' zóali', guli'güfi' ládxi'li'-bi', para cabí ubi ugu'íbi' tsanni ni' sóalenbi' libí'ili', tu' runbi' xichinë' Xanru' ca na' runa' neda' xichinë'. <sup>11</sup> Que lë ni na', cuntu nu ral-la' uzóa lëbi' tsólá'alö. Guli'gácalen-bi', ugu'uli'-bi' nöza idú tsáhui'do', para udxinbi' ga ni zoa' neda', tu' riböza'-bi' lëbi', enca' yugu' böchi'ru' túnlenë'-bi' tsözxön dxin.

<sup>12</sup> Ca naca queë' böchi'ru' Apolos, gúta'yua' lahuë' tsejë' tsöjyüë' libí'ili' tsözxön len yugu' böchi'ru', pero bití' rě'ënë' tsejë' na'a. Guídë' cate' séqui'në'.

*Didza' ru'ë Pablo ga ruúdx*

<sup>13</sup> Buli'subán ládxi'li', en guli'gaca tsutsu ca réajlë'ëli'-në' Cristo. Guli'gaca rugu ladxí', en buli'tipa ládxi'li'. <sup>14</sup> Len yöl-la' nadxí'i guli'gún bití'tës bi gunli'.

<sup>15</sup> Na'a, böchi' luzá'ado', chinöz quézili' ca naca queë' Estéfanos, enca' quégaca di'a dza queë'. Nácagaca nupa gula'sí lógaca ta'yéajlë' Cristo ladaj bönachi nacua' luyú Acaya. Bulu'dödi cuíngaquië' para ilunë' xichíngaca bönachi queë' Dios. <sup>16</sup> Ráta'yua' loli', böchi' luzá'ado', gunli' bal nupa nácagaca ca böchi'ru' na', enca' ca nácagaca nupa tunlen légaquië' tsözxön dxin, en tácalen légaquië'. <sup>17</sup> Rudzėjada' tu' bila'dxinë' Estéfanos, en Fortunato, en Acaico ga zoa', tu' gúcalengaquië' neda' uláz queëli'. <sup>18</sup> Bulu'huë tsáhuë'ë neda' ca na' bulu'huë tsáhuë'ë ca' libí'ili'. Guli'gún bal bönachi caní.

<sup>19</sup> Yugu' cö' bönachi queë' Dios luyú Asia ni tu'gapa Dios libí'ili'. Aquilo, en Priscila, enca' nupa tu'dubi queë' Dios ga naca lu yu'u lédxigaquië' tu'gapë' Dios libí'ili'. <sup>20</sup> Yúgu'të böchi'ru' ni tu'gapë' Dios libí'ili'. Guli'gapa Dios tuli' ia'tuli', en unída'li' luzá'ali'.

<sup>21</sup> Neda', Pablo, len na' cuin caza' ruzúaja' lu guichi lë ni, rnnía': Rugapa' Dios libí'ili'.

<sup>22</sup> Nu bití' nadxí'i Xanru' Jesucristo, chinabía dö' nu na'.

Gudá Xanru'.

<sup>23</sup> Rinábida'-në' Xanru' Jesucristo uzá' ládxi'ë' queëli'. <sup>24</sup> Nadxí'ida' yúgu'tëli' tu' nácaru' tuz len Xanru' Jesucristo. ¡Ca' gaca!

## DIDZA' BUROPI GUSÖL-LË'Ë PABLO YÖDZÖ CORINTO

*Pablo rugapë' Dios bönachi queë' Cristo nacu'ë Corinto*

<sup>1</sup> Neda', Pablo, naca' gubáz queë' Jesucristo tu' rë'ënë' caní Dios. Bi'i böchi'ru' Timoteo runbi' neda' tsözxön. Rugapa' Dios libí'ili', rudúbili' queë' Dios lu yödzo Corinto, enca' yúgu'tëli' néquili' quez queë' Dios luyú Acaya ga na' nababa Corinto. <sup>2</sup> Rinábida'-në' Xúziru' Dios, en Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

*Yugu' le gudí'i guzxáquë'ë Pablo*

<sup>3</sup> ¡Yöl-la' ba Dios, Xuzë' Xanru' Jesucristo, tu' náquië' Xúziru', en ruhuéchi' ládxë'ë rë'u, en náquië' ca' Dios, Nu ruhuë tsáhuí'tica'sö rë'u! <sup>4</sup> Dios ruhuë tsáhuë'ë rë'u cate' raca bíti'tës bi raca queëru', para gaca huë tsáhuí'ru' ca' nupa bi raca queguequi. Ruhuë tsáhuí'ru' légaquië' ca na' Dios ruhuë tsáhuë'ë rë'u.

<sup>5</sup> Tsa ta'yán le riguí'i rizáca'ru', ca na' gudí'i guzxáquë'ë Cristo, lësca' caní ta'yán le tu'huë tsahui' rë'u, tu' nácaru' tuz len Cristo. <sup>6</sup> Que lë ni na', channö bi riguí'i rizáca'tu', raca caní queëtu' para gaca huë tsáhuí'tu' libí'ili', en guntu' ga uláli'. Channö Dios ruhuë tsáhuë'ë netu', raca caní para gaca huë tsáhuí'tu' libí'ili', ate' lu yöl-la' riböza zxön ladxi' queëli', gaca guá' ilenli' yugu' le quí'i sáca'li', ca na' raca ca' queëtu'. <sup>7</sup> Ruzxöni ládxi'tu'-në' Dios gúntica'së' ga gaca dxi'a queëli', tu' chinözitu' ca na' riguí'i rizáca'li' tsözxön len netu', lësca' caní ruzí'ili' xibë tsözxön len netu' le ruhuë tsáhuë'ë Dios rë'u.

<sup>8</sup> Rë'ënitü' inözili', böchi' luzá'ado', ca naca le zían le gulaca queëtu' luyú Asia. Gudödité' bë' lë na' guca queëtu', ate' guca zítërö ca le guca guá' ilentu'. Ca' guca, bíti'rö bentu' löza sóatu' ibantu'. <sup>9</sup> Gúquitu' guca queëtu' ca raca quegaquië' bönni' chinarugu quegaquië' ilátië'. Guca caní queëtu' para cabí uzxöni ládxi'tu' la' cuínsitu', pero uzxöni ládxi'tu'-në' Dios, Nu rusubán nupa chinátigaca. <sup>10</sup> Dios busölë' netu' lu lë na' ben ga guzóa bönadxi gátitu', ate' rusölë' netu' yúgu'të dza. Runtu' löza usölë' Lë' netu' caní leyúbölö <sup>11</sup> channö gácalenli' netu', ulídzali'-në' Dios, en inábili'-në' gácalenë' netu'. Dios gunë' ca na' inábili'-në' tsözxön len bönachi zían, uzá' ládxë'ë queëtu', ate' ila'nná: "Xclenë' Dios" ni'a queëtu'.

*Rigúxjö'ë Pablo bizx que ridzenë' idxinë' Corinto*

<sup>12</sup> Lë ni le run ga rudzëjatu'. Bö' naca caztu' rulu'í'i netu', len yöl-la' ba'a ladxi' queëtu', en idú ládxi'tu' runtu' bi runtu' yödzo'lió ni, ate' caní bentu' ca' ga ni' zóali'. Caní bentu', tu' gúcalen netu' le buzá' ládxë'ë Dios queëtu', en calëga len yöl-la' réajni'í queëztu' bentu' caní. <sup>13</sup> Ruzúajstötu' queëli' lu guichi le gaca ulábali', en le gaca tséajni'ili'. Raca ládxa'a tséajni'ili' idú <sup>14</sup> lë na' réajni'ili' lati'. Ní'irö cate' idxín dza huödë' Xanru' Jesucristo, gaca gunli' netu' zxön ca na' netu' guntu' libí'ili' zxön.

<sup>15-16</sup> Tu' bena' löza lë ni, guzá' ládxa'a guída' ga zóali' zí'alö cate' gudöda' luyú Macedonia, ate' guída' ga zóali' leyúbölö cate' uzá'a ni para uzí'ili' xibá' chopa luzuí. Tödi ni' huáca gácalenli' neda' ugú'uli' neda' nöza tseja' luyú Judea. Caní gú'unida' guna'. <sup>17</sup> ¿Naru' réquitseli' guzxí' yë'a tu' butsó'a ca guna'? ¿Naru' réquitseli' lu yöl-la' bönáchisö quia' runa' le rizá'asö icja',

en bē'esa' ca' didza' cate' gunnía': "Caní guna"? 18 Ni'a queë Xanru' Dios, Nu run idütë ca rnna xtídzë'ë, biti' bē'esa' ca' didza' cate' bē'lēna' libí'ili' xtídzë'ë Dios. 19 Jesucristo, Zxí'inē' Dios, Nu na' bentu' libán que ga zóali', neda' len Silvano, en Timoteo, biti' ru'ísē' ca' didza'. Lē ru'ë didza' idütë li. 20 Cristo caz runē' ga naca idütë löza yúgu'të le guzxi' lu nē'ë Dios, ate' ni'a queë Lē' gaca innaru': "Ca' gaca", para gaca queë Dios yöl-la' ba. 21 Dios caz runē' ga runtu' löza tsözxön len libí'ili' néquiru' queë' Cristo, en budödē' lu na'tu' dxin queë' runtu'. 22 Bennē' queëru' le naca bē' néquiru' queë', tu' guchíziē' icja ládxi'do'oru' Dios Bō' Lá'ayi, Nu naca queëru' le run ga naca löza yúgu'të le gunnē' Dios queëru'.

23 Ni'a queë' Xanru' Dios, Nu nözi le rizá' ládxa'a, ruá'a didza' idütë li. Nözinē' Lē' biti' bida' ga zóali' lu yödzö Corinto, para cabí gun bayudxi guna' ga huí'inili'. 24 Biti' ré'ënitü' inná bē'etu' libí'ili' ca réajlë'ëli' Cristo, tu' chinácali' tsutsu ca réajlë'ëli' Lē'. Ré'ënitü' guntu' le gun ga udzeja ládxi'li'.

## 2

1 Que lē ni na' bē' ládxa'a cabí guídatea' queëli' zí'alö, para cabí guna' ga huí'inili'. 2 Channö guna' neda' ga huí'inili', ¿nuzxi caz gun ga udzējada' neda'? ¿Naru' guntsa' ga huí'ini nu ral-la' gun ga udzējada' neda'? 3 Que lē ni na' buzúaja' queëli' lu guichi zí'alö. Biti' gú'unida' guída' ga zóali', para cabí gunli' libí'ili' ga huí'inida' neda', tu' ral-la' gácali' libí'i cázali' le gun ga udzējada' neda'. Tu' ruzxöni ládxa'a libí'ili', nözda' udzējali' yúgu'tëli' channö udzējada' neda'. 4 Cate' ni' buzúaja' queëli' lu guichi lē na', gusévide'e ládxa'a, en buí'inide'e ládxa'a ga bidxintë gurödxá'. Buzúaja' caní lu guichi, calēga para guna' ga huí'inili', pero para inözili' ca nadxí'ide'eda' libí'ili'.

*Ral-la' uniti loru' nu ruá' dö' cate' rubí'i ladxí'*

5 Channö zoë' tu bönni' ni', bönni' na' busuhuí'ininē' rē'u, calēga néda'sö busuhuí'ininē', pero huáca innaru' busuhuí'ininē' yúgu'tëli' libí'ili'. Rnnía': "Huaca innaru'", para cabí tödi bē' ichugu bē'a queë' bönni' na'. 6 Tscati' gaz xíguia' chibenli' látu'biqui' yúgu'tëli' queë' bönni' na'. 7 Na'a, ral-la' uniti loli' bönni' na', en utí'pali' ládxe'ë, para cabí tödi bē' huí'ininē', en para cabí gaca tsaz chopa ládxe'ë. 8 Que lē ni na' ráta'yua' loli' gunli' le gaca bē' nadxí'ili'-nē' idú ládxi'li'. 9 Que lē ni na' ca' buzúaja' queëli' lu guichi lē na'. Gú'unida' si' bē'a libí'ili' para inözda' channö rúntica'sili' ca rnna xtídzá'a. 10 Cate' nu runiti loli' libí'ili', neda' ca' runiti lahua' nu na'. Cate' nu runiti lahua', channö bi ben nu na' runiti lahua', runa' caní uláz queë' Cristo para gaca bi uzí'ili' xibē'. 11 Caní runa', para cabí sequi' Satanás tu' xihui' ucúl-la rē'u, tu' chinöziru' yugu' le ré'ëni gun queëru'.

*Gurö'ë böniga Pablo lu yödzö Troas*

12 Cate' bidxina' lu yödzö Troas para guna' libán que didza' dxi'a queë' Cristo, bénnadē'ë Xanru' neda' lataj guna' libán ni'. 13 Sal-la' guca caní, guró'a böniga tu' cabí yöjxáca'a-bi' bí'i böchi'ru' Tito ni'. Que lē ni na' buzá'alena' bönachi ni', ate' guyija' luyú Macedonia.

*Idéli'ru' tu' zóalenē' Cristo rē'u*

14 ¡Xclenē' Dios! Riché'tica'sē' rē'u ca tu le naca bē' bidéli'nē' Cristo yöl-la' rusölá queëru'. Dios rugunē' dxin rē'u para rulu'ë lahui ca gaca ilünbē'e bönachi Cristo. Le nácaru' naca ca tu le rilá' zixixi, le riguisi gátí'tës.



15 Nácaru' ca tu nöri rilá' zxixi, le ruzégui'ë Cristo lahuë' Dios, en le riguísie' lógaca nupa nulágaca, en nupa nanítigaca. 16 Lógaca nupa na' nanítigaca nácaru' ca tu le rilá' siguti le naca bë' ilátie'. Lógaca nupa na' nulágaca nácaru' ca tu le rilá' zxixi le naca bë' ibántica'siru'. ¿Nuzxi caz naca lesaca' gaca que caní? 17 Biti' runtu' ca tun zían bönachi, nupa tu'gún dxin xtídzë'ë Dios ca tu le tuti', en to'o. Tu' nasöl-lë'ë Dios netu', idú ládxi'tu' ruí'tu' didza' lahuë' Lë' tu' nácatu' tuz len Cristo.

### 3

#### *Ca naca didza' le ruún rë'u tuz len Dios*

1 ¿Naru' réquitseli' run ba zxön cuintu' cate' ruí'tu' caní didza'? ¿Naru' runtsö bayudxi ulu'itu' libí'ili' tu guichi le rulu'í le nácatu'? ¿Naru' ral-la' inábitu' libí'ili' gúnnali' queétu' tu guichi caní, ca na' tun bal-la bönachi? 2 Libí'í cázali' nácali' ca tu guichi le rulu'í le nácatu', le nazúaj lu icja ládxi'do'otu', ate' yúgu'të bönachi gaca ulu'laba le, en tséajni'iguequi le. 3 Le nácali' nalá' lahui ca tu guichi nuzúajë' Cristo, le gusöl-lë'ë lu na'tu'. Biti' nazúaj tu lu guichi, pero Bö' Lá'ayi queë' Dios ban nuzúajë' le, calëga tu lu guiöjta'a, pero lu icja ládxi'do'oli' nuzúajë'.

4 Ruí'tu' caní didza' tu' ruzxöni ládxi'tu'-në' Dios tu' zóalenë' Cristo rë'u. 5 Biti' réquitu' bi gaca guntu' rácasó queétu', pero Dios runnë' queétu' yöl-la' huáca bi guntu'. 6 Dios caz bennë' queétu' yöl-la' huáca guntu' xichinë' lu didza' cubi na', le ruún rë'u tuz len Dios. Didza' ni bití' naca tu xibá nazúaj lu guichi, pero naca tu le nusëdinë' Dios Bö' Lá'ayi rë'u. Xibá na' nazúaj lu guíchisó richugu queëru' gátiru', pero Dios Bö' Lá'ayi nabániru'.

7 Yugu' xibá queë' nazúajgaca lu guichi, Dios buzúajë' yugu' lu guiöjta'a, ate' bulu'e lahui yöl-la' bení' queë' cate' budödë' le lu në'ë Moisés. Salla' gudödi que, guyëpitërö yösa bení' lahuë' Moisés. Caní guca, bití' guca ulu'yú bönachi Israel lahuë' Moisés. Channö yöl-la' bení' caní yöjtsaga xibá na', ate' xibá na' richugu quégaca bönachi ilátigaca, 8 zxöntërö naca yöl-la' bení' na' dzaga yugu' le runë' Dios Bö' Lá'ayi. 9 Yöjtsaga yöl-la' bení' lë na' ben ga narugu quégaca bönachi ilátigaca. Zxöntërö naca yöl-la' bení' que lë na' run ga rnnë' Dios nácacaca tsahui' bönachi. 10 Tu' nácatërö lesaca' yöl-la' bení' na' nalá' lahui na'a, cuídi'sö nagá'ana yöl-la' bení' na' bilá' lahui cate' Dios bunödzejë' xibá queë' quégaca bönachi. 11 Channö guzóa yöl-la' bení' que lë na' guzóa tu chí'do'osó, zxöntërö naca yöl-la' bení' que lë ni sóatica'sö.

12 Tu' zoa lë ni runru' löza, ruí'tu' didza' lu yöl-la' rugu ladxi'. 13 Biti' runtu' ca benë' Moisés, bucache' lahuë' len tu lári'do', para cabí ulu'yú bönachi Israel yöl-la' bení' na' zeaj riniti. 14 Gula'chul-la gula'nítie' yugu' bönni' ni'. Ga ridxintë na'a dza cate' tu'labë' guichi que didza' gula na' le ruún bönachi tuz len Dios, naca tsa nagá'ana la' leze lári'do' na' lógaquie', lë na' gaca ugúë' tuzë' Cristo. 15 Ga ridxintë na'a dza, cate' tu'labë' guichi ga na' nazúaj didza' queë' Moisés, zxa ca tu lári'do' guiöj lógaquie' le run ga nachul-la nanítigaquie'. 16 Cate' nu ruhuóaca queë' Xanru', rigúa lë na' run ga nachul-la naniti nu na'. 17 Cate' ni rnnatu': "Xanru'", ruí'tu' didza' queë' Dios Bö' Lá'ayi. Ga zoë' Bö' Lá'ayi queë' Xanru', ni' zoa caz yöl-la' nadzán, 18 Yúgu'tëru' rë'u bití' bi nusayaj loru'. Nácaru' ca tu guië dxili ga nalá' yöl-la' bení' que lahuë' Xanru', ate' yöl-la' bení' na' queë' Xanru', Nu naca Bö' Lá'ayi, rutsá' rë'u, en run ga zeaj rácaröru' ca náquie' Cristo caz, en ráta'rö queëru' yöl-la' bení' queë'.

## 4

<sup>1</sup> Dios buéchi' láchxë'ë netu', en budödë' lu na'tu' dxin ni runtu'. Que lë ni na' bití' raca chopá láchxi'tu'. <sup>2</sup> Chibucá'anatu' le tun bönachi bagáchi'sö, en le tun ga rutufí'ru'. Cuntu nu rizí' yé'etu', en bití' rutsá'atu' xtídzë'ë Dios. Tu' ruí'itu' didza' que le naca idütë li, ruí' láchxi'tu' guntu' le iléquite'e yúgu'të bönachi naca dxi'a lahuë' Dios. <sup>3</sup> Channö zoa nu bití' réajni'ini didza' dxi'a runtu' ba nali que, nácgacasö nupa nachul-la nanítigaca bití' ta'yéajni'i le. <sup>4</sup> Bití' ta'yéajlë' bönachi na'. Ben tu' xihui' ga naca caní, nu na' nun cuini ca dios, en rinná be'e bönachi dza ni zóaru' na'a. Ben ga nachul-la nanítigaca, para cabí ila'lé'e bení' que didza' dxi'a ca naca yöl-la' bení' queë' Cristo, Nu na' naca idú ca náquië' Dios caz. <sup>5</sup> Bití' runtu' libán que la' cuínsitu', pero runtu' libán queë' Jesucristo, en rigúixjö'ötu' náquië' Xanru', ate' netu' ni nácatu' huen dxin queëli' tu' nadxí'itu'-në' Jesús. <sup>6</sup> Dios, Nu ben ga buzení' bení' ga ni' guca chul-la, náquië' Nu rigú'u bení' icja láchxi'do'oru', le ruzéajni'i rë'u para gúnbë'ëru' yöl-la' bení' queë' Dios, lë na' ruzení' lahuë' Jesucristo.

*Tu' réajlë'ëru' Dios runru' ca rë'ënë' Lë'*

<sup>7</sup> Yöl-la' tsahui' ni yu'u icja láchxi'do'oru' rë'u. Nácaru' ca yugu' yusu' yu, para gaca bë' nequi queë' Dios yöl-la' huáca zxon na', en calëga que cázaru'.

<sup>8</sup> Tu'saca' zi' bönachi netu', pero bití' rudú láchxi'tu'.

Rö'ötu' böniga, pero bití' raca chopá láchxi'tu'.

<sup>9</sup> Ta'bía láchxi' bönachi netu', pero bití' rubéaj láchxë'ë Dios netu'.

Ta'zé'ede'e netu' yu, pero bití' tu'suniti netu'.

<sup>10</sup> Lu idú le naca caztu' rátitica'stu' tsözxön len Jesús,

na' naca bë' lu le naca caztu' nabánitu' Lë'.

<sup>11</sup> Tsanni ni zóatu' nabantu', zóatica'sö bönadxi gátitu' tu' néquitu' queë' Jesús para gaca bë' nabánitu' Lë' lu le naca caztu' le riniti. <sup>12</sup> Caní naca, zoa bönadxi queëtu' gátitu', pero ni'a que lë ni rata' yöl-la' na'bán queëli'.

<sup>13</sup> Nazúaj lu guichi lá'ayi le rnna: "Guyéajlë'a Dios, ate' que lë ni na' bë'a didza'." Lësca' caní raca queëtu', réajlë'ëtu' Dios, en que lë ni na' ruí'itu' didza'. <sup>14</sup> Nöztu' ca gunë' Dios, Nu busubán Xanru' Jesús, usubanë' ca' netu' tsözxön len Jesús, en usudxinë' netu' tsözxön len libí'ili' lahuë' Lë'. <sup>15</sup> Raca caní yúgu'të lë ni para gaca bi uzí'ili' xibé. Channö ila'deli' zianrö ca' bönachi le ruzá' láchxë'ë Dios queëru', ila'nnë': "Xclenë' Dios", ate' gaca yöl-la' ba queë' Dios.

<sup>16</sup> Que lë ni na', bití' raca chopá láchxi'tu'. Sal-la' riniti idú le naca caztu', yúgu'të dza rucubë' Dios le nácatu' lu icja láchxi'do'otu'. <sup>17</sup> Le cuídí'sö rigufí' rizáca'ru' ni tu chí'ido'osó run ga gata' queëru' le uzí'da'aru' xibé le sóatica'sö, en le nácatë'rö lesaca' ca gaca gúnbë'ëru'. <sup>18</sup> Bití' ruí' láchxi'ru' le rilé'ëru' luyú ni, pero le bití' gaca ilé'ëru' ruí' láchxi'ru'. Lë na' rilé'ëru', tu chí'ido'osó zoa, pero le cabí gaca ilé'ëru' sóatica'sö.

## 5

<sup>1</sup> Nöziru' cate' initi idütë le naca cázaru', le naca ca tu yu'u lári'do' yödzölió ni, Dios chinupë'ë tu le cubi queëru', le naca ca tu yu'u le zoa tsaz ni' yehua' yubá, lë na' nun cazë' Lë'. <sup>2</sup> Que lë ni na' rinnë láchxi'ru' tu' rë'ëni'ru' tsú'uru' le cubi ni', lë na' naca ca tu lídxiru' ni' yehua' yubá. <sup>3</sup> Tsú'uru' le cubi ni' ca na' rácuru' tu lari', para cabí sóaru' ga bití' zoa idütë le naca cázaru'. <sup>4</sup> Tsanni ni zóaru' lu idütë le naca cázaru', le naca ca tu yu'u lári'do', rinnë láchxi'ru' lu yöl-la' risëbi láchxi' queëru'. Bití' runru'

caní tu' rě'ëniru' ucá'anaru' idútě le naca cázaru', pero rě'ëniru' tsú'uru' tsaz le cubi ni'. Caní gaca, ucá'anaru' idútě le naca cázaru' le riniti, ate' tsú'uru' lu yól-la' na'bán idú. <sup>5</sup> Dios chinupě'ě yúgu'tě lě ni queěru', ate' guchiziě' rě'u Dios Bō' Lá'ayi, Nu naca queěru' le naca bē' naca lōza sí'iru' lě na' nupě'ě queěru'.

<sup>6</sup> Que lě ni na' nadipa ládxi'ru'. Tsanni ni yú'uru' lu le naca cázaru', nōziru' zóaru' zi'tu' ga zoa lidxě' Xanru'. <sup>7</sup> Runru' ca runru' tu' réajlě'ěru'-nē' Dios, en calēga tu' zoa bi rilě'ėru'. <sup>8</sup> Tu' runru' lōza lě ni, rě'ëniru' ucá'anaru' le naca cázaru' ni para tsōjsóalenru'-nē' Xanru'. <sup>9</sup> Que lě ni na' ru'í ládxi'ru' gunru' le raza ládxi'ě Xanru', channō ugá'anaru' lu idútě le naca cázaru' ni, o channō tsōjsóalenru'-nē' Xanru' ni'. <sup>10</sup> Caní runru' tu' run bayudxi idxinru' yúgu'těru' lahuě' Cristo ga ni' rō'ě ruchi'a rusorōě'. Ní'irō ubi'ě que queěru' tsa naca le benru' tsanni ni yú'uru' lu le naca cázaru', channō benru' le naca dxi'a o le cabí naca dxi'a.

### *Le ruún rě'u tuz len Dios*

<sup>11</sup> Que lě ni na', tu' rádxitu'-nē' Dios, ru'í ládxi'tu' uzéajni'itu' bōnachi. Nōzině' Dios ca naca le yu'u icja ládxi'do'otu', ate' ruzxōni ládxa'a nōzili' dxi'a ca' libí'ili' lě na' yu'u icja ládxi'do'otu'. <sup>12</sup> Biti' rubéaj cuintu' dxi'a loli'. Rě'ënitu' gata' lataj queéli' gunli' netu' bal, para gaca ubí'ili' didza', bi guiéli' yugu' bōnni' tun ba zxon cuíngaquiě' ca na' tu'lu'isō lahui cuíngaquiě', en calēga ca nácagaquiě' lu icja ládxi'do'gaquiě'. <sup>13</sup> Channō nachixi ícjavu', naca para gaca yól-la' ba queě' Dios, en channō cabí nachixi ícjavu', naca para gaca bi uzí'ili' xibé. <sup>14</sup> Run bayudxi bi guntu' tu' nadxí'ine' Cristo rě'u, tu' chinōziru' tuz Nu guti uláz quégaca yúgu'tě bōnachi, en que lě ni na' naca quégaca yúgu'tě bōnachi tsa nátilengaca Lě' tsōzxōn. <sup>15</sup> Lě' gútiě' uláz quégaca yúgu'tě bōnachi para cabirō iluně' bōnni' nabángaquiě' le nequi quégacasé', pero le nequi que Nu na' guti uláz quégacaquiě', en bubán lu yól-la' guti. <sup>16</sup> Que lě ni na', bíti'rō gúnbě'ėtu' bōnachi tsa naca le nalá'gaca lăhui'lō, en sal-la' canisō bēnbě'ėtu'-nē' Cristo, biti' nūnbě'ėtu'-nē' caní na'a. <sup>17</sup> Channō nuhuōaca nūti'tēs bōnachi tuz len Cristo, chinaca bōnachi cubi nu na'. Chigudōdi que le gulaca zí'alō, ate' chinucúbigaca yúgu'tě.

<sup>18</sup> Yúgu'tě lě ni nuně' Dios, Nu bun rě'u tuz len Lě' lu nē'ě Cristo, en budōdē' lu na'tu' guntu' libán ca gaca ulu'huōaca yúgu'tě bōnachi tuz len Lě'. <sup>19</sup> Libán runtu' rna caní: "Dios guzóaleně' Cristo, en beně' ga gaca ulu'huōaca bōnachi yōdzōlió ni tuz len Lě', en biti' rōjneně' dul-la' gula'baga'." Budōdē' lu na'tu' didza' dxi'a ni, ca gaca ulu'huōaca bōnachi tuz len Dios. <sup>20</sup> Na'a, nácavu' gubáz queě' Cristo, en raca na'a ca Dios caz ráta'yue' loli' lu rú'atu' netu'. Que lě ni na' ráta'yutu' loli' uláz queě' Cristo, guli'huōaca tuz len Dios. <sup>21</sup> Cristo biti' bi dul-la' beně', pero Dios budōdē' Lě' ca tu bōnni' dul-la' uláz queěru', para gata' queěru' lataj gácaru' tsahui' ca náquiě' Dios caz tu' nácaru' tuz len Cristo.

## 6

<sup>1</sup> Tu' runtu' dxin tsōzxōn len Dios, ráta'yutu' loli', rnatu': Biti' udōdili' cá'asō le ruzá' ládxi'ě Dios queéli'. <sup>2</sup> Nazúaj lu guichi lá'ayi ca gunnē' Dios le rna:

Tu dza buzá' ládxa'a quiu', biyōnda' li',  
ate' dza bena' ga gaca uló', gúcalena' li'.

¡Buli'yútsöca! ¡Na'a naca dza ruzá' ládxe'ë queëru! ¡Na'a naca dza gaca uláru!

<sup>3</sup> Biti' ré'ënitú' bi guntu' le gun ga nu ichixi inigui, para cabí soa nu ucá'ana cá'asö dxin ni runtu'. <sup>4</sup> Ni'a que bíti'tës bi runtu', ruí' ládxi'tu' gaca bë' nácatu' huen dxin queë' Dios. Que lë ni na', len yöl-la' riböza zxön ladxi' ruá' rilentu' yugu' le rigu'i rizáca'tu', en yugu' le riyadzaj queëtu', en yugu' le tun ga rö'ötu' böniga. <sup>5</sup> Caní bentu' sal-la' gula'zé'ede'e bönachi netu' yu, en gula'gu'ë netu' lidxi guié, en gula'bía di'i netu'. Gudödi bë' bentu' dxin, en biti' guta' lataj queëtu' gásitu' o bi gágutu'. <sup>6</sup> Bë' ládxi'tu' gaca bë' nácatu' huen dxin queë' Dios. Guca bë' lë ni:

Tu' nácatu' ba'a ladxi', en tu' nápatu' yöl-la' réajni'i,  
en tu' riböztu' zxön ladxi', en tu' nácatu' dxi'i ladxi',  
en tu' zóalenë' Dios Bö' Lá'ayi netu',  
en tu' naca idú ca nadxi'itu' luzá'atu'.

<sup>7</sup> Ruí'itu' didza' idútë li, ate' zóalen netu' yöl-la' huáca queë' Dios. Le naca tsahui' naca ca tu le rudí'initu' lu gudil-la, enca' le run chi'i netu' lu gudil-la na'.

<sup>8</sup> Nacuá' nupa tun netu' bal, enca' nupa tu'zóa netu' tsólá'alö.

Nacuá' nupa tu'lidza ditaj netu', enca' nupa tu'lidza tsahui' netu'.

Sal-la' ta'nná bönachi rizí' yë'ëtu', ruí'itu' didza' idútë li.

<sup>9</sup> Sal-la' nacuá' bönachi biti' núnbë'gaquië' netu',  
nacuá' ca' nupa núnbë'gaca netu'.

Ridatu' ga zoa bönadxi gátitu', pero ni zóatu' nabantu'.

Tunë' netu' xíguia', pero biti' tutië' netu'.

<sup>10</sup> Tu'suhuí'ini netu', pero rudzéjatica'stu'.

Nácatu' bönni' yechi', pero runtu' ga rata' yöl-la' tsahui' idú quégaca bönachi zían.

Sal-la' biti' bi dë queëtu', nequi queëtu' yúgu'të le dë.

<sup>11</sup> Idú ládxi'tu' ruí'ilentu' libí'ili' didza', böchi' luzá'ado', zóali' Corinto. Bulu'itu' libí'ili' ca ruí' ládxi'da'tu' libí'ili'. <sup>12</sup> Channö cabí nácaru' tuz biti' naca tu' cabí ruí' ládxi'tu' libí'ili', pero libí' cázali' biti' ruí' ládxi'li' netu'.

<sup>13</sup> Na'a, ruí'ilená' libí'ili' didza' ca runë' tu bönni' ruí'ilenë'-bi' xzí'inë' didza', rnníá': Buli'bí'i queëtu' ca rúnlentu' libí'ili'. Guli'gúí' ladxi' netu'.

### *Nácaru' ca tu yudo' ga yu'ë Dios ban*

<sup>14</sup> Biti' gácali' tuz len bönachi biti' ta'yéajlë'.

¿Nacxi gácatsö ilaca tuz le naca tsahui', en le cabí naca tsahui'?

¿Nacxi gácatsö ilaca tuz le naca chul-la, en le naca bení'?

<sup>15</sup> ¿Nacxi gácatsö ilácagaquië' tuz Cristo, en Satanás, tu' xihui'?

¿Nacxi gácatsö ilácagaquië' tuz tu bönni' réajlë'ë Cristo, en tu bönni' biti' réajlë'ë?

<sup>16</sup> ¿Nacxi gácatsö ilaca tuz yudo' queë' Dios, en budó' guiöj budó' yaga?

Libí' cázali' nácali' ca tu yudo' ga yu'ë Dios ban. Ca naca lë ni, Dios caz gunné':

Sóalena' légaquië', en tálena' légaquië'.

Gaca' Dios quégagaquië', ate' légaquië' iláquië' bönachi quia'.

<sup>17</sup> Que lë ni na', gunné' ca' caní:

Guli'rúaj ládjagaquië', en buli'lá'alen légaquië'.

Rnnë' Xanru': "Biti' gútsa'li' le ruá' dö', ate' sí' lu na'a libí'ili'.

<sup>18</sup> Neda' gaca' xuz cázali', ate' libí'ili' gácali' xzí'ina', bönni', en nigula'."

Caní rnnë' Xanru', Nu napa caz idútë yöl-la' huáca.

## 7

<sup>1</sup> Böchi' luzá'ado', néquiguequi queëru' yugu' lë ni guzxí' lu në'ë Dios. Que lë ni na' ral-la' un cuinru' dxi'a, en ubéajru' yúgu' tē le rucá'ana cá'asō idútē le naca cázaru', en bö' naca cázaru'. Lu yöl-la' radxi queëru' Dios ral-la' guéquiru' quez queë' Lë'.

*Ca bulu'bi' i ládxi'gaca nupa ta'yéajlë' Cristo*

<sup>2</sup> Guli'sí' lu ná'ali' netu'.

Cuntu nu biá'atu' dō' que, nu dzaga libí'ili'.

Cuntu nu bentu' ga ichixi inigui.

Cuntu nu guzxí' yé'etu'.

<sup>3</sup> Ruá'a caní didza', calëga para usubága'a libí'ili' xíguia', pero naca ca na' chigunnía' zí'alō, rnnía': Zoa' sina' ibánlena' libí'ili' o gátilena' libí'ili' tu' ru'í' ládxa'a libí'ili'. <sup>4</sup> Ruzxōnida' ládxa'a libí'ili', en rúnda'a libí'ili' zxōn. Sal-la' zían le riguí' rizáca'tu', nadípada' ládxa'a, en rudzėjade'e ládxa'a.

<sup>5</sup> Cate' bidxintu' luyú Macedonia, ga ridxintē na'a dza, biti' rata' queëtu' lataj uzí' ládxi'tu', pero zían le taca queëtu'. Ta'díl-lalen bōnachi netu', ate' lu icja ládxi'do'otu' yú'ugaca le tun ga rádxitu'. <sup>6</sup> Ní'irō Dios, Nu rutipa ladxí' nu chizóa gaca chopa ladxí', butipē' ládxi'tu' cate' budxinbi' bi'í' Tito ga guzóatu'. <sup>7</sup> Biti' gúcasō tu' budxinbi' queëtu', pero tu' gudíxjöi'ibi' ca' netu' ca na' libí'ili' butípali' ládxi'bi'. Gudíxjöi'ibi' netu' ca na' rē'ēnide'eli' ulé'eli' neda', en ca na' ruhu'ínili' ni'a que lë na' guca ni', enca' ca ru'í' ládxi'li' neda'. Yúgu'tē lë ni ben ga rudzeja ládxa'a.

<sup>8</sup> Sal-la' le buzúaja' queëli' lu guichi zí'alō ben ga bu'ínili', biti' ruhu'inda' na'a. Zí'alō bu'ínida' cate' gúquibe'eda' ben ga bu'ínili' libí'ili' tu' chí'ido', <sup>9</sup> pero na'a rudzėjada', calëga tu' bu'ínili', pero tu' ben yöl-la' ruhu'ini queëli' na' ga bubí'í ládxi'li'. Dios bugunē' dxin yöl-la' ruhu'ini queëli', para cabí'ichixi inígúili' ni'a que le bentu' netu'. <sup>10</sup> Yöl-la' ruhu'ini na' rugunē' dxin Dios run ga nu ubí'í ladxí' para ulá nu na', ate' que lë ni na' biti' ral-la' hu'íniru' que. Yöl-la' ruhu'ini le naca que yōdzölió ni run ga ilátigaca bōnachi. <sup>11</sup> Buli'yútsöca' ca bugunē' Dios dxin yöl-la' ruhu'ini queëli' na'.

Ben ga ru'í' ládxi'li'-nē' Dios.

Ben ga gú'unili' urúajli' dxi'a.

Ben ga guléli' nu na' ben dul-la'.

Ben ga rádxili'-nē' Dios.

Ben ga bē' ládxi'li' gunli' ca rnna xtídzē'ë Dios.

Ben ga nadxí'ili'-nē' Dios idú ládxi'li'.

Ben ga gú'unili' gunli' xíguia' nu na' ben dul-la'.

Benli' le naca bē' biti' bi dul-la' nabága'li' ni'a que lë na' guca.

<sup>12</sup> Que lë ni na', sal-la' buzúaja' caní lu guichi na', biti' guca ni'a que nu na' ben dul-la', en calëga ni'a que nu na' gudí' guxzaca', pero para gaca bē' lahuē' Dios le nácatē ru'í' ládxi'li' netu'. <sup>13</sup> ¡Lë ni butipa ládxi'tu'! Calëgasō bidipa ládxi'tu', pero rudzėjade'e ládxi'tu' tu' rudzėjabi' bi'í' Tito ni'a que le benli' libí'ili', tu' butípali' ládxi'bi'.

<sup>14</sup> Bena' libí'ili' zxōn lobi' Tito, ate' biti' benli' ga utu'ida'. Bē'lentica'stu' libí'ili' didza' idútē li, ate' lësca' caní naca idútē li didza' bē'lentu'-bi' Tito cate' bentu' libí'ili' bal. <sup>15</sup> Zeaj rárarō idú ca nadxí'ibi' bi'í' Tito libí'ili' cate' rōjnebi' ca na' benli' ca rnna xtídzá'tu', en ca na' benli'-bi' bal lu yöl-la' radxi Dios queëli' en lu yöl-la' nōxaj ladxí' queëli'. <sup>16</sup> Rudzėjade'eda' tu' gaca uzxōni ládxa'a libí'ili' idú ládxa'a.

## 8

*Ca ral-la' unödzej nu réajlë' Cristo le dë que*

<sup>1</sup> Na'a, böchi' luzá'ado', rë'ënitü' quíxjöi'itu' libí'ili' ca naca le buzá' ládxe'ë Dios quégaca yugu' cö' bönachi queë' Cristo luyú Macedonia. <sup>2</sup> Sal-la' yenni' gula'gu'í gula'záquië' lu yugu' le guzxi' bë' légaquië', bulu'dzëjade'enë', en idú ládxi'gaquië' bulu'nödzejadë'ë sal-la' nácagaquië' bönachi yechi'. <sup>3</sup> Neda' runa' ba nalí quégaquië', idú ládxi'gaquië' bulu'nödzejadë'ë tsca gula'zéqui'në', en bulu'nödzejare' tsca gula'zéqui'në'. <sup>4</sup> Gula'nábide'enë' netu', en guláta'yudë'ë lotu' gü'itu' légaquië' lataj tsözxön len netu' ilácalenë' böchi'ru' ta'yéajlë'ë Cristo. <sup>5</sup> Gulunrë' ca guqui ícjavu' ilunë'. Bulu'dödi cúngaquië' zí'alö lu në'ë Xanru', enca' lu na'tu' netu', le naca le raza ládxe'ë Dios. <sup>6</sup> Que lë ni na' gunábitu'-bi' bi'i Tito údxi gunbi' xichinbi' ga ni' zóali', en utúbibi' dumí runödzejali' lu yöl-la' dxi'i ládxi' queëli', ca na' gusi lobi' benbi' zí'alö. <sup>7</sup> Nácali' lo ca naca yúgu'të le runli',

ca réajlë'ëli' Cristo,

en ca réajni'ili',

en ca ruzéajni'ili' bönachi,

en ca ru'í ládxi'li' luzá'ali',

enca' ca nadxi'ili' netu'.

Lësca' caní ral-la' gácali' lo ca gácalenli' luzá'ali', lu yöl-la' dxi'i ládxi' queëli' bi unödzejali' quégaquië'.

<sup>8</sup> Biti' rinná bé'eda' libí'ili' gunli' caní. Ruá'a didza' ca tun ia'zica'rö bönachi, tu'nödzej idú ládxi'gaca, para guna' ga gunli' le gaca bë' naca idú ca nadxi'ili' luzá'ali'. <sup>9</sup> Nöz quézili' le buzá' ládxe'ë Xanru' Jesucristo queëru'.

Bilé'enë' yöl-la' tsahui'

pero para gácalenë' libí'ili'

böáquië' yechi'

para gata' queëli' yöl-la' tsahui',

tu' gúquië' Lë' yechi'.

<sup>10</sup> Caní runi neda': Dxi'arö gaca queëli' údxi gunli' lë na' gusi loli' runli' chiguca tu iz. Gúcali' lo, calégasö ca bunödzejali', pero lësca' ca gú'unili' unödzejali'. <sup>11</sup> Na'a, idú ládxi'li' buli'siyudxi gunli' lë na' gusi loli' runli', idú ládxi'li' bunödzejali'. Buli'nödzej na'a tsca séqui'li'. <sup>12</sup> Channö rë'ënilí' bi unödzejali', Dios runë' bal le runödzejali' tsca naca le dësö queëli'. Biti' rinabë' unödzejari' tsca le dësö queëli'.

<sup>13</sup> Biti' rë'ënda' guna' ga unödzejali' le gácalen ia'zica'rö bönachi ga idxintë yadzaj queëli'. <sup>14</sup> Rë'ënda' gaca tuz ca dë queëli', en quégaquië'. Na'a dëda' queëli' le gaca unödzejali' para bi gata' quégaca nupa ni' riyadzaj quégaquië'. Ní'irö cate' bi yadzaj queëli', légaquië' huáca bi ulu'nödzejë' queëli' para caní gaca tuz ca dë queëli', en quégaquië' yúgu'tëli'. <sup>15</sup> Lësca' caní nazúaj lu guichi lá'ayi le rnna: "Nu na' butúbida', biti' bugá'ana que, ate' nu na' butubi láti'do'os, biti' biyadzaj que."

*Ca runbi' bi'i Tito, enca' nupa dzágagaca lëbi'*

<sup>16</sup> íxclenë' Dios, tu' benë' Lë' ga ru'í ládxi'bi' bi'i Tito libí'ili', ca na' ru'í ládxa'a neda' libí'ili'! <sup>17</sup> Calégasö runbi' ca rnna xtídza'a bi rinábida'-bi', pero tu' ru'í ládxi' cázabi' libí'ili', rácasö queëbi' gú'unibi' tsöyubi' libí'ili'.

<sup>18</sup> Risöl-la'tu'-në' tsözxön len läbi' böchi'ru' na' tun lë' bal yúgu'të cö' bönachi queë' Cristo, tu' runë' dxi'a dxin que didza' dxi'a. <sup>19</sup> Ia'stú, gula'bö yugu' cö' bönachi queë' Cristo bönni' ni, para tséajlenë' tsözxön netu' guá'atu' lë' na' runödzejali', para gaca yöl-la' ba queë' Xanru', en gaca bë' ca' ru'i ládxi'ru' luzá'aru' ta'yéajlë'ë Cristo. <sup>20</sup> Caní gaca, gunë' netu' tsözxön para cuntu nu bi gaca innë' queëtu', ca rúnlentu' dumí na' runödzejada'ali', le gácalen bönachi yechi'. <sup>21</sup> Ru'i ládxi'tu' guntu' le naca dxi'a, calégasö lahuë' Xanru', pero lësca' lógaca bönachi.

<sup>22</sup> Risöl-la'tu'-në' ca' ia'tué' böchi'ru' tsözxön len légaquië', ate' zían luzuí guzxi' bë'ëtu' lë', ate' naca bë' rë'ënë' gácalenë' rë'u idú ládxe'ë. Ia'stú, tu' ruzxöni ládxe'ë libí'ili', rë'ënitëronë' ca' gácalenë' rë'u lu dxin ni. <sup>23</sup> Channö nu bi inaba ca nácabi' bi'i Tito, nácabi' luzá'a, rúnlenbi' neda' tsözxön dxin para gácalentu' libí'ili'. Channö nu bi inaba ca nácagaquië' ia'zíca'rë' böchi'ru' na', nasöl-la'gaca yugu' cö' bönachi queë' Cristo légaquië', ate' tunë' ga gaca yöl-la' ba queë' Cristo. <sup>24</sup> Guli'gún ga gaca bë' nadxi'ili' légaquië' para iléquibe'e yugu' cö' bönachi queë' Cristo runli' caní, en ila'nözi naca idütë li didza' dxi'a ru'itu' ca naca queëli'.

## 9

### *Ca naca dumí rutúbiru' le gácalen yugu' böchi'ru'*

<sup>1</sup> Ca naca le runödzejali' quégaquië' böchi'ru' ta'yéajlë'ë Cristo, biti' run bayudxi uzúaja' queëli' lu guichi ni. <sup>2</sup> Chinözda' ca rë'ënili' gunli' lë ni, ate' ruá'a didza' lógaca bönachi ta'yéajlë' Cristo luyú Macedonia ni ca naca le dxi'a runli'. Riguíxjöi'ida' légaquië' ca naca queëli', zóali' luyú Acaya, chiguca tu iz chizóa gunli' lë ni, ate' tu' ru'i ládxi'li' gunli' lë ni, bidípa ládxi'gaca lá'tu'biqui' yúgu'të bönachi ni ta'yéajlë' Cristo. <sup>3</sup> Na'a, risöl-la'a yugu' böchi'ru' ni queëli' para gaca bë' naca idütë li didza' ru'itu' ca naca queëli', ate' naca ca na' chigunnía' queëli', chizóa gunli' lë na' gácalen yugu' luzá'aru'. <sup>4</sup> Channö ila'zá'alén bal-la bönachi Macedonia ta'yéajlë' Cristo neda' tsözxön, ate' gaca bë' biti' zuíni gunli' lë na', ní'irö utu'ítu' tu' buzzöni ládxi'tu' libí'ili', ate' libí'i cázali' ca' ral-la' utu'ili'. <sup>5</sup> Que lë ni na' gúquida' ral-la' isöl-la'a yugu' böchi'ru' ni para ila'dxinë' ga zóali' zí'alö ca neda', ate' ilácalenë' libí'ili' para udxí utúbili' lë na' guzxi' lu ná'ali' unödzejali'. Caní gaca, údxí utúbili' dumí na' zí'alö ca idxina', ate' gaca bë' runödzejali' tu' rë'ëni cázali', en caléga tu' rinná bé'etu' libí'ili' bi unödzejali'.

<sup>6</sup> Guli'tsöjné lë na' rnna:

Nu raza ruzóa láti'do'os, láti'do'os ca' uzí.

Nu raza ruzóa sizxöni, sizxöni ca' uzí.

<sup>7</sup> Tu tuli' ral-la' unödzejali' tsca na' chinuzóali' icja ládxi'do'oli', en caléga lu yöl-la' ruhu'ini queëli' o tu' run bayudxi, tu' nadxi'inë' Dios nu runödzej idú ládxi'. <sup>8</sup> Dios gaca gúnnadë'ë queëli' ca riquínili' para gata' queëli' yúgu'të lë na' riquínili', ate' ugá'ana queëli' para gaca gácalenli' nu bi riyadzaj que. <sup>9</sup> Lësca' caní nazúaj lu guichi lá'ayi le rnna:

Idú ládxe'ë bunödzejë' quégaca bönachi yechi'.

Naca bë'tica'sö yöl-la' dxi'i ládxi' queë'.

<sup>10</sup> Dios, Nu runna queëru' bi gaz uzóaru', enca' bi guí'aj gáguru', gunné' ca' queëli' bi unödzejali', le naca ca lë na' nu raza ruzóa, en gunë' ca' ga ila'yán le ilápalí' le nácagaca yugu' le dxi'a runli'. <sup>11</sup> Dios gunë' ga gáta'da' queëli' yöl-la' tsahui' para gaca unödzejada'ali'. Caní gaca, yugu' le unödzejali', lë na' quísitu' uláz queëli', gun ga ila'nná bönachi zían: "Xclenë"

Dios.” <sup>12</sup> Lë na’ runödzejali’ le gácalen yugu’ böchi’ru’, calégasö gü’i quégaquié’ le ta’yádzjané’, pero gun ga ila’nné’: “Xclenë Dios.” <sup>13</sup> Cate’ gunli’ caní, ila’gu’ë Dios yöl-la’ ba tu’ gaca bë’ runli’ ca rnna didza’ dxi’a queë’ Cristo ca na’ rnnali’ runli’. Ila’gu’ë Lë’ yöl-la’ ba ca’, tu’ nácali’ dxi’i ladxi’, runödzejali’ quégaquié’, enca’ quégaca ia’zica’rö bönachi. <sup>14</sup> Ulu’lidzë’ Dios, en ila’nábinë’ Lë’ gácalenë’ libí’ili’ tu’ nadxí’iguequinë’ libí’ili’ ni’a que le buzá’ ládxi’dë’ë Dios queëli’. <sup>15</sup> ¡Xclenë’ Dios, bennë’ tu le nácada’ lesaca’ queëli’!

## 10

### *Yöl-la’ unná bë’ dë lu në’ë Pablo*

<sup>1</sup> Ta’nná bönachi naca’ nōxaj ladxi’ cate’ zóalena’ libí’ili’, pero cate’ zoa’ zi’tu’ ga zóali’ naca’ rugu ladxi’ ca ruzúaja’ lu guichi. Tu’ náquië’ nōxaj ladxi’, en dxi’i ladxi’ Cristo, neda’, Pablo, ráta’yua’ loli’ <sup>2</sup> cabí gunli’ ga gun bayudxi gaca’ rugu ladxi’ len libí’ili’ cate’ idxina’ ga zóali’. Chizóa gaca’ rugu ladxi’ len nupa ni’ ta’nná runtu’ dxin ni lu yöl-la’ bönáchisö queëtu’. <sup>3</sup> Le nácate’ nácatu’ bönachi, pero calëga rácasö queëtu’ runtu’ xichinë’ Dios. <sup>4</sup> Yugu’ le rudí’initu’ lu gudil-la, bití’ nácacaga ca le tu’dí’ini bönachi yödžöliö ni lu gudil-la, pero yugu’ le rudí’initu’ lu gudil-la nápagaca yöl-la’ huáca queë’ Dios, le ruguntu’ dxin para usunítitu’ le nál-lagaca que tu’ xihui’.

<sup>5</sup> Rusunítitu’ yugu’ didza’ bití’ nácatë’ le tu’zxöni ládxi’gaca bönachi, en yúgu’të le tun ga tun ba zxön cuínguequi, en le tun ga cabí ilunbë’ Dios. Runtu’ ga gaca ila’nná bë’enë’ yúgu’të le ta’zá’ ládxi’gaquië’, lë na’ tun ga ta’dá’bague’ë Dios, ate’ runtu’ ca’ ga tunë’ ca rnnë’ Cristo. <sup>6</sup> Tödi gunli’ le gaca bë’ naca idú ca runli’ ca rnna xtídzë’ë Cristo, sóatu’ sina’ guntu’ xíguia’ yúgu’të nupa ni’ ta’dá’baga’ xtídzë’ë.

<sup>7</sup> Ruyuli’ le nalá’ láchuisö. Channö réquinë’ nu bönni’ dzáguie’ libí’ili’ néquinë’ queë’ Cristo, ral-la’ guéquibe’enë’ ca’ lë ni: Ca na’ lë’ néquinë’ queë’ Cristo, lëasca’ caní netu’ néquitu’ queë’ Cristo. <sup>8</sup> Bití’ ca’ rutuí’ida’ sal-la’ gudödi bë’ ben ba zxön cuina’ ca naca yöl-la’ unná bë’ budödë’ Xanru’ lu na’tu’. Lë na’ dë lu na’tu’ naca para guntu’ ga gácarö idú ca réajlë’ëli’ Cristo, en calëga para usunítitu’ libí’ili’. <sup>9</sup> Bití’ ré’ënda’ guéquili’ ré’ënda’ gun gádxida’ libí’ili’ ni’a que le ruzúaja’ queëli’ lu guichi ni. <sup>10</sup> Nacuá’ ni’ nupa ila’nná: “Yugu’ le ruzúajë’ Pablo queëru’ lu guichi, rulidza zi’ë rë’u, en ralë’ didza’, pero cate’ zóalenë’ rë’u runë’ nōxaj ladxi’, en didza’ gúlado’ ru’ë.” <sup>11</sup> Nu na’ ru’i caní didza’ ral-la’ guéquibe’ë lë ni: Ca na’ nácatu’ cate’ bi ruzúajtu’ queëli’ lu guichi tsanni ni zóatu’ zi’tu’ ga zóali’, gácatu’ ca’ lu le guntu’ cate’ ni’ sóalentu’ libí’ili’.

<sup>12</sup> Le nácate’ bití’ nácatu’ rugu ladxi’ para innatu’ nácatu’ lëbi ca nácacaga nupa ni’ tun ba zxön cuínguequi. Nácacaga nupa ni’ yugu’ bönni’ bití’ bi nōzguequinë’. Lu le ta’za’sö ládxi’gaquië’ tu’zöë’ ca ral-la’ ilaca bönachi, en tu’chi’a tu’söröë’ la’ légasasë’ tsca naca lë na’ ta’za’sö ládxi’gaquië’. <sup>13</sup> Netu’ bití’ gunrö ba zxön cuintu’ ca ral-la’ guntu’, pero ca nácate’ dxin budödë’ Dios lu na’tu’, ate’ lu dxin ni, ral-la’ guntu’ le ga ni’ zóali’ libí’ili’. <sup>14</sup> Channö budödë’ Dios lu na’tu’ dxin guntu’ ga zóali’, bití’ ca’ gudödi bë’ëtu’ ca bentu’ cate’ bidxintu’ ga zóali’, en bentu’ libán que didza’ dxi’a ga na’ zóali’. <sup>15</sup> Bití’ run ba zxön cuintu’ ca naca dxin nungaca ia’zica’rö bönachi, pero ca nácasö dxin na’ budödë’ Dios lu na’tu’. Runtu’ löza gácarö idú ca réajlë’ëli’ Cristo para gaca guntu’ dxin ga zóali’ le nácarö lesaca’, tsca naca le budödë’ Dios



lu na'tu' guntu'. <sup>16</sup> Ní'irö gaca guntu' libán que didza' dxi'a ga nacua' yödzo dzö'ö zí'tu'rö ga zóali'. Caní gaca, biti' gun bayudxi gun ba zxön cuintu' ni'a que dxin núngaca ia'zica'rö bönachi, lè na' budödè' Dios lu nè'eguequi.

<sup>17</sup> Nazúaj lu guichi lá'ayi le rnna:  
Nu rë'ëni bi gun zxön,  
le ben cazè' Xanru' ral-la' gun zxön.

<sup>18</sup> Nurúajè' dxi'a tu bönni' cate' rnnè' Xanru' nurúajè' dxi'a, en calèga cate' ru'è caní didza' bönni' na' que la' cuinsè'.

## 11

*Ca nácagaquiè' Pablo, en bönni' tun cuíngaquiè' gubáz queè' Cristo*

<sup>1</sup> Rë'ënda' guá' ilenli' neda' tsanni ni gu'a didza' lu yöl-la' biti' bi nözi quia'. Buli'sá' ládxi'li' quia'. <sup>2</sup> Ruí'í ládxa'a libí'ili' ca na' Dios caz ruí'í ládxe'è libí'ili', tu' nácali' ca nácabi' tubi' bi'ni nigula ra'bando', naca idú ládxi'bi', rusudxina'-bi' lahuè' Cristo para utsaga ná'aleni' Lè cazè'. <sup>3</sup> Rádxida' idxín queéli' nu si' ye'e libí'ili', en gun ga usanli' ca nadxi'ili'-nè' Cristo idú ládxi'li', ca na' guca queénu Eva, nigula queè' Adán, cate' guzxi' ye'e Satanás tu' xihui' lènu lu yöl-la' sina' que. <sup>4</sup> Caní rnnía' tu' idú ládxi'li' ruí'ili' nu za' queéli' lataj, en run libán que xibá queè' Jesús, le nadzá' ca naca xibá na' bentu' netu' libán que, ate' rizí' lu ná'ali' tu bö', en tu didza' dxi'a le nadzá' gaca ca nácagaca Bö' Lá'ayi na', en didza' dxi'a na' guzxi' lu ná'ali' lu na'tu' netu'. <sup>5</sup> Réquida' biti' nácara' cuídísö ca nácagaquiè' bönni' ni' nácaterögaquiè' lo, ate' réquili' nácagaquiè' gubáz queè' Cristo. <sup>6</sup> Nadxi ca' naca' cuídísö ca ruá'a didza', pero biti' naca' cuídísö ca naca yöl-la' réajni'i napa'. Zián luzuí, en zián ca buluí'itu' libí'ili' ca naca yöl-la' réajni'i nápatu'.

<sup>7</sup> Nadxi ca' biti' naca dxi'a tu le bena', biti' bi buquizzja' libí'ili' cate' bena' libán ga zóali' que didza' dxi'a. Ben cuina' cá'asö, ate' bena' ga gúcali' libí'ili' zxön. <sup>8</sup> Buguna' dxin le nequi quéguequi ia'zica'rö cö' bönachi queè' Cristo, tu' guzxi'a dumí bulu'nödzejé' légaquiè' quia' para guca bena' dxin ga zóali' libí'ili'. <sup>9</sup> Cate' guzóalena' libí'ili', en biyadzaj quia', biti' busaca' zi'a nituli' libí'ili', pero lè na' biyadzaj quia', gulunnè' quia' böchi'ru' bila'rúajè' luyú Macedonia, en bila'dxinè' ga zoa'. Catu caz busaca' zi'a libí'ili', ate' la' lèbisö ca guna'. <sup>10</sup> Ni'a que le naca idútè li queè' Cristo le zóalen neda', biti' soa' dxisö, gun ba zxön cuina' ca naca lè ni idú luyú Acaya. <sup>11</sup> ¿Naru' réquitseli' rnnía' caní tu' cabí nadxi'ida' libí'ili'? Nözinè' Dios nadxi'ida' libí'ili'.

<sup>12</sup> Gúntica'sa' ca runa' na'a, para cabí gata' quégaquiè' lataj ilún ba zxön cuíngaquiè' bönni' ni' ta'nnasè' nácagaquiè' gubáz queè' Cristo, en ta'nnè' tunè' xichiné' Lè' ca runtu' netu'. <sup>13</sup> Biti' ca' nácagaquiè' gubáz nasöl-lè'è Cristo. Ta'zì' yè'è ca naca dxin tunè', en tun cuíngacasè' gubáz queè' Cristo. <sup>14</sup> Biti' ral-la' ubániru' ca tunè' bönni' na'. Lè'sca' Satanás caz, tu' xihui', ruluí' cuini' ca tu gubáz lá'ayi queè' Dios, ridé' lu beni'. <sup>15</sup> Que lè ni na' biti' ral-la' ubániru' channö yugu' huen dxin que tu' xihui' na' tu'luí' cuíngaquiè' ca nupa tun xichini Nu na' naca tsahui'. Udxì quegaquiè' ca sa'yéaj le tunè'.

*Yugu' le gudí' i guzáquè'è Pablo*

<sup>16</sup> Leyúbólö rea' libí'ili': Cuntu nu ral-la' guequi nachixi icja'. Channö réquili' nachixi icja', guli'güf' neda' lataj gu'a didza' ca tu bönni' nachixi

icjè', para gun ba zxon cuina' tu chí'ido'. <sup>17</sup> Didza' ni ruá'a bití' naca le rinná bē'ē Xanru', pero ruá'a didza' ca tu bōnni' nachixi icjè', run ba zxon cuina'. <sup>18</sup> Nacu'ē zían bōnni' tun ba zxon cúngaquiè' ca nácagaca le tunè' lu yōl-la' bōnáchisō queégaquiè'. Que lē ni na', neda' ca' gun ba zxon cuina'. <sup>19</sup> Tu' réquili' rácada'ali', idú ládxi'li' ru'í'ili' lataj ilu'ē didza' yugu' bōnni' nachixi ícjagaquiè'. <sup>20</sup> Ru'í'ili' ca' lataj nu gun lib'í'ili' bōnni' nadó'ogaca, o nu cúa le dē queéli', o nu inná be'e lib'í'ili', o nu ucá'ana lib'í'ili' cá'asō, o nu capa' rú'ali'. <sup>21</sup> Rutuí'ida' rnníá' lē ni: Bití' bentu' caní queéli' tu' gudōdi bē' gúcatu' nōxaj ladxi'.

Channō zoa nu naca rugu ladxi' para gun ba zxon cuini, neda' ca' gaca' rugu ladxi', en gu'a didza' ca tu bōnni' nachixi icjè'.

<sup>22</sup> ¿Naru' nácagaquiè' bōnni' hebreo?

Lēscá' naca' neda'.

¿Naru' nácagaquiè' bōnni' Israel?

Lēscá' naca' neda'.

¿Naru' nácagaquiè' zxi'ini xi'sóè' Abraham?

Lēscá' naca' neda'.

<sup>23</sup> ¿Naru' nácagaquiè' huen dxin queè' Cristo?

Lēscá' nácátēra' neda'.

(Na'a ruá'a didza' ca tu bōnni' nachixi icjè' cate' rnníá' caní.)

Béntēra' dxin ca gulunè' légaquiè'.

Guyu'a lidxi guié zíanrō luzuí ca gula'yu'ē légaquiè'.

Gula'zé'eda' neda' yu bōnachi zíanrō luzuí ca guca queégaquiè'.

Guzóa bōnadxi gátia' zíanrō luzuí ca guzóa queégaquiè'.

<sup>24</sup> Gayu' luzuí yugu' bōnni' judío gula'guínè' neda' guídi.

Tu tu luzuí na' gula'guínè' neda' chēnna uruá' luzuí.

<sup>25</sup> Tsonna luzuí gula'guínè' neda' gubá'ayi.

Tu luzuí bulu'ladxè' neda' guiōj.

Tsonna luzuí guzóa' tu lē'e barco le guca ditaj, en bōtaj lu nísado'.

Tu luzuí guzóa' idú tu yēla, en tu dza lu nisa que nísado'.

<sup>26</sup> Zían luzuí cate' ni' yu'a nōza,

gudōda' gapa guzóa bōnadxi quia' yugu' lu yegu,

en gapa guzóa bōnadxi quia' lu ná'agaquiè' gubán,

en gapa guzóa bōnadxi quia' lu ná'agaquiè' bōnni' uládz quia',

en gapa guzóa bōnadxi quia' lu ná'agaquiè' bōnni' zi'tu',

en gapa guzóa bōnadxi quia' lu yōdzō,

en gapa guzóa bōnadxi quia' lu lataj cá'asō,

en gapa guzóa bōnadxi quia' lu nísado',

en gapa guzóa bōnadxi quia' lu ná'agaquiè' bōnni' ta'z'í' yē'ē, ta'nnè'

nácagaquiè' bōchi'ru' ta'yéajlè'ē Cristo.

<sup>27</sup> Bena' dxin zi'i, en gudú ládxa'a.

Zían luzuí bití' guta' quia' lataj gásia'.

Guduna', en gubidxa' nisa.

Zían luzuí bití' guta' quia' bi gahua', o ga uts'e e cuina', o lari' gácua'.

<sup>28</sup> Ia'stú, yúgu'tē dza ruúbí ruguí'ida' tu' ru'í'ida' ládxa'a yúgu'tē cō' bōnachi queè' Cristo. <sup>29</sup> Cate' nu ricuidí', neda' ca' ricuidí'da'. Cate' nu run ga ichixi iníguinè' tu bōchi'ru', rileda' nu run caní. <sup>30</sup> Channō run bayudxi gun ba zxon cuina', gun ba zxon cuina' ca naca le nácagaca bē' ricuidí'da'.

<sup>31</sup> ¡Dios, Xuzè' Xanru' Jesucristo, gácatíca'sō queè' yōl-la' ba! ¡Lē' nōzinè' ruá'a didza' idútè' li! <sup>32</sup> Cate' ni' guzóa' lu yōdzō Damasco, bōnni' ni' guta' lu nē'ē uláz queè' bōnni' rinná bē'ē, lē' Aretas, bucu'ē yugu' bōnni' gula'bō'

nísië para ila'zönë neda', <sup>33</sup> pero yugu' böchi'ru' ni' bulu'dödë neda' tu ga ra'a beni' que yu'u, yu'a tu ga'böra zxön, en bulu'zötjë' neda' ní'ilo lu zö'ö run chi'i yödzö na'. Caní guca, bulá' lu ná'agaquië' bönni' ni' gula'bó' nísië' neda'.

## 12

### *Yugu' le bulu'inë' Dios Pablo*

<sup>1</sup> Le nácatë bití' ral-la' gun ba zxön cuina'. Sal-la' caní naca, na'a gu'a didza' ca nácatë le bulu'inë' Xanru' neda', en le buzéajni'inë' neda'. <sup>2</sup> Núnbë'a-në' tu bönni' réajlë'ë Cristo, chiguca chidá' iz zoa nu guchë' lë' yehua' yubá. Bití' nözda' channö guyijë' ni' lu idútë le naca cazë', o lu bö' naca cazë'. Tuzë' Dios nözinë'. <sup>3</sup> Nözda' guyázië' lataj lachi queë' Dios, nazí'i le paraíso. Bití' nözda' channö guyijë' ni' lu idútë le naca cazë', o cabí. Tuzë' Dios nözinë'. <sup>4</sup> Tsanni ni' zoë' ga na', biyönnë' le tun ga nu rubani, yugu' le bití' dë' lataj nu gü'i didza' que. <sup>5</sup> Bönni' ni huáca guna' lë' zxön, pero bití' gun ba zxön cuina'. Tuz gun ba zxön cuina' tu' ricuídi'da'. <sup>6</sup> La'tu' guë'ënida' gun ba zxön cuina', bití' gaca' bönni' bití' bi nözinë', channö inniá' le naca idútë li. Na'a, bití' gun ba zxön cuina' tu' cabí rë'ënda' nu gunrö neda' bal tsca le bilé'e bena' neda', o tsca naca didza' biyöni bë'a neda'.

<sup>7</sup> Ní'irö, para cabí tödi bë' gun ba zxön cuina' tu' bilé'eda' lë' na' tun ga nu rubani, Dios buzöë' tu huë' lu xipëla'a le riláda' ca rilá ga rinë' tu yötsi'. Huë' na' guca ca tu le bugún dxin tu' xihui', para busaca' zi' neda'. Caní guca quia' para cabí tödi bë' gun ba zxön cuina'. <sup>8</sup> Tsonna luzuí gúta'yua' lahuë' Xanru', en gunábida' Lë' ugúë' xihuë'a na'. <sup>9</sup> Xanru' gudxë' neda': "Nácatë quiu' le ruzá' ládxa'a quiu'. Uzí'tëru' xibé le ruzá' ládxa'a quiu' cate' ricuídi'nu'." Que lë' ni na', rudzëjade'eda' tu' ricuídi'da'. Tu' raca caní quia', rácalentëro yöl-la' huáca queë' Cristo neda'. <sup>10</sup> Que lë' ni na', tu' nadxí'ida'-në' Cristo, rudzëjada' cate' ricuídi'da', en cate' nu rulidza neda' zi', en cate' bi riyadzaj quia', en cate' nu ribiá ladxi' neda', en cate' bi raca quia'. Cate' nacuídi'da', nápatëro caza' yöl-la' huáca queë' Lë'.

### *Pablo ru'i ládxe'ë bönnachi queë' Cristo nacuá' Corinto*

<sup>11</sup> Naca' tu bönni' bití' bi nözinë' tu' bë'a didza' ca naca le dxi'a bena' neda'. Libí'i cázali' benli' bayudxi bena' caní. Libí'ili' ral-la' gunli' neda' bal, ate' sal-la' bití' bi naca' neda', bití' ca' nácara' cuidi' ca nácatëquië' bönni' ni' nácada'gaquië' lo, ta'nnë' nácatëquië' gubáz queë' Cristo. <sup>12</sup> Yugu' le bena' lu yöl-la' riböza zxön ladxi' quia' ga ni' zóali' nácatë bë' naca' gubáz queë' Cristo. Bilé'eli' yugu' le bena', le nácatë bë', en le tun ga nu rubani, en yugu' yöl-la' huáca zxön que yehua' yubá. <sup>13</sup> Tuz le cabí bena' ga zóali' le bena' ga nacuá' ia'zica'rö có' bönnachi queë' Cristo. Bití' busaca' zi'a libí'ili' bi gúnnali' le gu'aj gahua'. Buli'niti lo neda' tu' cabí bena' caní queëli'.

<sup>14</sup> Chizóa guída' ga zóali' le bunní luzuí. Bití' bi inaba' gúnnali' quia'. Rë'ënda' gunna cuin cázali' quia', en calëga bi dë' queëli'. Yugu' bi'i huë'ënido', bití' run bayudxi ulu'gágubi' xuz xiná'agacabi'. Xuz xiná'agacabi' na' ral-la' ulu'gahuë' xzí'inigaquië'. <sup>15</sup> Idú ládxa'a utóa' yúgu'të le dë' quia', en udödi cuina' ni'a queëli' para gaca bi uzí'ili' xibé, sal-la' réquida' cate' nadxí'iröda' libí'ili', zeaj ruhuéchi' yöl-la' nadxí'i queëli' neda'.

16 Nöz quézili' biti' busaca' zi'a libí'ili'. Na'a, bál-lali' innali' guca' sina', ate' len didza' biti' nácaté buzi'a xibali'. 17 ¿Naru' réquitseli' guzxi' yé'eda' libí'ili' cate' gusól-la'a yugu' gubáz quia' ga zóali'? 18 Gúta'yua' lobi' bi'i Tito tséajbi' ga zóali', ate' gusól-la'a-né' böchi'ru' na' tsözxön len lëbi'. ¿Naru' réquitseli' buzi'ibi' xibali' bi'i Tito? ¿Naru' cabí bentu' la' lëbisö ca runtu' bi'i Tito, en neda', enca' la' lëbisö didza' bë'ëtu'?

19 ¿Naru' réquitseli' rubéaj cuintu' dxi'a loli' libí'ili'? Lahuë' Dios ruí'itu' didza' uláz queë' Cristo, böchi' luzá'ado', ate' yúgu'të le runtu' nácaté para gácarö idú yöl-la' réajlë' queëli' Cristo. 20 Rádxida' biti' gácali' ca ré'ënda' gácali' cate' guída' ga zóali', ate' neda' biti' gaca' ca ré'ënili' libí'ili' gaca'. Rádxida' ridil-la' didza'li', en ruzxé'eli' luzá'ali', en rileli' luzá'ali', en rulidza' dítxali' luzá'ali', en rnnëli' que luzá'ali', en run ba zxon cuinli', en rutsátsali'. 21 Cate' guída' ga zóali', channö caní raca queëli', rádxida' gunë' Dios ga utuf'ida' ca naca queëli', ate' gun bayudxi cödx'a ni'a quégaca zían nupa ni' gulún dul-la', en biti' bulu'bi'i láchixi'gaca ca nácaté le cabí naca tsahui' gulúngaca, en yugu' le gula'zë láchixi'guequi le cabí naca dxi'a.

## 13

*Pablo ruzéajni'inë' bönachi Corinto, en rugapë' Dios légaquië'*

1 Le bunni luzuí ni guída' ga zóali'. Nazúaj lu guichi lá'ayi le rnna: "Run bayudxi ila'cuá' chopá tsonna nupa ilún ba nalí channö nu bi uzegui luzé'e didza'." 2 Chibuzéajni'ida' nupa gulún dul-la' cate' ni' guzóalena' libí'ili' le buropi luzuí, ate' na'a ruzéajni'ida' légaquië' leyúbölö, enca' yúgu'të nupa tun dul-la', sal-la' ni zoa' zi'tu', rnnía': Channö guída' ga zóali' leyúbölö biti' gaca' nöxaj ladxi' para til-la' légaquië'. 3 Rinábali' tu le gaca bë' ruá'a didza' uláz queë' Cristo. Lë na' guna' gaca bë' ruá'a caní didza'. Biti' ca' ricuídi'në' Cristo cate' bi runë' queëli', pero lu yöl-la' huáca zxon queë' runë' bi runë' queëli'. 4 Le nácaté gudë'ë lë'e yaga cruz ca nu ricuídi', pero zoë' nabanë' tu' zóalen yöl-la' huáca queë' Dios Lë'. Netu' ca' ricuídi'tu' tsözxön len Lë', pero tu' nácatu' tuz len Lë' nabantu', ate' zóalen netu' yöl-la' huáca queë' Dios bi guntu' ga ni' zóali'.

5 Buli'yú cuinli' channö réajlë'ëli' Cristo o cabí. Guli'sí' bë' la' cuínsili'. ¿Naru' cabí nözili' zóalenë' Jesucristo libí'ili' channö le nácaté réajlë'ëli' Lë'? 6 Runtu' löza chinöz quézili' le nácaté netu' réajlë'ëtu' Cristo. 7 Rulídzatu-në' Dios rinábitu-në' gácalenë' libí'ili', para cabí guá'ali' dö', calëga para urúajtu' dxi'a netu', pero para gunli' libí'ili' le naca tsahui' sal-la' guéquili' richixi riníguitu' netu'. 8 Biti' ca' gaca tá'baga'tu' le naca idútë li, pero gácasö guntu' ca sa'yéaj le naca idútë li. 9 Que lë ni na' rudzëjatu' cate' ricuídi'tu', ate' libí'ili' ridipa láchixi'li'. Rulídzatica'stu-në' Dios, rinábitu-në' gunë' ga gaca idú ca réajlë'ëli' Cristo. 10 Que lë ni na' ruzúaja' queëli' lu guichi lë ni tsanni ni zoa' zi'tu' ga zóali'. Ní'irö cate' guída' ga zóali' biti' gun bayudxi usaca' zi'a libí'ili', pero uguna' dxin yöl-la' unná bë' nudödë' Xanru' lu na'a, le naca para utipa' láchixi'li', en calëga para usunítia' libí'ili'.

11 Na'a, böchi' luzá'ado', dipa láchixi'li'.

Guli'güi' láchixi'li' gaca idú ca réajlë'ëli' Cristo.

Guli'güi' láchixi'li' ca' lë ni rea' libí'ili'.

Guli'gaca tuz len luzá'ali', en guli'cöza dxí'ado'.

Rinábida-në' Dios sóalenë' libí'ili'.

Lë' nadxí'inë' rë'u, en runë' ga ribözaru' dxí'ado'.

<sup>12</sup> Guli'gapa Dios luzá'ali', tuli' ia'tuli', en unída'li' luzá'ali'. <sup>13</sup> Yúgu'të böchi' luzá'aru' ni tu'gapë' Dios libí'ili'.

<sup>14</sup> Rinábida'-në' Dios gunë' ga gata' queëli' yúgu'tëli' le ruzá' ládxë'ë Xanru' Jesucristo queëru', en idxí'inë' ca' libí'ili', en gunë' ga gácali' tuz len Dios Bö' Lá'ayi. ¡Ca' gaca!

## DIDZA' GUSÖL-LË'Ë PABLO LUYÚ GALACIA

*Ruzúajë' Pablo quégaca bönachi luyú Galacia*

<sup>1</sup> Neda', Pablo, naca' gubáz queë' Cristo. Biti' gula'söl-la' bönachi neda'. Jesucristo caz gusöl-lë'ë neda', en nunë' Xúziru' Dios tu zxön Lë'. Lë' busubanë' Jesús lu yöl-la' guti. <sup>2</sup> Ruzúaja' queëli' lu guichi ni, libí'ili', yugu' cö' bönachi tu'dubi queë' Cristo luyú Galacia. Núnagaquie' yugu' böchi'ru' ni tu zxön neda'. <sup>3</sup> Rinábida' Xúziru' Dios, enca' Xanru' Jesucristo uzá' ládxe'ë queëli', en gunë' ga soa dxi icja ládxi'do'oli'. <sup>4</sup> Jesucristo caz budödi cuinë' lu yöl-la' guti tu' nözi dul-la' nabága'ru' para busölë' rë'u lu le naxihui' raca dza ni zóaru' na'a. Benë' caní tu' naca ca rë'ëni quézinë' Xúziru' Dios. <sup>5</sup> ¡Gácatica'sö queë' Dios yöl-la' ba! ¡Ca' caz!

*Tuz naca le rinnë dxi'a queë' Jesucristo*

<sup>6</sup> Rubánide'eda' ca runli', rucá'anatëli' Dios. Lë' bulidzë' libí'ili' para guéquilí' queë' tu' nözi le ruzá' ládxe'ë Jesucristo queëru', ate' na'a rë'ënilí' si' ladxí' ná'ali' tu' le rinnë dxi'a izá'a. <sup>7</sup> Le nácatë' bití' ca' zoa ia'tú le rinnë dxi'a pero ruá'a caní didza' tu' nacu'ë bönni' tu'tsë'ë libí'ili', en të'ënë' ulu'tsë'ë le rinnë dxi'a queë' Cristo. <sup>8</sup> Channö zoa nu gun ba nalí que tu le rinnë dxi'a le cabí naca tuz ca naca lë na' bentu' ba nalí que loli' libí'ili', rinábida'-në' Dios udxíë' dö' nu na' run caní. Ral-la' udxíë' neda' dö' channö guna' caní, en channö gunë' caní tu gubáz queë' Dios zë'ë yehua' yubá, Dios caz udxíë' ca' lë' dö'. <sup>9</sup> Chigunná caza' caní zí'alö, ate' na'a rnníá' caní leyúbölö: Channö zoa nu gun ba nalí que tu le rinnë dxi'a le cabí naca tuz ca naca lë na' chiguzxí' ladxí' ná'ali', rinábida'-në' Dios udxíë' dö' nu na'.

<sup>10</sup> ¿Réquitseli' rë'ënda' cú'uli' neda' yöl-la' zxön cate' ru'a caní didza'? ¡Biti' ca! Rë'ënda' urúaja' tsahui' lahuë' Dios. ¿Réquili' rë'ënda' uzaca' baládxí'lengaca bönachi neda'? La'tu' rë'ënda' uzaca' baládxí'lengaca bönachi neda', bití' gaca' huen dxin queë' Cristo.

*Naca böáquie' Pablo bönni' gubáz queë' Cristo*

<sup>11</sup> Ral-la' inözili' lë ni, böchi' zána'do'. Le rinnë dxi'a na' runa' ba nalí que bití' gulén icja lo ládxi'da'ahuiguequi bönachi. <sup>12</sup> Cuntu nu bönni' budödë' lu na'a le rinnë dxi'a na', en calëga nu bönni' busédinë' neda' le. Jesucristo caz buzéajni'inë' neda' ca naca le rinnë dxi'a queë'. <sup>13</sup> Chibiyön quézili' ca na' ben caza' neda' zí'atëlö cate' ni' nazí' lu na'a ca tequi le bach Dios bönni' judío. Nözili' ca bena', yenni' gudxía nahua' bönachi queë' Dios ta'yija ladxí' Cristo, en gú'unda' usulu usunítia' léguequi. <sup>14</sup> Lu le tequi le bach Dios bönni' judío, guyépisëtëra' neda' ca lá'tu'biqui' yúgu'të luzá'a bönni' judío yú'ugaquie' iz ca yu'a neda', tu' guzxi'rö ladxí' na'a ca léguequi le bulu'dödë' xuz xtó'oru' loru' ca tun cazë'. <sup>15</sup> Caní bena' neda', pero tu' náquie' dxi'i ladxí' Dios, gurö cazë' neda' zí'atëlö ca gulja', ate' bulidzë' neda' para guna' xichinë'. <sup>16</sup> Ní'irö, cate' gú'uni quézinë' Dios, benë' ga núnbë'a-në' zxí'inë', en gusöl-lë'ë neda' tsöjena' libán que le rinnë dxi'a ca naca queë' Lë' lógaca bönachi izá'a. Cate' benë' caní, bití' yödilja' nu naca bönachi nu usedi neda'. <sup>17</sup> Cabí guyija' yödzo Jerusalén para tsóyúa' nupa ni' nácgaca bönni' gubáz queë' Cristo zí'alö ca neda', pero guyija' luyú Arabia, ate' gudödi ni' böja' yödzo Damasco.

<sup>18</sup> Caní guca, chigudödi tsonna iz cate' ni' guyija' yödzo Jerusalén, yöyúa'-në' Pedro, ate' bugá'analena' lë' idú ca chidá' gubidza. <sup>19</sup> Tsanni ni' zoa' ni' biti' ca' bilé'eda' ia'turë' bönni' gubáz queë' Cristo, pero tuzë' Jacobo, bönni' böchë'ë Xanru' bilé'eda'. <sup>20</sup> Didza' ni ruzúaja' queë'li' lu guichi nácatë. Ni'a queë' Dios biti' ca' rizi' yë'a.

<sup>21</sup> Gudödi ni' guyija', gudöda' yugu' yödz luyú Siria, en luyú Cilicia. <sup>22</sup> Yugu' dza' ni' biti' núnbë'gaquië' neda' böchi'ru' tu'dubë' queë' Cristo gapa naca luyú Judea. <sup>23</sup> Gula'nözisinë' lë' na' gúla'guixjö' quia' ia'zica'rö bönachi, gula'nná: "Bönni' na' gudxía nahuë' rë'u zí'alö, runë' libán na'a que le reja ládxi'ru', lë' na' gú'unë' usulu usunítie'." <sup>24</sup> Caní guca, gula'gu'ë yöl-la' ba Dios tu' nözda' neda'.

## 2

### *Bönni' gubáz queë' Cristo guzxi' lu ná'agaquië' Pablo*

<sup>1</sup> Cate' chigudödi chidá' iz, guyéajlena' Bernabé, en budxina' yödzo Jerusalén. Guchë'a-bi' Tito, dzágabi' neda'. <sup>2</sup> Guyija' ni', en bë'lëna' didza' tsölá'alö bönni' ni' yu'u lu ná'agaquië' dxin queë' Cristo, ate' gudíxjö'ida' légaquië' ca naca libán runa' que le rinnë dxi'a lógaca bönachi izá'a. Caní bena' tu' gú'unda' cabi ugá'ana nítisö dxin na' chibëna', enca' dxin ni runa' na'a. <sup>3</sup> Sal-la' nácabi' Tito, bi'i luzá'a, bi'i griego, biti' gulunë' bönni' ni ga irugu lu xpëla'bi' lë' na' naca bë' bönachi queë' Dios ca tun cazë' bönni' judío. <sup>4</sup> Le nácatë gula'cuá' bal-la bönachi ni', nupa ni' ta'zi' yë', ta'ná nácagaca böchi'ru', ate' gulë'ëni ilún ga irugu lu xpëla'bi' Tito lë' na' naca bë'. Yugu' bönni' ni núngaquië' tu zxön rë'u pero tu'yusë' ca runru' para iléquibe'enë' ca nuláru' lu yöl-la' unná bë' que le rinná bë' xibá queë' Moisés tu' nácaru' tuz len Jesucristo. Gulë'ënë' ilunë' ga huóácaru' leyúbölö huen dxin tsaz lu xibá na'. <sup>5</sup> Biti' ca' bë'tu' légaquië' lataj. Caní bentu' para gun chí'itu' le nácatë que le rinnë dxi'a para gaca uzi'ili' xibé le rinnë dxi'a na'.

<sup>6</sup> Yugu' bönni' ni' réquiru' yu'u lu ná'agaquië' dxin queë' Cristo biti' bi gula'nná be'e neda' le naca cubi, pero biti' rufi' ládxa'a ca nácagaquië'. Dios biti' ruchí'a rusöröë' rë'u ca tu'chi'a tu'sörö bönachi rë'u. <sup>7</sup> Biti' bi gula'nná be'e neda' tu' guléquibe'enë' Dios nudödë' lu na'a dxin queë', para tsöjena' libán que le rinnë dxi'a lógaca bönachi izá'a, ca na' nudödë' lu në'ë Pedro dxin queë', para gunë' libán que le rinnë dxi'a lógaca bönachi judío. <sup>8</sup> Len yöl-la' huáca queë', Dios benë' neda' bönni' gubáz queë' para usédida' bönachi izá'a, ca na' benë' Pedro bönni' gubáz queë' para usédinë' bönachi judío.

<sup>9</sup> Jacobo, en Pedro, en Juan, bönni' ni' réquiru' yu'u lu ná'agaquië' dxin queë' Cristo, guléquibe'enë' Dios nudödë' lu na'a dxin ni. Que lë' ni na' guzxi' ladxí' ná'agaquië' neda', enca' Bernabé, ate' bentu' tuz didza' tsöjentu' xichinë' Dios lógaca bönachi izá'a neda', en Bernabé, ate' légaquië' ilunë' xichinë' Dios lógaca bönachi judío. <sup>10</sup> Gulá'ta'yusë' lotu' tsönetu' gácalentu' bönachi yechi', ate' lë' ni naca tu le ruí'tica'sö ládxa'a runa'.

### *Ca guca cate' Pablo gudíl-lalënë' Pedro lu yödzo Antioquía*

<sup>11</sup> Cate' bidxinë' Pedro lu yödzo Antioquía, gudíl-lalëna' lë' didza' tu' lë cazë' guchíxinë' ca benë'. <sup>12</sup> Caní guca tu' zí'atëlö gudágulenë' tsözxön yugu' bönachi izá'a ni'. Benë' caní ga bila'dxinrë' bal-la bönni' dá'gaquië' Jacobo. Ní'irö gusi lahuë' rubíguie', en bití'rö gudágulenë' tsözxön bönachi izá'a na' tu' gúdxinë' bi ilunë' bönni' na' nazí' lu ná'agaquië' ilunë' ga

irugu lu xpéla'gaca bönachi izá'a ca rinná bē' xibá queē' Moisés. <sup>13</sup> Ní'irö ia'zica'rē' bönni' judío ni' ta'yija ládxē'ē Cristo gulunē' tu zxön Pedro ca runē' lu yöl-la' radxi queē', ate' caní guca ga bidxintē' gulunē' ga gúdxinē' ca' Bernabé, ate' lē' benē' tu zxön légaquiē'. <sup>14</sup> Cate' bilé'eda' bití' tunē' ca naca le nácatē' le rusedi rē'u le rinné dxi'a, gudxa'-nē' Pedro lógaca yúgu'tē nupa ni' nudúbigaca queē' Cristo, gunniá': "Li' nacu' bönni' judío, pero runu' li' ca túngaca bönachi izá'a, en calēga ca tunē' bönni' judío. ¿Bizx queē' rē'ēnu' gunu' ga ilúngaca bönachi izá'a ca tunē' bönni' judío?"

*Nulágaca bönachi judío ca na' nulágaca ca' bönachi izá'a*

<sup>15</sup> Gudxa' ca' Pedro: "Rē'u ni nácaru' bönni' judío tu' nácagaquiē' xuz xiná'aru' judío, en calēga bönachi izá'a, nupa cabí núnbē'gaca Dios. <sup>16</sup> Nöz queéziru' cunttu nu huóaca tsahui' lahuē' Dios tu' run nu na' tsca rinná bē' xibá queē' Moisés, pero huóaca tsahui' tuzi nu na' reja ladxi' Jesucristo. Lēs caní ca' rē'u reja ládxi'ru' Jesucristo para huóacaru' tsahui' lahuē' Dios, en calēga tu' runru' tsca rinná bē' xibá queē' Moisés. Cuntu caz nu huóaca tsahui' lahuē' Dios tu' run tsca rinná bē' xibá queē' Moisés.

<sup>17</sup> 'Na'a, réquiru' nuhuóacaru' tsahui' tu' reja ládxi'ru' Cristo, pero channö naca bē' nácaru' bönni' dul-la' ca nácagaca bönachi izá'a, ¿innátsaru' runē' Cristo ga runru' dul-la'? ¡Bití' caz! <sup>18</sup> Channö ru'í' ládxa'a uchisa' le chibuquinja', lē ni naca bē' riguitsja' xibá le gunná bē'ē Dios. <sup>19</sup> Tu' cabí guca uzóa' didza' xibá na' gunná bē'ē Moisés, guca quia' tsca chinátia'. Tu' caní naca, nulá' na'a lu xibá na' para soa' ibana', en guna' ca rē'ēnē' Dios. <sup>20</sup> Naca quia' ca chigútilena' tsözxön Cristo lē'e yaga cruz ga na' gútiē' Lē'. Que lē ni na' calēga neda' ni zoa' nabana', pero Cristo zoē' nabanē' lu icja ládxi'da'ahua'. Tsca naca zoa' nabana' na'a, naca tu' reja ládxa'a Lē' zxi'inē' Dios, Bönni' na' bidxi'inē' neda', en budödi cuinē' lu yöl-la' guti uláz quia' neda'. <sup>21</sup> Bití' rē'ēnda' uzóa' tsölá'alö le ruzá' ládxē'ē queēru' Dios. Channö huáca huóaquiē' tsahui' tu bönni' lahuē' Dios tu' runē' tsca rinná bē' xibá queē' Moisés, ní'irö nítisö gútiē' Cristo."

### 3

*Le rinná bē' xibá queē' Moisés, en le reja ládxi'ru' Cristo*

<sup>1</sup> Libí'ili', tu' canöz, libí'ili', bönni' Galacia. ¿Nuzxi gulú'utsö libí'ili' nēbi para cabirö uzóali' didza' le nácatē? Gate ga rē' buluí'itu' libí'ili' le sa'yéaj ca gútiē' Jesucristo lē'e yaga cruz. <sup>2</sup> Gudíxjöi'i neda' lē ni. ¿Bidisóalenē' libí'ili' Dios Bö' lá'ayi tu' benli' ca rinná bē' xibá queē' Moisés o tu' guyija ládxi'li' le rinné dxi'a biyönili'? <sup>3</sup> ¿Nacxi guca nácali' tu' canöz caní? Gusí loli' nácali' bönachi queē' Dios tu' zóalenē' libí'ili' Dios Bö' lá'ayi. ¿Réquitseli' huáca udxí gunli' ga guéquili' queē' Dios rácasö queéli'? <sup>4</sup> ¿Guca nítisö guca queéli' yúgu'tē lē na' guzaca' gudí'ili'? ¡Bití' ca' guca caní! <sup>5</sup> Cate' Dios risöl-lē'ē queéli' Dios Bö' lá'ayi, en ru'ē libí'ili' lataj gunli' yugu' yöl-la' huáca que yehua' yubá, ¿runē' caní tu' runli' ca rinná bē' xibá queē' Moisés o tu' reja ládxi'li' le rinné dxi'a na' biyönili'?

<sup>6</sup> Lu guichi lá'ayi rnna: Abraham guyija ládxē'ē Dios, ate' Dios gunné' náquiē' bönni' tsahui' tu' guyija ládxē'ē Lē'. <sup>7</sup> Que lē ni na na' ral-la' inözili', nupa na' ta'yija ladxi' Dios nácagaca idú zxi'ini xi'sóé' Abraham. <sup>8</sup> Lu guichi lá'ayi ru'í' didza' zí'atélö ca gunē' Dios, innē' nácagaquiē' tsahui' bönni' izá'a ila'yija ládxē'ē Lē'. Que lē ni na' Dios gudíxjöi'inē' Abraham zí'atélö ca naca le rinné dxi'a, gunné': "Lu nē'ē Zxi'ini xi'sú' guna' ga gaca



dxí'a quégaca bönachi idutë yödzölió." <sup>9</sup> Caní naca, Abraham guyija ládxë'ë Dios, ate' Dios benë' ga guca dxí'a queë'. Lës caní ca' na'a, Dios runë' ga raca dxí'a quégaca yúgu'të nupa ta'yija ladxi' Lë'.

<sup>10</sup> Nupa na' tu'zxoní ladxi' ulu'huóaca tsahui' tu' túngaca ca rinná bë' xibá queë' Moisés, nabága'gaca xíguia'. Caní naca tu' nazúaj lu guichi lá'ayi, le rnna: "Yúgu'të nupa na' cabí túngaca idutë ca rinná bë' xibá na' nabága'gaca xíguia'." <sup>11</sup> Na'a, naca bë' cuntú nu huóaca tsahui' lahuë' Dios tu' run nu na' le rinná bë' xibá na', tu' zoa lu guichi lá'ayi le rnna: "Nu na' nuhuóaca tsahui' lahuë' Dios soa ibán tu' reja ladxi' Lë'." <sup>12</sup> Ca na' nuhuóaca tsahui' lahuë' Dios nu na' reja ladxi' Cristo nadzá' ca naca que nu na' ruzxoní ladxi' nuhuóaca tsahui' tu' run ca rinná bë' xibá queë' Moisés. Zoa lu guichi lá'ayi le rnna: "Nu na' run idutë ca rinná bë' xibá na' soa ibán tu' run caní."

<sup>13</sup> Cristo busölë' rë'u lu le richugu queëru' le rinná bë' xibá na' tu' bë'ë latja nu guchugu queë' uláz queëru'. Caní naca tu' zoa lu guichi lá'ayi le rnna: "Narugu quégaca yúgu'të nupa na' dá'gaca lë'e yaga." <sup>14</sup> Caní guca queë' Cristo para gaca gunë' Dios ca na' guzxi' lu në'ë queë' Abraham, gunë' ga gaca dxí'a quégaca bönachi izá'a lu në'ë Jesucristo, en para gaca gunë' ga idísóalenë' Dios Bó' lá'ayi rë'u channó uyija ládxí'ru' Lë', ca na' guzxi' lu në'ë Dios gunë'.

*Le rinná bë' xibá queë' Moisés, en le guzxi' lu në'ë Dios gunë' queëru'*

<sup>15</sup> Na'a, böchi' zána'do', uzúaja' queéli' tu le rucudzu' didza', tu le raca queëru'. Cate' chopa bönni' chigulunë' tuz xtídza'gaquië', en chigulunë' tsutsu didza' na', cuntú nu gaca utsá' didza' na', en cabí gaca nu bi udá' lë'e didza' na'. <sup>16</sup> Dios guzxi' lu në'ë bi gunë' queë' Abraham, en que zxi'ini xi'sóë'. Ga zoa lu guichi lë ni, biti' rnna: "Quégaca zxi'ini xi'sú'", le ruí'i didza' que zían bönachi, pero rnna: "Que zxi'ini xi'sú'." Lë ni ruí'i didza' que tuz bönni', Lë' Cristo. <sup>17</sup> Lë ni na' le rë'ënda' innía': Dios benë' tuz didza' len Abraham, en guzxi' lu në'ë gunë' ca na' gunné'. Le nazúaj lu xibá queë' Dios, le benë' Dios tapa gayuá' yu' chi-uruá' iz gudödi ni' cate' gudxë' caní Abraham, biti' gaca ugúa lë na' guzxi' lu në'ë Dios gunë', en cabí gaca usulu le. <sup>18</sup> Na'a, channó ral-la' gunru' ca rinná bë' xibá na' para sí'iru' le guzxi' lu në'ë Dios gunsë', bíti'rö naca tu le guzxi' lu ná'asë' gunë'. Dios runsë' caní tu' caní guzxi' lu në'ë bi gunë' queë' Abraham.

<sup>19</sup> Channó caní naca, ¿bizx queë gunná bë'ë Dios xibá na' nazúajgaca lu didza' queë'? Dios gunná bë'ë caní para gaca bë' xíguia' nabága'ru', pero gúcasö caní ga bidxintë dza na' bilá' lahuë' zxi'ini xi'sóë' Abraham na', Bönni' na' guzxi' lu në'ë Dios gunë' queë' lë na'. Yugu' le gunná bë'ë Dios lu xibá queë', gusól-lë'ë yödzölió ni lu ná'agaquië' gubáz lá'ayi queë', ate' Moisés budödë' didza' ca nácagaca xibá na'. <sup>20</sup> Biti' naquín nu udödi didza' cate' naca tuz nu run tuz didza', ate' Dios, tuz náquië'.

*Bizx queë gunná bë'ë Dios le zóagaca lu xibá queë'*

<sup>21</sup> Le nazúajgaca lu xibá queë' Dios, ¿ta'dá'gaca lë na' guzxi' lu në'ë Dios gunë'? ¡Biti' ca! La'tu' gunná bë'ë Dios tu xibá le gaca gun ga sóaru' ibanru' tsaz, ní'rö huáca huóácaru' tsahui' lahuë' Dios channó gunru' ca na' rinná bë' xibá na'. <sup>22</sup> Tscá naca lë na' nazúaj lu guichi lá'ayi, yúgu'tëru' nabága'ru' dul-la'. Caní naca para gaca sí'iru' lë na' guzxi' lu në'ë Dios gata' queëru' cate' tseja ládxí'ru' Jesucristo.

23 Zí'atëlö ga bidxín dza gaca tseja ládxi'ru' Cristo, le rnna xibá na' gunná be'e rë'u, ca na' zoa le rinná be'e tu bönni' yu'ë lidxi guié. Caní guca ga bidxintë dza bilá' lahui gaca huóácaru' tsahui' channö uyija ládxi'ru' Lë'. 24 Caní naca, le nazúaj lu xibá queë' Dios gunná be'e rë'u, lë na' busedi rë'u ca tu bönni' usedi ga bidxintë dza bilá' lahuë' Jesucristo, para gaca huóácaru' tsahui' lahuë' Dios channö uyija ládxi'ru' Lë'. 25 Na'a, tu' bidxín dza gaca huóácaru' tsahui' channö uyija ládxi'ru' Cristo, bíti'rö inná be'e rë'u lë na' busedi rë'u.

26 Yúgu'tëli' nácali' bi'i queë cazë' Dios tu reja ládxi'li'-në' Jesucristo, en chinácali' tuz len Lë'. 27 Yúgu'të nupa nadílagaca nisa para huóágagaca tuz len Jesucristo, nuhuóágagaca ca náquië' Lë cazë'. 28 Bíti'rö narúaj choplö bönni' judío, en bönni' izá'a, en cabí narúaj choplö bönni' náquië' tsaz huen dxin, en bönni' nazán, en cabí narúaj choplö bönni', en nígula, tu' cate' böácali' tuz len Jesucristo, yúgu'tëli' böácali' ca' tuz len luzá'ali' tuli' ia'tuli'. 29 Na'a, channö néquili' queë' Cristo, nácali' ca' xzí'ini xi'sóë' Abraham, ate' nazí'ili' lë na' guzxí' lu në'ë Dios gunné' queë' Abraham.

## 4

1 Lë ni le rë'ënda' innía': Tsanni ni ribözabi' tu bi'i' bönni'do' sí'ibi' bi ral-la' gunné' xúzibi' queëbi', ni' nácabi' bí'ido', en bití' nayépisëtë'röbi' ca raca que tu nu naca tsaz huen dxin, sal-la' le nácatë nequi queëbi' yúgu'të. 2 Tsanni ni' nácabi' bí'ido', nacua' nupa tun chi'i' lëbi', en tu'gún dxin le nequi queëbi' ga idxintë dza chinuzóë' xúzibi' queëbi'. 3 Lës caní raca ca' queëru'. Tsanni ni' gúcaru' ca bí'ido', gunná be'e xibá na' rë'u ca raca quégaca bönachi yödzülió ni. 4 Cate' bizá'a dza, Dios gusöl-lë'ë xzí'ini cazë' ni. Gúquië' xzí'ininu tu nígula ca nácaru' rë'u, en gunná be'e le zoa lu xibá quégaca bönni' judío Lë'. 5 Caní guca queë' para guca busölë' nupa na' rinná be'e le zoa lu xibá léguequi, para gaca huóácaru' bi'i queë' Dios.

6 Para gaca bë' chinácali' bi'i queë cazë', Dios guchizë' Dios Bö' lá'ayi ládxi'do'oli', ate' Lë cazë' rulidzë' Dios uláz queëli', rnnë': "Xuza'." 7 Caní naca, chinácali' bi'i queë' Dios, en bíti'rö nácali' ca yugu' bönni' tsaz nácagaquië' huen dxin. Na'a, tu' nácali' bi'i queë cazë' Dios, Lë cazë' nazí' ladxi' në'ë guequi queëli' le nequi queë' tu' nácali' tuz len Cristo.

### *Pablo ru'i ládxe'ë bönni' Galacia ta'yija ládxe'ë Cristo*

8 Cate' ni' bití' núnbë'ëli'-në' Dios, gúcali' ca yugu' bönni', tsaz nácagaquië' huen dxin, en benli' dxin quégaca budó' néquini. Bití' ca' nácagaca budó' na' Dios. 9 Na'a, tu' núnbë'ëli'-në' Dios, o huáca innaru': Tu' núnbë'ë Dios libí'ili', ¿bixz queë rë'ënili' ubí'ili' yugu' lu xibá cané na' cabí nu uzí' xibé? ¿Rë'ënili' huóácali' huen dxin tsaz, en gunli' ca rinná bë' xibá na'? 10 Rápali' tu ia'tú dza, enca' tu ia'tú beo', enca' tu ia'tú cusu na, en tu ia'tú iz. 11 Rádxida' bi gaca queëli'. ¿Naru' nuhuóáca nítisö dxin bena' para gúnbë'ëli' le nácatë? 12 Ráta'yuá' loli', böchi' zána'do', gácali' ca naca' neda', nulá' na'a lu na' xibá benë' Moisés. Caní ral-la' gácali' tu' böáca' neda' ca gúcali' libí'ili'. Bití' bi le cabí naca dxi'a benli' quia' neda'.

13 Chinöz quézili' bixz queë na' gusí lahua' runa' libán loli' que le rinnë dxi'a. Bena' libán ni' tu' gü'ida'. 14 Bití' buca'anali' neda' cané, en cabí buzóali' neda' tsólá'aló sal-la' bigútili' ca guca yödzühuë' quia' na'. Benli' neda' bal, tuz ca gunli' bal tu gubáz lá'ayi queë' Dios, o ca runli' bal Jesucristo caz. 15 Budzëjalë'ëli' dza ni'. ¿Bixzi guca queëli' tu' cabirö raca caní? Lë ni gaca innía' ca guca queëli': La'tu' huáca gunli', bubéajli' guiój

lo queézi, le gúnnali' quia'. <sup>16</sup>Na'a, ¿réquili' nuhuóáca' tu nu riléde'e libí'ili' tu' gudxa' libí'ili' le nácatë?

<sup>17</sup>Bónni' ni' tu'tsé'ë libí'ili' tu'i ládxe'ë libí'ili', pero calëga para gaca dxi'a queëli'. Té'enë' ilunë' ga uca'anali' netu' para güi' ládxi'li' légaquië'. <sup>18</sup>Na'a, naca dxi'a zoa nu ru'i ladxi' libí'ili', pero tuz channö naca para gaca dxi'a queëli'. Caní ru'itica'sö ládxa'a libí'ili', en calëgasö cate' ni' zóalena' libí'ili'. <sup>19</sup>Libí'ili', zxi'ina'do'. Ca na' raca queënu nigula chizóa sóabi' bí'ido' queënu, riguí' rizáca'nu, lës caní riguí' rizáca'a neda' ni'a queëli' leyúbölö ga idxinrö dza gácali' idú ca náquië' Cristo. <sup>20</sup>Nácaru la' zóalena' libí'ili' na'a para gaca gü'ilena' libí'ili' didza' nadzá'alö, tu' ruúbi ruguí'ilë'ëda' ni'a queëli'.

*Le rucudzu' didza' ca guca quégacanu Agar en Sara*

<sup>21</sup>Na'a, libí'ili', nuli' ré'enili' uzóa cuinli' lu xibá queë' Moisés, guli'ná'tsóca' didza' ni gu'a. ¿Catu caz buzé nágali' le rnna xibá na'?

<sup>22</sup>Rnna xibá na' caní: gula'cuá'abi' chópabi' bi'i bönni'do' queë' Abraham. Tubi' gúcabi' zxi'ininu tu nigula tsaz nácanu huen dxin, ate' ia'tubi' gúcabi' zxi'ininu nigula nazannu. <sup>23</sup>Zxi'ininu nigula huen dxin na' gúlajbi' lu ni'a lu na' tu bönni' tsa talajbi' yúgu'të bí'ido', pero zxi'ininu nigula nazannu na' gúlajbi' tu' guzxi' lu në'ë Dios gunë' ga gálajbi'. <sup>24</sup>Lë ni naca ca tu le rucudzu' didza'. Ca guca quégacanu chópanu nigula ni sa'yéaj ca naca chopá didza' Dios bënlenë' bönachi. Tu didza' na' naca le buzöë' Dios lu guí'a Sinaí, le sa'yéaj lë na' guca queënu Agar. Nupa na' rinná be'e xibá na' léguequi, nácacaca ca zxi'ininu Agar, en nácacaca ca huen dxin tsaz lu xibá na'. <sup>25</sup>Le gúcanu Agar na' sa'yéaj ca' ca naca guí'a Sinaí na' le zoa luyú Arabia, en sa'yéaj ca' ca naca yödzo Jerusalén na' a dza, tu' naca yödzo na' ca tu bönni' tsaz náquië' huen dxin tsözxön len nupa nacua' lu yödzo na'. <sup>26</sup>Jerusalén na' zoa yehua' yubá nazán, ate' rë'u ni nácaru' bönachi uládz que yödzo ni'. <sup>27</sup>Nazúaj lu guichi lá'ayi le rnna: Budzeja, nigula huödx, cabí nacua' zxi'inu'.

Lu yöl-la' rudzeja quiu' gurödxí'a, sal-la' catu caz guca quiu' le riguí' rizáca'nu nigula chizóa sóabi' bí'ido' queënu.

Budzeja tu' sal-la' nusán në'eguequi bönachi li', gunë' Dios ga ila'yántëro zxi'inu' ca bi'i queënu nigula zóalennu bönni' queënu.

<sup>28</sup>Libí'ili', böchi' zána'do', rë'u ni nácaru' ca gúcabi' Isaac, zxi'inë' Abraham. Nácaru' ca yugu' zxi'ini xi'sóë' Abraham, guzxi' lu në'ë Dios gata' queë'. <sup>29</sup>Dza ni', bi'i na' gúlajbi' ca talajbi' yúgu'të bí'ido', gudxiá ná'abi' bi'i na' gúlajbi' tu' nözi yöl-la' huáca queë' Dios Bö' lá'ayi. Lës caní raca ca' queëru' na'a, ta'bía no bönachi yödzo'lió ni rë'u. <sup>30</sup>¿Bizxi' rnna le zoa lu guichi lá'ayi? Caní rnna: "Gurú'una-nu nigula na' tsaz nácanu huen dxin tsözxön len zxi'ininu, tu' biti' gaca zxi'ininu nigula na' sí'ibi' tsözxön zxi'ininu nigula nazannu le guzxi' lu në'ë Dios guequi queëbi' zxi'ininu nigula nazannu na'." <sup>31</sup>Caní naca, böchi' zána'do'. Biti' nácaru' ca nácabí zxi'ininu nigula na', tsaz gúcanu huen dxin, pero nácaru' ca zxi'ininu nigula nazannu na'.

## 5

*Guli'gún chi'i cuinli', ugá'anali' lu yöl-la' nazán*

<sup>1</sup> Chinazanru' tu' busanë' Cristo rë'u. Guli'sóa tsutsu channö, ugá'anali' lu yöl-la' nazán na'. Biti' uzóa cuinli' leyúbölö lu xibá queë' Moisés para cabí gácali' ca tu bönni', tsaz náquië' huen dxin.

<sup>2</sup> Buli'zë nágali' neda'. Neda', Pablo, rea' libí'ili', channö ru'í'ili' lataj nu ichugu lu xpéla'li' ca rinná bë' xibá na', bití' ca' uzí'ili' xibé le benë' Cristo. <sup>3</sup> Leyúbölö rë'ënda' guía' núti'tës bönni' ru'ë' lataj nu ichugu lu xpélë'ë caní, run bayudxi gunë' idutë ca le rinná bë' xibá queë' Moisés. <sup>4</sup> Nuli' réquili' huóacali' tsahui' lahuë' Dios tu' runli' ca rinná bë' xibá na', chibulá'alenli'-në' Cristo. Chibusán ná'ali' le ruzá' ládxi'ë Dios queëru'. <sup>5</sup> Rë'u ni ruzxöni ládxi'ru' huóacaru' tsahui' lahuë' Dios ni'a que yöl-la' huáca queë' Dios Bö' lá'ayi tu' reja ládxi'ru' Cristo. <sup>6</sup> Channö nácaru' tuz len Jesucristo, bití' bi run channö narugu lu xpéla'ru' ca rinná bë' xibá na' o channö cabí narugu caní lu xpéla'ru'. Le run bayudxi naca tseja ládxi'ru' Cristo, le run ga idxí'iru' luzá'aru'.

<sup>7</sup> Dxí'ado' guca ca gusí loli' runli' dza ni'. ¿Nuzxi ben ga bucá'anali' le nácatë? <sup>8</sup> Bití' benë' Dios, Bönni' rulidzë' libí'ili', ga benli' caní. <sup>9</sup> Bití' gal-la ládxi'li' lë na' rna: "Látí'sö cúa zi que yöta xtila ruhuóázx idutë cúa ga nayú'u cúa zi na'." <sup>10</sup> Tu' nácaru' tuz len Xanru', runa' löza ca naca queëli', sa' ládxi'li' tuz ca rizá' ládxi'a neda', ate' Dios gun zi'ë bönni' na' rutsë'ë libí'ili', núti'tës nu naca bönni' na'.

<sup>11</sup> Ca naca quia' neda', böchi' zána'do', nacuá' nupa ta'nná rusédida' bönachi ral-la' irugu lu xpéla'guequi ca rinná bë' xibá queë' Moisés. Channö runa' caní, ¿bizx queë' ta'bia nahuë' bönni' judío neda'? La'tu' rusédida' caní, cuntu nu ilé neda' tu' runa' libán ca gútië' Cristo lë'e yaga cruz. <sup>12</sup> Ca naca que nupa ni' tu'tsá' libí'ili', t'ë'ni irugu lu xpéla'li' lë na', nácöru la' ila'chugu tsaz cuínguequi.

<sup>13</sup> Ca naca queëli', böchi' zána'do', Dios bulidzë' libí'ili' para gácali' bönachi nazángaca. Bití' ugunli' dxin yöl-la' nazán na' para gunli' ca rizësö ládxi'li', pero para gunli' dxin que luzá'ali', tuli' ia'tuli', tu' nadxi'ili' luzá'ali'. <sup>14</sup> Yúgu'të le rinná bë' xibá queë' Dios rusudxin nu na' run ca rinná bë' xibá na' rna: "Ral-la' idxí'inu' luzó'o ca nadxi'i cuinu'." <sup>15</sup> Channö rizi' quídza'li' luzá'ali' tuli' ia'tuli', runli' ca tunba' böa' guía' sínia', táguya'aba', en táguba' luzá'aba'. Buli'yú tsate' usulu usunítili' luzá'ali' tuli' ia'tuli'.

*Le runru' lu yöl-la' bönáchisö queëru', en le runru' len yöl-la' huáca queë' Dios Bö' lá'ayi*

<sup>16</sup> Lë ni na' rea' libí'ili': Guli'güi' latja inná bé'enë' libí'ili' Dios Bö' lá'ayi, ate' ní'irö bití'rö gunli' ca rizësö ládxi'ili' lu yöl-la' bönáchisö queëli'. <sup>17</sup> Yugu' le rizë ládxi'ru gunru' lu yöl-la' bönáchisö queëru' bití' röjlöz le rë'ënë' Dios Bö' lá'ayi gunru', ate' lë na' rë'ënë' Dios Bö' lá'ayi bití' röjlöz le rë'ëniru' gunru' lu yöl-la' bönáchisö queëru'. Chopa ni, bití' röjlözgaca, en que lë ni na' bití' gaca gunli' ca rë'ëni quézili'. <sup>18</sup> Channö ru'í'ili' lataj inná bé'enë' Dios Bö' lá'ayi libí'ili', bití'rö inná be'e xibá queë' Moisés libí'ili'.

<sup>19</sup> Naca bë' le tun bönachi lu yöl-la' bönáchisö quéguequi. Tun dul-la' le riguitsaj xibá que yöl-la' nutsaga na', enca' dul-la' le lë'ë. Tun yugu' le naxihui', en yugu' le catsahui'.

<sup>20</sup> Téquiguequi le bach budó' néquiniguequi.

Tun yöl-la' gudzá'.

Tu'dí'i luzë'eguequi, en ta'díl-lalen léguequi.

Tu'zxé'e luzë'eguequi, en ta'lé nupa na', en tu'huídi'.

Ta' rúaj choplö, en tu' béaj tsölá'alö nupa dá'gaca léguequi.

<sup>21</sup> Ta' zé ladxi' le dè que luzé'eguequi, en ta' guilaj xíguia'.

Ta' zudxi, en tagu lè'e.

Tu' dōdi bē' ca túnguequi.

Le zían le caní túnguequi. Neda' ruxōsa' lādxi'li' na'a para cabí gunli' caní ca na' buxōsa' lādxi'li' zí'alö, rnníá': Nupa túngaca caní bití' ca' ila'deli' ila'yú'u ga na' rinná bē'ē Dios.

<sup>22</sup> Channō zóalen Dios Bō' lá'ayi rē'u runru' caní:

Nadxi'iru' luzá'aru'.

Rudzeja lādxi'ru'.

Zoa dxi lādxi'do'oru'.

Ribōzaru' zxōn ladxi'.

Ruí'i lādxi'ru' luzá'aru'.

Nácaru' dxi'i ladxi'.

Rusudxinru' xtídza'ru'.

<sup>23</sup> Nácaru' nōxaj ladxi'.

Rinná be'e cuinru'.

Bití' ca' gunná bē'ē Moisés rē'u para cabí gunru' yugu' le caní. <sup>24</sup> Nupa néquiguequi queē' Cristo bítí'rō tun ca tē'ēni quez, en cabí tun le ta' zēsō ladxi' lu yöl-la' bōnáchisō quéguequi. <sup>25</sup> Dios Bō' lá'ayi runnē' yöl-la' na'bán queēru'. Lē' cazē' ral-la' inná bē'enē' rē'u ca naca yúgu'tē le runru'.

<sup>26</sup> Bití' ral-la' gun ba zxōn cuinru', en cabí utsá'aru' luzá'aru', en cabí uzzé'eru' luzá'aru' turu' ia'turu'.

## 6

### *Ral-la' gácalenru' luzá'aru' turu' ia'turu'*

<sup>1</sup> Na'a, bōchi' zána'do', channō ilé'eli' runē' dul-la' tu bōnni' bōchi'li', nuli' zóalenē' Dios Bō' lá'ayi libí'ili', ral-la' gunli' ga ubí'i lādxi'ē bōnni' na', pero run bayudxi gunli' caní lu yöl-la' nōxaj ladxi' queēli', en uyú cuinli' tsate' cu'u tu' xihuí' libí'ili' nōza dul-la'. <sup>2</sup> Guli' gácalen luzá'ali' tuli' ia'tuli' tsca naca yuá' nabága'li'. Channō gunli' caní uzóali' didza' le gunná bē'enē' Cristo rē'u.

<sup>3</sup> Channō zoa nu réqui chinadeli' yöl-la' nayēpisē, en bití' bi nadeli' nu na', nu ni na' rizí' ye'e la' cuinsi. <sup>4</sup> Tuhuéaj' tuhuéajē' bōnni' ral-la' uchi'a usōrōē' que le runē'. Ní'irō channō urúajē' dxi'a, huáca gun ba zxōn cuinē' ni'a que le chinunē', en bití' gun bayudxi uyúē' ca núngaca ia'zíca'rō bōnachi channō ba benrē' dxi'a o cabí. <sup>5</sup> Tuhuéaj' tuhuéajē' bōnni' ral-la' gu'ē le nusubáguē'ē Dios lē'.

<sup>6</sup> Channō zoa nu rusedi libí'ili' tu' cantu nu gaca si' ye'e Dios. Ulápali' tsca naca le rázali' nu na' rusedi libí'ili' lati' que yúgu'tē le do' dē queēli'.

<sup>7</sup> Bití' si' ye'e cuinli' tu' cantu nu gaca si' ye'e Dios. Ulápali' tsca naca le rázali'. <sup>8</sup> Channō le rázali' naca yugu' le runli' ca rizēsō lādxi'li' lu yöl-la' bōnáchisō queēli', le ulápali' gaca yöl-la' guti. Channō le rázali' naca yugu' le runli' ca raza lādxi'ē Dios Bō' Lá'ayi, ulápali' le gunnē' Dios Bō' lá'ayi queēli', le naca yöl-la' na'bán idú. <sup>9</sup> Caní naca, bití' ral-la' huōa lādxi'ru' gunru' le naca dxi'a, tu' channō cabí huōa lādxi'ru', idxín dza uláparu'. <sup>10</sup> Que lē ni na', bátati'tēs gata' queēru' lataj, ral-la' gunru' le naca dxi'a quégaca yúgu'tē bōnachi, en le naca lo, ral-la' gunru' caní quégaca bōchi' zanru' ta'yíja ladxi' Cristo.

*Le buzúajē' Pablo lu guichi ga ruúdx*

<sup>11</sup> Buli'yú cate' bach didza' ni ruzúaja' lu guichi len na' cuina'. <sup>12</sup> Nupa na' té'eni ilún ga irugu lu xpéla'li' ca rinná bē' xibá queē' Moisés, túngaca caní para ulu'ruaj dxi'a lógaca bōnachi, en cabí bi ilún queguequi tu' túngaca libán ca gútiē' Cristo lē'e yaga cruz. <sup>13</sup> Yugu' bōnni' na' ta'zí' lu ná'agaquiē' le narugu lu xpéla'gaquiē' ca rinná bē' xibá queē' Moisés, biti' tu'zōē' didza' idutē ca rnna xibá na'. Té'enē' ilunē' ga irugu lu xpéla'li' para gaca ilún ba zxōn cuíngaqiē' tu' ta'nná bé'enē' libí'ili' para irugu lu xpéla'li' caní. <sup>14</sup> Ca naca quia' neda', cú'usa' yōl-la' ba le benē' Xanru' Jesucristo cate' gútiē' lē'e yaga cruz. Tu' nōzi le benē' Cristo lē'e yaga cruz, yugu' le dē yōdzōlió ni naca quia' ca tu le chinati, biti' ru'í lādxa'a le, ate' neda' naca' quegaca bōnachi yōdzōlió ni ca tu bōnni' nati, biti' tu'í ladxí' neda'. <sup>15</sup> Channō nácaru' tuz len Jesucristo, biti' bi run channō narugu lu xpéla'ru' ca rinná bē' xibá na' o channō cabí narugu lu xpéla'ru' caní. Le run bayudxi naca gácaru' bōnachi cubi niu' lē'e lādxi'do'oru'. <sup>16</sup> Yúgu'tē bōnni' na' tunē' ca rinná bē' xibá runa' ni, en yúgu'tē bōnni' na' néquiqueuinē' queē' Dios, rinábida'-nē' Dios gunē' ga soa dxi lādxi'do'gaquiē', en huéchi lādxē'ē légaquiē'.

<sup>17</sup> Na'a zē lo, cuntu nu bōnni' ral-la' utsē'ē neda', tu' nácagaca bē' butsóa zóagaca lu xpéla'a naca' huen dxin queē' Xanru' Jesús.

<sup>18</sup> Na'a, bōchi' zána'do', rinábida'-nē' Xanru' Jesucristo uzá' lādxē'ē queēli' yúgu'tēli'. Ca' caz.

## DIDZA' GUSÖL-LË'Ë PABLO YÖDZÖ ÉFESO

*Pablo rugapë' Dios bönachi queë' Cristo nacua' Éfeso*

<sup>1</sup> Neda', Pablo, naca' gubáz nasöl-lë'ë Jesucristo tu' gú'uni quezínë' Dios gaca' caní. Rugapa' Dios libí'ili', zóali' Éfeso. Néquili' quez queë' Dios, en réajlë'ëli' Jesucristo. <sup>2</sup> Rinábida'-në' Xúziru' Dios, enca' Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

*Le naca queë' Dios Bö' Lá'ayi rata' queëru'*

<sup>3</sup> ¡Ral-la' cú'uru'-në' yöl-la' ba Dios, Xuzë' Xanru' Jesucristo! Tu' nácaru' tuz len Cristo, Dios chibuzá' ládxë'ë queëru' yúgu'të le naca dxi'a que yehua' yubá, le runë' Dios Bö' Lá'ayi ga rata' queëru'. <sup>4</sup> Zí'atëlö ca benë' Dios yödzölió ni, gurö cazë' rë'u para guéquiru' quez queë' tsözxön len Cristo, en gácaru' bönachi lá'ayi queë', en gácaru' idú dxi'a lahuë' Lë'. <sup>5</sup> Dios bucözë' zí'atëlö si' lu në'ë rë'u ca xzí'ini cazë' tsözxön len Jesucristo, tu' guyaza ládxë'ë gaca caní, en tu' naca le gú'uni quezínë' gunë'. <sup>6</sup> ¡Ral-la' cú'utica'siru'-në' Dios yöl-la' ba ni'a que le buzá' ládxë'ë queëru', yugu' le bénnasë' queëru' tu' nácaru' tuz len Xzí'inë', Nu na' nadxí'inë'! <sup>7</sup> ¡Cristo böá'uë' rë'u cate' ni' gútië' uláz queëru' para gaca uniti lahuë' Dios rë'u ca naca dul-la' nabága'ru'! ¡Xzöntërö naca le buzá' ládxë'ë Dios queëru', <sup>8</sup> lë na' rúnnadë'ë Lë' queëru'! ¡Lu yöl-la' rácada' queë', en lu yöl-la' réajni'i queë' <sup>9</sup> benë' Dios le bucözë' queëru', ate' buluf'inë' rë'u lë na' bigachi', le buzóa cazë' zí'atëlö usudxinë' lu në'ë Cristo! <sup>10</sup> Lë na' buzóa cazë' Dios usudxinë' cate' izá'a dza, naca gunë' ga ilaca tuz, en ila'cuá' lu në'ë Cristo yúgu'të le dë, le nacua' yehua' yubá, en le nacua' yödzölió ni.

<sup>11</sup> Tu' nácaru' tuz len Cristo, Dios gurö cazë' rë'u zí'atëlö para guequi queëru' le nequi queë' Xúziru' Dios, lë na' bucözë' queëru' ca naca le gú'uni quezínë' Dios, Nu run yúgu'të ca ré'ëni quezínë' Lë'. <sup>12</sup> Caní benë' Dios para cú'uru'-në' yöl-la' ba ca naca yöl-la' xzön queë', rë'u ni ruzxöni ládxi'ru'-në' Cristo zí'atëlö ca ia'zica'rö bönachi. <sup>13</sup> Lësca' caní guca queëli'. Cate' biyönili' didza' idútë li, didza' dxi'a ca gaca uláru', guyéajlë'ëli' Cristo, ate' Dios buzóë' queëli' le naca bë' nácali' queë', tu' guchizië' icja ládxi'do'oli' Dios Bö' Lá'ayi, Nu na' guzxi' lu në'ë Dios isöl-lë'ë queëru'. <sup>14</sup> Tu' zóalenë' Dios Bö' Lá'ayi rë'u, naca löza guequi queëru' le nequi queë' Xúziru' Dios cate' údxi huóá'uë' rë'u, rë'u na' chinéquiru' queë'. Caní naca para gaca yöl-la' ba que yöl-la' xzön queë'.

*Pablo rinábinë' Dios gunnë' queëru' yöl-la' réajni'i*

<sup>15</sup> Que lë ni na', cate' biyönda' ca réajlë'ëli'-në' Xanru' Jesús, en ca nadxí'ili' yúgu'të bönachi queë' Dios, ga ridxintë na'a dza <sup>16</sup> biti' ca' rusana' rea'-në' Dios: "Xclenu'", ca naca queëli'. Røjneda' libí'ili' cate' rulidza'-në' Dios. <sup>17</sup> Rinábida'-në' Dios queë' Xanru' Jesucristo, Dios na' náquië' Xúziru' nayëpisëtërë', rinábida'-në' isöl-lë'ë Dios Bö' Lá'ayi queëli', Bö' na' runna yöl-la' réajni'i queëru', en rulu'i rë'u ca naca cazë' Dios, para gaca idú ca núnbë'ëru'-në'. <sup>18</sup> Rinábida'-në' Dios uzéajni'inë' libí'ili' lu icja ládxi'do'oli' para gaca inözili' ca naca le runru' löza, lë na' bulidzë' libí'ili' para uzí'ili' xibé, en para inözili' ca naca yöl-la' tsahui' que yehua' yubá, le guequi quegaca nupa néquiguequi queë' Dios, <sup>19</sup> enca' para inözili' cate' xzön naca yöl-la' huáca queë', le rácalen rë'u ni réajlë'ëru' Lë'. Yöl-la'

huáca zxön ni naca la' lébisö na' bulu'e lahui Dios <sup>20</sup> cate' ni' busubanë' Cristo lu yöl-la' guti, en benë' ga gurö'ë cuita lë'ë Lë cazë' ga nayëpisëtëre' ni' yehua' yubá. <sup>21</sup> Rinná bé'enë' nupa ni' ta'nná bé', en nupa ni' dë lu në'eguequi, en nupa ni' nadéli'gaca yöl-la' huáca, en nupa ni' nácagaca xan. Cristo nayëpisëtëre' ca yúgu'të nupa nadéli'gaca yöl-la' unná bé' yödzölió ni, en lu yödzölió si' za'. <sup>22</sup> Dios budödë' lu në'ë Cristo yúgu'të le dë para inná bé'enë' le, en buzöë' Lë' quégaca bönachi queë' para gáquië' Xanru' lu yúgu'të le nequi queëru'. <sup>23</sup> Yugu' bönachi queë' Cristo nácagaca ca idútë le naca cazë', ate' raquië' Lë' idú lu le naca cazë' na'. Run cazë' Lë' ga raca idú yúgu'të le dë.

## 2

### *Nuláru' tu' nadxí'inë' Dios rë'u*

<sup>1</sup> Dios chibennë' yöl-la' na'bán idú queéli', sal-la' gúcali' zí'atëlö ca bönni' nátigaca tu' nözi dul-la' nabága'li', en ni'a que dö' biá'ali'. <sup>2</sup> Dza ni' benli' lébisö ca tun bönachi biti' nácagaca tsahui' nacua' yödzölió ni, en benli' ca gú'uni tu' xihui', nu rinná bé' lu bö'ös, en rugün dxin nupa biti' túngaca ca rnna xtídzë'ë Dios. <sup>3</sup> Lëscá' caní gúcaru' yúgu'tëru' rë'u. Benru' ca guzësö ládxi'ru', en ca guyaza ládxi'ru' lu yöl-la' bönáchisö queëru'. Que lë ni na' gubága'ru' dul-la' lahuë' Dios le nun ga gunë' rë'u xíguia' ca gunë' quéguequi ia'zíca'rö bönachi. <sup>4-5</sup> Ní'irö cate' ni' nácaru' ca bönni' nátigaca tu' nözi dul-la' gubága'ru', Dios busubanë' rë'u lu yöl-la' guti tsözxön len Cristo tu' buéchi' ládxi'ë rë'u, en bidxí'ide'enë' rë'u. Nuláli' tu' zoa le buzá' ládxi'ë Dios queéli'. <sup>6</sup> Dios busubanë' rë'u tsözxön len Cristo para gunë' ga cõ'oru' tsözxön len Lë' ga ni' rinná bé'ë yehua' yubá. <sup>7</sup> Caní benë' Dios, en buluí'inë' bönachi si' zá'gaca ca naca yöl-la' tsahui' que le buzá' ládxi'ë queëru', tu' budödë' Jesucristo ni'a queëru', le naca bé' ca nadxí'ide'enë' rë'u. <sup>8</sup> Nuláli' tu' zoa le buzá' ládxi'ë Dios queéli' tu' réajlë'ëli' Cristo. Busölë' libí'ili' calëga tu' nacua' le naca dxi'a benli' libí'ili', pero tu' naca le runsë' Dios. <sup>9</sup> Cuntu nu gaca gun ba zxön cuini tu' nulá, tu' cabí nulá nu na' tu' nacua' le naca dxi'a nun nu na'. <sup>10</sup> Le nácaru' naca le nun cazë' Dios. Tu' nácaru' tuz len Jesucristo, bucu'ë rë'u para gunru' le nácagaca dxi'a, le bucözë' zí'atëlö gunru'.

### *Rö'ö dxi icja ládxi'do'oru' lahuë' Dios ni'a que le benë' Cristo*

<sup>11</sup> Guli'tsöjné ca gúcali' zí'atëlö. Gúcali' bönachi izá'a, en que lë ni na' yugu' bönni' judío, bönni' na' ta'chúguië' lu xipéla'gaquië' le naca bé' dá'gaquië' Dios, en nazi' lágaquië' bönni' narugu lu xipéla'gaquië', ta'nnë' nácali' libí'ili' bönni' biti' narugu lu xipéla'gaquië'. <sup>12</sup> Dza ni' nubíga'li' ga zoë' Cristo. Gúcali' bönni' zí'tu' lógaca bönachi Israel, en biti' buzí'ili' xibé didza' benë' tsutsu Dios, en guzxí' lu në'ë bi gata' quégaca bönachi queë'. Guzóali' yödzölió ni, biti' zoa le runli' löza, en biti' núnbë'ënilí-në' Dios. <sup>13</sup> ¡Na'a, nácali' tuz len Jesucristo! ¡Zí'atëlö nubíga'li' libí'ili' zí'tu' ga zoë' Dios, pero na'a nudxíguë'ë Dios libí'ili' gála'sö tu' gútië' Cristo uláz queëru'! <sup>14</sup> Lë cazë' Cristo runë' ga rö'ö dxi icja ládxi'do'oru' lahuë' Dios. Lë' benë' ga yugu' bönni' judío, en yugu' bönni' zí'tu' bulu'huóáquië' tuz bönachi, en busúluë' yöl-la' rilé le guléaj légaquië' choplö ca tu zö'ö zxön. <sup>15</sup> Lë ni benë' Cristo cate' gútië' uláz queëru', en gudúë' yugu' xibá, en yugu' le rinná bé' nazúajgaca lu xibá quégaca bönachi judío, ate' chopá cõ' bönachi na', bunë' tuz bönachi cubi, nupa nácagaca tuz len Lë cazë'. Caní benë', en gulequi dxíë' yöl-la' rilé na'. <sup>16</sup> Cate' gútië' Cristo lë'e yaga cruz,



busúluë' yöl-la' rilé na', ate' chopa cö' bönachi na', bunë' légaquië' ca tuz bönachi, en gulequi dxíë' icja ládxi'do'gaquië' lahuë' Dios.

<sup>17</sup> Caní guca, bulu'í lahuë' Cristo, en benë' libán que didza' dxi'a ca ribequi dxíë' yúgu'të bönachi, libí'ili' na' nácali' bönachi izá'a, en zóali' zi'tu' ga zoë' Dios, enca' bönachi judío nacua' gála'sö. <sup>18</sup> Na'a, ni'a que le benë' Cristo, gaca ibíga'ru' lahuë' Xúziru' Dios, tu' zóalenë' Lë cazë' Dios Bö' Lá'ayi rë'u, sal-la' nácaru' bönachi judío o bönachi izá'a. <sup>19</sup> Que lë ni na', libí'ili', bönachi izá'a, bíti'rö nácali' ca bönachi zi'tu' zóali' tu luyú biti' nequi queëli', pero nabábalenli' bönachi queë' Dios. ¡Chinácali' ca bí'i queë cazë' Dios! <sup>20</sup> Libí'ili' nácali' ca tu yu'u zoa tsaz. Nácali' ca yugu' guiöj zxóagaca lahui xilibi zö'ö, le bulu'cu'ë yugu' bönni' gubáz queë' Cristo, en yugu' bönni' gulu'ë didza' uláz queë' Dios, ate' Lë cazë' Jesucristo náquië' ca guiöj lo que xilibi zö'ö na'. <sup>21</sup> Idútë yu'u na' le nácali' libí'i cázali' riyasa lahui xilibi zö'ö na' naca cazë' Cristo, en nacua' tu'lapa yugu' guiöj que, para gaca tu yudo' lá'ayi le naca tuz len Xanru'. <sup>22</sup> Libí'i cázali' nácali' tuz len Cristo Nu buzóa libí'ili' para gácali' ca tu yu'u ga na' yu'ë Dios, tu' dzáguë' Dios Bö' Lá'ayi libí'ili'.

### 3

*Náquië' Pablo huen libán que didza' dxi'a lógaca bönachi izá'a*

<sup>1</sup> Que lë ni na', neda', Pablo, yu'a lidxi guíë tu' runa' libán queë' Jesucristo para uzí'ili' xibë', libí'ili', bönachi izá'a. <sup>2</sup> Réquida' chinöz quézili' ca benë' Dios, budödë' lu na'a dxin runa' para uzí'ili' xibé le ruzá ládxe'ë queëru'. <sup>3</sup> Dios bulu'e lahui le bigachi' queë', en buzéajni'inë' neda' ca naca. Ca naca lë ni chibuzúaja' láti'do' queëli' lu guichi. <sup>4</sup> Cate' ulábalí' lë ni, gúnbë'ëli' le réajni'ida' ca naca le bigachi' ca naca queë' Cristo. <sup>5</sup> Dza ni'te cuntü nu buzéajni'inë' Dios ca naca le bigachi' na', pero na'a, lu në'ë Dios Bö' Lá'ayi, chibulu'ë lahui Dios ca naca, tu' buluf'inë' yugu' bönni' gubáz lá'ayi queë', en yugu' bönni' tu'ë didza' uláz queë'. <sup>6</sup> Caní rna lë na' bigachi': "Ni'a que didza' dxi'a ila'deli' bönachi izá'a tsözxön len bönachi judío le nequi queë' Dios, ate' ulu'huóáquië' ca tuz bönachi, en ulu'zi'ë xibé tsözxön len légaquië' le guzxi' lu në'ë Dios unödzejë' quégaquië' tu' dá'gaquië' Jesucristo." <sup>7</sup> Dios buzá' ládxe'ë quia' le bennë' quia'. Lu yöl-la' huáca zxön queë' benë' neda' huen libán que didza' dxi'a queë'. <sup>8</sup> Nacra' cá'asö ca yúgu'të bönachi queë' Dios, pero Lë' buzá' ládxe'ë quia' gaca' huen libán lógaca bönachi izá'a que didza' dxi'a ca naca yöl-la' tsahui' queë' Cristo, le nazáca'da'. <sup>9</sup> Dios budödë' lu na'a guna' ga iléquibe'e yúgu'të bönachi ca naca le buzóa cazë' Dios dza ni'te, lë na' naca tu le bigachi' queë' Dios, Nu ben yúgu'të le rilé'ëru'. <sup>10</sup> Caní guca, para iléquibe'e yúgu'të nupa ta'nná bë', en nupa dë lu në'ëgüequi ni' yehua' yubá, idú ca naca yöl-la' réajni'i queë' Dios cate' ila'lé'e ca nácacaca bönachi queë' Cristo. <sup>11</sup> Dios benë' lë ni, busudxinë' lë na' buzóa cazë' dza ni'te, le benë' lu në'ë Xanru' Jesucristo. <sup>12</sup> Tu' nácaru' tuz len Cristo, nazí'iru' lataj ibíga'ru' idú ladxi'ru' lahuë' Dios, tu' réajlë'ëru' Lë'. <sup>13</sup> Que lë ni na' ráta'yua' loli' biti' gaca chopa ládxi'li' tu' nözi le riguí'i rizáca'a neda' para gácalena' libí'ili', le naca tu le uzí'ili' xibé.

*Ca naca yöl-la' nadxi'i queë' Cristo*

<sup>14</sup> ¡Que lë ni na', ruzechu zxiba' lahuë' Xuzë' Xanru' Jesucristo! <sup>15</sup> Ca lë', nazí'i ca' lágaca yúgu'të bönachi queë', nupa nacua' yehua' yubá, en

nupa nacuá' yödžölió ni. <sup>16</sup> Rinábida'-në' Xúziru' Dios, lu yöl-la' zxon queë', le nazáca'da', gunnë' queëli' yöl-la' huáca queë' Dios Bö' Lá'ayi, en gunë' ga gálali' lu icja ládxi'do'oli'. <sup>17</sup> Rinábida'-në' Cristo soë' icja ládxi'do'oli' tu' réajlë'ëli' Lë'. Rinábida'-në' gunë' ga sóali' tsaz lu yöl-la' nadxi'i queë', en biti' tséaj bö' icja ládxi'do'oli' ca nadxi'ili'-në', <sup>18</sup> para gaca tséajni'ili' tsözxön len yúgu'të bönachi queë' Cristo ca naca yöl-la' nadxi'i queë', tsca ga ridxín ní'ilo, en ná'alö, en cadxi'ilö, en xitsá'alö. <sup>19</sup> Rinábida'-në' Dios gunë' ga gúnbë'ëli' yöl-la' nadxi'i na', le cabí gaca gúnbë'ëru' idú ca naca, para sóalen libí'ili' idú le naca cazë' Dios.

<sup>20</sup> ¡Na'a, yöl-la' ba Dios, Nu gaca gúntërö ca gaca inábaru' o ca gaca sa' ládxi'ru', ugunë' dxin yöl-la' huáca queë' lu icja ládxi'do'oru'! <sup>21</sup> ¡Gácatíca'sö queë' Dios yöl-la' ba lógaca bönachi queë' Cristo, en lahuë' Lë cazë' Jesu-cristo, na'a dza, en yúgu'të dza zá'gaca! ¡Ca' gaca!

## 4

### *Dios Bö' Lá'ayi nunë' rë'u tuz*

<sup>1</sup> Na'a, neda' ráta'yua' loli', yu'a lidxi guïë ni tu' runa' libán queë' Cristo, rinábida' libí'ili' gunli' idú ca ral-la' ilún nupa bulidzë' Dios para ilequi queë', ca na' bulidzë' ca' libí'ili'. <sup>2</sup> Guli'gaca nõxaj ladxí', en dxi'i ladxí'. Guli'cöz zxon ladxí'. Guli'gúí' ladxí' luzá'ali' tu' ia'tuli' lu yöl-la' nadxi'i queëli'. <sup>3</sup> Guli'gúí' ladxí' gácatíca'sili' tuz ca na' chinunë' Dios Bö' Lá'ayi libí'ili', gunli' caní lu yöl-la' riböza tsáhui'do' queëli' le rutsaga libí'ili'.

<sup>4</sup> Tuz naca idútë le naca cazë' Cristo le nadzágaru' rë'u.

Tuzë' náquië' Dios Bö' Lá'ayi dzáguïë' rë'u.

Tuz naca le runru' löza, lë na' bulidzë' rë'u Dios para uzí'iru' xibé.

<sup>5</sup> Tuzë' náquië' Xanru'.

Tuz le réajlë'ëru'.

Tuz le bidílaru' nisa.

<sup>6</sup> Tuzë' náquië' Dios Nu naca Xúziru' yúgu'tëru'.

Lë' rinná bé'enë' yúgu'tëru'.

Rugunë' dxin yúgu'tëru'.

Riböza cazë' Lë' lu icja ládxi'do'oru' yúgu'tëru'.

<sup>7</sup> Tu turu' nazí'iru' tu yöl-la' huáca queë' Dios tsca naca le bennë' Cristo que queëru'. <sup>8</sup> Naca caní ca na' nazúaj lu guichi lá'ayi le rnna:

Buëpë' yehua' yubá, guchë'ë zían bönachi gula'dzúngaca.

Gudísië' quégaca bönachi le runödžjasë' quégaquië'.

<sup>9</sup> ¿Bizxi rë'ëni inná lë na' rnna: buëpë'? Rusëdi rë'u bötjë' zí'alö, en bidxinë' yödžölió cadxi'ilö ni. <sup>10</sup> Nu na' bötaj naca Bönni' na' buëpë' xitsá'tërö ni' yehua' yubá para budzë'ë yúgu'të len le naca cazë' Lë'.

<sup>11</sup> Cristo caz bennë' que queëru' yugu' yöl-la' huáca queë':

Bë' lataj bal-lë' bönni' iláquië' gubáz queë'.

Benë' ga tu'ë didza' uláz queë' Dios ia'bal-lë' bönni'.

Gusöl-lë'ë ia'bal-lë' tsöjéngaquië' libán que didza' dxi'a.

Bucu'ë ia'bal-lë' para ilún chi'ë bönachi queë'.

Bucu'ë ia'bal-lë' para ulu'sédinë' bönachi queë'.

<sup>12</sup> Cristo caz bupë'ë bönachi queë' caní para gaca ilún xichinë', para ilún ga ilaca idú nupa nácacaga ca idútë le naca cazë' Lë'. <sup>13</sup> Caní gaca ga idxintë dza huóácaru' tuz yúgu'tëru' ca réajlë'ëru' Cristo, en ca núnbë'ëru'-në' Zxí'inë' Dios. Gácaru' nál-la, en huóácaru' idú ca náquië' Lë cazë' Cristo.

<sup>14</sup> Bítí'rö gácaru' ca yugu' bí'ido', ca nácacaga nupa na' tu'tsa'të ca túngaca,

en náca gaca ca tu le naché' lu yegu, o ca tu le rōjchē' bítitēs bō' recja, tu' ta'zī' lu nē'eguequi bítitēs didza' nu rusēdi léguequi, nu na' rizí' ye'e léguequi len yōl-la' sina' que, en run ga ta'chixi ta'nigui. <sup>15</sup> Na'a, rē'u ni, tu' nadxí'iru' luzá'aru', ral-la' gūf'iru' didza' le naca idútē li para gaca huóacaru' idú ca náquiē' Cristo, en gácaru' tuz len Lē', Nu naca Xani idú le naca cazē', le nácaru' rē'u. <sup>16</sup> Cristo caz runē' ga rutsaga dxi'a idútē le naca cazē', le nácaru' rē'u, ate' idútē le naca cazē' na' naguela' tsōzxōn ni'a que lē na' run tuz idútē le naca cazē'. Cate' tu turu' runru' xichinru', rē'u na' dzágaru' le naca cazē', idútē rizxōn, en raca idú, ca na' zeaj rácarō idú ca nadxí'iru' luzá'aru'.

*Yōl-la' na'bán cubi náparu' tu' nácaru' tuz len Cristo*

<sup>17</sup> Uláz queē' Xanru' rea' libí'ili' lē ni, en rigu'a le lu ná'ali', rnní'a: Bítirō gunli' ca tun nupa bití' núnbē'gaquiē' Dios, nupa na' tun ca ta'za'sō lādxi'guequi, <sup>18</sup> en nachul-la nanítigaca icja lādxi'do'guequi. Tu' cabí nōzguequinē' le nácatē, en nazídigaquiē', bití' nazí'gaquiē' yōl-la' na'bán na' runnē' Dios queēru'. <sup>19</sup> Bití' ca' tu'tuí'nē'. Nudōdi cúngaquiē' lu le ruá' dō'. Idú lādxi'gaquiē' tunē' yúgu'tē le cabí naca tsahui'. <sup>20</sup> Nupa ni' bulu'sedi libí'ili' ca naca queē' Cristo, bití' ca' bulu'sedi libí'ili' gunli' ca tun bōnachi caní. <sup>21</sup> Le naca idútē li biyōnili' ca naca queē' Cristo, en le nácali' queē' tu'sédinē' libí'ili' le naca idútē li na' zóalen Jesús. <sup>22</sup> Gulí'nná be'e yōl-la' bōnáchisō queéli' le gúcali' zí'alō, lē na' riniti ni'a que yōl-la' rizē ladxí' queéli' le ruá' dō' le guzxi' ye'e libí'ili'. <sup>23</sup> Ral-la' huóacali' cubi lu icja lādxi'do'oli', en lu bō' naca cázali'. <sup>24</sup> Ral-la' sí'ili' yōl-la' bōnachi cubi le nunē' Dios ca naca cazē' Lē', le rulu'í' cuini ni'a que le naca dxi'a, en le naca tsahui' runli', en run ga gaca gunli' caní.

<sup>25</sup> Que lē ni na', bítirō si' yé'ēli'. Yúgu'tēru' ral-la' gū'ilenru' luzá'aru' didza' le nácatē, tu' dzágaru' yúgu'tēru' idútē le naca cazē' Cristo.

<sup>26</sup> Channō hualéli', bití' ral-la' gunli' dul-la'. Bití' ileli' xidzé. <sup>27</sup> Bití' bi gunli' le gūf'ili' lataj tu' xihui' ucúl-la libí'ili'.

<sup>28</sup> Nu bōnní' ribanē' ral-la' usanē' yōl-la' gubán queē', en tsáziē' huen dxin para gata' queē' bi unōdzjē' qué gaca nupa ta'yadzaj.

<sup>29</sup> Bití' gūf'ili' didza' xihui', pero guli'gū' didza' dxi'a, yugu' le ilácalen nu yōni, en ilún ga gaca dxi'a que nu na'. <sup>30</sup> Bití' usuhuí'inili' Dios Bō' Lá'ayi, tu' naca bē' néquili' queē' Dios tu' zóalenē' Dios Bō' Lá'ayi libí'ili', ate' idxín dza údxi usólē' libí'ili' lu dul-la'.

<sup>31</sup> Gulí'cúa lada' libí'ili' yōl-la' ruzxē'e, en yōl-la' ridzá'a, en yōl-la' rilé, en yōl-la' ridil-la didza', en yōl-la' rutsaga yudxi, en yúgu'tē yōl-la' bití' rilé'e luzá'ali' dxi'a.

<sup>32</sup> Ral-la' gácali' dxi'i ladxí', en huéchi' lādxi'li' luzá'ali' tuli' ia'tuli', en uniti loli' luzá'ali' tuli' ia'tuli', ca na' benē' Dios, buniti lahuē' libí'ili' tu' nácali' tuz len Cristo.

## 5

*Ca ral-la' ilaca nupa náca gaca ca bi'i queē' cazē' Dios*

<sup>1</sup> Tu' nácali' ca bi'i queē' cazē' Dios, ate' nadxí'inē' libí'ili', guli'gūf' ladxí' gácali' ca náquiē' Lē'. <sup>2</sup> Ca naca yúgu'tē le runli': Ral-la' idxí'ili' luzá'ali' ca na' benē' Cristo.

Bidxi'inè' rë'u, en budödi cuinë' lu yöl-la' guti uláz queëru'.

Ben cuinë' ca böa' bëdxido' rúrtiru'-ba' lahuë' Dios tu' nözi dul-la' nabágaru'.

Gúquië' ca' ca tu le rilá' zxixi le raza ládxe'ë Dios le rigú'uru' lu bucugu lá'ayi queë'.

<sup>3</sup>Tu' nácali' queë' Dios,  
biti' ca' gunli' le ruá' dö',  
en biti' gunli' le cabí ral-la' gunli',  
en biti' uhuídi'li'.

Ní'irö cuntú nu gaca bi innè queëli'.

<sup>4</sup>Biti' gü'ili' didza' xihui',  
o didza' canöz, o didza' cá'asö,  
yugu' le cabí ral-la' gunli',

pero nácarö dxi'a guiëli'-nè' Dios: "Xclenu'."

<sup>5</sup>Chinöz quézili' nitüë' bönni' runè' le ruá' dö' biti' ca' tsázië' ga rinná bë'ë Cristo tsözxon len Dios, o nu bönni' runè' le cabí ral-la' gunè', o nu bönni' ruhuídi'nè'. Nu na' ruhuídi' naca ca nu reáj ladxí' budó' guiój budó' yaga.

<sup>6</sup>Biti' gü'ili' lataj nu si' ye'e libí'ili' len didza' biti' nácatë. Tu' nözi dul-la' caní Dios gunè' xíguia' nupa biti' túngaca ca rnna xtídzë'ë. <sup>7</sup>Biti' ca' gunli' tuz bönachi caní.

<sup>8</sup>Zí'atëlö guzóali' ga naca chul-la que dul-la', pero na'a zóali' lu bení', tu' nácali' tuz len Xanru'. Guli'gaca ca bönachi ta'dá lu bení', <sup>9</sup>tu' run bení' na' ga gácaru' dxi'i ladxí', en ga gü'iru' didza' le naca idútë li, en ga gácaru' tsahuí'. <sup>10</sup>Guli'güí' ladxí' inózili' le raza ládxe'ë Xanru'. <sup>11</sup>Biti' gütsa'li' nupa tun le ruá' dö', lè na' tunè' ga naca chul-la que dul-la', pero buli'béaj ga liná' yugu' lè na' tunè'. <sup>12</sup>Utui'iru' gü'iru' didza' ca naca le tun bönachi na' bagáchi'sö. <sup>13</sup>Cate' bi ubéajru' ga liná', gaca bë' yúgu'të tsca nácgaca, tu' gun le naca bení' ga gaca bë' yúgu'të. <sup>14</sup>Que lè ni na' nazúaj lu guichi lè na' rnna:

Bubán, li' na' rasiu'.

Guyasa ladaj nupa nátigaca.

Cristo uzení'ë quiu'.

<sup>15</sup>Buli'yú cuinli' ca runli'. Biti' gácali' nupa biti' ta'yéajni'ini, pero guli'gaca bönachi ta'yéajni'i. <sup>16</sup>Guli'sí' xibé lataj dë queëli' tu' chizóaru' dza biti' raca dxi'a queëru'. <sup>17</sup>Biti' gácali' bönni' biti' bi nözguequinè'. Guli'güí' ladxí' tséajni'ili' le rë'ënè' Xanru' gunli'.

<sup>18</sup>Biti' súdxili', tu' gun yöl-la' rizudxi ga nítili' tsaz.  
Guli'güí'ida' lataj inná bé'enè' Dios Bö' Lá'ayi libí'ili'.

<sup>19</sup>Guli'güí'ilen luzá'ali' didza' tuli' ia'tuli',  
ugunli' dxin yugu' le rul-la légaca salmo,  
en yugu' le rul-la yöl-la' ba Dios,  
en yugu' le rul-la nagu'ë Dios Bö' Lá'ayi icja ládxi'do'oru'.  
Idú ládxi'ru' ral-la' gúl-laru' queë',  
le cú'uru'-nè' Dios yöl-la' ba.

<sup>20</sup>Guli'gún dxin Lë' Xanru' Jesucristo,  
en guli'guíëtica'së' Xúziru' Dios: "Xclenu'" ca naca yúgu'të.

*Ca ral-la' gunru' quégaca di'a dza queëru'*

<sup>21</sup>Guli'gún ca rnna xtídzá' luzá'ali' tuli' ia'tuli' para caní gunli'-nè' Dios zxon.

<sup>22</sup>Libí'ili', yugu' nigula, guli'gún ca rnna xtídzá'gaquië' bönni' que queëli', ca na' ral-la' gunli' ca rnna xtídzë'ë Xanru'. <sup>23</sup>Caní ral-la' gunli', tu'

rinná bé'enë' bönni' nigula queë' ca na' runë' Cristo, rinná bé'enë' bönachi queë'. Cristo náquië' ca' Nu rusölá bönachi queë', nupa na' dzágagaca le naca cazë' Lë'. <sup>24</sup> Ca na' tun bönachi queë' Cristo ca rna xtídzë'ë, lësca' caní ral-la' ilunnu nigula ca rna xtídza'gaquië' bönni' que queégacanu ca naca yúgu'të le raca.

<sup>25</sup> Libí'ili', yugu' bönni', ral-la' idxí'ili'-nu nigula que queëli' ca na' Cristo nadxí'inë' bönachi queë', en budödi cuinë', gútië' uláz queégaquië'. <sup>26</sup> Gútië' Cristo para bubéajë' quez queë' Dios bönachi queë' na', ate' nayárigaca tu lu nisa le naca xtídzë'ë. <sup>27</sup> Gútië' uláz queégaquië' para gaca usudxinë' légaquië' lahuë' Dios, nácagaquië' ca tu lari' lachi, biti' nuá' bösaj le në'aj, en biti' naxú'una, en biti' zoa nitú le run ditaj le, pero runë' ga ilácagaquië' idú dxi'a, cuntú nu gaca bi innë' queégaquië'. <sup>28</sup> Ral-la' idxí'ili'-nu nigula que queëli' ca na' nadxí'i cuinli'. Nu bönni' nadxí'inë'-nu nigula queë', nadxí'i cuinë'. <sup>29</sup> Cuntú nu bönni' runi zi' cuinë', pero rugahuë', en run chi'i cuinë', ca runë' ca' Cristo, ca rúnlenë' bönachi queë', <sup>30</sup> nupa dzágagaca idútë le naca cazë'.

¡Rë'u ni dzágaru' le naca cazë' Lë'!

¡Néquiniru' xipëlë'ë, en dxita queë'!

<sup>31</sup> Lësca' caní nazúaj lu guichi lá'ayi le rna: "Que lë ni na' tu bönni' ral-la' ucá'anë' xuz xinë'ë para tsöjsóalenë'-nu nigula queë', ate' irópatë' ulu'huóáquië' tuz." <sup>32</sup> Lë na' nazúaj lu guichi ni ruluí'i lahui tu le naca idútë li, ate' neda' réquida' ruí'i didza' ca' ca naca queë' Cristo, en quegaca bönachi queë' na'. <sup>33</sup> Lësca' ruí'i didza' ca naca queëli'. Yúgu'tëli' libí'ili', bönni', ral-la' idxí'ili'-nu nigula que queëli' ca na' nadxí'i cuinli', ate' yugu' nigula ral-la' ilunnu bal bönni' que queégacanu.

## 6

<sup>1</sup> Libí'ili', yugu' bí'ido', ral-la' gunli' ca rna xtídza'gaquië' xuz xiná'ali' para caní gunli' ca rna xtídzë'ë Xanru'. Ral-la' gunli' le naca tsahui'. <sup>2</sup> Xibá zí'aló na' benë' Dios le nachë' tu le guzxi' lu në'ë gunë', naca lë na' rna: "Ben bal xuz xinó'o, <sup>3</sup> ate' gaca dxi'a quiu', ate' xidzé su' ibanu' yödzölió ni."

<sup>4</sup> Libí'ili', yugu' xuz, biti' gun leli' xzí'inili', pero buli'xón légacabi', en guli'sína' légacabi', en buli'sëdi légacabi' ca raza lãdxë'ë Xanru'.

<sup>5</sup> Libí'ili', núlöli' nácali' bönni' nadó'ogaca, guli'gún ca rna xtídza'gaquië' xanli' luyú ni idú lãdxi'li', gunli' légaquië' bal lu yöl-la' radxi queëli', en gunli' xichíngaquië' ca ral-la' gunli' xichinë' Cristo. <sup>6</sup> Guli'gún xichíngaquië', calégasö cate' ni' tu'yúë' libí'ili' para urúajli' dxi'a lógaquië', pero idú lãdxi'li' guli'gún xichíngaquië' ca raza lãdxë'ë Dios, ca na' ral-la' gunli' xichinë' Cristo. <sup>7</sup> Idú lãdxi'li' guli'gún xichíngaquië', ate' caní gaca, gunli' xichinë' Xanru', en calégasö xichíngaca bönachi. <sup>8</sup> Nöz quezili' ca gunë' Xanru'. Ubi'ë que queëru' tsa naca le dxi'a runru' sal-la' nadzanru', o sal-la' nácaru' bönni' nadó'ogaquië'.

<sup>9</sup> Libí'ili', nacuá' queëli' bönni' nadó'ogaca, guli'gún dxi'a caní quegaca huen dxin queëli' na', en biti' uzéli' ba nadx légaquië'. Guli'tsöjné ca naca queëli', yú'uli' lu në'ë Xanru' zoë' yehua' yubá la' ca nácatë queégaquië', ate' Lë' biti' rutsë'ë ca runë' que que bönachi.

*Dios runnë' queëru' le tun chi'i rë'u*

<sup>10</sup> Na'a, böchi' luzá'ado', guli'gaca tsutsu tu' nácali' tuz len Xanru', en zóalen libí'ili' yöl-la' huáca zxön queë'. <sup>11</sup> Guli'gún chi'i cuinli', ugunli' dxin

yugu' le runnë' Dios queëru', le tun chi'i rë'u, para gaca sóali' tsutsu cate' guë'ëni si' bë' tu' xihui' libí'ili'. <sup>12</sup> Biti' ridíl-lalenru' bönachi néquiguequini bëla', en dxita, pero ridíl-lalenru' yöl-la' unná bë' quégaca bö' xihui' ta'dá lu bö'ös, en dzágagaca nupa ta'nná bë', en nupa nadéli'gaca yöl-la' unná bë', en nupa dë lu ná'agaca, nupa nacuá' yödzölió ni ga naca chul-la que dul-la'. <sup>13</sup> Que lë ni na':

Guli'sí' yúgu'të le runnë' queëru' Dios le tun chi'i rë'u,  
para cate' idxín queëru' dza ni' ilaca le nácagaca xihui',  
gaca guá' ilenli',  
en cate' údxi gunli' caní, ugá'anali' tsutsu.

<sup>14</sup> Guli'sóa tsutsu.

Guli'sí' le naca idütë li,  
le gaca queëli' ca tu guídi guga' lë'ëli'.  
Guli'gaca tsahui' tu' gun chi'i libí'ili' le naca tsahui'  
ca run tu lari' yödx run chi'i luchu'ë bönni' rejë' gudil-la.

<sup>15</sup> Guli'sóa sina' para gunli' libán que didza' dxi'a  
le ribequi dxi icja ládxi'do'oru' lahuë' Dios,  
ca na' ruzóa cuinë' sina',  
en ridë'ë xiráchuë' tu bönni' rejë' gudil-la.

<sup>16</sup> Le naca lo, yöl-la' réajlë' queëli' Cristo  
gaca queëli' ca tu le naca tsutsu uzëli' loli',  
para cabí gál-la' yugu' le usán tu' xihui' libí'ili',  
le nácagaca ca yaga túchi'do' zoa guí' láhuilöguequi.

<sup>17</sup> Yöl-la' rusölá gaca queëli' ca tu lu'u guíë le gun chi'i ícjali'.  
Xtídzë'ë Dios gaca queëli' ca tu guíë tuchi'  
le runnë' Dios Bö' Lá'ayi queëru',  
para utíl-lalenru' le naca xihui'.

<sup>18</sup> Guli'gún yúgu'të lë ni,  
en buli'lidzë' Dios inábili'-në' gácalenë' libí'ili'.  
Buli'lidzatica'së' Dios zóalenë' Dios Bö' Lá'ayi libí'ili'.  
Para gunli' caní ral-la' usubán ládxi'li' en cabí huöaj ládxi'li',  
inábili'-në' Dios gácalenë' nupa néquiguequi queë'.

<sup>19</sup> Buli'lidzë' Dios, inábili'-në' gácalenë' ca' neda', en gunnë' quia' didza'  
cate' ral-la' gu'a didza', en gunë' ga gaca' rugu ladxi' cate' guna' libán para  
uzéajni'ida' bönachi ca naca le bigachi' que didza' dxi'a. <sup>20</sup> Dios budödë'  
lu na'a didza' dxi'a na' para guna' libán que, ate' tu' bena' caní yu'a lidxi'  
guíë ni. Buli'lidzë' Dios channö, inábili'-në' gunë' ga gaca' rugu ladxi' para  
guna' libán que didza' dxi'a ca ral-la' guna'.

#### *Ruúdx didza' bë'ë Pablo*

<sup>21</sup> Tíquico, böchi'ru' na' nadxí'iru'-në', en runë' xichinë' Xanru' idú  
ládxë'ë, quíxjöi'inë' libí'ili' idú ca raca quia', en ca runa' neda' ni. <sup>22</sup> Que  
lë ni na', isól-la'a-në' queëli', ate' uluf'inë' libí'ili' ca raca queëtu', ate' caní  
utipë' ládxi'li'.

<sup>23</sup> Rinábida'-në' Xúziru' Dios, enca' Xanru' Jesucristo gunë' ga soa dxi  
icja ládxi'do'oli', en gata' queëli' yöl-la' nadxí'i le dzaga yöl-la' réajlë'  
queëli' Cristo, yúgu'tëli' na' néquili' queë'. <sup>24</sup> Le ruzá' ládxe'ë Dios queëru'  
gaca queëli', yúgu'tëli' na' nadxí'ili'-në' Xanru' Jesucristo, naca idú yöl-la'  
nadxí'i queëli' Lë'. ¡Ca' gaca!

## DIDZA' GUSÖL-LË'Ë PABLO YÖDZÖ FILIPOS

*Pablo rugapë' Dios bönachi queë' Cristo nacua' Filipos*

<sup>1</sup> Neda', Pablo, enca' bi'i Timoteo, nactu' huen dxin queë' Jesucristo. Rugapa' Dios libí'ili', réajlë'ëli' Cristo, en libí'ili', dë lu ná'ali' xichinë' Cristo, en libí'ili', run chí'ili' bönachi queë' Cristo. Zóali' Filipos, en néquili' queë' Dios, en nácali' tuz len Jesucristo. <sup>2</sup> Rinábida'-në' Xúziru' Dios, enca' Xanru' Jesucristo gunnë' queëli' le ruzá' ládxë'ë queëru', en gunë' ga soa dxi icja ládxí'do'oli'.

*Pablo rinábinë' Dios bi gunë' quegaca bönachi ta'yéajlë' Cristo*

<sup>3</sup> Rea'-në' Dios: "Xclenu'", cate' rizá' ládxa'a queëli'. <sup>4</sup> Cate' rulidza'-në' Dios, en rinábida'-në' gácalenë' libí'ili', rudzeja ládxa'a <sup>5</sup> tu' røjneda' ca bénlenli' neda' tsözxön dxin que didza' dxi'a. Gusí loli' runli' dxin na' dza ni' si' biyönili', en runli' le ga ridxintë na'a dza. <sup>6</sup> Dios gusí lahuë' runë' tu le naca dxi'a lu icja ládxí'do'oli'. Ruzxöni ládxa'a Lë' gúntica'së' caní ga idxintë dza huödë' Jesucristo. <sup>7</sup> Ca na' rizá' ládxa'a queëli' naca ca ral-la' guna' tu' nadxí'ide'eda' libí'ili'. Yúgu'tëli' ruzí'ili' xibë tsözxön len neda' le ruzá' ládxë'ë Dios queëru', tsanni ni yu'a lidxi guié, en lësca' caní benli' cate' ni' bë'a didza', cate' na' bena' libán que didza' dxi'a le bena' ga bidxín queëli' tsaz. <sup>8</sup> Nözinë' Dios ca nadxí'ide'eda' libí'ili'. Naca ca na' nadxí'ide'enë' Lë cazë' Jesucristo rë'u. <sup>9</sup> Rinábida'-në' Dios gunë' ga idxí'iröli' luzá'ali', en gáta'da' queëli' yöl-la' rácada', en yöl-la' réajni'i idú <sup>10</sup> para gaca cöli' le nácatë'rö dxi'a. Channö gaca caní queëli', gácali' idú dxi'a, ate' cuntu nu gaca bi innë queëli' dza ni' huödë' Cristo. <sup>11</sup> Le nácali' naca bë' le naca dxi'a runë' Cristo lu icja ládxí'do'oli' para ilá' lahui yöl-la' zxon queë' Dios, en gaca queë' yöl-la' ba.

*Zóaru' nabanru' para gácaru' ca náquië' Cristo*

<sup>12</sup> Böchi' luzá'ado', ré'ënda' inözili' lë ni: Yúgu'të le guca quia' gulácalen neda' para guzxéqui'röda' bena' libán que didza' dxi'a. <sup>13</sup> Caní guca, yúgu'të ni'a náagaquië' bönni' yúlahui', en ia'zica'rë' bönni' ni nözguequinë' yu'a lidxi guié ni tu' runa' xichinë' Cristo. <sup>14</sup> Tu' yu'a neda' lidxi guié ni ben ga látu'biqui' yúgu'të böchi'ru' nácagacarë' rugu ladxi', ate' tu' zxoní ládxí'gaquië' Xanru', en biti'rö tádxinë' tunë' libán que xtídzë'ë Dios.

<sup>15</sup> Le nácatë bal-lë' tunë' libán queë' Cristo tu' tu'zxé'enë' neda', en ta'dil-lë', pero ia' bal-lë' tunë' libán queë' idú ládxí'gaquië'. <sup>16</sup> Yugu' bönni' tu'zxé'enë' na' tunë' libán queë' Cristo lu yöl-la' run ba zxon cuíngaquië', en calëga idú ládxí'gaquië'. Të'ënnë' ulu'saca' zi'ë neda' tsanni ni yu'a lidxi guié. <sup>17</sup> Yugu' bönni' idú ládxí'gaquië' na', lu yöl-la' nadxí'i quegaquië' tunë' libán queë', tu' nözguequinë' Dios caz budödë' lu na'a dxin runa', runa' libán que didza' dxi'a. <sup>18</sup> Biti' run lë na' ga rö'a böniga. Rudzëjad' tu' raca libán queë' Cristo nácati'tës, sal-la' tunë' libán idú ládxí'gaquië' o bití' tunë' le caní.

Na'a, rudzëjaröda' <sup>19</sup> tu' chinözida' ulá' lu le raca quia', yu'a lidxi guié ni, tu' rulídzali'-në' Dios, en tu' rácalenë' Dios Bö' Lá'ayi neda'. Náquië' Bö' risöl-lë'ë Jesucristo queëru'. <sup>20</sup> Caní ré'ënda', en ruzxöni ládxa'a-në' Dios, gunë' ga bití' utuí'ida', en gunë' ga gaca gu'a didza' lu yöl-la' rugu ladxi',

ate' lu na'a neda' gácatíca'sö yöl-la' ba queë' Cristo na'a dza, en yugu' dza zá'gaca, sal-la' gun bayudxi gátitea', o soa' ibana'. <sup>21</sup> Ca runi neda', channö zoa' nabana', naca para gaca' ca náquië' Cristo, en channö gátia', naca tu le uzí'ira' xibé. <sup>22</sup> Channö huáca guna' dxin le gácalen didza' dxi'a queë' Cristo channö sóasa' ibana', bití' nözda' bízxi'lo ral-la' cõa'. <sup>23</sup> Naca bõniga cõa'. Rë'enda' gátitea' para tsõjsóalentea'-në' Cristo, tu' gátatërö dxi'a quí'a', <sup>24</sup> pero runrö bayudxi sóasa' ibana' para séqui'da' gácalena' libí'ili'. <sup>25</sup> Tu' chinözida' naca caní, nözda' ca' ugá'analena' libí'ili' para gácalena' libí'ili' para gácarö idú ca réajlë'ëli' Cristo, ate' udzëjaröli' tu' réajlë'ëli' Lë'. <sup>26</sup> Caní naca, udusóalena' libí'ili' leyúbölö, le gun ga tsaz ládxi'li'-në' Jesucristo ni'a que le gunë', gácalenë' neda'.

<sup>27</sup> Guli'güi'sö ladxi' gácali' ca sa'yéaj didza' dxi'a queë' Cristo. Caní gaca, channö uduyúa' libí'ili' o channö soa' zi'tu', huayónida' nácali' tsutsu, en nácali' tuz, runli' tsözxõn dxin que le réajlë'ëru' le za' queëru' ni'a que didza' dxi'a. <sup>28</sup> Bití' güi'ili' nupa bití' ta'lé'e libí'ili' dxi'a lataj ilún gadxi libí'ili'. Lë ni ulufí'légaquië' ila'nítie', pero uláli' libí'ili', le gaca bë' rácalenë' Dios caz libí'ili'. <sup>29</sup> Dios ru'ë libí'ili' lataj gunli' xichinë' Cristo, calégasö ca réajlë'ëli' Lë', pero lësca' ca riguí' rizáca'li' cate' runli' xichinë'. <sup>30</sup> Na'a, gaca gunli' neda' tsözxõn güi' ládxi'ru' gunru' libán que didza' dxi'a. Bilé' quézili' ca gudí' guzácá'a cate' bena' caní zí'alö, ate' riyónili' ca riguí' rizáca'a ca' na'a.

## 2

*Gúquië' Cristo nõxaj ladxi', ate' bidéli'në' yöl-la' zxõn*

<sup>1</sup> Cristo runë' ga rutipa ládxi'li',  
 en lu yöl-la' nadxí'i queë' ruhuéchi' ládxi'ë libí'ili',  
 en runë' ga nácali' tuz len Dios Bö' Lá'ayi,  
 en ga nadxí'ili' luzá'ali',  
 en ga ruhuéchi' ládxi'li' luzá'ali' tuli' ia'tuli'.

<sup>2</sup> Na'a guli'gün ga udzëjarö ládxa'a. Para gunli' caní, ral-la' gácali' tuz len luzá'ali', en gaca lëbisö ca nadxí'ili' luzá'ali' tuli' ia'tuli'. Lësca' caní ral-la' gácali' tuz lu bö' naca cázali', en ca rizá' ládxi'li'. <sup>3</sup> Ca naca le runli', bití' bi ral-la' gunli' lu yöl-la' rudul-li' queëli', o para gun ba zxõn cuinli', pero dxí'ado' ral-la' gunli' yúgu'të, en cabí guéquili' nadéli'röli' libí'ili' ca luzá'ali'. <sup>4</sup> Guli'güi' ladxi' gaca dxi'a ca' que luzá'ali', en calëga queézili'.

<sup>5</sup> Ral-la' gácali' nõxaj ladxi' ca na' gúquië' Jesucristo nõxaj ladxi'. <sup>6</sup> Lë' naca cazë' lëbisö ca náquië' Dios caz, pero bití' gúquinë' ral-la' gunë' bayudxi ugá'anë' lëbisö ca na' náquië' Dios. <sup>7</sup> Bucá'ana cazë' yúgu'të le napë', en ben cuinë' ca tu bõnni' nadó'o. Guljë' ca talaj bõnachi, en gúquië' idú bõnachi. <sup>8</sup> Cate' ni' náquië' bõnni', gúquië' nõxaj ladxi', en benë' ca rnna xtídzë'ë Dios, en gútië'. Gudë'ë lë'e yaga cruz ca na' raca queë' nu bõnni' nabáguë'ë dul-la'. <sup>9</sup> Que lë ni na' Dios buchisë' Lë', en benë' ga náquië' lo ni' yehua' yubá, en benë' ga lë' tu le nácatërö lo ca yúgu'të lágaca bõnachi. <sup>10</sup> Caní benë' Dios para cate' ila'yõni ca na' lë' Jesús, ulu'zachu zxíbigaca yúgu'të nupa nacuá' yehua' yubá, en lu yödzülió, en lu lataj chulla. <sup>11</sup> Yúgu'të' ila'guixjõ'ë yálajdo' Jesucristo náquië' Xanru' para gaca yöl-la' ba queë' Xúziru' Dios.

*Ral-la' gácaru' ca tu le ta'gú'u bení' yödzülió ni*



<sup>12</sup> Que lè ni na', böchi' luzá'ado', ca na' benli' ca rnna xtídza'a cate' ni' zóalena' libí'ili', runrö bayudxi gunli' ca rnna xtídza'a na'a, tsanni ni zoa' zi'tu' ga zóali'. Guli'gún xichinë' Xanru' ga idxintè dza údxi usölè' libí'ili'. Guli'gún caní lu yöl-la' radxi queéli' Lè', en lu yöl-la' rizzizi. <sup>13</sup> Lè cazè' Dios runè' dxin lu icja ládxi'do'oli'. Runè' ga rë'ënili' gunli' le raza ládxe'ë Lè', en runè' ca' ga séqui'li' gunli' lè na'.

<sup>14</sup> Guli'gún yúgu'tè le ral-la' gunli', en biti' bi innèli' que, en biti' til-la dídza'li'. <sup>15</sup> Caní ral-la' gunli', para cabí gaca nu bi innè queéli', pero caní gácali' ca zxi'ini cazè' Dios, nácali' idú dxi'a yödzölió ga ni zóali' ladaj bönachi biti' nácgaca tsahui', en nucá'anagaca Dios. Libí'ili' rigú'uli' bení' ládjagaquiè' ca na' ta'gú'u bení' bôlaj lúzxiiba cate' ni naca chul-la, <sup>16</sup> cate' ruí'ili' lógaquiè' didza' ibániguequinè'. Channö caní gunli', huáca udzèjade'eda' ni'a que le naca cázali' dza huödè' Cristo, tu' inözda' biti' guca nítisö guzóa bönadxi gátia', en calèga nítisö bena' dxin. <sup>17</sup> Yöl-la' réajlè' queéli' Cristo naca tu le raza ládxe'ë Dios. Sal-la' gun bayudxi gátia' para gaca idú yöl-la' réajlè' queéli' Lè', udzèjada', en uzí'lèna' xibé tsözxón yúgu'tèli'. <sup>18</sup> Lèasca' caní ral-la' udzèjali' libí'ili', en uzí'lènlí' tsözxón neda' xibé.

#### *Ca tunbi' bi'i Timoteo, en bi'i Epafrodito*

<sup>19</sup> Channö caní rë'ënè' Xanru' Jesús, runa' löza isöl-la'tea'-bi' bi'i Timoteo ga zóali', ate' nírö udzèjada' cate' huödabi' ududíxjöi'ibi' neda' catèze raza queéli'. <sup>20</sup> Túzibi' lèbi' rizá' ládxi'bi' ca na' rizá' ládxa'a neda', en ruí'ida' ládxi'bi' libí'ili'. <sup>21</sup> Yúgu'tè bönni' ia'zica'rö, le naca quégacasè' tuí' ládxi'gaquiè'. Biti' tuí' ládxi'gaquiè' xichinë' Cristo. <sup>22</sup> Nöz quézili' ca benbi' bi'i Timoteo, ca na' burúajbi' dxi'a. Bénlenbi' neda' tsözxón dxin que didza' dxi'a, ate' nácabi' quia' ca tubi' bi'i bönni' rúnlenbi'-nè' tsözxón xúzibi' dxin. <sup>23</sup> Isól-la'a-bi' bi'i Timoteo ga zóali' cate' inözda' nacxi gaca quia' ni <sup>24</sup> sal-la' ruzxóni ládxa'a-nè' Xanru' gunè' ga uduyútea' libí'ili'.

<sup>25</sup> Lèasca' réquida' run bayudxi isöl-la'a-bi' bí'i böchi'ru' Epafrodito ga zóali'. Bi'i ni bénlenbi' neda' tsözxón dxin queè' Cristo, ate' gudíl-lalentu' tu' xihui'. Libí'i cázali' gusöl-la'li'-bi' ga zoa' para gácalenbi' neda'. <sup>26</sup> Lè cázabi' rë'ënibi' uduyúbi' libí'ili', en ruí'ida' ládxi'bi' libí'ili' tu' biyönili' ben bayá' queèbi'. <sup>27</sup> Le nácatè gü'ibi', en guqui gátibi', pero buéchi' ládxe'ë-bi' Dios, en calégasö lèbi', pero buéchi' ládxe'ë ca' neda', para cabí isèbirö ládxa'a ca na' risèbi ládxa'a na'a. <sup>28</sup> Que lè ni na', gú'uniröda' isöl-la'a-bi' queéli' para gaca udzèjali' leyúbölö cate' ulé'eli'-bi', en bítirö isèbi ládxa'a neda'. <sup>29</sup> Guli'sí' lu ná'ali' lèbi' lu yöl-la' rudzeja queéli', tu' nácabi' bi'i böchi'ru' réajlè'èbi' Cristo. Guli'gún bal yúgu'tè bönachi nácgaca ca nácabi' lèbi', <sup>30</sup> tu' guzóa bönadxi queèbi' gátibi' tu' benbi' xichinë' Cristo, en tu' gúcalenbi' neda' uláz queéli'.

### 3

#### *Le naca idú tsahui'*

<sup>1</sup> ¡Na'a, böchi' luzá'ado', buli'dzeja tu' nácali' tuz len Xanru'! Biti' rupizxaj neda' uzúaja' queéli' leyúbölö lè na' buzúaja' queéli' zí'alö, tu' gácalen lè ni libí'ili'. <sup>2</sup> Guli'gún chí'i cuinli' lógaca nupa ni' tuá' dö'. Nácgaca ca yugu' bö'cu' sinya', nupa na' tun bayudxi irugu lu xipèla'gaquiè' bönni' le naca bè' nazí' lu ná'gaquiè' xtídzè'ë Dios. <sup>3</sup> Rë'u nadéli'ru' lè na' naca idútè li, le naca bè' nazí' lu ná'aru' le runnè' queèru' Dios. Tu' réajlè'èru' Dios, zóalenè' Dios Bö' Lá'ayi rë'u, ate' rudzèjaru' tu' nácaru' tuz

len Jesucristo. Biti' ca' ruzxöni ládxi'ru' tu le runru' rácasö queëru'. <sup>4</sup>La'tu' ruzxöni ládxi'ru' lè ni, lèsc'a' neda' chinadéli'da' bi uzzöni ládxa'a. Channö zoë' nu bönni' réquinë' ulé' tu' nacuá' le nuné', neda' nadéli'röda' ca bönni' na':

<sup>5</sup>Gurugu lu xipéla'a lè na' naca bē' cate' ni' gúquida' xunu' dza.

Gulja' ladaj di'a dza quégaca bönachi Israel.

Nababa' xzi'ini xi'sóë' Benjamín.

Xuz xiná'a nácaquië' idú bönachi hebreo.

Guca' bönni' yudo' fariseo ca na' bena' ca rinná bē' xibá queë' Dios.

<sup>6</sup>Bē'da' ládxa'a xibá na' ga bidxintē gudxía ládxa'a bönachi queë' Cristo.

Tsca gaca gáquië' tsahui' tu bönni' tu' runé' ca rinná bē' xibá na', cuntu nu bi guca inné' quia'.

<sup>7</sup>Na'a, yúgu'tè lè na' bena' zxön zí'alö, nuzóa' tsölá'alö tu' néquida' queë' Cristo. <sup>8</sup>Calégasö yugu' lè na', pero nuzóa' ca' tsölá'alö yúgu'tè le dē, para gaca gúnbe'eda'-nē Xanru' Jesucristo, le nácatērö lesaca' ca yúgu'tè lè na'. Para gúnbe'eda' Lē gurú'una' ní'lö yúgu'tè, en réquida' naca ca bēbu, para uzi'a xibē' Cristo, <sup>9</sup>en para gaca' tuz len Lē'. Nuhuóaca' tsahui', calēga tu' runa' ca rinná bē' xibá na', pero Dios caz bunē' neda' tsahui' tu' réajlē'a Cristo, ca na' ruúnē' tsahui' yúgu'tè nupa ta'yéajlē' Lē'. <sup>10</sup>Rē'ēnisida' gúnbē'a-nē' Cristo, en sóalen yöl-la' huáca queë' Dios neda', lè na' busubán Cristo lu yöl-la' guti, ate' guna' Lē' tsözxön, qui' i saca'a ca na' gudí' i guzjáquē'è Lē', en soa' sina' gátia' ca gútiē' Lē', <sup>11</sup>tu' runa' löza Dios, usubanē' ca' neda' lu yöl-la' guti.

*Le runru' para idxinru' xilátjaru'*

<sup>12</sup>Biti' rnnía' chinadéli'da' yúgu'tè lè ni gunnē' quia', en bití' réquida' chinaca' idú tsahui'. Na'a, runa' bayudxi idéli'da' yúgu'tè lè na', tu' chibidéli'nē' Jesucristo neda'. <sup>13</sup>Böchi' luzá'ado', bití' ca' nadéli'da' yugu' lè ni, pero tuz le runa' bayudxi. Ruzál-la ládxa'a le chibidéli'da', ate' runa' bayudxi idéli'da' le za'. <sup>14</sup>Runa' ca runé' tu bönni' rixíti'dē'è para idxinē' xilatjē' para idéli'nē' tu le uzi'è xibé. Caní runa' para idéli'da' lè na' bulidzē' Dios rē'u para gata' queëru' ni' yehua' yubá tu' nácaru' tuz len Jesucristo.

<sup>15</sup>Caní ral-la' gunru' yúgu'tēru' rē'u, naca idú ca réajlē'ēru' Cristo. Channö réquili' bál-lali' ral-la' gunlí' tu le yúbölö, rinábida'-nē' Dios uzéajni'inē' libí'ili'. <sup>16</sup>Na'a, ca naca lè na' bidéli'ru', ral-la' gúntica'siru' caní.

<sup>17</sup>Böchi' luzá'ado', guli'gún ca na' runa' neda'. Chibuluf'itu' libí'ili' ca ral-la' gunlí'. Buli'yú ca tun nupa na' tun ca na' bentu' netu'. <sup>18</sup>Chigudxi caza' libí'ili' zían luzuí, ate' rea' libí'ili' leyúbölö len yöl-la' ribödxi quia', rnnía': Le tunē' zían bönni' run ga nácaquië' ca nupa bití' ta'lé'e Cristo dxi'a, tu' tu'zöé' tsölá'alö le ben cazē' Lē' lē'e yaga cruz. <sup>19</sup>Yugu' bönni' tunē' caní, tsöjácië' lu guí' gabila, tu' naca le ta'zēsö ládxi'gaquië' dios quégaquië', ate' tun ba zxön cúngaquië' ní'a que lè na' ral-la' gun ga ulu'tuí'inē'. Tuí'íládxi'sè le dē yödžölió ni, <sup>20</sup>pero rē'u ni ruí'íládxi'ru' le dē yehua' yubá ga nabábaru', en ribözaru' dza huödē' Xanru' Jesucristo, Nu rusölá rē'u, urúajē' yehua' yubá na'. <sup>21</sup>Lē' utsé'è idútē le naca cázaru', le rinití caz, en gunē' ga huóaca ca naca idútē le naca cazē' Lē', le sóatica'sö. Caní gunē' len yöl-la' huáca zxön queë' le ugunē' dxin para inná bé'enē' yúgu'tè.

## 4

*Ral-la' udzéjalentica'siru'-në' Xanru'*

<sup>1</sup> Que lë ni na', böchi' luzá'ado', guli'gaca tsutsu ca réajlë'ëli'-në' Xanru'. Nadxi'ide'eda' libí'ili', en rë'ënda' uduyúa' libí'ili'. Runli' ga rudzējada', en nácali' ca tu le ruzi'a xibé.

<sup>2</sup> Libí'ili', Evodia, en Síntique, ráta'yua' loli' gácali' tuz ca ral-la' ilaca nupa néquiquequi queë' Xanru'. <sup>3</sup> Na'a, böcha'a idú, rë'ënda' gácalenu' irópanu ni, tu' gulúnlennu neda' dxin, cate' bentu' libán que didza' dxi'a. Lësca' bulu'dzáguië' Clemente, en ia'zíca'rë' luzá'a na' netu'. Chinazúajgaca lágaquië' yehua' yubá ga na' nazúajgaca lágaca nupa chinadéli'gaca yöl-la' na'bán idú.

<sup>4</sup> ¡Buli'dzéjalentica'sö-në' Xanru'!

Leyúbölö, rnnía': ¡Buli'dzeja!

<sup>5</sup> ¡Guli'gaca dxi'i ladxi' len yúgu'të bönachi!

¡Chizóa huödë' Xanru'!

<sup>6</sup> Biti' ubi uguí'ili', pero guli'nabi-në' Dios le riquínili', en guli'guíë': "Xclenu" ca naca yúgu'të lë na' rinábali'. <sup>7</sup> Dios gunë' ga gaca queëli' le cuéqui dxi icja ládxi'do'oli', lë na' nadödirö bë' ca le gaca ila'yéajni'i bönachi. Lë na' ribequi dxi icja ládxi'do'oru' gun chi' icja ládxi'do'oli', en le rizá' ládxi'li' tu' nácali' tuz len Jesucristo.

*Ral-la' sa' ládxi'ru' le náca'gaca dxi'a*

<sup>8</sup> Ga ruúdxitë, böchi' luzá'ado', guli'sá' ládxi'li':

Yúgu'të le naca dxi'a, en le naca bica' ba,

en le naca idütë li, en le naca idú,

en le naca tsahui', en le naca ba'a,

en le naca lachi, en le ral-la' gunru' bal.

<sup>9</sup> Guli'gún ca na' busédida' libí'ili', lë na' guxzí' lu ná'ali' tsca na' bë'lëna' libí'ili' didza', en tsca na' bena' ga ni' zóali'. Dios, Nu runna queëru' le ribequi dxi icja ládxi'do'oru' sóalenë' libí'ili'.

*Le tsahui' gulunë' yugu' bönni' Filipos queë' Pablo*

<sup>10</sup> Rudzējalenda'-në' Xanru' tu' ruí' ládxi'li' neda' leyúbölö. Biti' rnnía' gul-la ládxi'li' neda', pero biti' guta' queëli' lataj gácalenli' neda' zí'alö.

<sup>11</sup> Lësca' caní, bití' rnnía' caní tu' zoa bi riyadzaj quia', tu' nazëda' tsaza ládxa'a le dësö quia'. <sup>12</sup> Chigudöda' lu yöl-la' yechi', en lu yöl-la' tsahui'. Nazëda' soa' nácati'tës, sal-la' nöljada' o nabila riduna', en sal-la' dëda' quia' o zoa bi riyadzaj quia'. <sup>13</sup> Yúgu'të huazéqui'da' tu' rutipë' Cristo ládxa'a. <sup>14</sup> Benli' dxi'a cate' ni' gúcalenli' neda', en butípalí' ládxa'a cate' gudí' guxzáca'a.

<sup>15</sup> Libí'ili', bönni' Filipos, nöz quézili' ca guca quia' dza ni' cate' buzá'a luyú Macedonia, para yöjena' libán que didza' dxi'a. Tsca nacua' bönachi queë' Cristo, cünturö nu gúcalen neda', pero libí'sili' gúcalenli' neda'. Gusöl-la'li' quia' bi bunödzjali', tu' guxzí' lu ná'ali' libán bena' neda'.

<sup>16</sup> Tsanni ni' guzóa' yödzö Tesalónica, tu' chopa luzuí' gusöl-la'li' quia' le bunödzjali' cate' ni' biyadzaj quia'. <sup>17</sup> Biti' ruí' ládxa'a bi si'a, pero rë'ënda' gáta'rö queëli' le uzí'ili' xibé yehua' yubá. <sup>18</sup> Rea' libí'ili': Chiguzxi'a yúgu'të lë na' gusöl-la'li' quia', atë' gudödítë bë' tsca le biyádzjada'. Ben ga naca caní lë na' gusöl-la'li' lu ná'abi' bi'i Epafrodito. Lë na' bunödzjali' naca ca tu le rilá' zxixi le ridxintë lahuë' Dios, en ca tu le rigú'uru' lahuë' Dios le raza ládxe'ë. <sup>19</sup> Dios gunnë' queëli' yúgu'të le riyadzaj queëli',

tsca naca yöl-la' tsahui' rö'ö yehua' yubá, tu' nácali' tuz len Jesucristo.  
<sup>20</sup> ¡Gácatíca'sö queë' Xúziru' Dios yöl-la' ba! ¡Ca' gaca!

*Yugu' bönachi queë' Cristo tu'gapa Dios luz'ë'eguequi*

<sup>21</sup> Uláz quia' neda', guli'gapa Dios nupa ni' néquiguequi queë' Dios tu' nácatíca tuz len Jesucristo. Tu'gapë' Dios libí'ili' böchi' luzá'aru' núnqaquie' neda' tsözxón ni. <sup>22</sup> Lësca' yúgu'të nupa ni néquiguequi queë' Dios, tu'gapa Dios libí'ili', en lësca' caní, yugu' bönni' huen dxin nacu'ë lidxë' bönni' rinná bë'ë idú luyú Roma tu'gapë' Dios libí'ili'.

<sup>23</sup> Rinábida'-në' Xanru' Jesucristo uzá' ládxe'ë queéli' yúgu'tëli'. ¡Ca' gaca!

## DIDZA' GUSÖL-LË'Ë PABLO YÖDZÖ COLOSAS

*Pablo rugapë' Dios bönachi queë' Cristo nacu'ë Colosas*

<sup>1</sup> Neda', Pablo, naca' gubáz queë' Jesucristo tu' rë'ënë' Dios caní, ate' dzágabi' bi'i böchi'ru' Timoteo neda'. <sup>2</sup> Rugapa' Dios libí'ili', zóali' Colosas. Nácali' böchi'tu' réajlë'ëli' Cristo, en nácali' quez queë' Dios. Rinábida'-në' Xúziru' Dios uzá' ládxe'ë queëli', en gunë' ga soa dxi icja ládxi'do'oli'.

*Pablo rulidzë' Dios, en rë' Lë': "Xclenu'"*

<sup>3</sup> Rética'stu'-në' Dios, Xuzë' Xanru' Jesucristo: "Xclenu'" cate' rulidztu'-në' Dios, en rinábitu'-në' bi gunë' queëli' <sup>4</sup> tu' biyönitu' didza' ca réajlë'ëli' Jesucristo, en ca nadxí'ili' yúgu'të nupa néquiguequi quez queë' Dios. <sup>5</sup> Caní runli' tu' runli' löza le nuzóë' Xanru' queëli' ni' yehua' yubá, lë na' biyönili' que cate' bë'lentu' libí'ili' didza', le naca löza sí'ili' ni'a que didza' dxi'a. <sup>6</sup> Didza' dxi'a na' bidxín queëli' ca ridxín ca' idútë yödzülió. Run dxin, en raca libán que, idútë yödzülió, la' tuz ca raca ga zóali', dza ni'te ga ridxintë na'a dza, cate' ni' biyönili', en bénbë'ëli' idútë le ruzá' ládxe'ë queëru' Dios. <sup>7</sup> Epafras, bönni' nadxí'iru'-në', busédinë' libí'ili' lë ni. Lë' rúnlenë' netu' tsözxön dxin, en rácalenë' libí'ili'. Náquië' huen dxin idú queë' Cristo. <sup>8</sup> Bönni' ni gudíxjöi'inë' netu' ca nadxí'ili' luzá'ali', ate' runë' Dios Bö' Lá'ayi ga gaca gunli' caní.

<sup>9</sup> Que lë ni na' netu' ca', dza ni'te ga ridxintë na'a dza, tu' réquibe'etu' lë ni, bití' ca' rizóa dxitu' rulidztu'-në' Dios, en rinábitu'-në' gácalenë' libí'ili', en gunë' ga gúnbë'ëli' idú le rë'ëni queézinë' Lë', en gunnë' queëli' yúgu'të yöl-la' rácada', en yöl-la' réajni'i le rigü'ë Dios Bö' Lá'ayi rë'u. <sup>10</sup> Caní rinábitu'-në' para gaca gunli' ca ral-la' ilún nupa néquiguequi queë' Xanru', gunli' yúgu'të le raza ládxe'ë Lë', en séqui'li' gunli' yúgu'të le naca dxi'a, en gácarö idú ca núnbë'ëli'-në' Dios. <sup>11</sup> Rinábitu'-në' utipë' ládxi'li', en gunnë' queëli' yöl-la' huáca idú queë', para gaca guá' ilenli' yúgu'të, en cózali' zxön ladxi', en udzeja ládxi'li'. <sup>12</sup> Lu yöl-la' rudzeja queëli' guli'guié' Dios Xuz: "Xclenu'", tu' budödë' lu ná'aru' gata' queëru' lataj lu bení' queë', en gunru' tsözxön nupa néquiguequi quez queë'. <sup>13</sup> Dios Xuz na' busölë' rë'u lu na' nu rinná bë' lataj chul-la, en budödë' rë'u ga na' rinná bë'ë Zxí'ini cazë', Nu nadxí'inë'. <sup>14</sup> Zxí'inë' na' böá'uë' rë'u, tu' gútië' uláz queëru', ate' buniti lahuë' rë'u ca naca dul-la' gubágaru'.

*Nuhuóácaru' tuz len Dios tu' gútië' Cristo uláz queëru'*

<sup>15</sup> Cristo náquië' tuz ca náquië' Dios caz, Nu bití' gaca ilé'eru'. Zoa cazë' Lë' zí'atëlö ca yúgu'të le benë' Dios. <sup>16</sup> Lu në'ë Cristo benë' Dios yúgu'të le dë, le nacua' lúzxiba, en le nacua' luyú, yugu' le rilé'eru', en yugu' le cabí gaca ilé'eru', lë na' náca gaca lataj lo, en yugu' yöl-la' unná bë', en le nápagaca yöl-la' zxön, en yugu' yöl-la' huáca que yehua' yubá, en que luyú ni. Yúgu'të benë' Dios lu në'ë Cristo para uzi'ë xibë Lë'. <sup>17</sup> Cristo zoa cazë' zí'alö ca yúgu'të le dë, ate' yúgu'të nacua'tica'sö ni'a queë' Lë'. <sup>18</sup> Cristo náquië' Xángaca bönachi queë', en runödzejë' queégaquië' yöl-la' na'bán. Náquië' ca' Nu gusi lo bubán tsaz lu yöl-la' guti. Zí'alö Lë' hubanë' tsaz lu yöl-la' guti para tsépisëtëre' ca yúgu'të le dë. <sup>19</sup> Caní guca, tu' guyaza ládxe'ë Dios Xuz sóalen Cristo idútë le naca cazë' Lë'. <sup>20</sup> Ni'a que

le benë' Cristo, Dios benë' ga gaca ulu'huóaca tuz len Lë' yúgu'të le dë, le nacua' luyú, en le nacua' lúzxiba. Bunë' léguequi tuz len Lë' tu' bulaljé' Cristo xichônë' cate' gútië' lë'e yaga cruz.

<sup>21</sup> Libí'ili', zí'atëlö nulá'alenlí'-në' Dios, en gúcali' ca yugu' bönni' biti' ta'lé'enë' Dios dxi'a lu icja ládxi'do'oli' n'a que dö' bíá'ali', pero na'a chibunë' libí'ili' tuz len Lë'. <sup>22</sup> Caní guca, tu' budödi cuinë' Cristo, en gútië' uláz queëli' para gaca usudxinë' libí'ili' lahuë' Dios, nácali' quez queë', en idú dxi'a, ate' cuntú nu bi gaca innë' queëli'. <sup>23</sup> Caní gaca channö ugá'anali' tsutsu ca réajlë'ëli' Cristo. Gácali' ca tu yu'u zxoá ga rë' xilibi zö'ö que, en biti' tseaj bö' ládxi'do'oli' ca runlí' löza didza' dxi'a biyönilí', lë na' raca libán que idútë yödzölió le benë' Dios zxan lúzxiba. Dios buzöë' neda', Pablo, para gaca' huen dxin que didza' dxi'a na'.

*Dxin budödë' Dios lu në'ë Pablo*

<sup>24</sup> Rudzëjada' na'a ca naca le riguí'i rizáca'a para gácalena' libí'ili', en ruúdxí rizá'a lu idútë le naca' le riguí'i rizáca'léna' tsözxön Cristo uláz que idú le naca cazë' Lë', le naca bönachi queë'. <sup>25</sup> Dios benë' ga naca' huen dxin quégaca bönachi queë' Cristo, ate' runa' xichinë' Dios, le budödë' lu na'a guna' para gácalena' libí'ili', quíxjö'a idú ca naca xtídzë'ë Dios. <sup>26</sup> Ruzéajni'ida' bönachi le nagachi', lë na' bigachi' dza ni'te, ate' cuntú nu benbë' le, pero na'a Dios chibuluf'inë' bönachi néquiquequi quez queë' ca naca que. <sup>27</sup> Dios gú'uni quezínë' gunë' ga ilúnbë'e yugu' yöl-la' tsahui' idú que le nagachi' ni, lë na' ta'yöni bönachi izá'a. Caní rruna lë na' bigachi': "Cristo náquië' tuz len libí'ili', en náquië' le naca löza idéli'li' tsazli' lu bení' queë'."

<sup>28</sup> Runtu' libán queë' Cristo, en rusá'atu' ládxi'gaca yúgu'të bönachi, ate' rusëditu' léguequi idútë yöl-la' réajni'i, para gaca usudxintu' yúgu'të bönachi lahuë' Dios, naca idú ládxi'gaca tu' nácacaca tuz len Jesucristo. <sup>29</sup> Para gaca caní runa' dxin, en ruí'i ládxa'a údxi guna' lë ni, rugúna' dxin yöl-la' huáca idú na' runnë' Cristo quia'.

## 2

<sup>1</sup> Rë'ënda' inözili' ruí'ida' ládxa'a runa' le gácalen libí'ili', enca' le gácalen bönachi yödzö Laodicea, en le gácalen ca' yúgu'të nupa biti' ila'lé'eni neda'. <sup>2</sup> Runa' caní para ila'dipa ládxi'gaquië', en iláquië' tuz lu yöl-la' nadxí'i, en ulu'zi'ë xibé yúgu'të yöl-la' tsahui' que yöl-la' run löza idú le runna yöl-la' réajni'i queëru'. Caní raca para ilúnbë'ë le bigachi' queë' Dios Xuz, lë na' naca cazë' Cristo. <sup>3</sup> Lu në'ë Cristo ruzí'iru' xibé yúgu'të yöl-la' tsahui' que yöl-la' rácada', en yöl-la' réajni'i. <sup>4</sup> Lë ni rea' libí'ili', para cabí gaca nu si' ye'e libí'ili', nu güí'i didza' tséajlë'ëru' le cabí nácatë. <sup>5</sup> Sal-la' zoa' zi'tu' ga zóali' lu idútë le naca', lu bö' naca caza' zóalena' libí'ili', en rudzëjada' tu' rilé'eda' rö'ö xibá queëli', en nácali' tsutsu ca réajlë'ëli' Cristo.

<sup>6</sup> Que lë ni na', ca na' guzxí' lu ná'ali' Xanru' Jesucristo, lësca' caní ralla' gunlí' yúgu'të le gunlí', dzáguië' Lë' libí'ili'. <sup>7</sup> Ca na' nun ga rë' luí yaga, enca' ca na' nayás zö'ö lu xilibi zö'ö, guli'sóalen Cristo. Guli'sóa tsutsu ca réajlë'ëli' Lë', ca na' chinazédali'. Guli'guíética'së' Dios: "Xclenu'."

*Le cubi nácaru' tu' dzágaru'-në' Cristo*

<sup>8</sup> Guli'gún chí'i cuinlí' para cabí güí'ili' lataj nu si' ye'e libí'ili', nu ugún dxin yöl-la' réajni'i quégaca bönachi, en yugu' didza' ta'nnasë' nácacaca idútë li, ca naca le ta'lëbi tun bönachi, en ca naca le tu' sedi bönachi le naca que yödzölió ni, en calëga le naca xtídzë'ë Cristo.

<sup>9</sup> Idütë le naca cazë' Dios zóalen Cristo sal-la' böáquië' bönachi, <sup>10</sup> ate' libí'ili' náпали' idütë le náquië' Dios tu' dzágali'-në' Cristo, Nu rinná be'e yúgu'të nupa ta'nná bë', en yugu' bönni' dë lu ná'agaquië'. <sup>11</sup> Narugu lu xipéla'gaquië' bönni' judío le rulu'í dá'gaquië' Dios, pero libí'ili', tu' dzágali' Cristo, zóalen libí'ili' le rulu'í néquili' queë' Dios, le cabí néquini lu ni'a lu ná'agaca bönachi. Yugu' bönni' judío tu'gúë' tu guídido', pero libí'ili', nadúa idütë yöl-la' bönachi queëli' le bënlenli' dul-la'. Caní naca queëli' tu' benli' tsözxön Cristo cate' gútië' lë'e yaga cruz. <sup>12</sup> Cate' bidílalí' nisa guca ca bigáchi'lenli'-në' Cristo tsözxön yeru ba, en bubánlenli'-në' tsözxön tu' guyéajlë'ëli' Dios, len yöl-la' huáca queë' busubanë' Cristo lu yöl-la' guti. <sup>13</sup> Zí'atëlö gúcali' ca nupa chinátigaca tu' nözi dul-la' gubága'li', en biti' guzóalen libí'ili' le rulu'í néquili' queë' Dios, pero na'a Dios nunë' ga nabánlenli'-në' tsözxön Cristo, en buniti lahuë' libí'ili' ca naca yúgu'të dul-la' gubága'li'. <sup>14</sup> Dios busúluë' yugu' le nabága'ru' le nazúajgaca lu xibá queë', lë na' tu'zegui rë'u didza'. Bugúë' lë na' nabága'ru', en budë'ë le lë'e yaga cruz ca tu le nabáguë'ë Cristo. <sup>15</sup> Cate' gútië' Cristo lë'e yaga cruz, bugúë' yöl-la' huáca unná bë' quégaca bö' xihui' unná bë', en quégaca bö' xihui' dë lu në'eguequi yöl-la' huáca, tu' bulu'e lahui le nácgaca bö' xihui' na', en bugúë' idütë le guta' lu në'eguequi.

*Ral-la' güi'í ládxi'ru' le naca que yehua' yubá*

<sup>16</sup> Que lë ni na', biti' güi'ili' lataj nu uzegui libí'ili' didza' ca naca le rë'aj ráguli', o tu' cabí runli' zxön yugu' dza laní, o tu' cabí runli' zxön beo' sí' ruzë, o tu' cabí runli' zxön yugu' dza lá'ayi quégaca bönachi. <sup>17</sup> Yúgu'të lë ni naca ca tu bixín que le ral-la' gaca, ate' le rulu'í yúgu'të lë ni náquië' Cristo caz. <sup>18</sup> Biti' güi'ili' lataj nu gun ga unítíli' le ral-la' sí'ili', nu runda' bayudxi ga ilaca nōxaj ládxi'gaca bönachi, en ilún zxön yugu' gubáz lá'ayi. Tu'gutsa' cuíngaquië' le cabí bila'lé'enë', en tun ba zxön cuíngaquië' ca naca le dzö'ösö ícjagaquië' lu yöl-la' bönáchisö quégaquië'. <sup>19</sup> Nu run caní biti' da' Cristo. Náquië' Xanru', en ruzóë' tsutsu idütë le naca cazë', le nácaru' rë'u. Rugahuë' le, en runë' ga naca tuz ni'a que le zeaj lu dxita lu bin, ate' rixxön idütë le naca cazë' ca rë'ënë' Dios uxönë' le.

<sup>20</sup> Libí'ili' chinátílenli'-në' Cristo para cabirö' ila'nná be'e xibá que yödzülió libí'ili'. ¿Bizx que runli' tsca ni nácali' que yödzülió, en runli' ca ta'nná bë' xibá que? <sup>21</sup> Caní ta'nná yugu' xibá que yödzülió ni:

Biti' quítjanu' lë ni.

Biti' gagu' lë na'.

Biti' canu' ia'tú le dë.

<sup>22</sup> Yúgu'të lë ni ila'niti cate' chibugunru' léguequi dxin. Caní nácgaca le ta'nná bë' bönachi, en yugu' xibá nazí' lu në'eguequi. <sup>23</sup> Le nácatë, yugu' xibá ni, téqui bönachi nápagaca yöl-la' réajni'í. Tun ga tu'lu'í cuínguequi ca bönachi yudo', en ga tu'lu'í cuínguequi nōxaj ladxi', en ga tu'saca' zí'gaca idütë le zeaj naca caz, pero xibá ni biti' ca' tácalen rë'u para gaca inná bé'eru' yugu' le rizë ládxi'ru' lu yöl-la' bönáchisö queëru'.

### 3

<sup>1</sup> Na'a, channö nubánlenli'-në' Cristo, guli'güi' ladxi' le nácgaca que yehua' yubá ga ni rö'ë Cristo cuita lë'ë ibëla Dios, ga náquië' lo. <sup>2</sup> Guli'sá' ladxi' le taca xitsá'aló, en calëga le taca luyú ni. <sup>3</sup> Naca queëli' tsca chinátíli', ate' yöl-la' na'bán queëli' rapa chi'ë Cristo ga ni' zoa cazë' Dios.

<sup>4</sup> Cristo nabánili' libí'ili'. Cate' ulu'í lahuë' Lë', ní'irö ulu'í loli' ca' libí'ili' tsözxön len Lë' lu beni' queë'.

*Yöl-la' na'bán gula, en yöl-la' na'bán cubi*

<sup>5</sup> Que lë ni na', guli'gún ga ila'niti le nacua'len libí'ili' que yödzölió ni: Yugu' le ruá' dö', en le nácagaca xihui', en yugu' le rizë ládxi'li' le ruá' dö', en yugu' le rizë ládxi'li' le naca xihui', en yöl-la' ruhuidi'.

Yöl-la' ruhuidi' naca lëbi ca nu reaj ladxí' budó' guiöj budó' yaga, tu' cabí reaj ladxí' Dios nu ruhuidi'. <sup>6</sup> Tun bönachi yugu' le caní, ate' gunë' Dios xíguia' yúgu'të nupa bití' túngaca ca rnna xtídzë'è. <sup>7</sup> Yugu' dul-la' caní beni' ca' libí'ili' cate' ní' nadödili' lu në'eguequi. <sup>8</sup> Na'a, bíti'rö gunli' yugu' lë ni:

Bíti'rö idzá'ali', en bíti'rö leli'.

Bíti'rö nu gunli' zí', en bíti'rö innë xíhui'li'.

Bíti'rö innali' le ruá' dö'.

<sup>9</sup> Bití' sí' yé'eli' luzá'ali' tuli' ia'tuli' tu' chinucá'anali' le gúcali' zí'alö, en yugu' le beni' zí'alö. <sup>10</sup> Chinácali' bönachi cubi, ate' tu tu dza ricúbili', ruhuóacaröli' ca naca Nu na' bun libí'ili', para gúnbë'ëli' Lë' idú ca náquië' Lë'. <sup>11</sup> Tu' chidzágaru'-në' Cristo:

Bíti'rö nácaru' bönni' zítu', en bönni' judío.

Bíti'rö nácaru' bönni' narugu lu xipëla'gaquië' le naca bë' nu da' Dios, en bönni' bití' narugu lu xipëla'gaquië' lë na' naca bë'.

Bíti'rö nácaru' bönni' ta'yéajni'inë', en bönni' bití' ta'yéajni'inë'.

Bíti'rö nácaru' bönni' nadó'ogaquië', en bönni' bití' nadó'ogaquië'.

Na'a, Cristo náquië' yúgu'të le nácagaca lesaca', en dzáquië' yúgu'tëru'.

<sup>12</sup> Dios nadxí'inë' libí'ili', en guröë' libí'ili' para guéquili' quez queë'. Que lë ni na', ral-la':

Gü'í ládxi'li' luzá'ali', en gácali' dxi'i ladxí',

en nöxaj ladxí', en cuidi' ladxí',

en cözali' zxön ladxí'.

<sup>13</sup> Channö raca didza' bizxaj tuli' len ia'tuli', guli'guá' ilén luzá'ali' tuli' ia'tuli', en buli'niti lo luzá'ali' tuli' ia'tuli' ca na' benë' Cristo, buniti lahuë' libí'ili'. <sup>14</sup> Le nazáca'tërö ca yúgu'të lë ni, ral-la' idxí'ili' yúgu'të bönachi, tu' naca yöl-la' nadxí'i le run ga nácaru' tuz, en ga nácaru' idú. <sup>15</sup> Guli'gü' lataj le ribequi dxi icja ládxi'do'oru' inná bë' lu icja ládxi'do'oli', lë na' runnë' Dios queëru'. Que lë ni na' bulidzë' libí'ili', para gácali' tuz lu idútë le naca cazë' Cristo. Guli'guíë' Dios: "Xclenu'."

<sup>16</sup> Guli'sí' lu ná'ali' xtídzë'è Cristo le gaca queëli' tu yöl-la' tsahui' zxön. Tu' zóalen libí'ili' yöl-la' réajni'i queë' Dios, buli'sedi, en buli'zëjni'i luzá'ali' tuli' ia'tuli'. Idú ládxi'li' guli'gul-la yugu' salmo queë' Dios, en yugu' le rul-la yöl-la' ba, en yugu' le rul-la lá'ayi, ate' guiëli'-në' Dios: "Xclenu'." <sup>17</sup> Yúgu'të le runli', le naca didza' ruí'ili' o le naca dxin runli', guli'gún yúgu'të lu Lë' Xanru' Jesús, en guiëli'-në' Dios Xuz: "Xclenu'", dzáquië' Cristo libí'ili'.

*Le ral-la' gunru' que luzá'aru' tu' néquiru' queë' Cristo*

<sup>18</sup> Libí'ili', nigula nutsaga ná'alenli' bönni' queëli', guli'gún ca rnna xtídzá'gaquië' bönni' que queëli' ca ral-la' gunli', tu' néquili' queë' Xanru'.

<sup>19</sup> Libí'ili', bönni' nutsaga ná'alenli' nigula queëli',



guli'dxi'i nigula que queéli',  
en biti' uzéli' bach légacanu.

<sup>20</sup> Libí'ili', bi'i ra'bán,  
guli'gún ca rnna yúgu'tè xtídza'gaquiè' xuz xiná'ali'.  
Lè ni raza ládxi'è Xanru'.

<sup>21</sup> Libí'ili', núlöli' nácali' xúzgaca bí'ido',  
biti' tódi bè' usína'li' zxf'inili',  
para cabí huóaj ládxi'gacabi'.

<sup>22</sup> Libí'ili', núlöli' nácali' bönni' nadó'ogaquiè',  
guli'gún ca rnna yúgu'tè xtídza'gaquiè' xanli' luyú ni.  
Calégasö gunli' caní cate' tu'yúé' libí'ili'  
ca na' tun nupa té'èni ilún ga ila'yaza ládxi'gaca bönachi,  
pero idú ládxi'li' guli'gún xichíngaquiè'  
ca ral-la' ilún nupa tadxi Dios.

<sup>23</sup> Ca naca yúgu'tè le runli', guli'gún idú ládxi'li',  
gaca ca runli' xichinè' Xanru',  
en calégasö ca runli' xichíngaca bönachi.

<sup>24</sup> Chinöz quézili' ubi'è Xanru' queéli',  
gunnè' queéli' le chinupé'è Dios quégaca nupa nácgaca zxf'ini cazè'.  
Caní gaca, tu' runli' xichinè' Xanru' Jesucristo.

<sup>25</sup> Nu ruá' dö, ubi'è Xanru' que nu na' ca naca dö' ruá' nu na', tu' cabí  
utsè'è Dios ca ral-la' ubi'è que queégaca bönachi.

#### 4

<sup>1</sup> Libí'ili', núlöli' nácali' xángaca bönachi,  
guli'gún le naca tsahui', en le naca dxi'a  
ca rugunli' dxin yugu' bönni' huen dxin queéli'.  
Guli'tsöjné zoa ca' Xanli' yehua' yubá.

<sup>2</sup> Libí'ili', yúgu'téli',  
buli'lidzatica'sé' Dios.  
Buli'subán ládxi'li' ulídzali'-nè' Dios,  
en guli'gufé': "Xclenu'."

<sup>3</sup> La' ná'asö cate' rulídzali'-nè' Dios, guli'nabi-nè' ca' gácalenè' netu', en  
gunnè' netu' lataj quíxjö'ötu' xtídzè'è Xanru', para gaca uzéajni'itu' bönachi  
le bigachi' ca naca queè' Cristo. Tu' runa' caní nadzuna' lidxi guié ni.

<sup>4</sup> Guli'nabi-nè' ca' Dios, gunnè' neda' lataj usalaj lá'ana' le bigachi' na' ca  
ral-la' guna'.

<sup>5</sup> Lu yöl-la' réajni'i queéli', guli'gún le runli' lógaca nupa biti' ta'yéajlè'  
Cristo. Guli'gunda' dxin yugu' dza uzá' ládxi'è Dios queéli', gunli' xich-  
inè'. <sup>6</sup> Ral-la' gü'ili' didza' ca raza ládxi'è Dios, en ca ral-la' gun nupa  
néquiquequi queè'. Ral-la' inözili' ca' naca ral-la' ubi'ili' didza', bi guié'li'  
tu tu bönachi.

*Yugu' bönachi queè' Cristo tu'gapa Dios luzè'eguequi*

<sup>7</sup> Tíquico quíxjöi'inè' libí'ili' le raca quia' ni. Náquiè' böchi'ru' nadxí'iru'-  
nè'. Náquiè' ca' huen dxin idú queè' Xanru', en rúnlenè' neda' tsözxön dxin  
queè' Xanru'. <sup>8</sup> Que lé ni na' risól-la'a-nè' ga zóali', para uzéajni'inè' libí'ili'  
le raca quia', en utipè' ládxi'li'. <sup>9</sup> Onésimo, böchi'ru' na' nabábalenè' libí'ili'  
sa'yéajlenè' lé' tsözxön. Náquiè' ca' böchi'ru' nadxí'iru'-nè', en réajlè'è  
Xanru'. Chopè' ni ulu'siyönnè' libí'ili' yúgu'tè le raca ni.

<sup>10</sup> Aristarco, bönni' na' yú'ulenè' neda' tsözxön lidxi guié rugapè' Dios  
libí'ili'. Bi'i Marcos, bi'i bönni' queènu nigula zanè' Bernabé rugápabi'

Dios ca' libí'ili'. Chigudxa' libí'ili' bi gunli' queëbi' bi'i Marcos na'. Channö huídabi' ga zóali', guli'gún-bi' bal. <sup>11</sup> Bönni' ni lë' Jesús, en zoa ia'tú lë' Justo lësca' rugapë' Dios libí'ili'. Nacuá' zían bönachi judío ta'yéajlë' Cristo, pero tsónnasë' ni ladaj bönachi judío tunë' dxin que le rinná bë'ë Dios tsözxön len neda', en tu'huí' zxöndë'ë neda'. <sup>12</sup> Epafras, bönni' ni nababë' ca' libí'ili' rugapë' Dios libí'ili'. Náquië' huen dxin queë' Cristo, en idú ládxë'ë rulidzë' Dios, en ráta'yutica'së' lahuë' gácalenë' libí'ili' para gácali' idú ladxi', en sóali' ca' sina' gunli' yúgu'të le ré'ëni quézinë' Dios. <sup>13</sup> Runa' ba nalí queë' Epafras na', ruí'ida' ládxë'ë libí'ili' enca' nupa nacué' yödzö Laodicea, en nupa nacué' yödzö Hierápolis. <sup>14</sup> Demas, enca' Lucas tu'gapë' Dios libí'ili'. Náquië' Lucas bönni' na' ruúnë' bönachi, ate' nadxí'iru'-në'.

<sup>15</sup> Guli'gapa Dios böchi'ru' nacué' Laodicea, enca' Ninfas, en bönachi queë' Cristo nacué' lídxinu Ninfas na'. <sup>16</sup> Cate' údxi ulábalí' guichi ni ga nì' zóali', guli'gún ga ulu'laba le bönachi queë' Cristo nacué' Laodicea. Buli'laba ca' libí'ili' guichi na' ila'söl-la' bönachi Laodicea na' queëli'. <sup>17</sup> Guli'guíë' Arquipo: "Bë' ládxu'u gunu' dxin na' budödë' Xanru' lu no'o."

<sup>18</sup> Neda', Pablo, ruzúaj caza' lu guichi dídzá'do' ni, rnníá': Rugapa' Dios libí'ili'. Guli'tsójné ca' raca quia' nadzuna' lidxi guíë ni. Rinábida'-në' Dios uzá' ládxë'ë queëli' le naca dxi'a. ¡Ca' gaca!

## DIDZA' ZÍ'ALÖ GUSÖL-LĚ'Ě PABLO YÖDZÖ TESALÓNICA

*Pablo rugapë' Dios bönachi queë' Cristo nacua' Tesalónica*

<sup>1</sup> Neda', Pablo, rugapa' Dios libí'ili', zóali' Tesalónica. Néquili' queë' Cristo, ate' nácali' tuz len Dios, enca' len Xanru' Jesucristo. Dzágagaquië' neda' Silvano, en bi'i Timoteo. Rinábida'-në' Xúziru' Dios, enca' Xanru' Jesucristo uzá' ládxë'ë queëli', en gunë' ga soa dxi'icja ládxi'do'oli'.

*Yugu' le taca bē' ta'yéajlë' bönachi Tesalónica Dios*

<sup>2</sup> Rética'stu'-në' Dios: "Xclenu'" cate' rōjnetu' ca naca queëli' yúgu'tëli'. Rōjnética'stu' libí'ili', bi rinábitu'-në' Dios ni'a queëli' cate' rulidztu'-në'. <sup>3</sup> Rōjnética'stu' lahuë' Xúziru' Dios ca naca le runli' tu' réajlë'ëli' Cristo, en ca naca dxin runli' tu' nadxí'ili'-në', en ca na' nácatica'sili' tsutsu tu' runli' löza Xanru' Jesucristo. <sup>4</sup> Böchi' luzá'atu', Dios nadxí'inë' libí'ili', ate' nōztu' gurō cazë' Lë' libí'ili'. <sup>5</sup> Caní naca, tu' bidxín queëli' didza' dxi'a runtu' libán que, calëga len didza'sö, pero lësca' len yöl-la' huáca bidxín queëli', ate' Dios Bö' Lá'ayi benë' tsutsu le, ate' idú ládxi'li' benli' löza le. Nöz quezili' ca gúcatu' ga zóali' tu' nadxí'itu' libí'ili'.

<sup>6</sup> Libí'ili' butsá' cuinli', ate' runli' ca runtu' netu', enca' ca benë' Xanru', tu' guzxí' lu ná'ali' xtídzë'ë, ate' sal-la' gudí'i guxzáca'da'ali', budzëjali' tu' zóalenë' Dios Bö' Lá'ayi libí'ili'. <sup>7</sup> Caní naca, chinácali' tu le naca bē' lógaca yúgu'të bönachi ta'yéajlë' Cristo nacua' luyú Macedonia, en luyú Acaya. <sup>8</sup> Caní naca, tu' guzë xtídzë'ë Xanru' ni'a queëli'. Calëgasö luyú Macedonia, en luyú Acaya, pero lësca' yúgu'të lataj guzë didza' ca réajlë'ëli' Dios. Caní naca, biti' bi run bayudxi innatu', <sup>9</sup> tu' ta'guixjö' la' léguquisö bönachi ni' queëtu' ca benli' netu' bal, en ca na' butsá' cuinli'. Bucá'anali' yugu' budó' guiöj budó' yaga, en böácali' queë' Dios para gunli' xichinë' Dios ban, Nu naca idú Dios. <sup>10</sup> Na'a, ribözali' dza huödë' Zxí'inë' Dios, irúajë' yehua' yubá. Dios busubanë' Lë' lu yöl-la' guti. Nu ni naca Jesús, Nu rusölá rë'u lu dul-la', para cabí soa le gun ga ichúguie' Dios queëru' dza si' za'.

## 2

*Xichinë' Dios benë' Pablo yödzö Tesalónica*

<sup>1</sup> Böchi' luzá'atu', nöz quezili' biti' guca nítisö dxin queë' Dios bentu' cate' ni' bidxintu' ga zóali'. <sup>2</sup> Nözili' ca guca queëtu' lu yödzö Filipos, ca na' gudí'i guxzáca'tu', ate' guluá' dö' bönachi ni' queëtu'. Ní'irö cate' bidxintu' ga zóali' gúcatu' rugu ladxí' tu' guzóalenë' Dios queëru' netu', ate' bentu' libán loli' que didza' dxi'a le budödë' Dios lu na'tu'. Caní bentu' sal-la' gula'dá'baga'da' bönachi ládzali' netu'. <sup>3</sup> Cate' ni' guchízatu' icja nágali' xtídzë'ë Dios, bē'ëtu' didza', calëga tu' nazí'i ye'e netu', en calëga tu' bi guzë ládxi'tu' le dë queëli', en biti' guzxí' yé'etu' libí'ili'. <sup>4</sup> Tu' nuzxöni ládxë'ë Dios netu', budödë' lu na'tu' guntu' libán que didza' dxi'a queë', ate' canisö ruí'itu' didza'. <sup>5</sup> Nöz quezili' catu' caz bē'lentu' libí'ili' didza' le gun xzön libí'ili', en biti' gulëaj tshai' cuintu' ca run nu bi rizë ladxí' le dë queëli'. Nöz quezinë' Dios naca caní. <sup>6</sup> Biti' gudíljatu' yöl-la' ba le naca que yödölió ni, lë na' cú'uli' libí'ili' netu', en calëga le ila'gú'u bönachi netu'. Sal-la' dë

lu na'tu' inná bé'etu' libí'ili' tu' nácatu' gubáz nasól-lë'ë Cristo <sup>7</sup> guzóalentu' libí'ili' dxi'i ládxi'do', en bentu' ca runnu xiná'agacabi' bi'i huë'enido', run chí'inu lé'gacabi' dxi'i ládxi'do'. <sup>8</sup> Caní guca, bidxí'ide'etu' libí'ili', ga bidxintë' gú'unitu' udödítu' lu ná'ali', calé'gasö didza' dxi'a queë' Dios, pero lá'tu'bi'qui' udödi'caztu' yöl-la' na'bán queë'tu', tu' nadxí'ide'etu' libí'ili'. <sup>9</sup> Röjneli', böchi' luzá'atu', ca na' guca cate' ni' bentu' libán loli' que didza' dxi'a queë' Dios, ca béntica'stu' dxin zi'i, ate' rëla, en të dza bentu' dxin para cabí usaca' zí'itu' nituli' libí'ili'.

<sup>10</sup> Libí'ili' na' réajlë'ëli' Cristo, huáca gunli' ba nalí, ate' nözinë' Dios ca na' gudá'entu' libí'ili' idú ca raza ládxe'ë Dios, en idú dxí'ado', en ca na' cuntú nu gaca bi' innë que. <sup>11</sup> Lë'sca' caní nözili' ca bentu' ca runë' tu bönni' qué'gacabi' zxi'inë', guchízatu' icja nágali', en butípatu' ládxi'li' tu tuli'. <sup>12</sup> Busá'atu' ládxi'li' gunli' ca ral-la' gun nu nequi queë' Dios. Lë cazë' bulidzë' libí'ili' para gaca tsú'uli' ga na' rinná bé'ë Lë' lu bení' queë'.

<sup>13</sup> Que lë ni na' ca', rëtica'stu'-në' Dios: "Xclenu'." Caní runtu' tu' guzxi' lu ná'ali' xtídzë'ë Dios le biyönili' bé'ëtu' didza', calëga ca xtídzä' bö'náchisö, pero ca le nácatë naca, xtídzë'ë Dios naca. Xtídzë'ë na' run dxin lu icja ládxi'do'oli' libí'ili', réajlë'ëli' Cristo. <sup>14</sup> Böchi' luzá'atu', raca queë'li' ca raca qué'gaca bö'nachi queë' Dios, nupa né'quiquequi queë' Jesucristo luyú Judea. Caní naca tu' chigudí'i guzxacá'da'ali' lu ná'agaca bö'nachi uládz queë'li', lëbisö ca na' gula'guí'i gula'záquië' lé'gaquië' lu ná'agaca bö'nachi uládz qué'gaquië', nupa ni' ná'cagaca bönni' judío. <sup>15</sup> Yugu' bönni' judío na' gulútië' Xanru' Jesús, en gulútië' ca' yugu' bönni' gulu'ë didza' uláz queë' Dios. Gula'bía ládxi'gaquië', en bulu'láguë' ca' netu'. Biti' tunë' le raza ládxe'ë Dios, tu' cabí ta'lé'enë' dxi'a yúgu'të bö'nachi izá'a. <sup>16</sup> Tu'záguë'ë ca' xinöztu', para cabí guntu' libán lógaca bö'nachi izá'a na' bití' nabábagaca lé'gaquië', tu' ruí'ilentu' lé'guequi didza' para ulu'lágaca. Caní raca, tu'zántica'së' dul-la' nabága'gaquië', en chinabága'gaquië' xíguia' le run ga ichúguie' Dios qué'gaquië'.

*Pablo rë'ënë' tsöjyüë' böchi'ru' nacu'ë Tesalónica*

<sup>17</sup> Na'a, böchi' luzá'atu', ruhu'ínitu' ca runë' tu bönni' uzëbi tu' nulá'alentu' libí'ili' tu chí'ido', pero sal-la' bití' rilé'etu' libí'ili', bití' nál-la ládxi'tu' libí'ili'. Que lë ni na', ruí'i ládxi'rötu' ulé'etu' loli', tu' rizëda' ládxi'tu' guntu' caní. <sup>18</sup> Que lë ni na' ca' gú'unitu' guídatu' ga zóali', ate' neda', Pablo, le nácatë bé' ládxa'a guída' chopa tsonna luzuí, pero Satanás, tu' xihui', buzaga' xinöztu'. <sup>19</sup> ¿Bizxi'caz naca le run ga runtu' löza, o le run ga rudzëjatu', o le ral-la' idéli'tu', le uzí'tu' xibë lahuë' Xanru' Jesucristo cate' huödë'? ¿Naru' cabí libí'i cázali' na'? <sup>20</sup> Libí'i cázali' nácalí' le run ga nácatu' bica' ba, en le run ga rudzëjatu'.

### 3

<sup>1</sup> Que lë ni na', cate' bití'rö guca guá'ilentu', ben xtídzä'tu' ugá'anatu' chópatu' lu yödzö Atenas, <sup>2</sup> ate' gusól-la'tu'-bi' bi'i böchi'ru', Timoteo ga zóali'. Nácabí' bi'i huen dxin queë' Dios, en rúnlenbi' neda' tsözxön libán que didza' dxi'a queë' Cristo. Gusól-la'tu'-bi' ga zóali' para cué'quibi' libí'ili' tsutsu, en ichízabi' icja nágali' ca ral-la' tséajlë'ëli' Cristo, <sup>3</sup> para cabí soa nu gaca chopa ladxí' ni'a que le tu'saca' zí' bö'nachi ni netu'. <sup>4</sup> Lë'sca' caní' guzóalentu' zóaru' yödzölió ni para guá' ilenru' le caní. <sup>5</sup> Que lë ni na', cate' bití'rö guca chiguca queë'tu', ate' nöz quézili' lë na'. <sup>5</sup> Que lë ni na', cate' bití'rö guca

guá' ilena', gusöl-la'a-bi' bi'i Timoteo ga zóali', para ududíxjöi'ibi' neda' ca naca queéli' ca réajlë'ëli'-në' Cristo, en channö cabí gulú'u tu' xihui' libí'ili' nõza dul-la', nu na' rigú'u bõnachi nõza dul-la', en channö cabí bõaca nítisö dxin na' bentu' ga zóali'.

<sup>6</sup> Cate' buzá'abi' bi'i Timoteo ga zóali', en budxinbi' ga zóatu', busiyõnbi' netu' le naca dxi'a. Bë'ëbi' didza' ca na' réajlë'ëli' Cristo, en ca na' nadxí'igacali'-në' yugu' böchi' luzá'aru', en ca na', lu yöl-la' dxi'i ladxi' queéli' röjnética'sili' netu', enca' ca na' raca ládxi'li' ulé'eli' netu', ca na' netu' raca ládxi'tu' ca' ulé'etu' libí'ili'. <sup>7</sup> Que lë ni na', böchi' luzá'atu', cate' ni' gudí'i guzxáca'tu' yúgu'të lë ni, en zían le guca queëtu', bidxín didza' queëtu' le bu'i zxon netu' cate' biyõnitu' ca réajlë'ëli'-në' Cristo. <sup>8</sup> Na'a, nuhuõaca ládxi'tu' tu' riyõnitu' rö'öli' tsutsu ca réajlë'ëli'-në' Xanru'. <sup>9</sup> ¿Nacxi caz gaca guíëtu'-në' Dios: "Xclenu'" ca ral-la' guntu' ni'a que yúgu'të le run ga rudzeja ládxi'tu' lahuë' Dios queëru' ni'a que le nácali' libí'ili'? <sup>10</sup> Bayudxi rulidztu'-në' Dios, en rinábitu'-në' rëla, en të dza para gaca ulé'etu' libí'ili', en usá'atu' le riyadzaj queéli' ca naca le réajlë'ëli'-në' Cristo.

<sup>11</sup> Na'a rinábitu'-në' Xúziru' Dios, enca' Xanru' Jesucristo, cu'ë netu' nõza ga idxintu' ga zóali'. <sup>12</sup> Lë'sca' rinábitu'-në' Xanru' gunë' ga gala, en gaca idú ca nadxí'ili' luzá'ali' tuli' ia'tuli', en ca nadxí'ili' yúgu'të bõnachi, ca na' netu' nadxí'itu' ca' libí'ili'. <sup>13</sup> Rinábitu'-në' gunë' ga gaca tsutsu, en idú dxi'a icja ládxi'do'oli' lahuë' Xúziru' Dios ca sa'yéaj le naca lá'ayi, ate' gunë' caní ga idxinrö dza huödë' Xanru' Jesucristo, dzágagaca bõnachi lá'ayi queë' Lë'.

## 4

### *Le runru' le raza ládxe'ë Dios*

<sup>1</sup> Ia'stú, böchi' luzá'atu', ni'a queë' Xanru' Jesús ráta'yutu' loli', en richízatu' icja nágali' para gunli' ca naca le chinazédali' lu na'tu' ca ral-la' gunli' le raza ládxe'ë Dios. Ca na' chirunli', ca' ral-la' gúntica'sili'.

<sup>2</sup> Chinöz quézili' yugu' le gunná bé'etu' libí'ili' uláz queë' Xanru' Jesús. <sup>3</sup> Le rë'ënë' Dios naca gácali' idú dxi'a, en bítirö gunli' le cabí naca tsahui', <sup>4</sup> en inözili' tu tuli' nacxi ral-la' sóalenli'-nu nigula que queéli' idú ca sa'yéaj le naca lá'ayi, en gunli' légacanu bal. <sup>5</sup> Biti' ral-la' sóalenli'-nu nigula queéli' lu yöl-la' rizé ladxi' le ruá' dö', ca na' tun bõnachi bití' nabábagaca Dios, en bití' núbë'gaca Dios. <sup>6</sup> Ca náca'gaca lë ni, cuntu nu ral-la' tódi bë', en cabí si' ye'e böchi' luzë'e bagáchi'sö, tu' ichúguië' Lë cazë Xanru' quégaca yúgu'të nupa tun le caní, gunë' ca na' chigúdxitu' libí'ili', en bentu' ba nalí que loli'. <sup>7</sup> Dios bulidzë' rë'u, calëga para gunru' le ruá' dö', pero para gácaru' idú dxi'a. <sup>8</sup> Caní naca, nu ruzóa tsólá'alö lë ni, calëga bõnáchisö ruzóa tsólá'alö, pero Dios caz ruzóa tsólá'alö, tu' gusöl-lë'ë Lë cazë' Dios Bö' Lá'ayi queëru', Nu ruí'i caní didza'.

<sup>9</sup> Biti' run bayudxi uzúaja' queéli' lu guichi ca ral-la' idxí'igacali'-në' böchi' luzá'ali', tu' chinazédali' la' libí'isili' lu në'ë Dios idxí'ili' luzá'ali' tuli' ia'tuli'. <sup>10</sup> Le nácatë nadxí'igacali'-në' yúgu'të böchi' luzá'aru' nacu'ë luyú Macedonia. Na'a, ráta'yutu' loli', böchi' luzá'atu', para idxí'igacaröli'-në' ca' yúgu'të böchi' luzá'ali'. <sup>11</sup> Ráta'yutu' loli' ca', gú'i ládxi'li' cõzali' dxí'ado', en gunli' yugu' le dë lu ná'asili', en gunli' dxin len na'a cunli' ca na' chigunná bé'etu' libí'ili'. <sup>12</sup> Gunná bé'etu' libí'ili' caní para gaca gunli'

le naca dxi'ado' lógaca nupa biti' nabábagaca libí'ili', en caní gaca, biti' bi yadzaj queéli'.

*Ca gaca cate' huödë' Xanru' Jesucristo*

<sup>13</sup> Lësca', böchi' luzá'atu', rë'ënitu' inözili' ca raca quégaca nupa chinátigaca, para cabí huí'nili' ca tun ia'zica'rö bönachi biti' zoa le tun löza. <sup>14</sup> Channö réajlë'ëru' gútië' Jesús, en bubanë', lësca' caní ral-la' uzxöni ládxi'ru'-në' Dios gunë' ga huödalengaca tsözxön Jesús nupa ni' chigulati, en gula'yéajlë' Lë'.

<sup>15</sup> Que lë ni na' riguixjöi'itu' libí'ili' xtídzë'ë Xanru' le rnna caní: "Rë'u ni zóaru' nabanru', en ugá'anaru' ga idxinrö dza huödë' Xanru' Jesucristo, biti' tsöjtságaru'-në' Cristo zí'alö ca nupa chigulati." <sup>16</sup> Caní gaca, tu' huötjë' Lë cazë' Xanru', en irúajë' yehua' yubá, ate' yön chi'ë, len yöl-la' unná bë' ulidzë', ate' yön ca' chi'ë gubáz lá'ayi lo, ate' yön ca' luzu ucödxë' Dios, ate' ulu'bán nupa na' chigulati, en gula'yéajlë' Cristo. <sup>17</sup> Ní'irö rë'u ni zóaru' nabanru', en nagá'anaru' luyü ni, uchisë' rë'u tsözxön len léguequi lu böaj lúzxiba para tsöjtságaru'-në' Xanru' lu bö'ös. Caní gaca, sóalenticas' siru'-në' Xanru'. <sup>18</sup> Que lë ni na', guli'huí' zxön luzá'ali' tuli' ia'tuli' ca nácgaca didza' ni.

## 5

<sup>1</sup> Na'a, ca naca dza na', o rëla na' cate' ilaca lë ni, biti' run bayudxi uzúaja' queéli' lu guichi, böchi' luzá'atu'. <sup>2</sup> Libí'ili' chinöz quézili' dxi'a ca gaca dza cate' huödë' Xanru'. Idxinë' tsárido'os ca ridxinë' gubán chi'i dzö'ölö. <sup>3</sup> Cate' ila'nná bönachi: "Raca dxi'a queëru', en biti' bi gaca queëru'", ní'irö la' idxintë le usuniti léguequi, lë na' idxín quéguequi ca na' ridxín le riguí' rizáca'nu nigula na' chizóa sóabi' bí'ido' queënu, ate' cuntu nu nutsa' ladaj bönachi yödzölió ni nu ulá cate' gaca lë na' gaca dza na'. <sup>4</sup> Na'a, böchi' luzá'atu', biti' zóali' chul-la niti, en que lë ni na' biti' idxín dza ni' queéli' bagáchi'sö ca ridxinë' bönni' gubán. <sup>5</sup> Yúgu'tëli' nácali' bönachi que bení, en que lahui' dza. Biti' nácaru' bönachi que chi'i dzö'ölö, en calëga que le naca chul-la. <sup>6</sup> Que lë ni na', biti' ral-la' tödi yëla loru' ca raca quégaca nupa biti' nabábagaca rë'u, pero ral-la' usubán ládxi'ru', en cözaru' ba'a ládxi'do'. <sup>7</sup> Nupa tasi, chi'i dzö'ölö tasi, en nupa ta'zudxi, chi'i dzö'ölö ca' ta'zudxi. <sup>8</sup> Na'a, rë'u ni, nácaru' que lahui' dza, en ral-la' cözaru' ba'a ládxi'do', tu' chinácuru' zxaru' le run chi'i rë'u, le naca yöl-la' réajlë' queëru' Dios, en yöl-la' nadxí'i, ate' le runru' löza uláru' naca ca tu lu'u guíë le run chi'i ícjaru'. <sup>9</sup> Caní naca, tu' nuzóë' Dios rë'u ni, calëga para idxinru' ga ichúguíë' queëru', pero para uláru' tu' ruzxöni ládxi'ru'-në' Xanru' Jesucristo, <sup>10</sup> tu' gútië' Jesús uláz queëru' para sóaru' ibanru' tsözxön len Lë' cate' huödë', sal-la' chinátiru' o sóaru' ibanru' dza ni'. <sup>11</sup> Que lë ni na' ral-la' utípalí' ládxi'li' tuli' ia'tuli', en gunli' tsutsu tuli' ia'tuli' ca na' chirunli'.

*Pablo richízië' icja nágagaquië' böchi' luzë'ë ta'yéajlë'ë Cristo*

<sup>12</sup> Ráta'yutu' loli', böchi' luzá'atu', gúnbë'ëli' nupa tun xichinë' Xanru' ga zóali', nupa na' ta'nná be'e libí'ili' uláz queë' Xanru', en tu'sá' ládxi'li'. <sup>13</sup> Ráta'yutu' loli' ca', gunli' légaquië' bal lu yöl-la' nadxí'i queéli', tu' tunë' dxin na'. Guli'cöza dxi'ado' tuli' len ia'tuli'.

<sup>14</sup> Lësca' caní richízatu' icja nágali', böchi' luzá'atu', para usá'ali' ládxi'gaca nupa biti' túngaca dxin, en utípalí' ládxi'gaca nupa tu'huöaj

ládxi'guequi, en gácalenli' nupa biti' naca tsutsu ca ta'yéajlë' Cristo, en gácali' nõxaj ladxí' lógaca yúgu'të bönachi.

<sup>15</sup> Guli'gún chí'i cuinli' para cabí uzí' lëbi luzá'ali', en cabí guá'ali' dö' que nu ruá' dö' queéli', pero guli'güí' ládxi'li' gúntica'sili' le naca dxi'a que luzá'ali' tuli' ia'tuli', en quégaca yúgu'të bönachi.

<sup>16</sup> Buli'dzéjatica'sö,

<sup>17</sup> en buli'lídzatica'së' Dios,

<sup>18</sup> en guli'guíë' Lë': "Xclenu'."

Caní ral-la' gunli' ni'a que yúgu'të le raca queéli', tu' nácagaca lë ni le rë'ënë' Dios gunli' tu' nácali' queë' Jesucristo.

<sup>19</sup> Biti' uzóalí' le rulídzatica'së' Dios Bó' Lá'ayi libí'ili'.

<sup>20</sup> Biti' uzóali' tsölá'aló xtídzë'ë bönni' ru'ë didza' uláz queë' Dios.

<sup>21</sup> Guli'sí' bë' yúgu'të, en guli'sí' lu ná'ali' le naca dxi'a.

<sup>22</sup> Biti' bi gútsa'li' le ruá' dö'.

<sup>23</sup> Lë cazë' Dios, Nu run ga zoa dxi icja ládxi'do'oru', gunë' ga gácali' idú dxi'a, en gun chí'ë bö' naca cázali', en icja ládxi'do'oli', en idútë le nácali', ate' cuntu nu gaca bi innë queéli' dza ni' huödë' Xanru' Jesucristo.

<sup>24</sup> Runë' Dios ca rnnë', Bönni' na' bulidzë' libí'ili'. Lë cazë' gunë' yugu' lë ni.

*Pablo rigü'ë yugu' böchi' luzë'ë lu në'ë Dios*

<sup>25</sup> Böchi' luzá'atu', buli'lidzë' Dios, en inábili'-në' gácalenë' netu'.

<sup>26</sup> Buli'gapa Dios yúgu'të böchi' luzá'aru', en unída'li' légaquië' lu yöl-la' nadxí'i queéli'.

<sup>27</sup> Ni'a queë' Xanru' Dios ruchi'a libí'ili' ulábalí' guichi ni lógaca yúgu'të böchi' luzá'aru' nabábagaquië' Cristo.

<sup>28</sup> Rinábida'-në' Xanru' Jesucristo uzá' ládxi'ë queéli' le nácagaca dxi'a queë'. ¡Ca' gaca!

## DIDZA' BUROPI GUSÖL-LË'Ë PABLO YÖDZÖ TESALÓNICA

*Pablo rugapë' Dios bönachi queë' Cristo nacua' Tesalónica*

<sup>1</sup> Neda', Pablo, rugapa' Dios libí'ili', zóali' Tesalónica. Nácali' queë' Xúziru' Dios, enca' queë' Xanru' Jesucristo. Silvano, en bi'i Timoteo dzágagaquië' neda'. <sup>2</sup> Rinábitu' Xúziru' Dios, en Xanru' Jesucristo, uzá' ládxë'ë queëli', en gunë' ga soa dxi icja ládxí'do'oli'.

*Dios ichúquië' quégaca bönachi dul-la' ila'nítigaca cate' huödë' Cristo*

<sup>3</sup> Ral-la' guiética'stu'-në' Dios: "Xclenu'" ca naca queëli', böchi' luzá'atu', ate' naca dxi'a guntu' caní, tu' zeaj rácarö idú ca réajlë'ëli'-në' Dios. Lësca' caní, ca nadxí'ili' luzá'ali' tuli' ia'tuli' zeaj rácarö idú. <sup>4</sup> Que lë ni na', len yöl-la' rudzeja riguixjö'ötu' ca naca queëli' lógaca bönachi queë' Dios ni, tu' ribózali' zxön ladxi', en réajlë'ëli' Dios sal-la' ta'bíada' ládxí'gaca bönachi libí'ili', en riguí'i rizáca'da'ali', pero ruá' rilenli' yúgu'të. <sup>5</sup> Yugu' lë ni taca bë' naca sahui' ca ruchi'a rusöröë' Dios bönachi. Ru'ë lataj riguí'i rizáca'li' na'a, para gácali' lesaca' tsázali' ga ni' rinná bë'ë Lë'.

<sup>6</sup> Naca tsahui' ca gunë' Dios, ubi'ë quégaca nupa tu'saca' zi' libí'ili', gunë' ga ila'guí'i ila'zaca' nupa na'. <sup>7</sup> Ia'stú, libí'ili' riguí'i rizáca'li' na'a, ate' ubi'ë Dios queëli', gunë' ga uzí' ládxí'li' tsözxön len netu', dza ni' ilá' lahuë' Xanru' Jesucristo, cate' irúajë' yehua' yubá. Yugu' gubáz lá'ayi ni'a në'ë ilunë' Lë' tsözxön, en ulu'lu'ë lahui yöl-la' huáca zxön queë'. <sup>8</sup> Ilá' lahuë' Cristo dza ni' ca tu guí' zxön cate' ni' gunë' zi' nupa bití' núnbë'gaca Dios, en bití' túngaca ca rnna didza' dxi'a queë' Xanru' Jesucristo. <sup>9</sup> Yugu' bönni' caní, uzí' lëbë' légaquië', ate' tsaz tsöjtsázagaquië' lu guí' gabila. Ila'cuitë' tsaz lahuë' Xanru', ga nalá'gaca yöl-la' zxön queë', en yöl-la' huáca queë'. <sup>10</sup> Caní gaca dza ni' cate' huödë' para gaca queë' yöl-la' ba ni'a que le nácgaca bönachi lá'ayi queë', ate' ulu'bani ni'a que le benë' ga nácgaca yúgu'të nupa ta'yéajlë' Lë'. Caní gaca ca' queëli' tu' guyéajlë'ëli' le bentu' ba nalí que loli' ca naca queë' Jesús.

<sup>11</sup> Que lë ni na' ca', rulídzatica'stu'-në' Dios queëru', en rinábitu'-në' gácalenë' libí'ili', en gunë' ga gácali' lesaca' idéli'li' lë na' bulidzë' libí'ili' para uzí'ili' xibé. Lësca' rinábitu'-në' gunë' ga gaca idú yúgu'të le ruí' ládxí'li' gunli' le naca dxi'a, en yúgu'të dxin runli' lu yöl-la' réajlë' queëli' Lë'. Len yöl-la' huáca queë' Dios huáca gunli' lë ni. <sup>12</sup> Caní gaca, gaca yöl-la' ba que Lë' Xanru' Jesucristo ni'a que le runli', ate' gácali' libí'ili' bica' ba ni'a que le gunë' Lë', gaca ca naca le buzá' ládxë'ë queëli' Dios queëru', enca' Xanru' Jesucristo.

## 2

*Ulu'i lahuë' Bönni' Xihui'*

<sup>1</sup> Na'a, ca naca que dza huödë' Xanru' Jesucristo, en ca gaca, udutubë' rë'u queë' Lë', ráta'yutu' loli', böchi' luzá'atu', <sup>2</sup> para cabí guí'ili' lataj nu gun chixi libí'ili' ca nácgaca le guzxí' lu ná'ali'. Bití' cuéqui böniga icja ládxí'do'oli' ni'a que bi ta'nnë' bönni' ta'zi' yë'ë, ta'nnë' zóalenë' Dios Bö' Lá'ayi légaquië', o ni'a que bi didza' tu'i bönachi, o ni'a que bi nazúaj tu lu guichi ta'nnë' netu' gusöl-la'tu', le rnna: "Chigudödi dza huödë' Xanru'."



<sup>3</sup> Biti' ca' gü'ili' lataj nu si' ye'e libí'ili', tu' cabí idxín dza ni' huödë' Jesús channö cabí ila'lá' lahui zí'aló zían nupa ila'dá'baga' Dios, ate' ilá' lahuë' Bönni' Xihui', bönni' na' ral-la' tsázië' lu guí' gabila. <sup>4</sup> Bönni' ni uzáguë'ë, ate' lu yöl-la' run ba zxon cuinë' tá'baguë'ë yúgu'të le nequi queë' Dios, o le tun zxon bönachi lu yöl-la' run Dios bal quéguequi. Gunë' bönni' na' caní ga idxintë cö'ë ca Dios caz lu yudo' ga naca xilatjë' Dios, en gun cuinë' ca Dios.

<sup>5</sup> ¿Naru' cabí röjneli' busiyönda' libí'ili' yugu' lë ni cate' ni' zóalena' libí'ili'? <sup>6</sup> Na'a, núnbë'ëli' Nu ruzaga' xinözë' Bönni' Xihui' na', para cabí ilá' lahuë' zí'aló ga idxinrö dza queë'. <sup>7</sup> Chirún dxin le nagachi' que le naca xihui', pero ná'atë zoa Nu ruzaga' xinözë' Bönni' Xihui' na' ga idxinrö dza ucuíta cuini Nu na' ruzaga' xinözë'. <sup>8</sup> Ní'irö ilá' lahuë' Bönni' Xihui' na', ate' Xanru' Jesucristo ucul-lë' lë' len bö' irúaj ru'ë, en usunítie' lë' len le tsëpi yösa bení' que dza huödë'. <sup>9</sup> Cate' idxinë' Bönni' Xihui' na', len yöl-la' huáca que Satanás' tu' xihui' ilá' lahuë'. Len yöl-la' huáca que le cabí nácatë, gunë' yúgu'të yöl-la' huáca zxon, en yúgu'të le ilaca bë', en yúgu'të le ilún ga ulu'bani bönachi. <sup>10</sup> Len yöl-la' huáca que le cabí nácatë, gunë' caní lógaca nupa ila'niti tu' cabí gula'z' lu në'eguequi idú ládxi'guequi le naca idútë li, para ulu'láguequi. <sup>11</sup> Que lë ni na' Dios gu'ë lataj idxín quéguequi tu nu run yöl-la' huáca, nu si' ye'e léguequi para ila'yéajlë' le cabí nácatë. <sup>12</sup> Caní gaca para ila'baga' xíguia' yúgu'të nupa bití' gula'yéajlë' le naca idútë li, pero gula'yaza ládxi'gaca le cabí naca tsahui'.

### *Nupa gurö cazë' Dios para ulu'lágaca*

<sup>13</sup> Böchi' luzá'atu', libí'ili' na' nadxí'inë' Xanru' libí'ili', ral-la' guíética'stu'-në' Dios: "Xclenu'" ni'a que le naca queëli', tu' chiguró cazë' Dios libí'ili' dza ni'te para uláli' ni'a que le runë' Dios Bö' Lá'ayi, para gácali' idú tsahui' tu' réajlë'ëli' le naca idútë li. <sup>14</sup> Para gaca caní queëli', Dios caz bulidzë' libí'ili', para idéli'li' gunli' tsözxön Xanru' Jesucristo lu bení' queë'. Caní gaca ni'a que didza' dxi'a runtu' libán que.

<sup>15</sup> Que lë ni na', böchi' luzá'atu', guli'sóa tsutsu, en guli'gún chí'i didza' na' nazëdali', le bë'lentu' libí'ili', en buzúajtu' queëli' lu guichi. <sup>16-17</sup> Rinábitu'-në' Xanru' Jesucristo, en Xúziru' Dios, utipë' ládxi'li', en gunë' ga gácali' tsutsu ca naca yúgu'të le naca tsahui' runli', en yúgu'të didza' dxi'a ruí'ili'. Lë cazë' nadxí'inë' rë'u, en bennë' queëru' le ruhuí' zxöntica'sö rë'u, en le naca dxi'a runru' löza, yugu' lë na' buzá' ládxi'ë Dios queëru'.

## 3

### *Le ral-la' inábiru'-në' Dios*

<sup>1</sup> Ia'stú, böchi' luzá'atu', buli'lidzë' Dios, en inábili'-në' gácalenë' netu', runtu' libán ni, para së xtídzë'ë Xanru', ate' ilún le bal bönachi, para gaca ni ca na' guca ga ni' zóali' libí'ili'. <sup>2</sup> Inábili'-në' ca' para ulatu' lu ná'agaquië' bönni' xihui' tuá' dö', tu' cabí ta'yéajlë' yúgu'të bönachi Dios. <sup>3</sup> Na'a, tu' runë' Xanru' ca rnnë', gunë' ga gácali' tsutsu, en gun chí'ë libí'ili', para cabí idzunli' lu na' tu' xihui'. <sup>4</sup> Ruzxöni ládxi'tu'-në' Xanru' ca naca queëli', gunli' yugu' lë ni si' gunábitu' libí'ili', ca na' chirunli'. <sup>5</sup> Rinábitu'-në' Xanru' usë'ë ládxi'li' para idxí'ili'-në' Dios, en cözali' zxon ládxi' ca na' benë' Cristo.

### *Ca run bayudxi gunru' dxin*

<sup>6</sup> Ní'a que Lë' Xanru' Jesucristo ruchí'atu' libí'ili', böchi' luzá'atu', icuí'tali' ga nacu'ë böchi' luzá'aru' ta'dasë' ca', en bití' tunë' ca naca xibá busé'ditu' libí'ili'. <sup>7</sup> Nöz quézili' ral-la' gunli' ca runtu' netu'. Biti' gudásitu' ca' netu' ga ni' zóali'. <sup>8</sup> Biti' gudágusötu' le bénnali' queëtu', pero lu yöl-la' ruúbi ruguí'i, en lu yöl-la' ricuidi' bentu' dxin rëla, en te dza para cabí usaca' zí'itu' nituli' libí'ili'. <sup>9</sup> Caní bentu' para gácatu' loli' ca tu le rulu'í libí'ili' ca ral-la' gunli', sal-la' dë lu na'tu' inábatu' bi gunli' queëtu'. <sup>10</sup> Lësca' cate' ni' guzóalentu' libí'ili', buchí'atu' libí'ili' caní, le rnna: "Channö cabí rë'ënë' nu bönni' gunë' dxin, bití' güí'ili' le gahuë'." <sup>11</sup> Canísö rnnatu' tu' riyönitu' nútsa'gaquië' ládjali' yugu' bönni' ta'dasë' ca', bití' bi dxin tunë', pero ta'dasë' ca' bi tun bi ta'nnë'. <sup>12</sup> Ní'a queë' Xanru' Jesucristo ruchí'atu' yugu' bönni' tunë' caní, en richízatu' icja nágagaquië' ilunë' dxin lu yöl-la' riböza dxí'ado', para gaca ilahuë' le nequi quegacasë'.

<sup>13</sup> Na'a, böchi' luzá'atu', bití' soa dxili', gúntica'sili' le naca dxi'a. <sup>14</sup> Channö nútí'tës bönni' bití' gunë' ca rnna xtídza'tu', le ruzúajtu' lu guichi ni, guli'gún ga gaca bë'ë bönni' na', en bití' gunli' tsözxón lë' para utuí'inë'. <sup>15</sup> Bití' ral-la' ilé'eli'-në' ca tu bönni' bití' rilé'enë' libí'ili' dxi'a, pero guli'sá' ládxe'ë ca böchi' cázali'.

*Pablo rigu'ë lu në'ë Dios yugu' böchi'ru' nacu'ë Tesalónica*

<sup>16</sup> Rinábitu'-në' Xanru' gúntica'së' ga cuía dxi icja ládxi'do'oli' ca naca yúgu'të le runli', en sóalenë' yúgu'téli'. Lë cazë' runë' ga rö'ö dxi icja ládxi'do'oru'.

<sup>17</sup> Neda', Pablo, len na' caza' ruzúaja' lu guichi ni le rugapa' Dios libí'ili', ate' naca tu le naca bë' yúgu'të guichi risól-la'a. Canísö ruzúaja' lu guichi. <sup>18</sup> ¡Le ruzá' ládxe'ë Xanru' Jesucristo queëru' gaca queëli' yúgu'téli'! ¡Ca' gaca!

## DIDZA' ZÍ'ALÖ GUSÖL-LË'Ë PABLO QUEËBI BI' TIMOTEO

*Pablo rugapë' Dios bi'i Timoteo*

<sup>1</sup> Neda', Pablo, naca' gubáz nasöl-lë'ë Jesucristo. Caní naca' tu' caní gunná bë'ë Dios, Nu rusölá rë'u, enca' tu' gunná bë'ë caní Xanru' Jesucristo, Nu na' runru' löza. <sup>2</sup> Rugapa' Dios li', böcha'ado' Timoteo. Nacu' ca xzi'ini caza' tu' benru' tsözxön xichinë' Dios. Rinábida'-në' Xúziru' Dios, enca' Xanru' Jesucristo uzá' ládxë'ë quiu', en huéchi' ládxë'ë li', en guné' ga soa dxi icja ládxí'do'o.

*Pablo rusë'ë ládxí'bi' Timoteo ca naca xibá cabí naca idú*

<sup>3</sup> Ráta'yua' lo' na'a gunu' ca na' gúta'yua' lo' cate' ni' guyija' luyú Macedonia, para ugá'anu' lu yödzo Éfeso, en inná bë'enu' bal-lë' bönni' ni' cabí ulu'sédinë' tu' xibá yúbölö, <sup>4</sup> en cabí ilunë' zxön yugu' didza' ridasö, en lágaca ziántë'rö cö' xuz xtó'ogaca bönachi, yugu' le tun ga tu'í ládxí'gaca bönachi le nácgaca nítisö. Yugu' le caní biti' tun tsutsu bönachi queë' Dios ca naca le ta'yéajlë' Lë'.

<sup>5</sup> Le rë'ëni gun lë ni rea' li', naca para ila'dxi'i bönachi luzë'eguequi, naca idú ládxí'gaca, en gaca dxi'a le ta'zá' ládxí'gaca, en gaca idú le ta'yéajlë' Dios. <sup>6</sup> Ca nácgaca lë ni, biti' bulu'rúajë' bal-lë' bönni' dxi'a, pero gula'guélë'ë tu' nöza yúbölö, en tunë' bal yugu' le biti' nácatë. <sup>7</sup> Té'ënnë' ulu'sédinë' bönachi ca naca le rinná bë' xibá queë' Dios, sal-la' biti' ta'yéajni'inë' lë na' tu'sédinë', en biti' ta'yéajni'inë' le ta'nnë' nácatë.

<sup>8</sup> Rë'u nöziru' naca dxi'a xibá gunná bë'ë Dios, channö nu rugún le dxin ca ral-la' gun. <sup>9</sup> Lë ni nöziru': Dios gudixjë' xibá queë', calëga para inná bë'e bönachi tsahui', pero para inná bë'e bönachi caní:

Nupa ta'dá'baga' le rinná bë' xibá na'.

Nupa biti' túngaca ca rinná bë' xibá na'.

Nupa tu'cá'ana Dios cá'asö.

Nupa tun le naca xihui'.

Nupa biti' túngaca Dios zxön.

Nupa tu'cá'ana le nequi queë' Dios cá'asö.

Nupa tuti xuz xiná'aguequi.

Nupa tuti bönachi.

<sup>10</sup> Nupa tun le ruá' dö'.

Yugu' bönni' nacuá'lenë' la' löjödxi bönni'gaquië'.

Nupa ta'bán yugu' bí'ido'.

Nupa ta'zí' yë'.

Nupa tun tsutsu xtídzá'guequi, ta'nná le cabí nácatë.

Nupa ta'dá'baga yugu' xibá tsahui'.

<sup>11</sup> Nöziru' naca caní tu' bidxín queëru' didza' dxi'a buzá' ládxë'ë Dios queëru'. Lë' náquië' lá'ayi, en budödë' lu na'a didza' dxi'a na' runa' libán que.

*Pablo rë' Cristo: "Xclenu'" tu' buéchi' ládxë'ë lë'*

<sup>12</sup> Rea'-në' Xanru' Jesucristo, Nu rutipa ládxa'a, "Xclenu'" tu' buzöni ládxë'ë neda', en buzöë' neda' guna' xichinë'. <sup>13</sup> Caní benë' sal-la' zí'alö neda' gunné' zi'a queë', en gudxía ládxa'a bönachi queë', en zían le bi'a

dö' quéguequi, pero Cristo buéchi' ládxë'ë neda', tu' bena' caní lu yöl-la' bití réajni'i quia' cate' ni' bití réajlë'ënida' Lë'. <sup>14</sup> Na'a, zxöntëro naca le buzá' ládxë'ë quia' Xanru' Jesucristo, lë na' run ga réajlë'ëru' Lë', enca' ga nadxí'iru'-në'.

<sup>15</sup> Didza' idütë li lë ni, en le naca lesaca' ila'zì' lu ná'agaca yúgu'të bönachi, le rnna: Lë cazë' Jesucristo bidë' yödzo'lió ni para busölë' bönachi dul-la', ate' busölë' neda' sal-la' nácara' bönni' dul-la' ca yúgu'të bönachi. <sup>16</sup> Que lë ni na' buéchi' ládxë'ë neda', ate' bulu'e lahui Jesucristo ni'a quia' neda', bönni' dul-la', ca naca yöl-la' zxön ladxi' idú queë', para gaca' tu le rulu'í' lógaca nupa ila'yéajlë' Lë', en gata' quéguequi yöl-la' na'bán idú. <sup>17</sup> Na'a rnní'a: ¡Yöl-la' ba Dios, Nu rinná' bë'tica'sö, Nu catu caz údxi que, en Nu bití' gaca ilé'ëru', la's dui Dios Nu nözi caz yúgu'të! ¡Queë' Lë' gácatica'sö yöl-la' run bal, en yöl-la' ba, na'a dza, en yúgu'të dza zá'gaca! ¡Ca' gaca!

<sup>18</sup> Zxí'ina'do' Timoteo, rudöda' lu no'o xibá ni para gunu' xichinë' Dios ca runë' tu bönni' idú ládxë'ë rejë' gudil-la, en para uzi'u xibë' yugu' le gula'guixjö' zí'alö nupa ni' gulu'í' didza' uláz queë' Dios ca gaca quiu'. <sup>19</sup> Len yöl-la' réajlë' quiu' Cristo ral-la' gunu' caní, naca idú dxi'a icja ládxi'do'o. Chigula'chixi gula'nigui bal-la bönachi, nupa bulu'zóa tsölá'alö le réajlë'ëru' Cristo. <sup>20</sup> Caní gulunë' Himeneo, en Alejandro, nupa na' busana' lu na' Satanás tu' xihui' para ila'zëdë' ca ral-la' ilunë', para cabirö ila'nnë' zì'ë que le nequi queë' Dios.

## 2

### *Le rusedi rë'u ulídzaru'-në' Dios*

<sup>1</sup> Que lë ni na' le naca lo le richízia' icja ná'agaca bönachi naca ca ral-la' ulídzaru'-në' Dios, en ca ral-la' gáta'yuru' lahuë', en ca ral-la' inábiru'-në' gunnë' bi riquíniru', en ca ral-la' guiëru'-në': "Xclenu'." Yugu' lë ni ral-la' gunru' uláz quéguequi yúgu'të bönachi. <sup>2</sup> Lë'sca' caní ral-la' gunru' uláz quégaca nupa ta'nná' bë', en quégaca yúgu'të nupa ná'agaca lo. Caní ral-la' gunru' para gaca dxi'a queëru', en gata' queëru' yöl-la' riböza tsáhu'ido'. Ral-la' gunru' caní lu yöl-la' réajlë' queëru' Dios, en lu yöl-la' ba'a ladxi' queëru'. <sup>3</sup> Lë ni naca dxi'a, en le raza ládxë'ë Dios, Nu rusólá' rë'u. <sup>4</sup> Dios caz rë'ënë' ulu'lágaca yúgu'të bönachi, en rë'ënë' ilún'bë'e le naca idütë li. <sup>5</sup> Tuzë' náquië' Dios, en tuzë' bönni' ruúnë' dzaga Dios, en bönachi. Nu ni naca Jesucristo, Nu gulaj bönachi. <sup>6</sup> Lë cazë' budödi cuinë' lu yöl-la' guti, le benë' tu' nözi dul-la' nabá'agaca yúgu'të bönachi. Dios benë' ba nalí queë' cate' bidxín dza queë' gútië'. <sup>7</sup> Ca naca lë ni, Dios buzöë' neda' para guna' libán que, en gaca' gubáz nasól-lë'ë Cristo, para usédigacada' bönachi izá'a ca naca le réajlë'ëru' Cristo, en ca naca le naca idütë li. Rilítëda', en bití' ca' rizí' yë'a.

<sup>8</sup> Na'a, rë'ënda' ulu'lidzë' bönni' Dios, en iláta'yüë' lahuë' gáti'tës, ná'cagaquië' idú dxi'a, en cabí ila'lenë' luzá'agaquië', en cabí ila'dil-la dídza'gaquië'. <sup>9</sup> Lë'sca' caní, rë'ënda' ilácunu nigula le naca ba'a. Le naca lachi le ral-la' ulu'lu'ínu lahui naca yöl-la' nöxaj ladxi', en le naca idú ladxi', en calëga le tu'pá'asinu icja lógacanu len oro, en yugu' bugá, en lari' nazá'ca'da'. <sup>10</sup> Yugu' le dxi'a tunnu ulu'lu'í' lahui le ná'cagacanu ca na' run le tá'cunu le naca ba'a. Caní ral-la' ilunnu nigula nún'bë'gacanu Dios. <sup>11</sup> Ral-la' ila'cuá'anu yugu' nigula dxisö cate' nu rusedi lé'gacanu, en ila'cuá'anu nöxaj. <sup>12</sup> Bití' runna' yugu' nigula lataj ulu'sédinu, en calëga ila'nná' bé'enu yugu' bönni'. Ral-la' ila'cuá'anu dxisö ga nudúbigaca

bönachi queë' Cristo. <sup>13</sup> Caní ral-la' gaca, tu' buzóë' Dios zí'alö Adán, ate' gudödi na' buzóë'-nu Eva. <sup>14</sup> Adán na', bití' guzxi' ye'e tu' xihui' lë', pero nigula queë', guzxi' ye'e lënu. Caní guca, gudítsjanu xibá queë' Dios, <sup>15</sup> pero ulanu nu nigula ruzóanu-bi' bí'ido' channö gúntica'sinu ca röjlöz le réajlë'ëru' Dios, en yöl-la' nadxi'i, en channö gácanu idú dxi'a, en idú ladxi'.

### 3

#### *Ca ral-la' ilácagaquië' bönni' tapa chi'ë bönachi queë' Cristo*

<sup>1</sup> Didza' idútë li lë ni rnna: Channö ru'í ládxi'ë nu bönni' gáquië' nu gapa chi'i bönachi queë' Cristo, dxin dxi'a rizé ládxi'ë. <sup>2</sup> Nu bönni' rapa chi'ë bönachi queë' Cristo run bayudxi gáquië':

Tu bönni' cuntu nu gaca bi innë queë'.

Zoa túzinu nigula queë'.

Ral-la' gáquië' ban ladxi', en idú ladxi', en nōxaj ladxi'.

Ral-la' gu'ë ga ila'cu'ë bóchi'ru' ta'dxinë' lidxi'.

Ral-la' gáquië' bönni' nazéqui'de'enë' usédinë' bönachi.

<sup>3</sup> Bití' gáquië' bönni' re'jë', en calëga bönni' sínia'.

Bití' gaquië' bönni' rizé ládxi'së' si'ë dumí.

Ral-la' gáquië' bönni' dxi'i ladxi', en zxön ladxi'.

Bití' gáquië' bönni' ruhuídi'në'.

<sup>4</sup> Ral-la' gáquië' bönni' rinná bé'enë' dxi'a bönachi nacúa' lidxi'.

Ral-la' ilunbi' zxi'inë' ca rnna xtídzë'ë lu yöl-la' run bal xúzgcabí'.

<sup>5</sup> ¿Naru' huácatsö tu bönni' gapa chi'ë bönachi queë' Dios channö cabí raca inná bé'enë' dxi'a bönachi nacúa' lidxi'? <sup>6</sup> Bití' ral-la' gáquië' tu bönni' si' gusí lahuë' tē'ë Cristo, para cabí tödi bē' gun ba zxön cuinë', en bití' gaca queë' ca na' guca que tu' xihui', nu ben ba zxön cuini, ate' Dios guchúguië' que tsöjgá'ana lataj chul-la. <sup>7</sup> Lësca' ral-la' gáquië' bönni' ta'nná dxi'a queë' nupa cabí nabábagaca bönachi queë' Cristo, para cabí soa nu uzóa lë' tsólá'alö, en para cabí idzunë' lu yalaj que tu' xihui'.

#### *Ca ral-la' iláquië' bönni' tácalenë' bönachi queë' Cristo*

<sup>8</sup> Lësca' caní ral-la' iláquië' bönni' tácalenë' bönachi queë' Cristo:

Ral-la' iláquië' bönni' idú ládxi'gaquië'.

Bití' iláquië' bönni' tu'rixë' didza'.

Bití' iláquië' bönni' té'ajë'.

Bití' iláquië' bönni' ta'zé ládxi'së' dumí.

<sup>9</sup> Ral-la' gaca ilapa chi'ë idútë le réajlë'ëru' Cristo.

Ral-la' ilaca idú dxi'a icja ládxi'do'gaquië'.

<sup>10</sup> Yugu' bönni' ni ral-la' si' bé'ëli' légaquië' zí'alö, ate' ní'irö gata' lu ná'agaquië' ilácalenë' bönachi queë' Cristo, channö cabí zoa nu gaca bi innë quégaquië'. <sup>11</sup> Lësca' caní, nigula que queëgaquië' ral-la' ila'cuá'anu idú ládxi'gacanu, en cabí ilácanu unnë que luzë'e. Ral-la' ilácanu zxön ladxi', en ilácanu li ladxi' lu yúgu'të le tunnu. <sup>12</sup> Yugu' bönni' ilácalenë' bönachi queë' Cristo ral-la' soa túzinu nigula que queëgaquië'. Lësca' ral-la' ila'nná bé'enë' dxi'a zxi'inigaquië', enca' bönachi ulidxi' que queëgaquië'. <sup>13</sup> Run bayudxi gaca caní, tu' ta'déli'në' lataj ga ilún bal bönachi xtídza'gaquië', channö tunë' dxi'a dxin tunë' tácalenë' bönachi queë' Cristo, ate' ilácarë' rugu ladxi' para ilu'ë didza' ca naca le réajlë'ëru' Jesucristo.

*Le bigachi' que le reaj ládxi'ru'-në' Dios*

14 Yugu' didza' ni ruzúaja' quiu' lu guichi, sal-la' runa' löza uduyútea' li'. 15 Channö huadzéda', ruzúaja' quiu' didza' ni para inözinu' naca ral-la' gunu' lógaca bönachi nacua' lidxé' Dios, nupa nácacaga bönachi queë' Dios ban, en nácacaga tsutsu, en ta'guixjö' dxi'a le naca idútè li. Nácacaga ca yugu' ya'zxón, en le nunída'gaca zö'ö, le nácacaga tsutsu, en ta'zón yu'u. 16 Le nácatè, zxöntèrö naca le bigachi' que le reaj ládxi'ru'-nè' Dios, ca na' nazúaj lu guichi le rnna:  
 Dios buluí'i lahuë', gúquië' bönachi.  
 Guca bè' náquië' tsahui' tu' guzóalenë' Dios Bö' Lá'ayi Lë'.  
 Gulácalenë' gubáz lá'ayi queë' Dios Lë'.  
 Guca libán queë' lógaca bönachi izá'a.  
 Gula'yéajlë' bönachi yödzölió Lë'.  
 Dios buchisë' Lë' xitsá' ga nayëpisëtèrë'.

## 4

### *Nupa ulu'huöaj ládxi'gaca ca naca le réajlë'ëru'-në' Cristo*

1 Yálajdo' riguixjö' è Dios Bö' Lá'ayi, rnnë': Dza tsöjsétëgaca, ila'dá'baga' bal-la bönachi Cristo. Ulu'huöaj ládxi'gaquië' ca naca le réajlë'ëru' Cristo. Ulu'zë nágagaquië' xtídza'gaca bönachi nacua'len bö' ta'zì' yë' léguequi, ate' ulu'zë nágagaquië' yugu' xibá quëguequi bö' xihui'. 2 Ulu'zë nágagaquië' xtídza'gaca bönachi tu'luí'isö tsahui' cuínguequi. Yugu' bönachi na' tuí' didza' le cabí nácatè, en chinazidi ládxi'do'guequi, para cabí uxösa léguequi. 3 Caní naca, tu'záguë'è xinözguequi nupa tè'ëni ulu'tsaga ná'agaca, en ta'nná bé'enë' bönachi para cabí ilágugaca le nagu'ë Dios para uzí'iru' xibé, lè na' huáca ilágugaca nupa ta'yéajlë' Dios, nupa na' chinún'bë'gaca le naca idútè li, en tè' Dios: "Xclenu'" cate' tahuë' le. 4 Dxi'a naca yúgu'tè le benë' Dios, en biti' bi ral-la' uzóaru' tsölá'alö channö ráguru' le, en rëru'-në' Dios: "Xclenu'." 5 Rusedi xtídzë'è Dios rë'u, Lë' únë' dxi'a yúgu'tè le gáguru' channö ulídzaru'-në' Dios, en inábiru'-në' gun lá'ayë' lè na' gáguru'.

### *Ca rurúajë' dxi'a huen dxin queë' Jesucristo*

6 Channö usédinu' yugu' böchi' luzá'aru' yugu' didza' ni, urúaju' dxi'a, en gacu' huen dxin dxi'a queë' Jesucristo, en gaca bè' nazédu' dxi'a ca naca didza' que le réajlë'ëru'-në' Cristo, en ca naca xibá dxi'a rapa chi'u. 7 Gurú'una yugu' didza' ridasö que yödzölió ca naca didza' tuí'ínu yugu' nigula gula. Béntica'sö le gun ga gacu' tsutsu para gunu' ca rë'ënë' Dios. 8 Látido'os uzi'u xibé gunu' le gun ga gácarö nál-la ni'a no'o, pero idú uzi'u xibé gunu' ca rë'ënë' Dios. Cate' runru' caní, lè ni run ga runru' löza sóaru' ibanru' yödzölió ni, enca' sóaru' ibanru' dza zá'gaca, tödi uzá'aru' yödzölió ni. 9 Didza' idútè li lè ni, en le naca lesaca' ila'zì' lu ná'agaca yúgu'tè bönachi. 10 Que lè ni na', rusáca'da' zì' cuinru' runru' dxin, tu' runru' löza Dios ban. Cristo gútië' para usölë' yúgu'tè bönachi. Tu'zì' xibé le benë' nupa na' ta'yéajlë' Lë'.

11 Gunná be'e, en busedi bönachi ilún yugu' lè ni. 12 Cuntu nu ral-la' uzóa li' tsölá'alö tu' nacu' bi'i ra'bán, pero ral-la' gunu' le uluí' nupa ta'yéajlë' Dios ral-la' ilún ca runu' li'. Caní uluí'ínu' légaquië':  
 Len didza' ru'u, en len le runu'.  
 Ca nadxí'ínu' luzó'o, en ca ru'u lataj zóalenë' Dios Bö' Lá'ayi li'.  
 Ca runu' ca rnno', en ca nacu' idú tsahui'.

<sup>13</sup> Tsanni za'a idxina' quiu', bé'tica'sö ladxi' ulabu' guichi lá'ayi lógaca bönachi nacua' ga ni' zu'. Guchiza icja nágagaquié' lè ni, en busedi légaquié'. <sup>14</sup> Biti' udödu' cá'asö le buzá' ládxe'ë Dios quiu', lè na' benné' quiu' ca na' gula'nná nupa ni' guluí' didza' uláz queé' Dios, cate' ni' bönni' gula tapa chi'ë bönachi queé' Cristo gula'xóa ná'agaquié' li', en bulu'lidzè' Dios.

<sup>15</sup> Béntica'sö yugu' lè ni. Bé'tica'sö ládxe'u gunu' caní, para ila'lé'e yúgu'tè bönachi ca na' zeaj ridéli'nu' le nequi queé' Cristo. <sup>16</sup> Gudapa chi'i cuinu', en gudapa chi'i xibá rusédiru'. Béntica'sö yugu' lè ni, ate' channö gunu' caní, uló' li', en ulu'lágaca ca' nupa ila'yöni li'.

## 5

### *Ca ral-la' gunbi' Timoteo ni'a quégaca bönachi queé' Cristo*

<sup>1</sup> Biti' uzenu' bach yugu' bönni' gula, pero guchiza icja nágagaquié' didza', tsca nácagaquié' xuz casu'.

Guchiza icja nágagacabi' bi'i bönni' ra'bán didza', tsca nácagacabi' bi'i böchi' casu'.

<sup>2</sup> Guchiza icja nágagacanu nigula gula didza', tsca nácagacanu xiná' casu'.

Guchiza icja nágagacabi' bi'i nigula ra'bán didza', tsca nácagacabi' bi'i zan casu', ca na' röjlöz le naca idú dxi'a.

<sup>3</sup> Ben bal yugu' nigula ba guti bönni' que queégacanu, nácagacanu túzinu.

<sup>4</sup> Channö zóanu tu nigula caní nacua'abi' bi'i queénu o xzi'ini xi'sóanu, ral-la' ila'zédabi' ilunbi' ca ré'ëné' Dios, para ilácalenbi' zí'alö bönachi nacua' lédxigacabi', en ulu'bí'ibi' quégaquié' xuz xiná'agacabi'. Lè ni naca dxi'a, en le raza ládxe'ë Dios. <sup>5</sup> Na'a, nigula na' nagá'ananu túzinu, runnu löza Dios, ate' rëla, en te dza rinábatica'sinu lahué' Dios, en rulídzanu Lè' ni'a quégaca bönachi queé', <sup>6</sup> pero nigula túzinu na' runnu ca naca le rizé ládxi'nu nácanu ca tu nigula chinátinu cate' ni zóanu nabannu. <sup>7</sup> Lësca' caní, gunná be'e bönachi nacua' ga ni' zu', para ilún ca sa'yéaj yugu' lè ni, para ilaca bönachi cantu nu gaca bi inné quéguequi. <sup>8</sup> Channö zoa nu bönni' cabí rugahué' yugu' di'a dza queé', en le nácarö lo, channö cabí rugahué' bönachi nacua' lidxé', chigudá'bagué'ë le réajlè'ëru' Cristo, en nácaré' xihui' ca nu cabí réajlè' Dios.

<sup>9</sup> Túzinu nigula zoanu túzinu caní chiyú'urönu ca tsónnalalaj iz huáca ibábanu nupa gácalenli', channö cabí bucá'ananu-né' bönni' queénu para sóalennu-né' ia'tué' bönni'. <sup>10</sup> Run bayudxi soa nu gun ba nalí queénu ca nácagaca le dxi'a runnu.

Gácalenli'-nu channö buscúlunu-bi' yugu' bí'ido', en channö ru'ínu ga ila'cuá' böchi'ru' zá'gaquié' yödzö zi'tu', en channö ru'ínu le ilè'aj ilágugaca bönachi queé' Dios, en channö rácalennu nupa ta'guí' ta'zaca', en channö rúntica'sinu yúgu'tè le naca dxi'a.

<sup>11</sup> Yugu' nigula túzinu biti' yuf'igacanu tsónnalalaj iz, biti' ibábagacanu nupa gácalenli', tu' ilunnu ca ta'zësö ládxi'gacanu, en ila'dá'bagá'nu Cristo, en ilè'ëninu ulu'tsaga ná'agacanu leyúbölö. <sup>12</sup> Caní gaca, ila'bága'nu dulla' tu' tu'zóanu tsölá'alö le gula'yéajlè'ënu Cristo zí'alö. <sup>13</sup> Lësca' ilácanu nigula xöhuédi, en nigula ta'dasö ca', en calégasö ilácanu xöhuédi, pero lësca' ilácanu nigula unné que luzé'e, en tsójgútsa'gacanu ga yúbölö, en ila'nnanu le cabí nácatè. <sup>14</sup> Que lè ni na', ré'ënda' ulu'tsaga ná'gacanu leyúbölö nigula túzinu caní yú'ugacanu iz cuidi', en ulu'scúlanu-bi' yugu'

bí'ido', en ila'nná bé'enu bi'i nacuá'abi' yu'u que queégacanu, para cabí iluí'inu nu ridá'baga' rē'u lataj bi innē queēru', rē'u na' réajlě'ēru' Cristo. <sup>15</sup> Caní ral-la' gaca, tu' chibulu'bíga'nu bál-lagacacnu, ate' tunnu ca rē'ēni Satanás tu' xihui'.

<sup>16</sup> Channō nūti'tēs bōnni' o nigula nu réajlě' Cristo, nacuá'anu nigula túzinu lídxigaca nupa na', ral-la' ilácalen légacanu, para cabí ulu'saca' zi' bōnachi queē' Cristo. Caní gaca, bōnachi queē' Cristo na' gaca ilácalen yugu' nigula nagá'anagacanu túzinu.

<sup>17</sup> Benrō bal yugu' bōnni' gula tapa chi'ē bōnachi queē' Cristo, yugu' bōnni' na' ta'nná bē'ē dxi'a, en bēntērō ca' bal yugu' bōnni' gula na' tunē dxin, tunē libán, en tu'sédinē' bōnachi. <sup>18</sup> Nazúaj lu guichi lá'ayi le rna: "Biti' cu'u du ruá'aba' bēdxi na' rulíbiba' zxoá' xtila." Rna ca': "Náquiē' lesaca' nu bōnni' huen dxin si'ē lazxjē'."

<sup>19</sup> Biti' si' lu no'o didza' ruí'i nu ruzegui didza' tu bōnni' gula rapa chi'ē bōnachi queē' Cristo, channō cabí nacuá' chopá tsonna nupa tun ba nalí que le benē'. <sup>20</sup> Nupa túntica'sō dul-la', busidxi léguequi lógaca yúgu'tē bōnachi queē' Cristo para iladxi ia'zica'rō bōnachi ni' Dios. <sup>21</sup> Ni'a queē' Xanru' Dios, en Xanru' Jesucristo, en ni'a quégaquiē' gubáz lá'ayi rō queē', rinná bé'eda' li' gunu' ca ta'nná didza' ni. Tuz ca ral-la' uchi'a usōróu' yúgu'tē bōnachi, en biti' gunu' bal tuzē' bōnni'. <sup>22</sup> Cuntu nu bōnni' ixóatē no'o, cabí gunu' ga gáquiē' huen dxin queē' Cristo, para cabí ibágu'u le runē' channō gunē' bōnni' na' dul-la'.

<sup>23</sup> Bítirō guí'ju' nísasō. Tu' rúntica'sō bayá' lē'u ral-la' guí'ju' láti'do' xisi uva nal-la para cō' dxi'a lē'u.

<sup>24</sup> Yugu' dul-la' quéguequi bal-la bōnachi ila'lá' lahui zí'alō cate' si' ila'dxín ga uchi'a usōrōē' Dios léguequi, ate' tōdi ni' ila'lá' lahui dul-la' nabága'gaca ia'zica'rō bōnachi. <sup>25</sup> Lēasca' caní, ila'lá' lahui dxin dxi'a núngaca bōnachi, ate' channō cabí nalá'gaca lahui, cuntu nu bōnni' gaca ucáchē'ē tsaz dxin na' nunē'.

## 6

<sup>1</sup> Yúgu'tē bōnni' nadó'ogaca ral-la' ilúndē'ē bal xángaquiē', para cabí gaca nu innē zi' que La lá'ayi queē' Dios, en que xibá queē'. <sup>2</sup> Nupa ni' nacu'ē xángaca ta'yéajlě'ē Cristo, bití' ral-la' ulu'cá'ana cá'asō légaquiē' tu' nácagaquiē' bōchi'guequi. Ral-la' ilunrō dxi'a xichíngaquiē' tu' ta'yéajlě'ē Cristo, bōnni' ni' tu'zi'ē xibé dxin dxi'a na', tu' nadxí'inē' Lē cazē' légaquiē'. Ca naca lē ni, busēdi bōnachi nacuá' ni', en guchiza le icja nágagaquiē'.

### *Le reaj ládxi'ru'-nē' Dios le ruzí'iru' xibé*

<sup>3</sup> Channō zoa nu bōnni' rusédinē' xibá yúbölō, en bití' rusédinē' yugu' didza' dxi'a queē' Xanru' Jesucristo, ca naca xibá na' rusedi rē'u ca ral-la' gunru' ca rē'ēnē' Dios, <sup>4</sup> bōnni' ni' run ba zxon cuinē', en bití' bi nōzinē'. Didza' bití' naca dxi'a rizē ládxe'ē ca nácagaca didza' bōniga, en didza' bizxaj, yugu' le tun ga tu'zxé'e bōnachi luzé'eguequi, en ta'díl-lalen luzé'eguequi didza'. Lēasca' tun didza' caní ga ta'nnē zi' bōnachi que luzé'eguequi, en ta'zá' ládxi'gaca que luzé'eguequi le cabí nácatē. <sup>5</sup> Lēasca' caní tun ga ta'díl-latica'sē' didza' bōnni' bití' ta'yéajni'inē', nupa bití' nazí' lu nē'eguequi le naca idútē li. Téquini huáca ila'zi' dumí zían channō ilúngaca tsōzxón nupa ta'yéaj ládxi'gaca Dios. Gucuíta ga nacuá' bōnachi caní. <sup>6</sup> Zxon naca le ruzí'iru' xibé cate' len yöl-la' ribōza zxon ladxi' reaj ládxi'ru'-nē' Dios. <sup>7</sup> Bití' bi nuá'aru' cate' ridxinru' yōdzölió, en lēasca' caní,



biti' bi uá'aru' cate' uzá'aru' yödzülió ni. <sup>8</sup> Que læ ni na', channö dësö queëru' le gáguru', en le gácuru', ral-la' udzéjaru'. <sup>9</sup> Yugu' bönni' té'enné' gata' quégaquié' yöl-la' tsahui', gaca quégaquié' le si' bé' légaquié' le xihui', ate' ila'yu'è lu yalaj que tu' xihui', ate' lu yöl-la' biti' bi nözi quégaquié' zían le ila'zè ládxi'gaquié', le ilún ditaj légaquié'. Yugu' læ ni ulu'suniti légaquié', en ilún ga ila'nítié' tsaz. <sup>10</sup> Tu' ta'zè ládxi'gaca bönachi dumí, læ ni run ga tun yúgu'tè le cabí naca tsahui'. Bal-lè' bönni', tu' ta'zè ládxi'gaquié' le, bulu'cá'ané' le gula'yéajlè'è Cristo, en chiraca quégaquié' zían le tu'saca' zi' légaquié'.

*Nu run dxin queë' Cristo naca ca tu bönni' rejë' gudil-la*

<sup>11</sup> Na'a, bönni' queë' Dios, gucuíta ga raca le caní.

Bë'tica'sö ládxi'u gunu' le naca tsahui', en le rë'ëné' Dios.

Guyéajlè'tica'sé' Cristo, en bidxi'i yugu' luzó'o.

Bë' ládxi' gacu' zxön ládxi', en nöxaj ládxi'.

<sup>12</sup> Ca runé' tu bönni' idú ládxi'è rejë' gudil-la,

ben dxin que le réajlè'ëru' Cristo, ate' beni quiu' yöl-la' na'bán idú.

Para gaca caní bulídzè' Dios lí'. Dxi'a guca le gunnó' yalaj lulu ca réajlè'u

Cristo, læ na' gunnó' lógaca zían nupa tun ba nalí que didza' bë'u. <sup>13-14</sup> Ni'a

queë' Xanru' Dios, Nu na' nabánigaca yúgu'tè le nacua', enca' ni'a queë'

Jesucristo, Nu ben ba nalí le naca dxi'a le gunné' yalajdo' lahuë' Poncio

Pilato, rinná bé'eda' lí' gun chi'u yugu' læ na' gunná bé'ené' Cristo rë'u.

Ral-la' gacu' idú tsahui', en biti' bi gunu' le güf'i lataj nu bi inné' quiu', ga

idxinté' dza ni' uluf'i lahuë' Xanru' Jesucristo. <sup>15</sup> Cate' idxín dza na' huödé'

Jesús, Dios ulu'è lahui Lè'.

¡Dios náquié' lá'ayi!

¡Tuzé' Lè' dè lu në'è yöl-la' unná bë',

en rinná bé'ené' yúgu'tè nupa ta'nná bë',

en náquié' ca' Xángaca yúgu'tè nupa nácagaca xan!

<sup>16</sup> ¡Tuzé' Lè' zóatica'sé'!

¡Zoë' lu bení' ga biti' gaca nu idxín rácasö que!

¡Catu caz nu bilé'e Lè', en biti' gaca nu ilé'e Lè'!

¡Queë' Lè' gácatuca'sö le run Lè' bal, en yöl-la' unná bë'!

¡Ca' gaca!

<sup>17</sup> Gunná be'e yugu' bönni' dè quégaquié' yöl-la' tsahui' dza ni zóaru' na'a,

para cabí ilún ba zxön cuíngaquié', en para cabí ulu'zxöni ládxi'gaquié'

yöl-la' tsahui' na' biti' naca löza. ¡Ral-la' iluné' löza Dios ban, Nu rúnnada'

queëru' yúgu'tè le ruzí'iru' xibé! <sup>18</sup> Gunná be'e légaquié' iluné' le naca

dxi'a, para ila'yanda' dxin dxi'a tuné', læ na' naca tu yöl-la' tsahui' idú.

Ral-la' bi ulu'nödzejé' quégaca bönachi yechi', en iluf'i ládxi'gaquié' léguequi.

<sup>19</sup> Channö iluné' caní, ulu'tubé' yöl-la' tsahui' na' naca idú, le ulu'zi'è xibé

dza si' za', en ila'déli'né' yöl-la' na'bán idú.

*Le gulu'è Pablo lu ná'abi' bi'i Timoteo*

<sup>20</sup> Bócha'ado' Timoteo, ben chi'i le nadödi lu no'o. Gucuíta ga nacua'

nupa tuí' didza' cá'asö, en yugu' didza' biti' nazaca', en yugu' didza'

bizxaj, yugu' didza' na' tuí' nupa ta'nnasö tácada', ate' nazi' yé'eguequi ca

naca læ na' tun. <sup>21</sup> Bal-la bönachi gula'zí' lu në'eguequi yugu' didza' caní,

ate' gula'chixi gula'nigui ca naca le réajlè'ëru' Cristo.

Rinábida'-né' Dios uzá' ládxi'è quiu' le nácagaca dxi'a queë'.

¡Ca' gaca!

## DIDZA' BUROPI GUSÖL-LÈ'È PABLO QUEËBI BI' TIMOTEO

*Pablo rugapë' Dios bi'i Timoteo*

<sup>1</sup> Neda', Pablo, naca' gubáz nasól-lè'è Cristo. Caní naca' tu' rë'ënë' Dios gaca' caní, para caní gaca le guzxi' lu nè'è, gunnë' queëru' yöl-la' na'bán idú, le ruzá' ládxë'è Jesucristo queëru'. <sup>2</sup> Rugapa' Dios li', böcha'ado' Timoteo. Nacu' ca xxi'ini caza' tu' benru' tu zxon xichinë' Cristo, ate' nadxi'ida' li'. Rinábida'-në' Xúziru' Dios, enca' Xanru' Jesucristo, uzá' ládxë'è quiu', en huéchi' ládxë'è li', en gunë' ga cö' dxi icja ládxi'do'o.

*Timoteo ral-la' gunbi' ba nali queë' Jesucristo*

<sup>3</sup> Rea'-në' Dios: "Xclenu'" ca naca quiu' cate' rulidza'-në' Dios. Biti' rizóa dxía' rinaba' ni'a quiu' rëla, en te dza lahuë' Dios, Nu na' runa' xichinë' idú ládxa'a ca na' gulunë' xuz xtá'ahua'. <sup>4</sup> Cate' røjneda' ca na' gurödxu', rizë' ládxa'a ulé'eda' li', para gaca udzëjada' idú ládxa'a. <sup>5</sup> Rea'-në' Dios: "Xclenu'" tu' zoa le run ga røjneda' ca réajlë'u Cristo idú ládxi'u. Lësca' caní, gula'yéajlë'ënu xinó'o gula Loida, enca' xinó'o Eunice Lë' zí'aló ca li', ate' runa' löza, lësca' caní réajlë'u Lë' na'a.

<sup>6</sup> Tu' naca caní, rusá'a ládxi'u para usabanu' le bennë' Dios quiu', lë na' bidxin quiu' cate' ni' guxóa na'a li', en bulidza'-në' Dios. <sup>7</sup> Bö' na' bennë' Dios queëru' bití' naca tu bö' le gun ga gádxiru', pero bennë' queëru' Bö' Lá'ayi Nu run ga náparu' yöl-la' huáca, en run ga nadxi'iru' luzá'aru', en run ca' ga rinná be'e cuinru'. <sup>8</sup> Que lë ni na', bití' utuí'inu' gunu' ba nali queë' Xanru', en bití' utuí'inu' ca raca quia' neda' ni, nadzuna' lidxi guíë tu' runa' xichinë', pero ben tsözxön nupa ta'guí'i ta'zaca' tu' tun libán que didza' dxi'a. Dios gunnë' yöl-la' huáca quiu' para gunu' caní. <sup>9</sup> Dios caz busölë' rë'u, en bulidzë' rë'u para gácaru' idú dxi'a. Bití' bulidzë' rë'u tu' zoa le dxi'a benru', pero bulidzë' rë'u tu' gu'uni quézinë' Lë', en tu' ruzá' ládxë'è caní queëru'. Dza ni'te buzóë' caní queëru' zí'atëlö ca guta' yödzölió ni, tu' néquiru' queë' Jesucristo. <sup>10</sup> Na'a, chibuluf'i lahui le ruzá' ládxë'è Dios queëru', tu' buluí'i lahuë' Jesucristo Nu rusólá rë'u. Bugüë' yöl-la' guti, en bulu'e lahui yöl-la' na'bán idú na', le cabí ca' initi. Caní naca ca rnna didza' dxi'a.

<sup>11</sup> Cristo buzóë' neda' para guna' libán que didza' dxi'a na', en para gaca' gubáz queë' para usëdigacada' bönachi izá'a. <sup>12</sup> Que lë ni na' riguí'i rizáca'a ca' yugu' le raca quia' ni, pero bití' rutuí'ida', tu' núnbë'a Nu na' réajlë'a. Runa' löza Lë', napë' yöl-la' huáca gapa chí'ë le budöda' lu nè'è ga idxintë dza ni' huödë'.

<sup>13</sup> Didza' dxi'a na' biyönnu' bena' libán que ral-la' gaca quiu' tu le rulu'i ca ral-la' usëdinu' bönachi ca réajlë'ëru' Jesucristo, en ca nadxi'iru' Lë'. <sup>14</sup> Ben chí'i le naca dxi'a na' nadödi lu no'o, ate' gaca gunu' caní len yöl-la' huáca queë' Dios Bö' Lá'ayi, Nu zóalen rë'u.

<sup>15</sup> Chinöz quézinu' ca na' gulunë' zian bönni' ta'yéajlë'è Cristo nacu'è luyú Asia bulu'béaj ládxi'gaquië' neda'. Figelo, en Hermógenes nabábagaquië' bönni' ni. <sup>16-17</sup> Rinábida'-në' Xanru' Dios huéchi' ládxi'è bönachi nacué' lidxë' Onesíforo, tu' butipë' ládxa'a bönni' ni zían luzuí. Cate' bidxinë' Roma, idú ládxi'è buguiljë' neda', ate' budzölinë' neda'.

Biti' butuí'inè' ni'a quia' neda' tu' nadzuna' lidxi guié' ni, nága'a du guié'.  
 18 Rinábida'-nè' Xanru' huéchi' ládxë'è' lè' dza ni' idxinè' lahuè' Dios.  
 Chinóz quézinu' ca na' gúcalenè' bönni' ni rë'u, cate' ni' guzóaru' yódzó  
 Éfeso.

## 2

*Ral-la' gácabi' Timoteo ca tu bönni' idú ládxë'è' rejë' gudil-la*

<sup>1</sup> Na'a, xzí'ina'do', butipa ládxu'u ca naca le ruzá' ládxë'è' Jesucristo quiu'.  
<sup>2</sup> Didza' biyönnu' bè'a lógaca zían nupa tun ba nalí que, didza' ni budödi lu ná'agaquiè' bönni' tunè' ca ta'nnè', bönni' gaca ulu'sédinè' ca' ia'bal-la bönachi.

<sup>3</sup> Ral-la' guá' ilenu' le ulu'saca' li' zi' ca na' ruá' rilén nu naca bönni' queë' Jesucristo idú ládxë'è' rejë' gudil-la. <sup>4</sup> Nu bönni' rejë' gudil-la, biti' ca' gútsë'è' yugu' le tun bönachi yódzölió ni, para tsaza ládxë'è' bönni' na' nuzóë' lè' gáquiè' bönni' queë' rejë' gudil-la. <sup>5</sup> Lësca' caní, nu nutsa' lu huitaj, biti' bi ideli' channö cabí run ca ral-la' gun. <sup>6</sup> Nu bönni' gúz gú'una runè' dxin, zí'aló lè' uzi'è' xibé lè' na' razë'. <sup>7</sup> Busá' ládxu'u lè' ni rea' li', ate' Xanru' caz gunè' ga tséajni'inu' yúgu'tè.

<sup>8</sup> Yöjnè ca guca queë' Jesucristo. Guljè', en gúquiè' xzí'ini xi'sóë' David, en gudödi gútiè', bubanè' lu yöl-la' guti. Caní rna didza' dxi'a runa' libán que. <sup>9</sup> Tu' runa' libán que didza' dxi'a, riguí'i rizáca'a le raca quia', ga ridxintè nága'a lidxi guié' ni, ca raca queë' tu bönni' huía' dö', pero biti' ca' nága'tè xtídzë'è' Dios. <sup>10</sup> Que lè' ni na' ruá' riléna' yúgu'tè lè' ni tu' nadxí'ida' nupa guröë' Dios, para ulu'lé' ca' légaquiè'. Jesucristo caz runè' ga ulu'lágaca bönachi na' para ila'cuá' lu bení idú queë'. <sup>11</sup> Catèz naca lè' ni rna:

Channö nátillenru' Lè', sóalenru'-nè' ca' ibanru'.

<sup>12</sup> Channö guá' ilenru' le quí'i sáca'ru', inná bè'lenru' ca' Lè'.

Channö ridá'baga'ru' Lè', Lè' tá'baguë'è' ca' rë'u.

<sup>13</sup> Sal-la' biti' runru' ca rnnaru', Lè' rúntica'sé' ca rnnè'.

Lè' biti' gaca tá'baguë'è' le náquiè'.

*Nu bönni' huen dxin queë' Cristo rurúajë' dxi'a*

<sup>14</sup> Busá' ládxí'gaca nupa nacua' ga ni' zu' ca naca lè' ni, ate' ni'a queë' Xanru' Dios gunná be'e légaquiè' para cabí ila'dil-la dídzë'è' ca nácagaca didza' cabí nazáca'gaca. Yugu' didza' caní tun ga ila'niti nupa tu'zè' nagui léguequi. <sup>15</sup> Bé'tica'só ládxu'u urúaju' dxi'a lahuè' Dios para gacu' ca tu bönni' huen dxin biti' rutuí'inè' ca naca dxin nunè'. Dxi'ado' ral-la' ugunu' dxin didza' idútè li. <sup>16</sup> Na'a, gucuíta ga nacua' nupa tuí'i didza' biti' nazaca', en didza' cá'asö, tu' tun didza' caní ga ilunrè' le cabí rë'ënè' Dios. <sup>17</sup> Ila'zè' didza' tu'è' ca rizxón hué' nudzu' le ridúdu' rilá. Himeneo, en Fileto nabábagaquiè' nupa tuí'i didza' caní. <sup>18</sup> Iropè' ni gula'chixi gula'níguinè' ca naca le naca idútè li, tu' ta'nnè' chigudödi dza ral-la' ulu'bán nupa chinátigaca, ate' gula'béquiè' baróli bal-la bönachi ga ridxintè bítirö ta'yéajlè' Cristo. <sup>19</sup> Le benè' tsutsu Dios zóatica'sö, en dè' tu' le naca bè', le rna: "Núnbë'è' Dios nupa néquiquequi queë'." Rna ca': "Gulí'cuíta ga raca le ruá' dö', yúgu'téli' libí'ili' néquili' queë' Cristo."

<sup>20</sup> Tu lu yu'u xzön yú'ugaca le néquini, calégasö oro, en plata, pero lësca' le néquini yaga, en yu. Bal-la tu'gún bönachi léguequi dxin ga liná', ate' ia'bal-la tu'gún léguequi dxin ga biti' naca liná'. <sup>21</sup> Para gácaru' ca naca lè' na' tu'gún bönachi dxin ga liná', en para gaca gunru' le naca dxi'a, en

gácaru' lesaca' ugunë' Xanru' rë'u dxin, ral-la' ucuítaru' ga raca le ruá' dö'. Channö gunru' caní, gácaru' lesaca' gunru' yúgu'të dxin dxi'a.

<sup>22</sup> Gurú'una le tun ga nu së ladxí' le ruá' dö' ca raca quégaquië' bönni' ra'bando'. Bë' ladxí' gacu' tsahui'. Ben le run ga réajlë'u Cristo, en le run ga nadxí'ínu' yugu' luzó'o, en le run ga ribözu' dxi'ado'. Ca nácgaca lë ni, ben tsözxön nupa tu'lidza Xanru', naca idú dxi'a icja ládxi'do'guequi. <sup>23</sup> Na'a, gurú'una yugu' didza' cá'asö, en didza' bití' nazaca', tu' chinöz quézinu' tun didza' caní ga ta'dil-la didza' bönachi. <sup>24</sup> Bönni' huen dxin queë' Xanru' bití' ral-la' tül-lalenë' bönachi didza', pero ral-la' gáquië' nöxaj ladxí' lógaca yúgu'të bönachi. Ral-la' gaca usédinë' bönachi, en gáquië' ca' zxön ladxí'. <sup>25</sup> Lu yöl-la' nöxaj ladxí' ral-la' uzéajni'inë' nupa ta'dá'baga' le runë' libán que. Channö gunë' caní, nadxi ca' Dios gu'ë légaquië' lataj ulu'bí'i ládxi'gaquië' para ilünbë'ë le naca idútë li. <sup>26</sup> Caní ulu'lë' lu yalaj que tu' xihui' ga nadzúngaquië', ate' ulu'huóáquië' tsahui' para ilunë' ca rë'ënë' Dios.

### 3

#### *Ca ilaca bönachi dza tsöjsétëgaca*

<sup>1</sup> Lësca' ral-la' inözinu' lë ni: Dza tsöjsétëgaca ilaca dza ila'gu'i ila'zaca' bönachi. <sup>2</sup> Yugu' dza ni' ila'cu'ë bönni' ilácagaquië' caní:

Ila'dxí'i la' cuíngacasë', en ulu'huídi'në'.

Ilún ba zxön cuíngaquië', en ulu'lu'i cuíngaquië' zxön.

Ila'nnë' zi'ë que le naca lá'ayi.

Ila'dá'baguë'ë xuz xiná'agaquië'.

Ilácagaquië' bönni' cabí ta'yaza ládxi'gaquië'.

Bití' ilunë' ca rë'ënë' Dios.

<sup>3</sup> Bití' ila'dxí'inë' ca ral-la' ilunë'.

Ilácagaquië' zidzaj ladxí'.

Ila'nnë' que luzá'agaquië'.

Bití' ila'nná be'e cuíngaquië'.

Ilácagaquië' bönni' dza'a.

Bití' ila'lë'enë' dxi'a le naca dxi'a.

<sup>4</sup> Ilácagaquië' hueti luzë'e, en bití' ila'dzáquië' dxi'a.

Ulu'lu'i cuíngaquië' ca bönni' nayépisëgaquië'.

Ila'dxí'inë' le ila'yásasö ládxi'gaquië', en calëga Dios.

<sup>5</sup> Ulu'lu'i cuíngaquië' ca bönni' núnbë'gaquië' Dios.

Ila'dá'baguë'ë le ruzá' ládxi'ë Dios queëru'.

Gucuíta ga nacuá' bönachi caní. <sup>6</sup> Lësca' caní, lu yöl-la' banísa quégaquië' ila'yazë' gapa naca lu yu'u, en ila'zi' yé'enë' yugu' nigula bití' bi nözguequinu para ila'zi' lu ná'agacanu le ulu'sédinë'. Ila'bága'nu nigula na' dul-la' zían, en ilu'i ládxi'gacanu yugu' le ila'zësö ládxi'gacanu le cabí nazaca'. <sup>7</sup> Ila'yónitica'sinu nigula ni didza' ilún libán que bönachi, pero bití' ca' ila'déli'nu ila'yéajni'ininu le naca idútë li. <sup>8</sup> Ca na' guláquië' Janes, en Jambres, bönni' ni' gula'dá'baguë'ë Moisés, lësca' caní ilácagaquië' bönni' ni, ila'dá'baguë'ë le naca idútë li. Ilácagaquië' chul-la niti, en ila'chíxinë' ca naca le réajlë'ëru' Cristo. <sup>9</sup> Bití' ila'déli'rönë', pero gaca bë' nácgagaquië' bönni' bití' bí nözguequinë' lógaca yúgu'të bönachi, ate' gaca quégaquië' ca na' guca quégaquië' Janes, en Jambres na'.

*Le rigü'ë Pablo lu ná'abi' bi'i Timoteo*

<sup>10</sup> Nöz quézinu' ca naca le rusédida' bönachi, en ca runa'. Nözinu' ca' le ruí'i ládxa'a guna', en ca réajlë'a Cristo, en ca naca' nöxaj ladxi', en ca nadxí'ida' luzá'a, en ca riböza' zxön ladxi'. <sup>11</sup> Nözinu' ca' yugu' le gula'bia ládxi'gaca bönachi neda', en yugu' le gudí'i guzácua', le gulaca quia' lu yödzo Antioquia, en lu yödzo Iconio, enca' lu yödzo Lистра. Yugu' le gula'bia ládxi'gaca bönachi ni' neda' biá' guléna', ate' Xanru' Jesús busölë' neda' lu yúgu'të lë na'. <sup>12</sup> Yúgu'të nupa té'ëni ilaca idú dxi'a tu' néquiquequi queë' Jesucristo, lësca' ila'guí'i ila'záquië' yugu' le ila'bia ládxi'gaca bönachi légaquië'.

<sup>13</sup> Na'a, bönni' tuá' dö', en bönni' ta'zí' yë'ë ilácarë' xihui'. Ila'zí' yé'enë' bönachi, ate' ila'zí' ye'e bönachi ca' légaquië'.

<sup>14</sup> Na'a, ben chi'i yugu' le buzëdu', en le guzxi' lu no'o, tu' nunbë' casu' nupa bulu'sedi li'. <sup>15</sup> Ga gudela' nacu' bí'ido' núnbë'u le nazúajgaca lu guichi lá'ayi, le huáca ulu'zëajni'ide'e li' para uló' tu' réajlë'u Jesucristo. <sup>16</sup> Yúgu'të le nazúajgaca lu guichi lá'ayi guchízië' Dios icja ládxi'do'gaca bönachi queë', nupa na' bulu'zúaj lu guichi didza' na' bë'ë Dios. Lë na' nazúaj lu guichi nácada' lesaca' usedi rë'u, en ubéaj ga liná' le runru', en ugú'u rë'u tu nöza, en usedi rë'u para gácaru' tsahui'. <sup>17</sup> Caní run, para gaca sina' nu naca queë' Dios, en gácada' gun yúgu'të le naca dxi'a.

## 4

<sup>1-2</sup> Ni'a queë' Xanru' Dios, enca' Xanru' Jesucristo, rinná bé'eda' li' gunu' libán que xtídzë'ë Xanru'. Lë cazë' uchi'a usöröë' nupa ni nabángaca, en nupa chinátigaca, dza ni' huödë' idinná bë'ë. Bë' ladxi' gunu' lë ni channö raca dxi'a quiu' o bití' raca dxi'a. Lu yöl-la' zxön ladxi', guléaj ga liná' le tun bönachi. Busá' ládxi'gaquië', en guchiza icja nágagaquië' ca naca lë na' rusédiru'. <sup>3</sup> Caní ral-la' gunu' tu' idxín dza cate' bití' ulu'zë nágagaquië' xibá tsahui', pero il'ëninë' ila'yönnë' le ta'dánisinë'. Ca ta'zësö ládxi'gaquië' ulu'tubë' quégaquië' nupa ulu'sedi légaquië'. <sup>4</sup> Ulu'cá'anë' le naca idútë li, en ila'zí' lu ná agaquië' yugu' didza' ridasö. <sup>5</sup> Na'a, ral-la' gacu' zxön ladxi' lu yúgu'të le runu'. Biá' gulén le ulu'saca' li' zi'. Ben libán que didza' dxi'a. Idú ládxi'u ben dxin le budödë' Cristo lu no'o gunu'.

<sup>6</sup> Ca naca quia' neda', nudödi cuina' lu në'ë Dios, ate' chizóa ilútië' neda' tu' runa' xichinë', ate' dza uzá'a yödzo lió ni chizóa idxín. <sup>7</sup> Ca runë' tu bönni' idú ládxi'ë rejë' gudil-la, lësca' caní bena' neda' dxin, en chibudxi bena' le budödë' Cristo lu na'a guna', tu' bena' idú ca sa'yéaj le réajlë'ëru' Cristo. <sup>8</sup> Ia'stú, naca löza quia' idéli'da' le ral-la' ila'zí' nupa nácagaca tsahui', le gunnë' Xanru' quia' dza ni', ate' tsahui' naca ca ruchi'a rusöröë' rë'u. Calégasö quia' neda' gunnë' le, pero lësca' gunnë' le quégaca yúgu'të nupa ta'dxí'i Lë', en idú ládxi'guequi ta'böza dza huödë'.

### *Le buzúajë' lu guichi Pablo gunbi' Timoteo*

<sup>9</sup> Bë' ladxi' guidateo' ga ni zoa' <sup>10</sup> tu' guléaj ládxi'ë Demas neda', tu' nadxi'inë' le ruzi'ë xibé yödzo lió ni, ate' guyijë' yödzo Tesalónica. Crescente guyijë' luyú Galacia, ate' bi'i Tito guyéajbi' luyú Dalmacia, tu' caní ben bayudxi ilunë'. <sup>11</sup> Tuzë' Lucas zóalenë' neda'. Guchë'ë-bi' bi'i Marcos para guidaleni' li' tsözöxon, tu' nácabi' gúnlenbi' neda' tsözöxon xichinë' Cristo. <sup>12</sup> Gusöl-la'a-bi' bi'i Tíquico lu yödzo Éfeso. <sup>13</sup> Cate' guídu', biá' quia' lari' guitsa' na' buca'ana' lu yödzo Troas lu yu'u lidxi' Carpo, en biá' ca' quia' yugu' guichi, en le naca lo, biá' quia' yugu' guichi néquiquequini guídi.

<sup>14</sup> Alejandro, bönni' gubëdxi guíë, zían le bi'ë dö' quia'. Lë cazë' Xanru' ubi'ë queë' ca nácagaca le benë' bönni' ni quia'. <sup>15</sup> Ben chi'i cuinu' queë' bönni' ni, tu' ridá'baga'dë'ë didza' runru' libán que.

<sup>16</sup> Cate' le zí'alö luzuí'bidxina' lógaquië' bönni' yúlahui', cuntu nu gúcalen neda', pero bulu'béaj ládxi'gaca yúgu'të bönachi neda'. Biti' ré'ënda' uzí' lëbë' Dios légaquië'. <sup>17</sup> Guzóalenë' Xanru' neda', en butipë' ládxa'a para údxi guna' libán que xtídzë'ë para ila'yöni yúgu'të bönachi izá'a le. Caní guca, busölë' Xanru' neda', ate' guca quia' tsa burúaja' lu ruá'aba' bëdxi guixi'. <sup>18</sup> Lë cazë' Xanru' usölë' neda' lu yúgu'të le cabí raca dxi'a, en gun chi'ë neda' ga idxíntea' ga rinná bë'ë Lë' ni' yehua' yubá. ¡Gácatca'sö queë' yö-la' ba yúgu'të dza zá'gaca! ¡Ca' gaca!

*Pablo rugapë' Dios bönachi queë' Cristo*

<sup>19</sup> Bugapa Dios Priscila, en Aquilo, enca' bönachi nacuá' lidxë' Onesíforo. <sup>20</sup> Bugá'anë' Erasto lu yödzo Corinto, ate' bucá'ana'-në' Trófimo luyú Mileto tu' ré'enë'. <sup>21</sup> Bë' ladxi' guídu' ga zoa' zí'alö cate' idxín beo' ziaga. Eubulo, en Pudente, en Lino, en Claudia, en yúgu'të böchi' luzá'aru' ni tu'gapë' Dios lí'.

<sup>22</sup> Rinábida'-në' Xanru' Jesucristo sóalenë' lí'. ¡Gácalen lí' le ruzá' ládxië' Dios quiu'! ¡Ca' gaca!

## DIDZA' GUSÖL-LË'Ë PABLO QUEËBI' BI'I TITO

*Pablo rugapë' Dios bi'i Tito*

<sup>1</sup> Neda', Pablo, naca' huen dxin queë' Dios, en gubáz nasöl-lë'ë Jesu-cristo. Gusöl-lë'ë neda' para guna' ga ila'yéajlë' bönachi chiguró cazë' Dios, para ulu'únbë' le naca idútë li ca ral-la' gun nu nunbë' Dios. <sup>2</sup> Caní naca' tu' runa' löza uzi'a xibé yöl-la' na'bán idú le guzxi' lu në'ë Dios gunnë' queëru' dza ni'te, cate' si' gusi' lo rata' yúgu'të le dë, ate' run cazë' Lë' le nazí' lu në'ë gunë'. <sup>3</sup> Cate' bidxín dza que, Dios bulu'e lahui xtídzë'ë, le gulu'ë lu na'a guna' libán que. Caní gunná bé'enë' Dios, Nu busólá rë'u, neda'. <sup>4</sup> Rugapa' Dios li', böcha'ado' Tito. Nacu' idú xzi'ini caza' tu' naca lébisö ca réajlë'ëru' Cristo. Rinábida'-në' Dios Xuz, en Xanru' Jesucristo Nu busólá rë'u, uzá' ládxë'ë quiu', en huéchi' ládxë'ë li', en gunë' ga soa dxi icja ládxi'do'o.

*Dxin queë' Cristo runbi' bi'i Tito luyú Creta*

<sup>5</sup> Que lë ni na' buca'ana' li' luyú Creta, para usó'o le riyadzaj quégaca bönachi queë' Cristo nacua' ni', para ilácagaca idú bönachi queë' Cristo, en para ucú'u bönni' gula yúgu'të yödzö para ilún chi'ë bönachi queë' Cristo nacua' tu tu yödzö ni', ca na' chigunná bé'eda' li' gunu'. <sup>6</sup> Nu bönni' gula rapa chi'ë bönachi queë' Cristo ral-la' gáquië':

Bönni' cuntu nu bi gaca innë queë'.

Zoa túzinu nigula queë'.

Yugu' xzi'inë' ral-la' ila'yéajlë'ëbi' Cristo.

Biti' soa nu gaca innë quégacabi' ta'dá dzágasibi' ca',

o ta'dá'baga'bi' xuz xiná'agacabi'.

<sup>7</sup> Nu bönni' rapa chi'ë bönachi queë' Cristo run bayudxi:

Biti' runë' le güf'i lataj nu bi innë queë' ca runë' xichinë' Dios.

Biti' gáquië' bönni' zidi o bönni' icja dza'a,

o bönni' re'jë', o bönni' ribízxjanë',

o bönni' rizë' ládxi'së' dumí.

<sup>8</sup> Ral-la' gu'ë ga ila'cu'ë böchi'ru' ta'dxinë' lidxë'.

Ral-la' sè ládxë'ë gunë' le naca dxi'a.

Ral-la' gáquië' bönni' réajni'i, en bönni' tsahui'.

Ral-la' gádxinë' Dios, en inná be'e cuinë'.

<sup>9</sup> Ral-la' gun chi'ë didza' idútë li ca chinazëdë',

para gaca ichízië' icja náagaca bönachi ca sa'yéaj xibá dxi'a,

en para gaca usayjë' rú'agaca bönachi ta'nnë que.

<sup>10</sup> Caní ral-la' gáquië' tu' ta'dá'baguë'ë zían bönni', en tu'ë didza' biti' nazaca', en ta'zí' yé'enë' bönachi. Zían bönni' tunë' caní nácagaquië' judío.

<sup>11</sup> Yugu' bönni' ni, run bayudxi gunu' ga tsayaj ruá'agaquië', tu' tunë' ga ta'chixi ta'nigui yúgu'të bönachi nacua' yu'u gapa ta'yázië', en tu'sédinë' le cabí ral-la' ulu'sédinë'. Caní tunë' para ila'zí'isë' dumí.

<sup>12</sup> Tuë' bönni' gubábë' bönachi Creta ga na' zu', bönni' na' bë'ë didza' uláz que yudo' quégacuië', gunnë': "Ta'zí' yé'tica'së' bönni' Creta, en nácagaquië' ca böa' guí'a sínia'. Nácagaquië' bönni' huágulë'ë xöhuëdi."

<sup>13</sup> Didza' ni benë' ba nali quégaquië' naca idütë li. Que lë ni na' gudilla légaquië' para gaca idú ca ta'yéajlë'ë Cristo, <sup>14</sup> en para cabí ulu'zë nágagaquië' yugu' didza' ridasá quégaquië' bönni' judío, en bití' ilunë' ca ta'nná bë' bönachi nucz'anagaca le naca idütë li.

<sup>15</sup> Yúgu'të naca dxi'a quégaca nupa nácagaca dxi'a, pero quégaca nupa nácagaca xihui', en bití' ta'yéajlë', bití' bi naca dxi'a, pero nácagaca xihui' ga ridxintë le ta'bequi ícjaguequi, en le ta'zá' láchxi'gaca. <sup>16</sup> Ta'nnë' núnbë'gaquië' Dios, pero le túngaquië' bití' röjlöz le ta'nnë' tu' nácagaquië' bönni' tu'dí'inë' Dios. Ta'dá'baguë'ë xtídzë'ë, en bití' ca' gaca ilunë' le naca dxi'a.

## 2

*Xibá dxi'a le ral-la' usëdiru'*

<sup>1</sup> Na'a, ral-la' gu'u didza' le röjlöz xibá dxi'a.

<sup>2</sup> Busedi yugu' bönni' gula:

Bití' ral-la' ilë'ajë'.

Ral-la' iláquië' ba'a ladxi', en bönni' ta'yéajni'inë'.

Ral-la' gaca idú ca ta'yéajlë'ë Cristo.

Ral-la' ila'dxi'inë' luzá'agaquië', en ila'bözë' zxon ladxi'.

<sup>3</sup> Busedi yugu' nigula gula:

Ilunnu le raza láchxë'ë Dios.

Cabí ila'nnënu que luzá'agacanu, en cabí ilë'ajnu.

Ral-la' ulu'sédinu le naca dxi'a.

<sup>4</sup> Ral-la' ulu'sédinu' nigula ni' yú'ugacanu iz cuidi'

para ila'dxi'ínu bönni' que queëgacanu, enca' xzí'inigacanu.

<sup>5</sup> Ral-la' ilácanu nigula ta'yéajni'ínu, en nigula dxi'a ladxi'.

Ral-la' ilún chí'ínu le dë láchxigacanu, en ilácanu dxi'a.

Ral-la' ilunnu bal bönni' que queëgacanu.

Ral-la' cabí bi ilunnu le gü'i lataj nu innë zi' que xtídzë'ë Dios.

<sup>6</sup> Busedi yugu' bönni' ni' nacu'ë iz cuidi':

Ral-la' ilácagaquië' bönni' ta'yéajni'inë'.

<sup>7</sup> Ral-la' güntica'su' le naca dxi'a,

ulu'i'ínu' bönachi caní ca ral-la' ilúngaca.

Ca rusédinu' ral-la' ulu'i' nacu' idú ladxi', en ba'a ladxi'.

<sup>8</sup> Ral-la' usédinu' didza' dxi'a le cabí gaca nu bi innë que.

Caní gunu' ga utuí'inë' bönni' ridá'baguë'ë,

en bití' gaca bi innë' queëli' runli' le ruá' dö'.

<sup>9</sup> Busedi böchi'ru' ni' ta'yéajlë'ë Cristo, en nadó'ogaquië':

Ral-la' ila'cu'ë nöxaj lógaquië' xángaqüië'.

Ral-la' ilunë' yúgu'të le ila'yaza láchxi'gaquië' xángaqüië'.

Bití' ral-la' tá'baga'gaquië' le ta'nná bë'ë.

<sup>10</sup> Bití' bi ulu'cáchi'lanë'.

Ral-la' ulu'lui' cuíngaquië' tsahui' ca naca yúgu'të le tunë'.

Caní ulu'i' lo naca dxi'a xibá queë' Dios, Nu busölá rë'u.

<sup>11</sup> Cristo, bönni' na' buzá' láchxë'ë Dios queëru' chibulu'i' lahuë' lógaca yúgu'të bönachi para ulu'lágaca. <sup>12</sup> Lë' rusédinë' rë'u ucá'anaru' le cabí raza láchxë'ë Dios, en cabí së láchxi'ru' le naca que yödölió ni, pero cözaru' zxon ladxi', en gácaru' tsahui' dza ni zóaru' na'a, en gunru' ca rë'ëni quézinë' Dios. <sup>13</sup> Ral-la' cözaru' le runru' löza le gun ga gácaru' bica' ba, lë na' gaca dza ni' cate' ulu'i' lahuë' Jesucristo lu bení' idú queë'. Náquië' Dios zxon, Nu rusölá rë'u. <sup>14</sup> Lë cazë' budödi cuinë' uláz queëru', para



böá'uë' rë'u lu yúgu'të le naca xihui', ate' ruúnë' rë'u tsahui' para gácaru' bönachi queë', en gü'i ládxi'ru' gunru' le naca dxi'a.

<sup>15</sup> Yugu' lë ni bé' didza', en guchiza icja nágagaca bönachi ni', ate' len yöl-la' unná bé' gudil-la léguequi. Béntica'só caní, para cabi si' lataj nu ucá' ana cá'asó xtídzu'u.

### 3

#### *Le ral-la' ilún bönachi ta'yéajlë' Cristo*

<sup>1</sup> Busá' ládxi'gaquië' böchi'ru' ni' ilunë' ca ta'nnë' bönni' dë lu ná'agaquië', en bönni' yúlahui', para ilunë' ca rnna xtídza'gaquië'. Ral-la' ila'cu'ë sina' ilunë' le naca dxi'a. <sup>2</sup> Biti' bi le ruá' dö' ral-la' ila'nnë' que luzá'agaquië', en biti' ila'díl-lalenë' légaquië' didza', pero ral-la' ilácagaquië' nōxaj ladxi', en idú ladxi' lógaca yúgu'të bönachi.

<sup>3</sup> Lësca' rë'u, zí'aló gúcaru' yugu' bönni' biti' ta'yéajni'inë', en gudá'baga'ru' Dios. Gudarú' nanítiru', en gúcaru' ca nupa nadó'ogaca, tu' benru' le guzë ládxi'ru' le ruá' dö', en ia'bal-la le guyaza ládxi'ru'. Benru' ca' le ruá' dö', en buzxé'eru' luzá'aru'. Biti' bila'lé'e bönachi rë'u dxi'a, ate' rë'u biti' bilé'eru' dxi'a luzá'aru' turu' ia'turu'. <sup>4</sup> Ní'irö bulu'e lahui Dios, Nu rusólá rë'u. Naca bé' náquië' idú dxi'a, en nadxi'inë' yúgu'të bönachi, <sup>5</sup> tu' busölë' rë'u, calëga tu' zoa bi le naca dxi'a benru' rë'u, pero tu' buéchi' ládxi'ë rë'u. Bunë' rë'u dxi'a, en benë' ga nácaru' bönachi cubi. Dios Bö' Lá'ayi rucubë' rë'u. <sup>6</sup> Dios gusöl-lë'ë Dios Bö' Lá'ayi queëru' tu' néquiru' queë' Jesucristo, Nu rusólá rë'u. <sup>7</sup> Buzá' ládxi'ë queëru', en bunë' rë'u tsahui' para gata' yöl-la' na'bán idú queëru', le runru' löza gunné' queëru'.

<sup>8</sup> Didza' idútë li lë ni nuzúaja' lu guichi. Ré'ënda' usédide'enu' yugu' bönni' ni' yugu' lë ni para ilu'i ládxi'gaquië' ilúntica'së' le naca dxi'a tu' ta'yéajlë'ë Dios. Lë ni naca dxi'a, en nácada' lesaca' ila'zì' lu ná'agaca yúgu'të bönachi. <sup>9</sup> Na'a, biti' gu'u lataj nu gü'i didza' le cabí nazaca', o nu gü'i ladxi' ca nácagaca lágaca ziántërö cö' xuz xtó'ogaca bönachi, o nu tsöjgutsa' yugu' didza' bizxaj, en yugu' le ridil-la didza' ca naca que xibá queë' Moisés, tu' cabí bi nazáca'gaca le caní, ate' cuntú nu uzí' xibé didza' caní.

<sup>10</sup> Channö zoa nu bönni' ni', rubéajë' choplö bönachi queë' Cristo, tōdi usó'ó ládxi'ë tu ia'tú luzuí, bubéajë' bönni' na'. <sup>11</sup> Nöz quézinu' chiböáquië' caní nu bönni' biti' náquië' tsahui', en runë' dul-la'. Chinabáguë'ë xíguia' ni'a que lë na' runë'.

#### *Le buzúajë' Pablo lu guichi le gunbi' bi' i Tito*

<sup>12</sup> Cate' isöl-la'a-në' Artemas o Tíquico ga zu', bé' ladxi' guídu' ga ni zoa' lu yödzo Nicópolis, tu' chinuna' quia' ugá'ana' ni yugu' beo' ziaga. <sup>13</sup> Zenas, bönni' na' rudödë' didza' ca rinná bé' bönachi yúlahui', enca' Apolos, ila'dxinë' ga ni' zóali'. Bugú'u légaquië' nōza lu yöl-la' rácalen, para cabí bi yadzaj quégaquië'. <sup>14</sup> Busedi yugu' böchi' luzá'aru' ilúntica'së' le naca dxi'a, en bi ulu'nödzejë' quégaca nupa bi riyadzaj quéguequi, para gaca bé' caní le nácagaquië' queë' Cristo.

#### *Pablo rugapë' Dios bönachi queë' Cristo*

<sup>15</sup> Yúgu'të nupa nacua'len neda' tu'gapa Dios li'. Bugapa Dios nupa ni' nadxi'igaca rë'u tu' ta'yéajlë' Dios. Le ruzá' ládxi'ë Dios queëru' gácalen yúgu'téli'. ¡Ca' gaca!

## DIDZA' GUSÖL-LË'Ë PABLO QUEË' FILEMÓN

### *Pablo rugapë' Dios Filemón*

<sup>1</sup> Neda', Pablo, dzágabi' neda' bi'i böchi'ru' Timoteo. Nadzuna' lidxi guié tu' runa' xichinë' Jesucristo. Rugapa' Dios li', Filemón. Nacu' bönni' nadxí'itu', en runu' xichinë' Cristo ca runtu' netu'. <sup>2</sup> Rugapa' Dios Apia, nigula quiu'. Nácanu zanru' réajlë'ënu Cristo. Rugapa' Dios ca' zxi'inu', Arquipo. Nácabi' queë' Jesucristo ca tu bönni' rejë' gudil-la, tu' runbi' xichinë' Lë' ca runtu' netu'. Lësca' rugapa' Dios bönachi queë' Cristo tu'dubë' lu yu'u lidxu'. <sup>3</sup> Rinábida'-në' Xúziru' Dios, enca' Xanru' Jesucristo, uzá' ládxe'ë queëli', en gunë' ga soa dxi icja ládxi'do'oli'.

### *Ca runë' Filemón tu' réajlë'ë Cristo*

<sup>4</sup> Rética'sa'-në' Dios queëru' "Xclenu", en röjnéta'sida' li' cate' rulidza'-në'. <sup>5</sup> Caní runa' tu' ridxín quia' didza' ca nadxí'inu'-në' Xanru' Jesús, en réajlë'u Lë', en nadxí'inu' ca' yúgu'të bönachi rö queë'. <sup>6</sup> Rinábida'-në' Dios gunë' ga gunda' dxin libán runu' ca naca le réajlë'u Cristo, para ulu'z'í' xibé nupa nacua' ni' yúgu'të le naca dxi'a, le ruzá' ládxe'ë Jesucristo queëru'. <sup>7</sup> Rudzëjada', en ruzí' zxöna' tu' nadxí'inu' yugu' böchi'ru', en benu' li', böcha'a, ga bulu'huöaca ládxi'gaca bönachi ta'yéajlë' Cristo.

### *Filemón ral-la' uniti lahuë'-bi' Onésimo, bi'i nadó'o queë'*

<sup>8</sup> Que lë ni na', sal-la' dë lu na'a tu' naca' gubáz nasöl-lë'ë Cristo inná bé'eda' li' ca ral-la' gunu', <sup>9</sup> ráta'yua' lo' len yöl-la' nadxí'i, neda' ni chinaca' bönni' gula, en yu'a lidxi guié tu' runa' xichinë' Jesucristo. <sup>10</sup> Ráta'yua' lo' uláz queëbi' Onésimo, bi'i na' bena' ga böácabi' queë' Cristo, en que lë ni na' nácabi' ca zxi'ini caza' ga ni nadzuna' lidxi guié.

<sup>11</sup> Bi'i ni, zí'alö biti' gúcabi' lesaca' quiu', pero na'a nácabi' lesaca' quiu' li', enca' quia' neda'. <sup>12</sup> Bi'i ni rusöl-la'a-bi' ga zu'. Ben bal lëbi' ca neda' caz runu' bal, tu' nadxí'ida'-bi'. <sup>13</sup> Gú'unida' ugá'analenbi' neda' ni, para uláz quiu' gunbi' xichina' tsanni ni yu'a lidxi guié tu' runa' libán que didza' dxi'a, <sup>14</sup> pero biti' bi' rë'ënda' guna' le cabí naca didza' quiu', para cabí guna' bayudxi gácalenu' neda', pero huáca gácalenu' neda' tu' ré'ëni quëzinu' ca'. <sup>15</sup> Nadxi ca' que lë ni na' buzá'abi' Onésimo ga zu' tu chí'ido' para udxinbi' tsaz ga zu'. <sup>16</sup> Na'a, bítirö gácabi' quiu' ca tu bi'i nadó'o, pero gácabi' quiu' ca bi'i böchi'cazu', tu' nácabi' bi'i böchi'ru' réajlë'ëbi' Cristo, en nadxí'iru'-bi'. Nácabi' caní quia' neda', ate' ral-la' gácaröbi' ca' caní quiu', calëgasö ca böchi' luzó'o, pero lësca' ca bi'i böchu'u réajlë'ëbi' Xanru' Jesucristo.

<sup>17</sup> Que lë ni na', channö nunu' neda' tuz, ben lëbi' bal ca neda' caz runu' bal. <sup>18</sup> Channö bi xíguia' benbi' quiu' o channö bi rál-la'bi' quiu', gunnátëz neda' ral-la'a. <sup>19</sup> Neda', Pablo, len na'a caza' ruzúaja' quiu' lu guichi lë ni: Neda' caz quizzja' bi rál-la'bi', en calëga guía' li': Lësca' ral-lu'u quia' yúgu'të le dë quiu' tu' bena' neda' ga napu' yöl-la' na'bán idú. <sup>20</sup> Ca' gaca, böcha'a. Channö dë le uzi'a xibó' tu' néquiru' queë' Xanru', ben lë na' chigúta'yua' lo' tu' naca' böchu'u réajlë'a Cristo, ate' caní gunu' ga huöaca ládxa'a.

<sup>21</sup> Ruzúaja' quiu' lu guichi ni, tu' ruzxöni ládxa'a li', gunu' ca rnna xtídza'a, en nözda' gunu' ia'lati' ca lë na' chigúta'yua' lo'. <sup>22</sup> Lësca' rinaba'

lo' upó'o quia' ga soa' lu yu'u lidxu', tu' runa' löza urúaja' lidxi guié ni, ate' guída' ga zóali' tu' rulídzali'-në' Dios, en rinábali' lahuë' ni'a quia' neda'.

*Pablo ruzúajë' lu guichi le rugapa Dios Filemón*

<sup>23</sup> Epafras, bönni' yú'ulenë' neda' tsözxön lidxi guié ni tu' runë' xichinë' Jesucristo, rugapë' Dios li'. <sup>24</sup> Lësca' tu' gapë' Dios li' Marcos, en Aristarco, en Demas, en Lucas, yugu' bönni' ni túnlenë' neda' tsözxön dxin queë' Cristo.

<sup>25</sup> Rinábida'-në' Xanru' Jesucristo uzá' ladxë'ë queëli'. ¡Ca' gaca!

## DIDZA' RUZÉAJNI'I YUGU' BÖNACHI HEBREO

*Dios bé'lenë rë'u didza' lu ru'ë Zxí'ini cazë'*

<sup>1</sup> Zián luzuí, en zián ca benë' Dios, bé'lenë' xuz xtó'oru' didza' dza ni'te lu ruá'agaquië' bönni' gulu'ë didza' uláz queë'. <sup>2</sup> Na'a, ga ruúdxí xtídzë'ë, dza ni zóaru' na'a, Dios bé'lenë' rë'u didza' lu ru'ë Zxí'ini cazë'. Dios buzóë' Lë' para guequi queë' Zxí'inë' yúgu'të le nequi queë' Lë', ate' lu në'ë Zxí'inë' na', Dios benë' yödzölió ni. <sup>3</sup> Zxí'inë' na' náquië' ca tu le ruluí'i lahui yöl-la' zxön queë' Dios, en ca náquië' Zxí'inë' ruluí'i lahui idú le náquië' Dios caz. Run cazë' ga nacuá'tica'sö yúgu'të, rugunë' dxin didza' ru'ë, en yöl-la' huáca queë'. Cate' budxi benë' le ruún rë'u dxí'a que le naca dul-la' nabága'ru', yöjchö'ë cuita lë'ë ibëla Dios, Nu rö'ö rinná bé' xitsá'tërö.

*Zxí'inë' Dios nayëpisëtërë' ca yugu' gubáz lá'ayi*

<sup>4</sup> Zxí'inë' Dios nayëpisëtërë' ca yugu' gubáz lá'ayi queë' Dios, tu' nácatërö lo le lë', lë na' Dios gulu'ë Lë' tu' náquië' Zxí'ini cazë', ca lágaquië' gubáz lá'ayi queë' na'. <sup>5</sup> Dios catu caz gudxë' tuë' gubáz lá'ayi queë' ca na' gudxë' Zxí'inë'. Gunnë':

Zxí'ina' nacu'. Buzóa' Li' na'a.

Catu caz bé'ë didza' queë' tuë' gubáz lá'ayi ca na' bé'ë didza' ca naca queë' Zxí'inë'. Gunnë':

Naca' Xuzë', ate' Lë' náquië' Zxí'ina'.

<sup>6</sup> Lësca' caní, cate' Dios buzóë' Bi'i que cazë' lu yödzölió ni, gunnë': Yúgu'të gubáz lá'ayi queë' Dios ila'yéaj ládxi'gaquië' Lë'.

<sup>7</sup> Ca nácaagaquië' gubáz lá'ayi queë', rnna:

Lë' runë' ga nácaagaquië' gubáz lá'ayi queë' ca bö' recja, ate' gubáz lá'ayi huen dxin queë', runë' ga nácaagaquië' ca guí'.

<sup>8</sup> Na'a, ca naca cazë' Zxí'inë', rnnë':

Ga rö'u rinná bé'u, inná bé'tica'su', Dios.

Tsahui' naca ca rinná bé'u.

<sup>9</sup> Nadxí'ínu' le naca tsahui', en calëga le ruá' dö'.

Que lë ni na' Dios budödë' lu no'ö yöl-la' unná bé', en benë' ga ruzí'tëru' Li' xibé yöl-la' unná bé'

ca le tu'zí'i xibé luzó'o.

<sup>10</sup> Lësca' caní rnnë':

Li', Xan, cate' gusí lo, benu' yödzölió,

ate' len ná'asu' buzú' lúzxiba.

<sup>11</sup> Huadödi quéguequi, pero Li', tsaz idí'u.

Yúgu'të itëbigaca ca ritëbi lari',

<sup>12</sup> en ca lari' utubu' léguequi, en utsó'o léguequi,

pero Li', catu caz utsá' cuínu'

en catu caz igulu'.

<sup>13</sup> Dios catu caz gudxë' tuë' gubáz lá'ayi queë' ca gudxë' Zxí'inë', gunnë':

Gurö'ö cuita lë'a ibëla

cate' gunra' ga ulu'zëchu zxíbigaca lo'

nupa biti' ta'lé'e Li' dxí'a.

<sup>14</sup> Yúgu'të gubáz lá'ayi queë' Dios nácaagaquië' bö' huen dxin queë' Dios, ate' nasól-lë'ë légaquië' para ilácalenë' nupa ni nulágaca.

## 2

*Biti' ral-la' ucá'anaru' cá'asö yöl-la' rusölá*

<sup>1</sup> Que lë ni na', ral-la' güi' ládi'röru' le chibiyöniru', para cabí gaca chopa ládi'ru'. <sup>2</sup> Guca bē' naca idütē li didza' na', le bidxín dza ni'te lu ná'agaquiē' gubáz lá'ayi queē' Dios, ate' yúgu'tē nupa gula'dödi bē' ca rnna didza' na', en bití' gulún ca rnna, Dios benē' léguequi xíguia' ca na' röjlöz le gulúngaca. <sup>3</sup> Lësca' caní bití' ca' uláru' rē'u lu xíguia' na' channö ucá'anaru' cá'asö yöl-la' rusölá ni, le benē' Lë cazē' Xanru' libán que zí'alö, ate' nupa bila'yöni Lē' bulu'luí' rē'u naca idütē li. <sup>4</sup> Lësca' caní Dios caz benē' tsözxón légaquiē' ba nalí, tu' benē' le nácagaca bē', en le tun ga rubániru', en yugu' yöl-la' huáca zxon. Gudísiē' ca' yugu' le runödzjē' Dios Bö' Lá'ayi quégaquiē' tsca gú'uni quézinē' Dios.

*Dios benē' ga böáquiē' Jesús idú ca nácaru' rē'u*

<sup>5</sup> Dios bití' budödē' yödzölió si' za' lu ná'agaquiē' gubáz lá'ayi que yehua' yubá queē', lë na' ruí'ru' didza' que. <sup>6</sup> Na'a, ca naca lë ni, nazúaj lu guichi lá'ayi didza' bē' nu run ba nalí le rnna:

Dios, rubánide'eda' tu' ruí' ládi'xu'u bönachi.

Rubánide'eda' tu' rácalenu' léguequi.

<sup>7</sup> Ia'látisö cá'asö ca yugu' gubáz lá'ayi que yehua' yubá quiu' benu' bönachi.

Buzú' quéguequi yöl-la' zxon, en yöl-la' run bal, en budödu' yúgu'tē le benu' Li' lu nē'eguequi.

<sup>8</sup> Yúgu'tē budödu' lu nē'eguequi para ila'nná be'e le.

Nazúaj lu guichi lá'ayi lë na' rnna: "Budödu' lu nē'eguequi yúgu'tē." Bití' bi bucá'anē' le cabí budödē' lu nē'eguequi, pero ga ridxintē na'a dza, bití' rilé'eru' yu'u lu nē'eguequi yúgu'tē. <sup>9</sup> Réquibe'eru' le guca queē' Jesús. Tu chí'sö, Dios benē' ga böáquiē' ia'látisö cuidi' ca yugu' gubáz lá'ayi que yehua' yubá queē'. Guljē' bönachi para gútiē', ate' gudí' guzjáquē'ē Jesús lu yöl-la' guti uláz quégaca yúgu'tē bönachi, tu' buzá' ládi'xē'ē Dios queēru' caní. Tu' benē' Jesús caní, Dios benē' ga rata' queēru' yöl-la' zxon, en yöl-la' run bal.

<sup>10</sup> Dios benē' yúgu'tē le rilé'eru', en runē' ga nacuá'tica'sö. Dios benē' ca ral-la' gunē' cate' benē' ga naca bē' náquiē' Cristo idú tsahui' ni'a que le gudí' guzjáquē'ē. Caní benē' Dios queē' Cristo, Nu bideli' yöl-la' rusölá para gaca ichē'ē bönachi zían yehua' yubá queē'. <sup>11</sup> Cristo ruúnē' tsahui' bönachi para ilequi quez queē' Dios. Tuzē' náquiē' Xúzguequi nupa na' ruúnē' Cristo tsahui', en Xuz cazē'. Que lë ni na', bití' ca' rutu'ínē' Zxí'ínē' Dios cate' rnnē' nácagaquiē' böchi' luzē'ē. <sup>12</sup> Ca naca lë ni nazúaj lu guichi lá'ayi le rnna:

Usiyönda' böchi' luzá'a ca nacu' Li', Dios.

Gatsaj láhui'lö bönachi tu'dubi quiu', gul-la' yöl-la' ba quiu'.

<sup>13</sup> Lësca' caní rnnē':

Uzxóni ládi'xa'a-nē' Dios.

Ga yúbölö nazúaj le rnnē':

¡Buli'yútsöca' neda', en yugu' zxi'ínē', nupa na' Dios bennē' quía'!

<sup>14</sup> Que lë ni na', tu' néquiqueuinē' bëla' en rön yugu' zxi'ínē' na', lësca' caní Cristo ben cuiné' ca nácagaquiē'. Guljē' bëla' en rön. Caní guljē' para guca gútiē', en caní guca busunítiē' yöl-la' huáca unná bē' que tu' xihui', nu

na' dē lu nē'e guti bōnachi. <sup>15</sup> Caní benē' Cristo para guca busanē' yúgu'tē nupa gulaca ca bōnni' nadó'ogaquiē' tsanni ni nacuá' nabángaca, tu' guladxi yōl-la' guti. <sup>16</sup> Naca bē' bití' benē' caní para gácalenē' yugu' gubáz lá'ayi que yehua' yubá queē' Dios, pero para gúcalenē' yugu' xzí'ini xí'sóē' Abraham. <sup>17</sup> Que lē ni na', ben bayudxi bōáquiē' Cristo idú ca nácagaquiē' bōchi' luzē'ē na', para gáquiē' lahuē' Dios tu bixúz lo, tu bixúzi runē' ca rnnē', en ruhuéchi' ládxi'ē bōnachi, enca' para gunē' le gun ga gata' lu nē'ē ugúē' dul-la' nabága'gaca bōnachi. <sup>18</sup> Na'a, tu' gudí'i guz xáquē'ē Lē cazē' Cristo, ate' guz xí' bē' tu' xihuí' Lē', que lē ni na' napē' yōl-la' huáca gácalenē' nupa ni, rizi' bē' tu' xihuí' léguequi.

### 3

#### *Jesús nayēpisētērē' ca Moisés*

<sup>1</sup> Que lē ni na', bōchi' luzá'ado', libí'ili' na' nácali' quez queē' Dios tu' bulidzē' Dios libí'ili', buli'yú dxi'a ca náquiē' Jesucristo. Náquiē' gubáz nasōl-lē'ē Dios, enca' bixúz lo que le nazí' lu ná'aru'. <sup>2</sup> Jesús ni runē' ca rnna xtídzē'ē Dios, Nu na' buzóa Lē' xilatjē', ca na' benē' ca' Moisés, benē' ca rnna xtídzē'ē Dios lógaca yúgu'tē bōnachi queē' Dios. <sup>3</sup> Nayēpisētērē' Jesús ca Moisés, para gaca queē' yōl-la' ba, ca na' nácariē' lo bōnni' nequi queē' tu yu'u ca naca huen dxin zoē' lu yu'u na'. <sup>4</sup> Yúgu'tē yu'u, zoa nu ben le, pero Dios náquiē' Nu ben yúgu'tē le rilé'eru'. <sup>5</sup> Le nácariē' Moisés benē' ca rnna xtídzē'ē Dios lógaca bōnachi queē' Dios, pero gúquiē' ca tu bōnni' huen dxin, ate' benē' ba nalí' que didza' ral-la' gu'ē Dios, <sup>6</sup> pero Cristo runē' ca rnna xtídzē'ē Dios, en náquiē' Xzí'ini cazē', ate' nacuá' lu nē'ē bōnachi queē' Dios. Rē'u ni, nácaru' bōnachi na' queē' Dios channō gácaru' tsutsu ga idxinrō dza údxi. Ral-la' gácaru' tsutsu ca ridipa ládxi'ru', enca' ca rudzējalenru' lē na' runru' lōza.

#### *Dē lataj ga ulu'zí' ládxi'gaca bōnachi queē' Dios*

<sup>7</sup> Que lē ni na', nazúaj lu guichi ca rnnē' Dios Bō' Lá'ayi le rnna: Na'a, channō riyōnili' didza' ru'ē Dios,  
<sup>8</sup> bití' gácali' zidi lu icja ládxi'do'oli'  
 ca na' gulaca nupa ni' gula'dá'baga' Dios  
 cate' ni' gula'zí' bē' Lē' lu lataj cá'asō.  
<sup>9</sup> Gula'zí' bē'ē xuz xtó'oli' neda' ni'  
 sal-la' bila'lé'enē' le bena' idú ca choá' iz.  
<sup>10</sup> Que lē ni na' guléda' bōnachi dza ni', en gunniá':  
 "Ta'chíxítica'siné' ca ta'zá' ládxi'gaquiē'.  
 Bití' té'ennē' ila'nōzinē' le rē'ēnda' ilunē'."  
<sup>11</sup> Que lē ni na' guléda' légaquiē', en bena' tsutsu xtídzá'a, gunniá':  
 "Bití' ila'yáziē' ga ulu'zí' ládxi'gaquiē' tsōzxon len neda'."

<sup>12</sup> Gulí'gún chí'i cuinli', bōchi' luzá'ado', para cabí gácali' nituli' libí'ili' tu bōnni' xihuí' cabí réajl'ē, en para cabí usanli'-nē' Dios ban. <sup>13</sup> Na'a, buli'zéajni'i tuli' ia'tuli' yúgu'tē dza, tsanni ni naca dza ni zóaru' na'a, para cabí si' ye'e le naca xihuí' libí'ili', en para cabí gácali' nituli' libí'ili' zidi lu icja ládxi'do'oli'. <sup>14</sup> Yúgu'tēru' gunru' tsōzxon Cristo channō gácaru' tsutsu ga idxinrō dza údxi, ca na' gusí lo ridipa ládxi'ru'.

<sup>15</sup> Caní ral-la' gunru' tsanni ni rnna:  
 Na'a, channō riyōnili' chí'ē Dios,  
 bití' gácali' zidi lu icja ládxi'do'oli',  
 ca na' gulaca nupa ni' gula'dá'baga' Dios.

<sup>16</sup> ¿Nupxi na' bila'yöni xtídzë'ë Dios, en gula'dá'baga' Lë'? Gulún caní yúgu'té nupa ni' bubéajë' Moisés léguequi luyú Egipto. <sup>17</sup> ¿Nupxi na' gulénë' Dios idú ca choá' iz? Gulaca nupa ni' gulún dul-la', ate' gulati lu lataj cá'asö. <sup>18</sup> ¿Nupxi ni' benë' tsutsu xtídzë'ë Dios, gunné' biti' ila'yaza ga ulu'zí' ládxi'guequi tsözxön len Lë'? Gulaca nupa ni' biti' gulún ca rnna xtídzë'ë Dios. <sup>19</sup> Na'a, réquibe'eru' biti' guca ila'yázië' tu' cabí gula'yéajlë'ë Dios.

#### 4

<sup>1</sup> Na'a, tsanni ni nagá'ana le guxzí' lu në'ë Dios queëru' para gaca tsú'uru' lataj queë' ga uzí' ládxi'ru', ral-la' gádxiru' para cabí unítiru' lataj tsú'uru' ni'. <sup>2</sup> Biyönrü' rë'u didza' dxi'a ca na' bila'yönnë' légaquië', pero légaquië' biti' bulu'zi'ë xibé didza' na' bila'yönnë', tu' cabí gula'yéajlë'ë Dios cate' bila'yönnë' le. <sup>3</sup> Rë'u ni réajlë'ëru' Dios, en tsú'uru' lataj queë' ga uzí' ládxi'ru'. Raca ca na' gunné' Dios:

Que lë ni na' guléda' légaquië'  
en bena' tsutsu xtídza'a, gunnía':  
Biti' tsú'ugaquië' ga ulu'zí' ládxi'lenë' neda'.

Dë lataj tsú'uru' rë'u ga uzí' ládxi'lenru'-në' Dios, sal-la' budxi benë' Dios xichinë' dza ni'te cate' ni' benë' yödzölió ni, en chiruzí' ládxi'ë. <sup>4</sup> Nazúaj lu guichi lá'ayi ga ru'í didza' ca naca que dza igadxi, le rnna: "Buzí' ládxi'ë Dios dza igadxi yugu' lu dxin benë'." <sup>5</sup> Ga yúbölö rnna: "Biti' tsú'ugaquië' ga ulu'zí' ládxi'lenë' neda'." <sup>6</sup> Nupa ni' bila'yöni zí'alö didza' dxi'a, biti' guyú'ugaca ni' tu' cabí gulún ca rnna xtídzë'ë Dios. Que lë ni na', ral-la' tsú'ugaca bönachi yúbölö ni'. <sup>7</sup> Que lë ni na' ca', Dios bulu'e tu dza yúbölö, gunné': "Na'a dza." Caní naca, cate' chigudödi iz zían, bë'ë didza' Dios lu ru'ë David, ca na' nazúaj lu guichi lá'ayi le rnna: Na'a dza, channö riyönili' didza' ru'ë Dios, biti' gácali' zidi lu icja ládxi'do'oli'.

<sup>8</sup> La'tu' benë' Josué ga bulu'zí' ládxi'gaquië' cate' gula'yu'ë lu xiyúgaquië', biti' bë'ë Dios didza' gudödi ni' que ia'turö dza cate' nu uzí' ládxi'len Lë'. <sup>9</sup> Que lë ni na', nagá'ana quégaca bönachi queë' Dios lataj ila'déli'në' ga ulu'zí' ládxi'gaquië'. <sup>10</sup> Nupa tsú'ugaca ga ulu'zí' ládxi'lengaca Dios, ulu'zí' ládxi'gaquië' lu dxin tunë', ca na' buzí' ládxi'ë Dios yugu' lu dxin benë' Lë'. <sup>11</sup> Que lë ni na', ral-la' gü'í ládxi'ru' tsú'uru' ga ni' uzí' ládxi'lenru'-në' Dios. Biti' ral-la' tá'baga'ru' xtídzë'ë ca na' gulún nupa ni' biti' gula'yéajlë' Dios, en biti' gula'yu'ë ni'.

<sup>12</sup> Xtídzë'ë Dios naca ban caz, en napa caz yöl-la' huáca. Richúgurö ga rë' ca guíë tuchi' natuchi' iropa ru'í. Richugu ridxín ga ta'dzaga bö' naca cázaru', en le zoa lu icja ládxi'do'oru', enca' rōxaj ga ridxintë lu dxita lu bin. Run ga naca bë' le ribequi ícjaru', en le rizá' ládxi'ru'. <sup>13</sup> Biti' bi gaca ucáchi'ru' ga biti' gaca ilé'enë' Dios le. Yúgu'të le nun cazë' Dios nalá' lahui, en narúaj ga liná' lahuë' Dios. Lahuë' Lë' run bayudxi quíxjö'öru' le nunru'.

*Jesús náquië' bixúz lo, Nu nácatërö zxön*

<sup>14</sup> Zoa queëru' tu bixúz lo, nácatërë' zxön, Nu na' gudödi ni' yehua' yubá, Jesús, Zxí'inë' Dios. Que lë ni na' ral-la' ugá'anaru' tsutsu ca naca le nazí' lu ná'aru'. <sup>15</sup> Zoa queëru' tu bixúz lo, Nu gaca huéchi' ládxi' rë'u ca nácgaca le raca queëru', tu' guxzí' bë' tu' xihui' Lë' cazë' idútë ca na' rizí' bë' tu' xihui' na' rë'u, pero biti' bi dul-la' benë' Lë'. <sup>16</sup> Que lë ni na', idú

ládxi'ru' ral-la' ibíga'ru' gala' ga rō'ë rinná bē'ë Dios, Bōnni' ruzá' ladxē'ë queēru', en inábaru' lahuē' huéchi' ladxē'ë rē'u, en uzá' ladxē'ë queēru', para gácalenē' rē'u cate' bi raca queēru'.

## 5

<sup>1</sup> Dios ribō cazē' nūti'tēs bixúz lo ladaj bōnachi, en ruzóē' lē' para gunē' yugu' le runē' lahuē' Dios uláz quégaca bōnachi, en cu'ë lahuē' Dios yugu' le tu'nōdzaj bōnachi, en yugu' bōa' bēdxi tútigaquiē'-ba' lu bucugu lá'ayi tu' nōzi dul-la' nabága'gaquiē'. <sup>2</sup> Bixúz lo na', tu' raca queē' lēbisō ca raca quégaca bōnachi, gaca gáquiē' xzōn ladxí' len nupa nácagaca yugu' bōnni' canōz, en nupa ta'chixi ta'nigui. <sup>3</sup> Que lē ni na', tu' náquiē' bixúz lo na' bōnáchisō, ral-la' cu'ë lahuē' Dios bōa' bēdxi na' tútigaquiē'-ba' lu bucugu lá'ayi ni'a que dul-la' nabaga' cazē', ca na' runē' ca' ni'a que dul-la' nabága'gaca bōnachi.

<sup>4</sup> Cuntu nu gaca gun cuini bixúz lo, pero Dios rulidzē' nu ral-la' gaca bixúz lo, ca na' bulidzē' Aarón. <sup>5</sup> Lēasca' caní guca queē' Cristo. Biti' ben cuinē' bixúz lo, pero Dios buzóē' Lē' ca bixúz lo. Ca naca lē ni, Dios gudxē' Lē':

Lí' nacu' Zxí'ina'.

Buzóa' Lí' na'a.

<sup>6</sup> Lēasca' caní gudxē' Lē' le nazúaj ga yúbölö, gunnē':

Lí' nácatica'su' bixúz,

ca na' gúquiē' Melquisedec bixúz.

<sup>7</sup> Cristo, cate' ni' zoa cazē' yōdzölió ni, bulidzē' Dios, en gúta'yue' lahuē'. Gurōdxi'ë, en gurōdxē' lahuē' Dios, Bōnni' guca usölē' Lē' lu yöl-la' guti, ate' Dios biyōnnē' Lē' tu' gúdxinē' Lē' idú ladxē'ë. <sup>8</sup> Sal-la' gúquiē' Zxí'inē' Dios, bizédē' gunē' ca rna xtídzē'ë Dios tu' gulaca queē' yugu' le gudí'i guzxaqué'ë. <sup>9</sup> Cate' chigúquiē' Cristo idú ca ral-la' gáquiē' tu bixúz lo, Dios benē' Lē' Bōnni' rusölē' tsaz yúgu'tē nupa tun ca rna xtídzē'ë. <sup>10</sup> Ní'irō Dios buzóē' Lē' para gáquiē' bixúz lo ca na' gúquiē' Melquisedec na' bixúz lo.

*Zoa bōnadxi queēru' huōaj ládxi'ru', en tá'baga'ru'-nē' Cristo*

<sup>11</sup> Ca naca lē ni, zían le ral-la' güi'ilentu' libí'ili' didza', le naca bōniga quíxjöi'itu' libí'ili', tu' cabí réajni'inili'. <sup>12</sup> Chigudödi dza ral-la' gaca usédili' bōnachi xtídzē'ë Dios, tu' chibiyōnili' xidzé, pero riquínili' nu quíxjöi'i libí'ili' leyúbölö yugu' le cabí naca bōniga nazí' lu nē'e nu si' réajlē'. Nagá'anali' ca yugu' bi'i huē'enido' ta'quínibi' nidxi', en calēga la' huagu tsutsu. <sup>13</sup> Yúgu'tē bōnni' naquíniguequinē' nu usedi légaquiē' lē na' bití' naca bōniga, nácagaquiē' ca yugu' bí'ido' té'ajbi' nidxi'. Biti' nazédagaquiē' ca sa'yéaj le naca tsahui'. <sup>14</sup> La' huagu tsutsu tu'zí' xibē' nupa chinálágaca, nupa na' gaca iléquibe'e le naca dxí'a, en le cabí naca dxí'a, tu' nugúngaquiē' dxin yöl-la' réajni'i quégaquiē'.

## 6

<sup>1</sup> Que lē ni na', bití' ral-la' usédatica'siru' yugu' xibá buzédaru' cate' si' gusí lo riyōniru' ca naca queē' Cristo. Ral-la' tsōjnōrōru' para gácaru' idú bōnachi queē' Cristo. Biti' naquíni usédaru' leyúbölö yugu' xibá bití' naca bōniga:

ca ral-la' ubí'i ládxi'ru',

en ca bití'rō gunru' le ruá' dö',

en ca ral-la' tséajlē'ëru'-nē' Dios,



<sup>2</sup> en ca naca xibá que le ridílaru' nisa, en ca rixóa ná'aru' bönachi ta'yéajlè' Cristo, en ca ral-la' ulu'bán nupa nátigaca, en ca gunè' Dios, ichúguiè' quégaca bönachi tuá' dö'.  
<sup>3</sup> Caní gunru' channö gunnè' Dios rë'u lataj.

<sup>4-6</sup> ¿Naru' huácatsö gunru' ga ulu'bí'i ládxi'gaca leyúbölö nupa tu'huöaj ladxi', en ta'dá'baga' Dios? Channö bidxín quéguequi bení' queè' Dios, en bulu'zí' xibé le runödzej' Dios zoè' yehua' yubá, en gulaca tuz len Dios Bö' Lá'ayi, en channö bulu'zí' xibé didza' dxi'a queè' Dios en yöl-la' huáca que dza si' za', en channö ní'irö tu'huöaj ladxi', en ta'dá'baga' Dios, biti' ca' gaca nu gun ga ulu'bí'i ládxi'gaca leyúbölö, tu' gaca tsca ulu'dá' leyúbölö Zxi'inè' Dios lè'e yaga cruz en ilún tsca ulu'titaj Lè' lahui' lógaca bönachi.  
<sup>7</sup> Nupa tun caní nácagaca ca yu na' ruzí' xibé nisa guiöj le ribixi láhuilö zían luzuí. Channö yu na' runödzaj le tu'zí' xibé nupa tá'ana yu na', raza ládxe'è' Dios le, <sup>8</sup> pero channö ruzóasö yu na' lubá yötsi', en bésigá', naca ditaj, en nabía dö', en naca para nu uzegui le.

### *Le runru' löza le run ga nácaru' tsutsu*

<sup>9</sup> Sal-la' ruí'itu' caní didza', libí'ili' na' nadxí'itu', réquitu' ruzí'ili' xibé le nácagacarö dxi'a, le tu'zí' xibé nupa nulágaca. <sup>10</sup> Dios náquiè' tsahui', en biti' gal-la ládxe'è' dxin tsahui' benli', en yugu' le benli' tu' nadxí'ili' Lè'. Gúcalenli' nupa néquiquequi quez queè' Dios, en runli' xichínguequi.  
<sup>11</sup> Na'a, ré'ënitü' gü'i ládxi'li' luzá'ali' tu ia'tuli', en gunli' caní ga idxinrö dza údxi, para gata' idú queéli' lè na' runli' löza. <sup>12</sup> Ré'ënitü' cabí gácali' xöhuèdi, pero gunli' ca tun nupa ta'yéajlè' Dios, en ta'böza zxön ladxi', para idéli'li' yugu' le guzxí' lu në'è' Dios gunnè' queèru'.

<sup>13</sup> Caní gaca, tu' benè' tsutsu Dios xtídzè'è' cate' guzxí' lu në'è' bi gunnè' queè' Abraham. Tu' cabí zoa nu nácáro lo ca Dios, que lè ni na' buzetaj cuinë', cate' ni' benè' tsutsu xtídzè'è'. <sup>14</sup> Caní gunnè' Dios: "Le nácátè' guna' ga gaca dxi'a quiu', en guna' ga ila'yánda'abi' zxi'ini xisú'." <sup>15</sup> Gulözè' Abraham zxön ladxi', ate' bidéli'nè' le guzxí' lu në'è' Dios gunnè' queè'.  
<sup>16</sup> Cate' tu bönni' runè' tsutsu xtídzè'è', ruzötjè' nu nácátèrö lo ca lè', ate' lè ni ruzóa dxisö yúgu'tè didza' bizxaj, tu' nunè' tsutsu xtídzè'è'. <sup>17</sup> Que lè ni na' Dios benè' tsutsu le guzxí' lu në'è' gunè', en buzötaj cuinë', tu' gú'unnè' uluí'inè' nupa ulu'zí' xibé le guzxí' lu në'è' unödzej' quéguequi, nácada' löza, en tsaz naca le nuzóa lahuè' gunè'. <sup>18</sup> Le guzxí' lu në'è' Dios, en le benè' tsutsu, chopa ni catu caz idzá'gaca, en ca naca quégaca chopa ni, biti' gaca si' yè'è' Dios. Caní benè' Dios para gácada' löza queèru' tu le huè tsahui' rë'u. Ruzxöni ládxi'ru' Lè' idéli'ru' lè na' runru' löza le gunnè' sí'iru'. <sup>19</sup> Lè na' runru' löza ruzóatica'sö tsutsu icja ládxi'do'oru', en naca ca tu du guíè ruzóa dxisö barco. Lè na' runru' löza run chí'è' Cristo ni'a queèru' ga ni' zoè' Dios yehua' yubá, le nadxín lu lataj lá'ayi na' zoa cúde'lö lari' nala' lu yudo' rö'ö yehua' yubá. <sup>20</sup> Guyáziè' Jesús uláz queèru' ca Nu röjnöru loru' ga ni' zoè' Dios, ate' Dios nuzóè' Lè' náquiè' tsaz bixúz lo ca na' gúquiè' Melquisedec bixúz lo.

## 7

### *Jesús náquiè' bixúz lo ca gúquiè' Melquisedec*

<sup>1</sup> Melquisedec gúquiè' bönni' na' gunná bè'è' lu yödzö Salem, enca' bixúz queè' Dios, nayépisètèrè'. Cate' suzè'è' Abraham, söhuöjè' gudödi guca

gudil-la cate' bucul-lë' yugu' bönni' ta'nná bë'ë, birúajë' Melquisedec na', yöjtságuie' Abraham, en gunábinë' Dios gun lá'ayë' Abraham. <sup>2</sup> Abraham bë'ë queë' tu cö' tu' chi cö' que yúgu'të le bidéli'në' lu gudil-la na'. Ca lë' Melquisedec na' rnna lu didza' xidza': "Bönni' Unná Bë' Tsahui'", en náquie' ca' Bönni' unná bë' que yödzo Salem, le rnna lu didza' xidza': "Bönni' Unná Bë' Ribequi Dxië'." <sup>3</sup> Biti' zoa lu guichi le rnna gula'cu'ë xuz xinë'ë, o xuz xtá'ahuë', en biti' nazúaj dza guljë' o dza gútië', pero náquie' ca náquie' Zxi'inë' Dios tu' náquie' tsaz bixúz lo.

<sup>4</sup> Buli'yútsöca' na'a, ca na' gúquie' zxön Melquisedec na', tu' lë cazë' xúziru' Abraham bë'ë queë' tu cö' tu' chi cö' que lë na' guléajë' lu ná'agaquie' bönni' ta'nná bë'ë ni' bucul-lë' lu gudil-la. <sup>5</sup> Lu xibá queë' Moisés, Dios rinná bé'enë' yugu' xzi'ini xi'sóë' Leví, nupa ná'agaca bixúz, ila'zi'ë tu cö' tu' chi cö' que le ta'zi' bönachi Israel, sal-la' ná'agaca di'a dza quégaquie', tu' ná'agaquie' yúgu'të' xzi'ini xi'sóë' Abraham. <sup>6</sup> Melquisedec na' biti' náquie' di'a dza quégaquie', pero guzxi'ë tu cö' tu' chi cö' lu në'ë Abraham, nu na' bideli' yugu' le guzxi' lu në'ë Dios gunné' queë'. Lë'sca' Melquisedec na' gunábinë' Dios gun lá'ayë' Abraham, <sup>7</sup> ate' cuntú nu gaca tá'baga' lë na' rnna: Nu nadéli'rö lahuë' Dios rinábini Dios gun lá'ayë' nu nacuídi'rö. <sup>8</sup> Na'a, dza ni zóaru' na'a, nupa ta'zi' tu cö' tu' chi cö' lu ná'agaca bönachi ná'agaca ca' bönachi tati caz, pero Melquisedec na', zoa le run ba nalí queë' le rnna zoë' nabanë'. <sup>9</sup> Na'a, huáca innaru' queë' Leví, en quégaca xzi'ini xi'sóë', nupa na' ta'zi' tu cö' tu' chi cö' lu ná'agaca bönachi, lë'sca' gula'guizxjë' tu cö' tu' chi cö' cate' ni' Melquisedec na' guzxi'ë tu cö' tu' chi cö' lu në'ë Abraham, xuz gula gudödi quégaquie'. <sup>10</sup> Caní naca, tu' huáca innaru' Abraham ni' nu'ë lë'ë Leví, en yugu' xzi'ini xi'sóë' cate' ni' yöjtságuie' Melquisedec lë', tu' cabí náljaniguequinë'.

<sup>11</sup> Ta'zi' bönachi Israel xibá gunná bë'ë Moisés lu ná'agaca bixúz, nupa ná'agaca xzi'ini xi'sóë' Leví ga nababë' ca' Aarón, bixúz lo. Na'a, la'tu' guca ulu'huöáca bönachi idú tsahui' lahuë' Dios tu' tun ca rinná bë' xibá queë' Moisés, biti' ben bayudxi soa ia'tué' bixúz ca gúquie' Melquisedec, en calëga ca gúquie' Aarón. <sup>12</sup> Channö rutsë'ë Dios ca ral-la' gáquie' bixúz, run bayudxi utsë'ë ca' ca naca xibá queë'. <sup>13</sup> Xanru', Nu na' nazúaj lu guichi ca naca queë' yugu' lë ni, nababë' ia'turö cö' xzi'ini xi'sóë' Israel ca le nababë' Leví na', ate' que cö' xzi'ini xi'sóë' ga nababë' Xanru', cuntú nu guca bixúz lahuë' Dios. <sup>14</sup> Naca caní tu' naca bë' guljë' Xanru' lu cö' di'a dza queë' Judá, ate' Moisés biti' bë'ë didza' queë' Judá na' cate' bë'ë didza' quégaca nupa ral-la' ilaca bixúz.

<sup>15</sup> Nácatërö bë' lë ni ni'a que le raca na'a. Ca na' gúquie' Melquisedec bixúz, chibulú'i lahuë' ia'turë' bixúz, Jesús. <sup>16</sup> Bönni' ni, biti' gúquie' bixúz tu' rinná bë' xibá ca ral-la' ilaca di'a dza queë', pero náquie' bixúz tu' napë' yöl-la' huáca que yöl-la' na'bán le catu caz údxi. <sup>17</sup> Nazúaj lu guichi lá'ayi le run ba nalí queë' le rnna:

Tsaz nacu' bixúz

ca na' gúquie' Melquisedec bixúz.

<sup>18</sup> Na'a, nadúa xibá gula ni', tu' cabí gudapa yöl-la' huáca unná bë', en biti' bi guca gun. <sup>19</sup> Xibá queë' Moisés na' biti' guca un bönachi idú tsahui'. Na'a, chiguyú'u tu le runru' löza le nácarö dxi'a, le run ga gaca ibíga'ru' gala' ga zoë' Dios.

<sup>20</sup> Cate' benë' Dios ga náquië' Jesús bixúz, benë' tsutsu xtídzë'ë. <sup>21</sup> Dios biti' benë' tsutsu xtídzë'ë cate' bucu'ë bönachi ni' ca bixúz, pero cate' benë' ga náquië' Jesús bixúz, benë' tsutsu xtídzë'ë, gunné':

Bena' tsutsu xtídzä'a neda', Xanu', gunniá':

“Biti' utsá'a ca guna'.

Tsaz nacu' bixúz

ca na' gúquië' Melquisedec bixúz.”

<sup>22</sup> Que lë ni na', Cristo náquië' Nu run ga naca löza didza' rucá'ana tsahui' le nácarö dxi'a ca lë na' guca zí'alö. <sup>23</sup> Yugu' bixúz ni' guláquië' bönni' zían, tu' cabí guca ulu'gá'anë' yödzülió ni tu' gulátië', <sup>24</sup> pero tu' zóatica'së' Jesús, tsaz náquië' bixúz, en biti' gaca nu huóäza xilatjë' para gaca bixúz. <sup>25</sup> Que lë ni na', tsaz gaca usölë' nupa ta'biga' gala' ga zoë' Dios, nupa tu' gún dxin Lë', tu' zóatica'së' nabanë', en rnnë' dxi'a uláz quegaquië' lahuë' Dios.

<sup>26</sup> Ben bayudxi soa tu bixúz lo caní queëru'. Náquië' lá'ayi, en idú tsahui', en biti' náquië' tsözxön bönachi dul-la', pero nayépisëtëre' ca yúgu'të le nacuá' ni' yehua' yubá. <sup>27</sup> Jesús ni, biti' náquië' ca yugu' bixúz lo yödzülió ni, tu' ben bayudxi gula'gu'ë rön lahuë' Dios yugu' dza, ate' gulútië'-ba' böa' bëdxi lahuë' Lë' tu' nözi dul-la' nabága'gaca cazë', ate' gudödi ni' gulunë' caní tu' nözi dul-la' nabága'gaca bönachi. Na'a, Jesús, tsaz gulu'ë rön lahuë' Dios, cate' ni' budödi cuinë' lahuë' Dios, en bulaljë' xichön cazë' tu' nözi dul-la' nabága'gaca yúgu'të bönachi. <sup>28</sup> Lu xibá queë' Moisés bönachi biti' náca'gaca idú dxi'a náca'gaca bixúz, pero gudödi bidxín xibá queë' Moisés, Dios benë' tsutsu xtídzë'ë, cate' benë' ga náquië' Xí'ini cazë' bixúz lo, tu' náquië' idú tsahui' ca ral-la' gáquië' bixúz.

## 8

### *Jesús náquië' Bixúz Lo queëru'*

<sup>1</sup> Na'a, ca rnna lë na' si' gunniá', naca caní: Zoa queëru' tu Bixúz Lo caní. Gurö'ë cuita lë'ë ibëla Dios, ate' rö'ë, rinná bë'ë yehua' yubá ni'.

<sup>2</sup> Lë' runë' dxin ca Bixúz Lo lu lataj nácatëro lá'ayi, le naca yudo' le naca idütë, lë na' buchisë' Xanru', en calëga bönachi. <sup>3</sup> Dios rucu'ë yúgu'të bixúz lo para ila'gu'ë yugu' le tu'nödzej bönachi, enca' xichöngacaba' böa' bëdxi lahuë' Dios. Que lë ni na' ben bayudxi soa bi gulu'ë Cristo lahuë' Dios. <sup>4</sup> La'tu' zoë' luyú ni, biti' ca' gáquië' bixúz, tu' nacuá'tica'së' bixúz ni, nupa ta'gú'u yugu' le tu'nödzej bönachi lahuë' Dios ca rinná bë' xibá queë' Moisés. <sup>5</sup> Yugu' bixúz ni tunë' dxin que tu le rulu'ísö, en le naca ca tu bixín que lë na' rö'ö yehua' yubá. Caní naca, tu' gúdxidë'ë Dios Moisés cate' si' uchisë' yú'udo' na' néquini guídi, gunné': “Buyútsöca', ben yúgu'të idú ca naca lë na' bulu'ida' li' lu guí'a ni'.” <sup>6</sup> Na'a, Bixúz Lo queëru' ni runë' dxin que le nácatëro lesaca', ate' ni'a que le benë' Lë' zoa tu didza' rucá'ana tsahui' queëru' le nácatëro lesaca', en le ru'í' didza' que le nácatëro lesaca' guzxi' lu në'ë Dios gata' queëru'.

<sup>7</sup> La'tu' gudapa didza' na' rucá'ana tsahui' le guzóa zí'alö idütë yöl-la' huáca, biti' ben bayudxi soa didza' buropi ni rucá'ana tsahui'. <sup>8</sup> Na'a, Dios rulu'ë biti' gulaca bönachi ni' idú dxi'a cate' bë'ë didza' ca na' nazúaj lu guichi lá'ayi, gunné':

Bulí'yútsöca', gunné' Xanru': Zá'gaca dza cate' uzóa' tu didza' cubi ucá'ana tsahui', le gúnlena' bönachi Israel, en bönachi Judá.

<sup>9</sup> Biti' gaca ca guca didza' rucá'ana tsahui' na',  
lë na' bénlena' xuz xtó'ogaquië',  
dza ni' gudéla'a ná'agaquië',  
en bubéaja' légaquië' luyú Egipto.

Tu' bulu'cá'anë' didza' quia' rucá'ana tsahui',  
neda' bucá'ana' légaquië', rnnë' Xanru'.

<sup>10</sup> Que lë ni na', caní gaca didza' ucá'ana tsahui'  
gúnlena' bönachi Israel  
tödi yugu' dza ni', rnnë' Xanru'.

Uchízia' icja ládxi'do'gaquië' xibá quia'  
en uzúaja' le lu icja ládxi'do'gaquië'.

Ní'irò gaca' Dios quégaquië'  
ate' légaquië' iláquië' bönachi quia'.

<sup>11</sup> Biti' gun bayudxi nu usedi luzé'e, inná:  
Bénbë'ë Xanru', tu' ilúnbë'ë yúgu'të' neda',  
ga isí lo nu naca cá'asö, ga idxintë' nu naca lo.

<sup>12</sup> Huéchi' ládxa'a légaquië',  
en uniti lahua' le cabí naca tsahui' gulunë',  
en bití'rò tsöjneda' dul-la' nabága'gaquië'.

<sup>13</sup> Cate' ni' ru'ë Dios didza' que tu didza' cubi rucá'ana tsahui', naca tu'  
chibigula lë na' guzóa zí'alö, ate' chizóa idúa lë na' nagula, en chinaca  
gulasi.

## 9

### *Lataj lá'ayi dë luyú, en lataj lá'ayi dë yehua' yubá*

<sup>1</sup> Na'a, didza' rucá'ana tsahui' na' guzóa zí'alö, dzágagaca xibá le ca rala'  
la' ila'yéaj ládxi'gaca bönachi Dios, en lataj lá'ayi bidzága le guca que luyú  
ni. <sup>2</sup> Caní naca lataj lá'ayi na' néquini guídi. Lu lataj na' dë lálhuilö, nazí'i  
le Lataj Lá'ayi, gula'cuá' le nuá' guí', en bucugu lá'ayi ga ni' gula'gu'ë  
yugu' yöta xtildo' lahuë' Dios. <sup>3</sup> Cúdzi'lö le buropi lari' nal-la' lu yu'u  
na' zoa lataj ni' nazí'i le, Lataj Idú Lá'ayi, <sup>4</sup> ate' lu lataj ni' gula'cuá' tu  
bucugu néquini oro ga na' bulu'zégui'ë nöri, enca' tu guí'ina ga yu'u didza'  
rucá'ana tsahui', en nacu guí'ina na' oro. Lu guí'ina na' gula'cuá' zxi'ga'do'  
na' néquini oro, le nadzá' yöta xtildo' na' nazí'i le maná, enca' xuyaga  
queë' Aarón, lë na' bub' ni'a në'e, enca' yugu' guió'j blaga na', nazúaj  
lálhuilö'guequi didza' rucá'ana tsahui'. <sup>5-6</sup> Lahui guí'ina na' gula'cuá' chopa  
gubáz lá'ayi néquiquequini oro, légaca querubín que lataj ga buluí'i lahuë'  
Dios, ate' bulu'zxoá xiliguequi lálhuilö lataj ga ni' gulu'ë bixúz lo rön tu'  
nözi dul-la'. Caní bulu'cu'ë yugu' lë ni. Biti' dë lataj uzúaja' na'a idütë ca  
nácagaca lë ni.

Ta'yázatica'së' yugu' bixúz lu lataj zoa lálhuilö, ga na' tunë' dxin  
quégaquië' que le ta'yéaj ládxi'gaquië' Dios. <sup>7</sup> Tuzë' bixúz lo guyázië' lu lataj  
buropi ni' tu luzuísö tu iz, en bi'ë rön le gulu'ë lahuë' Dios tu' nözi dul-la'  
nabaga' cazë', enca' tu' nözi dul-la' nabága'gaca bönachi, dul-la' gulunë' le  
cabí guléquibe'enë'. <sup>8</sup> Caní ruzéajni'inë' Dios Bö' Lá'ayi rë'u, bití' ca' guca  
idxinru' lahuë' Dios caz tsanni ni' tu'gunë' dxin lataj lá'ayi na' zoa lálhuilö  
lu yu'u lá'ayi na' néquini guídi, lë na' bidzága didza' rucá'ana tsahui' le  
guzóa zí'alö. <sup>9</sup> Yugu' lë ni naca tu le rulu'isö que le raca na'a dza. Yugu' le  
gula'gu'ë lahuë' Dios, en rön quégacaba' bóa' bëdxi na' gulútië'-ba' lahuë'  
Dios bití' guca ulu'ún idú dxi'a icja ládxi'do'gaquië' bönni' ni' gula'yéaj

ládxi'gaquië' Dios caní. <sup>10</sup> Yugu' lë ni buluf'i lahui quégacasö le gulë'aj gulahuë', en ca ral-la' ila'guíbi cuíngaquië', en quégaca xibá ca ral-la' gaca que idú ca zeaj naca cazë'. Yugu' lë ni buzöë' Dios quégaquië' ga bidxintë dza ral-la' utsë'ë yúgu'të.

<sup>11</sup> Na'a, chibuduluf'i lahuë' Cristo, en náquië' Bixúz Lo que le naca idú dxi'a, le bilá' lahui ni'a que le benë' Lë'. Lataj lá'ayi ga na' guyázië' Lë' nácarö lo, en nácarö idú, en biti' néquini lu ni'a lu ná'agaca bönachi, en biti' naca que luyú ni. <sup>12</sup> Na'a, chiguyázië' Cristo lu lataj lá'ayi na', calëga len xichöngacaba' bédxido', en xichöngacaba' chivo, pero len rön queë' cazë'. Guyázië' lu lataj idú lá'ayi tu luzuísö, ate' caní guca, benë' ga nuláru' tsaz. <sup>13</sup> Le nácatë xichöngacaba' bédxi, en chivo, en dö queëba' bédxido' bulu'zégui'ë-ba', yugu' le gula'gu'ë lu ícjagaca nupa nabága'gaca dul-la', guca ulu'gúa dul-la' na' nabága'gaca bönachi para ulu'ún légaquië' dxi'a idú ca zeaj naca cazë' ca naca que yöl-la' yudo' quégaquië'. <sup>14</sup> Na'a, gúntërö ca' xichönë' Cristo, tu' budödi cuinë' queë' Dios, en gúquië' idú tsahui', ate' zóalenë' Dios Bö' Lá'ayi Lë', Nu zóatica'sö. Na'a, xichönë' Cristo ruún idú dxi'a icja ládxi'do'oru' lu yugu' le gubága'ru' le tun ga nu gati, para gaca gunru' xichinë' Dios ban.

<sup>15</sup> Que lë ni na' náquië' Jesucristo Nu ben tsutsu didza' cubi rucá'ana tsahui', tu' gútië' Lë', en bugüë' dul-la' gula'baga' bönachi cate' ni' zoa didza' gula' rucá'ana tsahui'. Gútië' ca' para gaca ila'zi'ë lë na' guzxí' lu në'ë Dios unödzejë' quégaquië' bönni' bulidzë', le zóatica'sö. <sup>16</sup> Cate' ratië' nu bönni', en nucá'anë' tu didza' ca ral-la' ila'guísië' le nequi queë', run bayudxi gaca bë' chinátië' bönni' na' para gaca ilunë' ca rnna didza' na' nucá'anë'. <sup>17</sup> Cate' chinátië' bönni' na', gaca ilunë' ca rnna didza' na', pero tsanni ni zoë' nabanë', biti' ca' gaca ilunë' ca rnna didza' na'. <sup>18</sup> Que lë ni na', didza' na' rucá'ana tsahui' le guzóa zí'alö guca lesaca' tu' bidzága rön didza' na', le rulu'isö zoa nu guti. <sup>19</sup> Cate' ni' gudíxjöi'inë' Moisés bönachi ni' ca nácgaca yúgu'të xibá queë' Dios, gudélé'ë rön quégacaba' bédxido', en quégacaba' chivo, le nutsi' nisa, ate' len tu guíxi'do' nazí'i le hisopo, en lítsa'ba' bö'cu' zxila' le në'aj xiná, buchéajë' rön, en nisa na' lahui guíchi ga na' nazúaj xibá na', enca' láhuigaca bönachi. <sup>20</sup> Ní'irö gudxë' légaquië': "Lë ni naca rön le run tsutsu didza' rucá'ana tsahui' le gunná bé'enë' Dios rë'u para gunru' ca rnna." <sup>21</sup> Lësca' caní buchéajë' Moisés rön na' lu lataj lá'ayi néquini guídi, en lahui yúgu'të le tu'gunë' dxin para ila'yéaj ládxi'gaquië' Dios. <sup>22</sup> Ca na' rinná bë' xibá na', látu'biqiu' yúgu'të ral-la' un dxi'a rön léguequi, ate' channö cabí tu'laljë' rön, biti' udúa dul-la'.

### *Xichönë' Jesucristo rugúa dul-la'*

<sup>23</sup> Caní naca, ben bayudxi guzóa le bun dxi'a yudo' luyú ni le naca tu le rulu'isö ca naca lë na' rö'ö yehua' yubá, pero ca naca lë na' rö'ö yehua' yubá, ben bayudxi soa le un dxi'a nupa ila'yaza le, le nácarö lesaca' ca xichöngacaba' böa' bédxido' caní. <sup>24</sup> Biti' guyázië' Cristo lataj lá'ayi néquini lu ni'a lu ná'agaca bönachi, lë na' naca tu le rulu'isö ca naca le naca idú, pero guyázië' yehua' yubá caz para gaca uluf'i lahuë' na' a lahuë' Dios uláz queëru'. <sup>25</sup> Bixúz lo zoë' luyú ni razië' lataj nácatërö lá'ayi tu tu iz len rön quégacaba' böa' bédxi, pero biti' run bayudxi tsázië' Cristo zían luzuí para udödi cuinë' lahuë' Dios. <sup>26</sup> La'tu' guca caní, gun bayudxi qui'i sáquë'ë Cristo, en gátië' zían luzuí dza ni'te cate' guta' yödzöliö ga ridxintë na'a dza, pero na'a cate' naca dza údxi, tsaz buluf'i lahuë' tu luzuísö, en

budödi cuinë' lahuë' Dios, cate' gútië' para bugúë' dul-la' nabága'ru'. <sup>27</sup> Ca na' run bayudxi ilátigaca bönachi tu luzuísö ate' tódi ni' uchi'a usöröë' Dios léguequi, <sup>28</sup> lësca' caní, gútië' Cristo tu luzuísö, cate' budödi cuinë' lahuë' Dios para bugúë' dul-la' nabága'gaca bönachi zían. Na'a, uluí' lahuë' le buropi luzuí, calëga para ugúë' dul-la', pero para usölë' tsaz nupa ta'bóza Lë'.

## 10

<sup>1</sup> Xibá na' gunná bë'ë Moisés guca tu le ruluí'sö ca zeaj naca le tsahui' si' zá'gaca, en biti' guca idú ca nácagaca. Que lë ni na', xibá na' queë' Moisés biti' guca un idú tsahui' nupa ni' bila'dxín lahuë' Dios, en biá'gaca rön quégacaba' böa' bëdxido', lë na' gula'gú'utica'së' lahuë' Dios yugu' iz. <sup>2</sup> La'tu' guca un légaquië' idú tsahui', biti' gula'gú'utica'së' rön ni' lahuë' Dios, tu' cabirö ilëquibe'enë' bönni' guca caní quégaquië' nabága'gaquië' dul-la' channö chibulu'huóáquië' idú tsahui'. <sup>3</sup> Rön ni' gula'gu'ë lahuë' Dios yugu' iz busá' ládxi'gaquië' nabága'gaquië' dul-la'. <sup>4</sup> Caní guca, tu' cabí guca xichöngacaba' bëdxi, en chivo ugúa dul-la'.

<sup>5</sup> Que lë ni na', cate' bidxinë' Cristo yödzoülió ni, gudxë' Dios ca na' nazúaj lu guichi lá'ayi le rnna:

Biti' ré'ënu' nu cu'u rön quégacaba' böa' bëdxi lo' pero benu' ga naca' bönáchisö.

<sup>6</sup> Biti' raza ládxi'u nu uzegui'-ba' böa' bëdxi lo', o nu cu'u xichöngacaba' lo' tu' nözi dul-la'.

<sup>7</sup> Ní'irö gunná': Ni zoa' para guna' ca ré'ënu' Li', Dios. Naca ca na' nazúaj lu guichi lá'ayi ca gaca quia'.

<sup>8</sup> Lë na' nazúaj zí'alö rnna: "Biti' ré'ënë' Dios nu cu'u rön quégacaba' böa' bëdxi lahuë'." Didza' ni ruluí' rë'u bíti'rö raza ládxi'ë Dios lë ni sal-la' lu xibá queë' Moisés rinná bé'enë' Dios nu gun caní. <sup>9</sup> Gudödi ni' rnna: "Ni zoa' para guna' ca ré'ënu' Li', Dios." Didza' ni ruluí' rë'u rugúë' Dios lë na' gula'gu'ë lahuë' zí'alö, en ruzóë' xilataj le gulu'ë Zxí'ini cazë' lahuë'. <sup>10</sup> Na'a, Dios ruúnë' rë'u idú tsahui' tu' benë' Cristo ca ré'ënë' Dios cate' ni' budödi cuinë' lahuë' Dios uláz queëru', en gútië' tu luzuísö.

<sup>11</sup> Le nácate yúgu'të bixúz luyú ni zuíguequinë' yugu' dza, en tunë' xichíngaqië', en la' tuz ca tunë', ta'gu'ë lahuë' Dios zían luzuí xichöngacaba' böa' bëdxi, yugu' le cabí gaca ulu'gúa dul-la'. <sup>12</sup> Na'a, Cristo, tu le gulu'ë tsaz lahuë' Dios tu luzuísö tu' nözi dul-la', ate' ní'irö yöjchö'ë cuita lë'ë ibëla Dios. <sup>13</sup> Ribözë' ni' dza gunë' Dios ga ulu'zechu zxi'bigaca lahuë' nupa biti' ta'lë'e Lë' dxi'a. <sup>14</sup> Ni'a que tuz le gulu'ë lahuë' Dios, tsaz benë' ga nácagaca idú tsahui' nupa na' bunë' dxi'a, en bubéajë' léguequi quez queë' Dios. <sup>15</sup> Lësca' caní Dios Bö' Lá'ayi runë' ba nalí loru', tu' gunné' zí'alö lë na' nazúaj lu guichi le rnna:

<sup>16</sup> Caní gaca didza' ucá'ana tsahui' gúnlena' légaquië' tódi yugu' dza ni', rnnë' Xanru'.

Uchízia' icja ládxi'do'gaquië' xibá quia', en uzúaja' le lu icja ládxi'do'gaquië'.

<sup>17</sup> Gudödi na' gunné':

Bíti'rö tsöjneda' dul-la' nabága'gaquië' en dö' biá'gaquië'.

<sup>18</sup> Que lë ni na', channö chinadúa dul-la', bíti'rö run bayudxi nu bi cu'u lahuë' Dios tu' nözi dul-la'.

*Huáca ibíga'ru' gala' ga zoë' Dios*

<sup>19</sup> Na'a, yugu' böchi' luzá'ado', idú ládxi'ru' gaca idxinru' lahuë' Dios caz, ni'a que xichönë' Jesucristo. <sup>20</sup> Tséajlenru' tu nöza cubi, en idú tsahui' le nuzóë' Cristo, le ridxín cúdzi'lö lari' na' busayaj ga nu riyaza lataj idú lá'ayi na', o huáca innaru', nöza na' gusaljé' Cristo ni'a queëru' tu' budödë' idütë le naca cazë'. <sup>21</sup> Jesús náquië' queëru' tu bixúz nayëpisëtëré', en rinná bé'enë' bönachi queë' Dios. <sup>22</sup> Que lë ni na' huáca ibíga'ru' gala' ga zoë' Dios idú ládxi'ru', en lu yöl-la' run löza queëru', tu' réajlë'ëru' Cristo, tu' chibunë dxi'a icja ládxi'do'oru', para cabí uxósa ládxi'do'oru' rë'u, ate' gudibë' idütë le naca cázaru' len le naca tu nisa nácatëro idú. <sup>23</sup> Ral-la' gácaru' tsutsu, en cabí gaca chopá ládxi'ru' ca naca le runru' löza que le nazí lu ná'aru', le guzxi' lu në'ë Dios gunné' queëru', ate' Lë' runë' ca rnnë'. <sup>24</sup> Ral-la' utipá ládxi'ru' turu' ia'turu', para gunru' ga idxí'iröru' luzá'aru', en gúnröru' ca' le naca tsahui'. <sup>25</sup> Bal-la bönachi bíti'rö tu'dubi len rë'u. Biti' ral-la' gunru' ca tun bönachi na', pero ral-la' utipá ládxi'ru' turu' ia'turu', en gúnröru' caní tu' rilë'ëru' chizóa idxín dza huödë' Xanru'.

<sup>26</sup> Channö zéajlenru' runru' dul-la' tödi núnbë'ëru' le naca idütë li, bití' ca' nagá'ana bi gaca cú'uru' lahuë' Dios le ugúa dul-la'. <sup>27</sup> Yugu' bönni' tunë' caní, lu yöl-la' radxi ridzöbi quégaquië' ta'bözë' dza ichúguië' Dios quégaquië' ila'yázië' lu guí' gabila, lë na' uzéguitica'sö nupa ta'dá'baga' Dios. <sup>28</sup> Cate' nu bönni' buzóë' xibá queë' Moisés tsölá'alö, gulútië' lë' channö chopá tsonna bönachi gulún bá nali que le benë', ate' cuntú nu buéchi' ladxí' bönni' na'. <sup>29</sup> Na'a, nu bönni' uzóë' tsölá'alö Zxí'inë' Dios, en uzóë' tsölá'alö ca' xichönë' le run tsutsu didza' rucá'ana tsahui', le ruún rë'u dxi'a, ibága'rë' ca' xíguia'. Nu bönni' gunë' caní ucá'anë' cá'asö Dios Bö' Lá'ayi, Nu ruzá' ladxí' queëru' le riquíniru'. <sup>30</sup> Caní gaca, tu' núnbë'ëru'-në' Dios, Nu gunná: "Quia' neda' nequi yöl-la' ruzí' lëbi. Neda' ubi'a quégaca bönachi, rnnë' Xanru'." Lësca' caní gunné': "Xanru' uchi'a usöröë' bönachi queë'." <sup>31</sup> Ral-la' gadxi idzöbi nu ral-la' si' xíguia' lu në'ë Dios ban.

<sup>32</sup> Guli'tsójné yugu' dza chigula'dödi cate' ni' si' bidxín queëli' bení', ate' biá' gulenli' zían le bulu'saca' zi'ë libí'ili'. <sup>33</sup> Bulu'lidza ditaj bönachi libí'ili', en bulu'dxía libí'ili' dö' lahui' lógaca bönachi, ate' benli' tsözxön ca' nupa gula'guí'i gula'zaca' caní. <sup>34</sup> Caní guca, tu' buéchi' ládxi'li' nupa nadzúngaca lidxi guíë, en lu yöl-la' rudzeja queëli' biá' gulenli' nupa gula'béaj lidxili' yugu' le guta' queëli'. Caní benli' tu' nözili' nequi queëli' le nácarö dxi'a, en le zóatica'sö ni' yehua' yubá. <sup>35</sup> Na'a, bití' ucá'anali' lë na' runli' löza, le nachë' tu le zxön ubi'ë Dios queëli'. <sup>36</sup> Run bayudxi cözali' zxön ladxí', para cate' chibenli' ca ré'enë' Dios, sí'ili' le guzxi' lu në'ë gunné' queëli', ca na' nazúaj lu guichi lá'ayi, ca gunné' Dios le rnna: <sup>37</sup> Ia'tú chí'ido'osö idxinë' Bönni' na' ral-la' guidë'.

Bití' ca' tsenë'.

<sup>38</sup> Ní'irö nu naca tsahui' lahua' neda',

ulá nu na' tu' réajlë' neda'.

Channö huóaj ladxí', en tá'baga' neda',

bíti'rö tsaz ládxa'a nu na'.

<sup>39</sup> Na'a, rë'u ni, bití' nácaru' ca nupa tu'huóaj ladxí', en ta'dá'baga' Dios, en ila'niti, pero réajlë'ëru' Cristo, en nadéli'ru' yöl-la' rusölá.

## 11

*Ca naca yöl-la' réajlë' queëru' Dios*

<sup>1</sup> Na'a, tu' réajlë'ëru' Dios, naca löza queëru' sí'iru' le runru' löza, ate' naca bë' zoa le cabí gaca ilé'ëru'. <sup>2</sup> Caní gula'yéajlë'ë xuz xtó'oru' Dios, ate' que lë ni na' nazúaj lu guichi lá'ayi ca guca quégaquië' le rnna: Bulu'rúajë' tsahui' lahuë' Dios.

<sup>3</sup> Tu' réajlë'ëru' Dios, réquibe'ëru' benë' Lë' yödzülió ni len didza' bë'ësë'. Lësca' caní, cate' benë' Dios yúgu'të le rilé'ëru', bugunë' dxin le cabí nalá'.

<sup>4</sup> Tu' guyéajlë'ë Abel Dios, gulu'ë rön queëba' böa' bédxido' lahuë' Dios, tu le nácatëró lesaca' ca le gulu'ë Caín lahuë' Dios, en que lë ni na' Dios benë' ba nalí queë' Abel na', gunnë' náquië' tsahui', en benë' bal lë na' gulu'ë lahuë'. Sal-la' chinátië' Abel na', ga ridxintë na'a dza, naca tsca ru'ë didza', tu' guyéajlë'ë Dios.

<sup>5</sup> Tu' guyéajlë'ë Enoc Dios, gudödë' ni' yehua' yubá, en biti' ca' gútië', ate' bíti'rö nu budzüli lë', tu' buchë'ë Dios lë', ate' nazúaj lu guichi lá'ayi ca naca queë' le rnna: "Zí'alö ca buchë'ë Dios lë', benë' Enoc le raza ládxë'ë Dios." <sup>6</sup> Na'a, channö cabí réajlë'ëru' Dios, biti' gaca gunru' le raza ládxë'ë Lë', ate' para íbígá'ru' gala' ga zoë' Dios, run bayudxi tséajlë'ëru' zoa cazë' Lë', en rubi'ë que nu ru'í ladxi' Lë'.

<sup>7</sup> Cate' ni' Dios buzéajni'inë' Noé ca ral-la' ilaca le cabí rilé'ëninë' Noé na', tu' guyéajlë'ë Noé Dios, benë' ca rnna xtídzë'ë Dios. Bupë'ë barco zxon na' nazí'i le Arca, ate' lë'e barco na' bulu'lá bönachi di'a dza queë' Noé. Tu' guyéajlë'ë Noé Dios, benë' ga naca bë' narugu quégaca bönachi yödzülió ílátigaca, ate' bidéli'në' gúquië' tsahui' lahuë' Dios, le ta'deli' nupa ta'yéajlë' Lë'.

<sup>8</sup> Cate' ni' Dios bulidzë' Abraham, tu' guyéajlë'ë Abraham Lë', benë' ca rnna xtídzë'ë Dios, en buzë'ë ladzë' para tsejë' lataj ni' ral-la' si'ë ca tu le guequi tsaz queë', ate' birúajë' ladzë' sal-la' biti' nözinë' gazxi na' ral-la' tsejë'. <sup>9</sup> Tu' guyéajlë'ë Abraham Dios, gúquië' ca tu bönni' zi'tu', en guzóë' luyú na' Dios guzxi' lu në'ë unödzejë' queë'. Guzóë' lu yu'u guidido', en lëbisö ca gulunë' Isaac, en Jacob, xzí'ini xi'sóë' Abraham, nupa ni' guzxi' lu në'ë Dios unödzejë' quéguequi lë na' guzxi' lu në'ë unödzejë' queë' Abraham. <sup>10</sup> Caní benë' Abraham, tu' benë' löza idéli'në' yödzo na' rö'ö tsaz xilibi zö'ö que, le nuzóë' Dios xilibi zö'ö que, ate' gulu'ë le ga na' zoë' Lë' cazë'.

<sup>11</sup> Lësca' caní Sara, sal-la' chinácanu nigula huödx, guyéajlë'ënu Dios, ate' Lë' bë'ë queënu yöl-la' huáca buzóanu-bi' bí'ido'. Buzóanu-bi' bi'i bönni'do' sal-la' chigudödi izi queënu, tu' guyéajlë'ënu Dios gunë' ca rnna xtídzë'ë na' guzxi' lu në'ë queënu. <sup>12</sup> Que lë ni na', sal-la' chibigúladë'ë Abraham, gula'cuá'abi' zióntëróbi' xzí'ini xi'sóë'. Gula'cuá'abi' tsca rö'öba' böljaj lúzxiba, en tsca rö'ö yuzxi tu ra' nisa zxon, cunttu nu gaca ulaba légcabi'.

<sup>13</sup> Yúgu'të bönni' ni gulátië', en biti' gula'zi'ë lë na' guzxi' lu në'ë Dios unödzejë' quégaquië', pero gula'yéajlë'ë Dios, ate' zi'tu' zí'tu'sö bila'lë'ëné' lë na' ral-la' ila'zi'ë. Gula'yéajlë'ë Dios, en gulunë' ba nalí que lë ni. Caní guca, bulu'lu'ë nácaquië' ca bönni' zi'tu', en bönni' ta'dazë' yödzülió ni. <sup>14</sup> Yugu' bönni' tu'ë caní didza', tu'lu'ë ta'guiljë' tu lataj le gaca ládzagaquië'.

<sup>15</sup> La'tu' gula'zá' ládxi'gaquië' caní que luyú ga ni' bila'rúajë', le nácatë ulu'dzölinë' nacxi huöajgaquië' ni', <sup>16</sup> pero gula'zá' ládxi'gaquië' que luyú na' nácarö dxi'a, le rö' yehua' yubá. Que lë ni na' biti' rutuí'inë' Dios cate' ta'nnë' náquië' Dios quégaquië', tu' chinupë'ë tu yödzo quégaquië'.



<sup>17</sup> Tu' guyéajlë'ë Abraham Dios, cate' guzxi' bë'ë Dios lë', budödë'-bi' bi'i Isaac queë' lahuë' Dios ca na' tu'dödë'-ba' yugu' böa' bëdxi tútigaquië'-ba' lahuë' Dios. Guzóë' sina' Abraham gútië'-bi' bi'i bönni' zí'alö queë' na' lahuë' Dios sal-la' nácabi' bi'i na' guzxi' lu në'ë Dios unödzejë' queë'. <sup>18</sup> Caní benë' sal-la' gudxë' Dios lë', gunné': "Lu ná'abi' bi'i Isaac quiu' ichísagaca'-bi' zxi'ini xi'sú'." <sup>19</sup> Caní benë' Abraham, tu' gúquibe'enë' napë' Dios yöl-la' huáca usubanë'-bi' lu yöl-la' guti, ate' ca tu lugá'a luséqui', huáca innaru' buzi'ë-bi' lu yöl-la' guti sal-la' biti' guti cázabi'.

<sup>20</sup> Tu' guyéajlë'ë Isaac Dios, gunábinë' Dios gun lá'ayë'-bi' bi'i Jacob, enca' bi'i Esaú ca zeaj naca le ulu'zí'ibi' xibé dza si' za'. <sup>21</sup> Tu' guyéajlë'ë Jacob Dios, cate' ni' chizóa gátië' gunábinë' Dios gun lá'ayë'-bi' tu tubi' zxi'inë' José, ate' guyéaj ládxe'ë Dios, ni' nayéchuë' lu xiyaga queë'. <sup>22</sup> Tu' guyéajlë'ë José Dios, cate' ni' chizóa gátië', bë'ë didza' que dza na' ila'ruájë' zxi'ini xi'sóë' Israel luyú Egipto, ate' gunná bë'ë ca ral-la' ilu'ë dxita queë' luyú ga na' tsöjcu'ë.

<sup>23</sup> Tu' gula'yéajlë'ë Dios, cate' gúljabí' bí'ido Moisés, xuz xiná'abi' bulu'cáché'ë-bi' idú ca tsonna beo', tu' bila'le'enë' nácabi' bi'i bönni'do' na' lachi, en biti' guládxinë' bönni' rinná bé'enë' bönachi Egipto, bönni' na' gunná bë'ë ilútië'-bi' yugu' bi'i bönni'do' na'. <sup>24</sup> Tu' guyéajlë'ëbi' Moisés Dios, cate' guzxonbi', biti'rö bë'ëbi' lataj nu uzóa lëbi' bi'i bönni' queënu nigula zxi'inë' Faraón, bönni' na' rinná bé'enë' bönachi Egipto. <sup>25</sup> Caní benbi' tu' gúquibi' nácarö dxi'a nu usaca' zí' lëbi' tsözxön len bönachi queë' Dios ca uzí'ibi' xibé tu chí'sö yugu' le tu'zí' xibé nupa tun dul-la'. <sup>26</sup> Gúquibi' nácarö lesaca' nu ulidza dítaj lëbi', ca na' gaca ca' queë' Cristo, ca idéli'bi' yugu' yöl-la' tsahui' quégaca bönachi Egipto, tu' guzá ládxi'bi' ca naca le ubi'ë Dios queëbi'. <sup>27</sup> Gudödi ni', tu' guyéajlë'ë Moisés Dios, birúajë' luyú Egipto, en biti' gúdxinë' yöl-la' rilé queë' bönni' rinná bé'enë' bönachi Egipto, ate' biá' gulënë' ca run nu rilé'ë Dios, Nu na' biti' gaca ilé'eru'.

<sup>28</sup> Tu' guyéajlë'ë Moisés Dios, benë' Laní Pascua ca gunná bé'enë' Dios lë', en buchéajë' rön ra' yu'u lídxigaquië', para cabí guti zxi'inigaquië' nu na' ral-la' usuniti yugu' bi'i bönni' zí'alö quégaca bönachi Egipto. <sup>29</sup> Tu' gula'yéajlë'ë yugu' bönni' Israel Dios, gula'dödë' luyú bidxi gatsaj láhui'lö nísado' nazí'i le Nisa Xiná. Cate' gulé'ënnë' ila'dödë' ca' bönni' Egipto ni', gula'yépinë' nisa, en gulátigaquië' lu Nisa Xiná na'.

<sup>30</sup> Tu' gula'yéajlë'ë bönni' Israel Dios, cate' budxi gula'dödë' idú gásibi'ilö yödzö Jericó yugu' dza idú gadxi dza, bila'guínnaj yugu' zö'ö gulún chí'i yödzö na'. <sup>31</sup> Tu' guyéajlë'ënu Rahab Dios, nigula ru'ínu lataj bönachi, biti' gútinu tsözxön len bönachi Jericó na' biti' gulún ca rnna xtídzë'ë Dios, tu' bennu bal bönni' Israel na' buduyúlanguaquië' le rácalen bönachi Jericó.

<sup>32</sup> ¿Bízxirö ral-la' inní'a? Riyadzaj lataj uzúaja' ca gulunë' Gedeón, en Barac, en Sansón, en Jefté, en David, en Samuel, enca' yugu' bönni' gulu'ë didza' uláz queë' Dios.

<sup>33</sup> Tu' gula'yéajlë'ë Dios, bulu'zötjë' zían yödzö zxön.

Gulunë' le naca tsahui', ate' gula'déli'në' le guzxi' lu në'ë Dios unödzejë' quégaquië'. Bulu'sayjë' ruá'agacaba' bëdxi guixi'.

<sup>34</sup> Bulu'lë' yugu' lu guí' zxön.

Bila'ruájë' lu ná'agaca nupa gulë'ëni iluti légaquië' len guíë tuchi'. Dios bunë' légaquië' tsutsu cate' ni' gula'cuídi'në'. Bulu'huóáquië' ca' tsutsu lu gudil-la.

Bulu'láguie' bönni' guizxi yu rójáquië' gudil-la quégaquië' bönni' zi'tu'.

<sup>35</sup> Yugu' nigula dza ni' bulu'zi' inu bi'i que queégacanu nubángacabi' lu yöl-la' guti.

Ia'bal-lë' bönni' ni' gulátie' lu ná'agaquië' bönni' ni' bulu'saca' zi'ë légaquië', en tu' cabí gulé'ennë' ulu'cá'anë' Dios, biti' gula'zi'ë lataj nu usán légaquië'. Caní gulunë' para ila'déli'në' yöl-la' rubán lu yöl-la' guti, lë na' guléquinë' nazáca'rö. <sup>36</sup> Ia'bal-lë' biá' guléngaquië' yöl-la' rutitaj, en xíguia' que gubá'ayi, ate' gula'dzunë' lidxi guié, nága'gaquië' du guié. <sup>37</sup> Bulu'ladxí' bönachi bal-lë' guiöj, en gula'chözë' ia'bal-lë'. Gula'zi' bë'ë légaquië', en gulútigaca ziángaquië' len guié tuchi'. Gula'dödë' ná'alö ní'ilö, nácugaquië' guídi zxágacaba' bö'cu' zxila', en chivo. Guláquië' yechi', en gula'guí'i gula'záquë'ë, ate' bulu'dxia bönachi légaquië' dö. <sup>38</sup> Caní guláquië' bönni' na', ate' biti' gulaca bönachi yödzóliö ni lesaca' ulu'zi' xibégaquië'. Gula'dasë' lu lataj cá'asö, en yugu' lu guí'a, ate' gula'cuá'asë' yugu' zxan bulóaj, en yugu' yeru luyú. <sup>39</sup> Yúgu'të' bulu'rúajë' tshahi' lahuë' Dios tu' gula'yéajlë' Lë', sal-la' biti' gula'zi'ë luyú ni le guzxi' lu në'ë Dios unödzjë' quégaquië'. <sup>40</sup> Caní guca, tu' nupë'ë Dios ni'a queëru' tu le nácarö dxi'a para cate' únë' légaquië' idú dxi'a, rë'u ni gunru' légaquië' tsözxön.

## 12

### *Ral-la' uyuru-në' Cristo*

<sup>1</sup> Que lë ni na', lësca' rë'u, tu' nacua' idú gásibi'ilö ga ni zóaru' ziantërö nupa tun ba nalí ca ta'yéajlë' Dios, ral-la' ucá'anaru' yúgu'të le ruá' dö' le naca ca tu le naca zi'i nuá'aru', enca' yúgu'të dul-la' nazöngaca rë'u, ate' lu yöl-la' riböza zxön ladxí' queëru', ral-la' gunru' xichinë' Dios, le naca tsca xíti'ru' lu huitaj le zoa loru'. <sup>2</sup> Ral-la' uyuru-në' Jesús, Nu na' run ga gaca tséajlë'ëru' Dios, en Nu run ga raca idú yöl-la' réajlë' queëru' Lë'. Jesús gudí'i guzxi'quë'ë lë'e yaga cruz, en biá' gulënë' yöl-la' rutuí' que, tu' gú'unnë' idéli'në' yöl-la' rudzeja na' uzi'ë xibé, ate' yöjchö'ë cuita lë'ë ibëla Dios, ga ni' rö'ë rinná bë'ë.

<sup>3</sup> Buli'yüë' Jesús, ca na' gudí'i guzxi'quë'ë le bulu'saca' zi'ë bönni' dul-la' Lë', para cabí icuídi'li', en para cabí gaca chopa ladxí'li'. <sup>4</sup> Ga ridxintë na'a dza, biti' bi' biá' gulenli' ga idxintë nu gun libí'ili' huë' tu' ridá'baga'li' le naca dul-la'. <sup>5</sup> Nadxi ca' chizá' ral-la ladxí'li' lë na' ruzéajni'inë' Dios libí'ili'. Nácali' ca yugu' zxi'ini cazë', ca na' nazúaj lu guichi le rnnë':

Zxi'ina', biti' uzú' tsölá'alö le gunë' Xanru',  
cate' usëdi uzéajni'inë' li',  
en biti' huöaj ladxu'u cate' uní'inë' li'.

<sup>6</sup> Xanru' runí'inë' nu nadxfí'inë',  
en rusëdi ruzéajni'inë' yúgu'të nupa ta'zi' lu në'e ilaca zxi'ini cazë'.

<sup>7</sup> Ral-la' guá' ilenli' le uní'inë' Dios libí'ili', tu' runë' Dios caní queëli' tsca nácali' zxi'ini cazë'. Biti' ca' zóabi' tubi' bí'ido' biti' uní'inë'-bi' xúzi'bi'.

<sup>8</sup> Na'a, channö cabí runí'inë' Dios libí'ili' ca na' runë' quégaca yúgu'të zxi'ini cazë', ní'irö nácali' ca yugu' bi'i lan, en biti' nácali' idú zxi'inë' Dios.

<sup>9</sup> Ia'stú, cate' ni' nácaru' bí'ido', gula'cu'ë xuz xiná'aru' luyú ni, bulu'ní'inë' rë'u, pero runru' légaquië' bal. Ca' naca, ral-la' gúnrröru' ca rnna xtídzë'ë Xúziru' zoë' yehua' yubá para sóaru' ibanru' tsaz. <sup>10</sup> Yugu' xuz xiná'aru', tu chí'sö bulu'ní'inë' rë'u tsca le guléquisinë' naca dxi'a, pero cate' runí'inë' Dios rë'u, naca para gaca tu le uzí'iru' xibé, para gácaru' idú lá'ayi ca naca cazë' Lë'. <sup>11</sup> Le nácatë biti' nalá' lahui na'a le uzí'iru' xibé que le runí'inë'

rè'u, pero run ga ruhu' iniru'. Channö gü' iru' lataj usëdi rè'u le runi' inè' rè'u, gun ga cözaru' dxí' ado', en ga gácaru' tsahui'.

*Soa bönadxi queëru' channö cabí uzë nágaru' chi' è Dios*

<sup>12</sup> Que lè ni na' buli' ún tsutsu ná' ali' le röjxéqui' guequi, enca' xzíbili' le ta' xzízi, en idipa ládxi' li' para gunli' le naca dxí' a. <sup>13</sup> Guli' sóa nōza tsahui', para cabí gunli' ga ucá' ana nu ricuidi' ladxi' nōza na', pero guli' gún ga huóaca ladxi' nu na'.

<sup>14</sup> Guli' güi' ládxi' li' cōzalenli' dxí' a yúgu' tē bönachi, en gácali' tsahui' lahué' Dios, tu' channö cabí gunli' caní, biti' gaca ilé' eli' -nè' Xanru'. <sup>15</sup> Guli' gún chi' i cuinli' para cabí soa nu ucá' ana le ruzá' ládxi' è Dios queëru', en para cabí soa nu gaca ca tu guixi' silá', para cabí utsá' libí' ili', en cabí gun ga cabí gácali' tsahui' zianli' libí' ili'. <sup>16</sup> Guli' gún chi' i cuinli' para cabí gun nu dzaga libí' ili' le ruá' dö', o le cabí naca tsahui', ca na' benè' Esaú, xzí' inè' Isáac. Esaú na' bëti' è le ral- la' gata' lu në' è tu' náquiè' bi' i bönni' huaca queë' xuzè' para guzxi' è tu le do' gudahué'. <sup>17</sup> Chinöz quézili' ca na' guca queë' Esaú gudódi ni' cate' gu' unnè' idéli' nè' le inabè' xuzè' lahué' Dios para gaca le tsahui' queë'. Buéchi' ládxi' è xuzè' lè', pero biti' guta' lataj ubí' i ládxi' è Esaú na' sal- la' gudilaj ládxi' è le len yól- la' ribödxi queë'.

<sup>18</sup> Ca raca queëli' biti' naca ca guca quégaquiè' bönni' Israel. Légaquiè' gula' biguè' è gala' ga zoa tu guí' a le gaca nu can, ate' guyegui guí' a ni', en böaca chul- la lahui' dza tu' gur' ö böaj gasaj, en guyécjada' bö'. <sup>19</sup> Bila' yönnè' ta' bödxi lúzuba' böa', enca' chi' è Dios Nu bë' didza'. Cate' bila' yönnè' lè ni, guláta' yuè' lahué' Moisés para cabirö gü' ilenè' Dios légaquiè' didza'. <sup>20</sup> Caní gulunè' tu' cabí guca guá' iléngaquiè' lè na' gunná bé' enè' Dios légaquiè', gunné': "Channö tsöjlí' biba' tuba' böa' guí' do' os guí' a ni, ral- la' ulu' ládxi' è- ba' guió' j, o ulu' döde' -ba' yaga tuchi' ." <sup>21</sup> Lè na' bila' lé' enè' ben gádxida' légaquiè', ate' Moisés gunné': "Radxi ridzóbida', en rizzízida' a."

<sup>22</sup> Na' a, libí' ili' ral- la' gádxitèröli' tu' ribí' ga' li' gala' tu lu guí' a nazí' i le Sión, en ga zoa yödzo queë' Dios ban, le nazí' i le Jerusalén que yehua' yubá, ga na' nacu' è gubáz lá' ayi guizxi yu queë' Dios. <sup>23</sup> Ribí' ga' li' gala' ga ni' nudúbigaca xzí' ini cazè' Dios lahué' Lè', nupa na' nazúajgaca láguequi lu guichi ni' yehua' yubá, enca' ga zoè' Dios Nu ruchi' a rusöröè' yúgu' tē bönachi, en ga na' nacuá' yugu' bö' gulaca cazè' yugu' bönni' tsahui', tu' bunè' Dios légaquiè' tsahui'. <sup>24</sup> Ribí' ga' li' ca' ga zoè' Jesús, Nu ben tsutsu didza' cubi na' rucá' ana tsahui', enca' ga nagu' è Jesús rön queë' le run ga runiti lahué' Dios rè'u, rön na' run le nácarö dxí' a ca le ben xichönè' Abel, lè na' ben ga guchúguie' Dios queébi' bi' i böché' è.

<sup>25</sup> Que lè ni na', guli' gún chi' i cuinli' para cabí tá' baga' li' Nu na' ruí' i didza'. Biti' ca' bulu' lá nupa ni' gula' dá' baga' nu na' bulidza légaquiè' luyú ni. Nácatèrö löza biti' ca' uláru' rè'u channö tá' baga' ru' Nu na' rulidza rè'u, zoè' yehua' yubá. <sup>26</sup> Dza ni' guzxi' i luyú ni tu' biyón chi' è Dios, pero na' a chiguzxi' lu në' è, gunné': "Ia' tú luzuísö, en calégasö luyú uxí' zia', pero lúzxi' ba ca' uxí' zia' ." <sup>27</sup> Cate' ni' rnnè': "Ia' tú luzuísö", lè ni rulu' i rè'u ral- la' udúa yugu' le gaca ila' xzízi, lè na' rö' ö yödzülió ni, ate' ulu' gá' ana le cabí gaca ila' xzízi, lè na' rö' yehua' yubá. <sup>28</sup> Que lè ni na', tu' ral- la' idéli' ru' tu lataj ga inná' bë' èru', le cabí izxizi, ral- la' guièru' -nè' Dios: "Xclenu", ate' lu yól- la' ba' a ladxi', en lu yól- la' radxi Lè' tseaj ládxi' ru' Lè' ca na' raza

ládxe'ë Lè', <sup>29</sup> tu' náquië' Dios queëru' ca tu guí' le rusuniti le cabí naca idú tsahui'.

## 13

### *Le ral-la' gunru' le raza ládxë'ë Dios*

<sup>1</sup> Ral-la' idxí'tica'sili' luzá'ali' tuli' ia'tuli'. <sup>2</sup> Guli'tsöjné ral-la' uzóali' lídxili' nu idxín ga zóali'. Cate' gulún caní bal-la bönachi, bulu'cuá' lídxiguequi gubáz lá'ayi que yehua' yubá queë' Dios, sal-la' biti' guléquibe'e nácagaquië' gubáz lá'ayi.

<sup>3</sup> Guli'tsöjné nupa nadzúngaca lidxi guíë tsca nunli' légaquië' tsözxön, nadzunli' ca' lidxi guíë. Guli'güi' ládxi'li' yugu' bönni' ta'bía ládxi'gaca bönachi légaquië', tsca libí'ili' riguf'i rizáca'lenli' légaquië' tsözxön.

<sup>4</sup> Ral-la' gunli' bal yöl-la' nutsaga na', ate' tu tuë' bönni' ral-la' sóalenë'-nu nigula queë' lu yöl-la' ba'a ladxí' queë', tu' ichúguië' Dios quégaca nupa tun le ruá' dö', en nupa ta'guítsaj xibá que yöl-la' nutsaga na'.

<sup>5</sup> Biti' bi uhuí'di'li', pero guli'tsaza ládxi'li' tsca le dë queëli' na'a, tu' chigunnë' Dios: "Catu caz ucá'ana' li', en biti' ca' ubéaj ládxa'a li'." <sup>6</sup> Caní naca, huáca innaru' idú ládxi'ru' lë na' rnna:

Xanru' náquië' Nu rácalen neda'.

Biti' ca' gádxida' bi gun bönachi quia'.

<sup>7</sup> Guli'tsöjné yugu' bönni' tu'yúë' libí'ili', nupa na' tu'sédinë' libí'ili' xtídzë'ë Dios. Buli'yú ca nadéli'gaquië', en guli'gún ca tunë' lu yöl-la' réajlë' quégaquië' Dios.

<sup>8</sup> Lébisö ca náquië' Jesucristo, néaje, en na'a, en cá'tica'sö. <sup>9</sup> Biti' güi'ili' lataj yugu' xibá izá'a, en xibá nadzá' ichë'gaca libí'ili' nöza yúbölö. Naca dxi'a gunli' tsutsu icja ládxi'do'oli' ca naca le ruzá ládxe'ë Dios queëli', en calëga ca nácagaca xibá que le rë'aj ráguru', lë na' biti' ulu'zí' xibé nupa tu'i ládxi'gaca léguequi.

<sup>10</sup> Zoa queëru' tu bucugu lá'ayi, le cabí ulu'zí' xibé nupa tun dxin que didza' rucá'ana tsahui' na' bilá' zí'alö. <sup>11</sup> Bixúz lo que yu'u lá'ayi na' gulu'ë xichöngacaba' böa' bëdxi lu lataj idú lá'ayi tu' nözi dul-la', pero bulu'zéguië bëla' cá'asö quégacaba' ga naca ní'ilö ra' yödzö. <sup>12</sup> Lësca' caní gudí' guzáquë'ë Jesús ní'ilö ra' yödzö para bunë' bönachi dxi'a len rön queë' cazë'. <sup>13</sup> Tsöjtá'aru'-në' Jesús, sal-la' ila'béaj bönachi rë'u lu yödzö, en sí'iru' tsözxön len Lë' lë na' bulu'lidza ditaj bönachi Lë'. <sup>14</sup> Biti' zoa tu yödzö queëru' yödzölió ni le soa tsaz, pero riguíljaru' lë na' si' za'. <sup>15</sup> Que lë ni na', ral-la' cú'utica'siru'-në' Dios yöl-la' ba, ugunru' dxin Lë' Jesucristo. Yöl-la' ba na' naca ca tu le rigú'uru' lahuë' Dios. Len ruá'a cuinru' guiëru'-në' Dios: "Xclenu'" ni'a que le náquië' Lë'. <sup>16</sup> Biti' gal-la ládxi'li' gunli' le naca dxi'a, en gácalenli' luzá'ali' tuli' ia'tuli', tu' naca lë ni ca tu le rigú'uru' lahuë' Dios le raza ládxe'ë Lë'.

<sup>17</sup> Guli'gún ca rnna xtídz'a'gaquië' böchi'ru' tu'yúë' libí'ili', en guli'güi' lataj ila'nná bé'enë' libí'ili', tu' tapa chi'ë bö' naca cázali', ca tunë' yugu' bönni' ral-la' ila'guíxjö'ë lahuë' Dios le núngaquië'. Guli'gún caní para ilunë' dxin na' lu yöl-la' rudzeja quégaquië', en calëga lu yöl-la' risëbi ladxí' quégaquië', tu' cabí uzí'ili' xibé dxin na' ilunë' lu yöl-la' risëbi ladxí' quégaquië'.

<sup>18</sup> Buli'lidzë' Dios, inábili'-në' gácalenë' netu', tu' runtu' löza soa dxi icja ládxi'do'otu', para cabí uxösa netu', ate' ruf'i ládxi'tu' gúntica'situ' le naca

dxí'a. <sup>19</sup> Le nácarö lo, ráta'yua' loli' inábili'-në' Dios ugu'ë neda' tu nöza para udxina' ga zóali' bayöntë.

*Dios uzá' ládxe'ë queëru' le gácalen rë'u*

<sup>20</sup> Na'a, rinábitu'-në' Dios, Nu run le rucá'ana rë'u tsahui', en Nu busubán Xanru' Jesucristo lu yöl-la' guti, Nu na' naca Bönni' Lo Uyú Bö'cu' Zxila', tu' bulaljë' rön queë' le run tsutsu didza' rucá'ana tsahui', le zoa tsaz, <sup>21</sup> rinábitu'-në' gunë' ga gácali' idú tsahui', para gaca gunli' yúgu'të dxin dxí'a, en gunli' ca rë'ënë' Lë', ate' gunë' queëli' le raza ládxe'ë Lë', tu' néquili' queë' Jesucristo. ¡Queë' Cristo gácatíca'sö yöl-la' ba! ¡Ca' gaca!

<sup>22</sup> Ráta'yua' loli', böchi' luzá'ado', gü'i ládxi'li' didza' ni ruzéajni'i libí'ili', tu' naca láti'do'os lë ni ruzúaja' queëli'. <sup>23</sup> Ral-la' inözili' chiburúajbi' bi'i Timoteo, bi'i böchi'ru'do', lidxi guë, ate' channö idxíntëbi' ga zoa' ni, gunbi' neda' tsözxön uduyútu' libí'ili'.

<sup>24</sup> Buli'gapa Dios böchi'ru' tu'yúë' libí'ili', enca' yúgu'të bönachi rö queë' Dios. Tu'gapa Dios libí'ili' bönachi ta'yéajlé' Cristo nacua' luyú Italia.

<sup>25</sup> ¡Dios uzá' ládxe'ë queëli' yúgu'téli'! ¡Ca' gaca!

## LE BUZÚAJË' LU GUICH SANTIAGO

*Santiago rugapë' Dios bönni' judío ta'dë'ë Cristo*

<sup>1</sup> Neda', Jacobo, naca' huen dxin queë' Dios, enca' queë' Xanru' Jesu-cristo. Rugapa' Dios libí'ili', nácali' idxinnu cö' dí'a dza quegaca bönachi Israel, násilasili' idú yödžölió ni.

*Yöl-la' réajni'i le runnë' Dios queëru'*

<sup>2</sup> Böchi' luzá'ado', cate' gaca bi gaca queëli' le si' bë' libí'ili', ral-la' udžéjali' idú ládxi'li' <sup>3</sup> tu' nöz quezili', cate' bi raca queëli' le rizi' bë' libí'ili' ca réajlë'ëli' Cristo, lë ni rusedi libí'ili' cözali' zžön ladxí'. <sup>4</sup> Guli' guí' ládxi'li' gaca idú yöl-la' zžön ladxí' queëli', para údxi gácali' bönni' ta'yéajni'inë', en biti' bi yadzaj queëli' ca náagaca lë ni.

<sup>5</sup> Channö zoa lada' libí'ili' nu biti' réajni'ini, nu na' ral-la' inabi-në' Dios, ate' Dios caz gunnë' yöl-la' réajni'i que, tu' runödžjë' yödxi yana' quegaca yúgu'të bönachi, en biti' ca' réqui quezinë' gunnë' queëru'. <sup>6</sup> Na'a, nu bi rinabi-në' Dios, run bayudxi tséajlë' Lë', en cabí gaca chopa ladxí'. Nu raca chopa ladxí', raca que ca raca que bidxina' que nísado' cate' rutá bö' le, ruzéaj bö' le niló ná'alö. <sup>7</sup> Nu naca caní biti' ral-la' gun löza si' bi unödžjë' Xanru'. <sup>8</sup> Bönni' na' reaj bö' ládxi'da'ahuë' biti' ridžölinë' nácalö gunë'.

<sup>9</sup> Channö zoë' tu bönni' böchi'ru' réajlë'ë Cristo, en náquië' cá'asö yödžölió ni, ral-la' udžéjanë' tu' chinadéli'në' tu lataj lo lahuë' Dios. <sup>10</sup> Bönni' böchi'ru' na' rilë'enë' yöl-la' tsahui' queë' ral-la' udžéjanë' cate' runë' Dios ga bití'rö ruzžöni ládxi'ë lë na' dë queë'. Nu ruzžöni ladxí' yöl-la' tsahui' que, gaca que nu na' ca raca que xiyija guixi'do', la' ridžöditë que. <sup>11</sup> Caní naca, tu' gaca que nu na' ca raca que xiyija guixi'do' na' cate' rilén gubidza, en rudzá'ada', la' ribídxitë guixi' na', en rigúinnaj xiyija, en riniti yöl-la' lachi que. Lësca' caní gaca queë' bönni' rilë'enë' yöl-la' tsahui' queë', inítië' tsanni ni runë' dxin riguiljë' yöl-la' tsahui' na'.

*Le ta'zi' bë' rë'u*

<sup>12</sup> Bica' ba bönni' böchi'ru' na' ruá' rilenë' le rizi' bë' lë'. Cate' chiburúajë' tsahui', idéli'në' yöl-la' na'bán idú, ca na' rideli' nu nutsa' lu huitaj, nu rideli' tu bregui' zin. Bönni' böchi'ru' na' náquië' bica' ba tu' idéli'në' yöl-la' na'bán idú na' guzxi' lu në'ë Dios unödžjë' quegaca nupa nadxi'iguequi Lë'. <sup>13</sup> Cate' bi raca queëru' le run ga guë'éniru' gunru' le ruá' dö', biti' ral-la' innaru': "Dios rizi' bë'ë rë'u len le naca xihui'." Dios biti' rizi' bë'ë nu bönni' len le cabí naca dxi'a. <sup>14</sup> Na'a, channö nu bi raca que le rizi' bë' le len le cabí naca dxi'a, naca tu' rizë ladxí' le ruá' dö', ate' lë ni ben ga gú'uni gun le ruá' dö'. <sup>15</sup> Lë na' rizë ládxi'ru' le ruá' dö' run ga gunru' dul-la', en cate' chibudxi benru' dul-la' na', la' dul-la' ná'asö rusubaga' rë'u xíguia' gátiru'.

<sup>16</sup> Böchi' luzá'ado', biti' si' ye'e la' cuínsili'. <sup>17</sup> Yúgu'të le naca dxi'a, en yúgu'të le naca idú le ruzí'iru' xibé, zá'gaca saca' xitsá'alö, en ta'rúaj ga zoë' Xúziru' Dios, Nu ben yugu' le ta'yëpi yösa lúžxiba, yugu' le tu'tsá' cuínguequi, pero Lë' biti' rutsá' cuinë', en biti' rutsë'ë ca runë', rúnntica'së' queëru' le naca tsahui'. <sup>18</sup> Ca rë'ëni quezinë' Dios, benë' ga nácaru' bönachi

cubi queë'. Bugunë' dxin didza' queë' le naca idütë li, para gácaru' ca tu gulapa zí' aló queë' ladaj yúgu'të nupa na' guró cazë' Dios.

*Le reaj ládxi'ru'-në' Dios le naca li ladxi'*

<sup>19</sup> Que lë ni na' rea' libí'ili', böchi' luzá'ado', yúgu'tëli' ral-la' sóali' sina' yónili', pero biti' ral-la' innëtëzili', en biti' ilëtëzili'. <sup>20</sup> Nu na' riletëz biti' run le naca tsahui' lahuë' Dios. <sup>21</sup> Que lë ni na', guli' cá'ana yúgu'të le ruá' dö', en yúgu'të le zían le cabí naca tsahui', ate' lu yöl-la' nöxaj ladxi' guli'sí' lu ná'ali' didza' na' chinayaza icja ládxi'do'oli', tu' huáca gun didza' ni ga uláli'.

<sup>22</sup> Na'a, guli'gún ca rnna didza' ni, en cabí yónisili', tu' channö yónisili' didza' ni, si' yé'eli' la' cuínsili'. <sup>23</sup> Nu riyónisö didza' ni, en biti' run ca rnna, nu ni naca ca tu bönni' ruyúë' lahuë' tu lu guië dxili, <sup>24</sup> tu' ruyú cuinë', en söhuöjë', ate' la' ral-latë ládxië' ca rinë'ë. <sup>25</sup> Na'a, nu bönni' biti' ral-la ládxië' le riyönnë', pero ruí' ládxië' xibá queë' Dios le naca idú li, en le gaca gun ga uláru', ate' ugá'anë' tsutsu, en gúntica'së' ca rinná bë' xibá na', gaquië' bica' ba ca naca yúgu'të le runë'.

<sup>26</sup> Channö nu bönni' ladaj libí'ili' réquinë' naca dxi'a ca reaj ládxië' Dios, pero biti' rapa chi'ë lúdxë'ë para cabí innësë' ca', bönni' ni rizí' yé'enë' la' cuinsë', ate' biti' raza ládxië' Dios ca reaj ládxië' bönni' na' Lë'. <sup>27</sup> Le reaj ládxi'ru'-në' Dios, le naca idú, en le naca dxi'a, naca gácalenru' yugu' bi'i uzëbido', enca' yugu' nigula nagá'anau túzinu, cate' ta'gu'i ta'zaca' nupa na', en cabí gútsa'ru' le cabí naca tsahui' le raca yödzölió ni.

## 2

*Tuz ca ral-la' gunru' bönachi bal*

<sup>1</sup> Böchi' luzá'ado', channö réajlë'ëli' Xanru' Jesucristo, Nu nácatërö lo, biti' ral-la' utsá'ali' ca gunli' bal tu tu bönachi. <sup>2</sup> Channö tsázië' tu bönni' ga na' nudúbili', en nagu'ë xibön në'ë le néquini oro, en nácuë' lari' nazáca'da', ate' tsázië' ca' tu bönni' yéchi'do', nácuë' lari' cá'asö, <sup>3</sup> channö gunli' bal bönni' na' nácuë' lari' nazáca'da', en guiëli'-në': "Gurö'ölen ré'u ga ni naca dxi'a", pero guiëli' bönni' yéchi'do' na': "Ná'asö guzuí", o guiëli'-në': "Gurö'i lu yu ni." <sup>4</sup> Channö caní runli', rutsá'ali' ca runli' bal tu tu luzá'ali', en run cuinli' ca nu ruchí'a rusörö luzë'e, biti' naca dxi'a ca rizá' ládxi'li'.

<sup>5</sup> Böchi' luzá'ado', buli'zë nágali' lë ni. Dios guró cazë' yugu' bönni', sal-la' téquiguequi bönachi yödzölió ni nácaqaquië' cá'asö, para ila' déli'në' yöl-la' tsahui' lahuë' Lë' tu' ta'yéajlë'ë Cristo, en gata' quégaquië' lataj ga ni rinná bë'ë Lë'. Gata' quégaquië' lë na' guzxi' lu në'ë Dios unödzejë' quégaca nupa ta'dxi'i Lë'. <sup>6</sup> Libí'ili' rucá'anali' cá'asö bönachi yechi' ca', en runli' bal yugu' bönni' dë yöl-la' tsahui' quégaquië', ate' bönni' na' dë yöl-la' tsahui' quégaquië' tu'saca' zi'ë libí'ili', tu' tu'gunë' libí'ili' dxin. Lësca' tu'dödë' libí'ili' lu ná'agaquië' bönni' yúlahui'. <sup>7</sup> Yugu' bönni' na' dë yöl-la' tsahui' quégaquië' ta'nnë' zi'ë ca' que Lë' Jesucristo le nazáca'tërö, en ca naca Lë' nazí'i lali': "Nupa Dá'gaca Cristo."

<sup>8</sup> Runli' dxi'a channö runli' idú ca rinná bë' xibá lo, le nazúaj lu guichi, en rnna caní: "Ral-la' idxi'inu' luzó'o ca nadxi'i cuinu'." <sup>9</sup> Na'a, channö rutsá'ali' ca runli' bal tu tu bönachi, runli' dul-la', en nabága'li' xíguia' lu xibá queë' Dios, tu' riguütsjali' xibá na'. <sup>10</sup> Channö runë' tu bönni' idú ca rinná bë' xibá queë' Dios, pero channö ichíxinë' ca naca tuz le rinná bë' xibá na', chinabáguë'ë xíguia' que idütë le rinná bë' xibá na'. <sup>11</sup> Lë' cazë'

Dios gunné': "Biti' gunu' dul-la' le riguitsaj xibá que yöl-la' nutsaga na'", en gunné' ca': "Biti' gütü' bönachi." Na'a, channö cabí runu' dul-la' le riguitsaj xibá que yöl-la' nutsaga na', pero rütü' bönachi, nabágu'u xíguia' que idúté xibá queé' Dios. <sup>12</sup> Ca innali', en ca gunli', ral-la' gunli' ca ralla' ilún nupa uchi'a usöröë' Dios légaquié' ca rinná bé' xibá na', le run ga uláru'. <sup>13</sup> Nupa cabí tu'huechi' ládxi' gaca luzé' eguequi, uchi'a usöröë' Dios léguequi, ate' cuntü nu huéchi' ládxi' léguequi, pero nupa na' tu'huechi' ládxi' gaca luzé' eguequi ulu'rúaj dxi'a cate' uchi'a usöröë' Dios léguequi.

### *Le ral-la' gunru' tu' réajlë'ëru' Cristo*

<sup>14</sup> Böchi' luzá'ado', bití' bi uzi'ë xibé tu bönni' channö innasé': "Réajlë'a Cristo", pero bití' runé' le naca tsahui'. Biti' gaca ulé' bönni' na' channö innasé' réajlë'ë Cristo. <sup>15</sup> Channö nacu'ë böchi' luzá'aru' ta'yéajlë'ë Cristo, en bití' dé le ilácuë', en calëga le ilahuë', <sup>16</sup> ate' channö tu nu dzaga libí'ili' guiésö légaquié': "Böaj lídxili' tsáhui'do'. Chibölaj budzé'eli'", pero channö cabí unödzej quégaquié' lë na' ta'yádzjanë', bití' ca' gúcalen légaquié'. <sup>17</sup> Lësca' caní raca que nu bönni' rnnasé' réajlë'ë Cristo. Channö cabí runé' le naca bé' naca idú ca réajlë'ë Lë', bití' naca lesaca' yöl-la' réajlë' queë'.

<sup>18</sup> Nadxi ca' guié' tu bönni' luzé'ë: "Li' réajlë'ësu' Cristo, ate' neda' runa' le naca tsahui'. Biti' gaca ulu'ínu' neda' réajlë'u Cristo channö cabí zoa le naca tsahui' runu'. Neda' uluf'ida' lí' réajlë'a Cristo ni'a que le naca tsahui' runa'." <sup>19</sup> Li' réajlë'u tuzé' náquié' Dios. Naca dxi'a ca runu'. Lësca' caní ta'yéajlë' yugu' bö' xihui', en ta'zxizi tádxida' Lë'. <sup>20</sup> Li', bönni' bití' bi nözinë'. Ral-la' inözi quézinu' channö zoa nu rnnasö réajlë' Cristo, pero bití' run le naca tsahui', bití' naca lesaca' yöl-la' réajlë' Lë' que nu na'. <sup>21</sup> Naca bé' burúajë' xúziru' Abraham tsahui' lahuë' Dios ni'a que lë na' benë', cate' ni' gulu'ë-bi' bi' Isaac queë' lahuë' Dios. Gulu'ë-bi' ca na' tun bönachi ta'gú'u le tu'zegui' lahuë' Dios, sal-la' bití' buzégui'ë-bi'. <sup>22</sup> Na'a gaca inözili' ca guca queë' Abraham. Lë na' benë' guca bé' guyéajlë'ë Dios. Ca' naca, guca bé' naca idú ca guyéajlë'ë Dios ni'a que lë na' benë'. <sup>23</sup> Caní guca lë na' nazúaj lu guichi lá'ayi le rnna: "Abraham guyéajlë'ë Dios, ate' Dios bilé'enë' lë na' benë' ca tu le ben ga böáquié' Abraham tsahui'." Que lë ni na' guzxi' lë: "Luzé'ë Dios."

<sup>24</sup> Na'a, rilé'e quézili' naca bé' rurúajë' tu bönni' dxi'a ni'a que le runé', en calëgasö tu' réajlë'ë Dios. <sup>25</sup> Lësca' caní guca queënu Rahab, nigula bé'ënu bönachi lataj. Lësca' naca bé' burúajnu dxi'a tu' zoa tu le tsahui' bennu, lë na' bennu cate' ni' bennu bönni' tu'yulan bal, en gúcalennu légaquié' para bulu'gué'ë yöjhuöjgaquié' nöza yúbölö. <sup>26</sup> Ca na' raca que idúté le naca cázaru' channö cabí yu'u bö', chinati, lësca' caní naca que le réajlë'ëru' Cristo channö cabí nalá' yöl-la' run que, bití' naca lesaca'.

## 3

### *Yugu' le rnna lúdxiru'*

<sup>1</sup> Böchi' luzá'ado', bití' guntëz zían cuinli' bönni' tu'sédinë' bönachi, tu' chinöz quézili' zítërö uchi'a usöröë' Dios rë'u, núlöru' rusédiru' bönachi. <sup>2</sup> Yúgu'tëru' runru' zían le richixi riníguiru'. Channö cabí richixi riníguinë' tu bönni' ca naca didzá' ru'ë, bönni' ni náquié' idú tsahui', en raca inná be'e cuinë' ca naca yúgu'të le runé'. <sup>3</sup> Cate' rigú'uru' guié' ruá'agacaba' böa' para gunru' ga ilunba' ca rë'ë'niru', gaca inná bé'ëru' légacaba' lu



idütë le tunba'. <sup>4</sup> Buli'yú ca' ca raca quéguequi barco. Sal-la' zxöntëro naca tu barco, en récjada' bö' ruzéaj le, cuídi'do'os naca në'e xiyágui barco na' le ruzecaj rudxi'i barco para tseaj gáti'tës ga gué'ënnë' bönni' rusé'ë le. <sup>5</sup> Lësca' caní naca lúdxí'ru'. Sal-la' cuídi'do'os naca, zióntëro le rnna lúdxí'ru' na'. Buli'yútsöca' ca run guí'. Sal-la' guí'do'os ribíbiru', tu guí'a sibi huayégui. <sup>6</sup> Lësca' lúdxí'ru' na' naca ca tu guí'. Yúgu'të le ruá' dö' raca yödzülió ni rnna lúdxí'ru', en tu' dzaga lúdxí'ru' na' idütë le naca cázaru', que lë ni na' run ga raca xihui' idütë le nácaru'. Le rnna lúdxí'ru' ribequi guí', le ruzegui' rë'u ca naca yúgu'të le runru', ate' tu' rnna caní lúdxí'ru' na', naca que tsa chinaguéla'të guí' le nabequi' tu' xihui'. <sup>7</sup> Yúgu'tëba' böa' guixi' ta'daba' luyú, en yugu' böa' zoa xíligacaba', en yugu' böa' tá'ayöj lé'ëba' lu yu, enca' yúgu'tëba' böa' dzó'öba' lu nísado', huáca ila'nná be'e bönnachi luyú ni légcacaba', <sup>8</sup> pero cuntú nu bönni' gaca inná bé'enë' lúdxë'ë, tu' rnna lúdxí'ru' le ruá' dö', en bití' gaca nu uzaga' xinözi. Zióntëro le rnna lúdxí'ru' le naca ca tu le nachë' yöl-la' guti. <sup>9</sup> Len la' lúdxí'ru' ná'asö rulidza tsáhui'ru'-në' Dios Xuz, en rulidza díjjaru' ca' yugu' bönni', ate' benë' Dios légaquië' ca naca cazë' Lë'. <sup>10</sup> Caní naca, len la' ruá'asiru' na' rulidza tsáhui'ru' bönnachi, en rulidza díjjaru' bönnachi. Böchi' luzá'ado', bití' ral-la' gaca caní. <sup>11</sup> Bití' ca' ta'lén nisa siziá', en nisa zöna' la' tuzi ga ta'lén. <sup>12</sup> Böchi' luzá'ado', tu yaga higo bití' gaca cuía le ribía yaga olivo, ate' tu lubá uva bití' gaca cuía le ribía yaga higo na'. Lësca' caní, nitú ga rilén nisa bití' gaca ila'lén nisa zöna', en nisa siziá'.

#### *Yöl-la' réajni'i le naca idú*

<sup>13</sup> Channö zoë' tu bönni' ládjali' rácadë'ë, en réajni'de'enë', lu yöl-la' nöxaj ladxi' queë' ral-la' ulu'ë náquië' caní ni'a que le naca tsahui' runë'. <sup>14</sup> Na'a, channö ruzxé'eli' luzá'ali', en runli' dxin para ila'gú'u bönnachi libí'ili' yöl-la' ba, bití' ral-la' gun ba zxön cuinli' ca naca yöl-la' réajni'i queëli'. Nu run caní rizí' yë', en ridá'baga' le naca idütë li. <sup>15</sup> Yöl-la' réajni'i caní bití' naca le runödzejë' Dios, pero que yödzülió ni naca, enca' quégaca bönnachi yödzülió ni, en que tu' xihui'. <sup>16</sup> Yugu' bönni' tu'zxé'enë' luzá'agaquië', en té'ënnë' ila'gú'u bönnachi légaquië' yöl-la' ba, lësca' ta'dil-la' dídzë'ë, en tunë' yúgu'të le ruá' dö'. <sup>17</sup> Yugu' bönni' nápagaquië' yöl-la' réajni'i na' runödzejë' Dios:

Tunë' le naca idú tsahui', en ta'bözë' dxí'ado'.

Nácaquië' zxön ladxi', en nöxaj ladxi'.

Tu'huechi' ládxi'gaquië' bönnachi,

en tunë' le naca dxí'a.

Tuz ca tu'chí'a tu'söröë' luzá'agaquië',

en bití' ta'béaj bë'ë luzá'agaquië'.

<sup>18</sup> Nupa tuí' ládxi'gaca ila'bequi dxi le raca, ta'böza dxí'ado', para gaca ca' dxí'a idütë le zeaj naca caz.

## 4

### *Nupa tun zxön le nacué' yödzülió*

<sup>1</sup> ¿Bixx que na' ridíl-lali', en raca didza' bixxaj queëli'? Raca caní queëli' tu' rizë ládxi'li' zión le rizë ládxi'li' tu tuli', en que lë ni na' ridíl-lalenli' luzá'ali'. <sup>2</sup> Zión le ruhuídi'li', en tu' cabí rizí'ili' le, que lë ni na' rútili' bönnachi. Ruzxé'eli' le dë que luzá'ali', en tu' cabí ridéli'li' le, que lë ni na' rizóa ribó'öli', en ridíl-lali'. Bití' rata' queëli' le ré'ënni', tu' cabí rinábili-në' Dios lë na'. <sup>3</sup> Sal-la' zoa bi rinábali', bití' bi rizí'ili', tu' cabí naca dxí'a

ca rinábali', tu' r'è'nili' lè na' rinábali' para ugunli' le dxin ca raza ládxi'sili'.<sup>4</sup> Libí'ili', bönachi nusanli'-nè' Dios, ¿naru' cabí nözili' channö runli' zxön le nacua' yödzölió ni, chinuhuóacali' ca nu biti' rilé'e Dios dxi'a? Núti'tès nu r'è'ni gun zxön le nacua' yödzölió ni, nuhuóaca ca nu biti' rilé'e Dios dxi'a.<sup>5</sup> Biti' rnnasö ca' le nazúaj lu guichi lá'ayi le rnna: "Dios risöl-lè'è Dios Bö' Lá'ayi queéru', Nu zóalen rè'u, ate' Lè' nadxf'inè' rè'u, en rudúli'nè' rè'u channö rusanru'-nè'." <sup>6</sup> Na'a, zxöntèrö le ruzá' ládxe'è Dios queéru', tu' nazúaj lu guichi lá'ayi le rnna: "Dios ruzágué'è xinözguequi nupa tun ba zxön cuínguequi, pero ruzá' ládxe'è quégaca nupa nácgaca nōxaj ladxi'." <sup>7</sup> Que lè ni na', guli'sóa nōxaj ladxi' lahué' Dios. Guli'nná be'e tu' xihui', ate' uzxunnaj ga zóali'. <sup>8</sup> Guli'güí ládxi'li' sóalenli'-nè' Dios, ate' Lè' idisóalenè' libí'ili'. Libí'ili', bönachi dul-la', guli'gaca tsahui', en bítirö gunli' dul-la'. Libí'ili', núlöli' reax bö' ládxi'do'oli', en chopa le nadxi'ili', guli'gún dxi'a icja ládxi'do'oli'. <sup>9</sup> Guli'sèbi ládxi'li', en buli'huí'ini, en guli'cōdxi. Na'a ruzxidxili, pero ral-la' cōdxili'. Rudzėjali', pero ral-la' huí'inili'. <sup>10</sup> Guli'gaca nōxaj ladxi' lahué' Xanru', ate' Lè' gunè' ga tsépiséli'.

*Biti' ral-la' ichugu bē'èru' le run luzá'aru'*

<sup>11</sup> Böchi' luzá'ado', biti' innèli' que luzá'ali' tuli' ia'tuli'. Nu bönni' rinnè' que böchi' luzé'è, en rilaga yudxè' le runè', bönni' ni rinnè' que xibá queè' Dios, en ruchi'a rusöröè' le rinná bē' xibá na'. Na'a, channö ruchi'a rusöröu' le rinná bē' xibá na', run cuinu' nu ruchi'a rusöröè' le, en biti' runu' ca rinná bē' xibá na'. <sup>12</sup> Na'a, tuzè' náquiè' Dios, Nu ben xibá na', en náquiè' ca' Nu ruchi'a rusöröè' le runru'. Lè' cazè' gaca usölè' bönachi o usunítie' bönachi na'. Na'a, ¿núzxitè run cuinu', rilaga yudxu' luzó'o?

*Biti' gaca gunru' löza le gaca cuxö huidzaj*

<sup>13</sup> Na'a, buli'zè nágali', núlöli' rnnali': "Cuxö huidzaj tséajtu' yödzö ni', ate' sóatu' ni' tu iz, en zían le gá'utu', en úti'tu', ate' caní gáta'da' dumí queètu'." <sup>14</sup> Biti' nözili' bizxi gaca cuxö huidzaj. ¿Nacxi caz naca queéru', tsa zóaru' yödzölió ni? Nácaru' ca böchila le nalá' tu chí'do'osó, en la' rinítitè. <sup>15</sup> Que lè ni na', caní ral-la' innali': "Channö gué'ènnè' Xanru', sóaru' ibanru', en tu ia'tú le gunru'." <sup>16</sup> Na'a, libí'ili', lu yöl-la' run ba zxön queéli' rigú'uli' yöl-la' ba la' cuínsili'. Yúgu'tè le caní le runli' zeaj naca le ruá' dö'. <sup>17</sup> Channö nöziru' le naca dxi'a le ral-la' gunru', en biti' gunru' lè na', runru' dul-la'.

## 5

*Santiago rusè'è ládxi'gaquiè' bönni' dē'yöl-la' tsahui' quégaquiè'*

<sup>1</sup> Libí'ili', bönni' rilé'eli' yöl-la' tsahui', guli'cōdxi, en guli'cōdxi'a, tu' si' za' dza ilé'eli' yöl-la' yechi'. <sup>2</sup> Chinaca ditaj yöl-la' tsahui' queéli', ate' chinutōgacaba' le ráculi' böljado' que. <sup>3</sup> Chinaca que dumí oro, en dumí plata queéli' ca naca que guié nazön yöni que, ate' yöni que na' naca ca tu le ruzegui libí'ili' didza', ate' gaca queéli' ca tu guí' le usuniti libí'ili'. Caní gaca queéli', tu' busó' butúbili' queézili' yöl-la' tsahui' dza ni zóaru' chiröjsétégaca. <sup>4</sup> ¿Buli'yútsöca! Yugu' bönni' huen dxin gula'lapè' yöla queéli' chita'naba yúdxinè' lászjagaquiè', tu' cabí riguízxjanili' légaquiè', ate' lè na' ta'nabè' bönni' huen dxin na' chibidxn didza' na' lahué' Xanru', ate' Lè' rinná bé'enè' ni'a nè'è guizxi yu. <sup>5</sup> Benli' ga buné'eli', en güí' gudágtica'sili' le rnnasö queéli' lu yödzölió ni. Buxön cuinli', pero chizóa idxín dza údxi queéli'. Gaca queéli' ca raza queéba' bēdxi renni', chibú'u

dza gútiru'-ba'. <sup>6</sup>Richúguli' quégaquié' bönni' tsahui', en rútili' légaquié', ate' légaquié' biti' ta'dá'baguë'ë libí'ili' cate' rútili' légaquié'.

*Cözaru' zxön ladxi', en ulidzaru'-në' Dios*

<sup>7</sup>Na'a, böchi' luzá'ado', guli'cöza zxön ladxi' ga idxinrö dza huödë' Xanru'. Buli'yú ca runë' tu bönni' guz gu'una. Lu yöl-la' riböza zxön ladxi' ribözë' guiöjsiu', en guiöj cusu lin, ate' tödi ni' ulapë', en utubë' yöz zían. <sup>8</sup>Lësca' caní, libí'ili' na' réajlë'ëli' Cristo, guli'cöza zxön ladxi', en buli'tipa ládxi'li', tu' chizá' gala' dza huödë' Xanru'. <sup>9</sup>Böchi' luzá'ado', biti' innëli' que luzá'ali' tuli' ia'tuli', para cabí ibága'li' xíguia'. ¡Buli'yútsöca! ¡Chirudzaga lo udxinë' Xanru', ate' uchi'a usöröë' le runli'! <sup>10</sup>Böchi' luzá'ado', buli'yú ca guca quégaquié' bönni' gulu'ë didza' uláz queë' Xanru'. Nácagaquié' ca tu le rulu'i rë'u ca ral-la' quí'í sáca'ru', en cözaru' zxön ladxi'. <sup>11</sup>Na'a, nucuá'aru' légaquié' ca yugu' bönni' guláquié' bica' ba, nupa ni' gula'guí' gula'zaca'. Chibiyönili' ca benë' Job. Gulözë' zxön ladxi' sal-la' gudí'í guzzáca'dë'ë, ate' nözili' ca' ca benë' Xanru' queë' ga búdxitë. Ruhuéchi'da' ládxi'ë Xanru' rë'u, en ruí'í ládxi'ë rë'u.

<sup>12</sup>Böchi' luzá'ado', le nácatërö lo naca lë ni rea' libí'ili': ¡Biti' uzötjali' Nu zoa yehua' yubá, en biti' uzötjali' le nacua' luyú ni, en biti' uzötjali' bítitës bi run tsutsu xtídza'li'! Cate' innali' "Ön" ral-la' innásili' "Ön." Cate' innali' "Biti'" ral-la' innásili' "Biti'." Caní ral-la' gunli', para cabí ibága'li' xíguia' lahuë' Dios.

<sup>13</sup>Channö riguí'í rizáca' nu dzaga libí'ili', ral-la' ulidza Dios nu na'. Channö zoa nu rudzeja, ral-la' gul-la' yöl-la' ba nu na'. <sup>14</sup>Channö re'e nu dzaga libí'ili', ral-la' ulidza bönni' gula tapa chi'ë bönachi queë' Cristo, para ulu'lidzë' Dios, en ila'nábinë' Lë' únë' bönni' huë' na'. Ral-la' ila'gu'ë lë' le za, en ulu'gunë' dxin Lë' Xanru'. <sup>15</sup>Cate' ulu'lidzë' Dios, en ta'yéajlë'ë gunë' Cristo ga huöáquié' bönni' huë' na', ní'irö gunë' Xanru' ga huöása uzóë', en channö benë' dul-la' bönni' huë' na', Xanru' uniti lahuë' lë'. <sup>16</sup>Que lë ni na', guli'xóalëpi dul-la' nabága'li' tuli' ia'tuli', en guli'naba que luzá'ali' tuli' ia'tuli' lahuë' Dios para únë' libí'ili', para urúaj yödzöhuë' na' ré'eli'. Le rulidzë' tu bönni' tsahui' Dios, le runë' idú ládxi'ë, nácada' lesaca'. <sup>17</sup>Elías, bönni' ni' bë'ë didza' uláz queë' Dios, gúquié' tu bönni' yödzölió ca nácaru' rë'u, pero cate' bulidzë' Dios, en gunábinë' Lë' para cabí galaj guiöj, idú tsonna iz yu' xopa beo' biti' gulaj guiöj luyú ni. <sup>18</sup>Gudödi ni' bulidzë' Dios leyúbölö, ate' böálaj guiöj, ate' bunödzej le gulazë' yugu' bönni' dza ni'.

<sup>19</sup>Böchi' luzá'ado', lë ni ral-la' inözili'. Channö nunbë' nu bönni' dzáguië' libí'ili' le naca idútë li, en richixi riníguinë', ate' zoa nu gun ga ubí'í ládxi'ë bönni' na' richixi riníguinë', <sup>20</sup>nu na' gun ga ubí'í ládxi'ë bönni' dul-la' na' gudë' ga yúbölö, usölë' bönni' dul-la' na' lu yöl-la' guti, en gunë' ga uniti lahuë' Dios dul-la' zían nabáguë'ë bönni' na'. ¡Ca' gaca!

## DÍDZA'DO' ZÍ'ALÖ BUZÚAJË' PEDRO

*Pedro rugapë' Dios nupa ta'dá' Cristo*

<sup>1</sup> Neda', Pedro, naca' gubáz nasöl-lë'ë Jesucristo. Ruzúaja' queëli' lu guichi ni, libí'ili' násilasili' zi'tu' gapa dë ládzali', zóali' luyú Ponto, en luyú Galacia, en luyú Capadocia, en luyú Asia, en luyú Bitinia. <sup>2</sup> Gurö cazë' Xúziru' Dios libí'ili' ca na' bucözë' dza ni'te, para guéquili' quez queë' lu në'ë Dios Bó' Lá'ayi, en gunli' ca rnna xtídzë'ë Cristo, en gácali' idú tsahui' ni'a que xichönë' Cristo. Rinábida'-në' Dios uzá' ladxë'ë queëli', en gunë' ga soa dxi icja ladxí'do'oli'.

*Le rúntica'siru' löza*

<sup>3</sup> ¡Yöl-la' ba Dios, Xuzë' Xanru' Jesucristo! ¡Lu yöl-la' ruhuéchi' ladxi' zxön queë' bucubë' yöl-la' na'bán queëru' tu' busubanë' Jesucristo lu yöl-la' guti! ¡Lë ni run ga rúntica'siru' löza, <sup>4</sup> en gun ga idéli'ru' lë na' rapa chi'ë Dios queëru' yehua' yubá! Lë na' rapa chi'ë Dios, le unödzejë' quégaca bönachi queë', biti' initi, en biti' itëbi, en biti' igula. <sup>5</sup> Tu' réajlë'ëli' Lë', lu yöl-la' huáca zxön queë', Dios gun chi'ë libí'ili' cate' idxinrö dza ni' uzí'ili' xibé yöl-la' rusölá idú na' chinupë'ë queëru', en ulu'ë lahui dza údxi.

<sup>6</sup> Que lë ni na' rudzëjade'eli', sal-la' na'a ral-la' quí'i sáca'li' tu chí'ido' tu' taca zían le ta'zí' bë' libí'ili'. <sup>7</sup> Tu' ruá' rilenli' yugu' lë na' ta'zí' bë' libí'ili', naca bë' naca idú ca réajlë'ëli' Cristo. Lësca' caní rizí' bë'ëru' oro, le initi, cate' ruchí'aru' le lu guí'. Que lë ni na', cate' chinazí' bë' yöl-la' réajlë' queëli' Cristo, le nácáro lesaca' ca oro, gaca queëli' yöl-la' zxön, en yöl-la' run bal dza ni' ulu'í lahuë' Jesucristo.

<sup>8</sup> Libí'ili' nadxi'ili'-në' Cristo sal-la' catu caz bilé'eli' Lë'. Réajlë'ëli' Lë' sal-la' biti' rilé'eli'-në' na'a, ate' rudzëjali'. Yöl-la' rudzeja zxön queëli' le cabí gaca quíxjö'öru' tscá naca, naca idútë li. <sup>9</sup> Caní naca, tu' ridéli'li' yöl-la' rusölá que bö' naca cázali', le rata' queëli' tu' réajlë'ëli'-në' Cristo.

<sup>10</sup> Dza ni'te yugu' bönni' gulu'ë didza' uláz queë' Dios bulu'sédë' dxí'ado' ca naca yöl-la' rusölá na' dë queëru' na'a, ate' gulu'ë didza' ca naca le ruzá' ladxë'ë Dios queëru'. <sup>11</sup> Bó' Lá'ayi dzáguie' Cristo buzéajni'inë' zí'atëlö bönni' na' gulu'ë didza' uláz queë' Dios, en bulu'inë' légaquie' ca ral-la' quí'i sáquë'ë Cristo, enca' ca gaca queë' yöl-la' zxön tódi na'. Que lë ni na' guluf'i ladxí'gaquie' ila'nözinë' båtáxi gaca lë ni, en nuzxi na' gaca que lë na' bulu'inë' Bó' dzáguie' Cristo légaquie'. <sup>12</sup> Dios bulu'inë' bönni' na' gulu'ë didza' uláz queë' biti' naca tu le ila'lé'enë' légaquie', pero rë'u ni rilé'eru' lë na' gulu'ë didza' que, ate' libí'ili' riyónili' na'a ca naca que. Yugu' bönni' tunë' libán que didza' dxi'a tu'ë didza' que lë ni, ate' zóalen yöl-la' huáca queë' Dios Bó' Lá'ayi légaquie', Nu na' risól-lë'ë Dios zoë' yehua' yubá queëru', ate' t'ë'ennë' gubáz lá'ayi queë' Dios ila'nözinë' ca naca lë na' gulu'ë didza' que dza ni'te.

*Dios ruidzë' rë'u para gácaru' lá'ayi*

<sup>13</sup> Que lë ni na', guli'sóa ban ladxi', en guli'cözatica'sö bá'ado'. Idú ladxí'li' buli'zxöni ladxí'li' lë na' uzá' ladxë'ë queëli' Dios dza ni' ulu'í lahuë' Jesucristo. <sup>14</sup> Guli'gún ca rnna xtídzë'ë Dios, en biti' gú'ili' lataj yugu' le rizë ladxí'li' ila'ché' libí'ili' ga yübölö, ca na' benli' dza ni' biti' núnbë'ënili'-në' Dios. <sup>15</sup> Ral-la' gácali' lá'ayi ca naca yúgu'të le runli', ca na'

náquië' lá'ayi Dios, en bulidzë' libí'ili' para guéquili' queë'. <sup>16</sup> Lësca' caní nazúaj lu guichi lá'ayi, ca na' gunnë' Dios le rnna: "Guli'gaca lá'ayi, tu naca' neda' lá'ayi."

<sup>17</sup> Rëli'-në': "Xuztu'" cate' rulídzali'-në' Dios, ate' Lë', lëbisö ca ruchi'a rusöröë' yúgu'të bönachi tsca naca le núngaca tu tu bönachi na'. Que lë ni na' ral-la' gádxili' Lë' tsanni ni zóali' yödzölió ni, le cabí naca idú ládzali'. <sup>18</sup> Dios busölë' libí'ili' lu lë na' gúcali' dza ni' cate' benli' ca nácgaca le cá'asö bulu'dödë' xuz xtó'oli' loli'. Nöz quézili' böá'uë' libí'ili', calëga len tu le initi ca naca oro, en plata, <sup>19</sup> pero len xichönë' Jesucristo le nácatëro lesaca', tu' budödi cuinë', en gúquië' ca tuba' bö'cu' zxila' nácaba' idú dxi'a, böa'do' tutië'-ba' lahuë' Dios para ugúa dul-la'. <sup>20</sup> Dios gurö cazë' Cristo zí'atëlö ca benë' yödzölió ni, ate' dza ni zóaru' na'a benë' ga buluí'i lahuë' para uzí'ili' xibë'. <sup>21</sup> Ni'a que le benë' Cristo réajlë'ëli'-në' Dios, busubanë' Lë' lu yöl-la' guti, en benë' ga náquië' lo. Caní naca, réajlë'ëli'-në' Dios, en ruxxöni ládxi'li' Lë'.

<sup>22</sup> Na'a, chinún cuinli' dxi'a tu' runli' ca rnna le naca idútë li, en naca idú ca nadxi'ili' yugu' böchi' luzá'ali' ta'yéajlë'ë Cristo. Que lë ni na', idú ládxi'li' ral-la' idxí'ili' luzá'ali' tuli' ia'tuli'. <sup>23</sup> Chiböáljali' leyúbölö, calëga tu' nuzóagaca bönachi tati caz libí'ili', pero nuzóa Nu zoa caz libí'ili', en náljaleni' xtídzë'ë Dios, le naca ban, en le zóatica'sö. <sup>24</sup> Caní naca, tu' nazúaj lu guichi lá'ayi le rnna:

Yúgu'të bönachi nácgaca ca naca guixi'.

Yöl-la' lachi quéguequi naca ca xiyija guixi' na'.

Ribidxi guixi' na', en riguinnaj xiyija,

<sup>25</sup> pero xtídzë'ë Dios zóatica'sö.

Didza' ni bidxín queëli' lu didza' dxi'a.

## 2

<sup>1</sup> Que lë ni na', guli'cá'ana yúgu'të le ruá' dö'. Bítirö si' yë'ëli', en biti' ubéaj dxi'a cuinli' lógaca bönachi. Bítirö uxzé'eli', en biti' innëli' que luzá'ali'. <sup>2</sup> Ral-la' së ládxi'li' le naca queë' Dios Bö' Lá'ayi para gálali' ca na' tunbi' bi'i huë'ënidö', ta'zë ládxi'bi' nidxi'. Caní ral-la' gunli' ga idxinrö dza uláli', <sup>3</sup> channö réquibe'eli' náquië' Xanru' dxi'i ladxi'.

*Cristo náquië' ca tu guiöj naca ban*

<sup>4</sup> Guli'biga' ga zoë' Xanru'. Náquië' ca tu guiöj naca ban. Náquië' ca tu guiöj bulu'cá'ana bönachi cá'asö pero naca tu le gurö cazë' Dios le nazáca'tërö. <sup>5</sup> Lësca' caní, libí'ili' nácali' ca yugu' guiöj nabángaca. Guli'güi' Dios lataj ugunë' libí'ili' dxin, ate' gunë' ga gácali' ca tu yudo' ga soë' Dios Bö' Lá'ayi. Lu yudo' na' gácali' ca bixúz néquiqueuinë' quez queë' Dios, ate' lu në'ë Jesucristo gaca udödili' yugu' le runnë' Dios Bö' Lá'ayi queëli' lahuë' Dios, lë na' raza ládxe'ë Dios. <sup>6</sup> Que lë ni na' nazúaj ca' lu guichi lá'ayi le rnna:

Rigu'a lu zö'ö yödzö Siön tu guiöj lo squin zö'ö,

le gurö caza' neda', en naca lesaca'.

Nu réajlë' Lë', biti' ichixi inigui.

<sup>7</sup> Naca guiöj ni queëli' libí'ili' na' réajlë'ëli' Cristo tu le nazáca'da', pero quégaca nupa biti' ta'yéajlë' Cristo, naca ca na' nazúaj lu guichi lá'ayi le rnna:

Guiöj na' bulu'zöë' bönni' tu'cu'ë zö'ö tsölá'alö,  
tu' guléquinë' naca cá'asö,

guiöj ni chinaca guiöj lo squin zö'ö.

<sup>8</sup> Lësca' caní nazúaj lu guichi lá'ayi le rnna:

Guiöj ni gun ga tsöjchégu'gaca bönachi,  
en gun ga tsöjtsö'ögaca.

Le nácatë yöjchégu'gaquië' bönni' biti' ta'yéajlë'ë Cristo, tu' gula'chíxinë' cate' bulu'zóë' xtídzë'ë Dios tsólá'alö. Dios bucu'ë légaquië' para ilunë' caní.

*Nupa néquiquequi quez queë' Dios*

<sup>9</sup> Libí'ili' nácali' bönachi gurö cazë' Dios. Yúgu'tëli' nácali' bixúz queë' Bönni' Unná Bë' Lá'ayi. Nácali' ca tu yödzö nequi quez queë' Dios. Nácali' bönachi que cazë' Dios. Caní nácali' para gaca gunli' libán que le zxön benë' Dios, Bönni' na' bulidzë' libí'ili' para birúajli' ga naca chul-la que dul-la', en guyázali' lu bení' idú queë'.

<sup>10</sup> Zí'atëlö biti' gúcali' bönachi queë' Dios,

pero na'a chinácali' bönachi queë'.

Zí'atëlö cuntú nu buéchi' ladxí' libí'ili',

pero na'a Dios caz ruhuéchi' ládxë'ë libí'ili'.

*Zóaru' nabanru' para gunru' ca rë'enë' Dios*

<sup>11</sup> Böchi' luzá'ado', nácali' ca bönachi zí'tu', en ridásili' yödzölió ni. Que lë ni na', ráta'yua' loli', biti' güf'ili' lataj ila'nná be'e le rizësö ládxí'li' libí'ili', yugu' le ta'díl-lalen bö' naca cázali'. <sup>12</sup> Guli'gún le naca dxi'a lógaca bönachi biti' núnbë'gaquië' Dios. Caní gaca, channö ulu'zegui libí'ili' didza', en ila'nná tútili' bönachi, gaca ila'lé'e bönachi yugu' le dxi'a runli', ate' dza huödë' Xanru' ila'gu'ë Dios yöl-la' ba ni'a que le naca cázali'.

<sup>13</sup> Tu' néquili' queë' Xanru', guli'gún bal yúgu'të bönni' ta'nná bë'ë, bönni' na' nucuá'agaca bönachi légaquië', sal-la' náquië' bönni' rinná bé'enë' iduté yödzölió, tu' náquië' bönni' lo unná bë', <sup>14</sup> o channö náquië' bönni' rinná bé'enë' tu' yödzö, nu na' nuzóë' bönni' lo unná bë' na' para gunë' xíguia' nupa tua' dö', en gunë' bal nupa tun le naca dxi'a. <sup>15</sup> Caní rë'enë' Dios gunli' para ila'bö' dxie' yugu' bönni' biti' bi nözguequinë', en biti' núnbë'gaquië' Lë', cate' ila'lé'enë' le naca dxi'a na' runli'.

<sup>16</sup> Guli'gaca ca yugu' bönni' nazángaquië', pero biti' ugunli' dxin yöl-la' nazán queëli' para gunli' le ruá' dö'.

Guli'gaca ca yugu' bönni' nadó'ogaquië' queë' Dios.

<sup>17</sup> Guli'gún bal yúgu'të bönachi.

Guli'dxi'i yugu' böchi' luzá'ali'.

Guli'gadxi-në' Dios.

Guli'gún bal bönni' na' rinná bé'enë' iduté yödzölió.

*Le gudí'i guzxáquë'ë Cristo ruzéajni'i rë'u ca ral-la' gunru'*

<sup>18</sup> Núlöli' nácali' bönni' nadó'ogaca, guli'gadxi bönni' xanli', en guli'gún légaquië' bal, calégasö gunli' bal yugu' bönni' xanli' na' nácagaquië' tsahui', en tu'í' ládxí'gaquië' libí'ili', pero guli'gún bal ca' yugu' bönni' xanli' na' tu'saca' zi'ë libí'ili' lu dxin runli' quégaquië'. <sup>19</sup> Channö quí'i sáca'li', en biti' bi nabága'li', ate' guá' ilenli' lë na' tu' réquili' naca ca rë'enë' Dios, urúajli' tsahui' lahuë' Dios. <sup>20</sup> Na'a, channö ruá'ali' dö', ate' yugu' bönni' yúlahui' ilunë' libí'ili' xíguia', çnacxi' caz uzí'ili' xibé sal-la' len yöl-la' riböza zxön ladxí' queëli' guá' ilenli' lë na' gaca queëli'? Channö ribözali' zxön ladxí', en ruá' rilenli' le riguí' rizáca'li', ate' benli' le naca dxi'a, ní'rö urúajli' dxi'a lahuë' Dios. <sup>21</sup> Dios bulidzë' libí'ili' para quí'i sáca'li' caní,

tu' gudí'i guzxáquë'ë Lë cazë' Cristo uláz queëli', en buzóë' queëli' tu le rulu'i libí'ili' ca ral-la' gunli', para quí'i sáca'li' ca na' gudí'i guzxáquë'ë Lë'.

<sup>22</sup> Cristo biti' bi dul-la' benë', en catu caz guzxi' yë'ë.

<sup>23</sup> Cate' bulu'dídza' yúdxinë' Lë',  
biti' butsaqui yúdxinë' légaquië'.

Cate' bulu'saca' zi'ë Lë',  
biti' buzenë' légaquië' le bach,  
pero budödi cuinë' lu në'ë Dios,

Nu na' ruchi'a rusöröë' le runru' ca sa'yéaj.

<sup>24</sup> Lë cazë' Cristo guzxi'ë dul-la' queëru' lu idú le naca cazë' cate' ni' gútië' lë'e yaga cruz, para gácaru' ca yugu' bönni' nati, para cabirö gunru' dul-la', pero sóaru' ibanru' para gunru' le naca dxi'a. Lë' gúquië' huë' uláz queëru' para huöácaru' rë'u dxi'a. <sup>25</sup> Gúcali' ca yugu' bö'cu' zxila' nanítigacaba', pero na'a budxinli' queë' Cristo, Nu ruyú libí'ili', en rapa chi'ë bö' naca cázali'. Náquië' queëli' ca tu' bönni' uyú bö'cu' zxila'.

### 3

#### *Ca ral-la' ilún nupa nutsaga ná'gaca*

<sup>1-2</sup> Lësca' caní, libí'ili' nigula, ral-la' gunli' bal bönni' que queëli', en channö cabí ta'yéajlë'ë xtídzë'ë Cristo, ila'yéajlë'ë Lë' cate' ila'lé'enë' le naca dxi'a runli', en ca na' nácali' ba'a ladxi', en runli' légaquië' bal, sal-la' biti' bi didza' ru'ílenli' légaquië' ca naca queë' Cristo. <sup>3</sup> Yöl-la' lachi queëli' biti' naca le zoa láhuisö, tsca rupá'ali' íjali', en tsca nácagaca le néquini oro nusí cuinli', en lari' nazáca'da' náculi'. <sup>4</sup> Yöl-la' lachi queëli' ral-la' gaca le yu'u icja ládxi'do'oli'. Yöl-la' lachi le ridiá'tica'sö naca yöl-la' nöxaj ladxi', en yöl-la' ba'a ladxi', le nazáca'da'gaca lahuë' Dios. <sup>5</sup> Lësca' caní guca yöl-la' lachi quegacanu nigula gula'yéaj ládxi'nu Dios, nigula na' gula'cuá'anu dza ni'te. Bulu'zxöni ládxi'nu Dios, en gulunnu bal bönni' que queëgacanu. <sup>6</sup> Caní bennu Sara, tu' bennu ca rnna xtídzë'ë Abraham, bönni' queënu, en bulídzanu lë', gunnánu: "Xan." Libí'ili' ca' gunli' ca bennu Sara na' channö gunli' le naca dxi'a, en biti' bi gádxili'.

<sup>7</sup> Lësca' caní, libí'ili', bönni', ral-la' güi' ládxi'li' nigula que queëli'. Guli'gún légacanu bal, calégasö tu' nöta'gacanu ca yöl-la' nál-la queëli', pero lësca' tu' nadéli'gacanu yöl-la' na'bán na' runnë' Dios queëru', lébisö ca nadéli'li' libí'ili'. Guli'gún caní para cabí uzaga' tu' xihui' xinözili' cate' ulídzali'-në' Dios.

#### *Huagu'i huazáca'ru' sal-la' gunru' le naca dxi'a*

<sup>8</sup> Ga ruúdxitë, guli'gaca tuz tuli' len ia'tuli' yúgu'tëli', en guli'güi' ládxi'li' luzá'ali' tuli' ia'tuli'. Guli'gaca dxi'i ladxi', en zxön ladxi'. <sup>9</sup> Biti' ubí'ili', cabí guá'ali' dö' que nu ruá' dö' queëli', en biti' utsaga yúdxili' nu rutsaga yudxi libí'ili', pero caní ubí'ili', inábili'-në' Dios gunë' ga gaca bica' ba nu na', tu' bulidzë' Dios libí'ili' para gácali' bica' ba. <sup>10</sup> Caní naca le nazúaj lu guichi lá'ayi le rnna:

Nu bönni' ré'ënë' uzi'ë xibé yöl-la' na'bán queë', en cözë' dxí'ado',  
ral-la' ucá'anë' didza' xihui', en cabirö si' yë'ë.

<sup>11</sup> Ral-la' ucá'anë' le ruá' dö', en gunë' le naca dxi'a.

Ral-la' güi' ládxi'ë cözë' zxön ladxi', en gúntica'së' caní,

<sup>12</sup> Xanru' rapa chi'ë yugu' bönni' tsahui'  
en ruzë náquië' le tu'lidzë' Lë',

pero ruzáguë'ë xinózguequi nupa tua' dö'.

<sup>13</sup> ¿Nuzxi caz guá' dö' queëli' channö ruí'í ládxi'li' gúntica'sili' le naca tsahui'? <sup>14</sup> Sal-la' quí'í sáca'li' cate' runli' le naca tsahui', gácali' bica' ba. Cuntu nu gádxili', en biti' ubi ugu'íli' <sup>15</sup> pero buli'zxóni ládxi'li'-në' Cristo, en guí'íli' Lë' lataj inná bé'enë' lu icja ládxi'do'oli'. Guli'sóa sina' quíxjöi'íli' yúgu'të nupa ila'nabi libí'ili' bizx que runli' löza Cristo, en gunli' lë ni lu yöl-la' nöxaj ladxi' queëli', en lu yöl-la' run bal nupa na'. <sup>16</sup> Guli'gúntica'sö le naca dxi'a lahuë'Dios, en channö nacuá' nupa ta'nnë xihui' que le naca tsahui' runli' tu' réajlë'ëli' Cristo, ní'irö ulu'tuí' tu' nözi le ta'nnë queëli'. <sup>17</sup> Channö quí'í sáca'li', dxí'arö gaca channö naca tu' runli' le naca dxi'a, en calëga tu' ruá'ali' dö', channö Dios rë'ënë' quí'í sáca'li' caní.

<sup>18</sup> Lë cazë' Cristo gudí'í guz xáguë'ë, en gútië' uláz queëru' para bugüë' dul-la' nabága'ru'. Lë náquië' dxi'a, pero gútië' ní'a queëru', yugu' bönni' dul-la'. Caní benë' para bunë' rë'u tuz len Dios. Lu yöl-la' bönachi queë' gútië' pero lu bö' naca cazë' ni zoë' nabanë' lu le cubi le naca cazë'. <sup>19</sup> Lu bö' naca cazë' guyijë' yöjenë' libán lógaca bö' nadzúngaca. <sup>20</sup> Bö' ni gulaca cazë' yugu' bönni', dza ní'te gula'dá'baguë'ë xtídzë'ë Dios, dza ní' zoë' Noé, cate' ní' gulözë' Dios lu yöl-la' riböza zxön ladxi' queë', en biti' busiúdxë' légaquië', tsanni ní' benë' Noé barco zxön na'. Lë'e barco na' bulu'lá nabábasö bönachi lu nisa. Gulaca xunu' bönachi, bönni', en nigula. <sup>21</sup> Nisa ní' naca tu le rulu'í ca naca nisa ga na' ridílaru' nisa, le naca bë' nuláru' lu yöl-la' guti tu' bubanë' Jesucristo lu yöl-la' guti. Lë na' ridílaru' nisa biti' naca tu le run dxi'a le nácaru' láhuisö, pero rulu'í ruí'í ládxi'ru' gaca dxi'a icja ládxi'do'oru' lahuë' Dios. <sup>22</sup> Jesucristo bubenë' yehua' yubá, ga na' yöjchö'ë cuita lë'ë ibëla Dios, en rinná bé'enë' yugu' gubáz lá'ayi, en nupa ní' ta'nná bë', en nupa nadéli'gaca yöl-la' zxön.

## 4

*Ral-la' ugunru' dxin yöl-la' huáca queë' Dios para gunru' xichinë' Cristo*

<sup>1</sup> Que lë ni na', ca na' gudí'í guz xáguë'ë Cristo lu le naca cazë', lësca' libí'ili' ral-la' soa cözali' quí'í sáca'li'. Nu na' riguí'í rizáca'a tu' da' le naca tsahui' chibucá'ana dul-la'. <sup>2</sup> Na'a isí lo, ral-la' gúntica'sili' ca rë'ënë' Dios, en calëga ca rizësö ládxi'li' lu yöl-la' bönachi queëli'. <sup>3</sup> Tsca'ti' gaz le chibenli' chibenli'. Bítirö gunli' ca na' nupa biti' nünbë'gaca Dios. Dza ní'te benli' yugu' le cabí ral-la' gunli'. Guzë ládxi'li' le ruá' dö'. Guzúdxili'. Gudödi bë' güí'í gudáguli', en guyéaj ládxi'li' budó' guiöj budó' yaga, le rigútinë' Dios. <sup>4</sup> Na'a, tu' báninë' bönni' tunë' caní tu' cabirö runli' tsözxön légaquië' cate' tunë' le ruá' dö' caní, en que lë ni na' tu' tsaga yúdxinë' libí'ili'. <sup>5</sup> Légaquië' run bayudxi ulu'lu'í cuíngaqüë' lahuë' Dios, ate' Lë' chizóa uchi'a usöröë' nupa nabángaca, en nupa chinátigaca. <sup>6</sup> Que lë ni na' guca libán que didza' dxi'a lógaca nupa chinátigaca, nupa na' Dios buchi'a busöröë' léguequi cate' ní' gula'cuá' yödzölió ni, ca na' ruchi'a rusöröë' yúgu'të bönachi. Guca libán lóguequi para ila'cuá' lu yöl-la' na'bán lu bö' nácagaca caz, ca na' zoa cazë' Dios lu yöl-la' na'bán.

<sup>7</sup> Chizóa idxín dza údxi que yúgu'të le dë. Que lë ni na', guli'gaca ba'a ladxi', en buli'subán ládxi'li' para gaca ulídzali'-në' Dios. <sup>8</sup> Tu' runtë bayudxi, guli'dxi'í luzá'ali' tuli' ia'tuli', ate' channö dzágalí' lu yöl-la' nadxí'í, gácali' sina' uniti loli' yugu' luzá'ali' tua' dö' queëli'. <sup>9</sup> Guli'güf' lataj ila'cuá' böchi' luzá'ali' lidxili', en biti' innëli' queégaquië'. <sup>10</sup> Ral-la' ugunli' dxí'ado' dxin yugu' le buzá' ládxië'ë Dios queëli', en gácalenli'



luzá'ali' tuli' ia'tuli'. <sup>11</sup> Nu bönni' runë' ba nalí, ral-la' gunë' ba nalí que xtídzë'ë Dios, ate' nu bönni' runë' xichinë' Cristo, ral-la' ugunë' dxin yöl-la' huáca na' runné' Dios queë', ate' ni'a que yúgu'të le runlí, gaca yöl-la' ba queë' Dios ni'a que le nunë' Jesucristo. ¡Gácatuca'sò queë' Dios yöl-la' ba, en yöl-la' unná bè'! ¡Ca' gaca!

*Le ila'gu'i ila'zaca' bönachi ta'yéajlë' Cristo*

<sup>12</sup> Böchi' luzá'ado', bití' ubánili' tu' nözi le ta'z'í' bë'da' libí'ili'. Biti' naca tu le cabí núnbë'gaca bönachi. <sup>13</sup> Guli'dzëjade'e tu' dë lataj queëli' gunlí-në' tsözxön Cristo lu le riguí rizáquë'ë Lë' ni'a que bönachi queë' para gaca udzëjali' ca' dza na' huödë' Cristo, cate' ilé'eli' yöl-la' zxön queë'. <sup>14</sup> Channö tu'dzaga yudxi bönachi libí'ili' tu' dá'ali' Cristo, bica' ba libí'ili', tu' naca bë' zóalenë' Dios Bö' Lá'ayi libí'ili', Nu na' za'yehua'yubá. Bönachi yödzölió ni tu'dzaga yudxi Lë', pero libí'ili' runlí-në' bal. <sup>15</sup> Channö riguí rizáquë'ë nu bönni' dzáguie' libí'ili', ral-la' gaca caní tu' dë'ë Cristo, en calëga tu' rútië' bönachi, o ribanë', o ru'ë dö', o tu' yöjgútsë'ë ga yúbölö. <sup>16</sup> Na'a, channö núlöli' riguí rizáca'li' tu' dá'ali' Cristo, bití' ral-la' utuf'ili', pero guli'cu'ë Dios yöl-la' ba tu' nazí'lali' bönachi queë' Cristo.

<sup>17</sup> Chibidxín dza isí lahuë' Dios uchi'a usöröë' bönachi rö queë'. Channö zí'alö uchi'a usöröë' rë'u, ¿nácxitëro gaca quegaca nupa bití' túngaca ca rna didza' dxi'a queë' Dios? <sup>18</sup> Channö naca böniga ulu'lágaca nupa tun le naca dxi'a, ¿nácxitëro gaca quegaca nupa ta'dá'baga' Dios, en tun dul-la'? <sup>19</sup> Caní naca, yugu' bönni' ni ta'gu'i ta'zaquë'ë tu' rë'ënë' Dios gaca caní, ral-la' ilúntica'së' le naca tsahui', en ulu'dödë' bö' nácacaga cazé' lu në'ë Dios, tu' ben cazé' Lë' légaquie', en runë' ca rna xtídzë'ë.

## 5

*Pedro ruzéajni'inë' nupa ta'yéajlë' Cristo*

<sup>1</sup> Na'a, ruzéajni'ida' libí'ili', bönni' gula tapa chí'ili' nupa néquiguequi queë' Cristo, tu' naca' neda' ca' bönni' gula ca nácali' libí'ili', en bilé'eda' le gudí' guzxaquë'ë Cristo, ate' guna' ca' tsözxön libí'ili', uzí'iru' xibë yöl-la' zxön na' ilá' lahui. <sup>2</sup> Guli'gaca ca bönni' tu'yúë' bö'cu' zxila', gun chí'ili' bönachi na' Dios gulu'ë lu ná'ali'. Guli'gún caní idú ládxi'li' ca ré'ënë' Dios, en calëga tu' run bayudxi queëli', o tu' rizé ládxi'li' dumí. Guli'gún xichinlí' tu ré'ënisili', <sup>3</sup> en calëga tu' ré'ënili' inná bé'esili' nupa na' nagu'ë lu ná'ali'. Guli'gü' ládxi'li' gácali' tu le rulu'í ca ral-la' ilaca nupa na' run chí'ili'. <sup>4</sup> Caní naca, cate' ulu'í lahuë' Cristo, bönni' lo uyú bö'cu' zxila', idéli'li' tu le uzí'ili' xibë le catu caz iní.

<sup>5</sup> Lë'sca' caní, bí'í cuidí', guli'gún ca ta'nnë' yugu' bönni' gula. Yúgu'tëli' ral-la' gunlí' bal luzá'ali', tuli' ia'tuli', lu yöl-la' nöxaj ladxí' queëli', tu' nazúaj lu guichi lá'ayi le rna:

Dios ruzáguë'ë xinözguequi nupa tun ba zxön cuínguequi pero rácalenë' nupa nácacaga nöxaj ladxí'.

<sup>6</sup> Guli'sóa nöxaj ladxí' lu në'ë Dios, ate' Lë' uchisë' libí'ili' cate' izá'a dza. <sup>7</sup> Guli'cú'u yúgu'të le run ga ruúbí ruguí'ili' lu në'ë Dios, tu' rufí ládxe'ë libí'ili'.

<sup>8</sup> Guli'gaca ba'a ladxí', en buli'subán ládxi'li', tu' zoa tu' xihui', nu bití' rilé'ë libí'ili' dxi'a, ridá idú gásibi'ilö, en naca ca tuba' bëdxi guixí' ribödxi'aba', riguiljba' nu gáguba'. <sup>9</sup> Guli'gaca tsutsu ca réajlë'ëli' Cristo, en guli'zága' xinöza tu' xihui', tu' nözili' ta'gu'í ta'zaquë'ë böchi' luzá'ali' iduté yödzölió ni ca na' riguí' rizáca'li' libí'ili'. <sup>10</sup> Ní'iro cate' chigudí'í

guzxáca'li' tu chí'isö, Dios gunë' ga gácali' idú tsahui', en ga gácali' tsutsu, en ga gálali', en ga sóali' tsaz. Lë cazë' Dios ruzá' ládxe'ë queëru' yúgu'të le ruzí'iru' xibé, en bulidzë' rë'u para uzí'iru' xibé yöl-la' zxön queë' le zóatica'sö tu' nácaru' tuz len Jesucristo. <sup>11</sup> ¡Gácatica'sö yöl-la' ba, en yöl-la' unná bë' queë' Lë'! ¡Ca' gaca!

*Pedro ruzenë' didza' nupa ta'dá' Cristo*

<sup>12</sup>Dídza'do' ni ruzúaja' queëli' lu guichi lu në'ë Silvano. Réquida' náquië' böchi'ru' idú ladxi'. Rë'ënda' utipa' ládxi'li', en runa' ba nalí loli', le nácatë lë ni naca le ruzá' ládxe'ë queëru' Dios. ¡Guli'gaca tsutsu tu' ruzí'ili' xibé lë ni!

<sup>13</sup>Yugu' bönachi queë' Cristo nacua' Babilonia tu'gapa Dios libí'ili'. Dios gurö cazë' léguequi ca na' guröë' libí'ili'. Lësca' bi'i Marcos rugápabi' Dios libí'ili'. Nácabi' ca zxi'ini caza'. <sup>14</sup>Guli'gapa Dios luzá'ali' tuli' ia'tuli', en lu yöl-la' nadxi'i queëli' luzá'ali' unída'li' luzá'ali' tuli' ia'tuli'.

Rinábida'-në' Dios gunë' ga soa dxi icja ládxi'do'oli', yúgu'tëli' na' néquili' queë' Jesucristo. ¡Ca' gaca!

## DÍDZA'DO' BUROPI BUZÚAJĚ' PEDRO

*Pedro rugapě' Dios nupa ta'dá' Cristo*

<sup>1</sup> Neda', Simón Pedro, naca' huen dxin queë' Jesucristo, en gubáz nasöl-lë'ë Lë'. Rugapa' Dios libí'ili', réajlë'ëli'-në' Jesús. Lëbisö ca nazáca'gaca yöl-la' réajlë' queëli' Lë', en yöl-la' réajlë' queëtu' Lë'. Dios benë' ga réajlë'ëli' Lë' tu' naca cazë' tsahui', en tu' náquië' ca' Xanru' Jesucristo, Nu na' rusólá rë'u, tsahui'. <sup>2</sup> Rinábida'-në' Dios gunë' ga gata' queëli' idütë le ruzá' ládxë'ë queëru', en gunë' ga soa dxi icja ládxi'do'oli' tu' núnbë'ëli'-në' Dios, enca' Xanru' Jesús.

*Le nácgaca nupa ta'yéajlë' Cristo*

<sup>3</sup> Lu yöl-la' huáca zxön queë', Dios chibennë' queëru' yúgu'të le riquíniru' para gata' queëru' yöl-la' na'bán idú, en para gácaru' ba'a ladxi', tu' núnbë'ëru' Nu na' bulidza rë'u para gata' queëru' yöl-la' zxön queë', en le naca tsahui' queë'. <sup>4</sup> Tu' runë' caní, benë' ga gaca uzí'iru' xibé yugu' le zxön, en le naca tsahui' guzxi' lu në'ë gunnë' queëru', ate' tu' naca caní nuláru' lu le ruá' dö' raca yödzölió ni tu' ta'zë ládxi'gaca bönachi le cabí naca tsahui'. Nuláru' para gácaru' ca náquië' Lë' cazë' Dios. <sup>5</sup> Que lë ni na': Channö réajlë'ëli' Cristo,

guli'gü' ládxi'li' gácali' dxi'i ladxi'.

Channö chinácali' dxi'i ladxi',

guli'gü' ládxi'li' gata' ca' queëli' yöl-la' rácada'.

<sup>6</sup> Channö nápali' yöl-la' rácada',

guli'gü' ládxi'li' inná be'e cuinli'.

Channö rinná be'e cuinli',

guli'côza zxön ladxi'.

Channö ribözali' zxön ladxi',

guli'sóa ba'a ladxi'.

<sup>7</sup> Channö zóali' ba'a ladxi',

guli'dxi'i luzá'ali'.

Channö nadxi'ili' luzá'ali',

guli'dxi'i ca' yúgu'të bönachi.

<sup>8</sup> Channö caní runli', en zeaj rácarö idú ca runli' caní, lë ni gun ga bití' gaca nítisö yöl-la' réajlë' queëli' Lë', ate' tseaj gácarö idú ca núnbë'ëli'-në' Xanru' Jesucristo. <sup>9</sup> Nu bönni' bití' ruí'li' ládxë'ë gunë' caní, náquië' ca tu bönni' nachul-la nanítie', tu' chizá' ral-la ládxë'ë bunë' Cristo lë' tsahui', en bugüë' yugu' dul-la' gubáguë'ë zí'atëlö. <sup>10</sup> Que lë ni na', böchi' luzá'ado', ral-la' gü'itëro' ládxi'li' guéquibe'eli' bulidzë' Dios libí'ili', en gurö cazë' libí'ili'. Channö gunli' caní, bití' ca' ichixi iníguili'. <sup>11</sup> Caní gaca, idú ládxë'ë Dios gúnmasë' queëli' lataj tsázali' ga inná bé'tica'së' Xanru' Jesucristo, Nu rusólá rë'u.

<sup>12</sup> Que lë ni na' gúntica'sa' ga tsöjnéli' yugu' lë ni sal-la' chinöz quézili' le, en rugunli' dxin le naca idütë li na' chiguzxi' lu ná'ali'. <sup>13</sup> Runi neda' ral-la' usubana' ládxi'li' ca nácgaca lë ni tsanni ni zoa' nabana'. <sup>14</sup> Ral-la' guna' caní tu' nözda' si' gátia'. Xanru' Jesucristo chigudxi' cazë' neda' gaca caní quia'. <sup>15</sup> Que lë ni na' ruí'ida' ládxa'a guna' ga tsöjnética'sili' yugu' lë ni tödi gátia'.

*Nupa bila'lé'e yöl-la' zxön queë' Cristo*

<sup>16</sup> Biti' b'élentu' libí'ili' tu didza' ridasö lu yöl-la' sina' queëtu', cate' buzéajni'itu' libí'ili' ca ral-la' idxín dza huödë Xanru' Jesucristo, napé' yöl-la' unná bë' zxön. Netu' bilé'e quézitu' yöl-la' zxön queë'. <sup>17</sup> Bilé'etu' Lë' cate' Xúziru' Dios benë' Lë' bal, en bë'ë Lë' yöl-la' zxön, ate' biyön chi'ë Dios, le birúaj lataj bení' queë', cate' gunnë': "Bönni' ni náquië' Zxfína'. Nadxí'ida' Lë', en raza ládxa'a Lë'." <sup>18</sup> Netu' biyön quézitu' chi'ë na' le birúaj yehua' yubá cate' ni' guzóalentu'-në' Xanru' lu guí'a lá'ayi na'.

<sup>19</sup> Lë' na' guca, naca bë'da' zeaj nácatë didza' gulu'ë yugu' bönni' uláz queë' Dios, ate' ral-la' güi'i ládxi'li' didza' na', tu' naca ca tu guí' ruzení' tu ga naca chul-la ga idxintë dza uzení' lu icja ládxi'do'oli' Nu na' naca ca bölj hui sila queëru'. <sup>20</sup> Lë' ni runda' bayudxi tséajni'ili': Cuntu nu bönni', rácasö queë' bití' gaca tséajni'inë' didza' bë'ë tu bönni' uláz queë' Dios. <sup>21</sup> Yugu' didza' gulu'ë yugu' bönni' uláz queë' Dios bití' ca' gulu'ë tu' gulë'ëni quézinë', pero gulu'ë didza' uláz queë' Dios le guchizië' Dios Bö Lá'ayi icja ládxi'do'gaquië'.

## 2

*Ca nácaqaca nupa tu'sédinë' le cabí nácatë*

<sup>1</sup> Yugu' bönni' ta'zí' yë'ë gula'cuá'lenë' bönachi Israel, en gula'nnë' nácaqaqueië' bönni' tu'ë didza' uláz queë' Dios. Lësca' caní yugu' bönni' ila'zí' yë'ë ila'cuá'lenë' libí'ili', en ulu'sédinë' libí'ili' le cabí nácatë. Lu yöl-la' sina' quégaquië' ulu'sédinë' libí'ili' xibá quégacasë' le gun ga soa bönadxi queë'li' ucá'anali' le naca idútë li. Ila'dá'baguë'ë ca' Xanru', Nu busölá rë'u. Le ilunë' gun ga usunítië' Dios légaquië'. <sup>2</sup> Zianli' libí'ili' gunli' légaquië' tsözxön lu le ruá' dö' ilunë', ate' tu' gunli' bál-lali' caní ila'nnë' xihui' bönachi que didza' dxi'a le naca idútë li. <sup>3</sup> Lu yöl-la' ruhuidi' quégaquië' ulu'sédinë' libí'ili' le cabí nácatë, para gata' quégaquië' dumí queë'li'. Chinarugu quégaquië' bönni' ni, ate' naca löza ila'nítië' tsaz.

<sup>4</sup> Dios bití' buniti lahuë' yugu' gubáz lá'ayi queë' na' gulunë' dul-la', pero gurú'unë' légaquië' lataj chul-la. Nága'gaquië' du guíë ga naca chul-la na', ga na' ta'bözë' dza usiúdxë' Dios légaquië'. <sup>5</sup> Lësca' caní, bití' buniti lahuë' bönachi gula'cuá' dza ni'te cate' gusöl-lë'ë nisa guiöj le busuníti yödzülió le beti bönachi nácaqaca xihui', pero busölë' Noé lu nisa na', bönni' ni' benë' libán que le naca tsahui'. Dios busölë' ca' ia'gadxi di'a dza queë' Noé na' lu nisa. <sup>6</sup> Lësca' caní, Dios guchúguië' quégaca bönachi gula'cuá' yödzü Sodoma, en yödzü Gomorra. Busunítië' léguequi lu guí', ate' bulu'huóaca dö. Le guca quéguequi naca tu le rulu'i le run gadxi nupa tua' dö'. <sup>7</sup> Cate' busunítië' yugu' yödzü na', Dios busölë' Lot, tu bönni' tsahui', lu guí' na'. Buí'nida' ládxi'ë Lot cate' bilé'enë' le xihui' gulún bönachi tuá' dö' na'. <sup>8</sup> Caní guca, tu' guzóalenë' bönni' tsahui' na' léguequi, ate' bilé'enë', en biyönnë' le ruá' dö' na' gulúngaca, ate' tu' gúquië' tsahui' gusëbi ládxi'ë yúgu'të dza ni'a que yugu' le cabí naca tsahui' gulúngaca. <sup>9</sup> Caní naca, Xanru' nözinë' usölë' nupa na' tadxi Lë' lu na' nu run ga tsázagaca bönachi nöza dul-la', pero nucözë' xíguia' gunë' nupa bití' nácaqaca tsahui' ga idxinrö dza ichúguië' quéguequi ila'níti tsaz.

<sup>10</sup> Ichúguda'arö quégaquië' bönni' ni tunë' yugu' le ta'zé ládxi'ë le ruá' dö', en ta'dá'baguie' yöl-la' unná bë' queë' Xanru'. Nácaqaqueië' rugu ladxí', en zidi ladxí'. Bití' tádxinë' tu'lidza ditjë' gubáz lá'ayi ta'dé' lu bení'. <sup>11</sup> Gubáz lá'ayi na' nápagacatërë' yöl-la' unná bë', en yöl-la' huáca ca yugu'

bönni' na', pero gubáz lá'ayi na' biti' tu'huázxjanë' nu ulu'zéguië' didza' lahuë' Xanru'.

<sup>12</sup> Yugu' bönni' ni nácagaquië' ca böa' guixi', biti' bi ta'yéajni'iba', pero náljagacaba' para nu sön léjacaba', en guti léjacaba'. Ta'nnë xihuë'è que le cabí ta'yéajni'inë', ate' ila'nítië' tsaz ca raca quégacaba' böa' guixi' na'. <sup>13</sup> Dios ubi'è quégaquië' le ila'gu'i ila'záquë'è, tu' bulu'saca' zi'è bönachi. Téquinë' naca xibágaquië' tu'zi'è xibé le raca na'a dza. Nácagaquië' ca tu huë' nudzu', en tu le run ditaj cate' ni' tahuë' tsözxön len libí'ili', ate' tu'dzéjanë' tu' ta'zi' yé'enë' libí'ili'.

<sup>14</sup> Lu yöl-la' rizë' ladxí' quégaquië' le ruá' dö' tu'yúë'-nu yugu' nigula. Biti' nacu'è dxisö túngaquië' dul-la'. Túngaquië' ga ta'chixi ta'nigui nupa biti' nácagaca tsutsu ca ta'yéajlë' Cristo. Ta'guílatica'së' yugu' le tu'huídi'në'. Dios chinuchúguië' quégaquië' ilátigaquië'. <sup>15</sup> Bulu'cá'anë' le naca idütë li, ate' nachul-la nanítigaquië'. Tunë' ca benë' Balaam, xzí'inë' Beor, bönni' ni' bidxí'inë' dumí, ate' benë' le ruá' dö' tu' nazxjë'. <sup>16</sup> Dios buzenë' le bach Balaam na' tu' benë' le ruá' dö' na'. Tuba' búrrodo' bë'lenba' lë' didza' ca na' tu'í didza' bönachi, ate' buzága'ba' xinözë' Balaam ga na' sa'yéajë' lu yöl-la' ridá'baga' queë'.

<sup>17</sup> Nácagaquië' bönni' ni ca tu buduá' chibu'í nisa que, enca' ca tu böaj le richë' bö' budunu'. Chinabá'a xilátjagaquië' lataj chul-la. <sup>18</sup> Caní nácagaquië' tu' tu'è didza' yugu' le zxön lu yöl-la' biti' bi nözi quégaquië', en tu'gunë' dxin yugu' le ta'zë ladxí'gaca bönachi le ruá' dö', en tunë' ga ta'chixi ta'nigui nupa si' bulu'lá ladaj nupa nácagaca chul-la niti. <sup>19</sup> Të' bönachi ila'deli' yöl-la' rusólá, pero légaca cazë' nadzúngaquië', en tunë' bayudxi le ruá' dö'. Nadzúngaquië' yúgu'të bönni' lu na' bi rinná be'e icja ladxí'do'gaquië'. <sup>20</sup> Channö bulu'lë' lu le cabí naca tsahui' nacuá' yödzölió ni tu' gulúnbë' Xanru' Jesucristo, Nu rusólá rë'u, ate' ní'irö ta'röli le cabí naca tsahui' na' légaquië' leyúbölö, en ta'nná be'e légaquië', le nácate nabága'gacatërë' xíguia' ga röjsetë ca le gula'báguë'è zí'alö. <sup>21</sup> Dxf'arö gaca quégaquië' la'tu' catu caz ilúnbë' Nu ruzóa rë'u nöza tsahui' ca le gaca quégaquië' channö gulúnbë'è Lë', ate' ní'irö bulu'cá'anë' xibá lá'ayi bë'è Dios quégaquië'. <sup>22</sup> Chibudxín quégaquië' didza' na' rnna: Ruhue'cjabá' bö'cu', ruhuöáguba' le si' gúbaba'. Ruyázaba' cuchi na' si' gudíbiru'-ba' lu guna'.

### 3

#### *Naca löza huödë' Xanru'*

<sup>1</sup> Didza' ni naca le buropi ruzúaja' queë'li' lu guichi, böchi' luzá'ado'. Lu irópatë guichi na' ru'í ladxá'a usubana' ladxí'li' ca nácagaca lë ni. <sup>2</sup> Guli'tsöjné yugu' didza' gulu'è bönni' queë' Dios zí'atëlö, ca gulu'è didza' uláz queë'. Guli'tsöjné ca' xibá na' Xanru', Nu rusólá rë'u, gunná bë'enë' rë'u, lë na' bulu'sédinë' bönni' gubáz nasól-lë'è Lë' libí'ili'.

<sup>3</sup> Ral-la' tsöjnéli' lë ni naca lo. Dza tsöjsëtëgaca ulu'luf'i lahuë' bönni' ilunë' le ta'zë ladxë'è le ruá' dö'. <sup>4</sup> Ulu'titjë', ila'nnë': "¿Gazxi caz lë na' guzxi' lu në'è Cristo? Gunnë': Huöda' leyúbölö. Dza ni'te cate' gulatië' xuz xtó'oru', yúgu'të raca tuz ca guca cate' gusi' lo rata' yödzölió ga ridxintë na'a dza." <sup>5</sup> Tu'zöë' tsölá'alö le guca dza ni'te. Bë'è didza' Dios, ate' gulata' lúzxiba, en luyú. Birúaj luyú na' lu nisa ate' zoa gatsaj láhui'lö nisa. <sup>6</sup> Len nisa ca' busunítië' Dios yödzölió dza ni'te cate' ni' gusól-lë'è nisa guiój le beti yugu' bönachi dul-la'. <sup>7</sup> Lúzxiba, en yödzölió ni le nacuá' na'a dza, Dios

nucu'ë léguequi ga idxinrö dza usunítië' léguequi lu guí'. Caní gaca tu' gunné' caní Dios caz. Uzégu'ë léguequi dza ni' ichúguié' quégaca bönachi bití' nácgaca tsahui' gátigaca.

<sup>8</sup> Bití' gal-la ládxi'li' lë ni, böchi' luzá'ado'. Tu dza naca queë' Xanru' ca zían gayuá' iz, ate' zían gayuá' iz nácgaca queë' ca tu dza. <sup>9</sup> Bití' ridzenë' Xanru' gunë' le guzxí' lu në'ë gunë'. Téquiguequi bal-la bönachi ridzenë', pero ribözë' zxon ladxi', en ruá' rilenë' rë'u tu' cabí rë'ënë' initi nitú bönachi, pero rë'ënë' ulu'bí'i ládxi'gaca yúgu'të bönachi.

<sup>10</sup> Tsárido'os idxín dza huödë' Xanru' ca ridxinë' tu bönni' gubán chí'i dzö'ölö. Lu dza na' huadödi que lúzxiba len tu bö zxon. Ila'niti yúgu'të le nacuá' lu guí' zxon. Ila'yegui yödzölió ni, en le nacuá' yödzölió ni.

<sup>11</sup> Channö caní gaca, ila'niti yúgu'të lë ni, ¿bizxi caz ral-la' gunli'? Ral-la' gácali' ba'a ladxi', en udödi cuinli' lu në'ë Dios. <sup>12</sup> Ral-la' cözali' dza huödë' Xanru', en güi' ládxi'li' gunli' ga idxinrö bayón dza ni' cate' initi lúzxiba, ate' ila'niti yúgu'të le nacuá' ni lu guí'. <sup>13</sup> Caní gaca, pero rë'u ribözaru' le guzxí' lu në'ë Dios. Gunë' tu lúzxiba cubi, en tu luyú cubi ga ni' soa le naca tsahui'.

<sup>14</sup> Que lë ni na', böchi' luzá'ado', tsanni ni ribözali' yugu' lë ni, guli'güi' ládxi'li' gácali' idú tsahui' lahuë' Dios, ate' gunli' ga cuntu nu bi gaca innë queéli', en cözali' dxí'ado' cate' idxinrö dza ni'. <sup>15</sup> Ral-la' inözili' ribözë' Dios zxon ladxi' para gata' quégaca bönachi lataj ulu'lágaca, ca na' gunné' ca' böchi'ru' Pablo. Buzúajë' queéli' lu guichi, zóalen lë' yöl-la' réajni'i na' bë'ë Xanru' queë'. <sup>16</sup> Yúgu'të lu guichi ruzúajë', ru'ë didza' ca nácgaca lë ni, sal-la' nútsa'gaca ca' léguequi yugu' didza' nácgaca böniga tséajni'iru'. Yugu' didza' caní tu'chíxinë' bönni' bití' nözguequinë', en bönni' bití' naca idú ládxi'gaquië'. Lësca' caní tunë' quégaca ia'bal-la didza' nazúajgaca lu guichi lá'ayí, le gun ga usunítië' Dios légaquië'.

<sup>17</sup> Chinöz quézili' lë ni, böchi' luzá'ado'. Que lë ni na' guli'gún chí'i cuinli', para cabí ila'zí' ye'e bönachi bití' nácgaca tsahui' libí'ili', en para cabí ilún ga tseaj bö' icja ládxi'do'oli' ca réajlë'ëli' Cristo. <sup>18</sup> Guli'güi' ládxi'li' gácarö idú ca núnbë'ëli'-në' Xanru' Jesucristo, Nu rusólá rë'u, ate' ruzí'ili' xibë'. ¡Yöl-la' ba Lë' na'a dza, en yúgu'të dza zá'gaca! ¡Ca' gaca!

## DÍDZA'DO' ZÍ'ALÖ BUZÚAJË' JUAN

### *Didza' nabániru'*

<sup>1</sup> Rusiyöntu' libí'ili' ca naca queë' Bönni' na' zoa cazë' dza ni'te, le biyöñitu' bë'ë didza', en le bilé'etu' ca naca queë', en le buyutu' benë' Bönni' na'. Gudantu' Lë'. Bönni' ni náquië' Jesús, lë' ca' Didza' Nabánigaca Bönachi. <sup>2</sup> Bönni' na' nabánigaca bönachi buluí'i lahuë', ate' bilé'etu' Lë'. Runtu' ba nalí queë', en ruluí'itu' libí'ili' ca naca queë' Bönni' na' nabániru'. Bönni' ni guzóalenë' Dios Xuz, en chibuduluí'i lahuë' ga zóaru'. <sup>3</sup> Le bilé'etu', en le biyöñitu' rusiyöntu' libí'ili' para gácali' ca' libí'ili' tuz len netu'. Le nácatë naca yöl-la' tuz queëru' len Dios Xuz, enca' len Jesucristo Zxí'inë' Dios. <sup>4</sup> Ruzúajtu' queëli' lu guichi lë ni para gaca udzëjaru' idú ládxi'ru'.

### *Dios náquië' bení'*

<sup>5</sup> Lë ni naca didza' biyöñitu' bë'lenë' Jesús netu', ate' le rusiyöntu' libí'ili'. Caní rna: Dios náquië' bení', ate' nitú le naca chul-la que dul-la' bití' zóalen Lë'. <sup>6</sup> Channö innaru': "Nácaru' tuz len Dios", pero channö runru' le naca chul-la que dul-la', lë ni naca bë' rizí' yë'ëru', en bití' runru' le naca idútë li. <sup>7</sup> Na'a, channö runru' le naca tsahui', en ridaru' lu bení' ca na' Lë' náquië' tsahui', en zoë' lu bení', nácaru' tuz turu' len ia'turu', ate' xichönë' Jesucristo, Zxí'inë' Dios ruún rë'u dxi'a, en rugúa yúgu'të dul-la' nabága'ru'.

<sup>8</sup> Channö rnnaru': "Bití' bi dul-la' runru'", rizí' yë'ëru' la' cuínsiru', en bití' nazí' lu ná'aru' le naca idútë li. <sup>9</sup> Channö ixóalëpiru' lahuë' Dios dul-la' nabága'ru', Lë' runë' ca rnnë', en náquië' tsahui'. Uniti lahuë' dul-la' nabága'ru', en únë' rë'u tsahui', ugúë' yúgu'të le ruá' dö' dzaga rë'u. <sup>10</sup> Channö innaru': "Bití' bi dul-la' nabága'ru'", naca ca innaru': "Dios rizí' yë'ë", ate' bití' runru' ca rna xtídzë'ë.

## 2

### *Cristo náquië' Nu rudödi xtídzar'ru' lahuë' Dios*

<sup>1</sup> Libí'ili', zxi'ina'do', ruzúaja' queëli' lu guichi lë ni, para cabí gunlí' dul-la'. Na'a, channö nútí'tës nu gun dul-la', zoa nu rudödi xtídzar'ru' lahuë' Dios Xuz, Lë' Jesucristo, Nu naca tsahui'. <sup>2</sup> Naca cazë' Bönni' budödi cuinë', en gútië' para bugúë' dul-la' nabága'ru' lahuë' Dios. Calëgasö gútië' para bugúë' dul-la' nabága'ru' rë'u, pero gútië' ca' para bugúë' dul-la' nabága'gaca bönachi idútë yödzölió.

<sup>3</sup> Channö runru' ca naca le gunná bé'enë' rë'u, nöziru' chinúnbë'ëru' Lë'. <sup>4</sup> Nu rna: "Neda' núnbë'a-në' Dios" pero bití' run ca rinná bë' xibá queë', nu ni rizí' yë', en bití' run le naca idútë li. <sup>5</sup> Nu run ca rna xtídzë'ë Dios, le nácatë nadxi'i nu ni Dios ca ral-la' gun. Channö runru' caní, nöziru' néquiru' queë' Dios. <sup>6</sup> Lësca' caní, nu rna: "Neda' néquida' queë' Cristo", ral-la' gaca nu na' ca na' gúquië' Cristo cate' gudë' yödzölió ni.

### *Tu xibá cubi*

<sup>7</sup> Böchi' luzá'ado', ruzúaja' queëli' lu guichi xibá ni. Bití' naca tu xibá cubi, pero xibá gula na', le zóalen libí'ili' dza ni'te. Xibá gula na' naca didza' biyöñili' dza ni'te. <sup>8</sup> Lësca' naca ca ruzúaja' queëli' lu guichi tu xibá

cubi, lë na' le nácatë benë' Jesús ca rnna, ate' runli' ca' libí'ili' ca rnna, tu' chiridödi que le naca chul-la' que dul-la', ate' bení' idú chiruzení'.

<sup>9</sup> Nu rnna: "Zoa' lu bení'", pero biti' rilé'e dxi'a böchi' luzé'e, nu ni ni run le naca chul-la' que dul-la'. <sup>10</sup> Nu nadxí'i inigui biti' zóalen nu na'. <sup>11</sup> Le naca chul-la' que dul-la' run ga nu biti' rilé'e dxi'a böchi' luzé'e, en ga ridá nu na' ga nachul-la naniti nu na'.

<sup>12</sup> Ruzúaja' queëli' lu guichi, zxi'ina'do', tu' chibunít lahuë' Dios dul-la' nabága'li', tu' runë' le guzxi' lu në'ë gunë'. <sup>13</sup> Ruzúaja' queëli' lu guichi, libí'ili' nácali' xuz, tu' núnbë'ëli' Nu na' zoa caz dza ni'te. Ruzúaja' queëli' lu guichi, bi'i ra'bán, tu' chibucúl-lali' tu' xihui'.

<sup>14</sup> Chibuzúaja' queëli' lu guichi, zxi'ina'do', tu' núnbë'ëli'-në' Dios Xuz. Chibuzúaja' queëli' lu guichi, libí'ili' nácali' xuz, tu' núnbë'ëli' Nu na' zoa caz dza ni'te. Chibuzúaja' queëli' lu guichi, bi'i ra'bán, tu' nácali' bi'i nál-la, en nazí' lu ná'ali' xtídzë'ë Dios, en chibucúl-lali' tu' xihui'.

<sup>15</sup> Biti' idxi'isili' yödzölió ni, en calëga le dë yödzölió ni. Channö zoa nu nadxí'i yödzölió, biti' nadxí'i Dios Xuz. <sup>16</sup> Caní naca, tu' naca le tun bönachi yödzölió ni le cabí rë'ënë' Dios Xuz, pero naca le té'ëni bönachi yödzölió ni. Tunë' le riyaza ladxi' yöl-la' bönáchisö quégaquië'.

Tunë' le ruá' dö' le ridani guiöj lógaquië'.

Tun ba zxon cuíngaquië' ni'a que le dë quégaquië'.

Caní nácgaca le ruá' dö' tunë'. <sup>17</sup> Huadödi que yödzölió ni, enca' que le ta'zë ládxi'gaca bönachi, pero nu run ca rë'ënë' Dios sóatica'sö.

*Nu ru'i didza' idütë li, en nu rizí' yë'*

<sup>18</sup> Zxi'ina'do', chizóaru' dza údxi, en ca na' chibiyónili' huidë' bönni' ridá'baguë'ë Cristo, lësca' na'a chigusí lo nacu'ë zían bönni' ta'dá'baguë'ë Cristo. Que lë ni na' nöziru' chizóaru' dza údxi. <sup>19</sup> Bila'ruájë' bönni' caní ládjaru', pero biti' guláquië' tuz len rë'u. La'tu' guláquië' tuz len rë'u, ila'cuá'lentica'së' rë'u. Na'a, bila'ruájë' para gaca bë' biti' nácgaguie' yúgu'të' tuz len rë'u.

<sup>20</sup> Na'a, Bö' Lá'ayi nagú'u Nu naca lá'ayi rë'u, chizóalen libí'ili', ate' nöz quézili' yúgu'të. <sup>21</sup> Buzúaja' queëli' lu guichi, tu' chinözili' le naca idütë li, en calëga tu' cabí nözili' le. Nözili' ca' biti' ca' rizí' yë' nu nözi le naca idütë li.

<sup>22</sup> ¿Nuzxi caz na' nu rizí' yë'? ¿Naru' cabí naca nu na' ridá'baga' náquië' Jesús Nu gusól-lë'ë Dios? Naca nu ni bönni' ridá'baguë'ë Cristo, tu' ridá'baguë'ë náquië' Dios Xuzë' Jesús, en ridá'baguë'ë ca' náquië' Jesús Zxi'inë' Dios. <sup>23</sup> Núti'tës nu ridá'baga' Dios Zxi'ini, biti' ca' zóalenë' Dios Xuz nu na'. Núti'tës nu rnna yálajdo' Jesús náquië' Zxi'inë' Dios, lësca' zóalenë' Dios Xuz nu na'.

<sup>24</sup> Na'a, guli'güí' lataj le biyónili' dza ni'te ugá'analentica'sö libí'ili'. Channö le biyónili' dza ni'te ugá'analentica'sö libí'ili', lësca' libí'ili' ugá'analentica'sili'-në' Dios Zxi'ini, enca' len Dios Xuz. <sup>25</sup> Le guzxi' lu në'ë Dios naca lë ni: Gunnë' gunnë' yöl-la' na'bán idú queëru'.

<sup>26</sup> Chibuzúaja' queëli' lu guichi lë ni ca naca quégaca nupa ta'zí' ye'e libí'ili'. <sup>27</sup> Na'a, zóalenë' Dios Bö' Lá'ayi libí'ili'. Cristo gusól-lë'ë Lë' queëli', ate' Lë' cazë' zóalenticasë' libí'ili'. Que lë ni na' biti' riquínili' nu usedi libí'ili', tu' chizóalen Nu na' libí'ili', en rusedi libí'ili'. Didza' idütë li ru'ë Lë', en biti' rizí' yë'ë. Ca na' chinazëdali', guli'sóalenticasë' Cristo.



<sup>28</sup> Na'a, zxi'ina'do', guli'sóaléntica'sé' Cristo para cate' uluí' lahué' Lë', gácaru' rugu ladxi', en biti' utuí'iru' sóaru' lahué' Lë' cate' huödë'. <sup>29</sup> Channö nözili' náquië' Dios tsahui', ral-la' inözili' ca' yúgu'të nupa tun le naca tsahui' nácacaga zxi'inë' Dios.

### 3

#### *Nupa nácacaga zxi'inë' Dios*

<sup>1</sup> Buli'yú ca nadxí'ide'enë' Dios Xuz rë'u, benë' ga nazí'i laru' zxi'inë' Dios caz. Que lë ni na' bönachi yödzölió ni biti' ca' núnbë'gaca le nácaru', tu' cabí gulúnbe'e Jesús. <sup>2</sup> Böchi' luzá'ado', na'a chinácaru' zxi'inë' Dios, en biti' naca bé'eni le ral-la' gácaru'. Nöziru' cate' uluí' lahué' Jesús, gácaru' ca náquië' Lë', ate' ilé'eru'-në' catëz náquië' Lë'. <sup>3</sup> Núti'tës nu run löza gaca ca náquië' Jesús, ruí'i ladxi' nu na' gaca dxi'a ca na' náquië' Jesús dxi'a.

<sup>4</sup> Núti'tës nu run dul-la' riguitsaj xibá queë' Dios, tu' naca dul-la' le riguitsaj xibá. <sup>5</sup> Nözili' buluí' lahué' Jesús para bugúë' dul-la' nabága'ru', en biti' bi dul-la' runë' Lë'. <sup>6</sup> Núti'tës nu dzaga Lë' biti' run dul-la'. Núti'tës nu run dul-la' catu caz bilé'e Jesús, en biti' núnbe'e Lë'. <sup>7</sup> Zxi'ina'do', guli'gún chí'i cuinli' para cabí nu si' ye'e libí'ili'. Nu run le naca tsahui', naca tsahui' nu na' ca na' náquië' Jesús tsahui'. <sup>8</sup> Nu rúntica'só dul-la' nequi que tu' xihui', tu' run dul-la' tu' xihui' dza ni'te. Que lë ni na' budulufí' lahué' Zxi'inë' Dios, para usunitië' yugu' le nun tu' xihui'.

<sup>9</sup> Núti'tës nu naca zxi'inë' Dios biti' rúntica'só dul-la', tu' zóaléntica'só le guzxi' lu në'ë Dios Xuz nu na'. <sup>10</sup> Caní naca bë' nupa nácacaga zxi'inë' Dios, en nupa nácacaga zxi'ini tu' xihui'. Núti'tës nu biti' run le naca tsahui', en biti' nadxí'i böchi' luzë'e biti' nequi queë' Dios.

#### *Ral-la' idxí'iru' yugu' böchi'ru' ta'yéajlë'ë Cristo*

<sup>11</sup> Lë ni naca didza' biyönili' dza ni'te, le rnna: Ral-la' idxí'iru' luzá'aru' turu' ia'turu'. <sup>12</sup> Biti' ral-la' gunru' ca na' benë' Caín. Gúquië' Caín que tu' xihui', ate' bëtië'-bi' bi'i böchë'ë. ¿Bizx que bëtië'-bi' bi'i böchë'ë? Bëtië'-bi' tu' gulaca le benë' Caín na' le ruá' dö', pero le benbi' bi'i böchë'ë, gulaca tsahui'.

<sup>13</sup> Böcha'ado', biti' ubánili' channö cabí ta'l'é e bönachi yödzölió ni libí'ili' dxi'a. <sup>14</sup> Nöziru' chigudódiru' lu yöl-la' guti, en chidë yöl-la' na'bán idú queëru' tu' nadxí'iru' yugu' böchi'ru'. Nu biti' nadxí'i böchi' luzë'e, chinati caz nu na'. <sup>15</sup> Núti'tës nu biti' rilé'e dxi'a böchi' luzë'e, naca huëti bönachi nu na', ate' nözili' nu ruti bönachi biti' dë yöl-la' na'bán idú que. <sup>16</sup> Caní núnbë'ëru' yöl-la' nadxí'i le naca idú. Naca ca budödë' Jesús yöl-la' na'bán queë', en gútië' uláz queëru'. Lësca' caní rë'u ral-la' udódiru' yöl-la' na'bán queëru', para gácalenru' yugu' böchi'ru'. <sup>17</sup> Na'a, núti'tës nu dë yöl-la' tsahui' que, lë na' dë yödzölió ni, ate' rilé'e böchi' luzë'e, bi riyadzaj queë', en biti' ruhuéchi' ladxi' lë', bi unödzej queë', ¿naru' nadxí'itsó nu na' Dios? <sup>18</sup> Libí'ili', zxi'ina'do', ral-la' idxí'iru' luzá'aru', calëga len didza'só o lu yöl-la' rinnësó queëru', pero idú ládxi'ru', enca' len idütë yöl-la' run queëru' ral-la' idxí'iru' luzá'aru'.

#### *Le runru' löza lahuë' Dios*

<sup>19-20</sup> Channö caní nadxí'iru' yugu' böchi' luzá'aru', nöziru' néquiru' que Nu na' naca idütë li, ate' lahué' Dios huáca cö' dxi' icja ládxi'do'oru' channö ruxósa ládxi'do'oru' rë'u, tu' rácada'arë' Dios ca ládxi'do'oru', ate' Lë' nözinë' yúgu'të. <sup>21</sup> Böchi' luzá'ado', channö cabí ruxósa ládxi'do'oru' rë'u, dë le runru' löza lahué' Dios <sup>22</sup> tu' nöziru' gunnë' queëru' bítitës

bi inábaru' lahuë'. Caní naca, tu' runru' ca rinná bë' xibá queë', en le raza ládxë'ë Lë'. <sup>23</sup> Lë ni naca xibá queë', para tséajlë'ëru'-në' Jesucristo, Zxí'inë' Dios, en idxí'iru' luzá'aru' ca na' chigunná bë'enë' rë'u. <sup>24</sup> Zóalen Dios nu run ca rinná bë' xibá queë', ate' Dios caz zóalenë' nu na'. Caní nöziru' dzágitica'së' Lë' rë'u, tu' chigusól-lë'ë Dios Bö' Lá'ayi queëru'.

## 4

### *Le naca bë' zóalenë' Dios Bö' Lá'ayi rë'u*

<sup>1</sup> Böchi' luzá'ado', bití' tséajlë'ëli' núti'tës bönni' rnnë' zóalenë' Dios Bö' Lá'ayilë', pero guli'sí' bë' bönni' na', channö zóalenë' Dios Bö' Lá'ayilë', tu' ta'dë' zían bönni' ta'zí' yë'ë yödzölió ni. Ta'nnë' tu'ë didza' uláz queë' Dios. <sup>2</sup> Caní gúnbë'ëli'-në' nu bönni' zóalenë' Dios Bö' Lá'ayi lë'. Nequi queë' Dios bönni' na' rnnë' yálajdo' ca bidë' Jesucristo, Nu gusól-lë'ë Dios, rnnë' guca cazë' bönachi. <sup>3</sup> Lësca' caní, bití' nequi queë' Dios nu bönni' bití' rnnë' yalaj lulu ca bidë' Jesucristo, rnnë' bití' guca cazë' bönachi. Bönni' ni néquinë' que nu na' ridá'baga' Cristo, bönni' na' chibiyönili' ral-la' guidë', ate' na'a chiridë' yödzölió ni.

<sup>4</sup> Zxí'ina'do', néquili' queë' Dios, en chibucúl-lali' nupa na' ta'zí' yë', tu' náparö Nu na' zóalen libí'ili' yöl-la' huáca unná bë' ca nu na' ridá yödzölió ni. <sup>5</sup> Légaquië' nácaquië' bönachi yödzölió. Que lë ni na' tu'ë didza' que le naca que yödzölió, ate' bönachi yödzölió ni tu'zë nágagaca légaquië'. <sup>6</sup> Néquiru' rë'u queë' Dios. Nu nunbë' Dios ruzë nagui rë'u. Nu bití' nequi queë' Dios bití' ruzë nagui rë'u. Caní núnbë'ëru' nu na' yu'u le Bö' ruí'i didza' le naca idútë li, enca' nu na' yu'u le tu bö' rizí' yë'.

### *Náljalén Dios yöl-la' nadxí'i*

<sup>7</sup> Böchi' luzá'ado', ral-la' idxí'iru' luzá'aru', tu' náljalén Dios yöl-la' nadxí'i, ate' núti'tës nu nadxí'i luzë'e náljalén ca' Dios, en núnbe'e Dios. <sup>8</sup> Nu bití' nadxí'i luzë'e, bití' núnbe'e Dios, tu' náljalén Dios yöl-la' nadxí'i. <sup>9</sup> Caní bulu'e lahui Dios ca nadxí'inë' rë'u, gusól-lë'ë la's dui Zxí'ini cazë' yödzölió ni, para gata' yöl-la' na'bán idú queëru' ni'a queë' Lë'. <sup>10</sup> Caní naca bë' yöl-la' nadxí'i idú, calëga ca nadxí'iru'-në' Dios, pero ca na' Lë' bidxí'inë' rë'u, en gusól-lë'ë Zxí'ini cazë' para gútië', en caní bugúë' dul-la' nabágaru'.

<sup>11</sup> Böchi' luzá'ado', channö caní bidxí'ide'enë' Dios rë'u, lësca' rë'u ral-la' idxí'iru' luzá'aru'. <sup>12</sup> Catu caz nu bilé'e Dios, pero channö nadxí'iru' luzá'aru', Dios zóalenë' rë'u, ate' naca bë' nadxí'iru'-në' Dios idú ládx'i'ru'. <sup>13</sup> Nöziru' zóalenru'-në' Dios, ate' Lë' zóalenë' rë'u, tu' guchízië' Dios Bö' Lá'ayi rë'u. <sup>14</sup> Netu' bilé'etu' le benë' Dios Xuz, en runtu' ba nalí que. Lë' gusól-lë'ë Zxí'ini cazë' Nu rusólá bönachi yödzölió. <sup>15</sup> Nu bönni' rnnë' yálajdo' náquië' Jesús Zxí'inë' Dios, Dios zóalen cazë' bönni' na', ate' lë' zóalenë' Dios.

<sup>16</sup> Rë'u ni nöziru', en réajlë'ëru' nadxí'inë' Dios rë'u. Yöl-la' nadxí'i náljalén Dios, ate' nu bönni' nadxí'inë' luzë'ë, zóalenë' bönni' na' Dios, ate' Dios zóalenë' lë'. <sup>17</sup> Caní run dxin yöl-la' nadxí'i lu icja ládx'i'do'oru', run ga bití'rö rádxiru' dza ichúguië' Dios quégaca bönachi ilátigaca. Ca náquië' Jesús, nácaru' ca' rë'u yödzölió ni. <sup>18</sup> Channö nadxí'iru'-në' Dios, bití' bi gádxiru'. Cate' nadxí'iru'-në' Dios idú ládx'i'ru', runë' ga bití' rádxiru'. Nu radxi, riguí' rizáca'a. Nu na' radxi, bití' nadxí'i Dios idú ládx'i'.

19 Rë'u ni nadxí'iru'-në' Dios, tu' zí'alö bidxí'i quezínë' Lë' rë'u. 20 Channö nu inná: "Neda' nadxí'ida'-në' Dios", pero bití' rilé'e dxi'a böchi' luzé'e, nu ni rizí' yë'. Nu bití' nadxí'i böchi' luzé'e nu rilé'e caz, ¿naxci caz gaca idxí'i Dios, en catu caz bilé'e Lë'? 21 Caní gunná bé'enë' Jesús rë'u. Gunnë': Nu nadxí'i Dios, ral-la' idxí'i ca' böchi' luzé'e.

## 5

### *Ca gaca idéli'ru' lu le raca queëru' yödzölió ni*

1 Núti'tës bönni' réajlë'ë Jesús náquië' Cristo, náquië' zxi'inë' Dios, ate' núti'tës bönni' nadxí'inë' Dios Nu buzóa lë', ral-la' idxí'inë' ca' luzé'ë nu naca bi'i queë' Dios. 2 Caní réquibe'ëru' nadxí'iru' yugu' bi'i queë' Dios. Naca caní channö nadxí'iru'-në' Dios, en runru' ca rinná bé'enë' rë'u. 3 Caní naca bé' nadxí'iru'-në' Dios. Naca caní channö runru' ca rinná bé'enë' rë'u, ate' lë na' rinná bé'enë' rë'u bití' naca böniga. 4 Núti'tës bönni' náquië' bi'i queë' Dios ridéli'në' lu le raca yödzölió ni. Chibidéli'ru' lu le raca yödzölió tu' réajlë'ëru'-në' Dios. 5 ¿Nuzxi na' rideli' lu le raca yödzölió? Run caní nu réajlë' náquië' Jesús Zxi'inë' Dios.

### *Dios Bö' Lá'ayi runë' ba nalí queë' Cristo*

6 Caní blë'ë Jesucristo. Bidë' bidilë' nisa, en bulaljë' xichönë'. Calëgasö bidilë' nisa, pero lësca' bulaljë' xichönë'. Dios Bö' Lá'ayi náquië' Nu run ba nalí queë', tu' naca idútë li didza' ru'ë Dios Bö' Lá'ayi. 7 Tsonna nupa tun ba nalí queë' Jesús yehua' yubá ni', Dios Xuz, en Dios Zxi'ini, lë' ca' Didza', en Dios Bö' Lá'ayi. Yonnë' ni nácagaquië' tuz. 8 Lësca' caní, tsonna le tun ba nalí queë' luyú ni, ca na' zóalenë' Dios Bö' Lá'ayi Lë', en le bidilë' Jesús nisa, en rön ni' bulaljë' lë'e yaga cruz, ate' yonna ni, tuz ca ta'nná. 9 Channö si' lu ná'aru' le tun ba nalí bönachi, le runë' ba nalí Dios nácatëro lesaca'. Lë na' benë' ba nalí Dios naca le benë' ba nalí queë' Jesús, gunné' náquië' Zxi'ini cazë'. 10 Nu réajlë' Zxi'inë' Dios, nazí lu në'e le nunë' ba nalí Dios. Nu cabí réajlë' Dios, naca ca rna nu na': Dios rizí' yë'ë. Caní naca, tu' cabí guyéajlë' le benë' ba nalí Dios queë' Zxi'inë'. 11 Lë ni naca le benë' ba nalí Dios. Gunnë' chibennë' yöl-la' na'bán idú queëru', ate' Zxi'inë' na' náquië' Nu nabániru' caní. 12 Nu bönni' zóalenë' Zxi'inë' Dios lë', dë yöl-la' na'bán idú queë'. Nu bönni' bití' zóalenë' Zxi'inë' Dios lë', bití' dë yöl-la' na'bán idú queë'.

### *Ca nöziru' dë yöl-la' na'bán idú queëru'*

13 Libí'ili' na' réajlë'ëli'-në' Zxi'inë' Dios, ruzúaja' queëli' lu guichi lë ni para inözili' chidë yöl-la' na'bán idú queëli', en para gaca idú ca réajlë'ëli'-në' Zxi'inë' Dios.

14 Lë ni naca le ruzxöni ládxi'ru' Lë'. Channö bi inábiru' Lë' ca rë'ënë' Lë', Lë' riyönnë' rë'u. 15 Channö nöziru' riyönnë' rë'u ca naca bi rinábiru' Lë', nöziru' ca' ideli' queziru' lë na' rinábaru'.

16 Channö ilë'ëru' böchi' luzá'aru' runë' dul-la' le cabí nachë' yöl-la' guti, ral-la' inábaru' queë' lahuë' Dios, ate' Lë' unödzjë' yöl-la' na'bán queë'. Caní rnnía': Ral-la' inábali' quegaca nupa tun dul-la' le cabí nachë' yöl-la' guti. Dë dul-la' le nachë' yöl-la' guti. Bití' rnnía' inábali' que nu run dul-la' caní. 17 Yúgu'të le cabí naca tsahui' naca dul-la', pero dë dul-la' le cabí nachë' yöl-la' guti. 18 Nöziru' bití' rúntica'sö dul-la' nu naca zxi'inë' Dios, tu' rapa ch'i'ë Zxi'ini cazë' Dios nu na', ate' tu' xihui' bití' sequi' bi gun que.

19 Nöziru' yú'uru' lu në'ë Dios, ate' yúgu'të bönachi tu'f'i ládxi'gaca le dë yödzölió ni yú'ugaca lu na' tu' xihui'.

<sup>20</sup> Na'a, nöziru' chibidë' Zxí'inë' Dios, en bennë' yöl-la' réajni'i queëru', para gúnbë'ëru' Nu na' naca idútë li. Zóalenru' Nu na' naca idútë li tu' zóalenru'-në' Jesucristo, Zxí'inë' Dios. Nu ni naca Dios idú, en Nu runna yöl-la' na'bán idú queëru'. <sup>21</sup> Zxí'ina'do', guli'gún chi'i cuinli' para cabí tseaj ládxi'li' yugu' budó' guiöj budó' yaga. ¡Ca' gaca!

## DÍDZA'DO' BUROPI BUZÚAJĚ' JUAN

*Núnbě'ëru' le naca idútë li, en yöl-la' nadxí'i*

<sup>1</sup> Neda', bönni' gula run chi'a bönachi queë' Cristo, rugapa' li' Dios, nigula rö queë' Dios, tsözxön len yúgu'të zxí'inu'. Nadxí'ida' libí'ili' tu' núnbě'ëru' le naca idútë li, en calégasö neda', pero lësca' yúgu'të nupa chinúnbě'ëgaca le naca idútë li ta'dxí'i libí'ili'. <sup>2</sup> Nadxí'itu' libí'ili' tu' núnbě'ëru' le naca idútë li, le zóaléntica'sö rë'u. <sup>3</sup> Rinábida'-në' Dios Xuz, en Xanru' Jesucristo, Zxí'ini cazë' Dios, uzá' ládxcë'ë queë'li', en huéchi' ládxcë'ë libí'ili', en gunë' ga soa dxi icja ládxi'do'oli' tu' núnbě'ëli' le naca idútë li, en nadxí'ili' luzá'ali'.

<sup>4</sup> Budzëjade'eda' cate' biyönda' tunbi' zxí'inu' ca naca le naca idútë li, tu' tunbi' ca na' gunná bé'enë' Dios Xuz rë'u. <sup>5</sup> Na'a, ráta'yua' lo', nigúlado', gunu' ca rinná bë' xibá queë' Cristo. Biti' ruzúaja' quiu' lu guichi tu xibá cubi. Ruzúaja' la' lëbisö lë na' gunná bé'enë' rë'u dza ni'te. Gunnë' ral-la' idxí'iru' luzá'aru'. <sup>6</sup> Caní naca bë' nadxí'iru'-në' Dios. Naca caní channö runru' ca rna le gunná bé'enë' rë'u. Lë na' gunná bé'enë' rë'u naca para idxí'iru' luzá'aru' ca na' chibiyönili' dza ni'te.

*Nupa tš'ëni ila'z'í ye'e rë'u*

<sup>7</sup> Lë ni riguixjöi'ida' libí'ili', tu' chita'dá zían nupa ta'z'í yë' yödžölió ni, nupa na' biti' ta'z'í lu në'eguequi ca bidë' Jesucristo, gúquië' idú bönachi. Nu na' run caní, naca nu rizí' yë', en nu ridá'baga' Cristo. <sup>8</sup> Guli'gún chi'i cuinli' para cabí initi le nadéli'li' tu' guzxí' lu na'li' Cristo, pero guli'güf' ládxi'li' idéli'li' idútë le ral-la' sí'ili' lu në'ë Dios.

<sup>9</sup> Núti'tës nu riguela' nōza yúbölö, en rucá'ana xtídzë'ë Cristo, biti' zóalenë' Dios nu na'. Nu dá'tica'sö xtídzë'ë Cristo, zóalenë' Dios Xuz, enca' Zxí'inë' nu na'. <sup>10</sup> Channö núti'tës nu za' ga zóali', en rusedi xibá yúbölö, biti' ulëbili' nu na' lídxili', en biti' guiëli' le: "Guyú'u len netu'." <sup>11</sup> Nu rë le: "Guyú'u len netu'", run tsözxön nu na' ca naca le ruá' dö' run nu na'.

*Runë' Juan löza idxinë' ga nacu'ë böchi' luzë'ë*

<sup>12</sup> Sal-la' le zían ral-la' uzúaja' queë'li' lu guichi, biti' rë'ënda' uzúaja' yúgu'të lu guichi. Runa' löza guída' ga zóali', ate' güi'iru' didza' ruá'a cuinru', para gaca udzëjaru' idú ládxi'ru'.

<sup>13</sup> Zxí'ininu nigula zxilu', nigula rö queë' Dios, tu'gápabi' Dios li'. ¡Ca' gaca!

## DÍDZA'DO' BUNNI BUZÚAJË' JUAN

### *Le naca tsahui' runë' bönni' lë' Gayo*

<sup>1</sup> Neda', bönni' gula run chi'a bönachi queë' Cristo, rugapa' Dios li', Gayo dxi'i ladxi'. Nadxi'ida' li' tu' núnbë'ëru' le naca idútë li.

<sup>2</sup> Böcha'ado', rinábida'-në' Dios gunë' ga gaca dxi'a quiu' lu yúgu'të le runu', en su' ca' dxi'a, ca na' raca dxi'a que bö' naca cazu'. <sup>3</sup> Rudzėjada' tu' ta'dxinë' yugu' böchi'ru' ga zoa', en tunë' ba nalí quiu', ta'nnë' nacu' li ladxi', en runu' ca naca le naca idútë li. <sup>4</sup> Biti' bi dë le runrö ga rudzėjada' ca lë ni, riyönda' tun nupa nácgaca ca bi'i que caza' ca rnna le naca idútë li.

<sup>5</sup> Böcha'ado', runu' le naca tsahui', rácalenu' böchi'ru', en runu' ca' le nácarö lesaca', rácalenu' böchi'ru' bití' núnbë'enu' légaquië'. <sup>6</sup> Yugu' böchi'ru' ni tunë' ba nalí quiu' lógaca bönachi queë' Cristo ni, ta'guíxjö'ë ca na' nadxi'ínu' légaquië'. Runu' le naca dxi'a, rugú'u légaquië' nöza, en rácalenu' légaquië' ca na' sa'yéaj gunu' quégaca nupa tun xichinë' Dios, para ulu'ú'ë nöza. <sup>7</sup> Légaquië' bila' rúajë' ni tu' nadxi'ígaquië' Jesús, en bití' bi ta'zi'ë lu ná'agaca bönachi bití' ta'dá' Cristo. <sup>8</sup> Que lë ni na' ral-la' gunru' bal bönachi tun caní, para gúnlenru' légaquië' dxin que le naca idútë li.

### *Le cabí naca tsahui' runë' Diótrefes*

<sup>9</sup> Chibuzúaja' lu guichi le uzéajni'i bönachi queë' Cristo ni', pero Diótrefes, bönni' ni' raza ládxë'ë gáquië' lo ládjagaquië', bití' runë' netu' bal. <sup>10</sup> Que lë ni na', channö huida' ga zóali', usá'a ládxili' cate' udúbili' ca nácgaca le runë'. Rizí' quídzë'ë netu', en rnnë' queëtu' le cabí nácatë. Bití' rizxön ládxë'ë tsa lë nisö, pero lësca' bití' runë' bal böchi'ru' ta'dxinë' ni', ate' ruzáguë'ë xinözguequi nupa ni' té'ëni ilún légaquië' bal, en rubéajë' nupa na' ladaj bönachi queë' Cristo.

<sup>11</sup> Böcha'ado', bití' gunu' ca tun nupa tua' dö', pero ca tun nupa tun le naca tsahui' gunu'. Nu run le naca tsahui' nequi queë' Dios, pero nu ruá' dö' catu caz benbë' Dios.

### *Le naca tsahui' runë' Demetrio*

<sup>12</sup> Yúgu'të böchi'ru' tunë' ba nalí queë' Demetrio, ate' naca bë' runë' le naca idútë li. Lësca' netu' runtu' ba nalí queë', ate' nözili' nácatë lë ni runtu' ba nalí queë'.

### *Le rinabë' Juan lahuë' Dios*

<sup>13</sup> Ziánrö ca' le gú'unida' uzúaja' quiu' lu guichi, pero bití' ré'ënda' uzúaja' le lu guíchisö. <sup>14</sup> Na'a, runa' löza ilé'eteda' li', ate' gü'íru' didza' ruá'a cuinru'.

<sup>15</sup> Rinábida'-në' Dios gunë' ga soa dxi icja ládxido'o. Nupa ni ta'dxi'i rë'u tu'gapa Dios li'. Lësca' li', bugapa Dios tu tu nupa ni' ta'dxi'i rë'u. ¡Ca' gaca!

## DÍDZA'DO' BUZÚAJĚ' JUDAS

*Judas rugapë' Dios nupa nulidzë' Dios*

<sup>1</sup> Neda', Judas, tsaz naca' huen dxin queë' Jesucristo, en naca' ca' böchë'ë Jacobo. Rugapa' Dios libí'ili', nulidzë' Dios Xuz libí'ili', en nadxí'inë' libí'ili', en rapa chi'ë libí'ili' tu' nácali' tuz len Jesucristo. <sup>2</sup> Ré'ënda' inözili' ca ruhuéchi'da' ládxë'ë Dios libí'ili', en nadxí'ide'enë' libí'ili', enca' ruzóadë'ë dxi icja ládxi'do'oli'.

*Nupa tu'sedi le cabí nácatë*

<sup>3</sup> Libí'ili', böchi' luzá'ado', gúcada' ládxa'a uzúaja' queëli' lu guichi ca naca yöl-la' rusóla nadéli'ru', pero run bayudxi uchízia' icja nágali' para idú ládxi'li' tíl-lalenli' nupa ta'dá'baga' le réajlë'ëru'-në' Dios, lë na' budödë' Dios tsaz lu ná'agaca nupa néquiguequi quez queë' para ulu'zë didza' que lógaca yúgu'të bönachi. <sup>4</sup> Caní run bayudxi guna' tu' bagáchi'sö chigula'yázalenë' bal-lë' bönni' rë'u, Dios buzóë' quégaquië' dza ni'te ichúguië' quégaquië' ila'nítië' tsaz. Biti' ta'yéaj ládxi'gaquië' Dios bönni' caní. Tu' zoa le ruzá' ládxë'ë Dios queëru', téquinë' huáca ilunë' le ruá' dö'. Ta'dá'baguë'ë Xanru' Jesucristo. Tuzë' Lë' rinná bé'enë' rë'u.

<sup>5</sup> Chinöz quézili' lë ni, pero ré'ënda' usá'a ládxi'li' ca benë' Xanru' Dios. Sal-la' busölë' bönachi Israel cate' bubéajë' léguequi luyú Egipto, gudödi ni' busunítië' nupa bítsa'gaca ládjaguequi, en biti' gula'yéajlë' Lë'. <sup>6</sup> Lëscá caní, yugu' gubáz lá'ayi queë' Dios, nupa ni' biti' gulún xichíngaquië', pero bulu'cá'anë' xilátjagaquië', Dios busayjë' légaquië' tu lataj chul-la. Nága'gaquië' tsaz ni' ga idxinrö dza usiúdxë' Dios yödzóliö ni. <sup>7</sup> Lëscá caní guca quégaca yödzö Sodoma, en yödzö Gomorra, enca' yugu' yödzö dzágagaca léguequi. Ca na' gulunë' gubáz lá'ayi na', gula'dá'baguë'ë Dios, lëscá caní gulunë' bönni' yugu' lu yödzö na'. Bulu'dödi cuíngaquië' para gulunë' le ruá' dö', en le gula'zësö ládxi'gaquië' le tun ga nu rutuí'i. Na'a, tu' busaca' zì'ë Dios légaquië' lu guí' le cabirö ulu, lë na' guca quégaquië' naca tu le run gadxi yúgu'tëru', para cabí gunru' la' lëbisö.

<sup>8</sup> Sal-la' gulaca lë ni, la' canisö tunë' bönni' ni, bönni' röjácalenë' yëla ta'nënë'. Tun dítanë' idütë le naca cazë'. Ta'dá'baguë'ë le rinná bé'enë' Dios rë'u, en ta'nnë zì'ë quégaca nupa ta'nná bë' yehua' yubá. <sup>9</sup> Miguel caz, gubáz lá'ayi lo, cate' gudíl-lalenë' tu' xihui' para gaca u'ë idú le naca cazë' Moisés, biti' burúguinë' udxíë' dö' tu' xihui' na', pero gudxë' le: "Xanru' uzenë' li' bach." <sup>10</sup> Yugu' bönni' ni ta'nnë zì'ë quégaca le runë' Dios, yugu' le biti' ta'yéajni'inë', ate' yugu' le ta'yéajni'inë' rácasö quégaquië' ca na' tunba' böa' guixi' biti' ta'yéajni'iba', lë ni tu'gunë' dxin, en caní tu'dxía dö' cuíngaquië'.

<sup>11</sup> Bica' bayechi' légaquië' tu' chigulunë' dul-la' ca na' benë' Caín, ate' lu yöl-la' ruhuidi' quégaquië' chigula'chixi gula'níguinë' ca na' guchixi guníguinë' Balaam para si'ë dumí, ate' chinarugu quégaquië' ilátië' ca na' gútië' Coré cate' gudá'baguië' Moisés. <sup>12</sup> Yugu' bönni' ni tágulenë' tsözxón libí'ili' cate' ráguli' yugu' güi'i huagu lu yöl-la' nadxí'i queëli'. Tunë' ga ta'chixi ta'nigui nupa dzágagaca libí'ili', tu' tē'aj tagu lizë'. Náca'gaquië' ca yugu' bönni' ral-la' ulu'gágugaquië'-ba' bö'cu' xzila', pero la' cuíngacásë' tu'gahuë'. Náca'gaquië' ca böaj lúzxiba biti' nachë'gaca nisa, ate' ruá' bö'

léguequi ná'alö ní'ilö. Nácagaquië' ca' ca yugu' yaga chibidxín dza bi ila'bía, pero biti' bi ta'bía. Nácagaquië' ca' ca yugu' yaga chigula'bidxi idú luí, en chinaládzu'gaca. <sup>13</sup> Nácagaquië' ca' ca nísado' cate' riyasa ridxía, ate' ribó' bidxina' que, lé na' ruluí'i ca naca yöl-la' stu' tunë'. Nácagaquië' ca yugu' bölaj lúzxiba nucá'anagacaba' xinózagacaba'. Dios chinunë' quégaquië' ila'yázië' tsaz lataj chul-la.

<sup>14</sup> Ca naca quégaquië' bë'ë ca' didza' Enoc uláz queë' Dios. Enoc na' gúquië' tu bönni' gubábalenë' le igadxi cö' xzí'ini xi'sóë' Adán. Gunnë': "Buli'yútsöca, zë'ë Xanru', ate' dzágagaca Lë' zían gayuá' bönachi néquiquequi quez queë'. <sup>15</sup> Zë'ë para gunë' xíguia' yúgu'të bönachi, en ichúguië' quégaca yúgu'të nupa tua' dö' ila'niti tsaz." Caní gunë' tu nözi yúgu'të didza' zi' gula'nnë' bönni' dul-la' na' queë' Lë'. <sup>16</sup> Yugu' bönni' caní ta'nnë' queë', en ta'zí' quídzë'ë, en tunë' ca naca le ta'zësö láchxi'gaquië'. Tu'ë didza' lu yöl-la' run ba zxön cuíngaquië', en para ulu'zi'ë xibéguqui, tu'ë didza' le ta'gú'u bönachi yöl-la' zxön.

*Judas rusë'ë láchxi'gaca nupa ta'yéajlë' Cristo*

<sup>17</sup> Na'a, böchi' luzá'ado', guli'tsöjné yugu' didza' gulu'ë bönni' gubáz queë' Xanru' Jesucristo dza ni'te. <sup>18</sup> Yugu' bönni' na' gulë' libí'ili': "Yugu' dza tsöjsëtégaca ulu'luí'i lógaquië' bönni' ulu'titjë' le naca lá'ayi, en ilunë' ca naca le ta'zësö láchxi'gaquië' le ruá' dö'." <sup>19</sup> Yugu' bönni' ni tunë' ga irúajli' choplö. Tu'ë didza' lu yöl-la' bönáchisö quégaquië', en biti' zóalenë' Dios Bö' Lá'ayi légaquië'.

<sup>20</sup> Na'a, böchi' luzá'ado', guli'sóa tsutsu lu yöl-la' réajlë' queéli' Dios le naca idú lá'ayi. Buli'lidzë' Dios, ugunli' dxin yöl-la' huáca queë' Dios Bö' Lá'ayi. <sup>21</sup> Buli'gá'analenë' Dios, Nu nadxí'i rë'u, en guli'cöza dza ni' ulu'í' lahuë' Xanru' Jesucristo, Nu ruhuéchi' láchxë'ë rë'u para gata' yöl-la' na'bán idú queëru'.

<sup>22</sup> Guli'gún ga ila'dipa láchxi'gaca nupa raca chopa láchxi'gaca. <sup>23</sup> Guli'gún ga ulu'lë', le gaca tsca ubéajli' légaquië' lu guí'. Lu yöl-la' radxi queéli' buli'huéchi' láchxi'li' ia'zica'rö bönachi. Guli'gún chi'i cuinli', para cabí gunli' tsözxön légaquië', en cabí gútsa'li' le ruá' dö' tunë'.

*Le rigú'uru' Dios yöl-la' zxön*

<sup>24-25</sup> Dios la's dui, Nu nözi caz yúgu'të, en Nu busölá rë'u ni'a que le benë' Xanru' Jesucristo, napë' yöl-la' huáca gun chi'ë libí'ili', para cabí ichixi iníguili', en usudxinë' libí'ili' lahuë' Lë' ga zoë' lu bení idú. Gunë' ga gácali' idú tsahui', en ga udzëjade'eli'. ¡Gaca caz queë' Dios yöl-la' ba, en yöl-la' zxön, en yöl-la' naca lo, en yöl-la' unná bë', na'a dza, en yúgu'të dza zágaca! ¡Ca' gaca!



## LE BULU'INĒ' DIOS JUAN Apocalipsis

*Le bulu'e lahui Dios ca naca queë' Jesucristo*

<sup>1</sup> Lë ni naca le bulu'e lahui Jesucristo, le bē'ë Lë' lataj Dios ulu'inë' yugu' huen dxin queë' ca naca le run bayudxi ilácatë. Jesucristo gusól-lë'ë tuë' gubáz lá'ayi queë', nu na' buzéajni'i neda', Juan, huen dxin queë' Cristo. Gubáz lá'ayi na' bulu'inë' neda' ca naca lë ni. <sup>2</sup> Neda', Juan, ruzúaja' lu guichi ni le naca idütë li ca naca yúgu'të le bilé'eda', en runa' ba nalí que xtídzë'ë Dios, en que le benë' ba nalí Jesucristo.

<sup>3</sup> Bica' ba nu ulaba didza' ni, ate' bica' bágaca nupa ulu'zë' náagaca nu na' ulaba xtídzë'ë Dios ni, en ilún ca rnna lë ni nazúaj lu guichi, tu' chizóa gaca.

*Juan ruzúajë' le uzéajni'i gadxi cö' bönachi queë' Cristo*

<sup>4</sup> Neda', Juan, ruzúaja' lu guichi didza' ni le uzéajni'i gadxi cö' bönachi queë' Cristo nacua' luyú Asia. Dios, Bönni' zoa cazë', en guzóatica'së', en ral-la' huödë', rinábida'-në' uzá' ládxë'ë queëli', en gunë' ga cö'ö dxi icja ládxido'oli', ate' dzágagaca gadxi bö' Lë' nacua' lahuë' Lë' ga ni' rö'ë rinná bē'ë. <sup>5</sup> Dzáguië' ca' Jesucristo Lë'. Jesús ni runë' ca rnnë', en runë' ba nalí queë' Dios. Zí'alö Lë' bubanë' tsaz lu yöl-la' guti, en rinná bé'enë' bönni' ta'nná bē'ë yödzölió ni. Lë' nadxí'inë' rë'u, en gudibë' rë'u, tu' bugúë' dul-la' nabágaru' len xichönë' le bulaljë' lë'e yaga cruz, cate' gútië' uláz queëru'. <sup>6</sup> Jesucristo benë' ga rinná bē'ëru', en ga nácaru' yugu' bixúz, para cú'uru'-në' Dios, Xuzë' Jesús, yöl-la' ba. ¡Yöl-la' ba Lë', en gácatica'sö queë' yöl-la' unná bē'! ¡Ca' gaca!

<sup>7</sup> ¡Buli'yútsöca'! ¡Zë'ë Cristo lu böaj lúzxiba! ¡ila'lé'e Lë' yúgu'të bönachi, enca' nupa ni' gulún Lë' huë', en bétigaca Lë'! ¡ila'bödxi yechi' yúgu'të bönachi yödzölió ni cate' ila'lé'e Lë'! ¡La'tu' gácatë caní! ¡Ca' gaca!

<sup>8</sup> Caní rnnë' Lë': "Neda' naca' Bönni' zoë' zí'alö, enca' Bönni' röjsétië' ca naca le risí lo, en le ruúdxitë." Caní rnnë' Xanru', Bönni' napa cazë' yöl-la' huáca. ¡Zoa cazë' Lë', en guzóatica'së', en si' ulé'ë!

*Rilé'enë' Juan yöl-la' zxön queë' Jesucristo*

<sup>9</sup> Neda', Juan, naca' böchi' luzá'ali', en tsözxön riguí' rizáca'lena' libí'ili', en tsözxön len libí'ili' ruzi'a xibé le rinná bē'ë Dios, en nadéli'da' yöl-la' riböza zxön ladxí' na' rnnë' Jesucristo queëru'. Nadzuna' tu luyú bidxi ni gatsaj láhui'lö nísado', nazí'i le Patmos. Nadzuna' tu' bena' libán que xtídzë'ë Dios, en tu' bena' ba nalí queë' Jesucristo. <sup>10</sup> Lu dza lá'ayi queë' Xanru', guzóalenë' Dios Bö' Lá'ayi neda', ate' biyönda' cúdzu'la' chi'ë tu bönni' rulidzë' zidzaj. Biyön chi'ë ca ribödxi lúzuba' böa' bēdxi. <sup>11</sup> Bönni' ni gudxë' neda': "Neda' naca' Bönni' zoë' zí'alö, en Bönni' röjsétië' ca naca le risí lo, en le ruúdxitë. Buzúaj lu guichi le riyönnu', en rilé'enu', ate' gusól-la' le quéguequi gadxi cö' bönachi quia' nacua' luyú Asia, nupa nacua':

Lu yödzö Éfeso,  
lu yödzö Esmirna,  
lu yödzö Pérgamo,  
lu yödzö Tiatira,

lu yödzo Sardis,  
 lu yödzo Filadelfia,  
 lu yödzo Laodicea.”

<sup>12</sup> Buécja' para ilé'eda' Bönni' na' rulidzë' neda'. Cate' buécja', bilé'eda' gadxi le nuá'gaca guí' le néquiguequini oro. <sup>13</sup> Ladaj gadxi le nuá'gaca guí' na' bilé'eda' tu Bönni' riné'ë ca tu bönni'. Nácuë' tu lari' tunna le ridxín xini'ë, en luchu'ë nasié' tu le néquini oro. <sup>14</sup> Chiguíchido'os naca guitsa' icjé' ca naca zxila' o ca riná' bögui', ate' rëpi yösa bení' guiøj lahuë' ca guí'. <sup>15</sup> Rëpi yösa bení' ni'ë ca guíë bronze dxílido', le nudzé'eda' lu guí' ca bó' yalaj. Zidzaj biyön chi'ë ca riyön tu yegu zxön. <sup>16</sup> Lu në'ë ibëla xzóagacaba' gadxi bölaj bení', ate' rirúaj didza' ru'ë le naca ca tu guíë tuchi' natuchi' iropa la'a. Rëpi yösa bení' lahuë' ca gubidza cate' rudzá'a.

<sup>17</sup> Cate' bilé'eda' Lë' gudzö'a xini'ë ca tu bönni' nati. Ní'irö Lë' guxóa në'ë neda' len në'ë ibëla, en gudxë' neda': “Biti' gádxinu'. Neda' naca' Bönni' zoë' zí'alö, en röjsétië”. <sup>18</sup> Naca' Nu nabán caz. Gútiá', ate' na'a zóaticá'sa' nabana'. Dë lu na'a inná' bé'eda' yöl-la' guti, en lataj ga nacuá' nupa nátigaca. <sup>19</sup> Buzúaj lu guichi lë na' chibilé'enu', en le raca na'a, enca' le ralla' gaca tödi na'a. <sup>20</sup> Lë ni naca le nagachi' ca naca quégacaba' gadxi bölaj bení' na' bilé'enu' xzóagacaba' lu na'a ibëla, en ca naca gadxi le nuá'gaca guí' le néquiguequini oro. Gadxi bölaj bení' na' sa'yéajgacaba' gadxi gubáz quégaca gadxi cö' bönachi quia', ate' gadxi le nuá'gaca guí' na' sa'yéajgaca gadxi cö' bönachi quia' na'.”

## 2

### *Didza' gusöl-lë'ë yödzo Éfeso*

<sup>1</sup> Gunnë' ca' Bönni' na': “Buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Éfeso. Caní uzúaju' lu guichi: Ru'ë didza' Bönni' na' xzóagacaba' gadxi bölaj bení' lu në'ë ibëla, en ridë' gatsaj láhulö' gadxi le nuá'gaca guí' na' néquiguequini oro. <sup>2</sup> Caní rnnía': Neda' nöz quézida' yugu' le runli', en ca rúnda'ali' dxin. Nözda' ribözali' zxön ladxi', en biti' gaca guá' ilenli' nupa tua' dö'. Nözda' chiguzxi' bë'ëli' nupa ta'nná' nácagaca gubáz quia' pero biti' ca' nácagaca, ate' na'a nözili' ta'zí' yë'. <sup>3</sup> Ribözali' zxön ladxi', en chigudí'i guzxáca'li' tu' dá'ali' neda', pero biti' gucuidi' ládxi'li'. <sup>4</sup> Na'a, dë tu le ruzegui libí'ili' didza': Bítirö nadxí'ili' neda' ca na' bidxí'ili' neda' zí'alö. <sup>5</sup> Que lë ni na', guli'tsöjné ca na' benli' zí'alö, lë na' busanli', ate' na'a, buli'bf'i ládxi'li', en guli'gún ca na' benli' zí'alö. Channö cabí ubí'i ládxi'li', guídatia' queéli', ate' ugúa' le nuá' guí' queéli' xilataj. <sup>6</sup> Na'a, zoa tu le rácalen libí'ili'. Biti' rilé'eli' dxi'a le tunë' bönni' nicolaíta, nupa na' ta'yéaj ládxi'gaca budó' guiøj budó' yaga, en tun le ruá' dö', lë na' lësca' biti' rilé'eda' dxi'a. <sup>7</sup> Nu riyöni ral-la' uzë' nagui lë ni rnnë' Dios Bó' Lá'ayi, ru'ilenë' yugu' cö' bönachi quia' neda', Cristo, didza', rnnë': Nupa ila'deli' lu le raca yödzüliö, guna' ga ilágugaca le ribía yaga da' gatsaj láhulö' luyú lachi queë' Dios, le gun ga ila'cuá'tica'sö nabán.”

### *Didza' gusöl-lë'ë yödzo Esmirna*

<sup>8</sup> Gunnë' ca': “Lësca' caní, buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Esmirna. Caní uzúaju' lu guichi: Ru'ë didza' Bönni' na' zoë' zí'alö, en náquië' ca' Nu röjsete, Bönni' na' gútië', en bubanë' tsaz. <sup>9</sup> Caní rnnía': Neda' nöz quézida' le runli', en ca riguí'i

rizáca'li'. Nözda' nácali' yechi', pero le nácatë rilé'eli' yöl-la' tsahui' le naca idú. Nözda' ca' ca ta'nnë queëli' nupa ni' ta'nná nácagaca bönachi judío, pero biti' ca' nácagaca caní. Nupa ni ta'dá Satanás, tu' xihui'. <sup>10</sup> Biti' ca' gádxili' le ral-la' quí' sáca'li'. Tu' xihui' na' gun ga idzunli' bál-lali' libí'ili' lidxi guié. Caní si' bë' libí'ili', ate' quí' sáca'li' idú ca chi dza. Guli'tséajlë' neda' ga idxintë dza gátili', ate' neda' gunna' yöl-la' na'bán idú queëli'. <sup>11</sup> Nu riyöni ral-la' uzë nagui lë ni rnnë' Dios Bô' Lá'ayi, ru'ilenë' didza' yugu' cö' bönachi quia' neda', Cristo, rnnë': Nupa ila'deli' lu le raca yödzölió, biti' bi gun yöl-la' guti quéguequi, lë na' gaca le buropi luzuí quégaca nupa ila'cuá'tica'sö lu guí' gabila."

*Didza' gusöl-lë'ë yödzö Pérgamo*

<sup>12</sup> Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Pérgamo. Caní uzúaju' lu guichi: Ru'ë didza' Bönni' na' nu'ë guié tuchi' na' natuchi' iropa la'a. <sup>13</sup> Neda' nöz quézida' le runli'. Nözda' ca' zóali' ga ni' rinná bë' Satanás, tu' xihui', pero ni ruzxöni ládxi'li' neda'. Biti' ca' nusanli' ca réajlë'ëli' neda'. Biti' busanli' le yugu' dza ni' cate' gulútië' Antipas, bönni' ni' béntica'së' ba nalí quia', en gútië' ga ni' zoa Satanás, tu' xihui'. <sup>14</sup> Na'a, dë tu chopla le tu'zegui libí'ili' didza': Nacuá'len libí'ili' bal-la bönachi lu yödzö Pérgamo, nazí' lu në'eguequi xibá queë' Balaam, bönni' ni' busédinë' Balac benë' ga gula'chixi gula'nigui bönachi Israel, ate' gulahuë'-ba' yugu' böa' bëdxido' gulútigaquië'-ba' lógaca budó' guiöj budó' yaga, en gulunë' le ruá' dö'. <sup>15</sup> Lësca' caní nacua'len libí'ili' nupa ni' nazí' lu në'eguequi xibá quégaca bönachi nicolaíta, lë na' biti' rilé'eda' neda' dxi'a. <sup>16</sup> Que lë ni na', buli'bí'i ládxi'li' na'a. Channó cabí ubí'i ládxi'li', guídatea' ga zóali', en til-lalena' légaquië' len didza' rirúaj ruá'a, le naca ca tu guié tuchi'. <sup>17</sup> Nu riyöni ral-la' uzë nagui lë ni rnnë' Dios Bô' Lá'ayi, ru'ilenë' yugu' cö' bönachi quia' neda', Cristo, didza', rnnë': Nupa ila'deli' lu le raca yödzölió, guna' ga ilágugaca yöta maná nagachi'. Unödza' ca' tu guiöj chiguíchido' quégaquië', ate' lu guiöj na' nazúaj tu la cubi, cuntú nu nunbë' le, pero núpasö na' ila'zí'i le, ilúnbë'e la na'."

*Didza' gusöl-lë'ë yödzö Tiatira*

<sup>18</sup> Gunnë' ca': "Lësca' caní, buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Tiatira. Caní uzúaju' lu guichi: Ru'ë didza' Zxí'inë' Dios, Bönni' na' dxía guiöj lahuë' nácagaca ca guí', ate' ni'ë nácagaca ca guié bronze dxílado'. <sup>19</sup> Caní rnnë': Neda' nöz quézida' le runli'. Nözda' ca nadxí'ili' neda', en ca réajlë'ëli' neda'. Nözda' ca' ca runli' xichina' lu yöl-la' riböza zxön ladxi' queëli'. Nözda' nácarö idú ca runli' yugu' lë ni ca benli' zí'alö. <sup>20</sup> Nacuá' tu chopla le tu'zegui libí'ili' didza': Ruí'ili'-nu lataj nigula na' lënu Jezabel, rnnanu ruí'inu didza' uláz queë' Dios, ate' ni'a que le rusédinu rizí' yé'enu bönni' tunë' xichina'. Rusédinu légaquië' le run ga tunë' le ruá' dö', en tahuë'-ba' böa' bëdxido' ta'gu'ë légacaba' lógaca budó' guiöj budó' yaga. <sup>21</sup> Neda' bë'a-nu lataj ubí'i ládxi'nu, pero biti' rë'ëninu ucá'ananu le ruá' dö' na' runnu. <sup>22</sup> Que lë ni na' chú'una'-nu tu le gáti'nu ga na' quí' sáca'nu lu xihuë'ënu tsözxön len nupa gulún tsözxön len lënu le ruá' dö'. Caní guna' na'a channó cabí ulu'bí'i ládxi'guequi para cabirö ilún dul-la' na'. <sup>23</sup> Guna' ga ilátibi' zxi'ininu. Caní gaca, iléquibe'e yúgu'të cö' bönachi quia' ruyúa' le ta'bequi ícjaguequi, en le ta'zá' ládxi'gaca bönachi, ate' ubi'a queëli' tsca naca le

runli'. <sup>24</sup> Ia'zica'li' zóali' yödzo Tiatira, núlöli' biti' nazi' lu ná'ali' lë na' rusédinu, en biti' nazédali' lë na' ta'nná bönachi ni' naca le nayéajni'i idú, pero le nácatë naca xtídza' Satanás, tu' xihui', rea' libí'ili': Biti' usubága'a libí'ili' ia'tú le ral-la' gunli'. <sup>25</sup> Na'a, lë na' chinazí' lu ná'ali', guli'gún chi'i ga idxintë dza huöda'. <sup>26</sup> Bönni' ni' ila'déli'në' lu le raca yödzölió, en ilunë' ca rë'enda' neda' ga údxitë, neda' guna' ga ila'nná bé'enë' bönachi idútë yödzölió. <sup>27</sup> Ca na' budödë' Xuza' Dios yöl-la' unná bé' lu na'a, neda' ca' guna' ga ila'nná bé'enë' yugu' yödzö, ate' gata' lu ná'agaquië' tu xiyaga guié, ate' ulu'zxuzxjë' bönachi na' ca nu ruzxuzxaj zxiga' yö'öna néquini yu. <sup>28</sup> Gu'a ca' le naca ca bölaj hui sila quégaquië'. <sup>29</sup> Nu riyöni ral-la' uzë nagui lë ni rnnë' Dios Bô' Lá'ayi, ru'ilenë' yugu' cö' bönachi quia' neda', Cristo, didza'."

### 3

#### *Didza' gusöl-lë'ë yödzö Sardis*

<sup>1</sup> Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Sardis. Caní uzúaju' lu guichi: Ru'ë didza' Bönni' na' nacuá'len Lë' gadxi bö' na', ate' xzóagacaba' gadxi bölaj bení' lu në'ë ibëla, rnnë': Neda' nöz quézida' le ruá' dö' runli', en nözda' chinati cázali' sal-la' téquiguequi bönachi zóali' nabanli'. <sup>2</sup> Buli'subán ládxi'li'. Guli'gún tsutsu le nacuá'len libí'ili', le chizóa ilátigaca, tu' réquibe'eda' le runli' biti' naca idú tsahui' lahuë' Dios. <sup>3</sup> Guli'tsöjné' na'a xibá na' biyönili' le guzxí' lu ná'ali'. Guli'gún ca rnna xtídzë'ë Dios, en buli'bí'i ládxi'li'. Channö cabí usubán ládxi'li', guída' ga zóali' tsárido'os ca na' ridxinë' tsárido'os gubán, en biti' inözili' bizxi dza na' guída' ga zóali'. <sup>4</sup> Nacuá'len bal-la bönachi libí'ili' lu yödzö Sardis, nupa biti' náacagaca xihui'. Ila'dalen nupa ni neda', náacagaca lari' chiguíchido'os le rulu'i nuhuóacagaca idú tsahui', en náacagaca lesaca' gaca caní quéguequi. <sup>5</sup> Nupa ila'deli' lu le raca yödzölió ugácua' léguequi lari' chiguíchido'os, en biti' usúlua' láguequi chinazúajgaca lu guichi ga nazúajgaca lágaca nupa nadéli'gaca yöl-la' na'bán idú. Sí' lu na'a nupa ni lahuë' Xuza' Dios, enca' lógaquië' gubáz lá'ayi queë'. <sup>6</sup> Nu riyöni ral-la' uzë nagui lë ni rnnë' Dios Bô' Lá'ayi, ru'ilenë' yugu' cö' bönachi quia' neda', Cristo, didza'."

#### *Didza' gusöl-lë'ë yödzö Filadelfia*

<sup>7</sup> Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Filadelfia. Caní uzúaju' lu guichi: Ru'ë didza' Bönni' na' náquië' lá'ayi, en ru'ë didza' idútë li, en dë lu në'ë xzí'ini guié queë' David, bönni' gunná bé'ë. Bönni' na' ru'ë didza' risálajë' ga nu riyaza, ate' cuntu nu gaca usayaj le, en rusayjë' ga nu riyaza, ate' cuntu nu gaca isalaj le. <sup>8</sup> Bönni' ni rnnë': Neda' nöz quézida' le runli'. Nözda' nápalí' láti'do'os yöl-la' huáca, pero runli' ca rnna xtídza'a, en biti' rutuf'ili' rnnali' néquili' quia'. Que lë ni na' nuzóa' loli' tu ga nu tsaz le nayalaj, ate' cuntu nu gaca usayaj le. <sup>9</sup> Buli'yútsöca', ta'dë' bönni' ni' Satanás, tu' xihui', en ta'zí' yë'ë, ta'nnë' náacagaquië' bönachi judío ta'yéaj ládxi'gaca Dios, pero biti' náacagaquië' caní, guna' ga ila'dxinë' loli', en ulu'zechu xzíbigaquië' xini'ali'. Ní'irö iléquibe'enë' nadxí'ida' libí'ili'. <sup>10</sup> Tu' benli' ca rnna xtídza'a, en gulözali' zxön ládxi', gun chi'a libí'ili' dza na' ila'guí'i ila'zaca' yúgu'të bönachi lu yödzölió ni, lë na' gaca para sí' bé' léguequi. <sup>11</sup> ¡sí' guída'! Que lë ni na' guli'gún chi'i le nápalí', para cabí gaca nu gun

ga cabí s'íli' lè na' ral-la' gunna' queéli'. <sup>12</sup> Núlöli' ni' idéla'li' lu le raca yödžölió, neda' guna' ga gácali' tsutsu ca náca gaca ya'zxón, até' sóali' yudo' ga na' zoé' Dios, en catu caz irúajli' ni'. Udá'a libí'ili' ca lè' Dios quia', enca' ca lè yödžö queé' Dios le naca Jerusalén cubi, le huötaj irúaj yehua' yubá lu nē'ē Dios. Lēšca' udá'a libí'ili' La' cubi. <sup>13</sup> Nu riyöni ral-la' uzé nagui lè ni rnnē' Dios Bö' Lá'ayi, ru'ílenē' yugu' cō' bōnachi quia' neda', Cristo, didza'."

*Didza' gusöl-lē'yödžö Laodicea*

<sup>14</sup> Gunné' ca': "Lēšca' caní buzúaj lu guichi didza' ni isöl-lu'u queé' gubáz quia' zóalenē' bōnachi quia' lu yödžö Laodicea. Caní uzúaju' lu guichi: Ru'ē didza' Bōnni' na' zoé' tsaz, Bōnni' runē' ca rnnē', en ru'ē didza' idútē li ca runē' ba nalí, en náquiē' ca' Bōnni' na' gulén lu nē'ē yúgu'tē le benē' Dios. <sup>15</sup> Caní rnnē': Neda' nōz quezida' le runli'. Ca runli' naca ca nisa bití' naca ziaga, tu' cabí rucá'anali' tsaz neda', en bití' naca ca nisa zōgui', tu' cabí dá'ali' neda' idú ládxi'li'. Dxí'arō gaca la' gácali' ca nisa ziaga o ca nisa zōgui'. <sup>16</sup> Na'a, tu' nácali' ca nisa nati yúlasō, en bití' nácali' ca nisa ziaga, en bití' nácali' ca nisa zōgui', chú'una' libí'ili' ca run nu ruhuēbi nisa nati yula na'. <sup>17</sup> Libí'ili' rnnali' rilé'eli' yöl-la' tsahui' queéli', en raca dxí'a queéli', en bití' bi riyadzaj queéli', pero bití' réquibe'eli' le nácali'. ¡Bayechi' nácali'! ¡Nácali' xizí'! ¡Nácali' yechi', en lo chul-la, en ridali' xiguídísō! <sup>18</sup> Que lè ni na', neda' ruzéajni'ida' libí'ili' gá'uli' le naca ca oro lu na'a neda' le nuna' dxí'a lu guí, para gata' yöl-la' tsahui' idú queéli'. Ral-la' gá'uli' ca' lari' chiguichi quia' le gáculi' para igachi' yöl-la' xiguídídō queéli' le run ga nu rutuí'i. Ral-la' gá'uli' ca' quia' le gun ga ulu'huóaca guiōj loli' para gaca ilé'eli' le naca quia'. <sup>19</sup> Neda' ruzeda' bach, en run zí'a yúgu'tē nupa nadxí'ida' channō cabí tun le naca dxí'a. Que lè ni na', buli'b'í' ládxi'li', en guli'gún xichina' idú ládxi'li'. <sup>20</sup> Buli'yútsōca', neda' caz zuína' ga nu riyaza, en rulidza'. Channō nútí'tēs nu yōni chí'a, en isalaj quia', tsázia', en gágulena' nu na', até' nu na' gágulen neda'. <sup>21</sup> Núlöli' idéli'li' lu le raca yödžölió, neda' guna' ga cō'öli' tsōzxón len neda' ga na' rō'a rinná bē'a, ca na' benē' ca' Xuza' quia' neda'. Bidéli'da' neda' lu le guca quia', até' gurō'lena' Xuza' tsōzxón ga na' rō'ē rinná bē'ē. <sup>22</sup> Nu riyöni, ral-la' uzé nagui lè ni rnnē' Dios Bö' Lá'ayi, ru'ílenē' didza' yugu' cō' bōnachi quia' neda', Cristo."

## 4

*Yöl-la' ba ta'gu'ē Dios yehua' yubá*

<sup>1</sup> Gudödi gulaca yugu' lè ni, buyúa', en bilé'eda' tu ga nu riyaza le nayalaj yehua' yubá. Biyōnda' ca' chí'ē bōnni' na' biyōnda' zí'alō, até' bulidza zidzaj ca ribōdxi lúzuba' bōa' bēdxi. Chí'i ni bulidza neda', gunná: "Gudá xitsá'alō ni, até' neda' uluí'ida' li' le run bayudxi ilaca tōdi ni."

<sup>2</sup> La' ní'isō guzóalenē' Dios Bö' Lá'ayi neda', até' bilé'eda' yehua' yubá ni' tu lataj ga Nu rō'ō rinná bē', en bilé'eda' ca' Nu na' rō'ō lataj na'. <sup>3</sup> Rēpi yōsa bení' Nu na' rō'ō lataj na', ca na' rēpi yōsa bení' guiōj jaspe, en guiōj cornalina, yugu' guiōj nazáca'da'. Idú gásibi'ilō lataj na' zoa biguita' le naca lachi ca naca guiōj esmeralda, le répida' yōsa bení'. <sup>4</sup> Idú gásibi'ilō lataj na' nacua' ca' ia'tapa uruá' lataj gapa ta'bō' nupa ta'nná bē', até' yugu' lataj na' rō'ōgaquiē' tapa uru'ē bōnni' gula, nácuagaquiē' lari' chiguíchido'os, en dxíagaca ícjagaquiē' le néquiguequini oro. <sup>5</sup> Ta'rúaj yōsa, en guziú' rinnē' lu lataj lo ga ni' rō'ō Nu na', até' bō zxón ru'u. Lahui' lo

lataj na' tu'zení' gadxi le ta'gú'u bení', le nácagaca gadxi bö' dzágagaca Dios. <sup>6</sup> Ca dödilö lahui lataj ni dë tu ca naca tu nísado' le rëpi yösa bení' ca guiöj jara.

Nacua' tapa nupa nabángaca cuiti lataj na', tsölä'a huéaj, ate' zían guiöj lógaca dxíagaca zaca' cúdzi'löguequi, en láhuilöguequi. <sup>7</sup> Tu nu nutsa' ladaj tapa ni nalá' ca nácaba' bëdxi guíxi'. Nu na' buropi nalá' ca nácaba' bëdxi, ate' nu na' bunni nalá' lahui ca naca lo bönni', ate' nu budapi nalá' ca nácaba' bisia' ruzuba'. <sup>8</sup> Idápatë nupa ni, nacua' xopa xílgaca que queëguequi, ate' idá'alöguequi, en lë'elöguequi xílguequi dxíada'gaca zían guiöj löguequi. Rëla, en te ža bití' ta'cuá' dxisö, ta'nná:

¡Lá'ayi! ¡Lá'ayi! ¡Lá'ayi náquië' Xanru' Dios!

¡Napa cazë' yöl-la' huáca!

¡Guzóa cazë' Lë', en zoa cazë', en chizóa ulë'!

<sup>9</sup> Nupa na' nabángaca ta'gú'u yöl-la' ba Nu na' rö'ö rinná bë', en zóatica'sö nabán. Tun bal Nu na', en të Nu na': "Xclenu'." Bátati'tës tun idapa na' caní, <sup>10</sup> tu'tsaga lógaca tapa uru'ë bönni' gula na' lu yu lahui' lo Nu na', en ta'yéaj ládxi'gaca Nu na' zóatica'sö, en tu'cu'ë le néquiquequini oro dxía ícagaquië' lahui' lo lataj ga ni' rö'ö rinná bë' Nu na', ta'nnë':

<sup>11</sup> ¡Xantu' Dios, nacu' lesaca'

cú'utu' Li' yöl-la' ba, en guntu' Li' bal,

en gata' quiu' yöl-la' unná bë' tu' benu' yúgu'të le dë!

¡Ca rë'ëni quézinu' nacua', en gula'sí lo nacua'!

## 5

*Tu guichi, en Bönni' náquië' Bö'cu' Zxíla'do'*

<sup>1</sup> Ní'irö bilé'eda' tu guichi lu na' ibëla Nu na' rö'ö lataj lo. Guichi na' naca tu guichi nudubi, en dá'gaca didza' lë'elö, en láhuilö. Naguela' guichi na' gadxi le nusáyajgaca le. <sup>2</sup> Bilé'eda'-në' tuë' gubáz lá'ayi lo, ate' bë'ë zidzaj didza', gunné: "¿Nuzxi naca lesaca' uladzu' le naguéla'gaca guichi ni, en usalaj le?"

<sup>3</sup> Cuntu nu guca usalaj guichi na', en bití' guca nu uyú le, calëga nu zoa yehua' yubá, en calëga nu zoa luyú, en calëga nu zoa zxánilö luyú. <sup>4</sup> Ní'irö gurödxá' tu' cabí bidzöli nu naca lesaca' usalaj guichi na', en bití' bidzöli nu naca lesaca' ulaba le, en cuntu nu naca lesaca' uyú le. <sup>5</sup> Ní'irö tuë' bönni' gula ni' gudxë' neda', gunné: "Bití' cödxu'. Bönni' na' náquië' ca bëdxi guíxi', en nabábalenë' xzí'ini xí'sóë' Judá, en náquië' ca' xzí'ini xí'sóë' David, chibidéli'në' lu yúgu'të le raca, en séqui'në' uladzu'ë le naguéla'gaca guichi ni, en usalajë' le."

<sup>6</sup> Ní'irö bilé'eda'-në' Bönni' náquië' Bö'cu' Zxíla'do', zuínë' lahui' lo lataj lo na' zoa gatsaj láhui'lö nupa na' nabángaca, en gatsaj láhui'lë' ca' yugu' bönni' gula na'. Dxië' huë' ca naca que tu bö'cu' zxíla' zoa nu bëti lëba' lahuë' Dios, nacua' gadxi lúzuba', en gadxi guiöj loba', le tu'lu'í ca nácagaca gadxi bö' na' dzágagaca Dios, nasól-lë'ë léguequi idútë yödzölió. <sup>7</sup> Gudödë' Bönni' náquië' Bö'cu' Zxíla'do', en gudélë'ë guichi na' lu na' ibëla Nu na' rö'ö lataj lo na'. <sup>8</sup> Cate' chigudélë'ë guichi na', bulu'zóa zxíbiguequi idapa nupa na' nabángaca, en idapa uru'ë bönni' gula na' lahuë' Bönni' na' náquië' Bö'cu' Zxíla'do'. Tu tuë' bönni' gula na' zöngaquië' le rul-la nazí'i le arpa, en nuá'agaquië' ca' yugu' zxíga'do' néquiquequini oro, yugu' le yúdzugaca yalaj, lë na' rulu'í yöl-la' rulidza Dios quégaca bönachi queë'. <sup>9</sup> Tul-lë' tu le rul-la yöl-la' ba, le naca cubi, le rna caní:

Nacu' lesaca' quél'u guichi na',  
 en uládu'u le naguéla'gaca le,  
 tu' bē'u lataj yugu' bönni' gulútiē' Li',  
 ate' len xichönu' böa'uu' bönachi para ilequi queē' Dios,  
 nupa nácgaca bönachi izá'a nacuá' iduté yödölió,  
 bönachi tu'i yúgu'tē didza' yúbölö,  
 en nabábagaca yúgu'tē yödö,  
 en yúgu'tē luyú nacuá' iduté yödölió.  
<sup>10</sup> Benu' ga nácgacuiē' bönni' ta'nná bē'ē  
 en ga nácgacuiē' bixúz queē' Dios queéru'.  
 Benu' ga ta'nná bē'ē lu yu yödölió.

<sup>11</sup> Ní'irö buyúa', en biyönda' chí'igaquiē' gubáz lá'ayi zían. Zían gáyu'ē,  
 en gáyu'ē nacu'ē. Nacu'ē idú gásibi'lö lataj lo na' tsözxön len nupa na'  
 nabángaca, enca' yugu' bönni' gula na'. <sup>12</sup> Tu'ē zidzaj didza' yúgu'tē',  
 ta'nnē':  
 ¡Bönni' na' náquiē' Bö'cu' Zxíla'do' gulútiē',  
 náquiē' lesaca' gata' yöl-la' unná bē' lu nē'ē,  
 en yöl-la' tsahui', en yöl-la' réajni'i, en yöl-la' huáca!  
 ¡Náquiē' lesaca' gunru'-nē' bal, en tseaj ládxi'ru' Lē',  
 en cú'uru'-nē' yöl-la' ba!

<sup>13</sup> Ní'irö biyönda' tul-la yúgu'tē le benē' Dios yehua' yubá, en lu yu  
 yödölió, en zxánilö luyú, en lu nisado'. Tul-la yúgu'tē le nacuá' yugu' lataj  
 na', ta'nná:  
 ¡Yöl-la' ba Nu na' rö'ö lataj lo,  
 enca' Bönni' na' náquiē' Bö'cu' Zxíla'do'!  
 ¡Gúntica'siru'-nē' bal  
 en cú'utica'siru'-nē' yöl-la' ba,  
 ate' inná bē'tica'sē' Lē'!

<sup>14</sup> Idápatē nupa na' nabángaca ta'nná: “¡Ca' gaca!”

Ní'irö idapa uru'ē bönni' gula na' bulu'tsaga lógaquiē' lu yu, en gula'yéaj  
 ládxi'gaquiē' Nu na' zóatica'sö.

## 6

### *Yugu' le naguéla'gaca guichi*

<sup>1</sup> Ní'irö bilé'eda'-nē' Bönni' náquiē' Bö'cu' Zxíla'do', ate' buládu'ē tu le  
 naguela' guichi na', ate' biyönda' tu nu nutsa' ladaj idapa na' nabángaca,  
 ate' biyön chí'i ca guziú' rinnē, gunná: “¡Gudá uyú!”

<sup>2</sup> Buyúa', en bilé'eda'-ba' tuba' böa' chiguichi, ate' nu na' dxía lēba' zön  
 tu uxiti' yaga. Gulu'ē lē' tu le néquini oro udxié' icjē', ate' birúajē' ca tu nu  
 nácatērö lo para idéli'nē' lu gudil-la.

<sup>3</sup> Cate' buládu'ē le buropi le naguela' guichi na', biyönda' nu buropi na'  
 nabán, ate' gunná: “¡Gudá uyú!”

<sup>4</sup> Ní'irö birúajba' ia'tuba' böa', nácabá' xiná. Bulu'dödē' lu nē'e nu  
 na' dxía lēba' yöl-la' huáca unná bē' tsójtúa yöl-la' riböza dxi'a tsáhui'do'  
 quégaca bönachi, en gun ga iluti luzē'eguequi. Bulu'nödzejē' queē' tu guíē  
 tuchi' zxön.

<sup>5</sup> Cate' buládu'ē le bünni le naguela' guichi na', biyönda' nu bünni na'  
 nabán, ate' gunná: “¡Gudá uyú!”

Buyúa', en bilé'eda'-ba' tuba' böa' gasaj, ate' nu na' dxía lēba' zön tu  
 zxigóns. <sup>6</sup> Biyönda' ru'i didza' tu chí'i gatsaj láchui'lö tapa na' nabángaca,  
 ate' gunná: “Chopa guíē' zxoa' xtila len lazxaj que tu dza huen dxin tu'

gaca gubín, en xopa guié zxoá' cebada len lazraj que tu dza huen dxin, pero biti' gunu' ga yadzaj le naca za, en biti' bi gunu' que xisi uva nal-la."

<sup>7</sup> Cate' buládzu'è le budapi le naguela' guichi na', biyönda' ruí' didza' nu budapi na' nabán, ate' gunná: "¡Gudá uyú!"

<sup>8</sup> Buyúa', en bilé'eda'-ba' tuba' böa' gulaj, ate' nu na' dxía lëba' nazí' le Yöl-la' Guti, ate' zéajlen nu na' nu nazí' le Lataj Chul-la. Bulu'dödë' lu në'e nu na' inná be'e gatsaj tu gatsaj bönachi nacua' yödzölió para guti léguequi len guié tuchi', en len yöl-la' ridún, en len yugu' yödzöhué', en len yugu' böa' guixi' sínia' dzö'öba' luyú.

<sup>9</sup> Cate' buládzu'è le guyu' le naguela' guichi na', bilé'eda' zzan bucugu yehua' yubá ni' yugu' bö' gulaca cazë' bönni' ni' gulútië' légaquië' tu' gulunë' libán que xtídzë'è Dios, en tu' gulunë' ba nalí queë'. <sup>10</sup> Guluí' zidzaj didza' yugu' bö' ni, gula'nná: "¡Xantu' Lá'ayi, runu' ca rnno! ¿Bátaxi caz uchi'a usöröu' queëtu', en uzí' i lëbu' yugu' bönni' nacu'è yödzölió tu' gulútië' netu'?"

<sup>11</sup> Bulu'nödzjë' quéguequi yugu' lari' chiguíchido'os ilácuë', en gulë' léguequi: "Ral-la' uzí' ládxi'li' ia'tú chí'ido'osó, ga idxinrö dza ila'dxín yúgu'të luzá'ali' huen dxin queë' Cristo ni, yugu' bönni' na' ral-la' iluti bönachi légaquië' ca' ca na' bëtigaca libí'ili'."

<sup>12</sup> Cate' buládzu'è le buzxopi le naguela' guichi na', buyúa', en bilé'eda' gudödida' budó' zxu' luyú. Böáca gasaj gubidza, en guca ca tu lari' guitsa' gasaj, ate' böáca beo' xiná ca naca rön. <sup>13</sup> Gula'guínnaj böljaj lúzxiba lu yu, le guca ca raza que yaga higo, cate' ta'guínnaj le ribía cate' rutá le bö' budunu'. <sup>14</sup> Gudödi que lúzxiba, ate' guca que ca raza que tu guichi cate' nu rutubi le. Bulu'tsá' xilátjagaca yúgu'të guí'ado', enca' yúgu'të gapa zoa luyú bidxi lu nísado'. <sup>15</sup> Ní'irö yugu' bönni' ta'nná bë'è luyú, en yugu' bönni' lo, en yugu' bönni' ta'lé'enë' yöl-la' tsahui', en yugu' bönni' ta'nná bë'enë' bönni' röjáquië' gudil-la, en yugu' bönni' dë lu ná'agaquië', en yúgu'të nupa nadó'ogaca, en yúgu'të nupa biti' nadó'ogaca bulu'cachi' lógaquië' gapa naca zzan bulóaj, en gapa naca lë'e guió'j lu guí'ado'. <sup>16</sup> Gulë' yugu' guí'ado' na', en yugu' lë'e guió'j na': "Guli'dubága' netu', en buli'cachi' netu', para cabí ilé'e Nu na' rö'ö lataj lo ni' netu', en para cabí ideli' yöl-la' rilé queë' Bönni' na' náquië' Bö'cu' Zxíla'do' netu'. <sup>17</sup> Chibidxín dza ulu'í lahui yöl-la' rilé quégaquië', ate' ¿nuzxi caz sequi' guá' ilén le?"

## 7

### *Tu gayuá' yu' tapa-un milë' bönni'*

<sup>1</sup> Gudödi gulaca yugu' lë ni bilé'eda' tapa gubáz lá'ayi zuíguequinë' idapa la'a yödzölió. Tu'záguë'è xinözgaca idapa bö' recja tsólá'a huéaj luyú, para cabí tsecja bö' luyú yödzölió, en para cabí tsecja lu nísado', en para cabí utá yaga. <sup>2</sup> Bilé'eda' ca' ia'túë' gubáz lá'ayi zë'è rirúajë' ga rilén gubidza. Nu'è tu le udë'è nupa náca'gaca queë' Dios ban le gaca bë' léguequi. Bë'è zidzaj didza', en bulidzë' idapë' gubáz lá'ayi ni' nadödi lu ná'agaquië' yöl-la' huáca unná bë' ilún dítjanë' luyú, en nísado'. <sup>3</sup> Gudxë' légaquië': "Biti' gun dítjali' luyú, en nísado', en yugu' yaga cate' udá'arötu' tu le gaca bë' ra' xigágaquië' bönni' huen dxin queë' Dios queëru'."

<sup>4</sup> Biyönda' tsa náca'gaquië' bönni' da' légaquië' lë na' naca bë'. Náca'gaquië' idú tu gayuá' yu' tapa-un milë' ladaj yúgu'të cö' zxi'ini xi'sóë' Israel. <sup>5</sup> Yugu' bönni' na' da' légaquië' lë na' naca bë' náca'gaquië': Chinnu milë' di'a dza queë' Judá.



Chinnu milë' di'a dza queë' Rubén.

Chinnu milë' di'a dza queë' Gad.

<sup>6</sup> Chinnu milë' di'a dza queë' Aser.

Chinnu milë' di'a dza queë' Neftalí.

Chinnu milë' di'a dza queë' Manasés.

<sup>7</sup> Chinnu milë' di'a dza queë' Leví.

Chinnu milë' di'a dza queë' Isacar.

<sup>8</sup> Chinnu milë' di'a dza queë' Zabulón.

Chinnu milë' di'a dza queë' José.

Chinnu milë' di'a dza queë' Benjamín.

*Bönachi guizxi yu nácugaca lari' chiguíchido'os*

<sup>9</sup> Gudödi guca lë ni buyúa', en bilé'egacada' bönachi zían, cuntu nu gaca ulaba léguequi. Nabábagaquië' yúgu'të yödzo tu'i didza' yúbölö iduté yödzo'lió. Zuíguequinë' ca dódilö lahui lataj lo, ga na' rö'ë ca' Bönni' na' náquië' Bö'cu' Zxíla'do', en nácugaquië' lari' chiguíchido'os, en zöngaquië' zin. <sup>10</sup> Tu'ë zidzaj didza' yúgu'të, ta'nnë':

¡Yöl-la' rusölá za' lu në'ë Dios queëru', rö'ë lataj lo ni,

en za' ca' lu në'ë Bönni' na' náquië' Bö'cu' Zxíla'do'!

<sup>11</sup> Zuíguequinë' yúgu'të gubáz lá'ayi idú gásibi'ilö lataj lo na', enca' idú gásibi'ilö ga nacu'ë bönni' gula, enca' idú gásibi'ilö ga nacua' idapa na' nabángaca, ate' tu'tsaga lógaquië' lu yu ca dódilö lahui lataj lo na', en ta'yéaj ládxi'gaquië' Dios, <sup>12</sup> ta'nnë':

¡Ca' gaca! ¡Yöl-la' ba Li', Dios queëtu'!

¡Napu' yöl-la' zxon, en yöl-la' réajni'!

¡Rëtu' Li': "Xclenu", en runtu' Li' bal!

¡Napu' yöl-la' unná bë', en yöl-la' huáca!

¡Gácatíca'só caní quiu', Dios queëtu'!

¡Ca' gaca!

<sup>13</sup> Ní'irö gunábinë' neda' tuë' bönni' gula na', gunné': "¡Nupxi na' nácugaca lari' chiguíchido'os, en gapxi bönni' légaquië'?"

<sup>14</sup> Neda' gudxa' lë': "Xan, lí' nöz quézinu'."

Lë' gudxë' neda': "Nupa ni gula'gu'i gula'záca'da'. Gula'guíbë' lari' nácugaquië', en bulu'ún léguequi chiguíchido'os len xichönë' Bönni' na' náquië' Bö'cu' Zxíla'do'. <sup>15</sup> Que lë ni na' nacu'ë ca dódilö lahui lataj lo ga rö'ë rinná bë'ë Dios, en tunë' dxin lahuë' Lë' rëla, en të dza lu yudo' queë'. Nu na' rö'ö lataj lo ni gun chi'i légaquië' tu' zóaléntica'sö légaquië'. <sup>16</sup> Bítí'rö ila'dunë', en bítí'rö ila'bidxë' nisa, en bítí'rö ila'yéguinë' gubidza, en bítí'rö iléquinë' xilá <sup>17</sup> tu' uyúë' Bönni' na' náquië' Bö'cu' Zxíla'do' légaquië' ca nu uyú bö'cu' zxíla'. Zoë' gatsaj lálhui'lö lataj lo na'. Ichë'ë légaquië' gapa ralaj nisa le ru'i yöl-la' na'bán, ate' Dios uzxië' lógaquië' nisa ta'bödxë'."

## 8

*Le igadxi le naguela' guichi*

<sup>1</sup> Cate' buládu'ë le igadxi le naguela' guichi na', gurö'ö dxi yehua' yubá idú gatsaj hora. <sup>2</sup> Ní'irö bilé'egacada'-në' gadxi gubáz lá'ayi na' zuíguequinë' lahuë' Dios, ate' bulu'dödë' lu ná'agaquië' gadxi lúzuba' böa' bëdxi. <sup>3</sup> Ní'irö bidë' ia'tué' gubáz lá'ayi, nu'ë tu' zxíga'do' néquini oro, en guzuinë' ra' bucugu yehua' yubá ni'. Gulú'udë'ë yalaj lu në'ë para ugutsë' le len yöl-la' rulidza Dios le gulún yúgu'të bönachi queë' Cristo, en uzégui'ë

le lu bucugu na' néquini oro, le zoa lahui lo lataj lo na'. <sup>4</sup> Gurén dzön que yalaj na' zoa lu në'ë gubáz lá'ayi na', en guca tuz len yöl-la' rulidza Dios le gulún bönachi queë' Cristo, ate' bidxín ga na' rō'ë Dios. <sup>5</sup> Ní'irō gubáz lá'ayi na' bulifé' zxíga' do' na' len bo' yalaj dxía lu bucugu na', ate' gurú'uné' le luyú. Gunné guziú', ate' bö zidzaj biyön. Guyëpi yösa, en gudödi budó' zxu'.

*Tu'cödxë' lúzuba' böa' bëdxi*

<sup>6</sup> Ní'irō igádxité' gubáz lá'ayi na' zongaquië' gadxi lúzuba' böa' bëdxi na' gula'cu'ë sina' ulu'cödxë' léguequi.

<sup>7</sup> Bucödxë' gubáz lá'ayi zí'alō lúzuba' böa' bëdxi, ate' gurō'ō guiōj bögui' yöla sunna, en gui' nutsí'i rön, ate' bulu'huöxaj luyú. Guyegui tu cō' tsa tu tsonna cō' le dë luyú ni, ate' guyegui ca' tu cō' tsa tu tsonna cō' yaga. Guyegui ca' yúgu'të guixi' ya'a.

<sup>8</sup> Bucödxë' gubáz lá'ayi buropi na' lúzuba' böa' bëdxi, ate' gubixi tu le naca ca tu gu'a zxön régui lu nísado', ate' ia'látí'do'os ca gatsaj tu gatsaj nísado' na' böáca rön. <sup>9</sup> Guti tu cō' tsa tu tsonna cō' le nabángaca dzō'ō lu nisa zxön na', ate' guca ditaj tu cō' tsa tu tsonna cō' le ta'dödi lálhui'lō nisa na'.

<sup>10</sup> Bucödxë' gubáz lá'ayi bunny lúzuba' böa' bëdxi, ate' böxaj tu böljaj lúzxiba, le régui ca tu gu' yöri gapa dë nisa yegu, enca' gapa ralaj nisa, ate' guca caní que ia'látí'do'os ca gatsaj tu gatsaj nisa na' rō'ō luyú. <sup>11</sup> Böljaj ni lëba' Ajenjo, le naca tu le silá', ate' böáca silá' ia'látí'do'os ca gatsaj tu gatsaj nisa gapa na' dë nisa, en guca ca naca le silá' na', ate' gulati bönachi zían ni'a que nisa na' böáca silá'.

<sup>12</sup> Bucödxë' gubáz lá'ayi budapi lúzuba' böa' bëdxi, ate' böáca chul-la ia'látí'do'os ca gatsaj tu gatsaj gubidza, en lësca' caní guca que beo', ate' böáca chul-la tu cō' tsa tu tsonna cō' böljaj. Caní guca, bití' buzení' gubidza ia'látí'do'os ca gatsaj tu gatsaj dza, en bití' bulu'zení' böljaj, en beo' ia'látí'do'os ca gatsaj tu gatsaj rëla.

<sup>13</sup> Ní'irō buyúa', en biyönda' ru'ë zidzaj didza' tuë' gubáz lá'ayi ridödë' gatsaj lálhui'lō lúzxiba, en rnnë': "¡Bica' bayechi' libí'ili'! ¡Bica' bayechi' libí'ili'! ¡Bica' bayechi' libí'ili' zóali' luyú ni cate' ulu'cödxë' ia'tsonné' gubáz lá'ayi na' lúzuba' böa' bëdxi!"

## 9

<sup>1</sup> Bucödxë' gubáz lá'ayi guyu' lúzuba' böa' bëdxi, ate' bilé'eda' nu naca ca tu böljaj lúzxiba böxaj luyú, ate' bulu'nödzjé' nu na' zxi'ini guië que lataj chul-la. <sup>2</sup> Gusaljé' lataj chul-la na', ate' gurén dzön que lataj chul-la, le guca ca dzön rirúaj ga tu'zégui'ë bulá'do', ate' gula'chul-la gubidza, en lúzxiba ni'a que dzön na'. <sup>3</sup> Lu dzön na' bila'rúajba' böchi'zu, yugu' le gula'zxóasiba' luyú, ate' Dios bë'ë légacaba' lataj iládu'ba' bönachi ca tunba' xöjñō' dzō'öba' luyú. <sup>4</sup> Gunná bé'enë' légacaba' bití' ilún dítjaba' guixi' rō'ō luyú, en bití' ilún dítjaba' yugu' le naca ya'a, en calëga yugu' yaga, pero gácasō iládu'ba' bönachi na' bití' da' lë na' naca bë' nu nequi queë' Dios ra' xigágaquië'. <sup>5</sup> Bití' bë'ë légacaba' lataj ilútiba' légaquië', pero ulu'saca' zí'isiba' légaquië' idú ca gayu' beo'. Riláda' ga tádu'ba' ca na' rilá ga rádu'ba' xöjñō'. <sup>6</sup> Yugu' dza na' ilë'ënë' yugu' bönni' iluti cuíngaqië', pero bití' ila'zégui'në'. Ilë'ëninë' ilátíë', pero ucuíta cuini yöl-la' guti.

<sup>7</sup> Nalá'gacaba' böchi'zu na' ca nácagacaba' böa' nácugacaba' le néquiguequini guië, para tsöjácaba' gudil-la. Dxíagaca ícjagacaba' le nácagaca

ca tu le néquini oro. Naca lógacaba' ca naca lógaca bönachi. <sup>8</sup> Naca guitsa' ícjagacaba' ca naca guitsa' ícjanu nigula. Nácagaca láyi'gacaba' ca nácagaca láyi'ba' bēdxi guixi'. <sup>9</sup> Nácagaca luchú'ugacaba' le néquini guié. Ta'gú'u bō xiligacaba' ca na' ta'gú'u bō carreta ná'ayōjgacaba' bōa' ta'xiti'ba' lu gudilla. <sup>10</sup> Nácagaca xibángacaba' ca naca xibángacaba' xōjnō', zoa lí'igacaba'. Lu xibángacaba' na' zoa le tu'dí'iniba', para ilunba' zi' bönachi idú ca gayu' beo'. <sup>11</sup> Zoa nu rinná be'e légacaba', nu na' naca gubáz xihui' que lataj chul-la. Gubáz ni nazí'i le lu didza' hebreo: Abadón, le rnna lu didza' griego: Apolión, en lu didza' xidza': Nu Rusuniti.

<sup>12</sup> Chigudōdi tu le rusuniti bönachi, le za' zí'alō, pero zá'gaca ia'chopa le ulu'suniti bönachi.

<sup>13</sup> Bucōdxē' gubáz lá'ayi buzxopi lúzuba' bōa' bēdxi, ate' biyōnda' tu chí'i ruí'i didza' gatsaj láhui'lō tapa le nácagaca ca lúzuba' bēdxi dá'gaca tapa squin bucugu na' néquini oro, le rō' lahuē' Dios. <sup>14</sup> Chí'i ni ruí'ilen didza' gubáz lá'ayi buzxopi na' si' bucōdxē' lúzuba' bōa' bēdxi, en rnna: "Busedxi idápatē' gubáz xihui' na' nága'gaca ra' yegu Eufrates."

<sup>15</sup> Ní'irō bulu'sedxē' tapa gubáz xihui' na', chinucōzē' Dios léguequi para la' ná'asō, le naca dza na', en beo' na', en izi na', para ilútigaca tu cō' tsa tu tsonna cō' bönachi nacua' yōdzōlió. <sup>16</sup> Biyōnda' tsca nácagaquiē' bōnni' rōjāquiē' gudil-la dxíagaquiē'-ba' bōa', en dzágagaquiē' tapa gubáz xihui' na'. Nácagaquiē' idú chopa gayuá' mil milē'.

<sup>17</sup> Bilé'egacada'-ba' bōa' na' ca tu lu bixín, ate' nupa ta'bía légacaba' nacu luchú'uguequi le naca guí'do'os, en ya'a ca lúzxiba, en gulaj. Nácagaca ícjagacaba' bōa' na' ca ícjaba' bēdxi guixi', ate' lu ruá'agacaba' ta'rúaj guí', en dzōn, en tu le ruzégui'da', nazí'i le azufre. <sup>18</sup> Yugu' lē na' ta'rúaj ruá'agacaba' bētigaca tu cō' tsa tu tsonna cō' bönachi nacua' luyú, lē na' nácagaca guí', en dzōn, en lē na' ruzégui'da'. <sup>19</sup> Yugu' le tu'dí'iniba' bōa' na' ta'rúaj ruá'agacaba', en dzō'ō lu xibángacaba', tu' nácagaca xibángacaba' ca yugu' bēla zoa ícjagacaba' le tu'dí'iniba'.

<sup>20</sup> Ia'zica'rō bönachi, nupa bití' gulati lu chopa ni tu'suniti, bití' bulu'bí'i lādxi'guequi para cabirō ilúngaca ca na' túngaca, en bití' bulu'sán ta'yéaj lādxi'guequi yugu' bō' xihui', en yugu' budó' guiōj budó' yaga, yugu' budó' na' bití' ta'lé'e, en bití' ta'yōni, en bití' gaca sá'gaca. <sup>21</sup> Bití' bulu'bí'i lādxi'guequi para cabirō iluti bönachi, en calēga para cabirō ilúngaca yōl-la' gudzá' quéguequi, en le ruá' dō' túngaca, en yōl-la' ribán quéguequi.

## 10

### *Gubáz lá'ayi, nuá' lu nē'ē tu guíchido'*

<sup>1</sup> Ní'irō bilé'eda'-nē' ia'tué' gubáz lá'ayi nál-la, bōtjē' birúajē' yehua' yubá, nácuē' bōaj lúzxiba, en zoa ca tu biguita' ícjalē'. Rēpi yōsa bení' lahuē' ca run gubidza, ate' nácagaca ni'ē ca ya'zxōn ta'yegui. <sup>2</sup> Zoa lu nē'ē tu guíchido' nayalaj, ate' tu ni'ē ibēla nulibē' lu nísado', en ia'tú ni'ē yōgōla nulibē' luyú bidxi. <sup>3</sup> Ní'irō bē'ē zidzaj didza', ate' biyōn chí'ē ca riyōn cate' ribōdxi'aba' bēdxi guixi', en cate' budxi bē'ē zidzaj didza' na', bila'yōni chí'igaca gadxi guziú'. <sup>4</sup> Cate' budxi bila'yōni chí'igaca guziú' na', neda' si' uzúaja' lu guichi, pero biyōnda' nu ruí'i didza' yehua' yubá, rē neda': "Bucáchi'sō didza' ni gulufí' gadxi guziú' na'. Bití' uzúaju' didza' na' lu guichi."

<sup>5</sup> Ní'irō gubáz lá'ayi na' bilé'eda'-nē' zuínē' lu nísado', en luyú bidxi, guchisa nē'ē ibēla zaca' lúzxibalō, <sup>6</sup> ate' ben tsutsu xtídzē'ē ni'a que Nu na'

zoa caz, Nu na' ben yehua' yubá, en le nacuá' ni', enca' yödžölió, en le nacuá' ni', enca' nísado', en le nacuá' ni', ate' gunné': "¡Bíti'rö tse! <sup>7</sup> Cate' ucödxé' gubáz lá'ayi igadxi lúzuba' böa' bédxi, usudxiné' Dios le nagachi' queé', lé na' buluf'iné' yugu' huen dxin queé', bönni' ni' gulu'è didza' uláz queé'."

<sup>8</sup> Ní'irö chi'i na' biyönda' rirúaj yehua' yubá bē'len neda' didza' leyúbölö. Gunná: "Guyéaj, yöjxí' guíchido' nayalaj na' zöné' gubáz lá'ayi na' nulibé' lu nísado', en luyú bidxi."

<sup>9</sup> Guyija' ga na' zoé' gubáz lá'ayi na', en gunábida'-nē' gunné' guíchido' na' quia'. Gubáz lá'ayi na' gudxé' neda', gunné': "¡Guzxi', gudagu! Lu ru'u gaca zxixi ca naca bidxína'do' queéba' buz, pero lé'u huóaca silá'."

<sup>10</sup> Guzxi'a guíchido' na' zöné', en gudahua' le. Lu ruá'a guca zxixi ca naca bidxína'do' na', pero cate' budxi gudahua' le, böáca silá' lé'a. <sup>11</sup> Ní'irö gudxé' neda': "Ral-la' gu'u didza' leyúbölö uláz queé' Dios lógaca zían cö' bönachi izá'a, en gapa nacuá' yúgu'té yödžö, en gapa tuí' zían didza' yúbölö, en lógaca zían bönni' unná bē'."

## 11

### *Chopé' bönni' tuné' ba nalí*

<sup>1</sup> Ní'irö bidxín nu benna tu gui quia' le naca ca tu yaga ribixi, en gudxi neda': "Guyasa, en burixi yudo' queé' Dios. Burixi ca' bucugu lá'ayi que, en bulaba nupa nacuá' ni' ta'yéaj ládxi'gaca Dios. <sup>2</sup> Bucá'ana ca' lö'a que yudo' na' dē nílö, en bití' urixu' le, tu' nadödi lu ná'agaca bönachi izá'a, ate' ulu'libi ulu'léaj yödžö lá'ayi na' idú ca chop-a-un beo'."

<sup>3</sup> Gudxé' ca' neda': "Isól-la'a chopé' bönni' iluné' ba nalí quia', ate' ilu'è didza' uláz quia' idú ca chinnu gayuá' yu' tsónnalalaj dza, nácugaquié' lari' le naca bödzádzado'." <sup>4</sup> Chopé' bönni' ni tuné' ba nalí, nácagaquié' chop-a yaga olivo na' nazúaj lu guíchi lá'ayi ca naca quégaquié', en nácagaquié' ca' chop-a le nuá'gaca guí' na' nacuá' lahué' Dios, Xani yödžölió. <sup>5</sup> Channö gué'eni nu guá' dö' quégaquié', irúaj guí' ruá'agaquié' le usuniti nu na' ré'eni guá' dö' quégaquié', en guti nu na', enca' nupa ta'dá'baga' légaquié'. <sup>6</sup> Chopé' ni dē lu ná'agaquié' ulu'zágué'è xinöza nisa guió'j lúzhiba, para cabí galaj guió'j tsa dza na' ral-la' ilu'è didza' uláz queé' Dios, ate' dē lu ná'agaquié' ca' iluné' ga huóaca nisa rön, en iluné' ga gatsaj yödžöhué' yödžölió. Iluné' caní bálati'tés luzuí ilé'enné'. <sup>7</sup> Cate' údxi iluné' ba nalí, irúajba' böa' sínia' lataj chul-la, en tíl-lalenba' légaquié', en ucúl-laba' légaquié', en gútiba' légaquié'. <sup>8</sup> Le gulaca cazé' ila'túlusó ca' la' nöza lu yödžö zxön, ga ni' gudé'è ca' Xanru' lē'e yaga cruz, en ca rucúdzuru' didza', nazí'i le ca' Sodoma, enca' Egipto. <sup>9</sup> Idú ca tsonna dza yu' gatsaj bönachi yúgu'té yödžö, en yúgu'té bönachi izá'a, en bönachi tuí' zían didza' yúbölö, en bönachi yúgu'té luyú, ila'lé'eni le gulaca cazé', en bití' iluí' lataj nu ucache' légaquié' yeru ba. <sup>10</sup> Ulu'dzėjade'e nupa nacuá' yödžölió tu' gulatié', ate' lu yöl-la' rudzeja quéguequi ila'söl-la' le ulu'nödzej quégaca luzé'eguequi, tu' bulu'saca' zi'è chopé' ni gulu'è didza' uláz queé' Dios bönachi nacuá' yödžölió.

<sup>11</sup> Ní'irö cate' chibizá'a tsonna dza yu' gatsaj na', Dios busubané' légaquié', ate' gula'yasé' gulazuíné', ate' guladxi gula'džöbi yúgu'té nupa bila'lé'e légaquié'. <sup>12</sup> Ní'irö bē' zidzaj didza' tu chi'i yehua' yubá, en gudxi légaquié': "Guli'cuén ni."

Gula'benë' lu böaj lúzxiba zaca' yehua' yubálo, ate' nupa na' gula'dá'baga' légaquië' bila'lé'e légaquië'. <sup>13</sup> La' ní'so gudödida' budó' xzu', ate' biguinnaj tu cö' tsa tu chi cö' yugu' yu'u dzö'ö lu yödzo na', ate' lu budó' xzu' na', gulati tsónnalalaj yu' chi gayuá' bönachi. Guladxi gula'dzöbi nupa ni' nagá'anagaca, ate' gula'gú'u yöl-la' ba Dios zoë' yehua' yubá.

<sup>14</sup> Chigudödi le buropi le rusuniti bönachi, ate' chizóa idxín le bunni le usuniti léguequi.

*Rucödxë' gubáz lá'ayi igadxi lúzuba' böa' bëdxi*

<sup>15</sup> Bucödxë' gubáz lá'ayi igadxi lúzuba' böa' bëdxi, ate' guluf'i zidzaj didza' yugu' chi'i yehua' yubá, ta'nná:

Gapa ta'nná bë' bönachi yödzölió  
nadödigaca lu në'ë Xanru' Dios,  
en lu në'ë Cristo.

Lë' inná bé'tica'së.

<sup>16</sup> Ní'irö idapa uru'ë bönni' gula na' rö'ögaquië' gapa na' ta'nná bë'ë lahuë' Dios, bulu'tsaga lógaquië' lu yu, en ta'yéaj ládxi'gaquië' Dios.

<sup>17</sup> Ta'nnë':

¡Xantu' Dios, napa cazu' yöl-la' huáca!

¡Guzóa cazu', en zoa cazu', en ral-la' guída cazu'!

¡Xclenu', tu' chibugunu' dxin yöl-la' huáca zxon quiu',

en risí lo' rinná bë'u!

<sup>18</sup> ¡Gula'lé bönachi yugu' yödzö

pero chibidxín dza gunu' léguequi xíguia'!

¡Naca dza uchi'a usöröu' nupa chinátigaca!

¡Ubi'u quégaquië' huen dxin quiu',

yugu' bönni' gulu'ë didza' uláz quiu',

nupa néquiguequi quez quiu', en gulún bal Lo',

nupa náacagaca cá'asö, en nupa náacagaca lo!

¡Chibidxín dza usunítu' nupa bulu'suniti yödzölió!

<sup>19</sup> Ní'irö gualaj yudo' queë' Dios rö'ö yehua' yubá, ate' bilá' lahui gu'ína lá'ayi ga yu'u didza' rucá'ana tsahui' le nunë' Dios. Guyëpi yösa, en gulú'u bö zidzaj, en gunnë' guziú' luyú. Gudödi budó' xzu', en gurö'ö guiöj bögui' yöla sunna.

## 12

*Tunu nigula, en tuba' bëla zxon xitsini'*

<sup>1</sup> Ní'irö bilá' lahui yehua' yubá tu le naca bë'da', buluf'i lonu tu nigula nácunu le naca ca gubidza, en zoa zxan ní'anu beo'. Dxía ícjanu tu le néquini oro ga dxíagacaba' chinnu böljaj bení'. <sup>2</sup> Nigula ni chizóa soa bí'ido' queënu, en ribödxinu tu' rúdia' lé'ënu. Rigu'í rizáca'nu ruzóanu bí'ido' queënu. <sup>3</sup> Ní'irö ia'tú le naca bë' bilá' lahui yehua' yubá. Buluf'i loba' tuba' bëla zxon xitsini'. Nácaba' xiná gui'is, ate' dxíagaca gadxi ícjaba', en chi lúzuba', ate' dxía tu le néquini oro tu tu ícjaba' na'. <sup>4</sup> Len xibanba' gú'uyöjba' tu cö' tsa tu tsonna cö' böljaj lúzxiba, en gurú'unaba' légacaba' luyú. Guzuíba' bëla zxon xitsini' na' lonu nigula na' chizóa sóabi bí'ido' queënu. Zóaba' sina' gáguba'-bi' bí'ido' queënu na' ca gáljabi' na'. <sup>5</sup> Buzóanu-bi' tubi' bi'i bönni'do' ral-la' inná bé'ebi' yúgu'të yödzö len tu xiyaga guië. La' bucuítatë'ë-bi' Dios bí'ido' queënu na', en buchisë'-bi' ga ni' zoa cazë' Lë', rö'ë lataj lo ga na' rinná bë'ë. <sup>6</sup> Buzxúnnajnu nigula na',

zéajnu lu lataj cá'asö, ga ni' chinupé'ë Dios lataj queënu. Ulu'gahuë'-nu ni' idú ca chinnu gayuá' yu' tsónnalalaj dza.

<sup>7</sup> Gudödi gulaca lë ni, gúcada' gudil-la yehua' yubá. Gubáz lá'ayi lo lë' Miguel, en yugu' gubáz lá'ayi dá'gaquié' lë' gula'díl-lalenë'-ba' bëla zxön xitsiní' na'. Gula'díl-la bëla zxön na', en yugu' gubáz xihui' dá'gaca lëba' <sup>8</sup>pero biti' bila'deli' lu gudil-la na'. Que lë ni na' bíti'rö bidzöli xilátjagaca yehua' yubá. <sup>9</sup> Caní guca, gula'rú'unë'-ba' bëla zxön xitsiní' na' ní'lö. Nácaba' bëla na' zóaba' dza ni'te, lëba' tu' xihui'. Gula'rú'unë' tu' xihui' yödzölió, dzágagaca le gubáz xihui' na' dá'gaca le.

<sup>10</sup> Ní'irö biyönda' tu chi'i ruí'i zidzaj didza' yehua' yubá, rnna: "Na'a chibidxín dza nulu'ë lahui yöl-la' rusöla nunë' Dios, en yöl-la' huáca queë', en le rinná bë'ë, enca' le rinná bë'ë Cristo, tu' chigula'rú'unë' ní'lö nu na' buzegui yugu' böchi' luzá'aru' didza'. Rëla, en të dza buzegui légaquié' didza' lahuë' Dios queëru'. <sup>11</sup> Yugu' böchi' luzá'aru' ni bulu'cul-lë' nu na', tu' bulu'gunë' dxin xichönë' Bönni' na' náquié' Bö'cu' Zxíla'do' queë' Dios, en tu' bulu'gunë' dxin didza' na' gulunë' ba nalí queë'. Biti' guluí'i ládxi'gaquié' yöl-la' na'bán quegaquié', pero gulátie'. <sup>12</sup> Que lë ni na' gaca yöl-la' rudzeja yehua' yubá. ¡Bulí'dzeja libí'ili', zóali' ni'! ¡Bica' bayechi' libí'ili' zóali' yödzölió, en lu nísado', tu' chibötaj tu' xihui', en bidxín ga zóali'! Riléde'e tu' xihui' na' tu' chiréquite'e ia'tú chí'isö dë' lataj que."

<sup>13</sup> Cate' gúquite'eba' bëla zxön xitsiní' na' chigula'rú'unë'-ba' luyú, ní'irö yöjsóa régu'ba'-nu nigula na' buzóanu bi'i bönni'do' na' queënu. <sup>14</sup> Ní'irö Dios bë'ë-nu nigula na' chopa xíliba' bisiá' nácagaca zxön para gaca sunu, en icuítanu ga na' zóaba' bëla zxön xitsiní' na', en idxinnu xilátjanu lu lataj cá'asö. Ní' ulu'gahuë'-nu idú tsonna iz yu' gatsaj. <sup>15</sup> Bëla zxön xitsiní' na' gúbaba' nisa zile zaca' cúdzulönu, le guca ca tu nisa yegu, en gú'uniba' gua'të nigula na'. <sup>16</sup> Ní'irö luyú gúcalen nigula na'. Gyalaj luyú na', en güi' nisa yegu na' gúbaba' bëla zxön xitsiní' na'. <sup>17</sup> Ní'irö bëla zxön xitsiní' na' guléde'eba'-nu nigula na', ate' guyéajba' yöjtíl-lalenba' nupa nagá'anagaca queënu di'a dza queënu, nupa na' tun ca rnna le gunná bë'ë Dios, en nazi' lu në'eguequi le nunë' Jesucristo ba nalí.

## 13

### *Chópaba' böa' sínia'*

<sup>1</sup> Guzuída' lu yuzxi ra' nísado', en bilé'eda' ribenba' rirúajba' lu nísado' tuba' böa' sínia' dxíagaca gadxi ícjaba', en chi lúzuba'. Dxiagaca lúzuba' chi le néquini oro, ate' láhuigaca ícjaba' da' tu la le naca xihui' le cabí rilé'e Dios dxi'a. <sup>2</sup> Böa' sínia' na' bilé'eda'-ba' riná'aba' ca nácaba' tu bëdxito', nacuá' ní'aba' ca nácagaca ní'aba' oso, ate' ruá'aba' naca ca naca ruá'aba' bëdxi guixi'. Bëla zxön xitsiní' na' budödiba' lu na'aba' böa' sínia' ni yöl-la' huáca queéba', enca' xilátjaba' ga rinná bë'ëba', en yöl-la' unná bë'ë zxön queéba'. <sup>3</sup> Dxiá huë' tu ícjaba' böa' sínia' na', le naca le guti lëba', pero buniti huë' na', ate' bulu'bani yúgu'të bönachi yödzölió, en yöjdá'gaca böa' sínia' na'. <sup>4</sup> Gula'yéaj ládxi'gaquié'-ba' bëla zxön xitsiní' na', tu' budödiba' yöl-la' unná bë'ë queéba' lu ná'aba' böa' sínia' na'. Gula'yéaj ládxi'gaquié'-ba' böa' sínia' na', en gula'nnë': "¿Nuzxi caz naca zxön ca naca zxön böa' sínia' na', en nuzxi caz sequi' tíl-lalen lëba'?"

<sup>5</sup> Guta' lu ná'aba' böa' sínia' na' bë'ëba' didza' ba zxön, en didza' xihui' le rinnëba' queë' Dios. Idú ca chopa-un beo' guta' lu ná'aba' yöl-la' unná bë'. <sup>6</sup> Gusíloba' rinnëba' queë' Dios, en rinnë xihui'ba' que Lë' Dios, en que

lataj lá'ayi queé', en quégaca nupa nacuá' yehua' yubá. <sup>7</sup> Guta' lu ná'aba' gudíl-lalenba' nupa néquiguequi quez queé' Dios, en bucúl-laba' légaquié'. Guta' ca' lu ná'aba' gunná bé'eba' yúgu'tè bönachi izá'a, bönachi yúgu'tè yödzo, en bönachi tuí'i yúgu'tè didza' yúbölö, en bönachi idútè yödzülió. <sup>8</sup> Yúgu'tè bönachi nacuá' yödzülió gula'yéaj ládxi'gaca böa' sínia' na', nupa na' bití' nazúajgaca láguequi lu guichi que yöl-la' na'bán, guichi na' buzúajé' Bönni' na' náquié' Bö'cu' Zxíla'do' queé' Dios cate' si' guta' yödzülió. Buzóa cazé' Dios gútié' Bönni' na' ni'a quégaca bönachi queé'.

<sup>9</sup> Channö nu riyöni, ral-la' uzé' nagui. <sup>10</sup> Nupa nucu'è Dios idzúngaca, ral-la' idzúngaca, ate' nupa nucu'è Dios para nu guti léguequi len guíé' tuchi', len guíé' tuchi' ilátigaca. Que lè ni na', ral-la' ila'böza zxon ladxí' nupa néquiguequi queé' Dios, en ta'yéajlè' Lè'.

<sup>11</sup> Gudödi na' bilé'eda'-ba' ia'tuba' böa' sínia' gurenba' birúajba' lu yu. Dxiágaca chopá lúzuba' ca naca lúzuba' bö'cu' zxíla', en ruí'iba' didza' ca na' ruí'iba' didza' bëla zxon xitsiní' na'. <sup>12</sup> Dè lu ná'aba' böa' sínia' ni yúgu'tè yöl-la' unná bë' queé'ba' böa' sínia' bidxinba' zí'aló, cate' dzágaba' lèba'. Runba' böa' sínia' buropi ni ga ta'yéaj ládxi'gaca yúgu'tè bönachi nacuá' yödzülió böa' sínia' zí'aló na', böa' na' buniti hué' le guti lèba'. <sup>13</sup> Böa' buropi na' runba' ca' le nácagaca bë' ga ridxintè runba' ga ruhuóxaj guí' le za' lúzhiba, en ruhuóxaj luyú lógaca yúgu'tè bönachi. <sup>14</sup> Rizí' yé'eba' bönachi nacuá' yödzülió len le nácagaca bë' dè lu ná'aba' runba' loba' böa' sínia' zí'aló na'. Rinná bé'eba' bönachi nacuá' yödzülió iluné' tu budó' ca nácaba' böa' sínia' na' gúcaba' hué' que guíé' tuchi', ate' nabanba'. <sup>15</sup> Dè lu ná'aba' runba' ga soa ibán budó' na' naca ca nácaba' böa' sínia' zí'aló na', en güí'i didza' budó' ni, en gun ga nu guti yúgu'tè nupa bití' ila'yéaj ládxi'gaca le. <sup>16</sup> Benba' ga gudá' yúgu'tè bönachi tu le naca bë' dá'gaca lèba', nupa nácagaca cá'asó, en nupa nácagaca lo, nupa ta'lé'e yöl-la' tsahui', en nupa nácagaca yechi', nupa bití' nadó'ogaca, en nupa nadó'ogaca. Budá'aba' le lu ná'agaca ibèla o ra' xigágaca bönachi na'. <sup>17</sup> Cuntu nu gaca bi ga'u o bi guti' channö cabí da' nu na' lè na' naca bë', o channö cabí da' nu na' laba' böa' sínia' na', o le nabábaba' nuá'aba'. <sup>18</sup> Na'a riquínmu' yöl-la' réajni'i. Nu napa yöl-la' réajni'i ral-la' ulábatéz tsca le nabábaba' nuá'aba' böa' sínia' na', le naca ca le nababè' tu bönni', ate' le nabábaba' na' naca xopa gayuá' yu' tsónnalaj yu' xopa.

## 14

*Le tul-lè' tu gayuá' yu' tapa-un milè' bönni'*

<sup>1</sup> Gudödi ni' buyúa', en bilé'eda'-nè' Bönni' na' náquié' Bö'cu' Zxíla'do' zuiné' lu guí'ado' nazí'i le Sión. Nacuá'lené' Lè' tu gayuá' yu' tapa-un milè' bönni', da' ra' xigágaquié' Lè' Bönni' na' náquié' Bö'cu' Zxíla'do', enca' Lè' Xuzé'. <sup>2</sup> Ní'irö biyönda' tu le rigú'u bö yehua' yubá, le rinné zidzaj ca rinné tu yegu zxon, en ca rinné guziú'. Biyönda' le riyön cate' ta'guínniè' lè'e tu le rul-la zè zían du que. <sup>3</sup> Tul-lè' tu le rul-la cubi, nacu'è ca dódilö lahui lataj lo ni', enca' ca dódilö lahui ga na' nacuá' idapa nupa na' nabángaca len yugu' bönni' gula na'. Cúnturö nu gaca gul-la le rul-la ni, pero légasasè' tu gayuá' yu' tapa-un milè' bönni' ni, bönni' na' böa'ué' Cristo légaquié' ladaj bönachi yödzülió. <sup>4</sup> Nácagaquié' bönni' ni idú ladxí'. Bití' gula'cuá'lené' nigula, tu nácagaquié' idú bönni' ra'bán. Söjcalenè' Bönni' na' náquié' Bö'cu' Zxíla'do' gátitès ga sa'yéajé'. Cristo caz böa'ué' légaquié' ládjagaca bönachi, ate' nácagaca nupa bulu'dödi cúngaquié' zí'aló queé' Dios, enca'

queë' Bönni' na' náquië' Bö'cu' Zxíla'do'. <sup>5</sup> Catu caz gula'zì' yë'ë, ate' cuntu nu gaca bi innë quégaquië' ga na' nacu'ë ca dódilò lahui lataj lo ga rō'ë Dios.

*Didza' röjuá'gaquië' tsonna gubáz lá'ayi*

<sup>6</sup> Ní'irō bilé'eda' ia'tué' gubáz lá'ayi, ridödë' lu bö'ös lúzxiba, en röju'ë didza' dxi'a zóatica'sō para gunë' libán que lógaca nupa nacua' yödžölió, bönachi idútë luyú, yúgu'të bönachi izá'a, en bönachi tuí'i yúgu'të didza' izá'a, en bönachi yúgu'të yödžö. <sup>7</sup> Ru'ë zidzaj didza', rnnë: "¡Gulí'gádxí Dios, en guli'cu'ë yöl-la' ba tu' chizóa uchi'a usöröë' bönachi! ¡Gulí'tséaj ládxi'ë Dios, nunë' lúzxiba, en luyú, en nísado', en gapa ralaj nisa!"

<sup>8</sup> Ia'tué' gubáz lá'ayi sōjnáhuë' gubáz lá'ayi ni, en rnnë: "¡Chibudxi que yödžö Babilonia! ¡Chibudxi que yödžö zxon na'! Caní guca que, tu' gulún nupa nacua' ni' ga gula'zì' lu ná'agaquië' bönni' yúgu'të yödžö ilunë' ca nácagaca le ta'zë ládxi'gaquië' le ruá' dō'."

<sup>9</sup> Ia'tué' gubáz lá'ayi sōjnáhuë' gubáz lá'ayi buropi ni, en ru'ë zidzaj didza', rnnë: "¡Channō nu tseaj ladxi'-ba' böa' sínia' na', enca' budó' queéba', en guí'i lataj ta' ra' xigué o lu nē'e le naca bē' da' lēba', <sup>10</sup> gunë' Dios nu ni xíguia' lu yöl-la' rilé queë'! ¡Qui'i saca' nu na' lu guí', en lu lē na' ruzégui'da', lógaca gubáz lá'ayi, en lahuë' Bönni' na' náquië' Bö'cu' Zxíla'do'! <sup>11</sup> Cuentica'sō dzön que guí' ga ni' quí'i saca' nu na'. Rēla, en te dza qui'i saca', ate' catu caz gata' lataj ulu'zì' ládxi'gaca nupa ila'yéaj ládxi'gaca-ba' böa' sínia' na', en budó' queéba'. Biti' ulu'zì' ládxi'gaca nupa ilu'í' lataj ta' laba' léguequi. <sup>12</sup> Que lē ni na' nupa na' néquiguequi queë' Dios, en tun ca rnna le gunná bē'ë, en ta'yéajlë' Jesús, ral-la' ila'bōza zxon ladxi'."

<sup>13</sup> Ní'irō biyōnda' chi'i nu ruí'i didza' yehua' yubá, en rē neda': "Buzúaj lu guichi lē ni: ¡Bica' bágaca nupa ilátigaca na'a si lo, nupa na' ta'yéajlë' Xanru'!"

Dios Bö' Lá'ayi rnnë: "¡Ca' gaca! ¡Ulu'zì' ládxi'gaquië' lu dxin gulunë', en ulu'zi'ë xibé ca sa'yéaj le gulunë'!"

*Tu'zi'ë le rulá' luyú*

<sup>14</sup> Ní'irō buyúa', en bilé'eda' tu böaj lúzxiba chiguíchido'os, ate' lu böaj na' rō'ë tu bönni' náquië' ca náquië' Bönni' Guljë' Bönachi, ate' dxía icjë' tu le néquini oro, ate' zönë' tu guíë tuchi' lu nē'ë. <sup>15</sup> Birúajë' tuë' gubáz lá'ayi lu yudo' rō'ö yehua' yubá, ate' bē'ë zidzaj didza', en gudxë' Nu na' rō'ö lu böaj na', gunné: "¡Bugún dxin guíë tuchi' quiu', en guchugu zxoa' xtila, tu' chibidxín dza nu uzí' le! ¡Chinabídx do que le dē yödžölió!"

<sup>16</sup> Ní'irō Nu na' rō'ö lu böaj na' bugún dxin guíë tuchi' idútë yödžölió, ate' buzi'ë le rulá' luyú.

<sup>17</sup> Ní'irō birúajë' tu gubáz lá'ayi lu yudo' zoa yehua' yubá. Nu'ë ca' tu guíë tuchi'. <sup>18</sup> Birúajë' ia'tué' gubáz lá'ayi ra' bucugu ni', dē lu nē'ë inná bé'enë' guí', ate' bē'ë zidzaj didza', en bulidzë' gubáz lá'ayi zí'aló na' nu'ë guíë tuchi', gunné: "¡Bugún dxin guíë tuchi' quiu', en butubi tu'xóa huéaj le ta'bía lubá uva rō'gaca yödžölió, tu' chiná le ta'bía lubá uva!"

<sup>19</sup> Ní'irō gubáz lá'ayi ni bugunë' dxin guíë tuchi' idútë yödžölió, en butubë' le ta'bía lubá uva rō'gaca luyú, ate' yōjchú'unë' le ta'bía lubá uva na' lu yeru zxon ga izí xisi. Yugu' lē ni rulu'í' ca gunë' Dios, gunë' xíguia' bönachi nacua' yödžölió. <sup>20</sup> Bulu'libë' le ta'bía lubá uva na' lu lerui zoa ní'lō ra' yödžö, ate' lu lerui na' birúaj rōn, en gurén ga bidxintë ruá'agacaba' böa', en gudödi rōn na' idú tscá gaca sá'aru' idú chinu dza.



## 15

*Yugu' gubáz lá'ayi nuá'gaquié' gadxi yödzhüé'*

<sup>1</sup> Bilé'eda' ia'tú le nácada' bē' yehua' yubá, le run ga nu rubani. Bila'rúajé' gadxi gubáz lá'ayi, nuá'agaquié' gadxi yödzhüé' röjsétegaca, le uguné' dxin Dios, údxi guné' xíguia' bönachi yödzhüé'.

<sup>2</sup> Bilé'eda' ca' tu le naca ca tu nísado' le rēpi yōsa bení' ca guiōj jara le nutsí' i guí'. Nupa na' bulu'xicja lu bōa' sínia' na', en lu budó' queéba', en lu laba', zuígaca lu lē na' naca ca tu nísado', en nuá'agaquié' le tul-la, yugu' le bē'ē Dios quégaquié'. <sup>3</sup> Tul-lē' le rul-la na' bil-lē' Moisés, bönni' huen dxin queé' Dios. Naca tu le rul-la queé' Bönni' na' náquié' Bö'cu' Zxíla'do'. Ta'nné':

¡Li', Xantu' Dios, zxóntērō nacu' Li'!

¡Zxóntērō naca yúgu'tē le benu',

le tun ga rubánitu'!

¡Li' rinná bé'enu' yugu' yödzhüé'!

¡Idú dxí'ado', en idú tsahui' naca ca bi runu'!

<sup>4</sup> ¿Nuzxi caz cabí gadxi Li', Xantu'?

¿Nuzxi caz cabí cu'u Li' yöl-la' ba?

¡Tuzu' Li' nacu' lá'ayi!

¡Ila'dxín bönachi yúgu'tē yödzhüé',

en ila'yéaj lādxi'guequi Li'

tu' ta'lé'e naca tsahui' yúgu'tē le runu'!

<sup>5</sup> Gudödi guca lē ni, buyúa', en bilé'eda' gualaj yudo' yehua' yubá ga ni' dē lataj lá'ayi que le naca bē' zóalenē' Dios bönachi queé'. <sup>6</sup> Bila'rúajé' gadxi gubáz lá'ayi lu lataj lá'ayi na', nuá'agaquié' gadxi yödzhüé' na'. Nácugaquié' lari' nazáca'da' le rēpi yōsa bení', en núga'gaca luchú'ugaquié' le néquiguequini oro. <sup>7</sup> Ní'irō tu nu nutsa' ladaj idapa nupa na' nabángaca, bē' que queégaquié' gadxi gubáz lá'ayi na' gadxi zxíga'do' néquiguequini oro, en yúdzugaca le ruluí'i yöl-la' rilé queé' Dios, Bönni' zoa cazé'. <sup>8</sup> Lu lataj lá'ayi na' bidzá'a dzön, tu' zoa ni' yöl-la' bení', en yöl-la' huáca zxön queé' Dios. Cuntu nu sequí' tsaza lu lataj lá'ayi na' cate' gátsjarō gadxi yödzhüé' na' nuá'agaquié' gadxi gubáz lá'ayi na'.

## 16

*Yugu' zxíga'do' yúdzugaca le ruluí'i yöl-la' rilé queé' Dios*

<sup>1</sup> Ní'irō biyönda' chi'i nu rufi' zidzaj didza' lataj lá'ayi na', en rē gadxi gubáz lá'ayi na', rnna: “¡Guli'tséaj! ¡Guli'tsöjlálaj gadxi zxíga'do' na' lu yödzhüé', le yúdzugaca lē na' ruluí'i yöl-la' rilé queé' Dios!”

<sup>2</sup> Guyijé' gubáz lá'ayi zí'alö, en yöjlaljé' le yudzu zxíga'do' na' zöné' lu yödzhüé'. Lē na' yudzu zxíga'do' na' ben ga gutsaj yudzu' ya'a le riláda' idüté le naca caz nupa na' da' léguequi le naca bē' dá'gaca bōa' sínia' na', enca' nupa na' ta'yéaj lādxi'gaca budó' queéba'.

<sup>3</sup> Ní'irō guyijé' gubáz lá'ayi buropi, en yöjlaljé' le yudzu zxíga'do' na' zöné' lu nísado', ate' nisa na' böáca rön ca naca rön queé' tu bönni' nati, ate' gulati yúgu'tē nupa nabángaca nacua' lu nísado' na'.

<sup>4</sup> Guyijé' gubáz lá'ayi bunni, en yöjlaljé' le yudzu zxíga'do' na' zöné' gapa dē yegu, en gapa ralaj nisa, ate' gapa dē nisa na' bulu'huöca rön. <sup>5</sup> Ní'irō biyönda' ru'é didza' gubáz lá'ayi na' dē lu nē'ē rinná bé'ené' nisa na', rnné': “¡Xantu' Dios Lá'ayi! ¡Zoa cazu', en guzóa cazu'! ¡Tsaui' nacu' tu' richugu' caní quégaca bönachi <sup>6</sup> tu' bulu'laljé' rön quégaca nupa

néquiguequi quez quiu', en quégaca nupa guluí'i didza' uláz quiu'! ¡Na'a, Li' runu' ga ilé'ajé' rön, tu' caní ral-la' gaca quégaquié'!"

<sup>7</sup> Ní'irö biyönda' ruí'i didza' tu nu zoa ra' bucugu yehua' yubá ni', rna: "¡Ca' gaca, Xantu' Dios, napa cazu' yöl-la' unná bé'! ¡idüté li, en tsahui' naca ca richugu' quégaca bönachi!"

<sup>8</sup> Guyijé' gubáz lá'ayi budapi na', en yöjlaljé' le yudzu zxíga'do' na' zöné' lu gubidza, ate' gubidza na', bé'ë Dios le lataj uzégui'da' bönachi len guí' que. <sup>9</sup> Gula'yégui'da' yúgu'té bönachi tu ruzégui'da' gubidza, pero biti' bulu'bí'i láchigaca, en biti' gula'gú'u Dios yöl-la' ba. Gula'nné zi'i queé' Dios, Bönni' dé lu në'ë inná bé'ené' yugu' lè ni tu'saca' zi' bönachi.

<sup>10</sup> Guyijé' gubáz lá'ayi guyu' na', en yöjlaljé' le yudzu zxíga'do' zöné' lu xilataj böa' sínia' ga na' rinná bé'ëba', ate' gurö'ö chul-la gapa rinná bé'ëba'. Ní'irö, tu' gula'guí'i gula'zaca' bönachi, guláguya'a lúdxigaequi, <sup>11</sup> pero biti' bulu'bí'i láchigaca para cabirö ilungaca le ruá' dö' tuné'. Gula'nné zi'i queé' Dios zoé' yehua' yubá tu' ta'guí'i ta'zaca', en tu' dxíagaca yudzu' ya'a na'.

<sup>12</sup> Guyijé' gubáz lá'ayi buxopi na', en yöjlaljé' le yudzu zxíga'do' na' zöné' lu yegu xön nazí'i le Eufates, ate' gubidxi nisa yegu na' para ibá'a nöza ga ilá'dödi nupa ta'nná bé', nupa ilá'ruaj zaca' ga rilén gubidza.

<sup>13</sup> Ní'irö bilé'eda' bëla xön xitsiní' na', en böa' sínia' na', en bönni' ru'ë didza' uláz quégacaba'. Bila'ruaj tsonna bö' xihui' tun ditaj bönachi lu ruá'agaca nupa na'. Nalá'gaca ca nalá'gacaba' buludzu. <sup>14</sup> Nácagaca yonna bö' ni bö' que tu' xihui', bö' na' tun le nácagaca bé' le ilún ga ulu'bani bönachi. Yöjaca bö' xihui' na' idú yödzölió, en yöjtúbigaca nupa ta'nná bé', para tsöjáquié' lu gudil-la na' gaca lu dza xön queé' Dios, Bönni' napa cazé' yöl-la' unná bé'. <sup>15</sup> Caní rnné' Dios: "¡Buli'yútsöca! Guída' tsárido'os ca ridxiné' tu bönni' gubán. Bica' ba nu zoa ban ladxi', en run chi'i le nacu nu na', en rúntica'sö dxi'a, para cabí gun bayudxi ta xiguídisö, en para cabí utuí'i nu na' lahui' lógaca bönachi." <sup>16</sup> Yugu' bö' xihui' na' bulu'tubi yugu' bönni' ta'nná bé'ë, ate' bulu'dubé' tu lataj nazí'i le lu didza' hebreo: Armagedón.

<sup>17</sup> Guyijé' gubáz lá'ayi igadxi na', en yöjlaljé' le yudzu zxíga'do' na' zöné' lu bö'ös, ate' bé' zidzaj didza' tu nu zoa lu lataj lá'ayi zoa yehua' yubá ga dé lataj lo na', rna: "Chinaca."

<sup>18</sup> Ní'irö guyépi yösa, en gurö'öda' bö, en gunné guziú'. Gudödida' budó' xzu', le gudödida'rö ca gudödi tsanni ni nacuá' bönachi yödzölió. <sup>19</sup> Birúaj tsonna cö'ölö yödzö xön na', ate' gula'guínnaj yödzö nacuá' yödzölió. Yöjnené' Dios le naca xihui' gulún bönachi yödzö xön na' nazí'i le Babilonia, ate' lu yöl-la' rilé queé' bené' xíguia' nupa nacuá' ni'. <sup>20</sup> Bila'gachi' yugu' luyú bidxi dzö'ö lu nísado', ate' bítirö gula'lá' yugu' guí'ado'. <sup>21</sup> Böxaj ca' guiój bögui' yöla sunna, le za' lúzxiba, en yöjsóa ícjagaca bönachi, ate' nál-li' tu tu guiój bögui' na' ca tu gayuá' guié, ate' yúgu'té bönachi gula'nné xihui' queé' Dios tu' nözi guiój bögui' na' tu' bulu'saca'da' zi'i léguequi.

## 17

### *Dios richúquié' queénu nigula udá dzaga*

<sup>1</sup> Ní'irö bidxiné' tué' gubáz lá'ayi ga zoa', nababé' gadxi gubáz lá'ayi na' gula'zöné' gadxi zxíga'do' na' néquiguequini oro. Bé'lené' neda' didza', gunné': "Gudá ni, ate' uluí'ida' li' ca guné' Dios, guné'-nu xíguia' nigula

udá dzaga na', rō'ōnu lu nísado' zían. <sup>2</sup> Gula'cua'len lēnu nupa ta'nná bē' luyú yōdzōlió, en gulún le ruá' dō', ate' gula'zudxi nupa nacuá' yōdzōlió ní, tu' gulunlen lēnu le bití' naca dxi'a."

<sup>3</sup> Dios Bō' Lá'ayi guzóalenē' neda', ate' gubáz lá'ayi na' guché'ē neda' tu lu lataj cá'asō, ate' bilé'eda'-nu tu nigula ní' dxíanu cúdzu'ba' tuba' bōa' sínia', nácaba' xiná guí'ido'os. Dxíagaca gadxi ícjaba', en chi lúzuba', en dá'gaca ca' lēba' le ta'nnē xihui' queē' Dios. <sup>4</sup> Nigula na' dxíanu lēba' nácunu lari' xiná chul-la, en lari' xiná guí'ido'os. Nazí'i biquitaj queēnu le néquiguequini oro, en yugu' guió'j nazaca', en yugu' bugá. Lu ná'anu rō'ō tu xíga'do' néquini oro, en yudzu le nácagaca xihui', en le ruá' dō' runnu. <sup>5</sup> Ra' xigánu dá'gaca ca lēnu, le tu'luí' tu le nagachi', en ta'nná caní: "Yōdzō Babilonia Le Naca Lo", en "Xiná'agacanu Nigula Udá Dzaga", en "Xiná'agaca Le Xihui' Dzō'ō Yōdzōlió." <sup>6</sup> Gúquibe'eda' nazúdxinu nigula na' tu' bennu ga gulaj rōn quégaca nupa néquiguequi queē' Dios, en quégaca nupa na' zoa nu bēti léguequi tu' gulún ba nalí queē' Jesús. Cate' bilé'eda'-nu, bubánide'eda'. <sup>7</sup> Gudxē' gubáz lá'ayi na' neda', gunné': "¿Bizx que rubániu'? Uzéajni'ida' li' lē na' nagachi', le ruluí' ca naca nigula ní, enca' le ruluí' ca naca bōa' sínia' na' dxíanu-ba', bōa' na' dxíagaca gadxi ícjaba', en chi lúzuba'. <sup>8</sup> Bōa' sínia' na' bilé'enu' guzóaba' zí'alō, pero bití' zóaba' na'a. Bōa' ni chizóa irújaba' lataj chul-la, ate' tséajba' ga nítiba' tsaz. Ulu'bánide'e nupa nacuá' luyú cabí nazúajgaca láguequi lu guichi que yōl-la' na'bán, le buzúajē' Dios dza ni'te quez cate' sí' gata' yōdzōlió. Cate' ila'lé'eni bōa' sínia' na' guzóaba' zí'atēlō, pero bití' zóaba' na'a, ulu'bani tu' nubanba'.

<sup>9</sup> 'Lē ni naca tu le uzéajni'i nu gaca tséajni'i: Gadxi ícjaba' na' tu'luí' gadxi guí'ado' gapa rō'ōnu nigula na'. <sup>10</sup> Lēsca' caní gadxi ícjaba' na' tu'luí' gadxē' bōnni' ta'nná bē'ē. Gáyu'ē bōnni' ni chigudōdi quégaquiē'. Tuē' bōnni' ni rinná bē'ē na'a, ate' ia'túē' bití' ridxíninē', pero cate' guidē', inná bē'ē tu chí'ido'osō. <sup>11</sup> Bōa' sínia' na' guzóaba', pero bití' zóaba' na'a, ruluí' tu bōnni' izxunu', inná bē'ē. Nunē' tsōzōn bōnni' gadxi na', ate' tōdi ni nítie' tsaz.

<sup>12</sup> 'Chi lúzuba' na' bilé'enu' tu'luí' chiē' bōnni' ila'nná bē'ē. Bití' ta'zíninē' yōl-la' unná bē', pero ila'zī'ē yōl-la' unná bē' tu chí'ido'osō, en ila'nná bē'ē tsōzōn len bōa' sínia' na'. <sup>13</sup> Chiē' bōnni' ni, lēbisō nácagaquiē', ate' ulu'dōdē' yōl-la' unná bē' quégaquiē', en le nazí' lu ná'agaquiē' lu ná'aba' bōa' sínia' na'. <sup>14</sup> Ila'díl-lalenē' Bōnni' na' náquiē' Bō'cu' Zxíla'do', pero Lē' ucul-lē' légaquiē', tu' náquiē' Xángaca yúgu'tē nupa nácagaca xan, en náquiē' Bōnni' rinná bē'enē' yúgu'tē nupa ta'nná bē'. Nupa nacuá'len Lē', bulidzē' Dios léguequi, en gurōē' léguequi, ate' tsaz dá'gaca Lē'."

<sup>15</sup> Gubáz lá'ayi na' gudxē' ca' neda', gunné': "Yugu' nísado' na' bilé'enu' gapa ní' rō'ōnu nigula udá dzaga na', tu'luí' bōnachi yugu' yōdzō, en yugu' bōnachi izá'a, en bōnachi tuí' yugu' didza' yúbölō, en bōnachi yugu' luyú. <sup>16</sup> Chi lúzuba' bōa' sínia' na' bilé'enu', en tu'luí' chiē' bōnni', bití' ila'lé'enē'-nu nigula udá dzaga na' dxi'a, ate' ulu'cá'anē'-nu cá'asō, en xiguídisō. Ilahuē' xipéla'nu, en ulu'zégui'ē'-nu len guí'. <sup>17</sup> Dios uchíziē' icja ládxi'do'gaquiē' chiē' bōnni' na' le gun ga ilunē' ca rē'ēni quézinē' Lē', ate' ilácagaquiē' tuz, en ulu'dōdē' yōl-la' unná bē' quégaquiē' lu ná'aba' bōa' sínia' na' para gaca ca rna xtídzē'ē. <sup>18</sup> Nigula na' bilé'enu'-nu ruluí' yōdzō zōn na' rinná be'e nupa ta'nná bē' yōdzōlió ní."

## 18

*Riguinnaj yödzö Babilonia*

<sup>1</sup> Gudödi na' bilé'eda'-në' ia'tué' gubáz lá'ayi ruhuötjé' rirúajé' yehua' yubá, en dë lu në'ë yöl-la' unná bë' zxon, ate' guyëpi yösa bení luyú ni'a que yöl-la' bení queë' gubáz lá'ayi na'. <sup>2</sup> Bë'ë zidzaj didza' gubáz lá'ayi na', gunné':

¡Chibiguinnaj! ¡Chibiguinnaj Babilonia, yödzö zxon na'!

¡Chiböáca xilataj tu' xihui', en xilátjagaca bö' xihui' tun ditaj bönachi!

¡Yugu' biguinni xitsiní', en yugu' biguinni xihui' tu'zóaba' xilátajgacaba' ni'!

<sup>3</sup> Caní guca que yödzö na' ni'a que le gulún bönachi nacua' ni'.

Guluné' ga gulún bönachi yúgu'të yödzö ca nácagaca le ta'zësö ladxi' le ruá' dö'.

Nupa ta'nná bë' luyú yödzölió gulunlen légaquié' le ruá' dö', ate' guta' yöl-la' tsahui' quégaquié' bönni' to'o tuti' nacu'ë yödzölió tu' guyánda' yugu' le nazaca' gula'zë ladxi' bönachi ni'.

<sup>4</sup> Ní'irö biyönda' ruí' didza' ia' tu' nu zoa yehua' yubá, rnna:

Gulí'ruáj lu yödzö na', libí'ili' néquili' quia' para cabí gunli' dul-la' tsözxón len légaquié', en para cabí quí'í sáca'li' le gaca quégaquié'.

<sup>5</sup> Nayánda' dul-la' nabága'gaquié',

en chinayasa nadxín caz lúzxiba,

pero Dios röjnenë' le ruá' dö' núngaquié'.

<sup>6</sup> Bulí'bí'í quégaquié' ca na' guluné' queéli'.

Bulí'bí'í quégaquié' chopa cö' tsca le guluné'.

Bulí'bí'í quégaquié' chopa cö' tsca le naca xihui' guluné' queéli'.

<sup>7</sup> Gulí'gún ga ila'guí'í ila'záquié', en ila'bödxi yéché'ë

tsca guca yöl-la' ba, en yöl-la' zxon gulu'í cuíngaquié'.

Ta'zá' ládxi'gaquié', ta'nné':

Rö'ötu' ni, rinná bë'ëtu'.

Biti' nácatu' uzëbi, en catu caz cödxí yéchi'tu'.

<sup>8</sup> Que lë ni na', tu dzasö ila'dxín quégaquié' le ila'guí'í ila'záquié', yöl-la' guti, en yöl-la' ribödxi yechi', en yöl-la' ridún.

Iléguié' lu guí', tu' napa cazë' yöl-la' huáca zxon Xanru' Dios.

Lë cazë' usiúdxë' quégaquié'.

<sup>9</sup> Ní'irö gunné': "Ila'bödxi nupa ta'nná bë' luyú yödzölió, en gulún le ruá' dö' tsözxón len légaquié', en bulu'zí' xibé le nequi quégaquié'. Ila'bödxë', en ila'bödxi yéché'ë cate' ila'lé'enë' dzön que yödzö zxon na' régui. <sup>10</sup> Zi'tu' zí'tu'sö ila'cu'ë tu' iládxinë' ca gaca xíguia' le gaca que yödzö na', ate' ila'nné': ¡Bica' bayechi' Babilonia, yödzö zxon ni, le gúcada' lo! ¡Tu dzasö guca xíguia' que!"

<sup>11</sup> Ní'irö gunné': "Ila'bödxë' ca' bönni' to'o tuti' nacu'ë yödzölió, en ila'bödxi yéché'ë ni'a que yödzö na' tu' cabirö soa nu ga'u bi ilúti'ë ni'."

<sup>12</sup> Cúnturö nu ga'u ni':

Le néquiguequini oro, en plata,

en yugu' guió'j zaca', en yugu' bugá,

en yugu' lari' nazáca'da', en lari' xiná chul-la,

en lari' dxí'ado', en lari' xiná guí'ido'os,

en yugu' yaga rilá' zxixi,

en le néquiguequini dxita nazáca'da',

en le néquiguequini yaga nazáca'da',

en le néquiquequini guië cobre,  
 en le néquiquequini guië,  
 en le néquiquequini guiöj jara.

<sup>13</sup> Cúnturö nu ga'u ni':

Canel, en yugu' le rilá' zxixi, en yalaj,  
 en le rilá' zxixi que mirra, en que yöj olíbano,  
 en xisi uva nál-la, en le naca za,  
 en yiözja dxí'ado', en zxoá' xtila,  
 en yugu' búrrodo', en yugu' bö'cu' zxila',  
 en yugu' böa', en yugu' carreta,  
 en yugu' bönni' huen dxin, en ia'bal-la bönachi.

<sup>14</sup> Nupa na' to'o tuti' ilé légaquië', ila'nná:

Nadúagaca le guzé ládxi'li'.  
 Chigudödi quégaca yöl-la' tsahui',  
 en le nácgaca lachi queëli',  
 ate' bíti'rö idzölili' léguequi.

<sup>15</sup> Ní'irö gunné': "Ila'bödxë' bönni' to'o tuti' na', tu' guta' quégaquië' yöl-la' tsahui' tu' gulúti'ë lu yödzö na', ate' ila'cu'ë zítu' zítu'sö tu' iládxinë' ca gaca xíguia' le gaca que yödzö na', en ila'bödxí yéché'ë." <sup>16</sup> Ila'nnë': ¡Bica' bayechi' yödzö ni guca zxön!

Guca ca tu nigula náccunu lari' nazáca'da',  
 en lari' xiná chul-la, en lari' xiná guí'ido'os,  
 en nazí'i biquitaj queënu le néquiquequini oro  
 en le néquiquequini guiöj zaca', en yugu' bugá.

<sup>17</sup> Tu dzasö guniti yöl-la' tsahui' que yödzö ni.

Ní'irö gunné': "Yúgu'të bönni' xan barco, en nupa nacuá' lé'egaca barco na', en nupa tu'sá' yugu' barco na', en nupa tun dxin lu nísado', ila'cu'ë zítu' zítu'sö." <sup>18</sup> Cate' ila'le'enë' dzön que yödzö na' régui, ila'bödxë', en ila'nnë': "¿Bízxilö yödzö guca zxön ca naca yödzö ni?"

<sup>19</sup> Ní'irö gunné':

Ulu'dxíë' bëchtö ícjagaquië'.  
 Ila'bödxë', en ila'bödxí yechë'ë, ila'nnë'.  
 ¡Bica' bayechi' yödzö ni guca zxön!  
 Yöl-la' tsahui' que yödzö ni ben ga guta' yöl-la' tsahui'  
 quégaca yúgu'të nupa nácgaca xan barco lu nísado'.  
 Tu dzasö guniti yödzö ni.

<sup>20</sup> Buli'dzeja ca gaca que yödzö ni, libí'ili' zóali' yehua' yubá,  
 enca' libí'ili' néquili' queë' Dios,  
 libí'ili', bönni' gubáz queë',  
 en libí'ili', bönni' ruí'ili' didza' uláz queë'.  
 Buli'dzeja, tu' chiguchúguië' Dios que yödzö ni  
 ni'a que bi gulún queëli' nupa nacuá' lu yödzö ni.

<sup>21</sup> Ní'irö tuë' gubáz lá'ayi nál-la buchisë' tu guiöj zxön le naca ca tu guichi riyëtu, ate' gurú'unë' le lu nísado', gunné':

La' canísö gaca que yödzö Babilonia,  
 tu' iguínaj yödzö na' guca lo,  
 ate' bíti'rö nu udzöli le.

<sup>22</sup> Bíti'rö nu yöni lu yödzö na' nupa ta'guínni lë'e le rul-la,  
 en calëga nupa tu'cödxí gui  
 en calëga nupa tu'cödxí lúzuba' böa' bëdxi.

Bíti'rö udzöli bönni' huen dxin ni',  
en bití'rö yöni bö rigú'u le rutu ni'.

<sup>23</sup> Bíti'rö uzeni' nitú guí' lu yödzö na',  
en bití' yöni chi'ë bönni' rutsaga në'ë ni',  
en calëga chí'ibi' bí'i nigula rutsaga ná'abi'.

Caní gaca sal-la' nácali' lo, libí'ili' rá'uli', en rúti'li' lu yödzö ni,  
en guzxi' yé'eli' bönachi idútë yödzölió len yöl-la' gudzá' queéli'.

<sup>24</sup> Lu yödzö ni gulaj xichöngaqüë' bönni' gulu'ë didza' uláz queë' Dios,  
en xichöngaca nupa néquiquequi queë' Dios,  
enca' xichöngaca yúgu'të bönachi yödzölió,  
tu' bëtigaca nupa nacua' yödzö ni léguequi.

## 19

<sup>1</sup> Gudödi lë ni biyönda' tuí'i zidzaj didza' bönachi zián nacua' yehua'  
yubá, ta'nná:

¡Yöl-la' ba Dios! ¡Yöl-la' rusölá runë',  
ate' yöl-la' zxon, en yöl-la' unná bë' napë' Dios queëru'!

<sup>2</sup> ¡Naca idútë li, en tsahui' ca rusiúdxë'!  
¡Guchúguië' que yödzö na' naca ca tu nigula udá dzaga,  
en quegaca bönachi lu yödzö na' ila'niti tsaz!  
¡Gulún ditaj bönachi yödzölió tu' nözi le rua' dö' gulunë'!

¡Dios buzí' lëbë' légaquië'  
tu' gulútië' yugu' huen dxin queë'!

<sup>3</sup> Leyúbölö gula'nnë': "¡Yöl-la' ba Dios! ¡Cuéntica'sö dzön ga régui yödzö  
na'!"

<sup>4</sup> Idapa uru'ë bönni' gula ni' bulu'tsaga lógaquië' lu yu tsözxön len idapa  
nupa ni' nabángaca, en ta'yéaj ládxi'gaquië' Dios, Bönni' rö'ë lataj lo queë'.  
Gula'nnë': "¡Ca' gaca! ¡Yöl-la' ba Dios!"

<sup>5</sup> Ní'rö biyönda' ruí'i didza' tu nu zoa lataj lo na', rnna:  
¡Guli'cu'ë Dios queëru' yöl-la' ba  
yúgu'tëli' runli' xichinë', libí'ili' na' rádxili' Lë',  
nácali' bönachi cá'asö, en bönachi lo!

*Laní que yöl-la' rutsaga na' queë' Bönni' náquië' Bö'cu' Zxíla'do'*

<sup>6</sup> Biyönda' ca' nu ruí'i zidzaj didza', le biyön ca riyön cate' tuí'i didza'  
bönachi zián, en biyön ca' ca riyön ga ridödi tu yegu zxon, o ca riyön cate'  
rinnë guziú', ate' rnna:

¡Yöl-la' ba Dios tu' risí lahuë' rinná bë'ë!

¡Napa cazë' yöl-la' huáca!

<sup>7</sup> ¡Ral-la' udzeja ládxi'ru', en uzí'iru' xibë',  
en cú'uru'-në' yöl-la' ba

tu' chibidxín dza laní que yöl-la' rutsaga na'  
queë' Bönni' na' náquië' Bö'cu' Zxíla'do'!

¡Sí' lu në'ë Cristo nupa néquiquequi queë'!

¡Chinabá'a queëbi' bí'i utsaga ná'alenbi' Lë'!

¡Nácabi' le ruluí'i nupa na' néquiquequi queë'!

<sup>8</sup> ¡Dios ru'ë-bi' lataj gácubi' lari' nazáca'da'  
le naca idú, en répi yösa bení'!

Lari' nazáca'da' na' ruluí'i le naca tsahui' núngaca nupa néquiquequi  
queë' Dios.

<sup>9</sup> Ní'irö gubáz lá'ayi na' gudxë' neda', gunné': "Buzúaj lu guichi didza' ni: ¡Bica' bágaca nupa na' nulidzë' Dios légaquië' para ila'cu'ë laní que yöl-la' rutsaga na' queë' Bönni' náquië' Bó'cu' Zxíla'do'!"

Gudxë' ca' neda': "¡Yugu' didza' idútë li ni ru'ë didza' Dios caz'!"

<sup>10</sup> Buzóa zxiba' xini'ë gubáz lá'ayi na' para tseaj ládxa'a lë', pero gudxë' neda': "¡Biti' gunu' caní! Neda' ca' naca' huen dxin queë' Dios ca nacu' li', en ca nácaquië' böchi' luzó'o nazí' lu ná'agaquië' le naca idútë li ca naca queë' Jesús. ¡Guyéaj ládxe'ë Dios!"

Nupa tuí' didza' uláz queë' Dios, tuí' didza' le naca idútë li ca naca queë' Jesús.

### *Bönni' dxíë'-ba' böa' chiguichi*

<sup>11</sup> Ní'irö bilé'eda' nayalaj lúzxiba, ate' bulufí' loba' tuba' böa' chiguichi, ate' lë' Bönni' dxíë'-ba', Nu Run Ca Rnna, enca' Nu Ruí' Didza' Le Nácatë. Caní lë' tu' ruchi'a rusöröë' ca naca le naca idútë li, enca' caní tsejë' gudil-la. <sup>12</sup> Rëpi yösa bení' guiöj lahuë', le náca gaca ca guí', en dxíagaca icjë' zían le néquiguequini oro. Nazúaj lahuë' tu le lë', le cuntu nu nözi, pero tuzë' Lë' nözinë'. <sup>13</sup> Nácuë' tu lari' në'aj rön, en lë' ca' "Nu Naca Xtídzë'ë Dios." <sup>14</sup> Rönjónaquië' Lë' ni'a në'ë guizxi yu nacu'ë yehua' yubá, dxíagaquië'-ba' böa' chiguichi, en nácaquië' lari' nazáca'da', le naca chiguíchido'os, en bití' naca bösaj. <sup>15</sup> Rirúaj ru'ë le naca ca tu guíë' tuchi' le gúninë' zi' bönachi yugu' yödzo. Inná bé'enë' légaquië' len tu xiyaga guíë', en gunë' légaquië' xíguia', le gaca quégaquië' ca raca que le ribía lubá uva, zoa nu rulibi léguequi, tu' riléde'enë' Dios, Bönni' napa cazë' yöl-la' unná bë'. <sup>16</sup> Nazúaj lu lari' nácuë', enca' lu xigatsjë' ca lë', "Bönni' Rinná Bé'enë' Nupa Ta'nná Bë'", enca' "Bönni' Náquië' Xángaca Nupa Náca gaca Xan."

<sup>17</sup> Ní'irö bilé'eda'-në' tuë' gubáz lá'ayi zuínë' lu gubidza, ate' bë'ë zidzaj didza', en gudxë'-ba' böa' ta'daba' lúzxiba, rnnë': "¡Gulí'dá, bulí'dubi ga ni gáguli' laní zxon queë' Dios! <sup>18</sup> Gáguli' xipéla'gaca nupa ta'nná bë', en xipéla'gaca nupa ta'nná bë'e bönni' rójáquië' gudil-la, en xipéla'gaca nupa nál-lagaca, en xipéla'gacaba' böa', en xipéla'gaca nupa ta'bía léga gacaba', en xipéla'gaca yúgu'të bönachi, nupa bití' nadó'ogaca, en nupa nadó'ogaca, nupa náca gaca cá'asö, en nupa náca gaca lo."

<sup>19</sup> Ní'irö bilé'eda'-ba' böa' sínia' na', enca' yugu' bönni' ta'nná bë'ë yödzólió, en bönni' rójáquië' gudil-la guizxi yu quégaquië', nudúbigaquië' para ilúnlenë' gudil-la Bönni' dxíë'-ba' böa' chiguichi, dzágagaca Lë' ni'a në'ë guizxi yu. <sup>20</sup> Bidzunba' böa' sínia' na', enca' bönni' na' bë'ë didza' uláz queë'ba', bönni' na' benë' yugu' le nácada' bë' loba', en guzxi' yé'enë' nupa ni' guluí' lataj nu uzúaj láhuiguequi lë na' naca bë' dá'gaca lëba', en gula'yéaj ládxi'gaca budó' queë'ba'. Böa' sínia' na', enca' bönni' na' bë'ë didza' uláz queë'ba', gula'ru'unë' léguequi nabángacasö ca' ga rö'ö guí' zxon le réguilen lë na' ruzégui'da'. <sup>21</sup> Bönni' na' dxíë'-ba' böa' chiguích bëtië' yúgu'të nupa na' gudá'gaca léguequi len guíë' tuchi' na' rirúaj ru'ë, ate' bulu'huóljaba' yúgu'tëba' böa' na' ta'daba' lúzxiba, tu' guláguba' xipéla'guequi.

<sup>1</sup> Gudödi læ ni bilé'eda' ruhuötjē' tu gubáz lá'ayi, zē'ē yehua' yubá, en zönē' zxi'ini guíe que lataj chul-la, ate' nu'ē tu du guíe yōdx. <sup>2</sup> Guzxönē'-ba' bëla zxon xitsini' na', nácaba' bëla guzóaba' dza ni'te, bëla na' læba' Tu' Xihui', enca' Satanás, ate' bëguē'ē-ba', en bucá'anē'-ba' caní chi gayuá' iz. <sup>3</sup> Yōjchú'unē'-ba' lataj chul-la, en busayjē' lataj na', ate' budē'ē tu le riguela' le rusayaj lataj na' para cabirō si' yé'eba' bönachi yugu' yōdzō ga izá'arō chi gayuá' iz na', ate' tōdi ni' ral-la' yédxiba' tu chí'ido'.

<sup>4</sup> Ní'irō bilé'eda' yugu' lataj gapa ta'bō' nupa ta'nná bë', ate' nupa bila'deli' ulu'chi'a ulu'sörō le raca ta'bō' yugu' lataj na'. Bilé'eda' ca' yugu' bö' gulaca caz bönachi bulu'rixē' yénguequi yugu' bönni' biti' nácagaquiē' tsahui' tu' gulún ba nalí queē' Jesús, en tu' gulún libán que xtídzē'ē Dios. Yugu' bönachi ni biti' gula'yéaj lādxi'gaca böa' sínia' na', en budó' queēba', en biti' gulu'í' lataj nu uzúaj ra' xigáquequi, o lu nē'eguequi læ na' naca bë' nu da' læba'. Bulu'bán nupa ni lu yöl-la' guti, ate' gula'nná bë'len Cristo chi gayuá' iz, <sup>5</sup> pero ia'zica' rō bönachi nátigaca biti' bulu'bán. Cate' izá'arō chi gayuá' iz na' ulu'bán. Yöl-la' rubán lu yöl-la' guti guca ni naca le raca zí'alō. <sup>6</sup> ¡Bica' ba, en bica' lá'ayi nupa ta'deli' yöl-la' rubán na' raca zí'alō! ¡yöl-la' guti le raca burópilō biti' bi' gaca gun quéguequi, pero ilácagaca bixúz queē' Dios, enca' queē' Cristo, ate' ila'nná bë'len Lē' chi gayuá' iz na'!

<sup>7</sup> Cate' izá'a chi gayuá' iz na', ulu'sanē' Satanás ga na' nadzún. <sup>8</sup> Urúaj Satanás, en tsōjzxi' ye'e bönachi yugu' yōdzō nacuá' idapa la'a yōdzōlió. Sí' ye'e ca' bönachi yōdzō Gog, en yōdzō Magog, ate' utubi léguequi lu gudilla. Tsca nácagaca nupa ni, nácagaca ca naca yuzxi rō'ō tu ra' yegu zxon. <sup>9</sup> Guizxi yusō gula'dödē' idútē luyú, ate' gula'cu'ē lē'ajlō lataj ga na' nacuá' bönachi néquiquequi queē' Cristo, le naca yōdzō na' nadxi'inē' Dios. Ní'irō benē' Dios ga böxaj guí' le birúaj yehua' yubá, le buzegui' légaquiē'. <sup>10</sup> Tu' xihui' na' nazi' ye'e légaquiē', yōjchú'unagaquiē' le ga rō'ō guí' zxon que læ na' ruzégui'da', ga na' chizóaba' böa' sínia' na', enca' bönni' na' bë'ē didza' uláz queēba'. Ila'guí' ila'zaca' ni' rēla, en te dza yúgu'tē iz zá'gaca.

*Ta'dxín bönachi lahuē' Dios ga rō'ē ruchi'a rusöröē'*

<sup>11</sup> Ní'irō bilé'eda' tu lataj lo chiguichi, en bilé'eda' ca' Nu rō'ō ruchi'a rusöröē' lataj na'. Lahui' lo Nu ni gula'nítitē yōdzōlió, en lúzxiba, ate' bítirō budzōli xilátjaguequi. <sup>12</sup> Bilé'eda' ca' nupa chinátigaca, nupa nácagaca lo, en nupa nácagaca cá'asō, zuíguequinē' lahuē' Dios. Gula'yáaj guichi, en gyalaj ca' ia'tú guichi ga na' nazúajgaca lágaca nupa nadéli'gaca yöl-la' na'bán idú. Buchi'a busöröē' Dios nupa na' chinátigaca tsca naca le nazúaj yugu' lu guichi na', læ na' gulúngaca. <sup>13</sup> Lu nísado' bulu'rúaj nupa chinátigaca, nacuá' lu nísado'. Lu yöl-la' guti, en lu lataj chul-la bulu'rúaj nupa chinátigaca, gula'cuá' gapa ni', ate' buchi'a busöröē' Dios tu tu tsca naca le gulúngaca. <sup>14</sup> Ní'irō yōjtsázagaca yöl-la' guti, en lataj chul-la ga ni' rō'ō guí' zxon le naca lataj que yöl-la' guti le raca burópilō. <sup>15</sup> Nupa biti' nazúajgaca lu guichi quégaca nupa nadéli'gaca yöl-la' na'bán idú yōjtsázagaca lataj na'.

## 21

*Tu lúzxiba cubi, en tu luyú cubi*

<sup>1</sup> Gudödi na' bilé'eda' tu lúzxiba cubi, en tu luyú cubi, tu' chigudödi quégaca lúzxiba na', en luyú na' gula'cuá' zí'alō. Biti'rō dē nísado'. <sup>2</sup> Neda', Juan, bilé'eda' yōdzō lá'ayi na', le naca Jerusalén cubi, ruhuötaj, rirúaj



yehua' yubá ga zoë' Dios, en chinabá'a que ca nabá'a queëbi' bi'i nigula chizóa utsaga ná'alenbi' tu bönni'. <sup>3</sup> Biyönda' ruí'i didza' nu rnna yehua' yubá: "¡Buli'yútsöca! ¡Ga zoë' Dios zóalen bönachi! ¡Sóalenë' léguequi, ate' léguequi ilácagaca bönachi queë'! ¡Dios caz sóalenë' léguequi, en gáquië' Dios quéguequi! <sup>4</sup> Dios uzxië' nisa ribödxí zoa guiöj lóguequi. Cúnturö nu gati, en cúnturö nu cödxí, en cúnturö nu cödxí yechi', en cúnturö nu qui'i saca', tu' chigudödi quégaca lë na' gulaca zí'alö."

<sup>5</sup> Ní'irö Nu na' rö'ö lataj lo ni' gunná: "¡Buyútsöca! ¡Yúgu'të ruúna' cubi!"

Gudxi ca' neda': "¡Buzúaj lu guichi lë ni, tu' naca idútë li didza' ni, en naca löza!"

<sup>6</sup> Ní'irö gudxi neda': "¡Chinaca caz! ¡Neda' naca' Nu zoa zí'atëlö, enca' Nu röjsete ca naca le risí lo, en le ruúdxitë! ¡Nu ribidxi nisa, neda' guna' ga guí'aj nisa na' runna yöl-la' na' bán! <sup>7</sup> Nupa ila'deli' lu le raca yödzülió, gaca quéguequi yúgu'të lë ni. Neda' gaca' Dios quéguequi, ate' léguequi ilácagaca zxi'ini caza', <sup>8</sup> pero nupa tadxi, en nupa biti' ta'yéajlë' neda', en nupa náacagaca xihui', en nupa tuti bönachi, en nupa tun le biti' naca tsahui', en nupa náacagaca udzá', en nupa ta'yéaj ládxi'gaca budó' guiöj budó' yaga, en yúgu'të nupa ta'zí' yë', chizóa riböza xilátjaguequi lu guí', ga ni' rö'ö guí' zxon que lë na' ruzégui'da', lë na' naca yöl-la' guti le raca burópilö."

### *Yödzö Jerusalén le naca cubi*

<sup>9</sup> Ní'irö tuë' gubáz lá'ayi nababë' gadxë' gubáz lá'ayi ni' gula'zönë' gadxi zxi'ga'do' yúdxugaca gadxi yödzühuë' yöjsétegaca, bidë' ga zoa'. Gudxë' neda': "¡Gudá ni! ¡Uluf'ida' li' bi'i nigula na' si' utsaga ná'alenbi' Bönni' na' náquië' Bö'cu' Zxíla'do'!"

<sup>10</sup> Guzóalenë' Dios Bö' Lá'ayi neda', ate' guchë'ë' gubáz lá'ayi na' neda' tu lu guí'a sibi, en buluf'inë' neda' yödzö lá'ayi Jerusalén, ruhuötaj, rirúaj yehua' yubá ga zoë' Dios. <sup>11</sup> Yödzö ni rëpi yösa bení' tu' zóalen le yöl-la' bení' queë' Dios. Rëpi yösa bení' ca rëpi yösa bení' tu guiöj nazáca'da' ca naca guiöj guí'do'os nazí'i le jaspe. Naca yödzö na' yení'ido' ca naca guiöj jara. <sup>12</sup> Zoa tu zö'ö zxon, en sibi idú gásibi'ilö yödzö na'. Lë'e zö'ö na' nacua' chinnu gapa nu riyaza. Ra' gapa nu riyaza na' nacu'ë' chinnuë' gubáz lá'ayi tapa chi'ë. Tu tu ga nu riyaza na' nazúaj tu tu lágaca idxinnu cö' di'a dza zxi'ini xi'sóë' Israel. <sup>13</sup> Lë'e zö'ö le ruyú saca' ga rilén gubidza nacua' tsonna gapa nu riyaza, en saca' ga za' bö' ziaga nacua' tsonna gapa nu riyaza, en saca' tsólá'a ga ridödi gubidza beo' ziaga nacua' tsonna gapa nu riyaza, en saca' ga ribí'a gubidza nacua' ca' tsonna gapa nu riyaza. <sup>14</sup> Zxan zö'ö que yödzö na' nacua' chinnu xilibi zö'ö, ate' lë'egaca xilibi zö'ö na' nazúajgaca lágaquië' idxinnutë' bönni' gubáz queë' Bönni' na' náquië' Bö'cu' Zxíla'do'.

<sup>15</sup> Gubáz lá'ayi na' ruí'ilenë' neda' didza' zönë' tu yaga urixi le néquini oro para urixë' tsca naca yödzö na', en tsca náacagaca gapa nu riyaza, en tsca naca zö'ö que. <sup>16</sup> Yödzö na', lédi'i náacagaca idapa la'a. Lédi'i naca yöl-la' tunna que, en yöl-la' blaga' que. Len yaga na' burixë' tsca naca yödzö na', naca idú tsca gaca nu sa' idú chinnu dza, ate' lédi'i naca yöl-la' tunna que, en yöl-la' xitsá' que, en yöl-la' bölága' que. <sup>17</sup> Burixë' ca' yöl-la' yödx que zö'ö na', naca tu gayuá' yu' tapa-un dxíta, tsca naca dxíta que na' bönachi, lë na' ruríxinë' gubáz lá'ayi na'.

<sup>18</sup> Zö'ö na' néquini guiöj jaspe, ate' yödzö na' néquini órotëz, le naca yení'ido' ca naca guiöj jara. <sup>19</sup> Yugu' xilibi zö'ö que yödzö na' nazí'gaca biquitaj guiöj nazáca'da'gaca.

Xilibi zö'ö zí'alö néquini guiõj jaspe.  
 Le buropi néquini guiõj zafiro.  
 Le bunni néquini guiõj ágata.  
 Le budapi néquini guiõj esmeralda.  
<sup>20</sup> Le guyu' néquini guiõj ónice.  
 Le buzxopi néquini guiõj cornalina.  
 Le igadxi néquini guiõj crisólito.  
 Le izxunu' néquini guiõj berilo.  
 Le igá néquini guiõj topacio.  
 Le idxí néquini guiõj crisoprasa.  
 Le idxinéaj néquini guiõj jacinto.  
 Le idxinnu néquini guiõj amatista.

<sup>21</sup> Chinnu gapa nu riyaza na' ta'yáyjani chinno bugá. Tu tu ga nu riyaza na' riyáyjani tuz bugá. Luyú la' nõza lo que yõdzõ na' néquini órotèz, le naca yení'ido' ca naca guiõj jara.

<sup>22</sup> Biti' bilé'eda' tu yudo' lu yõdzõ na', tu' náquië' Xanru' Dios yudo' que, napa cazë' idútë yõl-la' unná bë', en lësca' caní náquië' Bõnni' náquië' Bõ'cu' Zxíla'do', náquië' yudo' que yõdzõ na'. <sup>23</sup> Biti' run bayudxi tsení'gaca gubidza, en beo' lu yõdzõ na', tu' uzení' yõl-la' bení' queë' Dios lu yõdzõ na', ate' lësca' Bõnni' náquië' Bõ'cu' Zxíla'do' náquië' le uzení' ni'. <sup>24</sup> Bõnachi yugu' yõdzõ, nupa nulágaca, ila'dá lu bení' que yõdzõ na', ate' yugu' bõnni' ta'nná bë'ë yõdzõlío idiguá'agaquië' yõl-la' tsahui' quégaquië' lu yõdzõ na'. <sup>25</sup> Catu caz tsáyajgaca gapa nu riyaza lu yõdzõ na' lahui' dza, ate' lataj na' catu caz gaca rëla. <sup>26</sup> Bõnachi yugu' yõdzõ idiguá'agaquië' ni' le nácagaca lesaca', en yõl-la' tsahui' quéguequi. <sup>27</sup> Tu le ruá' dõ' bití' ca' tsaza ni', en calëga tu le naca xihui', en calëga nu rizí' yë', pero tsázagacasõ ni' nupa nazúajgaca láguequi lu guichi queë' Bõnni' náquië' Bõ'cu' Zxíla'do', ga na' nazúajgaca lágaca nupa nadéli'gaca yõl-la' na'bán.

## 22

<sup>1</sup> Ní'irõ gubáz lá'ayi na' buluf'inë' neda' tu yegu yení'ido', le naca nisa yegu le runna yõl-la' na'bán. Rëpi yõsa bení' yegu na' ca rëpi yõsa bení' guiõj jara. Rirúaj yegu na' lu lataj lo ga rõ'ë Dios, en ga rõ'ë ca' Bõnni' náquië' Bõ'cu' Zxíla'do'. <sup>2</sup> Rizá' yegu ni gatsaj láhui'lõ nõza lo que yõdzõ na'. Tsólá'a huéaj ra' yegu na' rõ'õ tu yaga le runna yõl-la' na'bán, ate' ta'bía chinno luzuí tu iz. Tu tu beo' ta'bía yaga na'. Xilágui'gaca yaga na' nácagaca le tu'ún bõnachi yugu' yõdzõ. <sup>3</sup> Biti' soa ni' nitú le dxía dõ'. Soa lu yõdzõ na' lataj lo ga rõ'ë Dios, enca' ga rõ'ë Bõnni' náquië' Bõ'cu' Zxíla'do', ate' yugu' huen dxin queë' ila'yéaj ládxi'gaquië' Lë'. <sup>4</sup> Ila'lé'enë' lahuë' Lë', ate' le nazí'i Lë' nazúaj ra' xigágaquië'. <sup>5</sup> Biti' gaca rëla ni', ate' nupa nacua' ni' bití' ila'quínna tu le cu'u bení', en calëga bení' que gubidza, tu' gáquië' Xanru' Dios bení' quégaquië'. Nupa nacua' ni' ila'nná bë'tica'só.

### *Chizóa huödë' Cristo*

<sup>6</sup> Ní'irõ gubáz lá'ayi na' gudxë' neda', gunnë': "Didza' ni naca idútë li, en naca löza. Xanru' Dios, Nu ruchiza Bõ' Lá'ayi icja ládxi'do'gaquië' yugu' bõnni' tu'ë didza' uláz queë', chigusõl-lë'ë gubáz lá'ayi queë' para uluf'inë' yugu' huen dxin queë' le ral-la' gácatë. <sup>7</sup> Caní rnnë' Jesucristo: ¡Chizóa huõda! ¡Bica' ba nu run ca rnna didza' ruá'a uláz queë' Dios, le nazúaj lu guichi ni!"

<sup>8</sup> Neda', Juan, biyönda', en bilé'eda' yugu' lë ni. Gudödi biyönda', en bilé'eda' yugu' lë ni, buzóa zxiba' xini'ë gubáz lá'ayi na' buluí'inë' neda' yugu' lë ni para guna' lë' zxon. <sup>9</sup> Ní'irö lë' gudxë' neda': "Biti' gunu' caní, tu' naca' neda' huen dxin queë' Dios ca nacu' li', en ca nácagaquië' böchi' luzó'o na' tu'ë didza' uláz queë' Dios, enca' ca nácagaca yúgu'të nupa tun ca rnna le nazúaj lu guichi ni. ¡Ben zxon Dios!"

<sup>10</sup> Gudxë' ca' neda': "Biti' ucachu'u xtídzë'ë Dios ni, didza' ruá'a uláz queë', en nazúaj lu guichi ni, tu' chizóa ilaca yugu' lë ni. <sup>11</sup> Nu ruá' dö' guá'tica'sö dö'. Nu run le cabí naca tsahui' gúntica'sö le cabí naca tsahui'. Nu run dxi'a, gúntica'sö dxi'a, ate' nu nequi quez queë' Dios, guéquitica'sö quez queë'." <sup>12</sup> Rnnë' Jesús: "¡Chizóa huöda! Nu'a lu na'a le nadéli'gaca bönachi, ate' ubi'a que queë'guequi tsca naca le gulúngaca. <sup>13</sup> Neda' naca' Nu zoa zí'atëlö, enca' Nu röjsete, ca naca le risí lo, en le ruúdxitë. Naca' ca' Nu run ga risí lo, en Nu rusiúdxí."

<sup>14</sup> Ní'irö gunné': "¡Bica' ba nupa nayari le nácugaca, en tun le naca dxi'a! ¡Nazí'guequi lataj ilahuë' le ribía yaga le runna yöl-la' na'bán, en gaca ila'yaza gapa nu riyaza lun yödzo na'! <sup>15</sup> Nupa nácagaca xihui', en nupa nácagaca udzá', en nupa tun le ruá' dö', en nupa tuti bönachi, en nupa ta'yéaj ládxi'gaca budó' guiöj budó' yaga, en nupa ta'yaza ládxi'gaca ta'zí' yë' ila'cuá' ní'ilö ra' yödzo na'. <sup>16</sup> Neda', Jesús, gusöl-la'a gubáz lá'ayi quia', ate' buluí'inë' libí'ili' yugu' lë ni, libí'ili' na' dzágali' yugu' cö' bönachi quia'. Neda' naca' di'a dza queë' David, enca' zxí'ini xi'sóë'. Naca' ca' bölj hui sila."

<sup>17</sup> Tu'ë didza' Dios Bö' Lá'ayi, enca' bi'i nigula utsaga ná'alénbi'-në' Bönni' náquië' Bö'cu' Zxíla'do', ta'nnë': "¡Gudá!"

Nu riyöni didza' ni ral-la' inná: "¡Gudá!"

¡Nu ribidxi nisa, en nu rizë ladxí' le, ral-la' guídi, en guí'aj nisa le runna yöl-la' na'bán!

<sup>18</sup> Neda', Juan, ruzéajni'ida' nupa ta'yöni didza' ni ruá'a uláz queë' Dios, en nazúaj lu guichi ni, rnnía': Channö nu udá' lë'e didza' ni, Dios ubi'ë que nu na'. Gunë' lë' xíguia' ca naca le nazúajgaca lu guichi ni. <sup>19</sup> Lësca' caní, channö nu cúa bítí'tës didza' ni ruá'a uláz queë' Dios, en nazúaj lu guichi ni, Dios ugú'ë' ca' xilataj nu na' lu guichi ga nazúajgaca lágaca nupa nadéli'gaca yöl-la' na'bán idú, enca' lu yödzo lá'ayi, ca na' nazúaj qué'guequi lu guichi ni.

<sup>20</sup> Xanru', Nu run ba nalí qué'guequi lë ni rnnë': "¡Ön! ¡Huödatea'!"

¡Ca' gaca! ¡Gudá, Xantu' Jesús!

<sup>21</sup> Rinábida'-në' Xanru' Jesucristo uzá' ládxe'ë queë'li' yúgu'tëli'. ¡Ca' gaca!

## YUGU' SALMO

### 1

1 Bica' ba bönni' biti' runë' ca naca le ta'gú'u yöl-la' lë' nupa tu'cá'ana Dios, en biti' ridálenë' tsözxön nupa tun dul-la', en biti' runë' tsözxön le tun nupa ta'zí' quidza' Dios.

2 Le raza ládxë'ë náca gaca xibá naguixjé' Xanru', en ca náca gaca xibá na' rëla, en te dza rulaba ládxë'ë.

3 Bönni' ni náquië' ca tu yaga dxe' ga naca ra' nisa, le ribía sizxöni cate' ridxín dza que, en biti' ca' rizóa gubá' ayisö.

Yúgu'të le runë' ta'rúaj dxi'a.

4 Biti' raca caní quégaca nupa tuá' dö'.

Nácagaca ca bëbu zxe café ruá' le bö'.

5 Que lë ni na' biti' ulu'rúajë' tsahui' bönni' tu'ë dö' cate' Dios uchi'a usöröë' quégaquië',

en biti' ila'cu'ë bönni' dul-la' ga tu'dubë' bönni' tsahui'.

6 Rapa chi'ë Xanru' Dios nöza ga ta'dë' bönni' tsahui' na', pero uniti tsaz nu ridá gapa ta'dá nupa tuá' dö'.

### 2

1 ¿Bizx que tu'tsatsa bönachi yugu' yödzö en tu'pá'a nítisö le ilúngaca?

2 Bönni' ta'nná bë'ë luyú ta'dá' baguë'ë Dios.

Tun tuz xtídza' gaca nupa dë lu ná' agaca para ila'dá' бага' Xanru', en Nu na' nabö cazë' para inná bë'ë,

3 ta'nná: "Uzxuzxaj uquínajru' le ta'nná bë'enë' rë'u, en chú'unaru' yugu' le tu'zenë' bach rë'u."

4 Dios na' zoë' yehua' yubá uzxídxisë'.

Xanru' Dios utitaj cazë' léguequi.

5 Ní'irö lu yöl-la' rilé queë' güi'ilenë' léguequi didza',

en lu yöl-la' ridzá'a queë' uzenë' bach léguequi.

6 Innë': "Nuzóa caza' bönni' nabö caza' xilatjé' ga inná bë'ë.

Inná bë'ë lu Guí'a Sión, le naca guí'a lá'ayi quia'."

7 Quíxjö'ida' libí'ili' didza' nuzóë' tsaz Dios.

Xanru' Dios gudxi cazë' neda': "Li' nacu' Zxí'ina'.

Na'a dza nuzóa caza' Li'.

8 Gunábini neda', ate' guna' ga ilequi quiu' yugu' yödzö.

Guequi ca' quiu' idútë yödzölió.

9 Quitsju' léguequi len tu xiyaga guíë.

Uzxuzxju' léguequi ca run nu rilá'a tu zxiga' yö'öna."

10 Que lë ni na', libí'ili' na' rinná bë'ëli', guli'tséajni'i.

Guli'sedi cuinli', núlöli' ruchi'a rusöröli' le raca luyú.

11 Lu yöl-la' ba'a ladxi' queëli' guli'gún xichinë' Xanru'.

Lu yöl-la' rixxizi queëli' buli'sí' xibé'.

12 Guli'gún bal Zxí'inë' Dios para cabí ilétenë',

en para cabí udxi queëli' la' nöza.

La' ilentë yöl-la' rilé queë'.

¡Bica' ba yúgu'të nupa tu'zxöni ladxi' Lë'!

## 3

<sup>1</sup> Xan, chinayángacada' nupa ta'lé neda'.  
Zián nupa ta'dá'baga' neda'.

<sup>2</sup> Zián nupa ta'nné quia', ta'nná:  
"Biti' usölë' Dios lë'."

<sup>3</sup> Pero Li', Xan, run chí'tica'su' neda'.  
Nacu' yöl-la' ba quia', en Nu rutipa neda'.

<sup>4</sup> Bë'a zidzaj didza', bulidza'-në' Xanru',  
ate' Lë' biyönnë' chi'a ga na' zoë' lataj lá'ayi queë'.

<sup>5</sup> Neda' rata', en rasia',  
ate' rubana', tu' nazóntica'së' Xanru' Dios neda'.

<sup>6</sup> Biti' gádxida' gayuá' gayuá' bönachi,  
nupa na' nagú'ugaca neda' lë'ajlö.

<sup>7</sup> ¡Guyasa, Xan! ¡Busölá neda', Dios quia'!  
Budxía huë' xága'gaca nupa tu'dí'i neda',  
en buquínajda' nupa nácagaca xihui'.

<sup>8</sup> Xan, rusólá cazu' bönachi quiu'.  
Ben ga gaca dxi'a quégaca bönachi quiu'.  
¡Ca' gaca!

## 4

<sup>1</sup> Bubí'i didza' cate' rulidza' Li', Dios.  
Nacu' Nu ruchi'a rusörö le raca quia'.  
Cate' gurö'a böniga, bida cazu' Li' ga zoa', en gúcalenu' neda'.  
Ruhuéchi' ladxi' neda', en ruzé nagu' le rinábida' Li'.

<sup>2</sup> Rnnë' Dios: "Libí'ili', bönachi, ¿gáca'xte ulidza dítajli' neda'?'  
¿Gáca'xte caz idxí'ili' le cabí nazaca', en güi'i ládxi'li' le cabí naca?"

<sup>3</sup> Guli'tsöjné nabö cazë' Xanru' nu radxi Lë',  
ate' riyönnë' neda' cate' rulidza'-në'.

<sup>4</sup> Guli'gadxi Lë', en bíti'rö gunli' dul-la'.  
Guli'sá' ladxi' ca naca lë ni cate' dëli' ga ráta'li', en guli'sóa dxisö.

<sup>5</sup> Guli'cú'u lahuë' Xanru' le naca dxi'a,  
en buli'zxöni ladxi' Lë'.

<sup>6</sup> Zián nupa ta'nná: "¿Nuzxi caz gun ga gaca dxi'a queéru'?"  
Lu yöl-la' dxi'i ladxi' quiu' buyú netu', Xan.

<sup>7</sup> Runu' ga rudzėjade'eröda'  
ca tu'dzeja nupa tu'zí' xibé zxoá' za guizxi yu, en xisi lubá uva.

<sup>8</sup> Cate' rata', la' rásitia' lu yöl-la' riböza dxi ladxi' quia',  
tu' run cazu' Li', Xan, ga riböza' dxi'a tsáhui'do'.

## 5

<sup>1</sup> Ruzé nagu' didza' ruá'a, Xan.  
Buyú ca rinnëda' ládxa'a lu yöl-la' ruhuí'ini quia'.

<sup>2</sup> Dios quia', Nu rinná be'e neda', ruzé nagu' cate' rinábida' Li'  
gúcalenu' neda', na' güi'ilena' Li' didza'.

<sup>3</sup> Yugu' zila yönnu' chí'a.  
Zílado' idxina' lo', en cöza' didza' ubi'u.

<sup>4</sup> Nacu' Li' Dios bití' raza ládxi'u le cabí naca,

en biti' ru'u lataj ibiga' ga zu' nu ruá' dō'.

<sup>5</sup> Biti' ru'u lataj nupa tun ba rahui ila'dxín lo',  
en biti' rilé'enu' dxi'a nupa nácgaca xihui'.

<sup>6</sup> Rusunítu' dērō nupa ta'zǐ' ye'e luzé'eguequi,  
en biti' rilé'enu' dxi'a nupa tuti bōnachi, en ta'zǐ' yē'.

<sup>7</sup> Gaca tsu'a neda' lu yu'u lidxu', tu' nadxǐ'ide'enu' neda'.

Lu yōl-la' ba'a ladxi' quia' tsu'a ga naca yudo' lá'ayi quiu', en tseaj ládxa'a  
Li'.

<sup>8</sup> Tu' nacuá' zían nupa ta'lé neda', buluí'i neda' le naca dxi'a rē'ēnu' guna',  
Xan.

Busēdi neda' para gaca guna' ca rē'ēnu' Li'.

<sup>9</sup> Biti' gaca nu tseajlé' didza' tuí'i nupa na' ta'lé neda'.

Nácgaca xihui' icja ládxi'do'guequi.

Naca ruá'agaca ca tu yeru ba nayalaj,

en lu yōl-la' rizi' yē' quéguequi tuí'i yulaj didza'.

<sup>10</sup> Ben léguequi xiguia', Dios.

Ben ga biti' udxín xtídza'guequi.

Gurú'una léguequi tu' túntica'sō dul-la',

en tu' ta'dá'baga' xtídzu'u.

<sup>11</sup> Ulu'dzeja nupa tu'zxōni ladxi' Li'.

Lu yōl-la' rudzeja quéguequi gúl-lagaca quiu' tu' rácalenu' léguequi.

Tu'zǐ' xibó' nupa nadxǐ'igaca Li'.

<sup>12</sup> Run cazu' Li' ga raca dxi'a quégaca nupa tun ca rnna xtídzu'u, Xan.

Lu yōl-la' dxi'i ladxi' quiu' run chí'u léguequi.

## 6

<sup>1</sup> Biti' uzenu' bach neda' lu yōl-la' rilé quiu', Xan.

Biti' gunu' neda' xiguia' lu yōl-la' ridzá'a quiu'.

<sup>2</sup> Buéchi' ladxi' neda', Xan, tu' rudú ládxa'a.

Bun neda', Xan, tu' riguí'i rizáca'a.

<sup>3</sup> Rō'ō bōniga idútē le naca'.

¿Gáca'xte caz gaca caní, Xan?

<sup>4</sup> Gudá dusoló' neda', Xan.

Tu' nadxǐ'inu' neda', busōlá neda' lu yōl-la' guti.

<sup>5</sup> Lu lataj chul-la cuntu nu tsōjné Li'.

Cuntu nu zoa ni' nu gaca cu'u Li' yōl-la' ba.

<sup>6</sup> Rudú ládxa'a tu' rinnética'sō ládxa'a.

Yugu' dzō' ribisa le ráti'da' len nisa ribōdxi quia'.

Rusubisa' xcúgua' len nisa ribōdxi quia'.

<sup>7</sup> Rō'ō gui guiój lahua' tu' ribōdxitica'sa'.

Biti' gaca ilé'eda' tu' nōzigaca nupa tu'dí'i neda'.

<sup>8</sup> Guli'cuíta ga zoa', libí'ili', ruá'ali' dō',

tu' riyōnné' Xanru' ribōdxa' neda'.

<sup>9</sup> Ruzé' naguē' le rulidza', ráta'yua' lahuē',

en rubi'ē didza' cate' bi rinábida' Lē'.

<sup>10</sup> Ulu'tuí'i nupa tu'dí'i neda', en ila'bō' bōniga.

Lu yōl-la' rutuí'i quéguequi ulu'biga' ga zoa'.

## 7

<sup>1</sup> Ruzxōni ládxa'a Li', gácalenu' neda', Xana' Dios.

Busōlá neda' lu ná'agaca nupa ta'bia no neda', en gúcalen neda'

<sup>2</sup> para cabí soa nu cuéaj neda' ca runba' bēdxi guixi',  
en para cabí usuniti neda' ga cuntu nu zoa gácalen neda'.

<sup>3</sup> Xana' Dios, channō caní nuna':

Channō nabága'a xiguia',

<sup>4</sup> o channō bubí'a dō' que nu gúcalen neda',  
o channō bí'a dō' que nu bití' bi ben quia' lu bití' rilé'e neda' dxi'a,

<sup>5</sup> bē' lataj soa regu' neda' nu na' bití' rilé'e neda' dxi'a, en ucul-la neda'.

Bē' lataj nu na' quin neda' lu yu,

en ucá'ana neda' cá'asō.

<sup>6</sup> Lu yōl-la' rilé quiu' guyasa, Xan.

Gudá'baga' nupa na' lu yōl-la' ridzá'a quéguequi tá'baga' neda'.

Guyasa, gúcalen neda' tu' nacu' Nu ruchi'a rusörö le raca quia'.

<sup>7</sup> Ben ga ulu'dubi quiu' yúgu'tē bönachi,  
en gunná be'e léguequi ga ni' zu' xitsá'tērō.

<sup>8</sup> Ruchi'a rusöröu' quéguequi yúgu'tē bönachi, Xan.

Bubéaj neda' tsahui', Xan, tsca naca le tsahui' nuna', en tu' naca' idú  
tsahui'.

<sup>9</sup> Ben ga udxí que le xihui' tun nupa tuá' dō',

pero buzóa tsutsu nupa tun le naca dxi'a,

tu' nacu' Li' idú tsahui', Dios, en ruchi'a rusöröu'

le ta'zá' ládxi'gaca bönachi, en le ta'guínnaj ícaguequi.

<sup>10</sup> Naca cazē' Dios Nu run chi'i neda'.

Rusölē' nupa náca'gaca idú ládxi'.

<sup>11</sup> Dios ruchi'a rusöröē' queēru' ca naca le naca tsahui',

en richúgutica'sē' quégaca nupa tuá' dō'.

<sup>12</sup> Channō cabí ulu'bí'i ládxi' bönachi, utuchē' guíe tuchi' queē'.

Chinucözē' uxiti' yaga queē'.

<sup>13</sup> Chinupē'ē' yugu' le rudí'inē' lu gudil-la,

en nudxiē' lu du uxiti' yugu' yaga túchi'do' zoa guí' láhuiguequi.

<sup>14</sup> Buyútsöca', riguínnaj icjē' bönni' ru'ē dō' le xihui' gunē'.

Ruí'i ládxi'ē' le naca dō', en rizí' yē'ē.

<sup>15</sup> Nachō'önē' ga rē' tu yeru zxön ga nu ibixi,

pero lē' cazē' yōjbixē' lu yeru na' guchō'önē'.

<sup>16</sup> Budxín la' queézē' dō' na' bí'ē,

en dxiē' huē' ca naca xiguia' nabáguē'ē.

<sup>17</sup> Guía'-nē' Xanru': "Xclenu" tu' náquiē' tsahui',

en gul-la' yōl-la' ba que Lē' Xanru', Nu nayépisētērō.

## 8

<sup>1</sup> Xana' Dios,

bica' ba Lo' idútē yōdzölió!

¡Xitsá'tērō ca lúzhiba nayépisu' Li'!

<sup>2</sup> Túl-labi' bí'ido', enca' bí'i huē'énido' yōl-la' zxön quiu'

sal-la' nacuá' nupa ta'dá'baga' Li'.

Uzóa dxíu' nupa na' bití' ta'lé'e Li' dxi'a, enca' nupa ta'dá'baga' Li'.

<sup>3</sup> Cate' ruyúa' lúzhiba quiu', le nunu' len xibön na'zu',

enca' beu', en yugu' bōlaj bení' nuzú' xilátjaguequi,

<sup>4</sup> ní'irö rnnía': ¿Bizxi caz bönni', tu' röjné cazu' lē'?

¿Bizxi caz nu naca bönáchisö, tu' ru'í ládXu'u Li' nu na'?

<sup>5</sup> Nunu' ga naquië' bönni' ia'lati' cuidi' ca naca cazu' Li'.  
Nuzú' queë' yöl-la' ba quiu', en yöl-la' run bal ca  
tu le néquini oro dxía icjë'.

<sup>6</sup> Nunu' ga rinná bé'ené' yugu' le nun cazu' Li'.  
Yúgu'tè nuzú' xini'è lé'.

<sup>7</sup> Nuzú' xini'è yúgu'tèba' bö'cu' zxila', en yúgu'tèba' bédxi,  
<sup>8</sup> en lès caní nunu' ca' quégacaba' biguínido',  
en quégacaba' böla dzö'öba' nísado',  
enca' quégacaba' yúgu'tèba' böa' ta'dödiba' lu nísado'.

<sup>9</sup> ¿Xana' Dios,  
bica' ba lo' idütè yödZölió!

## 9

<sup>1</sup> ¡Idú ládxa'a rigu'a Li' yöl-la' ba, Xan!

¿Usiyönda' bönachi ca naca yúgu'tè yöl-la' huáca nunu'!

<sup>2</sup> ¿Udzéjada', en uzi'a xibó'!

¿Gul-la' yöl-la' ba que Lo', tu' nayépisëtëru'!

<sup>3</sup> ¿Ta'zxunnaj nupa ta'dá'baga' neda'!

¿Ta'dzö'ö, en tu'niti lo' Li',

<sup>4</sup> tu' nubéaju' tsahui' le naca dxi'a runa'!

¡Rö'u ga rinná bé'u, en ruchi'a rusöröu' queëtu' ca naca le naca tsahui'!

<sup>5</sup> Bulidza zi'u yugu' yödZö, en busunítu' nupa tuá' dö'.

Tsaz busulu' lu guichi quiu' gapa gula'zúaj léguequi.

<sup>6</sup> Chigula'niti nupa gula'dá'baga' Li'.

Tsaz naguínnajgaca gapa gula'cuá'.

Busunítu' yugu' yödZö gapa na' gula'cuá',

ate' cuntu nu zoa röjné yugu' yödZö na'.

<sup>7</sup> Zóatica'së' Xanru' Dios.

Naguijë' tsaz lataj ga rö'è rinná bé'è en ruchi'a rusöröë' quégaca bönachi.

<sup>8</sup> Uchi'a usöröë' quégaca bönachi yödZölió lu le naca tsahui'.

Uchi'a usöröë' quégaca yugu' yödZö lu le nácatë.

<sup>9</sup> Gun chi'è Xanru' Dios nupa nácacaga yechi'.

Gácalenë' léguequi cate' nu gun léguequi zi'.

<sup>10</sup> Ulu'zxöni ladxi' Li' nupa núnbë'gaca Lo'.

Caní gaca, Xan, tu' cabí nusán ládXu'u nupa tu'guilaj Li'.

<sup>11</sup> Guli'gul-la yöl-la' ba queë' Xanru', zoë' ga na' nazí'i le Sión.

Buli'siyön bönachi yugu' yödZö ca naca yugu' le nunë'.

<sup>12</sup> Bití' ral-la ládXë'è nupa ta'gu'í ta'zaca' cate' tu'lidza Lë',

tu' röjné léguequi Nu na' ruzí' lëbi nu ruti bönachi.

<sup>13</sup> Buéchi' ladxi' neda', Xan.

Buyú ca tun neda' zi' nupa tu'dí'i neda'.

Ruchisu' Li' neda' cate' chirequi gátia'

<sup>14</sup> para gaca usiyönda' bönachi yöl-la' ba quiu' Li'.

Ga naca ga nu tsaza yödZö quiu' nazí'i le Sión,

udzéjada' tu' nusöló' neda'.



15 Yöjbíxigaca bönachi yugu' yödzö lu yeru gula'chö'öna ga tsöjbíxigaca luzé'eguequi.

Bila'röli ni'aguequi lu yöxaj bulu'cachi' para ila'zön léguequi.

16 Chinuné' Xanru' Dios ga núnbé'gaca bönachi Lē' tu' buchi'a busöröē' quéguequi.

Lu lē' na' nun nu ruá' dö' zön la' cuinsi.

17 Ila'yaza lataj chul-la nupa tuá' dö', yúgu'tē nupa na' nal-la lādxi'gaca Dios.

18 Calēga tsaz ulu'gá'ana cá'asö nupa ta'yadzaj ta'yudxi, en bití' initi tsaz yöl-la' run löza quégaca nupa nácgaca yechí'.

19 Guyasa, Xan.

Bití' gu'u lataj tsépisē nu naca bönáchisö.

Buchi'a busörö quégaca bönachi yugu' yödzö.

20 Buxös léguequi, Xan.

Ben ga ulu'únbé' le nácgaca, tu' nácgacasö bönachi.

## 10

1 ¿Bizx que zu' zi'tu', Xan?

¿Bizx que rucachi' lo' cate' bi raca quia'?

2 Lu yöl-la' run ba rahui quégaca nupa tuá' dö' ta'bía no nupa nácgaca yechí'.

Ben ga ila'zön du yalaj na' nucáchi'gaca la' léguequisö.

3 Run ba zxön cuinë' bönni' ru'ē dö' ca naca le xihui' rizē lādxi'ē. Bönni' ruhuidi'nē' rulidza ditjé' luzé'ē, en ruzóē' Dios tsölá'alö.

4 Lu yöl-la' run ba zxön cuinë' bönni' huía' dö' bití' ru'í lādxi'ē Dios.

Rizá'asö lādxi'ē, rnnē': Bití' ca' zoa Dios.

5 Ruzí'ē xibé yúgu'tē le runē'.

Bití' ca' réquibe'enē' zoē' Dios Nu ruchi'a rusörö quégaca bönachi.

Ruzóē' tsölá'alö nupa bití' ta'lé'e lē' dxi'a.

6 Rē' la' cuinsē': "Gatga ichíxida'.

Catu caz bi gaca quia'."

7 Didza' ru'ē nácgaca le rudxía dö', enca' le rizí' yē', en le rudidza' yudxi yugu' luzé'ē.

Ru'ítica'sé' didza' le cabí' nácatē, en le naca xihui'.

8 Rucachi' cuinë' yugu' lu yödzö.

Bagáchi'sö rútiē' nupa bití' bi nabága'gaca.

Ruyúlanē' nu bi gaca gun que.

9 Ribözē' ga na' nucachi' cuinë' ca runba' bēdxi guixí'.

Ribözē' nu gaca sönē'.

Rizönē' bönni' yechí' lu du yalaj queē', en rá'ayöjē' lē' ga nagachi' queē'.

10 Riguinē' luyú nu na' nazönē'.

Zián nupa rucul-lē' len nē'ē nal-la.

11 Rē' la' cuinsē': "Nal-la lādxi'ē Dios.

Nucachi' lahuē', en bití' ca' rilé'enē' le runa'."

12 ¡Guyasa, Xan!

¡Gulís no'o, Dios!

¡Bití' gal-la lādxi'u nupa ta'gu'í ta'zaca'!

13 ¿Bizx que bönni' na' ru'ē dö' nuzóē' Dios tsölá'alö?

Gudxi' la' cuinsē': Bití' uzí' lē' Dios neda'.

14 Li' bilé'e quézinu' lë ni, Xan.

Ruí'i ládxi'u nu riguí'i rizáca', en nu risëbi ladxi',  
en zóatica'su' gácalenu' léguequi.

Nu naca bayechi' rigú'u cuini lu no'o, Xan,  
tu' zóatica'su' gácalenu' nu riyadza riyudxi.

15 Bugúa yöl-la' unná bē' quégaca nupa tuá' dō', en nácagaca xihui'.  
Bubí'i quéguequi ca naca xiguia' nabága'gaca.

16 Inná bē'tica'sē' Xanru' Dios.

Nupa tu'béaj ícaguequi Xanru' ulu'niti tsaz lu xiyú cazē'.

17 Ruzé nagu', Xan, le ta'nábini Li' nupa nácagaca do' ladxi'.

Rutipu' ládxi'guequi, en ruzé nagu' chí'iguequi.

18 Ruchi'a rusöröu' quégaca nupa nácagaca uzëbi,  
en nupa zoa nu ribía no léguequi,

para cabirö ulu'xösa bönachi yödzölió ni luzé'eguequi.

## 11

1 Ruzxöni ládxa'a Xanru' gácalenē' neda'.

¿Naru' guíétso' neda':

“Buzxunnaj lu guí'a ca runba' biguínido?”

2 Buyútsöca', zóngaca nupa tuá' dō' yaga uxiti'.

Nuzóagaca yágado' lahui tuchi' lu du rusé,  
para ilútiē' bagáchi'sö nupa nácagaca dxi'a.

3 Channö ila'guínnaj yugu' le tu'zóa tsutsu le naca dxi'a,

¿bizxi caz gaca gun nu naca tsahui'?

4 ¿Zoa cazē' Xanru' yudo' lá'ayi queé'!

Yehua' yubá zoa ga rö'ē rinná bē'ē Xanru' Dios.

Rilé'e guíöj lahuē' para uyúē' le tun bönachi.

5 Rizí' bē'ē Xanru' nu naca tsahui'.

Biti' rilé'enē' dxi'a nu ruá' dō', en nu raza ladxi' ta'dá'baga' yúlalui'.

6 Gunē' ga sáca'gaca nupa tuá' dō' le usuniti léguequi.

Ubi'ē quéguequi guí', en le ruquéla' guí', en tu bö' régui.

7 Caní gunē' Xanru' tu' náquiē' tsahui', en nadxi'inē' le naca tsahui'.

Nupa tun le nácate' ila'lé'e lahuē'.

## 12

1 Busölá neda', Xan, tu' cabirö zoa nitú nu naca dxi'a,

en bití' gaca nu idzöli nitú nu run ca rnna xtídza'a.

2 Ta'zí' ye'e yúgu'tē bönachi luzé'eguequi.

Lu yöl-la' rizí' yē' quéguequi tu'ílen luzé'eguequi didza' yúlajdo'.

3 Xan, buzóa dxisö nupa na' tuí' didza' yúlajdo',

en buzaga' ruí'igaca nupa tun ba zxön cuínguequi.

4 Ta'nná: “Gü'iru' didza' ca rizësö ládxi'ru',

ate' cuntu nu tá'baga' rē'u.

¿Nuzxi caz inná be'e rē'u ca naca didza' ruí'iru'?”

5 Rnnē' Xanru': “Na'a guída' tu' nacuá' nupa tun zi' nupa ta'yadzaj  
ta'yudxi,

ate' rinnē ládxi'gaca nupa ni tu' zoa nu ribía no léguequi.

Ca ta'zësö ládxi'gaca, la' guídatea' dusölá' léguequi.”

6 Huáca uzxöni ládxi'ru' didza' ru'ē Xanru'.

Nácagaca ca guíë plata ba nequi,  
le nudxi'a gadxi luzuí tu lu guí' lálë'e.

<sup>7</sup> Li' caz, Xan, gun chi'u léguequi,  
en usöló' léguequi lu ná'agaca nupa tuá' dö' na'a dza.

<sup>8</sup> Gáti'tës nacuá' nupa tuá' dö',  
cate' tun zxön bönachi le ruá' dö'.

## 13

<sup>1</sup> ¿Gáca'xte caz gal-la ládxa'u neda', Xan?

¿Naru' tsaz gal-la ládxa'u neda'?

¿Gáca'xte caz ucache' cuinu' lahua'?

<sup>2</sup> ¿Gáca'xte caz gun bayudxi guá' ilena' le réquida' zi'?

¿Gáca'xte caz huí'inida' rëla, en te dza?

¿Gáca'xte caz ucúl-lágaca neda' nupa ta'dá'baga' neda'?

<sup>3</sup> Buyú neda', Xan, en bubí'i didza'.

Butipa ládxa'a para cabí gátia'.

<sup>4</sup> Ní'irö biti' gaca ila'nná nupa ta'dá'baga' neda', biti' ila'nná: "Bucúl-laru'  
lë'."

Biti' gaca ulu'dzeja tu' nőtjada' ládxa'a neda'.

<sup>5</sup> Neda' ruzxöni ládxa'a yöl-la' dxi'i ladxi' quiu'.

Rudzéjada' tu' rusöló' neda'.

<sup>6</sup> Gul-la' queë' Xanru',  
tu' benë' quia' le naca dxi'a.

## 14

<sup>1</sup> Lu icja ládxi'da'ahuë' rnnë' bönni' tu' canöz, rnnë': Biti' zoa caz Dios.

Nachixi nanítigaquië' bönni' caní, en tunë' le cabí rilé'enë' dxi'a Dios.

Cuntu nu zoa nu run le naca dxi'a.

<sup>2</sup> Ga zoë' Dios yehua' yubá buyúë' luyú ni ga nacuá' bönachi

para ilé'enë' channö zoa nu réajni'i, nu na' riguilaj Dios.

<sup>3</sup> Yúgu'të' nadödigaquië' tsölá'alö.

Nachixi nanítigaquië' tu tuë'.

Cuntu nu zoa nu run le naca dxi'a, nitú bönachi.

<sup>4</sup> ¿Naru' cabí ta'yéajni'i nupa tuá' dö'?

Le tun nupa na' naca tsca tagu bönachi quia' ca nu ragu yöta.

Biti' ca' tu'lidza neda', Xángaca bönachi.

<sup>5</sup> Lu yöl-la' radxi ridzöbi quéguequi ta'zxizi

tu' ta'lé'e Xanru' Dios, en zóalenë' bönachi tsahui'.

<sup>6</sup> Tu'titaj xtídza'gaca nupa nácagaca yechi',

pero nupa ni tu'zxöni ladxi' gácalenë' Xanru' léguequi.

<sup>7</sup> Raca ládxa'a irúaj Sión Nu usölá bönachi Israel.

Cate' gunë' Xanru' ga ulu'dxín bönachi queë' nadzúngaca xilátjaguequi,

ulu'dzeja xzí'ini xí'sóë' Jacob, bönachi Israel, en ulu'zì' xibë' Dios.

## 15

<sup>1</sup> ¿Nuzxi caz bönachi tsöjsóa xilatju', Xan?

¿Nuzxi caz tsöjsóa ga naca lá'ayi quiu'?

2 Nu na' naca idú ladxi', en run le naca tsahui',  
en lu icja ládxi'da'ahui ruí'i didza' le nácatê.

3 Nu na' biti' rizi' quidza' bônachi,  
en biti' ruá' dō' que luzê'e,  
en biti' ruzê naga nu rizi' quidza' luzê'e.

4 Nu na' biti' run bal nu ruá' dō',  
pero run bal nupa tun zxôn Dios,  
en sal-la' bi uniti cate' chinún xtidza', biti' ca' rutsá' didza' na'.

5 Nu na' biti' rizi' icja dumí cate' runödzej dumí que tu chí'ido'sō,  
en biti' rizi' dumí para si' yē' ca naca le nun nu biti' nabaga' xigua'.  
Nu na' run yúgu'té le caní biti' ca' idzá' xilataja.

## 16

1 Ben chí'i neda', Dios, tu' ruzxóni ládxa'a Li'.

2 Lu icja ládxi'da'ahua' gudxa'-nē' Xanru':

“Li' nacu' Xana'.

Bíti'rō bi zoa quia' le naca dxi'a, pero tuzu' Li'.”

3 Riyaza ládxi'lēna' nupa nácatagaca queē' Dios luyú ni,  
en nupa nácatagaca idú ladxi'.

4 Ila'yán le ila'guí'i ila'zaca' nupa ta'yéaj ladxi' yugu' dios izá'a.  
Biti' ca' cu'a láhuiguequi rōn ca tun bônachi na',  
en biti' ulidza' lágaca dios na'.

5 Náquiē' Xanru' Dios Nu nabánida', en Nu ruzi'a xibé.

6 Li', Xan, nuzú' xilatja'.

Lataj na' nuzú' quia' naca le ruzi'a xibé,  
en lachi naca lataj na' nequi quia'.

7 Gul-la' yōl-la' ba queē' Xanru', Nu rigú'u yōl-la' neda' le naca tsahui',  
ga ridxintē ruzéajni'inē' neda' cate' ni' rasia'.

8 Chinuna' ga zóatica'sē' Xanru' lahua'.

Tu' zoē' cuita' biti' bi utsá' neda'.

9 Que lē ni na' budzeja ládxa'a, en buzi' xibé ládxi'da'ahua',  
atē' gun lōza le naca' cate' igácha'a yeru ba,

10 tu' cabí ucá'anu' neda' lataj chul-la,  
en biti' gu'u lataj uniti nu nequi quez quiu'.

11 Nunu' ga núnbē'a nōza ichē' neda' ga soa' ibana'.

Ga zu' Li' gata' quia' yōl-la' rudzeja idú,  
atē' cuitu' Li' uzí'tica'sa' xibó'.

## 17

1 Ruzê nagu' neda', Xan.

Lu le naca tsahui' quia' rulidza' Li'.

Bē' ladxi' le rinábida' Li' tu' cabí ca' rizi' yē'a.

2 Buchi'a busörō quia'

tu' runu' Li' le naca tsahui'.

3 Núnbē'u Li' le yu'u ládxi'da'ahua'.

Ruyú' neda' chí'i dzō'ölö.

Guzxi' bē'u neda', atē' burúaja' tsahui'.

Biti' ca' ruá'a didza' le cabí naca idú dxi'a.

4 Runa' ca rinná bē' xibá quiu',

en biti' ca' ruá'a dö' ca tun bal-la bönachi.

<sup>5</sup> Ridática'sa' la' nöza tsahui' quiu',

en biti' ca' ridöda' tsölá'alö.

<sup>6</sup> Rulidza' Li', Dios, tu' rubi'u didza'.

Ruzé nagu' yugu' didza' ruá'a.

<sup>7</sup> Buluf'i lahui yöl-la' dxi'i ladxi' quiu'.

Rusölá cazu' nupa tu'zxöni ladxi' Li'

lu ná'agaca nupa ta'dá'baga' léguequi.

<sup>8</sup> Ben chi'i neda' ca run chi'u la' guiöj lo cazu'.

Bucachi' neda' cuitu' Li' ca runba' böra, rucáchi'gacaba' börado' zxan xílaba',

<sup>9</sup> para cabí bi ilún quia' nupa tuá' dö',

nupa na' ta'lé neda', en nagú'ugaca neda' lé'ajlö.

<sup>10</sup> Biti' ca' zóalen léguequi yöl-la' ruhuéchi' ladxi',

ate' tuf'i didza' lu yöl-la' run ba zxön cuínguequi.

<sup>11</sup> Gátitës ga ridöda' ta'gú'u neda' lé'ajlö,

en tē'ēni ila'guín neda' luyú.

<sup>12</sup> Nácagaquiē' ca yugu' bēdxi guíxi'do'.

Tē'ēnē' ulu'sunítiē' neda'.

Nácagaquiē' ca yugu' bēdxi guixi'.

Nucachi' cuíngaquiē' para ila'zönē' neda'.

<sup>13</sup> Gudá, Xan, gudá'baga' nupa ta'lé neda', en bucul-la léguequi.

Busölá neda' lu ná'agaca nupa tuá' dö', ugunu' dxin guié tuchi' quiu'.

<sup>14</sup> Lu yöl-la' huáca zxön quiu' busölá neda', Xan,

lu ná'agaca nupa tu'zì' xibé na'a dza,

nupa na' nuhuölej nudzē'egaca yöl-la' tsahui' quiu'.

Nayángacabi' xzí'inigaquiē',

ate' tu'cá'anē' lu ná'agacabi' le dē sizzöni quégaquiē'.

<sup>15</sup> pero neda' ilé'eda' lo' tu' naca' tsahui',

en tsaza ládxa'a gaca' ca nacu' Li' cate' ubana'.

## 18

<sup>1</sup> ¡Nadxí'ide'eda' Li', Xan!

¡Li' rutipa cazu' ládxa'a!

<sup>2</sup> Ruzóē' Xanru' neda' tsutsu, en rapa chi'ē neda', en rusölē' neda'.

Náquiē' Dios quia', en Nu rutipa ládxa'a,

ate' ruzxöni ládxa'a Lē'.

Rácalenē' neda' lu gudil-la: Rusölē' neda', en rizönē' neda'.

<sup>3</sup> Rulidza'-nē' Xanru' Nu ral-la' cú'uru' yöl-la' ba,

ate' usölē' neda' lu ná'agaca nupa tu'dí'i neda'.

<sup>4</sup> Ia'látisö la' gútia',

ate' yöjbaga' neda' le usuniti neda', le ben ga gúdxida'.

<sup>5</sup> Ia'látisö la' yöjtsu'a lataj chul-la que yöl-la' guti,

tu' la' gútitia'.

<sup>6</sup> Lu le guca quia' bulidza'-nē' Xanru'.

Bulidza'-nē' Dios quia' para gácalenē' neda'.

Ga na' zoē' lataj lá'ayi queē' biyönnē' chi'a.

Buzé naguē' le gunabi yúdxida' Lē'.

<sup>7</sup> Ní'irö gudödi budó' xzu', en guzxizi luyú.

Guzxízida' xilíbigaca yugu' guí'a sibi.

Guzxízigaca tu' gulénë' Lë'.

<sup>8</sup> Birúaj dzön zxínë'ë,

ate' birúaj guí' ru'ë le buzegui le dë idú gásibi'ilë',

ate' buguela' guí' yugu' bo' yalaj.

<sup>9</sup> Benë' ga bôtaj lúxiba, en bôtajë' Lë cazë',

ate' guzóa xzan ni'ë le naca chul-la.

<sup>10</sup> Gudödë' lu bö'ös dxië' tu le nayëpisë nazí' i le querubín.

Carelö gudödë' tu lu bö' budunu'.

<sup>11</sup> Busubaga' cuinë' le naca chúl-lasö.

Lë na' naca böaj gasaj le richë'lë'e nisa.

<sup>12</sup> Lu le rëpi yösa queë' lu böaj gasaj na'

bila'rúaj bo' yalaj, en guiöj bögui' yöla sunna.

<sup>13</sup> Gunnë guziú' que chi'ë Xanru' lúxiba xitsá'.

Biyön chi'ë Dios nayëpisëtërë',

lu dzön, en yugu' lu bo' yalaj, en lu guiöj bögui' yöla sunna.

<sup>14</sup> Gusöl-lë'ë yugu' yaga lahui tuchi' queë', en bësilásië' nupa na' tu'dí' i neda'.

Gusöl-lë'ë yugu' yösa queë' yugu' le bulu'cul-la léguequi.

<sup>15</sup> Ní'irö bilá' lahui le zoa xzan nísado',

ate' bilá' lahui xilibi yödzölió,

cate' buzenu' bach nupa biti' ta'lé'e Li' dxi'a, Xan,

en lu yöl-la' rilé quiu' bulidza zí'u léguequi.

<sup>16</sup> Bötjë' zaca' xitsá'alö, en gudélë'ë neda'.

Bubéajë' neda' lu nisa zili.

<sup>17</sup> Busölë' neda' lu na' nu biti' rilé'e neda' dxi'a, en nál-latërö,

enca' lu ná'agaca nupa tu'dí' i neda', en nál-lágacatërö ca neda'.

<sup>18</sup> Cate' ni' chizóa inítia' gula'zóa régu'ë neda',

pero Xanru' gúcalenë' neda'.

<sup>19</sup> Bubéajë' neda', en buzóë' neda' tu lu lataj zxön.

Busölë' neda' tu' guyaza ládxe'ë neda'.

<sup>20</sup> Bubi'ë Xanru' quía' tsca le tsahui' naca',

en benë' quía' le naca dxi'a tu' cabí nabága'a xiguia',

<sup>21</sup> tu' runa' ca naca le rusëdinë' Xanru' neda',

en biti' ca' ridá'baga'a Lë'.

<sup>22</sup> Runa' ca ta'nná xibá nunë' Xanru',

en biti' ridá'baga'a le rinná bé' naguixjë' Lë'.

<sup>23</sup> Biti' bi le naca dö' nabága'a lahuë' Lë',

ate' ben chi'a le innía' para cabí gu'a dö'.

<sup>24</sup> Que lë ni na' bubi'ë Xanru' quía' tsca le tsahui' naca',

en tu' cabí nabága'a xiguia' lahuë' Lë'.

<sup>25</sup> Ruhuéchi' ládXu'u nupa tu'huechi' ladxi' luzë'eguequi,

en nacu' idú dxi'a len nupa náagaca idú dxi'a.

<sup>26</sup> Ruluí' i cuinu' idú ladxi' len nupa náagaca idú ladxi',

pero ridá'bagu'u nupa ta'dá'baga' xtídzu'u.

<sup>27</sup> Rusöló' nupa ta'guí' i ta'zaca',

pero ruzötju' nupa tun ba rahui.

<sup>28</sup> Ruquéla' cazu' guí' quía', Xana' Dios,

en rigú'u quía' bení' cate' ridá' ga chul-la.

29 Lu yöl-la' huáca queë' Dios rucul-la' bönni' guizxi yu röjáquië' gudil-la.

Tu' zóalenë' Dios quia' neda',  
rixítí'a ribixa' lu zö'ö run chi'i léguequi.

30 Idú dxi'a nácacaca le runë' Dios.

Nurúaj tsahui' xtídzë'ë.

Rapa chi'ë yúgu'të nupa ta'nábini Lë' gácalenë' léguequi.

31 ¡Tuzë' Xanru' náquië' Dios!

¡Tuzë' Dios rapa chi'ë rë'u!

32 Dios ni ruzalë' neda',  
en runë' ga naca' idú ládxa'a.

33 Runë' ga nácacaca ni'a ca ní'agacaba' bidxina' guixi',  
en ruzóë' neda' yugu' lu guí'a zxön.

34 Rusédinë' neda' para gaca tseja' gudil-la,  
en para gaca uguna' dxin uxiti' yaga néquini guié bronze.

35 Lu yöl-la' rusólá quiu' run chi'u neda'.

Len no'ó nál-la rizönu' neda',  
en lu yöl-la' dxi'i ladxi' quiu' nunu' ga nayëpisëtëra'.

36 Ruchi'u nöza ga ral-la' töda',  
en runu' ga biti' cuila'.

37 Guzóa régu'a nupa tu'dí'i neda', en bucul-la' léguequi.

Biti' buécja' ga bidxintë busunítia' léguequi.

38 Gudina' léguequi luyú, ate' biti' guca ulu'huöása.

Gula'dzö'ö zxañ ni'a.

39 Benu' neda' nál-la para tseja' gudil-la,  
en benu' ga bucul-la' nupa gula'dá'baga' neda'.

40 Benu' ga bulu'zxunnaj lahua' nupa biti' ta'lé'e neda' dxi'a,  
ate' busunítia' nupa na' bulu'dí'i neda'.

41 Bulu'lidza nu gácalen léguequi,  
pero cuntu nu zoa usólá léguequi.

Bulu'lidza ca' Xanru', pero biti' bubí'ë didza'.

42 Buzxuzxja' léguequi ca bëchtö yu nachë' lu bö'ös.

Buliba' léguequi ca ruliba' guna' la' nöza.

43 Busöló' neda' lu ná'agaca nupa ta'dá'baga',  
en nunu' ga rinná bé'eda' bönachi zían yödzö.

Tun ca rnna xtídza'a bönachi biti' núnbë'a zí'alö.

44 Cate' ta'yöni neda', la' tun ca rnna xtídza'a.

Tadxi neda' bönachi zían yugu' yödzö izá'a.

45 Ta'cuidi' ladxi', en lu yöl-la' rixxizi quéguequi  
ta'rúaj yugu' lu yödzö tsutsu quéguequi.

46 ¡Zoë' nabanë' Xanru'!

¡Yöl-la' ba Nu na' run chi'i neda'!

¡Guli'gún zxön Dios Nu rusólá neda'!

47 Náquië' Dios Nu rizí' la nupa tu'dí'i neda',  
en runë' ga tadxi bönachi guizxi yu neda'.

48 Rusólë' neda' lu ná'agaca nupa biti' ta'lé'e neda' dxi'a.

Le nácatë runë' ga rucul-la' nupa ta'dá'baga' neda',  
en rusólë' neda' lu na' bönni' ridzá'a.

49 Que lë ni na' guía' Li: Xclenu' Xan, lógaca bönachi zían yödzo, en gul-la' yöl-la' ba que Lo' La'ayi.

50 Rusölá cazë' Xanru' bönni' rinná bē'ë uláz queë', en nadxí'tica'së' nu na' nabö cazë', nu na' naca David, en yugu' xzí'ini xi'sóë' ga idxinrö dza udxi.

## 19

1 Yugu' le nacua' lúzxiba tu'luí'i lo yöl-la' zxön queë' Dios, atë' yugu' le raca lu böös náca gaca bē' le nunë'.

2 Yugu' dza tu'zéajni'i, en yugu' dzö' tu'luí'i lo yöl-la' réajni'i.

3 Biti' zoa didza' tuí'i, en bití' riyón tu le ta'nná. Bití' riyón chí'iguequi.

4 Le tu'zéajni'i ridxín ga naguéla'të luyú, en le tu'sedi ridxín idútë yödzülió.

Ga na' nacua' nuzóë' Dios xilataj gubidza,

5 le naca ca tu bönni' utsaga nē'ë rirúajë' yu'u, en naca ca' ca tu bönni' nál-la rudzéjanë' cate' zéajë' carelö lu huitaj.

6 Ga naguela' lúzxiba rilén gubidza, en ridödi ga ridxintë ga ribía.

Bití' bi zoa le cabí rutsë'e gubidza na'.

7 Tshui' naca ca rinná bē'ë Xanru', en run ga huóaca ládxi'ru'. Idútë li naca didza' nuzóë' Xanru', le run ga réajni'i nu naca nöxaj ladxi'.

8 Tshui' náca gaca xibá queë' Xanru', le tun ga rudzeja ládxi'ru'. Náca gaca idú dxi'a le gunná bē'ë Xanru', en ta'gú'u bení' icja ládxi'do'oru'.

9 Dxi'ado' naca gádxiru'-në' Xanru', para sóatica'siru'.

Idú li naca ca ruchi'a rusöröë' Xanru' bönachi, en idú tshui'.

10 Nazáca'gacatërö didza' na' ca oro, enca' ca oro ba nequi.

Náca gacatërö zxixi ca bidxina' buz, en ca le zxixi queëba'.

11 Didza' na' tu'zéajni'i neda', huen dxin queë'.

Uzí'tërö xibé nu run ca rnna xtídzë'ë na'.

12 ¿Nuzxi caz gaca inöz channö richixi rinigui?

Busölá neda' lu dul-la' nuna' le cabí gúquibe'eda' bena'.

13 Ben chí'i neda' para cabí udödi cuina' lu dul-la', para cabí inná be'e neda' lë na' naca dul-la'.

Ní'irö ugá'ana' tshui', en bití' ibága'a xiguia'.

14 Ben ga ilaca didza' ruá'a, en le rizá' ládxa'a ca raza ládxi'u Li'.

Nacu' Xana' ruzú' neda' tsutsu, en ruhuóá'au' neda'.

## 20

1 Rinábida'-në' Xanru' uzë naguë' li' cate' idxín dza qui'i sacu'u. Dios queë' Jacob gácalenë' li'.

2 Rinábida'-në' isól-lë'ë le gácalen li' le irúaj lataj lá'ayi queë'.

Lë na' irúaj Sión gun ga gacu' tsutsu.

3 Rinábida'-në' tsöjnenë' yúgu'të le gulú'u queë', en si' lu në'ë le buzégui'u lahuë'.

4 Rinábida'-në' gunné' quiu' tscá naca le rizé ládxi'u, en guné' ga gácatë yúgu'të le rizá' ládxi'u.



5 Udzéjatu' cate' usölë' li',  
 en uchísatu' le gaca bë' rulidztu'-në' Dios queéru'.  
 Rinábida'-në' Xanru' gunnë' quiu' yúgu'të le rinábinu' Lë'.  
 6 Na'a nõzda' rusölë' Xanru' nu nabõ cazë'.  
 Riyõnnë' nu na' nabõë' ga ni' zoë' yehua' yubá la'ayi queë'.  
 Isól-lë'ë yöl-la' huáca idú queë' le usólá nu na'.  
 7 Nacuá' nupa tu'zxõni ladxi' yugu' carreta que gudil-la,  
 ate' nacuá' bõnachi yúbölö tu'zxõni ladxi' yugu' böa',  
 pero rë'u ruzxõni ládxi'ru' Lë' Xanru' Dios.  
 8 Ta'cuídi'në' nupa na', en ta'dzõ'ë,  
 pero rë'u ni zuíru', en zóaru' tsutsu.

9 Busólá netu', Xan, tu' nacu' Nu rinná be'e netu'.  
 Rinábitu' Li' uzë nagu' netu' cate' ulídzatu' Li'.

## 21

1 Rudzéjanë' bönni' rinná bë'ë tu' zóalen lë' yöl-la' huáca quiu' Li', Xan.  
 Tu' busóló' lë', yënni'tërö rudzéjanë'.  
 2 Bunõdzju' queë' le rizë ládxi'ë.  
 Biti' gudá'bagu'u le gunábinë' Li'.  
 3 Tu' raza ládxi'u lë' ruzú' queë' yugu' le naca dxi'a.  
 Nudxiú' icjë' tu le néquini oro idú.  
 4 Gunábinë' Li' gu'u queë' yöl-la' na'bán, ate' bë'u le queë'.  
 Nunu' ga sóatica'së' ibanë' yugu' dza si' zaca.  
 5 Zxõntë naca yöl-la' zxõn queë' tu' nusóló' lë'.  
 Nunu' lë' bal, en nunu' ga nayëpisë'.  
 6 Zóatica'sö le naca dxi'a nuzú' queë'.  
 Runu' ga rudzéjade'enë' tu' zóalenu' lë'.

7 Caní raca queë' bönni' na' rinná bë'ë tu' ruzxõni ládxi'ë Xanru'.  
 Biti' bi utsá' lë' tu' ruhuéchi' ládxi'ë Dios nayëpisëtë'rë' lë'.

8 Huadeli' no'o ga nacuá' yúgu'të nupa ta'dá'bagá' Li'.  
 Huadeli' no'o ibëla ga nacuá' nupa tu'dí'i Li'.  
 9 Cate' idxín dza usiúdxu' léguequi gaca quéguequi ca tu guí' ruzegui bla'do'.

Usunítu' léguequi, Xan, lu yöl-la' rilé quiu',  
 ate' tséguiguequi tu lu guí' zxõn.  
 10 Ucuítu' yugu' xzí'ini xi'sóagaca nupa na' luyú ni,  
 en ubéaju' yugu' xzí'iniguequi ládjagaca bõnachi.  
 11 Caní gunu' tu' gulë'éniguequinë' ilu'ë dö' quiu'.  
 Gulún xtídza'gaquië' bi ilunë', pero biti' gaca ilunë' ca rnna xtídza'gaquië',  
 12 tu' gunu' Li' ga ulu'zxúnnejë'.  
 Ichisu' uxiti' yaga quiu', en gunu' léguequi huë'.  
 13 Len yöl-la' huáca quiu', Xan, uxicju' lu gudil-la.  
 Gúl-latu', en cú'utu' yöl-la' ba que yöl-la' huáca quiu'.

## 22

1 Dios quia', Dios quia', ¿bizx que nusán no'o neda'?  
 ¿Bizx que bití' riyõnnu' le rinnëda' ládxa'a, en bití' rácalenu' neda'?  
 2 Dios quia', idú dza rulidza' Li', pero bití' bi didza' rubi'u.

Idú yëla rulidza', en bití' ca' rasia'.

<sup>3</sup> Lá'ayi nacu' Li'.

Zu' ga riyón yöl-la' ba ta'gú'u bönachi Israel Li'.

<sup>4</sup> Bulu'zxöni ládxe'ë xuz xtó'otu' Li'.

Bulu'zxöni ládxe'ë Li', ate' busöló' légaquië'.

<sup>5</sup> Bulu'lidzë' Li', ate' gúcalenu' légaquië'.

Bulu'zxöni ládxe'ë Li', en bití' bulu'tuí'inë'.

<sup>6</sup> Naca' neda' ca tuba' bëla guna', en calëga bönni'.

Tu'dí'i bönachi neda', en tu'cá'ana neda' cá'asö.

<sup>7</sup> Yúgu'të nupa ta'l'é'e neda' tu'titaj neda'.

Ta'salaj ru'iguequi lu yöl-la' rutitaj, en tu'tá'ícjaguequi, ta'nná:

<sup>8</sup> "Lë' buzöni ládxe'ë Xanru' para usölë' lë'.

Xanru' usölë' lë' channö tsaza ládxe'ë lë'."

<sup>9</sup> Nacu' Li' Nu guléaj neda' lë'ënu xiná'a.

Benu' ga ruzxöni ládxa'a Li'

cate' ni' gúdx'a'a luchú'unu xiná'a.

<sup>10</sup> Nagá'ana' lu no'o Li' ga gudéla'të gulja'.

Ga gudéla'të buzóanu xiná'a neda' nacu' Dios quia'.

<sup>11</sup> Bití' su' zí'tu' ga ni' zoa', tu' zoa' gagu le gun neda' zí',

ate' cúnturö nu zoa nu gácalen neda'.

<sup>12</sup> Gula'gu'ë neda' lë'ajlö ca tunba' yugu' bëdxi.

Ca yugu' bëdxi que yödzo Basán gula'bía di'ë neda'.

<sup>13</sup> Ta'salaj ru'ágaquië' lahua' neda'

ca runba' bëdxi guixi', ridunba', en ribödxi'aba'.

<sup>14</sup> Nuhuóaca' ca nisa nalalaj luyú, ate' nazángaca bëch dxita quia'.

Nuhuóaca ládxi'da'ahua' ca bidxina' buz la lu lë'a.

<sup>15</sup> Nacuidi' yöl-la' huáca quia' ca tu rö'ö nalá'a,

ate' da' lúdx'a'a chichja'.

Nuzú' neda' lu bëchtö yu que yöl-la' guti.

<sup>16</sup> Ta'gu'ë neda' lë'ajlö ca tunba' yugu' bö'cu'.

Nagú'ugaquië' neda' lë'ajlö bönni' tu'ë dö'.

Nuzóagaquië' yeru blaga na'a, en ni'a.

<sup>17</sup> Nalá'gaca yúgu'të dxita néquinida'.

Ta'në'ë neda', en tu'yú yënnië' neda'.

<sup>18</sup> Ta'guísië' zxa' que queëgaquië',

en tu'yúë' le gaca bë' lahui lari' rixóa cúdza'a.

<sup>19</sup> Bití' gá'anú' zí'tu', Xan.

Gúcalentë neda', Li', Nu naca yöl-la' huáca quia'.

<sup>20</sup> Busölá neda' lu guíë tuchi'.

Busölá yöl-la' na'bán quia' lu ruá'agacaba' bö'cu'.

<sup>21</sup> Busölá neda' lu ruá'agacaba' bëdxi guixi',

en lu lúzugacaba' bëdxi gú'una.

Li' riyón quézinu' chí'a.

<sup>22</sup> Usiyönda' yugu' böchi' luzá'a ca naca Lo'.

Gatsaj láhui'lö ga na' tu'dubi bönachi lo' cu'a Li' yöl-la' ba.

<sup>23</sup> ¡Guli'cu'ë Xanru' yöl-la' ba, libí'ili' na' rádxili'-në'!

¡Guli'gun zxön Lë', yúgu'tëli' zxi'ini xi'sóé' Jacob!

¡Guli'gadxi Lë', yúgu'tëli' zxi'ini xi'sóé' Israel!

<sup>24</sup> Caní ral-la' gunli' tu' cabí bucá'anë' cá'asö,

en bití' budí'inë' nupa gula'guí'i gula'zaca',

en bití' bucachi' lahuë' para cabí ilé'enë' léguequi,  
pero cate' bulu'lidza Lë', biyönnë' léguequi.

<sup>25</sup> Cu'a Li' yöl-la' ba ga tu'dubi bönachi guizxi yu lo'.  
Lógaca nupa tadxi Li' usudxina' le guzxi' lu na'a guna' quiu'.

<sup>26</sup> Ilágugaca nupa nácagaca nōxaj ladxi', en ulu'huölaj ulu'dzë'e.  
Nupa ta'guilaj Xanru', en ta'gú'u Lë' yöl-la' ba ulu'zí'tica'sö xibë'.

<sup>27</sup> Bönachi idütë yödzölió tsöjnégaca Xanru', en ulu'huöáca queë'.  
Bönachi yúgu'të yödzö luyú ila'gú'u Lë' yöl-la' ba.

<sup>28</sup> Caní gaca tu' dë lu në'ë Xanru' inná bë'ë.  
Inná bé'enë' yúgu'të bönachi luyú.

<sup>29</sup> Yúgu'të nupa dë lu ná'agaca luyú ni ilágugaca, en ila'gú'u Lë' yöl-la' ba.  
Yúgu'të nupa ila'niti ulu'zechu zxfbigaca lahuë' Lë',  
nupa na' bití' ca' gaca ilún chí'i yöl-la' na'bán queéguqui.

<sup>30</sup> Zxi'ini xi'sóali' ilún xichinë'.  
Ila'guixjö' lë ni ca naca queë' Xanru' para ila'yöni nupa tsöjsëtégaca luyú  
ni.

<sup>31</sup> Ilidë', en ulu'luí'inë' lahui náquië' Xanru' tsahui'.  
Ulu'siyönnë' ca' nupa ral-la' ilalaj ca naca yugu' le benë' Lë'.

## 23

<sup>1</sup> Ruyú cazë' Xanru' Dios neda' ca tu nu ruyú bö'cu' zxila'.  
Bití' bi riyádzjada'.

<sup>2</sup> Runë' ga ruzí' ládxa'a ca túngacaba' bö'cu' zxila' tu'zí' ládxi'ba' gapa dëda'  
le iláguba'.

Ga naca ra' nisa rizá' tsahui' ládxi'do' richë'ë neda'.

<sup>3</sup> Runë' ga ruhuöáca ládxa'a.  
Richë'ë neda' ga naca nöza tsahui' tu' nadxi'inë' neda'.

<sup>4</sup> Sal-la' ridá' ga zoa bönadxi gátia',  
bití' bi gádxida' tu' zóalen cazu' neda', Dios.  
Len xiyaga quiu', en no'o rutipu' ládxa'a.

<sup>5</sup> Ga nacué' nupa ta'zóa regu' neda', ni' rucú'u quia' le gahua'.  
Rigú'u icja' le za rilá' zxixi, en ruliru' le guí'jada'.

<sup>6</sup> Le nácate' dusóalengaca neda' le naca dxi'a,  
en yöl-la' dxi'i ladxi' queë' yúgu'të dza soa' ibana',  
ate' lu yu'u lidxë' Xanru' sóatica'sa'.

## 24

<sup>1</sup> Nequi queë' Xanru' Dios luyú ni, en yúgu'të le dë lahui.  
Nequi queë' yödzölió, en yúgu'të nupa nacué' ni'.

<sup>2</sup> Naguixjë' le lahui nísado' rö'ö zxánilö,  
en nuzóë' xilibi luyú ga rë' zcan nísado'.

<sup>3</sup> ¿Nuzxi caz bönni' dë lu në'ë cuenë' guí'a lá'ayi queë' Xanru'?'  
¿Nuzxi caz gaca tsaza lu lataj lá'ayi queë'?

<sup>4</sup> Huáca bönni' na' naca dxi'a ca runë', en ca rizá' ládxe'ë,  
bönni' na' bití' runë' bal budó' guiöj budó' yaga,  
en bití' rizí' yë'ë cate' rizí' lu në'ë bi gunë'.

<sup>5</sup> Gunë' Xanru' ga gaca dxi'a queë' bönni' na'.  
Caní gunnë' Dios, Nu rusölá lë', en náquië' tsahui'.

6 Caní nácagaca nupa ta'dxín lahuë' Dios,  
nupa na' ta'biga' lahuë' Dios quégaca zxi'ini xi'sóë' Jacob.

7 Guli'salaj ga nu riyaza yödzö la'ayi.  
Guli'salaj ga nu riyaza xilatjë' Dios le nuzóë' tsaz,  
ate' tsázië' Bönni' unná bë' nayépisëtëré'.

8 ¿Nuzxi caz Bönni' unná bë' nayépisëtëré' na'?  
Náquië' Xanru' nál-latëré', en nápatëré' yöl-la' huáca,  
Lë', Xanru', Nu rideli' lu gudil-la.

9 Guli'salaj ga nu riyaza yödzö la'ayi.  
Guli'salaj ga nu riyaza xilatjë' Dios le nuzóë' tsaz,  
ate' tsázië' Bönni' unná bë' nayépisëtëré'.

10 ¿Nuzxi caz Bönni' unná bë' nayépisëtëré' na'?  
Náquië' Xanru' Dios quéquequi ni'a në'ë guizxi yu.  
Lë' náquië' Bönni' unná bë' nayépisëtëré' na'.

## 25

1 Idú ládxa'a rulidza' Li', Xan.

2 Ruzxöni ládxa'a Li', Dios quia'.

Ben ga cabí utuí'ida',  
en cabí ulu'dzeja nupa biti' ta'lé'e neda' dxi'a.

3 Biti' ila'bö' böníga nupa tun löza Li',  
pero ulu'tuí'i nupa ta'dá'baga' xtídzü'u.

4 Buluí'i neda' le ré'ënu' guna', Xan,  
en buzéajni'i neda' le raza ládxi'u Li'.

5 Busedi neda' para guna' ca naca le naca idútë li quiu'.  
Tu' nacu' Dios, Nu rusölá neda'  
gúntica'sa' löza Li'.

6 Yöjné ca naca yöl-la' dxi'i ladxi' quiu', Xan,  
en yöl-la' ruhuéchi' ladxi' quiu', yugu' le nacuá'tica'sö.

7 Buniti lo neda' ca naca dul-la' bena',  
en le gudá'baga'a Li' cate' ni' zoa' iz cuidi' quia'.

Lu yöl-la' ruhuéchi' ladxi' quiu',  
en yöl-la' dxi'i ladxi' quiu' yöjné neda', Xan.

8 Náquië' Xanru' dxi'a tsahui', en li ladxi'.  
Que lë ni na' ruluí'inë' nupa tun dul-la' le ral-la' ilún.

9 Ca naca le naca tsahui' richë'ë Dios nupa nácagaca nöxaj ladxi',  
en ruluí'inë' nupa nácagaca do' ladxi' le ré'ënë' ilún.

10 Lu yöl-la' ruhuéchi' ladxi' queë', en yöl-la' rusudxín didza' queë',  
richë'ë Xanru' nupa tun ca rinná bë' xibá naguixjë',  
en ca naca didza' rucá'ana tsahui' nunë'.

11 Tu' nacu' dxi'i ladxi', Xan,  
buniti lo neda' ca naca dul-la' nuna', le naca dul-la' zxön.

12 Nupa tun bal Xanru'  
uluí'i quézinë' léguequi le naca dxi'a le ral-la' ilún.

13 Ulu'zí' xibé le naca dxi'a gunnë' quéquequi,  
ate' guequi quégacabi' zxi'ini xi'sóaguequi luyú ni.

14 Xanru' zóaléntica'së' nupa tun ca rnna xtídzë'ë,

en ruzéajni'inë' léguequi ca naca didza' rucá'ana tsahui' nunë'.

15 Ruyútica'sa' guídë' Xanru' gácalenë' neda',  
tu' usölë' neda' lu na' nu ré'ëni sôn neda'.

16 Buécja quia', Xan, en buéchi' ladxi' neda',  
tu' zoa' tuza', en nacuídi'da'.

17 Nayán le tu'quí'i tu'saca' neda'.  
Busölá neda' lu le ruúbi ruguí'i ládxi'da'ahua'.

18 Buyú ca riguí'i rizáca'a, en rudú ládxa'a.  
Buniti lo neda' ca naca yugu' dul-la' nabága'a.

19 Buyú ca nayán nupa tun neda' zi'.  
Buyú ca tu'dí'i neda'.

20 Ben chi'i neda', en busölá neda'.  
Biti' gu'u lataj utuí'ida' tu' ruzxöni ládxa'a Li'.

21 Ben ga ilún chi'i neda' le naca idú ladxi',  
en le naca li ladxi', tu' runa' löza Li'.

22 Buá'au' bönachi Israel,  
Dios lu yugu' le raca quéguequi.

## 26

1 Guléaj neda' tsahui', Xan, tu' runa' le naca dxi'a,  
en idú ládxa'a ruzxöni ládxa'a Li'.

2 Buyú lu icja ládxi'da'ahua', Xan, en guzxí' bë' neda'.

Buyú le rizá' ládxa'a, en le ribequi icja',

3 tu' richë' yöl-la' dxi'i ladxi' quiu' neda',  
ate' runa' ca naca le naca idütë li quiu'.

4 Biti' runa' tsözxön nupa ta'zí' yë',  
en bití' ridálëna' nupa tu'lúí'isö cuínguequi tsahui'.

5 Biti' raza ládxa'a udúbilëna' nupa tuá' dö',  
en bití' guna' tuz didza' len nupa náca gaca xihui'.

6 Richisa na'a lo' Li', Dios, cabí dxía dö' na'a,  
en idú ládxa'a ribíga'a lo bucugu quiu', Xan,

7 para gul-la' le guía' Li': "Xclenu"  
en usiyönda' bönachi ca náca gaca le zxön nunu'.

8 Nadxí'ida' yu'u lidxu' ga na' zu', Xan,  
enca' lataj ga na' yu'u bení' lá'ayi quiu'.

9 Biti' usunítíu' neda' tsözxön len nupa tun dul-la',  
en bití' gútiú' neda' len nupa tuti bönachi,

10 nupa na' ta'yaza ladxi' tuá' dö',  
en nacuí'tica'só ila'guizxaj dumí para ulu'rúaj tsahui'.

11 Gúntica'sa' neda' le naca dxi'a.  
Buzá' ladxi' quia', en buá'uó neda'.

12 Nuzóë' Dios neda' ga zoa' tsutsu ladja bönachi guizxi yu  
nudúbigaca queë' para cu'a-në' yöl-la' ba Xanru'.

## 27

1 Náquië' Xanru' Dios bení' quia', en Nu rusölá neda'.

¿Nuzxi caz ral-la' gádxida'?

Rapa chí'ë Xanru' Dios caz yöl-la' na'bán quia'.

¿Nuzxi caz gaca gun ga gadxi idzöbida'?

2 Cate' gula'dá'baga' neda' nupa tuá' dö' para iluti neda',  
nupa na' bití' ta'lé'e neda' dxi'a, en tu'dí'i neda',

yöjchëgu'gaca, en yöjbíxigaca.

<sup>3</sup> Sal-la' ila'dá'baga' neda' bönachi guizxi yu, bití' ca' tsaza yöl-la' radxi ládxi'da'ahua'.

Sal-la' ila'díl-lalen bönachi neda', naca' neda' tsutsu ladxi'.

<sup>4</sup> Tu le rinaba' lahuë' Xanru' Dios, lë na' güi'i ládxi'sa', le naca para sóatica'sa' lidxë' Xanru' yúgu'të dza soa' ibana', para gaca uyúa' yöl-la' lachi queë' Xanru' Dios, en para sa' ládxa'a ca naca queë' lu yu'u lá'ayi queë'.

<sup>5</sup> Cate' idxín dza soa bönadxi quia', ucáchë'ë Lë' neda' lu yu'u lidxë'. Ga nagachi' lu yu'u lidxë' ucáchë'ë neda'.

Uzóë' neda' tsutsu ca tu lu guiöjto'o.

<sup>6</sup> Gunë' ga ucul-la' nupa tu'dí'i neda', ate' lu yöl-la' rudzeja quia' códxi'atica'sa' cate' bí unödza' queë' lu yu'u lidxë'.

¡Gul-la' queë'! ¡Ön, gul-la' queë' Xanru' yöl-la' ba!

<sup>7</sup> Buzë nagu', Xan, cate' ulidza' Li'.

Buzá' ladxi' quia', en bubí'i didza' ca naca le inábida' Li'.

<sup>8</sup> Cate' Li' gudxu' neda': "Buguilaj neda'", idú ládxa'a bubí'a didza', gunniá': Uguilja' Li', Xan.

<sup>9</sup> Bití' ucachi' lo' lahua' neda'.

Bití' ta'bagu'u neda' lu yöl-la' rilé quiu'.

Li' nacu' Nu rácalen neda'.

Bití' ucá'anu' neda', en bití' usán no'o neda'.

Nacu' Dios, Nu rusólá neda'.

<sup>10</sup> Huáca ulu'sán ládxe'ë xuz xiná'a neda', pero uzí' cazë' Xanru' Dios neda'.

<sup>11</sup> Busedi neda' para guna' ca rë'ënu' Li', Xan.

Buluí'i neda' para guna' le naca tsahui', tu' nacua' nupa ta'dá'baga' neda'.

<sup>12</sup> Bití' usanu' neda' lu ná'agaca nupa bití' ta'lé'e neda' dxi'a para cabí ilún quia' le té'ëni.

Ta'dá'baga' neda' nupa ta'zí' yë',

en nupa té'ëni iluá' dö' quia'.

<sup>13</sup> Guzxí' lu në'ë Xanru' Dios gunë' ga ilé'eda' le naca dxi'a, en le naca tsahui' queë' ga nacua' nupa nabángaca.

La'tu' cabí réajlë'a lë ni, chiböaj ládxa'a.

<sup>14</sup> ¡Guli'gún lözë' Xanru'!

¡Guli'gaca tsutsu, en buli'tipa ládxi'li'!

¡Ön, guli'gún lözë' Xanru'!

## 28

<sup>1</sup> Rulidza' Li', Xan.

Nacu' Guiöj le ruzóa neda' tsutsu.

Ruzë nagu' chí'a, tu' channö usayju' ru'u, gaca' ca tu bönní' razië' lataj chul-la.

<sup>2</sup> Ruzë nagu' le rulidza' Li' cate' rinábida' Li' gácalenu' neda',

cate' richisa' na'a zaca' Lataj Lá'ayi ga na' zu'.

<sup>3</sup> Biti' ichë'u neda' tsözxön len nupa tuá' dö',  
en tsözxön len nupa nácgaca xihui',  
nupa na' tuí'i didza' dxi'a lahui' lógaca dzaga yu'u quéguequi,  
pero yu'u ládxi'do'guequi le cabí naca tsahui'.

<sup>4</sup> Bubí'i quéguequi tsca naca le tun, en tsca naca dö' ruí'igaca.  
Bubí'i quéguequi tsca naca le tun nē'eguequi.  
Bubí'i quéguequi tsca ral-la' gaca quéguequi.

<sup>5</sup> Caní gaca quéguequi tu' cabí tun bal le nunë' Xanru',  
en bití' tun bal le nun nē'ë.  
Uquínnajë' léguequi, en bití' ca' uchisë' léguequi.

<sup>6</sup> ¡Yöl-la' ba Xanru',  
tu' riyönnë' cate' rinábida' Lë' gácalenë' neda'!

<sup>7</sup> Xanru' caz náquië' yöl-la' huáca quia', en le run chi'i neda'.  
Ruzxöni ládxa'a Lë', ate' rácalenë' neda'.  
Que lë ni na' ruzí' xibë' ládxi'da'ahua',  
ate' gul-la' le guía' Lë': "Xclenu'."

<sup>8</sup> Naca cazë' Xanru' yöl-la' huáca quéguequi bönachi queë',  
en náquië' ca' Nu run chi'i Bönni' na' bubéajë' quez queë' para inná bē'ë.

<sup>9</sup> Busölá bönachi quiu', Dios, en ben ga gaca dxi'a quéguequi nupa  
néquiguequi quiu'.  
Ben chi'i léguequi ca run tu nu ruyú bö'cu' zxila', en guchë'tica'sö léguequi.

## 29

<sup>1</sup> ¡Guli'cu'ë yöl-la' ba Xanru', libí'ili', nácali' zxi'inigaquië' bönni'  
nayëpisëgaquië'!

¡Guli'cu'ë yöl-la' ba Xanru', en guli'guié': "Napu' yöl-la' huáca idú'!"

<sup>2</sup> ¡Guli'cu'ë yöl-la' ba Xanru' le ral-la' gata' que Lë' tu' náquië' lá'ayi!  
¡Guli'gún bal Xanru', tu' naca lachi le naca lá'ayi queë'!

<sup>3</sup> Riyón chi'ë Xanru' lu nísado'.  
Riyón chi'ë Xanru' nayëpisë' ca riyón guziú' rinnë.  
Riyón chi'ë Xanru' lu nísado'.

<sup>4</sup> Nál-latërö naca chi'ë Xanru'.  
Nayëpisëtërö chi'ë Xanru'.

<sup>5</sup> Chi'ë Xanru' rilá'a yugu' yaga zxön.  
Ön, chi'ë Xanru' riguitsaj yugu' yaga lu guí'a Líbano.

<sup>6</sup> Runë' Xanru' ga ta'xiti' guí'a ca tunba' bëdxido'.  
Ta'xiti' guí'a Líbano, en guí'a Sirión ca tunba' bëdx guí'a.

<sup>7</sup> Chi'ë Xanru' run ga rëpi yösa.  
Ruxizi chi'ë Xanru' la' guixi' ga dë lataj.

<sup>8</sup> Ruxizi chi'ë Xanru' la' guixi' nazí'i le Cades.  
<sup>9</sup> Chi'ë Xanru' run ga ta'bëquiba' bidxina' guixi' böa' huë'ënido' quégacaba',  
en run ga ta'guínnaj yúgu'të laga' dxíagaca yugu' yaga.

Lu yudo' queë' tuí'i didza' yúgu'të le nacua', ta'nná: "¡Yöl-la' ba Lë'!"

<sup>10</sup> Gurö'ë gunná bē'ë Xanru' cate' gurö'ö nisa lu iduté yödzölió.

Ön, rö'ë rinná bē'tica'së' Xanru'.

<sup>11</sup> Rutipë' Xanru' ládxi'do'gaca bönachi queë'.

Gunë' Xanru' ga gaca dxi'a quégaca bönachi queë',  
en gunë' ga ila'böza dxi'a tsáhui'do'.

### 30

<sup>1</sup> Guna' Li' zxön, Xan, tu' buchisu' Li' neda',  
en bití' bē'u lataj bi ilún quia' nupa bití' ta'lé'e neda' dxi'a.

<sup>2</sup> Rigu'a Li' yöl-la' ba, Xana' Dios,  
tu' bulidza' Li' gácalenu' neda', ate' bunu' neda'.

<sup>3</sup> Bubéaju' yöl-la' na'bán quia' lu yeru ba, Xan.

Runu' ga zoa' nabana', para cabí' tsu'a lataj chul-la ga dzö'ö nupa nátigaca.

<sup>4</sup> ¿Guli'gul-la yöl-la' ba queë' Xanru', libí'ili' néquili' quez queë'!

¿Guli'guië': "Xclenu'" ca naca Lë' le naca lá'ayi!

<sup>5</sup> Tu chí'isö rilenë',  
pero ruzá' ládxi'tica'së' queëru'.

Channö cödxiru' tu yëla,

lu yöl-la' rudzeja queëru' cödxí'aru' itö yu.

<sup>6</sup> Cate' guca dxi'a quia', ní'irö gunní'a':

"Gatga bi utsá' neda'."

<sup>7</sup> Tu' buzá' ládxi'u quia', Xan, buzú' neda' ga zoa' tsutsu,  
en cate' bucachi' lo', gurö'a böniga.

<sup>8</sup> Bulidza' Li', Xan,  
en gúta'yua' lo'.

<sup>9</sup> ¿Bizxi xibé uzi'tso' channö gátia', en tsöjtsázia'

lataj chul-la ga dzö'ö nupa nátigaca?

¿Naru' huácatsö cu'a Li' yöl-la' ba channö huóaca' bëchtö yu?

¿Naru' huácatsö ulu'a lo le naca idú quiu'?

<sup>10</sup> Ruzé nagu', Xan, en ruzá' ládxi'u quia'.

Gúcalen neda', Xan.

<sup>11</sup> Buí'nida', ate' benu' ga buyá'a lu yöl-la' rudzeja quia'.

Bugú' lari' cá'asö gúcu'a', en bugacu' neda' le ruzí'a xibé.

<sup>12</sup> Bil-la bö' naca caza' yöl-la' ba quiu', en bití' soa dxisö.

Guiética'sa' Li': "Xclenu'", Xana' Dios.

### 31

<sup>1</sup> Ruzxöni ládxa'a Li', Xan.

Bití' gu'u lataj utuí'ida'.

Tu' nacu' tsahui', busölá neda'.

<sup>2</sup> Ruzé nagu' quia', en rusöló' neda'.

Gacu' ca tu guiöjto'o ga soa' tsutsu,

en ca tu ga soa' dxi'a tsáhui'do' lu gudil-la.

<sup>3</sup> Nacu' Li' guiöjto'o ga zoa' tsutsu, en le run chí'i neda'.

Para gaca yöl-la' ba que Lo' guchë' neda', en buluf'i neda' le dxi'a guna'.

<sup>4</sup> Uhéaju' neda' lu du yalaj nucáchi'gaquië' bönni' tu'é dö',

tu' nacu' Li' yöl-la' nál-la quia'.

<sup>5</sup> Rigu'a lu no'o bö' naca caza'.

Böá'au' neda', Xan, Dios idú.

<sup>6</sup> Bití' rilé'eda' dxi'a nupa tun zxön budó' guiöj budó' yaga,

pero neda' ruzxöni ládxa'a Li', Xan.

<sup>7</sup> Udzéjada', en uzi'a xibé yöl-la' dxi'i ladxi' quiu',



tu' bilé'e quézinu' le gudí'i guzxáca'a.

Nöz quézinu' yugu' le raca quia'.

<sup>8</sup> Biti' bucá'anu' neda' lu na' nu bití' rilé'e neda' dxi'a,  
pero nuzú' neda' tu lataj ga zoa' tsutsu.

<sup>9</sup> Buzá' ladxi' quia', Xan, tu' zoa tu le raca quia'.

Lu yöl-la' ruhuí'ini quia' ribödxa', en rudú ládxa'a.

<sup>10</sup> Riyechi' dza quia' tu' ruhuí'inide'eda',

en tu' rinné ládxa'a, en riyechi' iz quia'.

Rudú ládxa'a tu' nōzi dö' nu'a,

ate' nadxita idútē le naca'.

<sup>11</sup> Tu' nōzi le gulún nupa ta'dá'baga' neda'  
naca' tu le run gadxi yugu' dzaga yu'u quia',

ate' nupa núnbé'gaca neda' tadxi neda'.

Nupa ta'lé'e neda' la' nōza ta'zxunnaj ga rizá'a.

<sup>12</sup> Nál-la ládxi'gaca neda' ca nál-la ládxi'gaca nupa chinátigaca.

Naca' ca tu rō'ō nayuzxaj naguinnaj.

<sup>13</sup> Biyōnda' didza' zi' ta'nné bōnachi zían quia' bagáchi'sō.

Gátitēs zoa le run gadxi neda'.

Tun xtídza'gaca bi ilún quia'.

Ta'zá' ládxi'gaca nacxi iluti neda',

<sup>14</sup> pero neda' ruzxōni ládxa'a Li', Xan.

Rnnía' nacu' Dios quia'.

<sup>15</sup> Yú'ugaca lu no'o yúgu'tē dza soa' ibana'.

Busölá neda' lu ná'agaca nupa bití' ta'lé'e neda' dxi'a,

en lu ná'agaca nupa ta'zóa regu' neda'.

<sup>16</sup> Lu yöl-la' ruzá' ladxi' quiu' buyú neda', huen dxin quiu'.

Lu yöl-la' dxi'i ladxi' quiu' busölá neda'.

<sup>17</sup> Biti' gu'u lataj utuí'ida', Xan, tu' rulidza' Li'.

Ben ga ulu'tuí'i nupa tuá' dö'.

Ben ga ila'cuá' dxisö lu yeru ba.

<sup>18</sup> Ben ga bití' gaca bi inná nu rizí' yē',

nu na' rinné zi' queē' bōnni' tsahui',

en run ba zxōn cuini, en rulidza ditaj luzē'e.

<sup>19</sup> ¡Bica' zxōn yöl-la' dxi'i ladxi' quiu',

lē na' napu' para gácalenu' nupa tadxi Li'!

Runu' caní quégaca nupa tu'zxōni ladxi' Li'

lógaca nupa tun ba zxōn cuíniguequi.

<sup>20</sup> Rucáchu'u légaquiē' ga na' zu' bagáchi'sō,

ga bití' gaca idxín nu bōnni' xihui'.

Run chí'u légaquiē' bagáchi'sō ga bití' gaca idxín didza' bizxaj.

<sup>21</sup> ¡Yöl-la' ba Xanru' Dios,

tu' buluí'inē' neda' ca nadxí'inē' neda' cate' ni' zoa' tu yōdzō

ga nagú'ugaquiē' lē'ajlō bōnni' tu'tíl-lalenē' neda'!

<sup>22</sup> Lu yöl-la' radxi ridzōbi quia' gunnía': "Ilútiē' neda' lo' Li', Xan",

pero biyōnnu' le gunábida' Li', cate' ni' bulidza' Li'.

<sup>23</sup> ¡Guli'dxí'i-nē' Xanru', libí'ili' néquili' queē'!

Rapa chí'ē' Xanru' nupa ta'yéajlē' Lē',

en rubi'ē' ca sa'yéaj queē' bōnni' run ba zxōn cuinē'.

<sup>24</sup> ¡Guli'gaca tsutsu, en buli'tipa ládxi'li',

yúgu'téli' na' runli' löza Xanru' Dios!

## 32

<sup>1</sup> ¡Bica' ba bönni' na' Dios buniti lahuë' lë' ca naca dö' bi'ë, en bugúë' dul-la' queë'!

<sup>2</sup> ¡Bica' ba bönni' na' Dios rnnë' biti' nabáguë'ë xiguia', en biti' zóalen lë' yöl-la' rizí' yë'!

<sup>3</sup> Cate' guzóa' dxisö ca naca dul-la' quia', budú ládxa'a tu' gunnética'sö ládxa'a.

<sup>4</sup> Rëla, en te dza buquí'i busácu'u neda', Dios.

Budú ládxa'a ca raca cate' rö' böchila.

<sup>5</sup> Ní'irö guxóalëpa' dul-la' nabága'a lo' Li', en biti' bucácha'a le xihui' bena'.

Gunnía': "Ixóalëpa' dö' bi'a lahuë' Xana", ate' buniti lo' neda' ca naca xiguia' gubága'a.

<sup>6</sup> Que lë ni na', núti'tës nu nunbë' Li', Dios, ral-la' ulidza Li' cate' dë lataj güi'ilen Li' didza'.

Cate' rö' nisa bach uyú ni, biti' ca' ideli' idxín ga zoa nu na'.

<sup>7</sup> Li' nacu' ga gaca ucachi' cuina' cate' zoa bönadxi quia'.

Li' caz gun chi'u neda' para cabí bi gaca quia'.

<sup>8</sup> Li' gunu' ga gúl-latíca'sa' quiu' Li' tu' rusólo' neda'.

Rnnë' Dios: "Neda' uzéajni'ida' li', en uluí'ida' li' le ral-la' gunu'. Usédida' li', en uyútica'sa' li'.

<sup>9</sup> Biti' gacu' ca tu böa' o tu mula cabí ta'yéajni'iba'.

Ral-la' cu'u guíë en du rú'ugacaba' para inná bé'enu' lé'gacaba'."

Channö cabí gunu' caní, biti' ca' ilunba' ca rë'ënu'.

<sup>10</sup> Zián le tun ga tu'huí'iniguequi nupa tuá' dö',

pero bönni' ruzxöni ládxe'ë Xanru' ilé'enë' yöl-la' dxi'i ladxi' queë'.

<sup>11</sup> Buli'dzéjalenë' Xanru', en buli'sí' xibë', libí'ili' nácali' tsahui' lahuë' Lë'.

Lu yöl-la' rudzeja queëli' guli'cödxí'a, libí'ili' nácali' idú dxi'a.

## 33

<sup>1</sup> Lu yöl-la' rudzeja queëli' guli'gul-la lahuë' Xanru', libí'ili' nácali' tsahui' lahuë' Lë'.

Nupa ná'cagaca tsahui' ral-la' ila'gú'u Lë' yöl-la' ba.

<sup>2</sup> Guli'guíë' Lë': "Xclenu'", quínnili' lë'e bihuél-la.

Guli'gul-la yöl-la' ba queë', quínnili' le zë chi du que.

<sup>3</sup> Guli'gul-la queë' tu le rul-la cubi.

Guli'quinnaj dxí'ado', en lu yöl-la' rudzeja queëli' guli'cödxí'a.

<sup>4</sup> Xtídzë'ë Xanru' naca idú tsahui', ate' idú ládxe'ë runë' yúgu'të bi runë'.

<sup>5</sup> Nadxí'inë' le naca dxi'a, en le naca tsahui'.

Nalá' lahui yöl-la' dxi'i ladxi' queë' Xanru' idútë yödzülió.

<sup>6</sup> Len didza' bé'ësë' Xanru', benë' lúzxiba,

en benë' yúgu'të böljaj bení' len bö' rirúaj ru'ë.

<sup>7</sup> Rutubë' nisa rö'ö nísado' para gaca ca tu guí'a.

Napa chí'ë nisa rö'ö zili ga na' nupé'ë xilataj.

<sup>8</sup> Yúgu'të bö'nachi ral-la' ila'dxí'i Xanru'.

Bönachi idútë yödzülió ral-la' ila'cuá' nöxaj lahuë' Lë'.

9 Bě'ēsē' didza' Xanru', ate' la' gúcatē ca na' gunně'.

10 Gunná bē'ē, ate' guca tsutsu le nunē'.

Runē' Xanru' ga tu' huōáca cá'asō didza' túngaca bōnachi yugu' yōdzō.

Runē' ga bití' ilaca le tē'ēni ilúngaca bōnachi.

11 Sóatica'sō tsutsu didza' nunē' Xanru'.

Le rizá' ládxe'ē ulu'gá'anatica'sō quéguequi xzí'ini xi'sóaru'.

12 Bica' bágaca bōnachi yōdzō na' náquiē' Xanru' cazē' Dios quéguequi, bōnachi na' nabō cazē' Dios para ilaca quez queē'.

13 Zoa cazē' Xanru' yehua' yubá, ruyúē' ga zóaru'.

Rilé'enē' le tun yúgu'tē bōnachi nacuá' idútē yōdzōlió.

14 Ga na' zoa cazē' ruyúē' idú gásibi'ilō,

en rilé'enē' yúgu'tē nupa nacuá' idútē yōdzōlió ni.

15 Nun cazē' Lē' ládxi'do'gaca yúgu'tēguequi.

Réajni'i quézinē' ca naca yúgu'tē le túngaca.

16 Biti' ca' ulē' bōnni' unná bē' nacuá' queē' bōnni' guizxi yu rōjáquiē' gudil-la.

Biti' ulē' bōnni' zoē' gudil-la tu' nál-latērē'.

17 Biti' nazaca' gunru' lōza bōa' para idéli'ru' lu gudil-la,

tu' cabí gaca usōlaba' nu bōnni' tu' nál-latērōba'.

18 Buli'yú, ruyútica'sē' Xanru' nupa tadxi Lē',

nupa na' tun lōza yōl-la' dxi'i ladxi' queē',

19 para usōlē' léguequi lu yōl-la' guti,

en para ugahuē' léguequi cate' tsu'u gubín.

20 Idú ládxi'ru' runru' lōza Lē' Xanru'.

Rácalen cazē' rē'u, en rapa chí'ē rē'u.

21 Rudzeja ládxi'lenru' Lē',

en uzxōni ládxi'ru' Lē', tu' náquiē' lá'ayi.

22 Lu yōl-la' dxi'i ladxi' quiu' gúcalen netu', Xan,

tu' runtu' lōza Li'.

## 34

1 ¡Innética'sa' queē' Xanru' náquiē' dxi'a!

¡Cú'utica'sa' Lē' yōl-la' ba!

2 Bō' naca caza' gun zxōn Xanru'.

Nupa nácacaca nōxaj ladxi' ila'yōni lē ni, en ulu'dzeja.

3 Guli'gú' zxōnē' Xanru' tsōzxōn len neda',

en tsōzxōn usiyōnru' bōnachi ca naca Lē' La'ayi.

4 Bulidza'-nē' Xanru', ate' bubi'ē didza' quia',

en busōlē' neda' lu yugu' le gúdxida'.

5 Nupa nácacaca queē' bila'dxín lahuē', en bulu'zí' xibē'.

Bíti'rō caz ulu'tuí' i nupa na'.

6 Bulidza'-nē' Xanru', ate' biyōnnē' quia' neda', bōnni' yechi',

en busōlē' neda' lu yúgu'tē le guca quia'.

7 Gubáz lá'ayi que ya'abá queē' Xanru' tapa chí'ē nupa tadxi Lē',

en tu'sōlē' léguequi lu yúgu'tē le raca quéguequi.

8 Guli'sí' bē'ē, ate' inōzili' náquiē' Xanru' dxi'a.

¡Bica' ba bōnni' ruzxōni ládxe'ē Lē'!

9 Guli'gadxi Xanru', libí'ili' nácali' quez queē',

tu' cabí bi ila'yadzaj nupa tadxi Lë'.

<sup>10</sup> Ta'yadzaj ta'yúdxiba' bédxi guixi', en ta'dunba',  
pero nupa tu'lidza Xanru' biti' ca' ta'yadzaj le naca dxi'a.

<sup>11</sup> Guli'dá libí'ili', bí'ido', en buli'zé nágali' xtídza'a.

Uzájni'ida' libí'ili' para gádxili'-në' Xanru'.

<sup>12</sup> ¿Nuzxi caz bönni' ré'ënë' soë' ibanë',  
en ré'ënë' soë' iz zían para uzi'ë xibé le naca dxi'a?

<sup>13</sup> Ben chi'i lúdxu'u para cabí gu'u didza' xihui',  
en para cabí si' yé'enu' luzó'o.

<sup>14</sup> Bucá'ana le cabí naca tsahui', en ben le naca dxi'a.

Bë' ladxi' cözu' dxi'a tsáhui'do',  
en ben bayudxi gunu' yugu' lé ni.

<sup>15</sup> Ruyútica'sé' Xanru' nupa nácgaca tsahui',  
en riyón quézine' cate' tu'lidza Lë'.

<sup>16</sup> Uzáguë'ë Xanru' xinözgaca nupa tuá' dö',  
en gunë' ga cuntu nu tsöjné léguequi.

<sup>17</sup> Nupa nácgaca tsahui' tu'lidza Xanru', ate' riyönnë' quéguequi,  
en rusölë' léguequi lu yugu' le raca quéguequi.

<sup>18</sup> Xanru' zóalen cazë' nupa tu'huí'ini ladxi',  
en rusölë' nupa nácgaca nöxaj ladxi'.

<sup>19</sup> Zían le rigu'í rizáqué'ë bönni' tsahui',  
pero Xanru' rusölë' lë' lu yúgu'të lë na'.

<sup>20</sup> Xanru' rapa chi'ë yúgu'të dxita yu'ë,  
ate' biti' gatsaj nitú dxita queë'.

<sup>21</sup> Le xihui' run nu ruá' dö' gun ga gati nu na',  
ate' ila'baga' xigua' nupa biti' ta'lé'e dxi'a le naca tsahui'.

<sup>22</sup> Xanru' caz ruhuóá'uë' bö' nácgaca caz huen dxin queë',  
ate' biti' irugu que nitú nupa na' tu'zxöni ladxi' Lë'.

## 35

### *Tu le bil-lë' David*

<sup>1</sup> Xana' Dios, gudá'baga' nupa biti' ta'lé'e neda' dxi'a.

Butíl-lalen nupa ta'díl-lalen neda'.

<sup>2</sup> Guzxón le gun chi'i neda' lu gudil-la,  
en gudá gácalenu' neda'.

<sup>3</sup> Guzxón yaga tuchi' quiu' para uzagu'u xinözguequi nupa ta'zóa regu'  
neda'.

Gudxi bö' naca caza' nacu' Li' Nu rusölá neda'.

<sup>4</sup> Ben ga ulu'tuí'i, en ulu'gá'ana cá'asö nupa té'ëni iluti neda'.

Ben ga ulu'huécaj, en ulu'gá'ana cá'asö nupa té'ëni iluí'i dö' quia'.

<sup>5</sup> Ben ga ilaca ca bëbu zxe café zeaj lu bö'ös,  
en ben ga ulaguë' gubáz lá'ayi que ya'abá quiu' léguequi.

<sup>6</sup> Ben ga gaca chul-la nöza yú'ugaca, en ga cuílágaca,  
ate' soa régu'ë gubáz lá'ayi quiu' léguequi.

<sup>7</sup> Bulu'cáchi' du yalaj le sön neda', en biti' bi nuna' quéguequi.

Gula'chö'öna yeru ga tsöjbixa', en biti' bi nuna' quéguequi.

<sup>8</sup> Ben ga idxín quéguequi tsárido'os le usuniti léguequi,  
en ben ga du yalaj na' bulu'cáchi' sön la' cuínguequi quez.

Ben ga ila'bixi lu yeru na' gula'chö'öna.

<sup>9</sup> Udzeja ladxí'lëna'-në' Xanru',

en uzi'a xibé yöl-la' rusölá queë'.

<sup>10</sup> Ila'nná dxita néquinida': "Xan, ¿nuzxi caz naca ca nacu' Li'?

Rusöló' nu riguí'i rizáca' lu na' nu nál-latêrô ca le.

Rusöló' nu riguí'i rizáca', en riyadzaj riyudxi lu na' bönni' ribanë' le nequi que."

<sup>11</sup> Ta'dá'baguë'ë bönni' xihui' neda', en ta'nnë' quia'.

Ta'nabi yúdxinë' neda' ca naca yugu' le cabí nözda'.

<sup>12</sup> Tu'bi'ë quia' le naca dô' cate' runa' le naca dxi'a, ate' ruhuí'inide'e ládxa'a.

<sup>13</sup> Pero neda' gúcua' lari' cá'asô cate' guláquië' huë'.

Bena' gubasa, en busaca' zi' bö' naca caza',

en uláz quéguequi bulidza'-në' Dios zían luzuí.

<sup>14</sup> Bu'ínide'eda' tsca guca luzá'a o bi'i böchi' caza' nu na' guca huë'.

Gurödxí yecha'a ca huí'inide'eda' channö gátinu xiná' caza',

<sup>15</sup> pero cate' guchixi guníguida' neda', bulu'dzéjade'e, en bulu'dubi tsözxön.

Yugu' bönni' na' bulu'cá'anë' neda' cá'asô bulu'dubë' para ilunë' ga cö'a baguí'i.

Yugu' bönni' na' biti' núnbë'a gulúnnatica'së' neda'.

<sup>16</sup> Bulu'saca' zi'ë neda', en bulu'titjë' quia'.

Lu yöl-la' rilé quégaquië' neda' gulagu zxea láyi'gaquië'.

<sup>17</sup> Xan, ¿gáca'xte caz uyú iná'asu' le tunë'?

Busölá neda' lu dô' tu'ë quia'.

Busölá neda' lu ná'agaquië' bönni' na' ná'cagaquië' ca yugu' bédxi guixi'.

<sup>18</sup> Guía' Li': "Xclenu'" lógaca bönachi zían ulu'dúbigaca quiu'.

Cu'a Li' yöl-la' ba ga nudúbigaca ziantë bönachi.

<sup>19</sup> Biti' gu'u lataj ulu'dzeja nupa ta'dá'baga' neda', en ta'zí' yë',

en biti' gu'u lataj ulu'titaj quia', nupa na' tu'dí'i neda', en biti' bi nuna' quéguequi.

<sup>20</sup> Catu caz tu'í didza' le gun ga soa dxisö didza' bizxaj.

Lu yöl-la' rizí' yë' quéguequi ta'nnë' quégaca nupa ta'bö' dxi'a tsáhuí'do' yödzölió ni.

<sup>21</sup> Bulu'salaj ru'iguequi, en gula'nnë quia', gula'nná:

"¡Ön, bilé' quézitu' le nunë'!"

<sup>22</sup> ¡Bilé' quézínú' Li' lë ni, Xan! ¡Biti' su' dxisö!

¡Biti' ucá'anú' neda', Xan!

<sup>23</sup> ¡Guyasa, Xan! ¡Busubán ládxi'u, Xan, para uchi'a usöróu' quia'!

¡Gúcalen neda', Xana' Dios!

<sup>24</sup> ¡Tu' nacu' tsahuí', buchi'a busörö quia', Xana' Dios!

¡Biti' gu'u léguequi lataj ulu'dzeja ni'a que le raca quia'!

<sup>25</sup> ¡Biti' gu'u léguequi lataj ila'nná:

"Ön, bidéli'ru' le guzé ládxi'ru'!"

¡Biti' gu'u lataj ila'nná: "Chibucúl-laru' lë"!"

<sup>26</sup> ¡Ben ga ulu'tuí'i, en ulu'gá'ana cá'asô nupa tu'dzeja cate' ruhuí'inida'!

¡Ben ga ulu'tuí'i, en ulu'gá'ana cá'asô nupa ta'dá'baga' neda'!

<sup>27</sup> ¡Ben ga ila'bödxí'a lu yöl-la' rudzeja quéguequi,

en ulu'zí' xibé nupa tu'í ládxi'gaca urúaja' tsahuí'!

¡Bë' lataj ila'nná'ca'sö: "Nayëpisëtêrë' Xanru' Dios, tu' raza ládxi'ë' gunë' ga gaca dxi'a quégaca huen dxin queë'!"

28 Ní'irö guna' ba nalí quiu', inníá': "¡Nacu' tsahui'!"  
en cu'a Li' yöl-la' ba idú dza.

### 36

1 Le naca xihui' ru'ílen bönni' nucá'anë' Dios lu icja ládxi'da'ahuë'.

Biti' ca' rádxinë' Dios.

2 Tu' run ba zxon cuinë'

réquinë' bití' nözinë' Dios nabáguë'ë lë' dul-la', en bití' ichúguië' Dios  
queë'.

3 Ru'ë didza' xihui', en rizí' yë'ë.

Bití' réajni'inë', en bití' runë' le naca dxi'a.

4 Cate' ni' dë' lu le ráti'në' rizá' ládxi'ë ca naca le xihui' gunë'.

Ruí' ládxi'ë gunë' le cabí naca dxi'a,

en bití' rusanë' runë' le naca xihui'.

5 Zxöntë' ca yehua' yubá naca yöl-la' dxi'i ladxi' quiu', Xan,  
ate' gúntica'su' ca rnna xtídz'u, tsca zoa yehua' yubá.

6 Naca tsutsu le tsahui' nacu' ca nácgaca tsutsu yugu' guí'a zxon quiu'.

Ca ruchi'a rusörö'u naca ca naca nísado', tu' cabí gaca nu gúnbë'e le.

Run chí' casu' bönachi, en yugu böa' guixi', Xan.

7 Nazáca'të' yöl-la' dxi'i ladxi' quiu', Dios.

Run chí'u yúgu'të bönachi ca runba' yöjede, run chí'iba' yugu' börado' zxan  
xílabá'.

8 Tu'huölaj tu'dzë'e bönachi quiu' le nayánda' lu yu'u lidxu',

ate' ruguí'ju' léguequi le naca yöl-la' dxi'i ladxi' quiu'.

9 Yúgu'të le nacua' nabánigaca Li'.

Tu' naca casu' bení' rilé'etu' bení'.

10 Bidxí'itica'sö nupa núnbë'gaca Li',

en ben le naca dxi'a quégaca nupa nácgaca tsahui'.

11 Bití' gu'u lataj bi ilún quia' nupa tun ba zxon cuínguequi,

en bití' gu'u nupa tuá' dö' lataj ulu'laga' neda'.

12 Nadzö'ögaca nupa tuá' dö'.

Déguequi luyú, en bití' ca' gaca ulu'huöása.

### 37

1 Bití' ubi uguí' ládxi'do'oli' tu' tu'zí'gaca xibé nupa tuá' dö'.

Bití' uzxé'eli' nupa bití' tun le naca dxi'a.

2 Huadóditë quéguequi ca raca que guixi' nacuadi,

en udxi quéguequi ca raca quégaca guíxi'do' narúgugaca.

3 Buli'zxöni ládxi'ë Xanru', en guli'gún le naca dxi'a.

Buli'gá'ana luyú queë', en guli'cöz dxi'a tsáhuí'do'.

4 Buli'sí' xibë' Xanru',

ate' gunnë' queéli' le rizé ládxi'li'.

5 Buli'dödi cuinli' lu në'ë Xanru'.

Buli'zxöni ládxi'ë Lë', ate' gunë' le gácalen libí'ili'.

6 Gun cazë' Lë' ga urúajli' tsahui', en gácali' ca bení',

en cate' uchi'a usöröë' queéli', gaca queéli' ca lahui' dza.

7 Guli'sóa dxisö lahuë' Xanru', en guli'cöza le gunë'.

Bití' cuéqui ícjali' tu' nözi bönni' ruzi'ë xibé,

bönni' na' ru'ë dö'.

8 Bítí'rö leli', en buli'sán yöl-la' ridzá'a.

Bití' ubi uguí' ládxi'do'oli' tu' gun lë ni ga guá'ali' dö'.

- 9 Dios caz uzáguë'ë xinözguequi nupa tuá' dö',  
pero nupa tu'zxoñi ladxi' Xanru', guequi quéguequi luyú.
- 10 Ia'láti'sö xidzé, en bíti'rö soë' böñni' na' ru'ë dö'.  
Uguíjali' xilatjé', pero bíti'rö soë' ni'.
- 11 Nupa náçagaca nöxaj ladxi', guequi quéguequi luyú,  
ate' ulu'zì' xibé yöl-la' tsahui' que.
- 12 Tun didza' nupa tuá' dö' bi ilúngaca quégaca nupa náçagaca tsahui',  
en lu yöl-la' rilé quéguequi tagu zxea láyi'guequi.
- 13 Ruzxidxi cazë' Xanru' quéguequi,  
tu' rilé'enë' dza udxi quéguequi.
- 14 Nupa tuá' dö' chigula'béaj guíë tuchi' quéguequi,  
en nuá'gaca uxiti' yaga quéguequi  
para ulu'xicja nupa ta'zaca' zì', en ta'yadzaj ta'yudxi,  
en para ilutí nupa tun le naca dxi'a.
- 15 Guíë tuchi' quéguequi ila'chiza la' ládxi'do'guequisö,  
ate' ila'guítsaj uxiti' yaga quéguequi.
- 16 Dxi'atërö le do' dësö queë' böñni' tsahui'  
ca le zían dë queë' böñni' ru'ë dö'.
- 17 Huayúzxjagaca ná'agaca nupa tuá' dö',  
pero Xanru' caz rácalenë' nupa náçagaca tsahui'.
- 18 Ru'í ladxi' cazë' Xanru' nupa biti' bi xigua' nabága'gaca,  
ate' guéquitica'sö xiyúgaca quéguequi.
- 19 Biti' ca' ulu'tuí' cate' idxín dza biti' gaca dxi'a,  
en cate' tsu'u gubín, gáta'dëra le ilágugaca.
- 20 Ulu'niti tsaz nupa tuá' dö',  
ate' nupa biti' ta'lé'e dxi'a Xanru' ilaca ca yöl-la' lachi que guixi'.  
La' töditë quéguequi, en ilaca ca dzön le rinítitë.
- 21 Ta'nábini nu bi gunna quéguequi tu chí'isö, pero biti' ca' ulu'b'fí' lë na'.  
Nu naca tsahui' ruzá ladxi' quéguequi, en runödzej quéguequi.
- 22 Gaca luyú quégaca nupa run lá'ayë' Xanru',  
pero ila'niti tsaz nupa rudxíë' Lë' dö'.
- 23 Le runë' böñni' dxi'a naca le nuluí'inë' Xanru' lë',  
ate' raza ládxe'ë Lë' le runë' böñni' na'.
- 24 Cate' röjtsö'ë, biti' ca' röjtsö'ë tsaz,  
tu' röjzönë' Xanru' caz böñni' na'.
- 25 Guca' ra'bando', pero na'a nagula',  
en catu caz bilé'eda' nusán në'ë Dios böñni' tsahui',  
en catu caz bilé'eda' riyadzaj le ilágubi' xzí'inë'.
- 26 Yugu' dza ruzá ládxe'ë böñni' tsahui' quéguequi luzë'ë  
en runödzjë' le ta'nábini lë' unödzjë' tu chí'isö,  
Náčagacabi' xzí'ini xi'sóë' tu le run ga raca dxi'a queëru'.
- 27 Buli'cá'ana le cabí nácatë, en guli'gún le naca dxi'a.  
Channö caní gunlí', sóali' tsaz,
- 28 tu' nadxí'inë' Xanru' nu run le naca tsahui',  
en catu caz usán në'ë nupa néquiguequi quez queë'.
- Gun chí'ítica'së' léguequi,  
pero usunítië' xzí'ini xi'sóagaca nupa tuá' dö'.
- 29 Guequi luyú quégaca nupa náçagaca tsahui',  
ate' ila'cuá'tica'sö luyú na'.
- 30 Ru'ë böñni' tsahui' didza' le napa yöl-la' réajni'i,

ate' raca yöl-la' ruchi'a rusörö ni'a que didza' na' ru'ë.

<sup>31</sup> Yu'u icja ládxi'da'ahuë' le gunná bē'ë Dios.

Que lë ni na' catu caz ichixi iníguinë'.

<sup>32</sup> Ruyuda' nu ruá' dö' le runë' bönni' tsahui',  
en rigulaj nacxi gaca guti lë'.

<sup>33</sup> Xanru' biti' gu'ë nu na' lataj bi gun queë' bönni' tsahui' na',  
en biti' gu'ë lataj irugu queë' cate' nu uchi'a usörö queë'.

<sup>34</sup> Buli'zxöni ládxe'ë Xanru', en guli'gún ca rē'ënē' gunli',  
ate' uchisē' libí'ili' para guequi queéli' luyú.

Cate' udxi quégaca nupa tuá' dö', hualé'e quézili' le.

<sup>35</sup> Bilé'eda'-nē' bönni' huía' dö'.

Gúquië' ca tu yaga zxön, en buzí'de'enē' xibé.

<sup>36</sup> Ní'irö gudödi queë', en bití'rö zoë'.

Yöjdilja' lë', pero biti' ca' guca udzölida' lë'.

<sup>37</sup> Buli'yú ca náquië' bönni' tsahui'.

Cuntu nu gaca bi innē' queë',

tu' ila'cuá'abi' zxi'ini xi'sóë' bönni' zxön ladxi'.

<sup>38</sup> Ulu'niti tsaz nupa tu' cá'ana le gunná bē'ë Dios.

Usiúdxë' Xanru' yugu' zxi'ini xi'sóagaca nupa tuá' dö',

<sup>39</sup> pero rusólá cazë' nupa nácagaca tsahui'.

Rutipë' ládxi'guequi cate' bi raca quéguequi.

<sup>40</sup> Rácalenē' léguequi, en rusölë' léguequi.

Rubéajë' léguequi lu ná'agaca nupa tuá' dö', en rusölë' léguequi,  
tu' tu'zxöni ládxi'guequi Lë'.

## 38

<sup>1</sup> Biti' ilenu' neda', Xan, en biti' uzenu' neda' bach.

Biti' gunu' neda' xiguaia' lu yöl-la' rilé' quiu'.

<sup>2</sup> Ben zi'u neda', en budxiú' neda' huë'.

Nuzötju' neda' len no'o.

<sup>3</sup> Yu'a yödzöhuë' zxön tu' rilenu' neda'.

Dxía huë' idütë' le naca' tu' nözi dul-la' nabága'a.

<sup>4</sup> Xiguaia' nabága'a naca ca tu nísado' ga ruchicja' nisa.

Naca ca tu yua' zi'i nabága'a neda'.

<sup>5</sup> Tu' bena' yugu' le cabí naca dxi'a,

dxía' huë' le rilá' siguti, en rudzu'.

<sup>6</sup> Narecji' cúdza'a, en nagá'ana' cá'asö.

Idú dza ruhuí'inide'eda'.

<sup>7</sup> Idütë' le naca' yú'uda'a xilá,

ate' nazxi xipéla'a.

<sup>8</sup> Rudú ládxa'a, en ricuídi'da'.

Rinnëda' ládxa'a tu' ruúbi ruguf'i ládxi'da'ahua'.

<sup>9</sup> Nöz quézinu' Lí', Xan, le rizé ládxa'a,

en riyönnu' le rinnética'sö ládxa'a.

<sup>10</sup> Richunchu ládxi'da'ahua', en ricuidi' ládxa'a,

ga ridxintë richul-la guiój lahua'.

<sup>11</sup> Bití'rö ta'dzaga neda' yugu' luzá'a, en yugu' böcha'a, tu' nözi xihuë'a,

ate' tu'biga' di'a dza quia' ga zoa'.

<sup>12</sup> Nupa tē'ëni iluti neda' ta'bequi le ila'zön neda',

ate' nupa tē'ëni ulu'cul-la neda' tun xtídza'guequi nacxi ulu'suniti neda'.

Idú dza ta'bequi ícaguequi bi ilún quia'.



13 Naca' ca tu bönni' nacödzuë', en bití'rö riyönda'.

Naca' ca tu bönni' narugu lúdxë'ë, en bití' risaljë' ru'ë.

14 Naca' ca tu bönni' bití'rö riyönnë',  
en que lë ni na' bití' bi didza' rubi'ë.

15 Tuzu' Li' ruzxöni ládxa'a, Xan.

Ubí'i cazu' didza', Xana' Dios.

16 Bití' gu'u lataj ulu'dzeja ni'a que le raca quia'.

Bití' gu'u lataj ilún ba zxon cuínguequi tu' nagá'ana' cá'asö.

17 Chizóa' tsöjbixa',

en zóalenticá'sö xihuë'a neda'.

18 Que lë ni na' rixóalëpa' xiguia' nabága'a,

en risëbida' ládxa'a tu' nözi dul-la' nabága'a.

19 Nacuá' dxi'a, en nál-lagaca nupa téqui neda' zi'.

Nayánda' nupa tu'dí'i neda', en bití' bi nuna' quéguequi.

20 Ta'dá'baga' neda' nupa tu'bí'i le cabí naca dxi'a que nu run le naca dxi'a.

Caní tun tu' ruí'i ládxa'a guna' le naca dxi'a.

21 Bití' usán no'o neda', Xan.

Bití' ubigu' ga zoa', Dios quia'.

22 Gudáchi gácalenu' neda', Xan,

tu' naca cazu' Li' Nu rusólá neda'.

## 39

1 Gunnía': Gun chí'i cuina' ca naca le runa',

en bití' guna' dul-la' ca naca didza' ruá'a.

Bití' bi didza' gu'a

cate' nacué' nupa tuá' dö' gal-la' ga zoa'.

2 Guzóa' dxisö, en bití' bë'a didza' ga bidxintë

bití' gunnía' le naca dxi'a, pero biyali' xihuë'a.

3 Bubi buguí'i ládxi'da'ahua',

en cate' guzá' ládxa'a que, guyegui gulá ládxi'da'ahua'.

Que lë ni na' gunábida'-në' Xanru', gunnía':

4 Xan, ¿gáca'xte caz soa' ibana'?

Buluí'i neda' tsca iz soa' ibana'.

Ben ga inözda' channö chizóa' caz gátia'.

5 Nabábasö dza nuzú' quia' soa' ibana'.

Yugu' iz soa' ibana' bití' bi zeaj naca lo' Li'.

Le nácatë bití' bi nácacaca yúgu'të bönachi nacué' luyú ni.

6 Nácacacasö ca tu zxul-la rigú'u böaj.

Nítisö tu'úbi tu'guí'i ládxi'do'guequi, en tun dxin.

Tu'tubi yöl-la' tsahui', pero bití' nözguequi nuzxi guequi que.

7 ¿Bizxi caz gaca guna' löza, Xan?

Ruzxöni ládxa'a Li'.

8 Busólá neda' lu xiguia' nabága'a,

en bití' gu'u lataj ulu'titaj quia' nupa nácacaca canöz.

9 Soa' dxisö, en bití' bi didza' gu'a,

tu' ben cazu' Li' ga riguí'i rizáca'a lë ni.

10 Bítí'rö gunu' neda' xiguia'.

Chizóa' gátia' tu' rusaca' zi'u neda'.

11 Runu'-në' xiguia' bönni' dul-la', en ruzenu' lë' bach.  
Ca tu'töba' bëlado' que le yú'uba', rusunítu' le ruí'i ládxe'ë bönni' na'.  
Biti' bi naca cazë' bönni' dul-la' na'.

12 Buzë' nagu' le rulidza' Li', Xan, en le rinábida' Li'.  
Biti' su' dxisó cate' ribödxa' lo' Li',  
en bití' gaca' ca tu bönni' zi'tu' lo' Li',  
en ca tu bönni' ridasë' ca guláquië' xuz xtó'otu'.

13 Benna neda' lataj idipa ládxa'a  
zí'aló ca uzá'a yödzólió ni, en bíti'ró soa'.

## 40

1 Lu yöl-la' riböza zxon ladxi' quia' gulöza' gácalenë' Xanru' neda'.  
Ní'iró buzë' naguë' quia', en biyönnë' le bulidza'-në'.

2 Bubéajë' neda' ca tu lu yeru ga rë', en lu guna' zili.  
Buzóë' neda' tu lu guiójtó'o, en guléquië' neda' tsutsu.

3 Busëdinë' neda' tu le cubi le rul-la' le naca yöl-la' ba queë' Dios queëru'.  
Zián nupa ila'lé'eni lë ni, en ilún Lë' zxon,  
ate' ulu'zxöni ladxi'-në' Xanru'.

4 Bica' ba bönni' ruzxöni ládxe'ë Xanru'.  
Biti' runë' tsözxön nu run ba zxon cuini, nu na' run zxon yugu' dios  
núngaca bönachi.

5 Ziántërö naca le nunu' queëtu', Xana' Dios, yugu' le tun ga rubánitu'.  
Ziántërö le yu'u icja ládxi'do'o ca naca le gunu' queëtu'.

Biti' ca' gaca nu ulaba lo' Li' tsca nácagaca.  
Channö guë'ënda' nu usiyönda' tsca nácagaca,  
nayántërö tsca le gaca ulaba'.

6 Biti' ré'ënu' gútigaca'-ba' böa' guixi' lo', en calëga bi cu'a lo'.  
Biti' rinabu' uzégui'gaca'-ba' böa' bëdxi lo',  
en calëga tu le guna' lo' para ugúa dul-la',  
pero gusalju' naga' para yönda' le guío' neda'.

7 Que lë ni na' gunnía': Ni zoa caza' neda' quiu'.  
Lu guichi lá'ayi quiu' nazúaj caz ca naca quia'.

8 Raza ládxa'a runa' ca ré'ënu' Li', Dios quia'.  
Nagu'a icja ládxi'da'ahua' xibá naguixju' Li'.

9 Ga tu'dubi bönachi guixzi yu quiu', Xan,  
busiyönda' léguequi nacu' tsahui'.

Biti' ca' guzóa' dxisó.  
Nöz quëzinu' lë ni, Xan.

10 Biti' bucáchi'za' icja ládxi'da'ahua' ca ruúnu' tsahui' bönachi.  
Bulu'a lahui ca runu' ca rnno', en ca rusöló' bönachi.  
Ga nudúbigaca bönachi quiu' bití' guzóa' dxisó,  
pero bë'a didza' ca nacu' dxi'i ladxi', en ca ru'u didza' le nácatë.

11 Biti' ugú' quia' yöl-la' dxi'i ladxi' quiu', Xan.  
Yöl-la' dxi'i ladxi' quiu', en ca runu' ca rnna xtídzu'u ilún chí'ítica'sö neda'.

12 Zián le raca quia' nagú'ugaca neda' lë'ajlò, le cabí' gaca nu ulaba.  
Nabága'a yugu' dö' bí'a, en bíti'ró gaca ilé'eda'.

Nayanró ca guitsa' icja', ate' rudú ládxa'a.

13 ¡Busölá neda', Xan!

¡Gudáchi gácalenu' neda', Xan!

14 Ben ga ulu'tuí'i, en ila'bó' baguí'i  
nupa na' té'ëni ulu'suniti neda'.

Ben ga ulu'huécaj, en ulu'gá'ana cá'asö  
nupa na' té'ëni gaca quia' le cabí naca dxi'a.

15 Ben ga ulu'dú ládxi'gaca tu' nabíxigaca  
nupa na' tu'titaj neda', ta'nná: "¡Buyútsöca' le raca queë'!"

16 Ben ga ulu'dzeja, en ulu'zí' xibó' yúgu'té nupa tu'guilaj Li'.  
Ben ga ila'nnática'sö nupa ta'dxi'i yöl-la' rusólá quiu',  
ila'nná: "Nayépsëtèrè' Xanru'."

17 Nacuídi'da', en bití' bi gaca guna',  
pero ruí'i ladxi' casu' Li' neda', Xan.

Naca casu' Nu rácalen neda', en Nu rusólá neda'.  
Bití' tsenu' guídu' quia', Dios quia'.

## 41

1 Bica' ba bönni' ruí'i ládxi'ë nupa nácagaca yechi'.

Xanru' gácalen cazë' bönni' na' cate' bi gaca queë'.

2 Xanru' Dios gun chi'ë lë', en gunë' ga soë' ibanë'.  
Gunë' ca' ga uzi'ë xibé xiyú cazë'.

Bití' usán në'ë lë' lu ná'agaca nupa bití' ta'lé'e lë' dxi'a.

3 Xanru' utipë' ládxi'ë bönni' na' cate' ré'enë'.

Uchisé' lë' lu da'a le ráti'në', en gunë' ga soë' dxi'a.

4 Gunnía': Bena' dul-la' lo' Li', Xan.

Buéchi' ladxi' neda', en bun neda'.

5 Nupa bití' ta'lé'e neda' dxi'a ta'nnë quia', ta'nná:  
"¿Bátaxi gátië', en huáca gal-la ládxi'gaca bönachi lë'?"

6 Channö uduyúgaquië' neda', ta'zí' yë'ë.

Ta'gúë' didza' ca naca le raca quia',  
en cate' ta'rúajë', tu'siyönnë' bönachi.

7 Tu'dubi nupa bití' ta'lé'e neda' dxi'a, en ta'nnë quia'.

Ta'zá' ládxi'gaca zían le naca dö' le ilún quia'.

8 Ta'nnë quia', ta'nná: "Yu'ë yödzöhuë' le guti lë'.

Bítirö caz huóásë' ga na' dë' lu le denë'."

9 Lësca' caní benë' böchi' luzá'a ruzxóni ládxa'a-në'.  
Bönni' gudágulenë' neda' tsözxón ridá'baguë'ë neda'.

10 Buéchi' ladxi' neda', Xan, en bun neda',  
ate' ubí'i caza' quégaca nupa na' bití' ta'lé'e neda' dxi'a.

11 Gácabe'eda' raza ládxi'u neda',  
tu' cabí ulu'xicja neda' nupa bití' ta'lé'e neda' dxi'a.

12 Gáclen casu' neda' tu' runa' le naca dxi'a.  
Gunu' ga sóatica'sa' lo' Li'.

13 ¡Yöl-la' ba Xanru', Dios quégaca bönachi Israel!

¡Gulí'cu'ë yöl-la' ba na'a dza, en yugu' dza sí' zaca!

¡Ca' gaca!

¡Ön, ca' gaca!

## 42

1 Ca rizë ládxi'ba' bidxina' guixi' nisa yégudo',

lësca' caní rizě ládxa'a Li', Dios.

<sup>2</sup> Ribidxi ládxa'a Li' cazu', Dios.

¿Bátaxi udxina' ga dē quia', en tsu'a le yúbölö yudo' lá'ayi quiu'?

<sup>3</sup> Rëla, en te dza ribödxa', en biti' bi rahua'.

Yugu' dza nacuá' nupa ta'nábini neda', ta'nná: "¿Gazxi caz zoa Dios quiu'?"

<sup>4</sup> Risëbi ládxa'a cate' rōjneda' ca guca zí'alō,

cate' guzá'lena' bōnachi guizxi yu, en yōjnōrua' láhuilōguequi ra' yu'u queë'  
Dios.

Lu yöl-la' rudzeja queëtu' bıl-latu', en guyéaj ládxi'tu'-në' Xanru', en bentu'  
laní.

<sup>5</sup> ¿Bizx que risëbida' ládxa'a, en bizx que rō'a bōniga?

Uzxōni ládxa'a-në' Xanru' Dios, tu' huadxín dza cu'a-në' yöl-la' ba le  
yúbölö.

Náquië' Nu rusölá neda', en náquië' Dios quia'.

<sup>6</sup> Risëbida' ládxa'a, Dios quia'.

Que lē ni na' tsōjneda' Li' tsanni ni zoa', ridá' rizxúnna' ra' yegu Jordán,  
en tsanni ni ridá' lu guí'a Hermón, en lu guí'a Mizar.

<sup>7</sup> Ca tu guziú' rinnē lu nísado', en ca bō ruí'i tu budoá' nísado' queë' Dios,  
caní rinnē ladxí' bō' naca caza' lu yöl-la' risëbi ladxí'.

<sup>8</sup> Rinábida'-në' Xanru' huéchi' ládxe'ë neda' yugu' dza.

Yugu' dzō' rul-la' yöl-la' ba queë' Lē',

en rulidza' Dios, ruí'lena'-në' didza', Nu na' runna quia' yöl-la' na'bán.

<sup>9</sup> Guía'-në' Dios, Nu ruzóa neda' tsutsu, innía': ¿Bizx que nál-la ládxi'u  
neda'?

¿Bizx que run bayúdx quí'i sáca'tica'sa' lu ná'agaca nupa biti' ta'lé'e neda'  
dxi'a'?

<sup>10</sup> Rutsaba yúgu'tē dxita yu'a tu' tu'didza' yudxi neda'.

Yugu' dza ta'nábini neda', ta'nná: "¿Gazxi caz zoa Dios quiu'?"

<sup>11</sup> ¿Bizx que risëbida' ládxa'a, en bizx que rō'a bōniga?

Uzxōni ládxa'a-në' Xanru' Dios,

tu' huadxín dza cu'a-në' yöl-la' ba le yúbölö,

tu' náquië' Nu rusölá neda', en náquië' Dios quia'.

## 43

<sup>1</sup> Guléaj neda' tsahui', Dios, en bē' didza' uláz quia' lógaca bōnachi tuá' dö'  
quia'.

Busölá neda' lu na' nu rizi' yē', en biti' naca tsahui'.

<sup>2</sup> Li' cazu' nacu' Dios, Nu rutipa ládxa'a. ¿Bizx que nusán no'o neda'?

¿Bizx que ruhuí'inida' tu' ta'bía no neda' nupa tu'dí'i neda'?

<sup>3</sup> Gusöl-la' quia' bení' quiu', en le naca idútē li quiu' para ulu'lufí'i neda'  
nōza.

Ben ga ilá'chē' neda' ga naca lá'ayi quiu', ga na' zoa cazu' Li'.

<sup>4</sup> Tsu'a ra' bucugu queë' Dios.

Ibíg'a lahuē' Dios, Nu run ga rudzėjade'eda'.

Gúl-lalena' bihuël-la, cu'a Li' yöl-la' ba, Dios, nacu' Dios quia'.

<sup>5</sup> ¿Bizx que risëbida' ládxa'a, en bizx que rō'a bōniga?

Uzxöni ládxa'a-në' Xanru' Dios,  
tu' huadxín dza cu'a-në' yöl-la' ba le yúbölo,  
tu' náquië' Nu rusólá neda', en náquië' Dios quia'.

## 44

1 Biyõn quézitu' le, Dios.

Bulu'siyõnnë' netu' xuz xtó'otu'  
ca naca yugu' le zxõn benu' dza ni'te,  
cate' ni' gula'cu'ë légaquië' luyú ni.

2 Bulaga cazu' Li' bõnachi yugu' yõdzö izá'a,  
en bucuásu' légaquië' luyú ni.

Busaca' zi'u bõnachi izá'a na', en gurú'unu' léguequi.

3 Biti' gula'déli'në' xuz xtó'otu' luyú ni rácasö queégaquië',  
en biti' bulu'sólá la' cuíngacasë',  
pero ben cazu' Li' lë na' len yöl-la' huáca zxõn quiu',  
en lu yöl-la' zxõn que le naca cazu',  
ate' bulú'u lahui ca nadxí'inu' légaquië'.

4 Naca cazu' Li' Dios quia', en Nu rinná be'e neda'.

Busólá bõnachi quiu', yugu' xzí'ini xi'sóë' Jacob.

5 Uguntu' dxin yöl-la' huáca quiu', uxícjatu' nupa ta'dá'baga' netu',  
ate' tu' zóalen cazu' netu', ucúl-latu' nupa biti' ta'lé'e netu' dxi'a.

6 Biti' uzxöni ládxa'a uxiti' yaga quia',  
en biti' uzxöni ládxa'a guië tuchi' quia' para ilácalen neda',

7 tu' rusólá cazu' Li' netu' lu ná'agaca nupa biti' ta'lé'e netu' dxi'a,  
en ruzõtju' nupa tu'dí'i netu'.

8 Cú'utica'stu' Li' yöl-la' ba,  
en guiética'stu' Li': "Xclenu'."

9 Pero na'a nusán no'o netu', Dios, en bë'u lataj nu buxicja netu'.

Bíti'rö réajlenu' bõnni' queëtu' röjáquië' gudil-la.

10 Benu' ga buzxúnnajtu' lógaca nupa ta'díl-lalen netu',  
ate' gula'güë' yugu' le nequi queëtu'.

11 Bë'u lataj gulútië' ziantu' ca nu rúti-gacaba' bö'cu' zxila'.  
Bësilásiu' netu' ládjagaca yõdzö izá'a.

12 Naca tsca bëti'u netu', en láti'do'os guzxi'u.

Biti' ca' buzi'u xibé tsca guzxi'u.

13 Bõnachi yugu' dzaga yõdzö queëtu' bila'lé'e lë na' benu' queëtu',  
ate' tu'cá'ana netu' cá'asö, en tu'titaj netu'.

14 Benu' ga tu'didza' yudxi bõnachi yugu' yõdzö netu'.

Tu'tá ícaguequi lu yöl-la' rucá'ana netu' cá'asö.

15 Yugu' dza rutuí'ida' ca raca queëtu',  
en rö'a bõniga lu yöl-la' rutuí'i quia',

16 tu' riyõnda' nupa tu'didza' yudxi neda', en tu'cá'ana neda' cá'asö,  
nupa na' biti' ta'lé'e neda' dxi'a, en tu'dí'i neda'.

17 Guca queëtu' yúgu'të lë ni sal-la' biti' nál-la ládxi'tu' Li',  
en biti' nucá'anatu' didza' dzaga bénlenu' netu'.

18 Biti' ca' böaj ládxi'tu' ca réajlë'ëtu' Li',  
en biti' gudá'baga'tu' le buluí'inu' netu' guntu'.

19 pero nusán na' cazu' netu' ladaj nupa ná'cagaca ca yugu' böa' gui'a sínia',  
en nucá'anu' netu' ga chizóa' tseajtsázatu' lataj chul-la.

20 La'tu' gul-la ládxi'tu' Li', Dios queëtu',

o la'tu' guyéaj ládxi'tu' tu dios izá'a,  
 21 la' gáquibe'etënu' lë ni, Dios,  
 tu' nôz quézinu' le rizá' ládxi'tu'.  
 22 Tu' néquitu' quiu' Li' zóatica'sô nu guti netu'.  
 Nactu' ca yugu' bö'cu' zxíla'do' lo nu guti légacaba'.

23 ¡Bubán, Xan! ¿Bizx que rásitso' Li'?  
 ¡Guyasa! ¡Biti' usán no'o netu' chadía chacanna!  
 24 ¿Bizx que nucachi' lo' lotu' netu'?  
 ¿Naru' nál-la ládxi'u ca raca queétu', en ca riguf'i rizáca'tu'?  
 25 Naguíngaquië' netu' luyú.  
 Nadínitu' lu bëchtö yu.  
 26 ¡Gudáchi gácalenu' netu',  
 en lu yöl-la' dxi'i ladxi' quiu' busölá netu'!

## 45

1 Rizá' ládxa'a tu le naca dxi'a.  
 Ru'a didza' que le runë' bönni' rinná bë'ë.  
 Naca lúdxa'a ca le ruzúajlenë' bönni' nabé'ede'enë' ru'ë didza'.

2 Nácátëru' Li' lachi ca yúgu'të bönachi.  
 Nabé'ede'enu' ru'u didza'.  
 Que lë ni na' nunë' Dios gaca dxi'a quiu' chadía chacanna.  
 3 Bega' lë'u guië tuchi' quiu', bönni' nayëpisë',  
 lu yöl-la' lachi quiu', en lu yöl-la' unná bë' quiu'.  
 4 Lu yöl-la' unná bë' quiu' idéli'nu' lu gudil-la,  
 ugunu' dxin le naca idütë li, en yöl-la' nöxaj ladxi', en le naca tsahui'.  
 Yöl-la' huáca zxön quiu' gun ga ilá' lahui yugu' le zxöntëro.  
 5 Natúchi'gacada' yaga lahui tuchi' quiu'.  
 Bönachi yugu' yödzö zi'tu' ta'dzö'ö lo', nupa na' ta'díl-lalen li'.  
 Yugu' yaga lahui tuchi' quiu' nachöza'gaca ládxi'do'guequi.

6 ¡Chadía chacanna naguixju' ga rö'u rinná bë'u, Dios!  
 ¡Ca naca le naca tsahui' rinná bé'enu' bönachi quiu'!

7 Nadxí'inu' le naca tsahui', en biti' rilé'enu' dxi'a le biti' nácátë.  
 Que lë ni na' Dios quiu' nabö cazë' li'.  
 Nachízirë' icja ládxi'do'o yöl-la' rudzeja ca le nápagaca ia'zíca'rö bönachi.  
 8 Rilá' zxixi lari' nacu' len zi' mirra, en zi' áloe, en zi' casia.  
 Tunë' bönni' huil-la ga rudzéjanu' lu yu'u lidxu' zxön.  
 9 Yugu' nigula zxí'inigaquië' bönni' ta'nná bë'ë  
 nútsa'gacabi' bi'i nigula nacu'abi' lidxu'.  
 Nigula quiu' rinná bé'enu' zuínu' cuitu' ibëla,  
 en nácunu le nazí'i biquitaj oro nazaca'.

10 Bë' ladxi' neda', nigúlado'.  
 Bë' ladxi' neda', en biyön xtídza'a.  
 Gul-la ladxi' bönachi yödzö quiu', en yugu' di'a dza quiu'.  
 11 Ní'irö së ládxi'ë bönni' rinná bë'ë yöl-la' lachi quiu'.  
 Buzóa' xzibu' lahuë' tu' náquië' xanu'.  
 12 Ní'irö bönachi yödzö Tiro ila'dxín lo' nuá'gaca le nazáca'da' le ilunna  
 quiu'.

Yugu' bönni' ta'lé'enë' yöl-la' tsahui' ila'nábinë' li' bi unödzu' quégaquië'.  
 13 Yugu' bi'i nigula queë' bönni' rinná bē'ë zóagacabi' lidxë', en  
 nácatërögacabi' lachi.

Lari' nácubi' nadíalen du oro.

14 Ila'chë'ë-bi' lahuë' bönni' rinná bē'ë, nácubi' lari' nazáca'da'.  
 Ila'dabi' yugu' bi'i nigula ra'bando' cúdzi'löbi',  
 ate' ila'chë'ë légacabi' lahuë' bönni' na' rinná bē'ë.

15 Lu yöl-la' rudzeja, en lu yöl-la' ruzi' xibé quégacabi' ila'dxinbi',  
 en ila'yázabi' yu'u lidxë' bönni' na' rinná bē'ë.

16 Ila'cuá'abi' bi'i bönni' quiu' uláz quégaquië' xuz xto'o.  
 Gunu' ga ila'nná bē'ëbi' idútë yödzölió.

17 Gunu' ga tsöjnégacatica'sö bönachi ca nacu' Li'.

Que lë ni na' yúgu'të bönachi ilë li' "Xclenu" yugu' dza si' zaca.

## 46

1 ¡Náquië' Dios Nu run chi'i rë'u, en Nu ruzóa rë'u tsutsu!  
 ¡Zóatica'së' gácalenë' rë'u cate' bi raca queëru'!

2 Que lë ni na' biti' gádxiru' sal-la' izxizi idútë yödzölió,  
 en ila'niti yugu' guí'a lu nísado',

3 en sal-la' chasa idxía, en tsu'u bö nísado' na',  
 en ila'zxizi guí'ado' tu' nözi le raca.

4 Zoa tu yegu le run ga tu'dzeja nupa nacuá' ladzë' Dios,  
 ga na' röz'ö yudo' lá'ayi ga zoë' Dios nayëpisëtërë'.

5 Zoa cazë' Dios yödzö na', le catu caz iníti.  
 Cate' ni' soa itó yu gácalenë' nupa nacuá' ni'.

6 Tadxi ta'dzöbi bönachi yugu' yödzö,  
 ate' ta'bö' baguí'i nupa ta'nná bē',  
 tu' ru'ë didza' Dios, ate' riniti luyú ni.

7 Xanru' nayëpisëtërë' zóalen cazë' rë'u.  
 Dios quégaca xzí'ini xi'sóë' Jacob rapa chi'ë rë'u.

8 Guli'dá ilé'eli' le nunë' Xanru'.  
 Buli'yú ca nusunítië' luyú ni.

9 Ruzóa dxíë' gudil-la rácagaca idútë yödzölió.  
 Riguitsjë' yugu' uxiti' yaga,

en rusunítië' yugu' yaga lahui tuchi' que gudil-la.  
 Ruzéguí'ë yugu' carreta que gudil-la tu lu guí' zxön.

10 Rnnë': "Guli'sóa dxisó, ate' guéquië'eli' naca caza' Dios.  
 Nayëpisëtëra' yugu' lu yödzö, en lu idútë yödzölió."

11 Xanru' nayëpisëtërë' zóalen cazë' rë'u.  
 Dios quégaca xzí'ini xi'sóë' Jacob rapa chi'ë rë'u.

## 47

1 ¡Lu yöl-la' rudzeja queëli' guli'capa' ná'ali', bönachi yúgu'të yödzö!  
 ¡Guli'cu'ë yöl-la' ba Dios, len yugu' le rúl-lalenli'!

2 Ral-la' gunru' bal Xanru' Dios nayëpisëtërë'.  
 Náquië' Nu rinná bē' idútë yödzölió.

3 Benë' ga bidéli'ru' yugu' lu bönachi izá'a.  
 Benë' ga rinná be'eru' yugu' yödzö.

4 Gurõ cazë' luyú ga ni nuzóë' rë'u.

Naca tu luyú lachi quégaca zxi'ini xi'sóë' Jacob, nupa na' nadxí'i quézinë'.

5 Len yöl-la' ba zxön ribenë' Dios ga rö'ë rinná bë'ë.

Le zían le tu'cödxë' cate' ribenë' Xanru' ni'.

6 ¡Guli'gul-la yöl-la' ba queë' Dios! ¡Guli'gul-la!

¡Guli'gul-la yöl-la' ba queë' Bönni' rinná bé'enë' rë'u! ¡Guli'gul-la!

7 ¡Rinná bë'ë Dios idútë yödzölió ni!

¡Idú ládxi'li' guli'gul-la yöl-la' ba queë'!

8 ¡Zoa cazë' Dios lataj lá'ayi queë' ga rö'ë rinná bë'ë!

¡Rinná bé'enë' bönachi yúgu'të yödzö!

9 Tu'dubi nupa ta'nná be'e yugu' yödzö

tsözxön len bönachi queë' Dios queë' Abraham.

10 ¡Nequi queë' Dios yöl-la' zxön quégaca yúgu'të yödzö nacua' yödzölió!

¡Nayëpisëtërë' Lë'!

## 48

1 Nayëpisëtërë' Xanru', ate' run bayudxi cú'uru'-në' yöl-la' ba idú ládxi'ru' ga zoa lu yödzö queë' Dios queëru' le zoa lu gu'a lá'ayi queë'.

2 Lachi, en sibi naca gu'a lá'ayi na',

ate' raza ládxi'gaca bönachi idútë yödzölió ca naca.

Caní naca gu'a Sión le rö'ö tsölá'alö ga za' bö' ziaga.

Lu yödzö na' dë ga zoa Bönni' Unná Bë' nayëpisë'.

3 Rulu'ë lahui Dios sóaru' tsutsu cuitë' Lë'

ga zoa lu yu'u lidxë'.

4 Gula'dá'baga' nupa ta'nná bë' lu yu ni,

en gula'bígui'ë ra' yödzö lá'ayi na'.

5 Cate' bila'lé'enë' yödzö na' bulu'báininë'.

Gula'bö'ë böniga, en la' bulu'zxúnnajtë'.

6 Ra' yödzö na' gula'zxízië'.

Gula'zaca' zi'ë ca raza queënu nigula chizóa uzóanu-bi' bí'ido'.

7 Risól-lë'ë Dios tu bö' budunu',

le rusuniti yugu' barco zxön que yödzö Tarsis.

8 Biyönru' ca náçagaca le zxön benë' Dios,

ate' na'a rilé'e quéziru' le runë',

lu yödzö lá'ayi queë' Dios quégaca ni'a në'ë guizxi yu,

en náquië' ca' Dios queëru'.

Tsaz naguixjë' yödzö na'.

9 Ga zoa lu yudo' quiu', Dios,

röjnetu' ca naca yöl-la' dxi'i ladxí' quiu'.

10 Ca nayëpisëtërö Lo', Dios,

ca' ta'gu'u Li' yöl-la' ba bönachi idútë yödzölió.

Ca naca le naca tsahui' rinná bë'u.

11 Ulu'dzeja bönachi nacua' yödzö Sión.

Ulu'zí'inu xibé nigula zxi'ini xi'sóë' Judá

tu' ruchí'a rusóróu' netu' ca naca le naca tsahui'.

12 Guli'dá idú gásibi'ilö ga dë yödzö Sión,

en buli'laba yugu' yu'u sibi tun chí'i yödzö na'.



13 Buli'yú ca naca zö'ö run chí'i yödzö na',  
 en buli'yú ca' le nuzóagaca le tsutsu,  
 para gaca quíxjöi'ili' xzí'ini xi'sóali' ca náquië' Dios zxön ni.  
 14 Tsaz náquië' Dios queëru', na'a dza, en dza si' zaca.  
 Ulu'inë' ré'u nôza tôdi gátiru'.

## 49

1 Guli'yöni lë ni, libí'ili', bönachi yúgu'të yödzö.  
 Buli'zé nágali', libí'ili', zóali' idútë yödzölió.  
 2 Libí'ili', nayépsëtëróli', en libí'ili', nácali' cá'asö.  
 Libí'ili', dë yöl-la' tsahui' queéli', en libí'ili', nácali' yechi'.  
 3 Tsöjsá' ládxa'a ca naca le nápagaca yöl-la' réajni',  
 en gu'a didza' le nápagaca yöl-la' raca yenni'.  
 4 Güi'i ládxa'a ca naca tu le rucudzu' didza',  
 en quíxjö'a ca nápagaca tsanni quinnia' lë'e bihuël-la.  
 5 Biti' bi rádxida' cate' ridxín bi raca quia',  
 cate' ta'gu'ë neda' lé'ajlö bönni' tuá' dō' biti' ta'lé'enë' neda' dxi'a.  
 6 Tu'zxöni ládxe'ë bönni' na' yöl-la' tsahui' quégaquië',  
 en tun ba zxön cúngaquië' ca nápagaca le dë quégaquië'.  
 7 Biti' gaca huóá'uë' la' cuinsë' nitúë' bönni' na'.  
 Biti' gaca bi ünödzjë' queë' Dios le gun ga usölë' lë',  
 8 tu' naca zxöntëro' le huóá'u yöl-la' na'bán que nu bönni',  
 ate' catu caz gaca nu bönni' quíxjé' ca naca,  
 9 para idéli'në' sóatica'së' ibanë',  
 en cabí tsázië' yeru ba ga yú'ugaquië' bönni' nati.  
 10 Rilë'enë' tatië' ca' bönni' ta'yéajni'inë',  
 en ta'nitië' tuz ca tati nupa biti' bi nözigaca, en nupa biti' ta'yéajni'i,  
 ate' tu'cá'anë' yöl-la' tsahui' quégaquië' le ulu'zí' xibé bönachi yúbölö.  
 11 Téquinë' ila'cuá'tica'sö lídxigaquië' bönni' na',  
 ate' tsaz ila'cu'ë ni',  
 ate' ta'gu'ë lágaca xiyúgaquië' ca naca la' lágacasë'.  
 12 Pero yöl-la' ba zxön napë' bönni' na' biti' gun ga sóatica'së'.  
 Gati cazë' ca tátiba' böa' guixi'.  
 13 Caní naca le gaca quégaquië' bönni' tu'zxöni ládxe'ë yöl-la' tsahui'  
 quégaquië',  
 enca' quégaca xzí'ini xi'sóagaquië',  
 yugu' bi'i na' ta'yaza ládxi'gacabi' didza' gulu'ë xúzgacabi' na'.  
 14 Ilátië' ca tátiba' bö'cu' zxila',  
 ate' yöl-la' guti gaca quégaquië' ca tu nu uyú bö'cu' zxila'.  
 Yugu' bönni' tsahui' ila'nná bé'enë' légaquië' cate' itō yu zila.  
 Ila'niti le guta' quégaquië', ate' ila'cuá'tica'së' lataj chul-la ga dzö'ö nupa  
 nátigaca.  
 15 Huóá'u cazë' Dios yöl-la' na'bán quia' lu yöl-la' guti,  
 tu' ichë'ë neda' ga tsöjsóalena' Lë'.  
 16 Biti' gádxinu' cate' idéli'në' nu bönni' yöl-la' tsahui' zxön,  
 en cate' xön yöl-la' lachi que yu'u lidxë',  
 17 tu' cabí bi u'ë cate' gátië',  
 en biti' tséajlen lë' yöl-la' lachi que le guta' queë'.  
 18 Sal-la' cate' ni' zoë' nabanë' buzí' xibé bö' naca cazë',  
 ate' gula'gú'u bönachi lë' yöl-la' ba cate' bidéli'në' yöl-la' tsahui' na'.

19 Tsázië' ga na' dzö'ë xuz xtá'ahuë',  
en bítí'rö ilé'enë' bení'.

20 Náquië' bönni' napë' yöl-la' zxön, pero riyádzjanë' yöl-la' réajni'i,  
ca böa' guixi' tati cázaba'.

## 50

1 Ru'ë didza' Xanru' Dios nayëpisëtë'rë'.

Nutubë' dërö nupa nacuá' yödzölió ga naguéla'të ga rilén gubidza ga  
ridxintë ga ribía.

2 Lu yödzö Sión rigu'ë Dios bení'.

Napa yödzö na' yöl-la' lachi idú.

3 Zë'ë Dios queéru', en bití' soë' dxisö.

Tsöjnöru lahuë' tu guí' zxön,  
ate' tsecja tu bö' budunu' idú gasibí'ilë'.

4 Ulidzë' lúzxiba xitsá', enca' luyú  
cate' uchi'a usöröë' quégaca bönachi queë'.

5 Rnnë' Dios: "Guli'túbi nupa néquiquequi quez quia',  
nupa na' gulunlen neda' didza' dzaga,  
en bulu'lalaj rön lahua' le ben tsutsu didza' dzaga na'."

6 Naca bë' náquië' tsahui' Dios lúzxiba xitsá',  
tu' uchi'a usöröë' Dios bönachi queë'.

7 Rnnë': "Buli'zë nágali', bönachi quia', ate' gu'a didza'.  
Buli'zë nágali', bönachi Israel, ate' uzéguia' libí'ili' didza'.

Naca caza' Dios.

Ön, naca' Dios queëli'.

8 Bití' uzéguia' libí'ili' didza' ca naca le rúnнали' quia',  
en calëga ca nácagacaba' böa' bëdxi ruzéguili'-ba' lahua'.

9 Bití' riquinda'-ba' bëdxi queëli',  
en calëga chivo biguiú' nacuá'aba' queëli',

10 tu' néquigacaba' quia' yúgu'tëba' böa' guixi',  
enca' böa'-bëdxi nacuá'aba' lu gayuá' gayuá' guí'ado'.

11 Néquigacaba' ca' quia' yúgu'tëba' böa' zoa xiligacaba',  
enca' yúgu'të le zoa nabán la' guixi'.

12 La'tu' riduna' bití' guía' ca' libí'ili',  
tu' nequi quia' yödzölió, enca' yúgu'të le nacuá' ni'.

13 ¿Naru' gágutsa' xipéla'gacaba' bëdxi,  
o guí'jatsa' xichöngacaba' chivo?"

14 Le ral-la' unödzjali' queë' Dios naca yöl-la' rë Lë': "Xclenu"  
ate' ral-la' gunli' lahuë' Dios nayëpisëtë'rë' ca naca le guzxí' lu ná'ali'  
gunli'.

15 Rnnë' ca': "Ral-la' ulídzali' neda' cate' bi gaca queëli'.  
Gácalen caza' libí'ili', ate' gunli' neda' bal."

16 Dios rë' bönni' huía' dö', rnnë':

"¿Bizx que ru'u didza' ca nácagaca xibá naguixja'?

¿Bizx que ru'u didza' ca naca didza' dzaga núnlëna' bönachi?

17 Bití' runnu' lataj usédida' li',

pero rucá'anu' cá'asö didza' ruá'a.

18 Cate' rilé'enu'-në' bönni' gubán rácalenu' lë',

en runu' tsözxön nupa ta'guitsaj xibá que yöl-la' nutsaga na'.

<sup>19</sup> Zóatica'su' gu'u didza' xihui',

en ru'ítica'su' didza' biti' nácatë.

<sup>20</sup> Zóatica'su' uzéguii'-në' böchi' casu',

en rudidza' yudxu' böchi'-zan casu'.

<sup>21</sup> Caní benu', ate' biti' bi gunnía',

ate' gúquinu' naca' ca naca casu' li',

pero na'a uzégua' li' didza', en ulu'a lahui le nunu'.

<sup>22</sup> Buli'zë nágali' didza' ni, núlöli' ruzóali' neda' tsólá'alö.

Channö cabí, usunítia' libí'ili', ate' cuntu nu gaca usólá libí'ili'.

<sup>23</sup> Nu rë neda': Xclenu', runna quia' le run neda' bal,

ate' nu run ca rnna xtídza'a, usólá caza' nu na'."

## 51

<sup>1</sup> Dios quia', buzá' ladxi' quia' tsca naca yöl-la' dxi'i ladxi' zxön quiu',

en tsca naca le zían le ruzá' ládxi'u quia', bugúa yugu' le gudá'baga'a lo'

Li'.

<sup>2</sup> Buguíbitica'sö neda' tsca naca dö' bi'a.

Buchi'a neda' lu dul-la' nuna'.

<sup>3</sup> Nöz quézida' le gudá'baga'a,

en röjnétiqui'sida' yugu' dul-la' nuna'.

<sup>4</sup> Lo' Li' casu' bena' dul-la',

en lo' Li' ca' bi'a dö'.

Naca bë' nacu' tsahui' cate' ru'u didza',

en idú dxi'a, en tsahui' nacu' cate' ruchi'a rusöróu' queëtu'.

<sup>5</sup> Buyútsöca', nabága'a dö' cate' gusi lotë gulja',

en lu dul-la' zoa caza' cate' buzóanu xiná'a neda'.

<sup>6</sup> Rë'ënu' soa le naca idútë li icja ládxi'do'otu'.

Guchiza icja ládxi'da'ahua' yöl-la' réajni'i.

<sup>7</sup> Buchi'a neda' len le ruchi'aninu', ate' gaca' dxi'a.

Buguibi neda', ate' huóaca' zxíla'do'os.

<sup>8</sup> Ben ga yönda' le nachë' yöl-la' ruzí' xibé, en yöl-la' rudzeja,

para huóaca' ládxa'a lu le raca quia' tu' benu' ga réquibe'eda' nabága'a dul-

la'.

<sup>9</sup> Biti' uyú' yugu' dul-la' nuna',

en busulu yúgu'të le naca dö' nabága'a.

<sup>10</sup> Dios quia', bun dxi'a ládxi'da'ahua',

en guchiza neda' tu bö' cubi le nuzú' tsutsu.

<sup>11</sup> Biti' ucuítu' neda' ga zoa' lo' Li',

en biti' ugú' Dios Bö' Lá'ayi quiu' Nu zóalen neda'.

<sup>12</sup> Bunna quia' yöl-la' rudzeja que yöl-la' rusólá quiu',

en ben ga guna' ca rnna xtídzu'u idú ládxa'a.

<sup>13</sup> Ní'irö usédida' nupa ta'guitsaj xibá quiu' ca nácagaca le rë'ënu' ilúngaca,

ate' yugu' bönni' dul-la' ulu'huécja quiu'.

<sup>14</sup> Dios quia', benna neda' lataj cabí ibága'a xiguia'.

Naca casu' Dios, Nu rusólá neda'.

Lu yöl-la' rudzeja quia' gul-la' ca naca casu' tsahui'.

<sup>15</sup> Xana' Dios, gusalaj ruá'a,

ate' usiyönda' bönachi yöl-la' ba quiu'.

<sup>16</sup> La'tu' raza ládxi'u-ba' böa'-bëdxi gútitu'-ba' lo', la' gúntea' caní.

Biti' raza ládxi'u-ba' nu böa' uzégui'tu'-ba' lo'.

17 Le rě'ëně' Dios le naca ca tu le cú'uru' lahué'  
naca bö' naca cáziru' le nõtaj nagula ladxi'.

Dios quia', biti' ucá'anú' cá'asö ládxi'do'otu'  
le ruhui'ini ladxi', en le naca nõxaj ladxi'.

18 Lu yöl-la' ruzá' ladxi' quiu' ben le naca dxi'a  
quégaca bõnachi yõdzõ Siõn.

Buchisa zõ'õ le run chi'i yõdzõ Jerusalén.

19 Ní'irõ tsaza ládxi'u yugu' le cú'utu' lo' le naca idú dxi'a,

yugu' böa' guíxi'do' gútitu'-ba' lo',

en yugu' böa'-bédxido' uzégui'tu'-ba' lo'.

Ní'irõ ilútié'-ba' yugu' bédxi biguiú'do',

en ila'gu'e'-ba' lu bucugu quiu'.

## 52

1 ¿Bizx que run ba zxõn cuinu' ni'a que dö' ru'u, bõnni' nál-la?  
Zóatica'sõ yöl-la' dxi'i ladxi' queë' Dios.

2 Len lúdxu'u rúnlenú' luzó'o didza' para usunítuu' bõnachi.

Naca lúdxu'u, bõnni' rizí' yě', ca tu guíé' tuchi'.

3 Nadxí'irõnu' le naca dö' ca nadxí'ínu' le naca dxi'a,

en nadxí'irõnu' le cabí nácate' ca nadxí'ínu' le naca idútë' li.

4 Nadxí'ínu' yúgu'të' didza' tun ditaj bõnachi,

li' na', bõnni' rizí' yě'ë.

5 Tsaz uzõtaj cazë' Dios li'.

Sõnë' li', en ubéajë' li' lu yu'u lidxu',

en ucuítë' li' ga nacuá' nupa nabángaca.

6 Yugu' bõnni' tsahui' ila'lé'enë' lë ni, en iládxinë' Dios.

Ulu'zxidxë' queë' bõnni' na' rizí' yě'ë, ila'në':

7 “¿Buli'yútsõca! Bõnni' ni biti' gú'unnë' uzxõni ládxe'ë Dios,

pero buzzõni ládxe'ë yöl-la' tsahui' queë',

en le zían le guzé ládxe'ë le cabí bi nazaca.”

8 Naca' neda' ca tu yaga olivo ya'a le rö' ra' yu'u lidxë' Dios.

Uzxõni ládxa'a yöl-la' dxi'i ladxi' queë' Dios yugu' iz si' zaca.

9 Guíética'sa' Li': “Xclenu” tu' ben cazu' Li' ga naca caní,

ate' guna' lõza Lo' le naca dxi'a lógaca nupa néquiquequi quez quiu'.

## 53

1 Ta'zá' ládxe'ë bõnni' canõz, ta'nnë':

“Biti' ca' zoë' Dios.”

Nácagaquië' xihui' bõnni' caní, en núngaquië' le nácaterõ xihui'.

Cuntu nu bõnni' zoë' runë' le naca dxi'a.

2 Ga na' zoë' Dios yehua' yubá ruyúé' gátitës,

en rilé'enë' bõnachi nacuá' idútë yõdzõlió,

para inõzinë' channõ zoa nu réajni'i,

o channõ zoë' nu bõnni' ruí' ládxe'ë Dios.

3 Yúgu'të' bõnachi sõjáquië' ga yúbóló.

Yúgu'të' nácagaquië' xihui'.

Cuntu nu zoa run le naca dxi'a, nitüë' bõnni'.

4 ¿Naru' cabí nápagaquië' yöl-la' réajni'i bõnni' na' tu'ë dö'?

Tu'sunítie' bõnachi quia' ca tu nu ragu yõta,

en bití' ca' tu'lidzë' neda'.

<sup>5</sup> Tadxi ta'dzöbinë' bönni' caní, en bití' bi nuna' quégaquië'.  
Caní raca tu' rusunítie' Dios caz nupa ta'díl-lalen libí'ili'.

Gunli' ga ulu'tuí'inë' tu' chigurú'unë' Dios légaquië'.

<sup>6</sup> Raca ládxi'ru' irúaj Sión Nu usöla' bönachi Israel.  
Cate' uchisa cazë' Dios bönachi queë' nadzúngaca,  
ulu'dzeja xzí'ini xí'söë' Jacob, en ulu'zí' xibé bönachi Israel.

## 54

<sup>1</sup> Busöla' neda', Dios, para gaca yöl-la' ba que Lo'.

Len yöl-la' huáca quiu' guléaj neda' tsahui'.

<sup>2</sup> Ruzë' nagu' le rulidza' Li', Dios.

Ruzë' nagu' didza' ruá'a.

<sup>3</sup> Ta'díl-lalen bönni' zítu' neda',  
tu' té'ënë' bönni' zidzaj ilútië' neda'.

Bití' ca' tádxinë' Dios.

<sup>4</sup> Bulí'yútsöca', naca cazë' Dios Nu rácalen neda'.

Ruzóë' tsutsu Xanru' yöl-la' na'bán quia'.

<sup>5</sup> Ubi'ë' quégaca nupa ta'díl-lalen neda' le usuniti léguequi.

Tu' runu' ca rna xtídz'u, Dios, busuniti léguequi.

<sup>6</sup> Idú ládxa'a gútia'-ba' böa'-bëdxi lo'.

Guía' Li': "Xclenu" Xan, tu' naca dxi'a Lo'.

<sup>7</sup> Busöla' cazu' Li' neda' lu yugu' le guca quia',  
ate' rilé'eda' zeaj nanítitica'sö nupa ta'díl-lalen neda'.

## 55

<sup>1</sup> Ruzë' nagu' le rulidza' Li', Dios,

en bití' tá'bagu' le rinábida' Li'.

<sup>2</sup> Ruzë' nagu' neda', en rubí'u didza'.

Rulidza yúdxida' Li', en rö'a böniga

<sup>3</sup> ni'a que chi'ë bönni' bití' rilé'enë' neda' dxi'a,  
en tu' tu'tsá' neda' nupa tuá' dö', en tu'saca' zítu' neda',  
en lu yöl-la' rilé' quéguequi ta'bía no neda'.

<sup>4</sup> Réqui zítu' ládxi'da'ahua',  
ate' yöl-la' radxi que yöl-la' guti röjtsaza ládxi'da'ahua'.

<sup>5</sup> Chígula'yaza yöl-la' radxi, en yöl-la' rizxizi neda',  
ate' nabaga' yöl-la' radxi ridzöbi neda'.

<sup>6</sup> Gunnía': "Gaca ládxa'a gata' quia' xílaba' gu'dödo',  
para gaca töda' lu bö'ös, en idxina' tu lataj ga gaca uzí' ládxa'a.

<sup>7</sup> Raca ládxa'a tseja' zítu',  
en tsöjsó'a' la' guixi' ga dë lataj.

<sup>8</sup> Uyija' carelô tu lataj ga tsöjsó'a' tsutsu,  
para cabí bi gun quia' le naca ca bö' budunu'."

<sup>9</sup> Busuniti légaquië', Xan, en buxí ruá'agaquië',  
tu' bilé'eda' ta'dil-lë', en tu'tsatsë' lu yödzo.

<sup>10</sup> Rëla, en te dza ta'dödë' nöza lu yödzo.

Tu'ë dö', en tunë' le xihui' idú gásibi'ilö yödzo.

<sup>11</sup> Tu'sunítie' le nacua' ni'.

Tu'saca' zítu' bönachi, en ta'zí' yë'ë la' nöza que yödz.

12 Calëga bönni' biti' rilë'enë' neda' dxi'a nu rudidza' yudxi neda',  
 tu' huáca guá' ilena' le gunë',  
 en calëga bönni' rudí'inë' neda' nu ridíl-lalen neda',  
 tu' huáca ucachi' cuina' lahuë',  
 13 pero nacu' lí', tu bönni' ca neda'.  
 Nacu' böchi' luzá'a, en nacu' tuz len neda'.  
 14 Lu yöl-la' dxi'i ladxi' queëru' gúcaru' tuz.  
 Ladaj bönachi zián gударu', en bidxinru' lidxë' Dios.

15 Xana' Dios, bë' yöl-la' guti lataj idxín quëgaquië' bagáchi'sö.  
 Ben ga tsöjtsázagaquië' nabángaquië' lataj chul-la ga nacuá' nupa nátigaca,  
 tu' yu'u le xihui' lídxigaquië', en lu yu'u ca' gapa tu'dubë'.

16 Pero neda' ulidza'-në' Dios,  
 ate' usölá cazë' Xanru' neda'.  
 17 Chi'i dzö'ölö, en zílado', en gatsaj dza ulidza yúdxida' Lë',  
 en innë ládxa'a lahuë', ate' yön cazë' chi'a.  
 18 Huöá'uë' yöl-la' na'bán quia' lu na' nupa ta'díl-lalen neda'  
 en uzöë' neda' lataj ga cöza' dxi'a tsáhui'do',  
 tu' nayánda' nupa ta'díl-lalen neda'.  
 19 Huayön quëzinë' Dios, en ubi'ë quëgaquië'.  
 Rö'ë rinná bë'tica'së' Lë'.  
 Caní gunë' Dios tu' cabí tu'sanë' ca tunë',  
 en biti' tádxinë' Dios.  
 20 Bönni' ru'ë dö' ribía nahuë' nu riböza dxi'a tsáhui'do',  
 en rucá'anë' cá'asö didza' dzaga nunë'.  
 21 Bë'ë didza' yúlado',  
 pero yu'u icja ládxi'da'ahuë' yöl-la' ridzá'a.  
 Bë'ë didza' zxi'ido',  
 pero didza' na' bë'ë gulaca ca guíë tuchi'.

22 Gulú'u le nabágu'u lu në'ë Xanru', ate' utipa cazë' ládxi'u.  
 Biti' gu'ë lataj iguínmaj tsaz nu naca tsahui'.

23 Chú'unë' bönni' tu'ë dö' na' lataj chul-la  
 ga nacuá' nupa nátigaca ga na' ila'nítigaquië'.  
 Biti' ila'cuá' gatsaj tsca ral-la' ila'cu'ë nabángaquië' bönni' tutië' bönachi,  
 en bönni' ta'zì yë'ë.

Pero neda' uzxöni ládxa'a Lí'.

## 56

1 Buëchi' ladxi' neda', Dios, tu' ta'dá'baga' bönachi neda'.  
 Yugu' dza nupa tu'dí'i neda' ta'bía no neda'.

2 Yugu' dza nupa biti' ta'lé'e neda' dxi'a tuá' dö' quia'.  
 Zián nupa ta'díl-lalen neda' lu yöl-la' run ba zxon cuínguequi.

3 Cate' radxi ridzöbida', uzxöni ládxa'a Xanru'.

4 Ruzxöni ládxa'a-në' Dios, en rigú'a yöl-la' ba xtídzë'ë.  
 Ruzxöni ládxa'a-në', en biti' bi gádxida'.

¿Bíxzi caz gaca ilún quia' bönachi?

5 Yugu' dza tun nigui neda' nupa biti' ta'lé'e neda' dxi'a.

Ta'zá' ládxi'tica'sö nacxi iluá' dö' quia'.

<sup>6</sup> Tu'dubë' ga nagáchi'sö, en tu'yúlanë' yúgu'të le runa',  
para gata' quégaquië' lataj ilútië' neda'.

<sup>7</sup> Bubi'ë quégaquië', Dios, ca naca dö' tu'ë,  
en lu yöl-la' rilé quiu' busuniti légaquië'.

<sup>8</sup> Nöz quézinu' Li' ca rö'a böniga.

Nurixu' Li' nisa ribödxu quia'.

¿Naru' cabí nuzú' léguequi lu guichi quiu'?

<sup>9</sup> Cate' ulidza' Li', la' dza ná'asö ulu'huécja gúz cúdzu'lö nupa tu'dí'i neda'.  
Nöz quézida' rácalen cazu' neda', Dios.

<sup>10</sup> Ruzxöni ládxa'a-në' Dios, en rigu'a yöl-la' ba xtídzë'ë.

Ruzxöni ládxa'a-në' Xanru', en rigu'a yöl-la' ba xtídzë'ë.

<sup>11</sup> Ruzxöni ládxa'a-në', en biti' bi gádxida'.

¿Bizxi caz gaca ilún bönachi quia'?

<sup>12</sup> ¡Gunna' quiu', Dios yugu' le guzxi' lu na'a!

¡Cu'a Li' yöl-la' ba!

<sup>13</sup> Busöló' neda' lu yöl-la' guti, en nuzú' neda' tsutsu.

Ridá caza' lo' Li', Xantu' Dios, lu bení' ru'u quégaca nupa nabángaca.

## 57

<sup>1</sup> ¡Buéchi' ladxi' neda', Dios!

¡Buéchi' ladxi' neda' tu' ruzxöni ládxa'a Li' gun chí'u neda'!

Guxóa no'o neda' ca runba' böra run chí'igacaba' bórado' zxan xílabá',  
ga idxinrö tödi bönadxi raca quia'.

<sup>2</sup> Rulidza'-në' Dios nayépisëtërë'.

Náquië' Dios Nu run ga raca dxi'a quia'.

<sup>3</sup> Ga zoa cazë' yehua' yubá ubi'ë didza', en usölë' neda'.

Usölë' neda' lu na' nu ribía no neda'.

Lu yöl-la' dxi'i ladxi' queë', en yöl-la' idú ladxi' queë' gácalenë' neda'.

<sup>4</sup> Naca quia' tsa zoa' ládjacacaba' bëdxi guixi'.

Yugu' bönni' zidzaj nagú'ugaquië' neda' lé'ajlö.

Nácagaca láyi'gaquië' ca yugu' yaga tuchi' que gudil-la,  
ate' nácagaca lúdxu'gaquië' ca yugu' guié' tuchi'.

<sup>5</sup> Dios quia', buluf'i lahui lúzxiba yöl-la' zxön quiu',

en yödzöliö ni buluf'i lahui yöl-la' bení' quiu'.

<sup>6</sup> Nupa tu'dí'i neda' nucáchi'gaca du yalaj le sön neda'.

Rudú ládxa'a tu' rö'a böniga.

Gula'chö'önë' yeru ga tsöjbixa' neda',

pero gula'bixë' la' légacasë' lu yeru na'.

<sup>7</sup> ¡Chinabá'a quia', Dios!

¡Chinabá'a quia'!

¡Gul-la' quiu', en cu'a Li' yöl-la' ba!

<sup>8</sup> ¡Bubán, bö' naca caza'!

¡Guli'bán arpa, en bihuël-la!

¡Zílado' ubana',

<sup>9</sup> en gul-la' quiu' Li', Xan, ladaj bönachi yugu' yödzö!

¡Cu'a Li' yöl-la' ba lógaca yúgu'tè bönachi!

<sup>10</sup> Zxöntërö naca yöl-la' ruhuéchi' ladxi' quiu', le ridxintè yehua' yubá, ate' ridxintè yöl-la' idú ladxi' quiu' lúzxiba xitsá'.

<sup>11</sup> Dios quia', buluí'i lahui lúzxiba yöl-la' zxön quiu',

en yödzölió ni buluí'i lahui yöl-la' bení' quiu'.

## 58

<sup>1</sup> ¿Naru' ruí'ili' didza' idútè li, libí'ili' na', rinná bē'ēli'?

¿Naru' ruchi'a rusöröli' ca naca le naca tsahuí'?

<sup>2</sup> ¡Biti' ca'! Rizá' ládxi'li' yugu' le xihui',

en rusaca' zí'ili' bönachi len yugu' le cabí nácátè runli'.

<sup>3</sup> Ta'dödi tsölá'alö nupa tuá' dö' ga gudéla'tè gúl jagaca.

Ta'zí' yē' ga gudéla'tè bulu'cuá'anu xiná'aguequi léguequi.

<sup>4</sup> Yu'u ruí'iguequi le naché' yöl-la' guti ca le dxía láyi'gacaba' bēla sínia'.

Nácagaca ca tuba' bēla sínia' nacöd zuba',

<sup>5</sup> bēla na' bití' riyönba' chí'ē bönni' gudzá',

o le rul-lē' bönni' runē' gudzá'.

<sup>6</sup> ¡Dios quia'! ¡Buzxuzxaj láyi'gaquiē'!

¡Guladzu' yugu' layi' tuchi' quégaquiē'

nácagaca ca layi' tuchi' quégacaba' bēdxi guixi'!

<sup>7</sup> ¡Ben ga ila'nítiē' ca raca que nisa yegu gubó'o cate' ruhuí'!

¡Ben ga ila'cuádiē' ca raca que guixi' rō'ō la' nōza!

<sup>8</sup> ¡Ben ga ila'nítiē' ca yugu' bōruhuinna tu'únaba' lu gubidza,

o ca tubi' bí'ido' nuzóanu-bi' nigula zí'alö ca ral-la' gáljabi', en chinátitēbi'!

<sup>9</sup> Zí'alö ca gaca utsē'e yusu' tu guí' zxön,

ugúē' Dios légaquiē' lu yöl-la' ridzá'a queē',

bönni' nabángaquiē', en bönni' chizóa ilátiē'.

<sup>10</sup> Ulu'dzeja nupa nácagaca tsahuí' cate' ila'lé'e

uzí' lēbē' Dios bönni' tu'ē dö' na'.

Ulu'zxinē' len ná'agaquiē' xichóngaca nupa na' tuá' dö'.

<sup>11</sup> Ila'nná bönachi: "Le nácátè zoa le rubi'ē Dios quégaca nupa nácagaca tsahuí'.

Le nácátè zoē' Dios Nu ruchi'a rusörö quégaca nupa nacuá' yödzölió."

## 59

<sup>1</sup> Busölá neda', Dios, lu ná'agaca nupa ta'zóa regu' neda'.

Buzóa neda' tsutsu ga bití' gaca ila'dxín nupa ta'díl-lalen neda'.

<sup>2</sup> Busölá neda' lu ná'agaca nupa tuá' dö',

en guléaj neda' lu ná'agaca nupa tuti bönachi.

<sup>3</sup> Buyútsöca', ta'bō' nísie' neda' para ilútiē' neda'.

Ta'zóa régu'ē bönni' zidzaj neda',

calēga tu' gudá'baga'a légaquiē', o tu' ben zi'a légaquiē', Xan,

<sup>4</sup> en calēga tu' bētia' bönachi, pero ta'zē'ē carelō para tíl-lalenē' neda'.

Gudá gácalenu' neda', ate' ilé'enu' naca caní.

<sup>5</sup> Xantu' Dios quégaca ni'a no'ō guizxi yu,

en Dios quégaca bönachi Israel,

gudá dujenu' xiguia' bönachi yúgu'tè yödzö.



Biti' uzá' ládxa'u quégaca nupa tuá' dö' lu yöl-la' rizi' yé' quéguequi.

<sup>6</sup> Tu'dxiné' chi'i dzó'ölö, ta'bödxi yeché'ë ca runba' bö'cu' ragu yéchi'ba' beo',  
ate' ta'dödé' idú gásibi'ilö yödzö.

<sup>7</sup> Buyútsöca', didza' tu'ë nácagaca ca le rëbigaquié'.

Nácagaca didza' tu'ë ca yugu' guié tuchi'.

Ta'nné': "¿Nuzxi caz yöni?"

<sup>8</sup> Ruzxidxu' ca naca le tuné', Xan.

Rutitju' ca naca le tun bönachi yúgu'té yödzö.

<sup>9</sup> Tu' nal-la cazu' Li' guna' löza Li'.

Nacu' Dios Nu run chi'i neda'.

<sup>10</sup> Tu' náquié' Dios quia' dxi'i ladxi', dutságuié' neda'.

Uxijca cazé' Dios nupa ta'díl-lalen neda'.

<sup>11</sup> Biti' gútiu' nupa na' tuá' dö' para cabí ilal-la ladxi' bönachi ladza'.

Lu yöl-la' huáca zxön quiu' bésilasi nupa tuá' dö', en buzötaj léguequi luyú.

Naca cazu' Xantu', Nu run chi'i netu'.

<sup>12</sup> Ben ga sön légaquié' yöl-la' run ba zxön cuíngaquié'

tu' nözi dul-la' tuné' ca tu'isé' didza',

enca' tu' tu'dxié' dö' luzá'agaquié', en ta'zí' yé'ë.

<sup>13</sup> Lu yöl-la' rilé quiu' busuniti légaquié'.

Busuniti légaquié' tsaz para cabí ila'cuá'aré',

en para iléquibe'e bönachi Dios caz rinná bé'ené' xzí'ini xi'sóé' Jacob,

ga ridxinté idúté yödzölió.

<sup>14</sup> Tu'dxiné' chi'i dzó'ölö, ta'bödxi yeché'ë ca runba' bö'cu' ragu yéchi'ba'

beo',

ate' ta'dödé' idú gásibi'ilö yödzö.

<sup>15</sup> Ta'dé' ta'guiljé' le ilahué',

ate' ta'bödxi'ë channö cabí ulu'huölaj ulu'dzé'ené'.

<sup>16</sup> Gul-la' neda' ca naca yöl-la' huáca zxön quiu'.

Yugu' zila gul-la' lu yöl-la' rudzeja quia' ca naca yöl-la' dxi'i ladxi' quiu',

tu' naca cazu' Li' Nu run chi'i neda',

en nacu' Nu rácalen neda' cate' bi raca quia'.

<sup>17</sup> ¡Naca cazu' Li' Nu rutipa ládxa'a!

¡Gul-la' quiu' yöl-la' ba,

tu' nacu' Li' Nu run chi'i neda', Dios, en Nu nadxí'i neda'!

## 60

<sup>1</sup> Nusán no'o netu', Dios, en nuzötju' netu'.

Buécja queétu' na'a, en gúcalen netu'.

<sup>2</sup> Ben cazu' ga gudödi budó' zxu', en guyalaj luyú.

Bun luyú ni tu' chizóa iguinnaj.

<sup>3</sup> Sizxöni busaca' z'u bönachi quiu'.

Le guca queétu' guca tsca bugui'ju' netu' xis uva nal-la

le ben ga yöjchégu'tu' ca tu bönni' nazúdxiné'.

<sup>4</sup> Bunödztju' quégaca nupa tadxi Li' tu lari' ulu'chisa,

le sôjácálen cate' bi raca quéguequi,  
 5 para ulu'lágaca nupa na' nadxí'i quézínu'.  
 Len yöl-la' huáca zxôn quiu' busölá netu', en bubí'i didza' cate' rulidztu'  
 Li'.

6 Lu le naca lá'ayi queë' bë'ë didza' Dios, gunné':  
 "Uzi'a xibé, en quísia' xiyúgaca bônachi Siquem, en urixa' luyú dë cuita  
 yegu Sucot.

7 Nequi quia' xiyúgaca bônachi Galaad, enca' xiyúgaca zxi'ini xi'sóë' Man-  
 asés.

Naca ca tu le rusubín icja' xiyúgaca zxi'ini xi'sóë' Efraín.  
 Xiyúgaca zxi'ini xi'sóë' Judá naca ga rinná bë'a.

8 Xiyúgaca bônachi Moab naca ca tu ga riguibi na'a,  
 ate' cu' a löla' uléaja' xiyúgaca bônachi Edom.  
 Cödxí'a tu' uxicja' bônachi Filistea."

9 ¿Nuzxi caz gaca iché' neda' lu yödzo zoa zö'ö idú gásibi'ilö le run chí'i  
 yödzö na'?

¿Nuzxi caz iché' neda' lu xiyúgaca bônachi Edom?

10 ¿Naru' cabí nusán ládXu'u netu', Dios?

¿Naru' cabí tséajlenu' bönni' queëtu' rójáquië' gudil-la'?

11 Gúcalen netu' cate' tíl-lalenu' nupa ridíl-lalen netu',  
 tu' cabí gaca gácalen netu' nu naca bönáchisö.

12 Len yöl-la' huáca queë' Dios idéli'ru'  
 tu' uxicja' cazë' Lë' nupa ta'díl-lalen netu'.

## 61

1 Ruzé nagu' le rulidza' Li', Dios.

Ruí'i ládXu'u le rinábida' Li'.

2 Ga ni zoa' zi'tu' ga dë ladza' rulidza' Li' tu' rudú ládxa'a.

Guché' neda' ga zoa Nu na' naca ca tu guiöjto'o, Nu na' nál-latërö ca neda'.

3 Nacu' Li' Nu run chí'i neda'.

Nacu' Nu rácalen neda' cate' zoa nu ribía no neda'.

4 Bë' lataj sóatica'sa' ga zoa cazu' Li'.

Bë' lataj sóalena' Li', guna' neda' ca tunba' bórado' ta'yázaba' zxan xílaba'  
 yöjede.

5 Biyón quézínu' Li' le guzxi' lu na'a guna' quiu' Li', Dios.

Benu' ga nequi quia' le runödzju' quégaca nupa tadxi Li'.

6 Gunu' ga soë' xidzé bönni' na' rinná bë'ë uláz quiu'.

Zián iz soë' ibanë'.

7 Sóatica'sé' lo' Li', Dios.

Bë' queë' yöl-la' dxi'i ladxi', en le naca idútë li, yugu' le ilún chí'i lë'.

8 ¿Gúl-latica'sa' yöl-la' ba que Lo',  
 para gaca guna' tu tu dza le guzxi' lu na'a!

## 62

1 ¡Tuzë' Dios ruzxöni ládxa'a, en rizé ládxa'a Lë'!

¡Lë' cazë' rusölë' neda'!

2 ¡Tuzë' Lë' rapa chí'ë neda', en rusölë' neda'!

¡Ruzöë' neda' tsutsu, ate' biti' gaca nu uzötaj neda'!

3 ¿Gáca'xte caz gü'i ládxi'li' ucúl-lali' neda'?  
 Ré'énisili' uzóťjali' neda' ca tu zó'ö chizóa iguínna,  
 o ca tu lě'aj yaga le chinatěbi.  
 4 Ré'énisili' uzóťjali' neda' ga ni tuně' neda' bal.  
 Ruzí'ili' xibé yugu' didza' biti' nácatě.  
 Ruí'ili' dxi'a didza' láchui'sö,  
 pero lu icja ládxi'do'oli' rudidza' yúdxili' neda'.

5 ¡Tuzě' Dios ruzxöni ládxa'a,  
 en runa' löza Lě'!  
 6 ¡Tuzě' Lě' rapa chi'ě neda', en rusölě' neda'!  
 ¡Ruzóě' neda' tsutsu, ate' biti' gaca nu uzóťaj neda'!  
 7 ¡Tuzě' Dios rusölě' neda', en runě' ga naca' bica' ba!  
 ¡Dios nuzóě' neda' tsutsu, en rapa chi'ě neda'!

8 Libí'ili', bönachi, buli'zxöni ládxi'ě'ě Dios yúgu'tě dza.  
 Buli'siyönně' yugu' le raca queé'li', tu' run chi'i cazě' rě'u.  
 9 Le nácatě nácgaca yúgutě bönachi ca tu bö' ridódisö,  
 en biti' bi nazáca'gaca nupa na' nadé'li'gaca lataj lo.  
 Tu lu zzigóns biti' bi nál-lí'guequině'.  
 Nácgacarě' dzá'asö ca tu bö' rigué'la'siru'.  
 10 Biti' uzxöni ládxi'li' bi idé'li'li' len yöl-la' nál-la queězili'.  
 Biti' uzí'ili' xibé le cuanlı'.  
 Channö gata' queé'li' yöl-la' tsahui', biti' gü'i ládxi'li' le.  
 11 Tu luzuísö bě'ě didza' Dios.  
 Chopa luzuí biyönda' ca naca lě ni rnna:  
 "Nápatěřě' Dios yöl-la' huáca,  
 12 ate' zóatica'sö yöl-la' dxi'i ladxi' queě'."

Ubí'cazu', Xan, quegaca bönachi tsa naca le núngaca.

## 63

1 Dios, nacu' Dios quia', ate' idú ládxa'a ruguilja' Li'.  
 Ribidxi ládxa'a Li', ate' idútě le naca' rizě ladxi' Li'.  
 Zoa' tu luyú bidxi ga ni rudú ládxa'a, ate' biti' bi dě nisa.  
 2 Ben ga ilé'eda' Li' lu lataj ga na' zoa casu',  
 para ilé'eda' yöl-la' huáca quiu', en yöl-la' bení' quiu'.  
 3 Tu' nácatěřö dxi'a yöl-la' dxi'i ladxi' quiu' ca yöl-la' na'bán caz.  
 Que lě ni na' cu'a Li' yöl-la' ba.  
 4 Guía' Li': "Xclenu" tsanni ni zoa' nabana'.  
 Uchisa' na'a, en ulidza' Lo'.  
 5 Ruhuö'la'j rudzě'e icja ládxi'da'ahua' le nácatěřö dxi'a,  
 ate' lu yöl-la' rudzeja quia' rigu'a Li' yöl-la' ba.  
 6 Rójneda' Li' cate' déa' lu le ráti'da'.  
 7 Rizá' ládxa'a ca nacu' cate' rina'sa' yěla.  
 Rácalen casu' neda',  
 en tu' run chi'u neda', lu yöl-la' rudzeja quia' rul-la' quiu'.  
 8 Nazön casu' Li' bö' naca caza'.  
 Rizön casu' Li' neda',  
 9 pero ila'yaza lataj chul-la  
 nupa tě'ěni iluti neda'.  
 10 Ilátigaca lu guíě tuchi'.

Ilágugaca bö'cu' zuga' léguequi.

<sup>11</sup> Nu rinná bē' uláz queē' Xanru' udzeja ladxi' lahuē' Dios.  
Ulu'zī' xibé yúgu'tē nupa tu'zxōni ladxi' Lē',  
tu' usayaj cazē' Lē' ru'ígaca nupa ta'zī' yē'.

## 64

<sup>1</sup> Dios, buzē nagu' chí'a le rinabi yúdxida' Lī',  
para gun chí'u yōl-la' na'bán quia' tu' rádxida' bi gun nu ridíl-lalen neda'.  
<sup>2</sup> Bucachi' neda' para cabí bi ilún quia' bagáchi'sō nupa tuá' dō',  
en para cabí ila'bía di'ē neda' bōnni' tutiē' bōnachi.  
<sup>3</sup> Nácagaca lúdxigaquiē' ca yugu' guíē' tuchi',  
ate' nácagaca didza' zī' tu'ē ca yugu' yaga lahui tuchi'.  
<sup>4</sup> Bagáchi'sō tu'zē yugu' yaga lahui tuchi' na'  
para ilunē' huē' nupa bití' bi nabága'gaca.  
Tsárido'os tu'zē léguequi, en bití' bi tádxinē'.  
<sup>5</sup> Bití' ca' tu'cá'anē' le naca dō' tē'ēnē' ilunē'.  
Tu'ē didza' ca gaca ulu'cáché'ē yugu' du yalaj quégaquiē', ta'nnē':  
“¿Nuzxi caz gaca ilé'e yugu' du na'?”  
<sup>6</sup> Tunē' didza' ca naca le naca dō' ilunē', ta'nnē': “Chinabá'a le gunru'.”  
Tu'cáchi'gaquiē' le ta'zá' ládxxē'ē, en le ta'bequi icjē'.

<sup>7</sup> Uzal-lē' Dios tu yaga lahui tuchi' le ideli' légaquiē'.  
Tsárido'os gunē' légaquiē' huē'.

<sup>8</sup> La' didza' tu'isē' ilún ga tsejchégu'gaquiē'.  
Lu yōl-la' rubani quéguequi ulu'tá' ícjaguequi nupa ila'lé'e légaquiē'.  
<sup>9</sup> Ní'irō yúgu'tē bōnachi iladxi Dios,  
en ulu'siyōn luzē'eguequi ca naca le nunē' Dios,  
en ila'zá' ládxi'gaca ca naca lē na' nunē'.  
<sup>10</sup> Nu bōnni' tsahui' uzi'ē xibē' Xanru', en gunē' löza Lē'.  
Yúgu'tē nupa nácagaca idú ladxi' ulu'zī' xibē'.

## 65

<sup>1</sup> Dios, nupa nacuá' yōdzō Sión ila'gú'u Lī' yōl-la' ba,  
en ilunna quiu' le gula'zī' lu nē'eguequi,  
<sup>2</sup> tu' riyōn quézinu' Lī' cate' tu'lidza Lī',  
ate' yúgu'tē bōnachi ila'dxín lo'.  
<sup>3</sup> Tun nigui neda' dul-la' nuna',  
pero runiti lo cazu' netu' ca naca le ridá'baga'tu' Lī'.  
<sup>4</sup> Bica' ba nupa nabō cazu' quiu', en nulidzu' quiu',  
para ila'cuá' yugu' lataj lá'ayi quiu'.  
Huōlaj udzē'etu' le nácagaca dxí'a yú'ugaca lidxu',  
enca' le yú'ugaca yudo' lá'ayi quiu'.  
<sup>5</sup> Tu' nacu' tsahui' rubi'u didza', en runu' yugu' le zxōn le tácalen netu'.  
Naca cazu' Dios Nu rusólá netu'.  
Nupa nacuá' idútē yōdzōlió ulu'zxōni ladxi' Lī',  
enca' nupa nacuá' zī'tu' ia'tsólá'alō nísado'.  
<sup>6</sup> Len yōl-la' huáca quiu' nucu'u yugu' gu'a zxōn,  
le naca bē'gaca nál-latērō cazu' Lī'.  
<sup>7</sup> Ruzóa dxíu' le riyasa ridxía lu nísado', en le ru'u bö que.  
Ruzóa dxíu' bōnachi cate' tu'tsatsa.

8 Bönachi idütë yödzülió tadxi Li' ni'a quégaca le zxön nunu'.

Le run cazu' Li' tun ga tu'dzeja bönachi idapa la'a yödzülió.

9 Ruí'i ládzu'u luyú, en risól-lu'u nisa guiøj.

Runu' ga ruhuóaca yu ya'a.

Nucú'u luyú na' yugu' yegu yúdzugaca nisa zila,

le run ga dética'sö zxa'-za, tu' caní raza ládzu'u Li'.

10 Risól-lu'u nisa guiøj gapa dégaca na, en rusubisu' gapa chinadúz.

Ruúnu' yúludo' luyú zidzaj, en runu' ga ta'gula guixi' cuando'.

11 Runu' ga rula' yödxi yana' le nadúz luyú ni tu iz tu iz,

en ga zóatica'sö le ilë'aj ilágugaca bönachi.

12 Nacuá'aba' böa'-bëdxi la' guixi',

ate' tu'dzeja bönachi yugu' lu guí'ado'.

13 Gapa naca lachi' nacua'aba' bö'cu' zxila',

ate' dxíada' zxa' xtila la' yëla.

Lu yöl-la' rudzeja quéguequi ta'bödxi'a,

en tul-la bönachi quiu'.

## 66

1 ¡Guli'güi' zidzaj didza' lahuë' Dios

lu yöl-la' rudzeja queëli' yúgu'tëli' zóali' yödzülió!

2 ¡Guli'gul-la ca naca yöl-la' ba que Lë'!

¡Guli'cu'ë yöl-la' ba!

3 Guli'guié' Dios: "¡Zxöntëro nácagaca le nunu'

tu' naca zxöntëro yöl-la' huáca quiu'!"

Nupa bití' ta'lé'e Lí' dxi'a ulu'lu'i' cuini

ca nupa tun ca rnna xtídz'u.

4 Yúgu'të nupa nacua' yödzülió ilún Li' zxön,

en ilúl-la yöl-la' ba quiu'.

Ilúl-la yöl-la' ba que Lo'.

5 Guli'dá ilé'eli' yugu' le nunë' Dios.

Nayëpisëtëre' Dios lu le runë' quégaca bönachi.

6 Benë' ga böaca ca luyú bidxi ga dë nísado'.

Gula'dödë' gatsaj láchui'lö yegu, ta'zë'esó ní'agaquië'.

Ni' udzëjade'eru' ca náquië' Lë'.

7 Len yöl-la' unná bë' queë' rinná bë'tica'së'.

Ruyútica'së' bönachi yúgu'të yödzü.

Bití' ral-la' ilún ba zxön cuínguequi nupa ta'dá'baga' xtídzë'ë.

8 ¡Guli'gún zxönë' Dios queëtu', libí'ili' bönachi yúgu'të yödzü,

en guli'cu'ë yöl-la' ba gáti'tës!

9 ¡Run cazë' Lë' ga zóaru' nabanru',

en bití' ru'ë lataj cuila ní'atu'!

10 Guzxí' bë' cazu' netu', Dios.

Buchi'u netu' ca run nu ruchi'a guié plata lu guí'.

11 Bë'u lataj bidzuntu' lu du yalaj.

Busubágu'u netu' tu yua' zi'i.

12 Benu' ga gula'libë' icjtu' bönni' dxíagaquië'-ba' böa'.

Gudödítu' lu guí', en lu nisa,

pero guchë' cazu' netu' tu lataj ga bölaj budzë'etu'.

13 Tsu'a lidxu', en cu'a-ba' lo' böa'do' uzégui'a-ba' lo'.

Guna' lo' Li' le guzxi' lu na'a guna',

14 læ na' bë'a didza' que,

le gunniá' cate' ni' riguf'i rizáca'a.

15 Cu'a-ba' lo' Li' böa'-bëdxi renni' uzégui'a-ba' lo',

tsözxön len dzön quégacaba' chivo biguiú'.

Gútia'-ba' lo' yugu' bëdxi, en yugu' chivo biguiú'.

16 Guli'dá uzé nágali', yúgu'tëli' rádxili'-në' Dios,

ate' usiyönda' libí'ili' yugu' le benë' le gulácalen neda'.

17 Len ruá' cuinsa' bulidza' Lë',

en bena' Lë' zxon len lúdxá'a.

18 Channö rucácha'a le naca dö' lu ládxi'da'ahua',

biti' yönnë' Xanru' Dios didza' gu'a,

19 pero le nácatë biyönnë' Dios didza' bë'a.

Buzë naguë' cate' bulidza' Lë'.

20 ¡Yöl-la' ba Dios!

¡biti' gudá'baguë'ë neda' cate' bulidza'-në',

en biti' bugüë' yöl-la' nadxí'i queë' neda'!

## 67

1 Xantu' Dios, buzá' ladxi' queëtu', en ben ga gaca dxi'a queëtu'.

Lu yöl-la' dxi'i ladxi' quiu' buyú netu',

2 para gaca bë' le rë'ënu' guntu' yödzölió ni,

en para ila'nözi bönachi yúgu'të yödzö ca naca yöl-la' rusölá quiu'.

3 Ral-la' ila'gú'u bönachi Li' yöl-la' ba, Dios.

Yúgu'të bönachi ral-la' ila'gú'u Li' yöl-la' ba.

4 Ral-la' ulu'dzeja bönachi yúgu'të yödzö,

en ilúl-la lu yöl-la' rudzeja quéguequi.

Tu' uchi'a usöröu' bönachi ca naca le naca tsahui',

5 ral-la' ila'gú'u Li' yöl-la' ba bönachi, Dios.

Yúgu'të bönachi ral-la' ila'gú'u Li' yöl-la' ba.

6 Yödxi yana' runödzej luyú ni.

Dios queëru' runë' ga raca dxi'a queëru'.

7 Runë' Dios ga raca dxi'a queëru',

para iladxi Lë' yúgu'të nupa nacuá' yödzölió.

## 68

1 Raca ládxi'ru' chasë' Dios, en usulásië' nupa ta'díl-lalen Lë',

en gunë' ga ulu'zxunnaj nupa biti' ta'lé'e Lë' dxi'a.

2 Ca rulaga tu bö' recja dzön, ca' bulaga léguequi.

Ca na' ruúna' lu guí' quíxí'ba' buz,

ca' ila'niti nupa tuá' dö' lahuë' Dios.

3 Ulu'dzeja nupa nácgaca tsahui', en ulu'zí' xibë' Dios.

Lu yöl-la' rudzeja quéguequi ulu'zí' xibë'.

4 ¡Guli'gul-la queë' Dios!

¡Guli'gul-la yöl-la' ba que Lë'!

Buli'pá'a nōza ga tödë' gapa dë lataj.

¡Nazí'i lë' Xanru'!

¡Buli'dzeja lahuë' Lë'!

<sup>5</sup> Náquië' ca xúzgacabi' bi'i uzébidó',  
enca' Nu ruchí'a rusöró quégacanu nigula uzébi.

Caní náquië' Dios ga na' zoë' lataj lá'ayi queë'.

<sup>6</sup> Rucu'ë Dios nupa nagá'anagaca bayechi' tu yu'u.

Rubéajë' nupa nadzúngaca, en runë' ga raca dxi'a quéguequi,  
pero ulu'gá'ana tu luyú bidxi nupa ta'dá'baga' Lë'.

<sup>7</sup> Yöjnöru casu' lógaca bönachi quiu', Dios,  
cate' guchë'u léguequi la' guixi' ga na' dë lataj.

<sup>8</sup> Gudödi budó' zxu' dza ni'.

Lësca' gula guiöjsiu' lahuë' Dios.

Guzzizi guí'a Sinaí lahuë' Dios quégaca bönachi Israel.

<sup>9</sup> Benu' ga gulaj guiöjsiu', Dios.

Benu' ga böáca ya'a xiyú' ga ni' guca yu bidxi.

<sup>10</sup> Yöjcuá' nupa néquiguequi quiu' luyú na'.

Lu yöl-la' dxi'i ladxi' quiu', Dios,

bucözu' le gácalen nupa nácagaca yechi' luyú na'.

<sup>11</sup> Bë' cazë' didza' Xanru' Dios.

Ta'guísinu nigula zían didza' dxi'a queë', ta'nnanu:

<sup>12</sup> "¡Ta'zxúnnajë'! ¡Ta'zxúnnajë' bönni' ta'nná bë'ë,  
enca' bönni' röjáquië' gudil-la guizxi yu quégaquië'!"

Nigula gula'bözanu lídxigacanu bulu'zí'ínu xibé le gutá' quégaquië'.

<sup>13</sup> Sal-la' bucachi' loli' gapa tun chí'ili' bö'cu' zxila',

gáculi' le naca lachi ca nácagacaba' gu'dödo' néquiguequiniba' guíë plata,  
en xitúbigacaba' néquiguequini guíë oro.

<sup>14</sup> Cate' bësílásië' Dios bönni' na' gula'nná bë'ë lu guí'a Salmón,

benë' ga gula guiöj bögui' lu guí'a na'.

<sup>15</sup> Nequi queë' Dios guí'a Basán.

Naca guí'a Basán na' tu guí'a zxön.

<sup>16</sup> ¿Bizx que ruzxé'eli', yugu' guí'a zxön?

¿Bizx que ruzxé'eli' guí'a na' guzë ládxe'ë Dios tsöjsóë' ga na'?

Le nácatë tsaz soë' Dios ni'.

<sup>17</sup> Gayuá', en gayuá' nácagaca carreta que gudil-la queë' Dios.

Rizë'ë Xanru' lu guí'a Sinaí ga na' tseajtsazië' lataj lá'ayi queë'.

<sup>18</sup> Buëpu' yehua' yubá richë'u bönachi zían gula'dzúngaca.

Nu'u yugu' le bulu'nödzej bönachi quiu',

en le gulunna quiu' nupa ta'dá'baga' Li',

para tsöjsóë' Dios ni' tsaz.

<sup>19</sup> ¡Yöl-la' ba Dios, Nu ruá' sua'ru' tu dza tu dza!

¡Náquië' Dios Nu rusölá rë'u!

<sup>20</sup> ¡Dios queëru' rusölë' rë'u!

¡Rusölë' Xanru' Dios rë'u lu yöl-la' guti!

<sup>21</sup> Le nácatë Dios udxíë' huë' ícjagaca nupa ta'dá'baga' Lë'.

Udxíë huë' icjë' bönni' biti' gusanë' ca naca dö' ru'ë.

<sup>22</sup> Ru'ë didza' Xanru', rnnë': "Ubéaja' léguequi lu guí'a Basán, en ubéaja' léguequi lu nísado',

<sup>23</sup> ate' ulíbili' léguequi ga idxintë irúaj rön quéguequi, ate' ilé'ajba' zxiculi' xichóngaca nupa ta'dil-lalen libí'ili'."

<sup>24</sup> Ta'lé'e yúgu'të bönachi nupa ta'dalen Li', Dios.

Lu yöl-la' run Li' zxon ta'dá lu lataj lá'ayi quiu', Dios quia', Nu rinná be'e neda'.

<sup>25</sup> Nupa tul-la, en nupa ta'guínnaj lé'egaca bihuël-la, ta'dá ni', ate' bi'i nigula ra'bando' tunbi' léguequi tsözxön, ta'gápabi' lé'egaca guídido'.

<sup>26</sup> Buli'lidzë' Dios dxi'a tsáhui'do' gapa na' rudúbili' queë', tu' náquië' Xanru', libí'ili' zxi'ini xi'sóë' Israel.

<sup>27</sup> Nacu'ë zxi'ini xi'sóë' Benjamín ga na', bönni' gúcarë' cuidi', ate' ta'nná bë'ë.

Bönni' lo quégaquië' zxi'ini xi'sóë' Judá nútsa'gaquië' ladjagaquië', enca' ladjagaquië' bönni' lo quégaquië' zxi'ini xi'sóë' Zabulón, en Neftalí.

<sup>28</sup> Buluí'i lahui yöl-la' huáca quiu', Dios.

Buluí'i lahui yöl-la' huáca quiu', Dios, tu' chibenu' zián le gulácalen netu'.

<sup>29</sup> Tu' dë yudo' quiu' lu yödzö Jerusalén, bönni' ta'nná bë'ë ila'ché'ë ni' le ilunnë' quiu'.

<sup>30</sup> Buzé le bach bönachi yödzö na' nácagaca ca böa' guixi', enca' bönachi yugu' yödzö nácagaca ca yugu' bëdxi tsözxön len zxi'iniguequi.

Tu'libi bönachi yechi' tu' ta'zé lãdxi'gaca dumí.

Bësilási nupa na' ta'yaza ladxi' røjaca gudil-la.

<sup>31</sup> Bönni' gubáz quégaca bönachi Egipto ila'dxinë' lo'.

Bönni' Etiópia ila'chisa ná'agaquië' lo', Dios.

<sup>32</sup> ¡Guli'gul-la queë' Dios, bönachi yúgu'të yödzö!

¡Guli'gul-la yöl-la' ba queë' Xanru'!

<sup>33</sup> Rö'ë yehua' yubá xitsá'tërö, le zoa caz dza ni'te.

Buli'yútsöca', ru'ë zidzaj didza', en naca chi'ë ca guziú' rinnë.

<sup>34</sup> ¡Guli'gún zxonë' Dios!

Yöl-la' nayëpisë queë' rusubaga' bönachi Israel.

Yöl-la' huáca zxon queë' nalá' lúzxiba xitsá'.

<sup>35</sup> Rubániru' ca nacu' Li', Dios, lu lataj lá'ayi quiu'.

Runnu' quégaca bönachi quiu' yöl-la' nal-la, en yöl-la' huáca.

Náquië' Dios quégaca bönachi Israel.

¡Yöl-la' ba Lë' Xanru' Dios!

## 69

<sup>1</sup> Busölá neda', Xana' Dios, tu' raca quia' tsca nabága'a nisa ga ridxintë ruchicja' nisa.

<sup>2</sup> Raca quia' tsca ruhuötja' ga rë' lu guna', en biti' zoa ga gaca uliba'.



Zoa' ca tu lu nisa zila, en chizóa uchicja' nisa.

<sup>3</sup> Rudú ládxa'a tu' rulidza' nu gácalen neda', ate' da' lubá'a.  
Chirichul-la guiöj lahua' tu' ruyúa' ga guídu' dusöló' neda'.

<sup>4</sup> Nayántërö ca guitsa' icja' nupa biti' ta'lé'e neda' dxi'a,  
en biti' bi nuna' quéguequi.

Nál-lagaca nupa ta'díl-lalen neda', en t'ëni iluti neda',  
en biti' bi nuna' quéguequi.

Tunë' bayúdx ubi'a dumí le cabí gulana'.

<sup>5</sup> Nöz quézinu' Li', Dios, yöl-la' canöz quia',  
en biti' nagachi' lo' Li' dul-la' nuna'.

<sup>6</sup> Biti' gu'u lataj nupa tu'zxöni ladxi' Li' ulu'tuí' ni'a quia' neda',  
Xana' Dios nayépisëtëru'.

Biti' gu'u lataj nupa tun Li' zxön ila'gá'ana cá'asö ni'a quia',  
Dios quégaca bönachi Israel.

<sup>7</sup> Tu' nadxí'ida' Li' tu'lidza ditjë' neda',  
en que lë ni na' rutuí'ida'.

<sup>8</sup> Naca' ca tu bönni' zi'tu' lógacabi' bi'i böcha'a,  
en ca tu bönni' zi'tu' lógaquië' di'a dza quia'.

<sup>9</sup> Tu' ruí'í ládxa'a yudo' quiu' régui rilá ládxi'da'ahua'.  
Naca ca tu'lidza ditaj neda' nupa tu'lidza ditaj Li'.

<sup>10</sup> Ruzötaj cuina', en runa' gubasa,  
en que lë ni na' tu'didza' yudxi neda'.

<sup>11</sup> Rácuu' lari' cá'asö ca run nu ribödx yechi',  
ate' tu'titaj neda'.

<sup>12</sup> Ta'nnë' quia' yugu' la' nöza,  
ate' nupa nazúdxigaca tul-la ca naca quia',

<sup>13</sup> pero neda' ulidza' Li', Xan.

Bubí'í didza', Dios, cate' idxín dza raza ládxi'u Li'  
tu' nadxí'ide'enu' neda',  
en tu' guzzí' lu no'o usóló' neda'.

<sup>14</sup> Guléaj neda' para cabí huötja' lu le naca ca guna'.  
Ben ga ulá' lu ná'agaca nupa ta'díl-lalen neda',  
en lu le naca ca nisa zila le chizóa ibaga' neda'.

<sup>15</sup> Biti' gu'u lataj ibaga' neda' lë na'.

Biti' gu'u lataj uchicja' lu le naca ca nísado',  
enca' cabí huötja' tu lu yeru ba.

<sup>16</sup> Bubí'í didza', Xan, tu' nacu' dxi'í ladxi',  
en tu' ruhuéchi' ládxi'u neda', gudá quia'.

<sup>17</sup> Biti' ucachi' cuinu' lahua' neda', huen dxin quiu'.

¡Rö'a böniga! ¡Gudáchi gúcalen neda'!

<sup>18</sup> ¡Gudá ga zoa' dusöló' neda'!

¡Ben ga ulá' lu ná'agaca nupa ta'díl-lalen neda'!

<sup>19</sup> Nöz quézinu' Li' ca tu'didza' yudxi neda',  
en ca tu'lidza ditaj neda', en tu'cá'ana neda' cá'asö.  
Rilé'e quézinu' yúgu'të nupa biti' ta'lé'e neda' dxi'a.

<sup>20</sup> Rudú ládxa'a tu' tu'didza' yudxi neda', en biti' bi gaca guna'.

Gulöza' nu huéchi' ladxi' neda', pero cuntu nu guzóa.  
 Gú'unida' nu huë tsahui' neda', pero cuntu nu bidzöli.  
 21 Cate' guduna' bulu'gahuë' neda' tu le silá',  
 en cate' gubidxa' nisa, bulu'gui'jè' neda' nupe zi.

22 Ben ga huóaca laní quégaquië' ca tu le sön légaquië',  
 en ben ga huóaca le tu'zi'ë xibé ca tu le gun ga ila'chixi ila'níguinë'.  
 23 Ben ga ichul-la guiöj lógaquië' para cabirö ila'lé'enë'.  
 Ben ga ila'zéchutica sò cúdzu'gaquië' zخان yua' nuá'gaquië'.  
 24 Busubaga' légaquië' lu yöl-la' rilé quiu',  
 en bē' quégaquië' yöl-la' ridzá'a quiu'.  
 25 Ben ga cuntu nu soa ládzaqaquië',  
 en ga bití'rö nu soa lu yu'u lídxigaquië'.

26 Ta'zóa régu'ë nupa na' benu' léguequi xigua'.  
 Tu'siyönnë' ca ta'guí'i ta'zaca' nupa na' nunu' léguequi huë'.  
 27 Buzúaj lu guichi yugu' dul-la' tunë',  
 en bití' gu'u légaquië' lataj ila'déli'në' yöl-la' rusölá quiu'.  
 28 Busulu lágaquië' nazúajgaca lu guichi quégaca nupa nabángaca.  
 Bití' gu'u légaquië' lataj ila'bábalenë' nupa nácagaca tsahui'.  
 29 Neda' riguí'i rizáca'a, en rudú ládxa'a.  
 Guchisa neda', Díos, en busölá neda'.

30 ¡Cu'a-në' yöl-la' ba Dios len tu le gul-la'!  
 ¡Guna' Lë' zXön, en guía'-në': "Xclenu"!"

31 Chaza ládxe'ë Xanru' Dios lë ni  
 ca raza ládxe'ë-ba' böa'-bëdxi rúti'a'-ba' lahuë',  
 o ca raza ládxe'ë-ba' tuba' bëdxi zXön chinagúlaba'.  
 32 Nupa ta'guí'i ta'zaca' ila'lé'eni lë ni, en ulu'dzeja.  
 Ila'dipa ládxi'gaca nupa tu'guilaj Dios.  
 33 Ruzé naguë' Xanru' Dios nupa ta'yadzaj ta'yudxi,  
 en bití' ral-la ládxe'ë bönachi queë' nadzúngaca.

34 ¡Guli'cu'ë yöl-la' ba Dios, libí'ili' yehua' yubá, en luyú ni,  
 enca' nísado', en yúgu'të le nacué' tu tu lataj na'!

35 Usölá cazë' Dios bönachi Sión,  
 en uchisë' yugu' yödzo quégaca xzí'ini xisóë' Judá.  
 Ila'cuá' bönachi queë' ga na', ate' guequi quéguequi luyú na'.  
 36 Xzí'ini xisóagaquië' huen xichinë' ila'zí'ibi' luyú na',  
 ate' ila'cuá'tica sò ni' nupa nadxí'igaca Lë'.

## 70

1 ¡Busölá neda', Dios!  
 ¡Gudáchi gácalenu' neda', Xan!  
 2 Ben ga ulu'tuí'i, en ila'bö' böniga nupa na' tē'ëni iluti neda'.  
 Ben ga ulu'huécja, en ulu'gá'ana cá'asö nupa na' tē'ëni gaca bi gaca quia'.  
 3 Ben ga ulu'huécja lu yöl-la' rutuí'i quéguequi  
 nupa na' tu'titaj neda', ta'nná: "Ja, ja."  
 4 Ben ga ulu'dzeja, en ulu'zí' xibó' yúgu'të nupa tu'guilaj Li'.  
 Ben ga ilu'ítica sò didza' nupa ta'dxi'i yöl-la' rusölá quiu', ila'nná:

“¡Zxöntërö náquië’ Dios!”

<sup>5</sup> Neda’ nacuídi’da’, en biti’ bi gaca guna’.  
 ¡Gudáchi gácalenu’ neda’, Dios!  
 Nacu’ Nu rácalen neda’, en Nu rusölá neda’.  
 ¡Biti’ ca’ tsenu’ guídu’ quia’, Xan!

## 71

<sup>1</sup> Nuzóa cazu’ neda’ dxi’a tsáhui’do’ ga na’ zu’, Xan.

¡Biti’ gu’u lataj utuí’ida’!

<sup>2</sup> ¡Tu’ nacu’ tsahui’ gúcalen neda’, en busölá neda’!

¡Buzé nagu’ neda’, en busölá neda’!

<sup>3</sup> Nacu’ le uzóa neda’ tsutsu,

en le gun chí’i neda’ ga gaca ucachi’ cuina’.

Chigunná bé’enu’ nu usölá neda’ tu’ nacu’ Nu ruzóa neda’ tsutsu,  
 en Nu run chí’i neda’.

<sup>4</sup> Dios quia’, busölá neda’ lu na’ nu ruá’ dö’,

en lu na’ nu ridá’baga’ Li’, en run dzatsa.

<sup>5</sup> Tuzu’ Li’ runa’ löza, Xan.

Ruxxöni ládxa’a Li’ ga gudéla’të naca’ bí’ido’.

<sup>6</sup> Ruxxöni ládxa’a Li’ ga gudéla’të gulja’,

tu’ guzóalen cazu’ neda’ cate’ ni’ buzóanu xiná’a neda’.

¡Cú’utica’sa’ Li’ yöl-la’ ba!

<sup>7</sup> Zián nupa tu’bani ca naca quia’,

tu’ run chí’i cazu’ Li’ neda’.

<sup>8</sup> ¡Rigú’utica’sa’ Li’ yöl-la’ ba,

en tu dza tu dza rulu’a lahui yöl-la’ ba quiu’!

<sup>9</sup> ¡Biti’ usán no’o neda’ na’a, ni naca’ bönni’ gula!

¡Biti’ uca’anu’ neda’ na’a cate’ ni rudú ládxa’a!

<sup>10</sup> Tu’i didza’ nupa biti’ ta’lé’e neda’ dxi’a ca gaca bi ilún quia’,

ate’ tun tuz xtídza’ gaca nupa tē’ëni iluti neda’.

<sup>11</sup> Ta’nná: “¡Nusán në’ë Dios lë’!

¡Guli’dá sönru’-në’ tu’ cuntu nu zoa gácalen lë’!”

<sup>12</sup> ¡Dios, biti’ su’ zi’tu’ ga ni zoa!

¡Dios quia’, gudáchi gácalenu’ neda’!

<sup>13</sup> Ben ga ulu’tuí’i, en ila’niti nupa tē’ëni iluti neda’.

Ben ga ulu’tuí’inë’, en ila’bö’ë böniga bönni’ tē’ëne’ ilu’ë dö’ quia’.

<sup>14</sup> ¡Neda’ gúntica’sa’ löza Li’,

en cú’utica’sa’ Li’ yöl-la’ ba!

<sup>15</sup> Idú dza usiyönda’ bönachi nacu’ tsahui’,

en rusöló’ yúgu’të bönachi.

Biti’ nözda’ bal-laxi luzuí busöló’ neda’.

<sup>16</sup> ¡Gu’a didza’ ca nácgaca le zxön benu’ Li’, Xana’ Dios!

¡Usiyönda’ bönachi tuzu’ Li’ nacu’ tsahui’!

<sup>17</sup> Dios, rusédinu’ neda’ ga gudéla’të ni’ naca’ bí’ido’,

ate’ ga ridxintë na’a dza ruá’a didza’ ca nácgaca le zxön nunu’.

<sup>18</sup> Na’a naca’ bönni’ gula, en chinagucha’.

¡Biti’ usán no’o neda’, Dios!

Benna neda' lataj usiyönda' yugu' xzí'ini xsoa' ca naca yöl-la' huáca quiu',  
ate' quíxjöi'ida' nupa ilalaj ca naca yöl-la' nál-la quiu'.

19 ¡Le tsahui' nacu', Dios, ridxintë lúzxiba!  
¡Nunu' Li' yugu' le zxöntëró!  
¡Cúnturö nu zoa nu naca ca nacu' Li', Dios!

20 Gusöl-la' cazu' quia' yugu' le guca quia' le gulún neda' zi',  
pero ruúnu' neda' tsutsu,  
en le yúbölö uchisu' neda' para cabí gátia'.

21 Gunu' ga tsépisea',  
en huë tsahú'u neda' le yúbölö.

22 ¡Le nácatë cu'a Li' yöl-la' ba, en gul-la' tu bihuël-la, Dios!  
¡Gul-la' ca runu' ca rnno', en nacu' Nu naca lá'ayi lógaca bönachi Israel!

23 ¡Lu yöl-la' rudzeja quia' cõdxi'a cate' gul-la' quiu',  
en idú lãdxa'a gul-la' tu' busóló' neda'!

24 ¡Idú dza gu'a didza' ca nacu' tsahui'!  
¡Tu'tuí'i, en ta'bõ' baguí'i nupa gulë'ëni iluá' dö' quia'!

## 72

1 Dios, buzéajni'inë' bönni' rinná bë'ë  
para gaca uchi'a usöröë' ca ruchi'a rusöróu' Li'.

Ben ga ilácagacabi' tsahui' xzí'inë' ca nacu' Li' tsahui'.

2 Bë'ë lataj uchi'a usöröë' quégaca bönachi quiu' ca naca le naca tsahui',  
enca' quégaca bönachi quiu' ta'guí'i ta'zaca'.

3 Ben ga ila'cuá' dxi'a tsáhui'do' bönachi quiu' yugu' lu guí'a,  
en ilácagaca tsahui' yugu' lu guí'ado'.

4 Bë'ë lataj ubéajë' tsahui' nupa ta'guí'i ta'zaca' ladaj bönachi quiu',  
en usölë' yugu' xzí'inigaca nupa ta'yadzaj ta'yudxi,  
en ucul-lë' nu ribía no léguequi.

5 Ben ga iladxi bönachi quiu' Li' tsanni ni' soa gubidza,  
enca' tsanni ni' soa beo' ga idxintë dza udxi.

6 Ben ga gáquië' bönni' rinná bë'ë ca nisa guiõj ribixi lu guíxi'do',  
en ca yugu' guiõj gúpa'do' tu'subisa luyú.

7 Ben ga gaca dxi'a quégaca nupa nácgaca dxi'a yugu' dza inná bë'ë lë',  
en ila'cuá' dxi'a tsáhui'do' ga idxintë bití'rö soa beo'.

8 Ben ga inná bë'ë idapa la'a yödzölió,  
ga naguela' ra' yegu Eufrates ga idxintë idútë luyú.

9 Ben ga ulu'zachu xzíbigaca lahuë' lë' nupa nacua' luyú bidxi,  
en iladxi lë' nupa ta'díl-lalen lë'.

10 Ben ga ila'dxinë' lahuë' bönni' ta'nná bë'ë luyú Tarsis en yugu' lu yödzö,  
nuá'gáquië' yugu' le ulu'nödzjë' queë'.

Bönni' ta'nná bë'ë luyú Sabá, en luyú Seba ila'dxinë' bi ulu'nödzjë' queë'.

11 Ben ga ulu'zachu xzíbigaquië' lahuë' yúgu'të bönni' ta'nná bë'ë,  
en ilúngaca xichinë' bönachi yúgu'të yödzö.

12 Usölë' nu riyadzaj riyudxi cate' ulidza lë',  
enca' nu riguí'i rizaca', en nu bití' zoa nu gácalen nu na'.

13 Huéchi' lãdxë'ë nupa nácgaca yechi', en nupa ta'yadzaj ta'yudxi,  
en gun chi'ë yöl-la' na'bán quégaca nupa nácgaca yechi'.

14 Usölë' léguequi lu ná'agaca nupa tun léguequi zi',

en lu ná'agaca nupa tuá' dō',  
 en gü'i ládxe'è léguequi cate' nu gué'ëni guti léguequi.  
 15 Soë' ibanë', ate' iluá'gaca bönachi queë' oro que lu xiyúgaca bönachi  
 Sabá.

Ben ga ulu'lidza Dios bönachi, ila'nábitica'sö Li' gácalenu' lë'.  
 Ben ga ulu'lidza lë' dxi'a tsáhui'do' idú dza.  
 16 Ben ga unödzejada' zxoá' luyú queë', enca' yugu' lu guí'ado',  
 le unödzej yödxi yana' xiyúë' ca run guí'a Líbano.  
 Ben ga ila'yán nupa nacué' ladzë' ca rö'ö guíxi'do' lu xiyúë'.  
 17 Ben ga tsöjnégaca le lë' ga idxintë dza udxi.  
 Ben ga gaca yöl-la' ba que lë' tsanni ni' soa gubidza.  
 Ben ga ila'nabi bönachi Li' yúgu'të yödzö  
 gunu' ga gaca dxi'a quéguequi ca benu' queë' lë'.  
 Ben ga ila'gú'u lë' yöl-la' ba bönachi yúgu'të yödzö.

18 ¡Yöl-la' ba Xanru' Dios, Dios quégaca bönachi Israel!  
 ¡Tuzë' Lë' runë' le túngaca ga rubániru'!  
 19 ¡Yöl-la' ba Lë' le naca lachi ga idxintë dza udxi!  
 ¡Rizé ládxi'ru' ilí idútë yödzölió le naca bení' queë'!

¡Ca' gaca! ¡Ön, ca' gaca!

20 Chibudxi le rinábida'-në' Dios neda', David, zxi'inë' Isaí.

## 73

1 Le nácatë runë' Dios ga raca dxi'a quégaca bönachi Israel,  
 nupa na' naca dxi'a tsahui' ládxi'do'guequi.  
 2 Ia'láti'sö guchixi guníguida'.  
 Ia'láti'sö tsöjdöda' tsölá'alö,  
 3 tu' buzé'eda' nupa tun ba zxön cuínguequi,  
 en tu' dëda' yöl-la' tsahui' quégaca nupa tuá' dō'.  
 4 Biti' ca' téquinë' zi' bönni' tu'ë dō' na'.  
 Nácagaquië' tsutsu, en nacué' dxi'a.  
 5 Biti' ta'guí'i ta'záquë'ë ca ta'guí'i ta'zaca' ia'zica'rö bönachi.  
 Biti' ca' raca quégaquië' ca raca quégaca bönachi yúbölö.  
 6 Naca yöl-la' run ba zxön cuini quégaquië'  
 ca tu le néquini oro dxía ícjagaquië'.  
 Yöl-la' rutsatsa quégaquië' naca ca zxágaquië' nácugaquië'.  
 7 Tu'zi'ë xibë le ta'dödi bë'ë té'aj tahuë',  
 en ta'zá' ládxi'gaquië' quégaca le zían le ila'déli'në'.  
 8 Tu'titjë' ia'zica'rö bönachi,  
 en tu'ë didza' lu yöl-la' run ba zxön cuini quégaquië'.  
 Tun ba zxön cuíngaquië',  
 en té'ënë' ila'bía nahuë' ia'zica'rö bönachi.  
 9 Ta'nnë' queë' Dios zoë' yehua' yubá,  
 en tu'didza' yudxë' nupa nacué' yödzölió.  
 10 Que lë ni na' ta'dá' bönachi queë' Dios légaquië',  
 en ta'yéajlë' didza' tu'ë.  
 11 Ta'nnë': "Biti' ca' nözinë' Dios,  
 en biti' ilé'e lë ni Nu na' zoa xitsá'alö."  
 12 Caní nácagaca nupa tuá' dō'.

Dëda' yöl-la' tsahui' quéguequi, en ta'zítica'sò ia'lati'.

<sup>13</sup> ¿Naru' nítisö ben chí'i cuina' para gaca' dxi'a  
en para cabí íbága'a dul-la'?

<sup>14</sup> Dios, benu' ga gudí'i guzxáca'a idú dza.  
Yugu' zila benu' neda' zi'.

<sup>15</sup> La'tu' bē'a didza' ca náca-gaca lē ni  
guzxí' yé'eda' bönachi quiu'.

<sup>16</sup> Que lē ni na' bē' lādxa'a tséajni'ida' lē ni,  
sal-la' gúcada' böniga

<sup>17</sup> ga bídxintē dza guyu'a yudo' quiu'  
en guyéajni'ida' ca gaca quégaca nupa tuá' dö'.

<sup>18</sup> Le nácatē nuzú' léguequi ga ta'chixi ta'nigui,  
en runu' ga íla'niti tsaz.

<sup>19</sup> La' íla'nítitē,  
en íla'yaza ga udxi quéguequi.

<sup>20</sup> Náca-gaca ca tu le rinetu' yēla le ridödi que cate' ritö yu.  
Cate' chasu', Xan, la' udöditeu' léguequi tsölá'alö.

<sup>21</sup> Cate' yöjdín icja' le náca-gaca ca tu le silá',  
en guzá' lādxa'a yugu' le gúquida' zi',

<sup>22</sup> guca' tu' canöz, en bití' bi guyéajni'ida'.  
Guca' ca tuba' böa' guixi' lo' Li'.

<sup>23</sup> Zóatica'sa' lo' Li',  
ate' rizóncazu' neda'.

<sup>24</sup> Rigú'u yöl-lu'u neda' le rugú'u neda' nöza quiu',  
en ga údxité uzi'u neda', en gunu' neda' bal.

<sup>25</sup> ¿Núzxirö zoa yehua' yubá nu gácalen neda'?  
¡Tuzu' Li'!

Tu' rácalenu' neda' cúnturö nu zoa yödzölió nu riquinda'.

<sup>26</sup> Ricuidi' le naca', en rudú lādxa'a.

Le ruzóa tsutsu lādxi'da'ahua',  
en le ruzítica'sa' xibé naca'cazu' Li', Xan.

<sup>27</sup> Le nácatē íla'niti nupa tu'cá'ana Li'.

Usunítu' yúgu'tē nupa tu'zóa Li' tsölá'alö.

<sup>28</sup> Raca dxi'a quia' cate' ribiga' ga zu' Li', Dios.

¡Naca'cazu' Li', Xana' Dios, Nu run chí'i neda'  
para ulu'a lahui yúgu'tē le nuncazu'!

## 74

<sup>1</sup> Dios, ¿naru' tsaz nusán lādxi'u netu'?

¿Riléde'enu' netu', bö'cu' zxila' queécazu'?

<sup>2</sup> Yöjné netu', bönachi tu'dubi quiu', nupa böá'ucazu' dza ni'te,  
nupa böá'ucazu' para gácatu' bönachi queécazu'.

Yöjné guí'a Sión, ga ni guzóa'cazu' Li'.

<sup>3</sup> Gudá tōdu' ga ni naguinnajdērö yödzö lá'ayi quiu'.

Bulu'sunítidērö nupa gula'dá'baga' Li'  
yúgu'tē le gula'cuá' lataj lá'ayi quiu'.

<sup>4</sup> Tu'tsatsa nupa na' gula'dá'baga' Li'  
idú gásibi'ilö ga ni budúbitu' quiu'.

Nucúa'gaquië' ni le naca bë'gaca  
nuxícjagaquië' yödzo lá'ayi quiu'.

<sup>5</sup> Nalá' lahui yödzo ni ca nalá' tu guí'a cate' nu gulú'u le bidín,  
en nurixi nu na' yugu' yaga gula'cuá' lu guí'a na'.

<sup>6</sup> Bulu'zxuzxjë' le náacagaca lachi lu yödzo ni  
len yugu' guíë huága quégaquië', en yugu' yaga zidzaj.

<sup>7</sup> Bulu'zégui'ë idútë lataj lá'ayi quiu'.  
Nucá'anagaquië' cá'asö lataj ga benru' bal Lo'.

<sup>8</sup> Lu icja ládxi'do'gaquië' gula'né': "Nuxícjadërötu' bönachi ni."  
Idútë lu xiyutu' bulu'zégui'ë yúgu'të yu'u ga na' budúbitu' lo'.

<sup>9</sup> Bítirö caz rilé'etu' yugu' le bulu'subán ládxi'tu' gulísatu' lu xiyutu'.  
Bítirö zoa nu bönni' ru'ë didza' uláz quiu'.

Bítirö zóalen netu' nu bönni' nözinë' gáca'xte caz gaca caní queëtu'.

<sup>10</sup> Dios, ¿gáca'xte caz ulu'lidza ditaj netu' nupa ta'díl-lalen netu'?  
¿Gáca'xte caz ulu'cá'ana ditaj Lo' nupa ta'dá'baga' Li'?

<sup>11</sup> ¿Naru' cabí gácalenu' netu'?

¿Bizx que nucáchu'u yöl-la' huáca zxön quiu'?

<sup>12</sup> Rinná be'e quézinu' netu' Li', Dios, dza ni'te quez,  
en rusölá cazu' bönachi idútë yödzölió.

<sup>13</sup> Len yöl-la' huáca zxön quiu' bubéaj cazu' choplö nísado'.

Gulá'a cazu' ícjagacaba' böa' zxön nacuá'aba' nísado'.

<sup>14</sup> Bzxuzxja cazu' ícjagacaba' böa' sínia' lëba' Leviatán.

Ben cazu' ga guláguba' yugu' böa' guixi' xipéla'ba' böa' sínia' na'.

<sup>15</sup> Gusalaj cazu' yugu' beaj nisa, en gapa ráalajda' nisa.

Busubidxi cazu' yugu' yegu nisa gula'yúdzutíca'sö nisa.

<sup>16</sup> Nequi queë cazu' lahui' dza, en nequi ca' quiu' chi'i dzó'ölö.

Ben cazu' Li' bení', enca' gubidza.

<sup>17</sup> Naguixaj cazu' Li' yúgu'të buzá' nacuá' yödzölió.

Nun cazu' Li' beo' la, en beo' ziaga.

<sup>18</sup> Yöjné lë ni, Dios. Nupa ta'dá'baga' Li' nucá'anagaca ditaj Lo',  
ate' nupa náacagaca canöz nucá'anagaca cá'asö Lo'.

<sup>19</sup> Bítirö usán no' o nupa nadxi'ínu' lu ná'agaca nupa náacagaca ca yugu' böa'  
guixi' sínia'.

Bítirö gal-la ládxi'u tsaz nupa néquiquequi quiu', en ta'guí'i ta'zaca'.

<sup>20</sup> Yöjné didza' dzaga na' núnlenu' netu',

tu' nacuá' nupa tuti bönachi gapa naca chul-la lu xiyutu'.

<sup>21</sup> Bítirö gu'u lataj ulu'gá'ana cá'asö nupa náacagaca bayechi'.

Ben ga ila'gú'u Li' yöl-la' ba nupa ta'guí'i ta'zaca', en ta'yadzaj ta'yudxi.

<sup>22</sup> ¿Guyasa, Dios, en ben ca rnna xtídzu'u!

¿Ruzë nagu' ca rulidza ditjë' Li' bönni' canöz idú dza!

<sup>23</sup> Bítirö gal-la ládxi'u didza' zi' tuí'i nupa ta'dá'baga' Li'.

Yöl-la' dzatsa tun nupa tu'cá'ana Li' cá'asö riyöntica'sö.

## 75

<sup>1</sup> ¿Rëtu' Li': "Xclenu', Dios"!

¿Rëtu' Li': "Xclenu",

tu' zóaticá'su' gal-la' ga zóatu'!

¿Tuí'i didza' bönachi ca náacagaca le zxön nunu'!

2 Rnnë' Dios: "Nuzóa' dza cate' uchi'a usöróa' bönachi.  
Uchi'a usörö caza' léguequi ca naca le nácatë.

3 Tu'suniti yödzölió, en nupa nacuá' ni,  
pero tsaz nuzóa caza' le."

4 Gudxa' nupa tun ba zxön cuínguequi, gunnía': "Biti' gun ba zxön cuinli'",  
en gudxa' nupa tuá' dö': "Biti' huë tsahui' cuinli'.

5 Biti' huë tsahui' cuinli',  
en bití' gü'ili' didza' lu yöl-la' run ba zxön cuinli'."

6 Calëga ga rilén gubidza, en calëga ga ribía gubidza,  
en calëga la' guixi' ga dë lataj irúaj le huë tsahui' bönachi,  
7 pero uchi'a usörö cazë' Dios bönachi.

Uzötjë' tuë' bönni', en uchisë' ia'túë'.

8 Nuá' cazë' Xanru' lu në'ë tu zxiga' yudzu xisa le ribía lubá uva le ribixi  
rilëbi.

Chinugútsi'dërë' le, ate' rigu'ë le para ilë'aj le nupa tuá' dö' yödzölió ni,  
ate' ilë'jadërö le silá' que.

9 Neda' usiyöntica'sa' bönachi lë ni,  
en gul-la' yöl-la' ba queë' Dios queë' Jacob.

10 Ugúë' yöl-la' unná bë' quégaca nupa tuá' dö'.

Quíxjë' tsaz yöl-la' unná bë' quégaca nupa nácgaca tsahui'.

## 76

1 Zxí'ini xi'sóë' Judá núnbë'gaquië' Dios.

Nayëpisë le lë' ladaj bönachi Israel.

2 Zoa caz lataj lá'ayi queë' lu yödzö Jerusalen,  
ate' nazí'i le Sión lataj ga na' zoa cazë'.

3 Ni' guditsjë' yugu' yaga lahui tuchi' zoa gu' láhuiguequi,  
enca' yugu' guíë la, en yugu' le ta'díl-lalen bönachi lu gudil-la.

4 ¡Yöl-la' ba Li', Dios!

¡Nayëpisëtëru' ca yugu' guí'a zxön!

5 Buxicju' bönni' nál-lagaquië'.

Gudödi yëla guiöj lógaquië' bönni' röjáquië' gudil-la,  
en bití' guca ila'chisa ná'agaquië'.

6 Cate' Li', Dios queë' Jacob, gudíl-lalen cazu' légaquië'  
gulátiba' böa', ate' gulati ca' nupa dxíagaca légcaba'.

7 Li' caz ral-la' gádxitu',  
tu' cabí gaca nu soa lo' cate' ilenu'.

8 Ga zu' Li' yehua' yubá gunnó' uchi'a usöröu' bönachi.

Ní'irö guladxi nupa nacuá' lu yu, en gula'cuá' dxisö,

9 cate' guzuínë' Dios para uchi'a usöröë' quégaca bönachi,  
para usölë' nupa nácgaca nöxaj ladxi' yödzölió ni.

10 Sal-la' ta'léde'e bönachi, gaca yöl-la' ba queë' Lë'.

Uzi'ë xibégaca nupa ulu'gá'ana ladjaguequi.

11 Guli'sí' lu ná'alí' bi gunli' lahuë' Xanru' Dios,  
en guli'gún ca na' innali'.

Yúgu'të nupa nacuá' ga na' zoë' ral-la' bi ulu'nödzej queë',  
tu' náquië' Nu ral-la' gádxiru'.



12 Ubéaj cazë' bö' nácaḡaca caz nupa nadéli'gaca lataj lo.  
Bönni' ta'nná bē'ē luyú ni tádxinë' Lē'.

## 77

1 Rulidza'-nē' Dios, en ruá'a zidzaj didza'.

Rulidza'-nē' Dios, ate' riyönnē' chí'a.

2 Cate' bi guca quia' bulidza'-nē' Dios.

Chi'i dzö'ölö guchisa na'a lahuē', en biti' busana' rulidza'-nē'.

Biti' guca nu huē' tsahui' neda'.

3 Cate' röjneda'-nē' Dios, rö'a böniga.

Cate' rinnē' ládxa'a, ní'irö rudú ládxa'a.

4 Bubéaj casu' yēla guiöj lahua'.

Tu' ribö'a böniga biti' gaca gu'a didza'.

5 Chiguzá' ládxa'a ca guca dza ni'te,

ca guca yugu' iz chigula'dödi.

6 Tsöjneda' le bulá' chi'i dzö'ölö,

en tsöjsá' ládxa'a ca naca que, ate' rinábini cuina':

7 ¿Naru' tsaz nusán Xanru' neda'?

¿Naru' cabirö uzá' ládxe'ē quia'?

8 ¿Naru' cabirö gáquiē' dxi'i ladxi'?

¿Naru' cabirö tsöjnenē' le guzxi' lu nē'ē gunē'?

9 ¿Naru' nál-la ládxe'ē Dios tu' cabirö ruzá' ládxe'ē queēru'?

¿Naru' bíti'rö huéchi' ládxe'ē rē'u tu' rilenē'?

10 Ní'irö gudxi cuina': Raca caní quia' tu' risébida' ládxa'a,

en que lē ni na' réquida' nadzá' yöl-la' unná bē' queē' Dios nayēpisē'.

11 Tsöjneda' yugu' le nun casu' Li', Xantu'.

Tsöjneda' yugu' yöl-la' huáca benu' dza ni'te.

12 Sa' ládxa'a ca nácaḡaca le nunu',

en cuéqui icja' ca nácaḡaca le runu'.

13 Naca lá'ayi ca run casu' Li', Dios.

Cúnturö nu zoa naca dios ca nacu' Li', Dios queētu'.

14 Naca casu' Li' Dios, runu' yugu' yöl-la' huáca zxön.

Bulú'u lahui yöl-la' huáca quiu' lógaca bönachi yúgu'tē yödzo.

15 Len yöl-la' huáca zxön quiu' busöló' bönachi quiu',

nupa nácaḡaca zxi'ini xi'sóagaquiē' Jacob, en José.

16 Bila'lé'e yugu' nísado' Li', Dios.

Bila'lé'e yugu' nísado' Li', en gula'bö' böniga.

Gula'zxízilē'e yugu' nísado'.

17 Bulu'lalaj böaj lúzxiba nisa.

Lúzxiba xitsá' gunnēda' guziú'.

Guyēpi yōsa ca yugu' yaga lahui tuchi'.

18 Lu bö' budunu' biyön guziú' quiu' gunnēda'.

Yōsa gula'yēpi bulu'zení' luyú.

Gudödida' budó' zxu', en guzxi' luyú.

19 Bilá' lahui nöza quiu' gatsaj láhui'lö nísado',

ate' guzóa nöza ga gudödu' gatsaj láhui'lö nisa zila.

Biti' nalá' lahui na'a ga na' bulibu'.

20 Guchë' cazu' bönachi quiu' ca runë' bönni' richë'ë-ba' bö'cu' zxila' huë'ënido'.  
Guchë'u léguequi lu ná'agaquië' Moisés, en Aarón.

## 78

1 Buli'zë nágali' le uzéajni'ida' libí'ili', bönachi quia'.

Buli'zë nágali' didza' gu'a.

2 Usalja' ruá'a, en ucúdu'a didza'.

Gu'a didza' tu le nagachi' dza ni'te quez,

3 tu didza' chibiyönru', en núnbë'ëru',

le gulë' xuz xtó'oru' rë'u.

4 Biti' ucáchi'ru' didza' na' lógacabi' xzí'iniru'.

Usiyönru' yugu' xzí'ini xi'sóaru' yöl-la' ba queë' Xanru',

ca naca yöl-la' huáca queë', en yugu' le zxön benë'.

5 Gudixjë' tu didza' naca bë' queë' Jacob,

en nuzóë' le rinná bë'ë quégaca bönachi Israel,

le gunná bé'enë' yugu' xuz xtó'oru'.

Ulu'zéajni'inë' xzí'inigaquië' ca naca,

6 para ilúnbë'gacabi' le, bi'i si' zá'gacabi', enca' bi'i si' iláljabi',

para ulu'luí'ibi' ca' xzí'inigacabi' ca naca lë na' gunná bë'ë Dios.

7 Ulu'zxöni ládxi'gacabi' Dios,

en biti' gal-la ládxi'gacabi' yugu' le nunë' Dios.

Ilunbi' ca nácagaca le gunná bë'ë,

8 en biti' ilácagacabi' ca guláquië' xuz xtó'ogacabi'.

Guláquië' zidzaj ladxi' tu' gula'dá'baguë'ë xtídzë'ë Dios,

en biti' guláquië' nōxaj ladxi',

ate' lu icja ládxi'do'gaquië' biti' gula'yéajlë'ë Dios.

9 Yugu' xzí'ini xi'sóë' Efraim gula'gaquië' yaga uxiti',

pero bulu'zxúnnejë' lu gudil-la.

10 Biti' gula'dá'gaquië' didza' dzaga Dios bënlenë' légaquië',

en biti' gulunë' ca naca le gunná bé'enë' légaquië'.

11 Gulal-la ládxi'gaquië' yugu' le benë' Dios,

en yugu' yöl-la' huáca zxön benë' lógaquië'.

12 Benë' Dios le gulún ga bulu'bájinë' xuz xtó'ogaquië'

luyú Egipto, en luyú Zoán.

13 Gusaljë' nísado', en benë' ga gula'dödë' gatsaj láchui'lö nísado' na'.

Benë' ga guca nísado' na' ca yugu' guí'ado' tsölá'a huéaj.

14 Buluí'inë' légaquië' nōza lahui' dza, bugunë' dxin tu böaj,

ate' chí'i dzó'ölö bugunë' dxin tu böaj ruzeni' ca guí'.

15 Bulë'ë tu guiój ga naca la' guixi' ga dë lataj,

en bë'ë le gulë'ajë' le guca ca tu nísado'.

16 Gulë'ajë' nisa yegu le gulén lu guiójto'o.

Benë' ga birúaj nisa ca tu yegu zxön lu guiójto'o na'.

17 La' ní'isö gulunë' dul-la' lahuë' Lë',

en gula'dá'baguë'ë Dios nayëpisëtëre' la' guixi' na'.

18 Lu icja ládxi'do'gaquië' gula'zí' bë'ë Dios quégaquië',

cate' gula'nábinë' Lë' ugahuë' légaquië' ca gula'zësö ládxi'gaquië'.

19 Ní'irö gula'nnë' queë' Dios, gula'nnë':

“¿Naru' huáca cu'ë Dios le gáguru' la' guixi' ni ga dë lataj?

20 Buli'yútsöca', bë'ë guiójto'o, ate' birúajda' nisa,

le guca ca nisa yegu gubó'o zxön.

¿Naru' huáca gunnë' ca' queëru' yöta gáguru'?

¿Naru' gaca ugahuë' bönachi queë' le naca bëla'?"

21 Biyönnë' Xanru' Dios didza' ni, en guléde'enë',  
ate' gulén tu gu' le buzegui zían zxí'ini xi'sóë' Jacob,  
tu' guléde'enë' bönachi Israel,

22 tu' cabí gula'yéajlë'ë Dios,  
en biti' bulu'zxöni ládxi'gaquië' Lë' usölë' légaquië'.

23 Gunná bé'enë' Lë' yugu' böaj lúzxiba,  
en gusaljë' yehua' yubá.

24 Gusöl-lë'ë yöta maná le ilahuë',  
en bugahuë' légaquië' la' huagu que yehua' yubá.

25 Gulahuë' bönni' ni' yöta tahuë' gubáz que yehua' yubá.  
Gusöl-lë'ë guizxi yu le ilahuë'.

26 Benë' ga guyecja bö' birúaj ga rilén gubidza,  
ate' len yöl-la' huáca queë' gunná bé'enë' bö' recja  
le birúaj tsölá'alö ga ridödi gubidza beo' ziaga.

27 Benë' ga böxaj bëla' ca bëchtö yu ládjalö ga na' nacu'ë,  
le naca böa' zoa xíligacaba' gurö'öba' ca yuzxi dé tu ra' yegu zxön.

28 Benë' ga böxjagacaba' gatsaj láhui'lö ga na' nacu'ë,  
en ládjagaca yugu' yu'u guídido' quégaquië'.

29 Ca' guca, gulahuë', en bulu'huölaj gula'dzé'enë',  
tu' bë'ë quégaquië' le gula'zësö ládxi'gaquië'.

30 Zí'alö ca budxi bulu'huölaj gula'dzé'enë',  
tsanni ni' yu'u ruá'agaquië' le tahuë',

31 gulénë' Dios légaquië',  
en bëtië' bál-lagaquië', bönni' nál-latërögaquië' ládjagaquië',  
en bucul-lë' bönni' Israel nayëpisëtërögaquië'.

32 Sal-la' guca caní, gulunrë' dul-la',  
en biti' gula'yéajlë'ë Lë' ni'a quégaca le zxön benë'.

33 Que lë ni na' benë' ga böáca nítisö dxin gulunë',  
ate' lu yöl-la' radxi gula'zöë' yugu' lu iz quégaquië'.

34 Cate' bëtië' zíaंगाquië', ní'irö bulu'lidzë' Lë'.  
Bulu'bí'i ládxi'gaquië', en yöjtá'gaquië' Dios.

35 Ní'irö yöjnéguequinë' náquië' Dios Nu run chi'i légaquië',  
en náquië' Dios nayëpisëtërë' Nu böá'uö légaquië'.

36 Gula'zí' yé'enë' Lë' len didza' gulu'ë,  
tu' gulu'ë diza' biti' nácatë lahuë' Lë' len ruá'agaquië'.

37 Biti' gudá'gaquië' Lë' idú ládxi'gaquië',  
en biti' gulunë' ca rna didza' dzaga na' bënlenë' légaquië'.

38 Tu' buéchi' ládxi'ë Dios légaquië',  
buniti lahuë' ca naca xigua' gulunë', en biti' busunítie' légaquië'.  
Bubequi lahuë' quégaquië', en bíti'rö gulénë' légaquië',  
en biti' benë' ca sa'yéaj yöl-la' ridzá'a queë'.

39 Ca' guca, yöjnenë' nácagaquië' bönáchisö.  
Nácagaquië' ca tu bö' recja le ridódisö, en biti' rudxín.

40 Zían luzuí gula'dá'baguë'ë Lë' ga na' naca la' guixi',  
en bulu'suhu'ínë' Lë' lu yu bidxi na'.

41 Zían luzuí gula'zí' bë'ë Dios,  
en gulunë' zí' Dios Lá'ayi quégaca bönachi Israel.

- 42 Biti' yōjnéguequinē' yōl-la' huáca zxōn queē',  
le bulu'e lahui dza ni' bōá'uē' légaquiē'  
lu ná'agaca nupa biti' bila'lé'e légaquiē' dxi'a,  
43 cate' ni' benē' le gulaca bē' luyú Egipto,  
en benē' yugu' yōl-la' huáca queē' luyú Zoán,  
44 cate' benē' ga bōáca nisa rōn yugu' lu yegu luyú Egipto,  
enca' nisa yugu' lu beaj quégaquiē' para cabí guca ilé'ajé' le.  
45 Gusól-lē'ē ládjagaquiē' bōtsugayu guizxi yu,  
bōa' gula'guídxiba' légaquiē'.  
Gusól-lē'ē ca' riu bulu'sunítiba' le nequi quégaquiē'.  
46 Budödē' le naz nuzóagaquiē' lu ruá'agacaba' bōchi' zu,  
ate' guláguba' bōchi' zu na' le rō'ó yugu' la' yēla quégaquiē'.  
47 Busunítiē' yugu' lubá uva quégaquiē' len nisa guióy yōla sunna na',  
en busunítiē' yugu' yaga higo quégaquiē' len bōgui'.  
48 Bētiē'-ba' bōa'-bēdxi quégaquiē' len nisa guióy yōla sunna na',  
en lu yōsa gula'yēpi.  
49 Lu yōl-la' rilé queē' gusól-lē'ē quégaquiē' yugu' lē ni,  
en lu yōl-la' ridzá'a queē' busaca' zī'ē légaquiē',  
en gusól-lē'ē quégaquiē' gubáz que yehua' yubá para bulu'sunítiē'  
légaquiē'.  
50 Biti' bubequi lahuē' quégaquiē' para cabirō lenē' légaquiē',  
en biti' buniti lahuē' légaquiē' para cabí ilátie'.  
Budödē' légaquiē' lu yōl-la' guti,  
51 en bētiē' yúgu'tēbi' bi'i bōnni' lo quégaquiē' bōnni' Egipto,  
yugu' bi'i bōnni' lo quégaquiē' zxi'ini xi'sóē' Ham.  
52 Guchē'ē bōnachi queē' ca yugu' bō'cu' zxi'la'do',  
en buluf'inē' légaquiē' nōza la' guixi' ga dē lataj.  
53 Guchē'ē légaquiē' lu nē'ē para cabí bi iládxinē',  
pero gubaga' nísado' nupa biti' bila'lé'e légaquiē' dxi'a.  
54 Ca' guca, guchē'ē légaquiē' ga zoa luyú lá'ayi queē',  
luyú ni bidéli'nē' uláz quégaquiē' len yōl-la' huáca queē'.  
55 Bulágui'ē bōnachi izá'a luyú ni lógaca bōnachi queē',  
en burixē' que queégaquiē' xiyúgaquiē' ga ila'cu'ē,  
en benē' ga gula'cu'ē bōnachi Israel yugu' lu yu'u guídido'.  
56 Le yúbóló gula'zī' bē'ē Lē', en gula'dá'baguē'ē Dios nayépisētērē',  
en biti' gulunē' yugu' le gunná bé'enē' légaquiē'.  
57 Bulu'huōa ládxi'gaquiē', en bulu'cá'anē' Lē' ca gulunē' xuz xtó'gaquiē'.  
Gula'dödē' tsólá'aló ca run tu yaga lahui tuchi' biti' nácatē li.  
58 Gulún lenē' Lē' tu' gulunē' xilátjagaca budó' guióy budó' yaga yugu' lu  
guí'a,  
en gulunē' ga budúli'nē' légaquiē' ni'a quégaca budó' na'.  
59 Cate' bilé'enē' lē ni Dios, guléde'enē',  
en budf'inē' bōnachi Israel.  
60 Ní'irō bucá'anē' xilatjē' lu yōdzó Siló,  
ga na' guzóa yu'u lá'ayi queē' ládjagaquiē' bōnni' ni'.  
61 Bē'ē lataj gula'ché'ē bōnni' zī'tu' guí'ina lá'ayi queē',  
guí'ina na' buluf'i lahui yōl-la' zxōn queē'.  
62 Budödē' bōnachi queē' lu ná'agaca nupa bētigaca léguequi,  
63 en gúquinē' zī' nupa nácatē quez queē'.  
Buzegui tu guí' zxōn yugu' bi'i bōnni' quégaquiē',

ate' cuntu nu bugá'ana nu ulu'tsaga na'lenbi' yugu' bi'i nigula ra'bando'.

64 Yugu' bixúz quégaquië' gulatië' lu guié' tuchi',  
ate' biti' guca ila'bódxinu nigula uzëbi quégaquië'.

65 Ní'iró gúquië' Xanru' ca tu bönni' rubanë' lu yöl-la' rasi.

Gúquië' ca bönni' rejë' gudil-la gudödi bë'ë gu'ë xisi lubá uva nál-la.

66 Bulágui'ë yugu' bönni' gula'díl-lalenë' bönachi queë',  
en tsáido'os burixë' légaquië'.

67 Lësca' budödë' tsölá'aló yugu' zxi'ini xi'sóë' José,  
en biti' guröë' yugu' zxi'ini xi'sóë' Efraín.

68 Guröë' yugu' zxi'ini xi'sóë' Judá,  
en yödzö Sión le nadxi'i quézinë' Lë'.

69 Ni' benë' tu lataj lá'ayi queë' le naca ca tu gu'a zxön,  
le zoa tsutsu ca yödzölió ni nuzóë' tsaz.

70 Guröë' ca' David, huen dxin queë',  
en bubéajë' lë' ga na' zoë' ruyüë'-ba' yugu' bö'cu' zxíla'do'.

71 Bubéajë' lë' ga na' rapa chí'ë-ba' yugu' bö'cu' zxíla' guná',  
nacuá'aba' böa' huë'énido' quégacaba',  
para gáquië' nu uyú bönachi queë', yugu' zxi'ini xi'sóë' Jacob,  
en bönachi Israel, nupa na' nácagaca quez queë'.

72 Ca' guca, idú ládxë'ë buyüë' David bönachi na',  
en lu yöl-la' rácada' queë' guchë'ë légaquië' lu në'ë.

## 79

1 Dios, nacué' bönachi izá'a lu xiyúgaca bönachi quiu'.

Nucá'anagaca cá'asó yudo' lá'ayi quiu',  
en nusunítigaca yödzö Jerusalén.

2 Bulu'cá'anë' bönachi quiu' nátigaca luyú para iláguba' bíchulab léguequi,  
en bëla' rön quégaca huen xichinu' ga iláguba' böa' guixi' le.

3 Bulu'laljé' xichóngaca bönachi quiu' ca nisa idütë' lu yödzö Jerusalén,  
ate' cuntu nu bugá'ana nu ucache' léguequi.

4 Bönachi yugu' dzaga luyú queëtu' tu'titaj netu'.  
Tu'zxidxë', en tu'didza' yudxi netu'.

5 ¿Naru' tsaz ilenu' netu', Xan?

¿Naru' sóatica'só yöl-la' rilé quiu' ca tu gu' ruzegui netu'?

6 Gulégaca bönachi yugu' yödzö zi'tu' biti' tun Li' bal,  
enca' bönachi biti' tu'lidza Li'.

7 Bétigaca bönachi quiu' nácagaca zxi'ini xi'sóë' Jacob,  
en nusunítigaca xiyutu' ga zoa cazu' Li'.

8 Biti' gunu' netu' xiguia' tu' nözi dul-la' gulunë' xuz xtó'otu'.  
Buéchi' ladxi' netu' na'a, tu' rudú ládxi'tu'.

9 Gúcalen netu', Dios, Nu rusólá netu', para guntu' bal Lo'.  
Busólá netu', en buníti lo netu' ca naca dul-la' nabága'tu' para idxí'itu' Lo'.

10 ¿Bizx que ta'nabi bönachi yugu' yödzö izá'a netu',  
ta'nná: "Gáxxitë' zoa Dios queëli'?"

Bë' lataj ilë'etu', en ben ga gaca bë' lógaca yúgu'të bönachi  
rizi' lo' nupa tu'lalaj xichóngaca huen xichinu'.

11 Buzé nagu' ca ta'nnë' ládxi'gaca nupa nadzúngaca.

Len yöl-la' huáca zxön quiu' busólá nupa na' narugu' quéguequi ilátigaca,

12 en bubí'i quégaca bönachi yugu' dzaga yödzö queëtu'

ia'gadxi cò'lò ca' tsca naca didza' zi' gula'nně quiu' Li', Xan.  
<sup>13</sup> Netu', bònachi quiu', enca' bõ'cu' zxila' ruyú cazu' Li',  
 guìtica'stu' Li': "Xclenu",  
 en cú'utica'stu' Li' yõl-la' ba na'a dza, en dza si' zaca.

## 80

<sup>1</sup> Ruzě nagu' netu', Dios, Nu rapa chi'i bònachi Israel.  
 Nacu' Nu ruyú yugu' xzí'ini xi'sóë' José ca nu ruyú yugu' bõ'cu' zxila'.  
 Buzení' queētu', Li' na' rō'u rinná bē'u ga nacuá'  
 nupa nál-lágacatēro quiu' légaca querubín.  
<sup>2</sup> Buluí'i yõl-la' huáca quiu' lógaca xzí'ini xi'sóagaquiē' Efraín, en Benjamín,  
 en Manasés.  
 Gudá queētu', en busölá netu'.

<sup>3</sup> Ben ga huécjatu' quiu' Li', Dios.  
 Buluí'i netu' nadxí'inu' netu', ate' ulatu'.

<sup>4</sup> Xantu' Dios quéguequi ni'a no'o guizxi yu,  
 ¿gáca'xte caz ilenu' netu', en biti' yõnnu' le rulidztu' Li'?  
<sup>5</sup> Rugagu' netu' nisa ribõdxi queētu',  
 en ruguí'ju' netu' sixzõni nisa ribõdxi.  
<sup>6</sup> Nunu' ga bònachi dzaga yõdzõ queētu' tu'zxidxi queētu',  
 ate' nupa biti' ta'lé'e netu' dxi'a tu'titaj netu'.

<sup>7</sup> Ben ga huécjatu' quiu' Li', Dios quégaca ni'a no'o guizxi yu.  
 Buluí'i netu' nadxí'inu' netu', ate' ulatu'.

<sup>8</sup> Guléaju' tu lubá uva le nácatu' netu' luyú Egipto.  
 Bulagu' bònachi izá'a yugu' lu yõdzõ luyú ni, en budó'o lubá na' ni.  
<sup>9</sup> Buchi'u lataj ga guzxõn lubá na'.  
 Benu' ga ben lú' ga rē', ate' bulí idútē luyú ni.  
<sup>10</sup> Gulú'u zxul-la lubá na' yúgu'tē lu guí'ado',  
 ate' ni'a nē'e gula'baga' yugu' guí'a zxõn.  
<sup>11</sup> Gula'tunna ni'a nē'e ga bidxintē ra' nísado',  
 enca' ga bidxintē ra' yegu Eufrates.  
<sup>12</sup> ¿Bizx que buquínnaju' yugu' lē'aj gulún chi'i lubá na',  
 en ru'u lataj nupa ta'dõdisõ ta'bán le ribía lubá uva na'?  
<sup>13</sup> Tu'líbigacaba' cuchi guixi' le,  
 ate' táguba' böa' guixi' le.

<sup>14</sup> Buécja queētu', Dios quégaca ni'a no'o guizxi yu.  
 Ga ni' zu' yehua' yubá buyú ca raca que lubá quiu', en busölá netu'.  
<sup>15</sup> Gudá dusóló' lubá ni budá' cazu',  
 le naca ca tu lubá huě'eni buxõn cazu' Li'.

<sup>16</sup> Nupa biti' ta'lé'e netu' dxi'a gula'chugu ni'a nē'e lubá na', en bulu'quela'  
 le guí'.  
 Buyú ca tun, en lu yõl-la' rilé quiu' busuniti lēguequi.  
<sup>17</sup> Gúcalen bõnni' na' gurõ cazu' quiu',  
 netu', bònachi na' nuzóa cazu' tsaz quiu'.  
<sup>18</sup> Caní gaca, bíti'rõ ucá'anatu' Li'.  
 Bunna queētu' yõl-la' na'bán, ate' uzxõni ládxi'tu' Lo'.

19 Ben ga huéjatu' quiu' Li', Dios quégaca ni'a no'o guizxi yu.  
Buluí'i netu' nadxí'ínu' netu', ate' ulatu'.

## 81

1 Lu yöl-la' rudzeja queéli' guli'gul-la queë' Dios.  
Lë' náquië' yöl-la' nál-la queéli'.

Lu yöl-la' rudzeja queéli' guli'còdxi'a lahuë' Dios queë' Jacob.

2 Guli'gul-la tu le gúl-lali', cápa'li' lë'e guídido'.

Guli'quinnaj lë'egaca bihuël-la.

3 Guli'còdxi luzu chivo cate' zoa beo' huë'ëni,  
en cate' zoa beo' nál-la, en cate' raca laní.

4 Lë ni naca tu xibá quégaca bönachi Israel,  
le naca tu le gunná bé'enë' Xanru' Dios zxi'ini xi'sóë' Jacob.

5 Gudixjë' le para gaca tu le gun ba nali' queë' lógaca zxi'ini xi'sóë' José,  
le gudixjë' cate' gudödë' luyú Egipto,  
ga ni' biyönda' didza' izá'a biti' guyéajni'ida'.

6 Rnnë' Dios: "Gudúa' yua' zxoá ya'zxi'cagaquië',  
en bucuíta' le nuá'gaquië' le bulu'subaga' légaquië'  
nupa biti' bila'lé'e légaquië' dxi'a.

7 Bulídzali' neda' cate' bi guca queéli', ate' busölá' libí'ili'.

Bubi'a didza' cate' bi gunábili' neda', ni' nucachi' cuina' tu lu böaj gasaj.  
Guzxí' bë'a libí'ili' ga zoa nisa na' lë Meriba.

8 Buli'zë nágali', libí'ili', bönachi quia', ate' uxösa' libí'ili'.

Raca ládxa'a uzé nágali' neda', bönachi Israel.

9 Biti' ral-la' soa tu dios izá'a ga na' zóali',  
en biti' gunli' zxön tu dios quégaca bönachi zi'tu'.

10 Neda', Xanli', naca' Dios queéli'.

Guléaja' libí'ili' luyú Egipto.  
Guli'salaj ruá'ali', ate' cu'a ruá'ali' le gáguli'.

11 Biti' bulu'zë nágagaca bönachi quia' chí'a.  
Biti' gulún bönachi Israel ca rnna xtídza'a.

12 Que lë ni na' busán ládxa'a léguequi  
para gulún ca sa'yéaj yöl-la' ridá'baga' quéguequi,  
en para gulún ca gula'za'sö ládxi'gaca.

13 Guzá' ládxa'a ulu'zë nágagaca bönachi quia' xtídza'a,  
para ilún bönachi Israel ca rë'ënda' neda'.

14 La'tu' ilún caní, uxicja caza' nupa biti' ta'lé'e léguequi dxi'a,  
en tíl-lalena' nupa ta'díl-lalen léguequi.

15 Ulu'lú'i cuínguequi nupa biti' ta'lé'e neda' dxi'a,  
ca nupa tun ca rnna xtídza'a,  
pero tsaz guna' léguequi xigua'.

16 Lësca' uguhua' libí'ili', bönachi quia', zxoá xtila dxi'ado',  
en guna' ga huölaj idzé'eli' le zxi'xi que buz, le irúaj lë'e guió'j."

## 82

1 Zuínë' Dios ladaj nupa tu'dubi queë' ni' yehua' yubá.  
Ruchi'a rusöröë' nupa ta'nná bë'.

2 Rnnë': "¿Gáca'xte caz uchi'a usöröli' quégaca bönachi  
lu yöl-la' biti' naca tsahui' queéli'?"

Caní naca tu' rubéajli' tsahui' nupa tuá' dö'.

3 Buli'béaj tsahui' nupa ta'cuidi', en yugu' bi'i uzëbi.

Guli'gún le naca tsahui' quégaca nupa ta'guí'i ta'zaca',  
en quégaca nupa ta'yadzaj ta'yudxi.

<sup>4</sup> Buli'sólá nupa ta'cuidi', en nupa náacagaca yechi'.

Buli'sólá léguequi lu ná'agaca nupa tuá' dō'.

<sup>5</sup> Biti' nōziguequi, en bití' ta'yéajni'i.

Ta'dá ga chul-la.

Rizzizi xilibi yōdzōlió."

<sup>6</sup> Rnna caza' neda': "Nácali' ca yugu' dios.

Nácali' yúgu'téli' xzí'iné' Dios nayépisētērē',

<sup>7</sup> pero gátíli' ca tati bōnachi,

en ibíxili' lu gudil-la ca ta'bixi xzí'iné' bōnni' lo."

<sup>8</sup> Guyasa, Dios, en buchi'a busörö quégaca bōnachi yōdzōlió ni,  
tu' náacagaca queë cazu' yúgu'tē yōdzō bōnachi.

## 83

<sup>1</sup> Biti' ugá'anu' dxisö, Dios.

Biti' su' dxisö, Dios, en bití' usayaj ru'u,

<sup>2</sup> tu' tu'tsatsa nupa ta'dá'baga' Li',

ate' nupa bití' ta'lé'e Li' dxi'a tun ba zxön cuínguequi.

<sup>3</sup> Tun tuz xtídza'guequi bi ilún quégaca bōnachi queë cazu',  
en tu'pá yugu' le ilún quégaca nupa nadxí'i quézinu', ta'nná:

<sup>4</sup> "Guli'dá, usunítiru' léguequi para cabirö ilaca tu yōdzö bōnachi,  
en para cünturö nu tsójné bōnachi Israel."

<sup>5</sup> Núngaca tuz xtídza'guequi.

Nuzóagaca tsutsu xtídza'guequi ta'dá'baga' Li'.

<sup>6</sup> Yugu' bōnni' Edom, en yugu' bōnni' Ismael,

en yugu' bōnni' Moab, en yugu' bōnni' Agar,

<sup>7</sup> en yugu' bōnni' Gebal, en yugu' bōnni' Amón, en yugu' bōnni' Amalec,

en yugu' bōnni' Filisteo, en yugu' bōnni' Tiro,

<sup>8</sup> enca' yugu' bōnni' Asiria núngaquië' légaquië' tsözxön.

Rácalengaquië' yugu' bōnni' xzí'ini xi'sóé' Lot.

<sup>9</sup> Ben quégaquië' ca benu' quégaca bōnachi Madián, nupa na' busunítiru'  
dērö,

en ca na' benu' queë' Sísara, en ca na' benu' queë' Jabín ra' yegu Císón,

<sup>10</sup> nupa na' busunítiru' lu yōdzö Endor,

ate' gulaca ca xiqué'ëba' bēdxi luyú ni'.

<sup>11</sup> Ben quégaquië' bōnni' lo quéguequi

ca benu' quégaquië' Oreb, en Zeb,

en ben quégaquië' bōnni' ta'nná bé'enë' léguequi

ca benu' quégaquië' Zeba, en Zalmuna,

<sup>12</sup> nupa na' gula'nná: "Ilequi queëru'

yugu' lataj gapa na' gulequi queë' Dios."

<sup>13</sup> Dios quía', ben ga ilácagaquië' ca bëchtö yu le riché' bö',

en ca bëbu zxe café le ruá' bö' budunu'.

<sup>14</sup> Ca run tu guí' zxön, ruzegui' yugu' yaga zxön,

o ca run tu guí', ruzegui' tu guí'a zxön,

<sup>15</sup> gusí regu' léguequi tu lu bö' budunu',

en ben gadxi léguequi tu lu nisa guiöjsiu' zili.

<sup>16</sup> Ben ga ulu'tuí'i



para ulu'guilaj Li', Xan.

<sup>17</sup> Ben ga ulu'tuí'i, en ila'bõ' tsaz bõniga.

Ben ga ulu'gá'ana cá'asõ, en tsaz ila'niti,

<sup>18</sup> para iléquite'e nayépisètèru' tuzu' Li' idútè yõdzõliõ  
en ulu'zõa xzibiguequi lo', Xantu' Dios.

## 84

<sup>1</sup> ¡Bica' lachi gapa zoa cazu' Li', Dios!

¡Nacu' Xángaca ni'a no'o guizxi yu!

<sup>2</sup> Rizè ládxa'a soa' lu yu'u lidxu', Xana' Dios.

Lu yõl-la' rudzeja quia' idú ládxa'a rul-la' quiu' Li', Dios ban.

<sup>3</sup> Bidzõliba' biguínni chulí' lataj ga nuzõaba' lídhiba',

en bidzõliba' xiguichi guziú' ga budxiaba' xicá'aba',  
ga na' rigú'uba' biguínido' queëba',

gala' ga dè lu bucugu quiu' Li', Xángaca ni'a no'o guizxi yu.

Nacu' Nu rinná be'e neda', en nacu' ca' Dios quia'.

<sup>4</sup> ¡Bica' ba nupa ta'yaza lu yu'u lidxu'!

¡Ta'gú'utica'sõ Li' yõl-la' ba!

<sup>5</sup> ¡Bica' ba bõnni' nápagaquiè' yõl-la' nál-la le nequi queè cazu',

en ta'zè ládxi'gaquiè' ila'yu'è nõza le ridxín yõdzõ Siõn!

<sup>6</sup> Cate' ta'dödè' lu yu bidxi tunè' ga ruhuõáca gapa ralaj nisa beaj.

Tun ga rizi' xibé yu bidxi na' yugu' nisa guiõj ta'dxin bayõn.

<sup>7</sup> Lu yõl-la' huáca quégaquiè' rõjáquiè', en tu'zì'rõnè' yõl-la' huáca.

Ta'dxinè' yúgu'tègaquiè' lo' Li', Dios, lu yõdzõ Siõn.

<sup>8</sup> Ruzè nagu' le rulidza' Li', Dios, Xángaca ni'a no'o guizxi yu.

Ruzè nagu' neda', Dios queè' Jacob.

<sup>9</sup> Buyúè' bõnni' rinná bé'enè' netu', Dios.

Buyúè' bõnni' na' nabõ cazu'.

<sup>10</sup> Nácáro dxi'a soa' tu dza lu yu'u lidxu' ca le soa' idú chi gayuá' dza ga  
yúbölö.

Cõa' zì'alõ gaca' huen dxin ga nu riyaza yu'u lidxè' Dios

ca le soa caza' tu yu'u zxõn ga biti' zoa Dios.

<sup>11</sup> Náquiè' Xanru' Dios ca gubidza, en le rusubín rè'u.

Xanru' caz runnè' queèru' yõl-la' ruzá' ladxi' queè', en yõl-la' zxõn queè'.

Biti' ugüè' nitú le naca dxi'a gapa nacuá' nupa tun le naca tsahui'.

<sup>12</sup> ¡Li', Xángaca ni'a no'o guizxi yu,

bica' ba bõnni' ruzxõni ládxiè'è Li'!

## 85

<sup>1</sup> Buzá' ládxi'u quégaca bõnachi quiu', Xantu' Dios.

Buchè'u Li' xzí'ini xi'sóè' Jacob gula'dzunè'.

<sup>2</sup> Buniti lo' bõnachi quiu' ca naca xiguia' gula'baga'.

Bucáchu'u yugu' dul-la' gulúngaca.

<sup>3</sup> Buzõa dxíu' yõl-la' rilé quiu'.

Bugú' yõl-la' ridzá'a quiu'.

4 Buzóa netu' xilátjatu' le yúbölö, Dios, Nu rusölá netu',  
en bití'rö lenu' netu'.

5 ¿Naru' tsaz ilenu' netu'?

¿Naru' tsaz ilenu' yugu' zxi'ini xsoatu'?

6 ¿Naru' cabí usabanu' ládxi'tu' le yúbölö,  
para udzeja ládxi'lentu' Li' netu', bönachi quiu'?

7 Lu yöl-la' dxi'i ladxi' quiu' gúcalen netu',  
en busölá netu', Xan.

8 Uzé naga' didza' gu'ë Xanru' Dios.

Le guíë' bönachi queë' gun ga gaca dxi'a quéguequi,  
nupa na' náca gaca quez queë',

pero run bayúdx bití' ulu'huóá ládxi'gaca.

9 Le nácatë chizóë' usölë' nupa tun Lé' bal,  
para soa yöl-la' ba queë' luyú queëtu'.

10 Dzágagaca yöl-la' dxi'i ladxi', en le naca idútë li.

Tagu zxixi luzé'eguequi nu naca tsahui', en nu riböza dxi'a tsáhui'do'.

11 Luyú caz rilén le naca idútë li,

ate' yehua' yubá rirúaj le naca tsahui'.

12 Le nácatë Xanru' unödzejë' queëru' le naca dxi'a,  
ate' xiyuru' unödzej le uláparu'.

13 Le naca tsahui' röjnöru lahuë' Xanru',  
en gun ga soa nöza gátí'tës ga ulibë'.

## 86

1 Ruzé nagu', Xana' Dios, en rubí'u didza',  
tu' zoa nu rusaca' zi' neda', ate' riyadzaj riyúdxida'.

2 Ben chí'i bö' naca caza', Dios, tu' naca' quiu' Li'.

Busölá neda', huen dxin quiu', Dios quia', tu' ruzxöni ládxa'a Li'.

3 Buzá' ladxi' quia', Xan,

tu' rulidza' Li' idú dza.

4 Ben ga udzeja ládxa'a neda', huen dxin quiu',  
tu' rigu'a lu no'o bö' naca caza', Xan.

5 Nacu' dxi'a, Xan, en chizú' uniti lo' bönachi quiu'.

Nadxí'tica'su' yúgu'të nupa tu'lidza Li'.

6 Ruzé nagu' le rulidza' Li', Xan,

en ruí'i ládxi'u' gunu' yugu' le inábida' lo'.

7 Cate' bi gaca quia' ulidza' Li',

tu' ubí'i cazu' didza' bi gunu' quia'.

8 Cúnturö nu zoa ládjagaca dios nu naca ca nacu' Li', Xan,  
en bití' zoa ia'tú nu run ca náca gaca le runu' Li'.

9 Ila'dxín bönachi yúgu'të yödzö naguixju' Li', Xana' Dios,  
en ila'yéaj ládxi'gaca Li', en ilún zxön Lo'.

10 Nayépisëtërosu' Li', en tuzu' Li' runu' yugu' yöl-la' huáca zxön.

Tuzu' Li' nacu' Dios.

11 Busëdi neda' ca naca le rë'ënu' guna', Xan.

Guna' ca naca le naca idútë li naguixju' Li'.

Ben ga gádxida' Lo' idú ládxa'a.

12 Idú ládxa'a guía' Li': "Xlenu'", Xana' Dios,  
en guna' zxön Lo' yugu' iz si' zaca.

13 Nadxí'ide'enu' neda',

en chibusöló' bö' naca caza' lu lataj chul-la ga nacua' nupa chinátigaca.

<sup>14</sup> Dios quia', nupa ta'dá'baga' neda' ta'díl-lalen neda',  
ate' yugu' bönni' zidzaj ladxi' té'ëné' ilútié' neda',  
yugu' bönni' na' bití' tuné' Li' bal.

<sup>15</sup> Nacu' Dios ruhuéchi' ládxi'u netu', Xan, en ruzá' ládxi'u queétu'.  
Ridzenu' para ilenu' netu', en nadxí'ide'enu' netu', en runu' ca rnna  
xtídz'u.

<sup>16</sup> Buyú neda', en buzá' ladxi' quia'.  
Butipa ládxa'a neda', huen dxin quiu',  
en busölá neda', zxi'ininu nigula huen dxin quiu'.

<sup>17</sup> Buluí'i neda' tu le gaca bē' gaca dxi'a quia',  
para ila'lé'e le nupa bití' ta'lé'e neda' dxi'a.  
Ulu'tuí'i, tu' gúcalenu' neda',  
en bué tsahú'u neda', Xan.

## 87

<sup>1</sup> Nuzóé' Dios xilibi zö'ö que yödzö queé' lu guí'a lá'ayi.

<sup>2</sup> Nadxí'iröné' Xanru' lataj ga na' tu'chi'a tu'sörö bönachi Sión  
ca nadxí'iné' ia'zica'rö lataj gapa nacua' bönachi Israel.

<sup>3</sup> Zián le lachi ta'nná bönachi ca naca  
yödz na' nequi queé' Dios.

<sup>4</sup> Cate' ulidza' bönachi núnbē' gaca neda', Dios,  
ulidza' bönachi nníta' gaca Egipto, en Babilonia.  
Ca naca quégaca bönachi Filistea, en Tiro, en Etiopía  
innía' nabábagaca yödzö lá'ayi na'.

<sup>5</sup> Cate' gu'a didza' que yödzö Sión innía':  
Bönachi ni, en bönachi izá'a ni nabábagaca le,  
ate' neda', Dios nayépisëtèrè', uzóa' tsutsu yödzö na'.

<sup>6</sup> Cate' ulabè' Xanru' nupa nácagaca queé' inné':  
"Bönni' ni nababè' yödzö quia'."

<sup>7</sup> Ní'irö iluí'i didza' nupa tul-la, en nupa tu'cödxí' gui, ila'ná:  
"Ruzí'itu' xibé tuzi yödzö ni."

## 88

<sup>1</sup> Xana' Dios, Nu rusölá neda',  
rulidza' Li' rēla, en te dza.

<sup>2</sup> Bē' lataj idxín lo' le rulidza' Li'.  
Ruzē' nagu' le rinaba yúdxida' Li'.

<sup>3</sup> Ruúbi ruguí'i ládxi'da'ahua',  
en chizóa tsöjtsázia' lataj chul-la.

<sup>4</sup> Chinabábalena' nupa chinátigaca.  
Naca' ca tu bönni' nudú dērö ládxi'ē,

<sup>5</sup> en nagá'ané' cá'asö ladaj nupa chinátigaca,  
en ca nupa dēgaca yeru ba,

nupa na' bití'rö rōjnenu',  
en nusán no' o léguequi.

<sup>6</sup> Nuzú' neda' tu lu yeru zila,  
ga naca chul-la, en le nácada' zila.

<sup>7</sup> Rilenu' neda',  
en rusaca' zí'u neda' tu lu nísado' quiu'.

8 Nucuásu' yúgu'të nupa núnbë'a.  
 Nunu' neda' ca tu le ta'guti bônachi.  
 Nadzuna', en biti' gaca írúaja'.  
 9 Tu' riguí'i rizáca'a nudú guiøj lahua'.  
 Tu dza tu dza rulidza' Li', Xan.  
 Richisa na'a zaca' ga na' zu'.

10 ¿Naru' guntso' yugu' yöl-la' huáca zxön  
 para gácalenu' nupa chinátigaca?  
 ¿Naru' ulu'yasa nupa yú'ugaca lataj chul-la,  
 en ila'gú'u Li' yöl-la' ba?  
 11 ¿Naru' ulu'luí'i lahui yöl-la' dxi'i ladxi' quiu'  
 nupa nagáchi'gaca yeru ba?  
 ¿Naru' ulu'luí'i lahui nupa yú'ugaca lataj chul-la  
 ca runu' ca rnna xtídz'u?  
 12 ¿Naru' gaca bë' le zxön runu' ga na' naca chul-la?  
 ¿Naru' gaca bë' nacu' tsahui' ga na' cuntu nu bi röjnë?

13 Rulidza' Li' neda' para gácalenu' neda',  
 ate' yugu' zila ridxín lo' le rinábida' Li'.  
 14 ¿Bizx que nusán ládxu'u neda', Xan?  
 ¿Bizx que rucachi' lo' lahua' neda'?  
 15 Riguí'i rizáca'a, en chizóa gátia' ga gudela' naca' bí'ido'.  
 Réquida' zi' tu' ruxösu' neda', en rudú ládxa'a.  
 16 Nabága'a neda' yöl-la' rilé quiu',  
 ate' chizóa usuniti neda' le ruxösu' neda'.  
 17 Idú dza naca quia' ca nabaga' neda' nisa.  
 Nagú'ugaca neda' lë'ajlö yugu' nisa.  
 18 Nucuásu' ga zoa' nu nadxí'i neda', enca' luzá'a.  
 Zóalensö le naca chul-la neda'.

## 89

1 Gúl-latica'sa' ca naca yöl-la' dxi'i ladxi' quiu', Xan.  
 Usiyönda' zxi'ini xsoatu' ca runu' ca rnna xtídz'u.  
 2 Gunnía': "Sóatica'sö yöl-la' dxi'i ladxi' quiu'.  
 Tsaz naca bë' yehua' yubá ca runu' ca rnna xtídz'u."

3 Rnnë' Dios: "Naguixja' tsaz didza' dzaga núnlena' nupa nabö caza' quia'.  
 Bena' tsutsu xtídz'a' ca guna' queë' David, huen dxin quia'.  
 4 Gunnía': Ucuá'a tsaz zxi'ini xi'sú'.  
 Guna' ga sóatica'sö nu inná bë' uláz quiu'."

5 Nupa nacuá' yehua' yubá quiu' ila'gú'u yöl-la' ba le nunu' le tun ga  
 rubánitu', Xan.  
 Ga nudúbigaca nupa nácacaca quez quiu' ila'gú'u yöl-la' ba ca runu' ca  
 rnna xtídz'u.  
 6 ¿Nuzxi caz zoa ni' yehua' yubá naca ca nacu' Li', Xan?  
 ¿Nuzxi caz zoa ladaj nupa nayëpisëgaca naca ca nacu' Li', Xan?  
 7 Nupa nácacaca lá'ayi tun Li' bal, Dios.  
 Ral-la' gúnröru' Li' bal ca tun nupa nacuá'len Li'.  
 8 Dios, Xángaca ni'a no'o guizxi yu, ¿nuzxi caz naca ca nacu' Li', Xantu'  
 nayëpisëtërou'?

Naca bë' rúntica'su' ca rnna xtídz'u.

<sup>9</sup> Rinná be'e quézinu' le riyasa ridxía que nísado'.

Cate' riyasa ridxía nísado', ruzóa cazu' le dxisö.

<sup>10</sup> Busuniti cazu' bönachi Egipto, ate' gulaca ca nupa chinátigaca.

Bësilásiu' léguequi len no'o nál-la.

<sup>11</sup> Nequi quiu' yehua' yubá,

en nequi ca' quiu' luyú ni, tu' nuzóa cazu' léguequi.

<sup>12</sup> Naguixaj cazu' le dë tsölá'a ga za' bö' ziaga,

en le dë tsölá'a ga ridödi gubidza beo' ziaga.

Lu yöl-la' rudzeja quéguequi ta'bödxi'a guí'a Tabor,

en guí'a Hermón cate' ta'yöni Lo'.

<sup>13</sup> ¡Nál-latërö naca no'o!

¡Nápatërö no'o yöl-la' huáca!

¡Nayëpisëtërö no'o ibëla!

<sup>14</sup> Le naca dxi'a, en le naca tsahui' tun tsutsu le rinná bë'u.

Nacuá'len Li' yöl-la' dxi'i ladxi', en le naca idútë li.

<sup>15</sup> Bica' bágaca nupa ta'yöni didza' que yöl-la' rudzeja.

Ta'dá lu bení' que lo', Xantu' Dios.

<sup>16</sup> Idú dza tu'dzeja tu' zóalen Lo' léguequi,

en tu' zóalen léguequi le naca tsahui' quiu', le nayëpisëtërö.

<sup>17</sup> Naca cazu' Li' yöl-la' zxön que yöl-la' huáca quéguequi,

en tu' ruzá' ládXu'u queëtu' nazxönda' yöl-la' nál-la queëtu'.

<sup>18</sup> Nequi queë' Xanru' le run chi'i rë'u,

ate' néquinë' queë' Dios bönni' rinná bé'enë' rë'u.

Dios na' náquië' lá'ayi ladaj bönachi Israel.

<sup>19</sup> Dza ni'te bë'lenu' nupa néquiguequi quiu' didza'

lu yugu' le buluí'inu' léguequi,

gunnö': "Gúcalena' tu nu nayëpisëtërö.

Nuchisa' tu nu gurö caza' quia' ladaj bönachi.

<sup>20</sup> Budzöliida'-në' David, huen dxin quia'.

Gulu'a-në' le za le naca lá'ayi quia'.

<sup>21</sup> Len na' caza' naguixja' lë',

ate' len na'a ca' utipa' ládXë''ë.

<sup>22</sup> Biti' si' ye'e lë' nu rilé lë',

en biti' usaca' zi' lë' nu ruá' dö'.

<sup>23</sup> Uquínaja' lahué' nupa ta'díl-lalen lë',

en gu'a nupa biti' ta'lé'e lë' dxi'a.

<sup>24</sup> Sóalena' lë' lu yöl-la' run ca rnna xtídz'a'a,

en lu yöl-la' dxi'i ladxi' quia',

ate' tu' ulidzë' La', uxöna' yöl-la' nál-la queë'.

<sup>25</sup> Guna' ga inná bë'ë ga naguela' ra' nísado',

ga idxintë ra' yegu Eufrates.

<sup>26</sup> Ulidzë' neda', innë': Li' nacu' Xuza', en Dios quia',

enca' Nu run chi'i neda', en Nu rusölá neda'.

<sup>27</sup> Gun caza' neda' ga gáquië' ca bi'i lo queë' caza',

ate' tsëpisëtërë' ca yugu' bönni' ta'nná bë'ë yödzölió.

<sup>28</sup> Lu yöl-la' dxi'i ladxi' quia' gun chí'tica'sa' lë',

en uzóa' tsaz queë' didza' dzaga quia'.

<sup>29</sup> Ucuá'a tsaz zxí'ini xi'sóë',

ate' sóatica'só lataj ga inná bē'ë, tsca soa yehua' yubá.

<sup>30</sup> Channö ulu'cá'anē' zxí'ini xi'sóë' xibá quia',

en cabí ilunē' ca naca le buchí'a busöröa',

<sup>31</sup> en channö ila'guitsjē' xibá que le gunná bē'a,

en cabí ilunē' ca nácagaca le gunná bé'eda' légaquiē',

<sup>32</sup> ní'irö guna' légaquiē' xigua' ca sa'yéaj le ta'dödi bē' tunē',

en gu'a léguequi ca naca xigua' nabága'gaquiē'.

<sup>33</sup> Pero bití' ugúa' queë' yöl-la' dxi'i ladxi' quia',

en bití' usana' guna' ca rnna le guzxi' lu na'a guna'.

<sup>34</sup> Bití' ucá'ana' cá'asö didza' dzaga nuna',

en bití' utsá'a didza' bē'a.

<sup>35</sup> Tu le nuzóa' tsutsu, en nuna' ba nalí que le naca lá'ayi quia'.

Bití' ca' si' yé'eda' David.

<sup>36</sup> Gunnía' ila'cuá'tica'sē' zxí'ini xi'sóë',

en ga rö'ë rinná bē'ë sóatica'só lahua' ca gubidza.

<sup>37</sup> Naguixja' le tsaz ca nuzóa' tsaz beo',

ate' nacua'tica'só lúzxiba le tun ba nalí."

<sup>38</sup> Pero nuzú' tsölá'alö, en nusán ladxu'u,

en riléde'enu' nupa na' gurö cazu' quiu'.

<sup>39</sup> Nuzú' tsölá'alö didza' dzaga bénlenu' huen dxin quiu'.

Nuzötju' luyú yöl-la' unná bē' queë'.

<sup>40</sup> Nuquínaju' zö'ö gulún chi'i lē',

en nusunítu' yugu' lataj tsutsu queë'.

<sup>41</sup> Yúgu'tē nupa ta'dódisö ta'bán le nequi queë',

ate' bönni' dzaga yu'u queë' tu'cá'ana lē' cá'asö.

<sup>42</sup> Nuchisu' nupa ta'dá'baga' lē',

en runu' ga tu'dzeja nupa bití' ta'lé'e lē' dxi'a.

<sup>43</sup> Runu' ga bití' sequi' idéli'nē' lu gudil-la,

ate' cuntu nu sequi' ucul-lē' lu gudil-la na'.

<sup>44</sup> Bugú' yöl-la' lachi queë',

en nuzötju' yöl-la' unná bē' queë' lu yu.

<sup>45</sup> Benu' ga chinagulē' sal-la' ni zoë' iz cuidi',

en nunu' ga rutuí'nē'.

<sup>46</sup> ¿Gáca'xte caz gunu' caní, Xan?

¿Naru' tsaz nucachi' lo'?

¿Naru' gácatíca'sö yöl-la' rilé quiu' ca tu guí' réguide'e?

<sup>47</sup> Yöjné nabábasö iz soa' ibana',

en tu chí'isö nacua' bönachi yödzölió ni.

<sup>48</sup> ¿Nuzxi' caz bönni' gaca sóatica'sē' ibanē', en cabí gatiē'?

¿Naru' huáca usólá cuin cazē' lu yöl-la' unná bē' que lataj chul-la?

<sup>49</sup> ¿Gáxzitē' zoa yöl-la' dxi'i ladxi' quiu' guzóa zí'alö, Xan,

lē' na' buzú' tsutsu xtídzu'u gunu' queë' David,

len yöl-la' run ca rnna xtídzu'u?

<sup>50</sup> Yöjné ca tu'cá'ana cá'asö netu', huen dxin quiu', Xan,

enca' ca tu'cá'ana neda' cá'asö bönachi zían yödzö izá'a.

<sup>51</sup> Tu'cá'ana neda' cá'asö nupa bití' ta'lé'e Li' dxi'a, Xan.

Tu'cá'ana cá'asö yugu' le runa' neda', bönni' gurö cazu' quiu'.

52 ¡Yöl-la' ba Xanru' Dios iz si' zaca!  
 ¡Ca' gaca! ¡Ön, ca' gaca!

## 90

1 Naca cazu' Li', Xan, ca yu'u lidxa'.  
 2 Zí'atëlö ca gulata' yugu' guí'a, o ca guta' yödzölió,  
 ga naguela' cate' gusí lo ga idxintë dza udxi, tsaz naca cazu' Dios.  
 3 Runu' ga tu'huóáca bönachi bëchtö yu cate' rno':  
 "Guli'huóáca le néquinili', bönachi."  
 4 Quiu' Li' chi gayuá' iz nácagaca  
 ca dza neje le chigudödi que,  
 o ca tu chí'isö chi'i dzö'ölö.  
 5 Bugacu' bönachi ca tu lu yegu gubó'o, ate' gúcagaca ca tu yëla rineru'.  
 Cate' naca zila zéaj naca ca tu guíxi'do' rilentë luyú.  
 6 Cate' naca lahui' dza rizxön, en rö' ni'a në'e,  
 pero cate' chiral-la, ricuadi', en ridödi que.  
 7 Rinítitu' tu' rilenu' netu',  
 ate' tu' ridzó'o ruúbi ruguí'tu'.  
 8 Nuzú' lo' xiguia' nabága'tu',  
 en nubéaju' lu bení' quiu' dul-la' yu'u ládxi'do'otu'.  
 9 Tu' riléde'enu' netu' ridödi quégaca dza queétu',  
 ate' chibú'u iz queétu' ca tu le rinnë ládxi'tu'.  
 10 Tsónnalalaj yu' chi ízisö zóatu' nabantu',  
 o channö nál-latu', huazóatu' idú tápalalaj iz,  
 pero runtu' dxin bayudxi, en ruhuí'initu' yugu' iz na',  
 tu' ridödité quéguequi iz na', ate' uzá'atu'.  
 11 ¿Nuzxi caz réajni'í tsa naca yöl-la' rilé quiu'?  
 ¿Nuzxi caz nözi ca naca tsöbi yu'u nu na' rilenu'?  
 12 Que lë ni na' busëdi netu' para guéquibe'etu' tsa gácagaca iz zóatu',  
 para gácatu' bönachi ta'yéajni'í lo' Li'.  
 13 ¿Gáca'xte caz biti' huéchi' ládxi'u netu', Xan?  
 Buéchi' ladxi' netu', yugu' huen dxin quiu'.  
 14 Tu zila tu zila buluí'í netu' ca naca yöl-la' dxi'í ladxi' quiu',  
 para gúl-latu' lu yöl-la' rudzeja queétu', en uzí'itu' xibé yugu' dza na'.  
 15 Ben ga udzëjatu' tsa chigulaca dza busaca' zi'u netu',  
 en tsa gulaca iz biti' guca dxi'a queétu'.  
 16 Buluí'í netu', yugu' huen dxin quiu', ca naca le nunu',  
 en buluí'í xzí'initu' ca naca yöl-la' zxön quiu'.  
 17 ¡Buzá' ladxi' queétu', Xantu' Dios,  
 en ben ga irúaj dxi'a dxin runtu'!  
 ¡Ön, ben ga gaca dxi'a lo' dxin runtu'!

## 91

1 Nu bönni' ruzxöni ládxi'ë Dios para gun chi'ë lë',  
 en rizi'ë Dios Nu napa idútë yöl-la' huáca, para gácalenë' lë',  
 2 gaca guië' Xanru': "Nacu' Nu run chi'í neda', en Nu ruzóa neda' tsutsu.  
 Nacu' Dios quia', ate' ruzxöni ládxi'a Li'."  
 3 Usölá cazë' Dios Li' lu du yalaj que nu rizön bönachi,  
 en lu yödzöhuë' le rusuniti.  
 4 Usubágu'ë li' ca rusubága'ba' böra yugu' bórado' queëba',

ate' gaca chi'u lu në'ë ca raca quégacaba' börado' zxan xilaba' yøjede.  
Le run chi'i rë'u, en le ruzóa rë'u tsutsu naca yöl-la' run ca rnna xtídzë'ë  
cheë'.

<sup>5</sup> Biti' gádxinu' le run gadxi bönachi chi'i dzö'ölö,  
en bití' gádxinu' yaga lahui tuchi' tu'sé bönachi lahui' dza,

<sup>6</sup> en bití' gádxinu' yödzhüé' le rilén ga naca chul-la,  
en bití' gádxinu' le naca xihui' le ruti bönachi lahui' dza.

<sup>7</sup> Ilátigaca chi gayuá' bönachi cuitu' li',  
en ia'chí cö' chi gayuá' cuitu' ibëla,  
pero bití' bi gaca quiu' li'.

<sup>8</sup> Le nácaté uyú iná'asu',  
en ilé'enu' le rubí'i quégaca nupa tuá' dö'.

<sup>9</sup> Tu' nuzú'-në' Xanru' Nu run chi'i li',  
nuzú'-në' Dios nayépisëtërë' Nu gácalen li',

<sup>10</sup> bití' bi gaca quiu' le cabí naca dxi'a,  
en nitú' le naché' yödzhüé' bití' tsu'u lidxu',

<sup>11</sup> tu' cu'u cazé' Dios li' lu ná'agaquié' gubáz lá'ayi queé',  
para ilún chi'ë li' gátí'tës ga ridó'.

<sup>12</sup> Lu ná'agaquié' ila'ché'ë li',  
para cabí tsöjchegu'u guiöj.

<sup>13</sup> Uléaj ulibu' bédxi guixi', en bëla sínia'.

Usunu' lé'e labu' bédxi guixi'do', en bëla xitsiní'.

<sup>14</sup> Rnnë' Dios: "Nadxi'inë' neda', ate' que lé ni na' usölá' lé'.

Uzóa'-në' tsaz xitsá'tërö tu' núnbë'ë La'.

<sup>15</sup> Ulidzë' neda', ate' ubi'a didza'.

Sóalena' lé' cate' bi gaca queé'.

Usölá' lé', en guna' lé' bal.

<sup>16</sup> Uzánda'a dza soë' ibanë',  
en uluí'ida'-në' ca gaca usölá' lé'."

## 92

<sup>1</sup> ¡Bica' tsahui' naca rigú'utu' Li' yöl-la' ba, Xan,  
en rúl-latu' le tun Li' bal, Dios nayépisëtërë',

<sup>2</sup> en rusiyöntu' bönachi yugu' zila ca ruhuéchi' ládxi'u netu',  
en rulu'itu' lahui yugu' dzö' ca runu' ca rnna xtídzu'u!

<sup>3</sup> Rúl-latu' len yugu' bihuël-la,  
en rúl-latu' yugu' le lachi ca tul-la.

<sup>4</sup> Le zxön nunu' Li', Xan, run ga rudzójatu',  
ate' ruzi'tu' xibé le núngaca lu no'o.

<sup>5</sup> Bica' zxön nácgaca le nunu' Li', Xan.  
Zxöntërö le rizá' ládxi'u gunu'.

<sup>6</sup> Zoa tu le cabí gaca inözínë' bönni' nazxí icjé',  
en bití' gaca tséjni'inë' bönni' canöz le.

<sup>7</sup> Nupa nucá'anagaca Dios ila'yán ca ta'yán guíxi'do',  
en ulu'zí' xibé le tun nupa tuá' dö', pero ila'niti tsaz,

<sup>8</sup> tu' nayépsëtëru' Li' tsaz, Xan.

<sup>9</sup> Naca bë' le gaca quégaca nupa bití' ta'lé'e Li' dxi'a, Xan.  
Naca bë' ila'niti nupa bití' ta'lé'e Li' dxi'a.

Ulu'gá'ana cá'asó yúgu'të nupa tuá' dö'.

<sup>10</sup> Nunu' ga nácatëra' nal-la ca nácaba' bédxi.  
Nagú'u neda' le za le run ga rudzójada'.



11 Ilé'e quézida' cate' uxicju' nupa biti' ta'lé'e Li' dxi'a,  
 en yönda' cate' ila'bödxi yechi' nupa tuá' dö', nupa na' ta'díl-lalen neda'.  
 12 Ila'yán nupa nátagaca tsahui' ca ta'yán yaga zina' ca'.  
 Ila'zxón ca ta'zxón yaga rō'gaca lu guí'a Líbano.  
 13 Nátagaca ca yaga nudá'gacu' ra' yu'u lidxu', Xan,  
 le ta'zxón lu lö'a lataj quiu', Dios queétu'.  
 14 Cate' ni' yú'ugaca iz zían ila'bía le zxixi quéguequi.  
 Ilátagaca tsutsu, en ila'cuá'tica'sö ya'a.  
 15 Caní gaca para gaca bē' náquiē' tsahui' Xanru', Nu run chi'i neda'.  
 Biti' bi zóalen Lē' le cabí naca tsahui'.

## 93

1 ¡Rinná bē'ē Xanru!  
 ¡Nácuē' yöl-la' ba zxön queē'!  
 ¡Nácuē' zxē' Xanru', en núguiē' lē'ē yöl-la' unná bē'!  
 ¡Nuzōē' tsutsu yōdzōlió, ate' biti' utá cuini!

2 ¡Tsaz nuzú' tsutsu ga rō'u rinná bē'u, Xan,  
 en zóatica'su' Li'!  
 3 Riyasa ridxía nisa yugu' lu nísado', Xan.  
 Riyasa ridxía nisa, en ru'u bō que.  
 Riyasa ridxía nisa yugu' lu nísado', en yugu' lu yegu.

4 Xanru' Dios yehua' yubá nápatēre' yöl-la' unná bē'  
 ca bō ru'u lu nísado' le riyón ca guziú' rinnē,  
 enca' ca le riyasa ridxía nisa lu nísado'.

5 Tsaz naguixju' xibá quiu', Xan,  
 ate' idú lá'ayi naca ga zoa cazu' Li'.  
 Caní zóatica'sö na'a dza, en dza si' zaca.

## 94

1 Nacu' Dios, Xan, Nu ruzí' lēbi bōnachi.  
 Buluí'i cuinu', Dios, Nu ruzí' lēbi.  
 2 Ruchi'a rusōró cazu' yúgu'tē bōnachi.  
 Guzē, ate' len yöl-la' huáca zxön quiu' bubí'i quégaca nupa tun ba zxön  
 cúnguequi.

3 ¿Gáca'xte caz ulu'z'í' xibé nupa tu'cá'ana Li', Xan?  
 ¿Gáca'xte caz ulu'z'í' xibé?  
 4 ¿Gáca'xte caz ilún ba zxön cúnguequi, en iluí'i didza' z'í?  
 ¿Gáca'xte caz ilún ba zxön cúnguequi ní'a que dö' tuá'gaca?  
 5 Tu'sunítiē' nupa néquiguequi quiu', Xan.  
 Tu'saca' z'í'ē nupa néquiguequi quez quiu'.  
 6 Tútigaquiē' nigula uzēbi, enca' yugu' bi'i uzēbido',  
 en tunē' le naca xihui' ladaj bōnachi z'í'tu'.  
 7 Ta'nñē: "Biti' ilé'enē' Xángaquiē' rē'u,  
 en biti' ruí'i lādxe'ē Dios queē' Jacob lē ni."

8 Guli'tséajni'i, bōnachi biti' nōzguequi,  
 ate' libí'ili', bōnachi catún bal, ¿bátaxi tséajni'ili'?  
 9 Benē' Dios guídi nágaru'. ¿Naru' cabí riyón quézinē'?  
 Benē' Dios guiōj loru'. ¿Naru' cabí rilé'e quézinē'?

10 Ruzéajni'i quézínë' Dios bönachi yúgu'të yödzö.  
 ¿Naru' cabí gunë' léguequi xiguia'?  
 Ruchiza cazë' icja ládxi'do'oru' yöl-la' réajni'i.  
 ¿Naru' cabí réquibe'enë' bi runli'?  
 11 Nöz quézínë' Xanru' yugu' le ta'zá' ládxi'gaca bönachi.  
 Nózinë' canöz naca le ta'zá' ládxi'gaca.

12 Bica' ba bönni' na' ruzéajni'i quézinu'-në', Xan,  
 en rusedi quézinu'-në' ca naca xibá naguixju' Li'.  
 13 Gunu' ga uzí' ládxi'ë cate' bi gaca queë',  
 ga idxinrö dza tsú'ugaca yeru ba nupa tuá' dö'.

14 Biti' usán në'ë Xanru' bönachi queë',  
 en bití' ucá'anë' nupa néquiguequi quez queë'.  
 15 Ca naca le naca tsahui' uchi'a usöröë' rë'u le yúbölö,  
 ate' ulu'zí' xibé nupa nácgaca tsahui'.  
 16 ¿Nuzxi caz tíl-lalen nupa tuti bönachi para gácalen neda'?  
 ¿Nuzxi caz gácalen neda' cate' nacuá' nupa tuá' dö' quia'?  
 17 La'tu' cabí gúcalenë' Xanru' neda',  
 la' yöjtsú'utea' lataj chul-la que yöl-la' guti.

18 Gunnía': "Chizóa' ibixa",  
 ate' lu yöl-la' dxi'i ládxi' quiu' guzxönu' neda', Xan.  
 19 Cate' ruúbí ruguí' ládxi'da'ahua',  
 ruhuë tsahú'u neda', en runu' ga rudzédada'.  
 20 Biti' ca' gunu' tsözxön nupa tu'chi'a tu'sörö netu' ca naca le cabí naca  
 tsahui',  
 nupa na' tu'béaj tsahui' le cabí naca tsahui'.

21 Tu'dubë' tsözxön para ilútië' nupa nácgaca tsahui',  
 en ta'chúguië' quégaca nupa bití' bi nabága'gaca ilátigaca,  
 22 pero run chi'i cazë' Xanru' Dios neda'.  
 Nuzóë' neda' tsutsu, ate' ruzxöni ládxa'a lë'.  
 23 Ubi'ë quégaquië' ca naca dö' tu'ë,  
 en usunítie' légaquië' tu' nözi xiguia' nabága'gaquië'.  
 Usunítie' dërö Xanru' Dios légaquië'.

## 95

1 Guli'dá, gúl-laru' queë' Xanru' lu yöl-la' rudzeja queëru'.  
 Lu yöl-la' rudzeja queëru' cödxi'aru' que Nu na' naca ca tu guiöjto'o ga  
 nuláru'.  
 2 Uyéajru' lahuë', en guiëru'-në': "Xclenu'."  
 Lu yöl-la' rudzeja queëru' cödxi'aru' lahuë', gúl-laru' yugu' salmo.  
 3 Xanru' Dios náquië' Dios nayëpisëtë'rë'.  
 Nápatë'rë' yöl-la' unná bë' ca yúgu'të dios izá'a.  
 4 Lu na' cazë' yu'u le dë ga rë' znan luyú,  
 ate' néquiguequi ca' queë' guí'a sibi.  
 5 Nequi queë' nísado', tu' nun cazë' le,  
 en len ná'asé' benë' luyú bidxi.  
 6 Guli'dá, gunru'-në' zxön, en uzóa zxíbiru' lahuë'.  
 Uzóa zxíbiru' lahuë' Xanru' Nu ben rë'u.

7 Naca cazë' Lë' Dios queëru',  
 ate' nácaru' bönachi rugagu cazë', en ca bö'cu' zxila' richë' cazë'-ba' lu në'ë.  
 Rnna cazë' Dios: "Na'a, channö rë'ënili' yönili' chi'a,  
 8 biti' gunli' zidzaj icja ládxi'do'oli' ca gulunë' xuz xtó'oli' lataj na' lë  
 Meriba,  
 en calëga ca gulunë' la' guixi' ga dë lataj lë Masa,  
 9 cate' ni' gula'zí' bë'ë xuz xtó'oli' neda'.  
 Gula'zí' bë'ë neda' sal-la' bila'lé'enë' yugu' le bena'."  
 10 Idú choá' iz gúquida' zi' bönachi gula'cuá' dza ni',  
 ate' gunniá': "Ta'chixi ta'níguinë' lu icja ládxi'do'gaquië',  
 en biti' nözguequinë' le rë'ënda' ilunë'."  
 11 Que lë ni na' lu yöl-la' rilé quia' bena' tsutsu xtídza'a,  
 gunniá': "Biti' ca' ila'yázië' ga ulu'zí' ládxi'ë tsözxön len neda'."

## 96

1 ¡Guli'gul-la queë' Xanru' tu le cubi!  
 ¡Guli'gul-la queë' Xanru', yúgu'tëli' zóali' yödzölió!  
 2 ¡Guli'gul-la queë' Xanru'! ¡Guli'gún zxön lë'!

Tu dza tu dza buli'siyön bönachi didza' dxi'a ca rusölë' rë'u.  
 3 Buli'siyön bönachi yúgu'të yödzö yöl-la' ba queë'.  
 Buli'siyön yúgu'të bönachi le náca gaca zxön nunë'.  
 4 Zxöntëro náquië' Xanru', ate' runda' bayúdx cú'uru'-në' yöl-la' ba.  
 Ral-la' gádxitëru' Lë' ca tadxi bönachi izá'a dios quéguequi.  
 5 Yugu' dios qué gaca bönachi izá'a náca gacasö budó' guiój budó' yaga,  
 pero Xanru' Dios nunë' lúzxiba xitsá'.  
 6 Nacuá' yöl-la' bení', en yöl-la' ba lahuë' Lë'.  
 Nacuá' yöl-la' huáca, en yöl-la' lachi ga zoa cazë'.

7 ¡Guli'cu'ë Xanru' yöl-la' ba, bönachi yúgu'të yödzö!  
 ¡Guli'cu'ë yöl-la' ba, en yöl-la' huáca!  
 8 ¡Guli'cu'ë Xanru' yöl-la' ba ni'a que Lë'!  
 ¡Guli'guá' le unödzjali', en guli'dá lahuë'!  
 9 ¡Guli'gún Lë' zxön, náculi' le naca ba'a!  
 ¡Guli'zxizi lahuë', bönachi idútë yödzölió!

10 Guli'nná lógaca bönachi yúgu'të yödzö: "Rinná bë'ë Xanru'.  
 Naguixjë' tsaz luyú, ate' biti' utá cuini.  
 Ca naca le naca tsahui' uchi'a usöröë' qué gaca yúgu'të bönachi."

11 Ral-la' udzeja lúzxiba, en ulu'zí' xibé luyú.  
 Ral-la' cödxí'a nísado', en ila'bödxi yúgu'të le nacua' lu nísado'.  
 12 Ral-la' udzeja guixi' caz, en yúgu'të le nacua' la' guixi'.  
 Lu yöl-la' rudzeja quéguequi ilúl-la yaga  
 13 lahuë' Xanru', tu' si' ulë'.

Guidë' duchi'a dusöröë' nupa nacua' yödzölió.  
 Ca naca le naca tsahui' uchi'a usöröë' qué gaca yúgu'të bönachi,  
 enca' qué gaca bönachi yúgu'të yödzö para ilunë' ca rnna xtídzë'ë.

## 97

1 ¡Rinná bē' cazē' Xanru' Dios!  
 ¡Ral-la' ulu'dzeja bōnachi idútē yōdzōlió!  
 Buli'sí' xibē', libí'ili' zóali' yúgu'tē yōdzō izá'a.  
 2 Rō'gaca bōaj, en le chul-la idú gāsibi'ilō ga na' zoē'.  
 Le naca dxi'a, en le naca tsahui' tu'zóa tsutsu le rinná bē'ē.  
 3 Rinōru tu guí' zxōn lahuē',  
 le uzegui' nupa ta'dá'baga' Lē'.  
 4 Tu'zení' le ta'yēpi yōsa yōdzōlió.  
 Ril'é e luyú lē ni, en rizxizi.  
 5 Tu'úna' guí'ado' ca ruún bidxina' buz lahuē' Xanru'.  
 Náquiē' Xani idútē yōdzōlió.  
 6 Lúzxiba xitsá' naca bē' náquiē' tsahui',  
 ate' ta'lé' e bōnachi yúgu'tē yōdzō yōl-la' zxōn queē'.  
 7 Tu'tuí' yúgu'tē nupa tun zxōn budó' guiōj budó' yaga,  
 nupa na' tun ba zxōn cuínguequi ní'a quégaca budó' quéguequi na'.  
 Ulu'gá'ana cá'asó yúgu'tē dios quégaca bōnachi izá'a lahuē' Xanru'.  
 8 Bila'yōni bōnachi Sión, en bulu'dzeja,  
 enca' yugu' xzí'ini xi'sóē' Judá.  
 Tu'dzéjanē' ca ruchi'a rusōróu' netu', Xan.  
 9 Nayépisētērō casu' Lí, Xan, ca yúgu'tē nupa nacuá' yōdzōlió.  
 Nayépisētērō casu' Lí' ca yúgu'tē dios quégaca bōnachi izá'a.  
 10 Núlōli' nadxí'ili'-nē' Xanru', guli'guequi zí' le naca dō'.  
 Run chí'i cazē' bō' nácagaca caz nupa néquiguequi queē'.  
 Rusölē' léguequi lu ná'agaca nupa tuá' dō'.  
 11 Ruzení'tica'sō bení' queē' nupa nácagaca tsahui',  
 ate' tu'zí' xibē' nupa nácagaca dxi'a.

12 ¡Buli'sí' xibē' Xanru' núlōli' nácali' tsahui'!  
 ¡Buli'subán lādxi'li' ca nunē' Dios Lá'ayi, en guli'cu'ē yōl-la' ba!

## 98

1 ¡Guli'gul-la queē' Xanru' tu le cubi,  
 tu' nunē' le tun ga rubániru!  
 Len yōl-la' unná bē' zxōn queē', en yōl-la' huáca lá'ayi queē' nadéli'nē' lu  
 gudil-la.  
 2 Nunē' Xanru' ga naca bē' le nadéli'nē'.  
 Nuluí'inē' bōnachi yúgu'tē yōdzō náquiē' tsahui'.  
 3 Len yōl-la' dxi'i lādxi' queē', en yōl-la' li lādxi' queē'  
 benē' ca rnna xtídzē'ē le guzxi' lu nē'ē' gunē' quégaca bōnachi Israel.  
 Bila'lé' e bōnachi idútē yōdzōlió ca busölē' rē'u Dios queēru'.  
 4 ¡Lu yōl-la' rudzeja queēli' guli'gul-la queē' Xanru', yúgu'tēli' zóali'  
 yōdzōlió!  
 ¡Idú lādxi'li' guli'cu'ē yōl-la' ba, en guli'gul-la queē' le naca lá'ayi!  
 5 ¡Guli'gul-la queē' Xanru' yugu' salmo, en guli'quinnaj yugu' bihuēl-la!  
 ¡Guli'quinnaj lē'egaca arpa, en guli'gul-la yōl-la' ba queē'!  
 6 ¡Guli'cōdxi lúzugacaba' chivo, en lúzugacaba' bēdxi  
 lahuē' Xanru' Dios, Nu rinná bē'!

7 ¡Buli'lidza zidzaj, nísado', en yúgu'tè le nacua' nisa na'!

¡Guli'gul-la yödzo'lió, en yúgu'tè nupa nacua' ni'!

8 ¡Guli'capa' ná'ali', yugu' yegu,

ate' lu yöl-la' rudzeja queëli' guli'gul-la lahuë' Xanru', libí'ili', gu'ado',

9 tu' zè'è duchi'a dusöröë' quégaca bönachi yödzo'lió!

Ca naca le naca tsahui' uchi'a usöröë' quéguequi,  
en ca naca le naca dxi'a tsahui' inná bé'enë' yúgu'tè bönachi.

## 99

1 ¡Rinná bē'ē Xanru' Dios! Ta'zxizi yúgu'tè bönachi.

Rö'ē rinná bē'ē ladaj nupa nápagacatērö yöl-la' huáca,  
légaca Querubín, ate' rizzixi luyú.

2 Nayëpisëtērë' Xanru' lu yödzo' Sión,  
ate' rinná bé'enë' bönachi yúgu'tè yödzo' izá'a.

3 Ral-la' ila'gu'u Lë' yöl-la' ba yúgu'tè bönachi,  
tu' caní sa'yéaj, en le run ga runru' Lë' bal.

¡Lá'ayi náquië' Lë'!

4 Nadxí'i quézinu' le naca tsahui', Li', Bönni' unná bē' naye'pisë.

Tsaz naguixju' le naca dxi'a tsáhui'do',

en nuzú' quégaquië' zxi'ini xi'sóë' Jacob le naca tsahui', en le naca iduté  
li.

5 ¡Guli'gún zxönë' Xanru' Dios!

Buli'zechu zxi'bili' lahuë' Lë' ga rö'ē rinná bē'ē.

¡Lá'ayi náquië' Lë'!

6 Guláquië' Moisés, en Aarón bixúz queë',  
ate' benë' Samuel tsözxön nupa gula'yéaj ladxigaca Lë'.

Bulu'lidzë' Xanru', ate' bubí'i cazë' didza'.

7 Tu lu böaj bē'lenë' légaquië' didza'.

Gulunë' ca ta'nná bē' xibá queë', en yugu' le gunná bé'enë' légaquië'.

8 Bubi'u didza' lógaca bönachi quiu', Xantu' Dios.

Bulu'ínu' légaquië' nacu' Dios, en runiti lo' bönachi,

pero rubi'u quégaquië' ca sa'yéaj dö' tu'ë.

9 ¡Guli'gún zxönë' Xanru' Dios!

¡Buli'zechu zxi'bili' lahui' lo guí'a lá'ayi ga zoa cazë',

tu' náquië' lá'ayi Xanru' Dios!

## 100

1 ¡Lu yöl-la' rudzeja queëli' guli'gul-la queë' Xanru',  
libí'ili' zóali' iduté yödzo'lió!

2 ¡Lu yöl-la' rudzeja queëli' guli'cu'ë yöl-la' ba Xanru'!

¡Guli'dá lahuë' Lë', en lu yöl-la' rudzeja queëli' guli'gul-la queë'!

3 ¡Guli'tsojné Xanru', náquië' Dios!

Buzá' cazë' rë'u, en calëga rácasö queëru' zóaru'.

Nácaru' bönachi queë', en nácaru' ca bö'cu' zxila' queë'.

<sup>4</sup> Guli'tsaza zaca' ra' yu'u queë', guiëli'-në': "Xclenu'."

Guli'tsaza gapa naca lö'a queë', cú'uli'-në' yöl-la' ba.

Guli'guië': "Xclenu'", en guli'gunë' zxön.

<sup>5</sup> ¡Náquië' dxi'a tsahui' Xanru' Dios, ate' zóatica'sö yöl-la' dxi'i ladxi' queë'!

¡Zóatica'sö yöl-la' run ca rnna xtídzë'ë queë'!

## 101

<sup>1</sup> ¡Gul-la' ca runu' ca rnna xtídzü'u, en ca nacu' tsahui'!

¡Gul-la' yöl-la' ba quiu' Li', Xan!

<sup>2</sup> Güi'i ládxa'a guna' le naca idú dxi'a.

¿Bátaxi huécju' quia' neda'?

Lu yu'u lidxa' guna' le naca idú ladxi'.

<sup>3</sup> Biti' gu'a lataj sóalen neda' nitú le naca xihui'.

Biti' rilé'eda' dxi'a le tun nupa tu'cá'ana Li'.

Biti' ca' guna' lé'guequi tsözxön.

<sup>4</sup> Biti' ca' gaca' chopa ladxi'.

Biti' ca' guna' le naca dö'.

<sup>5</sup> Usunítia' dërö nu bönni' rinnë' que luzë'ë balándo'os.

Biti' ca' guá' ilena' nu run ba zxön cuini.

<sup>6</sup> Uyúa' dxi'a tsáhui'do' nupa tun ca rnna xtídzá'guequi luyú ni, para  
ila'cuá'len neda'.

Nu biti' bi xiguia' nabaga' huáca gun xichina'.

<sup>7</sup> Biti' ca' tsójsóa lidxa' nu rizi' yë'.

Biti' gu'a lataj ugá'ana lahua' nu ruí'i didza' le cabi naca.

<sup>8</sup> Yugu' zila usunítia' yúgu'të nupa tuá' dö' luyú ni,

para ucuíta' lu yödzö queë' Xanru' yúgu'të nupa tuti bönachi.

## 102

<sup>1</sup> ¡Buzë nagu' le rulidza' Li', Xan!

¡Bë' lataj ídxín lo' le rinaba yúdxida' Li'!

<sup>2</sup> Biti' ucache' cuinu' lahua' cate' bi rusaca' zi' neda'.

Buzë nagu' neda', en gudáchi ubi'u didza' cate' rulidza' Li'.

<sup>3</sup> Yöl-la' na'bán quia' ruúlu ca dzön,

ate' régui rilá lu dxita lu bin quia' ca tu guí'.

<sup>4</sup> Rudú ládxa'a ca raca que guixi' nabitxi,

en bítirò rizé ládxa'a bi gahua'.

<sup>5</sup> Tu' rinnëda' ládxa'a nadxítalë'a.

<sup>6</sup> Naca' ca tuba' bigúinni zóaba' luyú bidxi,

o ca tuba' cuturú dxíaba' tu lu yu'u nadachi.

<sup>7</sup> Nabéaj yëla guiöj lahua',

ate' naca' ca tuba' biguinnido' dxíaba' túziba' ícjo'o yu'u.

<sup>8</sup> Yugu' dza nupa biti' ta'lé'e neda' dxi'a tu'didza' yudxi neda'.

Nupa tu'titaj neda' tu'gún dxin la' cate' nu tu'dxía dö'.

<sup>9</sup> Naca le rahua' ca dódo'sö,

en nutsi' nisa ribödxa' le rë'ja'.

<sup>10</sup> Caní raca quia' tu' rilenu' neda', en réquinu' neda' zi'.

Gulusu' neda', en gurú'unu' neda' tsólá'alö.

<sup>11</sup> Naca yöl-la' na'bán quia' ca tu zxul-la rilá' cate' ribía gubidza,

en rudú quia' ca raca que guixi' ricuádi.

12 ¡Li', Xan, zóatica'su',

en zóalentic'a'sö Lo' bönachi!

13 ¡Chasu', en huéchi' ládxi'u bönachi yödzo Sión!

¡Chibidxín dza gü'i ládxi'u léguequi!

¡Ön, chibidxín dza na'!

14 Netu', huen dxin quiu', nadxí'itu' yugu' guiöj nacuá' lu zö'ö run chí'i  
yödzo Sión,

en ruí'i ládxi'tu' ga ridxintë bëchtö rö'ö la' nöza que.

15 Bönachi yugu' yödzo izá'a iladxi Lë' Xanru',  
ate' nupa ta'nná bë' yödzoilió iladxi yöl-la' zxon queë'.

16 ¡Nuchisë' Xanru' caz yödzo Sión,

ate' uluf'i lahuë' ni' lu yöl-la' zxon queë'!

17 Riyönnë' le tu'lidza Lë' nupa ta'yadzaj ta'yudxi.

Biti' ca' uzöë' tsölá'alö le tu'lidza yudxi Lë'.

18 Buli'zúaj lë ni lu guichi para ulu'laba zxi'ini xi'sóali' le,  
ate' nupa si' ilalaj ila'gú'u Xanru' yöl-la' ba.

19 Ga ni' ribözë' Xanru' xitsá' lu lataj lá'ayi queë',  
ga ni' zoë' Xanru' yehua' yubá, ruzé naguë'.

20 Riyönnë' le ta'nnë' ladxi' nupa nadzúngaca,  
en usanë' nupa narugu quéguequi ilátigaca.

21 Soa nu usiyöni bönachi yödzo Sión ca naca Lë' Xanru',  
ate' ila'gú'u Lë' yöl-la' ba lu yödzo Jerusalén,

22 cate' ulu'dubi tsözxön bönachi yugu' yödzo izá'a,  
en bönachi yugu' luyú,  
ate' tsözxön ila'gú'u yöl-la' ba Xanru'.

23 Benë' Xanru' ga gucuídi'da' la' nöza,  
en nunë' ga soa' nabábasö dza.

24 Gunnía': Dios quia', biti' gútiu' neda'  
cate' ni zoa' gatsaj iza ral-la' soa' ibana'.  
Zóatica'sö cazu' Li'.

25 Dza ni'te gudixju' yödzoilió,  
ate' len na' cazu' benu' lúzxiba.

26 Huadödi quéguequi, pero Li', tsaz idi'u.

Ilexu' yúgu'tëguequi ca riyexu' lari',  
en ca tu lari' utubu' léguequi, en utsó'o léguequi.

27 Li', biti' ca' utsá' cuinu', en biti' ca' guexu'.

28 Zxi'inigaca huen dxin quiu' ila'böza dxi'a tsáhu'i'do',  
ate' ucú'u tsutsu zxi'ini xi'sóagaquië' lo'.

## 103

1 ¡Bil-la yöl-la' ba queë' Xanru', li', bö' naca caza',  
ate' idütë le naca', bil-la yöl-la' ba que Lë' lá'ayi!

2 ¡Bil-la yöl-la' ba queë' Xanru', li', bö' naca caza',  
en biti' gal-la ládxi'u yúgu'të le ruzi'u xibë'!

3 Runiti lo cazë' neda' ca naca yúgu'të dul-la' nabága'a,

en rugüë' yúgu'të xihuë'a.

<sup>4</sup> Ruhuöá'uë' neda' lu lataj chul-la,  
en ruzá' ládxe'ë quia' yöl-la' dxi'i ladxí', en yöl-la' ruhuéchi' ladxí'.

<sup>5</sup> Rigu'ë xinöza' yugu' le naca dxi'a,  
lë na' run ga ruhuöáca' ca tu bönni' zoë' iz cuidi' queë',  
ca na' raca queéba' bisia'.

<sup>6</sup> Runë' yugu' le naca dxi'a,  
en ruchi'a rusöröë' quégaca yúgu'të nupa zoa nu rusaca' léguequi zi'.

<sup>7</sup> Buzéajni'inë' Moisés yugu' le gun cazë' Lë',  
en bulu'inë' bönachi Israel yugu' le zxön runë'.

<sup>8</sup> Xanru' ruhuéchi' ladxí' cazë' bönachi, en ruzá' ládxe'ë quéguequi.  
Biti' rilétenë', pero nadxí'itiqui'sinë' léguequi.

<sup>9</sup> Biti' ruzétiqúi'sinë' rë'u le bach,  
en bití' rilétiqúi'sinë'.

<sup>10</sup> Biti' runë' rë'u xiguia' ca sa'yéaj dö' nuá'aru',  
en bití' rubi'ë queëru' ca naca le xihui' nabága'ru'.

<sup>11</sup> Naca caní tu' ca na' naca xitsá'tërö lúzxiba ca luyú ni,  
la' canísö naca zxön ca nadxí'inë' Xanru' nupa tadxí Lë'.

<sup>12</sup> Tscá nácátërö zi'tu' ga rilén gubidza ga ridxintë ga ribía,  
la' canísö rucuitë' yugu' le ta'bága'ru' Lë'.

<sup>13</sup> Ca na' ruhuéchi' ládxe'ë xúzgaca cázabi' yugu' zxí'inë',  
la' canísö ruhuéchi' ládxe'ë Xanru' nupa tadxí Lë'.

<sup>14</sup> Caní runë' tu' nözinë' le nácaru'.  
Röjnenë' néquiniru' bëchtö yu.

<sup>15</sup> Tscá nácagaca dza zóaru' nabanru',  
nácagaca ca raca que xiyija guíxi'do'.

<sup>16</sup> Cate' recaj bö', ruúlu runítisö xiyija na',  
en bití' naca bë' ga na' guzóa.

<sup>17</sup> Xanru', tsaz nadxí'inë' nupa tadxí Lë',  
en runë' quégaca zxí'iniguequi le naca dxi'a.

<sup>18</sup> Caní runë' quégaca nupa tun ca rinná bë' xibá queë',  
en quégaca nupa tun ca rinná bë' xibá queë'.

<sup>19</sup> Naguixjé' Xanru' xilatjé' yehua' yubá ga na' rö'ë rinná bë'ë.  
Rinná bé'enë' yúgu'të le dë.

<sup>20</sup> ¡Guli'cu'ë yöl-la' ba Xanru', libí'ili', gubáz lá'ayi queë',  
nápatëröli' yöl-la' huáca zxön, en runli' ca rnna xtídzë'ë,  
libí'ili' na' runli' ca rnna didza' ru'è!

<sup>21</sup> ¡Guli'cu'ë yöl-la' ba Xanru', libí'ili' nácali' ni'a në'ë guizxi yu,  
libí'ili', huen dxin queë' na', runli' ca ré'ëni quézinë' Lë'!

<sup>22</sup> ¡Guli'cu'ë yöl-la' ba Xanru', yúgu'téli' na' nucu'ë libí'ili',  
libí'ili' zóali' yúgu'të lataj ga na' rinná bë'ë Lë'!  
¡Bil-la yöl-la' ba queë' Xanru', li', bö' naca caza'!

## 104

<sup>1</sup> ¡Gulu'ë yöl-la' ba Xanru', li', bö' naca caza'!

¡Nayëpisëtëru' Li', Xana' Dios!

¡Zxo' nacu' naca yöl-la' zxön, en yöl-la' ba!

<sup>2</sup> ¡Nusubaga' cuinu' bení' ca zxo' nacu' cazu',  
ate' naguixaj cazu' lúzxiba ca tu lari' zxön!



3 Naguixju' xilataj lidxu' lahui nisa dë xitsá'alö.  
 Dxía cazu' lu böaj ca tu lu carreta, en ridó' lu bö'ös.  
 4 Rugunu' dxin bö' raca ca tu gubáz quiu',  
 enca' yugu' guí' ca huen dxin quiu'.  
 5 Nuzú' tsutsu luyú ni lu xilibi,  
 en biti' ca' gaca nu utsá' xilataj.  
 6 Gudixju' nisa zxön luyú ni ca tu lari' nabaga' le,  
 ate' yöjbaga' nísado' na' yugu' guí'a.  
 7 Buzenu' le bach nisa na', ate' burúaj,  
 en cate' biyön chi'u, bayúdx buzunnaj nisa na'.  
 8 Gurén yugu' lu guí'a, en bötaj ga naca ra' yegu,  
 ga bidxintë yöjsóa ga nupó'o que nisa na'.  
 9 Gudixju' buzá' que nísado' ga biti' gaca tödi.  
 Bítirö caz tseajbaga' nisa na' luyú bidxi.  
 10 Runu' ga ralaj beaj yugu' lë'e guí'ado',  
 enca' ga ta'dödi yegu ga rö'ögaca röga'.  
 11 Yudzu yugu' yegu na' nisa té'ajba' böa' guixi',  
 le rugúa yöl-la' ribídx quégacaba' burro ta'dásiba' la' guixi'.  
 12 Yugu' ra' yegu rö'ögaca yaga ga tu'dxiaba' biguínido' xcá'agacaba',  
 en túl-laba' yugu' lu ni'a né'eguequi.  
 13 Rigú'u nisa guiöj quiu' yugu' lu guí'a,  
 en runu' ga tu'huöla tu'dzé'e yugu' le dzö'ö luyú.  
 14 Runu' ga rizxön yö le táguba' böa' bëdx,  
 en yugu' cuan guixi' tu'gún dxin bönachi,  
 le ilagu ni'a que le nudó'o luyú,  
 15 en xisi uva le run ga tudzeja ládxi'guequi,  
 en za olivo le ta'gú'u láhuiguequi lu yöl-la' ruzí' xibé quéguequi,  
 en yöta le nabániguequi.  
 16 Tu'zí' xibé nisa guiöj yaga cedro dzö'ö lu guí'a Líbano,  
 yugu' yaga na' budó'o, Xantu'.  
 17 Ni' tu'dxiaba' biguínni xcá'agacaba',  
 ate' tunba' biyúz lídxigacaba' ni'.  
 18 Nunu' Li' yugu' guí'a sibi ga dzö'öba' bdxina' guixi',  
 enca' yugu' znan bulóaj gapa tapa chi'i cuíngacaba' bizxidxu'.  
 19 Benu' beo' le naca bë' yugu' beo' que iz,  
 ate' ribía gubidza ga ral-la' cuía.  
 20 Benu' chi'i dzö'ölö, en cate' naca chul-la  
 ta'rúajba' ta'daba' böa' guixi'.  
 21 Ta'bödxí'aba' bëdxí guíxi'do', ta'zóa régu'ba' le ila'zönba'.  
 Tu'guílajba' le nuzóé' Dios iláguba'.  
 22 Cate' rilén gubidza tu'dxinba' lídxigacaba',  
 en röjóxagacaba' yugu' lu znan bulóaj quégacaba'.  
 23 Ní'irö ta'rúaj bönachi sôjaca huen dxin,  
 en tun caz dxin ga ridxintë ribía gubidza.  
 24 Xan, zióntërö yugu' le nunu' Li'.  
 Len yöl-la' réajni'i zxön quiu' nunu' yúgu'të.  
 Nalí luyú yödzölió ni yugu' le dxi'a nunu'.  
 25 Ni' zoa nisa nácatërö zxön,  
 ga na' nacuá'aba' böa' guizxi yu,  
 böa' cuidi', enca' böa' zxön.

26 Ni' ta'dödi barco zxön,  
enca' böa' zxön lëba' leviatán, böa' na' nuzóa cazu'.

27 Yúgu'tëba' ta'bözaba' Li,  
cate' idxinrö ugagu' légacaba'.

28 Rugagu' légacaba', ate' táguba'.  
Runödzu' le iláguba', ate' tu'huólaj ta'dzé'eba'.

29 Cate' ruhuecju' quiu', tádxiba',  
en cate' ruzi'u bö' quiu', tátiba',  
en ruhuóaca yu le néquinigacaba'.

30 Cate' rigú'u légacaba' bö', nabángacaba'.  
Rucubu' yúgu'të le nacua' yödzölió.

31 ¡Ral-la' gácatíca'sö yöl-la' ba queë' Xanru'!  
¡Ral-la' ila'yaza ládxi'tíca'sö bönachi le nun cazë' Lë'!

32 Ruyúë' Xanru' luyú, ate' ríxxizi.  
Riganë' yugu' gu'a, ate' rírúaj dzön.

33 ¡Gul-la' queë' Xanru' yúgu'të dza soa' ibana'!  
¡Gul-la' yöl-la' ba queë' Dios tsanni ni zoa' nabana'!

34 ¡Zxixi naca le rízá' ládxa'a ca naca queë'!  
¡Udzéjalenda'-në' Xanru'!

35 Ila'nítië' bönni' dul-la' nacu'ë yödzölió ni,  
en bíti'rö ila'cuá' nupa tuá' dö'.

¡Gulú'u yöl-la' ba Xanru', li', bö' naca caza'!  
¡Yöl-la' ba Lë' Xanru'!

## 105

1 ¡Guli'guíë' Xanru' Dios: "Xclenu"!

¡Buli'lídzë' Lë'!

¡Buli'siyön bönachi ca nácagaca le benë'!

2 ¡Guli'gul-la queë'! ¡Guli'gul-la yöl-la' ba queë'!

¡Guli'gú' didza' ca nácagaca le zxön nunë'!

3 ¡Buli'sí' xibé Lë' lá'ayi!

Ral-la' ulu'dzeja ládxi' yúgu'të nupa ta'guilaj Xanru'.

4 Guli'guiljë' Xanru', enca' yöl-la' huáca queë'.

Guli'gú' ládxi'tíca'sö idxinli' lahuë'.

5 Guli'tsöjné le nácagaca zxön benë' Lë',

lë na' tun ga rubániru', enca' ca nácagaca didza' bë'ë cate' buchi'a busöröë'  
bönachi,

6 lib'íli', xzí'ini xi'sóë' Abraham, huen dxin queë' Dios,  
en lib'íli', xzí'ini xi'sóë' Jacob, nácali' nupa gurö cazë' queë'.

7 Lë' náquië' Xanru' Dios.

Idütë yödzölió naca bë' ca buchi'a busöröë' bönachi.

8 Röjnétiqí'siné' didza' dzaga nunë',

didza' na' gunná bë'ë ila'zí' lu ná'agaquië' chi gayuá' cö' xzí'ini xi'sóë'  
Abraham,

9 didza' dzaga na' bënlenë' Abraham,

le naca didza' na' benë' tsutsu Dios ca gunë' queë' Isaac.

10 Ní'irō benē' tsutsu didza' na' lahuē' Jacob,

le naca tu le rinná bé'enē' lē' gunē',

para gaca quégaca bōnachi Israel tu didza' dzaga le zoa tsaz.

11 Gunnē': "Gunna' queēli' xiyúgaca bōnachi Canaán,  
le guequi tsaz queēli', en quégaca zxi'ini xi'sóali'."

12 Caní gunnē' Dios cate' ni' gula'cu'ē nabábagaquiē' bōnni' Israel.

Tu chópasē' guláquiē', en guláquiē' bōnni' zi'tu luyú.

13 Gula'dē' tu ia'tú yōdzō izá'a.

Bulu'zē'ē tu ga nu gunná bē', en bila'dxínē' ga nacuá' bōnachi izá'a,

14 pero bití' bē'ē lataj Dios nu usaca' zi' bōnachi queē' na',

en buzenē' le bach bōnni' gula'nná bē'ē para gulácalenē' bōnachi queē'.

15 Gunnē': "Bití' bi gunlí' quégaca bōnachi nabō caza' quia',

en bití' bi dō' guá'ali' quégaquiē' bōnni' tu'ē didza' uláz quia'."

16 Benē' ga guyú'u gubín yōdzōlió,

en benē' ga biyadzaj yōta ilahuē'.

17 Gusól-lē'ē tubi' bi'i bōnni', bi'i bidxinbi' ni' zí'aló ca légaquiē',

tu' gulúti'ē-bi' José para gácabi' bi'i nadó'o.

18 Gulúgui'ē bōnni' Egipto ní'abi' len du guíē,

en bulu'dē'ē yen ná'abi' bregui' guíē,

19 ga bidxintē dza budxín xtídzē'ē Xanru',

tu' guzxi' bē'ē Xanru' Dios José na'.

20 Ní'irō gusól-lē'ē bōnni' gunná bē'ē luyú Egipto nu busán-bi'.

Bōnni' na' gunná bé'enē' yōdzō izá'a zían busólē'-bi'.

21 Benē' ga gúcabi' xan yu'u queē',

ate' guta' lu ná'abi' yúgu'tē le dē queē' bōnni' na' rinná bē'ē.

22 Guta' lu ná'abi' gulú'ubi' lidxi guíē bōnni' ta'nná bē'ē tsca ré'ēni quézibi',

para busédibi' bōnni' gula queē' yól-la' réajni'.

23 Ní'irō bila'dxín ca' bōnachi Israel luyú Egipto.

Caní guca, guzóē' Jacob lu xiyúgaca zxi'ini xi'sóē' Ham.

24 Benē' Dios ga gula'yántērō bōnachi queē' luyú ni',

ate' guláquiē' ziantērē' ca nupa gula'díl-lalen légaquiē'.

25 Benē' Dios ga gulunē' zi' bōnni' Egipto bōnachi queē'.

Lu yól-la' banís quégaquiē' gula'zì yé'enē' nupa na' nácagaca huen dxin queē' Lē'.

26 Ní'irō gusól-lē'ē Moisés, huen dxin queē', lógaquiē',

enca' Aarón, bōnni' na' nabō cazē' Lē'.

27 Gulunē' chopē' ni zían yól-la' huáca zxon queē' Dios lógaca bōnachi Egipto na'.

Gulunē' zían yól-la' huáca que yehua' yubá lu xiyúgaca zxi'ini xi'sóē' Ham.

28 Gusól-lē'ē Dios le naca chul-la, ate' bōáca chul-la lahui' dza,

en bití' guca ila'dá'baguē'ē xtídzē'ē.

29 Benē' ga nisa yegu nacuá' lu yegu quégaquiē' bōáca rōn,

en benē' ga gulátiba' böla dzō'öba' yugu' yegu na'.

30 Gula'yanba' riu lu xiyúgaquiē',

ga bidxintē gula'yázaba' yu'u lidxē' bōnni' rinná bé'enē' légaquiē'.

31 Bē'ē didza' Dios, ate' gulátsjaba' bōtsugayu guizxi yu,

en gulátsjaba' ca' bō'iyudo' idútē lu xiyúgaquiē'.

32 Benē' ga guró'ō guiōj bögui' yōla sunna uláz que nisa guiōj,

ate' bōxaj ca' guí' lu xiyúgaquiē'.

33 Guditsjē' yugu' lubá uva quégaquiē', en yugu' yaga higo,

en busunítië' yaga rô'gaca lu xiyúgaquië'.

<sup>34</sup> Bë'ë didza', ate' bila'dxinba' bôchi'zu guizxi yu,  
enca' bôchi'zu hué'enido', cuntu nu gaca ulaba légaçaba',

<sup>35</sup> ate' guláguba' ca' idútë le naz nudá'agaquië' lu xiyúgaquië',  
en guláguba' ca' idútë le naz nudá'agaquië' lu xiyúgaquië'.

<sup>36</sup> Benë' ga gulátibi' yúgu'tëbi' bi'i bônni' lo idútë lu xiyúgaquië'.  
Bi'i lo na' quégaquië' bônni' nál-la.

<sup>37</sup> Ní'irô bubéajë' Dios yugu' bônni' Israel luyú na', nuá'agaquië' dumí  
plata, en oro,

ate' cuntu nu yôjchegu' nu nutsa' légaquië'.

<sup>38</sup> Bulu'dzeja bônachi Egipto cate' bulu'zë'ë bônni' Israel lu xiyúgaquië',  
ate' guladxi gula'dzöbi tu' nôziguequinë' bônni' Israel na'.

<sup>39</sup> Gusôl-lë'ë Dios tu böaj le gulú'u bônachi queë' zzul-la,  
ate' chi'i dzö'ölö gusôl-lë'ë guí' le buzení' quégaquië'.

<sup>40</sup> Gula'nábinë' Lë', ate' gusôl-lë'ë böra guíxi'do' zían le ilahuë',  
en benë' ga bulu'huôlaj gula'dzé'enë' yôta que yehua' yubá.

<sup>41</sup> Bulu'ë lahui tu guiôjto'o, ate' gulalaj nisa yégudo'.

Gudödi nisa na' luyú bidxi ni' ca tu nisa yegu gubó'o.

<sup>42</sup> Caní benë' Dios tu' yôjnenë' didza' lá'ayi queë',  
le guzxi' lu në'ë gunë' queë' Abraham, huen dxin queë'.

<sup>43</sup> Bubéajë' bônachi queë' lu yôl-la' rudzeja quéquequi,  
ate' lu yôl-la' rudzeja quéquequi gula'bôdxi'a bônachi gurô cazë' queë'.

<sup>44</sup> Bunödziejë' xiyúgaca bônachi yugu' yödzo izá'a quégaquië'.

Bulu'zi'ë xibé le ilá' luyú ni'a que dxin gulún bônachi izá'a na'.

<sup>45</sup> Caní benë' Dios para ilunë' ca rnna le gunná bé'enë' légaquië' ilunë',  
en ilunë' ca rinná bë' xibá gudixjë' Lë'.

¡Guli'cu'ë yôl-la' ba Xanru'!

## 106

1 ¡Guli'cu'ë yôl-la' ba Xanru'!

¡Guli'guíë' Xanru': "Xclenu" tu' náquië' idú dxi'a!

¡Zóatica'sö yôl-la' dxi'i ladxi' queë'!

2 ¿Nuzxi caz gaca quixjö' ca nácagaca le zxön nunë' Xanru',  
en uluí' lahui ca naca yôl-la' ba queë'?

3 ¡Bica' ba nupa tun le naca tsahui',  
nupa na' túntica'sö le naca dxi'a!

4 Yôjné neda', Xan, cate' ruzá' ládxi'u quégaca bônachi quiu'.

Buzá' ladxi' quia' yôl-la' rusölá quiu',

5 para gaca ilé'eda' gata' yôl-la' tsahui' quégaca nupa narô cazu' quiu',  
en para gaca udzëjalenda' bônachi quiu' cate' tu'dzeja,

en para gaca uzí'lëna' xibé nupa néquiquequi quiu'.

6 Nuntu' dul-la' ca gulunë' xuz xtó'otu'.

Biá'atu' dö', en bentu' le naca xihui'.

7 Cate' gula'cu'ë xuz xtó'otu' luyú Egipto,  
biti' gula'yéajni'inë' le nácagaca zxön benu'.

Biti' yôjnéquequinë' yugu' le benu' quégaquië' lu yôl-la' dxi'i ladxi' quiu',  
pero gula'dá'baguë'ë xtídz'u cate' gula'cu'ë ra' nísado' lë Nísado' Xíná.

- 8 Busölë' Xanru' Dios légaquië' para gaca bë' runë' ca rnna xtídzë'ë, en para ulu'e lahui yöl-la' huáca zxön queë'.
- 9 Caní guca, buzenë' le bach Nísado' Xiná na', ate' la' gubídxitë. Guchë'ë légaquië' ga rë'do' lu nísado' na', ate' gula'dë' lu yu bidxi ga na' gurö'ö nisa.
- 10 Caní guca, busölë' légaquië' lu na' nu na' benë' légaquië' zi', en buá'uë' légaquië' lu na' nu na' gudíl-lalen légaquië'.
- 11 Ní'irö gubaga' nísado' na' nupa gula'sí regu' légaquië'.
- Cuntu nu bugá'ana nu bidzaga léguequi.
- 12 Ní'irö gula'yéajlë' bönachi queë' xtídzë'ë, ate' gulul-la yöl-la' ba queë'.
- 13 Pero la' gulál-latë ládxi'gaquië' yugu' le benë'.
- Biti' gula'nábinë' Lë' ulu'ínë' légaquië' le ral-la' ilunë'.
- 14 Zián le gula'zë ládxë'ë cate' ni' gula'cu'ë la' guixi' ga dë lataj, en gula'zi' bë'ë Dios la' guixi' na'.
- 15 Ní'irö bë'ë Dios quégaquië' le gula'nábinë' Lë', pero gusöl-lë'ë quégaquië' tu yödzöhuë' le bëti zióngaquië'.
- 16 Cate' bulu'zxé'enë' Moisés ga ni' gula'cu'ë tsözxön, en bulu'zxé'enë' ca' Aarón, bönni' nubéajë' Xanru' quez queë',
- 17 la' ná'asö gualaj luyú, en bucachi' Datán.
- Bucachi' ca' nupa gulún tsözxön Abiram.
- 18 Gulaj tu guí' zxön ga na' nudúbigaquië', en buzegui' nupa na' guluá' dö'.
- 19 Lu guí'a Horeb gulunë' tu bédxido' néquiniba' oro, en gula'yéaj ládxë'ë budó' oro na'.
- 20 Caní guca bulu'cá'anë' Dios nayëpisëtë'rë', para gula'yéaj ládxë'ë budó' oro le naca ca tu bédxi ráguba' guixi'.
- 21 Gulal-la ládxë'ë Dios Nu busölá légaquië'.
- Lë' benë' zión le zxön le gulácalen légaquië' luyú Egipto.
- 22 Benë' zión le tun ga rubániru' lu xiyúgaca zxi'ini xi'sóë' Ham, en zión le tun ga rádxiru' Lë' le benë' ra' Nísado' Xiná.
- 23 Que lë ni na' gunné' Dios usunítië' légaquië', ate' la' cá'asö gunë' la'tu' cabí guzuinë' Moisés, bönni' rö queë', lahuë' Lë', en buzóa dxié' yöl-la' rilé queë' para cabí usunítië' légaquië'.
- 24 Ní'irö biti' gulë'enë' ila'yázië' luyú dxi'a na' dë lógaquië' tu' cabí gula'yéajlë'ë xtídzë'ë Dios.
- 25 Gula'nnë' zi'ë queë' Dios gapa naca lu yu'u guídi quégaquië', en biti' bulu'zë náguië' chí'ë Xanru'.
- 26 Que lë ni na' benë' tsutsu Dios xtídzë'ë le bë'lenë' légaquië', gunné' gunë' ga ilátië' ga na' naca la' guixi' ga dë lataj.
- 27 Gunnë' gunë' ga ilasi lásië' zxi'ini xi'sóagaquië' ladaj zión yödzö izá'a, en gúsië' légaquië' gapa nacuá' bönachi zi'tu'.
- 28 Ní'irö bulu'dödi cuíngaquië' lu na' budó' guié lë Baal-peor, en gulahuë' xipéla'gacaba' böa' guixi' gulútië'-ba' para gulunë' zxön yugu' dios nati.
- 29 Ca' guca, gulún lenë' Dios ni'a que le gulunë', ate' gulén tu yödzöhuë' zxön ládjagaquië'.
- 30 Ní'irö guzuinë' Finees, en benë' le raza ládxë'ë Dios, ate' guzóa dxi yödzöhuë' zxön na'.
- 31 Buzöë' Dios queë' Finees na' náquië' tsahui' ni'a que

lë na' benë' le nuzóë' tsaz ca naca queë'.

<sup>32</sup> Lësca' gulún lenë' Dios ga na' zoa nisa lë Meriba,

ate' Dios gulénë' Moisés tu' nözi lë na' gulunë'

<sup>33</sup> tu' gula'dá'baguë'ë xtidxë'ë Bô' Lá'ayi queë',

ate' Moisés, lu yöl-la' ridzá'a queë', gunné lizë'.

<sup>34</sup> Biti' bulu'sunítië' bönachi tuá' dö' gula'cuá' lu yu ni,

ca na' gunná bé'enë' Xanru' légaquië' ilunë'.

<sup>35</sup> Gulunë' léguequi tsözxón

en bila'zédë' ilunë' ca gulún bönachi na',

<sup>36</sup> ate' gula'yéaj láchë'ë budó' guiöj budó' yaga quéguequi,

le guca quégaquië' ca tu du yalaj le guzxón légaquië'.

<sup>37</sup> Gulútië'-bi' zxi'inigaquië' lógaca bô' xihui',

yugu' bi'i bönni', en nigúlado',

<sup>38</sup> en bulu'laljë' xichóngaca nupa bití' bi nabága'gaca

tu' bulu'laljë' xichóngacabi' bi'i bönni' quégaquië', en bi'i nigula quégaquië',

yugu' bi'i na' gulútië'-bi' lógaca budó' guiöj budó' yaga nacuá' luyú Canaán,

ate' gúcada' xihui' luyú ni tu' nözi rön na' bulu'laljë'.

<sup>39</sup> Ca' guca, guláquië' xihui' ni'a que le gulunë'.

Guláquië' ca tu nigula udá dzaga tu' bulu'cá'anë' Dios quégaquië'.

<sup>40</sup> Que lë ni na' guléde'enë' Xanru' Dios bönachi queë',

en bití' bilé'enë' dxi'a nupa na' néquiquequi queë'.

<sup>41</sup> Ní'irö budödë' légaquië' lu ná'agaca bönachi zían yödzo izá'a,

ate' nupa bulu'dí'i légaquië' gula'nná be'e légaquië'.

<sup>42</sup> Nupa na' bití' bila'lé'e légaquië' dxi'a gulunda' légaquië' dxin,

en bulu'zxicaj légaquië' lu yöl-la' unná bé' quéguequi.

<sup>43</sup> Zían luzuí gú'unë' Dios usölë' légaquië',

pero gula'dá'baguë'ë le ré'enë' ilunë',

ate' guzxöntëro xigua' nabága'gaquië'.

<sup>44</sup> Bilé'enë' Dios yöl-la' bayechi' quégaquië'

en biyönnë' ta'bödxi yechë'ë.

<sup>45</sup> Yöjnenë' didza' dzaga núnnenë' légaquië',

ate' bubequi lahuë' quégaquië' tu' nazxöntëro yöl-la' dxi'i ladxi' queë'.

<sup>46</sup> Benë' Dios ga bulu'huéchi' ladxi' légaquië'

nupa na' gula'ché' légaquië' nadzúngaquië'.

<sup>47</sup> ¡Busölá netu', Xantu' Dios!

Guléaj netu' ladjagaca yödzo izá'a

para guiëtu' Li': "Xclenu" ni'a que Lo' lá'ayi,

en lu yöl-la' rudzeja zxón queëtu' cú'utu' Li' yöl-la' ba.

<sup>48</sup> ¡Yöl-la' ba Lë' Xanru', Dios quégaca bönachi Israel

na'a dza, en yúgu'të dza si' zaca!

Ral-la' ila'nná yúgu'të bönachi: "¡Ca' gaca!

¡Guli'cu'ë yöl-la' ba Xanru' Dios!"

## 107

<sup>1</sup> ¡Guli'guië' Xanru': "Xclenu" tu' náquië' dxi'a, en tu' zóatica'sö yöl-la' dxi'i ladxi' queë'!

<sup>2</sup> Ral-la' ila'nná caní nupa na' buá'uë' Xanru',

nupa na' buá'uë' lu ná'agaca nupa gulún léguequi zì',  
 3 en nubéajë' léguequi zían lu yödzö izá'a,  
 saca' ga rilén gubidza, en saca' ga ribía,  
 saca' ga za' bö' ziaga, en saca' ga ridödi gubidza beo' ziaga.

4 Bal-lë' gula'dë' nanítigaquië' la' guixi' ga dë lataj,  
 en ga ni' biti' zoa nöza.  
 Biti' guca ulu'dzölinë' tu yödzö ga gaca tsöjcu'ë.  
 5 Gula'dunë', en gula'bidxë' nisa,  
 en gudú ládxi'gaquië'.

6 Ní'irö lu lë na' raca quégaquië' bulu'lidzë' Xanru',  
 ate' busölë' légaquië' lu zían le gula'gu'i gula'záquë'ë.

7 Guchë'ë légaquië' tu la' nöza tsahui',  
 en guchë'ë légaquië' tu lu yödzö ga tsöjcu'ë.

8 Ral-la' ilë' Xanru': "Xclenu" tu' nadxí'inë' légaquië',  
 en tu' benë' yugu' le zxön, gúcalenë' légaquië'.

9 Rugui'jë' nupa ta'bidxi ladxi',  
 en rugahuë' nupa ta'dún le nácgaca dxi'a queë'.

10 Bal-lë' gula'cu'ë ga chul-la, en ga zoa bönadxi ilátië'.  
 Gula'dzunë' yugu' lu du guié, en gula'gu'i gula'záquë'ë  
 11 tu' gula'dá'baguë'ë xtídzë'ë Xanru' Dios,  
 en bulu'zóë' tsölá'alö le rigu'ë icja ládxi'do'gaquië'.  
 12 Tu' gulunë' bayúdx dxin, gudú ládxi'gaquië'.  
 Gula'dzö'ë lu yu zcan yua' nuá'agaquië',  
 ate' cuntu nu zoa gácalen légaquië'.

13 Ní'irö lu lë na' raca quégaquië' bulu'lidzë' Xanru',  
 ate' busölë' légaquië' lu zían le gula'gu'i gula'záquë'ë.

14 Bubéajë' légaquië' ga na' gula'cu'ë ga chul-la,  
 en ga guzóa bönadxi ilátië',  
 ate' gudítsjë' yugu' du guié núga'gaquië'.

15 Ral-la' ilë' Xanru': "Xclenu" tu' nadxí'inë' légaquië',  
 en tu' benë' yugu' le zxön, gúcalenë' légaquië'.

16 Ruquínnejë' le tá'baga' gapa nu riyaza lidxi guié le néquiniguequi guié  
 bronze,  
 en ruzxuzxjë' yugu' vara néquiniguequi guié.

17 Bal-lë' gula'gu'i gula'záquë'ë tu' gula'dá'baguë'ë Dios,  
 en tu' nözi dö' gulu'ë.

18 Gula'gúti'në' bíti'tës la' huagu,  
 en gula'zóa ilátië'.

19 Ní'irö lu lë na' raca quégaquië' bulu'lidzë' Xanru',  
 ate' busölë' légaquië' lu zían le gula'gu'i gula'záquë'ë.

20 Gusöl-lë'ë quégaquië' xtídzë'ë, en bunë' légaquië',  
en busölë' légaquië' lu yöl-la' guti.

21 Ral-la' ilë' Xanru': "Xclenu" tu' nadxí'inë' légaquië',  
en tu' benë' yugu' le zxön, gúcalenë' légaquië'.

22 Ral-la' ilë' Dios: "Xclenu", en bi ulu'nódzjë' queë',  
en lu yöl-la' rudzeja quégaquië' ilul-lë' ca nácgaca le nunë'.

23 Bal-lë' gula'dödë' lahui nísado' yugu' lu barco zxön,  
en gulunë' dxin yugu' lu nísado'.

24 Bila'lë'enë' yugu' le nunë' Xanru',  
en yugu' le zxön nucu'ë lu nísado'.

25 Bë'ësë' didza', ate' guyecja bö' budunu',  
ate' guyasa gudxía nísado'.

26 Gula'yasa barco ca tu lu gu'ado' nisa,  
en la' bótjatë ga rö'ö röga' lu nisa na'.  
Tu' guzóale'ë bönadxi ilátië' gudú ládxi'gaquië'.

27 Gula'zxízië', en yøjchégu'gaquië' ca bönni' ta'zúdxinë',  
ate' nítisö guca yöl-la' rácada' quégaquië'.

28 Ní'irö lu lë na' raca quégaquië' bulu'lidzë' Xanru',  
ate' busölë' légaquië' lu zían le gula'gu'i gula'záquë'ë.

29 Benë' Dios ga guzóa dxisö bö' budunu' na' recja,  
ate' guzóa dxi le rasa ridxía lu nísado'.

30 Bulu'dzëjanë' tu' guzóa dxi lu nísado',  
en tu' guchë'ë Dios légaquië' dxi'a tsáhui'do' ga na' sójáquië'.

31 Ral-la' ilë' Xanru': "Xclenu" tu' nadxí'inë' légaquië',  
en tu' benë' yugu' le zxön, gúcalenë' légaquië'.

32 Ral-la' ulu'lu'ë lahui yöl-la' zxön queë' ga nudúbigaca bönachi queë',  
en ila'gu'ë Lë' yöl-la' ba ga nudúbigaquië' bönni' gula tu'chi'a tu'söröë'.

33 Runë' Xanru' Dios ga tu'hu'i dërö yugu' yegu,  
enca' yugu' beaj nisa.

34 Ga naca yu ya'a runë' ga ruhuóaca yu bidxi,  
ni'a que le xihui' nabága'gaca nupa nacua' ni'.

35 Ga naca yu bidxi runë' ga ruhuóaca yu nabisa,  
ate' ralaj nisa ga biti' bi nisa guzóa.

36 Ni' ru'ë lataj ila'cuá' nupa ta'dún  
para ilunë' ni' yödzö ga ila'cu'ë.

37 Tazë' yugu' le tazë', en tu'dë'ë yugu' lubá uva,  
yugu' le ta'bía yödxí yana'.

38 Runë' Xanru' ga raca dxi'a quégaquië',  
en ga ta'cuá'bi' zíanbi' bi'i quégaquië',  
en runë' ga ta'yanba' böa' bëdxi quégaquië'.

39 Cate' yugu' bönni' unná bë' zi'tu' tu'zxicjë' bönachi queë',  
en tu'zötjë' léguequi,

en tu'saca' zi'ë léguequi, en tu'ë dö' quéguequi,

40 rucá'anë' Dios bönni' na' dë lu ná'agaquië' cá'asö,



en runë' ga ta'dë' la' guixi' ga dë lataj, en tu luyú bidxi.

<sup>41</sup> Rusölë' yugu' bönni' yechi' lu le ta'guí' ta'záquë'ë,

en runë' ga ta'yanbi' xzi'inigaquië' ca ta'yanba' bö'cu' xzila'do'.

<sup>42</sup> Ta'lé'e lë ni nupa nácagaca tsahui', en tu'dzeja,

pero biti' bi ta'nná nupa tuá' dö'.

<sup>43</sup> Nupa ta'yéajni'i ral-la' sa' ládxi'gaca ca nácagaca lë ni,

ate' iléquibe'e náquië' Xanru' Dios dxi'i ladxi'.

## 108

<sup>1</sup> ¡Chinabá'a quia', Dios!

¡Gul-la' quiu'! ¡Ön, idú ládxa'a gul-la' yöl-la' ba quiu'!

<sup>2</sup> ¡Guli'bán, libí'ili' riguínali' bihuël-la!

¡Gúl-laru' cate' ni' ritó yu!

<sup>3</sup> ¡Guía' Li': "Xclenu" Xan, ládjagaca bönachi yugu' yödzö izá'a!

¡Gul-la' yöl-la' ba quiu' lógaca yúgu'të bönachi!

<sup>4</sup> ¡Zxöntëro naca yöl-la' dxi'i ladxi' quiu', le ridxintë lúzxiba xitsá'!

<sup>5</sup> Buluí'i lahui lúzxiba yöl-la' zxön quiu', Dios,

ate' lahui yödzölió ni buluí'i lahui yöl-la' bení' quiu',

<sup>6</sup> para usöló' netu', bönachi quiu', nupa nadxí'inu'.

Len yöl-la' huáca zxön quiu' busölá netu', en bubí'i didza'.

<sup>7</sup> Lu lataj lá'ayi queë' bë'ë didza' Dios, gunnë':

"Uzi'a xibé, en quísia' xiyúgaca bönachi Siquem,

en urixa' luyú dë cuiti yegu Sucot.

<sup>8</sup> Nequi quia' xiyúgaca bönachi Galaad,

enca' xiyúgaca xzi'ini xi'sóë' Manasés.

Naca ca tu le rusubín icja' xiyúgaca xzi'ini xi'sóë' Efraín.

Naca ga rinná bë'a xiyúgaca xzi'ini xi'sóë' Judá.

<sup>9</sup> Naca ca tu ga riguibi na'a xiyúgaca bönachi Moab,

ate' lu xiyúgaca bönachi Edom chú'una' löla'.

Cödxí'a tu' uxicja' bönachi Filistea."

<sup>10</sup> ¿Nuzxi caz gaca ichë' neda' lu yödzö

dë zö'ö idú gásibi'ilö le run chi'i yödzö na'?

¿Nuzxi caz gaca ichë' neda' lu xiyúgaca bönachi Edom?

<sup>11</sup> ¿Naru' cabí nusán ládxi'u netu', Dios?

¿Naru' cabí tséajlenu' bönni' queëtu' röjáquië' gudil-la?

<sup>12</sup> Gúcalen netu' cate' tíl-lalentu' nupa dutíl-lalen netu',

tu' naca dádusö gácalen netu' nu naca bönáchisö.

<sup>13</sup> Len yöl-la' huáca queë' Dios idéli'ru'

tu' uxicja cazë' Lë' nupa ta'díl-lalen rë'u.

## 109

<sup>1</sup> Rigu'a Li' yöl-la' ba, Xana' Dios.

Biti' su' dxisö,

<sup>2</sup> tu' ta'nná quia' nupa tuá' dö', en ta'zí' yë'.

Lu yöl-la' rizí' yë' quéguequi tuí' didza' le tu'zegui' neda'.

<sup>3</sup> Nagú'ugaca neda' lé'ajlò,

en lu yöl-la' biti' rilé'e neda' dxi'a tuí'tica'sö didza'.

4 Sal-la' nadxí'ida' léguequi, tu'zegui' neda' didza',  
pero neda' rulidza' Li'.

5 Bena' quéguequi le naca dxi'a, pero bulu'bí'i quia' le naca dö'.  
Nadxí'ida' léguequi, pero biti' ta'lé'e neda' dxi'a.

6 Buzóa tu bönni' huía' dö'  
para uchi'a usöröë' que nu na' biti' rilé'e neda' dxi'a.  
Ben ga soa gagu nu uzegui' nu na' didza'.

7 Cate' nu uchi'a usörö bönni' na', biti' gu'u lataj urúajë' dxi'a.  
Buyú le rinábinë' Li' tsca naca dul-la' nabáguë'ë.

8 Ben ga ilaca nabábasö dza soë' ibanë'.  
Ben ga tsu'u nu yúbölö uláz queë'.

9 Ben ga ilácabi' zxi'inë' bi'i uzëbi,  
en ga gácanu nigula queë' nigula uzëbi.

10 Ben ga ila'dásöbi' zxi'inë' ila'nábibi' nu bi unödzej quégacabi'.  
Ben ga ila'guíljabi' le ilágubi' zi'tu' ga zoa lídxigacabi' le nadachi.

11 Ben ga ugúa nu bi benna lë' tu chí'sö idütë le dë queë',  
en ben ga ila'banë' bönni' zi'tu' le rulá dxin runë'.

12 Ben ga biti' soa nu huéchi' ladxi' lë',  
en biti' soa nu uzá' ladxi' quégacabi' zxi'inë' nácagacabi' bi'i uzëbi.

13 Ben ga udxí' quégaca zxi'ini xi'sóë',  
en ga idxín dza bíti'rö soa nu si' la ca guzxi' lë'.

14 Yöjnética'sö le xihui' gula'báguë'ë xuz xtá'ahuë', Xan,  
en biti' gal-la ládxi'u dul-la' bennu xinë'ë.

15 Ben ga ila'cuá'tica'sö dul-la' na' lo' Li', Xan,  
para cabirö nu soa yödzölió nu tsöjné lë'.

16 Biti' buéchi' ládxi'ë luzë'ë,  
pero gudxía nahuë' nupa gula'guí'i gula'zaca',  
en nupa gula'yadzaj gula'yudxi,  
enca' nupa gula'sébi ladxi', ate' bëtië' léguequi.

17 Bidxí'inë' le rudxía luzë'ë dö'.  
Ben ga ulu'bí'i ca' queë'.

Biti' raza ládxi'ë gaca dxi'a que luzë'ë.  
Ben ga biti' gaca dxi'a queë'.

18 Gulaca ca zxë' nácuë' didza' xihui' bë'ë,  
ate' gula'yaza le nayá' nabanë' ca nisa,  
en gula'yú'u ca' dxita queë' ca le za.

19 Ben ga ilaca queë' ca tu lari' rixóa cúdzë'ë,  
en ca xipanë' rúgui'ë lë'ë.

20 Bubí'i caní quégaca nupa tu'zegui' neda' didza', Xan,  
enca' quégaca nupa tu'i didza' zi' que bö' naca caza'.

21 Li', Xana' Dios, ben quia' le naca dxi'a  
para gaca bë' runu' ca rnna xtídz'u.  
Tu' naca dxi'a yöl-la' dxi'i ladxi' quiu', busölá neda'.

22 Riguí'i rizáca'a, en riyadzaj riyúdxida',  
en raca zi' ládxi'da'ahua'.

23 Ridödi quia' ca raca que tu zxul-la cate' ribía gubidza.  
Naca' ca tuba' böchi'zu, richë' bö' recja lëba'.

24 Ta'cuidi' zxi'ba' tu' runa' gubasa.

Nadxita', en bíti'rö rö'ö za lu bëla' rön quia'.

25 Nupa biti' ta'lé'e neda' dxi'a tu'titaj neda'.

Cate' ta'lé'e neda', tu'tá ícjaguequi.

<sup>26</sup> Gúcalen neda', Xana' Dios.

Lu yöl-la' dxi'i ladxi' quiu' busölá neda'.

<sup>27</sup> Ben ga iléquibe'e rácalen cazu' neda'.

Nun cazu' Li' lè ni, Xan.

<sup>28</sup> Tu'dxía neda' dö', pero Li', ben ga gaca dxi'a quia'.

Cate' ila'yasë', ulu'tuí'inë',  
pero udzëjada' neda', huen dxin quiu'.

<sup>29</sup> Ben ga ulu'gá'ana cá'asö nupa tu'zegui' neda' didza',  
en ben ga gaca yöl-la' rutuí' quéguequi ca tu lari' nabaga' léguequi.

<sup>30</sup> Len ruá' cuina', zían luzuí guía'-në' Xanru': "Xclenu",  
en ladaj bönachi zían cu'a Lë' yöl-la' ba,

<sup>31</sup> tu' zuínë' cuita lë'e ibëla nu riyadzaj riyudxi  
para usölë' nu na' lu ná'agaca nupa tu'siúdxí bö' naca caz nu na'.

## 110

<sup>1</sup> Xanru' Dios gudxë' Xana': "Gurö'i cuita lë'a ibëla  
cate' gunra' ga ulu'zechu zxíbigaca lo'  
nupa biti' ta'lé'e Li' dxi'a."

<sup>2</sup> Ga zoë' yödzo Sión gusöl-lë'ë Xanru' yöl-la' unná bë' quiu',  
gunné': "Gunná be'e nupa biti' ta'lé'e Li' dxi'a."

<sup>3</sup> Ulu'dödi cuínguequi lu no'o bönachi quiu'  
cate' si'u yöl-la' unná bë' quiu'  
tu' napu' yöl-la' lachi que le naca lá'ayi."

Ila'cuá' bi'i bönni' ga zu' ca ribö'ö buzén zílado'.

<sup>4</sup> Runë' tsutsu xtídzë'ë Xanru', en biti' utsë'ë le, rnnë':  
"Tsaz nacu' bixúz ca na' gúquië' Melquisedec bixúz."

<sup>5</sup> Zoa cazë' Xanru' cuita lë'u ibëla.  
Ucul-lë' bönni' ta'nná bë'ë cate' idxín dza usiúdxë' luyú.

<sup>6</sup> Uchi'a usöröë' quégaca bönachi yúgu'të yödzö izá'a,  
ate' ilí yödzoilió len bëla' rön quéguequi.

Uzötjë' nupa ta'nná bë' zían lu yödzö izá'a.

<sup>7</sup> Guí'jë' nisa beaj ra' nöza,  
en ni'a que lë ni huöáca ládxe'ë.

## 111

<sup>1</sup> ¡Guli'cu'ë yöl-la' ba Xanru'!

Idú ládxa'a rea'-në' Xanru': "Xclenu'."

Runa' caní tsaxzön len bönni' tsahui' zían ga na' nudúbigaca bönachi queë'.

<sup>2</sup> Zxön náca'gaca le nunë' Xanru'.

Yúgu'të nupa ta'yaza ládxi'gaca lë na' benë' tu'sëda ca náca'gaca.

<sup>3</sup> Idütë dxi'a náca'gaca, en nayëpisetë'rogaca le nunë' Lë',  
ate' idiá'tica'sö le naca tsahui' queë'.

<sup>4</sup> Chinunë' ga tsöjneru' yugu' le benë', le tun ga rubániru'.

Náquië' Xanru' dxi'i ladxi', en ruí'i ládxe'ë rë'u.

<sup>5</sup> Rugahuë' nupa tadxi Lë'.

Röjnetica'së' didza' dzaga núnlenë' bönachi queë'.

<sup>6</sup> Buzëajni'inë' bönachi queë' ca naca yöl-la' huáca quégaca le nunë',  
le benë' ga gula'déli'në' xiyúgaca bönachi izá'a.

<sup>7</sup> Tsahui', en idütë li náca'gaca le núngaca lu në'ë.

Nácagaca tsutsu yúgu'të xibá gunná bē'ë.

<sup>8</sup> Rucúa'tica'së' tsutsu xibá queë',  
en rusudxinë' léguequi lu le naca idútë li, en le naca tsahui'.

<sup>9</sup> Gusöl-lë'ë Nu buá'uö bönachi queë'.

Tsaz nuzóë' didza' dzaga nunë'.

Lá'ayi, en ba'a ladxí' naca Lë'.

<sup>10</sup> Lu yöl-la' radxi queëru' Lë' risí loru' ridéli'ru' yöl-la' réajni'i.

Yúgu'të nupa tun ca ta'nná bē' xibá queë' nápagaca yöl-la' réajni'i.

Ila'cuá'tica'sö nupa ila'gú'u Lë' yöl-la' ba.

## 112

<sup>1</sup> ¡Guli'cu'ë yöl-la' ba Xanru'!

¡Bica' ba bönni' na' rádxinë' Xanru',

bönni' na' raza ládxë'ë runë' ca gunná bē'ë Dios!

<sup>2</sup> Tsépisëgaca xzí'ini xi'sóë' bönni' na' yödzöliö ni.

Gáquië' bica' ba bönni' na' runë' le naca dxi'a.

<sup>3</sup> Lu yu'u lidxë' gata' yöl-la' tsahui',

ate' idía'tica'sö le naca tsahui' runë'.

<sup>4</sup> Gulén bení' ga ridë' bönni' tsahui' ga na' naca chul-la.

Ruzá' ládxë'ë que luzë'ë, en ruí'í ládxë'ë lë', en runë' le naca dxi'a.

<sup>5</sup> Gaca dxi'a queë' bönni' ruzá' ládxë'ë que luzë'ë,

en runnë' que tu chí'sö le riyadzaj que.

Urúajë' dxi'a cate' nu uchi'a usörö queë'.

<sup>6</sup> Catu caz gaca nu utsá' bönni' na',

ate' sóatica'sö nu tsöjnë lë'.

<sup>7</sup> Biti' gádxinë' cate' nu usiyöni lë' le cabí' raca dxi'a.

Ridipa ládxë'ë tu' ruzxöni ládxë'ë Xanru' Dios.

<sup>8</sup> Dios rutipë' ládxë'ë, ate' bití' gádxinë'

cate' idxinrö dza ilé'enë' nuhuótjagaca nupa ta'díl-lalen lë'.

<sup>9</sup> Idú ládxë'ë runödzejë' quégaca bönachi yechi'.

Idía'tica'sö le naca dxi'a runë'.

Dios uchi'së' lë' ga tsépisë'.

<sup>10</sup> Ila'lé'e lë' ni nupa tuá' dö', en ila'bö' baguí'sö.

Ilagu zxe láyi'gaca, en ila'niti cuínguequi.

Tsaz initi le ta'zë' ladxí'gaca nupa tuá' dö'.

## 113

<sup>1</sup> ¡Guli'cu'ë yöl-la' ba Xanru'!

¡Guli'cu'ë yöl-la' ba, libí'ili' huen dxin queë' Xanru'!

¡Guli'cú'u yöl-la' ba Lë' Xanru'!

<sup>2</sup> ¡Cú'uru' yöl-la' ba Lë' Xanru',

cate' risí lo na'a, en yugu' iz sí' zaca!

<sup>3</sup> ¡Ga naguela' ga rilén gubidza ga ridxintë ga ribía,

cú'uru' yöl-la' ba Lë' Xanru'!

<sup>4</sup> ¡Nayëpisëtëre' Xanru' Dios ca yúgu'të yödzö izá'a!

¡Nazxöntëre' yöl-la' zxön queë' ca naca lúzxiba!

<sup>5</sup> ¿Nuzxi caz zoa naca ca náquië' Xanru' Dios?

Rö'ë rinná bē'ë ga na' nayëpisëtëre'.

6 Ruzötaj cuinë' para uyüé'

le dë lúzxiba, en le dë luyú ni.

7 Ruchisë' nupa nácagaca yechi', rubéajë' léguequi lu bëchtö yu.

Ruchisë' nupa ta'yadzaj, rubéajë' léguequi lu dö bëbu.

8 Runë' ga ta'bö'len nupa ta'nná bë'.

Ta'bö'len nupa ta'nná be'e bönachi queë'.

9 Runë' ga zóanu nigula huödx yu'u lídxinu.

Rudzeja ládxi'nu tu' runë' ga nacuá'abi' zxf'ininu.

¡Guli'cu'ë yöl-la' ba Xanru'!

## 114

1 Cate' bila'rúaj bönachi Israel luyú Egipto

bila'rúajë' zxi'ini xi'sóë' Judá ladaj nupa tufi' didza' izá'a.

2 Zxi'ini xi'sóë' Judá guláquië' ca lidxë' Xanru' Dios,

ate' gulaca bönachi Israel nupa rinná bé'enë' Dios.

3 Lahuë' Dios bubiga' nísado',

ate' bubí'i nisa yegu Jordán.

4 Gula'xiti' guí'a zxön ca yugu' bö'cu' zxila' biguiú',

ate' gula'xiti' ca' guí'ado' ca yugu' bö'cu' zxila'do'.

5 ¿Bi raca quiu', nísado', tu' rubigu'?

¿Bi raca quiu', yegu Jordán, tu' rubí'i nisa quiu'?

6 ¿Bi raca queëli', guí'a zxön, tu' rixíti'li' ca yugu' bö'cu' zxila' biguiú'?

¿Bi raca queëli', guí'ado', tu' rixíti'li' ca yugu' bö'cu' zxila'do'?

7 Guzxizi lahuë' Xanru', yödzölió.

Guxxizi lahuë' Dios queë' Jacob.

8 Benë' Dios ga gulaj nisa tu' lë'e guiöjto'o,

en benë' ga böáca le guca guiöj jara tu' ga rilén nisa.

## 115

1 Calëga queëtu', Xan, calëga queëtu',

pero que lo' gaca yöl-la' ba

tu' nacu' dxi'i ladxi', en le naca idútë li.

2 ¿Bizx que ta'nná bönachi yugu' yödzö izá'a:

“Gazxi caz zoë' Dios quégaquië”?

3 Zoë' Dios queëru' yehua' yubá.

Runë' le raza ládxe'ë gunë'.

4 Néquiquequini plata, en oro budó' quégaca bönachi izá'a na',

yugu' le núngaca lu ni'a lu na' bönachi.

5 Nacuá' ruí'iguequi, pero biti' gaca iluf'i didza'.

Nacuá' guiöj lógaca, pero biti' gaca ila'lë'e.

6 Nacuá' nágagaca, pero biti' gaca ila'yöni.

Nacuá' zxiniguequi, pero biti' gaca ila'lë'e.

7 Nacuá' ná'agaca, pero biti' bi gaca ila'gán.

Nacuá' ní'agaca, pero biti' gaca ila'zá'.

Biti' gaca ilún bö lubá'agaca.

8 Nupa tun budó' guiöj budó' yaga ilaca ca nácagaca budó' na',

núti'tës nu ruzxöni ladxi' budó' guiöj budó' yaga.

9 Libí'ili', bönachi Israel, buli'zxöni ládxë'ë Xanru' Dios.  
Rácalen cazë libí'ili', en rapa chi'ë libí'ili'.

10 Libí'ili', zxi'ini xi'sóë Aarón, buli'zxöni ládxë'ë Xanru' Dios.  
Rácalen cazë libí'ili', en rapa chi'ë libí'ili'.

11 Libí'ili' na' rádxi'li'-në' Dios, buli'zxöni ládxë'ë Xanru' Dios.  
Rácalen cazë libí'ili', en rapa chi'ë libí'ili'.

12 Xanru' Dios ruí'i ládxë'ë rë'u, en gunë' ga gaca dxi'a queëru'.  
Gunë' ga gaca dxi'a quégaca bönachi Israel.

Gunë' ga gaca dxi'a quégaca zxi'ini xi'sóë Aarón.

13 Gunë' ga gaca dxi'a quégaca nupa tadxi Lë',  
nupa na' nácagaca cá'asö, en nupa na' nayëpiseégaca.

14 Gunë' Xanru' Dios ga tsan le nequi queëli',  
lë na' nequi queëli', en le nequi quégaca zxi'inili'.

15 Raca ládxa'a gunë' Xanru' ga gaca dxi'a queëli'.  
Náquië' Nu ben lúxiba, en luyú ni.

16 Nequi queë' Xanru' Dios lúxiba xitsá',  
pero nudödë' lu ná'agaca bönachi luyú ni.

17 Nupa chinátigaca bití' gaca ila'gú'u Xanru' yöl-la' ba,  
en calëga nupa nacuá' dxisö lataj chul-la que yöl-la' guti.

18 ¡Cú'uru' yöl-la' ba Xanru' Dios  
na'a dza, en yúgu'të dza si' zaca!

¡Guli'cu'ë Xanru' yöl-la' ba!

## 116

1 Nadxí'ida'-në' Xanru' Dios, tu' riyönnë'  
le rulidza' Lë', en le rinábida'-në'.

2 Ruzë' naguë' chi'a.

Que lë ni na' ulidza' Lë' tsanni ni zoa' nabana'.

3 Guzóa bönadxi quia' gátia',  
en guyu'a tsöbi que lataj chul-la que yöl-la' guti,  
ate' gusëbi ládxa'a, en buí'inide'eda' ládxa'a.

4 Ní'irö bulidza'-në' Xanru' Dios, gunnía':  
"Ráta'yua' lo', Xan, usöló' neda'."

5 Xanru' Dios ruzá' ládxë'ë queëru', en náquië' tsahui'.  
Dios queëru' ruí'i ládxë'ë rë'u.

6 Rapa chi'ë Xanru' nupa nácagaca do' ladxi'.  
Bulu'xicja bönachi neda', ate' busólë' neda'.

7 Buzí' ladxi' bö' naca caza',  
tu' runë' Xanru' Dios ga raca dxi'a quia'.

8 Busöló' bö' naca caza', Xan, lu yöl-la' guti.  
Benu' ga buí'i nisa ribödxi guiöj lahua',  
en ga bíti'rö cuílagaca ni'a.

9 Ta'a lahuë' Xanru' Dios  
ga nacuá' nupa nabángaca.

10 Guyéajlé'a Lë' cate' gunnía':

"Zoa le rusaca' neda' zi'."

11 Lu yöl-la' rô' böniga quia' gunnía':

“Ta’zì’ yè’ yúgu’tè bönachi.”

<sup>12</sup> ¿Bizxi caz gu’a-nè’ Xanru’ Dios

ni’a que yugu’ le runè’ le ruzi’a xibé?

<sup>13</sup> Si’ lu na’a yöl-la’ rusölä queè’ Xanru’,  
en ulidza’-nè’ Xanru’ Dios.

<sup>14</sup> Unödza’ queè’ Xanru’ le guzxí’ lu na’a unödza’.

Raca ládxa’a gaca guna’ caní lógaca yúgu’tè bönachi queè’.

<sup>15</sup> Rúndè’è Xanru’ bal

yöl-la’ guti quégaca nupa néquiquequi quez queè’.

<sup>16</sup> Le nácatè naca’ huen dxin quiu’, Xan.

Naca’ huen dxin quiu’, enca’ zxi’ininu nigula huen dxin quiu’.

Busedxu’ le biröli neda’.

<sup>17</sup> Cu’a lo’ le unödza’ quiu’, en guía’ Li’: “Xclenu”,  
en ulidza’ Li’, Xan.

<sup>18</sup> Unödza’ queè’ Xanru’ le guzxí’ lu na’a unödza’.

Raca ládxa’a gaca guna’ caní lógaca yúgu’tè bönachi queè’.

<sup>19</sup> Ga zoa lö’a que yu’u lidxè’ Xanru’,

lu yödzo Jerusalén guna’ caní.

¡Guli’cu’è yöl-la’ ba Xanru’ Dios!

## 117

<sup>1</sup> ¡Guli’cu’è yöl-la’ ba Xanru’ Dios, libí’ili’, bönachi yúgu’tè yödzo izá’a!

¡Guli’cu’è yöl-la’ ba yúgu’tèli’,

<sup>2</sup> tu’ buxönè’ queèru’ yöl-la’ dxi’i ladxi’ queè’,  
en zóatica’sö le naca idú ladxi’ queè’!

¡Yöl-la’ ba Lè’!

## 118

<sup>1</sup> ¡Guli’guié’ Xanru’: “Xclenu”, tu’ náquié’ dxi’a!

¡Zóatica’sö yöl-la’ dxi’i ladxi’ queè’!

<sup>2</sup> Ral-la’ ila’nná bönachi Israel:

“¡Zóatica’sö yöl-la’ dxi’i ladxi’ queè’!”

<sup>3</sup> Ral-la’ ila’nná zxi’ini xi’sóè’ Aarón:

“¡Zóatica’sö yöl-la’ dxi’i ladxi’ queè’!”

<sup>4</sup> Ral-la’ ila’nná nupa tadxi Xanru’ Dios:

“¡Zóatica’sö yöl-la’ dxi’i ladxi’ queè’!”

<sup>5</sup> Cate’ gudí’i guzxáca’a bulidza’-nè’ Xanru’,

ate’ bubí’è didza’, en busölé’ neda’.

<sup>6</sup> Zoè’ Xanru’ cuita’ neda’, ate’ bití’ bi gádxida’.

¿Bizxi caz gaca ilún bönachi quía’?

<sup>7</sup> Zoè’ Xanru’ cuita’ neda’ ladaj nupa tácalen neda’.

Que lè ni na’ idéli’da’ láhuigaca nupa bití’ ta’lé’e neda’ dxi’a.

<sup>8</sup> Nácarö dxi’a uzxöni ládxa’a-nè’ Xanru’,

en bití' uzxöni ládxa'a nu naca bönáchisö.

<sup>9</sup> Nácáro dxi'a uzxöni ládxa'a-në' Xanru',  
en bití' uzxöni ládxa'a nupa ta'nná bë'.

<sup>10</sup> Bönachi yúgu'të yödzö izá'a gula'gú'u neda' lé'ajlö.  
Len yöl-la' huáca queë' Xanru' buxicja' léguequi.

<sup>11</sup> Gula'gu'ë neda' lé'ajlö. Ön, gula'gu'ë neda' lé'ajlö,  
pero len yöl-la' huáca queë' Xanru' buxicja' léguequi.

<sup>12</sup> Gula'gu'ë neda' lé'ajlö ca yugu' buzú' rön,  
pero gula'nítië' ca tu lu guí' guixi' yötsi' bidx.  
Len yöl-la' huáca queë' Xanru' buxicja' léguequi.

<sup>13</sup> Bulu'dxíguë'ë neda' ga bidxintë guzóa tsöjtsö'a,  
pero gúcalenë' Xanru' neda'.

<sup>14</sup> Naca cazë' Xanru' yöl-la' huáca quia', en le rul-la'.  
Naca cazë' yöl-la' rusölá quia'.

<sup>15</sup> Lu yu'u lídxigaca nupa nácagaca tsahui'  
ru'u bö que nupa ta'bódxí'a lu yöl-la' rudzeja quéguequi tu' nulágaca.

¡Runda' dxin në'ë ibëla Xanru'!

<sup>16</sup> ¡Nayëpisëtëro në'ë ibëla Xanru'!

¡Runda' dxin në'ë ibëla Xanru'!

<sup>17</sup> Bití' ca' gátia', pero soa' ibana',  
ate' usiyönda' bönachi le nunë' Xanru'.

<sup>18</sup> Xanru' bëndë'ë neda' xigua',  
pero bití' budödë' neda' lu yöl-la' guti.

<sup>19</sup> Guli'salaj quia' ga ta'yazë' bönni' tsahui'.

Tsu'a ni', en guía'-në' Xanru': "Xclenu'."

<sup>20</sup> Naca lataj ni ga riyaza cazë' Xanru' Dios.

Ila'yazë' ni bönni' tsahui'.

<sup>21</sup> ¡Guía' Li': "Xclenu'" Xan, tu' bubí'u didza' quia',  
en tu' nacu' Nu rusölá neda'!

<sup>22</sup> Zoa tu guiój bulu'zóë' tsölá'alö bönni' tu'cu'ë zö'ö.  
Na'a naca guiój na' guiój len squin zö'ö.

<sup>23</sup> Benë' Xanru' Dios ga naca caní.

Naca tu le run ga rubániru'.

<sup>24</sup> Dza ni naca dza nunë' Xanru' Dios.  
Udzéjaru', en uzí'iru' xibé.

<sup>25</sup> Ráta'yutu' lo', Xan, usöló' netu'.

Ráta'yutu' lo', Xan, gunu' ga gaca dxi'a queëtu'.

<sup>26</sup> Bica' ba bönni' na' zë'ë uláz queë' Xanru'.

Guntu' Li' zxön lu yu'u lidxë' Xanru'.

<sup>27</sup> Dios náquië' Xanru', ate' bennë' queëru' bení'.



Buli'nödzej queë Dios yugu' bēdxi renni' uzégui'ru'-ba' lahuë' lu bucugu queë'.

28 Naca cazu' Li' Dios quia', ate guía' Li': "Xclenu'."  
Naca cazu' Li' Dios quia', ate' guna' Li' zxön.

29 ¡Guli'-guië' Xanru' Dios: "Xclenu'" tu' náquië' dxi'a!  
¡Zóatica'sö yöl-la' dxi'i ladxi' queë'!

## 119

### *Le run le gunná bé'enë' Xanru' rë'u*

1 ¡Bica' ba nupa nácgaca idú dxi'a tsáhui'do',  
nupa na' tun ca rnna xibá naguixjé' Xanru'!

2 ¡Bica' ba nupa tun ca nácgaca le benë' ba nalí,  
en idú lādxi'gaca ta'zë ladxi' Lë'!

3 Biti' bi le cabí naca tsahui' tun,  
pero tun ca nácgaca le nulu'ë lahui.

4 Nuzú' queëtu' xibá quiu', Xan,  
para idú lādxi'tu' guntu' ca ta'nná.

5 Raca lādxa'a gúntica'sa' ca ral-la' guna',  
en guna' yugu' le gunná bē'u.

6 Ní'irö bití' ca' utuí'ida'  
channö gapa chí'a yugu' le gunná bē'u.

7 Lu yöl-la' ba'a ladxi' quia' guía' Li': "Xclenu'"  
cate' chinazi'a le buchí'a busöröu' le naca tsahui'.

8 Guna' ca ta'nná le gunná bē'u.  
Biti' usán no'o neda' tsaz.

### *Ral-la' gunru' ca gunné' Dios*

9 ¿Nacxi gaca gunbi' tu bi'i bönni' ga ugá'ana tsahui' lādxi'do'obi'?  
Ral-la' gunbi' ca rnna xtídz'u.

10 Idú lādxa'a rizé lādxa'a Li', Xan.  
Biti' gu'u lataj ucá'ana' yugu' le gunná bē'u.

11 Lu icja lādxi'da'ahua' runa' ca rnna xtídz'u,  
para cabí guna' dul-la' lo' Li'.

12 ¡Bica' xibó', Xan!  
Busedi neda' yugu' le gunná bē'u.

13 Len ruá' cuina' ru'a didza'  
ca nácgaca yúgu'të le rusedi quézinu' netu'.

14 Rudzējada' ca nácgaca le nunu' ba nalí  
ca nu rudzeja tu' dë yöl-la' tsahui' que.

15 Sa' lādxa'a ca nácgaca xibá quiu'  
en gü'i lādxa'a yugu' le nulú'u lahui.

16 Udzējada' ca nácgaca le gunná bē'u.  
Biti' gal-la lādxa'a xtídz'u.

### *Rudzėjade'eru' runru' le rnna cazë' Dios*

17 Ben ga gaca dxi'a quia' neda', huen dxin quiu', Xan,  
para soa' ibana', en guna' ca rnna xtídz'u.

18 Gusalaj guiöj lahua' para gaca ilé'eda'  
le tun ga rubánitu' nazúajgaca lu xibá naguixju' Li'.

19 Zoa' yödzölió ca tu bönni' ridasö.

Biti' ucachu'u yugu' xibá nunu' ga bití' gaca ilé'eda' léguequi.

<sup>20</sup> Yúgu'tè dza ruhuí'ini ládxa'a tu' rizé ládxa'a yugu' le nusédinu' netu' ca ral-la' guntu'.

<sup>21</sup> Ruzenu' le bach nupa tun ba zxôn cuínguequi, en nupa nudxiágaca dö', nupa na' tu'zóa sólál'aló yugu' xibá gunná bē'u.

<sup>22</sup> Biti' gu'u lataj nu guequi neda' zi' o nu ucá'ana neda' cá'asö, tu' runa' ca ta'nná le nunu' ba nalí.

<sup>23</sup> Sal-la' ta'bö' nupa ta'nná bē', en ta'nné quia', rizá' ládxa'a neda', huen dxin quiu', ca nácagaca le gunná bē'u.

<sup>24</sup> Raza ládxa'a yugu' le nunu' ba nalí.

Nácagaca le tu'zéajni'i neda'.

*Idú ládxi'ru' gunru' ca gunná cazē' Dios*

<sup>25</sup> Nadinni lu yu bö' naca caza'.

Busubán ládxa'a, ugunu' dxin xtídz'u.

<sup>26</sup> Buluí'ida' Li' yugu' le nuna', ate' bubi'u didza'.

Busedi neda' yugu' le gunná bē'u.

<sup>27</sup> Buzéajni'i neda' ca nácagaca xibá quiu', ate' sa' ládxa'a ca nácagaca le nunu', le tun ga rubánitu'.

<sup>28</sup> Ribödxi bö' naca caza' tu' risébida' ládxa'a.

Butipa ládxa'a, ugunu' dxin xtídz'u.

<sup>29</sup> Ben ga bití' guna' le cabí sa'yéaj, en buzá' ladxi' quia' xibá naguixju' Li'.

<sup>30</sup> Guröa' le naca idútè li para guna' ca rnna.

Nuzóa' lahua' yugu' le nusédinu' netu'.

<sup>31</sup> Nazí' lu na'a yugu' le nunu' liná' lo.

Biti' gu'u lataj bi gun ga utuí'ida', Xan.

<sup>32</sup> Guna' ca ta'nná xibá gunná bē'u, tu' rutipa cazu' ládxa'a.

*Rē'ëniru' tséajni'iru' xtídzē'ë Dios*

<sup>33</sup> Busedi neda', Xan, ca ta'nná le gunná bē'u, ate' gun chí'a léguequi ga idxinrö dza udxi.

<sup>34</sup> Benna quia' yöl-la' réajni'i para gun chí'a xibá quiu', en para idú ládxa'a guna' ca ta'nná.

<sup>35</sup> Ben ga guna' ca ta'nná le gunná bē'u,

tu' raza ládxa'a guna' ca ta'nná xibá na'.

<sup>36</sup> Ben ga güí'i ládxa'a yugu' le nunu' ba nalí, para cabí güí'i ládxa'a yöl-la' ruhuidí'.

<sup>37</sup> Buchi'a guiöj lahua' para cabí uyúa' le cabí nazaca'.

Butipa ládxa'a para guna' le uluí'inu' netu'.

<sup>38</sup> Ben tsutsu didza' bē'lenu' neda', huen dxin quiu', para gádxida' Li'.

<sup>39</sup> Bucuita ga zoa' nu rudidza' yudxi neda', lē na' rádxida' tu' nácagaca dxi'a tsahui' le nusédinu' netu' ca guntu'.

<sup>40</sup> Buyútsöca', rizé ládxa'a yugu' xibá quiu'.

Busubán ládxa'a, ugunu' dxin le tsahui' quiu'.

*Ruzxöni ládxi'ru' xtídzē'ë Dios*

<sup>41</sup> Lu yöl-la' dxi'i ladxi' quiu' buyú neda', Xan, en busölá neda' ca rnna xtídz'u' u gunu'.

<sup>42</sup> Ubi'a didza' bi guía' nu run ga rutuí'ida', innía':

“Ruzxöni ládxa'a xtídzu'u”, Xan.

43 Biti' ucuítu' tsaz didza' idútë li lu ru'a tu' runa' löza yugu' le nusédinu' netu'.

44 Gúntica'sa' ca ta'nná xibá naguixju' Li' yúgu'të dza, en yúgu'të iz si' zaca.

45 Lu yöl-la' rusólá quiu' soa' ibana' tu' bë' ládxa'a guna' ca ta'nná bë' xibá quiu'.

46 Gu'a didza' que le nunu' ba nalí lógaquië' bönni' ta'nná bë'ë en biti' ca' utuí'ida'.

47 Tsaza ládxa'a yugu' xibá gunná bë'u, yugu' lë na' nadxí'ida'.

48 Guna' ca' ca ta'nná xibá nunu', lë na' së ládxa'a, en sa' ládxa'a ca nácagaca le gunná bë'u.

*Zóatica'sö xtídzë'ë Dios*

49 Yöjnë didza' na' bë'lenu' neda', huen dxin quiu', tu' benu' ga runa' löza le.

50 Didza' na' ruhué tsahui' neda' cate' riguí'i rizáca'a, tu' tu' subán ládxa'a didza' bë'u.

51 Tu' títjalë'e neda' nupa tun ba zxon cuínguequi, pero biti' ca' usana' xibá naguixju' Li'.

52 Røjneda' yugu' le busédinu' netu' dza ni'te, Xan, ate' lë na' ruhué tsahui' neda'.

53 Lu yöl-la' ridzá'a quia' rō'a böniga ni'a quégaca nupa tuá' dö', nupa na' tu' cá'ana xibá naguixju' Li'.

54 Rul-la' ca nácagaca le gunná bë'u.

Zoa' ni ca tu bönni' ridë' zi'tu'.

55 Chi' dzó'óló røjneda' Lo', Xan, en run chi'a xibá naguixju' Li'.

56 Nacuá'len neda' le ruzi'a xibé' ate' runa' ca rnna yugu' xibá quiu'.

*Raza ládxi'ru' xtídzë'ë Dios*

57 Nacu' Li', Xan, le ruzi'a xibé.

Chigunnía' guna' ca rnna xtídzu'u.

58 Idú ládxa'a inábida' Li' sóalenu' neda'.

Buéchi' ladxi' neda' ca rnna xtídzu'u gunu'.

59 Guzá' ládxa'a ca nácagaca le runa',

ate' bubí'i ládxa'a para guna' ca rnna le nunu' liná' lo.

60 Bénda'a bayúdx, en biti' gudzedá'

para guna' ca rinná bë' xibá quiu'.

61 Bönachi zían bönachi tuá' dö' gula'gú'u neda' lë'ajlō,

pero biti' gul-la ládxa'a xibá naguixju' Li'.

62 Gulahuéla riyasa', en rigú'a Li' yöl-la' ba tu' nácagaca tsahui' yugu' le nusédinu' netu'.

63 Runa' tsözxōn nupa tadxi Li',

enca' nupa tun ca rnna xibá quiu'.

64 Ridxín idútë yödzölió yöl-la' dxi'i ladxi' quiu', Xan.

Busedi neda' yugu' le gunná bë'u.

*Naca le saca' le gunná cazë' Dios*

65 Benu' quia' neda', huen dxin quiu', le naca dxi'a, ca rnna xtídzu'u gunu', Xan.

66 Busedi neda' yöl-la' réajni'i idú, en yöl-la' raca yenni',  
tu' réajlé'a yugu' xibá gunná bë'u.

67 Zí'alò cate' buzötju' neda' gudá' nanitia',  
pero na'a runa' ca rnna xtídz'u.

68 Idú dxi'a tsahui' nacu', en runu' le naca dxi'a.  
Busedi neda' yugu' le gunná bë'u.

69 Nupa tun ba zxön cuínguequi ta'zì' yë' ca naca quia',  
pero idú ládxa'a guna' ca rnna xibá quiu'.

70 Chul-la niti naca icja ládxi'do'guequi,  
pero raza ládxa'a neda' xibá naguixju' Li'.

71 Naca dxi'a buzötju' neda'  
para bizédida' yugu' le gunná bë'u.

72 Nácagacarö dxi'a quia' xibá rinná bë'u  
ca nácagaca gayuá' gayuá'sö dumí oro, en plata.

*Naca tsahui' le gunná cazë' Dios*

73 Len no'o benu' neda', en buzú' neda'.  
Buzéajni'i neda' para gúnbë'a xibá gunná bë'u.

74 Nupa tadxi Li' ila'lé'e neda', en ulu'dzeja ládxi'guequi,  
tu' runa' löza xtídz'u.

75 Nözda' naca tsahui' ca ruchi'a rusöröu' quia' neda', Xan,  
ate' lu yöl-la' li ladxi' quiu' busaca' zi'u neda'.

76 Na'a, lu yöl-la' dxi'i ladxi' quiu' buë tsahui' neda',  
ca rnna didza' chibë'lenu' neda', huen dxin quiu'.

77 Gudá duhuechi' ládxi'u neda' para soa' ibana',  
tu' raza ládxa'a xibá naguixju' Li'.

78 Ben ga ulu'tuí'i nupa tun ba zxön cuínguequi,  
tu' gula'nnë quia', en biti' bi bena' quéguequi,  
pero neda' sa' ládxa'a ca naca xibá quiu'.

79 Ral-la' udxín quia' nupa tadxi Li',  
nupa na' núnbë'gaca le nunu' ba nalí.

80 Ben ga udxín ca rnna le gunná bë'u,  
para cabí utuí'ida'.

*Runë' Dios ca rnna xtídzë'ë*

81 Rudú ládxa'a tu' riböza' yöl-la' rusölá quiu',  
pero runa' löza xtídz'u.

82 Chirequi ichul-la lahua' tu' rizëda' ládxa'a xtídz'u,  
rnnía': "¿Bátaxi huë tsau'u neda'?"

83 Caní raca tu' naxú'unida' ca tu buzudi guídi nal-la' lahui guí',  
pero catu caz gal-la ládxa'a yugu' le gunná bë'u.

84 ¿Bál-laxi dza soa' ibana' neda', huen dxin quiu'?'  
¿Bátaxi usiúdxu' nupa ta'bía no neda'?"

85 Nupa tun ba zxön cuínguequi gula'chö'öna tu yeru ga tsöjbixa',  
nupa na' biti' tun ca rnna xibá naguixju' Li'.

86 Idütë li nácagaca yúgu'të xibá gunná bë'u.  
Lu yöl-la' rizí' yë' quéguequi ta'bía no neda'.

¡Gúcalen neda'!

87 Gula'zóa ulu'sunítie' neda' lu yödzölió ni,  
pero biti' busán na'a xibá quiu'.

88 Lu yöl-la' dxi'i ladxi' quiu' busubán ládxa'a,  
para gapa chi'a le nunu' ba nalí len ruá' cuinu'.

*Réajlë'ëru' xtídzë'ë Xanru'*

89 Rulidza' Li', Xan.

Tsaz naguixju' xtídzu'u yehua' yubá.

90 Gunu' ca rnna xtídzu'u quégaca bönachi na'a dza, en yúgu'të dza si' zaca.  
Gudixaj cazu' yödzülió, ate' idia'tica'sö.

91 Ni'a que le gunná bë'u nacuá' caz yúgu'të ga ridxintë na'a dza,  
tu' tun xichinu' yúgu'të lë na'.

92 La'tu' cabí raza ládxa'a xibá naguixju' Li',  
chigunítia' lu le busaca' zi' neda'.

93 Catu caz gal-la ládxa'a yugu' xibá quiu',  
tu' busubanu' ládxa'a ni'a quéguequi.

94 Néquida' quiu'.

¡Busölá neda', tu' ruí'i ládxa'a xibá quiu'!

95 Nupa tuá' dö' ta'bö' nisi neda' para ulu'suniti neda',  
pero neda' güi'i ládxa'a le nunu' ba nalí.

96 Chibilé'eda' ruúdxí que yúgu'të le naca idütë yödzülió ni,  
pero catu caz udxi que le gunná bë'u guntu'.

*Nadxí'iru' xtídzë'ë Xanru'*

97 Nadxí'ide'eda' xibá naguixju' Li'.

Idú dza rizá' ládxa'a ca naca que.

98 Réajni'iröda' ca nupa ta'dá'baga' neda'  
tu' ruí'i ládxa'a yugu' le gunná bë'u, en tu' dá'tica'sa' léguequi.

99 Réquibe'eröda' ca yúgu'të nupa tu'sedi neda',  
tu' rizá' ládxa'a le nunu' ba nalí.

100 Réajni'iröda' ca yugu' bönni' gula,  
tu' rapa chi'a xibá quiu'.

101 Gudapa chi'i cuína' para cabí guna' le cabí naca tsahui',  
en para guna' ca rnna xtídzu'u.

102 Biti' ca' nucá'ana' yugu' le nusédinu' netu',  
le nusedi quézinu' neda'.

103 Bica' zxixi nácgaca xtídzu'u.

Ön, nácgacarö zxixi ca le zxixi que buz.

104 Tu'zéajni'i xibá quiu' neda'.

Que lë ni na' réquida' zi' yúgu'të le cabí naca.

*Xtídzë'ë Dios ruzení' lu icja ládximo'oru'*

105 Ca tu bení' naca xtídzu'u ga ridá',  
en le ruzení' nöza ga ral-la' tóda'.

106 Guzxí' lu na'a bí guna', en nuna' tsutsu xtídza'a.  
Gapa chi'a le nusédinu' netu' le naca tsahui'.

107 Zoa le rusaca' zi' neda'.  
Busubán ládxa'a, Xan, ugunu' dxin xtídzu'u.

108 Guzxí' yöl-la' ba rigu'a Li' len ru'a, Xan,  
en buzéajni'i neda' yugu' le nusédinu' netu'.

109 Zóatica'sö bönadxi gátia',  
pero biti' ral-la ládxa'a xibá naguixju' Li'.

110 Nupa tuá' dö' bulu'zé tu du yalaj le sön neda',  
pero biti' bucá'ana' xibá quiu'.

111 Tsaz nazí' lu na'a le nunu' ba nalí,  
ate' run ga rudzeja ládxa'a.

112 Ruí'i ládxa'a gúntica'sa' ca ta'nná le gunná bē'u.  
Guna' caní ga idxintē dza udxi.

*Nagá'anaru' dxi'a ni'a que xtídzē'ē Dios*

113 Réquida' zi' nupa nácagaca chopá ladxi',  
pero nadxí'ida' xibá naguixju' Li'.

114 Nacu' ca tu ga rucachi' cuina', en le run chi'i neda'.

Runa' lōza xtídzu'u.

115 Gulí'cuíta ga zoa', libí'ili' ruá'ali' dō',  
tu' guna' ca ta'nná le gunná bē'ē Xana' Dios.

116 Buzóa neda' tsutsu, ugunu' dxin xtídzu'u, ate' soa' ibana'.

Biti' gu'u lataj utuí'ida' ca naca le runa' lōza.

117 Buzóa neda' tsutsu, ate' ulá',  
en gú'ítica'sa' ládxa'a le gunná bē'u.

118 Nusán no'o yúgu'tē nupa nusángaca le gunná bē'u,  
tu' naca yöl-la' sina' quéguequi le cabí nazaca'.

119 Ugú' nupa tuá' dō' luyú ni ca nu rugúa bēbu.

Que lē ni na' nadxí'ida' le nunu' ba nalí.

120 Rixxizi idútē le nayá' nabana' tu' rádxida' Li',  
en rádxida' le gaca cate' usiúdxu' bönachi.

*Ral-la' gunru' ca rnna xtídzē'ē Dios*

121 Bena' le naca tsahui', en le naca li.

Biti' usán no'o neda' lu ná'agaca nupa tu'saca' zi' neda'.

122 Nacu' quia' neda', huen dxin quiu', le naca bē' gaca dxi'a quia'.

Biti' gu'u lataj ulu'saca' zi' neda' nupa tun ba zxon'cuínguequi.

123 Richí'guiój lahua' tu' ribōza' yöl-la' rusólá quiu',  
enca' didza' tsahui' quiu'.

124 Lu yöl-la' dxi'i ladxi' quiu' ben quia' neda', huen dxin quiu',  
ca rē'ēni quézinu' gunu'.

Busedi neda' yugu' le gunná bē'u.

125 Naca' huen dxin quiu'.

Benna quia' yöl-la' réajni'i para gaca gúnbē'a le nunu' ba nalí.

126 Chibídxín dza bi gunu', Xan,

tu' gula'guítsjē' xibá naguixju' Li'.

127 Que lē ni na' nadxí'irōda' xibá naguixju' Li' ca nadxí'ida' oro.

jÖn, ca oro banéquini,

128 en réquida' nácagacarō dxi'a xibá quiu' ca yúgu'tē le dē!

Biti' rilé'eda' dxi'a yúgu'tē le cabí naca.

*Raca ládxi'ru' gunru' ca rnna xtídzē'ē Dios*

129 Run ga rubánida' le nunu' ba nalí.

Que lē ni na' bō' naca caza' nazí' lu nē'e le.

130 Cate' nalá' lahui' xtídzu'u, ruzení' queétu'.

Run ga ta'yéajni'i nupa nácagaca nōxaj ladxi'.

131 Gusalja' ru'a, en gunné ládxa'a,

tu' guzē ládxa'a xibá gunná bē'u.

132 Buyú neda', en buzá' ladxi' quia',

ca run cazu' quégaca nupa ta'dxí'i Li'.

133 Buzóa neda' tsutsu para guna' ca rnna xtídzu'u.

Biti' gu'u lataj le naca xihui' inná be'e neda'.

134 Buá'u neda' lu na' nu rusaca' zi' neda',

para gaca guna' ca naca xibá quiu'.

135 Ben ga gaca bē' nazí' lu no'o neda', huen dxin quiu',  
en busedi neda' yugu' le gunná bē'u.

136 Raca nisa ribōdxi guiōj lahua' ca tu yegu gubó'o,  
tu' cabí tun bōnachi ca rinná bē' xibá quiu'.

*Idutē li naca le rnna cazē' Xanru'*

137 Nacu' Li' tsahui', Xan.

Dxi'a tsahui' naca le ruchi'a rusōrōu' queetu'.

138 Nugú'u lu na'tu' le nunu' ba nalí.

Naca tsahui', en tsaz zoa.

139 Tu' ribōza' le naca quiu' run ga régui rilá ládxi'da'ahua',  
ate' gulal-la ladxi' xtídz'u nupa ta'dá'baga' neda'.

140 Idú dxi'a tsahui' naca xtídz'u.

Que lē ni na' neda', huen dxin quiu', nadxí'ida' le.

141 Nōxaj ladxi' naca', ate' tu' cá'ana bōnachi neda' cá'asö,  
pero bití' ral-la ládxa'a le gunná bē'u.

142 Zóatica'sö le naca tsahui' quiu',  
en idútē li naca xibá naguixju' Li'.

143 Ba bidxín le raca quia', en le rusaca' zi' neda',  
pero raza ládxa'a xibá gunná bē'u.

144 Nácatíca'sö tsahui' le nunu' ba nalí.

Buzéajni'i neda' para soa' ibana'.

*Ral-la' ulaba ládxi'ru' le gunná cazē' Dios*

145 Idú ládxa'a rulidza' Li'.

Bubí'i didza', Xan, ate' guna' ca naca le gunná bē'u.

146 Rulídzatica'sa' Li'.

Busölá neda', ate' guna' ca naca le nunu' ba nalí.

147 Riyasa' zí'aló ca ritō yu zila, en rulidza' Li' para gácalenu' neda'.

Ribōza' yugu' didza' gu'u.

148 Chi'i dzō'ölö rubéaja' yēla guiōj lahua',  
para ulaba ládxa'a ca naca xtídz'u.

149 Lu yöl-la' dxi'i ladxi' quiu' buzē nagu' chi'a.

Busubán ládxa'a, Xan, ca naca le nusédinu' netu'.

150 Ta'biga' nupa tuá' dō' ga zoa' para ila'bía no neda'.

Nucá'anagaca xibá naguixju' Li'.

151 Zu' gala' ga zoa', Xan,

ate' idútē li naca le gunná bē'u.

152 Dza ni'te quez núnbē'a le nunu' ba nalí,

en nōzda' tsaz nuzú' le.

*Le gunná cazē' Dios run rē'u tsahui'*

153 Buyú le rusaca' zi' neda', en busölá neda',

tu' cabí ral-la ládxa'a xibá naguixju' Li'.

154 Bubí'i didza' uláz quia', en buá'u neda'.

Busubán ládxa'a ca naca xtídz'u.

155 Zí'tu' zoa yöl-la' rusölá ga nacuá' nupa tuá' dō',

tu' cabí tuí'i ládxi'gaca le gunná bē'u.

156 Zxöntērō naca yöl-la' ruhuéchi' ladxi' quiu', Xan.

Busubán ládxa'a ca naca le nusédinu' netu'.

157 Ziángaca nupa ta'bía no neda', en ta'dá'baga' neda',

pero bití' nucá'ana' le nunu' ba nalí.

158 Biti' rilé'eda' dxi'a nupa nucá'anagaca Li',  
en biti' tun ca rnna xtídz'u.

159 Buyú ca nadxí'ida' xibá quiu', Xan.

Lu yöl-la' dxi'i ladxi' quiu' busubán ládxa'a.

160 Idútë li nácagaca yúgu'të xtídz'u,

en tsaz nacuá' yúgu'të le nusédinu' netu' le nácagaca tsahui'.

*Ral-la' udödi cuinru' lu në'ë Dios*

161 Ta'bía no neda' nupa ta'nná bë', en biti' bi bena' quéguequi,  
pero runa' bal xtídz'u lu icja ládxi'da'ahua'.

162 Rudzéjalenda' xtídz'u,

ca rudzeja nu rudzöli tu yöl-la' tsahui' zxön.

163 Réquida' zi', en biti' rilé'eda' dxi'a le cabí nácaté,

pero nadxí'ida' xibá naguixju' Li'.

164 Gadxi luzuí tu dza rigu'a Li' yöl-la' ba,

ni'a que le nusédinu' netu', le naca tsahui'.

165 Ta'böza dxi'a tsáhu'i'do' nupa nadxí'igaca xibá naguixju' Li',  
en biti' bi run ga röjchégu'gaca.

166 Runa' löza yöl-la' rusölá quiu', Xan,

en runa' ca rnna xibá nunu'.

167 Yugu' le nunu' ba nalí tun chi'i bö' naca caza',

ate' nadxí'ide'eda' léguequi.

168 Runa' ca ta'nná xibá quiu', en yugu' le nunu' ba nalí

tu' rilé'e quézinu' yúgu'të le runa'.

*Rudzéjalenu' xtídzë'ë Dios*

169 Ruzé nagu' le rulidza' Li', Xan.

Ruzéajni'i neda' ca rnna xtídz'u.

170 Ruzé nagu' le rinábida' Li',

en busölá neda' ca rnna xtídz'u gunu'.

171 Bë' neda' lataj cu'a Li' yöl-la' ba,

tu' rusédinu' neda' le gunná bë'u.

172 Bë' lataj gul-la lúdxa'a ca naca xtídz'u,

tu' nácagaca tsahui' yúgu'të xibá nunu'.

173 Guzóatë gácalenu' neda',

tu' naböa' xibá quiu'.

174 Rizé ládxa'a yöl-la' rusölá quiu', Xan,

en raza ládxa'a xibá naguixju' Li'.

175 Bë' lataj soa ibán bö' naca caza' para cu'a Li' yöl-la' ba,

en ben ga gácalen neda' le nusédinu' netu'.

176 Ridöda' tsölá'alö ca tuba' bö'cu' zxila' nanítiba'.

Gudá dudilju' neda', huen dxin quiu', tu' cabí ral-la ládxa'a xibá nunu'.

## 120

1 Cate' gudí'i guxzáca'a bulidza'-në' Xanru',

ate' Lë' bubí'ë didza'.

2 Busölá bö' naca caza', Xan, lu na' nu rizí' yë',

en lu na' nu biti' run ca gunná caz.

3 ¿Bizxi gunë' quiu' Dios, en bizxi ubi'ë quiu', li' na' rizí' yë'u?

4 Ichizë' li' yugu' yaga lahui tuchi' que nu reaj gudil-la,

en cu'ë icju' bo' yalaj que ya' yörído'.

5 Bica' bayechi' neda' tu' zóasa' yödzö Mesec,



en zoa' tu lu yu'u guídi quégaca bönachi Cedar.  
 6 Xidzélë'ë chiguzóa bö' naca caza'  
 len nupa tu'suniti yöl-la' riböza dxi'a tsáhui'do'.  
 7 Ré'ënda' cöza' dxi'a tsáhui'do', pero cate' ruá'a didza'  
 té'ënné' ila'díl-lalen neda'.

## 121

1 Uchisa icja' uyúa' le raca yugu' lu guí'a.  
 ¿Gazxi za' le gácalen neda'?  
 2 Le gácalen neda' za' lu në'ë Xanru'.  
 Lë' benë' lúxiba, en luyú.  
 3 Biti' gu'ë lataj cuilu' ga ridó'.  
 Biti' ca' gasi Nu na' run chi'i li'.  
 4 Buyútsöca', bití' ridódi yëla guiöj lahuë',  
 en bití' rásie', Lë' na' rapa chi'ë bönachi Israel.  
 5 Run chi'ë Xanru' Dios lí'.  
 Zoë' Xanru' Dios cuitu' ibëla, rigu'ë li' zxul-la.  
 6 Biti' uzegui' gubidza li' lahui' dza,  
 en bití' bi gun beo' quiu' chi'i dzó'ölö.  
 7 Gun chi'ë Xanru' Dios lí' ga rizó'o, en ga rudxinu',  
 dza ni zóaru' na'a, en yugu' dza si' zaca.  
 8 Xanru' Dios gun chi'ë lí' ga rizó'o, en ga rudxinu',  
 dza ni zóaru' na'a, en yugu' dza si' zaca.

## 122

1 Budzėjada' cate' gulë bönachi neda', gula'nná:  
 "Uyeajru' yu'u lidxë' Xanru' Dios."  
 2 Na'a zuíru' ni  
 ga nu riyaza yödzö Jerusalén.  
 3 Dxi'ado' gulunë' yödzö Jerusalén,  
 ate' naca lachi, en tuz ca röjlözgaca yu'u xön que.  
 4 Ta'yaza yugu' cö' bönachi queë' Xanru' ga ni  
 ca na' nusédinë' Dios bönachi Israel,  
 para ila'gú'u yöl-la' ba Xanru' Dios.  
 5 Ta'bö' nupa tu'chi'a tu'sörö queëru' ga ni,  
 ga ta'bö' ta'nná bë' xzí'ini xi'sóë' David.  
 6 Guli'nábinë' Dios gunë' ga gaca dxi'a que Jerusalén,  
 en ga ulu'zí' xibé nupa ta'dxi'i yödzö ni yöl-la' tsahui'.  
 7 Dios gunë' ga ila'böza dxi'a tsáhui'do' nupa nacua' yödzö ni,  
 en ga ulu'zí' xibé nupa ta'nná bë' yöl-la' tsahui'.  
 8 Tu' nadxí'ida' yugu' böcha'a, en yugu' böchi' luzá'a,  
 rnnía': "Gaca yöl-la' riböza dxi ladxi' lu yödzö ni."  
 9 Tu' nadxí'ida' lidxë' Xanru' Dios,  
 rinábida'-në' gunë' ga gaca dxi'a que yödzö ni.

## 123

1 Uchisa lahua' uyúa' ga zu' Lí',  
 rö'u rinná bë'u yehua' yubá ni'.  
 2 Ca runë' bönni' nadó'o, ruyúë' bi ulu'ë xanë',  
 ate' ruyubi' bi'i nigula nadó'o bi ulú'unu nigula xanbi',  
 lësca' caní ruyuru' rë'u bi ulu'ë Xanru' Dios,

ga idxinrö dza uzá' láchxé'ë queëru'.

<sup>3</sup> Buzá' ladxi' queëtu', Xan. Buzá' ladxi' queëtu',  
tu' nacuá' nupa tu' cá'ana netu' cá'asö.

<sup>4</sup> Rudú láchxi'tu' tu' tu'titaj netu' nupa tu'zì' xibé yúgu'tè le dë,  
en tu' tu' cá'ana netu' cá'asö nupa tun ba zxön cuínguequi.

## 124

<sup>1</sup> "La'tu' cabí gúcalenë' Xanru' rë'u",

ral-la' ila'nná bönachi Israel:

<sup>2</sup> "La'tu' cabí gúcalenë' Xanru' rë'u

cate' nupa biti' ta'lé'e rë'u dxi'a gula'díl-lalen rë'u,

<sup>3</sup> la' gulútitë rë'u

tu' gula'léde'e rë'u.

<sup>4</sup> Guca queëru' ca la' usubága'tè rë'u nisa,  
en la' uchícjatëru' lu nisa na'.

<sup>5</sup> La' uchícjatëru' tu lu nisa zila."

<sup>6</sup> ¡Bica' lá'ayi Xanru' Dios

tu' cabí bi'ë lataj nupa biti' ta'lé'e rë'u dxi'a ulu'suniti rë'u!

<sup>7</sup> Bularu' ca rulaba' biguínido' tu lu le zön lëba'.

Naröza' du yalaj, ate' nuláru'.

<sup>8</sup> Le rácalen rë'u za' lu në'ë Xanru' Dios.

Lë' benë' lúzxiba, en lu yu.

## 125

<sup>1</sup> Nupa tu'zxöni láchxi'gaca Xanru' Dios nácgaca ca guí'a Sión,  
tu' cabí bi gaca utá guí'a na', pero tsaz zoa caz.

<sup>2</sup> Ca rő'gaca guí'a idú gásibi'ilö yödzo Jerusalén,  
la' canísö zoë' Xanru' Dios idú gásibi'ilö bönachi queë',  
na'a dza, en yúgu'tè dza si' zaca.

<sup>3</sup> Biti' ral-la' ila'nná bë' nupa tuá' dö' lu xiyúgaca bönachi tsahui',  
para cabí iún ga ilu'ë dö' bönni' tsahui' na'.

<sup>4</sup> Xan, ben ga gaca dxi'a quégaca nupa nácgaca dxi'a,  
en quégaca nupa idú láchxi'gaca tun ca rnna xtídzu'u.

<sup>5</sup> Nupa tu'dödi cuínguequi lu le cabí nácatë,  
ben léguequi xiguia' tsözxön len nupa tuá' dö'.  
Ben ga ila'cuá' bönachi Israel dxi'a tsáhui'do'.

## 126

<sup>1</sup> Cate' Xanru' Dios buchë'ë bönachi yödzo Sión  
nupa gula'dzún zi'tu', gúquiru' yélasö rineru'.

<sup>2</sup> Ní'irö idú láchxi'ru' buzxidxi'ru',  
en lu yöl-la' rudzeja queëru' gurödxi'aru'.

Ní'irö gulufí didza' bönachi yugu' yödzo izá'a, gula'nná:  
"Dios, Xángaquië', benë' le nácgaca zxön, gúcalenë' légaquië'."

<sup>3</sup> Xanru' Dios benë' le nácgaca zxön, gúcalenë' rë'u,  
ate' ruzí'iru' xibë'.

<sup>4</sup> Buchë' netu', irúajtu' ga ni nadzuntu', Xan,  
para gácatu' ca nisa rudxín lu yegu nuhuí'igaca.

<sup>5</sup> Lu yöl-la' rudzeja ila'bödxi'a cate' ila'lapa

nupa lu yöl-la' ribödxí queguequi röjözagaca.

<sup>6</sup> Nu bönni' lu yöl-la' ribödxí rizé'ë, nu'ë bínnedo' röjözé',  
lu yöl-la' rudzeja cödxí'ë cate' udxiné', nu'ë le nulapé'.

## 127

<sup>1</sup> Channö cabí runë' tsutsu Xanru' Dios tu yu'u,  
nítisö tunë' dxin bönni' tunë' yu'u na'.

Channö cabí run chí'ë Xanru' Dios tu yödzö,  
nítisö ruyúë' bönni' na' yu'u lu në'ë yödzö na'.

<sup>2</sup> Nítisö naca rubanu' zílado', en röjöxu' cate' chigúl-lada',  
en ragu' le guzxi'u ni'a que le busaca' zi' cuinu',  
tu' runnë' Xanru' Dios que nu nadxí'inë' cate' ni' rasi nu na'.

<sup>3</sup> Buli'yú, nácacacabi' zxi'iniru' le runnë' Xanru' Dios queëru',  
ate' bí'ido' tu'cuá'anu nigula queëru'  
nácacacabi' le rubi'ë Xanru' Dios queëru'.

<sup>4</sup> Ca nácacaca yaga lahui' tuchi' lu na' nu bönni' rejë' gudil-la  
nácacacabi' zxi'inë' bönni' zoë' iz cuidi' queë'.

<sup>5</sup> Bica' ba bönni' nacuá'abi' queë' zióntë'röbi'.

Biti' ca' utuí'inë' cate' ru'ë didza' láhui'gaquië'  
bönni' tu'chi'a tu'söröë' queë', en lógaca nupa ta'díl-lalen lë'.

## 128

<sup>1</sup> Bica' ba yúgu'të nupa tadxi Xanru' Dios,  
nupa na' tun ca rë'ëni quézinë' Lë'.

<sup>2</sup> Cate' gagu' le gata' quiu' ni'a que dxin nun cazu',  
uzi'u xibé lë na', en gaca dxi'a quiu'.

<sup>3</sup> Gácanu nigula quiu' ca tu lubá uva dxía ga naca lö'a lidxu',  
ate' ilácabi' zxi'inu' ca yugu' yaga olívodo' ta'bö'öbi' ga ni' ráguli'.

<sup>4</sup> Buli'yútsöca, caní gáquië' bica' ba  
bönni' na' rádxiné' Xanru' Dios.

<sup>5</sup> Xanru' Dios zoë' Sión gunë' ga gaca dxi'a quiu',  
en gu'ë li' lataj ilé'enu' le dxi'a gaca que yödzö Jerusalén  
yúgu'të dza su' ibanu'.

<sup>6</sup> Dios gu'ë li' lataj ilé'enu' yugu' zxi'ini xi'sú',  
en gunë' ga ila'böza dxi'a tsáhui'do' bönachi Israel.

## 129

<sup>1</sup> “Zian luzuí gula'bía no netu' ga gudela' nácatu' ra'bando”,  
huáca ila'nná bönachi Israel:

<sup>2</sup> “Zian luzuí gula'bía no netu' ga gudela' nácatu' ra'bando”,  
pero biti' gula'deli' ulu'xicja netu'.

<sup>3</sup> Guca tsca bulu'gá'ana-ba' bëdxi lu bëla' cúdzu'tu',  
en gulún tunna ga gudödi xiyágaba' bëdxi quégaquië'.”

<sup>4</sup> Tsahui' náquië' Xanru' Dios.

Chinachúguë' du quégaca nupa tuá' dö' le gulúgui'ni netu'.

<sup>5</sup> Ben ga ulu'tuí'i, en ulu'huécja guz cúdzu'lö  
yúgu'të nupa biti' ta'lé'e dxi'a netu', bönachi Sión.

<sup>6</sup> Ben ga ilácagaca ca guíxi'do' da' ícjo'olö yu'u,  
le ribídxitë cate' ni' naca huë'ënido'.

<sup>7</sup> Biti' gaca ulí në'e nu tsöjchugu le,

en biti' gaca nu gachi tsölén guizxi que,  
 8 en biti' ta'nná nupa ta'dódi ni':  
 "Rinábitu'-nē' Xanru' Dios gunē' ga gaca dxi'a quiu'.  
 Lu Lē' Xanru' rinábitu' Lē' gunē' ga gaca dxi'a quiu'."

## 130

1 Ga ni nótjada' rulidza' Li', Xan.  
 2 Ruzě nagu' chi'a, Xana' Dios.  
 Ruzěda' nagu' le rinábida' Li'.  
 3 La' nnaru' tsójnenu' xiguia' nabága' gaca bönachi,  
 ¿nuzxi caz urúaj tsahui' lo', Xan?  
 4 Runiti lo cazu' netu', Xan,  
 para guntu' Li' bal.  
 5 Runa' löza Li', Xana' Dios. Run löza bö' naca caza' Li',  
 ate' runa' löza gaca ca rnna xtídz'u.  
 6 Bö' naca caza' runrö löza Li', Xan,  
 ca tunē' bönni' tapa chi'ē yódzö chi'i dzö'ölö ta'bözē' itö yu zila,  
 ca tunē' löza itö yu zila yugu' bönni' na'.  
 7 Guli'gún löza Xanru' Dios, libí'ili', bönachi Israel,  
 tu' náquiē' dxi'i ladxi' Xanru',  
 en ruhuá'uē' bönachi Israel.  
 8 Xanru' Dios huóá'uē' bönachi Israel  
 lu yúgu'tē xiguia' nabága' gaca.

## 131

1 Biti' run ba zxön cuina', Xan, en biti' rigú'u cuina' yöl-la' ba,  
 en biti' ulapa' na'a le nácgaca zxön, en le nácgaca böniga.  
 2 Idú ládxa'a nuzóa cuina' nöxaj, en zoa' dxisö.  
 Ca runbi' bi'i hué'ēni ruzí ládxi'bi' cuítanu xiná'abi',  
 ca' riböza bö' naca caza' lu icja ládxi'da'ahua'.  
 3 ¡Libí'ili', bönachi Israel, guli'gunē' löza Xanru' Dios  
 ga naguela' na'a dza, en yúgu'tē dza si' zaca!

## 132

1 Rinábida' Li', Xan, uláz queē' David tsójnenu'  
 yúgu'tē le gudí'i guzxáque'ē,  
 2 en ca benē' tsutsu xtídzē'ē, Xan, en guzxi' lu nē'ē bi gunē' lo',  
 nacu' Nu nál-latērö láhuigaquiē' xzí'ini xi'sóē' Jacob, gunnē':  
 3 "Biti' ca' tsu'a lidxa',  
 en biti' gáta'a le ráti'da',  
 4 en biti' gu'a lataj tódi yēla guiój lahua',  
 en biti' utsudi' lahua',  
 5 ga idxinrö dza ucöza' tu lataj ga soē' Xanru' Dios,  
 le gaca yu'u lidxi Nu na' nál-latērö láhuigaquiē' xzí'ini xi'sóē' Jacob."  
 6 Biyönitu' didza' que guí'ina lá'ayi queē' Dios cate' ni' zóatu' Efrata,  
 ate' budzölitu' le lu xiyúē' Jaar.  
 7 Uyéajru' ga na' zoa cazē' Xanru' Dios.  
 Tseaj ládxi'ru'-nē' ga naca xilibi ni'ē.  
 8 Gudödi, Xan, ga na' soa cazu' Li'.  
 Gudá tsözxön len guí'ina lá'ayi que yöl-la' zxön quiu'.

9 Ben ga sóalen le naca tsahui' yugu' bixúz quiu'  
ca tu lari' ta'xóë' cúdzu'gaquië'.  
Ben ga ilúl-la bönachi quiu' lu yöl-la' rudzeja quéguequi.

10 Uláz queë' David, huen dxin quiu', rinábida' Li'  
cabí ucá'anu' bönni' na' gurö cazu' Li'.

11 Xanru' Dios benë' tsutsu xtídzë'ë bi gunë' queë' David,  
le naca idütë li, ate' Lë' biti' unítie' xtídzë'ë na', gunnë':  
"Uzóa' tuë' xzí'ini xi'sú' xilatju' ga inná bë'ëbi'.

12 Channö ilunbi' xzí'ini xi'sú' ca rna didza' dzaga quia',  
en le nuna' ba nalí para uzéajni'ida' légacabi',  
ila'nná bë'ëbi' ga rō'u rinná bë'u yúgu'të dza si' zaca."

13 Xanru' Dios nabö cazë' queë' yödzö Sión.  
Raca lácxë'ë gaca Sión ga soa cazë' Lë'.

14 Rnnë': "Nácatica'sö lataj ni ga soa caza' neda'.  
Soa' ni tu' raca lácxa'a soa' ni.

15 Guna' ga gátada' le ilágugaca bönachi ni,  
en guna' ga ulu'huölaj ila'dzë'e yöta xtila  
nupa ta'yadzaj ta'yudxi lu yödzö ni.

16 Guna' ga sóalen yöl-la' rusölá yugu' bixúz quia'  
ca tu lari' ila'xóa cúdzu'gaquië',  
ate' ilúl-la bönachi quia' lu yöl-la' rudzeja quéguequi.

17 Guna' ni ga ilá' lahui yöl-la' unná bë' queë' David.  
Guna' ga sóatica'sö nu inná bë' xilatjë' bönni' na' nabö caza'.

18 Guna' ga sóalen nupa biti' ta'lé'e lë' dxi'a yöl-la' rutuí'i  
ca tu lari' ilácuguequi, pero tsëpi yösa bení' le dxía icjë'."

## 133

1 Buli'yútsöca': ¡Bica' dxi'a tsahui' naca  
cate' nupa nácagaca böchi' luzë'e  
ta'böza lu yöl-la' tuz quéguequi!

2 Naca ca le za ta'gú'u ícjaguequi bönachi,  
le ridzún lu guitsa' láhuiguequi,  
en bidzún lu guitsa' lúzxuë' Aarón,  
le bidzún ga ridxintë lu yení zxë'.

3 Naca ca buzén le ridinni lu guí'a Hermón,  
en ca le ribö'a lu guí'a Sión,  
tu' gunná bë'ë Xanru' gaca dxi'a queëru' lu guí'a na',  
en gata' yöl-la' na'bán idú queëru'.

## 134

1 ¡Buli'yútsöca'!

¡Guli'cu'ë Xanru' Dios yöl-la' ba, yúgu'tëli' runli' xichinë' Xanru',  
yúgu'tëli' na' zóali' yu'u lidxë' Xanru' chi'i dzö'öló!

2 ¡Guli'chisa ná'ali' ga zóali' lataj lá'ayi queë',  
en guli'nná dxi'a queë'!

3 Xanru' Dios, zoa cazë' yödzö Sión, gunë' ga gaca dxi'a queëli'.  
Naca cazë' Nu ben yehua' yubá, en yödzölió ni.

## 135

<sup>1</sup> ¡Guli'cu'ë yöl-la' ba Xanru' Dios!

¡Guli'cú'u yöl-la' ba La la'ayi queë' Xanru' Dios!

¡Guli'cu'ë yöl-la' ba, libí'ili' runli' xichinë' Xanru',

<sup>2</sup> libí'ili' na' zulí' yu'u lidxë' Xanru',

ga na' zóali' lö'a que yu'u lidxë' Dios queëru'!

<sup>3</sup> ¡Guli'cu'ë yöl-la' ba Xanru' Dios tu' náquië' dxi'a!

¡Guli'gul-la yöl-la' ba que La la'ayi queë', tu' naca lachi!

<sup>4</sup> Nabö cazë' Xanru' xzí'ini xi'sóë' Jacob para ilaca quez queë'.

Guröë' bönachi Israel para ilequi queë'.

<sup>5</sup> Nözda' nayëpisë' Xanru' Dios.

Nayëpisëtërë' ca yugu' dios quégaca bönachi izá'a.

<sup>6</sup> Run cazë' Xanru' ca riyaza ladxi' cazë' yehua' yubá ni',

en luyú ni, en lu nísado', en xzan lu yu.

<sup>7</sup> Runë' ga rö' böaj gáti'tës luyú ni,

en runë' ga rëpi yösa cate' ralaj guiöj.

Rubéajë' bö' recja ga rapa chi'ë le nequi queë'.

<sup>8</sup> Bëtië' yugu' bi'i bönni' zí'alö quégaca bönachi Egipto,

xzí'inigaca bönachi, en böa' huë'énido' quégacaba' böa' guixi'.

<sup>9</sup> Benë' yugu' yöl-la' huáca zxön le gulaca bé' luyú Egipto,

yugu' lé na' gulaca queë' Faraón, en quégaca huen xichinë'.

<sup>10</sup> Busunítië' Dios bönachi zían yödzö izá'a,

en bëtië' bönni' lo ta'nná bë'ë.

<sup>11</sup> Bëtië' Sehón, bönni' gunná bé'enë' bönachi Amorreo,

en Og, bönni' gunná bé'enë' bönachi Basán,

en bönni' gula'nná bé'enë' bönachi yödzö nacué' luyú Canaán.

<sup>12</sup> Budödë' xiyúgaquië' bönni' na'

lu ná'agaquië' bönni' Israel, bönachi queë' cazë'.

<sup>13</sup> Tsaz zoa caz Lo', Xan.

Ila'cuá'tica'sö nupa tsöjnégaca Li', Xan,

<sup>14</sup> tu' uchi'a usöröu' bönachi queu', Xantu' Dios,

en huéchi' ládxu'u nupa tun xichinu'.

<sup>15</sup> Budó' quégaca bönachi yugu' yödzö izá'a néquiniguequi plata, en oro, yugu' le núngaca lu ni'a lu ná'agaca bönachi.

<sup>16</sup> Zóagaca ru'iguequi, pero biti' bi didza' tuí'i.

Zóagaca guiöj lóguequi, pero biti' bi ta'lé'e.

<sup>17</sup> Zóagaca náagaca, pero biti' bi ta'yöni,

en biti' ta'guela' bö' ru'igaca.

<sup>18</sup> Nupa tun léguequi ilaca ca náagaca budó' na',

en caní ilaca yúgu'të nupa tu'zxöni ladxi' léguequi.

<sup>19</sup> Libí'ili', bönachi Israel, guli'guié' Xanru' náquië' dxi'a.

Libí'ili', xzí'ini xi'sóë' Aarón, guli'guié' Xanru' náquië' dxi'a.

<sup>20</sup> Libí'ili', xzí'ini xi'sóë' Leví, guli'guié' Xanru' náquië' dxi'a.

Libí'ili', núlöli' rádxili'-në' Xanru', guli'guié' Xanru' náquië' dxi'a.

<sup>21</sup> Núlöli' zóali' yödzö Sión ral-la' guiéli'-në' Xanru' náquië' dxi'a, tu' zoa cazë' Xanru' Dios yödzö Jesusalén.

¡Guli'cu'ë yöl-la' ba Xanru'!

## 136

- 1 ¡Xclenë' Xanru' Dios tu' náquië' dxi'a!  
Zóatica'sö yöl-la' dxi'i ladxi' queë'.
- 2 ¡Xclenë' Dios nayépisëtêrë' ca yugu' dios ízá'a!  
Zóatica'sö yöl-la' dxi'i ladxi' queë'.
- 3 ¡Xclenë' Xanru', nayépisëtêrë' ca yugu' xángaca bönachi!  
Zóatica'sö yöl-la' dxi'i ladxi' queë'.
- 4 ¡Xclenë' Dios, tuzë' Lë' runë' yugu' yöl-la' huáca zxön!  
Zóatica'sö yöl-la' dxi'i ladxi' queë'.
- 5 ¡Xclenë' Dios, len yöl-la' rácada' queë' benë' lúzxiba!  
Zóatica'sö yöl-la' dxi'i ladxi' queë'.
- 6 ¡Xclenë' Dios, gudixjë' luyú láhuilö nísado'!  
Zóatica'sö yöl-la' dxi'i ladxi' queë'.
- 7 ¡Xclenë' Dios, benë' gubidza, en beo'!  
Zóatica'sö yöl-la' dxi'i ladxi' queë'.
- 8 ¡Benë' Dios gubidza para tsení' lahui' dza!  
Zóatica'sö yöl-la' dxi'i ladxi' queë'.
- 9 ¡Benë' Dios beo', en yugu' bōlaj para ulu'zení' chi'i dzō'ölö!  
Zóatica'sö yöl-la' dxi'i ladxi' queë'.
- 10 ¡Xclenë' Dios, bëtië' yugu' bi'i bōnni' lo quégaca bönachi Egipto!  
Zóatica'sö yöl-la' dxi'i ladxi' queë'.
- 11 ¡Bubéajë' bönachi Israel ladaj bönachi Egipto na'!  
Zóatica'sö yöl-la' dxi'i ladxi' queë'.
- 12 ¡Len yöl-la' huáca zxön queë', en lu yöl-la' nadxi'i queë' benë' caní!  
Zóatica'sö yöl-la' dxi'i ladxi' queë'.
- 13 ¡Xclenë' Dios, bubéajë' choplö Nísado' Xiná!  
Zóatica'sö yöl-la' dxi'i ladxi' queë'.
- 14 ¡Benë' ga gula'dōdi bönachi Israel gatsaj láhui'lö nísado' na'!  
Zóatica'sö yöl-la' dxi'i ladxi' queë'.
- 15 ¡Lu nísado' na' busunítië' Faraón, en bōnni' queë' rōjáquië' gudil-la!  
Zóatica'sö yöl-la' dxi'i ladxi' queë'.
- 16 ¡Xclenë' Dios, guchë'ë bönachi queë' la' guixi' ga ni' naca yu bidxi!  
Zóatica'sö yöl-la' dxi'i ladxi' queë'.
- 17 ¡Xclenë' Dios, bëtië' bōnni' gula'nná bë'ë, guláquië' nal-la!  
Zóatica'sö yöl-la' dxi'i ladxi' queë'.
- 18 ¡Bëtië' bōnni' gula'nná bë'ë, dëda' lu ná'agaquië' yöl-la' unná bë'!  
Zóatica'sö yöl-la' dxi'i ladxi' queë'.
- 19 ¡Bëtië' Sehón, bōnni' gunná bé'enë' bönachi Amorreo!  
Zóatica'sö yöl-la' dxi'i ladxi' queë'.
- 20 ¡Bëtië' Og, bōnni' gunná bé'enë' bönachi Basán!  
Zóatica'sö yöl-la' dxi'i ladxi' queë'.
- 21 ¡Budödë' xiyúgaquië' lu ná'agaca bönachi queë'!  
Zóatica'sö yöl-la' dxi'i ladxi' queë'.
- 22 ¡Budödë' le lu ná'agaca bönachi Israel, bönachi tun xichinë'!  
Zóatica'sö yöl-la' dxi'i ladxi' queë'.
- 23 ¡Yōjnenë' rë'u cate' ni' bugá'anaru' cá'asö!  
Zóatica'sö yöl-la' dxi'i ladxi' queë'.
- 24 ¡Busölë' rë'u lu ná'agaca nupa gula'díl-lalen rë'u!

Zóatica'sò yöl-la' dxi'i ladxi' queë'.

<sup>25</sup> ¿Rugahuë' yúgu'të bönachi!

Zóatica'sò yöl-la' dxi'i ladxi' queë'.

<sup>26</sup> ¿Xclenë' Dios, zoa cazë' yehua' yubá!

Zóatica'sò yöl-la' dxi'i ladxi' queë'.

## 137

<sup>1</sup> Ra' yegu nacua' lu yu Babilonia guró'ötu',  
en gurödxí yéchi'tu', cate' yöjnetu' yödzö Sión.

<sup>2</sup> Lu yaga rō'gaca yugu' ra' yegu ni'  
bugála'tu' yugu' le rúl-lalentu'.

<sup>3</sup> Caní bentu' tu' gula'nabi yudxi nupa gulachë' netu' nadzuntu' ni' gúl-  
latu'.

Nupa bulu'saca' zi' netu' gula'naba queëtu' yöl-la' ruzxidxi, gula'nná:  
“Gulí'gul-la queëtu' tu le rul-la que yödzö Sión.”

<sup>4</sup> ¿Nacxi caz gaca gúl-latu' le rul-la queë' Xanru'  
ga ni nadzuntu' tu lu yödzö izá'a?

<sup>5</sup> Channö gal-la ládxa'a yödzö Jerusalén,  
rinábida'-në' Dios ugüë' yöl-la' raca que na'a ibëla.

<sup>6</sup> Rinábida'-në' gunë' ga ta' lúdxa'a chichja'  
channö cabí tsöjneda' ladza',  
en channö cabí huí' zxonra' yödzö Jerusalén ca ia'tú le ruzí'ida' xibé.

<sup>7</sup> Yöjné le gulunë' zxi'ini xi'sóë' Edom, Xan,  
le gulunë' dza busiúdxu' yödzö Jerusalén,  
ca na' gula'nnë': “Gulí'quinnaj dëra.  
Gulí'quinnaj dëra ga idxintë xilibi zö'ö yödzö na'.”

<sup>8</sup> Libí'ili', bönachi Babilonia, libí'ili' rusunítíli',  
bica' ba nu ubí'i queëli' ca na' benlí' queëtu'.

<sup>9</sup> Bica' ba nu quela' yugu' bí'ido' queëli'  
en uzuzxaj lé'gacabi' yugu' lu guió'j.

## 138

<sup>1</sup> Idú ládxa'a guía' Li', “Xclenu” Xan.

Gul-la' yöl-la' ba quiu' lógaca le tun zxon bönachi yugu' yödzö izá'a.

<sup>2</sup> Uzóa zxiba' saca' yudo' lá'ayi quiu', en guía' Li', “Xclenu”  
ni'a que Lo', tu' nacu' dxi'i ladxi', en runu' ca rna didza' bë'u,  
tu' benu' ca naca lu xtí'zdu'u, en lu le naca ca nazí'i lo.

<sup>3</sup> La' dza ná'asö cate' bulidza' Li', bubi'u didza'.  
Tu' butipu' ládxa'a, guca' rugu ladxi'.

<sup>4</sup> Yúgu'të bönni' ta'nná bë'ë ilë' Li': “Xclenu” Xan,  
cate' ila'yönnë' didza' ru'u.

<sup>5</sup> Ilul-lë' ca ná'agaca le runë' Xanru' Dios,  
tu' nácatë' rō zxon yöl-la' ba queë' Xanru'.

<sup>6</sup> Sal-la' nayëpisëtë'rë' Xanru' Dios  
ruí'i ládxe'ë nupa ná'agaca cá'asö,  
pero zi'tu' zí'tu'sö ruyúë' nupa tun ba zxon cuínguequi.

<sup>7</sup> Sal-la' ridá' ga zoa bönadxi quia', Li' utipa cazu' ládxa'a.



Tíl-lalen cazu' nupa ta'díl-lalen neda',  
ate' len yöl-la' huáca quiu' usöló' neda'.

<sup>8</sup> Xanru' gun cazë' quia' ca chinuzóa cazë' gunë'.

Zóatica'sö yöl-la' dxi'i ladxi' quiu', Xan.  
Biti' usán no'o le nun cazu' len na' cuinu'.

## 139

<sup>1</sup> Ruyú cazu' le yu'u icja ládxi'da'ahua', Xan, en nunbë' cazu' neda'.

<sup>2</sup> Nöz quézinu' cate' ribö'a, en cate' riyasa'.

Nózinu' le rizá ládxa'a ni' zu' zi'tu'.

<sup>3</sup> Ruyú cazu' neda' cate' bi runa', en cate' rasia',  
en nözinu' yúgu'të le runa'.

<sup>4</sup> Zí'atëlö ca bi didza' ru'a,  
chi nöz quézinu' bi innía', Xan.

<sup>5</sup> Röjnöru cazu' lahua', en za' cazu' cúdza'a,  
en naxóatica'sö no'o neda'.

<sup>6</sup> Run ga rubánida' tu' nöz quézinu' Li'.  
Biti' séqui'da' tséajni'ida' ca naca.

<sup>7</sup> ¿Naru' huáca tseja' ga bití' idxín Bö' quiu'?

¿Naru' huáca izxúnna' ga bití' zoa cazu' Li'?

<sup>8</sup> La'tu' huabena' lúzxiba, ni' soa cazu' Li',  
en la'tu' huötja' lataj chul-la, ni' zoa cazu' ca'.

<sup>9</sup> La'tu' uyija' ga rilén gubidza,  
o la'tu' huadóda' ia'tsölá'alö nísado',

<sup>10</sup> ni' caz ichë'u neda',  
ate' len no'o ibëla sön cazu' neda'.

<sup>11</sup> La'tu' innía': "Úcachi' neda' le naca chul-la",  
en la'tu' huóaca chul-la bení' zóalen neda',

<sup>12</sup> bití' gaca chul-la lo' Li' lë na' naca chul-la quia',  
pero chi'i dzó'ölö gaca quiu' ca lahui' dza.

Tuz ca nácagaca lo' Li' le naca chul-la, en le naca lahui' dza.

<sup>13</sup> Nun cazu' Li' le zoa icja ládxi'da'ahua'.

Benu' ga guyá' lë'ënu xiná'a le naca caza'.

<sup>14</sup> Guía' Li': "Xclenu'" tu' run ga rubánida' ca nun cazu' neda',  
ate' rádxida' Li' tu' tun le nunu' ga rubánida',

ate' bö' naca caza' nözi caz naca caní.

<sup>15</sup> Bití' bigachi' lo' le naca caza' cate' ni' si' galja',  
cate' ni' yu'a lë'ënu xiná'a.

<sup>16</sup> Bilé'e quézinu' neda' cate' ni' si' galja',  
tu' chinuzúajgaca lu guichi quiu'

yugu' dza ral-la' soa' ibana',  
sal-la' bití' ridxini nitú dza na'.

<sup>17</sup> Nazáca'tërögaca quia' le rizá ládxi'u, Dios.  
Ziántërö nácagaca lë na' rizá ládxi'u.

<sup>18</sup> La'tu' huáca nu ulaba léguequi,  
ilácagaca ziántërö ca nácagaca guiöj yuzxi.

Cate' rubana', ni' zóalena' Li'.

<sup>19</sup> Raca ládxa'a usunítu' nupa tuá' dö', Dios.

Que lë ni na', guli'cuíta ga zoa', núlöli' rútili' bönachi.

20 Tu'i didza' zi' ca nacu' Li', Dios,  
ate' nupa ta'dá'baga' Li' ta'nné liz que Lo'.  
21 ¿Naru' cabí rileda' nupa ta'lé Li', Xan?  
¿Naru' cabí ruzóa' tsölá'alò nupa ta'dá'baga' Li'?  
22 Idú ládxa'a bití rilé'eda' léguequi dxi'a.  
Nuzóa' léguequi ca nupa ta'díl-lalen neda'.

23 Buyú neda', Dios, en gúquibe'e le zoa icja ládxi'da'ahua'.  
Guzxí' bē' neda', en gúquibe'e le rizá' ládxa'a.  
24 Buyú channö zóalen neda' le naca dö',  
en buluí'i neda' nöza tsahui' quiu' zóatica'sö.

## 140

1 Busölá neda', Xan, lu ná'agaca nupa tuá' dö'.  
Ben chí'i neda' para cabí bi ilunē' bönni' zi' quia'.  
2 Ta'zá' ládxe'ē le náagaca xihui' ilunē',  
en tunē' ga ila'díl-lalen bönachi luzē'eguequi.  
3 Didza' tu'ē tun ga náagaca lúdxí'gaquiē' ca yugu' bēla sínia'.  
Yu'u ruá'agaquiē' le nachē' yöl-la' guti ca le dxía lu láyi'ba' bēla na'.  
4 Ben chí'i neda', Xan, para cabí bi ilunē' bönni' tu'ē dö' quia'.  
Ben chí'i neda' para cabí bi ilunē' bönni' zidzaj quia',  
bönni' na' té'ēnē' ilunē' ga ichixi iníguida'.  
5 Nupa tun ba zxon cúnguequi nucáchi'gaca le sön neda',  
enca' du yalaj iröli neda'.  
Nucáchi'gaca du yalaj ga ral-la' töda'.  
Nucözagaca le ila'zön neda'.

6 Gudxa'-nē' Xanru': "Nacu' Dios quia'.  
Ruzē' nugu', Xan, yugu' le rinábida' Li'.  
7 Xana' Dios, naca cazu' Nu rusölá neda' len yöl-la' huáca quiu'.  
Ben chí'i cazu' icja' cate' ni' zoa' lu gudil-la.  
8 Biti' gu'u lataj, Xan, gaca quia' le ré'ēnē' gunē' bönni' ru'ē dö'.  
Biti' gu'u lē' lataj idéli'nē' le rizá' ládxe'ē, para cabí tsépisé'.  
9 Nacuá' nupa nagú'ugaca neda' lē'ajlō.  
Busubaga' ícjagaquiē' dö' té'ēnē' ilu'ē quia'.  
10 Ben ga ila'bixaj bo' yalaj lahui ícjagaquiē'.  
Bē' lataj tsöjtsázagaquiē' tu lu guí' zxon,  
en yugu' lu yeru zila ga bití' ila'zéqui'nē' ulu'rúajē'.  
11 Biti' gu'u lataj soē' bönni' rizí' yē'ē luyú ni.  
Ben ga udxín queē' bönni' zidzaj dö' ru'ē."

12 Nözda' gunē' Xanru' ga ulu'rúaj tsahui' nupa ta'gu'i ta'zaca',  
en uchi'a usöröē' quégaca bönachi yechi'.

13 Le nácatē ilé Li': "Xclenu'" nupa náagaca tsahui' tu' tu'lidza Lo'.  
Ila'cuá' ga zoa cazu' Li' nupa náagaca dxi'a.

## 141

1 Rulidza' Li', Xan. Gudáchi ga zoa'.  
Ruzē' nugu' chí'a cate' rulidza' Li'.  
2 Buyú le rulidza' Li' ca dzön yalaj le ridxín lo',

en cate' richisa na'a, buzí' le ca tu böa'do' uzégui'a-ba' lo'.

<sup>3</sup> Ben chí'i ruá'a, Xan,

en gudapa chí'i guídi ruá'a para cabí gu'a didza' zi'.

<sup>4</sup> Biti' gu'u lataj gaca ládxa'a le cabí nácatë,

para cabí guna' le naca xihui'

len yugu' bönni' tutië' bönachi.

Biti' gu'u lataj guna' léguequi tsözxön.

<sup>5</sup> Bë' lataj gu'ë neda' bönni' tsahui' lu yöl-la' nadxí'i queë'

para uzéajni'inë' neda'.

Le gunë' gaca quia' ca le za cu'ë icja'.

Biti' gu'u lataj tá'baga' icja' le ilún nupa tuá' dö'.

Rinábida' Li' uzagu' xinözguequi.

<sup>6</sup> Ila'ládu'gaquië' bönni' lo quéguequi lë'e guí'a guiöj,

ate' iléquibe'e gulaca dxi'a didza' bë'a.

<sup>7</sup> Ca raca cate' nu rugá'ana-ba' bëdxi, en rulá'a yu,

ca' gaca que dxita yú'ugaquië',

le gulásilasi ra' ba que xilátjagaca nupa nátigaca.

<sup>8</sup> Richisa lahua' ruyúa' ga zu' Li', Xantu' Dios.

Rucachi' cuina' ga na' zu'. Biti' usán no'o neda'.

<sup>9</sup> Ben ga bití' tsöjbixa' lu le sön neda', lë na' nucáchi'gaca,

en ga bití' tsöjtsaza' lu du yalaj nucözagaca nupa tuá' dö'.

<sup>10</sup> Bë' lataj ila'yaza la' cuíngacasö lu du yalaj bulu'cachi' nupa tuá' dö',

pero benna lataj tódisa' neda' ga na' nagachi' du yalaj na'.

## 142

<sup>1</sup> Rulidza'-në' Xanru', ru'a zidzaj didza'.

Ráta'yua' lahuë' Xanru' uzá' ládxe'ë quia'.

<sup>2</sup> Rudöda' lahuë' yöl-la' rinaba yudxi quia',

en rusiyönda' Lë' le rácagaca quia'.

<sup>3</sup> Cate' budú ládxa'a,

gunözi quézinu' Li' le guca quia'.

La' nöza ga ridá' neda'

bulu'cachi' le sön neda'.

<sup>4</sup> Buyú cuita' ibëla

tu' cuntu nu zoa nu ruí'i ladxi' neda'.

Biti' bi zoa le gácalen neda'.

Cuntu nu run chí'i bö' naca caza'.

<sup>5</sup> Gurödxi'a lo' Li', Xan, gunnía':

Run chí'i cazu' neda' Li',

en naca cazu' Nu rácalen neda' ladaj nupa nabángaca.

<sup>6</sup> Ruzë nagu' le rulidza' Li',

tu' nagá'ana' cá'asö.

Busöla neda' lu ná'agaca nupa ta'zóa regu' neda',

tu' nácatërögaca nál-la ca neda'.

<sup>7</sup> Guléaj bö' naca caza' lu yu'u lidxi guíë,

para gaca guía' Li': "Xclenu" tu' rulidza' Lo'.

Nupa nácagaca tsahui' ulu'dubi idú gásibi'ilö ga zoa',

tu' gunnu' sizxöni quia' le riquinda'.

**143**

<sup>1</sup> Ruzě nagu' le rulidza' Li', Xan.

Ruzě nagu' le rinabi yúdxida' Li'.

Tu' runu' ca rnna didza' bē'u, en nacu' tsahui' gunnú'

<sup>2</sup> bití' ichē'u neda' lo' ga uchi'a usöröu' quia', huen dxin quiu'.

Cuntu nu zoa naca tsahui' lo' Li'.

<sup>3</sup> Nu bití' rilé'e neda' dxi'a zoa regu' bö' naca caza'.

Nuzötjē' yöl-la' na'bán quia' lu yu.

Benē' ga zoa' lataj naca chul-la ca raca quégaca nupa gulati dza ni'te.

<sup>4</sup> Que lē ni na' rudú ládxa'a, en rō'a böniga.

<sup>5</sup> Rōjneda' dza chigula'dödi.

Rizá' ládxa'a ca nácgaca le benu' Li'.

Ribequi icja' ca nácgaca le nun no'o.

<sup>6</sup> Richisa na'a zaca' ga zu' Li'.

Rizé ládxa'a Li' ca tu luyú bidxi rizé ladxi' nisa guiój.

<sup>7</sup> Bubí'tē didza', Xan, tu' rudú ládxa'a.

Bití' ucachi' lo' lahua' neda',

para cabí gaca' ca tu bönni' ru'ē lataj chul-la ga nacua' nupa nátigaca.

<sup>8</sup> Ben ga yōnda' yugu' zila ca naca yöl-la' dxi'i ladxi' quiu',

tu' ruzxōni ládxa'a Li'.

Busēdi neda' ca ral-la' guna',

tu' ruchisa' lo' Li' bö' naca caza'.

<sup>9</sup> Busólá neda', Xan, lu ná'agaca nupa bití' ta'lé'e neda' dxi'a.

Nacu' Nu ruzóa neda' tsutsu.

<sup>10</sup> Busedi neda' para guna' ca rē'ēnu' Li',

tu' naca cazu' Li' Dios quia'.

Bē' lataj ichē' Bö' Lá'ayi quiu' neda' lu nöza tsahui'.

<sup>11</sup> Butipa ládxa'a, Xan, para gaca yöl-la' ba que Lo'.

Tu' nacu' tsahui' busólá neda' lu le raca quia'.

<sup>12</sup> Lu yöl-la' dxi'i ladxi' quiu' guchugu quégaca nupa bití' ta'lé'e neda' dxi'a.

Busuniti yúgu'tē nupa tu'saca' zi' bö' naca caza',

tu' naca' huen dxin quiu'.

**144**

<sup>1</sup> ¡Yöl-la' ba Lē, Xanru' Dios!

¡Náquiē' ca tu guiój ga zoa' tsutsu!

Rutipē' na'a para gaca tseja' gudil-la,

en rutipē' ca' xibōn na'a para gaca tíl-lalena' bönni' nácgacquiē' nál-la.

<sup>2</sup> Naca cazē' Xanru' yöl-la' dxi'i ladxi' quia',

enca' ca tu ga zoa' tsutsu lu gudil-la.

Rusólé' neda', en náquiē' ca tu ga zoa' tsaz.

Náquiē' ca tu le run chí'i neda' lu gudil-la, ate' rucachi' cuina' ga na' zoē'.

Runē' ga tun nupa rinná bé'eda' ca rnna didza' ru'a.

<sup>3</sup> ¿Bízcatē caz náquiē' bönni' tu' runu' lē' ba lá'ana, Xan?

¿Bízcatē caz náquiē' bönni' tu' ru'í ladxi' cazu' lē'?

<sup>4</sup> Naca cazē' bönni' na' ca tu bö'do' recja,

ate' yugu' dza zoē' nabanē' nácgacasō ca tu zxul-la le rigú'u tu böaj ridōdisō.

<sup>5</sup> Buzōtaj lúzxiba, en bдинne ni, Xan.

Gudán yugu' guí'a, ate' irúaj dzōn lé'eguequi.

<sup>6</sup> Ben ga tsēpi yösa quiu', en bēsilasi léguequi.

Busé yugu' yaga lahui tuchi', en ben ga ila'bö' baguí'sö.

<sup>7</sup> Bulí no'o ga na' zu' xitsá'alö.

Busölá neda', en guléaj neda' lu ná'agaca bönachi zi'tu',  
le gaca ca rubéaju' neda' lu nisa zila.

<sup>8</sup> Ta'zí' yë' bönachi na',

ate' le cabí nácatë naca yöl-la' unná bë' quéguequi.

<sup>9</sup> ¡Gul-la' quiu' Li', Dios, tu le cubi!

¡Gul-la' quiu' yöl-la' ba, en quínnia' bihuël-la nuá' chi du que!

<sup>10</sup> Rusölá cazu' bönni' ta'nná bë'ë.

Busöló' David, huen dxin quiu', lu guië tuchi' queë' bönni' ru'ë dö'.

<sup>11</sup> Gúcalen neda', en busölá neda' lu ná'agaca bönachi zi'tu'.

Ta'zí' yë' bönachi na',

ate' le cabí nácatë naca yöl-la' unná bë' quéguequi.

<sup>12</sup> Ben ga ilácabi' bi'i bönni' queétu' ni yu'ugacabi' iz cuidi'

ca yugu' yaga nazxöngaca,

en ben ga ilácabi' bi'i nigula queétu'

ca nácgaca ya'zxén que tu yu'u nazaca'.

<sup>13</sup> Ben ga ilígaca yu'u queétu' zxoá' za utúbitu',

en ben ga iláljaba' gayuá' gayuá'aba' chíbodo',

en bö'cu' zxíla'do' ga nucuá'atu'-ba'.

<sup>14</sup> Ben ga ulu'cuá'aba' böa' hué'enido' quégaca böa' guixi' queétu',

en ga biti' bi gaca quégacaba' bédxi zxön, en bédxido' ca'.

Biti' gu'u lataj soa nu cödxí yechi' la' nöza que lászatu'.

<sup>15</sup> ¡Bica' bágaca bönachi raca caní quéguequi!

¡Bica' bágaca bönachi na' Xanru' Dios náquië' Dios quéguequi!

## 145

<sup>1</sup> ¡Guna' Li' zxön, Dios!

¡Nacu' Nu rinná be'e neda'!

¡Gádxítica'sa' Lo', Xana' Dios!

<sup>2</sup> ¡Tu dza tu dza cu'a Li' yöl-la' zxön,

en cú'utica'sa' Lo' yöl-la' ba!

<sup>3</sup> ¡Nayëpisëtë'rë' Xanru' Dios, ate' cú'uru'-në' yöl-la' ba!

¡Biti' ca' gaca gúnbë'ëru' ca naca yöl-la' zxön queë'!

<sup>4</sup> Yúgu'të bönachi ila'gú'u yöl-la' ba le nun cazu' Li',

para ulu'siyön zxí'inigaca,

en ulu'lui'i lahui le nácgaca zxön benu'.

<sup>5</sup> Sa' ládxa'a ca naca yöl-la' zxön que yöl-la' unná bë' quiu',

en ca nácgaca yöl-la' huáca zxön runu'.

<sup>6</sup> Iluí' didza' yúgu'të bönachi ca naca yöl-la' zxön

quégaca yöl-la' huáca runu'.

Usiyönda' bönachi ca naca yöl-la' zxön quiu'.

<sup>7</sup> Idú ládxi'gaca iluí' didza' cate' tsöjnégaca yöl-la' dxi'i ládxi' zxön quiu'.

Lu yöl-la' rudzeja quéguequi ila'bödxí'a tu' nacu' tsahuí'.

8 Xanru' Dios ruzá' láchxë'ë queéru', en ruhuéchi' láchxë'ë rë'u.  
 Biti' ilética'së', ate' zxöntërö naca yöl-la' dxi'i ladxi' queë'.  
 9 Runë' Xanru' Dios le naca dxi'a quégaca yúgu'të bönachi,  
 en ruhuéchi' láchxë'ë yúgu'të le nunë'.

10 Yúgu'të le nunu' ilé Li': "Xclenu" Xan,  
 ate' nupa néquiquequi quez quiu' ilún Li' zxön.  
 11 Ilu'i didza' ca naca yöl-la' zxön que le rinná bë'u,  
 en ulu'luf'i lahui yöl-la' zxön quiu',  
 12 para ulu'siyön bönachi ca nácagaca le zxön runu',  
 en ca naca yöl-la' zxön que le rinná bë'u le nayëpisëtërö.

13 jZóatica'sö le rinná bë'u,  
 ate' idía'tica'sö yöl-la' unná bë' quiu'!  
 jLu le naca idú ladxi' queë' runë' Dios ca rnnágaca yúgu'të didza' ru'ë,  
 en lu yöl-la' dxi'i ladxi' queë' runë' yúgu'të le runë'!  
 14 jRöjzönë' Xanru' yúgu'të nupa röjtsö'ögaca,  
 en ruchisé' yúgu'të nupa ndínnegaca!

15 jYúgu'të bönachi tu'yú Li', Xan,  
 ate' runödju' le ilágugaca cate' ridxín dza que!  
 16 jRusalaj cazu' no'o  
 en rugagu' yúgu'të le nacuá' nabángaca!

17 Náquië' tsahui' Xanru' Dios ca naca yúgu'të le runë'  
 en náquië' ca' dxi'i ladxi'.  
 18 Zoë' Xanru' gala' ga nacuá' yúgu'të nupa tu'lidza Lë',  
 nupa na' tu'lidza Lë' idú láchxi'guequi.  
 19 Gunnë' le ta'zë láchxi'gaca quégaca nupa tadxi Lë'.  
 Riyönnë' cate' tu'lidza Lë', en rusölë' léguequi.  
 20 Run chi'i cazë' Xanru' yúgu'të nupa nadxí'igaca Lë',  
 pero usunítie' nupa tuá' dö'.  
 21 Len ru'a cuina' cu'a-në' Xanru' yöl-la' ba,  
 ate' yúgu'të bönachi ilúntica'sö Lë' zxön.

## 146

1 jGuli'cu'ë yöl-la' ba Xanru'!  
 jLi', bö' naca caza', gulu'ë yöl-la' ba Xanru'!  
 2 jCu'a-në' Xana' yöl-la' ba tsanni ni zoa' nabana'!  
 jGul-la' yöl-la' ba queë' Dios quia' tsanni ni zoa' bö' naca caza'!

3 Biti' uzxöni láchxi'li' bönni' ta'nná bë'ë,  
 en calëga bönni' tati cazë', bönni' bití' ca' gaca ulu'sölë' rë'u.  
 4 Rurúaj bö' yu'ë nu bönni', ate' ruhuóáquië' yu.  
 La' dza ná'asö riniti le rizá' láchxë'ë gunë'.  
 5 Bica' ba bönni' rácalenë' Dios queë' Jacob lë',  
 bönni' na' runë' löza Xanru' Dios.

6 Nunë' Xanru' Dios lúzxiba, en luyú ni,  
 enca' nísado', en yúgu'të le nacuá' yugu' lataj na'.  
 Rúntica'së' Lë' ca rna didza' bë'ë,  
 7 en ruchi'a rusöröë' nupa zoa nu rusaca' zi' léguequi.

Rugagu cazë' nupa ta'dún.

Rusanë' Xanru' Dios nupa nadzúngaca.

<sup>8</sup> Rusaljë' Xanru' Dios guiøj lógaca nupa nácagaca lo chul-la.

Ruchisë' Xanru' Dios nupa nadzõ'ögaca.

Nadxí'inë' Xanru' Dios nupa nácagaca tsahui'.

<sup>9</sup> Rapa chi'ë Xanru' Dios yugu' bönni' zi'tu'.

Rácalenë'-bi' yugu' bi'i uzëbi, enca' yugu' nigula uzëbi,

pero ruzaguë' xinözguequi nupa tuá' dö'.

<sup>10</sup> Inná bé'tica'së' Xanru' Dios.

Náquië' Dios queëli', bönachi Sión.

¡Guli'cu'ë yöl-la' ba Xanru'!

## 147

<sup>1</sup> ¡Guli'cu'ë yöl-la' ba Xanru'!

¡Tsahui' naca gúl-laru' yöl-la' ba queë' Dios queëru'!

¡Naca lachi, en le ral-la' gunru', cú'uru'-në' yöl-la' ba!

<sup>2</sup> Runë' Xanru' Dios ga rixón yödzo Jerusalén.

Rutubë' bönni' Israel násilasigaquië'.

<sup>3</sup> Ruúnë' bönni' nácagaquië' yechi' ladxi',

en rudë'ë lari' ga dxíagaquië' huë'.

<sup>4</sup> Rulabë' tsca nacua' böljaj lúzhiba.

Nucu'ë lágacaba' tu tuba' yúgu'të böljaj na'.

<sup>5</sup> Nayëpisëtëre' Xanru' Dios, en nál-latëre'.

Ga rë'ë dzu réajni'inë' yúgu'të.

<sup>6</sup> Xanru' Dios rácalenë' nupa ta'gui'i ta'zaca'.

Ruzötjë' nupa tuá' dö' lu yu.

<sup>7</sup> ¡Guli'gul-la queë' Xanru' Dios, guiëli'-në': "Xclenu"!

¡Guli'gul-la yöl-la' ba queë' Xanru', quínnili' lë'egaca bihuël-lado'!

<sup>8</sup> Riguísië' yugu' böaj lúzhiba,

en risöl-lë'ë nisa guiøj luyú.

Runë' ga rilén yö yugu' lu guí'ado'.

<sup>9</sup> Rugahuë' yugu' böa' guíxi'do',

enca' bóiquiajdo' ta'bõdxi'aba'.

<sup>10</sup> Biti' raza lãdxë'ë yöl-la' nál-la queëba' böa',

en biti' ruzi'ë xibé yöl-la' nál-la queë' bönni'.

<sup>11</sup> Raza lãdxë'ë Xanru' Dios nupa tadxi Lë',

nupa na' tun löza yöl-la' dxi'i ladxi' queë'.

<sup>12</sup> ¡Guli'cu'ë yöl-la' ba Xanru', libí'ili' zóali' Jerusalén!

¡Guli'cu'ë yöl-la' ba Dios queëli', libí'ili' zóali' Sión!

<sup>13</sup> Bucu'ë tsutsu le tu'baga' gapa nu riyaza yödzo queëli',

en runë' ga raca dxi'a quégaca xzí'inili' ga na' zóali'.

<sup>14</sup> Runë' ga ribözali' dxi'a tsáhui'do',

en runë' ga ruhuölaj ridzé'eli' xzoa' xtila dxí'atëro.

<sup>15</sup> Rinná bé'enë' yödzülió ni,

ate' xtídzë'ë ridóditë gáti'tës.

16 Risöl-lë'ë guiöj bögui' ca zxila',  
en riguísië' buzén ca dö.

17 Riguísië' bögui' ca yugu' guiöj ruaj.

¿Nuzxi caz gaca guá' ilén le naca ziaga queë'?

18 Risöl-lë'ë xtídzë'ë, ate' ruúna' bögui' na'.

Runë' ga recja bö', ate' ruhuóáca nisa.

19 Ru'ilenë' xzí'ini xí'sóë' Jacob didza',  
en riguíxjë' xibá queë' para ilún bönachi Israel ca rnna.

20 Biti' benë' caní ni'a quégaca bönachi ia'tú yödzö izá'a,  
ate' biti' nözigaca ca nácagaca le gunná bë'ë.

¡Guli'cu'ë yöl-la' ba Xanru'!

## 148

1 ¡Guli'cu'ë yöl-la' ba Xanru'!

¡Guli'cu'ë yöl-la' ba, libí'ili' zóali' yehua' yubá!

¡Guli'cu'ë yöl-la' ba, libí'ili' zóali' xitsá'aló!

2 ¡Guli'cu'ë yöl-la' ba, libí'ili' gubáz lá'ayi queë'!

¡Guli'cu'ë yöl-la' ba, libí'ili' tscali' dá'ali' Lë'!

3 ¡Guli'cu'ë yöl-la' ba, libí'ili' gubidza, en beo'!

¡Guli'cu'ë yöl-la' ba, libí'ili' bôlaj bení'!

4 ¡Guli'cu'ë yöl-la' ba, libí'ili' zóali' zxon lúzxiba!

¡Guli'cu'ë yöl-la' ba, libí'ili' nisa, zxóali' láhuiló lúzxiba!

5 ¡Guli'cu'ë yöl-la' ba La la'ayi queë' Xanru', yúgu'tëli',  
tu' bë'ësë' didza', en canísö benë' libí'ili'!

6 Naguixjë' tsaz libí'ili'.

Naguixjë' xtídzë'ë le catu caz tódi que.

7 ¡Guli'cu'ë yöl-la' ba Xanru' idútë yödzölió,

en libí'ili' böa' ridali' lu nísado', en nísado' caz,

8 en libí'ili' guí', en guiöj bögui' yöla sunna, bögui', en böaj,

enca' lí, bö' budunu', runu' ca rnna xtídzë'ë,

9 en libí'ili' yugu' guí'a, en yúgu'të guí'ado',

en libí'ili' yaga dxíagaca le ta'bía, en yugu' yaga dxi'a,

10 en libí'ili' böa' guixi', en böa' bëdxi,

böa' tá'ayöj lë'ëba' lu yu, en böa' zoa xíligacaba',

11 enca' libí'ili' rinná bë'ëli' yödzölió, en bönachi yugu' yödzö izá'a,

yugu' xzí'inigaquië' bönni' ta'nná bë'ë, en bönni' ruchi'a rusöröli' yödzölió,

12 enca' libí'ili' bi'i bönni', en bi'i nigúlado',

yugu' bönni' zxon, en yugu' bí'ido'!

13 ¡Guli'cu'ë yöl-la' ba La la'ayi queë' Xanru'

tu' nayépisëtëro tuzë' Lë'!

¡Nayépisëtëro yöl-la' ba queë' ca luyú ni, en ca lúzxiba xitsá'!

14 Nuchisë' tu le nuzóa tsutsu bönachi queë',

le naca yöl-la' ba ta'gú'u Lë' nupa néquiguequi queë',

yugu' xzí'ini xí'sóë' Israel, nupa na' nadxí'inë'.

¡Guli'cu'ë yöl-la' ba Xanru'!



**149**

1 ¡Guli'cu'ë yöl-la' ba Xanru!  
 ¡Guli'gul-la queë' Xanru' Dios tu le cubi,  
 en guli'gul-la yöl-la' ba queë' ga nudúbigaca nupa néquiguequi quez queë'!

2 Ral-la' ulu'zí' xibë' Xanru' Dios bönachi Israel,  
 tu' náquië' Nu ben léguequi.

Ral-la' ulu'dzéjalen Dios nupa nacua' Siön,  
 tu' náquië' Nu rinná be'e léguequi.

3 Ral-la' ila'gú'u yöl-la' ba La la'ayi queë',  
 en lu yöl-la' rudzeja ulu'yá'a lahuë'.

Ral-la' ilúl-la yöl-la' ba queë', ila'capa' lë'e guídi,  
 en ila'quínni lé'egaca bihuél-lado',

4 tu' raza ládxë'ë Xanru' Dios bönachi queë'.  
 Uchisë' nupa ta'gu'i ta'zaca', en usölë' léguequi.

5 Nupa néquiguequi quez queë' ral-la' ulu'dzeja ládxi'gaca lu bení' queë'.  
 Lu yöl-la' rudzeja quéguequi ral-la' ilúl-la queë' cate' ni' dëgaca lu le  
 rati'gaca.

6 Yöl-la' ba queë' Xanru' Dios ral-la' sóatica'sö ru'igüequi,  
 en tu guié tuchi' natuchi' iropa la'a lu ná'agaca,

7 para ulu'zí' lëbi bönachi yugu' yödzö izá'a,  
 en ilún xigua' bönachi izá'a na',

8 para ilúguë'ë bregui' guié ná'agaquië' bönni' ta'ná bé'enë' bönachi yödzö  
 izá'a na',

en ulu'cu'ë bregui' guié yen ná'agaquië' bönni' lo quégaquië',

9 para ilunë' quéguequi ca nachuguë' Dios gaca quéguequi.  
 Naca lë ni le run bal nupa néquiguequi quez queë' Dios.

¡Guli'cu'ë yöl-la' ba Xanru'!

**150**

1 ¡Guli'cu'ë yöl-la' ba Xanru'!

¡Guli'cu'ë yöl-la' ba Dios lu lataj lá'ayi queë'!

¡Guli'cu'ë yöl-la' ba ga dëda' lataj queë'!

2 ¡Guli'cu'ë yöl-la' ba ca nácagaca le zxön nunë'!

¡Guli'cu'ë yöl-la' ba ca naca yöl-la' zxön queë'!

3 ¡Guli'cu'ë yöl-la' ba, ucódxili' lúzucacaba' chivo!

¡Guli'cu'ë yöl-la' ba, quínili' lé'egaca bihuél-la ca'!

4 ¡Guli'cu'ë yöl-la' ba, cápa'li' lë'e guídi, en uya'ali'!

¡Guli'cu'ë yöl-la' ba, quínili' lé'egaca bihuél-la, en ucódxili' gui!

5 ¡Guli'cu'ë yöl-la' ba, utíl-lali' guié lë'e luzë'e!

¡Guli'cu'ë yöl-la' ba, utíl-lali' guié zxön lë'e luzë'e!

6 ¡Guli'cu'ë yöl-la' ba Xanru', tscali' rizi'ili' bö'!

¡Guli'cu'ë yöl-la' ba Xanru'!